


Tuhun saá ña najándacoo Jesucristo nu yo:

El Nuevo Testamento en el mixteco de

Silacayoapan



New Testament in Mixtec, Silacayoapan (MX:mks:Mixtec,  
Silacayoapan)

**Tuhun saá ña najánda<sup>oo</sup> Jesucristo nu yo: El  
 Nuevo Testamento en el mixteco de  
 Silacayoapan  
 New Testament in Mixtec, Silacayoapan  
 (MX:mks:Mixtec, Silacayoapan)**

copyright © 2009 Wycliffe Bible Translators, Inc.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Mixtec, Silacayoapan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

7f2d3ecf-6d15-55a5-9081-6e970474df2f

## Contents

San Mateo . . . . .	1
San Marcos . . . . .	88
San Lucas . . . . .	139
San Juan . . . . .	235
Hechos . . . . .	303
Romanos . . . . .	390
1 Corintios . . . . .	425
2 Corintios . . . . .	461
Gálatas . . . . .	483
Efesios . . . . .	496
Filipenses . . . . .	508
Colosenses . . . . .	516
1 Tesalonicenses . . . . .	524
2 Tesalonicenses . . . . .	531
1 Timoteo . . . . .	535
2 Timoteo . . . . .	545
Tito . . . . .	552
Filemón . . . . .	556
Hebreos . . . . .	558
Santiago . . . . .	584
1 Pedro . . . . .	593
2 Pedro . . . . .	603
1 Juan . . . . .	609
2 Juan . . . . .	618
3 Juan . . . . .	620
San Judas . . . . .	622
Apocalipsis . . . . .	625

# Tuhun vaha nacaḥyí Mateo sahá ña nacaja Jesucristo

*Chichi naquixi Jesucristo  
(Lc. 3:23-38)*

1 Ña yóho cúu quiví na nasacuu tásáhnú jícó Jesucristo, mé a naquixi chichi David xihín chichi Abraham:

2 Abraham nasacuu tátá Isaac ta Isaac nasacuu tátá Jacob ta Jacob nasacuu tátá Judá xihín java ga ñani da.

3 Judá nasacuu tátá Fares xihín Zara ta náná ndiví da yóho nasananí ña Tamar. Ta Fares nasacuu tátá Esrom ta Esrom nasacuu tátá Aram.

4 Ta Aram nasacuu tátá Aminadab ta Aminadab nasacuu tátá Naasón ta Naasón nasacuu tátá Salmón.

5 Ta Salmón nasacuu tátá Booz, da cúu jahyí ña naní Rahab. Booz nasacuu tátá Obed ta Obed yóho nasacuu da jahyí ña naní Rut cán. Ta mé Obed yóho nasacuu tátá Isaí. 6 Ta Isaí nasacuu tátá rey David ta rey David yóho nasacuu tátá Salomón, da cúu jahyí ña nasacuu ñajihí Urías nu cuití cán.

7 Ta Salomón nasacuu tátá Roboam ta Roboam nasacuu tátá Abías ta Abías yóho nasacuu tátá Asa. 8 Ta Asa nasacuu tátá Josafat ta Josafat nasacuu tátá Joram ta Joram nasacuu tátá Uzías.

9 Ta Uzías nasacuu tátá Jotam

ta Jotam nasacuu tátá Acáz ta Acáz nasacuu tátá Ezequías. 10 Ta Ezequías nasacuu tátá Manasés ta Manasés nasacuu tátá Amón ta Amón nasacuu tátá Josías. 11 Ta Josías nasacuu tátá Jeconías xihín java ga ñani da. Ta nasacuu da tiempo tá ñatiin soldado na Israel já nasandaca ñahá da na cán ñuu Babilonia.

12 Ta tá nasanduu na Israel ñuu Babilonia cán já nacacu Salatiel ta tátá Salatiel nasacuu Jeconías. Ta Salatiel nasacuu tátá Zorobabel. 13 Ta Zorobabel nasacuu tátá Abiud ta Abiud nasacuu tátá Eliaquim ta Eliaquim nasacuu tátá Azor.

14 Ta Azor nasacuu tátá Sadoc ta Sadoc nasacuu tátá Aquim ta Aquim nasacuu tátá Eliud.

15 Ta Eliud nasacuu tátá Eleazar ta Eleazar nasacuu tátá Matán ta Matán nasacuu tátá Jacob.

16 Ta Jacob nasacuu tátá José, da nasacuu yí María. Ta María cúu ña nasacuu náná Jesucristo, mé a nachindahá Ndióxi cacomí a cuéntá sahá ñayiví.

17 Ña cán quea janda tá nacasahá cácu jahyí Abraham janda quiahva naxinu coo a quiví nacasahá cácu jahyí David já nayaha uxu comi generación. Ta tá quiahva nacasahá cácu jahyí David janda quiahva ñatiin na Babilonia na Israel já ñéhe ñahá na cuahan na nayaha inga uxu comi generación. Ta nayaha inga uxu comi generación nani nasanduu

na Israel ñuu Babilonia janda quiahva ñaxinu coo quivi ñacacu Jesús, mé a ñachindahá Ndióxi cacomí a cuénta sahá ñayivi.

*Tá ñacacu Jesús  
(Lc. 2:1-7)*

18 Joho ñasahjin tá ñacacu Jesucristo: Mé María, ñá cacuu náná Jesús cán sa ñasahan ñá tuhun ñá ña tandaha ñá xihin José. Joo tá cámaní coo da xihin ñá já ñacandaá ini da ña ñúhu jahyi ñá. Ta ña yóho ñasacuu a ña ñacaja ínimá yii Ndióxi. 19 Ta José, da cacuu yii María cán cúu dá da cája ndinuhu ña ndaa. Ta ñacahán da ña ñasahjin ñá xihin inga dataa joo coo ñaxeen da cahan núu da saha ñá nuú ñayivi. Sahá ña cán quea ñasacu ini da jándacoo jehé da ña. 20 Ta nani cáhvi ini da sahá ña caja da anda jávi ñaquixi in sani nu dá ta ñandaça náha in táto Ndióxi nu dá. Ta tañu mé sani cán ñacahan xihin dá. Já ñacachi a já:

—José, da ñaquixi chichi David, a cáyhvi tohún tandahún xihin María jan jáchi ñacaja ínimá yii Ndióxi ña ñúhu jahyi ñá. 21 Ta tá sa ñacacu jahyi María já chicaan ndó quivi á ná cananí a Jesús jáchi jácacu a ñayivi nuú cuachi tá ná candeé ini na mé á —ñacachi a.

22 Tóco ndihi ña yóho ñayaha ña ná xinu coo nuú tuhun Ndióxi ña ñacahyi in profeta sanahá ndivaha cán ta já ñacachi da cán já:

23 Vaxi quivi cañuhu jahyi in ñá tacú, ñá a ñáha coo ta xihin.

Ta tá sa ñacacu jahyi ñá cán já cacu na quivi á cananí a Emanuel.

Ta tuhun yóho cúni cachi a: in Ndióxi xoho.

24 Ta tá ñandicaxi ini José já ñacaja da tá in ñacachi táto Ndióxi cán xihin dá. Ta já ñatandaha dá xihin María. 25 Joo coo ñasahjin da xihin ña tá quiahva in in dataa xihin ñájihí da janda quiahva cacu jahyi María. Ta tá ñacacu a cán já ñasacu José quivi á cananí a Jesús.

## 2

*Tá ñaxito nihni na ndichí Jesús*

1 Ta ñacacu Jesús in ñuu naní Belén ña ndacaan estado Judea. Ta mé tiempo cán ñasacomí rey Herodes cuénta sahá nación Israel. Ta mé tañu já ñaxinu coo java na ndichí ñuu Jerusalén. Mé na ndichí yóho cúu ná na jácuaha xihin quimi ta ñaquixi na chí nu cána candii. 2 Ta tá ñaxinu coo na ñuu Jerusalén já ñandaça tuhún na ñayivi já ñacachi na já:

—Ndájá in da loho ñacacu viti jan, da cacuu rey nuú na Israel. Jáchi ñaxini nde ñaqueta quimi nuú nde ta xihin rí yóho sa ñacandaá ini nde ña sa ñacacu da. Ta viti vaxi nde yóho caja cáhnu nde da —ñacachi na ndichí cán ndaca tuhún na.

3 Ta tá ñaxini johu rey Herodes ña yóho já ñacasahá

da ndíhi ndivaha ini da ta quiahva já nacasáhá ndíhi ini tóco ndíhi ñayivi ñuu Jerusalén cán. <sup>4</sup> Sahá ña cán quéa nacana rey Herodes cán tóco ndíhi na sacuaña nuú jutu xihín na jánaha ley Moisés cán. Ta já nandaca tuhún da na saha ndá ñuu cúu nu cáchí tuhun Ndióxi cacu da nasahan Ndióxi tuhun a chindahá a cacomí a cuéntá sahá ñayivi. <sup>5</sup> Já nacachi na cán já xihín dá:

—Ñuu Belén, ña ndácaan estado Judea cán cúu nuú cáchí tuhun Ndióxi cacu da jáchi quiahva já nacyhyí in profeta sanahá tá nacachi da já:

<sup>6</sup> Vati ñuu Belén, ña ndácaan estado Judea,

cúu á in ñuu loho ndivaha tañu ñuu náhnu cán joo ín sahá a,

jáchi tañu ñayivi ñuu cán ndindita in da cacomí cuéntá sahá na Israel, na cúu cuéntá Ndióxi, já nacyhyí in profeta sanahá.

<sup>7</sup> Tá nandíhi já nacana xóo rey Herodes na ndíchí cán ta já nandaca tuhún da na cán saha ndá quivi nanaha quimi cán mé rí nu ná. <sup>8</sup> Anda já nachindahá da na ñuu Belén. Já nacachi da já xihín ná:

—Cuáhán ndo ñuu Belén cán ta ndaca tuhún vaha ndó ndaja cáa sahá ta loho nacacu jan. Ta tá sa nandíhehe ndó a já quixi ndó caxi tuhun ndó xihín i já ná cahun ri yehe va caja cáhnu i ña —nacachi Herodes xihín na.

<sup>9</sup> Ta xihín ña yóho naquee na ndíchí cuahan tucu na. Ta quimi, rí naxini na nu cuítí cán já ndáca tucu rí na cuahan na. Ta tá naxinu rí chí nuú ín mé a loho cán anda já nasacandichi rí. <sup>10</sup> Ta cájii ndivaha ini na tá xini na mé quimi cán. <sup>11</sup> Tá nandíhi já naquihvi na ini vehe já naxini na mé a loho cán xihín María, náná a. Ta já nacaxítí na nu á ta já nacaja cáhnu na ña. Ta tá nandíhi já nasuná na yuhú sató ñéhe na ta já najoco na jiuahun cuáan nuú a xihín jusa vaha xihín in ña támi sahan naní mirra nu mé a loho cán. <sup>12</sup> Tá nandíhi já naquixi in sani nu ná ta xihín mé sani cán nacachi Ndióxi xihín ná ña ná a ndíco coo na chí nu ín rey Herodes. Sahá ña cán quéa nandijama na íchi cuánúhu ná ñuu na.

*Tá ñéhe na Jesús cuahan na Egipto*

<sup>13</sup> Ta tá sa naquee na ndíchí cán cuahan na já naquixi in sani nuú José ta nandaca náha in tátó Ndióxi nu dá. Já cáchí a já xihín dá:

—Cuándacoún ndiquehe ña loho jan xihín María, náná a ta cunún cahun xihín ná chí ñundáhyi nacióo Egipto. Ta cán coún xihín ná janda quiahva ná caxi tuhun i xuhun. Jáchi caca nuu Herodes ndinducú da ña loho jan ña cahní ñahá da —nacachi tátó Ndióxi cán xihín José.

<sup>14</sup> Anda já nandaco José já naquee da Jesús xihín María, náná a já naqueta

ñuú na cuahān na chí Egipto. <sup>15</sup> Ta cán nasanduu na janda quiahva naxihí Herodes. Tóco ndihi ña yóho nayaha já ná xinu coo nuú tuhun nacachi Ndióxi sanahá tá nacahyí in profeta já: “Nasahiin jahyi i nación Egipto ta nacana i da ná ndicó coo da”, cáchí tuhun Ndióxi.

*Tá nasahnda Herodes chuun ña ná cahní na na valí*

<sup>16</sup> Ta ndaja coo naxini Herodes cán ña najándahvi na ndichí cán da sahá ña coo naxinu ga na nu dá. Ña cán quéa a juú quiahva naxojo ini da. Ta chí nasahnda da chuun ña ná cahní ndihi na ta valí, na ivi cuiā chí ninu, mé na ndúu ñuu Belén xihín ñuu válí catáhan xihín á. Jáchi sa nacaxi tuhun na ndichí cán xihín dá ña naxini na mé quimi anda tátuhun ivi cuiā. <sup>17</sup> Ta tá nandihí naxihí na valí yóho já naxinu coo nuú tuhun nacahyí profeta Jeremías sanahá ndivaha tá nacahyí da já:

<sup>18</sup> Ñuu Ramá jandá johó ndáhvi tácu cáyuhú cóhó ñáñaha sácu ñá.

Ta ñá sácu yóho cúu ña Raquel. Sácu ñá sahá jahyi ñá.

Ta coo cúní ña ndico ini ña jáchi naxihí jahyi ñá, cáchí tuhun Ndióxi.

<sup>19</sup> Joo tá sa naxihí Herodes já naquixi tucu sani nuú José nu ím da nación Egipto cán. Ta nandaca náha in táto Ndióxi nu dá já cáchí a já xihín dá:

<sup>20</sup> —Cuándacoún ta ndiquehe Jesús xihín María, náná a ta cuahán ndicó coo xihín ná chí ñundáhyi Israel. Jáchi sa naxihí va na nducú cahní ña loho jan —cáchí táto Ndióxi.

<sup>21</sup> Anda já nandicoo José ta ñéhe da Jesús xihín María, náná a cuahān na ndicó coo na chí ñundáhyi Israel.

<sup>22</sup> Joo tá ñañehe da tuhun ña nandicojo Arquelao chuun cacuu da rey nu Herodes, tátá da já nayihví José cuhun da chí estado Judea. Ta sahá ña sa nacaxi tuhun táto Ndióxi tañu sani nu dá sahá ña cán quéa nandijama da íchi ta cuahān da chí estado Galilea.

<sup>23</sup> Ta naxinu coo na in ñuu naní Nazaret nuú nasanduu na. Ta xihín ña yóho naxinu coo nuú tuhun nacahyí na profeta sanahá ña cacuu Jesús da ñuu Nazaret.

### 3

*Tá nacasáhá Juan, da jácandúta ñayivi cáhan ndojó da yucú íchí cán*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Mé tiempo cán Juan, da jácandúta ñayivi naxinu da yucú íchí cuéntá estado Judea cán. Ta nacasáhá jánaha da ñayivi. <sup>2</sup> Já cáchí da já xihín ná:

—Xíní ñuhú jándacoo ndó ña núu cája ndó ta ndicó coo ini ndó nu Ndióxi jáchi sa nacayati quivi cacomí Ndióxi cuéntá sahá ñayivi —cáchí da xihín ná.

<sup>3</sup> Mé Juan yóho cúú dá da ñaçahan profeta Isaías saha tá ñaçahyí da já:

Vaxi quivi tá cahan cóhó in da tañu yucú íchí ta cachi da já xihín ñayivi:

“Caja tiahva ndó íchí nuú quixi xitoho í,

ta cuná ndó in íchí ndacú nu mé á ña ná ndihvi a ínimá ndó”, cáchí tuhun Ndióxi.

<sup>4</sup> Ta jáhma ñasandixi Juan yóho ñasacuu a ña ñacavaha na xihín íji camello ta ñasandico in nií jáhndá tóco da. Ta ñaxixi da tica xihín ñuñu yucú.

<sup>5</sup> Ta ñaqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán ñasaa na nu Juan taa johó na nu cahan da.

<sup>6</sup> Ta tá ñañahma na cuachi na nu Ndióxi já najácandúta Juan na ini yuta Jordán.

<sup>7</sup> Joo tá ñaxini Juan ña janda johó xínu coo cuahá na fariseo xihín na saduceo nu dá ña ná jácandúta da na já ñacasáhá xójo ndivaha ini da ta já ñacachi da já xihín ná:

—Mé ndó cúú ndó tátuhun coo jáchi cúú ndó na quini. Cahan ndo ña a jándoho ga Ndióxi ini ndó sahá cuachi ndó tá ná candúta ndo vatí cája tá cája ndó cuachi. <sup>8</sup> Xíni ñúhú caja ndó ña vaha já ná cuni ñayivi ña mé a ndaa táhyí najándicoo ndó ña núu ñasacaja ndó jihna. <sup>9</sup> Ta a cahan ndo ña jácacu Ndióxi ndohó sahá ña cúú ndó na ñaquixi chichi Abraham. Jáchi coo saha toho ña jan

nu Ndióxi tá co jándacoo ndó cuachi ndó. Jáchi mé a ndaa ná cahan i xihín ndó ña janda yuu ndúu nu ñúhu jan cuo caja Ndióxi ña ná nduu a ñayivi quixi chichi Abraham.

<sup>10</sup> Mé ndó cúú ndó tátuhun in yíto, dó sa ñatiin na hacha cuahan na cahnda na. Ta tóco ndihi yíto, dó co sahan cuíhi vaha nuu, tahnda do ta quee dó nu ñúhu cayi do.

Quiahva já caja ri Ndióxi xihín ndó tá co cúni ndó ndicó coo ini ndó nu mé á. <sup>11</sup> Mé a ndaa cája ndúta i ndohó xihín ticuú ta xihín ña yóho náha ña ñandicó coo ini ndó nu Ndióxi. Joo vaxi inga da ta da cán cúú da jándicutú ínimá ndo xihín ínimá yii Ndióxi ta ña cán cacuu a tátuhun ñúhu cayi. Ta da cán íin cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa da. <sup>12</sup> Mé da vaxi cán caxi da ñayivi vaha tañu ñayivi quini. Cúú á tátuhun in dataa tá jáxixi da trigo xihín pala já ná quee xehe á já cacu vaha da ña. Ta xehe ñacana cán cuhun a cayi a xihín ñúhu ita ña a ndáhva toho —cáchi Juan xihín na cán.

### *Tá ñacandúta Jesús*

*(Mr. 1:9-11; Lc. 3:21-22)*

<sup>13</sup> Naquee Jesús chí estado Galilea cuahan yuta Jordán nu ndacaan Juan jácandúta dá ñayivi ña ná jácandúta da mé á. <sup>14</sup> Joo nu cuítí coo ñaxeen toho Juan jácandúta dá Jesús. Ña cán quea ñacachi da já xihín Jesús:



—Yóhó cúú da ndítahan jácandúta yehe. Ta cáa johó vasún yóho ña ná jácandúta i johó —ñacachi Juan cán xihín Jesús.

<sup>15</sup> Já nanducú nehe Jesús tuhun nu dá já ñacachi a já xihín dá:

—Candehé. Quiahva já ndítahan coo ña yóho viti jáchi ndítahan nu yo jáxinu coo i tóco ndihi ña ndaa ña nasacu ini Ndióxi coo —ñacachi a.

Xihín ña yóho ñacandúsa Juan ta chí najácandúta dá Jesús.

<sup>16</sup> Ta tá nandihí ñacandúta Jesús já ñaqueta ini ticuñi cán. Anda já nanuna indivi ta naxini Jesús nanuu ínima yii Ndióxi jatá ta nasacaá tá quiahva cáa in ndijata. <sup>17</sup> Tá nandihí já naxini johó a cáhan in a indivi ta já cáchi a cán já:

—Yóhó cúún jahyi maní i ta cájii ndivaha ini i xuhun —ñacachi a.

## 4

*Xíto ndojó tiñáhá sacuaḥa Jesús*

(Mr. 1:12-13; Lc. 4:1-13)

<sup>1</sup> Tá nandihí já ndáca ínima yii Ndióxi Jesús cuahan chí yucú íchí nuú co ndúu ñayivi já ná coto ndojó tiñáhá sacuaḥa mé á.

<sup>2</sup> Ta cán nasahjin a tixi ivi jícó quivi. Nuú ta ndivi coo naxixi a ta tá nandihí já naxinu joco nu á. <sup>3</sup> Já ñacayati tiñáhá sacuaḥa nuú Jesús ña coto ndojó ñahá ri já ñacachi rí já xihín á:

—Tá ta jivi ndusa jahyi Ndióxi cúún cahnda chuun

ña ná nduu yuu yóho pan —ñacachi rí cán xihín Jesús.

<sup>4</sup> Anda já ñacachi Jesús já xihín rí:

—Já cáchi tuhun Ndióxi: “A juú pan cuití cuxu ñayivi já catacu na, vaha. Xíní ñúhú ri a caja na ña sáhdá tuhun Ndióxi nu ná já quea cuu catacu na nu Ndióxi” —ñacachi Jesús xihín rí.

<sup>5</sup> Tá nandihí já ndáca tiñáhá sacuaḥa cán Jesús cuahan xihín rí ñuu Jerusalén, ña yii cán ta já najándaá rí a nu jícó jini veñuhu cáhnu ndacaan cán. <sup>6</sup> Ta já ñacachi rí já xihín á:

—Tá ta jivi ndusa jahyi Ndióxi cúún jácana mún chí ninu jáchi já cáchi tuhun Ndióxi:

Cahnda Ndióxi chuun nu tátó mé á ña ná candaa na yohó.

Ta ndinehe ndáha na yohó, já quea ná a ndícuehe sahun tá ná cachihin sahun xihín yuu, já cáchi tuhun Ndióxi —ñacachi rí xihín Jesús.

<sup>7</sup> Ta já nanducú nehe Jesús tuhun nu rí já ñacachi a já xihín rí:

—Cáchi tucu tuhun Ndióxi já: “A coto ndojó tohún Ndióxi, xitohún” —ñacachi Jesús xihín ri.

<sup>8</sup> Ta tá nandihí já ndáca tucu tiñáhá sacuaḥa cán Jesús nasahan xihín rí in jini yucu jícó ndivaha. Ta já nanaha rí ndaja táhan ñuu ndúu ñuyivi nu á ta najánaḥa rí tóco ndihi ña náhnu ndúu cán nu á. <sup>9</sup> Ta

já nacachi tucu rí já xihín Jesús:

—Tóco ndihi ña yóho quiahva i nuun tá ná caxítún nuú i caja cáhnún yehe — nacachi rí quini cán xihín Jesús.

<sup>10</sup> Anda já nacachi Jesús já xihín rí:

—Satanás, cuáhán caxoo jáchi já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuun” —nacachi Jesús xihín rí cán.

<sup>11</sup> Tá nandihí já nacaxoo tiñáhá sacuahá cán cuahan ri. Ta já naxinu java tátó Ndióxi chindeé na Jesús.

*Tá nacasáhá cáxi tuhun Jesús tuhun Ndióxi nuú na estado Galilea*

(Mr. 1:14-15; Lc. 4:14-15)

<sup>12</sup> Tá nanehé Jesús tuhun ña nachicaan na Juan, da jácandúta ñayivi vecaa já naquee a cán cuahan chí estado Galilea. <sup>13</sup> Joo cóo nacandoo a ñuu Nazaret chí naquee a cuahan coo a chí ñuu Capernaum ña ndácaan yuhú tañuhú, dó ndácaan ñundáhyi cuéntá na naquixi chíchi Zabulón xihín na naquixi chíchi Neftalí.

<sup>14</sup> Tóco ndihi ña yóho nayaha ña ná xinu cóo nuú tuhun nacahyí profeta Isaías sanahá tá nacahyí da já:

<sup>15</sup> Ñayivi ndúu ñundáhyi Zabulón xihín na ndúu ñundáhyi Neftalí, ña ñúhu inga xoo yuta Jordán yati yuhú tañuhú,

ta jári na ndúu Galilea, mé estado nu ndúu ñayivi, na cóo cúu chíchi Israel, <sup>16</sup> mé na cán nasanduu na nuú naá ndivaha ta viti naxini na in ñaha yehe ndivaha.

Jándiyehé á nu ná ña ná a quívi na,

joo catacu na anda ama cáa quívi nu ín Ndióxi, nacahyí Isaías sanahá.

<sup>17</sup> Ta chí mé tiempo já nacasáhá Jesús cáhan ndojó a nuú ñayivi ta já cáchí a já xihín ná:

—Xíni ñúhú jándacoo ndó cuachi cája ndó ta ndicó cóo ini ndó nu Ndióxi jáchi sa nacayati quívi cacomí a cuéntá sahá ñayivi —nacachi Jesús.

*Tá cána Jesús comí da tává tiyacá ña ná caca tuun da xihín á*

(Mr. 1:16-20; Lc. 5:1-11)

<sup>18</sup> Tá xíca Jesús cuahan yuhú tañuhú Galilea, nandinehé a ivi taa, da cúu ñani. In da nani Simón ta cáhan na Pedro xihín dá. Ta da inga cán nani da Andrés. Ndívi da yóho cúu dá da tává tiyacá ta ñúhu na jácana na ñúnu ná ini tañuhú cán. <sup>19</sup> Já nacachi a já xihín ndívi da:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndo ñayivi tañu cuachi —cáchi a.

<sup>20</sup> Ta chí ivi laá najándacoo da ñúnu da ta nandico da Jesús.

<sup>21</sup> Ta nani xíca Jesús cuahan chága chí nuú já naxini a inga

ivi tucu taa, da cúu ñani. In da naní Jacobo ta inga da naní Juan, da cúu jahyi Zebedeo. Ta ndíví mé da yóho ñúhu da ini barco da xihin tátá da ndája vaha da ñúnu dá. Ta nacana Jesús ndíví da yóho. 22 Ta chí ivi laá najándacoo da barco da xihin tátá da ta nacasáhá xíca tuun da xihin Jesús.

*Jána*ha Jesús nuú *cu*ahá ndivaha ñayivi  
(Lc. 6:17-19)

23 Níí cúu estado Galilea naxica nuu Jesús cahan tuhun vaha nuú ñayivi ini veñuhu in in ñuu cán. Cáxi tuhun a nu ná ña sa nandindaa quiví cacomí Ndióxi cuéntá sahá ñayivi ñuyiví. Ta nadaja vaha Jesús na quihví tá nuú cuehe ndóho na. 24 Ta níí cúu ñundáhyi cuéntá Siria nandicuíta nuu tuhun sahá ña cája Jesús. sahá ña cán quéa néhe na na quihví, na ndóho tá nuú cuehe vaxí na nu á ña ná nadaja vaha mé á na ta néhe na na ñúhu ínimá quini ini xínu na nu á ta ndijáá na xíhi yíhi xihin na quihví sahá néhe na vaxí na nuú Jesús. Ta nadaja vaha mé á na.

25 Ta cuahá ndivaha ñayivi ndíco na Jesús. Cúu ná na naquixi estado Galilea xihin na ndúu uxu ñuu cuéntá Decápolis xihin na ñuu Jerusalén xihin na estado Judea xihin na naquixi ñundáhyi chí xoo oriente nu ndácaan yuta Jordán cán.

## 5

*Tá cá*han ndojó Jesús *jin*i *yú*cu

(Lc. 6:20-23)

1 Tá naxini Jesús ña ndíco cuahá ndivaha ñayivi mé á ja nandaa jini yúcu ta ja nasacoo a cán. Ta nacayati na xíca tuun xihin á nu á. 2 Ta ja nacasáhá jana<sup>h</sup>a nu tóco ndihí na ndúu cán ja nacachi a ja xihin ná:

3 —Táhví nacuu ñayivi tá ndícuni na xíní ñúhú na ña chindeé Ndióxi na jachí na cán cúu na cacomí Ndióxi cuéntá sahá.

4 'Táhví nacuu na ndúu cuéha jachí na cán cúu na quia<sup>h</sup>va Ndióxi tuhun ndéé ini.

5 'Táhví nacuu na co ndíñehe jico mé jachí na cán cúu na ñe<sup>h</sup>e táhví ndiquehe na ña nasahan Ndióxi tuhun a quia<sup>h</sup>va nu ná.

6 'Táhví nacuu na xíca ini caja ña cúni Ndióxi. Na cán cúu na caja Ndióxi ña ná xínu nuú ña cúu ini na.

7 'Táhví nacuu na candáhví ini sahá ñayivi jachí na cán cacuu na candáhví ri ini Ndióxi sahá.

8 'Táhví nacuu na co ndácaan quini ínimá jachí na cán cúu na cúni Ndióxi.

9 'Táhví nacuu na ndíhi ini ña ná coo vaha na xihin ñayivi jachí na cán cúu na cachí Ndióxi cúu ná jahyi mé á.

10 'Táhví nacuu na ndóho ini sahá ña cája na ña sahndá Ndióxi nu ná caja na jachí na cán cúu na cacomí Ndióxi cuéntá sahá.

11 'Tahví nacuu ndó tá cánahá ñayivi xihín ndó ta cája xíxi na xihín ndó sahá ña cándeé ini ndó yehe. Ta tahví nacuu ndó tá jácojo na cuachi jíquí jatá ndó sahá ña cándeé ini ndó yehe.

12 'Xíní ñúhú cajii ndivaha ini ndó ta coo vaha ini ndó jáchi ndiquehe ndó in ña vaha ndivaha caja Ndióxi indiví. Xíní ñúhú ndicuhun ini ndó ña quiahva já nacaja xíxi na xihín na profeta, na nasanduu sanahá.

*Cúu yó tátuhun ñúhu  
jándiyehé nuú ñayivi ñuyíví  
(Mr. 9:50; Lc. 14:34-35)*

13 'Mé ndó cúu ndó tátuhun ñijí yívi na. Sá xíní ndó ña cája ñijí ña ná ndihaji ñaha xíxi ndó. Ta quiahva já cája ndó xihín ñayivi ñuyíví. Joo tá ná ndihi ña ohva ñijí cán a cúu ga ndicó coo a cahohva tucu a sahá ña cán queá jandá cuita va íchi cuañi nihni ñayivi ña jáchi coó chuun toho a.

14 'Jári mé ndó cúu ndó tátuhun ñúhu jándiyehé nuú ñayivi ndúu ñuyíví. Ta mé ñúhu cán cúu á tátuhun in ñuu cánúu jatá in yucú jícó ta a cúu toho ndácaan jehé a. 15 Jáchi co chíñúhu ná in lámpara ta tá nu ndíhi já chíjehé na ña tixi in sato. Ña cája na xihín á queá chínúu jícó na ña já ná jándiyehé a nu tócó ndihi na ndúu vehe. 16 Quiahva já xíní ñúhú ndihi ini ndó caja vaha ndó ña ná cacuu ndó tátuhun in ñúhu cáyí nuú ñayivi. Jáchi tá ná cuni na ña vaha cája

ndó já queá cuu caja cáhnu na Ndióxi, tátá yo, ña ín indiví.

*Jána*ha *Jesús* *saha* *ley*  
*Moisés*

17 'A juú cahán ndó ña naquixi i ñuyíví yóho ña cacu xóo i ña nasahnda ley Moisés xihín ña najánaha na profeta, vaha. Co váxi toho i cacu xóo i ña. Váxi i nu ndó jáxinu coo i tócó ndihi ña cáchí mé ley já ná naha i nu ndó ndía cúu ndusa ña. 18 Mé a ndaa ná cahan i xihín ndó ña a ndíhi saha mé ley nani ín indiví xihín ñuyíví yóho. Ni in túhún toho tuhun, a ndíhi saha janda quiahva ná yaha tócó ndihi ña ndítahan yaha. 19 Sahá ña cán queá nda na co cúni caja ña sáhnda ley Moisés vatí cúu á ña loho ndivaha ta ni co cúni na jánaha na ñayivi ña ná caja na ña cáchí a já queá cacuu na in na coó cuaha saha tañu na cacomí Ndióxi cuéntá saha. Joo na cája ña cáchí mé ley ta jánaha na ñayivi ña ná caja na ña, mé na cán cacuu na na cáhnu ndivaha tañu na cacomí Ndióxi cuéntá saha. 20 Mé a ndaa ná cahan i xihín ndo ña tá ná caja cuití va ndó tá quiahva cája na jánaha ley Moisés xihín na fariseo já queá a cuú ndihvi ndó nuú cacomí Ndióxi cuéntá sahá ñayivi.

*Jána*ha *Jesús* *ña* *co* *ndítahan*  
*cojo* *ini* *ñayivi*  
(Lc. 12:57-59)

21 'Mé ndó sá xíní ndo ña nacachi Moisés xihín tásáhnu jícó ndo sanahá tá nacachi da ja: "A cáhni ndó ndii jáchi

ndá nā ná cahní ndji tandaa quiví caja vií jutixia saha ná.”  
 22 Joo yehe cáchí i xihín ndó viti ña ndá nā ná caja cuehe xihín ñani táhan na tandaa quiví caja vií jutixia saha ná. Ta jári nā canahá xihín ñani táhan na, á cáchí nā cúu ná ñayivi tachí já vaxi quiví tá candichi na nu juéxe cáhnu ta cuu cuhun nā indayá sahá.

23 'Sahá ña cán queá tá ta ñéhe ndó in ñaha cuahan ndó joco ndó nu náa Ndióxi ta nani cuahan ndo cán ndicuhun ini ndó ña in in ñani táhan ndó ta co cúní táhan vaha na xihín ndó 24 já queá mé jan yati nu náa ndítahan jándacoo tóo ndó ña ñéhe ndó joco ndó jan. Ta ndítahan quee ndó cuhun ndó ndique táhan máni ndó xihín ñani táhan ndó cán. Ta tá ná ndihi já cuu ndicó coo tucu ndó nu náa Ndióxi joco ndó ña najándacoo ndó jan.

25 'Tá sácú in na saha ndó cuhun ndó vecaa ta cúní na candaca na ndohó cuhun ndó nu juéxe, xíní ñúhú nducú ndó ndá quiahva ndique táhan máni ndó xihín ná nani núná nu ndó caja ndó ña. Já queá ná a ndiquiahva nā cán ndohó ndáha juéxe jáchí cuu ndiquiahva juéxe cán ndohó ndáha nā policia ta chicaan nā ndohó vecaa. 26 Mé a ndaa cáchí i xihín ndó ña cañuhu ndó cán janda quiahva ná chahvi ndó tóco ndihi jjuhún yíca ndo.

*Jánaha Jesús sahá cuachi cája in dataa tá cúní da coo da xihín in ñá co cúu ñájihí da*

27 'Mé ndó sa xíní ndó ña ñasahnda ley Moisés chuun sanahá ta já nacachi a já: “Coto a cóo ndó xihín ñájihí á yí ñani táhan ndó.” 28 Joo yehe cáchí i xihín ndó viti ña ndá da sándehe in ñañaha ta cáhvi núu ini da xihín ñá já queá cómí tá cómí da cuachi nu Ndióxi jáchí cúu á tátuhun sa in da xihín ñá.

29 'Ña cán queá cáchí i xihín ndó ña tá nduchú núu cuáha ndó queá jándacava ndohó nuú cuachi, tavá ndó ña jácana xíca ndó ña ná cuhun a jáchí vaha chága ña ná ndihi sahá in nduchú núu ndó a juú ga ña ná cuhun in ní yiquí cuñu ndó ini indayá. 30 Ta tá ndahá cuáha ndó queá caja ña ná ndacava ndó nuú cuachi, chituhun ndó ña ta jácana xíca ndó ña ná cuhun a jáchí vaha chága ná ndihi saha ndáha ndo a juú ga ña ná cuhun ní yiquí cuñu ndó ini indayá.

*Jánaha Jesús ña co ndítahan nuú dataa jándacoo da ñájihí da (Mt. 19:9; Mr. 10:11-12; Lc. 16:18)*

31 'Ta mé ndó sa xíní ndó ña ñasahnda ley Moisés chuun sanahá já cáchí a já: “Ndá da cúní jándacoo ñájihí da ndítahan cavaha da in tutu quiahva da nu ña ta sa in vaha va cuu jándacoo da ña.”

32 Joo yehe cáchí i xihín ndo viti ña ni in túhún toho ta co ndítahan jándacoo da ñájihí da. Jáchí ndá da jándacoo ñájihí da cája da ña ná caja ñá cuachi tá ná tandaha tucu ñá. Jári da tandaha xihín ñá cómí ri da cuachi nu Ndióxi. Joo tá ná

candaa ini da ña íin ñájíhí da xihín inga dataa já quéa cuu ndusa jándacoo da ña.

*Jánaḡa Jesús ña ndítahan caja na tá sáhan na tuhun na nuú ñayivi*

<sup>33</sup> Mé ndó sa xíni ndó ña ñasahnda ley Moisés chuun sanahá já cáchí a já: “Xíni ñúhú jáxinu coo ndó tóco ndihi ña ñasahan ndó tuhun ndó caja ndó tá tává ndo quívi Ndióxi.” <sup>34</sup> Joo yehe cáchí i xihín ndó viti ña ná quiahva ndó tuhun ndó nuú ñayivi joo a tává ndó quívi ni in ñaha. A tává ndó quívi indiví jáchi indiví cúu nu íin coo Ndióxi. <sup>35</sup> Ta ni a tává ndo quívi ñundáhyi jáchi ñundáhyi cúu nu sáni mé á ta ni a tává ndo quívi ñuu Jerusalén jáchi cúu á ñuu ñacaxi Ndióxi, mé á cúu á rey cáhnu ndivaha. <sup>36</sup> Ta ni a tává ndó quívi yiquí jíni ndó tá sáhan ndó tuhun ndó nuú ñayivi jáchi co ndéé ndó ndaja yaa ndó á ndaja tuún ndó ni in túhún íjí jíni ndo. <sup>37</sup> Tá sáhan ndó tuhun ndó nuú ñayivi xíni ñúhú cachi ndó: “Ajan, caja i ña.” Á tá coo xíni ñúhú cachi ndó: “Uhun, a cuú caja i ña.” Jáchi tá cachi ndó inga tuhun já caja ndó ña cúni ña quini.

*Jánaḡa Jesús ña ndítahan caja cáhnu iní saḡa táhan ñayivi*

(Lc. 6:29-30)

<sup>38</sup> Mé ndó sa xíni ndó ña ñasahnda ley Moisés chuun sanahá já cáchí a já: “Tá quiahva cája ñayivi xuhun quiahva já caja ri yóhó va

xihín ná. Ta tá ná cani in da nduchú núún já quéa ndítahan cani mún nduchú núu da. Tá ná tavá da nuhún já ndítahan nuun tavá ri yóhó va nuhú da”, cáchí ley Moisés. <sup>39</sup> Joo yehe cáchí i xihín ndo viti: A cája ihvi ndó xihín ñayivi, na cája núu xihín ndo. Ta ndá na ná cani in xoo sajóho ndó, cata ñee ndó inga xoo sajóho ndó nu ná ña ná cani na a. <sup>40</sup> Ta tá cúni in na candaca na ndohó cuhun ndó nu juéxe sahá ña cúni na candaa na cotó ndo já quéa quiahva ndó ña nu ná ta janda cotó ndéé ndo quiahva ndó nu ná. <sup>41</sup> Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xíni ñúhú cojo ndó ña anda ivi kilometro cuhun ndo. <sup>42</sup> Ta ndá na ná caca in ñaha nu ndó quiahva ndó ña nu ná. Ta ndá na xíca too ñaha nu ndó, quiahva too ndó ña nu ná.

*Xíni ñúhú quihvi iní na co cúni mí*

(Lc. 6:27-28, 32-36)

<sup>43</sup> Mé ndó sa xíni ndo ña ñasahnda ley Moisés chuun sanahá já cáchí a já: “Quihvi ini ndó na xíni táhan vaha xihín ndó ta candají ndó na co cúni táhan xihín ndo”, cáchí ley Moisés. <sup>44</sup> Joo yehe cáchí i xihín ndo viti: Ndítahan quihvi ini ndó na co cúni táhan xihín ndó. Ta cahan vaha ndó xihín na canahá xihín ndó. Ta caja vaha ndó xihín na cándají ndohó. Ta caca tahví ndó nu Ndióxi sahá na cája xíxi xihín

ndo. <sup>45</sup> Jáchi xihín ña yóho náha ña cúu ndó jahyi Ndióxi, tátá yo, mé á íin indiví. Ta mé á cája ña ná cana candii jatá ñayivi quini xihín jatá ñayivi vaha. Ta mé á jácuun javi jatá ñayivi ndaa xihín jatá na co cája vaha. <sup>46</sup> A cáhán ndo ña cája Ndióxi cuahá ñamaní xihín ndo tá quihvi ini cuití ndó na quihvi ini ndóhó va jáchi janda ñayivi quini, na jataca jjuhún cuéntá impuesto cája na já. <sup>47</sup> Ta a cáhán ndo ña nacaja ndó cuahá ña vaha tá ná cahan Ndióxi cuití ndó xihín ñani táhan ndó jáchi janda ñayivi co xini Ndióxi cája na já. <sup>48</sup> Xini ñuhú cája ndaa ndó xihín tóco ndihi ñayivi tá quiahva cája ndaa Ndióxi, tátá yo, mé a íin indiví —nacachi Jesús.

## 6

*Jánaqa Jesús ña ndítahan chindeé yo na ndahvi*

<sup>1</sup> Já nacachi tucu Jesús já:

—A ndúcú ndó cája vaha ndó nuú ñayivi sahá ña ná cuni táhyí na ña cája ndó já candoo vaha ndó nu ná. Jáchi tá ná cája ndó já coó toho ñaha ñehé táhvi ndó nu Ndióxi, tátá ndo íin indiví. <sup>2</sup> Sahá ña cán queá tá chindeé ndó ñayivi, na ndímaní ñaha nuu, a cáca nuu ndó cahan lándá ndó ña nuú ñayivi tá quiahva cája na co cúu ná tá quiahva ndáa na. Jáchi na cán sahan na ñaha nuú na ndahví ini veñuhu xihín nu táca ñayivi íchi já ná cuu cuni táhyí tóco ndihi ñayivi ña vaha cája na. Jáchi na cán cuni

na ña ná cája cáhnu ñayivi na. Mé a ndaa cáhí i xihín ndó ña sa yahvi na cúu mé ña cája cáhnu ñayivi na. <sup>3</sup> Ña ndítahan cája ndó tá chindeé ndó na ndímaní ñaha nuu queá cája ndó ña ná a cándaa ini ni in ñayivi ña cája ndó <sup>4</sup> ta xini ñuhú cája jehé ndó ña. Ta Ndióxi, tátá ndo sándehe a ña vaha cája ndó xihín ñayivi ta mé á queá चाहvi a sahá ña cája ndó jan.

*Jánaqa Jesús ñayivi ndaja cacá tahvi na nu Ndióxi (Lc. 11:2-4)*

<sup>5</sup> "Tá xica tahvi ndo nu Ndióxi a cája ndó tá quiahva cája na co cúu ná tá quiahva ndáa na jáchi cátoó na candita na veñuhu xihín cáyé ña cacá tahvi na nu Ndióxi ña ná cuni táhyí ñayivi na. Mé a ndaa ná cahan i xihín ndo sa yahvi na cúu mé ña xini ñayivi na. <sup>6</sup> Joo ndóhó, tá xica tahvi ndó nu Ndióxi, tátá ndo íin indiví ndítahan quihvi ndó ini vehe ndó ta chicaji tuun ndó yehé a ta jan cuu cacá tahvi jehé ndo nu Ndióxi. Jáchi jan íin Ndióxi, tátá ndo xihín ndo taa joho a nu cahan ndo ta cája mé á ñamaní xihín ndó.

<sup>7</sup> "Ta tá xica tahvi ndó nu Ndióxi, a cahan tucu tucu ndó mé tuhun ña coó saha jáchi ñayivi, na co xini Ndióxi cán cája na já. Ta cáhán na táa joho Ndióxi na sahá ña cuaha cahan na joo a juú ña ndaa. <sup>8</sup> Joo a cája ndó tá quiahva cája na cán jáchi Ndióxi, tátá ndo sa xini va mé á ndá queá xini ñuhú ndo janda tá

cámani caca ndó ña nu á. <sup>9</sup> Ña yóho quea ndítahan cachi ndó tá xíca tahví ndó nu Ndióxi:

Tátá Ndióxi, ña íin indiví, cáhnu ná cacuu quívi ndó.

<sup>10</sup> Ná tandaa quí quívi cacomí ndó cuéntá sahá nde.

Ta ná coo tá íin cúní mé ndó coo ñuyíví yóho tá quiahva íin indiví cája ndó.

<sup>11</sup> Quiahva ndó nuú nde ña ndímani nuú nde cuxu nde in in quívi.

<sup>12</sup> Caja cáhnu ini ndó sahá cuachi nde tá quiahva cája cáhnu ini mé nde sahá ña núu cája ñayivi xihín nde.

<sup>13</sup> Ta a quiahva ndó ñamani ña ná coto ndojó tiñahá sacuahá ndehe já ná a cája nde cuachi nu ndó.

Jáchí cómí ndó cuéntá saha tóco ndihi ñayivi, ta cúu cája ndó tóco ndihi ñaha,

ta cáhnu cúu mé ndó anda ama cáa quívi.

Já ná coo, quiahva já cachi ndó tá xíca tahví ndó nu Ndióxi.

<sup>14</sup> Jáchí tá cája cáhnu ini ndó sahá ña núu cája inga na xihín ndo já quea caja cáhnu ri ini Ndióxi, tátá ndo, mé a íin indiví sahá ndo. <sup>15</sup> Ta tá co cúní ndo caja cáhnu ini ndó sahá ña núu nacaja inga na xihín ndó já quea a cája cáhnu ini Ndióxi sahá cuachi cája ndó.

*Jánaqa Jesús ndaja ndítahan caja na tá cajuhun na*

<sup>16</sup> Tá cajuhun ndó a cája ndó tá quiahva cája na co cúu

ná tá quiahva ndáa na. Na cán cúní na ña ná cuni táhyí tóco ndihi ñayivi ña xíjuhun na sahá ña cán quea cája cueha nuu na já ná ndiñehe jícó ñahá na. Mé a ndaa cáhí i xihín ndo ña sa yahví na cúu ña xíní ñayivi na.

<sup>17</sup> Joo ndóhó, tá ná cajuhun ndó ndítahan cuchú nuú ndo ta ndaja víi ndó mé ndó.

<sup>18</sup> Já quea ná a cúní ñayivi ña xíjuhun ndó ta in túhún Ndióxi, tátá ndo, mé a íin tuun xihín ndó cándaqa ini ña mé a ndaa xíjuhun ndó ta mé á quea chahvi a sahá ña cája ndó jan.

*Indiví cúu nu ndítahan ndaja tútu ñayivi ña vaha*

(Lc. 12:33-34)

<sup>19</sup> 'A ndúcú ndó játaca cuahá ndivaha ndó ña cuicá canduu nu ndo ñuyíví yóho jáchí yóho cúu nu quíhvi tíquijí ñaha ndó jándihi rí sahá ta já tíví ndihi ñaha ndó. Ta jári cuu quíhvi ña cuíhná caja cuíhná ña. <sup>20</sup> Vaha chága ná játaca ndó ña vaha indiví jáchí cán coo quíhvi toho tíquijí jándihi rí sahá ñaha ndó. Ta mé cán ni in ñaha co tíví ta ni ña cuíhná a cúu ndíhvi caja cuíhná.

<sup>21</sup> Jáchí nuú ndandaja tútu ndo ña ndáyahvi nu ndó, cán coo ri ínimá ndo.

*Nduchú núu yo cúu á tátuhun lámpara ña jándiyehé nu xíca í*

(Lc. 11:34-36)

<sup>22</sup> 'Nduchú núu yo cúu á tátuhun in lámpara jándiyehé nu yó já xíní yo nu xíca í. Ta tá tíví vaha nduchú núu yo já



cuu candehé vaha í nu xíca í. <sup>23</sup> Joo tá cō tívi nduchú núu yó já quéa xíca yó nu naá ndivaha. Ta tá cáhán yō ña cúu yó na xíca nu yéhe ndivaha ta cáa ví yó cája í cuachi já quéa cúu yó tátuhun na xíca nu naá ndivaha.

*In ñaha cúu Ndióxi ta inga ñaha cúu jiuhún*  
(Lc. 16:13)

<sup>24</sup> Ni in túhún ñayivi a cúu caja chúun nuú ivi xitoho na jáchi candají na in xitoho na ta inga xitoho na quihvi ini chága na. Á tá cō ta caja ndívi vaha na chuun nuú in xitoho na ta inga na cán a cája chúun vaha na nuu. Ta quiahva já íin ri xihin ndóhó va jáchi a cúu caja cáhnu ndó Ndióxi tá chínúu ndó ínima ndó jatá jiuhún ndo.

*Ndaá Ndióxi na cúu cuénta mé á*  
(Lc. 12:22-31)

<sup>25</sup> Candehé ndo ña cáhan i xihin ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quivi. Ta ni a ndícani ini ndó saha jáhma candixi ndó. Jáchi tá tácu ndo, ña jan cúu ña cáhnu chága a juú ga ña cuxu ndó. Ta íin chága saha yiquí cuñu ndó a juú ga jáhma ndíxi ndó jan. <sup>26</sup> Candehé ndó laa ndáchí nu táchi jan: rí jan ni cō xútu rí ta ni a vája sáhan rí jáquee rí ta ni cō yáca rí nu táán vaha rí nuní rí. Ta Ndióxi, tátá ndo, mé a íin indivi sáhan ña xíxi rí jan nu rí. Á cō xíni ndó ña íin chága saha mé ndó a

juú ga laa cán. Sahá ña cán quéa quiahva mé á ña xíni ñúhú ndó catacu ndó. <sup>27</sup> Ta cō saha toho ña ndícani nahá ini ndó jáchi a cúu ndaja jíco ndó mé ndó java metro chága sahá ña ndícani ini ndó.

<sup>28</sup> Ta ni cō ndítahan ndícani ini ndó saha jáhma candixi ndó. Candehé ndo ndá quiahva ndató sáhnu itá yúcu. Mé ita jan ni cō cája chúun a ta ni cō cávaha jáhma á. <sup>29</sup> Joo mé a ndaa ná cáhan i xihin ndo ña ñúchí chága ita yóho na caja Ndióxi a juú ga jáhma vaha ndivaha nasandixi rey Salomón sanahá, da nasahiin cuahá ñaha cuicá. <sup>30</sup> Candehé ndó ndaja ndáa vaha Ndióxi yucu ita vatí íin too a viti ta itaan cáyi a jándihi sahá. Ndaja ga ví caja Ndióxi xihin ndóhó ña quiahva mé á tóco ndihi ña xíni ñúhú ndó catacu ndó. Joo mé ndó cō cándúsa ndó ña candaa mé á ndohó. <sup>31</sup> Ña cán quéa a ndícani ini ndó saha ndá ña cuxu ndó á sahá ña coho ndó á sahá ña candixi ndó. <sup>32</sup> Jáchi na cō xíni íchi cuénta Ndióxi, na cán cúu na ndícani cuahá ini saha tóco ndihi ña yóho. Joo cúu ndó cuénta Ndióxi, tátá ndo íin indivi ta xíni vaha mé á ña ndímaní nu ndó catacu ndó. <sup>33</sup> Joo ndítahan nu ndó ndiquiahva ndó mé ndó ndáha Ndióxi ña ná cacomí mé á cuénta saha ndó ta já quiahva mé á ña ndímaní nu ndo catacu ndó. <sup>34</sup> A ndícani ini ndó sahá ña quíxi nu ndó inga quivi itaan jáchi Ndióxi cuití va xíni a ndía vaxi nu ndó quivi itaan ta cō

sahá ndicani ini ndó sahá ña ndoho ndó itaan.

## 7

*Co ndítahan candehé ndaa yó ñayivi*

(Lc. 6:37-38, 41-42)

<sup>1</sup> 'A cándehé ndaa ndó ñayivi já ná a cándehé ndaa Ndióxi ndohó. <sup>2</sup> Jáchi tá quiahva cája ndó xihín inga ñayivi quiahva já caja ri Ndióxi xihín ndohó va. Sahá ña cán queá tá quiahva sándehe ndaa ndó ñayivi quiahva já caja ri Ndióxi xihín mé ndó. <sup>3</sup> Jáchi ndá cuéntá queá sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yito ndúhu cáhnu ini nduchú núu ndo. <sup>4</sup> Ta tá a cuú cuni ndó yitó cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: "Ñani i, ná tavá loho i xehe ndácaan nduchú núu ñan." <sup>5</sup> Jándahvi ndó mé ndó xihín ña cája ndó. Xíni ñúhú tavá ndó yitó cáhnu ndácaan nduchú núu mé ndó ñan já ná nuna nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó.

<sup>6</sup> 'A quiahva ndó ña yii cuéntá Ndióxi nuú ñayivi quini. Jáchi tá cája ndó já cúu á tátuhun tá ná quiahva ndó ñaha yii nuú tina ta tiahva náa ndicó coo rí tiin rí ndohó. Ta jári cúu á tátuhun

tá ná quiahva ndó ñaha yahvi ndivaha tátuhun perla nu cóchi jáchi cuu cuani nihni rí ña.

*Ndaja caja í caca í ñamaní nu Ndióxi*

(Lc. 11:9-13; 6:31)

<sup>7</sup> Ndá ñaha ndímani nu ndó xíni ñúhú caca ndó ña nu Ndióxi ta já quiahva mé á ña nu ndo. Ndinducú ndó ña cuni ndo ta ñehe ndó ña caja Ndióxi. Cúu á tátuhun cati ndáha ndo yéhe ta já nuna yéhe nu ndo. <sup>8</sup> Jáchi na xíca in ñaha, na cán cúu na ñehe va. Ta na ndúcú ñaha, na cán cúu na ndíñehe ña. Ta na cati ndáha yéhe, na cán cúu na ndínuna yéhe nuu.

<sup>9</sup> Ta ndá ndó, na ndúu jahyi ta tá xíca jahyi ndó pan cuxu a nu ndo, ama cuéhe ri ndó quiahva ndó yuu nu á ña ná caxí a. <sup>10</sup> Ta ama ná quiahva ri ndó in coo nu á caxí tá xíca tiyacá nu ndó cuxu a. Co cája ndó já. <sup>11</sup> Candehé ndó. Vatí mé ndó cúu ndó ñayivi cája cuachi joo xíni vaha ndó quiahva ndó ña vaha nuu jahyi ndó. Ndaja ga ví cája Ndióxi, tátá ndo, mé a íin indivi xihín ndo. Quiahva mé á ña vaha nu ndo tá ná caca ndó ña nu mé á.

<sup>12</sup> 'Candehé ndó. Tá quiahva cuni ndó caja ñayivi xihín ndo quiahva já ndítahan caja ri ndohó va xihín ná jáchi ña yóho queá sáhdá ley Moisés xihín ña nacahí na profeta caja ndó.

*Yéhe táhan cúu nuú quihvi na cuhun indivi*  
(Lc. 13:24)

13 'Cúú á tátuhun ín ivi yéhé. In yéhé cúú á ña táhán ndivaha ta xíní ñúhú ndinducú ndó ndihvi ndó cán. Jáchí inga yéhé cúú á ña ndíca ndivaha nuú ndihvi na cuhún indayá. Ta cuhá ndivaha ñayivi cúú na xíca íchí ndíca cuahan na indayá nuú ndihi saha ná. 14 Joo ña cúú íchí ña ndáca ñayivi yéhé táhán nu ndihvi na indiví cúú á ichí táhán ndivaha ta yáncá ndivaha caca nuu í nu á. Ta chá ndivaha cúú na ndihvi cán.

*Xihín cuíhi cúun nuú in yító cuu ndicuni ndá yító cúú dó*  
(Lc. 6:43-44)

15 'Cuéntá coo ndó xihín na tuhún, na cáchí cáhan na cuéntá Ndióxi jan. Jáchí uun ndivaha cása na nu ndo. Joo cúú ná tátuhun ndivahyí quini ndivaha vatí náha na tátuhun ndicachi loho. 16 Cúú ndicuni ndó na xihín ña cája na. Jáchí ñayivi quini co cája vaha toho na. Cúú á tátuhun tá a cuú cuun uva nuú tohíñú ta ni a cuú jáquee ndó titó ñuhú nuú tohíñú. 17 Ña cán queá tóco ndihi yító vaha ndinuhu cuíhi vaha cuítí cúun nu do. Joo yító quini ndinuhu cuíhi quini cuítí cúun nu do. 18 Dó cúú yító vaha cán a cúu toho cana cuíhi quini nu do ta ni yító quini cán a cúu cuun cuíhi vaha nu do. 19 Ta tóco ndihi yító, dó co cána cuíhi vaha nuu, tahnda do ta quee dó nu cándaha ñúhu ña cayí do. 20 Sahá ña cán queá xihín ña cája ñayivi já cuu ndicuni

ndó á cúú ná ñayivi vaha á cúú ná na quini.

*A juú ndihi toho ñayivi ndihvi na nuú cacomí Ndióxi cuéntá saha ná*  
(Lc. 13:25-27)

21 'A juú ndihi toho na cáchí cúú yehe xitoho na cuhún na nuú cacomí Ndióxi cuéntá saha ná. Na cája ña sáhdá Ndióxi, tátá i, mé a ín indiví na cán cuítí cúú na cacomí mé á cuéntá saha. 22 Jáchí tá ná xinu coo quivi caja ví Ndióxi sahá ñayivi já queá casahá cahan cuhá ndivaha ñayivi xihín i ta já cachi na já: "Jesús, mé ndó cúú xitoho nde ta xihín quivi mé ndó naxíca nuu nde cáhan nde tuhun Ndióxi xihín ñayivi ta xihín quivi mé ndó natavá nde rí quini nasañuhu ínima ñayivi ta xihín quivi mé ndó nacaja cuhá ndivaha nde ña xituhún", cachi na xihín i. 23 Ta anda já nducú ñehe e tuhun nu ná já cachi i já xihín ná: "Co xini toho i yo cúú ndóhó. Caxoo ndó nuú i jáchi ndinuhu ña quini cája ndó", cachi i xihín ná.

*Sácú Jesús quiahva sahá ivi da nacavaha vehe*  
(Mr. 1:22; Lc. 6:47-49)

24 'Ndá na xini joho ña cáhan i ta cája na ña, na cán cúú ná tátuhun in dataa, da ín xini túni ta nacavaha da vehe da jata in tóto. 25 Ta tá naxinu javi já nasahnu yuta ta naxinu tachí quini jata vehe cán joo coo nandicava vehe da jáchi tóyí cándichi vehe da jata tóto cán. 26 Joo

na xini joho nu cahan i ta co cãja na ñã, na can cúu ná tátuhun in dataa, da co xini túni ta nacavaha da vehe da nuú ñuti. <sup>27</sup> Tá nandihí já naxinu javi já nasahnu yuta ta naxinu tachi quini jatã vehe can. Anda já nandicava vehe da ta chí nandihí saha chí uun —nacachi Jesús jánaã ñayivi.

<sup>28</sup> Ta tá nandihí nacahan Jesús ñã yóho já tóco ndihí ñayivi nacatontó na xini joho na ndã quiahva jánaã mé á <sup>29</sup> jáchi tá jánaã mé á nu ná cahan tá quiahva cahan in da in saha cahnda chuun ta co cahan toho a tá quiahva cãja na jánaã ley Moisés.

## 8

*Tá nandaja vaha Jesús in da ndóho cuehe táhyi*

(Mr. 1:40-45; Lc. 5:12-16)

<sup>1</sup> Tá nanuu Jesús jatã yucu nuú nasanúu a can já ndico cuahã ndivaha ñayivi jatã cuahan. <sup>2</sup> Ta ndaja coo já nacayati in dataa, da ndóho cuehe táhyi nu á. Ta já nacaxítí da nu á já nacachi da já xihin á:

—Cuu ndaja vaha ndó yehe, xitoho i tá cúni ndó —nacachi da xihin Jesús.

<sup>3</sup> Tá nandihí já nacani ndaa ndãã Jesús da já nacachi a já xihin dá:

—Cúni ñã ná ndivahún ñã can queã nandivahún viti —cáchi a xihin dá.

Tá nacachi Jesús já chí ivi laã nandindaa cuehe táhyi nandoho da can. <sup>4</sup> Anda já nacachi Jesús já xihin dá:

—Candehé. A cáxi tuhun tohún ñã yóho xihin ni in tuhún ñayivi. Cuahán ndacún nahun mún nuú jutú. Ta ndítahan jocún ñaha nu Ndióxi tátuhun sãhndã ley Moisés sanahã cãja na sa nandivaha. Já ná candaa ini tóco ndihí ñayivi ñã sa nandindaa va cuehe nasandohún —nacachi Jesús xihin da can.

*Tá nandaja vaha Jesús in da cãja chúun nuú in jefe soldado*

(Lc. 7:1-10)

<sup>5</sup> Tá nandihvi Jesús ñuu Capernaum já nacayati in da sãhndã chuun nuú soldado naquixi ñuu Roma nu Jesús jáchi cúni da caca da in ñamaní nu á.

<sup>6</sup> Já nacachi da já xihin á:

—Á co cúni ndó cãja ndó ñamaní ndaja vaha ndó mozo i, datacú jáchi cándúhu da vehe quihvi da naxihí tuhú yiquí cuñu da ta a juú quiahva cáhivvi yiquí cuñu da —nacachi da can xihin Jesús.

<sup>7</sup> Já nacachi Jesús já xihin dá:

—Vaha va, cuhun i ndaja vaha i da —nacachi Jesús.

<sup>8</sup> Anda já nacachi tucu da sãhndã chuun nuú soldado can já xihin Jesús:

—Candehé ndó. Coó saha toho yehe ñã ná ndihvi ndó vehe e. Joo cahnda cuití ndó chuun janda nu in ndó yóho ta já ndivaha va mozo i. <sup>9</sup> Jáchi ndúu java na náhnu chãã sãhndã chuun nuú i. Ta ndúu ri soldado sãhndã ri

yehe va chuun nuu. Ta tá chindahá i in da ña ná cuhun da nu cuni mí i cuhun da ta cuahan da. Ta tá sáhdá i chuun nuu inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caja da ña sáhdá i ta cája da ña —nacachi da cán.

<sup>10</sup> Tá naxini joho Jesús ña yóho já nacatontó a já nacachi a já xihín na ndico cuahan cán:

—Mé a ndaa ná cahan i xihín ndo ña a ñaha cuni i tañu na Israel in da cándéé cáhnu nahá ini Ndióxi tá quiahva cándéé cáhnu ini da yóho Ndióxi. <sup>11</sup> Candehé ndo ná cahan i xihín ndo ña quixi ñayivi ndijáá níí cúú saha ñuyiví ta cacoo na cuxu na xihín Abraham ta xihín Isaac ta xihín Jacob indiví nu ín Ndióxi cómí a cuéntá sahá ñayivi. <sup>12</sup> Joo cuahá na Israel, na nanditahan nuu coo cán a cóo toho na cán. Ña caja Ndióxi xihín na cán quéa cuíta na jata véhe cuhun na nuú naá ndivaha. Ta cán cuacu ndivaha na janda quiahva chicahña mé nuhu ná —cáchi Jesús.

<sup>13</sup> Tá nandihí já nacahan tucu Jesús xihín da sáhdá chuun nuú soldado cán já nacachi a já xihín dá:

—Cuanúhu vehún. Nandivaha mosún tá quiahva cunuñ jáchi nacandúsún yehe —nacachi Jesús xihín dá.

Chí mé hora já nandivaha mozo da cán.

*Tá nandaja vaha Jesús ña cúu xojo Pedro*

(Mr. 1:29-31; Lc. 4:38-39)

<sup>14</sup> Nasahan Jesús vehe Pedro ta tá naxinu a cán cándúhu ña cúu xojo Pedro quíhvi ña jáchi chícáan cáhni ndeé ña. <sup>15</sup> Anda já natiin Jesús ndáha ña quíhvi cán ta chí nandindaa cáhni ña. Ta já nandacoo ña cán cája ndíví ña nu ná.

*Tá nandaja vaha Jesús cuahá ndivaha na quíhvi*

(Mr. 1:32-34; Lc. 4:40-41)

<sup>16</sup> Ta tá nacuaá já ñéhe cuahá ndivaha na na quíhvi xihín na ñúhu ínima quini ini nuú Jesús. Ta xihín in túhún tuhun nacahan mé á natavá ínima quini ñúhu ínima ñayivi ta jári nandaja vaha mé á tóco ndihí na quíhvi. <sup>17</sup> Ta tóco ndihí ña yóho nayaha já ná xinu coo nuú tuhun ña nacahyí profeta Isaías tá nacachi da já: “Mé á nandiquehe ndihí a ña cávitá iní ta naxojo ndihí a cuehe yo”, cáchi tuhun Ndióxi.

*Na cuni candico Jesús*

(Lc. 9:57-62)

<sup>18</sup> Tá naxini Jesús ña a juú quiahva cándíhi táhan ñayivi ndúu na xihín á já nasahnda chuun ña ná cojo cava na inga xoo tañuhú cán. <sup>19</sup> Joo nacayati in da jánaha ley Moisés nu á já nacachi da já xihín á:

—Maestro, cuni candico i ndohó ndá nacuu nuú cuhun ndo —nacachi da xihín á.

20 Já nanducú ñehe Jesús tuhun nu dá já nacachi a já xihin dá:

—Ndicuii cúu rí ta vatí ín cáva ñúhu rí. Ta laa cúu rí ta vatí ín táca ñúhu rí. Joo yehe, da nachindahá Ndióxi nduu ñayivi, chí ni nuú cuju mí i coo va —nacachi Jesús xihin dá.

21 Ta inga da sa xíca xihin á nacachi da já xihin á:

—Maestro, quiahva jihna ndó ñamaní nuú i ña ná cuhun i jánduxu tátá i já quixi i candico i ndohó —nacachi da xihin á.

22 Já nacachi Jesús já xihin dá:

—Xíní ñúhú candicún yehe viti jáchi ná cuhun mé ñayivi, na a ñáha cacu ndaa ínimá jánduxu na ndii jan —nacachi Jesús xihin dá.

*Tá najácatáji Jesús tachi xihín tañuhú tá ndícojo do*

*(Mr. 4:35-41; Lc. 8:22-25)*

23 Ta ndaja coo naquihvi Jesús ini in barco ta cátahan na xíca tuun xihin á cán cuahan na. 24 Ta nani xíca na nuú tañuhú cán cuahan na ta in náá cuití naxinu in tachi quíni ndivaha nuú tañuhú cán. Ta a juú quiahva ndeé nacasáhá ndícojo ticuú cán janda quiahva nandichutú ticuú ini barco cán. Joo cándúhu Jesús ini barco quíji va. 25 Anda já ndáva na xíca tuun xihin á cán nasahan na ndíñehe na ña. Já nacayuhú na já cáchi na xihin á:

—Chindeé ndó ndehe, xi-toho nde. Jáchi cácoo barco

cahá tañuhú cuahan do — nacachi na xihin á.

26 Anda já nanducú ñehe Jesús tuhun nu ná já nacachi a já xihin ná:

—Ndá cuéntá quéa yíhvi nahá ndo. Ndá cuéntá quéa co cándeé ini ndó yehe — nacachi a.

Já nandacoo a ta jánani a tachi quíni cán xihín tañuhú cán ta já nacatáji uun tóco ndihi a cán. 27 Tá naxini na xíca tuun xihin á cán ña yóho já nacatóntó na ta nacasáhá ndáca tuhún táhan na já cáchi xihin táhan na já:

—Ta ndá da cúu dataa yóho ña janda tachi xihín tañuhú cándúsa nu cáhan da —cáchi xihin táhan na cán.

*Tá naqueta ivi da ñúhu ínimá quini ini nuú Jesús*

*(Mr. 5:1-20; Lc. 8:26-39)*

28 Tá naxinu coo Jesús inga xoo tañuhú cán nu ín ñundáhyi cuéntá Gadara já naqueta ivi da ñúhu ínimá quini ini tañu nu ndúxu ndii. Ta nacayati da nuú Jesús. Ndívi mé da ñúhu ínimá quini ini yóho cúu dá tá tuhun quíti, rí cuehe ndivaha. Sahá ña cán quéa ni in túhún ñayivi a cuú yaha chí íchi cán. 29 Tá naxini da Jesús já nacasáhá da cáyuhú da nu á já cáchi da já xihin á:

—Ndá cuéntá quéa vasún quihvi nuún xihín nde, Jesús, da cúu in túhún jini já jahyi Ndióxi. Á vasún jándoho yachún ini nde tá cámaní yii ndindaa tiempo ndoho ini

nde —ñacachi rí quini cán xihín Jesús.

<sup>30</sup> Ta ndaja coo yati cán nasanduu cuahá ndivaha cóchí xixáhan rí. <sup>31</sup> Ta mé rí quini ñúhu ini ndíví dataa cán naxica tahví rí nū Jesús já cáhí rí já xihín á:

—Tá ta ná tavún ndehe ini da yóho, quiahva ñamaní nuú nde ña ná cuhún nde ndihvi nde ini cóchí ndúu cáa —ñacachi rí xihín Jesús.

<sup>32</sup> Anda já ñacachi Jesús já xihín rí:

—Cuáhán ndó, dá já.

Chí ñaqueta rí quini cán ini ndíví dataa cán já nasahan rí nandihvi rí ini cóchí cán. Ta chí ivi laá xínu tóco ndihi cóchí cán cuahan rí núu rí nū ndáyi yuhú tañuhú cán. Ta najáqueta nuu rí mé rí ini tañuhú chí ñacandaa rí ticuú já naxihí rí.

<sup>33</sup> Ta chí a juú quiahva nayihví da ndáa cóchí chí naxinu ndivaha da cuahan da. Ta tá naxinu da ñuu já ñacasahá da ndicani da ndaja cáa ña nayaha xihín ndíví da nasañuhu ínima quini ini cán. <sup>34</sup> Anda já ñaqueta tóco ndihi ñayivi ñuu cán cuahan na candehé na Jesús. Ta tá naxini na mé á já naxica tahví na nū á ña ná quee a cuhún a.

## 9

*Tá nandaja vaha Jesús in da naxihí tuchu saha*

(Mr. 2:1-12; Lc. 5:17-26)

<sup>1</sup> Tá sa nayaha tóco ndihi ña yóho já nandaa Jesús jatá in barco ta já naxojo cava inga xoo tañuhú cán janda

quiahva naxinu coo a ñuu mé á. <sup>2</sup> Ta cán ñéhe na in da quíhvi, da naxihí tuchu saha ta cándúhu da nū yivi loho ñéhe na ñacasaa na nū á. Ta tá naxini Jesús ndá quiahva cándeé ini da cán mé á já ñacachi a já xihín da quíhvi cán:

—Candehé, jahyi a. A ndicani toho inún jáchí cája cáhnu ini i sahá cuachún viti —ñacachi Jesús xihín dá.

<sup>3</sup> Java táhan da jánaha ley Moisés ñacasahá da cáhán da já: “Mé da yóho ndája núu da Ndióxi xihín tuhun cáhan da jáchí ni in túhún toho ñayivi a cuú caja cáhnu ini sahá cuachi.” <sup>4</sup> Joo sa ñacandaa ini Jesús ña cáhvi ini da cán sahá ña cán quea nandaca tuhún a da já ñacachi a já xihín dá:

—Ndá cuénta quea cáhvi núu ini ndó sahá yehe. <sup>5</sup> Á cáhán ndo ña ihvi chága cachi i xihín da yóho: “Ñacaja cáhnu ini i sahá cuachún viti.” Á tá coo ta cachi i xihín dá: “Cuándacoo ta cuáhán.” <sup>6</sup> Candehé vaha ndo ná naha i nū ndo ña ín sahá i, da naxindahá Ndióxi nduu ñayivi caja cáhnu ini i sahá cuachi cája ñayivi ñuyívi yóho —ñacachi Jesús xihín dá.

Tá nandihí já nandicahan tucu a xihín da naxihí tuchu saha cán:

—Ta viti cáhan i xuhún cuándacoo ndiquehe xito lohún ta cuanúhu vehún —ñacachi Jesús xihín dá.

<sup>7</sup> Chí ivi laá nandacoo da quíhvi cán ta já ñaquee da cuanúhu dá. <sup>8</sup> Tá naxini

ñayivi ndúu cán ña ñacaja Jesús yóho já nayihví na ta ñacasáhá cája cáhnu na Ndióxi sahá ña nasahan ndée mé á nuú ñayivi ña ná cuu caja na ña xituhún.

*Tá ñacana Jesús Mateo ña caca tuun da xihín á*

(Mr. 2:13-17; Lc. 5:27-32)

9 Tá nandihí já ñaquee Jesús cuahan ta nani xíca cuahan já ñaxini a in dataa naní Mateo, da ín coo nu sácço da játaca jjuhún cuéntá impuesto. Ta ñacana Jesús da já ñacachi a já xihín dá:

—Naha quíj candicún yehe.

Anda já nandaca ndichi Mateo ta ñacasáhá ndícço da Jesús.

10 Tá nandihí já ín coo Jesús xíxi a vehe da cán ta cán ñaxinu çoo cuahá táhan na játaca jjuhún cuéntá impuesto xihín java ga ñayivi cája cuachi. Nasacço na xíxi na xihín Jesús ta cán ndúu coo ri na xíca tuun xihín a cán. 11 Ta tá ñaxini na fariseo ña ndúu na cán xíxi na xihín Jesús já ñacasáhá na ndáca tuhún na na xíca tuun xihín Jesús cán já:

—Ndá cuéntá quéa xíxi xitoho ndó xihín na játaca jjuhún cuéntá impuesto ta xihín java ga na cája cuachi —ñacachi na fariseo cán.

12 Joo tá ñaxini joho Jesús ña yóho já ñacachi a já xihín na fariseo cán:

—Ñayivi ín vaaha ço xíní ñúhú toho na da cája tátá ñahá joo na quíhvi, na cán cúu na xíní ñúhú da cája tátá ñahá.

13 Ta yehe çoo vaxi toho i cana i na sa ín vaaha. Vaxi i cana i ñayivi, na cája cuachi ña ná jándacoo na cuachi cája na. Xíní ñúhú cuhun ndo jácuaha vaaha ndó ña cúnj cachi tuhun Ndióxi tá cáchí a já: “Ña cúnj quéa ná candáhvi ini ndó ñayivi jáchi vaaha chága ña yóho a juú ga ña ná çocço ndó quítj nuú j”, cáchí tuhun Ndióxi —cáchí Jesús xihín ná.

*Cáhan Jesús ndá saha quéa cajuhun na*

(Mr. 2:18-22; Lc. 5:33-39)

14 Tá nandihí na xíca xihín Juan, da jácandúta ñayivi cán ñaxinu çoo na nu Jesús. Já ñacasáhá ndáca tuhún na mé á já ñacachi na já xihín á:

—Ndávaaha ço xíjuhun toho na xíca xihín yóho nani cuahá ndivaaha xíjuhun mé nde xihín na fariseo —ñacachi na cán xihín Jesús.

15 Anda já nanducú ñehe Jesús tuhun nu ná já ñacachi a já xihín ná:

—Á cáhán ndo canduu cuéha na ndúu in vícó tándaħa nani ín mé da tándaħa cán xihín ná. Uħun. Jáchi cájji ini na. Joo xinu çoo quívi candaa na da tándaħa cán anda jáví casáhá cajuhun na. Ta cáchí i xihín ndo ña vaxi quívi candaa na yehe nuú na yóho ta anda jáví casáhá na xíca tuun xihín i cajuhun na —ñacachi Jesús.

16 Ta nasacu Jesús inga quiahva nu ná já cáchí a já:

—Ama ná jándaha ñayivi jahmá yatá xihín in tuhun jáhma saá jáchi tá nandihí



ndíndíí a, sáhndá chága ví a jahmá yata cán ta jándacáhnú chága ví a yávi ña nāndicahmá nā cán. <sup>17</sup> Ta nī cōtáán nā vino saá ini vósó ní yata jáchī jácāhndī mé vino cán ní ta cuíta mé vino cán ta tívi vósó ní cája dó. Sahá ña cán quéa ndítahan taán yō vino saá ini vósó ní saá ná a ndíhi saha vino xihín vósó —cáchi Jesús.

*Tá nandaja vaha Jesús jahyi jhí Jairo xihín in ña nacani ndaa ndáha jáhma á*  
(Mr. 5:21-43; Lc. 8:40-56)

<sup>18</sup> Ta nani cáhan Jesús cándichi a naxinu cōo in da sáhndá chuun nuú nā Israel. Já nacaxítí da nu á ta já nacachi da já xihín á:

—Jacá naxihí uun ñá loho cúu jahyi jhí i joo tá ná caja ndó ñamaní quixi ndó vehe e ta chinúu ndó ndáha ndó jatá ña já nditacu tucu ñá —nacachi da cán xihín Jesús.

<sup>19</sup> Anda já naquee Jesús cuahan xihín da cán ta ndáca nā xíca tuun xihín á cán cuahan nā. <sup>20</sup> Ta ndaja coo cán iin in ñáñáha, ñá ndítahví nī ñá tíxi uxu ivi cuja. Ta nacayati ñá chí jatá Jesús já nacani ndaa ndáha ñá yuhú jáhma á. <sup>21</sup> Jáchi nācāhán ña: “Tá ná cani ndaa cuití ndáha í jáhma Jesús já ndivaha í”, nācāhán ña. <sup>22</sup> Joo nāndicoto nihni játa Jesús nu ñá ta tá naxini a ñá já nacachi a já xihín ña:

—A cáyihví tohún, jahyi a. Nāndivahún jáchi nacandúsún yehe —nacachi Jesús xihín ñá.

Ta chí mé hora já nāndivaha ñá.

<sup>23</sup> Ta tá naxinu cōo Jesús vehe da sáhndá chuun nuú nā Israel cán já naxini a ña sa ndúu música cán ña ná cuhun nā jánduxu nā jahyi da cán. Ta naxini a jándá johó sácu cóhó ñayivi ndúu na. <sup>24</sup> Ta chí já nacachi a já xihín tóco ndihi nā cán:

—Cuáhán queta ndó jatá véhe. Jáchi cōo naxihí toho ñá loho yóho. Qují cuití va ñá —nacachi Jesús xihín ñayivi ndúu cán.

Joo nacasáhá nā cán sácu ndaa ñahá nā. <sup>25</sup> Ta chí natavá Jesús nā jatá véhe. Ta tá nacayati a nu ñá cán já natiin a ndáha ñá chí ivi láa nāndacōo ñá. <sup>26</sup> Ta ní cúu ñundáhyi cán nāndicuita nuu tuhun sahá ña nacaja Jesús cán.

*Tá nandaja vaha Jesús ivi da cuáá*

<sup>27</sup> Tá naquee Jesús cuahan já ndíco ivi da cuáá jatá cuahan da já nacasáhá cáyuhú cóhó da já cáchí da já xihín á:

—Jesús, da naquixi chichi David caja ndó ñamaní candáhví loho ini ndó ndehe —cáchí da cáyuhú da jatá Jesús.

<sup>28</sup> Ta ndaja coo naquihvi Jesús ini in vehe ta já nacayati ndívi da cuáá cán nu á. Já nacasáhá ndáca tuhún a da cán já nacachi a já xihín dá:

—Á cáhán ndó ña cuu caja i jándiyehé nuu ndó —nacachi Jesús xihín da cán.

—Ajan, xitoho nde. Cándusa nde ña cuu caja ndó ña —ñacachi ndívi da cuaá cán xihín Jesús.

<sup>29</sup> Tá nandihí já ñacani ndaa ndáha Jesús nduchú núu da cán ta já ñacachi a já xihín ndívi da cán:

—Ná coo tá quiahva cúní ndo jáchi cándeé ini ndó yehe —cáchi a.

<sup>30</sup> Tá nandihí já ñacasáha sándehe ndívi da cuaá cán. Ta ñasahnda Jesús chuun nu dá ña ná a cáxi tuhun da nuú ñayivi sahá ña ñacaja mé á xihín dá.

<sup>31</sup> Joo tá jacá ñaqueta uun da cán já ñacasáha da ndícani da nuú ndijáá ñayivi ndúu ñundáhyi cán sahá ña ñacaja Jesús xihín dá.

*Tá nandaja vaha Jesús in da níhi*

<sup>32</sup> Nani ñaquee da cuaá cán cuahan da já ñasaa java ñayivi nu Jesús ñéhe na in da níhi, da ndácaan ínima quini ini. <sup>33</sup> Ta tá ñatavá Jesús ínima quini ini da cán chí ivi laá ñacasáha cáhan da. Ta a juú quiahva ñacatóntó ñayivi ta já cáchi ña já:

—Ni in túhun tañu coo ñaxini nde in ñaha tátuhun ña yóho ñundáhyi Israel —ñacachi ña cán.

<sup>34</sup> Joo ña fariseo cán ñacasáha cáchi ña já:

—Rí cúu tiñáhá sacuaña nu rí quini sahan rí ndée rí nuú Jesús yóho ña ná tavá a ínima quini ini ñayivi —ñacachi ña fariseo cán.

*Táhnda ini Jesús sahá ñayivi*

<sup>35</sup> Ndijáá ñuu náhnu xihín ñuu válí ñaxica nuu Jesús jánaña tuhun Ndióxi ini veñuhu ña cán. Ta ñacaxi tuhun a tuhun vaha xihín ñayivi ña sa ñacayati quívi cacomí Ndióxi cuénta saha ná. Ta nandaja vaha mé á tá nuú cuehe ndóho ñayivi. <sup>36</sup> Ta tá ñaxini Jesús ñayivi cuaha cán já ñatahvi ini a saha ná jáchi ndóho ini na ta cávitá ini na tátuhun ndicachi, rí coo da candaa ñahá. <sup>37</sup> Anda já ñacachi Jesús já xihín ña xica tuun xihín a cán:

—Mé á ndaa ndúu cuaha ndivaha ñayivi, ña cúní cuni johó tuhun Ndióxi joo chá cuití ña cúní cuhun ña cahan ña ña xihín ñayivi. Cúu á tátuhun ín cuahá ndivaha níi ña xíní ñúhú jáquee joo ndímaní ñayivi jáquee na ña. <sup>38</sup> Sahá ña cán quea xíní ñúhú caça tahvi ndó nu Ndióxi ña ná chindahá mé á chága ña cája chúun cuénta mé á —cáchi Jesús xihín ná.

## 10

*Chindahá Jesús ña xica tuun xihín á ña ná cuhun ña cahan ña tuhun Ndióxi xihín ñayivi*

(Mr. 3:13-19; Lc. 6:12-16)

<sup>1</sup> Tá nandihí já ñacana Jesús ndíhuxu ivi ña xica tuun xihín á cán. Ta já ñasahan ndée nu ná ña ná cuu tavá ña ínima quini ini ñayivi. Ta ñasahan ndée nu ná ña ná ndaja vaha na tá nuú cuehe ndóho ñayivi. <sup>2</sup> Ña yóho cúu quívi ndíhuxu ivi ña cúu apóstol xica tuun xihín á cán: Da nu cuití cán naní da

Simón ta cáhan ri na Pedro xihín dá. Ta inga da cán cúú Andrés ñani da. Ta inga da cúú Jacobo xihín ñani da, Juan. Ndívi da yóho cúú dá jahyi Zebedeo. <sup>3</sup> Tañu na cán ndácaan ri Felipe xihín Bartolomé xihín Tomás xihín Mateo, da najátaca jiuñún cuéntá impuesto. Ta cán ndácaan ri Jacobo, da cúú jahyi Alfeo xihín Lebeo, da cáhan ri na Tadeo xihín. <sup>4</sup> Ta cán ndácaan ri Simón, da naxica cuéntá na cananista xihín Judas Iscariote, mé da najjícó túhún Jesús tá nu ndíhí cán.

<sup>5</sup> Tá nachindahá Jesús ndíhuxu ivi na cán já nacachi a já xihín ná:

—Coto a cūhūn ndó chí ñuu ñayiví tóho, na cō cúú na Israel. Ta ni a quíhvi ndó ñuu ñúhu chí estado Samaria. <sup>6</sup> Vaha chága ná cūhūn ndó cahan ndó tuhun Ndióxi xihín na Israel jáchi cúú ná tátuhun ndicachi, rí nandiñúhú. <sup>7</sup> Cuáhán ndó caxi tuhun ndó xihín ná ña sa nacayati quiví cacomí Ndióxi cuéntá sahá ñayivi. <sup>8</sup> Ta ndaja vaha ndó na quíhvi ta jánditacu ndó ndii ta ndaja vaha ndó na ndóho cuehe táhyi. Ta tavá ndó rí quini ñúhu ínimá ñayivi. Ta a quehe ndó yahvi sahá ña cája ndó jáchi cōó naxeen ndó ndée ñéhe ndó jan. <sup>9</sup> A cáñehe toho ndó ni jiuñún cuáán ni jiuñún cúxú ni jiuñún caa cuáhá caca nuu ndó. <sup>10</sup> Ta ni a cáñehe ndó yátí cūhūn ndó íchi. Ta ni a cáñehe ndó inga naha jáhma

ndó cūhūn xihín ndó. Ta ni a cáñehe ndó inga ndusa ndó cūhūn ndó. Ta ni garróté a cáñehe ndó cūhūn ndó. Jáchi nditahan nuú ñayivi quiahva na ña nu ndó.

<sup>11</sup> "Tá ná xinu cōo ndó in ñuu cáhnu á ñuu loho, xini ñúhú ndinducú ndó in ñayivi, na cuu candeé ini ndó ta vehe na jan canduu ndó janda quiahva ná xinu quiví quee ndó cūhūn ndó. <sup>12</sup> Ta tá ná xinu cōo ndó vehe jan cahan Ndióxi ndó xihín ná. <sup>13</sup> Ta tá ná ndiquehe vaha ñayivi vehe jan ndohó já quea cachi ndó xihín ná ña ná coo vaha ini na. Joo tá cō cūni na ndiquehe vaha na ndohó já quea a cáhan ndo xihín ná ña ná coo vaha ini na. <sup>14</sup> Ta tá cō cūni na ndiquehe vaha na ndohó ta ni cō cūni na cuni johō na nu cáhan ndo já quea cuáhán queta ndó vehe jan á ñuu jan ta cati ndó ña yácá saha ndó já ná nahá ña cuahan cuachí na cán jata mé va na. <sup>15</sup> Jáchi mé a ndaa ná cahan i xihín ndo ña tá ná xinu cōo quiví caja vii Ndióxi sahá ñayivi ndúu ñuyiví já quea jándoho chága Ndióxi ini ñayivi ñuu jan a juú ga tá quiahva najándoho a ini na ñuu Sodoma xihín ñuu Gomorra sanahá sahá ña cōo nandiquehe na ndohó.

*Vaxi quiví caja xixi ñayivi xihín na xica cáhan tuhun Ndióxi*

<sup>16</sup> 'Candehé ndo. Yehe chindahá i ndohó cūhūn ndó tañu ñayivi quini. Cúú ndó tátuhun ndicachi válí

tañu ndivahyí ña cán quea xíní ñúhú cuénta vaha coo ndó tá quiahva cája coo. Ta xíní ñúhú coo mánsó ndo tá quiahva cája ndijata. <sup>17</sup> Cuénta coo ndó jáchi tiin na ndohó ta ndiquiahva na ndohó ndahá na jutixia. Ta cani na ndohó ini veñuhu. <sup>18</sup> Ta saha mí i cañehe na ndohó cuhun ndó nuú na cúu gobernador á nuú na cómi cuénta sahá in nación. Ta já ná cuu ndicani ndó sahá i nuú na cán ta xihín nuú na tóho, na coo cúu na Israel. <sup>19</sup> Joo a ndicani ini ndó saha ndá tuhun cahan ndó tá ná ndiquiahva ñayivi ndohó ndahá na cán. Jáchi tá ná ndindaa hora cahan ndó xihín ná já quea quiahva mé va Ndióxi tuhun nu ndó ña ná cuu cahan ndó sahá i nuú na cán. <sup>20</sup> Jáchi a juú jiní mé ndó quixi ña cahan ndo. Ínima yji Ndióxi cacuu ña quiahva tóco ndihi ña cahan ndo.

<sup>21</sup> Ta java taa jicó túhún da ñani da ta java da jicó túhún da jahyi da ña ná cahní ñahá na. Ta java na ndicuita na cani táhan na xihín tátá na ña ná cahní ñahá na. <sup>22</sup> Ta ndaja táhan ñayivi ndúu ñuyíví yóho candají na ndohó sahá yehe. Joo ndá na ná candico tuun íchi mí i janda ná xinu quivi quivi na, na cán cacuu na cacu ndaa ínima. <sup>23</sup> Tá ná ndicuita na caja xíxi na xihín ndó in ñuu já cunu ndó cuhun ndó inga ñuu. Jáchi mé a ndaa ná cahan i xihín ndo ña tá sa xinu coo tucu yehe, da nachindahá Ndióxi nduu

ñayivi já a ñaha caca nuu ndó ndijáa ñuu ndacaan ñundahyi Israel.

<sup>24</sup> Candehé ndo. Ni in túhún toho da xíca jácuaha tiahva chága da nu mé dá jánaha ñahá cán. Ta ni in túhún mozo coo cúu dá da cáhnu chága nuú xitoho da. <sup>25</sup> In da jácuaha ndítahan cajji íni da tá sa xíní ndihi da ña xíní maestro da. Ta da cúu mozo ndítahan cajji ini da tá ná xinu da cacuu da cáhnu tátuhun xitoho da. Candehé ndo. Tá ná cachi ñayivi xihín da cúu xitoho ndó ña cúu da Beelzebú, rí cúu tiñahá sacuahá ndaja ga ví cachi na xihín ndóho.

*Yo já ndítahan cayihví yo  
(Lc. 12:2-7)*

<sup>26</sup> Candehé ndo. A cáyihví toho ndó ñayivi jáchi ni in túhún toho ñaha cája ñayivi a cúu coo jehé nahá jáchi vaxi quivi tá ndaca náha nu á. Ta vatí cahan jehé ñayivi tuhun joo vaxi quivi tá candaa ini ñayivi sahá. <sup>27</sup> Ña cahan yehe xihín ndó nuú naá xíní ñúhú cahan ndó ña ndiví táhyí nani yehe candii. Ta ña cahan jehé e xihín ndo xíní ñúhú ndaa ndó jiní véhe cayuhú ndó ña. <sup>28</sup> A cáyihví toho ndó ñayivi, na cuu caja cahní yiquí cuñu ndó jáchi ni in ñaha a cúu caja na xihín ínima ndo. Ndióxi quea xíní ñúhú cayihví ndo jáchi mé á cuu jándihi a saha yiquí cuñu ndó ta cuu jácana mé á ínima ndo ini indayá anda ama cáa quivi.

<sup>29</sup> Candehé ndo. Laa válí ndáchí rí nu táchi ta núu

ndivaha jíco nā rj. Joo ni in rí cán cō cūyu nū ñúhu ña quivi rí tá cō sáhan Ndióxi, tátá ndó ñamaní. <sup>30</sup> Ta viti caja ndó cuéntá xihín mé ndó. Janda ijí jiní ndó jan ndáhvi tá in tá in a nū Ndióxi. <sup>31</sup> Ña cán quéa a cáyihví toho ndó jáchi ndiyahvi chága ndo nū Ndióxi a juú ga cuahá ndivaha laa válí.

*Tá cáhan cáxi ñayivi ña cúu ná cuéntá Jesús*  
(Lc. 12:8-9)

<sup>32</sup> 'Ndá nā cáxi tuhun nuú ñayivi ña cuahan nā cuéntá mí i já quéa cachi mí i sahá nā nū Ndióxi, tátá i, mé a ín indiví, ña mé a ndaa cúu ndusa nā cán cuéntá mí i. <sup>33</sup> Joo ndá nā ná cachi xihín ñayivi ña cō xini toho na yehe já quéa ni yehe a ndícuni toho i nā ña cúu ná cuéntá mí i nū Ndióxi, tátá i, mé a ín indiví.

*Cája Jesús ña sáhdá java táhan ñayivi*  
(Lc. 12:51-53; 14:26-27)

<sup>34</sup> 'A cáhan toho ndó ña naxinu i ñuyívi yóho caja i ña ná coo vaha ini ñayivi. Cō cája i já. Jáchi ña vaxi yehe caja i quéa ná cahnda java táhan na. <sup>35</sup> Vaxi i jácani táhan i dataa xihín tátá da sahá yehe. Ta vaxi i jácani táhan i in ñáñáha xihín náná ña sahá yehe. Ta vaxi i jácani táhan i ña cúu sanu xihín xojo ña sahá yehe. <sup>36</sup> Ta ndaja vehe mé ñayivi ndicuíta na cani táhan na sahá yehe.

<sup>37</sup> 'Ta ndá nā cūni chága tátá nā á náná nā a juú ga yehe já quéa coó saha toho

na cacuu na cuéntá mí i. Ta ndá nā quíhvi ini chága jahyi yíi nā á jahyi jíhi nā a juú ga yehe já quéa coó saha toho na cacuu na cuéntá mí i. <sup>38</sup> Ndá nā cō cūni ndoho ini sahá ña candico nā yehe ta cō ín tiahva na quivi na sahá i já quéa coó saha toho na cacuu na cuéntá mí i. <sup>39</sup> Jáchi ndá nā cátóo coo chága nā ñuyívi yóho, nā cán cúu nā ndihi saha. Joo nā sáhan ndeé ini quivi sahá i, nā cán cúu nā ñehe táhvi nā catacu na anda ama cáa quívi.

*Ña quiahva Ndióxi nuú ñayivi*  
(Mr. 9:41)

<sup>40</sup> 'Ndá nā ndíquehe vaha ndohó, ndíquehe vaha ri na yehe va. Ta ndá nā ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyívi yóho. <sup>41</sup> Ndá nā ndíquehe vaha in profeta vaxi cuéntá Ndióxi já quéa tá quiahva coo yahvi ndíquehe profeta cán quiahva já coo ri yahvi ndíquehe nā cán. Ta ndá nā ndíquehe in ta vaha sahá ña cúu dá ñayivi vaha já quéa ndíquehe nā cán yahvi na tá quiahva cáa yahvi ndíquehe ta vaha cán. <sup>42</sup> Ta ndá nā ná quiahva ñaha vatí in yáxi ticuí nuú in nā cúu jahyi i yóho sahá ña ndíco nā íchi cuéntá mí i, mé a ndaa ná cahan i xihín ndó ña chahvi Ndióxi sahá ñamaní cája na xihín ná —cáchi Jesús.

## 11

*Juan, da jácandúta ñayivi  
nachindahá da java da xíca  
xihín dá nuú Jesús  
(Lc. 7:18-35)*

1 Tá nandihí nanaha Jesús nuú na xíca tuun xihín á cán ña ndítahan caja na já naquee a cuahan jánaha nuú ñayivi ta cáxi tuhun a tuhun Ndióxi nuú ñayivi ndúu ñundáhyi cán.

2 Mé tiempo já nasandacaan Juan veca, mé dá cúú dá da jácandúta ñayivi. Ta cán nañehé dá tuhun sahá ña náhnu cája Jesús. Anda já nachindahá da java na xíca xihín dá nu á <sup>3</sup> ña ná ndaca tuhún na Jesús á jivi ndusa cúú á Cristo, mé a chindahá Ndióxi cacomí a cuénta sahá ñayivi, á ndítahan candati na inga ga quixi. <sup>4</sup> Tá nandihí nandaca tuhún da cán Jesús sahá ña yóho já nacachi Jesús já xihín ná:

—Cuáhán ndó ndicani ndó nu Juan tóco ndihí ña naxini ndó cája i xihín tóco ndihí ña naxini johó ndó cáhan i. <sup>5</sup> Ta ndicani ndó nu dá ña ndínuna nuú na cuáa ta ndícaca na réncó cája i. Ta ndaja vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndii. Ta cáxi tuhun i tuhun Ndióxi nuú na ndahví já ná cuu cacu ndaa ínimá ná. <sup>6</sup> Tahví nacuu na co jándacoo ña candeé ini na yehe —nacachi Jesús.

<sup>7</sup> Tá naquee na nachindahá Juan cán cuahan na já

naçasahá Jesús cáhan xihín ñayivi já cáchi a já xihín ná:

—Ndía naçahan ndo cuni ndó tá naqueta ndó nasahan ndó sánehé ndo Juan yucú íchí cán. A juú da cán cúú ta láchá já quíji nuu da tátuhun quíji nuu in tóyoó cája tachí.

<sup>8</sup> Ndía naqueta ndó candehe ndó. A juú da cán cúú ta ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá cúú da ndúu vehe rey cuití va. <sup>9</sup> Ndía nasahan ndó candehe ndó cán. Á coó nasahan ndó cuni johó ndó nu cáhan in da cúú profeta nu ndo. Mé a ndaa da cán cúú dá in profeta ta iin chága saha dá a juú ga inga profeta nasanduu sanahá. <sup>10</sup> Jáchi mé Juan cúú dá da cáhan tuhun Ndióxi saha tá cáchi a já:

Chindahá i in da cánúu cuhun nu mún,  
já ná caja tiahva da íchi nuú quisún, já naçahyi a sanahá.

<sup>11</sup> Candehe ndo ná çahan i xihín ndo. Tañu tóco ndihí ñayivi coó ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé ndáha Ndióxi ña ná cacomí a cuénta saha ná, vatí cúú ná na coó saha, na cán cúú na cáhnu chága a juú ga Juan.

<sup>12</sup> Janda quiví naxinu Juan, da jácandúta ñayivi ta janda viti ñuhú ndíhi ndivaha ini ñayivi ndiquiahva na mé ná ndáha Ndióxi. Ta na sahan tuhun ndeé ini, na cán cúú

na ñehē táhvi cacomí Ndióxi cuéntá saha. <sup>13</sup> Janda tá cámanj xinu Juan tóco ndihi ña nacahyí na profeta xihín ña nacahyí Moisés cáhan ña vaxi quiví cacomí Ndióxi cuéntá sahá ñayivi. <sup>14</sup> Ta tá cúnj ndo candúsa ndó ña nacahyí na cán sanahá já cuu candaá ini ndó ña Juan cúu dá da nacahan na cán saha tá nacachi na ña ndítahan quixi tucu profeta Elías ñuyiví yóho.

<sup>15</sup> Na ñin johó, ná cuni johó na.

<sup>16</sup> 'Ná cahan j xihín ndó ndaja ñin ñayivi ndúu tiempo viti. Cúu ná tátuhun na valí sácoo sáíquí na nuú yahvi ta cáyuhú na nuú java ga na valí ndúu cán ta já cáchí na já: <sup>17</sup> "Nativí nde tótiví nu ndo joo coó naxeen ndó cata sahá ndo. Ta naxita cuéha ndivaha nde nu ndo ta ni coó nasacu ndó." <sup>18</sup> Quiahva já ñin ñayivi ndúu tiempo viti jáchí tá naquixi Juan, da jácandúta ñayivi ta naxijuhun da ta ni coó naxihi da vino joo nacachi ndó saha dá ña ndácaan ínimá quini ini da. <sup>19</sup> Ta tá naxinu yehe, da nachindahá Ndióxi nduu ñayivi ta xíxi j pan ta xíxi j vino já nacasáhá cáchí ndó sahá j ña cúu u in taá ndehé ndivaha ta xíxi ndivaha j. Ta cáchí ndó ña cátoó ndivaha j cacuu amigo na cája cuachi xihín na játaca jjuhún cuéntá impuesto. Joo na cúnj cándaá ini ña ndaa, na cán cúu na cándaá ini ña cája Juan ta cája ri yehe ña ndaa —nacachi Jesús xihín ná.

*Ñayivi sáá ini co cúnj na*

*caja na ña cúnj Ndióxi*  
(Lc. 10:13-15)

<sup>20</sup> Tá nandihí já nacasáhá Jesús jánani a ñayivi ndúu ndijáá ñuu nuú nacaja cuaha chága mé á ña xitúhún. Jáchí vatí nacaja cuaha mé á ña xitúhún nu ná coó nandicó coo ini na nu Ndióxi. Ña cán quéa nacachi Jesús já xihín ná:

<sup>21</sup> —Ndáhví nahá nacuu ndó, na ñuu Corazín. Ta ndáhví nahá nacuu ndó, na ñuu Betsaida. Cuahá ndivaha ña náhnu nacaja j nu ndo joo coó naxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihín sahá ñuu Sidón sahá cuachi na. Tá ná sahan j caja j ña náhnu nuú na cán tá quiahva nacaja j nu mé ndó, sa najándacoo va na cán cuachi na, nduu. Ta chí jivi laá ndaca ndixi na jahmá ndii ta jácuju na yaa yiquí jini na, nduu. Jáchí xihín ña yóho jánahá na ña nandicó coo ini na sahá cuachi na. <sup>22</sup> Mé a ndaa ná cahan j xihín ndo tá ná xinu quiví caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá. <sup>23</sup> Ta viti cáhan j xihín ndó, na ndúu ñuu Capernaum. Janda indiví cúnj ndó cuhun ndó joo sahá ña sáá ini ndó cuhun ndó janda indayá, caja Ndióxi. Jáchí tá ná caja j ña xitúhún nuú ñayivi ñuu Sodoma tá quiahva nacaja j nu ndóhó ta ni a ndíhi sahá ñuu cán, nduu. <sup>24</sup> Mé a ndaa ná cahan

ĩ xihĩn ndo ña tá ná xinu quivĩ caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Sodoma sanahá —ñacachi Jesús.

*Tá ñacajii ndivaha ini Jesús  
(Lc. 10:21-22)*

<sup>25</sup> Mé tiempo cán ñacahan Jesús já ñacachi a já:

—Cája cáhnu ĩ ndohó, tátá Ndióxi, ña cúú xitoho tóco ndihi ñaha ndúu indivi xihín ñuyivĩ. Jáchĩ najánaaha ndó ña ndíchĩ ndivaha nuú ñayivi, na coó cuahá saha nuú java ga na. Ta ñacaja ndó ña ná a cuú candaa ini na ndíchĩ xihín na tácu ini ñaha mé ndó. <sup>26</sup> Já ñacaja ndó jáchĩ já nasacu ini ndó caja ndó —ñacachi Jesús.

<sup>27</sup> Anda já ñacachi a já xihín na ndúu cán:

—Nandiquiahva tátá ĩ tóco ndihi ñaha ndahá ĩ ña ná cacomí ĩ cuéntá sahá. Ta ni in túhún toho ñayivi co xini vaha na yehe, da cúú in túhún jini já jahyi Ndióxi. Mé Ndióxi, tátá ĩ cuiti va xini vaha yehe. Ta ni in túhún toho na co xini vaha na yo cúú tátá ĩ. In túhún yehe, da cúú jahyi a xini vaha ĩ yo cúú mé á. Ta yehe cúú da caxi ndá ñayivi jánaaha ĩ nuú sahá Ndióxi, tátá ĩ já ná candaa vaha ini na yo cúú mé á. <sup>28</sup> Naha ndihi ndó nuú ĩ, na sa ñacanaá cája chúun. Taxi ndó ña ndójo ndó jan nuú ĩ ta já yehe caji ña ná ndiquehe ndée ndo. <sup>29</sup> Yehe cuni ña ná ndiquiahva ndó mé ndó ndahá ĩ. Ta ña yóho

cúú á tátuhun in yúcu chínúu na sahá jiqui tindiqui. Ta xini ñuhú catiahva ndó caja ndó tá quiahva cája yehe. Jáchĩ coó cama jini ĩ xihín ñayivi ta cúú u ña manso ndivaha. Quiahva já caja ndó já ñehe ini ndo ndiquehe ndée ndo. <sup>30</sup> Jáchĩ yúcu chínúu ĩ jata ndo xihín ñaha jácojo ĩ jata ndo cúú á ña cama ñuhú laá —ñacachi Jesús.

## 12

*Ña ñacaja na xica tuun xihín Jesús in quivĩ ndiquehe ndée ñayivi*

*(Mr. 2:23-28; Lc. 6:1-5)*

<sup>1</sup> Ta ndaja coo in quivĩ ndiquehe ndée ñayivi xica Jesús cuahan tañu nuú ñaxutu na trigo. Ta sahá ña cuico na xica tuun xihín Jesús sahá ña cán quea ñacasahá na túhún na java yucu jini trigo cán ta táva na trigo saxí na.

<sup>2</sup> Tá ñaxini na fariseo ña yóho já ñacasahá na cáhan cuachĩ na nuú Jesús. Já cáchĩ na já:

—Candehé. Na xica tuun xuhun jan cája na chuun ña co ndítahan caja ñayivi quivĩ ndiquehe ndée yó —ñacachi na xihín Jesús.

<sup>3</sup> Já nanducú ñehe Jesús túhun nu ná já ñacachi a já xihín ná:

—Á a ñaha toho cahvi ndó nuú túhun Ndióxi nu cáhan sahá ña ñacaja David sanahá tá ñacuico da xihín na xica xihín dá. <sup>4</sup> Ña ñacaja da quea ñaquihvi da ini veñuhu Ndióxi ta ñaxixi da pan ña yji. Ta ni nu mé dá ta ni



nuú nā xíca xihín dá cán cō cáni a nuú cuxu na pan cán. In túhún jutú cuití va cáni a nuú cuxu na pan cán. <sup>5</sup> Ta á a ñáha toho cahvi ndó ña ñacahyí Moisés nu ley tá ñacahyí da ña cō cája toho jutú cuachi nu Ndióxi vatí cája chúun da veñuhu quiví ndíquehe ndéé ñayivi. <sup>6</sup> Mé a ndaa ná cahan i xihín ndo ña ín chága sahá i, da cándichi yóho a juú ga sahá veñuhu nu cája cáhnu na Ndióxi jan. <sup>7</sup> Mé ndó cō cándaá toho ini ndó ña cúní cachi tuhun Ndióxi tá cáhí a já: “Yehe cúní ña ná candáhvi ini ndó ñayivi jáchi vaha chága ña yóho a juú ga ña ná joco ndó quítí nuú i”, cáhí tuhun Ndióxi. Jáchi tá ná candaá ini ndó tuhun yóho, nduu ta a chícaan toho ndó cuachi jatá ñayivi, na cōó cuachi. <sup>8</sup> Candehé ndó. Yehe, da ñachindahá Ndióxi nduu ñayivi, ín sahá i cahnda i chuun sahá quiví ndíquehe ndéé ñayivi —ñacachi Jesús.

*Tá nandaja vaha Jesús in da nahichí ndáha*

*(Mr. 3:1-6; Lc. 6:6-11)*

<sup>9</sup> Tá nandihí já ñaquee Jesús cuahan já nandihvi a veñuhu mé ñuu cán. <sup>10</sup> Ta cán ñasandacaan in dataa, da nahichí ndáha. Ta sahá ña ndúcú ña fariseo ndúu cán ndá quiahva caha na já ná cuu chícaan ña cuachi jatá Jesús sahá ña cán quéa nandaca tuhún ña mé á já ñacachi na já:

—Á sahan Ndióxi ñamaní ndaja vahún ña quíhvi quiví

ndíquehe ndéé yo —ñacachi ña cán xihín á.

<sup>11</sup> Anda já ñacachi Jesús já xihín ná:

—Candehé ndó. Tá ín in ndicachi loho jana ndo ta tá ná ndicava rí ini in táhvi quiví ndíquehe ndéé yo, ama ná a cùhun ndó tavá ndó rí. <sup>12</sup> Ta ndíyahvi chága ñayivi a juú ga ndicachi. Ña cán quéa sahan Ndióxi ñamaní cája i ña vaha quiví ndíquehe ndéé yo —ñacachi Jesús xihín ná.

<sup>13</sup> Tá nandihí ñacachi a já xihín dataa, da nahichí ndáha cán já:

—Jándacaá ndáhun — ñacachi a xihín dá.

Tá najándacaá da ndáha dá já nandivaha ndáha dá. Ta cáa tá quiahva cáa inga ndáha da cán. <sup>14</sup> Joo tá ñaqueta ña fariseo cán já ñacasahá ña jándique táhan na tuhun na ña cahni ña Jesús.

*Ña cahan Isaías sahá Jesús*

<sup>15</sup> Tá ñañehe Jesús tuhun ña ndúcú ña cán cahni ñahá ña já ñaquee a cuahan va ta cuahá ndivaha ñayivi ndíco jatá cuahan. Ta ndaja táhan ña quíhvi nandaja vaha Jesús. <sup>16</sup> Ta ñasahnda Jesús chuun nuú ña sa nandivaha cán ña ná a cáxi tuhun ña nuú ñayivi yo cúu mé á. <sup>17</sup> Tóco ndihí ña yóho ñayaha já ná xinu cōo nuú tuhun ñacahyí profeta Isaías tá ñacahyí da já:

<sup>18</sup> Yóho ín da cája chúun cuéntá mí i, mé dá ñacaxi i.

Quíhvi ndivaha ini i da ta cáji íni i xihín ña cája da.

Ta jáchutu ndaa i ínima dá xihín ínima yii mí i,

ña ná jánaḥa da nuú ñayivi ndúu ñuyiví ndá quiahva cája víi i saḥa ná.

19 Ta ni a cáḥan cuachi toho da ta ni a cáyuhú cóhó da, já quéa a cúni joho ñayivi xica cállé nu cáḥan da.

20 Tá quiahva a jácuachi toho da ndoo, dó sa natahnu,

quiahva já a jácuachi toho da ñayivi, na cávitá ini.

Ta quiahva já ni a ndáhvá toho da tití ñúhu loho, ña sa cúni ndahva janda quiahva ná quee vaha ña ndaa xihín ña ihvi.

21 Ta ndaja táhan ñayivi ndúu níi cúu ñuyiví tandaa candeé ini na mé dá, naçahyí Isaías sanahá.

*Jácojo na cuachi jatá Jesús ña cája chúun a xihín ndée tiñáhá sacuaḥa*

(Mr. 3:20-30; Lc. 11:14-23; 12:10)

22 Java ñayivi ñéhe na in da cuaá ta cúu dá da níhi jáchi ndácaan rí quini ini da. Ta tá nandaja vaha Jesús da já nasandehé da ta nandicaḥan da. 23 Tá naxini ñayivi ndúu cán ña yóho já naçatóntó ndivaha na já naçasáhá ndáca tuhún táhan na já cáchí na já:

—Á a juú da yóho cúu da naquixi chichi rey David — cáchí xihín táhan na.

24 Tá naxini joho na fariseo ña cáḥan ñayivi cán já

naçasáhá cáchí mé na fariseo cán já:

—Taa yóho cúu tává da rí quini ñúhu ini ñayivi jáchi mé Beelzebú, rí cúu tiñáhá sacuaḥa nu rí quini cán sahan rí ndée rí nu dá cája da ña — naçachi na.

25 Ta sa xini va Jesús ña cáhvi ini na cán sahá ña cán quéa naçachi a já xihín ná:

—Tá sahdá java táhan ñayivi ndúu in nación ta ndúu na cuaḥa táhdá já casáhá cáni táhan ndaja táhan mé va na já cama chá ndihi sahá nu ndúu na cán. Ta quiahva já yaha ri xihín in ñuu á in vehe tá sahdá java táhan ndaja táhan mé ná já quéa jándihi na saḥa ná. 26 Ta quiahva já yáha xihín Satanás, rí cúu tiñáhá sacuaḥa. Ta tá ná tavá rí inga rí quini ini ñayivi á tá ná caní táhan ndaja táhan mé rí já quéa ndihi saḥa ndée ña cómí ri. 27 Mé ndó cáchí ndo ña tává i rí quini ini ñayivi xihín ndée Beelzebú, rí cúu tiñáhá sacuaḥa. Joo tá mé a ndaa cúu ndusa ña cáchí ndo sahá i jan, ndáchí quéhe na cúu cuéntá mé ndó jan ndée tavá na rí quini ini ñayivi. Ama ná cachi ndó ña tává ndo rí quini xihín ndée tiñáhá sacuaḥa. Ña yóho náha ña co cáhvi ndaa ini ndó. 28 Candeheé ndo. Yehe tává i ínima quini ini ñayivi xihín ndée ínima yii Ndióxi. Ta xihín ña yóho náha cáxi a ña sa naxinu co quivi cacomí Ndióxi cuéntá saḥa ndó.

29 Candeheé ndo. Sácu u in quiahva nu ndo. Ni in dataa a cúu ndihvi da caja cuíhná

da ñaha vehe in da ndacú joo tá ná cató da da ndacú cán já cuu quehe da ñaha da cán.

<sup>30</sup> Ndá na coó cuahan xoo i, cúu ná na co cúní yehe. Jáchi ndá na co chíndeé yehe xihín ña cája i, cúu ná na sáji nuu nuú i.

<sup>31</sup> Ña cán queá cáchi i xihín ndo ña caja cáhnu ini Ndióxi saha tá nuú cuachi cája ñayivi xihín saha tá nuú tuhun quini cáhan na. Joo tá ná cahan núu na saha ínimá yii Ndióxi já queá a cája cáhnu toho ini Ndióxi sahá ña nacaja na.

<sup>32</sup> Caja cáhnu ini Ndióxi janda saha ndá na ná canahá xihín yehe, da nachindahá Ndióxi nduu ñayivi joo tá ná canahá na xihín ínimá yii Ndióxi já queá a cája cáhnu toho ini Ndióxi saha ná ni nani tácu na ndúu na ñuyiví yóho ta ni tá cuhun na cavií saha ná nu Ndióxi.

*Xihín cuihi cúun nuú in yito cuu ndicuní ndá yito cúu dó*  
(Lc. 6:43-45)

<sup>33</sup> Xíní ñúhú jándee ndó yitó vaha ña ná cuun cuihi vaha nu do. Jáchi tá ná jándee ndó yitó núu já queá cuihi núu cuun nu do. Jáchi xihín cuihi cúun nuú in yito cuu ndicuní ndá yito cúu dó. <sup>34</sup> Mé ndó cúu ndó tátuhun coo jáchi cúu ndó na quini sahá ña cán queá cáhan ndó tuhun quini ta a cuú cana tuhun vaha yúhu ndo. Jáchi yúhu ñayivi cána tóco ndihi ña nandicutú ñúhu ínimá ná. <sup>35</sup> In taa vaha cáhan da ndinuhu ña vaha jáchi ndinuhu ña vaha ñúhu

ínimá dá. Ta in taa quini cáhan da ndinuhu ña núu jáchi ña núu queá ndacaan ínimá dá. <sup>36</sup> Mé a ndaa ná cahan i xihín ndo ña tá ná ndindaa quiví caja vii Ndióxi sahá ñayivi ndúu ñuyiví anda jávi ndiquiahva ñayivi cuéntá nu Ndióxi sahá ndaja táhan tuhun núu nacahan na ñuyiví yóho. <sup>37</sup> Jáchi saha mé tuhun nacahan ndó jan caja vii Ndióxi saha ndo. Ta xihín ña jan cachi Ndióxi ña á íin cuachi ndó á coo cuachi ndó —cáchi Jesús.

*Xíca ñayivi quini ña ná caja Jesús ña xitúhún nu ná*  
(Mr. 8:12; Lc. 11:29-32)

<sup>38</sup> Java na fariseo xihín na jánaha ley Moisés nacahan na xihín Jesús já nacachi na já xihín a:

—Maestro, cúní nde ña ná caja ndó in ñaha xitúhún nuú nde já ná cuni nde —nacachi na xihín Jesús.

<sup>39</sup> Já nanducú ñehe Jesús tuhun nuú na cán já nacachi a já xihín ná:

—Ñayivi quini, na co cúní cándúsa Ndióxi, na yóho cúu na cúní cuni ña xitúhún. Joo a cúní toho na ña. Ña cuni ndusa na queá ña ndoho i tá quiahva nandoho Jonás, da nasacuu profeta sanahá. <sup>40</sup> Jáchi tá quiahva nasandacaan Jonás uní quiví xihín uní ñuú tixi tiyacá cáhnu tá nacocó rí da quiahva já ndacaan ri yehe, da nachindahá Ndióxi nduu ñayivi tixi ñundáhyi uní quiví xihín uní ñuú. <sup>41</sup> Ta ñayivi

na sanduu Nínive sanahá cán ndacuíta na chicaan na cuachi jata ndó tá ná xinu quivi caja vii Ndióxi sahá cuachi ñayivi ndúu viti. Jáchí mé na nasanduu ñuu Nínive cán najándacoo na cuachi cája na tá naçahan Jonás xihin ná ña naçachi Ndióxi coo. Ta yehe ín chága sahá i a juú ga Jonás joo co cándusa ndó yehe. <sup>42</sup> Jári tá ná xinu quivi caja vii Ndióxi sahá cuachi ñayivi ndúu tiempo viti anda já ndacuíta in ñá nasacomí cuéntá sahá ñayivi ndúu chí xoo sur sanahá ta chicaan ñá cuachi jata ñayivi ndúu tiempo viti. Jáchí mé ñá cán vatí naçahin xíca ndivaha ñá nu rey Salomón sanahá naçahan ñá cuni johó ñá tuhun ndíchí çahan da. Ta yehe ín chága sahá i a juú ga Salomón joo co cándusa ndó yehe.

*Jánaça Jesús ña cuahá tañu ndíco coo tucu ínima quini ini ñayivi vatí sa naquee rí*  
(Lc. 11:24-26)

<sup>43</sup> "Tá quéta in ínima quini ini in dataa já quée rí cuahan rí xíca nuu rí ndijáá yucú íchí ndínducú rí nuú candoo rí. Ta tá co ndíñehe rí ña já casáhá çahvi ini rí já: <sup>44</sup> "Coho ndíco coo tucú ini da nuú nasandacaan í cán jáchí cúú á tátuhun vehé", çahán rí. Ta tá xinu coo rí ini da cán já sándehe rí ña ín vii va ini da cán tá quiahva vii ini vehe tá natihvi á ta nandaca ndójó vaha tóco ndihi ñaha ini a. <sup>45</sup> Anda já quée tucu mé rí quini cán cuahan rí quehe rí

usa ga rí quini chága a juú ga mé rí já xinu ndihi rí ndihvi rí ini dataa cán. Ta mé da cán ndiquini chága da a juú ga tá nasandacaan in táláá rí ini da. Quiahva já ndoho rí ñayivi quini ndúu tiempo viti —cáchi Jesús.

*Nána Jesús xihin ñani a cuni na cuni na a*

(Mr. 3:31-35; Lc. 8:19-21)

<sup>46</sup> Nani çahan yí va Jesús xihin ñayivi já na xinu coo náná Jesús xihin ñani a ña ná çahan na xihin á cuni na. Joo naçandoo na ndíta na jata véhe. <sup>47</sup> Já naçahan in na cáxi tuhun na nuú Jesús já cáchi na já xihin á:

—Jata véhe cáa ín nánún xihin ñanún ta çahan na xuhun cuni na —naçachi na xihin Jesús.

<sup>48</sup> Joo nanducú ñehe Jesús tuhun nuú na cán já naçachi a já xihin ná:

—Çahan i xihin ndó ndá na cúú ndusa náná i xihin ñani i —naçachi Jesús xihin ná.

<sup>49</sup> Anda já naña ndáha mé á na xíca tuun xihin á cán já naçachi a já:

—Na yóho cúú ná tátuhun náná i xihin ñani i. <sup>50</sup> Jáchí ndá na cája ña cuni Ndióxi, tátá i, mé a ín indiví, na cán cúú ná tátuhun ñani i xihin quiahva i xihin náná i —naçachi Jesús xihin na cán.

## 13

*Sácú Jesús quiahva sahá in da sátá tata*

(Mr. 4:1-9; Lc. 8:4-8)

<sup>1</sup> Sa mé quivi já naqueta Jesús vehe cán já naçahan

nasacoo a yati yuhú tañuhú cán. <sup>2</sup> Ta sahá ña nataca cuahá ndivaha ñayivi nu á sahá ña cán quea nandaa mé á jatá in barco loho ta nasacoo a jatá do cán nani ndúu ñayivi ñuti yuhú tañuhú cán. <sup>3</sup> Anda já nasahá jánaha cuahá ñaha nu ná ta nasacu a quiahva nu ná já nacachi a já xihín ná:

—In da sátá tata naquee da cuahan da cata da ña. <sup>4</sup> Ta tá sátá da ña cuahan da já nacuyu java ña íchi ta cán naxinu laa ta nasaxí rí ña. <sup>5</sup> Ta java ña nacuyu a tañu yuu nuú coo cuaha ñuhu. Ta cama chá nanduta mé tata jáchi co cúná ñuhu nuú nacuyu a. <sup>6</sup> Joo tá naqueta candii já najahíchi ñahá sahá ña coo cuaha yoho a chí nandihí sahá. <sup>7</sup> Ta java tata nacuyu tañu tohíñú ta tá nasahnu tohíñú cán já nanditáha ndihí a nacaja tohíñú. <sup>8</sup> Ta java tata nacuyu a nu ñuhú vaha ta já nasahan cuahá ñaha ña jáquee na nu á. Java ña nasahan in ciento a nuú in in tata ta java ña nasahan uní jícó uxu a ta java ña nasahan oco uxu a nuú in in tata. <sup>9</sup> Na íin johó, ná cuni johó na —nacachi Jesús.

*Ndicani Jesús ndá saha quea nasacu a quiahva nu ná*  
(Mr. 4:10-12; Lc. 8:9-10)

<sup>10</sup> Na xíca tuun xihín Jesús cán nacayati na nu á já nasahá ndáca tuhún na mé á ndá cuéntá quea jánaha mé á xihín quiahva cuití va nuú

ñayivi. <sup>11</sup> Anda já nacachi Jesús já xihín ná:

—Ña coo nacandaa ini ndó jihna ña cán cándaa ini ndó viti jáchi nasuná Ndióxi xíní túní ndó cándaa ini ndó ndá quiahva cacomí mé á cuéntá sahá ñayivi. Joo na a ñaha cacomí Ndióxi cuéntá saha, na cán cúu na sácú u quiahva nuu. <sup>12</sup> Jáchi ndá na sa íin ñaha nuu, ñehe táhvi na coo chága ñaha nu ná. Joo na co á ñaha nuu, janda ña chá íin nu ná ndindaa. <sup>13</sup> Sahá ña cán quea cáhan í xihín ndinuhu quiahva xihín mé ndó jáchi vatí sándehe na joo cúu ná tátuhun na co tívi nuu. Ta vatí xíní johó na joo cúu ná tátuhun na johó jáchi co cándaa ini na ña cáhan í xihín ná. <sup>14</sup> Ta xihín ña yoho xínu coo nuú tuhun nacachi profeta Isaías sanahá ndivaha tá nacachi da já:

Vatí xíní johó na joo cúu ná tátuhun na johó jáchi co cándaa ini na ña cáhan í xihín ná.

Ta vatí sándehe na joo cúu ná tátuhun na co tívi nuu.

<sup>15</sup> Jáchi nandaji xíní túní tóco ndihí ñayivi ñuu yoho.

Ta ndájí tuun johó na ta ndájí tuun nduchú nuú na.

Ña cán quea a cuú cuni johó na,

ta ni a cuú candehé na,

ta ni a cuú cándaa ini na ña xíní johó na.

Ta xihín ña yoho co ndícó coo na nuú í ña ná ndaja vaha í na, nacahyí mé á Isaías sanahá.

16 Joo tahví na cuu ndó jáchi cánda*a* ini ndó ña sánde*h*é ndó xihín ña xini joh*o* ndó. 17 Mé a nda*a* ná cahan i xihín ndo ña cuahá ndivaha na profeta xihín cuahá ndivaha ñayivi vaha na*x*ica ini na cuni na ña xini ndó yóho viti joo coó na*x*ini na ña ta na*x*ica ini na cuni joh*o* na ña xini joh*o* ndó yóho joo coó na*x*ini joh*o* na ña.

*Ndicani Jesús ña cuni cachi quiahva nasacu a nu ná*

(Mr. 4:13-20; Lc. 8:11-15)

18 Cuni joh*o* ndó ña cuni cachi quiahva nasacu u sa*h*á da sata tata cán. 19 Ñayivi, na xini joh*o* tuhun vaha sa*h*á ña sa na*c*ayati quiví cacomí Ndióxi cuénta sa*h*á ñayivi joo co cánda*a* ini na ña, na cán cúu ná tátuhun tata ña na*c*uyu íchi cán. Jáchi xinu tiñhá sacua*h*a ta táva ri tuhun Ndióxi cán ínima ná. 20 Ta tata ña na*c*uyu tañu yuu cán ná*h*a ndá quiahva íin ñayivi, na cáji ndivaha ini ndíquehe tuhun Ndióxi. 21 Joo sa*h*á ña co ñé*h*e íni yóho a cuhun cúná a sa*h*á ña cán quéa chá tiempo cuití va cándusa na tuhun Ndióxi. Jáchi tá casá*h*a ndóho ini na sa*h*á tuhun Ndióxi chí jándaco*o* va na ña. 22 Ta tata ña na*c*uyu tañu tohiñú cán ná*h*a ndá quiahva íin ñayivi, na xini joh*o* tuhun Ndióxi joo co jándaco*o* na íchi na*x*ica na jihna. Ta casá*h*a ndicani ini na sa*h*á ña*h*a ñuyiví yóho ta casá*h*a na cáto*o* na canduu cuahá ña*h*a cuicá nu ná ta casá*h*a ndicaji ini na caja na

ña núu. Sa*h*á ña cán quéa cúu á tátuhun tata ña co cána ña*h*a já*q*uee na nuu jáchi coó nasahnu na xihín tuhun Ndióxi. 23 Joo tata ña na*c*uyu nuu ñuhú vaha cán ná*h*a ndá quiahva íin ñayivi, na xini joh*o* tuhun Ndióxi ta cánda*a* ini na ña ta cája na ña cáji ini Ndióxi xihín. Java na cúu ná tátuhun yucu trigo ña nasahan in ciento a nuú in in tata. Ta java na cúu ná tátuhun tata ña nasahan un*j*ico uxu a nuú in in tata. Ta java na cúu ná tátuhun tata ña nasahan oco uxu a nuú in in a —na*c*achi Jesús xihín ná.

*Sácú Jesús quiahva sa*h*á yucu quini nána tañu trigo*

24 Anda*a* já nasacu Jesús inga quiahva nuú ñayivi ndúu cán já na*c*achi a já xihín ná:

—Tá ná casá*h*a cacomí Ndióxi cuénta sa*h*á ñayivi já cacuu a tátuhun tá na*x*utu in dataa trigo ña vaha nu ñú*h*u dá. 25 Joo tá sa ndúu ndihi na quijí na já na*x*inu co in da co cuni táhan xihín dá ta na*c*ihin da tata yucu quini tañu trigo cán já na*q*uee da cuahan da. 26 Ta tá nasahnu trigo cán ta na*c*asá*h*a cána yoco a já na*n*du*t*a ri yucu quini cán. 27 Anda*a* já nasahan na cája chúun cán cahan na xihín xitoho na já na*c*achi na já: “Candé*h*e ndo. Tata vaha quéa na*c*ihin ndó nu ñú*h*u ndo joo co cánda*a* ini nde ndá*h*i na*q*uixi yucu quini nanana xihín á yóho”, na*c*achi na cán xihín xitoho na. 28 Anda*a* já na*n*ducú

ñehe da cán tuhun nu ná já ñacachi da já xihin ná: “Ndá da co cuni yehe, da cán cúu da ñacaja ña yóho”, ñacachi da. Anda já ñacachi na cája chúun nu dá cán já xihin dá: “Á co cuni ndó ña ná quihvi nde tuhun ndihi nde yucu quini cáa tañu trigo”, ñacachi na xihin dá. <sup>29</sup> Anda já ñacachi da já xihin ná: “Ná coo mé á jáchi tiahva náá nani tuhun ndó yucu quini jan cuu tuhun ndó yucu trigo xihin á. <sup>30</sup> Vaha chá ná quiahva í ñamaní cuahnu a xihin trigo janda quiahva ná ndindaa tiempo jáqueé trigo. Ta tá sa jáqueé já cahnda i chuun nuú na jáquee ña ná tavá xóo na yucu quini jihna ñúhú ta ná cató na ña tá nuhni tá nuhni ña ná chican ñúhu ná ña. Ta anda jáví ná játaca na trigo taán vaha na ini yáca ñaha i”, ñacachi da —cáchi Jesús sácú a quiahva nu ná.

*Sácú Jesús inga quiahva saha ndíqui mostaza*

(Mr. 4:30-32; Lc. 13:18-19)

<sup>31</sup> Ta ñasacu Jesús inga quiahva nu ná já ñacachi a já xihin ná:

—Tá ná xinu coo quivi cacomí Ndióxi cuéntá sahá ñayivi já cúu á tátuhun in ndíqui mostaza ña chíhin in dataa nu ñúhu da. <sup>32</sup> Cúu á ndíqui loho chága nu tóco ndihi ndíqui válí iin ñuyiví. Joo sáhnú a janda quiahva ndúu a in yító, dó cáhnú nu ndíhi yító nu xinu coo laa cávaha rí choho ri nu ndáha do —cáchi Jesús.

*Sácú Jesús quiahva sahá yusá naxaa*

(Lc. 13:20-21)

<sup>33</sup> Ta ñasacu Jesús inga quiahva nu ná já ñacachi a já xihin ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñáñáha uní táhnda náhnú harina xihín loho yusá naxaa ña ná jánañu a tóco ndihi mé yúsa cán —ñacachi Jesús.

*Sácú Jesús quiahva cuití va nuú ñayivi*

(Mr. 4:33-34)

<sup>34</sup> Xihín ndinuhu quiahva cuití najánaña Jesús tóco ndihi ña yóho nuú ñayivi. <sup>35</sup> Já ñacaja Jesús ña ná xinu coo nuú ña ñacachi in da profeta sanahá tá ñacachi da já:

Xihín ndinuhu quiahva cuití va cahan i xihín ñayivi, ta cahan i sahá ñaha ñasahjin jehé nu ná janda mé saha tá cámaní cava sahá sahá ñuyiví —cáchi tuhun Ndióxi.

*Ndicani Jesús ña cuni cachi quiahva ñasacu a sahá yucu quini nanana tañu trigo cán*

<sup>36</sup> Tá ñandihí ñandindayí Jesús ñayivi cuaha ndúu cán já ñaquihvi a ini vehe. Anda já ñacativi na xica tuun xihín a cán nu á já ñacachi na já xihin á:

—Ná ndicani ndó nuú nde ndía cuni cachi quiahva ñasacu ndó sahá yucu quini nanana tañu trigo cán —ñacachi na.

<sup>37</sup> Anda já ñacachi Jesús já xihin ná:

—Da xútu tata vaha cúu yehe, da nachindahá Ndióxi nduu ñayivi. <sup>38</sup> Ta ñúhu nu xútu u tata cúu á ñayivi ñuyíví. Ta tata vaha cán cúu á yuhú nuú na cómí Ndióxi cuéntá saha. Ta yucu quini cán cúu á yuhú nuú ñayivi quini, na cúu cuéntá rí quini. <sup>39</sup> Ta da co cúní táhan xihín i nasahan da naxutu da yucu quini nu ñúhu cán ta cúu dá yuhú nuú tiñhá saçuaha. Ta tiempo jáquee na cán cúu á tá ná xinu coo quiví caja ví Ndióxi sahá ñayivi ndúu ñuyíví. Ta na xíca jáquee cán cúu ná tát Ndióxi. <sup>40</sup> Ta tá quiahva nacaja na cán xihín yucu quini tá najátaca na ña ta nachicaan ñúhu na ña quiahva já vaha ri xihín ñayivi ñuyíví yóho tá ná tанда quiví ndihi sahá ñuyíví. <sup>41</sup> Ta yehe, da nachindahá Ndióxi nduu ñayivi chindahá i tát mí i ña ná cahnda java táhan na na cómí i cuéntá saha xihín na co cúu cuéntá mí i. Jáchí na cán jácahan na inga na caja na cuachi xihín java ga na cája ña núu. <sup>42</sup> Ta jáqueta nuu i na ini indayá ta cán cuacu na anda quiahva chicáhñá nuhu na jáchí ndóho ndivaha ini na. <sup>43</sup> Ta anda já na cája ña cúní Ndióxi ndiyihví ndaa na tá quiahva yéhe candii nuú cacomí Ndióxi cuéntá saha ná, mé á cúu á tátá na. Ndá na ín johó, ná cuni johó na.

*Sácú Jesús quiahva sahá sató jiuhún ndácaan jehé*

<sup>44</sup> Tá ná cacomí Ndióxi cuéntá sahá ñayivi cacuu

a tátuhun ña yáha xihín in dataa tá ndíñehe dá in sató jiuhún ña ndácaan jehé in ñundáhyi. Ta tá nandihí já chíjahví tucu da ña xihín ñúhu. Ta já cávatá ndivaha da cuhun da jicó da tóco ndihí ña cómí da ña ná cueen da ñundáhyi nuú nanduxu mé sató jiuhún cán.

*Sácú Jesús quiahva sahá in jíqui sándacu na ña yahvi ndivaha*

<sup>45</sup> Tá ná cacomí Ndióxi cuéntá sahá ñayivi cacuu a tátuhun tá xíca nuu in da cája ndahví ndúcú da jíqui sándacu na ña yahvi ndivaha. <sup>46</sup> Ta tá ndítahan da in jíqui yahvi ndivaha já cuahan da jicó da ndihí ñaha cómí da ña ná cueen da jíqui yahvi ndivaha cán.

*Sácú Jesús quiahva sahá in ñúnu táv tiyacá*

<sup>47</sup> Ta tá ná cacomí Ndióxi cuéntá sahá ñayivi cacuu a tátuhun in ñúnu jácana na nuú tañuhú ta já tñin na tá nuú tiyacá. <sup>48</sup> Ta tá sa nachutú ñúnu cán já táv na tiyacá cán yuhú tañuhú ta cán sácoo na ndacahnda java na ri. Ta rí vaha cán táan vaha na ini toyicá na joo rí núu cán xítá ri cája na. <sup>49</sup> Quiahva já vaha ri xihín ñayivi tá ná ndihí sahá ñuyíví. Jáchí queta tát Ndióxi ndacahnda java na vaha tañu na quini. <sup>50</sup> Ta ñayivi quini cán chicaan na ini indayá ta cán cuacu na janda quiahva chicáhñá nuhu na jáchí ndóho ndivaha ini na —cáchí Jesús.



*Tá jánaha Jesús sahá ña saá xihín ña yata*

<sup>51</sup> Tá nandihí já nandaca tuhún Jesús na já nacachi a já:

—Á cándaq̄ ini ndó tóco ndihí ña cáhan i yóho —cáchi a.

—Ajan, cándaq̄ ini nde ña — nacachi na cán xihín á.

<sup>52</sup> Anda já nacachi Jesús já xihín ná:

—Tá jácuaha in da jánaha ley Moisés sahá ndaja ndiquiahva da mé dá ndáha Ndióxi cacomí a cuéntá saha dá já cúu dá tátuhun in daq̄a, da ín ñaha ini vehe. Ta xini vaha da tavá da ñaha da á cúu á ña saá á ña yata —cáchi a.

*Tá cuahan Jesús ñuu Nazaret*

(Mr. 6:1-6; Lc. 4:16-30)

<sup>53</sup> Tá nandihí najánaha Jesús xihín quiahva yóho já naquee a cuanúhu a.

<sup>54</sup> Tá naxinu a ñuu mé á já nacasáhá jánaha ini veñuhu cán. Ta jandá johó cátóntó ñayivi ñuu cán já cáchi na já:

—Ta ndájá nacatiahva nahá ri da yóho ña xini da. Ta ndaja cája da ñaha xitúhún yóho. <sup>55</sup> Á a juú da yóho cúu jahyi da cája chúun xihín yító. Á a juú náná da yóho cúu María. Ta ñani da cúu Jacobo xihín José xihín Simón xihín Judas viti. <sup>56</sup> Ta sa mé ñuu yóho ndúu ri quiahva da jan. Ndájá nacatiahva nahá da ña jánaha da nu yo, dá já — nacachi xihín táhan na cán.

<sup>57</sup> Ta chí coó naxeen na candúsa ñahá na. Saha ña cán quéa nacachi a já xihín ná:

—Vatí tóco ndihí ñayivi cája cáhnu na in profeta joo na vehe da xihín na ñuu da co cándúsa na da —cáchi Jesús.

<sup>58</sup> Ta coó nacaja cuahá Jesús ña xitúhún ñuu cán jáchi coó nacandúsa toho ñayivi cán mé á.

## 14

*Tá naxihí Juan, da nacaja ndúta ñayivi*

(Mr. 6:14-29; Lc. 9:7-9)

<sup>1</sup> Mé tiempo cán naxini johó Herodes, da cúu gobernador cán ña ndítuhún na sahá Jesús. <sup>2</sup> Anda já nacachi da já xihín mozo da:

—Á a juú Jesús cúu á Juan, da najácandúta ñayivi ta viti nanditacu tucu da. Saha ña cán quéa ín ndée da cája da tóco ndihí ña cája da yóho — cáchi Herodes.

<sup>3</sup> Jáchi janda mé saha ñatiin Herodes Juan nacató ñahá da ta nachicaan da da vecaa. Ta nacaja da ña yóho sahá Herodías, ña nasacuu ñájihí Felipe, ñani da. <sup>4</sup> Jáchi mé Juan najánani ñahá da sahá ña ín Herodes xihín ña ta já nacachi da:

—Co ndítahan cóun xihín ñájihí ñanún —nacachi Juan xihín dá.

<sup>5</sup> Ta janda já nanducú Herodes cahni da Juan joo a cúu caja da ña jáchi yihví da ñayivi sahá ña cándúsa na ña cúu Juan in profeta nachindahá Ndióxi. <sup>6</sup> Joo in tañu nani ndácaan Juan vecaa já nacavaña Herodes víco sahá quivi nacacu da. Ta nandaca ndíchí ña cúu jahyi

Herodías cán na\_xita sáhá ña nu ndíhi na ndúu víco cán. Ta a juú quiahva nacajii ini Herodes xihín ña yóho. <sup>7</sup> Sáhá ña cán quéa quivi Ndióxi táva da tá sáhan da tuhun da nu ña cán ña quiahva da nu ña ndá ña cúni mé ña cacá ña nu dá. <sup>8</sup> Tá nandíhi nandaca tuhún jihna ña náná ña já ndáva ña nasahan ña nu Herodes já cáchi ña já xihín dá:

—Viti ñuhú cúni ña ná quiahva ndó yiquí jíní Juan, da jácandúta ñayivi nuú i ini in cohó cáhnu —nacachi ña xihín dá.

<sup>9</sup> Tá nacachi ña já xihín Herodes já nacacuéha ndivaha ini da. Joo sahá ña sa natavá da quivi Ndióxi tá nasahan da tuhun dá nu ña cán ta sahá ña cúni da candoo vaha da nuú na ndúu víco xihín da cán sahá ña cán quéa nasahnda da chuun ña ná quiahva na ña nu ña. <sup>10</sup> Chí nasahnda da chuun ña ná chituhun ná yiquí jíní Juan ini vecaa cán. <sup>11</sup> Ta já nachicaan na yiquí jíní da ini in cohó cáhnu já nasahan na ña nu ña cán. Anda já nandiquiahva ña cán ña ndáha náná ña.

<sup>12</sup> Anda jáví naxinu na naxica xihín Juan cán já nasahan na nandiquehe na yiquí cuñu da ta najánduxu na da. Ta já nasahan na nacaxi tuhun na ña yóho nuú Jesús.

*Tá nasahan Jesús ña cuxu uhun mil taa*

(Mr. 6:30-44; Lc. 9:10-17; Jn. 6:1-14)

<sup>13</sup> Tá naxini johó Jesús saha Juan já naquee xóo a ini in

barco loho cuahan nuú co ndúu ñayivi. Joo tá naxini johó ñayivi ña cuahan Jesús já naquee na ñuu na ndíco na cuahan sáhá na nu ín a. <sup>14</sup> Ta tá nanuu Jesús barco cán já naxini a cuahá ndivaha ñayivi ta natahvi ini a saha ná. Ta chí nandaja vaha mé á na quíhvi naquixi tañu na cán. <sup>15</sup> Ta tá sa cáhini cuahan já nacayati na xica tuun xihín a cán nu á. Já cáchi na já xihín á:

—Sa nahini va ta a juú xoo nu ndúu ñayivi quéa yóho. Ndindayí ndó ñayivi ná cuhun na ñuu válí yati jan já ná cueen na ña cuxu na —nacachi na cán xihín á.

<sup>16</sup> Anda já nacachi a já xihín ná:

—Co xíní ñuhú toho quee na cuhun na. Mé ndó quiahva ndó ná cuxu na —nacachi Jesús.

<sup>17</sup> Anda já nacachi tucu na cán já xihín á:

—Co mé ñaha va cuxu na yóho. Uhun víxí pan xihín ivi laá tiyacá cuití va ín yóho —nacachi na xihín Jesús.

<sup>18</sup> —Taxi ndó a chóho —nacachi Jesús xihín ná.

<sup>19</sup> Anda já nasahnda Jesús chuun ña ná ndaca nduu ndíhi na cán nuú yucu. Anda já natiin a ndíhuhun pan xihín ndíví tiyacá cán já nasandehé a chí indiví já nandiquiahva ndixahvi nu Ndióxi. Tá nandíhi já nasahnda java pan ta nasahan ña nuú na xica tuun xihín á cán ta na cán nandicahnda na ña nuú

ñayivi cuaha cán. <sup>20</sup> Ta tóco ndihi na naxixi na janda quiahva naxhutú na. Ta tá nandihí naxixi na já najátaca na ña nacandoo cán ta najácutú na uxu ivi toyicá xihín ña nacandoo cán. <sup>21</sup> Ta tóco ndihi na naxixi cán nasacuú na tátuhun uhun mil taa. Co cáhan sahá najihí xihín na valí.

*Tá naxica sahá Jesús nuú tañuhú*

(Mr. 6:45-52; Jn. 6:16-21)

<sup>22</sup> Ta tá nandihí já nacaja Jesús ña ná ndihvi na xica tuun xihín á cán ini in barco ña ná cuhun cuéé na inga xoo tañuhú cán nani candoo too mé á jándindayí a ñayivi cuaha cán. <sup>23</sup> Ta tá sa najánduta tóco ndihi ñayivi já nandaa mé á yucu cuahan caça tahví a nu Ndióxi. Tá nandihí já nacuaá ta in túhún mé á ndacaan xica tahví a nu Ndióxi cán. <sup>24</sup> Ta ndaja coo barco loho, dó cândojó na xica tuun xihín á cán sa naxinu coo dó janda mahñú tañuhú cuahan do. Ta ndicojo ndivaha tañuhú jáchi xoo cuahan na vaxi tachí. <sup>25</sup> Joo tátuhun sa cuahan tívi já xica sahá Jesús cuahan nuú tañuhú naxinu a nu ná. <sup>26</sup> Ta tá naxini na xica sahá Jesús vaxi a nuú tañuhú cán já nacatontó na. Ta nacasáhá na cáyuhú cóhó na sahá ña yihví na já cáchí na já:

—Ínima quéa vaxi yóho — cáchí na.

<sup>27</sup> Joo ivi laá nandicahan Jesús xihín ná já cáchí a já:

—Ndacú coo ini ndó jáchi yehe va cúu u. A yihví toho ndó —nacachi a xihín ná.

<sup>28</sup> Anda já nacachi Pedro já xihín Jesús:

—Xitoho i, tá ta jivi cúu mé ndó cahnda ndó chuun ña ná cuu saa i nu ndo ta ná caca i nuú tañuhú —nacachi da xihín Jesús.

<sup>29</sup> Ta já cáchí Jesús já:

—Naha quíi —cáchí a xihín dá.

Anda já nanuu Pedro barco cán ta nacasáhá xica sahá da nuú tañuhú cuahan da nuú Jesús. <sup>30</sup> Joo tá naxini da tachí ndeé xicó nuú tañuhú cán já nayihví da. Chí ivi laá nacasáhá quéta nuu da cuahan da ini tañuhú. Já nacayuhú cóhó da já cáchí da já xihín Jesús:

—Chindeé ndó yehe, xitoho i —nacachi da xihín á.

<sup>31</sup> Ta cama chá natiin Jesús ndáha da ta já nacachi a já xihín dá:

—Ndá cuénta quéa co cándéé chága inún yehe ta nacasáhá cáhvi ivi johó inún —nacachi Jesús xihín dá.

<sup>32</sup> Ta tá nandaa ndívi na jata barco já nacatáji tachí cán. <sup>33</sup> Anda já nacaja cáhnu na ñuhu ini barco cán Jesús já cáchí na já xihín á:

—Mé a ndaa táhyí cúu jivi ndusa ndó in túhún jini já jahyi Ndióxi —nacachi na xihín á.

*Tá nandaja vaha Jesús na quihvi ndúu ñundáhyi Gensaret*

(Mr. 6:53-56)

34 Ta já naxica loho ga na nuú tañuhú cán já naxinu coo na ñundáhyi Genesaret. 35 Ta tá nandicuni ñayivi ndúu cán mé á já nanchindahá na chuun nasahan nuú ndaja táhan ñayivi ndúu ndijáá ñundáhyi cán. Já ñehe ndihi na na quíhvi nacasaá na nu á. 36 Ta na quíhvi cán naxica tahvi na nu á ña ná quiahva ñamaní cani ndaa ndáha ná yuhú jahmá níhnu a ta tóco ndihi na nacani ndaa ndáha jahmá a nandivaha na.

## 15

*Ña cája quini ínimá ñayivi  
(Mr: 7:1-23)*

1 Ndaja coo java na fariseo xihín java na jánaha ley Moisés ndúu ñuu Jerusalén cán nacayati na nuú Jesús já nacasáhá cáchí na já xihín á:

2 —Ndávaha coo cája na xica tuun xuhun ña nacachi tásáhnu jícó yo caja na. Ndávaha xixi na tá cámani ndahá na tá quiahva sáhná ley caja na —nacachi na cán xihín Jesús.

3 Anda já nanducú ñehe Jesús tuhun nu ná já nacachi a já:

—Ta jári ndóhó va, ndá cuéntá quéa jándacoo ndó ña sáhná Ndióxi nu ndó caja ndó. Ta ña cája ndó quéa ndícó ndó costumbre mé va ndó. 4 Jáchi sáhná Ndióxi chuun já cáchí a já: “Caja cáhnún tátún xihín nánún.” Ta jári cáchí a: “Ndá na ná chícaan cháhan jatá tátá na á náná na, ndítahan quivi na”,

cáchí a. 5 Joo ndóhó, jánaha ndó nuú ñayivi ña cuu cahan na já xihín tátá na á náná na: “A cuú chindeé e ndóhó jáchi sa nasacu xoo i ñaha i quiahva i ña nu Ndióxi”, cáchí na. 6 Tá ná cachi na ña yóho já quéa co ndúsa ga chindeé na tátá náná na. Quiahva joho cája ndó ta sácu xoo ndó ña nasahnda Ndióxi chuun nu ndó ta ndája ndó a tátuhun in ñaha ña coo saha. Jáchi ndícó cáhnu ndó ña najándacoo tásáhnu jícó ndó nu ndó. 7 Coo cúu ndó tá quiahva ndáa ndó. Mé a ndaa nacahan profeta Isaías saha ndó sanahá tá nacahyí da ña nacachi Ndióxi:

8 Yuhú ninu uun na cája cáhnu na yehe.

Ta coo cája cáhnu na yehe xihín ndinuhu ínimá na.

9 Ta mé a uun quéa cája cáhnu na yehe,

jáchi ña jánaha na nuú ñayivi cuití va cúu á ña quíxi jiní mé va na, nacachi profeta Isaías sanahá ndivaha —nacachi Jesús xihín na cán.

10 Tá nandihí já nacana Jesús tóco ndihí ñayivi ndúu cán já nacachi a já xihín ná:

—Cuni joho vaha ndó ña cahan i xihín ndó ta ná candaá ini ndó ña. 11 A juú ñaha xixi ñayivi ndája quini ínimá ná. Tuhun quini quéta yúhu ná ña jan quéa cája quini ñahá —nacachi Jesús.

12 Tá nandihí já nacayati na xica tuun xihín Jesús cán nu á já nacachi na já xihín á:

—Chí a váha mé ñacuu ini ña fariseo tá ñaxini johu na ña ñacachi ndó ñan —ñacachi ña cán.

<sup>13</sup> Andá já ñacachi Jesús já xihín ná:

—Ñayivi, ña cō ndíquehe váha tuhun Ndióxi cúú ná tátuhun in yito, dó cōó najánde Ndióxi, tátá i ña íin indivi. Sahá ña cō cúú dó cuéntá mé á já tandaa quivi ña tuhun mé á do anda yóho do. <sup>14</sup> Sahá ña cán queá cō ndítahan ndicani ini ndó sahá ña ñan jáchi ña cuaá va cúú ná. Ta a cúú toho caja in da cuaá candaca da inga da cuaá cūhun da jáchi ndíví já da ndacava da yávi —ñacachi Jesús.

<sup>15</sup> Tá ñandihí já ñacachi Pedro já xihín Jesús:

—Ndicani loho ndó nuú nde ndaja cáa ña cáchí ndo ña cō cája quini toho ña xíxi ñayivi mé ná jáchi cō cánda iní nde ña —ñacachi Pedro xihín Jesús.

<sup>16</sup> Já ñacachi Jesús já xihín ná:

—Á cōó toho xíní túní ri ndóhó va, váha. <sup>17</sup> Jáchi cō cánda iní ndó ña tóco ndihí ñaha xíxi ñayivi a cuú caja quini a ña. Jáchi ña xíxi ñayivi cō xínu a ini ínima ná joo xínu cō ña tixi va na já queta tucu a yiquí cuñu na. <sup>18</sup> Ña cuu ndaja quini ñayivi cúú ña quíxi ínima ná tátuhun tuhun cáhan ña xihín ña cája na. <sup>19</sup> Jáchi chí ínima ñayivi quíxi ña cáhvi núu ini na tátuhun ña cáhvi ini na cahní ña ndji. Ta sa mé cán

quíxi ña cáhvi ini in datáa coo da xihín ñájihí ñani táhan da á xihín in ña cō cúú ñájihí da. Ta sa mé cán quíxi ña ndiáva iní da caja cuíhná da. Ta sa mé cán quíxi ña cávaha jíquí da tuhun sahá ñani táhan da ta jári quíxi ña cánahá da xihín Ndióxi. <sup>20</sup> Tóco ndihí ña cáhvi núu ini ñayivi caja na, ña yóho queá ndája quini a ña. Joo cō cáquini toho ñayivi sahá ña cō ndáhá ña tá cámani cuxu na tá quiahva íin costumbre na —ñacachi Jesús xihín ña xíca tuun xihín á cán.

*Tá ñacandee ini in ña tóho Jesús*

(Mr. 7:24-30)

<sup>21</sup> Tá ñandihí já ñaquee Jesús cuahan chí ñundáhyi cuéntá Tiro xihín cuéntá Sidón cán. <sup>22</sup> Ta nu xíca cuahan cán ñaqueta in ñáñáha ñundáhyi Canaan nu á já cáyuhú ña já cáchí ña já xihín á:

—Xitoho i, da ñaquixi chíchi David caja ndó ñamani candáhví loho ini ndó yehe. Chindee ndó jahyi jíhí i jáchi rí quini ndácaan ini ñá —ñacachi ñáñáha cán xihín Jesús.

<sup>23</sup> Joo ni in túhún tuhun cōó ñanducú ñehe Jesús nu ña. Andá já ñacatívi ña xíca tuun xihín a cán nu á já ñacachi na já xihín á:

—Taxi ndó ña ñan ná quee ña cūhun ña jáchi cáyuhú ña ndácaa ña jata yó vaxi ña —ñacachi ña cán xihín Jesús.

<sup>24</sup> Andá já ñacachi Jesús xihín ñáñáha cán já:

—Nāchindahá Ndióxi yehe vaxi i nuú ñayivi Israel cuití va, mé na cúu tátuhun ndicachi, rí nāndiñúhú — nācachi Jesús.

<sup>25</sup> Andá já ndáva ñá cán naxinu coo ñá nācaxítí ña nu Jesús já cáhí ña já xihín á:

—Caja ndó ñamaní chindeé loho ndó yehe, xitoho i.

<sup>26</sup> Andá já nācachi Jesús já xihín ñá:

—A váha toho candaa i pan ndahá na valí ta já cana i ña nuú tina —nācachi Jesús xihín ñá cán.

<sup>27</sup> Andá já nācachi ñá cán já xihín Jesús:

—Mé a ndaa cáhan ndo joo andá tina, rí ndúu tixi mesa xixi rí ña jácuyu jahyi xitoho rí —nācachi ñá cán xihín Jesús.

<sup>28</sup> Andá já nācachi Jesús já xihín ñá:

—Mé a ndaa cāndeé cáhnu inún Ndióxi. Ná coo a tá quiahva cúni mún —nācachi Jesús xihín ñá.

Chí mé hora já nāndivaha jahyi jíhí ña.

*Ndaja váha Jesús cuahá na quihvi*

<sup>29</sup> Tá nāndihi já naquee Jesús cuahan já naxinu coo a yati yuhú tañuhú Galilea. Já nāndaa in jini yucu ta cán nasacoo a. <sup>30</sup> Ta já nācasáhá nācaca cuahá ndivaha ñayivi já ñéhe na na quihvi saha xihín na cuaá xihín na níhi xihín na réncō ndáha. Ta cuahá ga nuú na quihvi ñéhe na nācasaa na nāchinduu na na nu Jesús. Ta nāndaja váha mé á na. <sup>31</sup> Ta

xihín ña yóho a juú quiahva nācatóntó na tá naxini na ña nācasáhá ndicahan na níhi. Ta nācatóntó na tá naxini na ña nāndivaha ndahá na réncō ta ndicaca váha na quihvi saha ta quiahva já nāndivaha ri na cuaá. Ta nācasáhá na cája cáhnu na Ndióxi, mé a cómi cuéntá sahá na Israel.

*Tá nāshahan Jesús ña cuxu comi mil nataa*  
(Mr: 8:1-10)

<sup>32</sup> Andá já nācana Jesús na xíca tuun xihín á já nācachi a já xihín ná:

—Táhnā ndivaha ini i sahá ñayivi yóho jáchi sa naxinu uní quivi ndúu na xihín i ta chí coo ga ña cuxu na. Ta co cúni chindahá i na nuhu na vehe na jáchi cámani cuxu na ta tiaha náá cuitá na ta cuyu na íchi —nācachi Jesús.

<sup>33</sup> Andá já nācachi na xíca tuun xihín a cán já:

—Coó toho ñuu yati va ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —nācachi na cán xihín Jesús.

<sup>34</sup> Já nācachi Jesús já:

—Ndaja pan cómi ndo.

Já nācachi na cán já:

—Usa pan xihín java tiyacá válí.

<sup>35</sup> Andá já nāshanda Jesús chuun ña ná cacoo ndihi ñayivi nu ñúhu cán. <sup>36</sup> Ta já nātiin a ndihusa pan cán xihín java tiyacá válí cán já nāndiquiahva ndixahvi nu Ndióxi. Ta já nāshanda java ña ta nāshahan ña nuú na xíca tuun xihín á cán ña ná ndicahnda na ña nuú

ñayivi cuaha cán. <sup>37</sup> Ta naxixi tóco ndihi na janda quiahva nachutú tixi na. Ta tá najánditaca na ña nacandoo cán já nachutú usa toyicá xihín ña. <sup>38</sup> Ta na naxixi cán cúu ná comi mil taa ta co cáhan sahá najihí xihín na valí. <sup>39</sup> Ta tá nandihí nandindayí Jesús ñayivi já nandihvi a ini barco já naxinu coo a ñundáhyi cuénta Magdala.

## 16

*Cúni na fariseo xihín na saduceo cuni na in ña xituhún caja Jesús*

(Mr: 8:11-13; Lc. 12:54-56)

<sup>1</sup> Ta ndaja coo naxinu coo na fariseo xihín na saduceo nu Jesús. Ta sahá ña cuni na coto ndojó cuiti ñahá na sahá ña cán quéa naxica na nu á ña ná caja in ña xituhún cuénta indiví já ná candaa ini na á mé a ndaa cúu á ña nachindahá Ndióxi. <sup>2</sup> Anda já nanducú ñehe Jesús tuhun nu ná já nacachi a já xihín ná:

—Tá nahini já cáchí ndo já: “Tiempo vaha ndivaha cacuu a jáchi ndíyéhe cuahá indiví”, cáchí ndo. <sup>3</sup> Ta naha cáchí ndo já: “Viti ndusa quéa cuun ndeé ndivaha javi jáchi ín víco ndivaha ta ín víco cuahá indiví”, cáchí ndo. Co cúu ndó tá quiahva ndaa ndó. Ndá cuénta quéa tiáhva ndó ndicuni ndó ndá quéa coo tá sándehe ndó indiví joo co tiáhva ndó ndicuni ndó ndá tiempo cúu á viti. <sup>4</sup> Nayivi quini, na co cuni candúsa Ndióxi, na cán cúu na xica

ñá ná caja i ña xituhún nu ná. Joo ni in tuhún toho ñaha xituhún a cája ga i nu ná. In tuhún ña candehé na cacuu a ña tandaa quivi ndoho i tá quiahva nandoho profeta Jonás sanahá ndivaha — nacachi Jesús xihín ná.

Já naquee a cuahan.

*Tá sácú Jesús quiahva sahá na fariseo*

(Mr: 8:14-21)

<sup>5</sup> Ta ndaja coo naxinu coo a inga xoo tañuhú xihín na xica tuun xihín á cán ta nandindójó na cán cañehe na pan cuxu na. <sup>6</sup> Tá nandihí já nacachi Jesús já xihín ná:

—Candehé ndo. Cuénta coo ndó xihín na fariseo ta xihín na saduceo jan jáchi ña jánaña na cúu á tátuhun yusa naxaa ña cáva táhan na xihín harina cávaha na pan — nacachi Jesús.

<sup>7</sup> Joo na xica tuun xihín á cán ndítuhún xihín táhan na ña nacachi Jesús já sahá ña coo pan ñehe na cuahan xihín ná.

<sup>8</sup> Ta tá nacandaa ini Jesús ña cáhan na já nacachi a já xihín ná:

—Ndá cuénta quéa co cándee cáhnu ini ndó yehe ta cáhan ndo ña cáchí i ña yóho xihín ndo sahá ña co ñehe ndó pan vaxi ndó. <sup>9</sup> A ñaha cándaa ini ndó. Ndítahan ndicuhun ini ndó ña nandaja cuahá i uhun víxi pan tá naxixi uhun mil taa. Ta sa xini ndó ndaja toyicá najácutú ndo xihín ña nacandoo cán. <sup>10</sup> Ta ndítahan ndicuhun ini ndó ña nacaja i xihín usa pan

tá nandicahnda i ña naxixi comi mil ta ta sa xini ndó ndaja toyicá najácutú ndo xihín ña ñacandoo cán. <sup>11</sup> Ndá cuéntá quea co cándaa toho ini ndó ña coo ñacachi i ña yóho xihín ndó sahá ña coo pan ñehe ndó vaxi ndó. Joo ñacachi i ña cuéntá coo ndó xihín na fariseo ta xihín na saduceo jáchi ña jánaha na cúu á tátuhun yusá naxaa ña cává táhan na xihín harina cávaha na pan —ñacachi Jesús.

<sup>12</sup> Tá ñacachi Jesús ña yóho já ñacandaa ini na xica tuun xihín á cán ña a juú toho sahá yusá naxaa cáhan Jesús saha. Ña cuni Jesús cachi a xihín ná quea cuéntá vaha ná coo na xihín ña jánaha na fariseo xihín na saduceo.

*Tá caxi tuhun ndaa Pedro ña cúu Jesús mé á ñachindahá Ndióxi cacomí a cuéntá sahá ñayivi*

*(Mr. 8:27-30; Lc. 9:18-21)*

<sup>13</sup> Tá naxinu coo Jesús ñundáhyi Cesarea cuéntá Filipo já nandaca tuhún a na xica tuun xihín á cán já ñacachi a já xihín ná:

—Ndá da cáchi ñayivi cúu yehe, da ñachindahá Ndióxi nduu ñayivi —ñacachi Jesús.

<sup>14</sup> Já ñacachi na cán já:

—Java na cáchi na ña cúu ndó Juan, da ñacaja ndúta ñayivi. Ta java na cáchi na ña cúu ndó profeta Elías. Ta java na cáchi na ña cúu ndó profeta Jeremías. Ta java na cáchi na ña cúu ndó in táhan profeta nasanduu sanahá —ñacachi na.

<sup>15</sup> Anda já ñacachi Jesús já xihín ná:

—Ta ndóhó ri, ndá da cáchi ndó cúu u —ñacachi a.

<sup>16</sup> Anda já nanducú ñehe Simón Pedro tuhun nu Jesús já ñacachi da já xihín á:

—Mé ndó cúu Cristo, ña ñachindahá Ndióxi cacomí cuéntá sahá ñayivi. Ta cúu ndó in tuhún jini já jahyi Ndióxi, mé a tácu in indivi —ñacachi da.

<sup>17</sup> Anda já nanducú ñehe Jesús tuhun nu dá já ñacachi a já xihín dá:

—Tahví nahá cúun, Simón, jahyi Jonás jáchi ni in tuhún ñayivi coo ñacaxi tuhun ña yóho xuhun. In tuhún tátá i, mé a in indivi ñanaha ña yóho nuun. <sup>18</sup> Ta quiahva joho cáchi ri yehe saha yóhó: Yohó cúun Pedro ta quivun cuni cachi a tóto. Ta cúun tátuhun yuu ndúhu sahá in vehe nuú cavaha i veñuhu mí i jáchi yóhó caca nuún cahun sahá i nuú ñayivi já ná quee vaha na xihín tiñahá sacuahá já ná a cuhun na indayá. <sup>19</sup> Ta caja i xuhun ña ná cuu ndicanún nuú ñayivi ndaja ndiquiahva na mé ná ndáha i cacomí i cuéntá saha ná. Cacu a tátuhun quiahva i yávi nuun ña ná cunún íchi nuú ndihvi ñayivi cacomí i cuéntá saha ná. Tá co sahun ñamaní ná ndihvi ñayivi cán já quea a quiahva toho i ñamaní nu ná. Joo tá sahun ñamaní nu ná ndihvi na cán já quea quiahva ri yehe ñamaní nu ná —cáchi a xihín Pedro.



20 Anda já nasahnda Jesús chuun nuú na xíca tuun xihín á cán ña ná a cáxi tuhun na xihín ni in tuhún ñayivi ña cúu mé á Cristo, mé á nachindahá Ndióxi cacomí cuéntá sahá ñayivi.

*Tá cáxi tuhun Jesús ña quivi a*  
(Mr. 8:31-9:1; Lc. 9:22-27)

21 Ta janda mé quivi já nacasáhá Jesús cáxi tuhun a xihín na xíca tuun xihín á ña ndítahan nu á cuhun a ñuu Jerusalén. Ta mé cán ndoho ndivaha ini a ndahá na sacuahá veñuhu xihín ndahá na sacuahá nuú jutu xihín ndahá na jána ley Moisés. Ta caja xíxi ri na cán va xihín á ta cahní ñahá na. Joo tá ná xinu uni quivi nditacu tucu a. 22 Anda já natavá xóo Pedro Jesús já nacasáhá da jánani ñahá da já nacachi da já xihín á:

—Ama ná yaha ña yóho xihín ndó, xitoho i. Ná a quiahva toho Ndióxi ñamani ndoho ndó já —nacachi Pedro xihín Jesús.

23 Joo nacava nuu Jesús sándehé a nu Pedro ta já cáchí a já xihín dá:

—Cuáhán quee Satanás, rí cúu tiñahá sacuahá. Tá quiahva ín na sáji nuu nu ná quiahva já íun nuú i. Jáchi co cáhvi inún tá quiahva cáhvi ini Ndióxi joo cáhvi inún tá quiahva cáhvi ini ñayivi cuéntá ñuyíví yóho —nacachi Jesús xihín dá.

24 Anda já nacachi Jesús já xihín na xíca tuun xihín a cán:

—Ndá na cúni candico yehe ndítahan nu ná ndihi chága ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coó caja toho a ná quivi na sahá i. 25 Jáchi ndá na catóo coo chága ñuyíví yóho ndihi saha ná. Joo ndá na sahan ndeé ini quivi sahá i xihín sahá tuhun Ndióxi, ñehé táhvi ná catacu na anda ama cáa quivi. 26 Vatí ná quee vaha in na ñuyíví yóho ta cómí na tóco ndihi ñaha ñuyíví yóho joo ndá chuun quéa tá nu ndihí ndihi saha ná indayá. Jáchi ni in ñaha a cuú chahvi in na saha ínima ná ña ná a cuhun na indayá. 27 Jáchi yehe, da nachindahá Ndióxi nduu ñayivi quixi tucu u xihín ndée Ndióxi, tátá i ta xihín ndée táto Ndióxi. Mé tiempo cán naha ndaja cáhn cúu yehe. Anda já chahvi i nuú in in ñayivi sahá ñaha nacaja na nani nasanduu na ñuyíví yóho. 28 Mé a ndaa ná cahan i xihín ndo ña java na ndúu yóho a quíví toho na janda quiahva ná xinu quivi cuni na quixi tucu yehe, da nachindahá Ndióxi nduu ñayivi cacomí i cuéntá sahá na cúu cuéntá mí i —cáchí Jesús.

## 17

*Tá nandijama nuu Jesús quiahva cáa*

(Mr. 9:2-13; Lc. 9:28-36)

1 Tá nayaha íñu quivi já nandaa Jesús in yucú jícó ta ndáca táhan Pedro xihín Jacobo xihín ñani da Juan

cuahān nā xihīn á. <sup>2</sup> Ta nu táhyi mé nā cān nandijama quiahva cáa. Ta a juú quiahva nandiyéhe nuu á tá quiahva ndiyéhe candii. Ta jáhma ndíxi a nandiyaa cachi ña ta chí a juú quiahva yéhe ña. <sup>3</sup> Ta ndaja coo nandaca náha Moisés xihīn Elías ta nacasáhá ndítuhún da xihīn Jesús. <sup>4</sup> Anda já nandicahā Pedro xihīn Jesús já nacachi da já xihīn á:

—Vaha cúu ndúu nde yóho, xitoho nde. Tá cúni ndó cavaha nde unī vehe tiyahvá válí. In a coo mé ndó ta inga coo Moisés ta inga coo Elías — cáchi Pedro.

<sup>5</sup> Ta nani cáhan Pedro nanuu in víco jata ná ta nacava nuu a nā. Ta a juú quiahva ndató yéhe a. Ta tañu víco cān naxini johō na ña cáhan in a ta já cáchi a já:

—Da yóho cúu jahyi manī i ta cáji ini i xihīn dá. Cuni johō ndó nu cáhan da — nacachi mé a cān.

<sup>6</sup> Tá naxini johō nā xíca tuun xihīn Jesús cān ña cáhan yóho já nacaxítí nā janda quiahva naxinu nuu ná nu ñúhu. Ta a juú quiahva ná yihví nā. <sup>7</sup> Anda já nacayati Jesús nu ná ta nacani ndaa ndáha nā já nacachi a já xihīn ná:

—Cuándacōo ndó. A cáyihví toho ndó —nacachi Jesús xihīn ná.

<sup>8</sup> Ta tá nandiñehe nā cān nuu ná já naxini na ña iin in túhún jini mé va Jesús.

<sup>9</sup> Ta tá nanuu na jini yúcu cān já nasahnda Jesús chuun nu ná já nacachi a já xihīn ná:

—A cáxi tuhun ndó ña naxini ndó yóho nuú ni in ñayivi janda quiahva ná nditacu tucu yéhe, da nachindahá Ndióxi nduu ñayivi —nacachi Jesús.

<sup>10</sup> Já nacachi nā cān já xihīn á:

—Ndávaha cáchi nā jánaha ley Moisés ña ndítahan quixi jihna ñúhu profeta Elías — nacachi na.

<sup>11</sup> Já nacachi Jesús já xihīn ná:

—Mé a ndaa jihna ñúhu quixi Elías ta ndaja vaha ndihi da ñaha. <sup>12</sup> Joo mé a ndaa ná cáhan i xihīn ndo ña sá naquixi va Elías joo coo naxeen na ndicuni na da. Ta nacaja na tá quiahva cúni mé ná xihīn dá. Ta quiahva já jándoho ri na ini yéhe, da nachindahá Ndióxi nduu ñayivi —nacachi Jesús.

<sup>13</sup> Anda jáví nacandaa ini nā xíca tuun xihīn Jesús cān ña cáhan Jesús saha Juan, da najácandúta ñayivi tá nacachi a ña sá naquixi va Elías.

*Tá nandaja vaha Jesús in da loho ndacaan inima quini ini (Mr. 9:14-29; Lc. 9:37-43)*

<sup>14</sup> Ta tá sá nanuu na ta naxinu coo na nu ndúu cuahá ñayivi cān já naxinu coo in dataa ta já nacaxítí da nu Jesús. Já nacachi da já xihīn á:

<sup>15</sup> —Candáhví loho ini ndó jahyi i, xitoho i jáchi xihí yihí da ta ndóho ndivaha ini da. Ta cuahá tañu ndícava da nu

ñúhu ita á ini ticuñi. <sup>16</sup> Ta ñéhe e da ñacasaa i nuú na xíca tuun xihín ndó yóho joo coó ñacuu ndaja vaha na da — ñacachi da xihín Jesús.

<sup>17</sup> Anda já ñacachi Jesús já:

—Ndáhví nahá ñacuu ndó jáchi sa cuahá ndivaha quivi iní i xihín ndó ta a ñaha candeé ini ndó yehe. Cúú ndó ñayivi quini ndivaha chí co ndeé ga ini i xihín ña cája ndó. Taxi ndó ta loho jan chóho — ñacachi Jesús.

<sup>18</sup> Anda já najánani Jesús rí quini ndácaan ini da loho cán. Chí ñaqueta rí cuahan ri ta mé hora já ñandivaha da loho cán.

<sup>19</sup> Tá ñandihí já ñacahan jehé na xíca tuun xihín Jesús cán xihín á já ñacachi na já:

—Ndávaha coó ñacuu caja nde tavá nde ínima quini ñasandacaan ini da loho jan — ñacachi na xihín Jesús.

<sup>20</sup> Já ñacachi Jesús já xihín ná:

—Coó ñacuu caja ndó jáchi co candeé cáhnu ini ndó yehe. Mé a ndaa cáhí i xihín ndó, loho tíin ndivaha cáa in ndíqui mostaza joo ndúu dó in yíto cáhnu. Tá candeé loho ini ndó yehe viti vaxi quivi candeé chága ini ndó yehe. Anda jáví cuu caja ndó in ñaha ihvi ndivaha tátuhun ña cuu cachi ndó xihín in yúcu ña ná caxoo a ta chí caxoo ndusa ña. Tóco ndihí ñaha cuu caja ndó tá ná candeé ini ndó yehe. <sup>21</sup> Joo tá cúni ndó tavá ndó ínima quini tátuhun rí yóho xíní ñúhú cahun ndó ta caça tahví ndó

nu Ndióxi —cáhí Jesús xihín ná.

*Tá cáxi tūhun tucu Jesús ña quivi a*

(Mr. 9:30-32; Lc. 9:43-45)

<sup>22</sup> Ta ndaja coo xíca tútu ndihí na xíca tuun xihín Jesús cán cuahan na xihín á chí estado Galilea. Ta já ñandicani Jesús nuú na cán ña tandaa quivi ndiquiahva ñayivi mé á ndáha na cahní ñahá, mé a ñachindahá Ndióxi nduu ñayivi. <sup>23</sup> Ta ñacachi a xihín ná ña tá sa ná vaha uní quivi já nditacu tucu a. Tá ñacachi Jesús ña yóho xihín na xíca tuun xihín á cán já ñacacuéha ndivaha ini na.

*Tá ñachahvi Jesús jūhún impuesto cuéntá veñuhu cáhnu ñuu Jerusalén*

<sup>24</sup> Tá ñaxinu coo Jesús ñuu Capernaum xihín na xíca tuun xihín á já ñaxinu coo na jataca jūhún impuesto cuéntá veñuhu nu Pedro. Já ñacachi na já xihín dá:

—Á co cháhvi toho Jesús, da jánaha ndohó jan jūhún impuesto cuéntá veñuhu ñuu Jerusalén — ñacachi na xihín Pedro.

<sup>25</sup> Anda já ñacachi Pedro já:

—Cháhvi a ña — ñacachi da.

Anda já ñandihvi Pedro ini vehe nu ndácaan Jesús joo jihna ñúhú ñandicahan Jesús xihín dá já ñacachi a já:

—Ndía cáhvi inún, Simón. Yo já ndítahan nu cháhvi jūhún cuéntá impuesto nuú na sáhdá chuun ñuyíví yóho. Á na ñuu mé ná á na ñuu toho — ñacachi Jesús.

26 Já naçachi Pedro já:

—Na tóho va sá cháhvi jiuhún cája na —naçachi Pedro.

Já naçachi tucu Jesús já:

—Sahá ña cán quéa mé na ñuu cō cháhvi toho na. 27 Joo mí cō cúni yō ña ná ndicuita na xōho sahá ña cán quéa cuhún tañuhú. Ta mé cán tavún tiyacá. Ta rí nu cuítí ná tavún jan candehún yúhu rí jáchi jan nditáhún in jiuhún ca. Ta cañehe a cuhun chahvún saha mún ta saha mí i jáchi queta va — naçachi Jesús xihin Pedro.

## 18

*Ndicani Jesús ndá na cúu na in chága saha*

(Mr. 9:33-37; Lc. 9:46-48)

1 Mé tañu já naçayati na xíca tuun xihin Jesús nu á já naçasáhá ndáca tuhún ñahá na já naçachi na já xihin á:

—Yo já cacuu da cáhnu chága tá ná tandaa quivi cacomí Ndióxi cuéntá sahá ñayivi —naçachi na xihin Jesús.

2 Anda já naçana Jesús in da loho já naçacandichi a da mañnú java na cán. 3 Já naçachi a já:

—Mé a ndaa ná cahan i xihin ndo ña ndítahan ndaja núu ndó mé ndó ta nduu ndó tátuhun na valí já cuu cacomí Ndióxi cuéntá saha ndo. 4 Na cúni cacuu na cáhnu chága tá cacomí Ndióxi cuéntá sahá ñayivi ndítahan nduu na tátuhun in na coó saha ta já nduu na tátuhun taa loho yóho. 5 Ta ndá na

ná ndiquehe in aloho tátuhun da yóho sahá ña cúni na yehe, na cán cúu na ndiquehe ri na yehe viti.

*Tá jándacava ñayivi inga na nuú cuachi*

(Mr. 9:42-48; Lc. 17:1-2)

6 'Ta ndá na ná jándacava in na ndahvi, na cándeé ini yehe nuú cuachi janda vaha chága ná candico in yúu yojó jico ná ta ná ndihi sahá na cahá tañuhú. 7 Ndáhvi nahá naçuu ñayivi ñuyívi yóho jáchi mé a ndaa in cuahá ndivaha ña núu ñuyívi yóho. Ña cán quéa ndácava cuahá ñayivi nuú cuachi joo ndáhvi nahá naçuu na jándacava inga na nuú cuachi.

8 'Sahá ña cán quéa tá ndaha ndo á saha ndo jándacava ndohó nuú cuachi, chituhun ndó a ta jácana xíca ndó ña ná cuhun a. Jáchi vaha chága ná cuhun rénco ndó á lundu ndó indivi a juú ga ña ná cuhun ní yiquí cuñu ndó indayá nu cáyí ñúhu ita anda ama cáa quivi. 9 Ta tá nduchú núu ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchi vaha chága ná cuhun ndó indivi xihin in tuhún nduchú núu ndo a juú ga ña ná cuhun ndó xihin ndívi nduchú núu ndo indayá nu cáyí ñúhu ita.

*Tá sácú Jesús quiahva sahá in ndicachi, rí nandiñuhú*

(Lc. 15:3-7)

10 'Coto a quéhe núu ndó ni in na cúu cuéntá mí i jáchi cáchí i xihin ndó ña tátō Ndióxi, mé na ndaá na

cán ní tiempo ndíta na nu Ndióxi, tátá i indiví. <sup>11</sup> Jáchí yehe, da nachindahá Ndióxi nduu ñayivi naquixi i jácacu u ñayivi, na cája cuachi.

<sup>12</sup> Cuni johó ndó ná cahan i xihín ndo: Tá cómi in dataa in ciento ndicachi ta tá ndiñúhú in rí já queá ña cája da queá jándacoo da comi jico sahún comi rí cán yúcu ta já quee da cahun da ndinducú da mé rí nandiñúhú cán. <sup>13</sup> Ta tá ndiñehe dá ri cajii chága ini da saha rí nandiñúhú cán a juú ga sahá comi jico sahún comi rí sa ndúu nu dá cán. <sup>14</sup> Ta quiahva já ndoho ri Ndióxi, tátá i jáchí co cuni mé á ña ná ndihi sahá ni in na cándeé ini mé á.

*Ndítahan caja cáhnu ini sahá ñani táhan í*  
(Lc. 17:3)

<sup>15</sup> Tá cája quini ñani táhan ndó xihín ndo já queá tavá xoo ndó da ta cahan ndó xihín dá ña ná ndicuni da ña a váha toho cája da. Ta tá ná tahvi ini da sahá cuachi cája da já queá sa nandiquehe táhan manj tucu ndó xihín dá. <sup>16</sup> Joo tá co cuni da cuni johó da nu cahan ndo já queá ndítahan nu ndó cana ndó in á ivi chága ñani táhan ndó já ná cacua na testigo sahá ña cahan ndo. <sup>17</sup> Ta tá co cuni da cuni johó da nu cahan na cán xihín dá já queá ndítahan cahun ndó nu tóco ndihi na cúu cuéntá Jesús táca veñuhu. Ta tá co cuni da cuni johó da nu cahan ndihi na cán xihín dá já queá ndítahan caja ndó xihín dá tá quiahva cája ndó

xihín in da tóho, da co cándusa Ndióxi á in da jataca jihún cuéntá impuesto.

<sup>18</sup> Mé a ndaa ná cahan i xihín ndo ña tóco ndihi ñaha ná cató ndo ñuyiví yóho candico a janda indiví. Ta tóco ndihi ña ná ndaxi ndo ñuyiví yóho janda indiví ndaxi ña.

<sup>19</sup> Ta jári cahan i ña yóho xihín ndó. Tá jándique táhan tuhun ivi ndó ñuyiví yóho ta tá mé a ndaa in cúu ndó sahá ña xica tahvi ndó nu Ndióxi, mé á lin indiví já queá quiahva tátá i ña nu ndo. <sup>20</sup> Jáchí nu ndúu ivi á unj na ta táca na cuéntá mí i já queá tañu na cán ndacaan i —nacachi Jesús.

*Tá sácú Jesús quiahva sahá in da co cuni caja cáhnu ini da sahá inga da*

<sup>21</sup> Ta ndaja coo nacayati Pedro ndaca tuhún da Jesús já nacachi da já:

—Xitoho i, ndaja tañu xini ñúhú caja cáhnu ini i sahá ñani táhan i tá cája núu da xihín i. Á ndítahan nuú i caja cáhnu ini i saha dá janda usa tañu —nacachi da xihín Jesús.

<sup>22</sup> Já nacachi Jesús já xihín dá:

—A juú janda usa tañu cuiti ndítahan caja cáhnu inún sahá ñani táhún. Vaha janda comi ciento comi jico uxu tañu ndítahan nuun caja cáhnu inún sahá ñani táhún.

<sup>23</sup> Cáchí i ña yóho xihín ndó jáchí tá cómi Ndióxi cuéntá sahá ñayivi cúu á táhún ña nayaha xihín in rey tá

naçasáhá dā jātaca da cuéntá nuú nā yícá nū dá. <sup>24</sup> Mé tañu já ñéhe na in dā yícá cuahá millón nū dá naçasaa nā. <sup>25</sup> Ta sahá ña coó naucu chahvi da ña yícá dā sahá ña cán quea nasahnda rey chuun ña ná jicó nā mé dá xihín ñajihí dā xihín jahyi válí dā ta janda ñaha da viti ña ná cuu ndiquehe rey cán cuéntá dā. <sup>26</sup> Anda já naçaxítí dā yícá cán nū mé rey já naçasáhá xíca tahví dā já cáchí dā já: “Caja ndó ñamaní, xitoho i candati too chága ndó yehe, ndáhvi i, já chahvi ndihi i ña yícá i nū ndo”, naçachi da xíca tahví dā nū rey cán. <sup>27</sup> Anda já naçandáhvi ini rey cán dā ta naçaja cáhnu ini a saha tóco ndihi ña yícá dā já najani a da cuahan dā.

<sup>28</sup> Ta tá naqueta dā yícá cán cuahan dā já nandique táhan da xihín inga dā cúú mozo. Ta mé mozo cán yícá dā loho va nuú dā cán. Ta já naçasáhá dā ndáca yihí dā cuéntá nuú dā cúú mozo jácuahnú ñahá dā. Já cáchí dā já: “Chahvún ña yícún nuú i”, cáchí dā cán. <sup>29</sup> Anda já nandacava xítí mé dā cúú mozo cán nū dá já naçasáhá xíca tahví dā nū dá já cáchí dā já xihín dá: “Cajún ñamaní candati too chágun yehe, ndáhvi i, já chahvi ndihi i ña yícá i nuun”, naçachi dā cúú mozo cán. <sup>30</sup> Joo coó naheen da ta ña naçaja da quea nasahan dā nachicaan dā dā cúú mozo cán vecaa janda quiahva ná cuu chahvi ndihi da ña yícá dā nū dá. <sup>31</sup> Ta tá naçini java

ga nā cúú mozo cán ña yóho já nandihihvi ndivaha ini na ta chí ndáva na nasahan nā naçaxi tuhun na nū mé rey cán ndaja cáa ña naucu. <sup>32</sup> Anda já xójo ndivaha ini mé rey cán chí naçana da dā naçayícá cán já naçachi da já xihín dá: “Mozo quini ndivaha cúú yóho. Cuahá ndivaha jihún naçayícún nuú i joo naçaja cáhnu ini i saha tóco ndihi a jáchi naçica tahvún nuú i. <sup>33</sup> Quiahva já ndítahan ri nū yóho va caja cáhnu inún sahá ña yícá ñani táhún nuun jáchi já naçaja i xuhun”, naçachi rey cán. <sup>34</sup> Ta sahá ña xójo ndivaha ini mé rey cán xihín dá sahá ña cán quea nandiquiahva da dā yícá cán ndáha nā jácaxáhan ñahá cán janda quiahva ná chahvi da saha tóco ndihi ña yícá dā —cáchí Jesús.

<sup>35</sup> Já naçachi tucu Jesús já:

—Quiahva já caja ri Ndióxi, tátá i, mé a íin indivi xihín ndóhó va tá co cája cáhnu ini ndó sahá ñani táhan ndó xihín ndinuhu ini ndó —cáchí Jesús.

## 19

*Jánaqa Jesús nuú nā sa natandaha ña co ndítahan jándacoo táhan na*

(Mr. 10:1-12; Lc. 16:18)

<sup>1</sup> Tá nandihí naçachi Jesús ña yóho já naçquee a estado Galilea já naçinu coo a estado Judea, ña íin inga xoo yuta Jordán cán. <sup>2</sup> Ta a juú quiahva cuahá ñayivi nandico jatá ta nandaja vaha mé á nā quihvi.

<sup>3</sup> Joo ndaja coo java na fariseo nacayati na nu Jesús sahá ña coto ndojó ñahá na cúnj na. Já nacachi na já xihín á:

—Á núná nuú in dataa jándacoo da ñájíhí da saha ndá ña nacuu —nacachi na fariseo cán.

<sup>4</sup> Anda já nacachi Jesús já:

—Á a ñaha cahvi ndó tuhun Ndióxi nu cáhí a ña janda mé saha tá nacavaha Ndióxi ñayivi nu cuítí já nacavaha dataa ta nacavaha ñáñáha.

<sup>5</sup> Ta nacachi tucu a ña ndítahan nuú dataa jándacoo da tátá da xihín náná da já ndique táhan da xihín ñájíhí da. Já xinu ndíví na cán cacuu na tátuhun in víxí yiquí cuñu na. <sup>6</sup> Sahá ña cán queá co cúú ga na ivi yiquí cuñu sahá ña nanduu na tátuhun in túhún yiquí cuñu na. Sahá ña cán queá co ndítahan nuú da cán janí táhan da ña najacátahan Ndióxi tá natandaha ná —nacachi Jesús.

<sup>7</sup> Anda já nandaca tuhún tucu na cán Jesús já nacachi na já:

—Joo já cachi ndó xihín nde: ndá cuéntá queá nasahnda ri Moisés chuun ña cuu cavaha in dataa in tutu quiahva da nu ñájíhí da ta xihín ña cán cuu jándacoo da ña —nacachi na cán xihín Jesús.

<sup>8</sup> Já nacachi Jesús já:

—Sahá ña táhyí ndivaha ínimá ndo sahá ña cán queá sahan Moisés ñamaní nu ndó ña cuu cavaha ndó tutu quiahva ndó nu ñájíhí ndo

ñá ná jándacoo ndó ña. Joo tá nacavaha Ndióxi ñayivi nu cuítí coo nacacúni toho a coo ña yóho. <sup>9</sup> Cuni johó ndó ná cahan i xihín ndo. Tá ná jándacoo in dataa ñájíhí da ta co cúú á sahá ña nacaja ñá cuachi xihín inga ta ta tá tandaha dá xihín inga ñá já queá cája da cuachi nu Ndióxi. Ta quiahva já ín ri cuachi da ná tandaha xihín ñá nacandoo cán —cáhí Jesús.

<sup>10</sup> Tá naxini johó na xíca tuun xihín Jesús cán ña yóho já nacachi na já:

—Tá ta quiahva já cáa janda vaha chága ná a tandahá ñayivi, dá já —nacachi na cán.

<sup>11</sup> Já nacachi Jesús já:

—A juú ndihi ñayivi candaa ini ña cahan i yóho. Ndinuhu na ndínuna xíní túni cája Ndióxi, na cán cúú na candaa ini ña yóho. <sup>12</sup> Ndúu java dataa ta a cuú tandaha da jáchi já nacacu da ta já ta cúú mé va da. Ta java da a cuú tandaha da jáchi já nacaja ñayivi xihín ná ta já ta cúú mé va na. Ta java da a tandaha da jáchi cúní da ndiquiahva ní da mé dá nu Ndióxi ña ná cacomí a cuéntá saha dá. Ta ndá ndó, na ndínuna xíní túni, candaa ini ndó ña yóho —nacachi Jesús.

*Cája yii Jesús na valí*

(Mr. 10:13-16; Lc. 18:15-17)

<sup>13</sup> Tá nandihí já ñéhe na java na valí nacasaá na nu Jesús ña ná chinúu a ndahá a jini ná ta já caça tahví a

nu Ndióxi saha ná. Joo ndaja coo na xica tuun xihin á cán nacasáhá na cája cuēhe na xihin na ndáca na valí cán. <sup>14</sup> Já nacachi Jesús xihin na xica tuun xihin á cán já:

—Quiahva ndó ñamaní ná quixi na valí nuú i ta a cájí nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho —nacachi Jesús.

<sup>15</sup> Tá nandihí já nachinúu Jesús ndáha á jiní na valí cán. Anda já naquee a cuahan.

*Nditúhún in da cuicá xihin Jesús*

(Mr. 10:17-31; Lc. 18:18-30)

<sup>16</sup> Ta ndaja coo naxinu in dataa nu ín Jesús ta nandaca tuhún ñahá da já nacachi da já:

—Maestro, mé ndó cúu ndó taa vaha ña cán quéa ndáca tuhún i ndohó ndía ndítahan caja i já ná ñehe táhvi i cūhun i indiví coo i anda ama cáa quivi —nacachi da xihin Jesús.

<sup>17</sup> Já nacachi Jesús já xihin dá:

—Ndá cuéntá quéa cáchún xihin i ña cúu u da vaha. Ni in túhún toho ñayivi coo cúu ná na vaha ñuyiví yóho. In túhún Ndióxi cuití va quéa vaha. Tá cūnun catacún nu ín mé á já quéa xíní ñuhú cajún ña sáhdá tuhún Ndióxi —nacachi Jesús xihin dá.

<sup>18</sup> Já nacachi da cán já:

—Ndá cúu mé ña ndítahan caja i —nacachi da.

Já nacachi Jesús já xihin dá:

—Coto a cáhnún ndii. Coto a cóun xihin ñájihí á yí ñani táhún. Coto a cája cuíhnún. Coto a cáhun ña tuhún sahá ñayivi. <sup>19</sup> Nditahan caja cáhnún tátún xihin nánún. Ta ndítahan quihvi inún ñani táhún tá quiahva quihvi inún mún —nacachi Jesús.

<sup>20</sup> Já nacachi da yúta cán já xihin á:

—Janda taa loho nasacuu u nacasáhá i cája i tóco ndihí ña sáhdá Ndióxi caja i. Ndía cúu ga ndítahan caja i —nacachi da.

<sup>21</sup> Já nacachi Jesús já xihin dá:

—Tá ta cūnun cacuún in taa ndacú nu Ndióxi cuáhán jicún tóco ndihí ñahún jan ta ndacahndún jiuhún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —nacachi Jesús.

<sup>22</sup> Tá naxini johó da yúta cán ña yóho já naquee cuéha ndivaha da cuahan da jáchi da cuicá ndivaha cúu dá.

<sup>23</sup> Anda já nacachi Jesús xihin na xica tuun xihin á cán já:

—Mé a ndaa ná cachi i xihin ndó ña ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná. <sup>24</sup> Jáchi janda cama chága cuu vaha in camello ini in yávi sahá yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —nacachi a.

<sup>25</sup> Tá naxini johó na xica tuun xihin Jesús cán ña yóho



já *na*catóntó *ndi*vaha na ta *na*ndaça *tuh*ún táhan na já cáchi ná já:

—Ndá ná *cu*ú ná *cu*u *ca*cu ndaa *ín*ima, dá já —cáchi ná.

<sup>26</sup> *Nand*icoto *nih*ni *Jesús* nu ná já *na*cachi a já *xih*in ná:

—Ni in na *a* *cu*ú *ca*ja *ña* yóho *joo* *Ndióxi* *qué*a *cu*u *ca*ja *ña* *já*chi ni in *ña*ha *co* *íhvi* toho nu *Ndióxi* —*na*cachi *Jesús*.

<sup>27</sup> *And*a já *na*cachi *Pedro* já:

—*Joo* *nde*he, *naj*ándacoo *ndi*hi *nde* *ña*ha *na*sacomí *nde* ta *ndí*co *nde* *ndó*hó. *Ndí*a *ñe*he *tá*hvi *nde* *ca*ja *ndó* —*na*cachi *Pedro* *xih*in *Jesús*.

<sup>28</sup> *And*a já *na*cachi *Jesús* já *xih*in dá:

—Mé *a* *nda*a ná *ca*chi *i* *xih*in *ndo*. Tá ná *tand*aa *qui*vi *ndu*u *sa*á *tó*có *ndi*hi *ña*ha já *ca*coo *ye*he, *da* *na*chindahá *Ndióxi* *ndu*u *ña*yivi *nu*ú *ndicá*hnu *ndi*vaha *i*. Ta *cán* *ca*coo *ri* *ndó*hó, *na* *na*xica *tu*un *xih*in *i* *nu*ú *uxu* *ívi* *tá*yi *vá*ha. Ta *cán* *ca*ja *vi*í *ndó* *sa*há *ndí*huxu *ívi* *tá*hnda ná *na*quixi *ch*ichi *Israel*. <sup>29</sup> Ta *nda* ná *naj*ándacoo *ve*he na á *ñ*ani na á *qui*ahva na á *tát*a ná á *nán*a ná á *ñ*ájíhí ná á *ja*hyi na á *ñ*undáhyi ná *sa*há *ye*he, ná *cán* *cu*ú ná *ñe*he ná *cu*aha *chá*ga *ví* *ña*ha. Ta *jat*a *ña* *cán* *ñe*he *tá*hvi ná *ca*tacu na nu *Ndióxi* *and*a *ama* *cá*a *qui*vi. <sup>30</sup> Ta *ndú*u *cu*ahá ná *ín* *sa*ha *ñ*uyiví *yó*ho *viti* *joo* *vaxi* *qui*vi *ca*cuu na ná *co*ó *sa*ha nu *Ndióxi*. Ta *ndú*u *cu*ahá ná *co*ó *sa*ha *ñ*uyiví *yó*ho *viti* *joo* *vaxi* *qui*vi *ca*cuu na ná *ín* *sa*ha nu *Ndióxi* —*na*cachi *Jesús*.

## 20

*Sá*cú *Jesús* *qui*ahva *sa*há *java* *da* *sá*hnda *uva*

<sup>1</sup> Já *na*cachi *Jesús* já *sá*cú a *qui*ahva:

—*Nu*ú *ca*comí *Ndióxi* *cu*énta *sa*há *ña*yivi *cu*ú á *tá*tuhun *ña* *yó*ho: *ín* in *da*taa *na*ha *chá* *na*quee *da* *cu*ahan *da* *nducú* *da* *mo*zo *ca*ja *chú*un *da* *ca*hnda *da* *uva* nu *ñú*hu dá. <sup>2</sup> Ta *na*candoo *da* *chahvi* *da* in *jiuhún* *ca*a *naní* *denario* in *qui*vi. Ta já *na*chindahá *da* *mé* *mo*zo *cán* *cu*ahan *da* *ca*ja *chú*un *da* nu *ñú*hu dá. <sup>3</sup> Tá *na*ndihi já *na*quee *tucu* *da* *xih*in *ña*ha *ñú*hu *cán* *tá*tuhun *ca*a in *na*ha já *na*nditahan *da* *java* *da* *ndú*u *nún*a *uun* *nu*ú *yahvi*. <sup>4</sup> Já *na*cachi *mé* *da* *xih*in *ña*ha *ñú*hu *cán* já: “*Cu*áhán *ri* *ndó*hó *va* *ca*hnda *ndó* *uva* nu *ñú*hu *i* *ta* já *chahvi* *i* *ndó*hó *tá* *qui*ahva *ndít*ahan nu *ndó* *que*he *ndó*”, *na*cachi *da*. Já *na*quee *mo*zo *cán* *cu*ahan *da* *já*quee *da* nu *ñú*hu dá. <sup>5</sup> Ta *tá* *na*cuu *ca*xivi já *na*queta *tucu* *da* *xih*in *ña*ha *ñú*hu *cán* *cu*ahan *da* *ta* *na*tiin *da* *java* *ga* *da* *ca*ja *chú*un *xih*in dá. Ta *tá* *na*cuu *ca*a *un*i *na*tiin *chá*ga *da* *da* *já*quee nu *ñú*hu dá. <sup>6</sup> Ta *tá* *na*cuu *tá*tuhun *ca*a *uh*un *sa*hini *na*queta *tucu* *da* *ta* *nu*ú *yahvi* *cán* *na*xini *chá*ga *da* *da* *ndú*u *nún*a *uun*. Já *na*cachi *da* *já* *xih*in *da* *ndú*u *cán*: “*Ndá* *cu*énta *qué*a *sa* *na*cuu *ndiví* *yaa* *ndú*u *ndó* *yó*ho”, *na*cachi *da* *xih*in *da* *ndú*u *cán*. <sup>7</sup> Ta *na*nducú *ñe*he *da* *cán* *tuhun* *já* *cá*chi *da* *já*: “*Co* *cá*ja *chú*un *nde* *já*chi *co*ó *na* *quí*xí *ndú*cú *nde*

caja chún nde”, nācachi da cán. Andá já nācachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já chahvi i ndohó tá quiahva ndítahan nu ndó quehe ndó”, nācachi da.

8 Ta tá sa nācuaá já nācachi da xihín ñaha ñúhu cán xihín da cómi chuun nu mozo cán ña ná cana da da cúu mozo cán já ná quehe yahvi da sahá chuun nācaja da. Ta da naquihvi nācaja chún nu ndíhí cán, da cán cúu da jihna ñúhú ná quehe yahvi. Tá nandihí cán ná quehe yahvi da naquihvi nu cuití. 9 Andá já nācasaa da naquihvi caja chún caa uhun sahini já nāquehe in in da cán in denario. 10 Ta ndaja coo tá nācani a nuú da naquihvi caja chún janda naha cán quehe yahvi da já queá nācahan da ña cuaha chága jjuhún ndiquehe da nuú da naquihvi caa uhun sahini cán. Joo quiahva já in denario nāquehe ri in in da cán. 11 Sahá ña cán queá nācasahá da cahan cuachí da xihín da xihín ñaha ñúhu cán. 12 Já nācachi da já: “Da nandai cuu caja chún nu ndíhí cuí yóho in hora cuití nācaja chún da. Ta tá quiahva nāchahvi ndó ndehe, da nācaja chún ndiví yaa nu ndítahyí quiahva já nāchahvi ri ndó nuú da caa va”, nācachi da cahan cuachí da cán. 13 Andá já nācachi da xihín ñaha ñúhu cán xihín in táhan mozo cán já: “Candehé, amigo. Co cāja quini toho i

xuhun. Á a juú in denario nācando i chahvi i nuun. 14 Juhun ña ndítahan quehún ta cuanuhun. Jáchi cuni chahvi i nuú da nācaja chún in hora cuití va tá quiahva nācando i chahvi i nu yóho. 15 Jáchi núná nuú i caja i ña cuni mí i xihín jjuhún i. Ta co ndítahan cahihvi inún sahá ña vaha ini i”, nācachi da xihín ñaha ñúhu cán xihín da cahan cuachí cán —nācachi Jesús sácú a quiahva.

16 Ta nācachi tucu a já:

—Sahá ña cán queá ndúu cuahá na ín saha ñuyiví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyiví yóho viti joo vaxi quivi cacuu na na ín saha nu Ndióxi —nācachi a.

*Cáxi tuhun tucu Jesús ña quivi a*

(Mr. 10:32-34; Lc. 18:31-34)

17 Ta tá sa nāquee tucu Jesús cuahan chí Jerusalén já íchi cán natavá xóo a ndíhuxu ivi na xíca tuun xihín á cán já nācachi a já xihín ná:

18 —Candehé ndo. Yóho ndáa í cuahan yó chí Jerusalén nuú ndiquiahva na yehe, da nāchindahá Ndióxi nduu ñayivi ndahá na sacuahá nuú jutú xihín nuú na jannahá ley Moisés. Ta na cán cúu na cacu ini sahá ndaja quivi i. 19 Andá já ndiquiahva na yehe ndahá na tóho ña ná cuacu ndaa na yehe. Ta caní na yehe ta já cata caa na yehe ndica cruxu joo tá ná yaha uní quivi

já nditacu tucu u —ñacachi Jesús.

*Tá naxica náná Jacobo xihin Juan ñamaní nuú Jesús (Mr. 10:35-45)*

<sup>20</sup> Anda já nacayati ñájíhi Zebedeo, ñá cúu náná Jacobo xihin Juan nuú Jesús. Ta ndáca ñá ndíví jahyi ñá nacasaá ñá nacaxítí ñá nu á jáchi cúni ñá caça ñá in ñamaní nuú Jesús. <sup>21</sup> Anda já nacachi Jesús já xihin ñá:

—Ndá queá cúni ndó — nacachi a.

Já nacachi ñá cán já:

—Ñá cúni queá ná caja ndó ñamaní cahnda ndó chuun ñá ná cacoo in in jahyi i xoo jíin ndó. In da xoo cuáha ta in da xoo íti jíin ndó indiví tá ná cacomí ndó cuéntá sahá ñayivi —nacachi ñá cán.

<sup>22</sup> Anda já nacachi Jesús já xihin ñá:

—Co cándaá ini ndó ñá xíca ndó nuú i —nacachi a.

Anda já nacachi a já xihin Jacobo xihin Juan cán:

—Á cuu ndoho ini ndó tá quiahva nditahan nuú i ndoho ini i. Jáchi ñá vaxi nuú i ndoho ini i cúu á tátuhun coho i in yáxi ndutá ova. Á íin tiahva ndó ndoho ini ndó tá quiahva ndítahan nuú i ndoho ini i anda quiahva ná quivi i —nacachi Jesús xihin ndíví da cán.

—Cuu caja nde ñá — nacachi ndíví da cán xihin Jesús.

<sup>23</sup> Anda já nacachi tucu a já xihin dá:

—Mé a ndaa tandaa quivi coho ndó ñá ova ñúhu in yáxi,

mé ñá coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i. Joo sahá ñá xíca ndó cacoo in ndó xoo cuáha i ta in ndó xoo íti i a juú yehe cúu dá cuu quiahva i ñá nu ndo. Jáchi sa nandicaxi Ndióxi na ñehé táhvi cacoo cán —nacachi a.

<sup>24</sup> Joo ndaja coo tá naxini johó ndíhuxu chága na xíca tuun xihin Jesús cán ñá yóho já nacasáhá na xójo ini na xihin ndíví da cúu ñani cán. <sup>25</sup> Anda já nacana Jesús tóco ndihi na xíca tuun xihin a cán já nacachi a já xihin ná:

—Sa xíni ndó ndaja cája na sáhdá chuun nuú ñayivi ndúu ñuyíví yóho. Ñá cája na queá jácandíhi na ñayivi ta cája na tá quiahva cúni mé ná.

<sup>26</sup> Joo co ndítahan coo ñá cán tañu mé ndó jáchi ndá da cúni cacuu da cáhnu chága tañu ndó xíni ñúhú cacuu da in da cája chúun cuéntá ndihi ndó.

<sup>27</sup> Ta ndá da cúni cacuu da nu cuítí tañu ndóhó ndítahan cacuu da da cája ndíví nuú ndihi ndó. <sup>28</sup> Jáchi ni yehe, da nachindahá Ndióxi nduu ñayivi coo naquixi i ñuyíví yóho ñá ná caja ndíví ñayivi nuú i. Ñá naquixi i caja i queá caja ndíví i nu ná ta ndiquiahva i mí i quivi i já ná cuu cacu ndaa ínima cuahá ñayivi ná a cühun na indayá —nacachi a.

*Tá nandaja vaha Jesús ivi da cuaa*

(Mr. 10:46-52; Lc. 18:35-43)

29 Ta tá naqueta Jesús ñuu Jericó xihín na xíca tuun xihín á cán já ndíco cuahá ndivaha ñayivi jatá cásahan na. 30 Ta ndaja coo yati jín ichi cán nasanduu coo ivi da cuaá ta tá naxini johoh da ña yáha Jesús cuahan já nacasáhá ndívi da cáyuhú da já cáchí da já:

—Jesús, da naquixi chichi David, caja ndó ñamani candáhví loho ini ndó ndehe —cáchí da.

31 Anda já nacasáhá cája cuehe ñayivi xihín ndívi da cuaá cán ña ná catáji yúhu dá. Joo ví ga ví cáyuhú da já cáchí da já:

—Jesús, da naquixi chichi David, caja ndó ñamani candáhví loho ini ndó ndehe —nacachi da.

32 Anda já nandaca ndichi Jesús já nacana ndívi da cuaá cán. Ta já nandaca tuhún a da já nacachi a já xihín dá:

—Ndía cúní ndó ña ná caja i xihín ndó —nacachi a.

33 Já nacachi ndívi da cuaá cán já:

—Candehé nde cúní nde, xitoho.

34 Anda já nacandáhví ini Jesús da ta nacani ndaa ndáha á nuu dá. Chí ivi laá nanuna nuu da cuaá cán ta nacasáhá da ndíco da jatá Jesús cuahan da.

## 21

*Ndíhvi Jesús ñuu Jerusalén*  
(Mr. 11:1-11; Lc. 19:28-40;  
Jn. 12:12-19)

1 Ta tá sa ja chá xinu coo na ñuu Jerusalén já naxinu na

in ñuu loho naní Betfagé yati jín yucu naní olivo. Ta cán nasahnda Jesús chuun nuu ivi táhan da xíca tuun xihín á cán. 2 Já nacachi a já xihín dá:

—Cuáhán ndó ñuu loho jan ta tá ná xinu coo ndó jan ndiñehe ndó in búrró jíhí ndíco ndaa rí ta xihín mé rí jan cándichi inga búrró loho. Ndaxí ndó rí ta cañehe ndó ndívi rí quixi ndó. 3 Ta ndá na ná cahan xihín ndó já queá cachi ndó xihín ná ña xíní ñúhú xitoho ndó rí joo tá ná ndihi chuun rí já nducú ñehe tucu da rí, já cachi ndó xihín ná —nacachi Jesús xihín ndívi da cán.

4 Tóco ndihi ña yóho nayaha já ná xinu coo nuu ña nacahyí in da profeta já:

5 Joho cachi ndó xihín na ñuu Jerusalén:

“Candehé ndó. Ndáhví uun cáa da cómi cuéntá saha ndó.

Vaxi da nu ndó ta canúu da jata búrró jíhí, jahyi in rí ndiójo, canúu da vaxi da nu ndó”, cáchí tuhun Ndióxi.

6 Ta ndívi da xíca tuun xihín Jesús cán nasahan da nacaja da tá in nasahnda Jesús chuun nu dá. 7 Já ñehe da búrró jíhí cán xihín búrró loho, jahyi rí naxinu na nuu Jesús. Anda já nachojó na cotó ndéé na jata rí ta nandaa Jesús jata rí. 8 Ta mé cuahá ñayivi ndúu cán nacasáhá na chinduu na cotó ndéé na ichi mé nuu yaha Jesús cán. Ta java na nacasáhá na sáhná na ndahá yito ta chinduu na

do íchi mé nuú yaha Jesús cuhūn a. <sup>9</sup> Ta ñayivi cuahan chí nuu ta jári na vaxi chí jata ñacasáhá na cáyuhú na já cáchi na já:

—Cája cáhnu í da ñaquixi chichi David yóho. Ndicáhnu nahá ná cacuu da cómi cuéntá saha yo jáchi cúú dá da vaxi yuhú nuu Ndióxi. Cáhnu ná cacuu Ndióxi —cáchi ñayivi cuaha cán cáyuhú na cásahan na xihín á.

<sup>10</sup> Ta tá nandihvi Jesús ñuu Jerusalén cán tóco ndihi ñayivi ñacasáhá catóntó ndivaha na. Já cáchi xihín táhan na já:

—Ndá da cúú da yóho — cáchi xihín táhan na.

<sup>11</sup> Java táhan na cán cáchi na:

—Da yóho cúú in profeta, da ñuu Nazaret cuéntá estado Galilea —cáchi xihín táhan na.

*Tá ñataxi Jesús na ndúu jícó ñaha yéhe veñuhu*

(Mr. 11:15-19; Lc. 19:45-48; Jn. 2:13-22)

<sup>12</sup> Anda já nandihvi Jesús veñuhu cáhnu cán já ñacasáhá táxi ndihi a na ndúu jícó xihín na ndúu xéen cán. Ta ñaxicó ñehe a mesa na ndúu ndijama jjuhún cán ta ñaxicó ñehe a táyi sácoco na ndúu jícó ndijata. <sup>13</sup> Já ñacasáhá cáchi a já xihín ndihi na cán já:

—Já cáchi tuhun Ndióxi já: “Vehe mí i cacuu a vehe nuú quixi na caca tahví na nu Ndióxi”, cáchi tuhun Ndióxi. Joo ndóhó ñandai cuu ndó yóho caja cuíhná ndo nuú

ñayivi —ñacachi Jesús xihín ná.

<sup>14</sup> Tá nandihvi já ñacayati java na cuáá xihín java na réncoco nu á ini mé veñuhu cáhnu cán ta ñandaja vaha mé á na. <sup>15</sup> Joo xójo ndivaha ini na sacuaha nuú jutū xihín na jánaha ley Moisés tá ñaxini na ña xituhún ñacaja mé á ta tá ñaxini johō na ña cája cáhnu na valí cán mé á tá cáchi na já: “Cája cáhnu í da ñaquixi chichi David.” Saha ña cán queá xójo ini na <sup>16</sup> ta já ñacachi na já xihín Jesús:

—Á xini johún ña cáhan na valí yóho —ñacachi na xihín Jesús.

Já ñacachi Jesús já:

—Ajan, xini johō i ña cája cáhnu na Ndióxi. Á cóo ñacahvi ndó tuhun Ndióxi nu cáchi a já:

Janda na valí ta janda na chichí ñacaja Ndióxi xihín ná,  
ñá ná cuu caja cáhnu na mé á,  
cáchi tuhun Ndióxi —  
ñacachi Jesús xihín na cán.

<sup>17</sup> Anda já najándacoo a na já ñaqueta jata ñuu cán cuahan chí ñuu Betania ta cán ñasahin a.

*Tá nachicaan Jesús cháhan jata titó ñuhú*

(Mr. 11:12-14, 20-26)

<sup>18</sup> Ta inga quivi itaan tá nandicó cóo a cuahan chí Jerusalén já ñacasáhá cuico a cuahan. <sup>19</sup> Ta yuhú íchi cán ñaxini a cándichi in titó ñuhú. Ta chí ñasahan sádehé a á ín cuíhi nu do caxi a. Joo cóo ñaha ná ndiñehe a. Ndáha

uun dó cán cuití va iin. Anda já nacachi a já xihín do:

—Ni in tühún ga tañu a cána cuhi nu yóhó —nacachi a xihín do.

Chí ivi laá nahichí titó ñuhú cán. <sup>20</sup> Tá naxini na xíca tuun xihín Jesús cán ña yóho já nacatontó na já cáhí na já:

—Ndá cuéntá queá nahichí titó ñuhú cán ivi tühun —nacachi na xihín Jesús.

<sup>21</sup> Ta nanducú ñehe Jesús tühun nu ná já nacachi a já:

—Mé a ndaa ná cahan i xihín ndo ña tá ná candeé ini ndó yehe ta ni loho co cáhvi ivi johó ini ndó já queá cuu caja ndó ña náhnu chága nuú ña nacaja i yóho. Ta janda cuu cachi ndó xihín in yucu: “Caxoo ta cuáhán jáquetún mún ini tañuhú”, ta chí já ndusa coo. <sup>22</sup> Ta tá ná candeé ini ndó yehe nani xíca tahví ndo nu Ndióxi ta co cáhvi ivi johó ini ndó já queá ñehe ndó ña xíca ndo nu á —nacachi Jesús.

*Tá ndáca tühún na Jesús yo sahan ndé nu á ña jánaha mé á nuú ñayivi*

*(Mr. 11:27-33; Lc. 20:1-8)*

<sup>23</sup> Tá nandihí já nandihvi Jesús ini veñuhu cáhnu cán ta nani jánaha tühun Ndióxi nuú na ndúu cán naxinu na sacuahá nuú jutú xihín na sacuahá nuú na Israel cán nu á. Já nacachi na já xihín á:

—Yo já sahan ñamaní nuun cajún ña cájún yóho —nacachi na.

<sup>24</sup> Anda já nanducú ñehe Jesús tühun nu ná já nacachi a já:

—Ta ná ndaca tühún ri yehe va ndohó ta tá ná nducú ñehe ndó tühun nuú i anda já caxi tühun i nu ndó yo já nasahan ñamaní nuú i caja i ña cája i yóho. <sup>25</sup> Ta viti cachi ndó xihín i yo já nachindahá Juan ña ná quixi da caja ndúta dá ñayivi. Á Ndióxi nachindahá da á ñayivi nachindahá ñahá —nacachi Jesús ndáca tühun a ná.

Já nacasahá ndítühún xihín táhan na já cáhí na já:

—Tá ná cachí ña Ndióxi queá nachindahá Juan ta já nducú ñehe Jesús tühun nu yo já cachi da xohó: “Ndá cuéntá queá coo naxeen ndó candúsa ndó da, dá já”, cachi Jesús xohó. <sup>26</sup> Ta tá ná cachí ña ñayivi cúu na nachindahá Juan já yihví yo ña ndicuita ñayivi xihín yo. Jáchí tóco ndihi na cándúsa na ña naquixi Juan jáyaha da ña nacahan Ndióxi nuú ñayivi —cáhí na ndítühún xihín táhan na.

<sup>27</sup> Sahá ña cán queá nacachi na já xihín Jesús:

—Co xini toho nde yo já nachindahá Juan.

Anda já nacachi Jesús já xihín ná:

—Ta ni yehe a cáxi tühun i nu ndo yo já nasahan ñamaní nuú i caja i ña yóho —nacachi Jesús xihín na cán.

*Sácu Jesús quiahva sahá ivi da cúu jahyi in dataa*

<sup>28</sup> Anda já nacachi tucu Jesús xihín na cán já:

—Cuni j<sub>o</sub>ho ndó ñ<sub>a</sub> nayaha in tañu. Iin in dataa ta nasahin ivi jahyi ta da. Ta nasahan da nuú in táhan da cán já nacachi da já xihín dá: “Jahyi a, cuáhán caja chúun lohún nu ñuhú i nu cáa tó uva”, nacachi da xihín jahyi da. <sup>29</sup> Já nacachi jahyi da já xihín dá: “A cühun toho i jáchi co xíca ini i cühun i”, nacachi da. Joo tá nandihí nacahvi ini da ñ<sub>a</sub> a váha ná cuu ini da chí já naquee da cuahan da caja chúun da nu ñuhú tátá da. <sup>30</sup> Ta jári nasahan tátá da cahan da xihín inga jahyi da ta quiahva já nasahnda ri da chuun nuú da cán. Ta da cán nacachi da já xihín tátá da: “Ajan. Cühun i”, cáchi da. Joo tá nandihí coo nasahan toho da. <sup>31</sup> Ta viti cachi ndó xihín i ndá da cúu da nacaja ñ<sub>a</sub> cuni tátá da —nacachi Jesús.

Já nacachi na cán:

—Da nu cuítí.

Anda já nacachi tucu Jesús já:

—Mé a ndaa ná cahan i xihín ndó ñ<sub>a</sub> iin chága sahá na játaca jjuhún cuéntá impuesto xihín najihí xíca jii ñ<sub>a</sub> ná cacomí Ndióxi cuéntá saha ná a juú ga ndohó. <sup>32</sup> Jáchi naquixi Juan, da jácandúta ñayivi najána ha da ndohó ndaja ndítahan caja ndó ta coo naxeen ndó candúsa ndó da. Joo na játaca jjuhún cuéntá impuesto xihín najihí xíca jii nacandúsa na ñ<sub>a</sub> nacahan da. Ta vatí naxini ndó ñ<sub>a</sub> yóho joo coo naxeen ndó ndijama ndó ñ<sub>a</sub> cája ndó

jáchi coo naxeen ndó candúsa ndó mé Juan.

*Sácú Jesús quiahva sahá java mozo, da nacaja quini xihín xitoho da*

(Mr. 12:1-12; Lc. 20:9-19)

<sup>33</sup> Cuni j<sub>o</sub>ho ndó ná cacu u inga quiahva nu ndó. Nasahin in dataa ta najánde cuaha dá tó uva nu ñuhú dá. Ta nasacu da in corra yito nu do. Ta nacavaha da in nuú cühni mé uva cán ñ<sub>a</sub> cavaha vino. Ta nacavaha da in nu jícó canúu da já cuu candaa da tóco ndihí dó cán.

’Anda já nasahan ndojó da ñuhú dá nuú java na caja chúun na ñ<sub>a</sub>. Ta já naquee da cuahan xíca da. <sup>34</sup> Ta tá naxinu tiempo jáquee na já nachindahá da java mozo da ñ<sub>a</sub> ná cühun na nuú na ndúu cája chúun ñuhú da cán ñ<sub>a</sub> ná ndiquiahva na nu dá ñ<sub>a</sub> cáni nu dá ndiquehe da saha ñuhú dá ñ<sub>a</sub> nasahan ndojó da nuú na cán. <sup>35</sup> Joo ndaja coo na cája chúun nu ñuhú cán natiin na in táhan da cúu mozo da cán ta nacani na da. Ta inga táhan da cán nasahní na. Ta inga táhan da cán nandicuita ñee na xihín yuu. <sup>36</sup> Joo mé da xihín ñaha ñuhú cán nachindahá cuaha chága da mozo da nasahan da nu ñuhú dá. Ta tá quiahva nacaja na xihín mé java mozo nasahan nu cuítí cán quiahva já nacaja ri na xihín tóco ndihí mozo cán.

<sup>37</sup> Tá nandihí já nasacu ini da xihín ñaha ñuhú cán chindahá da jahyi da jáchi nacahan da: “Cája i cuéntá

coo toní ñúhú ña xihín jahyi i”, ñacahán ña xihín ñaha ñúhu cán. <sup>38</sup> Joo tá ñaxini ña cája chúun ndojó ñúhu cán ña vaxi ña cúu jahyi ña xihín ñaha ñúhu cán já ñacachi xihín táhan na já: “Candehé ndo. Yóho vaxi ña cúu jahyi xitoho í. Ta tá ná xinu quivi quivi xitoho í ta ña yóho cacuu da ndicojo chuun saha ñúhu yóho. Cóho cahni yó ña já ná candoo ñúhu yóho ndáha mí”, ñacachi xihín táhan ña cán. <sup>39</sup> Ña cán quea ñatiin na ña ta ñatavá ña ña ñanda yuhú cútu ta cán ñasahní ña ña —ñacachi Jesús sácú a quiahva.

<sup>40</sup> Ña ña já ñandaca tuhún Jesús ña ndúu cán já ñacachi a já:

—Ndía cáhan ndo caja ña xihín ñaha ñúhu yóho xihín ña cája chúun ñu ñúhu dá —ñacachi a.

<sup>41</sup> Ña ña já ñacachi ña cán já xihín Jesús:

—Ña caja ña quea cahni ña ña quini, mé ña ñacaja chúun too ñu ñúhu ña cán. Ta já ndiquiahva ndojó ña ñúhu ña ñuú java ña ña ná caja chúun na ñu á. Ta tá jáquee na ndiquiahva na ñu dá ña cáni ñu dá ndiquehe ña saha ñúhu dá —ñacachi ña cán xihín Jesús.

<sup>42</sup> Já ñacachi Jesús já xihín ña cán:

—Á a ñaha cahni ndo tuhun Ndióxi ñu cáchi a:

Mé yuu ña ñajácana ña cáva ña vehe,

ñá cán cúu ña ñandu yuu ndúhu sahá vehe ña ña in chága saha.

Ña yóho quea ñacaja Ndióxi, ta cúu á in ñaha cáhnu ndivaha ñu yo, cáchi tuhun Ndióxi.

<sup>43</sup> Ña cán quea cáhan i xihín ndo ña cacu xoo Ndióxi ndohó ña ná a cácomí ga mé á cuénta saha ndo. Ta quiahva mé á ñamaní ñuú java ga ñayivi ña ná ndihvi na ñuú cacomí Ndióxi cuénta saha ná, mé ña ndiquiahva na ñu á ña cáni ñu á ndiquehe a.

<sup>44</sup> Ta cáchi i xihín ndo ña yehe cúu u tátuhun mé yuu cáhan i saha. Ta nda ña ná ndicava jatá yuu cán chí chachi xehé ña. Quiahva já ndihi sahá ñayivi tá co cúni ña candúsa na yehe. Ta tá mé yuu cán ná yaha ndicava jatá in na já caji ndihi ñaha. Quiahva já ndihi sahá ñayivi ini indayá tá co cúni ña candúsa na yehe —ñacachi Jesús.

<sup>45</sup> Tá ñaxini joho ña cúu sacua ña ñuú jutú xihín ña fariseo cán ña yóho, ñacandaa táhyi ini na ña saha mé ná cáhan Jesús. <sup>46</sup> Sahá ña cán quea ñanducú ña tiin na mé á joo coo ñacuu caja na sahá ña ñayihví ña ñayivi jáchi cándúsa ñayivi cán ña cáhan Jesús cuénta Ndióxi.

## 22

*Sácú Jesús quiahva sahá vicó tándaha*

(Lc. 14:15-24)

<sup>1</sup> Tá ñandihí já ñacasáha tucu Jesús jána ñayivi xihín



ndinuhu quiahva. Já cáchi a já xihín ná:

2 —Núú cacomí Ndióxi cuéntá sahá ñayivi cúú á tátuhun ña nayaha xihín in rey tá nacavaha da in víco ña tandaha jahyi taa da. 3 Náchindahá da mozo da ña ná cuhun da cana da na ndítahan quixi. Joo coó naxeen na quixi na mé víco. 4 Anda já náchindahá chága da mozo da ña ná caxi tuhun da nuú na ndítahan quixi cán ña sa nacaja ndívi da ña cuxu na. Sa naxihí tindiquí xihín java ga quíti, rí nandaha. Sa nacandívi ndihi ñaha cuéntá víco tándaha sahá ña cán queá ná quixi na. Ña yóho cúú chuun natahnda nu mozo cán cachi da xihín na ndítahan quixi cán. 5 Joo co ndaa na cán cuhun na. In táhan da cán naquee da cuahan da candehé da nu ñuhu dá. Ta inga da naquee da cuahan da caja ndahvi da. 6 Ta java ga na cán natiin na mozo mé rey cán ta nacaja xíxi na xihín dá janda quiahva nasahní ñahá na. 7 Anda já naxojo ndivaha ini rey cán sahá ña cán queá náchindahá da soldado da ña ná cuhun na cahní na na nasahní ndii cán ta ná chicaan ñuhu dá ñuu na. 8 Anda já nacachi tucu rey cán já xihín java ga mozo da: “Sa nacandívi tóco ndihi ñaha ña coo víco joo na nacana i cán coó saha toho na quixi na víco. 9 Ña cán queá cuahán ndó ndijáá cáyé náhnu ta ndá ñayivi nacuu cana ndó na ná quixi na víco

tándaha yóho”, nacachi rey cán nasahnda da chuun nu mozo da. 10 Anda já naquee mozo da nasahan na ndijáá cáyé ta ndaja cáa mé ñayivi najátaca na. Ñayivi vaha xihín na quini viti nataca nacaja na. Ta já najacutú na vehe nuú coo víco tándaha cán xihín ñayivi.

11 'Anda já nandihvi rey nu ñúhu na cán já naxini da ndacaan in dataa, da co ndíxi jáhma ña ndíxi na ndúu víco tándaha. 12 Ta nacayati mé rey nu dá já nacachi da já xihín dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándaha”, nacachi rey xihín da cán. Joo coó nanducú ñehe da tuhun nu rey. 13 Anda já nasahnda rey chuun nu mozo da. Já nacachi da já xihín ná: “Cató ndó ndáha dá xihín saha dá. Ta jácana ndó da chí jata nuú naá yávi. Cán cuacu ndivaha da anda quiahva cahña nuhu da”, cáchi da. 14 Jáchi cuahá ndivaha cúú ná nacana Ndióxi ña ná cacomí a cuéntá saha joo chá cúú ná ndiquiahva na ndáha mé á ña ná cuu caxi a na —nacachi Jesús.

*Ndáca tuhún na Jesús á ndítahan nu ná chahvi na jihún cuéntá impuesto*

(Mr. 12:13-17; Lc. 20:20-26)

15 Tá nandihí já naquee na fariseo nasahan na jándique táhan na tuhun na ndaja caja na coto ndojó na Jesús xihín tuhun cahan mé á já ná cuu

jácojo na cuachi jatá. <sup>16</sup> Ña cán quea nachindahá na java na cuénta mé ná xihín java na cuénta Herodes nuú Jesús já nacachi na já xihín á:

—Maestro, xini nde ña nd-inuhu ña ndaa cáhan mé ndó. Ta cándaá ini nde ña jánaħa ndó ña ndaa saħa íchi cuénta Ndióxi. Ta co quehe ndó cuénta tá cáhan núu ñayivi saħa ndo. Ta cándaá ini nde ña tá cáhan ndó saħa in ñaha cája ñayivi cúu á saħa ña sándehe ndó janda ínima ná. <sup>17</sup> Saħa ña cán quea cúní nde candaá ini nde ndía cachi ndó saħa ña yóho: Á ndítahan nuú nde chahvi nde jjuhún cuénta impuesto nuú da cómí cuénta saħa ñuu Roma. Á chahvi nde ña á a chahvi toho nde ña — nacachi na cán xihín Jesús.

<sup>18</sup> Joo sa nacandaá ini Jesús ña cáhvi núu ini na saħa ña cán quea nacachi a já xihín ná:

—Co cúu ndó tá quiahva ndáa ndó jáchi cúní ndó coto ndojó cuití ndó yehe. <sup>19</sup> Jánaħa ndó in táhan jjuhún ña chahvi ndó impuesto jan nuú i — nacachi Jesús.

Anda já nasahan na in jjuhún caa naní denario nu á. <sup>20</sup> Tá naxini Jesús ña yóho já nacachi a já xihín ná:

—Yo nahná ta yo quivi quea ndáa nu á — nacachi a.

<sup>21</sup> Já nacachi na cán já xihín á:

—Ñéhe a nahná xihín quivi da cómí cuénta saħa ñuu Roma — nacachi na.

Anda já nacachi tucu Jesús já:

—Ndiquiahva ndó ña cúu ñaha da cómí cuénta saħa ñuu Roma jan nu dá. Ta ndiquiahva ndó ña cúu ñaha Ndióxi nu á — nacachi a.

<sup>22</sup> Tá naxini johó na cán ña yóho já nacatontó na ta najándacoo na a naquee na cuahan na.

*Tá ndáca tuhun na Saduceo Jesús á mé a ndaa nditacu ndii (Mr. 12:18-27; Lc. 20:27-40)*

<sup>23</sup> Ta sa mé quivi já nasahan java na saduceo cahan na xihín Jesús. Ta mé na saduceo yóho co cándusa na ña nditacu tucu na sa naxihi. Saħa ña cán quea nandaca tuhún na Jesús já cáhí na já xihín á:

<sup>24</sup> —Maestro, nu ley nacahyi Moisés sanahá natahnda chuun ta cáhí a já: “Tá tándaħa in dataa xihín ñájíhí da ta tá xíhí da ta coó jahyi da cacu já quea ndítahan nuú ñani da tandaha dá xihín ñá cuáan nacandoo cán. Ta já ná coo jahyi da cán xihín yuhú nuú ñani da”, cáhí ley Moisés. <sup>25</sup> Ta viti cuni johó ndó ná cacu nde in quiahva nu ndó. Tañu mé nde yóho nasanduu usa ñani. Ta da nu cuití cán natandaha dá xihín in ñáñáħa. Tá nandihí já naxihí da. Joo saħa ña coó jahyi da nacacu xihín ñájíhí da saħa ña cán quea nandiquehe ñani da, da chí ivi jata dá ña cuáan cán. <sup>26</sup> Ta quiahva já nandoho ri da chí ivi cán jáchi naxihí da ta coó jahyi da nacacu xihín ña. Ta janda ndíhusa ñani

cán naṭandaha xihin ña ta ndihusa da naxihí ta ni in da cōo nacacu jahyi xihin ña. <sup>27</sup> Ta tá nu ndihí naxihí ri ñañáha cán va. <sup>28</sup> Ta viti cachi ndó xihín nde tá ná xinu quiví nditacu tucu ndji, ndá da cacuu ndusa yí ñá cán jáchi ndihusa ñani cán naṭandaha xihin ñá ñuyívi yóho —nacachi na saduceo cán xihín Jesús.

<sup>29</sup> Anda já nacachi Jesús já:

—A váha toho cáhán ndo jáchi cō xini ndó ndaja cáhan tuhun Ndióxi ta ni cō xini ndó ndá quiahva cáhnu cúu ndeé Ndióxi. <sup>30</sup> Jáchi mé quiví tá ná nditacu tucu ndji a tándaha ga ná ta ni a quiahva na jahyi jhí na tandaha ná. Cacuu na tá tuhun táto Ndióxi ndúu indivi ta cō tándaha na cán. <sup>31</sup> Joo sa xini yo ña nditacu tucu ndji. Á a ñaha cahvi ndó tuhun Ndióxi nu cáhí a já: <sup>32</sup> “Yehe cúu Ndióxi ña cája cáhnu Abraham ta yehe cúu Ndióxi ña cája cáhnu Isaac ta yehe cúu Ndióxi ña cája cáhnu Jacob viti”, nacachi a. Ta ña yóho cuni cachi a ña tácu yí va Abraham xihín Isaac xihín Jacob vatí sa naxihí yiquí cuñu na —nacachi Jesús.

<sup>33</sup> Tá naxini johó ñayivi ndúu cán ña yóho já nacatontó na xihín ña jánaḥa Jesús nu ná.

*Tá cáhan Jesús ndá ley quéa cáhnu chága*

(Mr. 12:28-34)

<sup>34</sup> Tá nañehé na fariseo tuhun ña naquee váha Jesús nasahnu a nuú na saduceo já nanditútú ndihi na. <sup>35</sup> Ta

in táhan mé da cán, da jánaḥa ley Moisés nandaca tuhún da Jesús jáchi cuni da coto ndojó da mé á. Já nacachi da já:

<sup>36</sup> —Maestro, ndía cúu ña cáhnu chága sáhdá ley Moisés caji í—nacachi da cán xihín Jesús.

<sup>37</sup> Já nacachi Jesús já xihín dá:

—Ña cáhnu chága nu ley Moisés cúu ña yóho: “Ndítahan quihvi ini ndó Ndióxi, xitoho ndó xihín tóco ndihi ínima ndó ta xihín ndinuhu ini ndó ta xihín tóco ndihi xini túni ndo.” <sup>38</sup> Ña yóho cúu ley nu cuítí ta cúu á ña cáhnu chága nu tóco ndihi ley. <sup>39</sup> Ta tá quiahva ín ña nu cuítí yóho quiahva já ín ri ña chí ivi va ta cáhí a já: “Xini ñuhú quihvi ini ndó ñani táhan ndó tá quiahva quihvi ini ndó mé ndó.” <sup>40</sup> Ta jata ndívi ña yóho tiiin tóco ndihi ley Moisés xihín ña najánaḥa na profeta sanahá —nacachi Jesús xihín na fariseo cán.

*Ndáca tuhún na Jesús ndáchi naquixi a*

(Mr. 12:35-37; Lc. 20:41-44)

<sup>41</sup> Ta nani nanditútú ndihi na fariseo ndúu na nu Jesús cán já nandaca tuhún a na. <sup>42</sup> Já nacachi a já xihín ná:

—Ndía cáhvi ini ndó saḥa Cristo. Ndá chichi cáhán ndo vaxi a —nacachi Jesús xihín ná.

Já nacachi na cán já:

—Vaxi a chichi David, da nasacuu rey sanahá —nacachi na cán xihín Jesús.

43 Anda já nacachi tucu Jesús já xihín ná:

—Tá ta mé a ndaa vaxi Cristo chichi David ndá cuéntá quéa nacachi da ña cúu á xitoho da. Jáchi nachutú ndaa ínima David xihín ínima yii Ndióxi tá nacahyí da já:

44 Já nacachi Ndióxi xihín xitoho i:

“Cacoo xoo cuáha i yóho janda quiahva ná caja i ña ná cacomún cuéntá sahá na co cúní yohó”, nacachi Ndióxi, nacachi David.

45 Ndávaha cáhí na ña vaxi Cristo chichi David tá ta sa mé David nacachi da ña cúu á xitoho da —nacachi Jesús.

46 Ta chí ni in na coo nacuu caja nducú ñehe na tuhun nu á. Ta janda mé quivi já ni in ga na coo nasahan ndeé ini ndaca tuhún chága na mé á.

## 23

*Chicaan Jesús cuachi jatá na fariseo xihín jatá na jánaha ley Moisés*

(Mr. 12:38-40; Lc. 11:37-54; 20:45-47)

1 Anda já nacachi Jesús já xihín tóco ndihi ñayivi ta xihín na xíca tuun xihín á cán já:

2 —Na jánaha ley xihín na fariseo cúu ná na ndítahan nuu ndicani na ña cúní cachi ley Moisés. 3 Ña cán quéa xíní ñúhú caja ndó tóco ndihi ña jánaha na nu ndo. Joo a cája toho ndó tá quiahva cája mé ná jáchi co cája na ña jánaha mé va na. 4 Jáchi cája na ña

ná coo ihvi ndivaha ley janda quiahva co ndeé ini ñayivi cája na ña. Joo mé ná ni loho tín co chindeé ñahá na. 5 Ta cája na tóco ndihi ñaha ña ná cuni ñayivi na jáchi cátóo na candico listoni nánu jini ná xihín jico ndáha ná nu ndaa tuhun Ndióxi. Ta cátóo na coo lándá chága yuhú jáhma ná a juú ga java ga ñayivi. 6 Ta tá cuahan na víco cátóo na coo na nuu vaha cuití va. Ta tá quíhvi na veñuhu cátóo na cacoo na nu sácoo na ín chága saha. 7 Ta cátóo na ña ná cahan toni ñúhú ndivaha ñayivi xihín ná tá xíca nuu na nuu yahvi. Ta chí a juú quiahva cátóo na ña ná cachi ñayivi 'maestro' xihín ná.

8 Joo ndóhó co ndítahan nu ndó nducú ndó ña ná cahan ñayivi 'maestro' xihín ndo. Jáchi in ñani cúu ndihi ndó ta in tuhún cúu maestro ndo, mé á cúu Cristo. 9 Ta a cahan ndo tátá cáhnu xihín ni in ñayivi ñuyiví yóho jáchi in tuhún Ndióxi cúu á tátá ndo ta mé á ín a indiví. 10 Ta a nducú ndo ña ná cahan ñayivi 'jefe' xihín ndó jáchi in tuhún laá va cúu jefe ndo, mé a cúu Cristo. 11 Ndá da cúu da cáhnu chága tañu ndó xíní ñúhú da cája chúun da sahá ndihi ndó. 12 Jáchi ndá na ndíñehe jícó mé, jánuu ndáha Ndióxi na. Joo ndá na jánuu ndáha mé nu Ndióxi, jándíñehe jícó mé á na.

13 Ndáhví nacuu ndó, na jánaha ley Moisés xihín na fariseo jáchi co cúu ndó tá quiahva ndáa ndó. Jáchi sáji nuu ndó nuu ñayivi

já ná a cuú cacomí Ndióxi cuéntá saha ná. Ta ni ndóhó cō ndiquiahva ndó mé ndó ndáha Ndióxi ná cacomí a cuéntá saha ndó. Ta cája ndó ña ná a cúu candaa ini ñayivi ndaja caja na ndiquiahva na mé ná ndáha Ndióxi. <sup>14</sup> Ndáhví nahá nacuu ndó, na jánaḥa ley Moisés xihín na fariseo jáchi cō cúu ndó tá quiahva ndáa ndó. Jáchi cándaa ndó vehe najihí cuáan ta tá nandihí cuahá ndivaha xíca tahví ndó nu Ndióxi jáchi cúni ndó jájahvi ndó nuú ña núu cája ndó. Saha ña cán quea cáchí i xihín ndó ña ndóhó cacuu ndó na ndoho chága ini, caja Ndióxi.

<sup>15</sup> Ndáhví nahá nacuu ndó, na jánaḥa ley Moisés xihín na fariseo jáchi cō cúu ndó tá quiahva ndáa ndó. Jáchi a juú quiahva xíca nuu ndó ndúcú ndó in tálaá ñayivi ña ná candico na ña jánaḥa ndó. Ta tá sa nandaja ndó na cuéntá mé ndó já cája chága na cuachi janda cáni a nu ná ndoho chága ini na indayá a juú ga mé ndó.

<sup>16</sup> Ndáhví nahá nacuu ndó jáchi cúu ndó tátuhun na cuaá ndáca inga na cuaá. Jáchi jánaḥa ndó ñayivi ña tá sahan na tuhun na nuú inga ñayivi nani tává na quivi veñuhu cáhnu já quea cō ndúsa jáxinu cō na tuhun na. Joo cáchí ndó ña tá tává na quivi jiuḥun cuáan ndácaan veñuhu cáhnu já quea ndúsa jáxinu cō na tuhun na, já cáchí ndó. <sup>17</sup> Joo tóntó ndivaha ndó ta cúu ndó tátuhun na cuaá viti. Jáchi

cō cándaa ini ndó ña ín chága sahá veñuhu cáhnu a juú ga sahá jiuḥun cuáan jáchi mé jiuḥun cuáan cúu á cuéntá Ndióxi sahá ña ndácaan ini veñuhu cáhnu ña cúu cuéntá mé á. <sup>18</sup> Ta inga tucu ña jánaḥa ndó nuú ñayivi cúu ña yóho: Tá sahan in na tuhun na nuú ñayivi nani tává na quivi nu náa Ndióxi já quea cō ndúsa jáxinu cō na tuhun na. Joo cáchí ndó ña tá tává ñayivi quivi ña sájo cō na cánúu nu náa cán já quea ndúsa jáxinu cō na tuhun na, já cáchí ndó. <sup>19</sup> Joo tóntó ndivaha ndó ta cúu ndó tátuhun na cuaá. Jáchi ín chága sahá nu náa cán a juú ga sahá ña sájo cō na cánúu nu náa jáchi ña sájo cō na cán cúu á cuéntá Ndióxi sahá ña cánúu a nu náa cuéntá mé á. <sup>20</sup> Saha ña cán quea ndá na tává quivi nu náa já quea tává ndihí ri na quivi tóco ndihí ña sájo cō na cánúu nu náa cán. <sup>21</sup> Ta ndá na tává quivi veñuhu cáhnu já quea tává ri na quivi Ndióxi jáchi cán ín mé á. <sup>22</sup> Ta ndá na tává quivi indivi já quea tává ri na quivi Ndióxi xihín quivi nu sájo a sahdá a chuun.

<sup>23</sup> Ndáhví nahá nacuu ndó, na jánaḥa ley Moisés xihín na fariseo jáchi cō cúu ndó tá quiahva ndáa ndó. Mé ndó cávaha ndó uxu táhndá ña jáquee ndó ñundáhyi ndó ta sahan ndó in táhndá ña nu Ndióxi. Já cája ndó anda yucu válí ña támi sahan tátuhun menta xihín anís xihín comino. Joo cō cája ndó ña ín chága saha ña sahdá

ley Moisés. Jáchí cō cája ndó ña ndaa ta cō cándáhví ini ndó ñayivi ta cō cándeé ini ndó Ndióxi tá quiahva sáhná ley caja ndó. Mé a ndaa xíní ñúhú cája ndó tóco ndíhi ña yóho joo a jándacoo ndó ña jóco ndó nū Ndióxi in táhná nuú uxu táhná ña ñéhe ndó. <sup>24</sup> Mé ndó cúú ndó tátuhun na cuaá ndáca inga na cuaá. Jáchí ndinuhu ini ndó cája ndó ña coo cuahá saha cuéntá ley Moisés joo sácú xoo ndó ña ín chága saha nū Ndióxi caja ndó. Cúú ndó tátuhun in da ndíhi ini da tavá da in ndicama loho ndácaan tásá da ná a cóco da rí. Joo cō íhvi toho nū dá cóco da in camello.

<sup>25</sup> 'Ndáhví nahá nacuu ndó, na jánaḥa ley Moisés xihín na fariseo jáchí cō cúú ndó tá quiahva ndáa ndó. Jáchí ndíhi ini ndó caja ndó costumbre ña ndícata ndó jatá vaso xihín jatá cohō joo ña ñúhu ini a cán najátaca cuíhná ndo sahá ña ndiáva ndivaha ini ndó ña núu. <sup>26</sup> Ndáhví nahá nacuu ndó, na fariseo jáchí cúú ndó tátuhun na cuaá. Ña ndítahan caja ndó nū cuítí quéa ndaja vií ndó ínima ndó já cacuu ndó tátuhun in vaso á in cohō sa nandícata vaha na jáchí nandivií ini a xihín jatá viti.

<sup>27</sup> 'Ndáhví nahá nacuu ndó, na jánaḥa ley Moisés xihín na fariseo jáchí cō cúú ndó tá quiahva ndáa ndó. Cúú ndó tátuhun vehe válí ndíta camasanto nū táán na ndii. Ndató jándicuchu na jatá joo chí ini a a juú quiahva quini

sáhan jáchí ndinuhu lásá ndii ñúhu ini a. <sup>28</sup> Quiahva já cúú mé ndó jáchí ndáa ndó tátuhun ñayivi vaha ndivaha. Joo mé a ndaa cō cúú ndó tá quiahva ndáa ndó jáchí ndinuhu ña núu ndácaan ínima ndo.

<sup>29</sup> 'Ndáhví nahá nacuu ndó, na jánaḥa ley Moisés xihín na fariseo jáchí cō cúú ndó tá quiahva ndáa ndó. Cávaha ndó vehe válí ndíta camasanto nuú cañuhu lásá na nasacuu profeta sanahá ta jácacutú ndó nuú nanduxu na nacaja ndaa. <sup>30</sup> Ta cáchí ndo já: "Ta tá nasanduu nde tiempo nasanduu tásáhnū jícó yo sanahá ta chí a chindeé toho nde na nasahní profeta, na nasanduu sanahá", cáchí ndo. <sup>31</sup> Ta xihín ña yóho náha táhyí a ña naquixi ndó chíchi na nasahní profeta sanahá. <sup>32</sup> Cuáhán ndo jáxinu cōo ndó mé cuachi nacasáhá cája tásáhnū jícó ndo sanahá.

<sup>33</sup> 'Mé ndó cúú ndó tátuhun cōo jáchí cája ndó tá quiahva cája cōo. A cuú cacu ndaa ínima ndó ta chí tandaa quiví cūhun ndó indayá nū ndoho ndivaha ini ndó. <sup>34</sup> Sahá ña cán quéa yehe chindahá i java profeta nū ndo xihín java na ndichí xihín java na jánaḥa tuhun Ndióxi nū ndo. Joo java na cahní ndó na ta java na cata caa ndó na ndica crúxu ta java na caní ndó na ini veñuhu ta java na taxí ndó na tá ñuu tá ñuu. <sup>35</sup> Ña cán quéa caca Ndióxi cuéntá nū ndó saha tóco ndíhi ñayivi ndaa, na nasahní ndo

sanahá. Caca mé á cuéntá saha Abel, da nasacuu da ndaa janda quiahva naxinu coo a nuú caca mé á cuéntá sahá Zacarías, da nasacuu jahyi Berequías. Mé da yóho nasahni ndó ini veñuhu tañu nu náa xihín nuú yii ndivaha. <sup>36</sup> Mé a ndaa ná cahan i xihín ndo ña caca Ndióxi cuéntá saha tóco ndihi ndii jan nuú ñayivi ndúu tiempo viti.

*Tá sácu Jesús sahá ñayivi ndúu ñuu Jerusalén*  
(Lc. 13:34-35)

<sup>37</sup> Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndicuíta ndó cáni ndó na xihín yuu na nachindahá Ndióxi nu ndó. Cuahá ndivaha tañu cúní jándataca ndihí i ndohó joo coo naxeen ndó cuni johó ndó. Cúú á tá quiahva cája nduxú tá játaca rí jahyi válí rí tixi ndixi rí. <sup>38</sup> Ta viti cuni johó ndó ña cahan i xihín ndo. Vaxi quivi tá janí ndáha mé vehe ndó candoo a. <sup>39</sup> Ta mé a ndaa ná cahan i xihín ndó ña a cúní ga ndó yehé janda quiahva ná xinu coo quivi cachi ndó: “Cáhnú nahá ná cacuu da vaxi cuéntá Ndióxi, xitoho í”, cachi ndó —nacachi Jesús xihín na cán.

## 24

*Cáxi tuhun Jesús ña vaxi quivi ndihi sahá veñuhu cáhnú ndácaan ñuu Jerusalén*  
(Mr. 13:1-2; Lc. 21:5-6)

<sup>1</sup> Ta tá sa naquee Jesús veñuhu cáhnú Jerusalén cán cuahan já nacativi na xica

tuun xihín á nu á ta nacasáhá na cahan na xihín á ndá quiahva cáa veñuhu cán. <sup>2</sup> Joo nanducú ñehe Jesús tuhun nu ná já nacachi a já:

—Mé a ndaa ná cahan i xihín ndo ña janda ni in yuu yóho a candoo jatá inga yuu jáchi vaxi quivi tá nditaní ndihi ña yóho —nacachi Jesús xihín na xica tuun xihín á cán.

*Ña coo tá sa nacayati quivi ndihi saha ñuyivi*  
(Mr. 13:3-23; Lc. 21:7-24; 17:22-24)

<sup>3</sup> Anda já naquee Jesús cuahan chí yucu nu cáa yitó olivo xihín na xica tuun xihín á. Ta nani ndúu na cán nacativi na xica tuun xihín á nu ín coo a cán já nacasáhá ndáca tuhún xoo na a já nacachi na já xihín á:

—Cúní nde ña ná caxi tuhun ndó xihín nde ndá ama coo tóco ndihi ña yóho. Ta ndaja coo tá ná xinu coo quivi quixi tucu ndó ñuyivi yóho. Ta ndaja coo tá ná ndihi saha ñuyivi —nacachi na xihín Jesús.

<sup>4</sup> Já nacachi Jesús já:

—Cuéntá coo ndó ná a jándahvi ni in na ndohó. <sup>5</sup> Jáchi cuahá ndivaha na quixi na cuéntá mí i ta cahan na ña tuhún tá cachi na já xihín ndo: “Yehé cúú Cristo, da nachindahá Ndióxi cacomí cuéntá sahá ñayivi”, cachi na. Ta xihín ña yóho cuahá ndivaha ñayivi jándahvi na. <sup>6</sup> Ta jándá johó ñehe ndó tuhun ña ndicuíta ñayivi cani táhan na yóho á cáa. Joo a cáyihví toho ndó jáchi já

ndítahan coo. Joo ña yóho co cúní cachi a ña ñaxinu coo quiví nu ndíhí. <sup>7</sup> Jáchí ñayivi ndúu in nación ndicuítá na caní táhan na xihín ña ndúu inga nación. Ta quixi tama ta quixi cuehe ta ndaja táhan quixi a táan. <sup>8</sup> Ta ña yóho cacuu a tondóhó ña casáhá jihna ñúhú vaxi nuú ñayivi jáchi cámani xinú coo nuú ndoho chága ini na.

<sup>9</sup> 'Anda já tiin na ndohó ta ndiquiahva na ndohó ndahá ña co cúní ndohó já ná caja xíxi na xihín ndo. Ta cahni ña ndohó ta tóco ndihi ñayivi ndúu ñuyíví candají ña ndohó sahá yehe. <sup>10</sup> Ta mé tañu já cuaha ná jándacoo na ña candeé ini na yehe ta ndaja táhan mé ná candají táhan na ta ndaja mé ná jicó túhún táhan na. <sup>11</sup> Ta quixi cuahá ndivaha ña tuhún ta cachi na cúu ná profeta cuéntá Ndióxi joo jándahvi na cuahá ndivaha ñayivi. <sup>12</sup> Ta sahá ña ndicuahá ndivaha ña núu ñuyíví yóho sahá ña cán queá jándacoo cuahá ñayivi ña quíhvi ini táhan na. <sup>13</sup> Joo ndá ña ná candico tuun íchi mí i janda ná xinú quiví quivi na, ña cán cacuu na cacu ndaa ínimá. <sup>14</sup> Ta níi cúu ñuyíví ndicuítá nuu tuhun vaha cáhan sahá yehe já ná candaá ini ñayivi ndá quiahva cacomí Ndióxi cuéntá saha ná. Anda jávi ndihi saha ñuyíví.

<sup>15</sup> Ña cáhvi tutu ná candaá ini na ña cáhan. Sanahá nacahyí profeta Daniel sahá in ña quini ña játiví ñahá. Tá

ná cuni ndó ña xinú coo ña yóho nuú yíi cuéntá Ndióxi <sup>16</sup> já queá ndá ña ndúu estado Judea xíní ñúhú cunu na cuhun ña chí yúcu. <sup>17</sup> Ta ndá ña cándójó jiní véhe, co ndítahan nuu na tavá ña ndá ñaha vehe na. <sup>18</sup> Ta ndá ña ndúu yúcu, ná a ndicó coo na vehe na ndiquehe na jáhma ná. <sup>19</sup> Ndáhvi nacuu najihí, ña ñúhu jahyi mé quiví já. Ta ndáhvi nacuu najihí ña néhe ndaa ña valí táhan ña chíchí yíi. <sup>20</sup> Caca tahví ndo nu Ndióxi ña ná a cácuu a tiempo vixi tá ná cunu ndó cuhun ndo. Ta cacá tahví ndo nu á ña ná a cácuu a quiví ndiquehe ndée ná. <sup>21</sup> Jáchi quiví ndoho ndivaha ini ñayivi cacuu a cán. Jáchi janda tá nacava sahá saha ñuyíví coo ndoho ini na tá quiahva ndoho ini na mé quiví já. Ta tá ná yaha ña jan, a ndicó coo ga ña ndoho ini na quiahva já. <sup>22</sup> Ta tá ná a ndája cuítí Ndióxi tiempo cán ni in ñayivi a cúu cacu ndaa. Joo sahá ña sa nacaxi mé á sahá ña cán ndaja cuítí mé á tiempo cán.

<sup>23</sup> "Ta tá ná cachi in na xihín ndó: "Candehé ndo. Yóho íin Cristo, da nachindahá Ndióxi cacomí a cuéntá sahá ñayivi." Á tá ná cachi na: "Candehé ndo. Caa íin da", cachi na, já queá a cándúsa toho ndó ña. <sup>24</sup> Jáchi quixi cuahá ña jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi cuaha ná ta cachi na cáhan ña cuéntá Ndióxi ta jári caja na cuahá ndivaha



ñā nāhnu xihín ñā xitúhún ñā nā jándahvi na ñāyivi. Ta jandā nā sá naçaxi Ndióxi jándahvi na tá ná cuu caja na ñā. <sup>25</sup> Candehé ndo jáchi sá naçaxi tuhun yachi ndihi i ñā yóho xihín ndo. <sup>26</sup> Ñā cán queá tá ná cachi na xihín ndo: “Candehé ndo. Yucú íchí cáa íin Cristo.” Já queá a cūhun ndó jan. Á tá ná cachi na xihín ndo: “Candehé ndo. Ini vehe yóho ndácaan da cúu Cristo.” A cándúsa ndó nā. <sup>27</sup> Jáchi tá quiahva yehe tása queá xoo nu cána candii ta xójo cava indiví quiahva já queta yehe, da nachindahá Ndióxi nduu ñāyivi. <sup>28</sup> Mé nu candúhu yiquí cuñu ndii cán cacuu nuú ndicutú tiyocó canduu rí.

*Ndá quiahva coo tá ná quixi tucu Jesucristo*

(Mr. 13:24-37; Lc. 21:25-33; 17:26-30, 34-36)

<sup>29</sup> Ta iivi laá tá jacá nayaha quiví ndoho nahá ini nā cán já canaá nuú candii ta ni a ndíyehe ga yoo ta jandā indiví quee quimi cuyu rí nu ñúhu ta jandā indiví ñā naçavaha Ndióxi ndiquiji nuu. <sup>30</sup> Anda já ndaca náha ñā xitúhún indiví já candaā ini ñāyivi ñā vaxi yehe, da nachindahá Ndióxi nduu ñāyivi. Ta ndaja táhan ñāyivi ndúu ní cúu sahá ñuyiví ndahyi cóhó nā ta já cuni na yehe quixi i tañu viçó indiví xihín tóco ndihi ndeé e ta cuni na ndá quiahva cáhnu cúu yehe. <sup>31</sup> Ta já chindahá i tátó mí i ñā ná tiví cóhó nā trompeta já ná

nditaca tóco ndihi nā naçaxi i tañu tóco ndihi ñuu jandā ní cúu sahá ñuyiví ta jandā ní cúu sahá indiví.

<sup>32</sup> Jácuaha ndó ñā cūni cachi mé quiahva sácú u nu ndó sahá yító tító ñuhú. Jáchi tá yúta ndáha dó cán ta já vaxi núma válí do já candaā ini ndó ñā sá naçayati tiempo ihní. <sup>33</sup> Quiahva já cuu candaā ini ndó ñā tá ná cuni ndó ñā sá cúu tóco ndihi ñā naçaxi i xihín ndo yóho já cuu candaā cáxi ini ndó ñā sá naçayati tiempo quixi tucu yehe ñuyiví yóho. <sup>34</sup> Mé a ndaa ná cahan i xihín ndo ñā yaha tóco ndihi ñā yóho ta anda jáví quivi nā ndúu tiempo viti. <sup>35</sup> Ta ndihi saha indiví xihín ñuyiví joo a ndíhi toho sahá tuhun naçahan i xihín ndo yóho jáchi coo tá coo tá quiahva naçaxi i yóho.

<sup>36</sup> Joo ni in túhún toho ñāyivi co xini nā ndá quiví á ndá hora yaha ñā yóho. Ni mé tátó Ndióxi ndúu indiví co xini nā ndá quiví coo ñā yóho. Ta ni yehe, da cúu in túhún jini já jahyi Ndióxi co xini ndá quiví coo ñā yóho. In túhún Ndióxi, tátá i queá xini a. <sup>37</sup> Tá quiahva nayaha tiempo tá nasahiin Noé sanahá quiahva já yaha ri tá ná tandaa quiví quixi tucu yehe, da nachindahá Ndióxi nduu ñāyivi. <sup>38</sup> Jáchi mé tiempo cán tá cámaní cuun javí quini cán já cáxixi ñāyivi ta cáxihí na ta tándaha ná ndúu na jandā quiahva naquihvi Noé ini barco cáhnu cán. <sup>39</sup> Ta coó naquehe na

cuéntá janda quiahva naxinu coo javi quini cán ta najánaá dó sahá ndihi na. Quiahva já a quéhe na cuéntá saha ndá quivi quixi yehe, da nachindahá Ndióxi nduu ñayivi. <sup>40</sup> Mé tiempo já canduu ivi dataa xutu da ta in da ndindita cuhun xihin i ta inga da candoo va. <sup>41</sup> Ta canduu ivi najihí ndíco na ta in ñá ndindita cuhun xihin i ta inga ñá candoo va.

<sup>42</sup> Xíni ñúhú coo tiahva vaha ndó jáchi coo xini ndó ndá quivi quixi tucu xitoho ndó. <sup>43</sup> Xíni ñúhú candaa vaha ini ndó ña tá xini in dataa ndá hora cuni quihvi ta cuihná vehe da já quéa a cúju toho da jáchi candaa vaha da vehe da já ná a quihvi da cuihná vehe da. <sup>44</sup> Sahá ña cán quéa ndítahan canduu tiahva ri ndóhó va. Jáchi xinu coo yehe, da nachindahá Ndióxi nduu ñayivi mé hora tá coo cáhán ndo xinu coo i nu ndo.

*Da cája chúun vaha ta da coo cája chúun vaha*  
(Lc. 12:41-48)

<sup>45</sup> Mé ndó ndítahan nu ndó cacuu ndó tátuhun in da ndíchí jini, da cája chúun vaha nuú xitoho da. Ta najándacoo xitoho da chuun ndáha dá ña ná quiahva da cuxu na java ga cúu mozo xihin da cán. Anda já naquee xitoho da cuahan da. <sup>46</sup> Tahví nacuu mé mozo cán tá xinu coo xitoho da ta ndítahan da cája chuun yii va da ña nacandoo nu dá caja da. <sup>47</sup> Mé a ndaa ná cahan i xihin ndo ña quiahva xitoho da cán chuun nu dá

ña ná cacomí da cuéntá saha tóco ndihi ñaha cómi xitoho da. <sup>48</sup> Joo tá cásahá da cája núu da ta cáhán da ña cayáncá ndivaha xitoho da ndicó coo da. <sup>49</sup> Ta sahá ña cán quéa cásahá da cája xixi da xihin java ga na cúu mozo xihin dá. Ta já cáa ga da cásahá xixi da ta xíhi da ta já xini da. <sup>50</sup> Ta ndaja coo xinu coo xitoho mozo cán mé quivi coo cáhán da ña xinu coo da. <sup>51</sup> Anda javi jándoho quini xitoho da cán ini da jáchi coo cúu dá tá quiahva cáa da. Ta ndítahan ndoho da tá quiahva ndoho tóco ndihi na cája já mé nuú cuacu ndivaha na janda quiahva cáhña nuhu ná —nacachi Jesús.

## 25

*Sácú Jesús quiahva saha ña nacaja uxu najihí, na tacú*

<sup>1</sup> Já cáchí tucu Jesús já:

—Tá ná xinu coo quivi cacomí Ndióxi cuéntá saha ñayivi já cacuu a tá quiahva nayaha xihin uxu najihí, na tacú tá nasahan na vicó tándaha. Tá naquehe na candil ña ñúhu sítí ini já cuahan na ndique táhan na xihin da tándaha cán. <sup>2</sup> Uhun táhan na tacú cán cúu ná na tácu ini ta uhun na cán cúu ná na coo tácu toho ini. <sup>3</sup> Ndíhuhun na coo tácu ini cán natiin na candil ñaha na cuahan na joo coo naquehe chága na sítí ña jácutú tucu na candil tá sa cuni ndahva ña. <sup>4</sup> Joo na tácu ini cán ñéhe na candil ñaha na ta ñéhe ri na yuyú sítí cuahan na ña jácutú

na candil tá sa cúni ndahva ña. <sup>5</sup> Ta ndaja coo ñacasáhá cáyancá mé da tándaḥa cán sahá ña cán quéa ñanaá ini ndihi na ta ñaquiji va na. <sup>6</sup> Joo tá ñacuu yati java ñuú já tácu cáyuhú java na já cáchí ña já: “Candehé ndo. Sa vaxi da tándaḥa. Cuáhán queta ndó ndiquehe ndó da”, cáchí ña cáyuhú ña cán. <sup>7</sup> Já ñandacoo tóco ndihi ña tacú cán ta ñacasáhá ña cája ndívi ña candil ñaha na. <sup>8</sup> Anda já ñacasáhá ndíhuhun ña co tácu ini cán cáhan ña xihín ndíhuhun ña tácu ini cán já cáchí ña já xihín ná: “Caja ndó ñamaní quiahva loho ndó sítí ndo nuú nde jáchi sa ñandihí sítí nde ta jalóho cúni ndahva candil ñaha nde”, cáchí ña co tácu ini cán. <sup>9</sup> Já ñanducú ñehe ndíhuhun ña tácu ini cán tuhun nu ná já cáchí ña já: “A cúu toho caja nde quiahva nde sítí nu ndó jáchi tiaḥva náá ndimaní dó nu mé nde. Vaha chága cuáhán mé ndó nu cáyahvi dó cueen ndó do”, ñacachi ña tácu ini cán xihín ná. Já ñaquee ña co tácu toho ini cán cuahán ña. <sup>10</sup> Joo nani ñaquee ndíhuhun ña co tácu ini cán cuahán ña cueen na sítí ña já ñaxinu da tándaḥa cán ta ñandihvi ndíhuhun ñajihí tácu ini cán ini vehe nu ín vicó tándaḥa cán ta ñandaji yéhe. <sup>11</sup> Tá ñandihí já ñandai cuu ndíhuhun ña ñasahan ñaxeen sítí cán já cáti ndáḥa ná yéhe ta cáyuhú ña já cáchí ña já: “Cuná loho ndó yéhe nuú nde, xitoho”, cáchí ña cáyuhú ña ndíta na jatá véhe.

<sup>12</sup> Anda já ñanducú ñehe da tándaḥa cán tuhun nu ná já cáchí ña já xihín ná: “Co xini toho iyo cúu ndóhó”, ñacachi da cán xihín ná —ñacachi Jesús.

<sup>13</sup> Já ñacachi tucu Jesús já:

—Sahá ña cán quéa xini ñuhú cuéntá vaha coo ri ndóhó va jáchi co xini ndó ndá hora xinu coo quivi cacomí Ndióxi cuéntá saḥa ndo — cáchí Jesús.

*Ña ñacaja in taa xihín jjuhún da*

(Lc. 19:11-27)

<sup>14</sup> Ta já cáchí tucu Jesús já:

—Tá ná xinu coo quivi cacomí Ndióxi cuéntá saḥa ñayivi já cacuu a tátuhun ña ñayaha xihín in dataa. Tá ñaxinu coo quivi quee da cuhun xicá da já ñacana da java da cája chúun xihín dá. Ta já ñandiquiahva da jjuhún da ndahá da cán ña ná candaa da ña. <sup>15</sup> Ta tá quiahva tiaḥva in in da cañehe da jjuhún quiahva já ñasahan xitoho da nu dá. In táhan da cán ñasahan xitoho da uhun mil nu dá ña ná candaa da ña. Ta inga da cán ñañeḥe ivi mil. Ta inga da cán ñañeḥe in mil. Anda já ñaquee xitoho da cuahán xicá da. <sup>16</sup> Ta ndaja coo da ñandiquiahva xitoho uhun mil ndáḥa cán ñacaja da ndahvi xihín jjuhún xitoho da ta já ñañeḥe dá inga uhun mil chága jatá. <sup>17</sup> Ta jári da ñasahan xitoho ivi mil nu cán ñacaja da ndahvi xihín jjuhún cán ta ñañeḥe dá inga ivi mil jatá. <sup>18</sup> Joo da ñasahan

xitoho in mil nu cán natiin da jjuhún xitoho da ta já nasahan da nacaan da in yávi ta já najánduxu da ña.

19 "Ta tá sa nayaha cuaha tiempo já nandicó coo xitoho mozo cán. Ta já nacasáhá cája vii da cuéntá xihín da cán.

20 Ta já naxinu da nañehe uhun mil cán nuú xitoho da ta já nandiquiahva da inga uhun mil ña nañehe dá jatá jjuhún cán nuú xitoho da. Ta já cáchí da já xihín xitoho da: "Candehé ndo uhun mil nasahan ndó nuú i. Joo yóho ín inga uhun mil nañehé e jatá", nacachi da xihín xitoho da. 21 Anda já nacachi xitoho da já xihín dá: "Vaha ndivaha nacajún. Mozo vaha ndivaha cúu yóhó jáchi chá va nasahan i nuun ta vaha nacaja chúun ña. Sahá ña cán quéa caja i ña ná cacomún cuéntá sahá cuaha chága ñaha. Ta viti cuu cóun xihín i ta já ná cajii chága inún", nacachi xitoho da.

22 Tá nandihí já naxinu coo ri da nandiquehe ivi mil cán nuú xitoho da. Já nacachi da já xihín xitoho da: "Ivi mil nasahan ndó nuú i joo yóho ín inga ivi mil nañehé e jatá", nacachi da xihín xitoho da.

23 Anda já nacachi xitoho da já xihín dá: "Vaha ndivaha nacajún. Mozo vaha cúu yóhó jáchi chá va nasahan i nuun ta nacaja chúun vahún ña. Sahá ña cán quéa caja i ña ná cacomún cuéntá sahá cuaha chága ñaha. Ta viti cuu cóun xihín i ta já ná cajii chága inún", nacachi xitoho

da. 24 Joo tá naxinu coo ri da nañehe in mil ndahá xitoho cán já nacasáhá cáchí da já xihín xitoho da: "Candehé ndo, xitoho i. Sa cándaa vaha ini i ña cúu ndó in taa ndacú ndivaha tuhun. Ta vatí co xútu ndó nuú in ñuhu joo jáquee tá jáquee ndó nu á. Ta jataca ndó ña nuú coo naxutu ndó ña. 25 Sahá ña cán quéa nayihví vi ta nasahan i najánduxu u jjuhún nasahan ndó nuú i tixi ñuhu. Joo yóho ín jjuhún ndo ndiquehe ndó ña", nacachi da cán xihín xitoho da. 26 Anda já nacachi xitoho da já xihín dá: "Coo cúun in mozo vaha nuú i. Cúun da júsá ndivaha. Sa cándaa vaha inún ña jáquee e nu ñuhu ña co xútu u, 27 ña cán quéa ndá cuéntá quéa coo nasahan tóun jjuhún i banco já ná ndiquehe e jiqui á nuú na cán tá ná ndicó coo i, nduu", nacachi xitoho da cán xihín dá. 28 Anda já nacachi da xihín java na ndúu cán: "Candaa ndó in mil jan ndahá da jan ta quiahva ndó ña nuú da sa cómí uxu mil jan. 29 Jáchi da cája chúun vaha ñehe chága ví da ñaha já quéa ná coo cuahá chága nu dá. Joo da co cája chúun vaha janda ña chá cómí da ndindaa ndáha dá. 30 Ta mozo a váha toho jan tiin ndó da jácana ndó da nuú naá jata véhe jan. Cán cúu nu ndáhyi ndaa ñayivi janda quiahva cáhña nuhu ná sahá ña ndóho ndivaha ini na", nacachi xitoho da, —nacachi Jesús.

*Tá ná cavii sahá ñayivi nu*

*Ndióxi*

31 Já *naçachi* tucu Jesús já:

—Tá ná *xinu* *quivi* *quixi* *yehe*, *da* *nachindahá* *Ndióxi* *nduu* *ñayivi* *ta* *quixi* *i* *xihin* *tóco* *ndihi* *na* *cúu* *tátō* *Ndióxi*. *Anda* *já* *cacoo* *i* *nu* *sácoo* *na* *sáhdá* *chuun* *ta* *já* *ndicáhu* *ndivaha* *i*. 32 *Ta* *nditaca* *ñayivi* *ndúu* *ndijáá* *ñuyívi* *nuú* *i*. *Ta* *já* *casáhá* *i* *ndicahnda* *java* *táhan* *i* *na* *tá* *quiahva* *cája* *in* *da* *ndáá* *ndicachi* *tá* *sáhdá* *java* *da* *ndicachi* *xihin* *tijúhu* *ña* *ná* *a* *cáva* *táhan* *rí*. 33 *Ta* *já* *chinduu* *u* *ñayivi* *cuéntá* *mí* *i*, *na* *cúu* *tátuhun* *ndicachi* *cán* *xoo* *cuáha* *i*. *Ta* *xoo* *íti* *i* *chinduu* *u* *na* *co* *cúu* *cuéntá* *mí* *i*, *na* *cúu* *tátuhun* *tijúhu* *cán*. 34 *Ta* *sahá* *ña* *cúu* *u* *da* *cómí* *cuéntá* *sahá* *ñayivi* *sahá* *ña* *cán* *quéa* *cachi* *i* *já* *xihin* *na* *ndúu* *xoo* *cuáha* *i* *cán* *já*: “*Cuáya* *ndó* *ná* *cacomí* *Ndióxi*, *tátá* *i* *cuéntá* *saha* *ndo* *jáchi* *cúu* *ndó* *na* *naçaja* *cuahá* *mé* *á* *ñamaní* *xihin*. *Jáchi* *janda* *tá* *cámaní* *cava* *sahá* *saha* *ñuyívi* *sa* *nasacu* *tiahva* *mé* *á* *nuú* *canduu* *ndó* *ña* *cacomí* *a* *cuéntá* *saha* *ndo*. 35 *Jáchi* *naçahan* *ndó* *naçixi* *i* *tá* *naçuico* *i*. *Ta* *naçahan* *ndó* *ticuiví* *nuú* *i* *tá* *nahichi* *ini* *i*. *Ta* *nandiquehe* *vaha* *ndó* *yehe* *tá* *nasacuu* *u* *da* *tóho* *naçinu* *i* *nu* *ndo*. 36 *Ta* *najasá* *ndo* *jáhma* *nuú* *i* *tá* *co* *ñéhé* *e* *ña* *cándixi* *i*. *Ta* *tá* *naçaquíhvi* *já* *nachindeé* *ndó* *yehe*. *Ta* *tá* *naçandacaan* *i* *vecaa* *já* *naçito* *nihni* *ndó* *yehe*.” 37 *Anda* *já* *ndaca* *tuhún* *java* *na* *naçaja* *vaha* *ta* *já* *cachi* *na* *já* *xihin* *i*: “*Ndá*

*tañu* *quéa* *naçini* *nde* *ña* *cuíco* *ndó*, *xitoho* *nde* *ta* *já* *naçahan* *nde* *ña* *xíxi* *ndó*. *Ta* *ndá* *tañu* *naçini* *nde* *ña* *íchi* *ndó* *ticuiví* *ta* *já* *naçahan* *nde* *ticuiví* *nu* *ndo*. 38 *Ta* *ndá* *tañu* *nasacuu* *ndó* *da* *tóho* *ta* *nandiquehe* *vaha* *nde* *ndohó*. *Ta* *ndá* *tañu* *naçini* *nde* *ña* *cámaní* *jáhma* *candixi* *ndó* *ta* *najasá* *nde* *ña* *nu* *ndo*. 39 *Ta* *ndá* *tañu* *quéa* *naçini* *nde* *ña* *quíhvi* *ndo* *ta* *nachindeé* *nde* *ndohó*. *Ta* *ndá* *tañu* *naçandacaan* *ndó* *vecaa* *ta* *naçito* *nihni* *nde* *ndohó*.” 40 *Anda* *já* *cachi* *yehe*, *da* *cómí* *cuéntá* *sahá* *ñayivi* *já* *xihin* *ná*: “*Mé* *a* *ndaá* *ná* *cahan* *i* *xihin* *ndó* *ña* *tá* *naçaja* *ndó* *a* *xihin* *na* *cúu* *cuéntá* *mí* *i*, *na* *coó* *saha* *nuú* *ñayivi* *ñuyívi* *já* *cúu* *á* *tátuhun* *naçaja* *ndó* *a* *xihin* *mí* *i*”, *cachi* *i* *xihin* *na* *ndúu* *xoo* *cuáha* *i*.

41 *Anda* *já* *casáhá* *cachi* *i* *já* *xihin* *na* *ndúu* *xoo* *íti* *i* *cán* *já*: “*Caxoo* *ndó* *nuú* *i* *jáchi* *cúu* *ndó* *na* *naçatavi* *cháhan* *ta* *cuhun* *ndó* *indayá* *cañuhu* *ndó* *anda* *ama* *cáa* *quivi*. *Jáchi* *ña* *jan* *cúu* *ña* *nasacu* *tiahva* *Ndióxi* *ndacaan* *tiñahá* *sacuaça* *xihin* *tátō* *mé* *rí*. 42 *Jáchi* *coó* *naçahan* *ndó* *ña* *xíxi* *i* *tá* *naçuico* *i* *ta* *ni* *coó* *naçahan* *ndó* *ticuiví* *nuú* *i* *coho* *i* *tá* *nahichi* *ini* *i*. 43 *Da* *tóho* *cúu* *u* *naçinu* *coo* *i* *tañu* *ndó* *ta* *coó* *nandiquehe* *vaha* *ndó* *yehe*. *Ta* *nandimaní* *i* *ña* *candixi* *i* *ta* *coó* *naçahan* *ndó* *in* *jáhma* *loho* *nuú* *i*. *Naçaquíhvi* *ta* *naçandacaan* *i* *vecaa* *ta* *coó* *naçito* *nihni* *ndó* *yehe*”, *cachi* *i* *xihin* *na* *ndúu* *xoo* *íti* *i* *cán*. 44 *Anda* *já*

nducú ñehe ri na cán tuhun nuú i já cachi na já xihín i: “Ndá tañu queá naxini nde ña cuíco ndó ta ndá tañu queá naxini nde ña íchi ini ndó ticuú ta ndá tañu nasacuu ndó da tóho ta ndá tañu nandimaní jáhma ndó ta ndá tañu nasahin quíhvi ndó ta ndá tañu nasandacaan ndó vecaa ta coó nachindee nde ndohó”, cachi na ndúu xoo íti i cán xihín i. <sup>45</sup> Anda já cachi i já xihín na coo cúu cuéntá mí i já: “Mé a ndaa ná cahan i xihín ndo ña tá ta coo nacaja ndó xihín ñani táhan ndó, na coo saha nuú ñayivi ñuyíví já queá coo nacaja ndó ña xihín yehe”, cachi i xihín na coo cúu cuéntá mí i. <sup>46</sup> Ta já yaha ndihi na cán cuhun ná indayá anda ama caa quívi. Ta na nacaja vaha cán yaha na nu Ndióxi catacu na anda ama caa quívi —cáchi Jesús.

## 26

*Nditúhún jehé na tiin na Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Tá nandihí nacahan Jesús tóco ndihi ña yóho xihín ñayivi cán já nacachi a xihín na xíca tuun xihín á cán já:

<sup>2</sup> —Sa cándaq ini ndó ña tixi ívi quívi coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xihín na xíca tuun xihín á cán.

<sup>3</sup> Anda já na sacuaḥa nuú jutú xihín na jánaḥa ley

Moisés xihín na sacuaḥa veñuhu nandique táhan na yehé Caifás, da cúu sacuaḥa chága nu ndíhi jutú cán. <sup>4</sup> Ta najandique táhan tuhun na ndá quiahva caja na tiin jehé na Jesús ña ná cahní ñahá na. <sup>5</sup> Já cáchi xihín táhan na já:

—Joo a tীন toho í da tañu mé víco jáchi tiaḥva náa ndivaa ñayivi —nacachi na.

*Tá nachojo in ñañaḥa perfume jini Jesús*

(Mr. 14:3-9; Jn. 12:1-8)

<sup>6</sup> Ta ndaja coo íin Jesús ñuu Betania vehe Simón, da cahan na xihín: taa nandoho cueḥe táhyi. <sup>7</sup> Já naxinu in ñañaḥa nu á ta cánee in yúyú ña alabastro ndáḥa ña. Ta ini mé yúyú cán ñúhu perfume, dó yahvi ndivaha. Ta já naxinu ña najácuyu ña do jini Jesús nani íin coo a nu mesa cán. <sup>8</sup> Tá naxini na xíca tuun xihín Jesús cán ña yóho já nacasáhá na xójo ini na já cáchi na já:

—Ndá cuéntá queá tíví uun perfume yahvi ndivaha yóho.

<sup>9</sup> Jáchi cuu jicó yó do ta já quehé cuahá jiuḥún saḥa do, nduu ta já cuu jasá yo jiuḥún cán nuú na ndahví —nacachi na cán.

<sup>10</sup> Ta nacandaq ini Jesús ña cáhvi ini na cán ña cán queá nacasáhá cáchi a já xihín ná:

—Ndá cuéntá queá cája cueḥe ndó xihín ñañaḥa jan jáchi ña vaha queá nacaja ña yóho xihín i. <sup>11</sup> Jáchi na ndahví ní tiempo canduu na tañu ndó joo yehe a cóo tuun toho i xihín ndo. <sup>12</sup> Jáchi tá najácuyu ña perfume yiquí

cuñu i já n̄acaja tiaḥva ñá yeḥe ná coo tiaḥva vi tá ná casaa quiví nduxu. <sup>13</sup> Mé a ndaa ná caḥan i xihín ndo ña ní cúú ñuyiví nuú caca nuu ñayivi caḥan n̄a tuhun vaḥa sahá i ndicani na ña n̄acaja ñá yóho xihín i já ndicuhun ini na saḥa ña —n̄acachi a.

*Jicó túhún Judas Jesús*  
(Mr. 14:10-11; Lc. 22:3-6)

<sup>14</sup> Ta ndaja coo in táhan da uxu ivi xica tuun xihín Jesús, da nani Judas Iscariote naḥan da caḥan da xihín na saḥaḥa nuú jutú. <sup>15</sup> Ta já cáchi da já xihín ná:

—Ndaja quiaḥva ndó nuú i tá ná ndiquiaḥva i Jesús nu ndo —n̄acachi Judas xihín na saḥaḥa nuú jutú cán.

Anda já naḥan n̄a oco uxu jjuhun cúxú nu dá saḥá Jesús. <sup>16</sup> Ta sa mé nani já naḥasáhá Judas ndúcú da ndaja cuu caja da ndiquiaḥva da Jesús ndáḥa ná.

*Tá na xijini ndayí Jesús xihín na xica tuun xihín á*  
(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Mé quiví nuú vicó xíxi na pan, ña cō quee yusá naḥaa xihín cán já na xinu n̄a xica tuun xihín Jesús cán nu á. Já n̄acachi na já xihín á:

—Ndáchi cuni ndó cuhun nde caja ndíví nde cajíni ndó vicó pascua —n̄acachi na xihín á.

<sup>18</sup> Anda já n̄acachi Jesús já xihín ná:

—Cuáhán ndó ñuu jan ta jan cuni ndó in dataa ta já cachi ndó já xihín dá: “Da

jánaḥa ndeḥe cáchi xuhun: Cuhun i vehe ndó cajíni i vicó pascua xihín na xica tuun xihín i jáchi sa n̄andindaa tiempo cuhun i viti” —n̄acachi Jesús.

<sup>19</sup> Já naḥee n̄a cán naḥan n̄a n̄acaja na tá ín naḥanda Jesús nu ná ta cán n̄acaja ndíví na ña cajíni na vicó pascua.

<sup>20</sup> Ta ndaja coo tá n̄acuaá já naḥacoo Jesús nu mesa xihín ndíhuxu ivi n̄a xica tuun xihín a cán. <sup>21</sup> Ta nani xijíni na já naḥasáhá cáchi a já:

—Mé a ndaa ná caḥan i xihín ndó ña in táhan ndó, n̄a xica tuun xihín i cacuu da jicó túhún yeḥe —n̄acachi Jesús xihín ná.

<sup>22</sup> Anda já naḥasáhá n̄a cán cácuéḥa ndivaḥa ini na já naḥasáhá tá in tá in na ndáca túhún n̄a Jesús já cáchi n̄a já xihín á:

—Á yeḥe cacuu da jicó túhún ndo, xitoho i —cáchi na ndáca túhún ñahá n̄a.

<sup>23</sup> Anda já n̄anducú ñeḥe Jesús tuhun nu ná já n̄acachi a já xihín ná:

—Da naḥivhi ndáḥa ini coho xíxi i, da cán cúú da jicó túhún yeḥe. <sup>24</sup> Yeḥe cúú da naḥindahá Ndióxi nduu ñayivi ta ndítahan nuú i quivi i tá ín cáchi tuhun Ndióxi. Joo ndáhví naḥá n̄acuu da jicó túhún yeḥe. Janda vaḥa chága ná a cácu da, nduu —n̄acachi Jesús.

<sup>25</sup> Anda já n̄andicaḥan Judas, mé da jicó túhún ñahá cán já n̄acachi da já xihín Jesús:

—Xitoho i, á yehe cúu da jicó tuhún ndo —nacachi da xihín á.

—Jivi mún cúu dá — nacachi Jesús xihín dá.

<sup>26</sup> Ta nani xíxi na ndúu na natiin Jesús pan já nandiquiahva ndixahvi nu Ndióxi. Tá nandihi já nasahnda java ña ta nandicahnda ña nuú na xíca tuun xihín á cán. Ta já nacachi a já xihín ná:

—Júhun ndó jáchi ña yóho cúu tátuhun yiquí cuñu i — nacachi a.

<sup>27</sup> Tá nandihi já natiin a in vaso nu ñúhu tó uva já nandiquiahva ndixahvi nu Ndióxi já nacachi a já xihín na xíca tuun xihín á cán já:

—Coho ndihi ndó dó ñúhu ini vaso yóho. <sup>28</sup> Jáchi dó yóho cúu dó tátuhun nií i, dó cuíta sahá cuahá ñayivi já ná ndoo cuachi na. Tá ná cuíta nií i já candaá ini ndó ña najáxiñu coo Ndióxi tuhun a nasahan sanahá. <sup>29</sup> Mé a ndaa ná cahan i xihín ndo ña a cóho ga i tó uva janda quiahva ná xiñu coo quiví coho tucu u inga dó vaha chága xihín ndo tá ná xiñu quiví cacomí Ndióxi, tátá i cuéntá sahá ñayivi —nacachi a.

*Cáxi tuhun Jesús ña chijehé tuhún Pedro ña xini da mé á*  
(Mr. 14:26-31; Lc. 22:31-34; Jn. 13:36-38)

<sup>30</sup> Ta tá nandihi naxita na in canto já naquee na cuahan na yucu yitó olivo. <sup>31</sup> Ta já nacachi Jesús já xihín ná:

—Mé ñuú viti jándacoo ndihi ndó yehe cuhun ndó sahá ña ndoho i. Já cáchi tuhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cuhun ri”, cáchi tuhun Ndióxi. <sup>32</sup> Joo tá sa ná nditacu tucu u já cuhun jihna ñúhu yehe estado Galilea anda já cuhun mé ndó — nacachi Jesús.

<sup>33</sup> Anda já nanducú ñehe Pedro tuhun nu á já nacachi da já xihín á:

—Vatí ná jándacoo tóco ndihi na mé ndó sahá ña ndoho ndó joo a jándacoo toho i ndohó —nacachi da xihín á.

<sup>34</sup> Anda já nacachi Jesús já xihín dá:

—Mé a ndaa ná cahan i xuhun ña mé ñuú viti tá camañi cana chéle já chijehé tuhún ña xinun yehe uní táhnda —nacachi Jesús xihín dá.

<sup>35</sup> Anda já nacachi tucu da já:

—Vatí ná quivi i xihín ndo joo a chíjehé tuhun toho i sahá ña xini i mé ndó — nacachi da xihín Jesús.

Ta quiahva já nacachi tóco ndihi java ga na xíca tuun xihín á cán.

*Tá xíca tahví Jesús nu Ndióxi in nuú nani a Getsemani*  
(Mr. 14:32-42; Lc. 22:39-46)

<sup>36</sup> Anda já naxinu coo Jesús xihín na xíca tuun xihín á cán in nuú nani a Getsemani. Já nacachi a já xihín ná:



—Yóho cacoo ndó nani ná cuhun i cáa caça tahví i nu Ndióxi —cáchi a.

37 Ta ndáca Pedro xihin ndívi da cúu jahyi Zebedeo cuahan xihin á. Ta já nacasáhá cácuéha ndivaha ini a ta a juú quiahva táhvi ini a. 38 Anda já nacachi a já:

—A juú quiahva cácuéha ini i chí quivi i cúu ini i. Yóho candati tóo ndó yehe ta coto a cúju ndo —nacachi Jesús.

39 Ta já naquee mé á nasahan loho chága chí nuu já nacaxítí a janda quiahva naxinu taan nu ñúhu. Ta já cáchi a já:

—Tátá Ndióxi, tá ta ná cuu caja ndó ñamaní ña ná a ndóho i ña ihvi ndivaha vaxi nuu i ndóho i. Joo ná coo tá ín cúní mé ndó ta ná a cóo toho ña cúní yehe —cáchi Jesús.

40 Tá nandihí já nandicó coo a nuú najandacoo a na xíca tuun xihin á cán ta já nandiñehe á na quíji na ndúu na. Anda já nacachi a já xihin Pedro:

—Á coo nacuu candita ndó ni in hora. 41 Xíní ñúhú coo tiahva ndó ta caça tahví ndo nu Ndióxi já ná a cóto ndojó rí quini ndóhó. Jáchi ínimá ñayivi cúní a ndinducú a Ndióxi joo yiquí cuñu na co ín tiahva caja ña cúní Ndióxi —nacachi Jesús.

42 Anda já naquee tucu Jesús táhndá ivi cuahan tucu a caça tahví a nu Ndióxi já cáchi a já:

—Tátá Ndióxi, tá ta a cúu va caja ndó ñamaní ná a ndóho

ini i ña jan já ná coo tá ín cúní mé ndó coo —cáchi a.

43 Tá nandihí já nandicó coo tucu a nu ndúu na xíca tuun xihin á cán ta nandiñehe á na quíji tucu na ndúu na jáchi naqueehe a mahnú na. 44 Já naquee tucu a nasahan xíca tahví a nu Ndióxi táhndá uní ta sa mé tuhun cán nacahan tucu a. 45 Anda já naquixi tucu a nu ndúu na xíca tuun xihin á cán já nacachi a já xihin ná:

—Vatí cúní ndó cuju ndó ta vatí cúní ndó ndiquehe ndéé ndó joo a cúu caja ndó ña viti. Jáchi sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. 46 Cuáhán ndacoo ndó ná coho. Jáchi sa vaxi da jicó túhún yehe —cáchi a.

### Tá natin na Jesús

(Mr. 14:43-50; Lc. 22:47-53; Jn. 18:2-11)

47 Ta nani cáhan yíi va Jesús já naxinu Judas, da cúu in táhan uxu ivi na xíca tuun xihin á cán. Ta ndáca da cuahá ñayivi, ñéhe na machítí xihin yíto viti. Ta na cán cúu ná na naquixi cuéntá na sacuahá nuu jutú xihin cuéntá na sacuahá veñuhu. 48 Ta mé Judas, da ndiquiahva ñahá cán sa nacandoo da xihín na cán ña tatí yúhu dá sajóho Jesús jáchi nacachi da já xihin ná:

—Ndá da ná tatí yuhú u sajóho, da cán cúu dá tiin ndó —nacachi da.

49 Chí ivi laá nacativi da nu Jesús já nacahan Ndióxi

dá xihín á ta já natatí yúhu dá sajóho mé á. <sup>50</sup> Andá já nacachi Jesús já xihín dá:

—Cama chá cajún ña, amigo.

Andá já nacayati na nu Jesús ta natiin tuun na a.

<sup>51</sup> Joo in táhan da xíca tuun xihín Jesús cán, natavá da machítí da ta já nachitúhün da in johó da cúu mozo nuú da sacuahá chága nu ndíhi jutú cán. <sup>52</sup> Andá já nacachi Jesús já xihín dá:

—Chicaan vaha machítí jan jáchi ndá na sáhní xihín machítí, xihín machítí quivi ri na cán va. <sup>53</sup> Á cō cánda inún ña cuu caca tahví i nu Ndióxi, tátá i ña ná chindahá mé á cuaha ndivaha táto mé á ña ná chindeé na yehe. <sup>54</sup> Cuu caja i ña joo xíní ñúhú yaha tá yaha ña nacahyí nuú tuhun Ndióxi ndoho i —cáchi Jesús.

<sup>55</sup> Ta já nacachi Jesús já xihín na naxinu tiin ñahá cán:

—Cája ndó xihín i tátuhun cája na xihín ta cuíhna jáchi naqueta ndó vaxi ndó tiin ndó yehe xihín machítí ta xihín yító viti. Ta ndijáá ní quivi nasahiin i xihín ndo ini veñuhu cáhnu jánaḥa i tuhun Ndióxi nu ndo ta ni in tañu cōo natiin ndó yehe. <sup>56</sup> Joo tóco ndíhi ña yóho yaha ña já ná xinu cōo ña nacahyí na profeta sahá i ini tuhun Ndióxi sanahá —cáchi a.

Tá nandíhi já naxinu ndíhi na xíca tuun xihín Jesús cán cuahān na ta najándacoo na mé á.

*Tá ñehe na Jesús cuahān na nuú nataca ndíhi na sacuahā*  
(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Tá natiin na cán Jesús já ñehe na a cuahān na nuú Caifás, da cúu sacuahā chága nu ndíhi jutú. Ta cán sa nanditútú na jánaḥa ley Moisés ndúu na xihín na sacuahā veñuhu. <sup>58</sup> Joo ndaja coo nasandico xíca Pedro Jesús anda quiahva naxinu da yéhe vehe da cúu sacuahā chága nu ndíhi jutú cán. Ta já nandíhvi da nasacōo da nu ndúu soldado cán sándehe da ndá quéa caja na xihín Jesús.

<sup>59</sup> Ta na sacuahā nuú jutú xihín tóco ndíhi na cómi cuéntá sahá na Israel nataca na cán ndúcú na cuachi jácojo na jatá Jesús já ná cuu cahní ñahá na. <sup>60</sup> Joo cōo ñaṇehe ná cuachi jíquí ña cuu chinúu na jata mé á vatí naxinu cōo cuahá na nacahān ña tuhún sahá. Andá jáví naxinu cōo ivi ga da cáhan ña tuhún sahá.

<sup>61</sup> Já nacachi da já:

—Naxini johó nde nacachi da jan já: “Jánditani i veñuhu cáhnu cán ta jácandichi tucu u ña tixi uní quiví”, cáchi da —nacachi na cán chicaan na cuachi jatá Jesús.

<sup>62</sup> Andá já nandacā ndíchi da cúu sacuahā chága nu ndíhi jutú cán já cáchi da já xihín Jesús:

—Á chí a ndúcú ñehún tuhun nuú nde sahá cuachi jácojo na jatun —nacachi da.

<sup>63</sup> Joo ni in tuhun cōo nanducú ñehe Jesús nu dá. Andá já nacachi da cúu

sacuaḥa chága nu ndíhi jutu cán já xihín á:

—Tavún quivi Ndióxi, ña tácu ín indiví ta cachún xihín nde á jivi ndusa yóhó cúun Cristo, da cúu in túhún jiní já jahyi Ndióxi, da nachindahá mé á cacomí cuéntá sahá ñayivi —nacachi da xihín Jesús.

64 Já nanducú ñehe Jesús tuhun nu dá já nacachi a já:

—Ajan, jivi yehe cúu u da cáchí ndó jan. Ta viti ná caḥan i xihín ndo ña vaxi quivi tá cuni ndó yehe, da nachindahá Ndióxi nduu ñayivi cacoo i xoo cuáha Ndióxi, mé á ín cuaha ndée. Ta já cuni ndó yehe ndicó coo i ñuyiví yóho tañu vico tá ná quixi i chí indiví —nacachi a.

65 Tá naxini johó da sacuaḥa chága nu ndíhi jutu cán ña yóho já nandata da jáhma dá ña ná candaá ini ñayivi ña xójo ini da. Ta já nacachi da já:

—Ndája núu da yóho Ndióxi. Coó chicuu chága yó ñayivi ná caḥan na xihín yo jáchi sa naxini johó ndihí ña nacanaḥá da yóho xihín Ndióxi. 66 Ta ndaja xíní ndó caja í xihín dá viti —nacachi da.

Anda já nacachi ndihi na cán já:

—Íin cuachi da jan ta ndítahan cuḥun da quivi da —nacachi na cán.

67 Ta já nacasáhá na xihnu ndaa na tójí na nu á. Ta nacasáhá túxú na yiquí a. Ta java na cáni jahnda nu á.

68 Ta já cáchí na já xihín á:

—Caḥan xihín nde yo nacani yohó tá ta mé a ndaa cúun Cristo, da nachindahá Ndióxi cacomí cuéntá sahá ñayivi —cáchí na xihín á.

*Tá nachijehé tuhun Pedro ña xini da Jesús*

(Mr. 14:66-72; Lc. 22:56-62; Jn. 18:15-18, 25-27)

69 Ta ndaja coo ín coo Pedro yuhú yéhe da cúu sacuaḥa chága nu ndíhi jutu cán. Já nacativi in ñañaḥa, ña cája chúun mé vehe cán. Já nacasáhá cáchí ña já xihín dá:

—Yóhó cúun in táhan da xíca tuun xihín Jesús, da estado Galilea —nacachi ña cán xihín dá.

70 Joo ndaja coo nachijehé tuhun Pedro nu ndíhi na cán ña xini da Jesús. Já cáchí da já:

—Co xini toho i ndá saḥa cáhun —nacachi da xihín ña cán.

71 Ta tá sa naqueta da yéhe cán já naxini inga ñañaḥa da já nacasáhá cáchí ña já xihín tóco ndihi na ndúu cán:

—Naxini i naxica tuun da yóho xihín Jesús, da ñuu Nazaret cán —nacachi ña cán.

72 Ta já nacasáhá tucu Pedro chíjehé tuhun da ña xini da Jesús ta natavá da quivi Ndióxi já cáchí da já:

—Co xini toho i ndá da cúu da jan —nacachi Pedro xihín na cán.

73 Chá va nayaha ña yóho ta nacayati java na ndúu cán nu Pedro. Já nacachi na já xihín dá:

—Mé a ndaa táhyí jivi táhan na xíca tuun xihín Jesús cúu

ri yóhó va jáchi cáhūn tátūhun cáhan nā cán —nācachi na xihīn dá.

<sup>74</sup> Anda já nacasáhá Pedro cáhahá da ta natavá da quivī Ndióxi ña co xīni da Jesús. Já cáhí da já:

—Co xīni toho i ndá da cúu da jan —nācachi da.

Tá nācachi da já chí ivi laá nācana chéle. <sup>75</sup> Anda já nāndicūhun ini Pedro ña nācahan Jesús xihīn dá tá nācachi a xihīn dá: “Tá cámaní cana chéle sa chíjehé tūhún ña xīnūn yehe unī tañu.” Anda já nāqueta da jatā véhe ta a juú quiahva sácu da jáchi cácuéha ndivaha ini da.

## 27

*Tá nāndiquiahva na Jesús ndáha Pilato*

(Mr. 15:1; Lc. 23:1-2; Jn. 18:28-32)

<sup>1</sup> Tá natīvi inga quivī itaan já nāndique táhan ndihi na sacuaha nuú jutū xihīn nā sacuaha veñūhu ña nditūhún nā ndá quiahva jácojo na cuachi jatá Jesús já ná cuu cahní ñahá nā. <sup>2</sup> Sahá ña cán quéa nācató nā mé á ta ñéhe na a cuahan nā ndiquiahva na mé á nu Pilato, da cúu gobernador ñuu cán.

*Tá naxihī Judas*

<sup>3</sup> Ta ndaja coo naxini Judas, da najicó tūhún Jesús ña nāsacu ini nā cán cahní nā Jesús. Já nācahvi ini da sahá ña núu nācāja da chí ndáva da cuahan da nducú ñéhe da ndíhoco uxū jiuhūn cúxú nuú nā sacuaha nuú jutū xihīn

nuú nā sacuaha veñūhu. <sup>4</sup> Já nācachi da já xihīn nā cán:

—Cuachi cáhnu ndivaha quéa nācāja i jáchi najicó tūhún i in da coo cuachi.

Já nācachi nā cán já xihīn dá:

—Co sáhní toho nde mé nde sahá ña yóho. Mún xīni ndá quéa nācájún —nācachi nā cán xihīn dá.

<sup>5</sup> Anda já nācuinha Judas jiuhún cán ini veñūhu cáhnu. Ta já nāqueta da nāsahan da nācata caa da mé dá já nāsahní da mé dá.

<sup>6</sup> Ta já najátaca nā sacuaha nuú jutū jiuhún cán já nācachi xihīn táhan na já:

—A váha toho ña ná chicaan yó jiuhún yóho ini satō nu táan nā jiuhún jóco nā nu Ndióxi jáchi ndii naxihī sahá ña yóho —nācachi na.

<sup>7</sup> Ta tá sa nānditūhún vaha xihīn táhan na já nāxeen na in ñúhu xihīn jiuhún cán. Mé ñúhu cán naní a ñúhu da cávaha ñaha xihīn ñundáhyi. Ta ñúhu cán cacuu a nu jánduxu nā nā tóho. <sup>8</sup> Sahá ña cán quéa nāsacu na quivī ñúhu cán ña cananí a yójo nuú naxitā niī. Ta já naní a janda viti. <sup>9</sup> Ta xihīn ña yóho naxīnu coo nuú ña nācahyí profeta Jeremías sanahá tá nācachi da já sahá Jesús: “Natīin na ndíhoco uxū jiuhūn cúxú jáchi ña jan nāsacuu yahvi nāsacu nā Israel चाहvi na saha dá. <sup>10</sup> Ta xihīn mé jiuhún cán nāxeen na ñúhu naní a ñúhu da cávaha ñaha xihīn ñundáhyi jáchi quiahva já

naſahnda Ndióxi chuun nuú i caja i”, cáchí tuhun Ndióxi.

*Tá cándichi Jesús nu Pilato*

(Mr. 15:2-5; Lc. 23:3-5; Jn. 18:33-38)

<sup>11</sup> Ta ndaja coo cándichi Jesús nu Pilato, da cúu gobernador. Ta já naſasáhá da cán ndáca tuhún ñahá da já cáchí da já xihin á:

—Á mé a ndaa cúun in rey, da cómí cuéntá sahá na Israel.

—Ajan. Jivi ndusa cúu u tá quiahva cáchí ndó jan —naſachí Jesús xihin dá.

<sup>12</sup> Ta na ſacuaha nuú jutú xihín na ſacuaha veñuhu naſhicaan na cuachi jatá Jesús joo ni in tuhun coo nanducú ñehe a nu ná.

<sup>13</sup> Anda já naſachí Pilato já xihín Jesús:

—Á co xini johó tohún ndaja cuahá nuú cuachi jácojo na jatun —naſachí da.

<sup>14</sup> Joo ni in tuhún tuhun coo nanducú ñehe Jesús nu dá. Chí cátontó ndivaha da cúu gobernador sahá ña co cáhan Jesús.

*Sácú ini na ndaja caja na ña ná quivi Jesús*

(Mr. 15:6-20; Lc. 23:13-25; Jn. 18:38-19:16)

<sup>15</sup> Tañu mé víco pascua naſahin costumbre da cúu gobernador cán sá janí da in táhan da ndácaan vecaa. Ndá da cúní ñayivi janí da, da cán cúu da janí da. <sup>16</sup> Mé tañu já naſandacaan in da naní Barrabás vecaa. Níí cúu naſaxita nuu tuhun sahá da yóho. <sup>17</sup> Ta tá naſata ndihí ñayivi já nandaca tuhún

Pilato na já naſachí da já xihin ná:

—Yo cúní ndo ña ná janí i. Á Barrabás janí i á Jesús, da cáchí na cúu Cristo, da naſhindahá Ndióxi cacomí cuéntá sahá ñayivi. Yo janí i cúní ndo —naſachí da.

<sup>18</sup> Naſachí Pilato ña yóho xihin ná jáchí ſa cándaſa vaha ini da ña sahá ña cáhivi ini na xihín Jesús sahá ña cán quéa nandiquiahva na mé á nu dá. <sup>19</sup> Ta nani in coo da nu ſácco da sáhdá da chuun vechúun cán já naſhindahá ñájihí da tuhun nu dá já naſachí ña já: “A quíhvi ndáhun Jesús jáchí cúu dá in taſa ndaa. Nuú anda véhe naſaní i naſaja Jesús ta ndícani ndivaha ini i sahá”, naſachí ña.

<sup>20</sup> Joo ndaja coo na ſacuaha nuú jutú xihín na ſacuaha veñuhu cán najácahan na ñayivi ña ná caſa na nu Pilato ña ná janí da Barrabás ta ná cahní da Jesús. <sup>21</sup> Anda já naſachí da cúu gobernador cán já xihin ná:

—Yo cúní ndó ña ná janí i.

—Anda já naſachí na cán já:

—Barrabás jan va janí ndó —naſachí na xihin dá.

<sup>22</sup> Anda já naſachí tucu Pilato já xihin ná:

—Ndía cúní ndó caja i xihín Jesús, da cáchí ndo cúu Cristo.

—Anda já naſachí tóco ndihi na cán já:

—Cata caa ndó da ndica crúxu.

<sup>23</sup> Anda já naſachí tucu Pilato já xihin ná:

—Ndá cuachi ñajaja da, vaha —ñacachi da xihín ná.

Joo xihín ña yóho ví ga ví ñacasáhá cáyuhú na já cáchi na já:

—Cata caa ndó da ndica crúxu.

<sup>24</sup> Ta tá ñaxini Pilato ña co yáa na cán ta ví ga ví ndívaá na já ñatiin da ticuñi ta ñandahá da nu ndíhi ñayivi cán ta já ñacachi da já xihín ná:

—Xihín ña yóho jáñaha i nu ndo ña coo cuachi toho ndójo i saha ndá ña ná caja ndó xihín da yóho jáchi coo cuachi toho da yóho. Jata mé ndó ná cuhun ndíhi va —ñacachi da xihín ná.

<sup>25</sup> Anda já ñacachi tóco ndíhi na cán já:

—Vaha ná candojo nde cuachi ta janda jahyi nde viti ná candojo na cuachi sahá ña ná quivi da —ñacachi na cán xihín dá.

<sup>26</sup> Anda já najaní Pilato Barrabás. Ta tá ñandíhi najácaxáhan na Jesús já ñandiquiahva da a ndáha ná ña ná cata caa na a ndica crúxu.

<sup>27</sup> Anda já ñéhe soldado cuéntá gobernador cán Jesús yuyéhe vechúun. Já najátaca soldado cán java ga táhan da ta cán ñacava toyivi da mé á ndúu da. <sup>28</sup> Tá ñandíhi já ñatavá na jáhma á. Anda já ñachinúu na in jahmá cuhá túun jatá. <sup>29</sup> Ta já ñachinúu na in tiyivi ínu jini á. Ta ñachiñee na in ndoo ndahá cuáha. Ta já ñacasáhá na cáxítí na nu á já sácu ndaa ichi ñahá na já cáchi na já xihín á:

—Cáhnú ñahá ná cacuu yóhó, da cúu rey nuú na Israel —ñacachi na.

<sup>30</sup> Ta ñacasáhá xihnu ndaa na tóji na nu á. Ta já cándaa na ndoo cán ndáha á ta cáni na yiquí jini a xihín do. <sup>31</sup> Ta tá sa ñandíhi ñasacu ndaa ñahá na já ñacandaa na jáhma ñachinúu na jatá cán ta najácandixi tucu na a xihín jáhma mé á. Anda já ñéhe na a cuahan na cata caa na a ndica crúxu.

*Tá ñacata caa na Jesús ndica crúxu*

(Mr. 15:21-32; Lc. 23:26-43; Jn. 19:17-27)

<sup>32</sup> Ta tá ñéhe na Jesús cuahan na cata caa na a já ñanditahan na in da naní Simón, da ñuu Cirene. Ta ñajaja ndúsa na xihín dá ña ná ndicojo da crúxu nuú cata caa na Jesús. <sup>33</sup> Ta ñaxinu coo na xiquí naní Gólgota. Tuhun yóho cuni cachi a: nu ndúu lásá yiquí jini ndii. <sup>34</sup> Mé cán ñasahan na vino nu á, dó ñacava táhan xihín ña ova ña ná coho a do. Joo tá ñaxito ndojó a do coo ñaxeen toho a coho a do.

<sup>35</sup> Ta tá sa ñandíhi ñacata caa na a ndica crúxu já ñaquehe na jáhma á ñandicahnda nu táhan na. Joo jihna ñuhú ñasajiquí na sahá ta da ñaquee vaha cán, da cán ñandiquehe jáhma á. Xihín ña yóho ñaxinu coo nuú ña ñacahyí profeta sanahá tá ñacahyí da já: “Ñandicahnda nu táhan mé ná cotó níhnu i ta já ñasajiquí na sahá cotó maá i ta da ñaquee

vaha cán nandiquehe da ña”, cáchí tuhun Ndióxi. <sup>36</sup> Ta já nasacoo soldado cán ndúu na ndáá ñahá na. <sup>37</sup> Ta jiní ndica crúxu cán naçahyí na ndá saha naçata caa na a já cáchí a já: “Da yóho cúu Jesús, da cúu rey nuu na Israel.”

<sup>38</sup> Ta sa mé já naçata caa ri na ivi ta cuíhna xihín Jesús: in da xoo cuáha ta inga da xoo íti. <sup>39</sup> Chí cáva jini mé ñayivi yáha cán canahá na xihín á. <sup>40</sup> Ta já cáchí na já:

—Yóhó cáchún jánditani veñuhu cáhnu cán ta tixi uní víxi quívi cáchún jácandichi tucún ña. Tá ta mé a ndaa cúun jahyi Ndióxi jácaçu mún ta cuáhán nuu ndica crúxu jan —naçachi na xihín Jesús.

<sup>41</sup> Ta quiahva já naçaja ri na sacuaça nuu jutú xihín na jánaça ley Moisés xihín na sacuaça veñuhu. Sáçu ndaa na a já cáchí na já:

<sup>42</sup> —Najácaçu da java ga ñayivi ta viti chí a cuú caja da jácaçu da mé dá. Tá ta mé a ndaa cúu dá rey nuu na Israel, ná nuu da ndica crúxu viti ñuhú já ná candúsa nde da. <sup>43</sup> Cándéé ini da Ndióxi ta cáchí da cúu da jahyi Ndióxi já quéa ná quixi Ndióxi chindeé a da tá ta mé a ndaa quíhvi ini a da —naçachi na cán canahá na xihín Jesús.

<sup>44</sup> Quiahva já canahá ri ndívi ta cuíhna táca in in xoo jin á cán xihín á.

### *Tá naçihí Jesús*

(Mr. 15:33-41; Lc. 23:44-49; Jn. 19:28-30)

<sup>45</sup> Tá naçinu coo caçivi ndaa naçanaá níi cúu ñuyívi

ta janda caa uní sahini já naçasáhá nandiyehé tucu. <sup>46</sup> Ta sa mé hora já naçayuhú cóho Jesús já naçachi a já:

—Elí, Elí, lama sabactani — ña yóho cúni cachi a: Ndióxi mí i, Ndióxi mí i, ndávaha najándacoo ndáha ndó yehé.

<sup>47</sup> Ta java na ndíta cán tá naçini johó na tuhun cáchí a já naçachi na já:

—Cána da profeta Elías — naçachi na cán.

<sup>48</sup> Ivi laá xínu in da nasahan da naçhindaxi da in ticoto ini vino iyá. Ta naçató da ña nuú in yitó ndoç já naçhiñee da do yati yúhu Jesús ña ná coho a do. <sup>49</sup> Joo na java ndíta cán naçachi na já xihín dá:

—Cóho candehé yo á quixi Elías jácaçu a da —naçachi na cán.

<sup>50</sup> Anda já naçayuhú cóho tucu Jesús já naçihí a. <sup>51</sup> Ta ndaja coo nandatá java ndaa jahmá ndeé ña sáji nuu nuú yíi ndivaha veñuhu cáhnu ñuu Jerusalén cán. Janda jiní á ta janda sahá nandata. Ta mé hora já naçaan ta ndijáa yuu tóto ndúu cán nandata. <sup>52</sup> Ta nanuna cáva nu nasañuhu na naçihí ta cuhá ñayivi, na nasacuu cuénta Ndióxi nanditacu tucu na. <sup>53</sup> Ta tá sa nanditacu tucu Jesús já naçinu na naçeta cáva cán ñuu Jerusalén ta cuhá ndivaha ñayivi naçini ñahá.

<sup>54</sup> Ta da cúu sacuaça nuú soldado cuénta Roma xihín da ndáá Jesús xihín da cán tá naçini da ña naçaan ta naçini da java ga ña nayaha cán já

naçasáhá yíhví ndivaha da. Já naçachi da já:

—Mé a ndaa táhyí cúú da yóho in túhún jini já jahyi Ndióxi —naçachi da.

<sup>55</sup> Ta mé cán naşandita cuahá najihí sándehe xicá na Jesús. Mé na cán cúú na naçaja ndíví ñahá nu Jesús tá nandico na mé á naquixi na janda estado Galilea. <sup>56</sup> Tañu najihí cán naşandacaan María, ñá ñuu Magdala xihin María, ñá cúú náná Jacobo xihin José. Ta cán naşandacaan ri ñá cúú náná ndíví da cúú jahyi Zebedeo.

*Tá naçhicaan nayiquí cuñu Jesús ini cáva*

(Mr. 15:42-47; Lc. 23:50-56; Jn. 19:38-42)

<sup>57</sup> Ta ndaja coo naşahin in da cuicá naní José, da ñuu Arimatea. Mé da yóho naşacu da in táhan da naşaxica tuun xihin Jesús. Ta tá sa naçuaá já naşinu da <sup>58</sup> naşahan da cahan ndahví da xihin Pilato ña ná ndiquiahva da yiquí cuñu Jesús nu dá. Anda já naşahnda Pilato chuun ña ná ndiquiahva na ña nu dá. <sup>59</sup> Ta já naçhitiví José cán yiquí cuñu Jesús xihin in jáhma vaha ña vií. <sup>60</sup> Ta já naçhicaan da yiquí cuñu Jesús ini in yávi ña saá ndacaan ndica cáva ña jacá naçaán da cuéntá mé dá. Ta tá nandihí já naçihahví da yuhú cáva cán xihin in yuu jáhnda cáhnu ta já naçuee da cuahan da. <sup>61</sup> Ta nu yéhe mé cáva cán naşandu coo María, ñá ñuu Magdala xihin inga ña naní María cán.

*Tá ndaa java soldado nu ndacaan Jesús*

<sup>62</sup> Ta ndaja coo sa nandihí naçaja ndíví na ñaha cuéntá quivi ndiquehe ndee na. Ta inga quivi itaan najátaca táhan na saçuaha nuú jutu xihin na fariseo já naşahan na nu Pilato. <sup>63</sup> Já naçachi na já xihin dá:

—Vaxi nde nu ndo caça loho nde ñamani nu ndó. Jáchi ndicuhun ini nde ña tá naşatacu Jesús, da naşica jándahvi ñayivi cán naçachi da ña tá sa ná yaha uní quivi já nditacu tucu da. <sup>64</sup> Ña cúni nde queá ná chindahá loho ndó na cuhun candaa nuú naçhicaan na yiquí cuñu da cán janda quiahva ná yaha uní quivi. Jáchi tiahva náa xinu coo na naşica tuun xihin dá ñuu ta caja cuíhna na yiquí cuñu da. Ta já casáhá cachi na xihin ñayivi ñuu ña nanditacu tucu Jesús tañu na naçihí. Ta xihin ña yóho jándahvi chága na ñayivi a juú ga jihna —naçachi na.

<sup>65</sup> Anda já naçachi Pilato já:

—Cañehe ndó in táhnda soldado. Cuáhan ndó candaa ndó nu ndacaan da tá quiahva xini mé ndó caja ndó —cáchi Pilato xihin ná.

<sup>66</sup> Anda já naçuee na cán naşahan na já naçhicañi vaha chága na nu ndacaan yiquí cuñu Jesús cán. Ta naşacu na sello yuu jáhnda cán ta já naşacu na soldado ña ná candaa da ña.



## 28

*Tá nanditacu tucu Jesús*

(Mr. 16:1-8; Lc. 24:1-12; Jn.

20:1-10)

<sup>1</sup> Tá sa nayaha quivi ndiquehe ndée ná ta nativi inga quivi itaan já naxinu María, ña ñuu Magdala xihín inga María cán sánehé na nuú nachicaan na yiquí cuñu Jesús cán. <sup>2</sup> In naá cuití nataan ndeé ndivaha. Nayaha ña yóho jáchi nanuu in tátō Ndióxi indivi. Ta najátivi a yuu jáhndá nasajahvi nuú nasandacaan yiquí cuñu Jesús cán. Ta já nasacoo a jatá. <sup>3</sup> Ta yéhe mé tátō Ndióxi cán tá quiahva yéhe tasa. Ta jáhma ndíxi a cúu á jahmá yaa cachi. <sup>4</sup> Ta a juú quiahva ná yihví soldado ndúu cán nacaja tátō Ndióxi chí nacasáhá quíji ninu da. Ta já nacuyu da nu ñúhu tátuhun ndii naxihi. <sup>5</sup> Joo ndaja coo tátō Ndióxi cán nandicaahan xihín najihí cán já nacachi a já xihín ná:

—A cáyihví toho ndó. Sa xíní vaha i ña ndínducú ndo Jesús, ña nacata caa na ndica crúxu. <sup>6</sup> Coó toho a cán ín yóho jáchi sa nanditacu tucu a tá quiahva nacachi mé á xihín ndó. Naha ndó candehe ndó nuú nasahín a já cuni ndó ña coó ga ín nuú nasacu na ña. <sup>7</sup> Ta cama ndó cuhun ndó caxi tuhun ndó xihín da naxica tuun xihín á ña sa nanditacu tucu Jesús tañu na sa naxihi. Ta viti canuú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña

nacachi i xihín ndo —nacachi tátō Ndióxi cán.

<sup>8</sup> Anda já naquee mé najihí cán mé nuú nasandacaan yiquí cuñu Jesús. Ta vatí yihví na joo cávatá ndivaha na ta sahá ña cán queá xínu na cuahan na caxi tuhun na ña yóho nuú na naxica tuun xihín Jesús cán. <sup>9</sup> Ta nani cuahan na ivi laá sa ín va Jesús xihín ná. Já nacachi a já xihín ná:

—Ndióxi ná coo xihín ndo.

Anda já nacayati na cán nu á já nanumi na sahá ta nacaja cáhnu na a. <sup>10</sup> Anda já nacachi tucu Jesús já xihín ná:

—A cáyihví toho ndó. Cuahán ndo caxi tuhun ndó xihín na cúu cuéntá mí i ña ná cuhun na estado Galilea jáchi cán cuni na yéhe —nacachi Jesús xihín najihí cán.

<sup>11</sup> Ta nani xínu najihí cán cuahan na já ndáva java soldado, da nasandaa nuú nasandacaan Jesús cán naxinu da ñuu Jerusalén já nacaxi tuhun da ña nacuu nuú na sacuaña nuú jutú. <sup>12</sup> Anda já najátaca táhan na sacuaña cán xihín na sacuaña veñuhu já najándique táhan na tuhun na ta já nasahan cuahá ndivaha na jihún nuú na soldado cán. <sup>13</sup> Já nacachi na já xihín soldado cán:

—Coto a cáhan ndó ña nanditacu Jesús. Ña cachi ndó cúu ña yóho: “Na naxica tuun xihín á cán, na cán cúu na naquixi ñuú ta nacaja cuíhna na yiquí cuñu a nani naquiji nde”, já cachi ndó xihín ndá na ná ndaca tuhún

ndohó. <sup>14</sup> Ta a cáyihví toho ndó tá ná candaa ini da cúu gobernador sahá ña yóho jáchi cahan mé nde xihín dá ta chindeé nde ndohó ña ná a cája da ni in ñaha xihín ndo — nacachi na sacuahá cán xihín soldado.

<sup>15</sup> Anda já naquehe da cúu soldado cán jihún ta nacaja da tá quiahva nasahnda na sacuahá cán chuun nu dá. Ta xihín ña yóho nandicuíta nuu tuhun sahá ña nayaha cán. Ta cahan na Israel cán sahá ña yóho janda quivi víti.

*Tá sáhdá Jesús chuun nuú na naxica tuun xihín á*  
(Mr. 16:14-18; Lc. 24:36-49; Jn. 20:19-23)

<sup>16</sup> Joo ndíhuxu in na naxica tuun xihín Jesús cán nasahan na chí Galilea. Já nandaa na in jini yucu tá quiahva nasahnda mé Jesús chuun nu ná. <sup>17</sup> Ta tá naxini na mé á já nacaja cáhnu na a. Joo java na cáhvi ivi joho ini na jáchi co cándúsa na ña nanditacu tucu a. <sup>18</sup> Anda já nacayati Jesús nu ná já nacachi a já xihín ná:

—Nasahan Ndióxi ndée nuú i caja i ña náhnu ndivaha indivi xihín ñuyívi yóho.

<sup>19</sup> Sahá ña cán quea cuahán ndo jánaha ndo nuú ñayivi ndúu ndijáá ñuyívi ndaja caja na caca vaha na íchi cuénta mí i. Ta caja ndúta ndó na xihín quivi Ndióxi, tátá i ta xihín quivi yehe, da cúu in túhún jini já jahyi mé á ta xihín quivi ínimá yíi Ndióxi.

<sup>20</sup> Ta jánaha ndó na ña ná caja na tóco ndihi ña nasahnda i nu ndó caja ndó. Ta mé a

ndaa coo i xihín ndo ndijáá nú quivi janda quiahva ná xinu coo quivi ndihi saha ñuyívi. Já ná coo —nacachi Jesús.

## Tuhun vaha nacahyí Marcos saha Jesucristo

*Tá jácandúta Juan ñayivi  
yucú íchí*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Quiahva johoho nacava sáhá tuhun vaha cáhan saha Jesucristo, mé a cúu in túhún jini já jahyi Ndióxi.

<sup>2</sup> Sanahá nacahyí profeta Isaías ña nacahan Ndióxi xihín jahyi a. Já cáchí a já:

Chindahá i in da canúu  
cuhun nu mún,  
ña ná caxi tuhun da nuú  
ñayivi saha yóhó ta já  
ndaja ndacú da íchí  
nuú yahún.

<sup>3</sup> Ta cahan cóhó da tañu yucú íchí ta cachi da já xihín ñayivi:

“Caja tiahva ndó íchí nuú  
quixi xitoho í ta cuná  
ndó in íchí ndacú nu  
mé á ña ná ndihvi a  
ínima ndo”, nacahyí  
Isaías.

<sup>4</sup> Ta ndaja coo ín Juan yucú íchí ta nacasáhá cája ndúta dá ñayivi. Ta caxi tuhun da xihín ná ña tá cúní na caja cáhnu ini Ndióxi sahá cuachi na já ndítahan nu ná ndicó coo ini na ta já candúta ná.

<sup>5</sup> Chí naquixi cuahá ndivaha ñayivi estado Judea xihín ñuu Jerusalén taa johoho na nu cáhan da ta tá náhma na cuachi na já nacaja ndúta dá na ini yuta Jordán.

<sup>6</sup> Ta nasandixi mé Juan yóhó jáhma ña nacavaha na xihín íji camello ta nasandico in ní jáhndá tóco dá. Ta naxixi da tica xihín ñuñu yúcu. <sup>7</sup> Tá caxi tuhun da nuú ñayivi já cáchí da já:

—Jatá yehe vaxi in da ín cuaha chága ndée dá a juú ga yehe chí coó sahá i ndica xiti i nu dá ña ndaxi i correa ndusa dá. <sup>8</sup> Yehe najácandúta i ndohó xihín ticuú joo mé da cán cúu da jándicutú ínima ndó xihín ínima yii Ndióxi — nacachi Juan xihín ná.

*Tá nacandúta Jesús*

(Mt. 3:13-17; Lc. 3:21-22)

<sup>9</sup> Mé tiempo já naquee Jesús ñuu Nazaret ña ndacaan estado Galilea. Naxinu a nu ín Juan ta najácandúta Juan Jesús ini yuta Jordán cán.

<sup>10</sup> Ta tá naquee Jesús ticuú cán já naxini a nandinuna indivi ta nanuu ínima yii Ndióxi jata mé á. Ta cáa ínima yii Ndióxi yóhó tá quiahva cáa in ndijata. <sup>11</sup> Ta naxini johoho na cáhan in a indivi ta já cáchí a já:

—Yóhó cúun jahyi máni i ta cájii ndivaha ini i xuhun.

*Tá naxito ndojó tiñáhá  
sacuaqa Jesús*

(Mt. 4:1-11; Lc. 4:1-13)

<sup>12</sup> Ivi laá nasahan ínima yii Ndióxi ndaca Jesús yucú íchí nu coó ñayivi. <sup>13</sup> Ta cán nasahin a ivi jico quivi ta mé tiñáhá sacuaqa naxito ndojó rí a. Ta cán ndúu quití quini joo naxinu java tátó Ndióxi chindeé na mé á.

*Cásáhá Jesús cáhan tūhun vaha xihín ñayivi*

(Mt. 4:12-17; Lc. 4:14-15)

<sup>14</sup> Tá nandihí nāchicaan na Juan vecaa já naṣahan Jesús estado Galilea caxi tūhun a nuú ñayivi tūhun vaha saha Ndióxi. <sup>15</sup> Já cáhí a já xihín ná:

—Sa naxinu tiempo viti ta nacayati quivi cacomí Ndióxi cuéntá sahá ñayivi. Ña ndítahan nu ndo quéa jándacoo ndó cuachi cája ndó ta candúsa ndó tūhun vaha ña cuu jácacu ndohó —nacachi Jesús.

*Cána Jesús comí na caca tuun xihín á*

(Mt. 4:18-22; Lc.: 5:1-11)

<sup>16</sup> In tañu xica Jesús cuahan yati yuhú tañuhú Galilea. Ta naxini a in da naní Simón xihín Andrés, da cúu ñani. Ndívi mé da yóho cúu dá da tává tiyacá ta ñuhu da jácana da ñunu dá ini tañuhú. <sup>17</sup> Načasáhá cáhí Jesús já xihín dá:

—Naha quí ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

<sup>18</sup> Ta chí ivi laá najándacoo da ñunu dá ta nandico da Jesús.

<sup>19</sup> Anda já naxica loho ga Jesús chí nuu já naxini a Jacobo xihín ñani da Juan, da cúu jahyi Zebedeo. Ndívi da yóho ñuhu da ini barco ndája vaha da ñunu dá. <sup>20</sup> Nacana Jesús ndívi da yóho ta chí najándacoo da tátá da, Zebedeo cán ini barco xihín java

ga da cája chúun xihín dá ta já načasáhá xica tuun da xihín Jesús.

*Tá ndácaan ínima quini ini in dataa*

(Lc. 4:31-37)

<sup>21</sup> Naxinu coo Jesús xihín na xica tuun xihín á ñuu Capernaum. Ta tá natandaa quivi ndiquehe ndée ñayivi já naquihvi Jesús ini veñuhu ta načasáhá jánaḥa na cán. <sup>22</sup> Ta nacatontó tóco ndihí ñayivi sahá tūhun cáhan mé á jáchi najánaḥa mé á tátūhun in da ín saḥa cahnda chuun ta co cáhan tátūhun na jánaḥa ley Moisés. <sup>23</sup> Ini mé veñuhu cán naṣandacaan in dataa, da ndácaan ínima quini ini. Načasáhá cáyuhú rí cán já cáhí rj já:

<sup>24</sup> —Jesús, da ñuu Nazaret. Ndá cuéntá quéa quihvi nuún xihín nde. Á vaṣún jándihún sahá nde. Sa xini vaha i yohó ta cándaá cáxi ini i ña cuún in da yji nāchindahá Ndióxi —nacachi rí cán.

<sup>25</sup> Ta načasáhá Jesús jánani a rí quini ndácaan ini da cán. Já nacachi a já:

—Caji yūhun ta janí da yóho.

<sup>26</sup> Ta tá quéta rí quini ndácaan ini da cán naṣahní yihí rí da ta cáyuhú cóho rj já naqueta rí ini da cán. <sup>27</sup> Nacatontó tóco ndihí ñayivi chí načasáhá ndáca tūhún táhan na já cáhí na já:

—Ndía quéa yóho. Ta ndá naquixi tūhun saá jánaḥa da yóho jáchi cáhan da xihín rí quini tátūhun in da sáhdá

chuun ta chí cándúsa rí quee rí cūhūn rī —naçachi na.

<sup>28</sup> Ta chí cama chá nandicuīta nuu tūhun saha Jesús níí cúú estado Galilea.

*Ta nandaja vaha Jesús ña cúú xojo Simón*

(Mt. 8:14-15; Lc. 4:38-39)

<sup>29</sup> Tá naquee na veñūhu já cuahan Jesús xihín Jacobo xihín Juan vehe Simón xihín ñani da, Andrés. <sup>30</sup> Ta ndaja coo cándūhu ña cúú xojo Simón nuú xito nāchicaan cáhni ndeé ña. Ta tá naxinu coo na cán já naxaxi tūhun na nuú Jesús ña quíhvi ña. <sup>31</sup> Anda já nācayati Jesús nu ña ta natiin a ndáha ña já nandíñehe a ña chí ivi laá nandindaa cáhni á ña. Anda já nācasáhá cája ndíví ña ña cuxu na.

*Ndája vaha Jesús cuahá ñayivi*

(Mt. 8:16-17; Lc. 4:40-41)

<sup>32</sup> Tá naqueta nuu cāndii ta nācuaá já ñehe ndihi ñayivi na quíhvi xihín na ñūhu ínimā quini ini nācasaa na nu Jesús. <sup>33</sup> Ta tóco ndihi na ñuu nandai cuu na yuyéhé nu ín Jesús. <sup>34</sup> Nandaja vaha Jesús cuahá ñayivi, na ndóho tá nuú cuehe. Ta nātavá a cuahá ínimā quini ini ñayivi. Joo coo nāsaahan Jesús ñamaní nu rí quini ña ná cahan rí jáchi xini rí yo cúú Jesús.

*Xica nuu Jesús jánaha ñayivi estado Galilea*

(Lc. 4:42-44)

<sup>35</sup> Ta naha inga quiví itaan tá cámaní yíí tiví nandacoo Jesús ta naquee a ñuu cuahan

nuú coo ñayivi ña caça tahví a nu Ndióxi. <sup>36</sup> Tá nandacoo Simón xihín java ga da xica tuun xihín Jesús já naxini na ña coo a ín chí naquee na cuahan na ndinducú na mé á. <sup>37</sup> Ta tá nandíñehe ñahá na já cáchi na já xihín á:

—Tóco ndihi ñayivi ndinducú na ndohó.

<sup>38</sup> Joo cáchi Jesús já xihín ná:

—Cóho java ga ñuu yati yóho ña ná jánaha i tūhun vaha nuú na cán viti jáchi sahá ña yóho vaxi i —cáchi Jesús.

<sup>39</sup> Ta chí naxica nuu Jesús níí cúú estado Galilea cahan tūhun vaha ini veñūhu in in ñuu cán ta tává a ínimā quini ndācaan ini ñayivi.

*Tá nandaja vaha Jesús in da ndóho cuehe táhyi*

(Mt. 8:1-4; Lc. 5:12-16)

<sup>40</sup> Ta ndaja coo nācayati in dataa ndóho cuehe táhyi nuú Jesús ta nācaxítí da nu á já nācasáhá cáchi da já:

—Cuu ndaja vaha ndó yehe tá cūni ndó —cáchi da.

<sup>41</sup> Ta nātahvi ini Jesús saha dá. Anda já nācani ndaa ndáha á da. Já cáchi a já:

—Cūni ña ná ndivahún ña cán quéa nādivahún viti —naçachi Jesús xihín dá.

<sup>42</sup> Tá nācachi a já chí ivi laá nandindaa cuehe táhyi ña nandoho da cán. Já nādivíí yiquí cuñu da. <sup>43</sup> Tá nandihí najāndindayí Jesús da ta nāsaanda chuun nu dá já cáchi a já xihín dá:

<sup>44</sup> —Candehé. A cāhūn xihín ni in túhūn toho ñayivi

ñā nācaja i xuhun. Cuáhán ndacún nahun mún nuú jutū. Ta ndítahan jocún ñaha nu Ndióxi tátuhun nāsahnda ley Moisés sanahá caja na sa nandivaha. Já ná candaa ini tóco ndihi ñayivi ña sa nandindaa va cuehe nāsandohún —nācachi Jesús xihin dá.

<sup>45</sup> Joo tá naquee da cuahan da nacasáhá da ndicani da nuú ndihi ñayivi ña nandaja vaha Jesús da sahá ña cán quea coo nācuu ga ndihvi tívi Jesús ni in ñuu. Jatá ñuu nuú co ndúu ñayivi nāsahin a ta janda mé cán xinu coo ñayivi, na quíxi nuú ndijáá ñuu xito nihni na mé á.

## 2

*Tá nandaja vaha Jesús in da naxihi tuchu saha*

(Mt. 9:1-8; Lc. 5:17-26)

<sup>1</sup> Tá nayaha chá quivi já nandico coo tucu Jesús ñuu Capernaum. Ta nācandaa ini ñayivi ña ín a vehe. <sup>2</sup> Ta chí cama chá nanditútú cuahá ñayivi chí coo vati ga yuyéhe cándita na. Já nacasáhá cáxi tuhun Jesús tuhun Ndióxi nu ná. <sup>3</sup> Anda já naxinu coo comi ta ta ñéhe da in da naxihi tuchu saha. Nasaá da nu ín Jesús. <sup>4</sup> Joo naxini da ña a cuú xinu da yati nu ín Jesús sahá cuahá ñayivi chutú ndaa nu ín a cán. Chí nandaa da jini véhe ta nacasáhá da suná da jini véhe mé xoo nu ín Jesús. Ta mé cán najānuu da xito loho nu cándúhu da quíhvi chí yávi jini véhe cán. <sup>5</sup> Tá naxini Jesús ña cándeé ini da cán mé

á já cáhí a já xihin mé da quíhvi cán:

—Candehé, jahyi a. Sa nācaja cáhnu ini i sahá cuachún viti —nācachi Jesús.

<sup>6</sup> Joo java na jānaha ley Moisés ndúu coo cán nacasáhá cáhán na: <sup>7</sup> “Ndá cuéntá quea ndája núu da Ndióxi xihin tuhun cáhan da. Jáchí ni in tuhún toho ñayivi a cuú caja cáhnu ini sahá cuachi. In tuhún jini Ndióxi quea cuu caja cáhnu ini sahá cuachi”, nācāhán na. <sup>8</sup> Joo sa nācandaa ini Jesús ña cáhvi ini na cán chí nācachi a já xihin ná:

—Ndāvaha cáhán ndojá. <sup>9</sup> Á cáhán ndó ña ihvi chāga cachi i xihin da yóho: “Nācaja cáhnu ini i saha cuachún viti.” Á tá coo ta cachi i xihin dá: “Cuándacoo, ndiquehe xitún ta caca nuún.” <sup>10</sup> Candehé vaha ndó ná naha i nu ndo ña ín sahá i, da nāchindahá Ndióxi nduu u ñayivi caja cáhnu ini i sahá cuachi cája ñayivi ñuyívi yóho —nācachi Jesús xihin ná.

Anda já nācachi a xihin mé da naxihi tuchu saha cán:

<sup>11</sup> —Ta viti cáhan i xuhun cuándacoo ndiquehe xito lohún ta cuanúhu —nācachi a.

<sup>12</sup> Chí ivi laá nādacoo mé da quíhvi cán ta nāndiquehe da xito loho da já naquee da cuahan da nuú ndihi na ndúu cán. Anda já nācatóntó tóco ndihi na ta nacasáhá cája cáhnu na Ndióxi já cáhí na já:

—Ni in tuhún tañu coo naxini nde in ñaha cáhnu

tátuhun ña yóho —ñacachi na.

*Tá nacana Jesús Leví, da cáhan na Mateo xihin*

(Mt. 9:9-13; Lc. 5:27-32)

<sup>13</sup> Tá nandihí já nasahan tucu Jesús yuhú tañuhú cán ta tá ñacayati cuahá ñayivi nu á já ñacasáhá jánaḡa nu ná. <sup>14</sup> Nani xíca Jesús cuahan nayaha nu ín in da nani Leví, jahyi Alfeo. Ta ín coo da nu sácoo da játaca jjuhún cuéntá impuesto. Ta cáchí a já xihin dá:

—Naha quí candicun yehe.

Anda já nandaca ndichi Leví ta nandico da Jesús.

<sup>15</sup> Tá nandihí nasahan Jesús vehe Leví ta nasácoo a xíci a xihin cuahá da játaca jjuhún cuéntá impuesto xihin java ga na cája cuachi. Ta sa mé cán nasanduú ri java da xíca tuun xihin Jesús xíci da tañu na cán jáchi cuahá ñayivi ndíco na Jesús. <sup>16</sup> Joo na jánaḡa ley Moisés xihin na fariseo tá naxini na ín coo Jesús xíci a xihin na cán ñacasáhá cáchí na já xihin da xíca tuun xihin Jesús:

—Ndá cuéntá quea xíci xitoho ndó xihin na játaca jjuhún cuéntá impuesto ta xihin java ga na cája cuachi —ñacachi na cán.

<sup>17</sup> Tá naxini joho Jesús ña yóho ñacasáhá cáchí a já:

—Ñayivi ín vaḡa co xíní ñuhú toho na da cája tátá ñahá joo na quíhvi, na cán cúú na xíní ñuhú da cája tátá ñahá. Ta yehe coo vaxi toho i cana i na sa ín vaḡa. Vaxi i cana

i ñayivi, na cája cuachi ña ná jándacoo na cuachi cája na —ñacachi Jesús.

*Cáhan Jesús ndá saḡa quea cajuhun na*

(Mt. 9:14-17; Lc. 5:33-39)

<sup>18</sup> In tañu tá xijuhun na xíca xihin Juan xihin na xíca xihin na fariseo naxinu coo java ñayivi nu Jesús ta ñacasáhá ndáca tuhún na mé á já cáchí na já:

—Ndávaḡa co xijuhun toho na xíca tuun xihin yóhó joo xijuhun mé nde, na xíca xihin Juan xihin na xíca xihin na fariseo —ñacachi na.

<sup>19</sup> Ta nanducú ñehe Jesús tuhun nu ná já ñacachi a já:

—Á cáhán ndo xijuhun na ndúu víco tándaḡa nani ín mé da tándaḡa cán xihin ná. Uḡun. Jáchi cájii ín na nani ín mé da tándaḡa xihin ná. Chí a cuú toho cajuhun na. <sup>20</sup> Joo xinu quívi candaa na mé da tándaḡa ta anda jávi casáhá cajuhun na. Ta cáchí i xihin ndó ña vaxi quívi candaa na yehe nuú na yóho ta anda jávi casáhá na xíca tuun xihin i cajuhun na —ñacachi Jesús.

<sup>21</sup> Ta nasacu Jesús inga quíahva nu ná já cáchí a já:

—Ama ná jándaha ñayivi jahmá yatá xihin in tuhun jámḡa saá jáchi tá nandihí ndíndíí a, sáhdá cháḡa ví a jahmá yatá cán ta jándacáḡnu cháḡa ví a yávi ña nandicahmá na cán. <sup>22</sup> Ta ni co táán na vino saá ini vóso ní yatá jáchi jácahndi mé vino cán ní ta cuíta mé vino cán ta tíví vóso ní caja dó saḡá

ñā cán quéa ndítahan taán na vino saá ini vósō nií saá — ñacachi a.

*Ña ñacaja na xíca tuun xihín Jesús in quivi ndíquehe ndée ñayivi*

(Mt. 12:1-8; Lc. 6:1-5)

<sup>23</sup> In quivi ndíquehe ndée ñayivi nani xíca Jesús cuahan tañu nuú ñaxutu na trigo xihín na xíca tuun xihín á já ñacasáhá túhun na yucu jini trigo. <sup>24</sup> Tá ñaxini na fariseo ña cája na já ñacachi na já xihín Jesús:

—Candehé. Ndávaha cája na xíca tuun xuhun chuun ña cō ndítahan caja na quivi ndíquehe ndée yō —ñacachi na fariseo.

<sup>25</sup> Anda já ñacachi Jesús já xihín ná:

—Á a ñáha cahvi ndó nuú túhun Ndióxi nu cáhan sahá ña ñacaja David sanahá tá ñacuico mé dá xihín na xíca xihín dá. <sup>26</sup> Ña ñacaja David quéa ñaquihvi da veñuhu Ndióxi tá ñasacuu Abiatar da sacuahā nuú jutū. Já ñaxixi da pan yii ña in túhún jutū cúú da ndítahan nuú cuxu ña cán, nduu. Joo ñaxixi David ña ta ñasahan da ña nuú java ga na xíca xihín dá.

<sup>27</sup> Ta ñacachi tucu Jesús já xihín ná:

—Candehé ndō. Cōó ñacavaha Ndióxi ñayivi ndoho ini na sahá quivi ndíquehe ndée ná jáchi ñasacu ini a cavaha in quivi já ná cuu ndíquehe ndée ñayivi. <sup>28</sup> Ña cán quéa yehe va, da ñachindahá Ndióxi nduu

ñayivi in sahá i cahnda i chuun sahá quivi ndíquehe ndée ñayivi —ñacachi Jesús.

### 3

*Tá ñandaja vaha Jesús in da ñahichi ndáha*

(Mt. 12:9-14; Lc. 6:6-11)

<sup>1</sup> Ñaquihvi tucu Jesús ini veñuhu ta cán ñasandacaan in dataa, da ñahichi ndáha. <sup>2</sup> Ta ñacasáhá nání na fariseo Jesús sándehe ná á ndaja vaha mé á da cán quivi ndíquehe ndée ná já ná cuu chicaoan na cuachi jatá. <sup>3</sup> Anda já cáchi Jesús xihín da ñahichi ndáha cán já:

—Cuándacōo ta candichi mahñú yóho —ñacachi Jesús.

<sup>4</sup> Anda já ñandaca túhún a na java cán já cáchi a já xihín ná:

—Ndía cáchi ley ndítahan caja í mé quivi ndíquehe ndée ñayivi. Á chindeé yó ñayivi á caja í ña núu xihín ná. Á jácacú na á cahni yó na —ñacachi Jesús.

Joo ni in túhún túhun cōó ñacahan na. <sup>5</sup> Ñacasáhá xójo ini Jesús sándehe a nu ná. Joo táhvi tucu ini a saha ná jáchi cúú ná ñayivi saá ini. Ta cáchi a xihín mé dataa, da ñahichi ndáha cán:

—Jándacaa ndáhun.

Tá ñajándacaa da ndáha dá ivi laá ñandivaha ndáha dá. <sup>6</sup> Tá ñandihí ñaquee na fariseo veñuhu já ñacasáhá na jándique táhan na túhun na xihín na cuéntá Herodes ña cahni na Jesús.



*Tá nanditútú cuahá ñayivi yuhú tañuhú*

<sup>7</sup> Joo nasahan Jesús xihín na xíca tuun xihín á yuhú tañuhú ta cuahá ndivaha ñayivi estado Galilea nandico na nasahan na. <sup>8</sup> Tá nacandaá ini ñayivi ña náhnu cája Jesús, naquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu válí jín ñuu Tiro xihín Sidón jáchi candehé na Jesús cúni na. <sup>9</sup> Sahá ña yóho queá naxica Jesús ñamani nuú na xíca tuun xihín á ña ná cacu tiahva na in barco nuú ndacaan mé á ña ná a cándíhi ñayivi cuaha cán ña. <sup>10</sup> Jáchi cuahá ndivaha ñayivi nandaja vaha mé á. Sahá ña cán queá tóco ndihi na quíhvi cáti na jatá ña cani ndaa ndáha ná mé á cúni na.

<sup>11</sup> Ta tá naxini na ñúhu ínimá quini ini cán Jesús ivi laá ndícava xítí na nu á ta cásahá cáyuhú cóhó na já cáchi rí quini ndacaan ini na cán já:

—Yóhó cúun da cúu in túhún jini já jahyi Ndióxi.

<sup>12</sup> Joo jánani Jesús rí cán já sáhdá a chuun nu rí ña ná a cáxi túhun rí yo cúu mé á.

*Tá naxaxi Jesús uxu ivi da caca tuun xihín á*

*(Mt. 10:1-4; Lc. 6:12-16)*

<sup>13</sup> Tá nandíhi já naquee xóo Jesús nasahan in xiqui ta tá nandíhi nacana mé á java na xíca xihín á cán, mé na cúni a caxi a ta naxinu na cán nu Jesús. <sup>14</sup> Ta tañu

na cán nandicaxi Jesús uxu ivi da caca tuun xihín á ta tá nandíhi já nanchindahá mé á da cuhun da cahan da túhun Ndióxi xihín ñayivi. <sup>15</sup> Ta nacaja mé á ña cuu ndaja vaha da na quíhvi ta cuu cahnda da chuun nu rí quini ña ná quee rí ini ñayivi. <sup>16</sup> Ña yóho cúu quiví uxu ivi da nandicaxi Jesús caca tuun xihín á: Simón, da nasacu tucu a quiví cananí Pedro <sup>17</sup> xihín Jacobo xihín ñani da, da naní Juan, jahyi Zebedeo. Ndívi da yóho nasacu a quiví cananí Boanerges ta mé túhun yóho cúni cachi a cúu dá tátuhun jahyi in tasa ña cána indiví. <sup>18</sup> Nacaxi a Andrés xihín Felipe xihín Bartolomé xihín Mateo xihín Tomás xihín Jacobo, da cúu jahyi Alfeo xihín Tadeo xihín Simón, da naxica cuéntá na cananista <sup>19</sup> xihín Judas Iscariote, mé da najicó túhún Jesús tá nu ndíhi.

*Jácojo na cuachi jatá Jesús ña cája chúun a xihín ndée tiñáhá sacuaqa*

*(Mt. 12:22-32; Lc. 11:14-23; 12:10)*

Anda já naquihvi Jesús ini in vehe xihín na xíca tuun xihín á. <sup>20</sup> Ta inga tucu naxhutú cuahá ñayivi nu íin a janda a cuú cuxu a xihín na xíca tuun xihín á cán. <sup>21</sup> Ta tá nañehé na vehe Jesús túhun sahá ña yóho ivi laá naquixi na ña cañehe na mé á cuhun a cúni na jáchi nacatachi Jesús cáhán na.

<sup>22</sup> Jári na jánaqa ley Moisés, na naquixi Jerusalén

naçasáhá cáhan na já cáchí na já:

—Taa yóho ndácaan Beelzebú ini da, rí cúu sacuaḥa nu rí quini. Ta xihín ndéé mé rí cán tává da rí quini ini ñayivi —naçachi na.

<sup>23</sup> Anda já naçana Jesús ñayivi já naçacu a in quiahva nu ná ja cáchí a já xihín ná:

—A cuú tavá tiñáhá sacuaḥa mé rí. <sup>24</sup> Jáchi tá sáhdá java táhan na ndúu in ñuu ta cáni táhan ndaja táhan mé va na já quéa a ñéhe íní na coo nahá na. <sup>25</sup> Ta tá casáhá sáhdá java táhan na ndúu in vehe ta cáni táhan na já a cuú ga canduu nahá na mé vehe cán. <sup>26</sup> Ta quiahva já tá ná casáhá rí quini ndúu ndáha tiñáhá sacuaḥa cáni táhan rí xihín mé va rí janda quiahva sáhdá java táhan rí já quéa a cuú canduu nahá rí jáchi ndihi saha rí.

<sup>27</sup> 'Sácú u inga quiahva nu ndo. Ni in dataa a cuú ndihvi da caja cuíhná da ñaha vehe in da ndacú cán joo tá ná cató da da ndacú já cuu quehe da ñaha da cán.

<sup>28</sup> 'Mé a ndaa ná cahan i xihín ndo. Ndióxi cuu caja cáhnu ini a saha tá nuú cuachi cája ñayivi xihín saha tá nuú tuhun quini cáhan na. <sup>29</sup> Joo tá ná cahan núu na saha ínimá yí Ndióxi já quéa a cája cáhnu ini Ndióxi sahá ña naçaja na ta anda ama cáa quivi candojo na cuachi saha —naçachi Jesús.

<sup>30</sup> Naçachi a ña yóho xihín na cán jáchi cáchí na ña ndácaan ínimá quini ini a.

*Nána Jesús xihín ñani a cuni na çuni na a*

(Mt. 12:46-50; Lc. 8:19-21)

<sup>31</sup> Tá nandihí naxinu náná Jesús xihín ñani a nu ín a joo naçandoo na jata véhe. Ta naçindahá na in na naçahan naçana ñahá. <sup>32</sup> Ta na ndúu coo xihín Jesús cáchí na já xihín á:

—Jata véhe cáa ín nánún xihín ñanún ta ndínducú na yohó —cáchí na xihín Jesús.

<sup>33</sup> Anda já naçachi Jesús já xihín ná:

—Ná cahan i xihín ndo yo já cúu tátuhun náná i xihín ñani i.

<sup>34</sup> Anda já naçandehé a nuú na ndúu coo tiyivi xihín á cán já cáchí a já xihín ná:

—Na yóho cúu ná tátuhun náná i xihín ñani i. <sup>35</sup> Jáchi ndá na cája ña cuni Ndióxi, na cán cúu ná tátuhun ñani i xihín quiahvá i xihín náná i —naçachi Jesús.

## 4

*Sácú Jesús quiahva saha in da sátá tata*

(Mt. 13:1-9; Lc. 8:4-8)

<sup>1</sup> Naçasáhá tucu Jesús jánaḥa ñayivi yuhú tañuhú ta nataca cuahá ñayivi nu ín a cán. A juú quiahva cuahá cúu ná sahá ña cán quéa naquihvi Jesús ini in barco, dó cándichi yuhú tañuhú cán. Ta naçaco a cán ta tóco ndihí ñayivi naçaca ndita na nuú ñutí yuhú tañuhú cán. <sup>2</sup> Já najánaḥa cuahá ñaha nuú na cán ta naçacu a quiahva nu ná já cáchí a já:

3 —Cuni johō ndó ña yóho: In da sátá tata ñaquee da cuahān da cata da ña. 4 Ta tá sátá da ña cuahān da ñacuyu java ña íchi ta ñaxinu laa ta ñasaxí rí a. 5 Ta java ña ñacuyu a tañu yuu nuú coó cuahā ñúhu. Ta cama chá ñanduta mé tata cán jáchi co cúná ñúhu nuú ñacuyu a. 6 Joo tá ñaqueta candii já najáhichi a ña sahá ña coó cuahā yóho a chí ñandihí sahá. 7 Ta java tata ñacuyu a tañu tohíñú ta tá ñasahnu tohíñú cán já ñanditáha ndihí a ñacaja tohíñú chí coó ñasahān mé tata cán ndá ñaha jáquee na nu á. 8 Ta java tata ñacuyu a nuú ñuhú vaaha. Ñanduta mé tata cán ta ñasahnu a já ñasahān cuahá ñaha ña jáquee na nu á. Java ña ñasahān oco uxu a nuú in in tata ta java ña ñasahān uní jico uxu a ta java ña in ciento a nuú in in tata.

9 Andá já ñacachi tucu Jesús já xihín ná:

—Ña ín johō, ná cuni johō na —ñacachi a.

*Ndicani Jesús ndá saha quéa ñasacu a quiahva nu ná*

(Mt. 13:10-17; Lc. 8:9-10)

10 Tá ñacandoo Jesús xihín mé ña uxu ivi xica tuun xihín á cán xihín java ga ña ndíco ñahá cán já ñacasáhá ndáca tuhún ña Jesús ña ndía cúní cachi a xihín quiahva ñasacu a nuú ña cán. 11 Ta cáchi a já xihín ná:

—Ña coó ñacandaā ini ndó jihna ña cán cándaā ini ndó a viti jáchi ñasuná Ndióxi xíní

túní ndo cándaā ini ndó ndá quiahva cacomí mé á cuéntá sahá ñayivi. Joo ña a ñaha cacomí Ndióxi cuéntá saha, ña cán cúu ña sácú u quiahva nuu. 12 Já quéa vatí sándehé ña joo cúu ná tátuhun ña co tívi nuu ta vatí xíní johō na joo cúu ná tátuhun ña jóho jáchi co cándaā ini na ña cáhan i xihín ná. Ta sahá ña cán quéa co ndíco coo na nu Ndióxi ta ní mé á co cája cáhnu ini sahá cuachi na.

*Ndicani Jesús sahá da sátá tata cán*

(Mt. 13:18-23; Lc. 8:11-15)

13 Ta já cáchi tucu a já xihín ña xica tuun xihín á:

—Ta tá co cándaā ini ndó quiahva, ña ñasacu u yóho ndaja caja ndó cándaā ini ndó java ga quiahva ña cachi i xihín ndo. 14 Mé da sátá tata cán cúu dá tátuhun da xica cáhan tuhun Ndióxi xihín ñayivi. 15 Java ga ñayivi cúu ná tátuhun tata ña ñacuyu íchi. Taa johō na tuhun Ndióxi ta tá ñandihí ñaxini johō na ña já vaxi tiñahá sacuahā ta cája rí xihín ná ña ndíndójó ña ña. 16 Ta java ñayivi cúu ná tátuhun tata ña ñacuyu tañu yuu jáchi taa johō na tuhun Ndióxi ta cáji ini na ndíquehe na ña. 17 Ta tá quiahva ndiává yucu sahá ña co ñúhu cúná yóho a quiahva já ndóho ñayivi tá casáhá ndicuíta ñayivi cája xíxi na xihín ná. Ta tá casáhá ndóho ini na sahá tuhun Ndióxi ña ñaxini johō ña cán chí ivi laá jándacoo va na ña cándeé ini na Ndióxi. 18 Ta java na cúu

ná tátuhun tata ña ñacyu tañu tohiñú jáchi táa johó na tuhun Ndióxi <sup>19</sup> joo ndícani ndivaha ini na sahá ñaha ñuyivi yóho. Cátóó ndivaha na ñaha cuicá chí jándahvi na mé ná xihín ña cán ta xíca ini na coo tóco ndihi ñaha nu ná. Ta cáva nuu táhan ñaha ñuyivi yóho xihín tuhun Ndióxi ini inima ná sahá ña cán quea cávitá ini na ta co sáhu na xihín tuhun Ndióxi. <sup>20</sup> Joo ndúu java na xini johó tuhun Ndióxi ta cándusa na ña. Ta cája chúun vaha na xihin á ta já cuahnu na xihin á. Cúu ná tátuhun tata ñacyu nu ñuhú vaha. Java na cúu ná tátuhun tata ña ñasahan oco uxu a nuú in in a. Ta java na cúu ná tátuhun ña ñasahan unijico uxu a ta java na cúu ná tátuhun ña ñasahan in ciento a nuú in in tata —ñacachi Jesús xihín na cán.

*Sácú Jesús quiahva sahá in lámpara*

(Lc. 8:16-18)

<sup>21</sup> Ta cáchi tucu Jesús xihin ná:

—Coó toho chuun lámpara tá chícaan í ña tixi sato á tixi xito jáchi chuun ña quea cánúu ña nu jíco já ná jándiyehé ña nu yo. <sup>22</sup> Ni in túhún toho ñaha a cuú coo jehé jáchi xinú quivi já ndáca náha nu á. Ta ni in tuhun ñacahan jehé ñayivi a cuú coo jehé nahá jáchi xinú quivi já candaá ini tóco ndihi ñayivi sahá tuhun ñasahin jehé cán. <sup>23</sup> Na in johó, ná cuni johó na —ñacachi a.

<sup>24</sup> Ta cáchi tucu a já xihin ná:

—Candehé vaha ndó ña taa johó ndó. Tá quiahva cája ndó xihin ñayivi quiahva já caja Ndióxi xihin ndo joo chága ví caja mé á xihin ndo. <sup>25</sup> Jáchi da sa in ñaha nu, ñehé táhvi dá coo chága ñaha nu dá joo da coo ñaha nu, janda ña chá in nu dá ndindaa —ñacachi Jesús.

*Jánaqa Jesús nu ná ndá quiahva sáhu tata*

<sup>26</sup> Ta cáchi tucu Jesús já:

—Tá ndiquiahva ñayivi mé ná ndáha Ndióxi ña ná cacomí a cuénta saha ná já cúu á tátuhun in dataa ñachihin tata. <sup>27</sup> Tá ñandihí yáha quivi ta quiji da ta ndácoo da já yáha quivi xihin ñuú. Ta já ndúta mé tata cán ta sáhu a joo mé da ñachihin a cán co xini da ndaja sáhu a. <sup>28</sup> Sáhu a jáchi chuun nu mé ñúhu quea caja ña ná cuahnu ña cán. Jihna ñuhú ndúta mé yucu trigo já cana yóco a ta nu mé yóco a cán ndicutú ndaa ndiqui á. <sup>29</sup> Ta tá ñachichi mé ndiqui a cán já quee na cuahan na jáquee na ña jáchi ñaxinu coo quivi jáquee na ña —ñacachi Jesús.

*Sácú Jesús inga quiahva saha ndiqui mostaza*

(Mt. 13:31-32; Lc. 13:18-19)

<sup>30</sup> Ta cáchi tucu Jesús já:

—Viti sácú u inga quiahva nu ndo já ná candaá ini ndó ndá quiahva caja Ndióxi xihin ñayivi tá casahá a cómi a cuénta saha ná. <sup>31</sup> Cúu á

tátuhun in ndíqui mostaza ña chíhin na nuú ñundáhyi. Cúú á ndíqui loho chága nu tóco ndihi ndíqui válí ín ñuyívi.  
<sup>32</sup> Joo tá nandihí nāchihín na a nasahnu a ta nanduu a in yító, dó cáhnu nu ndíhi yító. Ta xihín ndahá nāhnu dó sácú do cati ta janda laa ndíquehe ndée ri nu cati do —nācachi Jesús.

*Sácú Jesús quiahva cuiti va nuú ñayivi*

*(Mt. 13:34-35)*

<sup>33</sup> Najánaḥa Jesús tuhun Ndióxi nu ná. Ta nasacu cuahá quiahva nu ná tátuhun ña yóho janda quiahva xínu nu mé ná cándaḥa ini na.  
<sup>34</sup> Xihín mé quiahva cuiti va najánaḥa Jesús nuú ñayivi joo tá nācando Jesús xihín mé na xica tuun xihín á já ndícani cáxi ndihi a ñaha nuú na cán.

*Tá najacatáji Jesús tañuhú tá ndícojo do*

*(Mt. 8:23-27; Lc. 8:22-25)*

<sup>35</sup> Tá nācuáá mé quivi cán já nācachi Jesús já xihín na xica tuun xihín á:

—Cóho inga xoo tañuhú yóho.

<sup>36</sup> Anda já najāndacoo na ñayivi já naquee na cuahan na xihín Jesús ini mé barco nuú sa ndácaan mé á. Ta ndáca táhan java ga barco cuahan dó xihín ná. <sup>37</sup> Ta ndaja coo naxinu in tachi quini ndivaha. Ta nacasáhá ndícojo tañuhú ndíhvi dó ini barco já nacasáhá ndícutú ticui ini mé barco cán. <sup>38</sup> Ta chí xoo jata mé barco cán cándúhu Jesús quiji a ta cánúu

jini á jata ña yíhi jini ná. Já najāndacáxi ini na mé á ta cáchi na já xihín á:

—Maestro. Chí co sáhní a mé á ña cuni ndihi saha yo jáchi sácoo barco cahá ticui cuahan do —nācachi na.

<sup>39</sup> Anda já nādacoo Jesús ta nacasáhá jananí a tachi xihín tañuhú viti já cáchi a já:

—Catáji ndo.

Já najáyaḥa tachi. Já nācando táji níí mé cán.  
<sup>40</sup> Anda já nācachi Jesús xihín na xica tuun xihín á:

—Ndávaha nayihví nahá ndo. Ndávaha co cándeé ini ndó yehe —nācachi a.

<sup>41</sup> A juú quiahva nayihví mé na cán já nacasáhá cahan xihín táhan na:

—Ndá da cúú dataa yóho ña janda tachi xihín tañuhú cándúsa nu cahan da —nācachi na cán.

## 5

*Tá nandaja vaha Jesús in da ndácaan ínimā quini ini*

*(Mt. 8:28-34; Lc. 8:26-39)*

<sup>1</sup> Anda já naxinu na inga xoo mé tañuhú cán nu ín ñundáhyi cuéntá Gadara. <sup>2</sup> Ta tá nanuu Jesús barco cán já naquee in dataa camasanto já naxinu da nuú Jesús. Mé da yóho cúú dá da ndácaan ínimā quini ini. <sup>3</sup> Ta ín va da nu ndúxu ndii ta ni in na a cuú cató na da ni xihín cadena a cuú cató na da. <sup>4</sup> Vatí cuahá tañu sa nācató na saha dá xihín ndáha dá joo sáhdá da cadena ta jácuachi da ña ta ni in na a cuú caja xihín dá. <sup>5</sup> Nuú ta ndiví xica

nuu da yúcu xihín nu ndúxu ndii cáyuhú da xíca nuu da ta jándicuehe da mé dá xihín yuu. <sup>6</sup> Joo tá naxini xíca da Jesús, nihi chá nasahan da naxinu da nu ín a já nandicava xítí da nu á. <sup>7</sup> Ta cáyuhú cóhó da já cáchí da já xihín á:

—Ndá cuéntá queá vasún quihvi nuún xihín i. Yóhó cúún Jesús, da cúú in túhún jini já jahyi Ndióxi, ña cáhnu ndivaha. Xíca tahví i nuun ña ná a jándohún ini i —nacachi da.

<sup>8</sup> Nacachi da ña yóho xihín Jesús jáchi nacasáhá sáhdá mé á chuun nu rí quini cán já cáchí a já:

—Ínima quini, janí da yóho.

<sup>9</sup> Anda já nandaca tuhún Jesús mé rí quini cán já cáchí a já:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní nde jáchi cuaha cúú nde.

<sup>10</sup> Ndáhví mé xíca tahví da cán nu Jesús ña ná a tává xíca a rí quini cuhun ri. <sup>11</sup> Ta ndaja coo xíca nuu cuaha cóchí xixáhan rí yati yúcu cán. <sup>12</sup> Sahá ña cán queá naxica tahví mé ínima quini cán nu Jesús já cáchí ri já:

—Chindahá ndehe ná cuhun nde ndihvi nde cóchí cáa.

<sup>13</sup> Anda já nasahan Jesús ñamaní ta chí naquee ínima quini nasañuhu ini da cán já nandihvi rí ini cóchí xíca nuu cán. Ta tóco ndihi cóchí yóho

xínu rí cuahan rí nanuu rí nu ndáyi já najáqueta nuu rí mé rí ini tañuhú chí nacandaa rí ticuúí já naxihí rí. Tátuhun ivi mil cóchí nandihí saha.

<sup>14</sup> Ta ndaja coo mé da ndáa cóchí cán nayihví da chí xínu da cuahan da caxi tuhun da ña nayaha yóho nuú ñayivi ñuu Gadara xihín nuú java ga na ndúu yati cán. Naquee cuahá ñayivi mé cán candehé na ña nacuu. <sup>15</sup> Tá naxinu coo na nu ín Jesús naxini na ín coo da nasañuhu cuaha rí quini ini cán. Sa nandaca ndixi da jáhma ta sa nandicaxí táhyí ini da. Chí nayihví na. <sup>16</sup> Ta na naxini ña nacaja Jesús cán nacasáhá na ndícani na nuú ñayivi ña nandoho dataa, da nasañuhu rí quini ini cán xihín ña nandoho cóchí viti. <sup>17</sup> Anda já nacasáhá na xíca tahví na nu Jesús ña ná quee a cuhun a.

<sup>18</sup> Tá sa cuahan ndihvi Jesús ini mé barco cán já naxinu da nasañuhu rí quini ini cán já nacasáhá da xíca tahví da nu á ña ná quiahva ñamaní nu dá cuhun da xihín á. <sup>19</sup> Joo coo nasahan Jesús ñamaní nu dá já nacachi a xihín dá:

—Cuanúhu vehún ta ndícani nuú na vehún ndaja náhnu ñaha nacaja Ndióxi xuhun ta ndaja natahvi ini a sahun —nacachi a.

<sup>20</sup> Já naquee da cuahan da ta nacasáhá da ndícani da nuú ñayivi ndúu java ñuu cuéntá Decápolis tóco ndihí ña nacaja Jesús xihín dá. Chí cátóntó na táa johó na ña.

Tá nandaja vaha Jesús jahyi jhí Jairo xihín in ña nacani ndaa ndáha jáhma á  
(Mt. 9:18-26; Lc. 8:40-56)

21 Tá nandihhi nandihvi Jesús ini mé barco cán já naxinu coo a inga xoo tañuhú nuú naquixi a. Ta cán nanditútú cuahá ñayivi nu á mé yuhú tañuhú cán. 22 Já naxinu in da naní Jairo, da sáhdá chuun veñuhu. Tá naxini da Jesús nacaxítí da sahá. 23 Ta ndáhví mé naxica tahví da nu á já cáhí da já:

—Xíhijahyí i viti ñúhú. Caja ndó ñamaní ná cohó vehe chinúu ndó ndáha ndó jatá ña ná ndivaha ña já ná catacu ña —nacachi da.

24 Anda já naquee Jesús cuahan xihín dá. Chí cándíhi táhan mé ñayivi ndíco na jatá cuahan na. 25 Ta tañu ñayivi cán ndácaan in ña quíhvi. Sa naxinu uxu ivi cuiá ndítahví nji ña. 26 Nandoho ndivaha ini ña nuú na cája tátá ñayivi ta sa najátiví ndihhi ña jjuhún ña catátá ña cúní ña. Joo a cuú ndivaha ña ta janda cája ndeé chága ví a xihín ña. 27 Tá naxini johó ña saha Jesús já cuahan ña cayati ña chí jatá tañu tóco ndihhi ñayivi cuahan jatá mé a cán. Ta nacani ndaa ndáha ña jáhma á 28 jáchi nacaán ña: “Tá ná caní ndaa cuití ndahá yo jáhma á já ndavaha í”, nacaán ña. 29 Ivi laá nahichí nji ña. Naxini cáxi ña nandivaha ña ta cuahan va cuehe nandoho ña. 30 Jári Jesús ivi laá nacandaa ini a ña nandivaha in ñayivi nacaja

ndéé mé á. Já nacasáhá sándehe a chí jatá tañu ñayivi. Já nacasáhá ndáca tuhún á na já cáhí a já:

—Ndá ndó nacani ndaa ndáha jáhma i.

31 Ta nanducú ñehe mé na xíca tuun xihín á cán tuhun nu á já cáhí na já xihín á:

—Sándehe vaha mé ndó ndá quiahva cándíhi táhan ñayivi vaxi na xihín ndó ta cáa ga mé ndó ndáca tuhún ndó ndá na nacani ndaa ndáha jáhma ndó —nacachi na.

32 Joo cáva nuu nuu Jesús sándehe a ndá na nacani ndaa ndáha jáhma á. 33 Ta mé ña nandivaha cán tá nacandaa ini ña ña nayaha já nacasáhá quíji ninu ña sahá ña yíhvi ña. Já naxinu ña nasaxítí ña nu Jesús. Anda já nacasáhá ña ndícani ña nu á ndaja cáa ña nacaja ña. 34 Anda já nacachi Jesús já xihín ña:

—Jahyi a, nandivahún jáchi nacandúsún yehe. Cuanúhu ta a ndícani ga inún jáchi nandindaa cuehun —nacachi Jesús.

35 Cáhan yíi va Jesús xihín ña cán tá naxinu java na naquixi vehe mé da sáhdá chuun veñuhu cán já nacachi na já xihín dá:

—Sa naxihí va jahyi ndó. A jáquihvi ga ndó da xíca jánaha ñayivi jan —nacachi na.

36 Joo nacaja Jesús tátuhun co xíni johó a nuú nacaan na. Nacasáhá cáhí a já xihín da sáhdá chuun veñuhu cán:

—A cáyhívi tohún. Candúsa cuití vún yehe —cáhi a.

37 Ta coó nasahan Jesús ñamaní nuú na cuaha ndúu cán cuhun na xihin á. Na nasahan cuití xihin á cúu Pedro xihin Jacobo xihin Juan, da cúu ñani Jacobo. 38 Tá naxinu na vehe mé da sáhdá chuun veñuhu cán já naxini a ndíváá ñayivi sácu ndivaha na cáyuhú na ndúu na cán. 39 Já naquihvi a vehe ta já cáchí a já:

—Ndávaha ndíváá nahá ndo ta sácu cuaha ndo. Ta coó naxihí toho ñáloho yóho joo quíji cuití va ñá —nacachi a xihin na cán.

40 Joo nasasáhá na sácu ndaa na a. Andá já natavá Jesús tóco ndihi ñayivi jata véhe. Na naquihvi xihin á nasacuu tátá náná ña xihin na xíca tuun xihin á. Ta naxayati a nu cándúhu mé ñáloho cán. 41 Já natiin a ndáha ña ta nasasáhá cáchí a já xihin ña:

—Talita, cumi —nacachi a. Mé tuhun yóho cúní cachi a: Ñáloho cáhan i xuhun cuándacoó.

42 Ivi laá nandacoó ñáloho, ñá ndacaan uxu ivi cuiá ta nasasáhá ña xíca nuu ñá. Já nacatontó tóco ndihi ñayivi.

43 Joo nasahnda Jesús chuun nuú na ndúu cán ña ná a cáxi tuhun na ña nayaha yóho nuú java ga ñayivi. Ta nasahnda a chuun nu ná ña ná quiahva na ña cuxu mé ñáloho cán.

## 6

*Ín Jesús ñuu a Nazaret*

*(Mt. 13:53-58; Lc. 4:16-30)*

1 Naquee Jesús cuanúhu á ñuu a. Já naquee na xíca

tuun xihin á cuahan na xihin á. 2 Tá naxinu quívi ndíquehe ndée ná já nasasáhá Jesús jánaha ñayivi ini veñuhu cán. Ta cuahá ñayivi naxini johó nuú nacahan ta chí nacatontó na ta ndáca tuhún xihin táhan na já cáchí na já:

—Ndájá nacatiahva nahá da yóho ña jánaha dá nu yo. Ndá naquixi ña ndíchí jini dá. Ndá naquixi ñaha xituhún cája da. 3 Á a juú da yóho cúu da cája chuun xihin yito, da cúu jahyi María. Ta ñani da cúu Jacobo xihin José xihin Judas xihin Simón. Ta quiahva da jan ndúu ñuu yóho xihin mí —cáchí na ndáca tuhún táhan na.

Ta chí coó naxeen na candúsa ñahá na. 4 Sahá ña cán queá nacachi Jesús já xihin ná:

—Vatí tóco ndihi ñayivi cája cáhnu na in profeta joo na vehe da xihin na ñuu da co cándúsa na da —nacachi Jesús.

5 Chí coó nacuu caja Jesús ña náhnu nuú na cán. Java va na quíhvi cuití va naxinúu a ndahá jini ná já nandaja vaha a na. 6 Ta chí nacatontó Jesús sahá ña co cándúsa na mé á. Sahá ña cán queá naquee Jesús cuahan jánaha ñayivi java ga ñuu válí ndúu yati cán.

*Tá naxindahá Jesús uxu ivi na xíca tuun xihin á caxi tuhun na nuú ñayivi saha mé á*  
*(Mt. 10:5-15; Lc. 9:1-6)*

7 Tá najánditaca Jesús ndíhuxu ivi na xíca tuun xihin á cán já naxindahá a na tá ivi tá ivi cañehe táhan na



cuhun na. Ta nasahan ndée nu ná ña ná cuu tavá na ínima quini ñúhu ini ñayivi. <sup>8</sup> Ta nasahnda a chuun nu ná ña ná a cañehe toho na ñaha cuhun na íchi. In túhún ña cuu cañehe na cuhun na cúu in garrote, dó tiin ndaa na. Joo a cúu cañehe na ni yáti ni pan ni jiyhún. <sup>9</sup> Ndítahan cayihi na ndusa ta in túhún cotó na ndítahan candixi na cuhun na. <sup>10</sup> Ta nacachi a já xihin ná:

—Tá ná xinu coo ndó in vehe, canduu ndó mé vehe jan anda quiahva xinu quivi quee ndó cuhun ndo. <sup>11</sup> Ta ndá ñuu co cuni na ndiquehe vaha na ndohó ta ni co cuni na taa johu na nu cahan ndo já quea cuahán queta ndó cuhun ndo ta cati ndó ña yáca saha ndo já ná naha ña cuahan cuachi na cán jata mé va na. Mé a ndaa ná cahan i xihin ndo ña tá ná xinu quivi caja vii Ndióxi sahá ñayivi ndúu ñuyivi já quea jándoho chága Ndióxi ini ñayivi ñuu jan sahá ña coo nandiquehe na ndohó a juú ga tá quiahva najándoho a ini na ñuu Sodoma xihin Gomorra sanahá —nacachi Jesús xihin ná.

<sup>12</sup> Anda já naquee mé na xica tuun xihin á cuahan na caxi tuhun na nuú ñayivi ña ndítahan nu ná ndicó coo ini na jándacoo na cuachi cája na. <sup>13</sup> Ta natavá cuaha ná ínima quini nasañuhu ini ñayivi ta tá naxojo na síti jini ñayivi quíhvi já nandivaha na.

*Tá naxihi Juan, da nacaja*

*ndúta ñayivi*

*(Mt. 14:1-12; Lc. 9:7-9)*

<sup>14</sup> Nañehe Herodes, mé da cómi cuénta sahá ñayivi cán tuhun sahá Jesús jáchi ní cúu nandicuita nuu tuhun sahá. Ta já cáchi Herodes já saha Jesús:

—Á a juú Jesús cúu á Juan, da najácandúta ñayivi ta viti nanditacu tucu da. Sahá ña cán quea in ndée da cája da tóco ndihi ña cája da yóho — cáchi da.

<sup>15</sup> Ta java na cáchi na já:

—Á a juú da yóho cúu Elías, da nasacuu profeta.

Ta java na cáchi na já:

—Á a juú da yóho cúu in profeta tátuhun na profeta nasanduu sanahá ndivaha.

<sup>16</sup> Tá naxini johu Herodes ña yóho já nacasahá cáchi da já:

—Jivi ndusa da yóho cúu Juan, da najácandúta ñayivi, da nasahnda i chuun ná chituhun ná jico dá joo viti nanditacu tucu da —nacachi da.

<sup>17</sup> Jáchi mé Herodes yóho sa nasahnda da chuun ña ná tiin na Juan, da najácandúta ñayivi ta nacató na da já nachicaan na da vecaa. Nacaja da ña yóho sahá Herodías, ña nasacuu ñájihí Felipe, ñani mé Herodes jáchi sa naquee Herodes ña cacuu ña ñájihí mé dá. <sup>18</sup> Ta natii Herodes mé Juan jáchi já nasacahan Juan já xihin dá:

—Co ndítahan coún xihin ñájihí ñanún —nacachi da.

<sup>19</sup> Sahá ña cán quea naxojo ini Herodías xihin Juan. Ta

cúni ñá cahní ñá da joo a cuú caja ñá. <sup>20</sup> Jáchi yíhvi Herodes Juan sahá ña xíni da ña cúu Juan in taa ndaa, da co caja cuachi. Ña cán quéa coo nasahan Herodes ñamaní nu mé Herodías caja ñá ña núu xihín dá. Ta taa johó Herodes nu cáhan Juan vatí cáhvi ivi johó ini da sahá ña xíni johó da joo cájji ini da taa johó da nu cáhan da. <sup>21</sup> Joo in quivi nanuna nu Herodías cahní ña Juan jáchi ñacaja Herodes in víco cuéntá quivi ñacacu da. Mé já ñacana da da náhnu ndúu nu dá ña ná quixi na cuxu na xihín dá. Ta ñacana da tóco ndihi na cúu sacuaḥa nuú soldado xihín tóco ndihi ñayivi in saḥa estado Galilea. <sup>22</sup> Ta ndaja coo ñá cúu jahyi jíhí Herodías ñaquihvi ñá nu ndúu na xíxi na ta ñacasáhá ña xíta sahá ña nuú ndihi na cán. Ta ñacatóo Herodes xihín na ndúu xíxi xihín dá ndá quiahva ñaxita sahá ña sahá ña cán quéa ñacachi Herodes xihín ña:

—Ndía cúni mún, cacún ña nuú i jáchi quiahva i ña nuun —ñacachi da.

<sup>23</sup> Ta nasahan da tuhun da nu ñá cán ña quiahva da tóco ndihi ñaha ná caça ñá nu dá vatí ñahñu táhvi ndaa ñundáhyi ña cómi da chuun saḥa ñacachi da quiahva da nu ña. <sup>24</sup> Já ñaquee ñá cán cuahán ña caxi tuhún ña nu náná ña ña ñacachi Herodes xihín ñá. Ta ñandaca tuhún ñá náná ña ndía caça ñá nu dá ta já ñacachi mé náná ña já xihín ña:

—Caça yiquí jíni Juan, da jácandúta ñayivi —ñacachi Herodías.

<sup>25</sup> Ta cama chá ñaquihvi tucu ñá cán nu ndacaan Herodes já cáchi ña já xihín dá:

—Viti ñúhú cúni ña ná quiahva mé ndó yiquí jíni Juan, da jácandúta ñayivi nuú i ini in coḥo cáhnu —ñacachi ñá.

<sup>26</sup> Ta ndaja coo ñacasáhá ñacacuéḥa ndivaha ini Herodes sahá ña ñaxica ñá cán yiquí jíni Juan. Joo sahá ña sa nasahan da tuhun da nu ña ta sa ñaxini johó tóco ndihi na ndúu xíxi xihín dá cán ña ñacachi da xihín ña sahá ña cán quéa ndúsa caja da ña cúni ña. <sup>27</sup> Chí ivi laá ñachindahá da in soldado vecaa ña ná cañehe da yiquí jíni Juan quixi a. <sup>28</sup> Ñaxinu soldado cán vecaa já ñachitúhún dá jico Juan já ñeḥe da ña ini in coḥo cáhnu já ñandiquiahva da ña nu ñá cán já ñandiquiahva ñá a nu náná ña.

<sup>29</sup> Tá ñacandaa ini na ñaxica xihín Juan ña ñacaja na xihín dá já nasahan na ñandiquehe na yiquí cuñu da já najánduxu na da.

*Tá nasahan Jesús ña cuxu uhun mil taa*

(Mt. 14:13-21; Lc. 9:10-17; Jn. 6:1-14)

<sup>30</sup> Tá ñandihí já ñandique táhan tucu na xica tuun xihín Jesús xihín á já ñacasáhá ndícani na nu á ña ñacaja na xihín ña najánaha na. <sup>31</sup> Já ñacachi Jesús xihín ná:

—Naha ndó ná cōho ndiquehe ndée loho í nu cāa xóo.

Nacachi a já xihín ná jáchi cuahan vaxi ñayivi xíca nuu cuaha chá nā mé cán ta chí cō sáhan na ñamaní cuxu na.

<sup>32</sup> Anda já nandihvi Jesús xihín ná xíca tuun xihín á ini in barco já naquee na cuahan nā in nu cāa xóo.

<sup>33</sup> Joo cuahá ñayivi nandicuni na Jesús tá naquee a cuahan. Já xínu cuahá ñayivi tá nuú ñuu cán cuahan sáhá nā xoo nuú cuahan Jesús ini barco. Ta jihna ga mé ná naxinu yuhú tañuhú cán a juú ga Jesús.

<sup>34</sup> Tá nanuu Jesús barco cán já naxini a cuahá ndivaha ñayivi. Já natahvi ini a saha ná jáchi tá quiahva ndúu ndicachi, rí cōó xitoho quiahva já ndúu ná. Anda já nacasáhá jánaha cuahá ñaha nu ná. <sup>35</sup> Ta tá sa cáhini cuahan naxinu nā xíca tuun xihín á já cáchí nā já:

—Sa nahini va ta a juú xoo nu ndúu ñayivi quéa yóho.

<sup>36</sup> Ndindayí ndó ñayivi ná cuhun nā ñuu válí xihín nuú yati yóho já ná cueen na ña cuxu na —nacachi nā xíca tuun xihín Jesús.

<sup>37</sup> Tá nandihvi já nanducú ñehe Jesús tuhun já cáchí a já:

—Mé ndó quiahva ndó ná cuxu na —nacachi Jesús xihín nā cán.

Ta nacachi na já xihín á:

—Ndá cuu caja nde quiahva nde ña cuxu nā yóho jáchi jjuhún cuahá ndivaha xíní ñuhú nde já cuu cueen nde pan cuxu ñayivi cuaha

yóho. Ta ni a quéta toho ivi ciento denario —nacachi na.

<sup>38</sup> Já nacachi tucu Jesús já xihín nā cán:

—Ndaja pan cómi ndo. Cuahán ndo candehé ndo.

Tá nasahan nā sándehe nā já cáchí nā já xihín á:

—Íin uhun pan xihín ivi tiyacá.

<sup>39</sup> Anda já nasahnda Jesús chuun nu ná ña ná jácacōo na ndihi ñayivi tá táhnda nuú yucu cuí cán. <sup>40</sup> Ta nasacōo na java táhnda in ciento nā ta java táhnda ivi jico uxu nā.

<sup>41</sup> Anda já natiin Jesús ndihuhun pan xihín ndíví tiyacá ta sándehe a indiví já nandiquiahva ndixahvi nu Ndióxi.

Ta nasahnda java pan já nasahan ña nuú nā xíca tuun xihín á já ná ndicahnda na ña nuú ñayivi.

Tá quiahva já nasahnda tiyacá já nanditahnda rí nu tóco ndihi ñayivi cán. <sup>42</sup> Já naxixi tóco ndihi ñayivi cán ta nachutú tixi ndihi na.

<sup>43</sup> Ta mé pan xihín tiyacá ña nacandoo naxixi na najácutú nā uxu ivi toyicá. <sup>44</sup> Ta naxixi uhun mil dataa cán.

Tá naxixi uhun mil dataa cán.

*Tá naxica sáhá Jesús nuú tañuhú*

(Mt. 14:22-27; Jn. 6:16-21)

<sup>45</sup> Tá nandihvi nacaja Jesús ña ná ndihvi nā xíca tuun xihín á ini in barco ña ná cuhun cuée nā inga xoo tañuhú já xinu nā Betsaida nani ndindayí a ñayivi já saa mé á cán ndique táhan xihín ná. <sup>46</sup> Ta tá sa nandindayí

ndihi a ñayivi naqee a cuahan yucu caça tahvi a nu Ndióxi. <sup>47</sup> Tá nacuaá sa ndácaan barco mahñú tañuhú cán ta Jesús ín yii va nu ñúhu. <sup>48</sup> Ta naxini a ña ndóho ini na xica tuun xihín á jáchi a cuú jácaca na barco ini ticuú jáchi mé xoo nuú cuhun na vaxi tachi. Tá sa cuahan tívi já xica sáhá Jesús cuahan nuú ticuú xoo nu ndúu na ta tá nacayati a nu ndúu na jalóho yaha saa cuhun a, nduu. <sup>49</sup> Joo tá naxini na xica sáhá Jesús nuú ticuú nacahán na cúu á in ínima já nacayuhú cóhó na. <sup>50</sup> Jáchi tóco ndihi na naxini ñahá nayihvi na. Joo nandicañan Jesús já cáchi a já:

—Ndacú coo ini ndó jáchi yehe va cúu u. A yíhvi toho ndó —nacachi Jesús.

<sup>51</sup> Tá nandaa Jesús jata barco nu cándójó na já najáyaá tachi. Chí nacatóntó mé na xica tuun xihín á cán. <sup>52</sup> Jáchi a ñaha taçu vaha ini na sáhá ña nacaja Jesús tá nandaja cuaha mé á pan xihín tiyacá jáchi nandaji tuun xini túni ná.

*Tá nandaja vaha Jesús na quíhvi ndúu ñundáhyi Genesaret*

(Mt. 14:34-36)

<sup>53</sup> Naxinu na inga xoo tañuhú ta nacató ndaa na barco yuhú tañuhú cán já nasaa na ñundáhyi Genesaret. <sup>54</sup> Tá quéta Jesús xihín na xica tuun xihín á ini barco cán ivi laá nandicuni ñayivi mé á. <sup>55</sup> Já xinu na cuahan na ndijáá ñuu válí ndúu yati cán

ndúcú na na quíhvi já ñéhe na na nuú xito cása na nu Jesús. <sup>56</sup> Ta ndá ñuu nacuu nu quíhvi Jesús cúu á ñuu náhnu á ñuu válí á yucu já quéta ñayivi sácú na na quíhvi yuhú íchi. Ta já xica tahvi na nu Jesús ña ná quíahva ñamaní cani ndaa ndáha ná a vatí loho yuhú jahmá a. Ta ndá na nacani ndaa ndáha mé á ivi laá nandivaha na.

## 7

*Ña cája quini ínima ñayivi*  
(Mt. 15:1-20)

<sup>1</sup> In tañu na fariseo xihín java na jánaha ley Moisés, na naquixi ñuu Jerusalén nacayati na nu ín Jesús. <sup>2</sup> Ta naxojo ini na tá naxini na ña ndúu coo java na xica tuun xihín Jesús xíxi na tá cámani ndahá na tá quíahva ín costumbre na Israel. <sup>3</sup> Jáchi jánaha na fariseo xihín ndihi na Israel ña a cuú cuxu na tá cámani ndahá vaha na tá quíahva ín costumbre tásáhnu jícó na. <sup>4</sup> Ta jári jánaha na ña tá ndícó coo na sahan na yahvi xini ñuhú ndahá na tá quíahva ín costumbre na já ná cuu cuxu na. Ta ín cuahá ga nuú ñaha jánaha na ndítahan caja na tátuhun ña ndícata na yáxi xíhi na xihín tindohó xihín cóhó caa anda xito quíji na viti, ndítahan ndicata na. <sup>5</sup> Anda já nacasáhá na fariseo xihín na jánaha ley Moisés cáchi na já xihín Jesús.

—Ndávaha co cája na xica tuun xuhun tá quíahva nacachi tásáhnu jícó yo caja

í. Ndávaha xíxi na tá cámani ndahá nā tá quiahva sáhnđá ley caja í —nācachi na. <sup>6</sup> Já nācachi Jesús já xihin ná:

—Mé a ndaa nācahan profeta Isaías saha ndo jáchi co cúu ndó tá quiahva ndáa ndó.

Já nācahyí da já:

Yuhú ninu uun na cája cáhnu na yehe.

Ta co cája cáhnu na yehe xihín ndinuhu ínimā ná.

<sup>7</sup> Mé a uun va queá cája cáhnu na yehe,

jáchi ña jánaha na nuú ñayivi cúu á ña quixi jini mé cuití va na, nācahyí Isaías sanahá.

<sup>8</sup> Jáchi najándacoo ndó ña nāsahnda Ndióxi nu ndó caja ndó ta nācasáhá ndíco cáhnu ndó costumbre ña nācaja tásáhnu jícó ndo. Ta sahá ña yóho ndícata ndó tindoho xihín yáxi xíhi ndó ta cája ndó cuahá chága costumbre yata —nācachi Jesús xihín ná.

<sup>9</sup> Já nācachi tucu a já xihín ná:

—Sahá ña cūni ndo candico cáhnu ndó costumbre mé va ndó sahá ña cán queá najándacoo ndó ña nāsahnda Ndióxi caja ndó. <sup>10</sup> Jáchi já cáchi ley Moisés: “Caja cáhnún tátún xihín nánún”, ta jári cáchi a já: “Ndá na ná chicaan cháhan jata tátá na á jata náná na, ndítahan quivi na”, cáchi ley Moisés.

<sup>11</sup> Joo ndóhó jánaha ndó nuú ñayivi ña cuu cahan na já xihín tátá na á náná na: “A cúu chindeé e ndóhó jáchi sa nāsacu xoo i ñaha i quiahva i

ña nu Ndióxi”, cáchi na. <sup>12</sup> Tá ná cachi na ña yóho já queá co ndúsā ga chindeé na tátá na á náná na. <sup>13</sup> Quiahva johó cája ndó sácu xóo ndó ña nāsahnda Ndióxi nu ndo ta ndája ndó a tátuhun in ñaha ña coo saha. Jáchi ndíco cáhnu ndó costumbre ña najándadacoo tásáhnu jícó ndó nu ndo ta quiahva já jánaha ndó nuú jahyi ndó. Ta cuahá ga ñaha tátuhun ña yóho cája ndó —nācachi Jesús.

<sup>14</sup> Anda já nācana tucu Jesús ñayivi já nācachi a já xihín ná:

—Cuni johó ndihi ndó nu cáhan i xihín ndo ta candaa ini ndó ña. <sup>15</sup> Ni in ñaha xíxi ñayivi a cúu caja quini ínimā ná. Ña cuu ndaja quini ñayivi cúu ña quixi ínimā na tátuhun ña cáhan na xihín ña cája na. <sup>16</sup> Na in johó, ná cuni johó na —cáchi Jesús.

<sup>17</sup> Tá nandihhi nandihvi Jesús ini in vehe ta nācandoo cuahá ñayivi jata véhe. Já nādaça tuhún na xíca tuun xihín á ña ndia cūni cachi a xihín tuhun nācahan xihín ná. <sup>18</sup> Ta nāducú ñehe a tuhun nu ná já nācachi a já:

—Á coo toho xíni túni ri ndóhó va, vaha. Jáchi co cándaa ini ndó ña tóco ndihi ñaha xíxi ñayivi a cúu caja quini a na. <sup>19</sup> Jáchi ña xíxi ñayivi co xínu a ini ínimā ná joo xínu coo a tixi na já queta tucu a yiquí cuñu na —nācachi Jesús.

Xihín tuhun yóho nācachi Jesús xihín ná ña cuu cuxu na tóco ndihi ñaha ña xíxi ñayivi

jáchí cō ndája quini a ínimā ná.  
 20 Ta nācachi tucu Jesús já:

—Ñā cuu ndaja quini ñayivi cúú ñā quíxi ínimā ná tátuhun tuhun cáhan nā xihín ñā cája na. 21 Jáchí chí iní ínimā ná quéta ñā cáhvi núu ini na tátuhun ñā cáhvi ini in dataa coo da xihín ñájíhí ñani táhan da á tá xíca ini da coo da xihín in ñáñáha, ñá cō cúú ñájíhí da á tá cáhvi ini na cahní nā ndii. 22 Ta sá mé cán quéta ñā xíca ini na caja cuíhná nā ta jári xíca ini na coo cuahá ndivaha ñaha nu ná. Ta sá mé cán quéta ñā núu cája na ta cáhan nā ñā tuhún ta cája na tá nuú cuachi ta cáhíhvi ini na ta cátóó nā cahan nā saha táhan na ta cája cáhnu na mé ná ta quíhvi cája na. 23 Tóco ndihi ñā núu yóho ñā cáhvi ini ñayivi caja na, quíxi a ínimā ná ta ndája quini a nā.

*Tá nācandeeé ini in ñá tóho Jesús*

*(Mt. 15:21-28)*

24 Já naqee Jesús cuahan chí ñundáhyi cuéntá Tiro xihín Sidón. Ta naquihvi a in vehe coo a ta cō cúni a ñā ná candaa ini nā ñuu ñā iin a cán joo cōó nācuu coo jehé a. 25 Chá va ta nācandaa ini in ñáñáha ñā in Jesús vehe cán. Ta in in jahyi jíhí ñā, ñá ndácaan ínimā quini ini. Ta ndaja coo nasaa ñá ta nācaxítí ñā saha Jesús. 26 Ta cúú ñá ñá tóho cuéntá ñundáhyi Sirofenicia. Ta naxica tahví ñá nu Jesús ñā ná tavá a ínimā quini ndácaan ini jahyi ñá. 27 Anda já nācachi Jesús já xihín ñā:

—Jihna ñúhú ndítahan nuú i chindee e nā Israel anda jávi cuu chindee e ndohó, nā tóho jáchí in in tuhun ta cáhí a ñā a váha toho candaa í pan xíxi nā valí ta jácana í ñā nuú tina —nācachi Jesús.

28 Anda já nācachi mé ñá tóho cán já xihín Jesús:

—Mé a ndaa cáhan ndó, xi-toho. Joo anda tina, rí ndúu tixi mesa xíxi rí ñā jácu yu jahyi xitoho rí —nācachi ñá.

29 Anda já nācachi Jesús já xihín ñá:

—Vaha va nācahun. Sahá ñā cán quéa cáhí i xuhun cuanúhu viti jáchi sá naqueta va ínimā quini nasandacaan ini jahyún —nācachi Jesús.

30 Ta tá naxinu ñá vehe já naxini ñá cándúhu jahyi ñá nuú xito ta sá cōó ga ínimā quini cán ndácaan ini jahyi ñá.

*Tá nandaja vaha Jesús in da jóho, da a cuú cahan*

31 Naqee Jesús ñundáhyi cuéntá Tiro ta nayaha chí ñuu Sidón xihín java ga ñuu cuéntá Decápolis cán já naxinu coo a tañuhú Galilea.

32 Cán ñéhe na in dataa nacasaa nā nu Jesús. Cúú dá da jóho ta cúú dá da níhi. Ta naxica nā nu á ñā ná chinúu a ndáha á jini dá já ná ndivaha da. 33 Já nātavá xóo Jesús da tañu ñayivi cán. Já najáquihvi a in nducu ndáha jóho da ta naxihnu a tójíi a já nācani ndaa a tójíi a yáa dá. 34 Tá nandihí nasandehé a indiví já ndísaa ndísaa ínimā á já nācachi a já xihín dá:

—Efata —ñacachi a ta ña yóho cúnj cachí: Ná ndinuna.

<sup>35</sup> Ivi laá nandinuna johó mé da johó cán ta nandivaha yáa dá já ñacasáhá cáhan vaha da. <sup>36</sup> Ta ñasahnda Jesús chuun nuú ndihi na ña ná a cáxi tuhun na ña yóho nuú ni in ñayivi. Joo tá ñacachi a ña yóho já queá ví ga ví cáhan na.

<sup>37</sup> Chí cátoántó ndihi ñayivi tá xíni johó na ña ta cáhan xihín táhan na já cáchí na já:

—Vaha ndivaha cája Jesús tóco ndihi ñaha jáchi jánditacu a na johó ta jándicahan mé á na níhi —ñacachi na.

## 8

*Tá ñasahan Jesús ña cuxu comi mil ñayivi*

*(Mt. 15:32-39)*

<sup>1</sup> Mé já nanditútú tucu cuahá ñayivi ta chí coó mé ñaha cuxu na. Anda já ñacana Jesús na xíca tuun xihín á já ñacachi a já xihín ná:

<sup>2</sup> —Táhnada ndivaha ini i sahá ñayivi yóho jáchi sa ñaxinu unj quivi ndúu na xihín i yóho ta chí coó ga ñaha cuxu na. <sup>3</sup> Ta co cúnj chindahá i na nuhu na vehe na jáchi cámanj cuxu na ta tiahva náá cuitá na ta cuyu na íchi jáchi sa cánj ndivaha ñaqui xi java na —ñacachi Jesús.

<sup>4</sup> Anda já ñacachi na xíca tuun xihín á cán já:

—Ndaa cáhan ndo. Ta ni mí, a cuú quiahva í ña cuxu na jáchi coó toho ñayivi ndúu yóho nuú cueén ña cuxu na —ñacachi na.

<sup>5</sup> Anda já ñandaca tuhún Jesús na já cáchí a já xihín ná:

—Ndaja pan cómí ndo.

Já ñacachi na cán já:

—Usa ña.

<sup>6</sup> Anda já ñasahnda Jesús chuun nuú ñayivi ña ná cacoo na nu ñúhu. Já ñatiin a ndíhusa pan cán. Ta ñandiquiahva ndixahvi nu Ndióxi. Já ñasahnda java ña ta ñasahan ña nuú na xíca tuun xihín á cán ña ná ndicahnda na ña nuú ñayivi cuaha cán. <sup>7</sup> Ta jári ñasacomí na java tiyacá válí ta ñandiquiahva mé á ndixahvi nu Ndióxi saha ri já ñasahnda chuun nu ná ña ná ndicahnda na ri. <sup>8</sup> Ta ñaxixi tóco ndihi na ndúu cán anda quiahva ñachutú tixi na ta tá ñandihí najáchutú na janda usa toyicá xihín ña ñacandoo. <sup>9</sup> Tá tuhun comi mil ñayivi ñaxixi. Ta tá ñandihí já najándindayí Jesús na. <sup>10</sup> Já ñandihvi a ini barco xihín na xíca tuun xihín á já ñaquee na cuahan na ñundáhyi cuéntá Dalmanuta.

*Cúni na fariseo ña ná caja Jesús in ña xituhún nu ná*

*(Mt. 16:1-4; Lc. 12:54-56)*

<sup>11</sup> Anda já ñaxinu na fariseo nu Jesús já ñacasáhá ndítuhún na xihín á. Ta sahá ña cúnj na coto ndojó cuití ñahá na sahá ña cán queá ñaxica na nu á ña ná caja in ña xituhún, ña quixi indiví já ná candaa ini na á mé a ndaa cúu á ña ñachindahá Ndióxi. <sup>12</sup> Ndísaa ndísaa ini Jesús jáchi ndíhi ini a xihín ná já cáchí a já:

—Ndá saha quéa xíca na yóho ña ná caja i in ña xitúhún. Mé a ndaa ná cahan i xihín ndó ña a cája i ñaha xitúhún nuú na yóho — naçachi a.

<sup>13</sup> Anda já nandihvi tucu Jesús ini mé barco cán ta najándacoo a na cán já naçuee a cuahan inga xoo tañuhú.

*Tá cahan Jesús sahá ña jánaḡa na fariseo*  
(Mt. 16:5-12)

<sup>14</sup> Ta ndaja coo nandindójó mé na xíca tuun xihín a cán cañehe na ñaha cuxu na joo naçahin in pan cuití va xihín ná ini barco cán. <sup>15</sup> Anda já naçahnda Jesús chuun nu ná já cáhí a já xihín ná:

—Candehé ndo. Cuéntá coo ndó xihín na fariseo ta xihín na cúu cuéntá Herodes jáchi ña jánaḡa na cúu á tátuhun yusa naxaa ña cáva táhan na xihín harina cávaḡa na pan —naçachi Jesús.

<sup>16</sup> Coó naçandaa ini na ña cáhí a ña cán quéa naçasáhá ndítuhún xihín táhan na já cáhí na já:

—Sahá ña coó pan ñéhe vaxí sahá ña cán quéa cahan Jesús ña yóho xoho —naçachi na.

<sup>17</sup> Sa naçandaa ini Jesús ña cahan na ta já naçasáhá cáhí a já:

—Mé ndó cáhí ndó ña coó pan ñéhe vaxí jáchi co cándaa ini ndó ta ni co cája ndó cuéntá sahá ña jánaḡa i. Nandaji tuun xíní túní ndo.

<sup>18</sup> Cúu ndó tátuhun na co tívi nuu xihín na coó joho jáchi vatí xíní ndo ta xíní joho ndó

joo co cándaa ini ndó. Á co ndícuḡun ini ndó ña naçaja i <sup>19</sup> tá nandicaḡnda i ndícuḡun pan nuú uḡun mil ta. Ndaja toyicá nanditaca naçaja ndó xihín ña naçandoo cán — naçachi Jesús.

Já nanducú ñehe na tuhún nu á:

—Uxu ivi ña.

<sup>20</sup> Ta naçachi tucu Jesús xihín ná já:

—Ta tá nandicaḡnda i usa pan nuú comi mil ñayivi, ndaja toyicá nanditaca naçaja ndó xihín ña naçandoo —naçachi a.

Já nanducú ñehe na tuhun nu á:

—Usa ña.

<sup>21</sup> Anda já naçachi a já xihín ná:

—Cámani yii va cándaa ini ndó —naçachi a.

*Tá nandaja vaḡa Jesús in da cuaá ñuu Betsaida*

<sup>22</sup> Tá nandihí naxinu na ñuu Betsaida já ñehe na in da cuaá naçasaḡa na nu Jesús. Já naxica taḡví na nu á ña ná caní ndaa ndáḡa á da. <sup>23</sup> Ta chí naḡiin a ndáḡa da cuaá cán já naḡavá a da yuhú ñuu. Naçindaa tójii a nduchú núu da já naçinúu a ndáḡa á jini dá. Já nandaca tuhún a da á cuu candehé da. <sup>24</sup> Ta já naçachi da cán já sándehe da:

—Sándehe e java ta joo tá quiaḡva ndáa yito quiaḡva já ndáa da xíca nuu da xíní i — naçachi da.

<sup>25</sup> Anda já naçinúu tucu Jesús ndáḡa á nduchú núu da já naçandehé ndaa da. Anda jáví nandivaḡa nduchú



núú dā ta načasáhá sándehe cáxi vaha da tóco ndíhi ñaha. <sup>26</sup> Ta nāchindahá Jesús dā cuanúhu dā vehe da já nācachi a já xihín dá:

—A ndíhvún mahñú ñuu ni a ndicanún ña yóho nuú ñayivi ndúu jan —nācachi a.

*Tá cáxi tūhun ndaa Pedro ña cúu Jesús mé a nāchindahá Ndióxi cacomí cuéntá sahá ñayivi*

(Mt. 16:13-20; Lc. 9:18-21)

<sup>27</sup> Tá nāndihi já nāsahan Jesús xihín na xíca tuun xihín á ñuu válí ndácaan Cesarea cuéntá Filipino. Nani xíca na cuahan na íchi nāndaca tūhún a na já cáchí a já xihín ná:

—Ndá dā cáchí ñayivi cúu yehe —nācachi a.

<sup>28</sup> Já nācachi na cán já:

—Java na cáchí na ña cúu ndó Juan, dā nācaja ndúta ñayivi. Ta java na cáchí na ña cúu ndó profeta Elías. Ta java na cáchí na ña cúu ndó in táhan profeta nāsanduu sanahá —nācachi na.

<sup>29</sup> Andā já nāndaca tūhún tucu Jesús na já cáchí a já xihín ná:

—Ta ndóhó ri, ndá dā cáchí ndó cúu u —nācachi a.

Andā já nācachi Pedro já xihín á:

—Mé ndó cúu Cristo, mé a nāchindahá Ndióxi cacomí cuéntá sahá ñayivi —nācachi da.

<sup>30</sup> Andā já nāsahnda Jesús chuun nu ná ña ná a cáxi tūhun na ña yóho nuú ni in ñayivi.

*Cáxi tūhun Jesús ña quivi a (Mt. 16:21-28; Lc. 9:22-27)*

<sup>31</sup> Andā já nāchasáhá jánaħa Jesús nu ná ña tandaa quivi ndoho ndivaha ini mé á, dā nāchindahá Ndióxi nduu ñayivi. Ta na saçuaha veñuhu xihín na saçuaha nuú jutū xihín na jánaħa ley Moisés candají na mé á janda quiahva ná cahní ñahá na. Joo tá ná xinu unī quivi nditacu tucu a. <sup>32</sup> Cáxi ndivaha nācahan Jesús ña yóho xihín ná ta chí anda já natavá xóo Pedro Jesús já nāchasáhá jánani da a sahá ña nācachi a xihín ná. <sup>33</sup> Joo nācava Jesús ta nāndicoto nihni a nuú na xíca tuun xihín á já nāchasáhá ndícuehe a xihín Pedro já cáchí a já xihín dá:

—Cuáhán quee Satanás, rí cúu tiñahá saçuaha. Co ín xíní túnun tá quiahva ín xíní túní Ndióxi jáchi cáhvi inún tá quiahva cáhvi ini ñayivi ñuyiví yóho —nācachi a.

<sup>34</sup> Andā já nācana Jesús na xíca tuun xihín á xihín java ga ñayivi já nācachi a já xihín ná:

—Ndá na cúni candico yehe ndítahan nu ná ndíhi chága ini na sahá yehe a juú ga saħa mé ná. Ta ndítahan coo tiaħva na ndoho ini na sahá yehe. Ta coó caja toho a ná quivi na sahá i. <sup>35</sup> Jáchi ndá na cátóo coo chága ñuyiví yóho ndíhi saħa ná. Joo ndá na sáhan ndeé ini quivi saħa i xihín saħa tūhun Ndióxi, ñehe táhvi ná catacu na anda ama cáa quivi. <sup>36</sup> Vatí ná quee vaha

in na ñuyíví yóho ta cómí na tóco ndihi ñaha ñuyíví joo ndá chuun quéa tá nu ndihí ndihi saha ná indayá. <sup>37</sup> Jáchi ni in ñaha a cuú chahvi in na saha ínimá ná ná a cúnun na indayá. <sup>38</sup> Candehé ndo. Mé tiempo viti cája ñayivi cuhá cuachi ta co xéen na caja na ña sáhdá Ndióxi nu ná. Ta ndá na cácahan nuu sahá i xihín sahá tuhun vaaha cáhan i quiahva já cacahan ri nuú yehe, da nachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán nahá ndaja cáhnu cúú yehe jáchi quixi i xihín ndée Ndióxi ta xihín ndée táto yí mé á viti — nacachi Jesús.

## 9

<sup>1</sup> Ta nacachi tucu Jesús já xihín ná:

—Mé a ndaa ná cahan i xihín ndo. Java na ndúu yóho a quíví toho na janda quiahva ná xinu quívi cuni na cacomí Ndióxi cuéntá sahá ñayivi xihín ndée mé á — nacachi a.

*Tá nandijama Jesús quiahva cáa*

(Mt. 17:1-13; Lc. 9:28-36)

<sup>2</sup> Tá nayaha iñu quívi já nandaa Jesús in yucú jíco ta ndáca táhan Pedro xihín Jacobo xihín Juan cuahan na xihín á. Ta nu táhyí mé na cán nandijama quiahva cáa.

<sup>3</sup> Ta a juú quiahva nandiyehé jáhma ndíxi a chí nandiyaa cachí ña. Ni in ñayivi ñuyíví yóho a cuú ndicata yaa nahá jáhma tá quiahva yaa nanduu

jáhma á. <sup>4</sup> Anda já na xíca tuun xihín Jesús naxini na Elías xihín Moisés ndúu na ndítuhún na xihín á. <sup>5</sup> Ta já nacachi Pedro já xihín Jesús:

—Maestro, vaaha cúu ndúu nde yóho jáchi já cuu cavaaha nde uní vehe tiyahvá válí. In a coo mé ndó ta inga coo Moisés ta inga coo Elías — nacachi da.

<sup>6</sup> Nayihví ndivaha na xíca tuun xihín Jesús sahá ña cán quéa co xíni mé Pedro ndía cáa cáhan va da. <sup>7</sup> Anda já nanuu in víco jata ná já najajahvi a na ta tañu víco cán naxini johó na ña cáhan in a já cáchí a já:

—Da yóho cúú jahyi maní i. Cuni johó ndó nu cáhan da.

<sup>8</sup> Ta tá nandicoto nihni na sa coó ga na naxini na ta jandá in túhún Jesús naxini na.

<sup>9</sup> Tá sa cuahan nuu na jini yucu cán já nasahnda Jesús chuun nu ná ña ná a cáxi tuhun na nuú ñayivi ña naxini na anda quiahva ná xinu quívi nditacu tucu mé a nachindahá Ndióxi nduu ñayivi. <sup>10</sup> Sahá ña cán quéa nachijehé tuhun na sahá joo nandítuhún xihín táhan na ndía cúní cachi Jesús tá nacachi a ña nditacu tucu a. <sup>11</sup> Anda já nacasáhá ndáca tuhún na mé á já cáchí na já xihín á:

—Ndávaha cáchí na jánahá ley Moisés ña ndítahan quixi jihna ñuhú profeta Elías — nacachi na.

<sup>12</sup> Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihi da ñaha. Á co xini ndó ndá quiahva cáchí tuhun Ndióxi sahá da chindahá Ndióxi nduu ñayivi. Cáchí a ña ndoho ini da ta candají na da. <sup>13</sup> Joo cáxi tuhun i nu ndó ña sa ñaquixi va Elías ta ñacaja na tá quiahva cúni mé va na xihin dá ta tá quiahva cáchí tuhun Ndióxi ndoho da quiahva já ñandoho da — ñacachi Jesús.

*Tá ñandaja vaha Jesús in taa loho ndácaan ínimá quini ini*

(Mt. 17:14-21; Lc. 9:37-43)

<sup>14</sup> Tá ñandihí já ñandicó coo Jesús xihín na cán nu ndúu java gá na xica tuun xihin á cán. Já ñaxini na cuahá ndivaha ñayivi ñacava nuu na na cán. Jári ñúhu java na jánaḥa ley Moisés cáni táhan yúhu ná xihín na xica tuun xihín Jesús. <sup>15</sup> Tá ñaxini ñayivi yóho Jesús chí ñacatóntó ndihi na já ñandava nihni na ñasahan na cáhan Ndióxi ná xihin á. <sup>16</sup> Anda já ñandaca tuhún Jesús na já cáchí a já xihin ná:

—Ndá saḥa nditúhún ndó xihín na ñan —ñacachi a.

<sup>17</sup> In da cándichi cán ñanducú ñehe da tuhun nu Jesús já cáchí da já:

—Maestro, yóho ñehe e jahyí i ñacasaa i nu ndó jáchí ndácaan in ínimá quini ini da ta ñandaja níhi ñahá rí. <sup>18</sup> Ndá ñacuu tíin rí da, jándacava rí da nu ñúhu ta já cásahá cána cuyu chiquiñu yúhu dá ta

cáhñá nuḥu dá. Xihín ña yóho cásahá jácuitá rí da. Ta sa ñaxica i ñamaní nuú na xica tuun xihin ndó ña ná tavá na mé ínimá quini yóho joo coo ñacuu caja na ña —ñacachi da.

<sup>19</sup> Já ñacachi Jesús já xihin ná:

—Ndáhví nahá ñacuu ndó jáchí sa cuahá ndivaha quivi ín i xihin ndo ta a ñaha candeé ini ndó yeḥe. Ta chí co ndeé ga ini i xihín ña cája ndó. Taxi ndó da loho ñan chóho — ñacachi a.

<sup>20</sup> Chí ñehe na da loho cán ñasaa na nu Jesús. Ta tá ñaxini mé rí quini ndácaan ini da loho Jesús ivi laá ñacaja rí ña ná quivi yihí da loho cán já tívi núu da ñandicava da nu ñúhu xihín chiquiñu cána yúhu dá. <sup>21</sup> Anda já ñandaca tuhún Jesús tátá da cán já cáchí a já xihin dá:

—Á sanahá ndóho jahyún ña yóho —ñacachi a.

Já ñacachi tátá da cán já:

—Janda tá loho da cája rí já xihin dá. <sup>22</sup> Ta cuahá tañu chícaan rí quini da ini yávi núhu xihín ini ticuij viti ña cahní ñahá rí cúni rí. Ña cán quea xica tahví i nu ndó ña ná cándahví loho ini ndó ndeḥe ta chindeé ndó ndeḥe tá ta cuu caja ndó ña —ñacachi da.

<sup>23</sup> Anda já cáchí Jesús já xihin dá:

—Cuu caja i ña tá cándúsún yeḥe. Jáchí cuu caja i tóco ndihi ñaha xihin ñayivi tá candeé ini na yeḥe —ñacachi a.

<sup>24</sup> Ivi laá naçayuhú tátá mé da loho cán já cáchí da já:

—Cándúsa vi joo chindee ndó yehe ná candúsa chága i —naçachi da.

<sup>25</sup> Ta tá naxini Jesús ña naçasáhá chútú cuahá ñayivi já nandicuehe mé á xihin mé rí quini cán já cáchí a já xihin ri:

—Ínima quini, rí nandaja níhi ta nandaja jóho da loho yóho, sáhná i chuun nuun ña ná queún cuhun ta a ndícó coo gaún ndihvún ini da —naçachi a.

<sup>26</sup> Anda já naçayuhú cóho rí quini cán já nasahní yíhi tucu rí da. Chí naqueta rí cuahan rí ta najándacoo rí da loho cán tátuhun in ndji sahá ña cán queá naçasáhá cáchí ñayivi ña sa naxihí va da jan.

<sup>27</sup> Joo natiin Jesús ndáha dá já nandínehe a da. Ta já nandaca ndichi da cán.

<sup>28</sup> Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cáchí na já xihín á:

—Ndávaaha coo naçuu caja ndehe tavá nde ínima quini nasandacaan ini da loho jan —naçachi na.

<sup>29</sup> Já naçachi Jesús já xihín ná:

—Tá cúní ndó tavá ndo tá ínima quini táhan rí yóho ndítahan cajuhun ndó ta çaca tahví ndo nu Ndióxi —naçachi a.

*Cáxi tuhun tucu Jesús ndaja coo nuú quivi a*

(Mt. 17:22-23; Lc. 9:43-45)

<sup>30</sup> Tá naçee na cuahan na nayaha na chí estado Galilea

ta co cúní Jesús ña ná candaa ini ñayivi <sup>31</sup> jáchí jánaħa Jesús nuú na xíca tuun xihín á cúní a. Ta cáchí a xihín ná ña vaxi quivi ndiquiahva ñayivi mé á, da nachindahá Ndióxi nduu ñayivi ndahá ñayivi ta cahní ñahá na joo tá ná yaha uní quivi nditacu tucu a. <sup>32</sup> Joo coo naçandaa ini na ña cáhan xihín ná ta yíhvi na ndaca tuhún na mé á sahá tuhun cáhan.

*Ndicani Jesús ndá na cúu na ín chága saħa*

(Mt. 18:1-5; Lc. 9:46-48)

<sup>33</sup> Ta ndaja coo naxinu na ñuu Capernaum ta tá sa ndúu na vehe já naçasáhá ndaca tuhún Jesús na xíca tuun xihín á já cáchí a já xihín ná:

—Ndía ndítuhún ndó saħa tá vaxi ndó íchí —naçachi a.

<sup>34</sup> Joo coo nanducú ñehe na cán tuhun nu á jáchí íchí nuú naquixi na nandítuhún cuaha ná saħa ndá da cúu da cáhnu chága tañu mé ná.

<sup>35</sup> Anda já nasacoo Jesús já naçana ndíhuxu ivi da xíca tuun xihín á já naçasáhá cáchí a já xihín dá:

—Ndá ndó, na cúní cacuu na nu cuítí ndítahan ndaja núu ndó mé ndó cacuu ndó na nu ndíhí ta caja ndíví ndo nu ndíhi na —naçachi a.

<sup>36</sup> Tá nandihí já naçana Jesús in da loho já nasacu a da mahnú nu ndúu na já nasañehe ndaa da já naçasáhá cáchí a já:

<sup>37</sup> —Ndá na ná ndiquehe vaħa in da loho tátuhun da yóho sahá ña quíhvi ini na yehe, ndiquehe ri na yehe viti.

Ta ndá nā ndíquehe yehe, a juú in túhún yehe ndíquehe na vaha jáchi ndíquehe ri na tátá i, mé a nāchindahá yehe — nācachi a.

*Tá ndúu java nā ndíquehe saha yo já quea cuahan nā xoo í*

(Mt. 10:42; Lc. 9:49-50)

<sup>38</sup> Andá já nācachi Juan já:

—Maestro, naxini nde in dataa ta cáhan da quivi mé ndó já tává da ínima quini ñúhu ini ñayivi. Joo co xíca nuu da xihín yo sahá ña cán quea nasaji nuu nde nū dá caja da ña —nācachi da.

<sup>39</sup> Joo nācachi Jesús já:

—A cáji nuu ndó nū dá jáchi tá cája in na ña xitúhún xihín quivi i já quea a cuú caca nuu na cahan núu na sahá i. <sup>40</sup> Jáchi ndá nā co ndíndita caja xíxi xohó, mé nā cán cuahan nā xoo mí. <sup>41</sup> Ta ndá nā ná quiahva in ñaha nū ndó vatí in yáxi ticuú sahá ña ndíco ndó yehe mé a ndaa ná cahan i xihín ndo ña chahvi tá chahvi Ndióxi sahá ñamaní cája na xihín ndó —nācachi Jesús.

*Tá jándacava ñayivi inga na nuú cuachi*

(Mt. 18:6-9; Lc. 17:1-2)

<sup>42</sup> Ta cáchi tucu Jesús já:

—Ndá nā ná jándacava in nā ndahví, nā cāndeé ini yehe nuú cuachi janda vaha chága ná candíco in yuú yojó jico ná ta ná ndihi sahá nā chá tañuhú. <sup>43</sup> Tá ndáha ndo quea jándacava ndohó nuú cuachi chitúhún ndó a jáchi vaha chága ná cuhún ndó indivi

xihín in túhún ndáha ndo a juú ga cuhún ndó xihín ndívi ndáha ndo indayá nuú co ndáhva ñúhu cáyi. <sup>44</sup> Ta cán ni ticujú co xíhi ni ñúhu cáyi co ndáhva. <sup>45</sup> Tá saha ndo quea jándacava ndohó nuú cuachi chitúhún ri ndó ña jan va jáchi vaha chága ná cuhún réncó ndó indivi xihín in túhún saha ndo a juú ga cuhún ndó xihín ndívi saha ndo indayá nuú co ndáhva ñúhu cáyi. <sup>46</sup> Ta cán ni ticujú co xíhi ta ni ñúhu cáyi co ndáhva. <sup>47</sup> Tá nduchú nuú ndó quea jándacava ndohó nuú cuachi tavá ndó ña jáchi vaha chága ná coo cóhó nuú ndó cuhún ndó nuú cacomí Ndióxi cuéntá saha ndo a juú ga ña ná coo ndívi nduchú nuú ndo cuhún ndó indayá. <sup>48</sup> Ta cán ni co xíhi ticujú ta ni ñúhu cáyi co ndáhva.

<sup>49</sup> Tá quiahva ndívi jihún cuáan cája ñúhu cáyi quiahva já ndívi ínima ñayivi xihín ña ndóho ini na. Ta tóco ndihi ñaha jóco nā nū Ndióxi chícaan nā ñii yívi na já co tívi a. <sup>50</sup> Vaha va cája ñii jáchi xihín ñii ndíhaji ña xíxi na joo tá co óhva ña já a cuú caja ohva tucu yó a já ná caja chúun tucu ña. Ndítahan nū ndóhó caja ndó tátuhún cája ñii ta já canduu víi xihín táhan ndó —cáchi Jesús.

## 10

*Jánaha Jesús nuú nā sa natandaha ña co ndítahan jándacoo táhan na*

(Mt. 19:1-12; Lc. 16:18)

<sup>1</sup> Naqee Jesús ñuu Capernaum cuahan. Já nasahan

estado Judea xihín ñundáhyi íin inga xoo yuta Jordán. Cán ñacasáhá ñanditaca tucu ñayivi nu á chí jáñaha tucu a na tá quiahva ñacaan mé á cája. <sup>2</sup> Anda já ñacayati java na fariseo nu Jesús sahá ña coto ndojó ñahá na cuni na. Ñacachi na já xihín á:

—Á núna nuú in dataa jándacoo da ñájíhí da — ñacachi na.

<sup>3</sup> Já ñanducú ñehe Jesús tuhun nu ná já cáhí a já xihín ná:

—Ndaja cáhí ley Moisés ña ndítahan caja ndó — ñacachi a.

<sup>4</sup> Anda já ñacachi na cán já:

—Tá ná quiahva in dataa in tutu nu ñájíhí da sahá ña cuni da jándacoo da ña já quéa sáhan ley Moisés ñamani jándacoo da ña — ñacachi na.

<sup>5</sup> Anda já ñacachi Jesús já xihín ná:

—Sáhan ley Moisés ñamani yóho nu ndo jáchí táhyí ndivaha ínima ndo. <sup>6</sup> Joo janda mé saha tá ñacavaha Ndióxi ñayivi nu cuítí já ñacavaha in túhún ta xihín in túhún ñaha. <sup>7</sup> Sahá ña cán quéa ndítahan nuú dataa jándacoo da tátá da xihín náná da já ndique táhan da xihín ñájíhí da. <sup>8</sup> Já xinu ndíví na cán cacuu na tátuhun in víxí yiquí cuñu na sahá ña cán quéa co cúu ga na ivi yiquí cuñu sahá ña ñanduu na tátuhun in túhún yiquí cuñu. <sup>9</sup> Sahá ña cán quéa co ndítahan nuú na cán janí táhan na ña najacátahan

Ndióxi tá ñatandaha ná — ñacachi Jesús xihín ná.

<sup>10</sup> Ta tá ñandicó coo tucu na vehe já ñacasáhá tucu na xica tuun xihín á cán ndaca tuhún na Jesús sahá ña ñacahan.

<sup>11</sup> Ta ñanducú ñehe Jesús tuhun nu ná já ñacachi a já:

—Tá ná jándacoo in dataa ñájíhí da ta tándaha dá xihín inga ñañaha já quéa cája da cuachi nu ñájíhí nuú da jáchí íin da xihín inga ñaha. <sup>12</sup> Ta tá ná jándacoo in ñañaha yí ña ta tándaha ña xihín inga da cája ri ña cán va cuachi nu yí ña jáchí íin ña xihín inga dataa — ñacachi Jesús.

*Cája yíi Jesús na valí*

(Mt. 19:13-15; Lc. 18:15-17)

<sup>13</sup> Anda já ñehe na java na valí ñacasaa na nu Jesús ña ná cani ndaa ndaha á na. Joo mé na xica tuun xihín á cán ñacasáhá na cája cuehe na xihín mé na ndaca na valí cán. <sup>14</sup> Tá ñaxini Jesús ña cája na já ñandicuehe a já cáhí a já xihín na xica tuun xihín á:

—Quiahva ndó ñamani ná quixi na valí nuú i ta a cájí nuu ndó nu ná jáchí cacomí Ndióxi cuénta sahá ñayivi tá ná caja na tá quiahva cája na valí yóho. <sup>15</sup> Mé a ndaa ná çahan i xihín ndo ndá na co cuni ndiquiahva na mé ná ndaha Ndióxi tátuhun cája na valí yóho já quéa a cúu cacomí Ndióxi cuénta saha ná — ñacachi a.

<sup>16</sup> Anda já ñacasáhá Jesús ñehe ndaa na valí ta chínuu a ndaha á jiní ná já cája yíi á na.

*Cáhan in da cuicá xihín Jesús*

(Mt. 19:16-30; Lc. 18:18-30)

17 Tá cuahan tucu Jesús íchi já xínu in dataa nacasaa da nasaxítí da nu á já cáhí da já xihín á:

—Maestro, mé ndó cúú ndó ta vaha ña cán quéa ndáca tuhún i ndohó ndíá ndítahan caja i já ná ñehe táhvi cuhun i indiví coo i anda ama cáa quívi —nacachi da.

18 Já nacachi Jesús já xihín dá:

—Ndá cuéntá quéa cáhún xihín i ña cúú u da vaha. Ni in tuhún toho ñayivi coo cúú ná na vaha ñuyivi yóho. In tuhún Ndióxi cuití va quéa vaha. 19 Sa xini vún ña sáhdá Ndióxi nuun cajún já cáhí a já: “Coto a cóun xihín ñájíhí á yí ñani táhún. Coto a cáhnún ndii. Coto a caja cuíhnún. Coto a cáhún ña tuhún sahá ñayivi. Coto a jándahvún ñayivi. Ta caja cáhnún tátún xihín nánún” —nacachi Jesús xihín dá.

20 Já nacachi da cán já:

—Maestro, janda tá nasacuu u ta loho nacasáhá i caja i tóco ndihi ña sáhdá Ndióxi caja i —nacachi da.

21 Nasandehé Jesús nu dá ta táhdá ini a saha dá já nacachi a já xihín dá:

—Inga ñaha cámaní cajún: Cuáhán jicún tóco ndihi ñahún jan ta ndacahndún jjuhún jan nuú na ndahví já ñehe táhvun coo cuahá ñahún indiví. Ta tá ndihi

já quisún candicún yehe —nacachi Jesús.

22 Joo tá naxini johó da cuicá cán ña nacachi Jesús ivi laá nacavitá ini da já naquee cuéha dá cuahan da jáchi in cuahá ndivaha ñaha da.

23 Anda já nacasáhá sándehe Jesús nuú na xíca tuun xihín a cán já nacachi a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná —nacachi a.

24 Chí nacatontó mé na xíca tuun xihín a cán saha tuhún nacahan joo nandicahan tucu Jesús já cáhí a já:

—Jahyi a, ndaja yáncá cáa saha in na cándéé ini jjuhún ndiquiahva na mé ná ndáha Ndióxi ña ná cacomí a cuéntá saha ná. 25 Jáchi janda cama chága cuu yaha in camello ini in yávi saha yitucú a juú ga ña ná ndiquiahva in da cuicá mé dá ndáha Ndióxi ña ná cacomí a cuéntá saha dá —nacachi Jesús.

26 Anda já nacatontó ndihi mé na xíca tuun xihín a cán tá naxini johó na ña yóho. Já nacasáhá ndáca tuhún táhan na já cáhí na já:

—Ndá na cúú na cuu cacu ndaa ínima, dá já —nacachi na.

27 Nandicoto nihni Jesús nu ná já cáhí a já xihín ná:

—Ni in na a cúu caja ña yóho joo Ndióxi quéa cuu caja ña jáchi ni in ñaha coo ihvi toho nu Ndióxi —nacachi a.

28 Anda já nacachi Pedro já xihín Jesús:

—Joo ndehe najándacoo ndihi nde ña ñasacomí nde ta ndíco nde ndohó —ñacachi da.

<sup>29</sup> Já nanducú ñehe Jesús tuhun nu ná já cáchi a já:

—Mé a ndaa ná cahan i xihin ndo ña ndá na jándacoo vehe na á ñani na á quiahva na á tátá na á náná na á ñájíhí na á jahyi na á ñundáhyi ná sahá yehe xihín sahá tuhun cahan i, <sup>30</sup> na cán cúu na ñehe cuaha chága ví ñaha ñuyíví yóho jatá ña najándacoo na tátuhun vehe na, ñani na, quiahva na, náná na, jahyi na, ñundáhyi ná viti vatí ná ndicuíta ñayivi caja xíxi na xihín ná. Joo ñehe táhvi ná catacu na anda ama cáa quivi xihín Ndióxi. <sup>31</sup> Ta ndúu cuahá na ín sahá ñuyíví yóho viti joo vaxi quivi cacuu na na coó saha nu Ndióxi. Ta ndúu cuahá na coó saha ñuyíví yóho viti joo vaxi quivi cacuu na na ín saha nu Ndióxi —ñacachi a.

*Cáxi tuhun tucu Jesús ña quivi a*

(Mt. 20:17-19; Lc. 18:31-34)

<sup>32</sup> Ta ndaja coo cuahan Jesús xihín na xíca tuun xihín á chí íchi ndáa cuahan chí Jerusalén. Cánuu Jesús cuahan xihín ná. Ta ñacatóntó na cán ta yíhvi na cuahan na xihín á. Anda já ñatavá xoo tucu a ndíhuxu ivi na xíca tuun xihín á já ñacasáhá cahan xihín ná ña ndoho a chága chí nuu. <sup>33</sup> Já ñacachi a já:

—Candehé ndo. Yóho ndáa í cuahan yo chí Jerusalén nuú ndiquiahva na yehe, da ñachindahá Ndióxi nduu ñayivi ndahá na sacuaha nuú jutu xihín nuú na jánaha ley Moisés. Na yóho cúu na cacu ini sahá ndaja quivi i. Anda já ndiquiahva na yehe ndahá na tóho. <sup>34</sup> Cuacu ndaa na yehe ta cani na yehe ta cuihna na tójií na nuú i ta já cahni na yehe. Joo tá ná yaha uní quivi nditacu tucu u —ñacachi Jesús xihín ná.

*Tá ñaxíca Jacobo xihín Juan ñamaní nu Jesús*  
(Mt. 20:20-28)

<sup>35</sup> Anda já ñacayati Jacobo xihín Juan, jahyi Zebedeo nu Jesús já ñacachi da já xihín á:

—Maestro, cúní nde caça nde in ñamaní nu ndo —ñacachi da.

<sup>36</sup> Já ñacachi Jesús já xihín dá:

—Ndía maní cúní ndó caja i xihín ndo —ñacachi a.

<sup>37</sup> Já ñacachi da cán já xihín á:

—Ña xíca nde nu ndo quéa ná quiahva ndó ñamaní nuú nde cacoo in in nde xoo jíin ndo. In nde coo xoo cuáha ta in nde coo xoo íti jíin mé ndó indiví nuú coo ndó cacomí ndó cuéntá sahá ñayivi —ñacachi da.

<sup>38</sup> Anda já ñacachi Jesús já xihín dá:

—Co cándaq ini ndó ña xíca ndó nuú i. A cuu ndoho ini ndó tá quiahva ndítahan nuú i ndoho ini i. Jáchí ña vaxi nuú i ndoho ini i cúu á tátuhun coho i in yáxi ndutá ova. A



íin tiahv̄a ndó ndoho ini ndó tá quiahva nditahan nuú i ndoho ini i anda quiahva ná quivi i —n̄acachi a.

<sup>39</sup> Já n̄acachi da cán já:

—Cuu caja nde ña.

Já n̄acachi Jesús já xih̄in dá:

—Mé a ndaa tandaa quivi coho ndó ña ova ñúhu ini yáxi, mé ña coho i. Ta tandaa quivi ndoho ndivaha ini ndó tá quiahva ndoho ini i anda quiahva ná quivi i.

<sup>40</sup> Joo sahá ña cacoo in ndó xoo cuáha i ta in ndó xoo íti i a juú nuú i quiahva i ña nu ndo. Jáchi sa n̄andicaxi Ndióxi na ñehe táhvi cacoo cán —n̄acachi Jesús xih̄in dá.

<sup>41</sup> Tá n̄axini joh̄o uxu chága na xíca tuun xih̄in Jesús cán ña yóho já n̄acasáhá xójo ini na xih̄in Jacobo xih̄in Juan viti. <sup>42</sup> Joo n̄acana Jesús na já n̄acachi a já xih̄in ná:

—Sa xini ndó ndaja cája na sáhdá chuun nuú ñayivi ndúu ñuyiví yóho. Ña cája na queá jácandíhi na ñayivi ta cája na tá quiahva cúni mé ná.

<sup>43</sup> Joo co ndítahan coo ña cán tañu mé ndó jáchi ndá da cúni cacuu da cáhnu chága tañu ndó xini ñúhú cacuu da in da cája ndíví nuú ndihi ndó.

<sup>44</sup> Ta ndá da cúni cacuu ta nu cuítí tañu ndóhó ndítahan cacuu da da cája ndíví nu ndihi ndó. <sup>45</sup> Jáchi ni yehe, da n̄achindahá Ndióxi nduu ñayivi coo n̄aquixi i ñuyiví yóho ña ná caja ndíví ñayivi nuú i.

Ña n̄aquixi i caja i queá caja ndíví i nu ná ta ndiquiahva i mí i quivi i já ná cuu cacu ndaa ínimá cuahá

ñayivi ná a cúhun na indayá —n̄acachi a.

*Tá n̄andaja vaha Jesús in da cuaá naní Bartimeo*

(Mt. 20:29-34; Lc. 18:35-43)

<sup>46</sup> Anda já n̄axinu na ñuu Jericó. Ta tá sa naqueta tucu Jesús cuahan jatá ñuu cán xih̄in na xíca tuun xih̄in á xih̄in cuahá ga ñayivi ta mé yuhú íchi cán íin coo in da cuaá naní Bartimeo, jahyi Timeo sáti da. <sup>47</sup> Ta tá n̄axini joh̄o da ña cáyati Jesús, da ñuu Nazaret vaxi da já n̄acasáhá mé da cuaá cán cáyuhú cóho da já cáchi da já:

—Jesús, da n̄aquixi ch̄ichi David caja ndó ñamaní candáhvi loho ini ndó yehe —n̄acachi da.

<sup>48</sup> Joo n̄acasáhá cuahá ñayivi cája cuehe na xih̄in dá ña ná caji da yúhu dá. Joo ví ga ví cáyuhú da já cáchi da já:

—Ndóhó, da n̄aquixi ch̄ichi David caja ndó ñamaní candáhvi loho ini ndó yehe —n̄acachi da.

<sup>49</sup> Anda já n̄andaca ndichi Jesús já n̄acachi a já:

—Cana ndó da ná quixi da.

Já n̄acana na da cuaá cán já cáchi na já xih̄in dá:

—A ndícani inún. Candichi jáchi cána Jesús yohó —n̄acachi na.

<sup>50</sup> Anda já najácana da cotó ndeé da ta n̄andaca ndichi da já nasaa da nu íin Jesús.

<sup>51</sup> Anda já n̄andaca tuhún Jesús da já cáchi a já xih̄in dá:

—Ndía cúhun ná caja i xuhun.

Já naçachi mé da cuaá cán já:

—Candehé e cúni, xitoho.

<sup>52</sup> Já naçachi Jesús já xihin dá:

—Cuu nuhu vún viti. Sa nandivahun jáchi naçandee inún yehe —naçachi a.

Chí ivi laá nandaca ndehé da cuaá cán. Já nandico da Jesús ichi cán cuahan da.

## 11

*Ndihvi Jesús ñuu Jerusalén*  
(Mt. 21:1-11; Lc. 19:28-40;  
Jn. 12:12-19)

<sup>1</sup> Tá naxinu na yati ñuu Jerusalén jijn ñuu Betfagé xihin ñuu Betania ña ndique táhan nuu xihin yucu yitó Olivo já nasahnda Jesús chuun nuú ivi da xica tuun xihin á. <sup>2</sup> Já cáchi a já xihin dá:

—Cuahán ndo ñuu loho ndacaan yati jan. Tá ná xinu coo ndó jan ndiñehe ndó in búrró ndico ndaa, rí cámani yii ndaa na. Ndaxí ndó rí ta cañehe ndó rí quixi ndó.

<sup>3</sup> Ta ndá na ná ndaca tuhún ndohó saha rí já quea cachi ndó xihin ná ña xini ñuhú xitoho ndó rí viti joo tá ná ndihi chuun rí já ndixi tucu rí, já cachi ndó xihin ná —naçachi Jesús xihin da.

<sup>4</sup> Ta naquee da cán cuahan da já nandiñehe dá mé búrró cán ndico ndaa rí jijn yéhe yuhú ichi já nandaxí da rí.

<sup>5</sup> Ta ndaja coo java na ndúu cán naçasahá cáchi na já:

—Ndía cája ndó. Ndávaha ndaxí ndo búrró jana nde jan —naçachi na.

<sup>6</sup> Anda já nanducú ñehe mé da xica tuun xihin Jesús cán tuhun nu ná ta naçachi da tá quiahva naçachi Jesús xihin dá. Anda já nañehe dá ñamaní cañehe da rí cuhun da. <sup>7</sup> Tá nandihí já ñehe da búrró cán naçasaa da nu Jesús já naçojó da cotó ndée da jata rí já nandaa Jesús jata rí. <sup>8</sup> Ta cuahá ñayivi naçasahá na chinduu na cotó ndée na ichi ta java na naçasahá na sáhdá na ndáha yitó já chinduu na do ichi. <sup>9</sup> Ta na cuahan chí nuu ta jari na vaxi chí jata naçasahá na cáyuhú na já cáchi na já:

—Cája cáhnu í Ndióxi. Ndicáhnu nahá ná cacuu da cómi cuéntá saha yo jáchi cúu dá da vaxi yuhú nuu Ndióxi. <sup>10</sup> Cáhnu ná coo quiví tá casahá Ndióxi cacomí a cuéntá saha yo. Tá quiahva nasacomí David, tátá yo cuéntá sahá ñayivi sanahá quiahva já cacomí mé á cuéntá saha yo. Cáhnu ná cacuu Ndióxi —cáchi ñayivi.

<sup>11</sup> Anda já nandihvi Jesús ñuu Jerusalén ta já naxinu a veñuhu cáhnu cán. Ta tá nandihí nasandehé ndihi a níi xoo cán já naquee a cuahan chí ñuu Betania xihin ndihuxu ivi na xica tuun xihin á jáchi sa nahini ta cuahan cuaá va.

*Tá nachicaan Jesús cháhan jata titó ñuhú*

(Mt. 21:18-19)

<sup>12</sup> Tá naquee na Betania inga quiví itaan já naçasahá cuico Jesús cuahan. <sup>13</sup> Tá naxini xicá a in titó ñuhú vaha dó ndoco ndáha.

Naſahañ Jesús sándehe á á in cuihi nu do joo co rí ná ñehe a. Ndáha uun va dó cán in jáchi a juú tiempo coo rí cán queá. <sup>14</sup> Anda já naçahan Jesús xihín titó ñuhú cán já cáchi a já xihín do:

—Ni in ga na a cáxi ga cuihi nu yóhó —cáchi a xihín do.

Ta naçini joho na xíca tuun xihín á cán tuhun yóho.

*Tá naçaxí Jesús na ndúu jícó ñaha yéhe veñuhu*

(Mt. 21:12-17; Lc. 19:45-48; Jn. 2:13-22)

<sup>15</sup> Tá nandihí já naçinu na Jerusalén. Ta tá nandihví Jesús veñuhu cáhnu cán já naçasáhá táxi a na ndúu jícó cán xihín na ndúu xéen viti. Ta naçicó ñehe a mesa na ndúu ndíjama jiuñun ñayivi ta naçicó ñehe a táyi sácoo na ndúu jícó ndíjata. <sup>16</sup> Ta chí coó naſahañ ñamaní nuú ñayivi cañehe na ñaha ndihví na veñuhu. <sup>17</sup> Anda já naçasáhá jánaħa nu ná já cáchi a já xihín ná:

—Já cáchi tuhun Ndióxi: “Vehe mí i cacuu a vehe nuú quixi na caça taħví na nuú i saħa tóco ndihí ñayivi ñuyívi”, cáchi tuhun Ndióxi. Joo ndóhó nandai cuu ndó yóho caja cuihná ndo nuú ñayivi —naçachi Jesús xihín ná.

<sup>18</sup> Tá mé na sacuaħa nuú juṭu cán xihín na jánaħa ley Moisés naçini joho na ña yóho já naçasáhá na ndúcu na ndá quiaħva cañní na a jáchi yíhví ñahá na saħa ña cátoñtó ndihí ñayivi xihín ña jánaħa mé á nu ná. <sup>19</sup> Joo tá naçuaá já naçuee

Jesús ñuu cuahañ xihín na xíca tuun xihín á.

*Tá naħichí titó ñuhú, dó coó cuihi nuu*

(Mt. 21:20-22)

<sup>20</sup> Ta naha chá inga quivi itaan nayaha na nu cándichi mé titó ñuhú cán já naçini na ña naħichí do janda yóho do naħichí. <sup>21</sup> Anda já nandicuħun ini Pedro saħa mé titó ñuhú já cáchi da já xihín Jesús:

—Maestro, candehe ndó titó ñuhú, dó naçahan cuehe ndó xihín. Sa naħichí dó viti —naçachi da.

<sup>22</sup> Já naçachi Jesús já xihín dá:

—Candé ini ndó Ndióxi. <sup>23</sup> Jáchi mé a ndaa ná caħan i xihín ndo ña tá ná cachi ndó xihín yucu yóho: “Caxoo ta cuáhán jáquetún mún ini tañuhú”, ta tá co cáhvi ivi joho ini ndó ta tá candúsa ndó coo tá ín cáchi ndó ta chí já ndusa coo. <sup>24</sup> Saħa ña cán queá cáchi i xihín ndo ña tóco ndihí ñaha xíca taħví ndó nu Ndióxi ta tá cándúsa ndó ña sa nañehe ndó a já queá ñehe ndusa ndó a.

<sup>25</sup> Ta tá ndúu ndó xíca taħví ndo nu Ndióxi xíní ñuhú caja cáhnu ini ndó saħa ndá na xójo ini ndó xihín já ná caja cáhnu ri ini Ndióxi, tátá ndo ña ín indivi saħa cuachi ndó. <sup>26</sup> Joo tá co cája cáhnu ini ndó saħa ñayivi já queá ni Ndióxi, tátá ndo ña ín indivi a cája cáhnu ini a saħa cuachi ndó —naçachi a.

*Tá nandacá tuhún na Jesús ña ndáchí quíxi ndéé á ña cája cuahá nuú ñaha*

(Mt. 21:23-27; Lc. 20:1-8)

27 Anda já nandicó coo tucu na ñuu Jerusalén. Ta tá xíca Jesús chí veñuhu cáhnu cán já nacayati na sacuahá nuú jutú xihín na jánaḥa ley Moisés xihín na sacuahá veñuhu nu á. 28 Já nandacá tuhún na Jesús já cáchí na já xihín á:

—Yo já sáhan ñamaní nuun cajún ña cájún yóho —nacachi na.

29 Já nacachi Jesús já xihín ná:

—Ná ndaca tuhún ri yehe va ndohó ta tá ná nducú ñehe ndó tuhun nuú i anda já caxi tuhun i nu ndo yo já nasahan ñamaní nuú i caja i ña cája i yóho. 30 Cachi ndó xihín i yo já nachindahá Juan ña ná quixi da caja ndúta da ñayivi. Á Ndióxi nachindahá da, á ñayivi nachindahá ñahá. Nducú ñehe quí ndó tuhun nuú i viti —nacachi Jesús xihín ná.

31 Anda já nacasáhá ndítuhún xihín táhan na cán já cáchí na já:

—Tá ná cachí ña Ndióxi quéa nachindahá Juan ta já nducú nehe Jesús tuhun nu yo já cachi da xoho: “Ndá cuénta quéa coo naxeen ndó candúsa ndó da, dá já”, cachi Jesús xoho. 32 Ta tá ná cachí: “Ñayivi cúu na nachindahá Juan”, já ndicuíta ñayivi xihín yo —nacachi na ndítuhún xihín táhan na.

Já cáchí na jáchí yíhví na ñayivi jáchí tóco ndihi ñayivi nacahán na saḥa Juan ña cúu dá da nachindahá Ndióxi jáyaha da tuhun cáhan mé á nuú ñayivi. 33 Sahá ña cán quéa nacachi na já xihín Jesús:

—Coo xini toho nde yo nachindahá Juan.

Anda já nacachi a já xihín ná:

—Ta ni yehe a cáxi tuhun i nu ndo yo já nasahan ndéé nuú i caja i ña yóho —nacachi a.

## 12

*Sácú Jesús quiahva saḥa java mozo, da nacaja quini xihín xitoho*

(Mt. 21:33-46; Lc. 20:9-19)

1 Anda já nacasáhá Jesús sácú a quiahva nuú ñayivi já nacachi a já xihín ná:

—Nasahin in dataa najándeé cuaha dá tó uva nu ñúhu dá ta já nasacu da in corra yító nu do. Ta nacavaḥa da in nuú cunni mé uva cán ña cavaḥa vino. Ta nacavaḥa da in nu jíco canúu da já cuu candaa da tóco ndihi dó cán.

Tá nandihí já nasahan ndojó da ñúhu dá nuú java na caja chúun na ña já naquee da cuahan xíca da. 2 Ta tá naxinu tiempo jáquee na já nachindahá da in mozo da nuú na cája chúun ñúhu da cán ña ná ndiquiahva na ña cáni nu dá ndiquehe da saḥa ñúhu da ña nasahan ndojó da nuú na cán. 3 Joo mé na cája chúun tóo ñúhu cán natiin na mozo da cán já nacani na

da. Tá nandihí já nanducú ñehe na da nuú xitoho da joo coó ñaha ná sahan na nu dá. <sup>4</sup> Anda já nachindahá tucu mé da xihín ñaha ñúhu cán inga mozo. Joo da yóho ñacaja xíxi tucu na xihín dá jáchi ñacani na da xihín yuu. Ta najándicuehe na jiní dá já ñacasáhá cáñahá na xihín dá. <sup>5</sup> Ta mé da xihín ñaha ñúhu cán nachindahá tucu da inga mozo da ta ñasahní na da. Ta nachindahá cuahá ga da mozo da ñasahan cán. Ta java da ñacani na ta java da ñasahní na.

<sup>6</sup> 'Ñacandoo in túhún jahyi mé da xihín ñaha ñúhu cán ta quíhvi ndivaaha ini da jahyi da. Joo tá nu ndihí já nachindahá da jahyi da jáchi cáhán da: "Cája i cuéntá coo toní ñúhú na xihín jahyí i", ñacahán da. <sup>7</sup> Joo mé na cája chúun ñúhu cán ñacasáhá ndítúhún xihín táhan na já cáhí na já: "Candehé ndo. Yóho vaxi da cúu jahyi xitoho í. Ta tá ná xinú quívi quívi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mí", ñacachi xihín táhan na cán. <sup>8</sup> Anda já ñatiin na da cán ta ñasahní na da já najácana na yiquí cuñu da jata cútu cán — ñacachi Jesús.

<sup>9</sup> Anda já ñandaca tuhún Jesús ñayivi ndúu cán já cáhí a já:

—Á co xini ndó ndía caja da xihín ñaha ñúhu yóho viti. Ña caja da queá quixi da ta cahní ndihí da na cája chúun too nu

ñúhu dá. Já ndiquiahva da ñúhu dá nuú java ga na já ná caja chúun na nu á.

<sup>10</sup> 'Á co xini ndó ña cáhí tuhún Ndióxi. Ña cáhí a queá:

Mé yuu ña najácana da cávaha vehe,

ñá cán cúu ña ñanduu yuu ndúhu sahá vehe ña ín chága saha.

<sup>11</sup> Ña yóho queá ñacaja Ndióxi ta cúu á in ñaha cáhnu ndivaaha nu yo, cáhí tuhún Ndióxi — ñacachi Jesús.

<sup>12</sup> Anda já ñacasáhá ndúcú na sacuaaha tiin na Jesús chicaan na a vecaa jáchi ñacandaa ini na ña saha mé ná ñasacu a quiahva yóho. Joo sahá ña yíhvi na ñayivi najándacoo na a ta ñaquee na cuahan na.

*Ndáca tuhún na Jesús á ndítahan nu ná chahvi na jihún cuéntá impuesto*

(Mt. 22:15-22; Lc. 20:20-26)

<sup>13</sup> Tá nandihí já nachindahá na java na fariseo xihín na cúu cuéntá Herodes nu Jesús ña ná coto ndojó ñahá na xihín tuhún cáhan mé á já ná chicaan na cuachi jata. <sup>14</sup> Anda já ñaxinu na nu Jesús já cáhí na já xihín á:

—Maestro, xini nde ña ndinuhu ña ndaa cáhan mé ndó. Ta co quehe ndó cuéntá tá cáhan núu ñayivi saha ndo. Ta cándaa ini nde ña tá cáhan ndó sahá in ñaha cája ñayivi cúu á sahá ña sándehe ndó janda ínima ná. Ta cándaa ini nde ña jánaha ndó ña ndaa saha íchi cuéntá Ndióxi. Ta

viti cúni nde ndaça tuhún nde ndohó á ndítahan nuú nde chahvi nde jjuhún cuéntá impuesto nuú da cómi cuéntá saha yo ñuu Roma. Á chahvi nde ña, á a chahvi toho nde ña —nacachi na.

<sup>15</sup> Joo sa nacandaa ini Jesús ña co cúu ná tá quiahva ndáa na ña cán quéa nacachi a já xihín ná:

—Cánda cáxi táhyí ini i ña cúni ndó coto ndojó cuití ndó yehe. Jánaha ndó in táhan jjuhún jan nuú i ná candehé e ña —nacachi a.

<sup>16</sup> Já nasahan na mé jjuhún cán nu á ta tá naxini a ña já nacachi a já xihín ná:

—Yo nahná ta yo quivi quéa ndáa nu á.

Já nacachi na cán já xihín á:

—Ñehe a quivi xihín nahná da cómi cuéntá saha yó ñuu Roma —nacachi na xihín á.

<sup>17</sup> Anda já nacachi Jesús já xihín ná:

—Ndiquiahva ndó ñaha da cómi cuéntá saha ndó ñuu Roma jan nu dá. Ta ndiquiahva ndó nu Ndióxi ña cúu ñaha mé á —nacachi a.

Chí nacatontó mé na cán sahá ña nacachi Jesús xihín ná.

*Ndáca tuhún na saduceo Jesús á mé a ndaa nditacu ndii (Mt. 22:23-33; Lc. 20:27-40)*

<sup>18</sup> Anda já nasahan java na saduceo cahan na xihín Jesús. Ta mé na saduceo yóho co cándusa na ña ndítacu tucu na sa naxihi. Sahá ña cán quéa nandaca tuhún na Jesús já cáchi na já xihín á:

<sup>19</sup> —Maestro, nu ley nacañhi Moisés sanahá natandaha chuun ta cáchi a já: “Tá tándaha in dataa xihín ñájíhi da ta tá coo jahyi ña cácu xihín dá ta tá ná xinu quivi quivi da cán já quéa cáchi ley Moisés ña ndítahan tandaha tucu ñájíhi da xihín da cúu ñani mé ndii cán já ná coo jahyi da cán xihín yuhú nuú ñani da”, já cáchi ley Moisés. <sup>20</sup> Ta viti cuni joho ndó ná cacu nde in quiahva nu ndó. Nasahin usa ñani ta da nu cuití natandaha dá xihín in ñañáha. Tá nandihí naxihi da joo coo jahyi da ná cacu xihín ña cán. <sup>21</sup> Ta natandaha ñani da, da chí ivi xihín ña cuáan cán. Ta já naxihi ri da cán va ta ni da yóho coo nacacu jahyi xihín ñájíhi ñani. Ta quiahva já nandoho ri ñani da, da chí uni. <sup>22</sup> Anda quiahva naxinu ndihusa da natandaha xihín ña ta ni in da coo nacacu jahyi xihín ña. Tá nu ndihí naxihi ri mé va ña. <sup>23</sup> Ta viti ndáca tuhún nde ndohó ndá da cacuu ndusa yí ña cán tá ná xinu quivi nditacu tucu ndii jáchi ndihusa va ñani da cán natandaha xihín ña —nacachi na.

<sup>24</sup> Anda já nanducú ñehe Jesús tuhun nu ná já cáchi a já xihín ná:

—A váha toho cáhvi ini ndó jáchi co xini ndó ndaja cahan tuhun Ndióxi ta ni co xini ndó ndá quiahva cáhnu cúu ndée Ndióxi. <sup>25</sup> Jáchi tá ná nditacu tucu ndii a tandaha ga na ta ni a quiahva na jahyi

jíhí nā tandaha ná. Cacuu na tátuhun táto Ndióxi ndúu indivi ta co tandahá nā cán. <sup>26</sup> Joo sa xini yo ña nditacu tucu ndii. Á a ñaha cahvi ndó ña ñacahyi Moisés sahá ña ñacahan Ndióxi xihin dá tañu tohíñú, dó cándaha ñúhu cán. Já ñacachi a já xihin dá: “Yehe cúu Ndióxi cája cáhnu Abraham ta yehe cúu Ndióxi cája cáhnu Isaac ta yehe cúu Ndióxi cája cáhnu Jacob”, ñacachi a. <sup>27</sup> Ta ña yóho cúní cachi a ña tácu yí va Abraham xihín Isaac xihín Jacob vatí sa ñaxihí yiquí cuñu na. Sahá ña cán quea co xini ndó ndá saha cahan ndo —ñacachi a.

*Tá cahan Jesús ndia cúu ña cáhnu chága sáhdá Ndióxi caja í*

*(Mt. 22:34-40)*

<sup>28</sup> Ta ndaja coo in da jánaha ley Moisés ñacayati da nu Jesús jáchi sa ñaxini johó da ña ñacahan Jesús xihín nā ndúu cán. Sahá ña xini da ña ñanducú ñehe ndaa Jesús tuhun nuú nā cán sahá ña cán quea ñandaca tuhún da Jesús já cáhí da já xihin á:

—Ndia cúu ña cáhnu chága sáhdá Ndióxi caja í — ñacachi da.

<sup>29</sup> Já ñacachi Jesús já xihin dá:

—Ña cáhnu chága cúu ña cáhí tuhun Ndióxi yóho: “Taa johó ndó, nā Israel. Ín in tuhún jini Ndióxi ta mé á cúu xitoho í. <sup>30</sup> Ta ndítahan quihvi ini ndó mé Ndióxi, xitoho ndó xihin tóco ndihi ínimā ndo ta xihin ndinuhu ini ndó. Ta

quihvi ini ndó a xihin tóco ndihi xini túni ndo ta xihin tóco ndihi ndée ndo.” Ña yóho cúu ña nu cuítí sáhdá Ndióxi caja ndó. <sup>31</sup> Tá cúní coo ña nu cuítí já cúní coo ri ña chí ivi va ta cáhí a: “Quihvi ini ndó ñani táhan ndó tá quiahva quihvi ini ndó mé ndó.” Coó ga inga ña sáhdá Ndióxi caja ndó cacuu ña cáhnu chága nuú ña yóho —ñacachi a.

<sup>32</sup> Anda já ñacachi mé da jánaha ley Moisés cán xihín Jesús:

—Vaha chá ñacahan ndó, Maestro. Mé a ndaa quea ñacahan ndo ña ín in tálaá cuítí Ndióxi ta coó inga ga Ndióxi. <sup>33</sup> Ta ndítahan quihvi ini mé á xihin tóco ndihi ínimā yo ta xihin ndinuhu ini ta xihin tóco ndihi xini túni yo ta xihin tóco ndihi ndée yo. Ta ndítahan quihvi ini ñani táhan í tá quiahva quihvi ini mí. Ndiyahvi chága ña yóho a juú ga tóco ndihi ñaha jóco nā nu Ndióxi ta ndiyahvi chága ña a juú ga ñaha chícaan ñúhu ná nu náa —ñacachi da.

<sup>34</sup> Tá ñaxini Jesús ña ñanducú ñehe vaha da cán tuhun nu á já cáhí a já xihin dá:

—Jalóho cúní ña cacomí Ndióxi cuéntá sahun — ñacachi Jesús.

Tá ñandihí cán ni in ga nā coó ñacahan ndée ini na ndaca tuhún ga nā mé á.

*Ndaca tuhún nā Jesús ndáchí ñaquixi a*

*(Mt. 22:41-46; Lc. 20:41-44)*

35 Ndácaan Jesús veñuhu cáhnu jánaḥa nuú ñayivi já cáchí a já xihín ná:

—Ndávaḥa cáchí na jánaḥa ley Moisés ña vaxi Cristo chichi David. 36 Ta sa mé David tá nachutú ndaa ini da xihín ínimá yijí Ndióxi já nacachi da já:

Já nacachi Ndióxi xihín xitoho i:

“Cacoo xoo cuáha i yóho, anda quiahva ná caja i ña ná cacomún cuéntá sahá na co cúní yohó”, nacachi Ndióxi sanahá.

37 Ndávaḥa cáchí na ña vaxi Cristo chichi David joo mé tiempo cán nacachi David ña cúu á xitoho da —nacachi Jesús.

Ta cuaha ndivaḥa ñayivi cájijí íní na táa johó na nu caḥan Jesús.

*Chicaan Jesús cuachi jatá na jánaḥa ley Moisés*

(Mt. 23:1-36; Lc. 11:37-54; 20:45-47)

38 Tá jánaḥa Jesús na já cáchí a já xihín ná:

—Cuéntá coo ndó xihín na jánaḥa ley Moisés jáchí cátóo na cándixi na jáhma nání caca nuu na. Ta cátóo na caḥan toní ñuhú ndivaḥa ñayivi xihín ná tá xíca nuu na nuú yahvi. 39 Ta tá cuahaḥan na veñuhu cátóo na cacoo na nu sácoo na íin chága saḥa. Ta tá cuahaḥan na víco nuú vaḥa cátóo na coo na. Cuéntá coo ndó xihín na yóho. 40 Jáchí cándaa na vehe najihí cuaan ta tá nandihí cuahá ndivaḥa xíca ṭahví na nu Ndióxi jáchí

cúní na jájahvi na nuú ña núu cája na. Mé a ndaa ná caḥan i xihín ndo ña mé na jánaḥa ley Moisés yóho cacuu na na ndoho chága ini caja Ndióxi —cáchí Jesús.

*Ña najoco in ña cuaan ndáhví*

(Lc. 21:1-4)

41 In tañu íin coo Jesús ini veñuhu cáhnu cán yati nu íin saṭo nu táan na jiuḥún jóco na nu Ndióxi. Ta sándeḥé a ndá quiahva táan ñayivi jiuḥún ini mé saṭo cán. Ta naxini a cuahá ṭaa cuicá xínu coo táan cuahá na jiuḥún ini mé saṭo cán. 42 Ta mé já naxinu coo in ña cuaan ndáhví ta naṭaán ña ivi jiuḥún ña núu yahvi ini mé saṭo cán. 43 Já nacana Jesús na xíca tuun xihín á ta já cáchí a já xihín ná:

—Mé a ndaa ná caḥan i xihín ndo ña cuaha chága jiuḥún naṣahaḥan ña cuaan ndáhví yóho a juú ga tóco ndihi java ga na cán. 44 Jáchí tóco ndihi na cán naṣahaḥan na ña yójó nu ná joo ña cuaan ndáhví yóho naṣahaḥan ña nu Ndióxi tóco ndihi ña cómí ña catacu ña —nacachi a xihín ná.

## 13

*Cáxi tuhun Jesús nu ná ña vaxi quivi ndihi sahá veñuhu cáhnu ñuu Jerusalén*

(Mt. 24:1-2; Lc. 21:5-6)

1 Tá naquee Jesús veñuhu cáhnu cán já nacachi in da xíca tuun xihín a cán já:

—Maestro, candehé ndó ndaja náhnu yuu nacavaḥa na veñuhu yóho ta ndaja jíco



ndivaha naçavaha na ña —  
naçachi da.

<sup>2</sup> Anda já naçachi Jesús já  
xihín dá:

—Mé a ndaa náhnu a joo  
ndá chuun cúú á jáchi ni  
janda in yuu yóho a cándoo  
jatá inga yuu jáchi vaxi quivi  
tá nditaní ndihi ña yóho —  
naçachi a.

*Ndícani Jesús ña coo tá ná  
cayati quivi ndihi saha ñuyiví  
(Mt. 24:3-28; Lc. 21:7-24;  
17:22-24)*

<sup>3</sup> Anda já nasahan na cán  
yúcu yíto Olivo, ña xito ndaa  
táhan xihín veñuhu cáhnu cán.  
Ta tá íin coo Jesús cán já  
naxinu Pedro xihín Jacobo  
xihín Juan xihín Andrés já  
naçahan jehé na xihín á já  
cáchi na já:

<sup>4</sup> —Cúni nde ña ná çaxi  
tuhun ndó xihín nde ndá ama  
coo tóco ndihi ña yóho. Ta  
ndaja coo tá sa naçayati mé  
quivi cán —naçachi na.

<sup>5</sup> Já naçachi Jesús já xihín  
ná:

—Cuéntá coo ndó ta a  
quiahva ndó ñamaní jándahvi  
ni in ñayivi ndohó. <sup>6</sup> Jáchi  
cuahá ndivaha na quixi na  
cuéntá mí í ta çahan na ña  
tuhún tá cachi na já xihín  
ndó: “Yehe cúú Cristo, da  
nachindahá Ndióxi cacomí  
cuéntá sahá ñayivi.” Ta xihín  
ña yóho cuahá ndivaha ñayivi  
jándahvi na.

<sup>7</sup> Joo tá naçasahá xini johu  
ndó ña yóho cáa cúu tondóhó,  
a cáyihví toho ndó jáchi  
quiahva já ndítahan coo. Joo  
cámaní yíi xinu coo quivi nu  
ndíhí. <sup>8</sup> Jáchi ñayivi ndúu in

nación ndicuítá na caní táhan  
na xihín na ndúu inga nación  
ta caní táhan na in ñuu xihín  
na inga ñuu. Ta quixi nditáán  
ndijáá nu ndúu ñayivi já xinu  
tamá ndeé ta já casahá na  
ndivaa na. Ta tóco ndihi ña  
yóho cúú á tá çava sahá sahá  
ña núu vaxi nuú ñayivi jáchi  
cámaní xinu coo chága nuú  
ndoho ini na.

<sup>9</sup> Joo candaa vaha ndó  
mé ndó jáchi ndiquiahva  
na ndohó ndahá na cómí  
chuun ta caní na ndohó ini  
veñuhu. Ta sahá yehe cañehe  
na ndohó nuú na cómí cuéntá  
sahá ñayivi xihín nuú na cúu  
jutixia ta já cuu çahan ndó  
sahá í nuú na cán. <sup>10</sup> Joo jihna  
ñúhú xini ñúhú ndicuítá nuu  
tuhun vaha saha mí í nu tóco  
ndihi ñayivi anda jáví ndihi  
saha ñuyiví yóho. <sup>11</sup> Ta tá ná  
cañehe na ndohó çahun ndó  
nuú na jutixia, a ndícani ini  
ndó sahá ndá tuhun çahan  
ndó xihín ná. Mé hora já  
çahan ndó ña quiahva Ndióxi  
nu ndó çahan ndo. Jáchi  
a juú jini mé ndó quixi ña  
çahan ndo. Ínima yíi Ndióxi  
cacuu ña quiahva tóco ndihi  
ña çahan ndo. <sup>12</sup> Ta java taa  
jicó túhún da ñani da ta java  
da jicó túhún da jahyi da ña  
ná cahní ñahá na. Ta cuaha  
ná ndicuítá na caní táhan na  
xihín tátá na ta cahní ñahá  
na. <sup>13</sup> Ta ndaja táhan ñayivi  
ndúu ñuyiví yóho candají na  
ndohó sahá yehe. Joo ndá  
na ná candico tuun íchi mí í  
janda ná xinu quivi quivi na,  
na jan cacuu na çacu ndaa  
ínima.

14 'Na cáhvi tutu ná candaá ini na ña cáhan. Daniel cúu da naçahyí sanahá sahá in ña quini ña játivi ñahá. Tá ná cuni ndó ña cándichi in a nuú cõ ndítahan coo a já ndítahan nuú na ndúu estado Judea cunu na cuhun na chí yúcu. 15 Ta ndá na cánúu jini véhe mé quivi já cõ ndítahan nuu na tavá na ñaha vehe na. 16 Ta ndá na ndúu yúcu cõ ndítahan ndicó coo na vehe na ndiquehe na jáhma ná. 17 Ndáhvi najihí, mé na ñúhu jahyi mé quivi já. Ta ndáhvi na ñéhe ndaa na valí táhan ña chíchi yji. 18 Caça tahvi ndõ nu Ndióxi ña ná a cácuu a tiempo vixi tá ná cunu ndó cuhun ndõ já ná a ndóho chága ini ndó. 19 Jáchi quivi ndoho ndivaha ini ndó cacuu a cán. Jáchi janda tá naçava sahá saha ñuyivi coo nandoho ini na tá quiahva ndoho ini na mé quivi jan. Ta tá ná yaha ña jan, a ndicó coo ga ña ndoho ini na quiahva já. 20 Ta tá ná a ndája cuítí Ndióxi tiempo yóho ni in ñayivi a cúu çacu ndaa. Joo nasacu ini a ndaja cuítí a mé tiempo yóho jáchi quihvi ini a tóco ndihi na naçaxi mé á.

21 "Ta tá ná cachi in na xihin ndó: "Candehé ndõ, yóho íin Cristo, da nachindahá Ndióxi cacomí cuéntá sahá ñayivi", á tá ná cachi na: "Candehé ndõ, cáa íin da", cachi na já quéa a cándúsa toho ndó na. 22 Jáchi quixi cuahá na jándahvi ndohó ta ndaja na mé ná tátuhun Cristo. Joo a juú Cristo cúu ná. Ta quixi

cuahá ná ta cachi na çahan na cuéntá Ndióxi ta jári caja na cuahá nuú ña náhnu xihin ña xituhún ña ná jándahvi na ñayivi. Ta anda na sa naçaxi Ndióxi jándahvi na tá ná cuu caja na ña. 23 Xini ñuhú candehé vaha ndó mé ndó jáchi sa naçaxi tuhun yachi ndihi i ña yóho xihin ndõ — naçaxi Jesús.

*Ndaja coo tá ná xinu coo quivi quixi tucu Jesús*

(Mt. 24:29-35,42,44; Lc. 21:25-36)

24 Já cáchi tucu Jesús já:

—Joo tá sa nayaha tóco ndihi ña nandoho ini ñayivi já canaa nuú candii ta a ndíyehé ga yoo. 25 Anda indivi quee quimi cuyu rí nu ñúhu ta quiji nuu indivi ña naçavaha Ndióxi. 26 Anda já cuni na yehé quixi i tañu vico xihin tóco ndihi ndéé cáhnu i, da nachindahá Ndióxi nduu ñayivi. Ta cuni na ndá quiahva cáhnu cúu yehé. 27 Ta tá nandihí já chindahá i tátõ mí i ña ná jánditaca na na sa naçaxi i tañu tóco ndihi ñuu janda níí cúu sahá ñuyivi ta janda níí cúu sahá indivi.

28 'Catiahva ndó ña cúni cachi mé quiahva sácú u nu ndó sahá titó ñuhú. Tá yúta ndáha dó cán ta vaxi núma valí do já candaá ini ndó ña vaxi tiempo ihní. 29 Ta quiahva já cacuu ña yóho tá ná cuni ndó yaha tóco ndihi ña yóho. Jáchi anda jáví candaá ini ndó ña naçayati tiempo quixi tucu yehé ñuyivi yóho. 30 Mé a ndaa ná çahan i xihin ndó

## 14

ñā yaha tá yaha tóco ndihi ñā  
 ñacachi i xihin ndo ta anda  
 jávi quivi nā ndúu tiempo viti.  
<sup>31</sup> Ta ndihi sahá indivi xihin  
 ñuyivi joo a ndihi toho sahá  
 tuhun nacahan i xihin ndó  
 yóho. Jáchi coo tá coo va ñā.

<sup>32</sup> Joo ni in túhún toho  
 ñayivi co xini nā ndá quivi á  
 ndá hora yaha ñā yóho. Ta ni  
 mé tátō Ndióxi ndúu indivi co  
 xini nā ndá quivi coo ñā yóho.  
 Ta ni yehe, da cúu in túhún  
 jini já jahyi Ndióxi co xini ndá  
 quivi coo ñā yóho. In túhún  
 Ndióxi, tátá yo queá xini a.

<sup>33</sup> Sahá ñā cán queá cañuhu  
 ini ndó sahá ñā yóho. Coo  
 tiahva ndó ta caça tahví ndo  
 nu Ndióxi jáchi co xini ndó  
 ndá quivi xinu coo ñā yóho.

<sup>34</sup> Jáchi ñā yóho cúu á tátuhun  
 in dataa quéta cuahan xicá  
 joo tá cámaní quee da cuhun  
 da jándacoo tóo da vehe da nu  
 mozo da ñā ná candaa na ñā.  
 Ta sahan da chuun caja in in  
 mozo da. Ta nuú da ndáá  
 yéhe nasahnda da chuun ñā  
 ná candaa vaha da ñā. <sup>35</sup> Sahá  
 ñā cán queá xini ñúhú coo  
 tiahva ndó jáchi co xini ndo  
 ndá quivi xinu coo mé da cúu  
 xitoho vehe. Co xini ndo á  
 cacuu a tá nacuaá tóo á cacuu  
 a java ñuú táji á cacuu a tá  
 nacana chéle á cacuu a tá sa  
 nativi. <sup>36</sup> Cuéntá coo ndó. A  
 juú tiahva náá xinu coo da  
 ta ndiñehe dá ndohó ndúu  
 ndó quiji ndo. <sup>37</sup> Ñā cáhan i  
 xihin ndó cáhan i xihín ndihi  
 na: Xini ñúhú coo tiahva ndó  
 saha mé quivi quixi tucu u —  
 nacachi Jesús.

*Ndítuhún jehé na tiin na  
 Jesús*

(Mt. 26:1-5; Lc. 22:1-2; Jn.  
 11:45-53)

<sup>1</sup> Tá cámaní ivi quivi caja  
 na vicó pascua xihin vicó tá  
 xixi na pan ñā co queé yusá  
 naxaa xihin já nacasáhá na  
 sacuahá nuú jutu xihín na  
 jánaha ley Moisés ndúcú na  
 ndá quiahva caja na tiin jehé  
 na Jesús já cuu cahní na a.  
<sup>2</sup> Ta já cáchi xihin táhan na:

—A tiin toho í da mé vicó  
 jáchi tiahva náá ndivaa ñayivi  
 —nacachi na.

*Tá nachojo in ñañáha per-  
 fume jini Jesús*

(Mt. 26:6-13; Jn. 12:1-8)

<sup>3</sup> Ta ndaja coo ín Jesús ñuu  
 Betania vehe Simón, da cáhan  
 na xihin: ta nandoho cuehe  
 táhyi. Ta nani ndúu coo na nu  
 mesa cán naxinu in ñañáha  
 ta ñéhe ñā in yúyú alabastro  
 nachutú jini a xihín perfume,  
 dó támi ndivaha sahan ta cúu  
 dó perfume yahvi ndivaha.  
 Ta natahví ñā yóho mé yúyú  
 cán já nachojó ñā do jini  
 Jesús. <sup>4</sup> Ta java na ndúu cán  
 nacasáhá na jáa ná xihin ñā  
 já nacasáhá cáchi xihin táhan  
 na já:

—Ndavaha nativi uun per-  
 fume yóho. <sup>5</sup> Coo jicó yó  
 do, nduu ta yaha ga nuú uni  
 ciento denario quehé saha dó  
 ta xihín jjuhún cán cuu chin-  
 deé yó na ndahví, nduu —  
 cáchi na.

Sahá ñā cán queá naxojo  
 ini na xihin ñañáha cán ta  
 nacahan núu na saha ñā.

<sup>6</sup> **Anda** já **naçachi** Jesús já **xihìn** ná:

—**A** **cáhan** ndó **xihìn** ña. **A** jáquihvi ndó ña. Ña vaha quéa **naçaja** ña yóho **xihìn** i. <sup>7</sup> **Jáchi** **na** **nda**hvi níi tiempo canduu na tañu ndó ta cuu caja ndó ña vaha **xihìn** ná ndá tañu **cúni** mé va ndó joo **yehe** a cóo tuun toho i **xihìn** ndo. <sup>8</sup> Mé ña yóho **naçaja** ña **jan**da nuú **naxinu** ndée ña **caja** ña **xihìn** i. **Sa** **najándicuchu** **yachi** va ña yóho **yiquí** **cuñu** i **xihìn** **per-**fume, dó **támi** **sáhan** **jan** ña ná coo **tiahva** **vi** tá ná **casaa** **quivi** **nduxu**. <sup>9</sup> Mé a **nda**a ná **cahan** i **xihìn** ndo níi **cúu** ñuyívi nuú **caca** nuu ñayivi **cahan** na **tuhun** **vaha** **saha** mí i já **quéa** **ndicani** na ña **naçaja** ña yóho **xihìn** i já **ndicuhun** ini na **saha** ña —**naçachi** a.

### *Jicó túhún Judas Jesús*

(Mt. 26:14-16; Lc. 22:3-6)

<sup>10</sup> Ta **ndaja** coo in **táhan** **da** **uxu** **ivi** **xíca** tuun **xihìn** Jesús, **da** **nani** **Judas** **Iscariote** **naçahan** **da** **cáhan** **da** **xihìn** **na** **sacua**hã nuú **jutu**. Já **naçahan** **da** **tuhun** da nuú **na** **cán** ña **ndiquiahva** da Jesús **ndáha** ná. <sup>11</sup> Tá **naxini** **joho** **na** **cán** ña **naçachi** da **xihìn** ná **naçavatá** **na** ta **naçahan** **na** **tuhun** na nuú mé **Judas** ña **quia**hva na **jiuhún** nuú dá. Ta **sã** mé **nani** já **naçasáha** **Judas** **ndúcú** **da** **ndaja** cuu **caja** da **ndiquiahva** da Jesús nuú ná.

*Tá naxijini ndayí Jesús xihìn na xíca tuun xihìn á*

(Mt. 26:17-29; Lc. 22:7-23; Jn. 13:21-30; 1 Co 11:23-26)

<sup>12</sup> Mé **quivi** **nuú** **vicó** **pascua** tá **xíxi** na **pan** ña **co** **quéa** **yusá** **naxaa** **xihìn** já **sáhní** **na** **ndicachi** **váli** **jóco** **na** **nu** **Ndióxi**. Já **nandaca** **tuhún** **na** **xíca** tuun **xihìn** Jesús mé á já **cáchi** **na** já **xihìn** á:

—**Ndáchi** **cúni** ndó **cuhun** **nde** **caja** **ndívi** **nde** **cajini** ndó **vicó** **pascua** —**naçachi** na.

<sup>13</sup> **Anda** já **nachindahá** Jesús **ivi** **da** **xíca** tuun **xihìn** á já **cáchi** a já **xihìn** dá:

—**Cuáhán** ndó ñuu **jan** **jáchi** **jan** **ndiñehe** ndó in **dataa** **ñehe** da in **yoo** **ticutí** ta **candico** ndó **da** **cuhun** **ndo**. <sup>14</sup> Tá ná **xinu** **da** **vehe** **nuú** **ndihvi** da já **cáchi** ndó **xihín** **da** **cúu** **xitoho** **vehe** **cán** **já**: “**Da** **janaha** **ndehe** **cáchi** **xuhun**: **Ndáchi** **ín** **nuú** **coo** i **cajini** i **vicó** **pascua** **xihín** **na** **xíca** tuun **xihín** i.” <sup>15</sup> **Anda** já **janaha** mé **da** **cán** in **cuarto** **cáhnú** ña **cánúu** **jini** **vehe** **piso** **ninu**. **Sã** **ín** **tiahva** va ña. **Cán** **caja** **ndívi** **ndo** ña **cajini** —**naçachi** Jesús **xihìn** ná.

<sup>16</sup> Já **naquee** mé **na** **xíca** tuun **xihìn** Jesús **cán** **cuahan** **na** ta tá **naxinu** **na** ñuu **cán** **naçahin** tá **ín** **cáchi** Jesús **xihìn** ná. Já **naçaja** **ndívi** **na** ña **cajini** na **vicó** **pascua** mé **cán**.

<sup>17</sup> Tá **naçuaá** **naxinu** Jesús **xihìn** **ndihuxu** **ivi** **na** **xíca** tuun **xihìn** á. <sup>18</sup> Ta tá **ndúu** **coo** na nuú **mesa** **xíxi** na já **naçachi** Jesús já **xihìn** ná:

—Mé a **nda**a ná **cahan** i **xihìn** **ndo** ña in **táhan** **ndó**, **da** **ndúu** **coo** **xíxi** **xihín** i nuú **mesa** **yóho** **cacuu** **da** **jicó** **túhún** **yehe** —**naçachi** a.

19 Anda já naçasáhá na cán cácuéha ini na já naçasáhá tá in tá in na ndáca tuhún na mé á já cáchí na já xihín á:

—Á yehe cacuu da jicó tuhún mé ndó.

Já naçachi inga tucu da já:

—Á a juú yehe cacuu da.

20 Anda já naçachi Jesús já:

—In táhan ndó da cúu uxu ivi, da in ndúu xíxi xihín i ini coho i, da cán cúu da jicó tuhún yehe. 21 Yehe cúu da naçindahá Ndióxi nduu ñayivi ta ndítahan nuú i quivi i tá ín cáchí tuhun Ndióxi. Joo ndáhvi nahá naçuu da jicó tuhún yehe. Janda vaha chága ná a cácu da, nduu —naçachi a.

22 Nani xíxi na ndúu na natiin Jesús pan já nandiquiahva ndixahvi nu Ndióxi. Tá nandihi naçahnda java ña ta naçahan ña nu ná já cáchí a já xihín ná:

—Juhun ndó jáchí ña yóho cúu tátuhun yiquí cuñu i —naçachi a.

23 Tá nandihi natiin a in vaso nu ñúhu tó uva já nandiquiahva ndixahvi nu Ndióxi. Ta naçahan mé á do nuú na cán ta tá in tá in na naçihi na do. 24 Já naçachi a já xihín ná:

—Dó yóho cúu dó tátuhun nij i, dó cuíta sahá cuahá ñayivi. Tá ná cuíta nij i já candaá ini ndó ña najáxiñu çoo Ndióxi tuhun a naçahan sanahá. 25 Mé a ndaá ná cahan i xihín ndó ña a coho ga i tó uva janda quiahva ná xinu çoo quíví coho tucu u inga dó vaha chága tá ná xinu

quíví cacomí Ndióxi cuéntá sahá ñayivi —naçachi a.

*Cáxi* tuhun Jesús ña chijehé tuhun Pedro ña xini da me á  
(Mt. 26:30-35; Lc. 22:31-34; Jn. 13:36-38)

26 Tá nandihi naçita na in canto já naçee na cuahan na yucu yitó Olivo. 27 Anda já naçachi Jesús já xihín ná:

—Tóco ndihi ndó jándacoo ndó yehe ñuu viti jáchí já cáchí tuhun Ndióxi já: “Cahní i da ndáá ndicachi ta xihín ña yóho ndicuíta nuu ndicachi jana dá cuñun ri”, cáchí tuhun Ndióxi. 28 Joo tá nandihi nditacu tucu u ta já cuñun jihna ñuhú yehe estado Galilea anda já cuñun mé ndó —naçachi a.

29 Anda já naçachi Pedro já xihín Jesús:

—Vatí ná jándacoo ndihi na mé ndó joo a jándacoo toho i ndohó —naçachi da.

30 Anda já naçachi Jesús já xihín dá:

—Mé a ndaá ná cahan i xuhun mé ñuu viti tá camaní cana ivi chéle já chijehé tuhún ña xínun yehe uní tañu —naçachi a.

31 Já naçasáhá ndúcú ndée Pedro cahan da já cáchí da já:

—Vatí ná quivi i xihín ndo joo a chijehé tuhun toho i sahá ña xini i mé ndó —naçachi da.

Ta mé quiahva já naçachi ndihi na cán xihín á.

*Tá* xíca tahví Jesús tañu yitó olivo nani a Getsemani  
(Mt. 26:36-46; Lc. 22:39-46)

<sup>32</sup> Anda já naxinu na cán in nuú naní Getsemaní já nacachi Jesús já xihín na xíca tuun xihín á:

—Yóho cacoo ndó nani ná cuhun i cáa caça tahví i nu Ndióxi —nacachi a.

<sup>33</sup> Ta ndáca Pedro xihín Jacobo xihín Juan cuahan xihín á. Ta ndaja coo nacasáhá cácuéha ini a ta a juú quiahva táhvi ini a. <sup>34</sup> Já nacachi a já xihín ná:

—Cácuéha ndivaha ini i chí quivi i cúu ini i. Yóho candoo too ndó ta coto a cúju ndo —nacachi a.

<sup>35</sup> Anda já naquee Jesús cuahan chága chí nuú já nacaxítí a janda quiahva naxinu coo nuú á nu núhu cán. Já naxica tahví a nu Ndióxi ña ná caja mé á ña ná a ndóho a tá quiahva vaxi nu á ndoho a chí nuú. <sup>36</sup> Já cáchí a já xíca tahví a nu Ndióxi:

—Tátá Ndióxi, tóco ndihi ñaha cuu caja ndó. Chindeé ndó yehe ná a ndóho i ña ihvi ndivaha ña vaxi nuú i ndoho i. Joo ná coo tá lin cúni mé ndó ta ná a cóo toho ña cúni yehe —nacachi a.

<sup>37</sup> Anda já nandicó coo a nu ndúu na xíca tuun xihín á cán ta já nandiñehe á na quíji na ndúu na. Já nacasáhá cáchí a já xihín Pedro:

—Á quíji vún, Simón. Á coo nacuu canditún ni in hora. <sup>38</sup> Xíni núhú coo tiahva ndó ta caça tahví ndo nu Ndióxi já ná a cóto ndojó rí quini ndohó. Mé a ndaa ínima ñayivi cúni a ndinducú a Ndióxi joo yiquí

cuñu na coo in tiahva caja ña cúni Ndióxi —nacachi a.

<sup>39</sup> Anda já naquee tucu a cuahan caça tahví a nu Ndióxi. Ta sa mé tuhun nacahan nu cuítí cán nacahan tucu a chí ivi. <sup>40</sup> Tá tá nandicó coo a nandiñehe tucu a na xíca tuun xihín á cán ndúu na quíji na jáchí naqueehe a mahnú na. Ta chí coo xíni na ndá tuhun nducú ñehe na nu Jesús sahá ña quíji na. <sup>41</sup> Tá nandicó coo a táhndá uni já nacachi a já xihín ná:

—Vatí cúni ndó cuju ndo ta vatí cúni ndó ndiquehe ndée ndo joo a cúu caja ndó ña viti. Jáchí sa naxinu coo hora ndiquiahva na yehe, da nachindahá Ndióxi nduu ñayivi ndahá ñayivi cája cuachi. <sup>42</sup> Cuáhán ndacoo ndó ná coho. Jáchí sa vaxi da jícó túhún yehe —nacachi a.

### *Tá natiin na Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Ta nani cáhan yij va Jesús cándichi a já naxinu Judas, da cúu in táhan da uxu ivi xíca tuun xihín Jesús cán. Ta xihín mé da cán vaxi cuahá ñayivi ñehe na machiti xihín yito viti. Mé na vaxi cán cúu ná na vaxi cuénta na sacuahá nuú jutú xihín nuú na jánahá ley Moisés xihín nuú na sacuahá veñuhu. <sup>44</sup> Ta mé Judas, da ndiquiahva mé á nuú na cán sa nacandoo da xihín na cán ña tatí yuhu dá sajóho Jesús jáchí nacachi da já xihín ná:

—Mé da ná tatí yuhú u sajóho, da cán cúu dá tiin ndó

ta cató tuun ndó da cañehe ndó cuhūn ndo —naçachi da.

<sup>45</sup> Ta tá naxinu da cán chí ivi laá naçayati da nu Jesús já cáchi da já xihin á:

—Maestro, maestro.

Já natatí yūhu dá sajóho a. <sup>46</sup> Anda já natiin tuun na Jesús.

<sup>47</sup> Joo in táhan da xica tuun xihín Jesús cán natavá da machiti da já nachitúhūn dá in johō da cúú mozo da sacuaḥa nuú jutū cán.

<sup>48</sup> Anda já naçachi Jesús já xihín na naxinu tiin ñahá cán:

—Cája ndó xihín i tátuhun cája na xihín ta cuihná jáchi naqueta ndó vaxi ndó tiin ndó yehe xihín machiti ta xihín yito. <sup>49</sup> Ndijáá ní quivi naçahiin i tañu ndó jan ta najánaḥa i ndohó ini veñuhu cáhnu ta ni in tañu coó natiin ndó yehe. Joo tóco ndihi ña yáha yóho xíní ñuhú yaha ña já ná xinū coo nuú ña naçahyi sahá i ini tuhun Ndióxi —naçachi a.

<sup>50</sup> Anda já naxinu ndihi na xica tuun xihín Jesús cán cuahān na ta najándacoo na mé á.

*Tá naxinu in datacú cuahān da*

<sup>51</sup> Joo in datacú catíví da in tuhún jini sámana ndíco da jatá na cán cuahān da ta natiin na da. <sup>52</sup> Joo najaní da mé dá ta naçandoo sámana da já naxinu lahla da cuahān da.

*Nasacu na Jesús nuú natata ndihi na sacuaḥa*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Anda já naçañehe na Jesús naçahan na nuú da cúú sacuaḥa chága nu ndihi jutū. Ta nandique táhan tóco ndihi na sacuaḥa nuú jutū xihín na sacuaḥa veñuhu xihín na jánaḥa ley Moisés. <sup>54</sup> Ta naçandíco xíca Pedro Jesús anda quiahva naxinu da yéhe vehe da cúú sacuaḥa chága nu ndihi jutū cán. Já naçacoo da xihín da ndáá veñuhu cáhnu cán xítúni da yati yávi núhu cán.

<sup>55</sup> Ta na sacuaḥa nuú jutū xihín tóco ndihi na cómi cuéntá sahá na Israel natata na cán ndúcú na cuachi jácana na jatá Jesús já cuu cahní ñahá na. Joo coó cuachi jíquí ná ñeḥe ná chínúu na jata mé á. <sup>56</sup> Ta cuahā ná naçasáhá cáhan na ña tuhún saḥa Jesús joo coo xínū tuhun cáhan na jáchi a cuú ndique táhan vaḥa tuhun na. <sup>57</sup> Ta nandaça ndichi java da cáhan da tuhun jíquí saḥa Jesús já cáchi da já:

<sup>58</sup> —Naxini johō nde naçachi da jan já: “Jánditani i veñuhu cáhnu cán, ña naçavaḥa ñayivi ta tixi uní quiví jácandichi tucu u inga ga ña a cuú cavaḥa ndahá ta” —naçachi da.

<sup>59</sup> Joo ni já coó naçuu ndique táhan tuhun na xihín ña naçachi na cán.

<sup>60</sup> Anda já nandaça ndichi mé da cúú sacuaḥa chága nu ndihi jutū tañu na cán já nandaça tuhún da Jesús já cáchi da já xihín á:

—Á chí a ndúcú ñehún tuhun nuú nde sahá cuachi

jácojo na jatun —ñacachi da.

<sup>61</sup> Joo coó ñacahan Jesús ni in tuhun xihin ná já táji ní já va ñasahiin a. Mé da cúu sacuahá chága nu ndíhi jutú cán ñacasáhá ndáca tuhún tucu da a já cáchí da já xihin á:

—Á jivi ndusa yóhó cúun Cristo, da cúu in tuhún jini já jahyi Ndióxi yii, mé da ñachindahá Ndióxi cacomí cuéntá sahá ñayivi —ñacachi da.

<sup>62</sup> Anda já ñacachi Jesús já:

—Ajan, jivi yehe cúu dá. Ta vaxi quivi tá cuni ndó yehe, da ñachindahá Ndióxi nduu ñayivi cacoo i xoo cuáha Ndióxi, mé a in cuaha ndée. Ta já cuni ndó yehe ndicó coo i ñuyivi yóho tañu vico tá ná quixi i chí indivi —ñacachi a.

<sup>63</sup> Anda já ñandatá da cúu sacuahá chága nu ndíhi jutú jáhma da ña ná candaa ini ñayivi ña xójo ini da. Já cáchí da já:

—Ndá chicuu chága yó ñayivi ndicani nu yo. Xihin ña ñacahan da yóho candaa ini ña ndája núu da Ndióxi. <sup>64</sup> Á sa ñaxini johó ndó ña ndája núu da Ndióxi xihin tuhun ñacahan da. Ndaja xini ndó caji i xihin dá viti —ñacachi da.

Anda já ñandique táhan tuhun ndihi ñayivi ña ndácaan cuachi nu Jesús ña cán quéa ndítahan quivi a.

<sup>65</sup> Java na ñacasáhá na xihnu ndaa na tójí nu á ta java na ñachicaji na jáhma nu á já ñacasáhá cáni na jahnda

nuu á já ndáca tuhún ñahá na já cáchí na já xihin á:

—Cahan xihin nde yo ñacani yohó viti —ñacachi ná.

Ta janda na ndáa veñuhu cáhnu cán viti ñacasáhá cáni na jahnda nuu á.

*Tá ñachijehé tuhun Pedro ña xini da Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Ta ndaja coo Pedro in yii dá xitúni da cán já ñaxinu in ña cája chúun xihin da cúu sacuahá chága nu ndíhi jutú. <sup>67</sup> Já ñaxini ña xitúni Pedro ta nahá vaha ñasandehé ña nu dá já cáchí ña já:

—Yóhó cúun táhan da xica tuun xihin Jesús, da ñuu Nazaret —ñacachi ña.

<sup>68</sup> Joo ñachijehé tuhun da ña xini da Jesús já cáchí da já:

—Uhun. Co xini toho i da ta co xini toho yehe ndá saha cáhun —cáchí Pedro.

Anda já ñacayati da yuyéhé ta ivi laá ñacana chéle. <sup>69</sup> Tá ñaxini mé ña cája chúun xihin da cúu sacuahá chága nu ndíhi jutú cán ña ñasandichi too da yéhé cán já ñacasáhá ña cáxi tuhun ña xihin tóco ndihi ñayivi ndúu cán já cáchí ña já:

—Candehé ndó. Da cáa cúu in táhan da xica tuun xihin Jesús —ñacachi ña.

<sup>70</sup> Ñacachi tucu Pedro ña co xini da Jesús. Chá va ñayaha ña yóho ta já ñacachi na ndúu xitúni cán xihin Pedro:

—Táhan ri da cáa va cúu yóhó jáchi cúun da Galilea ta



cáhun tátuhun cáhan na cán —nacachi na.

<sup>71</sup> Anda já nacasáhá Pedro cánahá da ta natavá da quivi Ndióxi ña co xini da Jesús já nacachi da já:

—Ni co xini mi i ndá taa cúu da jan, da cáhan ndó sahá jan —nacachi da.

<sup>72</sup> Tá nacachi da já ivi laá nacana chéle ña chí ivi. Anda já nandicuhun ini Pedro ña nacachi Jesús xihin dá tá nacachi a já: “Tá camani cana ivi chéle sa chíjehé tuhún ña xínun yehe uni tañu.” Tá nandicuhun ini Pedro ña yóho já nacasáhá sácu ndivaha da.

## 15

*Tá nandiquiahva na Jesús ndáha Pilato*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Tá nativi inga quivi itaan já nandique táhan na sacuahá nuú jutú xihin na sacuahá veñuhu xihin na jánaha ley Moisés xihin ndihi na cómi cuénta sahá na Israel. Já nacató na Jesús ñehe na a cuahan na já nandiquiahva na mé á nu Pilato. <sup>2</sup> Ta mé Pilato nandaca tuhún da Jesús já cáchi da já xihin á:

—Á mé a ndaa cúun in rey, da cómi cuénta sahá na Israel.

—Ajan. Jivi cúu u tá quiahva cáchi ndo jan —nacachi Jesús xihin dá.

<sup>3</sup> Ta najácojo na sacuahá nuú jutú cán cuahá cuachi jata Jesús. <sup>4</sup> Já nandaca tuhún tucu Pilato Jesús já nacachi da já xihin á:

—Ndávaha co ndúcú ñehún tuhun nuú i. Candehé ndaja cuahá nuú cuachi jácojo na jatun —nacachi da.

<sup>5</sup> Joo ni in tuhun coo nacahan Jesús. Tá naxini Pilato ña co ndúcú ñehe Jesús tuhun já nacatontó da sahá ña cája.

*Sácu ini na saha Jesús ndaja caja na ña ná quivi a*

(Mt. 27:15-31; Lc. 23:13-25; Jn. 18:38-19:16)

<sup>6</sup> Tañu mé víco pascua nasahiin costumbre Pilato ña janí da in da ndacaan vecaa. Ndá da cuni ñayivi janí da, da cán cúu da janí da. <sup>7</sup> Ta ndaja coo mé já ndacaan in da naní Barrabás vecaa xihin java ga da naxica xihin dá. Ndacaan da vecaa sahá ña nasahni da ndii tá nandivaa ñayivi. <sup>8</sup> Chí naxinu ñayivi nu Pilato já nacasáhá na cáhan na xihin dá ña ná caja da tá quiahva sá caja da. <sup>9</sup> Joo nandaca tuhún Pilato na já cáchi da já:

—Á co cuni ndó ña ná janí i da cúu rey nuú ñayivi Israel yóho —nacachi da.

<sup>10</sup> Nacachi Pilato ña yóho jáchi xini da ña nandiquiahva na sacuahá nuú jutú cán Jesús nu da sahá ña cáhivi ini na xihin á. <sup>11</sup> Joo na sacuahá nuú jutú cán nacasáhá na jándinihi na ñayivi ña ná cachi na xihin Pilato ña ná janí da Barrabás. <sup>12</sup> Tá nandihí já nandaca tuhún Pilato na já nacachi da já xihin ná:

—Ndía cuni ndó caja i xihin da cáchi ndó cúu rey nu

ndóhó, nā Israel —ñacachi da.

<sup>13</sup> Anda já nanducú ñehe ñayivi cán tuhun nu Pilato já cáchi nā já xihín dá:

—Cata caa ndó da ndica crúxu.

<sup>14</sup> Já ñacachi Pilato já xihín ná:

—Ndá cuachi ñacaja da, vaha.

Joo ví ga ví cáyuhú cóhó nā já cáchi nā já:

—Cata caa ndó da ndica crúxu.

<sup>15</sup> Ta sahá ña cúní Pilato candoo vaha da nuú ñayivi najaní da Barrabás. Ta tá nandihí najácaxáhan na Jesús já nandiquiahva da a ndáha nā cuhun cata caa ñahá nā ndica crúxu.

<sup>16</sup> Anda já ñehe soldado Jesús cuahan nā yuyéhe vechúun cán. Já najánditaca soldado cán java ga táhan da.

<sup>17</sup> Já ñachinúu na in jahmá cuhá túun jatā Jesús ta ñachinúu na in tiyivi íñu jiní á. <sup>18</sup> Tá nandihí já ñacasáhá nā cáyuhú nā já cáchi nā já:

—Cáhnú nahá ná cacuu yóhó, da cúu rey nuú nā Israel —cáchi nā sácú ndaa ñahá nā.

<sup>19</sup> Tá nandihí ñacasáhá cáni na yiquí jíní a xihín in ndoo ta ñacasáhá nā xihnu ndaa na tójí nā nuú á já ñacasáhá nā cáxítí nā nu á ña cája na tátuhun cája cáhnú na a. <sup>20</sup> Tá nandihí ñasacu ndaa na a já ñatavá nā jáhma cuhá túun ña ñasanúu jatá. Ta najándaca ndixí na a xihín jáhma mé á já ñasañehe na a cuahan nā cata caa na a ndica crúxu.

*Tá ñacata caa na Jesús ndica crúxu*

(Mt. 27:32-44; Lc. 23:26-43; Jn. 19:17-27)

<sup>21</sup> Tá ñehe na Jesús cuahan nā cata caa na a ndica crúxu já nandique táhan na xihín in da vaxi da ndihvi da ñuu Jerusalén. Mé da cán naní da Simón, da ñuu Cirene, da cúu tátá Alejandro xihín Rufo. Já ñacaja ndúsa ná xihín dá ña ná ndicojo da crúxu nuú cata caa na Jesús.

<sup>22</sup> Já ñasañehe na Jesús ñasahan nā in xiquí naní Gólgota. Tuhun yóho cúní cáchi a: nu ndúu lásá yiquí jíní ndii. <sup>23</sup> Cán ñasahan nā vino nu Jesús, dó ñacava táhan xihín jusa ña naní mirra. Joo coo ñaxeen toho a coho a do. <sup>24</sup> Anda já ñacata caa na a ndica crúxu. Já ñacasáhá soldado cán sáiquí da saha jáhma Jesús ta ñacachi xihín táhan da ña ndá da ná queue vaha cuu quehe in in jáhma Jesús.

<sup>25</sup> Ta cúu á tátuhun caa in naha tá ñacata caa na Jesús ndica crúxu cán. <sup>26</sup> Ta jiní ndica crúxu cán ñacahyí nā ndá sahá ñacata caa na a ta já cáchi a já: “Da yóho cúu rey nuú nā Israel.” <sup>27</sup> Ta sa mé já ñacata caa na ivi ta cuíhná xihín Jesús: in da xoo cuáha ta in da xoo íti. <sup>28</sup> Ta xihín ña yóho ñaxinu coo tuhun Ndióxi tá cáchi a já: “Tañu ta quini ñasacu na a.”

<sup>29</sup> Chí cáva jiní mé ñayivi yáha cán canahá nā xihín á já cáchi nā já:

—Candehé. Yóhó cáchún ña jánditanun veñuhu cáhnu cán ta tixi uní víxí quívi cáchún jácandichi tucún ña. <sup>30</sup> Jácaacu mún. Cuáhán nuu ndica crúxu jan —ñacachi na sácu ndaa ichi na.

<sup>31</sup> Ta quíahva já cája na sacuaḥa nuú jutu cán xihín na jánaḥa ley Moisés sácu ndaa ñahá na. Ta ñacasáhá cáhan xihín táhan na já cáchí na já:

—Ñacuu ñacaja Jesús jácaacu da java ga ñayivi joo viti a cuú jácaacu da mé dá. <sup>32</sup> Tá ta mé a ndaa cúu dá Cristo, da cúu rey nuú na Israel ná nuu da ndica crúxu viti ñuhú já ná candúsa nde da —cáchí na.

Ta janda da ivi táhan ndácaa ndica crúxu jín á cán cánaḥá da xihín á.

### Tá naxihi Jesús

(Mt. 27:45-56; Lc. 23:44-49; Jn. 19:28-30)

<sup>33</sup> Tá naxinu coo çaxivi ndaa ñacanaá níi cúu ñuyívi ta janda caa uní saḥini já ñacasáhá nandiyehé tucu. <sup>34</sup> Ta sa mé hora já ñacayuhú cóhó Jesús já cáchí a já:

—Eloi, Eloi, lama sabactani —ñacachi a.

Tuhun yóho cúni cáchí a: Ndióxi mí i, Ndióxi mí i, ndávaḥa najándacoo ndáḥa ndó yeḥe.

<sup>35</sup> Ta java na ndíta cán naxini johó na tuhun cáchí a. Já ñacachi na já:

—Cuni johó ndó jáchí cána da profeta Elías —ñacachi na.

<sup>36</sup> Anda já xínu in da ñasahan da nachindaxi da in

ticoṭo ini vino iyá. Já ñacató da mé ticoṭo cán nuú in yitó ndoṭo já ñachitivi da do yati yúhu Jesús ña ná coho a do. Já ñacachi da já xihín java da cán:

—Cóho candehó á quixi Elías jánuu a da ndica crúxu —ñacachi da.

<sup>37</sup> Anda já ñacayuhú cóhó Jesús já naxihi a. <sup>38</sup> Anda já nandatá java ndaa jáhma ndeé ña sáji nuu nuú yí ndivaḥa veñuhu cáhnu ñuu Jerusalén cán. Janda jini á ta janda saḥá nandatá. <sup>39</sup> Ta ndaja coo in dataa, da saḥndá chuun nuú soldado cuéntá Roma ñasahin da nu ndácaa Jesús cán ta tá naxini da naxihi a já ñacachi da já:

—Mé a ndaa táhyi cúu da yóho in túhún jini já jahyi Ndióxi —ñacachi da.

<sup>40</sup> Ta ñasanduu java najihí ta sándeḥé xicá na Jesús. Tañu na yóho ñasandacaan ña naní María, ña ñuu Magdala xihín María, ña cúu náná Jacobo, da loho chá nuú José xihín in ña naní Salomé.

<sup>41</sup> Ñasandico najihí yóho jata Jesús ta ñachindeé ñahá na tá ñasahin a estado Galilea. Cuáhá ga najihí ñasanduu cán ta java na cúu ná na ñasahan xihín á ñuu Jerusalén jihna tá cámaní quivi a.

### Tá najánduxu na Jesús

(Mt. 27:57-61; Lc. 23:50-56; Jn. 19:38-42)

<sup>42</sup> Tá ñacuaá too uun quívi viernexe tá cámaní casaa quívi ndíquehe ndeé na Israel já ñayaha tóco ndihi ña yóho.

43 Ta ndaja coo íin in da nani José, da ñuu Arimatea, da cúu táhan na cómi cuéntá sahá na Israel. Mé José yóho ndáti da casaa quiví cacomí Ndióxi cuéntá sahá ñayivi ñuyiví yóho. Ta nasahan ndeé ini da cuhun da cahan maní dá xihín Pilato sahá yiquí cuñu Jesús ña ná quiahva mé Pilato ña nu dá. 44 Chí nacetóntó Pilato tá nacandaa ini da ña sa naxihí Jesús. Já nacana da da sáhdá chuun nuú soldado da já nandaca tuhún ñahá da á sa naxihí Jesús. 45 Tá naxaxi tuhun da cán nu Pilato ña sa naxihí Jesús já nasahan Pilato ñamani nuú José ña ná ndiquehe da yiquí cuñu Jesús. 46 Anda já naxeen José in jahmá vaha ta najánuu da yiquí cuñu Jesús ndica crúxu já naxitiví da ña xihín mé jahmá vaha cán. Tá nandihí já naxhicaan da mé yiquí cuñu Jesús cán ini in yávi ndácaan ndica cáva. Tá nandihí já naxihjaví da yuhú cáva cán xihín in yuu jáhdá cáhnu. 47 Ta ndaja coo María, ña ñuu Magdala xihín María, náná José nasandehé na nuú nasacu na yiquí cuñu Jesús ini mé cáva cán.

## 16

*Tá nanditacu tucu Jesús*

*(Mt. 28:1-10; Lc. 24:1-12; Jn. 20:1-10)*

1 Ta tá sa nayaha quiví ndiquehe ndeé na já nasahan María, ña ñuu Magdala xihín María, ña cúu náná Jacobo xihín Salomé viti naquee na cuahan na cuen na java nuú

ñaha támi sáhan ña chindáá na yiquí cuñu Jesús. 2 Ta naha chá mé quiví domingo tá naqueta candii já cuahan na nuú naxhicaan na yiquí cuñu Jesús cán. 3 Ta nani xíca na cuahan na íchi cán já ndítuhún xihín táhan na ndá quiahva caja na tavá na yuu ndájí nuú ndácaan yiquí cuñu Jesús cán. Já cáhí na já:

—Yo tavá toho yuu ndájí nuu nuú quihví ini nu ndácaan yiquí cuñu Jesús — cáhí xihín táhan na cásahan na jáchi cáhnu ndivaha mé yuu cán.

4 Joo tá naxinu na mé cáva cán já naxini na ña cóo ga yuu ndájí yuhú cáva cán. 5 Ta tá nandihví na mé cáva cán já naxini na cáa íin in dataa ndíxí jahmá yaa ña cáni. Íin coo da xoo cuáha ta cúu dá da yúta. Tá naxini najihí yóho da cán chí nayihví na. 6 Anda já naxahan da cán já cáhí da já:

—A yíhví toho ndó. Xíní yehé ña ndínducú ndo Jesús ña Nazaret, ña nacata caa na ndica crúxu. Candehé ndo nuú nasacu na a. Cóo ga íin viti jáchi nanditacu tucu a. 7 Ta viti cuáhán ndo caxi tuhun ndó xihín na naxica tuun xihín á ta xihín Pedro ña cánuú mé á cuahan estado Galilea. Tá cuhun ndó cán já cuni ndó a tá quiahva naxachi mé á xihín ndo — naxachi tátó Ndióxi.

8 Já naquee na cán xínu na cuahan na jáchi nayihví ndivaha na anda quíji ninu na. Cóo naxahan na xihín

ni in ñayivi jáchi nayihvi ndivaha na.

*Tá naxini María, ñá ñuu Magdala Jesús*  
(Jn. 20:11-18)

9 Tá nandihí nanditacu tucu Jesús ta tá nativi mé quivi domingo já ñá nu cuítí naxini Jesús nasacuu ñá María, ñá ñuu Magdala, mé ñá natavá Jesús usa rí quini nasandacaan ini ñá. 10 Ta tá naxini ñá mé á já naquee ñá cuahan ñá caxi tuhun ñá nuú na naxica tuun xihin Jesús ñá tácu a. Ta ndúu cuéha ini na ta sácu na ndúu na tá nasaa ñá. 11 Ta naxi tuhun ñá nu ná ñá nanditacu tucu Jesús ta naxini ñá mé á joo coó naxeen na candúsa na ñá.

*Tá naxini ivi da naxica tuun xihin Jesús mé á*  
(Lc. 24:13-35)

12 Ta tá nandihí já nandijama Jesús ndá quiahva cáa já nandaca náha á nuú ivi táhan na cuahan yucu, na naxica tuun xihin á. 13 Joo tá nandicuni na mé á já naquee na cuahan na caxi tuhun na xihin na java cán joo coó naxeen na candúsa na tuhun nacaahan ndívi na yóho xihin ná.

*Sáhdá Jesús chuun nuú na xica tuun xihin á*  
(Mt. 28:16-20; Lc. 24:36-49; Jn. 20:19-23)

14 Tá nandihí cán nandaca náha Jesús nuú ndihuxu in na naxica tuun xihin á nani ndúu na xíxi na. Já nacasáhá jánaní a na jáchi nandaja táhyí na inima ná ta coó

naxeen na candúsa na ñá naxini na java cán Jesús tá nandihí nanditacu tucu a. 15 Já nacasáhá cáchi Jesús já xihin ná:

—Cuáhán ndo núu cúu ñuyivi yóho ta caxi tuhun ndó xihin ndihí ñayivi tuhun vaha sahá i. 16 Ta ndá na ná candúsa yehe ta candúta ná já quéa cacu ndaa inima ná ta a cuhun na indayá. Joo na co candúsa yehe, na cán cúu na cuhun na ndoho ini na indayá anda ama cáa quivi. 17 Joo na cándéé ini yehe caja na ñá xituhún. Ta xihin quivi yehe tavá na inima quini ndacaan ini ñayivi. Ta ndacaahan na tuhun saá ñá coó nactiahva na. 18 Ta tá ná tiin ndáha ná coo ta tá ná coho na ñá cúu cahní ñahá, a cahní toho a na. Ta tá ná chinúu na ndáha ná jiní na quihvi já ndivaha mé na quihvi cán — naxachi Jesús.

*Tá nandaa Jesús cuahan indivi*  
(Lc. 24:50-53)

19 Tá nandihí nacaahan Jesús, xitoho í tóco ndihí tuhun yóho xihin ná anda já nandindita cuahan indivi ta nasacoo a xoo cuáha Ndióxi, tátá yo. 20 Tá nandihí já naquee na naxica tuun xihin á cán cuahan na caxi tuhun na tuhun vaha sahá Jesús ndijáá ñuu. Ta já naxindeé Jesús, xitoho í na cán ta náha ñá cúu á ñá ndaa cáhan na jáchi naxaja mé á ñá cúu cája na cuahá nuú ñá xituhún. Já ná coo.

## Tuhun vaha nacahyí Lucas sahá Jesucristo

*Ndicani Lucas ndavaha  
nacahyí da tuhun yóho*

<sup>1</sup> Sa xini vahún, Teófilo ña sa cuahá ñayivi ndúcú na cahyí na tá cáa tá iin ña nayaha tañu nde. <sup>2</sup> Ta najánaha na nuú nde tóco ndihi ña naxini na jandá mé saha. Mé na yóho cúu ná na naxica nuu nacahan na tuhun vaha saha Jesús nuú ñayivi. <sup>3</sup> Ta cuni ri yehe va cahyí i ña jáchi cuéé cuéé nandaca tuhún i ndaja cáa anda mé saha já ná cuu cahyí vií ndihi i ña nu mún, Teófilo, da quihvi ndivaha ini i. <sup>4</sup> Jáchi cuni ña ná candaa vaha inún ndaja cáa ña ndaa ña najánaha na nuun.

*Cáxi tuhun in táto Ndióxi ña  
cacu Juan, da jácandúta ñayivi*

<sup>5</sup> Mé tiempo cán nasacuu Herodes rey nuú na Judea. Ta nasahin in da cúu jutú naní Zacarías. Ta nasacuu da cuénta in táhndá jutú naní Abías. Ta ñájíhí da naní ña Elisabet, ña naquixi chichi Aarón, da nasacuu jutú sanahá. <sup>6</sup> Mé Zacarías yóho xihin ñájíhí da nasacuu na ñayivi naxica ndaa nu Ndióxi. Ta xihín ndinuhu ini na nacaja na ña sáhndá Ndióxi nuú tuhun mé á caja na. Ta ni in túhún toho ñayivi cóo nacuu ñehe íni na cahan núu na saha ná. <sup>7</sup> Joo cóo

toho jahyi na nacacu jáchi cóo nacuu canduu jahyi Elisabet cán. Ta mé tiempo já sa nacayatá ndivaha ndívi na.

<sup>8</sup> Ta ndaja coo in quivi nanditahan nuú mé táhndá jutú xica xihin Zacarías cán caja chúun na cuénta Ndióxi. <sup>9</sup> Tóco ndihi jutú cán nasajiquí na ndá da ná quee vaha ta da cán cacuu da quihvi chiníhmá ini veñuhu cáhnu ndacaan ñuu Jerusalén cán. Ta naquee vaha Zacarías. <sup>10</sup> Ta nani chiníhmá Zacarías cán ini veñuhu já nanditútu ñayivi ndúu na yéhe ñuhu cán ndicahán na Ndióxi. <sup>11</sup> Ta nani chiníhmá Zacarías nu náa cán ndacaan da já nacanáha in táto Ndióxi nu dá cándichi a xoo cuáha nu náa nu chiníhmá da cán. <sup>12</sup> Tá naxini Zacarías táto Ndióxi cán, nayihvi ndivaha da ta ni cóo xini da ndia caja da. <sup>13</sup> Joo nandicahan táto Ndióxi cán xihin dá já nacachi a já:

—A yíhvi tohún, Zacarías jáchi sa naxini johó Ndióxi nuú naxica tahvún nu á. Sahá ña cán quea caja mé á ña ná cacu in jahyi Elisabet, ñájíhún. Ta cacún quivi dá cananí da Juan. <sup>14</sup> A juú quiahva cavatún ta caji inún caja ta loho jan tá ná cacu da. Ta cuahá ga java na caji iní na caja da tá ná cacu da. <sup>15</sup> Jáchi da cáhnu cacuu jahyún jan nu Ndióxi. A cóho da ni in túhún toho dó xíhi ñayivi xini na xihin. Ta cacuu da in da jándicutú ndaa Ndióxi xihin ínima yí mé á jandá tá cámaní cacu da. <sup>16</sup> Ta mé

jahyún jan caja da ña ná ndicó coo cuahá na Israel nu Ndióxi, xitoho na. <sup>17</sup> Ta jihna ñuhú mé Juan cuhun da caja tiahvva da ñayivi janda ná quixi mé á chindahá Ndióxi. Tá quiahva nandicutú ndaa ínima profeta Elías xihin ínima yii Ndióxi quiahva já ndicutú ndaa ínima Juan xihin á já ná coo ndée dá caja da ñaha tátuhun nacaja Elías. Ta caja mé Juan ña ná ndique táhan máni ñayivi xihin jahyi na. Ta caja da ña ná coo johó ñayivi sáa ini já ná caja na ña cuni Ndióxi. Quiahva já caja da cacu tiahvva da ñayivi janda quiahva ná xinu quivi quixi da nasahan Ndióxi tuhun a chindahá a —nacachi tátó Ndióxi cán xihin Zacarías.

<sup>18</sup> Anda já nanduca tuhún Zacarías cán tátó Ndióxi já nacachi da já xihin á:

—Ndaja caja i candaa ini i á mé a ndaa táhyí coo tá ín cáchún coo jáchi sa nacayatá ndivaha i ta quiahva já nacayatá ri ñájíhí vi —nacachi Zacarías cán.

<sup>19</sup> Anda já nanducú ñehe tátó Ndióxi cán tuhun nu dá já cáchi a já xihin dá:

—Yehe cúu Gabriel ta chuun Ndióxi xica nuu i cája i. Mé a cán nachindahá yehe ña ná quixi i caxi tuhun i ña yóho xuhun. <sup>20</sup> Joo viti sahá ña coo nacandúsún ña nacachi i xuhun candoo níhun ña ná a cúu cahun janda quiahva ná xinu quivi cacu jahyún. Sa vaxi quivi coo tá ín nacachi i xuhun coo —nacachi tátó Ndióxi cán xihin dá.

<sup>21</sup> Joo ndaja coo ñayivi ndíta ndáti yéhe ñuhu cán sa nacasahá ndíhi ini na sahá ña sa nacannahá ta coo Zacarías cán quéta jata véhe. <sup>22</sup> Joo tá naqueta Zacarías veñuhu coo nacuu cahun da ni in tuhún tuhun xihin ná. Xihin ña yóho nacandaa ini na ña naxini da in ñaha nacaja Ndióxi nu náa yii mé á cán. Janda ndaha uun da cúu nuu na cán jáchi nacandoo níhi dá.

<sup>23</sup> Ta tá sa najáxinu Zacarías quivi cája chúun da veñuhu cán já naquee da cuanuhu dá vehe da. <sup>24</sup> Tá sa nayaha ña yóho já naquee jahyi Elisabet, ñájíhí Zacarías cán. Ta tixi uhun yoo coo naquee ña caca nuu ña. Ta nacahan ña: <sup>25</sup> “Nacaja Ndióxi ña yóho xihin i viti já ná a candehé ndaa nahá ga ñayivi yehe”, nacahan ña.

*Cáxi tuhun tátó Ndióxi xihin María ña cacu Jesús*

<sup>26</sup> Tá naxinu inu yoo ñuhu jahyi Elisabet cán já nachindahá Ndióxi mé Gabriel, tátó mé á in ñuu naní Nazaret ndacaan estado Galilea. <sup>27</sup> Nasahan tátó Ndióxi yóho Nazaret naxito nihni a in ña tacú naní María, ña natiin tuhun in da naní José ña ná tandaha ña xihin dá. Mé José yóho naquixi da chichi David, da nasacomí cuénta sahá ñayivi Israel sanahá. <sup>28</sup> Nandihvi tátó Ndióxi cán nu ín ña ta já nacachi a já xihin ña:

—Cahan Ndióxi yehe xuhun, María jáchi cúun in ña nañehe táhvi nu Ndióxi.

Íin Ndióxi xuhun ta nacaja cuaha chága ñamaní xuhun a juú ga xihín java ga najihí — nacachi tátō Ndióxi cán xihin ña.

<sup>29</sup> Joo tá naxini María tátō Ndióxi cán já nacatontó ña táa johō ñá ña cáhan mé a cán xihin ña. “Ta ndá cuéntá quéa cáhan tátō Ndióxi yóho já xihín yo”, nacahan ña. <sup>30</sup> Anda já nacachi tátō Ndióxi cán já xihin ña:

—A yíhvi tohún, María jáchi cúun in ñá nañehe táhvi nu Ndióxi. <sup>31</sup> Ta viti quee jahyún ta tá sa nacacu a já cacún quivi á ná cananí a Jesús. <sup>32</sup> Mé jahyún jan cacuu a ta cáhnu. Ta cachi ñayivi saha dá ña cacuu da in túhún jiní já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva nasacomí David, da cúu tásáhnu jícó da cuéntá sahá ñayivi. <sup>33</sup> Quixi da cacomí da cuéntá sahá ñayivi Israel ta anda ama cáa quivi cacomí da cuéntá saha ná — nacachi tátō Ndióxi cán xihin María.

<sup>34</sup> Anda já nandaca tuhún María tátō Ndióxi cán já cáchi ña já xihin á:

—Ndaja coo cacu jahyi i ta ni in túhún toho ta coo in xihin i — nacachi ña xihin á.

<sup>35</sup> Anda já nanducú ñehe tátō Ndióxi cán tuhun nu ñá já cáchi a já:

—Ínima yii Ndióxi quéa quixi jándicutú yohó. Ta ndée Ndióxi, mé á cáhnu nu ndíhi a cán cava nuu a yohó tátuhun

caja in vico. Sahá ña cán quéa tá ná cacu jahyún jan cacuu da in da yii nacaxi Ndióxi caja chúun nu mé á. Ta cachi ñayivi saha dá ña cúu dá in túhún jiní já jahyi Ndióxi. <sup>36</sup> Ta cáxi tuhun i xuhun ña cacu jahyi Elisabet, ña cúu táhún cán vatí sa nacayatá ña. Ta viti sa naxinu iñu yoo ñúhu jahyi ña, mé ña nacachi ñayivi saha ña a cúu coo jahyi ña. <sup>37</sup> Jáchi Ndióxi cuu caja tóco ndihi ñaha — nacachi tátō Ndióxi cán xihin María.

<sup>38</sup> Anda já nacachi María já: —Ndióxi cúu xitoho i ta ná caja mé á tá quiahva cuni a xihin i. Ná coo tá in cáchi ndó coo.

Tá nandihí nacachi María cán ña yóho já naquee tátō Ndióxi cán cuahan.

*Xito nihni María Elisabet, ña cúu táhan ña*

<sup>39</sup> Ta mé tañu quivi já já xínu María nasahan ña in ñuu ndacaan chí yucu cuéntá Judea cán. <sup>40</sup> Ta tá naquihvi ña vehe Zacarías, yii Elisabet cán já nacahan Ndióxi ña xihin Elisabet. <sup>41</sup> Ta tá naxini johō Elisabet nacahan Ndióxi María xihin ña chí nacandita ña loho ndacaan tixi Elisabet cán chí ivi laá nandicutú ndaa ña xihin ínima yii Ndióxi. <sup>42</sup> Anda já nacayuhú cóhó Elisabet já nacachi ña já xihin María:

—Ni in túhún toho najihí coo nacaja máni Ndióxi xihin tá quiahva nacaja máni á yohó. Ta nacaja yii mé á jahyún. <sup>43</sup> Ta coo saha toho yehé ná quisún yóho, ña cúu



náná xitoho i coto nihnún yehe. <sup>44</sup> Jáchí tá naxini johu uun i ña ñacahan Ndiósun xihín i ivi laá ñacanda jahyi i ini tixi i jáchí ñacajii íní a. <sup>45</sup> Tahví ñacuún jáchí ñacandúsún ña ñacachi Ndióxi, xitoho í xuhun. Jáchí caja tá caja mé á ña ñacachi a caja —ñacachi Elisabet cán xihín María.

<sup>46</sup> Anda já ñacachi María já: Cája cáhnu i Ndióxi, xitoho í xihín ínimá i.

<sup>47</sup> Ta cájii ndivaha ini i xihín ña cája Ndióxi, mé a jácacu yehe.

<sup>48</sup> Jáchí ñandicuhun ini a sahá yehe, ñá ndáhví, ñá cúu in mozo mé á.

Ta cachi ñayivi ndúu viti xihín ña vaxi quivi canduu ñuyívi yóho ña ñacaja cuaha Ndióxi ñamani xihín i.

<sup>49</sup> Jáchí mé Ndióxi, mé a cuu caja tóco ndihi ñaha ñacaja cuahá ña náhnu xihín i.

Ta yii ndivaha quivi mé á.

<sup>50</sup> Ta níi tiempo táhvi ini mé á sahá tóco ndihi ñayivi, ña cája cáhnu mé á.

<sup>51</sup> A juú quiahva náhnu ñaha ñacaja mé á.

Ñasahnu a nuú ña ndíñehe jícó mé.

<sup>52</sup> Ta ñacandaa mé á chuun ndahá da náhnu ta najánuu ndáha mé á da.

Ta ñandíñehe jícó mé á ña najánuu ndáha mé ñuyívi yóho.

<sup>53</sup> Ta najándicutú ndaa mé á ñaha nuú ña ñandimaní ñaha cuxu.

Ta ñacandaa mé á ña ñasacomí ña cuicá já ñataxi a ña cán ná quee na cuhun ña.

<sup>54</sup> Ñachindeé a ña Israel, ña cája chúun cuéntá mé á.

Ta coó ñandindójó a tahvi ini a saha ná.

<sup>55</sup> Jáchí quiahva já ñasahan mé á tuhun a caja anda ama cáa quivi xihín Abraham ta xihín tásáhnu jícó yo, ña ñaquixi chichi mé dá, já ñacachi María cája cáhnu ñá Ndióxi.

<sup>56</sup> Ta ñacandoo María ñasahiiñ ñá vehe Elisabet tixi uní yoo. Anda já ñaquee ñá cuanúhu ñá vehe ñá.

*Tá ñacacu Juan, da jácandúta ñayivi*

<sup>57</sup> Tá ñandindaa quivi cacu jahyi Elisabet já ñacacu in taa loho. <sup>58</sup> Ta tóco ndihi ñayivi ndúu yati xihín ñá xihín ña cúu táhan ñá ñasahan ña xító nihni na ña. Ta cájii íní ña jáchí ñacandaa ini na ña ñacaja Ndióxi cuahá ñamani xihín ña. <sup>59</sup> Ta tá naxinu ña loho cán uná quivi já ñasahan ña ñachicaan ña marca yiquí cuñu a tátuhun ín costumbre ña. Ta ñacahán ña cananí a Zacarías tá quiahva naní tátá a. <sup>60</sup> Joo já ñacachi Elisabet já:

—A cananí toho da já. Juan va cananí da —ñacachi ñá xihín ña cán.

<sup>61</sup> Anda já ñacachi na cán já xihín ña:

—Ndá cuéntá quea cananí jahyún já ta ni in túhún toho ña vehún coó naní já.

62 Anda já nacuu ndáha ná nu Zacarías cán ña ndáca tuhún na da ndaja coo canani ña loho cán. 63 Anda já naxica Zacarías cán in tutu nu ná ta já nacahyí da já: “Juan cananí da.” Tá nacahvi na cán ña yóho já nacatóntó ndihi na. 64 Ta chí sa mé hora já nandicahañ tucu Zacarías. Já nacasáhá da cája cáhnu da Ndióxi. 65 Xihin tóco ndihi ña nayaha yóho nacatóntó ndihi na nasanduu yati xihin Zacarías cán. Ta ní cúu ñuu válí ñúhu chí yúcu cuéntá Judea cán nandicuita nuu tuhun saha tóco ndihi ña nayaha yóho. 66 Ta tóco ndihi na naxini joho ña yóho nacasáhá ndícani ini na sahá. Já nacasáhá ndáca tuhún táhan na já cáhí xihin táhan na já:

—Ndá taa cacuu taa loho yóho tá ná cuahnu da.

Nacachi na ña yóho jáchi naxini táhyí na ñamaní náhnu cája Ndióxi xihin taa loho cán.

*Cája cáhnu Zacarías Ndióxi*

67 Anda já nandicutú ínima Zacarías, tátá Juan cán xihin ínima yii Ndióxi. Já nacasáhá da cáhan da tuhun sahan Ndióxi nu dá cáhan da. Já nacachi da já:

68 Cáhnu ná cacuu Ndióxi, mé a cúu xitoho ñayivi naquixi chichi Israel.

Jáchi naquixi a jáca a mí, na cúu cuéntá mé á.

69 Nachindahá Ndióxi mé a jáca a mí ná a cúhun yó indayá.

Ta íin ndée á cája tóco ndihi ña náhnu.

Ta naquixi a chichi David, da nacaja chúun cuéntá Ndióxi sanahá.

70 Ta janda sanahá ndivaha nasahañ Ndióxi tuhun a ña caja mé á ña yóho.

Ta já najáyaha na profeta cán tuhun nacahañ Ndióxi nuú ñayivi.

71 Ña nacachi mé á quéa jáca a mí ndahá na ihvi yo xihin ndáha na coo cúni mí.

72 Ta nacachi a tahvi ini a saha tásahnu jícó yo, na nasanduu sanahá cán.

Ta a ndíndójó toho mé á saha tuhun yii nasahañ nu ná jáchi ña yii cúu tóco ndihi tuhun sahan Ndióxi nuú ñayivi.

73 Ña yóho cúu tuhun nacachi Ndióxi jáxinu coo a nuu tá nasahañ mé á tuhun a nu Abraham, da nasacuu tásahnu jícó yo cán.

74 Ta nacachi mé á xihin dá ña jáca a mí ndahá na coo cúni mí já ná a cáyhvi yo caja chúun í cuéntá mé á.

75 Ta já ná cacuu ñayivi ndaa, na nandiquiahva mé caja ña cúni mé á tóco ndihi quivi ndúú ñuyivi yóho, nacachi Zacarías nu ndíhi ñayivi cán.

76 Anda já nacasáhá da cáhan da xihin ña loho jahyi da já cáhí da já xihin á:

Ta yóhó, jahyi a, cachi ñayivi sahan ña cúun in profeta Ndióxi, mé a cúu cáhnu nu ndíhi a.

Ta jihna ñúhú cuhún jácahun ñayivi ña ná cacu tiahva na ínima ná ndiquehe na mé a chindahá Ndióxi vaxi.

77 Ta xihín ña yóho cuu caxi tuhún xihín ñayivi ña cája cáhnu ini Ndióxi sahá cuachi na.

Já ná cuu cacu ndaa ínima ná ná a cuhun na indayá.

78 Sahá ña quíhvī ini Ndióxi mí ta sahá ña táhvī ini mé á saha yó sahá ña cán queá janda indivi nu íin mé á nachindahá a in a cuu chindeé a mí ná ndihví ichí saá cuéntá mé á.

79 Jáchi vaxi a jándiyehē a nuú ñayivi ndúu nuú naá ña ná caca na íchi nuú cuu coo vaha ini na xihín Ndióxi, nacachi Zacarías xihín jahyi loho da.

80 Já nacasáhá sáhnú taa loho cán cuahan da. Ta ndíndacú da xihín ñaha Ndióxi viti. Ta nasahin da yucú íchi nuú co ndúu cuahá ñayivi janda quiahva naxinu quiví nacasáhá jána ha da nuú na Israel.

## 2

*Tá nacacu Jesús ñuu Belén (Mt. 1:18-25)*

1 Ta mé tiempo cán tá nasacomí Augusto cuéntá sahá ñayivi ndúu ñuyiví já nasahnda da chuun ña ná nditaca quiví ndaja táhan ñayivi cómí da cuéntá saha. 2 Ta mé tañu nu cuití tá nanditaca quiví ná já nasacuu Cireneo gobernador

estado Siria. 3 Ta tóco ndihi ñayivi nanditahan nu ná cuhun na tá ñuu tá ñuu nuú nacacu tásáhnú jícó na ná quee quiví ná. 4 Sahá ña cán queá naquee José ñuu Nazaret cuéntá Galilea cán já nasahan da ñuu Belén ña ndacaan estado Judea nuú nacacu David jáchi naquixi da chichi David. 5 Nasahan María xihín José ñuu Belén quee quiví ná. Mé María yóho cúú ña naxica da cacuu ñájihí da. Ta sa já ñúhu jahyi ña cuahan ña ñuu Belén. 6 Ta nani nasanduu na ñuu Belén cán naxinu quiví cacu jahyi María. 7 Ta nacacu jahyi nuú ña. Ta nachitiví ña a ticoto já nachindúhu ña a nu xixáhan quítí cán. Mé nu sánduu quítí cán nacacu jahyi María jáchi coo nañehē ná vehe canduu na jáchi sa nacatáñu va vehe nuú canduu ñayivi xínu coo ñuu Belén cán.

*Cáxi tuhun táto Ndióxi xihín na ndáá ndicachi ña nacacu Jesús*

8 Nasanduu java na ndáá ndicachi jana ná ñuu yati ñuu Belén cán. 9 Ta in náá cuití nanaha táto Ndióxi mé á nu ná. Ta chí nandiyihvi ndaa nu ndúu na cán nacaja Ndióxi ta nayihvi ndivaha na. 10 Joo nandicahan táto Ndióxi cán xihín ná já nacachi a já:

—A yíhví toho ndó jáchi tuhun vaha queá ñéhe e vaxi i cahan i xihín ndo. Ta xihín ña yóho cajii ndivaha ini tóco ndihi ñayivi. 11 Jáchi mé quiví viti nacacu in a jácacu a ndohó nuú cuachi ndó ta

mé á cán cúu Cristo, xitoho ndó, ña nāchindahá Ndióxi cacomí a cuénta saha ndo. Ta nacacu a ñuu Belén nuu nacacu David sanahá. <sup>12</sup> Tá ná cūhun ndo cán já cuni ndó ña loho cán cátiví a ticoto cándúhu á nu xixáhan quíti. Tá ná cuni ndó ña yóho já candaá ini ndó ña cáhan i ña ndaa xihín ndo —nacachi táto Ndióxi xihín na ndáá ndicachi cán.

<sup>13</sup> Ta nani cáhan táto Ndióxi cán naxinu coo cuaha chága táto Ndióxi nu ín a cán. Mé táto Ndióxi yóho naquixi na indivi ta cája cáhnu na Ndióxi já cáhí na já:

<sup>14</sup> Cáhnu ná cacuu Ndióxi ín indivi.

Ta ná coo vaha ini tóco ndihi ñayivi ndúu ñuyíví, mé na cáji ini xihín ñamaní cája Ndióxi xihín ná, nacachi táto Ndióxi cán.

<sup>15</sup> Ta tá sa nandicó coo táto Ndióxi cán cuahan chí indivi já nacasáhá cáhí xihín táhan na ndáá ndicachi cán já:

—Cóho quí yó ñuu Belén candehé yó ña nacachi Ndióxi, xitoho í xohó ña nacuu ñuu Belén cán.

<sup>16</sup> Já xínu na nasahan na ta tá naxinu coo na cán já nandinehe ná María xihín José xihín mé ña loho cándúhu nu xixáhan quíti cán. <sup>17</sup> Anda já nacasáhá nandicani na ndáá ndicachi cán nu ná ña nacachi táto Ndióxi xihín ná sahá ña loho cán. <sup>18</sup> Ta chí cátontó tóco ndihi ñayivi tá xini johó na ña ndícani na ndáá ndicachi cán nu

ná. <sup>19</sup> Joo nandicūhun ini María tóco ndihi ña nayaha ta ndícani ini ña sahá. <sup>20</sup> Tá nandihí já naquee na ndáá ndicachi cán cuahan na. Ta a juú quiahva cája cáhnu na Ndióxi cuahan na saha tóco ndihi ña naxini johó na xihín saha tóco ndihi ña naxini na jáchi nasahin tá ín nacachi táto Ndióxi cán xihín ná.

*Tá ñéhe na léé loho Jesús cuahan na ndiquiahva na cuénta saha mé á veñuhu cáhnu ñuu Jerusalén*

<sup>21</sup> Tá nayaha una quivi nacacu léé jahyi María cán já nachicaan na marca yiquí cuñu a tá quiahva ín costumbre na. Ta nasacu na quivi á cananí a Jesús jáchi quiahva já nacachi táto Ndióxi cán xihín María ña ndítahan cananí a janda tá cámaní cañuhu jahyi ña.

<sup>22</sup> Ta nu ley Moisés, ña nacahyí da sanahá cáhí a ña tá ná ndihi nacacu jahyi in ñañáha, a cúu quihvi ña veñuhu anda ná yaha sáhdá ley quivi. Ta tá sa nayaha quivi cán já naquehe María xihín José mé léé loho Jesús cán. Já ñéhe na ña cuahan na ndiquiahva na cuénta sahá nu Ndióxi veñuhu cáhnu ñuu Jerusalén cán. <sup>23</sup> Nacaja na ña yóho jáchi já cáhí ley nasahnda Ndióxi sanahá: “Tóco ndihi taa valí, na cúu jahyi nuu najihí, ndítahan ndiquiahva na ña nu Ndióxi.” <sup>24</sup> Ta jári najoco na ña sáhdá ley Moisés coo tá nandihí nacacu jahyi na. Ta ña yóho cúu ivi ndiyuu á ivi ndijata.

25 Ta ndaja coo mé tiempo cán *naṣah̄iin* in *daṭaa* naní Simeón ñuu Jerusalén cán. Ta *naṣacuu* da in *ṭaa* vaha ndivaha, *da* cája cáhnu Ndióxi. Ta ndáti da *xinu* *coo* *quivi* chindahá Ndióxi in *da* chindeé *na* Israel já ná a ndóho *ga* ini na. Ta nandicutú ndaa ínimá dá *xih̄in* ínimá *yii* Ndióxi. 26 Ta mé a cán *queá* *naçachi* *xih̄in* dá ña a *quivi* toho da *janda* *quiahva* ná cuni táhyí *da* Cristo, mé a *naṣahan* Ndióxi *tuhun* a chindahá a. 27 Ta mé ínimá *yii* Ndióxi ndáca Simeón *cuahan* *da* veñuhu mé *quivi* *naxinu* María *xih̄in* José cán *caja* na *xih̄in* Jesús tá *quiahva* *sáhdá* ley Moisés *caja* na. 28 Tá nandique táhan da *xih̄in* ná já *natiin* da Jesús já *naṣahe* ndaa da a. Já *naçasáhá* *da* cája cáhnu da Ndióxi já *cáchí* *da* já: 29 *Tátá* Ndióxi, *sa* *cuu* *quiahva* ndó ñamaní *quivi* *yaa* *i* viti, *jáchi* *sa* *najáxinu* *coo* ndó *nuú* *tuhun* ndó, ña *naṣahan* ndó *nuú* *yehe*, *da* *cúu* mozo ndo. 30 *Jáchi* *naxini* *i* *xih̄in* *nuú* *i* mé a *nachindahá* ndó *jáçacu* *ndehe*. 31 *Naçacu* ndó a ña ná *jáçacu* a ndaja *táhan* ñayivi. 32 Mé a *yóho* *jándiyehē* a *nuú* *na* *coo* *naquixi* *chichi* Israel. Ta *saḥa* mé a *yóho* *cahan* vaha ñayivi *saḥá* *na* Israel, *na* *cúu* *cuéntá* mé ndo, *naçachi* Simeón. 33 *Chí* *naçatóntó* José *xih̄in* María *táa* *joho* na ña *cahan*

Simeón *saḥa* Jesús. 34 Tá *nandihí* *naxiça* *tahví* Simeón *nu* Ndióxi *saḥa* ná *anda* já *naçasáhá* *cáchí* *da* já *xih̄in* María, *náná* Jesús:

—*Naçaxi* Ndióxi *ṭaa* *loho* *yóho* ña ná *caja* da ná *cuhun* *cuahá* *na* Israel *ndoho* ini na *ta* *caja* da ña ná *çacu* *ínimá* *cuahá* *na* cán. *Naquixi* da *nu* Ndióxi *joo* *candají* *cuaha* ná *da* 35 já *náha* *táhyí* ña *cáhvi* ini in in *na* cán. Ta *yóhó*, *María* *tahvi* *ndivaha* *inún* *saḥá* ña *yóho* *ta* *cacuu* a *tátuhun* *tuxú* *na* *machiti* *ínimun* —*naçachi* Simeón *xih̄in* María.

36 Ta mé cán *naṣah̄iin* ri in ñá naní Ana, ñá *jáya* *tuhun* *cahan* Ndióxi *nuú* ñayivi. Ta *naçacuu* ñá *jaḥyi* *da* naní *Faniel*, *da* *naquixi* *chichi* *Aser*. Mé Ana *yóho* *naçayatá* ña. Tá *yúṭa* ñá *naṭandaha* ña *joo* *usa* *laá* *cuiá* *naṣah̄iin* ñá *xih̄in* *yí* ña já *naxih̄i* *da*. 37 Ta *viti* *sa* *naxinu* *comi* *jicó* *comi* *cuiá* *in* *cuāan* ña. *Ñuu* *ta* *ndivi* *in* *tuun* ña *veñuhu* *cája* cáhnu ñá Ndióxi. *Xíjuhun* ñá *ta* *xíça* *tahví* ña *nu* mé á. 38 Mé *hora* *in* Simeón *ndítuhún* *da* *xih̄in* María já *naxinu* *coo* Ana cán. Ta tá *nandihí* *nandiquiahva* ñá *ndixahvi* *nu* Ndióxi já *naçasáhá* *cahan* ñá *saḥá* ña *loho* Jesús cán *nuú* ñayivi, *na* *ndáti* *quixi* *quivi* *chindahá* Ndióxi *da* *chindeé* *na* ñuu Jerusalén. Ta *cáchí* ñá ña *jivi* mé Jesús cán *queá* *ndáti* *na* *quixi*.

*Tá nandicó coo na ñuu Nazaret*

39 Tá *nandihí* *naçaja* José *xih̄in* María ña *sáhdá* ley

Moisés cája na cán já cuanúhu na ñuu Nazaret, ña ndácaan estado Galilea cán. <sup>40</sup> Ta mé taa loho Jesús sáhnú da ta ndíndacú da. Ta johó ndíndíchí ga ví jini dá cuahan da. Ta cuahá ndivaha ñamani cája Ndióxi xihin dá.

*Ndácaan Jesús veñuhu cáhnu ñuu Jerusalén*

<sup>41</sup> Tá nu cuiá sáhan náná tátá Jesús víco pascua ñuu Jerusalén. <sup>42</sup> Ta tá naxinu Jesús uxu ivi cuiá já ndáca táhan mé á xihin ná tá cuahan na víco ñuu Jerusalén cán jáchi já nasahin costumbre ñayivi cája na tañu víco cán. <sup>43</sup> Ta tá sa nayaha víco cán já nandicó coo José xihin María cuahan na. Joo coo naxini na ña nacandoo Jesús ñuu Jerusalén cán. <sup>44</sup> Tañu ñayivi cuaha cán catáhan da vaxi da, nacahan na. Ta tá sa naxinu ní in quivi xica na cuahan na já nacasahá ndínducú na da tañu ñayivi cúu táhan na xihin tañu na xini táhan xihin ná. <sup>45</sup> Joo coo nandiñehe ná da. Anda já nandicó coo tucu na ñuu Jerusalén ndínducú na da.

<sup>46</sup> Janda quivi uni ví já nandiñehe ná Jesús ini veñuhu cáhnu cán. Caa lin coo da tañu na jánahá ley Moisés cán. Taa johó da nu cáhan na ta ndáca tuhún da na sahá java ga ñaha. <sup>47</sup> Ta chí catóntó tóco ndihi ñayivi tá xini johó na tuhun ndúcu ñehe da nuú na jánahá ley Moisés cán jáchi náha ña ndíchí jini dá. <sup>48</sup> Tá naxini María xihin José ña ndácaan Jesús tañu na jánahá ley Moisés cán já nacatóntó

na. Anda já nacachi María já xihin Jesús:

—Jahyi maní i. Ndá cuéntá quéa nacajún ña yóho xihin nde. Yehe xihin tátún a juú quiahva ndicani ini nde xica nuu nde ndínducú nde yohó —nacachi María xihin Jesús.

<sup>49</sup> Anda já nacachi Jesús já: —Ndá cuéntá quéa ndínducú ndó yehe. Á co xini toho ndó ña ndítahan ndihi ini i cája i chuun nasahnda tátá i, mé á lin indiví nuú i cája i, vaha —nacachi Jesús xihin ná.

<sup>50</sup> Joo ni María ni José coo nacandaa ini na ña nacachi Jesús cán xihin ná.

<sup>51</sup> Anda já nandicó coo Jesús cuahan xihin ná ñuu Nazaret. Ta nacaja da tóco ndihi ña cuni na. Ta nandicuhun ini María ña nacaja Jesús ini veñuhu cáhnu cán. <sup>52</sup> Ta sáhnú Jesús ta cátaçu ini da cuahan. Ta cájii ini Ndióxi xihin ña cája Jesús. Ta quiahva já cájii ri ini ñayivi va xihin ña cája da.

### 3

*Cásahá Juan cáhan da tuhun Ndióxi xihin ñayivi yucú íchí cán*

(Mt. 3:1-12; Mr. 1:1-8; Jn. 1:19-28)

<sup>1</sup> Tá naxinu sahun cuiá cómi Tiberio cuéntá sahá ñayivi ñuyivi já nasacuu Poncio Pilato gobernador nuú na ndúu estado Judea. Ta da naní Herodes nasacuu gobernador nuú na ndúu estado Galilea. Ta ñani Herodes, da naní Felipe

cán nasacuu gobernador nuú na ndúu Iturea xihín nuú na ndúu Traconite. Ta da naní Lisanas nasacuu gobernador nuú na ndúu Abilinia. <sup>2</sup> Ta Anás xihín Caifás nasacuu da sacuaḥa nu ndíhi jutú. Mé tiempo cán naçahan Ndióxi xihín Juan, da cúu jahyi Zacarías, mé nu ín da yucú íchí cán. <sup>3</sup> Anda já nayaha Juan ndíjáá ñuu válí ñúhu yuhú yuta Jordán cán. Ta cáxi tuhun da nuú ñayivi ña ndítahan nu ná jándacoo na ña núu cajú na já ná cajú cáhnu ini Ndióxi sahá cuachi na ta já ná candúta ná. <sup>4</sup> Tóco ndihi ña yóho nayaha tá ín naçachi Isaías tá naçahyí da sanahá:

Vaxi quivi tá cahan cóhó in da tañu yucu íchí ta cachi da já:

“Caja tiaḥva ndó íchí nuú quixi xitoho í,

ta cuná ndó in ichí ndacú nu mé á ña ná ndihvi a ínimá ndo.

<sup>5</sup> Tóco ndihi ña cúu táhvi ná ndicutú ndihi a.

Tóco ndihi yucu xihín xiqui ná ndicava ndaa ndihi a.

Tóco ndihi ichí ndicava ná ndindacú ndihi a.

Ta íchí ña co ín ndaa nuu ndindaa ndihi nu á.

<sup>6</sup> Ta tóco ndihi ñayivi ndúu ñuyiví cuni na ndá quiaḥva jácacu Ndióxi ñayivi”, já cáchí tutu naçahyí Isaías sanahá ndivaḥa.

<sup>7</sup> Ta naçasáhá ñayivi ndái cuu na nu ín Juan ña ná jácandúta da na joo naçasáhá

xójo ndivaḥa ini da xihín ná já cáchí da já:

—Mé ndó cúu ndó tátuhun coo jáchi cúu ndó na quini. Cáhán ndo ña a jándoho ga Ndióxi ini ndó sahá cuachi ndó tá ná candúta ndo vatí cajú tá cajú ndó cuachi. <sup>8</sup> Xíni ñúhú cajú ndó ña vaha já ná cuni ñayivi ña mé a ndaa táhyí najándicoo ndó ña núu nasacaja ndó jihna. Ta a cáhán ndo ña jácacu Ndióxi ndohó sahá ña cúu ndó na naquixi chichi Abraham. Jáchi coo saḥa toho ña jan nu Ndióxi tá co jándacoo ndó cuachi ndó. Jáchi mé a ndaa ná cahan i xihín ndó ña janda yuu ndúu nu ñúhu jan cuu cajú Ndióxi ña ná nduu a ñayivi quixi chichi Abraham. <sup>9</sup> Mé ndó cúu ndó tátuhun in yíto, dó sa natiin na hacha cuahan na cahnda na. Ta tóco ndihi yíto, dó co sahan cuhi vaha nuu, taḥnda do ta quee dó nu ñúhu cayi do. Quiaḥva já cajú rí Ndióxi xihín ndohó tá co cuni ndó ndicó coo ini ndó nu mé á —naçachi Juan xihín ñayivi cán.

<sup>10</sup> Anda já naçasáhá ñayivi cán ndaca tuhún na da já cáchí na já xihín dá:

—Ndía ndítahan nuú nde cajú nde.

<sup>11</sup> Já cáchí Juan já xihín ná:

—Ndá na ndúu ivi cotó ná quiaḥva na in a nuú na coo ñaha nuu. Ta ndá na ín ña cuxu ná cahnda java táhan na ña xihín na coo a nuu —cáchí Juan xihín na cán.

<sup>12</sup> Tañu na nandai cuu cán naxinu rí java da jácaca

jiuhún cuéntá impuesto ña candúta dá. Ta nandaca tuhún da Juan já nacachi da já:

—Maestro, ndia ndítahan nuú nde caja nde.

<sup>13</sup> Anda já nacachi Juan já xihin dá:

—Quehe ndó jiuhún nuú ñayivi tá quiahva sáhdá ley cuití va quehe ndó —nacachi Juan xihin da cán.

<sup>14</sup> Ta jári java da cúu soldado nandaca tuhún da Juan já nacachi da já:

—Ta ndehe ri ndia ndítahan caja nde.

Já nacachi Juan já xihin dá:

—A cándaa ndó ña cómi ñayivi. A jáyihví ndó na sahá ña ná quiahva na ñaha nu ndo. Ta ni a jácojo ndó cuachi jata ná tá coo nacaja na ña. Ta xini ñuhú coo vaha ini ndó xihin yahvi quehe ndó sahá chuun cája ndó —nacachi Juan xihin da cán.

<sup>15</sup> Tóco ndihi ñayivi ndihi ini na jáchi cuni na candaa ini na ña á mé Juan cúu Cristo, da nachindahá Ndióxi cacomí cuéntá sahá ñayivi.

<sup>16</sup> Joo nandicahan Juan xihin tóco ndihi ñayivi já nacachi da já xihin ná:

—Mé a ndaa cája ndúta i ndohó xihin ticui. Joo vaxi inga da ta da cán cúu da jándicutú ínimá ndo xihin ínimá yii Ndióxi ta ña cán cacuu a tátuhun ñuhú cáyi. Ta da cán íin cuaha chága ndée dá a juú ga yehe. Ta chí coo sahá i ndica xítí i nu dá ña ndaxí i correa ndusa dá. <sup>17</sup> Mé da vaxi cán caxi

da ñayivi vaha tañu ñayivi quini. Cúu á tátuhun in dataa tá jáxixi da trigo xihin pala já ná quee xehe á já cacu vaha da ña. Ta xehe nacana cán cuhun a cayi a xihin ñuhú ita ña a ndáhva toho —nacachi Juan.

<sup>18</sup> Quiahva johu nahan Juan nuú ñayivi tá nacaxi tuhun da tuhun vaha nu ná. Ta cuahá java ga ñaha cahan da xihin ná caja na. <sup>19</sup> Inga ñaha nacaja da quéa najánani da Herodes, da cúu gobernador jáchi nasahjin Herodes xihin Herodías, ña cúu ñajihí ñani da, Felipe. Ta najánani Juan da sahá java ga ña núu nacaja da. <sup>20</sup> Joo nacaja jóhó Herodes mé dá ta coo naxeen da coo johu da nu cahan Juan xihin dá. Ña nacaja da quéa nacaja chága da ña núu tá nachicaan da Juan vecaa.

### *Tá nacandúta Jesús*

*(Mt. 3:13-17; Mr. 1:9-11)*

<sup>21</sup> Tá camaní ndacaan Juan vecaa, cája ndúta dá ñayivi ta já najacandúta ri da Jesús. Ta nani xica tahvi Jesús nu Ndióxi já nanuna indiví. <sup>22</sup> Ta nanuu ínimá yii Ndióxi jata Jesús. Ta nasacaa ínimá yii Ndióxi yóho tá quiahva cáa in ndijata. Tá nandihí já naxini johu na ña cahan in a indiví já nacachi a já:

—Yóhó cúun jahyi maní i ta cájii ndivaha ini i xuhun —nacachi a.

*Ña yóho cúu quivi na nasacuu tásáhnú jícó Jesús*  
*(Mt. 1:1-17)*



23 Naşandacaan Jesús táťuhun oco uxu cuja tá naçasáhá jánahā tuhun Ndióxi nuú ñayivi. Ta naçahán ñayivi ña naşacuu a jahyi José. Ta José cán naşacuu da jahyi Elí, 24 ta táť Elí naşananí Matat. Ta táť Matat naşananí Leví. Ta táť Leví naşananí Melqui. Ta táť Melqui naşananí Jana. Ta táť Jana naşananí José. 25 Ta táť José naşananí Matatías. Ta táť Matatías naşananí Amós. Ta táť Amós naşananí Nahum. Ta táť Nahum naşananí Esli. Ta táť Esli naşananí Nagai. 26 Ta táť Nagai naşananí Maat. Ta táť Maat naşananí Matatías. Ta táť Matatías naşananí Semei. Ta táť Semei naşananí José. Ta táť José naşananí Judá. 27 Ta táť Judá naşananí Joana. Ta táť Joana naşananí Resa. Ta táť Resa naşananí Zorababel. Ta táť Zorababel naşananí Salatiel. Ta táť Salatiel naşananí Neri. 28 Ta táť Neri naşananí Melqui. Ta táť Melqui naşananí Adi. Ta táť Adi naşananí Cosam. Ta táť Cosam naşananí Elmodam. Ta táť Elmodam naşananí Er. 29 Ta táť Er naşananí Josué. Ta táť Josué naşananí Eliezer. Ta táť Eliezer naşananí Jorim. Ta táť Jorim naşananí Matat. 30 Ta táť Matat naşananí Leví. Ta táť Leví naşananí Simeón. Ta táť Simeón naşananí Judá. Ta táť Judá naşananí José. Ta táť José naşananí Jonán. Ta táť Jonán naşananí Eliaquim. 31 Ta táť Eliaquim

naşananí Melea. Ta táť Melea naşananí Mainán. Ta táť Mainán naşananí Matata. Ta táť Matata naşananí Natán. 32 Ta táť Natán naşananí David. Ta táť David naşananí Isai. Ta táť Isai naşananí Obed. Ta táť Obed naşananí Booz. Ta táť Booz naşananí Salmón. Ta táť Salmón naşananí Naasón. 33 Ta táť Naasón naşananí Aminadab. Ta táť Aminadab naşananí Aram. Ta táť Aram naşananí Esrom. Ta táť Esrom naşananí Fares. Ta táť Fares naşananí Judá. 34 Ta táť Judá naşananí Jacob. Ta táť Jacob naşananí Isaac. Ta táť Isaac naşananí Abraham. Ta táť Abraham naşananí Taré. Ta táť Taré naşananí Nacor. 35 Ta táť Nacor naşananí Serug. Ta táť Serug naşananí Ragau. Ta táť Ragau naşananí Peleg. Ta táť Peleg naşananí Heber. Ta táť Heber naşananí Sala. 36 Ta táť Sala naşananí Cainán. Ta táť Cainán naşananí Arfaxad. Ta táť Arfaxad naşananí Sem. Ta táť Sem naşananí Noé. Ta táť Noé naşananí Lamec. 37 Ta táť Lamec naşananí Matusalén. Ta táť Matusalén naşananí Enoc. Ta táť Enoc naşananí Jared. Ta táť Jared naşananí Mahalaleel. Ta táť Mahalaleel naşananí Cainán. 38 Ta táť Cainán naşananí Enós. Ta táť Enós naşananí Set. Ta táť Set naşananí Adán. Ta Ndióxi naçavaħa Adán.

*Xíto ndojó tiñáhá sacuaḥa Jesús*

(Mt. 4:1-11; Mr. 1:12-13)

1 Tá nandihí cán naquee Jesús yuta Jordán. Ta nandicutú ndaa ínima mé á xihín ínima yíi Ndióxi ta mé á cán nasandaca Jesús nasahan yucú íchí nuú co ndúu ñayivi.

2 Ta cán nasahin Jesús tixi ivi jico quivi ta naxito ndojó tiñáhá sacuaḥa mé á. Ta tóco ndihí quivi cán coó naxixi a ta tá nandihí já nacasáhá cuico a. 3 Anda já nacachi tiñáhá sacuaḥa cán já xihín á:

—Tá ta jivi ndusa jahyi Ndióxi cúun, cahnda chuun ña ná nduu yuu yóho pan.

4 Anda já nanducú ñehe Jesús tuhun nu rí já nacachi a já:

—Já cáchí tuhun Ndióxi: “A juú pan cuití cuxu ñayivi já catacu na, vaḥa. Xíní ñúhú caja ri na ña sáhdá tuhun Ndióxi nu ná já quea ná cuu catacu na nu Ndióxi”, — nacachi Jesús xihín rí cán.

5 Tá nandihí já ndáca tiñáhá sacuaḥa cán Jesús nasahan rí in jini yucú jícó xihín á já nanaha rí tóco ndihí ñuu ndúu ñuyiví nu á in tóo loho johó. 6 Anda já nacachi rí já xihín á:

—Candehé ndaja náhnu cúu ñuu ndúu ñuyiví ta yehe sáhdá i chuun nuú ndaja táhan ña ta cuu jasá i ña nu yóhó jáchí cuu jasá i ña yo nu cúni mí i jasá i ña. 7 Ta quiahva i ña nun tá ná caxítun nuú i caja cáhnún yehe —nacachi rí xihín á.

8 Joo nanducú ñehe Jesús tuhun nu rí já cáchí a já:

—Satanás, cuáhán caxoo jáchí já cáchí tuhun Ndióxi: “In túhún Ndióxi, xitohún ndítahan caja cáhnún ta in túhún mé á ndítahan caja ndívún nuu” —nacachi Jesús xihín tiñáhá sacuaḥa cán.

9 Tá nandihí já ndáca tucu tiñáhá sacuaḥa cán Jesús nasahan rí ñuu Jerusalén xihín á. Ta najánda rí a nu jícó jini veñuhu cáhnu ndácaan cán já nacachi rí já xihín á:

—Tá ta jivi ndusa jahyi Ndióxi cúun jácana mún chí ninu. 10 Jáchí nuú tuhun Ndióxi ndaa in tuhun ña cáchí a já:

Cahnda Ndióxi chuun nu tátó mé á ña ná candaa na yohó.

11 Ta ndiñehe ndáha ná yohó já quea ná a ndicuehe sahun tá ná cachihin sahun xihín yuu, cáchí tuhun Ndióxi — nacachi rí xihín Jesús.

12 Anda já nanducú ñehe Jesús tuhun nu rí já cáchí a já:

—Ín inga tucu nuú nacahyi tuhun Ndióxi ta cáchí a já: “A cóto ndojó tohún Ndióxi, xitohún” —nacachi Jesús xihín rí cán.

13 Ña cán quea naquee xóo tóo tiñáhá sacuaḥa nu Jesús ta naquee rí cuahan rí jáchí coó nañehe íní rí ndá quiahva coto ndojó chága rí a.

*Tá nacasáhá cáxi tuhun Jesús tuhun Ndióxi nuú na estado Galilea*

(Mt. 4:12-17; Mr. 1:14-15)

14 Ta ndaja coo nandicó coo Jesús estado Galilea. Ta ín cuahá ndée a jáchi nandicutú ndaa ínima mé á xihín ínima yíi Ndióxi. Ta ndijáá ñayivi ndúu cán naçasáhá na cáhan na saha mé á. 15 Ta naçasáhá a jánaha tuhun Ndióxi nuú ñayivi ini veñuhu in in ñuu na. Ta tóco ndihi na cáhan vaha na sahá ña cája mé á.

*Tá nasahin Jesús ñuu Nazaret*

*(Mt. 13:53-58; Mr. 6:1-6)*

16 Tá nandihí já cuanúhu Jesús ñuu Nazaret nuú nasahnu a. Ta mé quívi ndíquehe ndée ná cán, nasahan mé á veñuhu. Ta nacaja tá quiahva sá cajú mé á já nandaca ndichi a cahvi a tuhun Ndióxi nuú ñayivi. 17 Nasahan na libro nacahyí profeta Isaías nu á ña ná cahvi a ña nuú na ndúu veñuhu cán. Ta tá nasuná a libro cán já nandinehe á nu ndaa ña cáchí a já:

18 Chútú ndaa ínima i xihín ínima yíi Ndióxi, jáchi nacaxi mé á yehe ña ná cuhun i caxi tuhun i tuhun saá ña vaha nuú na ndahví.

Ta nachindahá mé á yehe ña ná ndaja vaha i na ín cuéha ini.

Ta nachindahá mé á yehe ña ná caxi tuhun i nuú na ndúu ndahá tiñahá sacuahá ndá quiahva cajú na queta na ndáha ri.

Ta nachindahá mé á yehe ña ná cuná i nduchú

nuú na cuahá já ná cuu candehé na.

Ta nachindahá a yehe ña ná candaa i ña ndóho ini ñayivi.

19 Ta nachindahá mé á yehe ña ná cáhan i xihín ñayivi ña sa naxinu coo tiempo vaha ndivaha jáchi cúni Ndióxi cajú cuahá ñamaní xihín ñayivi, já cáchí ña nacahvi Jesús nuú na cán.

20 Tá nandihí já nachicaji Jesús libro cán já nandiquiahva mé á ña nuú da cajú chúun veñuhu cán ta nasacoo a. Na ñúhu veñuhu cán sándehe na nu mé á. 21 Sahá ña cán quéa nacachi a já xihín ná:

—Mé quívi viti naxini ndó naxinu coo nuú tuhun nacahyí Isaías sanahá ndivaha —nacachi Jesús xihín na cán.

22 Ta ndijáá ñayivi cán cáhan vaha na saha Jesús ta catóntó na sahá ña ndató ndivaha tuhun cáhan xihín ná. Já naçasáhá ndaca tuhún táhan na já cáchí na já:

—Á a juú da yóho cúu jahyi José cán —cáchí na cáhan xihín táhan na.

23 Anda já nacachi Jesús xihín na cán já:

—Cajú i cuéntá cúni ndó cachi ndó tuhun yóho xihín i: “Yohó, da cúu doctor ndaja vaha jihna mún.” Ta xihín ña yóho cúni ndó cachi ndó xihín i: “Ña náhnu naxini johó nde nacajún ñuu Capernaum cán, cajú ña mé ñuu mún yóho ná cuni nde.”

24 Anda já naçahan chága Jesús xihin ná já naçachi tucu a já:

—Mé a ndaa ná çahan i xihin ndo ña ni in túhún toho ñayivi cō ndíquehe vaha na profeta mé ñuu da. 25 Mé a ndaa ná çahan i xihin ndo. Tá naçahin profeta Elías sanahá já naçanduu cuahá ri na cuaan tañu ñayivi Israel ta nandoho ndivaha ini na jáchi naquixi in joco ndeé ndivaha sahá ña coó naçuun javi tixi unj cuia java. 26 Joo coó naçindahá toho Ndióxi Elías ña ná çuhun da chindeé da na ndúu nación Israel cán. Na naçaja Ndióxi quéa naçindahá a da nuú in ña cuaan naçahin ñuu Sarepta yati ñuu Sidón cán. 27 Ta quiahva já naçahin ri tiempo tá naçacuu Eliseo profeta. Mé tiempo cán naçanduu cuahá na nandoho cuehe táhyi nación Israel cán. Joo in túhún da nandaja vaha da cán, da naní Naamán, da naquixi ñuu tóho naní Siria —naçachi Jesús xihín na cán.

28 Tá naçini johō na ñúhu veñuhu cán ña naçachi Jesús xihín ná já naçojo ndivaha ini na xihín á. 29 Já nandicuita na xihín á ta naçavá na Jesús yuhú ñuu. Ta cán najánda na a jinj yucú jíco nu cánúu ñuu cán. Já naçahán na chindahá nihni na a janda ninu. 30 Joo naçaha Jesús cuahan nu ná já naçaque a cuahan va.

*In da naçandacaan ínima quini ini*  
(Mr. 1:21-28)

31 Anda já naçaque Jesús cuahan ñuu Capernaum, ña ndácaan estado Galilea. Ta cán naçasahá jánaça tuhun Ndióxi nuú ñayivi mé quivi ndíquehe ndeé ná. 32 Ta chí cátóntó na tá quiahva jánaça Jesús nu ná jáchi çahan mé á tátuhun in da ín saça cahnda chuun.

33 Mé ini veñuhu nu ndácaan Jesús jánaça cán naçandacaan in dataa, da ndácaan in ínima quini ini. Já naçayuhú ínima quini cán nu Jesús já cáchi rj já:

34 —Jándacoo táji ndehe, Jesús, da ñuu Nazaret. Ndá cuénta quéa quíhvi nuún xihín nde. A vásún jándihún sahá nde. Sa xini vaha i yohó ta cánda cáxi ini i ña cúun in da yji naçindahá Ndióxi —naçachi ínima quini cán xihín Jesús.

35 Anda já naçasahá Jesús jánaçi a ínima quini ndácaan ini dataa cán já naçachi a já xihín rj:

—Caji yuhun ta janí da yóho —naçachi Jesús xihín rj.

Tá naçachi a já chí najándacava rí quini dataa nuú na cán já naçqueta rí ini da cán. Ta coó naçaja rí ni in ña núu xihín dá. 36 Tóco ndihi ñayivi naçanduu cán nayihví ndivaha na. Ta já naçasahá cáchi xihín táhan na já:

—Íin ndivaha sahá tuhun çahan Jesús yóho jáchi xihín ña çahan da sáhdá da chuun xihín ndeé dá ta tává da ínima quini ta chí quée rí cuahan rj —naçachi xihín táhan na cán.

37 Ta ní cúú ñuu váli cán nandicuíta nuu tũhun saha Jesús.

*Ndája vaha Jesús ñá cúú xojo Simón Pedro*

(Mt. 8:14-15; Mr. 1:29-31)

38 Anda já naquee Jesús veñũhu cán já cuahan vehe in da naní Simón. Tá naxinu a cán já naquihvi a ini vehe da. Ta naxini a ña quihvi ñá cúú xojo Simón cán, ña chícãan cáhni ndeé ña. Chí naxica tahví na nu Jesús ña ná ndaja vaha mé á ña. 39 Anda já nacayati Jesús nu ña já nasahnda chuun nuú cuehe cán ña ná quee a. Já nandindaa ña chícãan cáhni á ña chí ivi laá nandicoo ñá já nacasáhá cája ndíví ñá ña cuxu na.

*Ndája vaha Jesús cuahá na quihvi*

(Mt. 8:16-17; Mr. 1:32-34)

40 Tá naqueta nuu candii mé quivi cán já ñéhe ñayivi na quihvi ndúu nu ná naxinu na nu Jesús. Tá nuú cuehe nasandoho na cán ta tá nachinúu Jesús ndáha á jiní in in na já nandivaha na nacaja mé á. 41 Ta cuaha táhan na quihvi cán nacana ínima quini ini na nacaja mé á. Ta tá quéta rí quini cán já cáyuhú cóhó rí nu Jesús já cáhí rí já:

—Yóhó cúún in túhún jiní já jahyi Ndióxi —cáhí rí xihin Jesús.

Joo najánani Jesús ínima quini cán ta co cuni a quiahva ñamaní ña ná cahan rí jáchi xini vaha rí cán ña cúú mé á Cristo, da nachindahá Ndióxi cacomí cuéntá sahá ñayivi.

*Jánaqa Jesús tũhun Ndióxi nuú ñayivi ndúu estado Galilea*  
(Mr. 1:35-39)

42 Tá nativi inga quivi itaan já naquee Jesús ñuu cán ta cuahan in nu cáa xoo. Joo nacasáhá ñayivi ndínducú na mé á janda quiahva naxinu na nu ín a jáchi cuni na caji na nu á ná a jándacoo a na.

43 Anda já nacachi Jesús já xihin ná:

—Ndítahan nuú i cuhun i caxi tũhun i xihin ñayivi ndúu java ga ñuu ña vaxi quivi cacomí Ndióxi cuéntá sahá ná. Jáchi chuun yóho nachindahá Ndióxi yehe vaxi i —nacachi Jesús xihin na cán.

44 Chí naxica nuu Jesús jánaqa tũhun Ndióxi nuú ñayivi ini veñũhu estado Galilea cán.

## 5

*Cája Jesús ña ná cuu tiin cuaha ná tiyacá*

(Mt. 4:18-22; Mr. 1:16-20)

1 In tañu ín Jesús yuhú tañuhú naní Genesaret. Ta a juú quiahva nataca ñayivi chí nacasáhá cándíhi na Jesús jáchi cuni na cuni johu na tũhun Ndióxi. 2 Ta naxini Jesús ivi barco ndíta dó yati yuhú tañuhú cán. Coó da ñúhu ini dó jáchi sa naquee da tává tiyacá ta yati jin va ndícata da ñunu dá. 3 Anda já naquihvi Jesús ini in táhan barco cán, do cúú ñaha Simón. Ta nacachi Jesús xihin Simón ña ná jácaxicá loho da do. Tá nandihí já nasacoo Jesús ini barco já nacasáhá jánaqa nuú ñayivi

janda mé ini barco cán. <sup>4</sup> Ta tá sa nandihí naçahan xihín ñayivi cán já naçachi a já xihín Simón:

—Cañehe barco yóho ná cuhun dó xoo nu cúná chága ticuú ta jácanún ñunún tavún tiyacá —naçachi Jesús xihín dá.

<sup>5</sup> Anda já nanducú ñehe Simón tuhun nu Jesús já cáchí da já xihín á:

—Maestro, nini yaa ñuu naçaja chúun nde ña ndúcú nde tavá nde tiyacá. Ta coo ñaha natavá nde. Joo tá sa cáchí mé ndó já caja i tá íin cáchí ndo cuhun i jácana i ñunu i ini tañuhú —naçachi Simón xihín Jesús.

<sup>6</sup> Ta tá naçaja da ña naçachi Jesús xihín dá já a juú quiahva cuahá tiyacá natavá da chí janda ñunu dá cán naçasahá táhnda. <sup>7</sup> Anda já naçuu ndáha dá nuú java ga da tává tiyacá ñuhu ini inga barco ña ná quixi da chindeé táhan da xihín dá. Anda já naquixi da cán chindeé táhan da xihín Simón. Já najácutú da ndíví barco cán xihín tiyacá chí janda ndúcú cacoo dó cán çahá tañuhú xihín ña cuahá tiyacá naquee ini dó.

<sup>8</sup> Tá naçini Simón Pedro cán ña yóho já naçaxítí da nu Jesús já cáchí da já xihín á:

—A cáyati ndó nuú i, xitoho i jáchí cúu u in taja çaja cuachi.

<sup>9</sup> Já naçachi Simón jáchí nayihví da. Ta quiahva já nayihví da naçhindeé táhan xihín dá cán sahá ña cuaha nahá tiyacá natavá da. <sup>10</sup> Quiahva já nayihví

ri Jacobo xihín Juan, da cúu jahyi Zebedeo. Ndíví da yóho chindeé táhan da xihín Simón cán. Ta já naçachi Jesús já xihín Simón:

—A cáyihví tohún jáchí viti casáhún caca nuún tavún ñayivi tañu cuachi tá quiahva naçajún tá natavún tiyacá ini tañuhú —naçachi Jesús xihín dá.

<sup>11</sup> Ña cán quea tá natavá da cán barco da yuhú tañuhú cán já najándacoo ndihí da ñaha da ta nandico da Jesús.

*Tá nandaja vaça Jesús in da ndóho cuehe táhyi*  
(Mt. 8:1-4; Mr. 1:40-45)

<sup>12</sup> Ta ndaja coo íin Jesús in ñuu ta já naçinu coo in da ndóho cuehe táhyi nu á. Ta tá naçini da Jesús já naçaxítí da nu á janda quiahva naçani ndaa nuú dá nu ñuhú. Já naçasahá xíça tahví da nu á já cáchí da já xihín á:

—Cuu ndaja vaça ndó yehe, xitoho i tá cúni ndo —naçachi da xihín Jesús.

<sup>13</sup> Anda já naçani ndaa ndáha Jesús da já naçachi a já:

—Cúni ña ná ndivahún ña cán quea nandivahún viti —naçachi Jesús.

Tá naçachi Jesús já chí ivi laá nandindaa cuehe táhyi nandoho da cán. <sup>14</sup> Anda já naçahnda Jesús chuun nu dá ña ná a ndícani da nuú ñayivi sahá ña naçaja xihín dá. Ña naçachi a xihín dá quea:

—Cuáhán ndacún jánahun mún nuú jutú. Ta ndítahan jocún ñaha nu Ndióxi tátuhun

naṣahnda ley Moisés ṣanahá caja na sa nandivaha. Já ná candaa ini ñayivi ña sa nandindaa va cuehe naṣandohún —naçachi Jesús xihín da cán.

<sup>15</sup> Joo ví ga ví naçasáhá ndícuíta nuu tuhun sahá ña cája Jesús. Sahá ña cán quéa táca cuahá ndivaha ñayivi cuni johó na nu cáhan mé á xihín ná. Ta jári táca na jáchi cuni na ña ná ndaja vaha mé á na. <sup>16</sup> Joo tává xóo Jesús mé á xoo nuú coó ñayivi ta cán sá xica tahví a nu Ndióxi.

*Ndaja vaha Jesús in da naxihi tuchu saha*

*(Mt. 9:1-8; Mr. 2:1-12)*

<sup>17</sup> In tañu ndácaan Jesús ini in vehe jánaḥa nuú ñayivi. Tañu na cán naṣanduú coo java na fariseo xihín java na jánaḥa ley Moisés. Tóco ndihi na cúu ná na naquixi ndijáá ñuu válí ñúhu estado Galilea cán xihín ñuu válí ñúhu estado Judea xihín ñuu Jerusalén viti. Ta náḥa Jesús ña ñéhe a ndéé Ndióxi jáchi ndivaha ñayivi cája mé á. <sup>18</sup> Mé hora já naxinu coo java dataa ta ñéhe da in xito loho nu cándúhu in da quíhvi, da naxihi tuchu saha. Ta cuni da jáquihvi da da cán ini vehe nu ndácaan Jesús cán já chindúhu dá da nu Jesús, naçahán da. <sup>19</sup> Joo coó naçuu caja da quíhvi da jáchi nanditútú ndivaha ñayivi ndúu na yéhe vehe cán. Sahá ña cán quéa nandaa da jini véhe já natavá da teja cándójó cán. Já najánuu da xito loho nu cándúhu mé da quíhvi cán tañu tóco ndihi

ñayivi ñúhu ini vehe cán jánda quiahva naxinu xito da quíhvi cán nu in Jesús. <sup>20</sup> Tá naxini Jesús ña cándéé ini da ñéhe da quíhvi cán mé á já naçachi a já xihín da quíhvi cán já:

—Candehé. Sa naçaja cáhnu ini i sahá cuachún viti —naçachi Jesús xihín dá.

<sup>21</sup> Anda já naçasáhá na jánaḥa ley Moisés xihín na fariseo cán cáhan na: “Ndá da cúu da yóho ta ndá cuéntá quéa ndája núu da Ndióxi xihín tuhun cáhan da. Jáchi ni in túhún toho ñayivi a cúu caja cáhnu ini sahá cuachi. In túhún jini Ndióxi quéa cuu caja cáhnu ini sahá cuachi”, naçahán na cán.

<sup>22</sup> Joo Jesús sa naçandaa va ini a ña cáhvi ini na cán sahá ña cán quéa naçachi a já xihín ná:

—Ndávaha cáhan ndo já.

<sup>23</sup> Á cáhan ndo ña ihvi chága cachi i xihín da yóho: “Naçaja cáhnu ini i saha cuachún viti.” Á tá coó tá cachi i xihín dá: “Ndicoo ta cuanúhu.”

<sup>24</sup> Candehé vaha ndo ná naḥa i nu ndo ña in sahá i, da naçindahá Ndióxi nduu u ñayivi, caja cáhnu ini i sahá cuachi ñayivi ñuyiví yóho —naçachi Jesús xihín na cán.

Anda já naçachi tucu a xihín da naxihi tuchu saha cán já:

—Ta viti cáhan i xuhun, cuándacoo ndiquehe xito lohún ta cuanúhu.

<sup>25</sup> Tá naçachi Jesús já chí ivi laá nandicoo da nu ndíhi ñayivi ndúu cán jáchi

nandivaha saha dá. Ta nandiquehe da xito loho da nuú nasandúhu dá. Anda já cája cáhnu da Ndióxi naquee da cuanúhu dá vehe da. <sup>26</sup> Ta tóco ndihi ñayivi nasanduú cán naçatóntó na ta naçaja cáhnu na Ndióxi sahá ña naçaja Jesús. Ta a juú quiahva yíhvi na já naçachi na já:

—Ña náhnu ndivaha va quéa naxini quivi viti — naçachi na.

*Cána Jesús in da naní Leví, da cáhan na Mateo xihín, ña ná cáca da xihín á*

*(Mt. 9:9-13; Mr. 2:13-17)*

<sup>27</sup> Tá nandihí já naquee Jesús xíca cuahan. Ta cán naxini a in da játaca jjuhún cuéntá impuesto. Mé da yóho naní da Leví ta íin coo da nu sácoo na játaca jjuhún cuéntá impuesto cán. Anda já naçachi Jesús já xihín dá:

—Naha quí candicun yehe —naçachi a xihín dá.

<sup>28</sup> Anda já nandaça ndichi Leví cán ta najándacoo da tóco ndihi ñaha cán ta já naçasáhá ndíco da Jesús xíca da. <sup>29</sup> Tá nandihí já naçavaha Leví in víco cáhnu mé vehe da cán ña caja cáhnu da Jesús. Ta cán nataca cuaha táhan na játaca jjuhún cuéntá impuesto ndúu na vehe da. Ta cuahá ga ñayivi nataca ndúu coo nu mesa cán. <sup>30</sup> Joo na fariseo xihín na jánaha ley Moisés naçasáhá na cáhan núu na sahá na xíca tuun xihín Jesús já naçachi na já:

—Ndá cuéntá quéa xíxi ndó xihín na játaca jjuhún cuéntá

impuesto ta xihín java ga na cája cuachi —naçachi na cán xihín na xíca tuun xihín Jesús.

<sup>31</sup> Anda já nanducú ñehe Jesús tuhun nuú na cán já naçachi a já xihín ná:

—Ñayivi íin vaha co xíní ñuhú toho na da cája tátá ñahá joo na quíhvi, na cán cúu na xíní ñuhú da cája tátá ñahá.

<sup>32</sup> Ta yehe coo vaxi toho i cana i na sa íin vaha. Vaxi i cana i ñayivi, na cája cuachi ña ná jándacoo na cuachi cája na — naçachi Jesús xihín na cán.

*Ndáca tuhún na Jesús ndá cuéntá quéa co xijuhun da xíca tuun xihín á*

*(Mt. 9:14-17; Mr. 2:18-22)*

<sup>33</sup> Anda já naçasáhá ndáca tuhún tucu na Jesús já cáhí na já xihín á:

—Xíní nde ña xíca tahví ndivaha va na nasaxíca tuun xihín Juan ta jári xijuhun ndivaha va na cán. Ta quiahva já cája na fariseo. Joo na xíca tuun xihín yóhó jan ní tiempo xíxi na pan ta xíhi na vino. Ndá cuéntá quéa cája na já —naçachi na cán xihín Jesús.

<sup>34</sup> Anda já nanducú ñehe Jesús tuhun nu ná já cáhí a já xihín ná:

—Cúu á tátuhun tá cája na víco tándaħa ta íin va mé da tándaħa cán xihín ná já quéa co ndítahan nu ná cajuhun na. Quiahva já íin ri xihín yehe va. Coó saha cajuhun na xíca tuun xihín i jáchi íin vi xihín ná viti. <sup>35</sup> Joo vaxi quivi ndinda da i nuú na yóho. Anda já



casáhá nā yóho cajuhun na —  
nācachi Jesús xihín nā cán.

<sup>36</sup> Andá já nasacu Jesús  
quiahva nū ná já nācachi a  
já xihín ná:

—Ni in túhún toho ñayivi cō  
sáhdá nā in túhún jáhma saá  
já ndicahmá nā in jáhma yatá.  
Jáchí tá ná caja na já játivi na  
jáhma saá cán. Ta ni cō ndíque  
táhan vaha in jáhma yatá tá  
jándaha na ña xihín in túhún  
jahmá saá. <sup>37</sup> Ta ni in túhún  
toho ñayivi cō táán nā vino  
saá ini in nií yatá. Jáchí tá  
ná caja na já já quéa jácāhndi  
va vino saá nií yatá cán. Ta  
xihín ña yóho tivi ní cán ta  
tivi ri dó cúu vino cán va.  
<sup>38</sup> Ña ndítahan caja na quéa  
taán na vino saá ini nií saá já  
ná cuu cañuhu vaha dó cán ta  
mé ní cō cáhndi a. <sup>39</sup> Ta ni in  
túhún táhan nā xihí vino yatá  
cō xíca nā vino saá coho na  
jáchí cáhí nā ña vaha chága  
xihí dó yatá —nācachi Jesús  
xihín quiahva sácú a nuú nā  
cán.

## 6

*Tá nā xíca tuun xihín Jesús  
túhun na yucu jiní trigo quivi  
ndíquehe ndée ñayivi*

*(Mt. 12:1-8; Mr. 2:23-28)*

<sup>1</sup> In quivi ndíquehe ndée  
ñayivi nani xíca Jesús cuāhan  
xihín nā xíca tuun xihín á já  
nayaha na tañu nuú naxutu  
na trigo. Já nācasáhá nā cán  
túhun na yucu jiní trigo cán já  
tává nā trigo já chínihni ndáha  
ná a ta sáxí nā cāsahan nā.  
<sup>2</sup> Tá naxini java nā fariseo cán  
ña cája na já nācachi na já:

—Ndávaha cája ndó chuun  
ña cō ndítahan caja ndó quivi  
ndíquehe ndée yō —nācachi  
nā fariseo cán xihín nā xíca  
tuun xihín Jesús.

<sup>3</sup> Andá já nanducú ñehe  
Jesús túhun nū ná já nācachi  
a:

—Á a ñáha cahvi ndó nuú  
túhun Ndióxi nū cáhan sahá  
ña nācāja David sanahá tá  
nācuico da xihín nā xíca  
xihín dá. <sup>4</sup> Ña nācāja da cán  
quéa naquihvi da ini veñuhu  
Ndióxi ta natiin da pan yí já  
naxixi da ña ta nasahan da  
ña nuú nā xíca xihín dá ña  
ná cuxu na. Joo jutū cuiti  
va cúu nā ndítahan nuú cuxu  
ña cán, nduu. <sup>5</sup> Ta yehe va,  
da nachindahá Ndióxi nduu  
ñayivi in sahá i cahnda i  
chuun sahá quivi ndíquehe  
ndée ñayivi —nācachi Jesús  
xihín nā cán.

*Tá nandaja vaha Jesús in  
da nahichi ndáha*

*(Mt. 12:9-14; Mr. 3:1-6)*

<sup>6</sup> Inga tucu quivi ndíquehe  
ndée ná já naquihvi Jesús  
ini in veñuhu ta nācasáhá  
jánaha nū ná. Ta ini mé  
veñuhu cán nasandacaan  
in dataa, da nahichi ndahá  
cuáha. <sup>7</sup> Ta ndaja coo nā  
jánaha ley Moisés xihín nā  
fariseo nání nā Jesús sándehe  
nā ña á ndaja vaha mé á da  
cán quivi ndíquehe ndée nā.  
Ta xihín ña yóho cáhan nā cuu  
ñehe íni nā jácojo na cuachi  
jatá. <sup>8</sup> Joo sa xini va Jesús ña  
cáhi ini nā cán. Sahá ña cán  
quéa nācachi a já xihín da  
nahichi ndáha cán já:

—Cuándac̄o ta candichi mahñú yóho —nacachi Jesús xih̄in dá.

Andá já nandacá ndichi da cán nuú Jesús.

<sup>9</sup> Andá já nacasáhá Jesús cáhan xih̄in java ga na ndúu cán já nacachi a já xih̄in ná:

—Cuni joh̄o ndó ná ndaca tuhún i ndohó. Ndía cáchí ley ndítahan caja í mé quivi ndíquehe ndée ñayivi. Á chin-deé yo ñayivi á caja í ña núu xih̄in ná. Á jácacu na á cahní yó na —nacachi Jesús xih̄in ná.

<sup>10</sup> Andá já nandicoto nihni Jesús nuú ndihi na nacava nuu ndúu xih̄in á cán. Ta nacachi a já xih̄in da nah̄ichi ndáha:

—Jándacaa ndáhun.

Ta tá najándacaa da cán ndáha dá chí ivi laá nandivaha ndáha dá. <sup>11</sup> Joo tóco ndihi na java ndúu cán naxojo ndivaha ini na. Já nacasáhá ndítuhún xih̄in táhan na ña ndá quéa cuu caja na já ná cuu jándihi na saha Jesús.

*Tá nacaxi Jesús uxu ivi da cacuu apóstol*

(Mt. 10:1-4; Mr. 3:13-19)

<sup>12</sup> Mé tañu já naquee Jesús nasahan in jini yucu caca tahví a nu Ndióxi. Ta níi cúu ñuu naxica tahví a nu Ndióxi. <sup>13</sup> Ta tá sa nativi já nacana mé á na xica xih̄in á. Ta tañu na cán nacaxi a uxu ivi da cacuu da in táhndá taa cananí apóstol, da chindahá a caca nuu cáhan tuhun Ndióxi.

<sup>14</sup> Nacaxi a da naní Simón, da nasacu tucu a quivi cananí

Pedro. Ta nacaxi a da cúu ñani Pedro, da naní Andrés. Ta nacaxi a Jacobo xih̄in Juan xih̄in Felipe xih̄in Bartolomé <sup>15</sup> xih̄in Mateo xih̄in Tomás xih̄in Jacobo, da cúu jahyi Alfeo. Ta nacaxi a Simón, da naxica cuénta na cananista. <sup>16</sup> Ta nacaxi ri a Judas, ñani Jacobo xih̄in Judas Iscariote, mé da najicó tuhún Jesús tá nu ndíhi.

*Jánaqa Jesús nuú cuahá ñayivi*

(Mt. 4:23-25)

<sup>17</sup> Tá nandihí nanuu Jesús jini yucu xih̄in na xica tuun xih̄in á já naxinu a yojó ndaa nasahin a xih̄in ná. Ta cán nasanduu ri cuahá ndivaha ñayivi táhan na naquixi ndijáá ñuu válí ndúu chí estado Judea xih̄in na ndúu ñuu Jerusalén xih̄in na ndúu ñuu Tiro xih̄in Sidón, ña ndúu yati yuhú tañuhú. Ta tóco ndihi ñayivi yóho naxinu na cuni joh̄o na nu cáhan Jesús. Ta naxinu na jáchi cuni na ña ná ndaja vaha mé á na. <sup>18</sup> Ta tóco ndihi na nasañuhu ínimá quini ini nandaja vaha ri Jesús na jáchi natavá a ínimá quini nasañuhu ini na. <sup>19</sup> Ta tóco ndihi ñayivi cuni na cani ndaa ndáha ná Jesús jáchi xih̄in ndée mé á ndaja vaha tóco ndihi na quíhvi.

*Jánaqa Jesús ndá quiahva cajii chaga iní já ná a cánduu cuéha yo*

(Mt. 5:1-12)

<sup>20</sup> Tá nandihí já nasandehé Jesús nuú na xica tuun xih̄in

á já naçasáhá cáchí a já xihin ná:

—Tahví naçuu ndó, na cándahví jáchí ndóhó cúú na cacomí Ndióxi cuéntá saha.

21 Tahví naçuu ndó, na cuíco viti ñúhú jáchí ndóhó cacuu na chutú ndaa tá ná ndihi.

Tahví naçuu ndó, na sácu viti jáchí ndóhó cacuu na casáhá cuacu tá nu ndihí.

22 Tahví naçuu ndó tá cándají ñayivi ndohó ta casáhá táxi na ndohó á cánahá na xihin ndo. Ta tahví naçuu ndó tá quehe núu na ndohó sahá ña cáhán na ña cúú ndó na núu ndivaha. Tá ná caja na tóco ndihi ña yóho xihin ndo sahá ña cándeé ini ndó yehe, da nachindahá Ndióxi nduu ñayivi, tahví naçuu ndó. 23 Já queá ndítahan cájii ndivaha ini ndó mé quivi já jáchí sa naxica tahví Ndióxi in ña vaha ndivaha in indivi quiahva nu ndo. Jáchí tá quiahva cája xíxi na jan xihin ndó viti quiahva já naçaja xíxi ri tásáhnú jícó na jan xihín na nasacuu profeta sanahá.

24 Joo ndáhvi naçuu ndó, na cuicá viti jáchí sa naçajii ndivaha va ini ndó ñuyivi yóho.

25 Ndáhvi naçuu ndó, na nachutú ndaa viti jáchí ndóhó cúú na quixi tama nuu.

Ndáhvi naçuu ndó, na sácu viti jáchí ndóhó cúú na cuacu xihin ña cacuéha ini ndó.

26 Ndáhvi naçuu ndó tá ná casáhá ñayivi cahan vaha na saha ndo jáchí quiahva já naçahan vaha tásáhnú jícó na jan sahá na profeta túhún

naçanduu najándahvi ñayivi sanahá.

*Xini ñúhú quihvi ini na co cúní mí*

(Mt. 5:38-48; 7:12)

27 Tóco ndihi ndó, na xini joho nu cahan i yóho, ndítahan quihvi ini ndó na co cúní ndohó. Ta xini ñúhú caja vaha ndó xihin ndá na cándají ndohó. 28 Xini ñúhú caça tahví ndó nu Ndióxi ña ná caja yii á na nachicaan cháhan jata ndo. Ta caça tahví ndó nu Ndióxi sahá na cánahá xihin ndo. 29 Ta ndá na ná caní in xoo sajóho ndó, cata ñee ndó inga xoo sajóho ndó nu ná ña ná caní na. Ta tá ná candaa na jahmá ndeé ndo quiahva ndó ñamaní ña ná quehe ri na cotó ndo tá já cúní na. 30 A cájihnda ndó nuú na xíca ñaha nu ndo. Ta ndá na cándaa ña cúú ñaha ndó, a ndíndaça ndó ña nu ná. 31 Tá quiahva cúní ndó caja ñayivi xihin ndo quiahva já ndítahan caja ri ndóhó va xihin ná.

32 Jáchí tá quihvi ini ndó ñayivi sahá ña quihvi ri ini na cán ndohó va, ndía vaha cája ndó jáchí quiahva já cája ñayivi quini. 33 Ta tá cája vaha cuití ndo xihín na cája vaha xihin mé ndó, ndía vaha cája ndó jáchí quiahva já cája ri ñayivi quini va. 34 Ta tá sáhan tóo ndó ñaha ndó nuú ñayivi sahá ña cáhán ndo caja na ñamaní xihin mé ndó, ndía vaha cája ndó jáchí quiahva já cája ri ñayivi quini va. 35 Joo ndóhó, xini ñúhú quihvi ini ndó na co cúní ndohó. Ta xini ñúhú caja vaha ndó xihín

ñayivi. Ta xíní ñúhú quiahva too ndó ñaha ndó ta a cándati ndó ña ná nducú ñehe na cán ña nu ndo. Tá ná caja ndó já já quea ñehe táhví ndó ña vaha ndivaha caja Ndióxi ta nduu ndó jahyi Ndióxi, mé a cúu Ndióxi cáhnu ndivaha. Jáchi mé Ndióxi cándahví ini a ndá na co ndíquiahva ndixahvi nu mé á ta cándahví ri ini a ñayivi quini va. <sup>36</sup> Xíní ñúhú tahnda ini ndó sahá ñayivi tá quiahva táhnda ini Ndióxi saha ná.

*Co ndítahan candehé ndaa yó ñayivi*

(Mt. 7:1-5)

<sup>37</sup> 'A candehé ndaa ndó ñayivi já ná a cája Ndióxi já xihín ndo. A chícáan ndó cuachi jatá inga na já ná a quehe Ndióxi cuéntá sahá cuachi mé ndó. Caja cáhnu ini ndó saha ná já ná caja cáhnu ini Ndióxi saha mé ndó. <sup>38</sup> Jasá ndo ñaha nuú ñayivi já ná ñehe ndó ñaha nu Ndióxi. Cúu á tátuhun cája ñayivi tá jáchutú na in ndoho xihín nuní ta quíji nihni na ndoho já ná ndituun a ta jácuyu chága na nuní já táán na ña ini a janda quiahva xíta ña yuhú ndoho cán. Tá quiahva cája mé ndó xihín ñayivi quiahva já caja Ndióxi xihín ndo jáchi tá cuaha sahan ndó nuú ñayivi quiahva já cuaha quiahva ri Ndióxi nu ndóhó va —nacachi Jesús xihín na cán.

<sup>39</sup> Tá nandihi já nasacu a quiahva nu ná já nacachi a já:

—A cúu toho caja in ta cuáá candaca da inga da cuáá

cuhun da jáchi ndíví já da ndicava da yávi. <sup>40</sup> Ni in túhún toho da xíca jácuaha tiaha chága nu mé da jánaha ñahá cán. Joo tá ná xinu quívi já catiahva vaha da já candaa ini da tóco ndihi ña xíní da najána ha ñahá cán.

<sup>41</sup> 'Jáchi ndá cuéntá quea sándehe ndó ña núu cája ñani táhan ndó ta co sándehe ndo ndá quiahva náhnu chága ña núu cája mé ndó. Cúu á tátuhun ndácaan in xehe loho nduchú núu ñani táhan ndó nani ndácaan in yító ndúhu cáhnu ini nduchú núu ndo. <sup>42</sup> Ta tá a cúu cuni ndó yító cáhnu ndácaan ini nduchú núu mé ndó ndaja caja ndó cachi ndó xihín ñani táhan ndó: “Ñani i, ná tavá loho i xehe ndácaan nduchú núun jan.” Jándahvi ndó mé ndó xihín ña cája ndó. Xíní ñúhú tavá ndo yító cáhnu ndácaan nduchú núu mé ndó já ná nuna nu ndó cuni vaha ndó já ná cuu tavá ndó xehe loho ndácaan nduchú núu ñani táhan ndó —nacachi Jesús.

*Tá xíní yó cuihi in yító já cándaq iní ndá yító cúu dó*

(Mt. 7:17-20; 12:34-35)

<sup>43</sup> Anda já nacasáhá tucu a cáchi já:

—Coó toho yító vaha cúun cuihi quini nuu. Ta ni coó yító quini cuu cuun cuihi vaha nuu. <sup>44</sup> Jáchi xihín cuihi cúun nuu in in yító cándaq iní ndá yító cúu dó. A vája cúu tuhun sáhdá ñayivi tití ñuhú nuu tohíñú. Ta ni a vája cúu tuhun sáhdá na uva nuu tonáña yúcu. <sup>45</sup> In ta vaha cáhan da

ndinuhu ña vaha jáchi ndinuhu ña vaha ñúhu ínima dá. Ta in òa quini cáhan da ndinuhu ña núu jáchi ña núu quéa ndácaan ínima dá. Jáchi yúhu ñayivi cána tóco ndihi ña nandicutú ñúhu ínima ná — ñacachi Jesús.

*Sácu Jesús quiahva sahá ivi da ñacavaha vehe*  
(Mt. 7:24-27)

<sup>46</sup> Cáhan tucu Jesús já cáchi a já:

—Ndá cuéntá quéa cáhan xitoho nahá ndó yehe ta co cája ndó ña sáhdá i nu ndó. <sup>47</sup> Ná cahan i xihin ndó ndaja ín da vaxi nuú i cuni johó da tuhun cáhan i ta cája da ña cáchi i. <sup>48</sup> Cúu dá tátuhun in òataa ñacavaha vehe. Tá ñacasáhá da tává da sahá vehe da já ñasata cúná da já ná chinúu da vehe da òata tóto. Ta tá ñasahnu cuahá yuta já ñacani ndaa ñihi ticuúí cán òatá vehe da. Joo coó nandicava vehe da ñacaja ticuúí cán jáchi tóyí cándichi vehe da òata tóto cán. <sup>49</sup> Joo ndá da xini johó nu cáhan i ta co cája da ña cáchi i, cúu dá tátuhun inga òataa, da ñacavaha vehe nu ñúhu uun. Ta coó ñasata da nuú nanduxu sahá. Ta tá ñasahnu cuahá yuta já ñacani ndaa ñihi ticuúí cán òatá vehe da. Ta xihin ña yóho nandicava vehe da ta chí nandihí saha chí uun —ñacachi Jesús.

## 7

*Tá ndadaja vaha Jesús in*

*da cája chúun nuú in jefe soldado*

(Mt. 8:5-13)

<sup>1</sup> Tá nandihí ñacahan Jesús xihin ñayivi cán já ñaquee a cuahan chí Capernaum. <sup>2</sup> Mé ñuu Capernaum cán ñasahiin in òataa, da sáhdá chuun nuú soldado ñaquixi ñuu Roma. Mé da yóho ñasahiin in mozo da ta quíhvi ndivaha ini da mozo da. Joo ndaja coo mé mozo da yóho quíhvi ndeé da ta òandá ja chá quivi da. <sup>3</sup> Tá ñaxini johó da sáhdá chuun nuú soldado yóho sahá Jesús já ñachindahá da java ña sacuahá táhan ña ñaquixi chichi Israel já ná caça ña ñamaní nuú Jesús quixi a ndaja vaha mozo da cán. <sup>4</sup> Tá ñaxinu ña cán nuú Jesús ñacasáhá xíca tahví ndivaha na nu á já cáchi ña já xihin á:

—Ín sahá da sáhdá chuun nuú soldado yóho ña ná chindeé ndó da. <sup>5</sup> Jáchi quíhvi ini da tóco ndihí ñayivi ndúu nación Israel ta sa mé da òan cúu da ñasahnda chuun ña ná cavaha na veñuhu nde — ñacachi ña cán xihin Jesús.

<sup>6</sup> Andá já ñaquee Jesús cuahan xihin ná. Joo tá sa jalóho xinú coo na vehe da sáhdá chuun nuú soldado cán já ñachindahá da java amigo da nuú Jesús ná cahan ña yuhú nu da já ñacachi na já:

—A jándihí ndó mé ndó ndihvi ndó vehe e, xitoho i jáchi coó saha toho i ña ná ndihvi ndó vehe e. <sup>7</sup> Sahá ña cán quéa coó ñasahan ndeé ini i cuhun i ndinducú u mé

ndó. Joo janda nu in ndó jan cahnda ndó chuun ña ná ndivaha mozo i já ndivaha da. <sup>8</sup> Jáchí ndúu java na náhnu chága sáhdá chuun nuú i. Ta ndúu ri soldado sáhdá ri yehe va chuun nuu. Ta tá chindhá i in da ña ná cuhun da nu cuni mí i cuhun da ta cuhan da. Ta tá sáhdá i chuun nuú inga da ña ná quixi da nuú i ta vaxi da nuú i. Ta tá sáhdá i chuun nu mozo i ña ná caja da ña sáhdá i ta cája da ña —nacachi na.

<sup>9</sup> Tá naxini joho Jesús tóco ndihi ña nacahan amigo da sáhdá chuun nuú soldado cán xihín á já nacatontó a xihín dataa cán. Anda já nasandehé a nu tóco ndihi ñayivi ndíco cuhan cán já nacachi a já xihín ná:

—Mé a ndaa ná cahan i xihín ndo ña a ñáha cuni i tañu na Israel in da cándeé cáhnu nahá ini Ndióxi tá quiahva cándeé cáhnu ini da yóho Ndióxi —nacachi Jesús xihín na ndíco jatá cán.

<sup>10</sup> Ta tá nandicó coo na cúu mozo da sáhdá chuun nuú soldado cán vehe da já naxini na ña sa nandivaha va da nasaquihvi cán.

*Tá najánditacu Jesús jahyi in ñá cuáan*

<sup>11</sup> Tá sa nayaha ña yóho já naquee Jesús cuhan chí in ñuu naní Naín xihín na xíca tuun xihín á. Ta a juú quiahva cuhá ñayivi ndíco cuhan. <sup>12</sup> Tá naxinu coo a yati yuhú ñuu cán já naxini a ñayivi ñehe na in ndii cuhan na jánduxu na. Mé ndii cán

nasacuu da in túhún já nu náná da, ña cúu ña cuáan. Ta a juú quiahva cuhá ñayivi ñuu cán ndáca táhan xihín ña cuhan na jánduxu na jahyi ñá. <sup>13</sup> Tá naxini Jesús ña já natahvi ini a saha ña. Anda já nacachi a já xihín ña:

—A cuácu gaun.

<sup>14</sup> Anda já nacayati Jesús nuú sató ndii cán já nacani ndaa ndáha á do. Anda já nasacuita na ndójo sató ndii cán. Ta nacahan Jesús xihín da cúu ndii cán já nacachi a já xihín dá:

—Yehe cahan i xuhun, da tacú, cuándaco —nacachi Jesús xihín dá.

<sup>15</sup> Anda já nasaco da nasacuu ndii cán ta nacasáha da cahan da. Já nandiquiahva Jesús da nu náná da. <sup>16</sup> Tá naxini tóco ndihi ñayivi cuhan cán ña nacaja Jesús já yíhvi na. Ta nacasáha na cája cáhnu na Ndióxi já cáchi na já:

—In profeta cáhnu ndivaha cúu da naxinu coo tañu mí yóho viti.

Ta nacachi tucu na:

—Ndióxi quea naxinu coo nu yo ña ná chindeé a ñayivi cuénta mé á —nacachi na.

<sup>17</sup> Ta níi cúu ñayivi cuénta estado Judea xihín na ndúu yati cán nacandaa ini na sahá ña nacaja Jesús cán.

*Juan, da jácandúta ñayivi, natchindahá da java da xíca xihín dá nu Jesús*

(Mt. 11:2-19)

<sup>18</sup> Ta ndaja coo ñañehe Juan, da jácandúta ñayivi,

tuhun saha tóco ndihi ña nacaja Jesús yóho jáchi nandicani na xica xihin Juan ña nu dá. Sahá ña cán queá nacana da ivi táhan da xica xihin da <sup>19</sup> já nachindahá da na nu Jesús ña ná ndaca tuhún na mé á á jivi ndusa cúú á Cristo, mé a chindahá Ndióxi cacomí cuéntá sahá ñayivi, á ndítahan candati na inga ga quixi. <sup>20</sup> Tá naxinu na xica xihin Juan nu in Jesús já nacachi na já xihin á:

—Da naní Juan, da xica jácandúta ñayivi, da cán cúú da nachindahá ndehe vaxi nde ndaca tuhún nde ndohó á cúú ndó Cristo, ña chindahá Ndióxi cacomí cuéntá sahá ñayivi, á ndítahan candati nde inga ga —nacachi na cán xihin Jesús.

<sup>21</sup> Mé hora naxinu coo na cán nu in Jesús já naxini na nandaja vaha Jesús cuahá ñayivi quíhvi, na nasandoho tá nuú cuehe. Ta natavá a ínimá quini nasañuhu ínimá java na. Ta cuahá ndivaha na cuaá nandinuna nuu nacaja Jesús. <sup>22</sup> Sahá ña cán queá tá nanducú ñehe Jesús tuhun nuú na xica xihin Juan cán já nacachi a já xihin ná:

—Cuahán ndó ndicani ndó nu Juan saha tóco ndihi ña naxini ndó cája i xihin tóco ndihi ña naxini johó ndó cáhan i. Ta ndicani ndó nu dá ña ndínuna nuú na cuaá ta ndícaca na réncó cája i. Ta ndája vaha i na ndóho cuehe táhyi. Ta jándinuna i johó na johó já ná cuni johó na. Ta jánditacu u ndji. Ta cáxi

tuhun i tuhun Ndióxi nuú na ndahví já ná cuu cacu ndaa ínimá ná. <sup>23</sup> Tahví nacuu na co jándacoo ña cändeé ini na yehe —nacachi Jesús xihin ná.

<sup>24</sup> Tá naquee na nachindahá Juan cán cuahan na já nacasahá Jesús cáhan saha Juan nuú ñayivi cán já cáchi a já xihin ná:

—Ndía nacahán ndó cuni ndó tá naqueta ndó nasahan ndó sándehe ndo Juan yucú íchí cán. A juú da cán cúú ta láchá já quíji nuu da tátuhun quíji nuu in tíyoó cája tachí. <sup>25</sup> Ndía naqueta ndó candehe ndó. A juú da cán cúú ta ndíxi jahmá lándá ndivaha. Sa xini vaha ndó ña co ndúu toho da ndíxi jahmá lándá yucú íchí. Ndá da ndíxi jahmá lándá ta cája da ña cuni yiquí cuñu da, mé da cán cúú da ndúu vehe rey cuití va. <sup>26</sup> Ndía nasahan ndó naxini ndó cán. Á coo nasahan ndó cuni johó ndó nu cáhan in da cúú profeta nu ndo. Mé a ndaa da cán cúú dá in profeta ta in chága saha dá a juú ga inga profeta nasanduu sanahá. <sup>27</sup> Jáchi mé Juan cúú dá da cáhan tuhun Ndióxi saha tá cáchi a já:

Chindahá i in da canuú cuhun nu mún, já ná caha tiahva da íchi nuú quisún, já nacahyi a sanahá.

<sup>28</sup> Candehe ndo ná cahan i xihin ndo. Tañu tóco ndihi ñayivi coo ga inga profeta cáhnu chága a juú ga Juan, mé da jácandúta ñayivi. Joo ndá na sa nandiquiahva mé

ndáha Ndióxi ña ná cacomí a cuénta saha ná, vatí cúu ná na coó saha, na cán cúu na cáhnu chága a juú ga Juan —nacachi Jesús.

29 Tá naxini johó tóco ndihi ñayivi ndúu cán ña yóho já nandicuni na ña cája ndaa Ndióxi tóco ndihi ñaha. Na nacahán já cúu na najácandúta Juan ta tañu na cán nasañuhu java ri na játaca jjuhún cuénta impuesto. 30 Joo na fariseo xihín na jánaha ley Moisés, na coó najácandúta Juan cán, na cán cúu na naquehe núu na tóco ndihi ñamani cuni Ndióxi caja xihín ná. 31 Anda já nacachi Jesús já xihín ná:

—Ná cahan i xihín ndó ndaja ín ñayivi ndúu tiempo viti. 32 Cúu ná tátuhun na valí sácoo sájíquí nuú yahví ta cáyuhú na nuú java ga na valí ndúu cán já cáchí na já: “Nativí nde tótíví nu ndo joo coó naxeen ndó cata sahá ndo. Ta naxita cuéha ndivaha nde nu ndo ta ni coó nasacu ndó.” 33 Quiahva já ín ñayivi ndúu tiempo viti jáchí naquixi Juan, da jácandúta ñayivi ta naxijuhun da ta coó naxihi da vino joo nacachi ndó saha dá ña ndácaan ínima quini ini da. 34 Ta tá naxinu yehe, da nachindahá Ndióxi nduu ñayivi ta xíxi i pan ta xíxi i vino já nacasáhá cáchí ndo sahá i ña cúu u in ta ndehé ndivaha ta xíxi ndivaha i. Ta cáchí ndo ña cátoó ndivaha i cacuu u amigo na cája cuachi xihín na játaca jjuhún cuénta

impuesto. 35 Joo na cuni cándaá ini ña ndaa, na cán cúu na cándaá ini ña cája Juan xihín yehe ña ndaa —nacachi Jesús xihín na cán.

*Ín Jesús vehe Simón, da cúu fariseo*

36 In táhan da fariseo nacana da Jesús ña ná cuxun a cuxu a vehe da. Anda já nasahan Jesús vehe da já nasacoo a nu mesa. 37 Joo ndaja coo in ñañáha, mé ña ñuu cán tá nañehe ña tuhun ña naxinu Jesús vehe Simón cán cuxu a já naxinu ña xihín in yúyú alabastro, ña nachutú ndaa xihín sítí támi sahan nacasaá ña nu Jesús. Mé ñañáha yóho cúu ña in ña cája cuahá cuachi. 38 Ta sácu ña nacaxítí ña saha Jesús ta xihín ticuú nuú ña najácuchu ña sahá. Ta tá nandihí já najáhichí ña do xihín ijí jini ña. Anda já natatí yuhu ña sahá. Ta nachojó ña sítí támi sahan cán jata saha á. 39 Tá naxini mé da fariseo, da nacana Jesús vehe da cán ña yóho já nacahán da já: “Tá profeta ndusa ná cacuu da yóho ta sa cándaá va ini da ndá ña cúu ña cáni ndaa ndáha saha dá jáchí cúu ña ña cája cuahá cuachi”, nacahán Simón cán.

40 Anda já nacachi Jesús já xihín da fariseo cán:

—Candehé Simón, cuni johó ná cahan i xuhun —nacachi Jesús xihín dá.

Anda já nacachi Simón cán já xihín Jesús:

—Cahan mé á xihín i, xi-toho i —nacachi da.



41 Anda já nasacu Jesús in quiahva nu dá já nacachi a já xihín dá:

—Nasanduu ivi dataa ta nasayicá da jjuhún nu mé da sáhan too a cán. In da nasayicá uhun ciento ta inga da nasayicá ivi jico uxu. 42 Ta ni in da cán co ndéé da chahvi da ña yicá da sahá ña cán quea nacaja cáhnu ini da sáhan too jjuhún cán sahá ña yicá ndíví da cán. Ta viti cachún xihín i, Simón, ndá da cáhún tixi ndíví da yóho cacuu da da quihvi ini chága mé da, da nacaja cáhnu ini saha cuéntá ña nasayicá da cán —nacachi Jesús xihín Simón.

43 Anda já nanducú ñehe Simón cán tuhun nu Jesús já nacachi da já xihín á:

—Cája i cuéntá ña quihvi ini chága da nasayicá cuahá jjuhún cán nu dá —nacachi da.

Anda já nacachi Jesús já xihín Simón:

—Mé a ndaa cáhún —nacachi a.

44 Anda já nasandehé Jesús ña nachojo síti sahá cán já nacachi a já xihín Simón:

—Candehé vaha ñañáha jan, Simón. Naquihvi i vehún joo coo nasahún ticuú ndoo sahá i. Joo ñañáha yóho najácuchu ña sahá i xihín ticuú nuu ña. Ta tá nandihí já najáhichí ña sahá i xihín ijí jiní ña. 45 Ta yóhó, coo natatí yuhún sajóho yehe tá nasaa i vehún. Joo ña yóho, janda nani naquihvi ña vehún tátí yuhu ña sahá i. Ta anda viti ñuhú cája ña

a. 46 Ta ni coo nachojó tohún síti jiní i tá naxinu i vehún. Joo ña yóho nachojó ña síti támi sahan sahá i. 47 Ta cáhí i xuhun, Simón, ña xihín ña cája ña yóho náha ña mé a ndaa quihvi ini ña yehe jáchí nacaja cáhnu ini i sahá cuachi ña vatí cuahá ndivaha cúu á. Joo ndá na cáhán ña chá cuití va cuachi cája cáhnu ini i saha, na cán cúu ri na chá cuití quihvi ini na yehe —nacachi Jesús xihín Simón.

48 Anda já nacasahá cáhí a já xihín ñañáha cán:

—Sa nacaja cáhnu ini i sahá cuachún viti.

49 Ta tóco ndihi java ga na nataca ndúu coo nu mesa vehe Simón cán nacasahá cáhí xihín táhan na já:

—Ndá ta cúu da yóho jáchí janda cuachi cája ñayivi cája cáhnu ini da saha —nacachi xihín táhan na cán.

50 Anda já nacachi Jesús já xihín ñañáha cán:

—Nacacu ndaa ínimun jáchí nacandee ínún yehe. Cuanúhu ta a ndícani ga ínún viti —nacachi Jesús xihín ña.

## 8

*Tá java najihí chindeé na Jesús*

1 Tá nandihí nayaha ña yóho já nacasahá Jesús xica nuu a cuahá ñuu náhnu xihín ñuu válí ña caxi tuhun a xihín ná ña sa nacayati quiví cacomí Ndióxi cuéntá saha ná. Ta ndíco ndihuxu ivi na apóstol cán mé á. 2 Ta nasandaca táhan java ri najihí xihín á, na natavá

mé á ínimã quini ini xihín na ñandaja vaha mé á nuú cuehe ñasandoho na. Tañu najihí yóho ñasandacaan ñá naní María, ñá cáhan na Magdalena xihín. Mé María yóho cúu ñá ñatavá Jesús usa ínimã quini ini. <sup>3</sup> Ta cátahan ri in ñá naní Juana cuahan ñá xihín na cán. Mé Juana cúu ñá ñájihí ña naní Chuza, ña cómi cuéntá sahá vehe Herodes. Ta jári in ñá naní Susana ñaxica nuu ñá xihín Jesús. Cuaha chága najihí ñaxica nuu na xihín á ta ñachindeé ñahá na xihín ña cómi na.

*Sácú Jesús quiahva sahá in da sátá tata*

*(Mt. 13:1-17; Mr. 4:1-12)*

<sup>4</sup> Naqueta ñayivi cuahá ñuu jáchi cúni na Jesús. Ta tá sa ñataca cuahá ñayivi nu íin Jesús, ñacasáhá cáhan xihín ná. Ta ñasacu a in quiahva nu ná já ñacachi a já xihín ná:

<sup>5</sup> —In ña sátá tata ñaque da cuahan ña cata da ña. Ta tá sátá ña ña cuahan ña já ñacuyu java ña íchi. Ta tá ñayaha ñayivi já ñachinihni saha joho na a ta já ñaxinu laa ñasaxí rí ña. <sup>6</sup> Ta java tata cán ñacuyu a tañu yuu. Ta tá ñanduta mé tata cán, cama chá ñahíchi a jáchi íchí ndivaha tañu yuu cán. <sup>7</sup> Ta java ga tata cán ñacuyu a tañu tohínú ta tá ñanduta ña já ñanditaha ndihi a ñacaja tohínú, dó ñasahnu xihín á cán. <sup>8</sup> Joo java tata ñacuyu a nu ñuhú vaha. Ta tá ñasahnu a já ñajáquee na cuahá ñaha nu á. Janda in ciento tata

ñacana jatá in in nuú tata cán —ñacachi Jesús xihín ná.

Ta tá ñandihí ñandicani Jesús ña yóho nu ná já ñacahan cóhó a nu ná já ñacachi a já xihín ná:

—Ndá ndó, ña íin joho, ná cuni joho ndó —ñacachi Jesús xihín na cán.

<sup>9</sup> Anda já ñacasáhá na xica tuun xihín á cán ndaca tuhún na mé á ndia cúni cachi quiahva ñacachi a xihín ñayivi cán. <sup>10</sup> Ta ñanducú ñehe Jesús tuhun nu ná já ñacachi a já xihín ná:

—Ña coo ñacandaa ini ndó jihna, ña cán cándaa ini ndó viti jáchi ñasuná Ndióxi xini túni ndó candaa ini ndó ndá quiahva cacomí mé á cuéntá sahá ñayivi. Joo sácú u quiahva nuú java ga ñayivi já quea vatí sándehe na joo cúu ná tátuhun na co tívi nuu. Ta vatí xini joho na, cúu ná tátuhun na jóho jáchi co cándaa ini na ña cáhan i xihín ná —ñacachi Jesús xihín na xica tuun xihín á cán.

*Ndicani Jesús ña cúni cachi quiahva ñasacu a nuú na cán*

*(Mt. 13:18-23; Mr. 4:13-20)*

<sup>11</sup> Anda já ñacachi Jesús já xihín ná:

—Ña yóho cúni cachi quiahva ñasacu u nuú ñayivi yóho: Mé tata cán cúu á yuhú nuú tuhun Ndióxi, ña xica java na cáhan na xihín ñayivi. <sup>12</sup> Mé tata ña ñandicava íchi cán náha nu yo ndá quiahva íin java ñayivi. Xini joho na tuhun Ndióxi joo tá ñandihí já vaxi tiñahá sacuaña ta cája

rí xih̄in ná ñ̄a ndíndójó na ñ̄a já ná a cándúsa na tuhun Ndióxi ñ̄a ná a cácu ndaa ínima ná. <sup>13</sup> Ta tata ñ̄a nandicava tañu yuu cán náha nu yo ñ̄a ndúu java ñ̄ayivi ta xini johu na tuhun Ndióxi ta cáji iní na ndíquehe na ñ̄a. Joo sahá ñ̄a co ñ̄ehe iní yóho á cuhun cúná a sahá ñ̄a cán quéa chá tiempo cuití va cándúsa na tuhun Ndióxi. Jáchí tá cásahá ndóho ini na sahá tuhun Ndióxi chí jándacoo va na ñ̄a. <sup>14</sup> Ta tata ñ̄a nandicava tañu tohiñú cán náha nu yo ñ̄a ndúu java ñ̄ayivi ta xini johu na tuhun Ndióxi joo co jándacoo na íchi naxica na jihna. Ta cásahá ndícani ini na sahá ñ̄aha ñ̄uyiví yóho ta cásahá na cátóo na canduu cuahá ñ̄aha cuicá nu ná ta cásahá ndicají ini na caja na ñ̄a núu. Sahá ñ̄a cán quéa cúu á tátuhun tata ñ̄a co cána ñ̄aha jáquee na nuu jáchi coo ñ̄asahnu na xih̄in tuhun Ndióxi. <sup>15</sup> Joo tata ñ̄a nandicava nu ñ̄uhú vaha cán náha nu yo ñ̄a ndúu java ñ̄ayivi ta xini johu na tuhun Ndióxi xih̄in ndinuhu ini na ta cája na ñ̄a sáhdá a nu ná. Ta sahá ñ̄a ndíco cáhnu na Ndióxi ta co jándacoo na mé á sahá ñ̄a cán quéa cúu ná tátuhun tata ñ̄asahan cuahá ñ̄aha ñ̄a cuu jáquee na nuu jáchi sáhnu na xih̄in tuhun Ndióxi —ñ̄acachi Jesús ndícani a nuu na xica tuun xih̄in á cán.

*Sácú Jesús in quiahva sahá in lámpara*  
(Mr. 4:21-25)

<sup>16</sup> Ni in túhún toho ñ̄ayivi co ndícahmi na in lámpara ta anda já chíjahvi na jatá xih̄in in ñ̄aha. Ta ni co chícaan jehé na ñ̄a tixi xito. Ñ̄a cája na quéa chínúu jícó na ñ̄a já ná yehe a nuu na quíhvi ini vehe cán. <sup>17</sup> Ni in túhún toho ñ̄aha a cuú coo jehé nahá jáchi xinu quivi já ndáca náha nu á. Ta ni in tuhun ñ̄acahan jehé ñ̄ayivi a cuú coo jehé nahá jáchi xinu quivi já candaa ini tóco ndihi ñ̄ayivi sahá tuhun ñ̄asahiin jehé cán.

<sup>18</sup> Sahá ñ̄a cán quéa ndítahan coo johu vaha ndó nu cáhan i xih̄in ndo. Jáchí dá ín ñ̄aha nuu, ñ̄ehe táhvi dá coo chága ñ̄aha nu dá joo da coo ñ̄aha nuu, janda ñ̄a loho ín nu dá ndindaa —ñ̄acachi Jesús.

*Tá naxinu coo náná Jesús xih̄in ñ̄ani a nu ín a*  
(Mt. 12:46-50; Mr. 3:31-35)

<sup>19</sup> Anda já naxinu coo náná Jesús xih̄in ñ̄ani a mé nu ín a cán. Joo coo ñ̄acuu cayatí na nu á jáchi a juú quiahva ñ̄achutú ñ̄ayivi ndúu na xih̄in á cán. <sup>20</sup> Anda já ñ̄asahan in da caxi tuhun da xih̄in Jesús já cáhí da já xih̄in á:

—Jata véhe cáa ín nánún xih̄in ñ̄anún ta cahan na xuhun cúní na —ñ̄acachi da cán xih̄in Jesús.

<sup>21</sup> Anda já ñ̄acachi Jesús xih̄in tóco ndihi ñ̄ayivi ndúu cán já:

—Ndá na xini johu tuhun Ndióxi ta cája na ñ̄a cáhí a, na cán cúu ná tátuhun náná

¡ xihín ñani ¡ —ñacachi Jesús xihín ná.

Tá najácatáji Jesús tachi xihín tañuhú tá ndícojo do

(Mt. 8:23-27; Mr. 4:35-41)

<sup>22</sup> In quivi ñaquihvi Jesús ini in barco xihín ña xíca tuun xihín á. Ta já ñacachi a já xihín ná:

—Cóho inga xoo tañuhú yóho.

Anda já ñaquee na cuahan ña. <sup>23</sup> Ta nani xójo cava na tañuhú cán cuahan ña já ñanaá ini Jesús ñaquiji á. Ta in náá cuití ñaxinu in tachi quini ndivaha nuú tañuhú cán ta ñacasáhá ndíndita dó ta jáchutú do ini barco cán. Ta chí iyo ndivaha cáa jáchi cuu cacoo barco cahá ticuú. <sup>24</sup> Anda já ñasahan ña ndíñehe na Jesús já ñacachi na já xihín á:

—Maestro, Maestro. Cácoo barco yo cahá ticuú cuahan do —ñacachi na xihín á.

Anda já ñandico Jesús já ñacasáhá jáñani a tachi xihín ticuú ndícojo cán. Tá ñandihi já najáyaá mé á tachi xihín ticuú chí táji ní uun ñacandoo nuú tañuhú cán. <sup>25</sup> Anda já ñacachi Jesús já xihín ña xíca tuun xihín á:

—Ndaja vaha co cándeé ini ndó yehe —ñacachi a.

Joo ña cán ñayihví ña ta ñacatónto ña. Ta chí jánda ndáca tuhún táhan na já cáchi ña já:

—Ndá da cúu dataa yóho ña anda tachi xihín tañuhú cándusa nu cáhan da — ñacachi xihín táhan ña cán.

Tá ñatava Jesús ínimá quini ñasañuhu ini in dataa ñuu Gadara

(Mt. 8:28-34; Mr. 5:1-20)

<sup>26</sup> Tá ñandihi já cuahan ña ta ñaxinu co na ñundáhyi cuénta Gadara, ña cándo inga xoo tañuhú ta ndícoto nihni táhan xihín estado Galilea. <sup>27</sup> Tá ñanuu Jesús barco cán já ñacayati in dataa, da ñuu Gadara cán nu á. Mé da yóho sa ñacanahá ndivaha ñuhu ínimá quini ini da. Ta já cáa vichí láhlá da xíca nuu da. Ta ni co ín da vehe. Tañu nu jánduxu ña ndii cán va ín tuun da. <sup>28</sup> Tá ñaxini da Jesús ñandicava xítí da nu á ta já ñacayuhú da já ñacachi da já xihín á:

—Ndá cuénta quéa vasún quihvi nuún xihín ¡. Yóho cúun Jesús, da cúu in túhún jini já jahyi Ndióxi, ña cáhnu ndivaha. Xíca tahví ¡ nuun ña ná a jándohún ini ¡.

<sup>29</sup> Ñacachi da ña yóho xihín Jesús jáchi ñacasáhá sáhdá mé á chuun nu ínimá quini cán ña ná quee rí ínimá da cán. Ta cuahá tañu ñasatiin rí da. Ta vatí ñacató ña ndáha dá xihín saha dá xihín cadena joo ñasahnda túhún dá ña ñacaja rí quini cán. Ta já ñacaja rí ña ná cunu da cuhún da chí yucú íchí nuú co ndúu ñayivi. <sup>30</sup> Ñandaca tuhún Jesús mé rí quini cán já ñacachi a já xihín ri:

—Ndaja nanún.

Anda já ñanducú ñehe da cán tuhún nu á já ñacachi da já xihín á:

—Legión naní ¡.

Naçachi da cán ña naní da Legión jáchi cuahá ndivaha rí quini nandihvi rí ini da. <sup>31</sup> Ta mé rí quini ñuhu ini da cán naxica tahví rí nu Jesús ña ná a chindahá a rí cuhun rí nu ndúu ínima ndii. <sup>32</sup> Ta yati in ndica yucu cán nasanduu cuahá ndivaha cóchí xixáhan rí. Sahá ña cán quea naxica rí quini cán ñamaní nu Jesús ña ná ndihvi rí ini cóchí ndúu cán. Anda já nasahan Jesús ñamaní nu rí. <sup>33</sup> Chí naquee rí quini dataa cán cuahan rí já nandihvi rí ini cóchí cán. Ta tóco ndihi cóchí yóho xínu rí cuahan rí nanuu rí nu ndáyi já najáqueta nuu rí mé rí ini tañuhú cán ta já naçandaa rí ticuúí já naxihí rí.

<sup>34</sup> Tá naxini mé dataa ndáa cóchí cán ña yóho já naxinu da cuahan da caxi tuhun da ña nayaha yóho nuú ñayivi ñuu Gadara cán xihín nuú java ga na ndúu yati cán. <sup>35</sup> Anda já naqueta ñayivi sándehe na ña naçuu cán. Ta tá naxinu coo na nu in Jesús cán já naxini na in coo mé da nasañuhu rí quini ini cán saha Jesús. Ta sa nandaca ndixi da jáhma ta chí sa nandicaxí táhyí ini da. Tá naxini na ña yóho chí nayihví na. <sup>36</sup> Ta na naxini nuú natavá Jesús rí quini ini dataa cán, na cán cúu na nandicani ña nuú na coo naxini cán. <sup>37</sup> Tá naxini johu na ñuu Gadara cán ndaja nasahiin já naxica tahví ndihi na nu Jesús ña ná quee a cuhun a jáchi yíhví ndivaha na. Sahá ña cán quea nandihvi tucu Jesús ini barco

cán ña ná quee a cuhun a. <sup>38</sup> Joo tá cámaní quee a cuhun a já naçasahá da naqueta rí quini ini cán xica tahví da nu Jesús ña ná quiahva mé á ñamaní cuhun da xihín á. Joo nasahnda Jesús chuun nu dá ña ná candoo da. Já naçachi a já xihín dá:

<sup>39</sup> —Cuanúhu vehún. Ta já ndicanún nuú na vehún ndaja náhnu ñaha naçaja Ndióxi xuhun —naçachi Jesús xihín da cán.

Anda já naquee da cán cuahan da. Já nandicani da nu tóco ndihi na Gadara cán ndaja cáa ña naçaja Jesús xihín dá.

*Tá nandaja vaha Jesús jahyi jihí Jairo xihín in ña naçani ndaa ndáha jáhma á*  
(Mt. 9:18-26; Mr. 5:21-43)

<sup>40</sup> Tá nandicó coo Jesús inga xoo tañuhú cán, a juú quiahva cávatá ñayivi naxinu na ndiquehe na mé á jáchi mé cán nasanduu na ndáti na mé á. <sup>41</sup> Anda já naçasaá in dataa naní Jairo, da sáhdá chuun veñuhu. Mé Jairo yóho naxinu da naçaxítí da saha Jesús já naxica tahví da nu á ña ná cuhun a vehe da. <sup>42</sup> Jáchi xihí ñá loho cúu jahyi jihí da ta in já cúu ña nu dá ta ndáçaan ñá tátuhun uxu ivi cuia. Chí naquee Jesús cuahan ta nani xica cuahan vehe Jairo cán a juú quiahva cuahá ñayivi ndico na jatá cuahan na ta chí janda cándíhi na mé á cuahan na.

<sup>43</sup> Ta tañu ñayivi cuahan cán ndáçaan in ñáñáha ta

ndítahví nij ñá tixi uxu ivi cuja. Ta najándihi ndihi ñá jiuhún ña nuú na cája tátá ñayivi joo ni in na coó nacuu caja tátá ñahá. <sup>44</sup> Joo nacayati ñá chí jata Jesús ta natiin ñá yúhu jáhma á. Chí ivi laá nasacuiin nij ñá cán.

<sup>45</sup> Anda ja nacasáhá Jesús ndáca tuhún a tóco ndihi ñayivi ja nacachi a ja xihin ná:

—Ndá ndó nacani ndaa ndáha yehe —nacachi a xihin ná.

Joo ni in na coó nasahan tuhun nu á. Sahá ña cán quéa nacachi Pedro xihín java ga da xíca tuun xihin mé á cán ja xihin á:

—Maestro, a juú quiahva cándíhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá na nacani ndaa ndáha ndohó —nacachi da cán xihin á.

<sup>46</sup> Anda ja nacachi Jesús ja:

—Íin in na nacani ndaa ndáha yehe jáchí nacandaa ini i ña nandivaha in na xihin ndée mí i —nacachi Jesús.

<sup>47</sup> Joo ndaja coo mé ña nandivaha cán tá naxini ña ña nacandaa ini Jesús sahá ña nacaja ña ja nandiquiji ninu ña xihín ña yíhvi ña ta ja naxinu coo ña nacaxítí ña nu Jesús. Ta nu ndíhi ñayivi ndúu cán nacasáhá ña ndícani ña nu á ndá cuéntá quéa nacani ndaa ndáha ña mé á chí ivi laá nandivaha ña. <sup>48</sup> Anda ja nacachi Jesús ja xihin ña:

—Jahyi a, nandivahún jáchí nacandúsún yehe. Cuanúhu.

Ta a ndícani ga inún —nacachi Jesús xihin ña.

<sup>49</sup> Ta nani cáhan Jesús xihin ña cán ja naxinu in da naquixi chí vehe Jairo, da sáhdá chuun veñuhu cán. Ja nacachi da cán ja xihin dá:

—Sa naxihí va jahyi ndó. A jaquihvi ga ndó da xíca jánaha ñayivi jan.

<sup>50</sup> Joo tá naxini joho Jesús ña nacachi da cán ja nacachi a ja xihin Jairo:

—A cáyihví tohún. Candúsa cuití vún yehe chí ndivaha va jahyún —nacachi Jesús xihin dá.

<sup>51</sup> Tá naxinu coo Jesús vehe Jairo cán coó naxeen a quiahva ñamaní ña ná quihvi ñayivi ini vehe cán xihin á. Na naquihvi xihin á nasacuu Pedro xihin Jacobo xihin Juan xihin tátá mé ña loho cán xihin náná ña.

<sup>52</sup> Jandá joho ndívaa ñayivi sácu ndivaha na ndúu na saha ña loho cán. Anda ja nandicahan Jesús xihin ná ja nacachi a ja:

—A cuácu ndó. Coó naxihí toho ña loho yóho. Quíji cuití va ña —nacachi a xihin ná.

<sup>53</sup> Joo nacasáhá na cán sácu ndaa na Jesús jáchí xíni na ña sa naxihí ña loho cán ta sa cúu ña ndíi. <sup>54</sup> Anda ja natiin Jesús ndáha ña naxihí cán ja nacahan cóho a xihin ña ja nacachi a ja:

—Ñá loho, cuándacoo.

<sup>55</sup> Chí ivi laá nanditacu ña loho cán ja nandicoo ña. Ta nasahnda Jesús chuun ña ná quiahva na ña cuxu ña. <sup>56</sup> Chí a juú quiahva nacatóntó tátá

náná ñá loho cán sahá ña ñacaja Jesús. Joo ñasahnda Jesús chuun nu ná ña ná a ndícani na nuú ni in ñayivi sahá ña nayaha.

## 9

*Tá ñachindahá Jesús ndíhuxu ivi na xíca tuun xihín á ña ná cūhūn na caxi tūhun na tūhun Ndióxi nuú ñayivi*

*(Mt. 10:5-15; Mr. 6:7-13)*

<sup>1</sup> Najánditaca Jesús ndíhuxu ivi na xíca tuun xihín á já ñasahan ndée nu ná ña ná cuu tavá na tá nuú ínima quini ñúhu ini ñayivi ta ñasahan ndée mé á nu ná ña ná cuu ndaja vaha na tá nuú cuehe ndóho ñayivi.

<sup>2</sup> Ñasahnda Jesús chuun nu ná ña ná caxi tūhun na xihín ñayivi ña sa ñacayati quiví cacomí Ndióxi cuéntá saha ná. Ta ñasahnda chuun nu ná ña ná ndaja vaha na na quíhvi. <sup>3</sup> Ta ñacachi a já xihín ná:

—A cáñehe ndó ñaha cūhūn ndó íchi. Ni garróte ni yáti ni pan ni jūhún a cáñehe ndó cūhūn ndo. In túhún cotó cañehe ndó cūhūn xihín ndo. <sup>4</sup> Tá ná xinu ço ndó in vehe, canduu ndó vehe jan janda quiahva ná ndinda daa quiví quee ndó cūhūn ndo. <sup>5</sup> Ta ndá ñuu nuú ço cūni na ndiquehe vaha na ndohó, cuáhán quee ndó ñuu jan ta catí ndó ña yacá saha ndo já ná ñaha ña cuahan cuachi na cán jata mé va na —ñacachi Jesús xihín ná.

<sup>6</sup> Anda já ñaquee na cán cuahan na ta ñasahan na ñaxica nuu na ndijáá ñuu

váli. Xíca na cáxi tūhun na nuú ñayivi tūhun vaha cáhan saha Jesús, mé a cuu jácacu ñahá. Ta ndája vaha na na quíhvi.

*Tá ñaxihi Juan, da ñacaja ndúta ñayivi*

*(Mt. 14:1-12; Mr. 6:14-29)*

<sup>7</sup> Ta ndaja coo Herodes, da cúu gobernador cán ñacandaa ini da saha tóco ndihi ña cája Jesús. Ta chí ço xini da ndia cahan da jáchi java na cáchi na xihín dá ña cúu Jesús mé Juan, da najácandúta ñayivi ta viti ñanditacu tucu da cáchi java na xihín dá. <sup>8</sup> Ta java ri na cáchi na ña cúu Jesús profeta Elías, mé da ñaxica nuu sanahá ta viti ñaxinu tucu da nu ná. Ta java na cáchi na ña cúu á in táhan na profeta ñasanduu sanahá joo túní quea ñanditacu tucu a xíca nuu a, cáchi na. <sup>9</sup> Anda já ñacachi Herodes já xihín ná:

—Mí yehe cúu da ñasahnda chuun ña ná chitūhūn ná jico da naní Juan cán. Ta ço xini ndá da cúu da naní Jesús yóho. Jáchi mé a ndaa xini johó i ña cája cuahá ndivaha da ña náhnu —ñacachi Herodes cán.

Ta chí cūni Herodes cuni da Jesús.

*Sáhan Jesús ña cuxu uñun mil taa*

*(Mt. 14:13-21; Mr. 6:30-44; Jn. 6:1-14)*

<sup>10</sup> Tá ñandicó ço na ñachindahá Jesús caca nuu cahan tūhun Ndióxi xihín ñayivi cán nu in mé á já ñandicani na nu á saha

tócó ndihi ña ñacaja na nuú ñasahan na. Anda já ñehe Jesús na ñasahan na in nu cáa xóo yati chí ñuu Betsaida cán. <sup>11</sup> Joo tá ñacandaa ini ñayivi ndá xoo cuahan Jesús já ndíco na cuahan na. Ta ñandiquehe vaḥa Jesús na ta ñandicani a nu ná ña sa ñacayati quívi cacomí Ndióxi cuéntá saḥa ná. Ta ñandaja vaḥa mé á ña quíhvi.

<sup>12</sup> Ta tá sa cáhini cuahan já ñacayati ndíhuxu ivi na apóstol cán nu Jesús já ñacachi na já xihín á:

—Cahan ndó xihín ñayivi ná quee na cuhun na ndiquehe ndéé ná ta ná nducú ña ña cuxu na ñuu válí xihín nuú yati chá yóho nu ndúu ñayivi jáchi coó ñaha mé va nu ndúu yóho —ñacachi na cán xihín Jesús.

<sup>13</sup> Anda já ñacachi Jesús já xihín ná:

—Mé ndó quiahva ndó ná cuxu na —ñacachi a xihín ná.

Anda já ñacachi na cán já xihín á:

—Uhun víxí pan xihín ivi laá tiyacá cuití va ín nuú nde. Ta ama ná cuhun ri ndeḥe cueen nde ñaha cuxu tóco ndihi ñayivi ndúu yóho —ñacachi na cán.

<sup>14</sup> Jáchi ñayivi cán cúu ná tátuhun uhun mil taa. Anda já ñacachi tucu Jesús já xihín na xíca tuun xihín á:

—Cacu coo ndó ña tá táhnda ivi jico uxu, ivi jico uxu na.

<sup>15</sup> Chí ñasacu coo ndíhuxu ivi na apóstol cán na. <sup>16</sup> Anda já ñatiin Jesús ndíhuhun

pan xihín ndívi tiyacá cán já ñasandehé a chí indivi já ñandiquiahva ndixahvi nu Ndióxi saḥa ña cán. Tá ñandihí já ñasahnda java táhvi a ña já ñasahan ña nuú ña xíca tuun xihín á cán já ñanditahnda ña cuxu ñayivi ndúu cán. <sup>17</sup> Ta tóco ndihi na ñañehé ñaxixi janda quiahva ñachutú tixi na. Tá ñandihí já najáchutú na uxu ivi toyicá xihín ña ñacandoo ñaxixi ndihi na cán.

*Tá náhma Pedro ña cúu Jesús mé a ñachindahá Ndióxi cacomí cuéntá saḥa ñayivi*

(Mt. 16:13-28; Mr. 8:27-9:1)

<sup>18</sup> In tañu tá ñacana xóo Jesús xihín na xíca tuun xihín á ña caça tahví a nu Ndióxi já ñandaca tuhún mé á ña já ñacachi a já xihín ná:

—Ndá ña cáhí ñayivi cúu yeḥe —ñacachi a xihín ná.

<sup>19</sup> Anda já ñanducú ñehe na cán tuhun nu á já ñacachi na já xihín á:

—Java ñayivi cáhí ña ña cúu ndó Juan, ña najácandúta ñayivi. Ta java na cáhí ña ña cúu ndó profeta Elías. Ta cáhí java ga ví ña ña cúu ndó in táhan profeta ñasanduu sanahá, ña ñanditacu tucu xíca nuu viti —ñacachi na xíca tuun xihín Jesús cán.

<sup>20</sup> Anda já ñandaca tuhún Jesús na já ñacachi a já xihín ná:

—Ta ndóhó ri ndá ña cáhí ndo cúu u —ñacachi a xihín ná.

Anda já ñacachi Pedro já xihín á:



—Mé ndó cúú Cristo, ña ñachindahá Ndióxi cacomí cuéntá sahá ñayivi —ñacachi da xihín á.

<sup>21</sup> Joo ñacachi Jesús xihín na xíca tuun xihín a ña coto a ndícani na ña yóho nuú ni in túhún ñayivi. <sup>22</sup> Anda já ñacachi a já xihín na cán:

—Yehe cúú u da ñachindahá Ndióxi nduu ñayivi ta ndítahan nuú i ndoho ndivaha ini i. Ta na sacuahá veñuhu xihín na sacuahá nuú jutú xihín na jáñaha ley Moisés candají na yehe ta anda já cahní na yehe. Joo tá ná xinu uní quiví já nditacu tucu u —ñacachi a xihín ná.

<sup>23</sup> Tá ñandihí já ñacachi tucu a já xihín ndihí na xíca tuun xihín á cán já:

—Ndá na cúni candico yehe ndítahan nu ná ndihí chága ini na sahá yehe a juú ga saha mé ná. Ta ndijáá ní quiví ndítahan coo tiahva na ndoho ini na sahá yehe ta coó caja toho a ná quiví na sahá i. <sup>24</sup> Jáchi ndá na cátóo coo chága ñuyiví yóho ndihí saha ná. Joo ndá na sahan ndeé ini quivi sahá i ñehe táhvi ná catacu na anda ama cáa quiví. <sup>25</sup> Vatí ná quee vaha in na ñuyiví yóho ta cómi na tóco ndihí ñaha ñuyiví joo ndá chuun quea tá nu ndihí ndihí saha ná indayá.

<sup>26</sup> Ndá na cácan nuu sahá i xihín sahá tuhun vaha cahan i quiahva já cacahan ri nuú yehe, da ñachindahá Ndióxi nduu ñayivi sahá na cán tá ná quixi i cacomí i cuéntá sahá ñayivi. Mé tiempo cán

ñaha ndaja cáhnu cúú yehe jáchi quixi i xihín ndée Ndióxi ta xihín ndée tátó mé á viti. <sup>27</sup> Mé a ndaa ná cahan i xihín ndo ña ndúu java na ndíta yóho ta ni a quiví toho na janda quiahva ná xinu quiví cuni na cacomí Ndióxi cuéntá sahá ñayivi —ñacachi Jesús xihín na cán.

*Tá ñandijama Jesús quiahva cáa*

*(Mt. 17:1-8; Mr. 9:2-8)*

<sup>28</sup> Ta tá ñayaha táyhun uná quiví ñacachi Jesús ña yóho xihín ná já ñandaa jiní in yúcu ña caça táhvi a nu Ndióxi. Ta ndáca táhan Pedro xihín Jacobo xihín Juan cuahan na xihín á. <sup>29</sup> Ta nani xíca táhvi Jesús nu Ndióxi já ñandijama quiahva cáa nuu á. Ta janda jáhma ndíxi a cán ñandiyaa cachi ña ta chí a juú quiahva yehe ña. <sup>30</sup> Anda já ñaxini na ivi taa ndúu da ndítuhún da xihín Jesús. In da cán cúú Moisés ta inga da cán cúú Elías. <sup>31</sup> A juú quiahva ndató ndíyehe ndaa nu ndúu na cahan na xihín Jesús ta ndítuhún na sahá ña jándoho na ini a ñuu Jerusalén ta já quivi a. <sup>32</sup> Ta vatí cúni cuju Pedro xihín java ga na cátáhan xihín dá cán ñasandita na. Ta ñaxini na ndá quiahva cáhnu cúú Jesús xihín da ivi táhan ndúu xihín á cán. <sup>33</sup> Ta tá ñacasahá cáxíca Moisés xihín Elías cán nu Jesús cuahan na já ñacachi Pedro já xihín Jesús:

—Maestro, ndaja vaha cúú á ndúu nde yóho jáchi já cuu

cavaḥa nde unī vehe tīyahvá váli. In a coo mé ndó ta inga coo Moisés ta inga coo Elías — naçachi da.

Joo chí cō xīni mé va Pedro ndíā cáa cáhan da. <sup>34</sup> Ta nani cáhan da ndíta na já nanuu in vīcō jata ná ta najájahví a na. Ta chí naçasáhá yíhvī na xīca tuun xīhin Jesús cán tá naxini na naçava nuu vīcō cán na. <sup>35</sup> Anda já naxini johō na cáhan in a tañu vīcō cán já naçachi a já:

—Da yóho cúu jahyi maní i. Cuni johō ndó nu cáhan da.

<sup>36</sup> Tá nandihī naxini johō na ña cáhí a cán já naxini na ña ín in túhún jīni mé va Jesús. Ta mé na xīca tuun xīhin á cán naçahīn táji yúhu ná sahá ña naxini na ta cōó nandīcani na sahá nuú ni in túhún ñayivi.

*Tá nandaja vaha Jesús in ta loho ndácaan ínima quini ini*

*(Mt. 17:14-21; Mr. 9:14-29)*

<sup>37</sup> Ta inga quivī itaan tá nanuu Jesús xīhín na xīca tuun xīhin á jīni yúcu cán já naçqueta cuahá ndivaha ñayivi cuahan na ndique táhan na xīhín Jesús. <sup>38</sup> Anda já nandīcahan cóhó ndivaha in dataa tañu tóco ndihī ñayivi cán já naçachi da já xīhin Jesús:

—Maestro, caja ndó ñamanī candehé loho ndó jahyí i jáchi in túhún jīni já cúu dá nuú i. <sup>39</sup> Ta ndácaan in ínima quini ini da ta tīn rí dá ta cája rí xīhin dá ña ná ndahyí cóhó da. Ta cája rí ña ná quivī yíhí da ta já cána

cuyu chiquiñu yúhu dá. A juú quiahva cája xīxi rí quini cán xīhin dá ta chí cō cúni rí janí rí da. <sup>40</sup> Sa naxīca tahví i nuú na xīca tuun xīhin ndó ña ná tavá na mé rí quini cán joo cōó naçuu caja na ña —naçachi da cán xīhin Jesús.

<sup>41</sup> Anda já naçachi Jesús já:

—Ndáhvī nahá naçuu ndó jáchi sa cuahá ndivaha quivī ín i xīhin ndó ta a ñaha candéé ini ndó yehe. Cúu ndó ñayivi quini ndivaha chí cō ndéé ga ini i xīhín ña cája ndó. Taxi ndó ta loho jan chóho — naçachi Jesús xīhin ná.

<sup>42</sup> Ta tá cáyati ta loho cán cuahan da nu Jesús já naçaja rí quini cán ña ná ndicava da nu ñúhu ta cán naçaja rí ña ná quivī yíhí tucu da. Anda já najánani Jesús rí quini cán já nandīvaha ta loho cán ta nandīquiahva mé á da nu tátá da. <sup>43</sup> Ta tóco ndihī ñayivi naçanduu cán naçatóntó na tá naxini na ña náhnu cája Ndióxi.

Ta nani catóntó na ndúu na sahá ña náhnu cája Jesús cán já naçasáhá cáhan mé á xīhín na xīca tuun xīhin á. Já naçachi a já xīhin ná:

<sup>44</sup> —Cuni johō vaha ndó ña yóho ta coto a ndíndójó ndó ña. Tiin na yehe, da naçindahá Ndióxi nduu ñayivi ta já ndiquiahva na yehe ndahá java dataa — naçachi Jesús xīhin ná.

<sup>45</sup> Joo ni in táhan na xīca tuun xīhin á cán cōó naçandaa ini na ndíā cúni cachi Jesús. Jáchi cōó nanuna xíní túni ná ña ná candaa

ini na ña. Ta yíhvi na ndaca tuhún na mé á ña ná ndicani a ña nu ná.

*Ndicani Jesús ndá na cúu na in chága saha*

(Mt. 18:1-5; Mr. 9:33-37)

46 Tá nandihí já nacasáhá na xíca tuun xihín Jesús cán ndítuhún xihín táhan na saha ndá da cúu da cáhnu chága tañu mé ná. 47 Anda já naxini Jesús ña cáhvi ini na cán já natiin a in ta loho já nasacu ndichi a da jin á. 48 Já nacachi a já xihín ná:

—Ndá na ná ndiquehe váha ta loho yóho sahá ña quíhvi ini na yehe, ndiquehe ri na yehe viti. Ta ndá na ndiquehe yehe, ndiquehe ri na tátá i, mé a nachindahá yehe. Ndá na coó saha mé tañu tóco ndihí ndó, na cán cúu na in chága saha nu Ndióxi —nacachi Jesús xihín na cán.

*Tá ndúu java na ndiquehe saha yo já quea cuahan na xoo í*

(Mr. 9:38-40)

49 Anda já nacachi Juan já xihín Jesús:

—Maestro, naxini nde in dataa ta cáhan da quivi mé ndó já tává da ínima quini ñúhu ini ñayivi. Joo co xíca nuu da xihín yo sahá ña cán quea nasaji nuu nde nu dá caja da ña —nacachi da cán.

50 Anda já nacachi Jesús já xihín dá:

—A cáji nuu ndó nu dá sahá ña cája da ña. Jáchi ndá da co ndíndita caja xíxi xoho, mé

da cán cuahan da xoo mí — nacachi Jesús.

*Jañani Jesús Jacobo xihín Juan*

51 Tá nacayati quivi ndindita Jesús cuhun a indivi coó nayihvi a quehe a íchi cuahan chí ñuu Jerusalén. 52 Nachindahá Jesús java na xíca xihín á ña ná cuhun cuéé na in ñuu loho ndacaan estado Samaria cán já ná nducú na nuú canduu tóo na chí naquee na cuahan na. 53 Joo coó naxeen toho na Samaria cán ndiquehe na Jesús jáchi naxini na ña cuahan chí ñuu Jerusalén. 54 Tá naxini Jacobo xihín Juan cán ña yóho já nacachi da já xihín Jesús:

—Á co cuni ndó, xitoho i ña ná cahnda nde chuun ña ná cuyu ñúhu cáyi indivi já ná jánaa nde sahá ñayivi yóho tá quiahva nacaja profeta Elías sanahá —nacachi na xihín á.

55 Anda já nandicoto nihni Jesús nu ná já nacasáhá janani a na já nacachi a já xihín ná:

—Co xini ndó ña a váha toho cáhvi ini ndó já. 56 Jáchi coó naquixi toho yehe, da nachindahá Ndióxi nduu ñayivi, ña ná jánaa i sahá ñayivi. Naquixi i ñuyivi yóho jáchi cuni ña ná cacu ndaa ínima ná —nacachi Jesús xihín na cán.

Anda já naquee na cuahan na inga ñuu loho.

*Na cuni candico Jesús*  
(Mt. 8:19-22)

57 Ta nani xíca na cuahān na já nacachi in dataa já xihīn Jesús:

—Cúni candico i ndohó ndá nacuu nuú cūhun ndo — nacachi da.

58 Anda já nanducú ñehe Jesús tuhun nu dá já cáhí a já xihīn dá:

—Ndicuii cúu rí ta vaṭi iin cáva ñúhu rí. Laa cúu rí ta vaṭi iin táca ñúhu rí. Joo yehe, da nachindahá Ndióxi nduu ñayivi chí ni nuú cuju mí i coó va —nacachi a xihīn dá.

59 Tá nandihí já nacachi Jesús já xihīn inga da:

—Naha quíi candico yehe.

Joo nanducú ñehe da cán tuhun nu Jesús já cáhí da já xihīn á:

—Quiahva jihna ndó ñamaní nuú i ña ná cūhun i jánduxu tátá i já quixi i candico i ndohó —nacachi da xihīn Jesús.

60 Anda já nacachi Jesús já xihīn dá:

—Ná cūhun mé ñayivi, na a ñaha cacu ndaa ínimā jánduxu na ndii jan. Joo yóhó, cuahán caxi tuhun nuú ñayivi ña sa nandindaa quiví cacomí Ndióxi cuéntá saha ná — nacachi Jesús xihīn dá.

61 Anda já nacativi inga dataa nu Jesús já nacachi da já xihīn á:

—Jesús, candico i ndohó cúni. Joo quiahva ndó ñamaní nuú i ná cūhun loho i ndindayí jihna ñúhú i na vehe e já quixi i candico i ndohó —nacachi da xihīn Jesús.

62 Anda já nacachi Jesús já xihīn dá:

—Ndá da cásahá ndíco yehe ta já ndicó coo tucu da cuahān da chí jata, cúu dá da coó chuun toho cacomí Ndióxi cuéntá saha. Jáchi da cán cúu dá tátuhun da tiin yaṭa ta cásahá da xútu da cuahān da joo tá nandihí ndicoto nihni tucu da chí jata ta chí coó saha dá cacomí Ndióxi cuéntá saha dá — nacachi Jesús.

## 10

*Chindahá Jesús uní jico uxu taa cūhun da cahan da tuhun Ndióxi xihīn ñayivi*

<sup>1</sup> Tá nandihí já nacaxi Jesús inga uní jico uxu chága dataa. Ta tá ivi tá ivi da nachindahá a da cuahān da já ná cūhun cuéé da cahan da tuhun Ndióxi xihīn ñayivi ndúu tóco ndihí ñuu nuú nasacu ini Jesús cūhun a coto nihni a ñayivi. <sup>2</sup> Anda já nacachi a já xihīn ná:

—Mé a ndaa ndúu cuahá ndivaha ñayivi, na cúni cuni johō tuhun Ndióxi joo coó cuahá na cúni cūhun cahan ña xihīn ná. Cúu á tátuhun vaha ndivaha nacana ní nuú utu joo ndímaní na jáquee ña. Ña cán quea xíní ñúhú caça tahví ndo nuú da xihīn ñaha utu cán ña ná chindahá chága da na jáquee nuú utu da. Quiahva já ndítahan caça tahví ndo nu Ndióxi ña ná chindahá chága mé á na caca nuu cahan tuhun Ndióxi xihīn ñayivi já ná ndiquehe vaha na ña. <sup>3</sup> Mé ndó cúu ndó

na chindahá i cuhun caca nuu cahan tuhun Ndióxi. Mé a ndaa iyo ndivaha cáa nuú cuhun ndo jáchi cacuu ndó tátuhun ndicachi válí tañu cuahá ndivahyí. <sup>4</sup> Tá naquee ndó cuahan ndo coto a cáñehe ndó yátí cuhun ndo ni jihún ni inga ndusa ndó a cáñehe ndó cuhun ndo. Ta a cácuíta ndó cahan Ndióxi ndó xihín ñayivi ndique táhan xihín ndó íchi. <sup>5</sup> Ta tá ná xinú coo ndó in vehe, jihna ñúhú cahan Ndióxi ndó xihín na ndúu vehe cán já cachi ndó já xihín ná: “Ná coo vaha ini ndó, na ndúu vehe yóho”, cachi ndó xihín ná. <sup>6</sup> Ta tá mé a ndaa íin vaha ini ñayivi ndúu vehe cán já a cándo nuu toho tuhun nacachi ndó xihín na cán. Joo tá co íin vaha ini na cán já a quéhe ndó cuéntá sahá ña nacachi ndó ña ná coo vaha ini na jan jáchi a juú na coo vaha ini cúu toho na jan. <sup>7</sup> Tá ná xinú coo ndó in vehe nu ndiquehe vaha na ndohó, canduu ndó mé vehe jan. Ta a cáca nuu ndó tá vehe tá vehe nducú ndo nuú coo ndó. Ta ndá ñaha íin nu ná sáhan na nu ndo cuxu ndó á coho ndó, tiin ndó a ndáha ná. Jáchi ndítahan nuú in dataa ndiquehe da ña catacu da sahá chuun cája da. <sup>8</sup> Ta tá ná xinú coo ndó in ñuu nu ndiquehe vaha na ndohó, cuxu ndó ndía cúu mé a sáhan na nu ndo. <sup>9</sup> Ta ndaja vaha ndó ndá na quíhvi ndúu cán. Ta cachi ndó já xihín ná: “Sa nacayati quiví cacomí Ndióxi cuéntá saha ndo”, cachi ndó xihín ná.

<sup>10</sup> Joo tá ná xinú coo ndó in ñuu nuú co cúni na ndiquehe vaha na ndohó, cuahán ndó cáyé ñuu cán já cachi ndó já xihín ná: <sup>11</sup> “Janda ña yácá natiin ndaa sahá nde ñuu ndó yóho quíji nihni nde ta xihín ña yóho náha nde ña cuahan cuachi ndó jata mé va ndó. Jáchi sa nacaxi tuhun va nde xihín ndo ña sa nacayati quiví cacomí Ndióxi cuéntá sahá ñayivi”, cachi ndó xihín ná —nacachi Jesús xihín na cán.

<sup>12</sup> Andá já nacachi tucu a já xihín ná:

—Tá ná xinú coo quiví caja víi Ndióxi sahá ñayivi já jándoho chága mé á ini ñayivi ñuu jan a juú ga tá quiahva najándoho a ini na ñuu Sodoma sanahá —nacachi Jesús xihín ná.

*Cahan Jesús sahá ñuu nu ndúu ñayivi, na co cúni jándacoo cuachi*

(Mt. 11:20-24)

<sup>13</sup> Andá já nacachi tucu Jesús xihín ná já:

—Ndáhví nahá nacuu ndó, na ñuu Corazín. Ta ndáhví nahá nacuu ndó na ñuu Betsaida. Cuahá ndivaha ña náhnu nacaja i nu ndo joo coó naxeen ndó ndicó coo ini ndó jándacoo ndó cuachi ndó. Sanahá najándihi Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva nacaja i nu mé ndó, sa najándacoo va na cán cuachi na, nduu. Ta chí ivi laá ndaca ndixi na jahmá ndíi ta jácuuyu na yaá yíquí jíni na,

nduu. Jáchi xihín ña yóho jánaḥa na ña nandico ɔo ini na sahá cuachi na. <sup>14</sup> Joo tá ná xinu quivi caja vii Ndióxi sahá ñayivi já ndoho chága ini mé ndó, na ñuu jan a juú ga tá quiahva nandoho ini ñayivi nasanduu ñuu Tiro xihín ñuu Sidón sanahá. <sup>15</sup> Ta viti cáhan i xihín ndó, na ndúu ñuu Capernaum. Janda indivi cuni ndó cuhun ndó joo sahá ña sáa ini ndó cuhun ndó janda indayá, caja Ndióxi —nacachi Jesús.

<sup>16</sup> Anda já nacachi a xihín na xica tuun xihín á já:

—Ndá na xini johó nu cáhan ndo ta cája na ña cáchi ndo já quéa cúu á tátuhun cája na ña cáchi yehe xihín ná caja na. Ta ndá na cándají ndohó cúu á tátuhun cándají ri na yehe va. Ta ndá na cándají yehe, cándají ri na Ndióxi, mé a nachindahá a yehe quixi i ñuyivi yóho —nacachi Jesús xihín na chindahá mé á cuhun cáhan tuhun Ndióxi xihín ñayivi cán.

Anda já naquee na cuahan na.

*Tá nandico ɔo ndihuni jico uxu na nachindahá Jesús caca nuu cáhan tuhun Ndióxi*

<sup>17</sup> A juú quiahva cájii íni na uni jico uxu na nachindahá Jesús cáhan tuhun Ndióxi cán tá nandico ɔo na. Já nacachi na já xihín Jesús:

—Tá cáhan nde quivi ndó sáhdá nde chuun nu ínima quini ta chí xini johó rí ta cája rí ña sáhdá nde nu ri —nacachi na cán xihín Jesús.

<sup>18</sup> Anda já nacachi Jesús já xihín ná:

—Mé a ndaa quéa cáhan ndó jan. Jáchi naxini i xihín nuu mí i ndá quiahva naquee Satanás, rí cúu tiñahá sacuaḥa indivi ta nandicava rí nu ñúhu tátuhun in tasa. <sup>19</sup> Chí nasahan i ndée nu ndóhó ña ná cuu cahnda ndó chuun nuú tiñahá sacuaḥa. Já cuu cuani nihni ndó jatá ɔo xihín jata líhma ta a ndóho ndó ni in ñaha. Ta nasahan i ndée nu ndo ña ná cuu quee vaha ndó nuú ndihi ña núu cuni tiñahá sacuaḥa caja rí xihín ndo. <sup>20</sup> Vatí cájii ini ndó sahá ña cándusa rí quini nu sáhdá ndó chuun nu ri joo ndítahan cajii chága ini ndó sahá ña sa naquee va quivi ndó ña cuhun ndó indivi —nacachi Jesús xihín ná.

*Tá nacajii ndivaha ini Jesús (Mt. 11:25-27; 13:16-17)*

<sup>21</sup> Ta chí mé hora já nacaja ínima yii Ndióxi ña ná cajii ndivaha ini Jesús. Já nacasáhá cáchi a já:

—Cája cáhnu i ndohó, tátá Ndióxi, ña cúu xitoho tóco ndihi ñaha ndúu indivi xihín ñuyivi. Jáchi najánaḥa ndó ña ndíchi ndivaha nuú ñayivi, na ɔo cuahá saḥa nuú java ga na. Ta nacaja ndó ña ná a cúu candaa ini na ndíchi xihín na tácu ini ñaha mé ndó. Já nacaja ndó jáchi já nasacu ini ndó caja ndó —nacachi Jesús.

<sup>22</sup> Anda já nacachi a já xihín na ndúu cán:

—Nandiquiahva tátá i tóco ndihi ñaha ndahá i ña ná cacomí i cuéntá sahá. Ta ni in

túhún toho ñayivi cō xíní vaha na yehe, da cúú in túhún jini já jahyi Ndióxi. Mé Ndióxi, tátá i cuití va xíní vaha yehe. Ta ni in túhún toho na cō xíní vaha yo cúú tátá i. In túhún yehe, da cúú jahyi a xíní vaha i yo cúú mé á. Ta yehe cúú da caxi ndá ñayivi jánaḥa i nuu sahá Ndióxi, tátá i já ná candaḥa vaha ini na yo cúú mé á —ñacachi Jesús.

23 Anda já nasandehé a nuú na xíca tuun xihin á cán. Já ñacasáhá cáchí a já xihin mé cuití na:

—Tahví ñacuu ñayivi tá ná cuu candehé na tóco ndihi ña xíní mé ndó viti. 24 Mé a ndaa ná caḥan i xihin ndo ña cuaha táhan na profeta nasanduu sanahá ta cuaha táhan na nasacomí cuéntá sahá ñayivi sanahá cuni na cuni na tóco ndihi ña xíní ndo cája i. Joo coó ñaxini na ña. Ta cuni na cuni joho na ña xíní joho ndó caḥan i xihin ndo. Joo coó ñaxini joho na ña.

*Sácu Jesús quiahva sahá in da Samaria, da ñacaja vaha*

25 Ta ndaja coo in da jánaḥa ley Moisés ñandaca ndichi da caḥan da xihin Jesús jáchi cuni da coto ndojó ñahá da. Ta ñacachi da já xihin á:

—Maestro, ndia ndítahan caja i já ná cuu catacu u indivi anda ama cáa quivi —ñacachi da xihin á.

26 Anda já ñanducú ñehe Jesús tuhun nu dá já ñacachi a já xihin dá:

—Ndaja cáchí ley Moisés. Ndaja cáchí ley tá cáhvún ña —ñacachi Jesús xihin dá.

27 Anda já ñanducú ñehe da jánaḥa ley Moisés cán tuhun nu Jesús já ñacachi da já:

—“Quihvi inún Ndióxi, xitohún xihin tóco ndihi ínimun ta xihin ndinuhu inún. Ta quihvi inún a xihin tóco ndihi ndéun ta xihin tóco ndihi xíní túnun. Ta quihvi inún ñani táhún tá quiahva quihvi inún mún” —ñacachi da cán ñanducú ñehe da tuhun nu Jesús.

28 Anda já ñacachi Jesús já xihin dá:

—Mé a ndaa vaha va ñacahun. Cuáhán caja tóco ndihi ña yóho já ñehe táhvun catacún indivi anda ama cáa quivi —ñacachi Jesús xihin dá.

29 Joo da jánaḥa ley Moisés cán cuni da candoo vaha da nuú ñayivi ndúu cán sahá ña cán quea cáchí da já xihin Jesús:

—Yo já cúú ñani táhan i.

30 Anda já ñandicani Jesús nu dá já cáchí a já xihin dá:

—In tañu ñaquee in dataa ñuu Jerusalén cuahān da íchi ña ñanu cuahān chí ñuu Jericó. Ta ndaja coo cán ñaqueta java ta cuihná nu dá. Ta ñatiin na da ta ñacaja cuihná ndihi na ñaha da janda jáhma dá viti ñaquehe na. Tá ñandihí já ñacani quini ndivaha na da janda quiahva ñasahní tóo na da. Já ñaquee na cuahān na. 31 Ta ña vaha quea ñayaha in jutú mé íchi cán. Joo tá ñaxini

ñahá da já nayaha saa da cuahan va da. <sup>32</sup> Ta sa mé ichi cán nayaha ri in da naquixi chichi Leví ta tá naxini da da nandicuehe cándúhu ichi cán já nayaha saa da cuahan da. <sup>33</sup> Jári in da Samaria xica cuahan mé ichi cán. Joo tá naxini da da nandicuehe cándúhu ichi cán chí natahvi ini da saha dá. <sup>34</sup> Anda já nacayati da nu cándúhu dá. Já nacaja tátá da nuú nandicuehe da quihvi cán xihin síti xihin vino viti. Ta já nacató da nuú nandicuehe cán xihin ticoto. Tá nandihí najánda da da jata búrró jana dá já ñehe ñahá da cuahan da. Já nanducú da vehe coo too da quihvi cán ña ná candaa na da. <sup>35</sup> Ta inga quivi itaan tá nasacu ini da Samaria cán quehe da ichi cuhun da já natavá da ivi jiuhún caa nasahan da nuú da xihin ñaha vehe cán. Já nacachi da já xihin dá: “Cajún ñamaní candaa vahún da quihvi yóho. Ta tá ná chicaan chágún jiuhún xihin dá, a ndícani toho inún jáchi chahvi mí vi ña nuun tá ná ndicó coo i”, cáchi da Samaria cán — nacachi Jesús.

<sup>36</sup> Anda já nandaca tuhún Jesús da jánaha ley Moisés cán já nacachi a já xihin dá:

—Ta viti cachún xihin i tixi ndíhuní da nayaha ichi nuú nasanduhú da nandicuehe nacaja ta cuihná yóho, ndá da cúu da nanaha ña mé a ndaa táhyi quihvi ini da ñani táhan da — nacachi Jesús.

<sup>37</sup> Anda já nacachi da

jánaha ley Moisés já:

—Da natahvi ini sahá da nandicuehe jan, da jan cúu da cája i cuéntá nanaha da ña mé a ndaa quihvi ini da ñani táhan da — nacachi da cán.

Anda já nacachi Jesús já xihin dá:

—Ta viti cuahán ri yóho va, quihvi inún ñani táhún tá quiahva nacaja da Samaria yóho — nacachi a xihin dá.

*Tá nasahan Jesús vehe Marta xihin María*

<sup>38</sup> Naquehe Jesús ichi xica cuahan janda quiahva naxinu coo a in ñuu loho. Ta cán nandiquehe vaha in ñá naní Marta mé á vehe ñá. <sup>39</sup> Ta nasahin in quihvi Marta yóho, ñá naní María. Ta naxinu coo María nasacoo ñá yati saha Jesús jáchi cuni ñá cuni johó ñá nu cáhan mé á. <sup>40</sup> Joo ndaja coo a juú quiahva ndíhi ini mé Marta cája ndívi ñá ñaha cuxu na ndácaan ña. Anda já nacayati ñá nu Jesús já nacachi ñá já xihin á:

—Candehé ndo, xitoho i. Á co sándehé toho ndó ña in túhún mí i cája ndívi i ñaha ta ñá cúu quihvi i jan co chindeé loho ñá yehe. Cahán loho ndó xihin ña ná chindeé ñá yehe — nacachi Marta cán xihin Jesús.

<sup>41</sup> Anda já nanducú ñehe Jesús tuhun nu ña já cáchi a já xihin ña:

—Marta loho, a juú quiahva ndícani inún ta ndíhi inún jáchi in ndivaha chuun nuun. <sup>42</sup> Joo in in túhún ñaha ña in chága saha ta cúu á ña



ndítahan cajún. Ta María, ñá cúú quihvun yóho ñacaxi ñá ña vaha chága. Ta ni in na a cúu caji nuu nu ñá cuni johó ñá tuhun cáhan i —ñacachi Jesús xihin ña.

## 11

*Jánaḥa Jesús na xica tuun xihin á ndaja caja na caça tahví na nu Ndióxi*

(Mt. 6:9-15; 7:7-11)

<sup>1</sup> In tañu xica tahví Jesús nu Ndióxi ndácaan. Ta tá nandihí ñaxica tahví a já ñacachi in táhan da xica tuun xihin á cán já xihin á:

—Jánaḥa ndó ndeḥe, xitoho nde caça tahví nde nu Ndióxi, tátá yo tá quiahva ñacaja Juan, da ñacaja ndúta ñayivi. Jáchi najánaḥa da nuú na nasaxica xihin dá ndá quiahva caja na caça tahví na nu Ndióxi —ñacachi da cán xihin Jesús.

<sup>2</sup> Anda já ñacachi Jesús já xihin na cán:

—Tá ná caça tahví ndo nu Ndióxi já cachi ndó já:

Tátá Ndióxi, ña íin indiví, cáhnu ná cacuu quiví ndo.

Ná tandaa quí quiví cacomí ndó cuéntá sahá nde.

Ta ná coo tá íin cuni mé ndó coo ñuyiví yóho tá quiahva íin indiví cája ndó.

<sup>3</sup> Quiahva ndó nuú nde ña ndímaní nuú nde cuxu nde in in quiví.

<sup>4</sup> Caja cáhnu ini ndó sahá cuachi nde tá quiahva cája cáhnu ini nde saha tóco ndihí ña núu cája ñayivi xihín nde.

Ta a quiahva ndó ñamaní ña ná coto ndojó tiñáhá sacuaḥa ndeḥe já ná a cája nde cuachi nu ndo, já cachi ndó caça tahví ndo —ñacachi Jesús.

<sup>5</sup> Anda já nasacu Jesús in quiahva nu ná já ñacachi a já xihin ná:

—Cúú á tátuhun tá ná cuhun ndó vehe in amigo ndo java ñuú táji ta já cachi ndó já xihin dá: “Amigo, á a quiahva tóun uní pan nuú i <sup>6</sup>jáchi ñacasaa in da xíní táhan xihín i vehe e ta cúú dá da nasahan xícá ta coó ñaha nuú i quiahva i cuxu da”, cachi ndó xihin amigo ndo. <sup>7</sup> Ta viti ná caja í cuéntá nducú ñeḥe da ndácaan ini vehe cán tuhun nu ndo já cachi da já: “A jáquihvún yeḥe jáchi ndáji tuun yéhe. Ta ndúu jahyi valí i quíji na xihín i nuú xito ta a cuú caja i ndacoo i quiahva i ndá ñaha nuun”, cachi da cán xihin ndo ná caja í cuéntá.

<sup>8</sup> Mé a ndaa ná cáhan i xihin ndo ña vatí co cuni da jan ndacoo da quiahva da ñaha nu ndo sahá ña xíní táhan ndó xihin dá joo ndacoo tá ndacoo da quiahva da ñaha nu ndo sahá ña jáquihvi ndó da. Sahá ña cán quea ndacoo da quiahva da tóco ndihí ña xíní ñúhú ndo nu ndo. <sup>9</sup> Ña cán quea cáhan i ña yóho xihin ndo: Ndá ñaha ndímaní nu ndo xíní ñúhú caça ndó ña nu Ndióxi ta já quiahva mé á ña nu ndo. Ndinducú ndo ña cuni ndo ta ñeḥe ndó ña caja Ndióxi. Cúú á tátuhun catí ndáḥa ndo yéhe ta já nuna

yéhe nū ndo. <sup>10</sup> Jáchi nā xíca, nā cán cúu nā ñéhe va. Ta nā ndúcú ñaha, nā cán cúu nā ndíñéhe va. Ta nā cáti ndáha yéhe, nā cán cúu nā ndínuna yéhe nuu.

<sup>11</sup> Ta ndá ndó, nā ndúu jahyi ta tá xíca jahyi ndó pan cuxu a nū ndo, ama cuéhe ri ndó quiahva ndó yuu nū á ña ná caxí a. Ta ama ná quiahva ndó coo caxí a tá xíca cuñu tiyacá caxí a. <sup>12</sup> Ta ama cuéhe ri ndó quiahva ndó líhma caxí jahyi ndó tá xíca ndivi nū ndo. <sup>13</sup> Vati cúu ndó ñayivi cája cuachi joo xini vaha ndó quiahva ndó ña vaha nuu jahyi ndó. Ta ndaja ga ví cája Ndióxi, tátá ndo, mé a in indivi xihin ndo. Quiahva mé á inima yii á nū ndá nā ná caça ña nū á — nacachi Jesús.

*Chícaan nā cuachi Jesús ña ñéhe a ndéé tiñáhá sacuaḥa*

(Mt. 12:22-30; Mr. 3:20-27)

<sup>14</sup> In tañu tává Jesús inima quini ini in dataa, da nanduu níhi, nacaja rí quini. Ta tá sa nacana mé rí quini ini da cán nacaja Jesús anda já nandicahan tucu da. Ta chí nacatontó cuahá ñayivi ndúu cán tá naxini na ña yóho. <sup>15</sup> Joo java na nacasáhá cáchi nā já saḥa Jesús:

—Taa yóho cúu tává da rí quini ñúhu ini ñayivi jáchi mé Beelzebú, rí cúu tiñáhá sacuaḥa nū rí quini cán, sahan rí ndéé rí nū dá cája da ña — nacachi na.

<sup>16</sup> Ta java ga nā cuni nā coto ndojó nā Jesús saḥá ña cán quea naxica nā nū á ña ná

caja mé á ñaha xitúhún quixi indivi já ná cuni na. <sup>17</sup> Joo xini vaha va Jesús ña cáhvi ini nā cán saḥá ña cán quea nacachi a já xihin ná:

—Tá sáhdá java táhan ñayivi ndúu in ñuu ta ndúu na cuahá táhdá já cásahá cáni táhan ndaja táhan mé va na já cama chá ndihi saḥá ñuu nū ndúu na cán. Ta quiahva já yáha xihin nā ndúu in vehe tá cásahá sáhdá java táhan na ta cáni táhan na já cama chá ndihi saḥá vehe na. <sup>18</sup> Ta quiahva já yáha xihin Satanás, rí cúu tiñáhá sacuaḥa va. Tá ná cani táhan ndaja táhan mé rí já quea ndihi saḥa ndéé ña cómi rí. Cáhan i ña yóho xihin ndo jáchi cáchi ndo ña tává i rí quini ini ñayivi xihin ndéé Beelzebú, rí cúu tiñáhá sacuaḥa. <sup>19</sup> Joo tá mé a ndaa cúu ndusa ña cáchi ndó saḥá i jan, ndáchí quehe nā cúu cuéntá mé ndó jan ndéé tává nā rí quini ini ñayivi. Ama ná cachi ndó ña tává ndó rí quini xihin ndéé tiñáhá sacuaḥa. Ña yóho náha ña co cáhvi ndaa ini ndó. <sup>20</sup> Joo yehe xihin in túhún ndéé Ndióxi tává i inima quini ini ñayivi. Ta xihin ña yóho náha cáxi a ña sa naxinu coo quivi cacomí Ndióxi cuéntá saḥa ndo — cáchi Jesús.

<sup>21</sup> Ta sácú Jesús quiahva nū ná ta xihin ña yóho jánaha ña quee vaha mé á xihin tiñáhá sacuaḥa. Já cáchi a já:

—In in dataa ta tóyí cáa da ta ñéhe da ndá chúun chindeé da mé dá. Ta nani ndáa da

vehe da mé a ndaa coó toho ñaha ndoho ñaha da jáchi ndáá vaha da ña. <sup>22</sup> Joo tá ná quixi inga taa, da ndacú chága a juú ga mé da cán ta quee vaha da xihin dá já candaa ndihi da ndá chúun ña ñacandeé ini da mé dá. Ta já caja tá cúni mé da ndacú chága cán xihin ñaha da inga cán.

<sup>23</sup> Ndá na coó cuahan xoo i, cúu ná na co cúni yehe. Jáchi ndá na co chindeé yehe xihin ña cája i, cúu ná na sáji nuu nuú i.

*Jánaha Jesús ña cuahá tañu ndicó coo tucu rí quini ini ñayivi vatí sa naquee rí (Mt. 12:43-45)*

<sup>24</sup> Tá quéta in rí quini ini in dataa já queé rí cuahan rí xica nuu rí ndijáa yucú íchí ndínducú rí nuú candoo rí. Ta tá co ndiñehe rí ña já casáhá cáhvi ini rí já: “Cóho ndicó coo tucú ini da nuú nasandacaan í cán jáchi cúu á tátuhun vehé”, cáhán rí. <sup>25</sup> Ta tá xinu coo rí ini da cán já sándehe rí ña ín vií va ini da cán tá quiahva vií ini vehe tá natihvi á ta nandaca ndójó vaha tóco ndihi ñaha ini a. <sup>26</sup> Anda já queé tucu mé rí quini cán cuahan rí quehe rí usa ga rí quini chága a juú ga mé rí já xinu ndihi rí ndihvi rí ini da cán. Ta mé da cán ndiquini chága da a juú tá nasandacaan in talaá rí ini da —ñacachi Jesús.

*Ndá na cúu na tahví chága nacuu*

<sup>27</sup> Ta nani cáhan Jesús tuhun yóho nuú ñayivi já

ñacayuhú cóho in ñañaña tañu ñayivi cuaha cán já ñacachi ñá já:

—Tahví ñacuu ñá najácacu yohó, mé ñá najácuáhnu yohó —ñacachi ñá xihin Jesús.

<sup>28</sup> Anda já ñacachi Jesús já:

—Tahví chága ñacuu ñayivi tá xini johó na tuhun Ndióxi ta cája na ña cáchi a —ñacachi Jesús.

*Xíca ñayivi quini ña ná caja Jesús ña xitúhún cuni na*

<sup>29</sup> Tá ndítaca cuahá ñayivi nu ín Jesús já ñacasáhá mé á cáhan xihin ná já ñacachi a já:

—Quini ndivaha va ñayivi ndúu tiempo viti. Xíca na ña ná caja i ñaha xitúhún nu ná. Joo coó toho ña cán coo. Ña cuni ndusa na quea ndoho i tá quiahva nandoho Jonás, da nasacuu profeta sanahá. <sup>30</sup> Jáchi mé ñayivi nasanduu sanahá ñuu Nínive cán ñacandaa ini na ña nachindahá Ndióxi Jonás nu ná. Ta quiahva já candaa ri ini na ndúu viti ña nachindahá ri Ndióxi yehe va, da nanduu ñayivi. <sup>31</sup> Tá ná xinu quiví caja vií Ndióxi sahá cuachi ñayivi ndúu tiempo viti anda já ndicujta in ñá nasacomí cuénta sahá ñayivi ndúu chí sur sanahá ta chacaan ña cuachi jatá ñayivi ndúu tiempo viti. Jáchi mé ña cán vatí nasahin xicá ndivaha ña nu rey Salomón sanahá nasahan ña cuni johó ña tuhun ndíchí cáhan da. Ta yehe ín chága sahá i a juú ga Salomón joo co cándusa ndó yehe. <sup>32</sup> Ta jári ñayivi

na sanduu Nínive sanahá cã ndicujta na chicaan na cuachi jatã ndo tá ná xinu quiví caja vií Ndióxi sahá cuachi ñayivi nduu viti. Jáchi mé na nasanduu ñuu Nínive cã najãndacoo na cuachi cája na tá naçahan Jonás xihin ná ña naçachi Ndióxi coo. Ta yehe ín chãga sahá í a juú ga Jonás joo co cãndusa ndo yehe.

*Nduchú núú yo cúú á tãtuhun in lámpara*

(Mt. 5:15; 6:22-23)

<sup>33</sup> Ni in túhún toho ñayivi co chicaan ñuhũ ná in lámpara ta já quéhe na ña sácú na in nuú jehé. Ni co chicaan na ña tixi sato. Ña cája na quéa chínúu jícó na ña já ná yehe nuú na quihvi ini vehe cã. <sup>34</sup> Nduchú núú yo cúú á tãtuhun in lámpara jándiyehẽ a nu yo já xíní yo nu xíca í. Ta tá tívi vaã nduchú núú yo já cuu candehé vaã í nu xíca í. Joo tá co tívi nduchú núú yo já quéa xíca í nu naã ndivaã. <sup>35</sup> Cuéntã coo ndó a juú caãan ndo ña cúú ndó na xíca nu yehe ta cáa ví ndó cája ndo cuachi tãtuhun na xíca nu naã. <sup>36</sup> Tá ná quiahva ndó ñamaní jándiyehẽ Ndióxi ínima ndo já a cája ga ndo cuachi jáchi a cánehe ga ndo ínima quini. Tá cája ndó ña cúní Ndióxi já cúú á tãtuhun in lámpara jándiyehẽ ínima ndo —naçachi Jesús.

*Chicaan Jesús cuachi jatã na fariseo xihín jatã na jãnaã*

*ley Moisés*

(Mt. 23:1-36; Mr. 12:38-40; Lc. 20:45-47)

<sup>37</sup> Tá nãndihi naçahan Jesús já naçana in da fariseo Jesús ña ná cuhun a cuxu a vehe da. Tá nãndihi já naçahan Jesús vehe da já naquihvi a naçao a nu mesa xihín java na cã. <sup>38</sup> Joo ndaja coo da fariseo cã chí naçatóntó da jáchi naçini da ña coo nãndahá Jesús cacoo a cuxu a tá quiahva ín costumbre mé na fariseo cã. <sup>39</sup> Añã já naçachi Jesús já xihín da fariseo cã:

—Ndóhó, na fariseo, ndíhi ini ndó cája ndó costumbre ña ndícata ndó jatã vaso xihín jatã coho viti joo co ndíhi ini ndó ndícata ndó ini a. Quiahva já cája mé va ndó jáchi ndíhi ini ndó ndahá ndo tãtuhun costumbre ndo joo co ndíhi ini ndó ndaja vií ndo ínima ndo nuú naçhutú ndaa xihín ñaha quini cáhvi ini ndó. <sup>40</sup> Ndaja tóntó jini ndo. Á co xini toho ndó ña tá naçavaã Ndióxi ñayivi já naçavaã mé á yiquí cuñu na ta naçavaã mé á ínima ná. <sup>41</sup> Caja ndó ñamaní xihín na ndahví xihín ndinuhu ini ndó já ná coo vií ndó nu Ndióxi.

<sup>42</sup> Ndahví naçuu ndó, na fariseo. Mé ndó tá cáchí ndo sahan ndó ñaha nu Ndióxi já cávaã ndó uxu táhnda ñaha ndó cã. Ta in a sahan ndó nu Ndióxi ta quéhe ndihi ndó ña java cã. Quiahva já cája ndó xihín minu estila xihín yucu lotã ta quiahva já cája ndó xihín tá nuú ñaha cána

nu ñúhu ndo. Joo co cája ndó ña ndaa xihín ñayivi. Ta ni co quihvi ini ndó Ndióxi. Joo ña cúni Ndióxi caja ndó quéa ná caja ndaa ndó ta ná quihvi ini ndó a. Ta a ndíndójó ndó quiahva ndó ñaha nu Ndióxi.

43 'Ndáhví nacuu ndó, na fariseo. Jáchi tá sáhan ndó veñuhu cátóo ndo cacoo ndó nu sácoo na náhnu. Ta cúni ndó ña ná cahan Ndióxi toni ñúhú ndivaha ñayivi xihín ndo tá ndique táhan na xihín ndo íchi.

44 'Ndáhví nacuu ndó, na jánahá ley Moisés. Ta ndáhví nacuu ndó, na fariseo. Jáchi co cúu ndó tá quiahva ndaa ndó. Mé ndó cúu ndó tátuhun yávi nu táan na ndii jáchi núu cája ndó. Vatí xójo cava ñayivi yáha na nuú nanduxu ndii cán joo co xini na ña cúu á in yávi nu ñúhu ndii jáchi coo yuu ñáñi a —nacachi Jesús.

45 Anda já nanducú ñehe in da jánahá ley Moisés cán tuhun nu Jesús já nacachi da já xihín á:

—Maestro, xihín tuhun cahan jan jándihihvi ri a ndehe va.

46 Anda já nacachi Jesús já xihín dá:

—Ndáhví nacuu ri ndóhó va, na jánahá ley Moisés. Jáchi cája ndó ña ná coo ihvi ndivaha ley já ná a cúu caja ñayivi ña. Joo mé ndó cája ndúsa ndó xihín ná ña ná caja na ña vatí ni mé ndó a cuú caja ndó ña.

47 'Ndáhví nacuu ndó jáchi cúu á tátuhun cáva ndó

ñáñi nu jánduxu ndó na profeta, na nasahní tásáhnu jícó ndo sanahá. 48 Ta xihín ña yóho náha ndó ña cájji ini ndó xihín ña nacaja tásáhnu jícó ndo sanahá tá nasahní na na profeta. Ta viti cúu á tátuhun chindeé táhan ndó xihín na cán jáchi mé ná nasahní na na profeta ta mé ndó nacavaha ndó nuú nanduxu na.

49 'Xini vaha Ndióxi ñayivi ta ndaa nacahan mé á tá nacachi a já: “Chindahá i java profeta xihín java apóstol nu ndo. Joo mé ndó cahní ndo java na ta java na ndicuíta ñee ndó na”, nacachi Ndióxi sanahá. 50 Joo viti caça Ndióxi cuénta nuú ñayivi ndúu tiempo viti saha tóco ndihi na profeta, na naxihi ndijáá tiempo janda nani nacava sáhá saha ñuyivi. 51 Caça Ndióxi cuénta nuú ñayivi ndúu tiempo viti sahá na profeta ndii naxihi sanahá. Caça mé á cuénta sahá Abel, da naxihi nacaja Caín cán. Ta caça mé á cuénta sahá ndijáá na profeta naxihi tiempo naquixi cán janda quiahva naxinu coo a nuú caça cuénta sahá ndii Zacarías. Mé da yóho nasahní na da ini veñuhu sanahá tañu nu náa xihín nuú yji ndivaha. Ña cán quéa cahan i xihín ndó ña caça Ndióxi cuénta saha tóco ndihi ndii jan nuú ñayivi ndúu tiempo viti.

52 'Ndáhví nacuu ndó, na jánahá ley Moisés. Jáchi cája ndó ña ná a cúu candaá ini ñayivi ña cáchi tuhun Ndióxi. Ta xihín ña yóho cúu ndó na

sájí nuu cuití va jáchi ni co sáhan ndó ñamaní nu ná ña ná candúsa na ña ndaa. Ta mé ndó vatí xini ndó cúú á ña ndaa joo co cája ndó ña cáchí a —ñacachi Jesús xihín na jánaḥa ley Moisés cán.

<sup>53</sup> Tá ñacachi Jesús ña yóho já naxojo ndivaha ini na jánaḥa ley Moisés cán xihín na fariseo cán xihín á. Ta já ñacasáhá na ndáca tuhún cuaha chága na mé á sahá ña cuni na jáquihvi cuití ñahá na. <sup>54</sup> Ta nasacu cuaha ná tuhun ihvi nu á jáchi ndúcu na ndá quiahva chicaan na cuachi jatá xihín in tuhun ña ná yaha yúhu á caḥan.

## 12

*Jánaḥa Jesús sahá na co cúú ná tá quiahva ndáa na*

<sup>1</sup> Ta nani caḥan Jesús cán ñacasáhá táca cuahá ndivaha ñayivi. Cuaha mil na ñacasáhá ndái cuu na cán. Janda quiahva cándíhi táhan ndaja táhan mé ná xihín á cuahan ná. Nu cuití ñacahan Jesús xihín na xica tuun xihín á já cáchí a já:

—Cuéntá coo ndó xihín na fariseo jáchi cúú ná tátuhun yúsa naxaa quée xihín harina ña cávaha na pan. Co cúú ná tá quiahva ndáa na. <sup>2</sup> Ta ni in tuhún toho ñaha a cúu coo jehé nahá jáchi cana tá cana tuhun sahá. <sup>3</sup> Tóco ndihi tuhun ñacahan jehé ndó ñuú já vaxi quivi cuni johó ñayivi ña ndiví táhyí. Tóco ndihi ña ñacahan jehé ndó tá ndájí yéhé já vaxi quivi candaa ini

tóco ndihi ñayivi ñuu sahá —ñacachi Jesús xihín na xica tuun xihín á.

*Yo já ndítahan cayihví yo*  
(Mt. 10:26-31)

<sup>4</sup> Anda já ñacasáhá caḥan Jesús xihín ndihi na cán já cáchí a já:

—Candehé ndo, na cúu amigo i. Cuni caḥan i xihín ndo ña a cáyihví toho ndó ñayivi, na cuu cahní yiquí cuñu ndó. Jáchi ña jan cúu ndihi va ña cája na ta a cúu caja na ni in ñaha xihín ínima ndó. <sup>5</sup> Ta viti ná caḥan i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchi mé a cán quéea cuu caja ña ná quivi ndó ta tá nandíhi cuu chicaan ínima ndo ini indayá. Mé a cán quéea ndítahan ndusa cayihví ndo.

<sup>6</sup> Sa xini vaha ndó ña uhun laa válí yahvi rí ivi jjuhún. Vatí núu ndivaha sáhan ñayivi rí joo co ndíndójó toho Ndióxi saḥa rí jáchi ndáa mé á rí. <sup>7</sup> Quiahva já in rí saḥa mé ndó nu Ndióxi. Jáchi janda ijí jini ndó jan ndáhvi tá in tá in a nu Ndióxi. A cáyihví toho ndó jáchi ndiyahvi chága ndóhó nu Ndióxi a juú ga cuahá laa válí.

*Tá caḥan cáxi ñayivi ña cúú ná cuéntá Jesús*

(Mt. 10:32-33; 12:32; 10:19-20)

<sup>8</sup> Mé a ndaa ná caḥan i xihín ndó ña ndá na cáxi tuhun nuú ñayivi ña cuahan na cuéntá mí i já quéea cachi mí i, da ñachindahá Ndióxi nduu ñayivi saḥa ná ña mé

a ndaa cúu ndusa na cán cuéntá mí i. Já cachi i xihin tátō Ndióxi. <sup>9</sup> Joo ndá na ná cachi xihin ñayivi ña cō xini toho na yehe já quea ni yehe a ndícuni toho i na ña cúu ná cuéntá mí i nu tátō Ndióxi.

<sup>10</sup> "Ta ndá na ná cahan núu sahá yehe, da nachindahá Ndióxi nduu ñayivi, caja cáhnu ini i saha ná. Joo ndá na ná cahan núu saha ínimā yii Ndióxi, na cán cúu na a cāja cáhnu ini toho Ndióxi saha.

<sup>11</sup> "Tá ná tiin na ndohó ña cañehe na ndohó cūhun ndó nahma ndó nuú na sacuaḥa veñuhu á nuú na jutixia sahá i, a ndícuni toho ini ndó ña ndá tuhun quea cahan ndó nuú na cán. <sup>12</sup> Jáchi tá ná xinu cōo hora cahan ndó nuú na cán, jánaḥa ínimā yii Ndióxi nu ndó ndá tuhun nducú ñehe ndó nuú na cán —ñacachi Jesús xihin ná.

*In da cuicá, da nacaja quíhví*

<sup>13</sup> In táhan da ndacaan tañu ñayivi cuaha cán nacahan da xihin Jesús já ñacachi da já xihin á:

—Maestro, cahan loho ndó xihin ñani i ña ná cahnda java da ñaha ña najándacoo tátá nde nuú nde tá naxihi na —ñacachi da xihin Jesús.

<sup>14</sup> Anda já nanducú ñehe Jesús tuhun nu dá já ñacachi a já xihin dá:

—A juú juéxe cúu yehe já coo i cahnda java i ñaha ndó, vaḥa.

<sup>15</sup> Anda já ñacachi tucu a já xihin na ndúu cán:

—Cuni johō vaḥa ndó. Cuéntá coo ndó ña ná a ndiáva nahá ini ndó canduu cuahá ñaha cuicá nu ndó. Jáchi a juú saha ña ndúu cuahá ñaha cuicá nu ndó chí cuu catacu nahá chága ndó, vaḥa —ñacachi Jesús.

<sup>16</sup> Anda já nasacu a in quiahva nu ná já ñacachi a já xihin ná:

—Ñasahiin in da cuicá ta a juú quiahva nasahnu vaḥa ñaha nu ñuhu dá. <sup>17</sup> Anda já ñacasahá mé da cuicá cán ndícuni ini da já nacahan da já: "Ndáchí taán toho í cuahá nahá ñaha nacana nu yo yóho jáchi coó ga nuú cañuhu a", nacahan da. <sup>18</sup> Anda já nacahan tucu da já: "Ña caja í quea ndicani ndihi í yaca ní ñaha í já cavaha í ña nánhu chága. Ta cán taán yo ndihi ña nacana nu yo ta cán taán yo tóco ndihi java ga ña cómi yo.

<sup>19</sup> Anda já cachi i já xihin mí i: Sa cuahá ndivaḥa va ñaha nasacu vaḥún viti. Ta queta ña cusún tixi cuahá ndivaḥa cuja. Ta viti jandá ndiquehe ndée cuití vún. Cuxu cuití vún. Coho cuití vún. Ta jandá cajji cuití ini vún, já va cachi i xihin mí i", nacahan da. <sup>20</sup> Joo nacahan Ndióxi já ñacachi a já xihin dá: "Taa quíhví, sa mé ñuú viti quivi vún. Ta tóco ndihi ña nasacu vaḥún jan a juú ña cusún cúu á. Ndá na cúu mé va na cuxu ña jan", ñacachi Ndióxi xihin dá.

<sup>21</sup> Quíhví ndivaḥa cāja ñayivi tá ndája tútú na ñaha ñuyívi yóho joo cō ñuhu ini na saha Ndióxi ña ná caja na ña cūni

mé á. Sahá ña cán quéa cúu ná na ndahví ndivaha nu mé á —nacachi Jesús xihín ná.

*Ndaá Ndióxi na cúu ndusa jahyi mé á*

(Mt. 6:25-34)

<sup>22</sup> Tá nandihí já nacahan Jesús xihín na xíca tuun xihín á cán já nacachi a já xihín ná:

—A ndícani toho ini ndó sahá ña cuxu ndó catacu ndó ta ni saha jáhma candixi ndó.

<sup>23</sup> Jáchí cáhnu chága mé ndó a juú ga ña xíxi ndó xihín ña ndíxi ndó. <sup>24</sup> Candehé ndó rí naní ticacá jan. Co xútu rí ta ni co jáquee rí. Ta ni coo yáca nu táan rí ñaha rí. Joo sahan va Ndióxi ñaha cuxu rí ña ná catacu rí vatí laa va cúu rí. Ta mé ndó ndiyahvi chága ndó a juú ga laa jan. <sup>25</sup> A ndícani

toho ini ndó jáchí coo toho a ñehe ndó ndícani ini ndó. Ni in túhún toho ndó a cúu ndaja jícó ndó mé ndó java metro chága sahá ña ndícani ini ndó.

<sup>26</sup> Tá ta ni loho ña yóho a cuú caja ndó, ndía ndóho ndó ndícani nahá ini ndó caja ndó java ga ñaha, dá já.

<sup>27</sup> Candehé ndó ndá quiahva ndató sáhnu ita. Co cája chúun a ta ni co cávaha jáhma á. Joo mé a ndaa ná cahan i xihín ndó ña ñúchí chága ita yóho nacaja Ndióxi a juú ga jáhma vaha ndivaha nasandixi rey Salomón sanahá, da nasahin cuahá ñaha cuicá. <sup>28</sup> Candehé ndó ndaja ndáa vaha Ndióxi yucu ita vatí in tóo a viti ta itaan cáyi a jándihí sahá. Ta ndiyahvi chága mé ndó a juú ga yucu ita. Joo co

cándúsa ndó ña candaa mé á ndohó. Ña cán quéa xíní ñúhú candeé ini ndó Ndióxi ña quiahva tá quiahva mé á jáhma candixi ndó. <sup>29</sup> Ta a ndícani ini ndó ndaja caja ndó ñehe ndó ña cuxu ndó xihín ña coho ndó. <sup>30</sup> Jáchí ñayivi, na co xíní íchí cuéntá Ndióxi, na cán cúu na ndícani cuahá ini saha tóco ndihí ña yóho. Joo cúu ndó cuéntá Ndióxi, mé a cúu tátá ndó ta xíní vaha mé a ña ndímaní nu ndó catacu ndó. <sup>31</sup> Joo ndítahan nu ndó ndiquiahva ndó mé ndó ndáha Ndióxi ña ná cacomí a cuéntá saha ndó já quiahva mé á nu ndó ña ndímaní nu ndó catacu ndó.

*Indiví cúu nu ndítahan ndaja tútu ñayivi ña vaha*

(Mt. 6:19-21)

<sup>32</sup> A cáyihví toho ndó jáchí mé ndó cúu ndó tátuhun ndicachi válí janá i. Mé a ndaa chá va cúu ndó joo cáji ini Ndióxi ña cómí a cuéntá saha ndó. <sup>33</sup> Jícó ndó ña cómí ndó ta jasá ndó ñaha nuú na ndímaní ñaha nuu. Jáchí quiahva já ndaja tútu ndó ñaha vaha indiví nuú cuhun ndó. Jáchí mé cán a ndíhi sahá ña vaha cómí ndó. Ta ni na cuíhná a cuú quihvi na caja cuíhná ñaha ndó cán. Ta ni tiquijí a cuú jándihí rí sahá ñaha ndó cán. <sup>34</sup> Jáchí nuú ndaja tútu ndó ña ndáyahvi nu ndó, cán coo ri inima ndó.

*Naha Jesús ña xíní ñúhú canduu tiahva ñayivi cuhun na xihín mé á*



35 Xíní ñúhú canduu tiahvá ndó candati ndó ndá hora ndicó coo tucu u quixi i ndiquehe e ndohó. 36 Xíní ñúhú cacuu ndó tátuhun mozo tá ndáti tiahvá da ndicó coo xitoho da, da cuahan víco tándaha. Ndáti tiahvá da cuná da yéhe nu dá tá ná xinu coo da cani ndáha dá yéhe. 37 Tahví nacuu mozo tá co quiji da ndúu da tá ná xinu coo xitoho da. Mé a ndaa ná cahan i xihin ndo ña janda mé da cúu xitoho da cán ndiquehe ñaha da ta já cacoo da da nu mesa da ta já chican da cohó cuxu mozo da. 38 Coó caja toho a ña ná xinu coo xitoho da java ñuu táji á tá sa yati tivi, tahví nacuu mozo cán tá ndíta da ndúu da tá naxinu xitoho da nu dá. 39 Candehé ndo jáchi xíní ñúhú candaá ini ndó ña yóho. Tá xini in dataa ndá hora cuni na cuíhna quihvi na vehe da já quea a cúju da jáchi ndáa vaha da vehe da já ná a quihvi na caja cuíhna na ñaha vehe da. 40 Quiahva já xínú ñúhú canduu tiahvá ri ndohó va jáchi quixi tucu yehe, da nachindahá Ndióxi ndúu ñayivi mé quivi co cahan ndo quixi i —nacachi Jesús xihin ná.

*In mozo vaha xihin in mozo a váha*  
(Mt. 24:45-51)

41 Anda já nandaca tuhún Pedro Jesús já nacachi da já xihin á:

—Á nuú ndehe cuití nasacu ndó quiahva yóho á nasacu

ndó ña nuú ndaja táhan ñayivi ndúu yóho.

42 Anda já nacachi Jesús já xihin dá:

—Ña cahan i yóho cahan i ña xihin da tácu ini, da cája vaha ndusa. Cúu á tátuhun in mozo tá jándacoo xitoho da chuun ndáha dá ña ná quiahva da cuxu na java ga cúu mozo xihin dá cán. Anda já naquee mé xitoho da cuahan da. 43 Tahví nacuu mé mozo cán tá xinu coo xitoho da ta ndíñehe dá da cája da chuun ña nacandoo nu dá caja da. 44 Mé a ndaa ná cahan i xihin ndo ña quiahva xitoho da cán chuun nu dá ña ná cacomí da cuénta saha tóco ndihi ñaha cómi xitoho da. 45 Joo da cúu mozo yóho tá ná casahá da cahan da ña cayancá ndivaha xitoho da ndicó coo da ta sahá ña cán quea casahá da cája xixi da xihin java ga na cúu mozo xihin dá cán. Ta já cáa ga da casahá xixi da ta xihí da ta já xini da. 46 Ta ndaja coo xinu coo xitoho mozo cán mé quivi co cahan da. Anda jávi jándoho quini xitoho da cán ini da jáchi coo nacaja da ña ndítahan caja da. Ta ndoho da yóho tá quiahva ndóho tóco ndihi na sáa ini, mé na co cája ña sáhdá xitoho na nu ná caja na.

47 Tá ná candaá ini mozo ña cuni xitoho da caja da joo co in tiahvá da caja da ña ta ni co cuni da caja da ña sáhdá xitoho da nu dá, da cán cúu da ndoho ndivaha ini. 48 Joo tá in in mozo ta co candaá vaha

ini da ndá quéa cúnj xitoho da caja da ta ndaja coo cája da in ñaha ña co táhán ini xitoho da xihín já quéa chá cuití va ndoho ini da. Tá ná caja Ndióxi cuahá ñamanj xihín in ñayivi já quéa ndítahan caja chúun cuaha ná nu mé á. Ta tá sa cándéé ini ñayivi inga na já quéa ndinuhu ñamanj náhnu chága caça na cán ña ná caja na xihín ná.

*Cája Jesús ña sáhdá java táhan ñayivi*

*(Mt. 10:34-36)*

<sup>49</sup> 'Yehe naquixi i ñuyívi yóho cahnda java táhan i ñayivi já ná nahá na cúnj cuhun xoo mí i xihín na co cúnj cuhun xoo i. Ta ña yóho cúú á tátuhun naquixi i chícáan ñúhu i ñuyívi yóho. Ta cúnj ña ná ndihi quíi chuun naquixi caja i yóho. <sup>50</sup> Vaxi quívi ndoho ndivaha ini i ta a juú quiahva ndíhi ini i ndáti xinú coo mé quívi jan. <sup>51</sup> A cáhán toho ndó ña naxinu i ñuyívi yóho caja i ña ná coo vaha ini ñayivi. Ña vaxi yehe caja i quéa ná cahnda java táhan na. <sup>52</sup> Jáchj viti xihín chí nuu cacuu a tátuhun canduu uhun ñayivi in vehe joo a cúnj táhan na sahá yehe jáchi ivi na cacuu cuéntá mí i ta unj na candají yehe. Á tá coo ta unj na quíhvj ini yehe ta ivi na candají ri yehe. <sup>53</sup> Ta jári da cúú tátá cani táhan da xihín jahyi da sahá yehe. Ta jári ndicujta dataa cani táhan da xihín tátá da sahá yehe. Ta jári najihí cani táhan na xihín jahyi jíhi na sahá yehe. Ta

jári najihí cani táhan na xihín náná na sahá yehe. Ta jári ndicujta najihí cani táhan na xihín sanu na sahá yehe. Ta jári ndicujta najihí cani táhan na xihín xojo na sahá yehe —nacachi Jesús.

*Co cúnj ñayivi candaa ini na yo cúú Jesús*

*(Mt. 16:1-4; Mr. 8:11-13)*

<sup>54</sup> Anda já nacachi tucu Jesús já xihín ñayivi:

—Mé ndó tá xínj ndo ndicujta vico vaxi a ñuu ndó chí xoo nu quéta candii já cáchi ndó ña cuun javi ta chí cúun ndusa dó. <sup>55</sup> Ta tá xínj ndo vaxi tachj chí xoo sur já cáchi ndo ña ihní ndivaha coo ta chí ihní ndusa sáhiin. <sup>56</sup> Co cúú ndó tá quiahva ndáa ndó. Cándaa vaha ini ndó ña cúu ñuyívi ta cándaa ini ndó cahan ndó ndá quéa coo tá sándehe ndó indivi. Joo co cúnj ndó candaa ini ndó ña jánaha i nu ndo.

*Ndítahan caja vaha ndó xihín na co cúnj ndohó*

*(Mt. 5:25-26)*

<sup>57</sup> 'Ndávaha co tává vaha ndó cuéntá ndía quéa vaha ta ndía quéa a váha. <sup>58</sup> Tá sácú ini na saha ndó cuhun ndó vecaa ta ndáca táhan ndó xihín na cán cuahan ndó nuú na jutixia, xínj ñúhú nducú ndó ndá quiahva ndique táhan máni tucu ndó xihín ná nani xíca ndó íchi cuahan ndo. Já quéa ná a cánehe na cán ndohó cuhun ndó nu juéxe jáchi da cúú juéxe cán ndiquiahva da ndohó ndáha policia ta policia cán chícáan da ndohó vecaa. <sup>59</sup> Mé a ndaa

ná cahan i xihin ndo ña tá ndácaan ndó vecaa jan chí a cána ndó janda quiahva ná chahvi ndihi ndó ña yíca ndo nuú da cán já janí da ndohó —nacachi Jesús xihin ná.

## 13

*Cahan Jesús ña ndítahan jándacoo ñayivi cuachi cája na*

<sup>1</sup> Mé tiempo já naxinu coo java na ndicani na nu Jesús sahá ña nasahní Pilato java dataa estado Galilea nani jóco da nu Ndióxi. Ña cán quéa cáchi na ña nacatáhan nji da naxihi xihin nji quiti, rí jóco da. <sup>2</sup> Anda já nacachi Jesús já xihin ná:

—Á cáhan ndo ña naxihi da Galilea yóho sahá ña ín chága cuachi da a juú ga java ga na Galilea. <sup>3</sup> A juú a já jáchi quiahva já ndihi ri saha ndóhó va tá ná a jándacoo ndó cuachi cája ndó. <sup>4</sup> Sanahá ndivaha já naxihi sahun uní taa jáchi nandicava in torre naní Siloé jata ná. Á cáhan ndo ña nandicava torre cán jatá na yóho jáchi nasahin chága cuachi na a juú ga na ñuu Jerusalén. Joo co cúú á quiahva já. <sup>5</sup> Mé a ndaa ná cahan i xihin ndo ña quiahva já ndihi ri saha ndóhó va tá ná a jándacoo ndó cuachi cája ndó —nacachi Jesús xihin ná.

*Sácu Jesús quiahva sahá in titó ñuhú, dó co cána cuhi nuu*

<sup>6</sup> Anda já nasacu Jesús in quiahva nu ná já nacachi a já xihin ná:

—In dataa najánde da in titó ñuhú nu ñuhú dá. Ta

tá nayaha tiempo já nasahan da sándehe da do ña á cána titó ñuhú nu do. Joo co mé rí nandiñehe dá. <sup>7</sup> Anda já nacachi da já xihin da ndáá ñuhú dá cán: “Candehé, sa naxinu uní cuia já cuítí quixi i ndúcú u titó ñuhú nu yito yóho. Ta coo ñaha cána nu do. Vaha chága ná cahndún do jáchi ndá chuun quéa candichi uun dó cája táñu dó nu ñuhú i”, nacachi da xihin da ndáá ñuhú dá cán. <sup>8</sup> Anda já nacachi da ndáá ñuhú dá cán já xihin dá: “Quiahva ndó ñamaní, xitoho i ña ná coo too ga dó cuia viti ná jatayi i ñuhú saha do ta ná chicaan loho i tata saha do. <sup>9</sup> Ta xihin ña yóho jonáa cana cuhi nu do. Ta tá coo ñaha cána nu do já cahnda ndó do tá cúní ndo”, nacachi mozo cán xihin xitoho da —nacachi Jesús.

*Mé quivi ndiquehe ndée ñayivi ndája vaha Jesús in ña xica tojo*

<sup>10</sup> Ta ndaja coo in quivi ndiquehe ndée ná já nasandacaan Jesús veñuhu jánaha tuhun Ndióxi nuú ñayivi. <sup>11</sup> Ta mé ini veñuhu cán nasandacaan in ñáñaha, ña quihvi sahun uní cuia. In ínimá quini cúú rí naquihvi ini ña ta nacaja rí ña ná nditojo ña ta chí ni loho a cuú jándicaa ña mé ña. <sup>12</sup> Tá naxini Jesús ña já nacana mé á ña já nacachi a já xihin ña:

—Ndaja vaha i yohó viti —nacachi Jesús xihin ña.

<sup>13</sup> Anda já nachojó a ndáha á jata ña chí mé hora já

nandicaa yiquí cuñu ña ta ñacasáhá ña cája cáhnu ña Ndióxi. <sup>14</sup> Joo mé da cúu sacuaḥa veñuhu cán ñacasáhá ndícuehe da jáchi nandaja vaha Jesús ñañaḥa cán mé quivi ndíquehe ndée ná. Já ñacasáhá cáchi da cán já xihín ñayivi ndúu ini veñuhu cán já:

—Íin iñu quivi núná nu yó cája chúun í ta tañu quivi já cuu quixi ndó catátá ndó tá cúní ndó. Joo a quixi ndó catátá ndó quivi ndíquehe ndée yó —ñacachi da xihín ná.

<sup>15</sup> Anda já ñacachi Jesús já xihín da sacuaḥa veñuhu:

—Co cúu ndó tá quiahva ndáa ndó. Cája mé ndó chuun quivi ndíquehe ndée yo tá ndáxi ndó tindiQUI á búrrō jana ndó sáhan ndó jácoho ndó ri ticuú. <sup>16</sup> Ta viti candehé ndó ñañaḥa yóho. Cúu ña ña ñaquixi chichi Abraham ta sa íin sahun uní cuia ñaquehe cuehe ña ñacaja Satanás, mé tiñáhá sacuaḥa. Ta mé ndó cáhán ndó ña a váha toho ñacaja í ña najaní í ñañaḥa yóho ndáḥa cuehe ña nandoho ña tixi cuahá cuia. Joo mé a ndaa nanditahan nuú í janí í ña ndahá cuehe yóho coo caja toho a cúu á quivi ndíquehe ndée yo —ñacachi Jesús.

<sup>17</sup> Tá ñacachi Jesús ña yóho chí a juú quiahva ñacacahan nuú na coo cúní Jesús cán. Joo tóco ndihi java ga ñayivi cán cájii ndivaha ini na jáchi ñaxini na ña cája Jesús ña náhnu ndivaha.

*Sácú Jesús quiahva saḥá in ndiqui mostaza*

(Mt. 13:31-32; Mr. 4:30-32)

<sup>18</sup> Tá ñandihí já ñacachi tucu Jesús já:

—Ná ndicani í nu ndó ndaja íin nu ndiquiahva ñayivi mé ná ndáḥa Ndióxi ña ná cacomí a cuéntá saḥa ná. <sup>19</sup> Cúu á tátuhun in ndiqui mostaza ña chíhin in daḥa nu ñúhu dá. Ta mé ndiqui loho yóho sáhnu a janda quiahva ndúu a tátuhun in yitó cáhnu nu xinu coo laa chójó ri táca ri nu ndáḥa do —ñacachi Jesús.

*Sácú Jesús quiahva saḥa ndaja cája yusá ñaxiaa tá quee a xihín harina*

(Mt. 13:33)

<sup>20</sup> Anda já ñacachi tucu Jesús já:

—Ná ndicani í nu ndó ndaja íin nu ndiquiahva ñayivi mé ná ndáḥa Ndióxi ña ná cacomí a cuéntá saḥa ná. <sup>21</sup> Cúu á tátuhun tá cávaḥa na pan ta quee yusá ñaxaa xihín harina. Cúu á tátuhun tá cáva táhan in ñañaḥa loho yusá ñaxaa xihín uní táhndá náhnu harina ña ná jánañu a tóco ndihi mé yusa cán —ñacachi Jesús.

*Táhán ndivaha yéhe nuú quihvi ñayivi cuhun na indivi*

(Mt. 7:13-14, 21-23)

<sup>22</sup> Nandiquehe Jesús íchi cuahan chí ñuu Jerusalén ta ndijáá ñuu náhnu xihín ñuu válí nu yáha janaḥa mé á tuhun Ndióxi cuahan. <sup>23</sup> Ta ndaja coo nandaca tuhún in da Jesús já ñacachi da já xihín á:

—Xitoho í, á chá cuití va ñayivi cacuu na cacu ndaa ínimā cuhun chí indiví — ñacachi da xihin Jesús.

Anda já nanducú ñehe Jesús tuhun já cáchí a já xihin dá:

24 —Cúú á tátuhun íin in yéhé táhán loho nuú ndihvi ñayivi indiví. Ña cán quéa xíní ñúhú ndó ndihvi ini ndó ndihvi ndó chí yéhé loho cán jáchí cuahá ndivaha ñayivi ndítihvi na ña quihvi na joo a cúu quihvi na. 25 Jáchí tá quiahva íin in xitoho vehe quiahva já íin Ndióxi. Jáchí tá ná ndicoo da cúú xitoho vehe cán chícaji tuun da viti yéhé vehe da já xínu coo ndó cándichi ndó jata véhe cáni ndáha ndó yéhé já cachi ndó já: “Á ndúyu ndó, xitoho i. Á a cája ndó ñamaní cuná loho ndó yéhé ná quihvi nde”, cachi ndó xihin dá. Ta já nducú ñehe da cán tuhun nu ndó cachi da já xihin ndo: “Cuáhán ndo jáchí co xíní toho i ndohó.” 26 Ta já casáhá mé ndó cachi ndó já xihin dá: “Cuahá tañu sa ñaxixi nde ta ñaxihi nde xihin ndo. Ta ní cáyé ñuu nde ñaxica nuu ndó najánaha ndó ñayivi.” 27 Anda já nducú ñehe da cán tuhun nu ndo já cachi da já xihin ndo: “Sa ñacahan vi xihin ndo ña co xíní toho i ndá na cúú ndohó. Caxoo ndihi ndó nuú i jáchí cúú ndó ñayivi cája ndinuhu ña núu.” 28 Ta cán ndusa quéa cuacu cóhó ndo ta casáhá cahña nuhu ndó xihín ña cojo ini ndó. Jáchí cán cuni ndó Abraham

xihin Isaac xihin Jacob xihin tóco ndihi na profeta. Cuni ndó ña ndúu na indiví cán ta cómí Ndióxi cuéntá saha ná. Ta a juú quiahva táhnda ini ndó jáchí tavá xóo Ndióxi ndohó ña ná a ndihvi ndó nu ndúu na cán. 29 Jáchí xínu ñayivi ndúu ndijáá ñuyíví nu Ndióxi ta ndaca nduu na nuú cacomí Ndióxi cuéntá sahá ñayivi. 30 Ta mé quivi cán já cuni ndó java ñayivi, na coo saha mé nuú ñayivi ta nduu na na íin chága saha nu Ndióxi. Ta cán cuni ndó java na ndíñehe jícó mé viti ta a cóo toho saha ná nu Ndióxi —ñacachi Jesús.

*Táhnda ini Jesús ta sácu a sahá ñayivi ndúu ñuu Jerusalén (Mt. 23:37-39)*

31 Mé quivi já ñaxínu coo java na fariseo nu Jesús já ñacachi na já xihin á:

—Cuáhán inga ñuu coún jáchí sácú ini Herodes cahni da yohó —ñacachi na xihin á.

32 Anda já ñacachi Jesús já xihin ná:

—Cuáhán ndó cahan ndó xihín da cátoó jándahvi ñayivi jan ta cachi ndó xihin dá ña tává i ínimā quini ñúhu ini ñayivi ta ndája vaha i na quihvi ta caja tá caja i ña yóho janda quiahva ná xínu coo quivi jándihi i chuun yóho. 33 Joo sa mé Jerusalén jan quivi vi jáchí jan cúu nu sáhní na profeta. Ta viti ndítahan caca nuu yíi vi íchí xíca i cuahan i yóho —ñacachi Jesús.

<sup>34</sup> Anda já nacachi tucu Jesús já:

—Ndáhví nahá nacuu ndó, na ndúu ñuu Jerusalén. Jáchi sáhní ndó na profeta. Ta ndícuíta ndó cáni ndó na nachindahá Ndióxi nu ndó xihín yuu. Cuahá ndivaha tañu cúní jánditaca ndihi i ndohó joo coó naxeen ndó. Cúú á tá quiahva cája nduxú tá játaca rí jahyi válí rí tixi ndixi rí. <sup>35</sup> Ta viti cuni johó ndó ña cáhan i xihín ndó. Vaxi quiví janí ndáha mé vehe ndó candoo a. Ta mé a ndaa ná cáhan i xihín ndó ña a cúní ga ndó yehé janda quiahva ná xinu coo quiví cachi ndó: “Cáhnú nahá ná cacuu da vaxi cuéntá Ndióxi, xitoho í” — nacachi Jesús.

## 14

*Tá nandaja vaha Jesús in da naquihvi cuiñu*

<sup>1</sup> Ta ndaja coo in quiví ndíquehe ndéé ná já nasahan Jesús naxixi a vehe in da cúú sacuahá nuú na fariseo. Ta java ga na fariseo cán nacasáhá nání na Jesús ndúu na. <sup>2</sup> Ta mé yati nu Jesús cán nasahiin in dataa, da naquihvi cuiñu yiquí cuñu. <sup>3</sup> Anda já nandaca tuhún Jesús na jánaña ley Moisés xihín na fariseo já nacachi a já xihín ná:

—Á núná nu yó ndaja vaha í in da quihvi mé quiví ndíquehe ndéé yo, á co núná toho nu yó cája í ña —nacachi Jesús xihín ná.

<sup>4</sup> Joo táji nasahiin yuhú na cán. Anda já nandaja vaha

Jesús da quihvi cán já nacachi a xihín dá ña ná quee da cuhun da. <sup>5</sup> Ta já nacachi a já xihín na fariseo cán:

—Mé ndó tá ndicava búrró á tindi quí jana ndó ini in táhvi chí ivi laá tavá ndó rí. Ta coó caja toho a á cúú á quiví ndíquehe ndéé yo —nacachi Jesús.

<sup>6</sup> Joo coó nacuu nducú ñehe na tuhun nu Jesús.

<sup>7</sup> Anda já naxini Jesús ña jandá johó ndácaxi na nataca cán nuú vaha cacoo na já najánaña nu ná ndía vaha chága ndítahan caja na. Já nacachi a já:

<sup>8</sup> —Tá ná cana in na yohó cuhun in víco tándaha, a ndúcú tohún cacoun nu sácoo na náhnú. Jáchi cuu xinu coo in da íin chága saha a juú ga yohó. <sup>9</sup> Ta da nacana yohó víco cán cuu cachi da já xuhun: “Quiahva nu íin coún jan ná cacoo da yoho”, cachi da xuhun. Anda já cacahan nuún já queún cuhun cacoun janda nu ndíhí. <sup>10</sup> Ña ndítahan cajún quea cacoun janda nu ndíhí. Já quea tá ná xinu da nacana yohó nu íún já cachi da já xuhun: “Amigo, cuahán yaha nu ndúu na náhnú coún.” Xihín ña yoho ndindita jícún nuú na ndúu coo nu mesa xíxi xuhun cán. <sup>11</sup> Jáchi ndá na cája cáhnú mé, na cán cacuu na nanuu ndáha johó. Ta na co ndíñehe jícó mé, na cán cúú na ndicáhnú —nacachi Jesús.

<sup>12</sup> Anda já nacahan Jesús xihín mé da nacana ñahá cán já nacachi a já xihín dá:

—Tá ná cavaḥa cuahún ña cajáñu na á ña cajíni na, a cána tohún na cúu amigún jan ni na cúu ñanún jan ta ni a cána tohún na cúu táhún ta ni a cánún na cuicá nduu yati xuhun jan. Jáchí tá ná caja na víco cana ri na jan va yohó ta xihín ña jan táhnda cuénta sahá ñamañi ñacajún xihín na cán. <sup>13</sup> Ña ndítahan cajún tá ná cavaḥún in víco quea canún na ndahví ta canún na réncō ta canún na cuaá. <sup>14</sup> Ta já cajíi ínún jáchi na cán a cúu toho caja na chahvi na ñamañi ñacajún xihín ná ñuyívi yóho. Joo vaxi quívi tá ná nditacu ñayivi ñasañehe ínima vaha ñuyívi yóho já chahvi Ndióxi ñamañi ñacajún jan —ñacachi Jesús xihín ná.

*Sácú Jesús quiahva sahá in dataa, da ñacana cuaha chá ñayivi ña ná cuhun na víco vehe da*

(Mt. 22:1-10)

<sup>15</sup> Tá ñaxini johō in táhan da ín coo nu mesa xihín Jesús cán ña yóho já ñacachi da já xihín á:

—Tahví ñacuu na ná ñehe táhvi cuhun indivi ña ná cacomí Ndióxi cuénta saha ná —ñacachi da xihín Jesús.

<sup>16</sup> Anda já ñasacu Jesús in quiahva nu dá já ñacachi a já xihín dá:

—In dataa ñacavaḥa da in víco cáhnu ta ñacana cuahá ndivaḥa da ñayivi. <sup>17</sup> Ta tá sa ñaxinu coo hora cajíni na já ñasahnda da chuun nu mozo da ña ná cuhun da cana da na ña quixi na

ndaca nduu na nu mesa. Já ñacachi da já xihín ná: “Naha quíi ndo jáchi sa ñacandíví ndihi ñaha”, ñacachi mozo xihín na cán. <sup>18</sup> Joo tóco ndihi na cán ñacasáhá na cáhan na ña a cúu toho cuhun na. Ta in táhan da cán ñacasáhá cáchi da já xihín mé mozo cán já: “Jacá ñaxeen uun i in ñúhu ta xíní ñúhú cuhun i candehé e nu á. Cáhnu coo ínún”, ñacachi da xihín mozo cán. <sup>19</sup> Ta inga da ñacachi da xihín mé mozo cán já: “Jacá ñaxeen e uhun yúntá tindiquí ta viti cúni cuhun i coto ndojó i ri. Cáhnu coo ínún”, ñacachi da xihín mozo cán. <sup>20</sup> Ta inga tucu da ñacasáhá cáchi da já: “Jacá ñatandaha vi sahá ña cán quea a cúu toho cuhun i”, ñacachi da xihín mozo cán. <sup>21</sup> Tá ñandicó coo mozo cán nuú xitoho da já ñandicani ndihi da nuú xitoho da ña ñacachi na cán xihín dá. Anda já ñacasáhá ñandicuehe xitoho da cán já ñacachi tucu da já xihín mozo da: “Ta viti cuahán camún ndijáá cáyé ñuu játacún na ndahví xihín na réncō xihín na cuaá. Cañehún na quisún yóho ná cuxu na”, ñacachi xitoho da cán xihín dá. <sup>22</sup> Tá ñandihí já ñasahan mozo cán já ñacaja da ña ñacachi xitoho da xihín dá. Ta tá ñandicó coo da já ñacachi da já xihín xitoho da: “Sa ñacaja i tá ín ñasahnda ndó nuú i. Joo yójó tá yójó nuú cuu canduu chága na”, ñacachi da xihín xitoho da. <sup>23</sup> Anda já ñacachi xitoho da

já xih̄in dá: “Cuáhán ndijáá cáyē xih̄in ndijáá ích̄i ta xih̄in ña ndúsa játacún na ña ná quixi na já ná chutú vehe e. <sup>24</sup> Jách̄i ni in túhún toho táhan na ñacana i quixi vehe e nu cuítí cán, a quíxi ga na cajini na ña ñacatáhan vehe e”, ñacachi da xih̄in mozo da —ñacachi Jesús.

*Ndítahan jándacoo í ndá ña ndáyahvi nu yó tá ta mé a ndaa cúni yó candico yó Jesús*  
(Mt. 10:37-38)

<sup>25</sup> Cuahá ñayivi ndíco na jata Jesús cuahan na. Anda já nandico coo jata nuu Jesús já ñacachi a já xih̄in ná:

<sup>26</sup> —Ndá na cúni jácuaha xih̄in i xíní ñúhú quih̄vi ini chága na yehe a juú ga tátá na xih̄in náná na. Ta xíní ñúhú quih̄vi ini chága na yehe a juú ga ñájíhí na á jah̄yi na á ñani na á quiahva na. Ta xíní ñúhú quih̄vi ini chága na yehe a juú ga mé ná. <sup>27</sup> Ta ndá na co ndíco yehe sahá ña yíhví na quivi na, mé a ndaa coo sahá toho na cacuu na cuéntá yehe. <sup>28</sup> Tá cúni ndó cavaha ndó in vehe jícó ña cája ndó quéa tavá vaha ndó cuéntá ña á queta jih̄ún ndo á a quéta já ná jáxinu ndó ña. <sup>29</sup> Jách̄i tá ná a tává jih̄na ndó cuéntá ta casahá ndó cavaha ndó vehe ndó joo tá nandih̄i co quéta ga jih̄ún ndó ña ná jáxinu coo ndó ña já quéa cacahan nuu ndo jách̄i casahá ñayivi cuacu ndaa na ndohó. <sup>30</sup> Já cachi na já xih̄in ndo: “Taa jan ñacasahá da cavaha da vehe da joo coo ñacuu jáxinu

dá ña”, já cachi na cuacu ndaa na ndohó —ñacachi Jesús.

<sup>31</sup> Anda já ñacachi tucu Jesús já:

—Tá ná cani táhan in rey, da cómi uxu mil soldado xih̄in inga rey, da cómi oco mil soldado já quéa xíní ñúhú ndicani vaha ini da ña á cuu quee vaha da xih̄in da inga rey cán tá ná quih̄vi táhan da xih̄in dá. <sup>32</sup> Ta tá natavá vaha da cuéntá ña a cuú quee vaha da xih̄in rey, da cómi oco mil soldado cán janda xicá va ín da já chindahá da java ñataa ña ná cuhun da caca da ñamani nuú inga rey cán ña ná ndíco va tondohó. <sup>33</sup> Quiahva já ín ri xih̄in ndohó va. Ndá ndohó, na co cúni jándacoo tóco ndih̄i ña cómi ndo sahá yehe já quéa coo sahá toho ndó cacuu ndó cuéntá yehe —ñacachi Jesús.

*Cahan Jesús ña tá jándacoo ñayivi ích̄i cuéntá mé á cúu ná tátuhun ñij, ña co ohva ga*  
(Mt. 5:13; Mr. 9:50)

<sup>34</sup> Anda já ñacachi tucu Jesús já:

—Ña vaha ndivaha cúu ñij yívi na joo coo chuun toho a tá co ohva ña. <sup>35</sup> Mé ñij, ña co ohva ga jan ni co váha ña jácana í nu ñúhu yó jách̄i co ndáhá toho ñúhu yó cája ña. Ña cája na xih̄in ñij jan quéa sátá va na ña. Na ín joh̄o, ná cuni joh̄o na —ñacachi Jesús.

## 15

*Sácú Jesús quiahva sahá in ndicachi, rí nandiñúhú*  
(Mt. 18:10-14)



1 Cuahá na játaca jjuhún cuénta impuesto xihín cuahá na cája cuachi nacasáhá na cáyati na nu ín Jesús jáchi cúní na cuni johó na nu cáhan mé á. 2 Sahá ña cán quéa nacasáhá na fariseo xihín na jánahá ley Moisés cáhan núu na sahá. Já cáchi xihín táhan na já:

—Taa jan ndiquehe vaha da ñayivi cája cuachi ta xíxi da xihín ná —cáchi xihín táhan na cán.

3 Anda já nasacu Jesús in quiahva nu ná já nacachi a já xihín ná:

4 —Mé ndó tá cómi ndo in ciento ndicachi ta tá in cuití ndiñuhú in ndicachi jana ndo ña cája ndó quéa jándacoo ndó comi jíco sahún comi rí cán yucu ta já quée ndó cuahan ndó ndinducú ndó rí nandiñuhú cán janda quiahva ndiñehe ndó ri. 5 Ta tá ndiñehe ndó ri já cávatá ndo já quéhe ndó ri chínúu ndó ri sahá jiqui ndo vaxi ndó. 6 Ta tá xínu coo ndó vehe ndó já játaca ndó ñani táhan ndo xihín na xíní táhan xihín ndó. Já casáhá cáchi ndó já xihín ná: “Xíní ñuhú cajii íní ndó xihín i jáchi cájii íní i sahá ña nandiñehé e ndicachi jana i, rí nandiñuhú cán”, cáchi ndó xihín ná. 7 Mé a ndaa ná cahan i xihín ndo ña quiahva já ta janda chága ví cájii íní na ndúu indivi tá jándacoo in ñayivi cuachi cája na a juú ga sahá comi jíco sahún comi ñayivi, na cája tá cája ña vaha.

*Sácú Jesús quiahva sahá in jjuhún, ña nandiñuhú*

8 “Ta viti ná cahan tucu u inga quiahva xihín ndo. In ñañaha nasahjin uxu jjuhún caa ña yahvi ndivaha nu ña. Ta tá ndiñuhú in táhan ña cán já ndicahmi ña ñuhú ta tíhvi ña vehe ña jáchi ndíhi íní ña ndínducú ña ña ta ví ví ndínducú ña ña janda quiahva ná ndiñehe ña ña. 9 Ta tá sa nandiñehe ña ña já játaca ña ñani táhan ña xihín na xíní táhan xihín ña já casáhá cáchi ña já xihín ná: “Xíní ñuhú cajii íní ndó xihín i jáchi cájii íní i sahá ña nandiñehé e jjuhún i, ña nandiñuhú”, cachi ña cán —nacachi Jesús.

10 Anda já nacachi tucu Jesús já:

—Mé a ndaa ná cahan i xihín ndó quiahva já cájii íní tátó Ndióxi ndúu indivi tá jándacoo in ñayivi cuachi cája na —nacachi Jesús.

*Tá najándacoo in dataa tátá da ta naquee da cuahan xicá da*

11 Anda já nasacu Jesús in quiahva nu ná já nacachi a já: —In dataa nasahjin ivi jahyi taa da. 12 Ta da loho chá cán nacachi da já xihín tátá da: “Taa i, á a váha ná ndicahnda va ndó ñaha cómi ndo já ná ndiquehe e ña cáni nuú i ndiquehe e”, nacachi da cán xihín tátá da. Anda já nasahnda java tátá da ñaha, in táhnda naqueehe mé dá ta in táhnda naqueehe ñani da. 13 Ta chá va quiví nayaha já najicó ndíhi da loho chá cán ñaha ña nañehe dá nu tátá da ta xihín jjuhún nacana cán naquee da

cuahān xícá ndivaha da chí ñuu tóho. Ta cán ñacasáhá da játiví ndaja ñacuu johó da jjuhún da ña cája da ña núu. <sup>14</sup> Ta tá sa najátiví ndihi da jjuhún da já naxinu in tama ndeé ndivaha mé nu ín da cán. Já ñacasáhá naxinu joco nu dá ta ñacasáhá cuíco da. <sup>15</sup> Anda já ñaquee da ñasahan da ndúcú da chuun caja da nuú in dataa mé nu ín da cán. Ta ñasahan da cán chuun nu dá ña ná cuhun da candaa da cóchí janá da cán. <sup>16</sup> Ta tá cúní coo ndiava já cúní coo ña sáxí cóchí cán. Ta chí caxí da ña cán janda quiahva chutú tixi da cúní da. Joo co sáhan na ña nu dá. <sup>17</sup> Anda já ñacasáhá da ndícani ini da já ñacahán da já: “Cuaha chá mozo táhan na cája chúun nu tátá i chí yójó johó ñaha xíxáhan na ta yóho xihí va yehe joco ín i. <sup>18</sup> Ña caja i quéa ndicó coo tucu u nu ín tátá i ta já cachi i já xihin ná: Tátá maní i, ñacaja i cuachi nu Ndióxi ta ñacaja ri cuachi nu ndóhó va. <sup>19</sup> Ta chí coó saha mí vi cacuu u jahyi ndó sahá ña ñacaja i. Ndiqeehe ndó yehe ná cacuu u tátuhun in mozo va ndó, já cachi i cuhun i nu tátá i”, ñacahán da. <sup>20</sup> Anda já ñaquee da íchi cuanúhu dá vehe tátá da.

“Ta janda xícá va vaxi da já naxini tátá da mé dá já nandicuni a da. Ta ñatahvi ini a saha dá. Já xínu a ñasahan ñehé a da já ñanumi a da ta ñatátí yúhu á sajóho da. <sup>21</sup> Anda já ñacachi da já xihin tátá da: “Tátá maní

i, ñacaja i cuachi nu Ndióxi ta ñacaja ri cuachi nu ndóhó va. Ta chí coó saha mí i cacuu u jahyi ndó”, ñacachi da xihin tátá da. <sup>22</sup> Ta ndaja coo tátá da ñacasáhá cahan xihin java ga mozo já ñacachi a já xihin ná: “Cama ndó ta tavá ndó jáhma, ña vaha ta jácandixi ndó jahyi i. Ta chican ndó in jéhe nducu ndáha dá. Ta chican ndó ndusa saha dá. <sup>23</sup> Ta cañehe ndó chélo, rí ndató ñandaha jan já ná quivi rí cuxú jáchi caja i in víco viti. <sup>24</sup> Jáchi jahyi i yóho tá ñaquee da cuahan da ñacahán i naxihí da. Joo viti ñandicó coo da nuú i. Sahá ña cán cúu á tátuhun ñanditacu tucu da. Ñasacuu da tátuhun da ñandiñúhu joo viti ñandee va da”, ñacachi tátá da cán. Anda já ñacasáhá na cája na víco.

<sup>25</sup> Joo ndaja coo da cúu ñani da, da sacuaaha chága cán, ndácaan da cája chúun da yucu va. Ta tá ñandicó coo da já naxini johó da tívi musica ta cáxita sáhá na. <sup>26</sup> Anda já ñacana da in da cája chúun cán já ñandaca tuhún ñahá da ndía cúu. <sup>27</sup> Anda já ñacachi da cája chúun cán xihin dá: “Cúu víco jáchi ñandicó coo ñanún. Ta ñasahnda tátún chuun ña ná quivi chélo, rí ndató ñandaha cán jáchi cájii ín na ña ñacasaa vaha ñanún ta coó a ñandoho da”, ñacachi da cán. <sup>28</sup> Joo ndaja coo da sacuaaha cán najoo da ta chí coó ñaxeen da quihvi da nu cúu víco cán. Sahá ña cán ñaqueta tátá da jatá véhe

já cáhan ndahví a xihín dá ña ná quihvi da. <sup>29</sup> Anda já ñacasáhá cáchí da já xihín tátá da: “Taá i, sa cándaá vaha ini ndó ña sa cuahá ndivaha cuia cája chūun i nu ndo ta cája i tóco ndihi ña sáhdá ndó nuú i caja i. Joo ni in túhún toho tañu coó ñasahan ndó ni in tijúhu loho nuú i ña ná caja i in víco loho cuxu u xihín na xíní táhan xihín i. <sup>30</sup> Joo viti ñasahní ndó chélo, rí ndató ñandaha jan, ña cája ndó víco jáchi ñacasaa ñani i jan. Ta mé da jan ñaxica nuu da najátiví ndaja ñacuu da jjuhún ndo xihín najihí xíca jii”, ñacachi da cán xihín tátá da. <sup>31</sup> Anda já ñacachi tátá da já xihín dá: “Candehé jahyi a. Mé a ndaa ní tiempo iún xihín i. Ta ñaha mé vún cúu ndihi ña ín nuú i. <sup>32</sup> Joo mé a ndaa ndítahan nu yo caja i víco ta cajii íní yo viti jáchi ñandicó coo ñanún, mé da ñacahán yo ña ñaxihí. Ta viti ñacasaa da cúu á tátuhun ñanditacu tucu da. Ñasacuu a tátuhun ñandiñuhú da joo ñandiñehe yó da viti”, ñacachi a cán xihín jahyi a —ñacachi Jesús.

## 16

*Ndindaa chuun ndaha in mozo jáchi coó ñacaja vaha da nuú xitoho da*

<sup>1</sup> Anda já ñasacu tucu Jesús inga quiahva nuú na xíca tuun xihín á. Já ñacachi a já xihín ná:

—Ñasahiin in taa cuicá ta ñasahiin in da ndáá ñaha da. Joo java ñayivi ñasahan na chicaan na cuachi jata

dá nuú xitoho da ña játiví ndaja ñacuu johó da ña cúu ñaha xitoho da. <sup>2</sup> Anda já ñacana xitoho da mé dá já ñacachi da já xihín dá: “Johó cáchí ñayivi ñaquixi na cáhan na sahún sahá ña cán quéa táxi i cuénta nuun ña ndicanún nuú i ndaja cáa chuun ñacajún jáchi ndindaa chuun ndáhun ta a cácuu gaún da ndáá ñaha i”, ñacachi xitoho da cán xihín dá. <sup>3</sup> Anda já ñacasáhá da cúu mozo cán ndícani ini da já ñacahán da já: “Ndía caja i viti jáchi ndindaa va chuun ndahá i caja xitoho i. Ta co ndée toho i caja i chuun vee. Ta tá ná caca nuu i cuati i ta cacahan va nuú i. <sup>4</sup> Sa xíní ví ndía caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, ñacahán da. <sup>5</sup> Anda já ñacana da tá in tá in na yíca nuú xitoho da. Ta tá ñaxinu da nu cuítí cán nu dá já ñandaca tuhún ñahá da já ñacachi da já xihín dá: “Ndaja yícún nuú xitoho i”, ñacachi da xihín da yíca cán. <sup>6</sup> Já ñanducú ñehe da cán tuhún já ñacachi da já: “In ciento lata sítí yíca i nuú xitohún”, ñacachi da cán xihín dá. Anda já ñacachi da cúu mozo cán já xihín dá: “Candehé nu tutu yóho ndáa ndaja yícún nuú xitoho i. Joo cacoo quí jan ta cahyi ña yícún ivi jico uxu lata sítí cuití va”, ñacachi mozo cán xihín da yíca nuú xitoho da cán. <sup>7</sup> Tá ñandihí já ñandaca tuhún da inga da yíca nuú xitoho da já ñacachi

da já xihín dá: “Ta yóhó ri ndaja yícún nuú xitoho i”, ñacachi da. Anda já ñanducú ñehe da yícá cán tuhun nu dá já ñacachi da já xihín dá: “In ciento maquila trigo yícá i nu dá”, ñacachi da cán. Anda já ñacachi tucu da ndáá ñaha cán já: “Candehé yóho ndáa ndaja yícún. Joo cacoo quíi jan ta cahyí ña yícún comi jico maquila trigo cuití va”, ñacachi da ndáá ñaha cán xihín dá. <sup>8</sup> Tá ñandihí já ñacachi xitoho da xihín dá ña mé a ndaa cúú dá in da ndíhí jini jáchi xihín ña ñacaja da cán candoo vaha da nuú ñayivi yícá nuú xitoho da vatí coó ñacaja vaha da nuú xitoho da —ñacachi Jesús xihín quiahva sácú a nuú ña xíca tuun xihín á cán.

Anda já ñacachi tucu a já xihín ná:

—Ñayivi cátóo canduu vaha ñuyiví yóho xini vaha chága ña ndaja cája na candoo vaha nu táhan na a juú gá ña sa xíca íchi cuéntá Ndióxi.

<sup>9</sup> Ñayivi ndúu ñuyiví yóho cája na ña núu xihín ña cómi ña. Joo ndóhó, xini ñuhú caja ndó ndinuhu ña vaha xihín ña cómi ndo. Jáchi ña jan quéa cúní Ndióxi caja ndó. Jáchi tá ná xinu quiví quivi ndó já ndiquehe vaha na ndohó indivi sahá ña ñacaja vaha ndó xihín ña ñasacomí ndo.

<sup>10</sup> Ta ndá da xihín ndinuhu ini ndáa da ñaha da vatí loho cúú á quiahva já caja ri da candaa da ñaha da tá cuaha cúú á. Joo ndá da co ndáa

da ñaha da xihín ndinuhu ini da vatí loho cúú á quiahva já a cándaa vaha da ñaha da tá cuaha cúú á. <sup>11</sup> Ta tá co ndáa vaha ndó ñaha ñuyiví yóho já quéa ni Ndióxi a quiahva toho a ñaha cuéntá indivi nu ndo jáchi a catiahva ndó candaa ndó ña. <sup>12</sup> Ta tá co tiáhva ndó candaa ndó ña ñasahan too inga na nu ndo, ñaha ña a cúu ndiquiahva na ña cacuu ñaha mé ndó nu ndo jáchi a catiahva ndó candaa ndó ña.

<sup>13</sup> Ni in túhún toho mozo a cúu caja chúun nuú ivi xitoho. Jáchi candají da in xitoho da ta inga xitoho da quihvi ini chága da. Á tá coó ta caja ndiví vaha da chuun nuú in xitoho da ta inga da cán a cája chúun vaha da nuú. Ta quiahva já ín ri xihín ndóhó va jáchi a cuú caja cáhnu ndó Ndióxi tá chínúu ndó ínima ndó jatá jiuhún ndo —ñacachi Jesús.

<sup>14</sup> Ta nu cáhan Jesús cán ndíta ña fariseo, ña cátóo ndivaha jiuhún táa johó na nu cáhan mé á. Ta ñacasáhá ña sácú ndaa na Jesús. <sup>15</sup> Anda já ñacachi Jesús já xihín ná:

—Cája ndó tátuhun cúu ndó ñayivi vaha nuú ñayivi joo sa xini vaha Ndióxi ínima ndo. Ndá ña cáhvi ini ñayivi ndáyahvi chága, ña jan quéa co ndáyahvi nu Ndióxi —ñacachi Jesús xihín ná.

*Ndítahan nuú ñayivi caja na ña ñasahnda Ndióxi anda quiahva ná naá saha ñuyiví xihín indivi*

16 Anda já nacachi tucu Jesús já:

—Janda tá cámaní xinu Juan, da nacaja ndúta ñayivi já nasahiin ley Moisés xihín ña najánaha na profeta sanahá. Joo viti ndijáá ndícuíta nuu tühun Ndióxi cuahan ña vaxi quivi cacomí Ndióxi cuéntá sahá ñayivi. Ta ndá na cuni ndiquiahva na mé ná ndáha Ndióxi ndítahan nu ná ndihi ini na ndihvi na ichi cuéntá mé á.

17 Joo janda quiahva ná naá saha ñuyivi xihín indivi ndítahan nuú ñayivi caja na tóco ndihi ña sáhdá ley. Jáchi janda vaha chága ín a ná ndihi sahá ñuyivi xihín indivi a juú ga ña ná ndihi sahá in túhún tühun ndácaan nu ley Moisés —nacachi Jesús.

*Tá jándacoo táhan na sa natandaha*

*(Mt. 19:1-12; Mr. 10:1-12)*

18 Anda já nacachi tucu Jesús já:

—Tá jándacoo in dataa ñájlí da ta tándaha dá xihín inga ñáñaha já queá cája da cuachi nu Ndióxi. Ta ndá da tándaha xihín in ñáñaha, ña najándacoo yí, cája ri da cán va cuachi nu Ndióxi — nacachi Jesús.

*Ña nandoho in da cuicá xihín ña nandoho in da naní Lázaro*

19 Ndícani Jesús nuú ñayivi já nacachi a já xihín ná:

—Nasahiin in da cuicá ta a juú quiahva vaha jáhma nasandixi da ta chí a juú quiahva ñúchí nacaja cutú

da vehe da jáchi ndijáá ní quivi nasacaja da víco nu xíxáhan cuicá ndivaha da. 20 Ta nasahiin in da ndahví naní Lázaro. Quíhvi da ta ndóho da cuehe ndihi táhyi. Ta ndahví cáa da ín coo da nu ñúhu yuyéhé da cuicá cán. 21 Ta mé da ndahví yóho cuni da jáchutú da tixi da xihín ña ndícava nu mesa da cuicá cán. Ta xihín ña ndeé quíhvi da ndahví yóho chí janda tina xinu coo rí yáco ndaa rí nuú ndihi nanana ní da cán. 22 Ta ndaja coo in quivi naxihí da ndahví cán. Já naxinu táto Ndióxi já ñéhe na da cuahan da coo da indivi nu ín Abraham. Ta jári da cuicá cán va naxihí da ta nasahan na najánduxu ná da. 23 Ta nani ndóho ini da cuicá cán ndácaan da indayá já nandiñehe da nuú dá. Já naxini xicá da Abraham. Ta naxini da ín Lázaro xihín dá. 24 Anda já nacasáhá da cuicá cán cáyuhú da já nacachi da já: “Tátá Abraham, candáhvi loho ini ndó yehe. Ta ná chindahá ndó Lázaro ná quixi da yóho quiahva loho da ticuú jándaxi loho da yaá i jáchi ndóho ndivaha ini i indayá yóho nu cáyi ñuhú ita.” 25 Anda já nacachi Abraham já xihín dá: “Jahyi a, xini ñúhú ndicuhun inún ña vaha ndivaha nasahíun ñuyivi. Ta Lázaro yóho ndahví ndivaha nandoho da ñuyivi sahá ña cán queá co ndóho ga ini da yóho viti nani ndóho inún jan viti. 26 Ta a cúu saq toho Lázaro nu íun jan jáchi ín

in táhvi cúná ndivaha tañu ndehe, na ndúu xoo chóho xihín ndóhó, na ndúu xoo chí jan. Sahá ña cán quéa a cuú cuhun na ndúu xoo chóho chí jan ta ni na ndúu xoo chí jan a cuú quixi xoo chóho”, ñacachi Abraham xihín da cán. <sup>27</sup> Anda já ñacachi da cuicá cán já xihín Abraham: “Tá ta já ta caja loho ndó ñamani, tátá Abraham ña ná chindahá loho ndó Lázaro ña ná cuhun da vehe tátá i <sup>28</sup> ná cahan loho da xihín na vehe e. Jáchí ndúu uhun ñani i ta co cúní i ña ná quixi na cán yóho ndoho ini na tá quiahva ndóho ini i viti”, ñacachi da cuicá cán xihín Abraham. <sup>29</sup> Joo nanducú ñehe Abraham tuhun nu dá já ñacachi da já xihín dá: “Sa íin va ley ñacahyí Moisés xihín ña ñacahyí na profeta nuú na cán. Vaha va ná caja na ña cáhí a”, ñacachi Abraham xihín dá. <sup>30</sup> Anda já nanducú ñehe da cuicá cán tuhun nu Abraham já ñacachi da já xihín dá: “Mé a ndaa quéa cahan ndó jan, tátá Abraham. Joo vaha chága ná chindahá ndó in táhan na sa naxihí já ná cahan na xihín ñani i já ná jándacoo cama na cuachi cája na”, ñacachi da xihín Abraham. <sup>31</sup> Anda já ñacachi tucu Abraham já xihín dá: “Tá co cúní ñanún caja da ña ñacahyí Moisés xihín ña ñacahyí na profeta quiahva já a cándusa toho ri na ndiquehe vaha na in ndii tá ná nditacu a cuhun a cahan xihín ñanún”, ñacachi Abraham xihín da cuicá cán

—ñacachi Jesús xihín ñayivi.

## 17

*Tá jácahan táhan ñayivi  
caja na cuachi*

(Mt. 18:6-7, 21-22; Mr. 9:42)

<sup>1</sup> Anda já ñacachi Jesús já xihín na xíca tuun xihín á:

—Níi tiempo quixi ñaha ña cája ña ná ndicají ini ñayivi caja na cuachi. Joo ndáhvi ñacuu na tá ná jándicava na inga na nuú cuachi. <sup>2</sup> Janda vaha chága ná candico in yuú yojó jico ná ta ná ndihi saha ná cahá tañuhú a juú ga ña jándicava na na ndahví yóho nuú cuachi. <sup>3</sup> Cuéntá coo ndó xihín ña cája ndó.

“Tá ná caja ñani táhan ndó cuachi nu ndo, jáñani ndó da. Ta tá ná tahvi ini da saha cuachi ñacaja da, caja cáhnu ini ndó saha dá. <sup>4</sup> Ta vatí usa táhndá ná caja da cuachi nu ndo in quivi ta já vaxi tucu da nu ndo usa táhndá ta já cásahá cáhí tucu da xihín ndo ña a ndicó coo ga da caja da ña já ndítahan nu ndó caja cáhnu ini ndó saha dá —ñacachi Jesús.

*Cúni na xíca tuun xihín  
Jesús candeé cáhnu chága ini  
na mé a*

<sup>5</sup> Tá nandihí já ñacachi na xíca tuun xihín Jesús cán já xihín á:

—Vá ná caja ndó ña ná candeé chága ini nde ndohó —ñacachi na xihín á.

<sup>6</sup> Anda já ñacachi Jesús já xihín ná:

—Tá ná candeé ini ndó yehe vatí cúu á tátuhun in

ndiquí mostaza cuu cachi ndó xihín in yító cáhnu ña ná cuhun dó candichi dó ini tañuhú ta chí já ndusa coo.

*Ña ndítahan caja in da nuú xitoho da*

7 "Tá íin in mozo ndo ta chindahá ndó da yúcu ña ná tiin da yata á candaa da quítí jana ndo ta tá ná ndicó coo da cán já ama ná cachi ndó xihín dá ña ná yaha da cacoo da nu mesa cuxu da. 8 Ña caja ndó queá cachi ndó já xihín dá: "Jácatáhan ñaha ná cajíni í ta caja ndíví ná cuxu u. Ta tá sa nandíhi naxixi í já cuxu mún tá cúnun", ña jan va queá cahan ndó xihín mozo ndo. 9 Ta ama ná ndiquiahva ñayivi ndixahvi nu mozo na tá nandíhi nacaja da in chuun nasahnda na nu dá caja da. 10 Ta quiahva já ndítahan coo ri xihín ndóhó va. Tá ná ndíhi nacaja ndó tóco ndíhi chuun nasahnda Ndióxi nu ndo já ndítahan nu ndó cachi ndó já: "Mé nde cúu nde mozo coo saha ta nacaja cuití va nde chuun ndítahan nuú nde caja nde", já ndítahan cachi ndó — nacachi Jesús xihín na cán.

*Tá nandaja vaha Jesús uxu ta ndóho cuehe táhyi*

11 Ta nani xíca Jesús cuahan chí ñuu Jerusalén já nayaha chí xoo nu íin lindero na Samaria xihín na Galilea. 12 Ta tá naxinu coo a in ñuu loho já naqueta uxu ta ndóho cuehe táhyi nu á joo nasacuita xíca da nu á. 13 Já

naçasáhá cáyuhú da nu Jesús já nacachi da já xihín á:

—Jesús, maestro, candáhví loho ini ndó ndehe —nacachi da xihín Jesús.

14 Tá naxini Jesús ndíhuxu da cán já nacachi a já xihín dá:

—Cuáhán ndó nahá ndó mé ndó nuú na cúu jutú — nacachi Jesús xihín dá.

Ta nani xíca ndíhi da cuahan da nandíví yiquí cuñu da ta nandindaa cuehe da. 15 Ta ndaja coo in táhan ndíhuxu da cán tá naxini da ña nandíví yiquí cuñu da já nacavatá ndivaha da. Ta naçasáhá da cája cáhnu da Ndióxi cáyuhú cóhó da já nandicó coo da nu Jesús. 16 Já nacaxítí da nu á janda quiahva naxinu taan da nu ñúhu jáchi ndíquiahva ndivaha da ndixahvi nu á. Ta mé dataa yóho cúu dá da Samaria. 17 Anda já nacachi Jesús já xihín dá:

—Uxu cúu da nandivaha nacaja í. Joo in da cán coo naxeen toho da ndicó coo da ndiquiahva da ndixahvi nuú í. 18 In túhún da tóho yóho cuití va cúu da nandicó coo ndíquiahva ndixahvi nu Ndióxi —nacachi Jesús.

19 Anda já nacachi Jesús já xihín dataa cán:

—Candichi ta cuáhán. Nandivahún jáchi nacandúsún yehe —nacachi Jesús.

*Ndaja coo tá ná xinu coo quíví cacomí Ndióxi cuéntá sahá ñayivi*

(Mt. 24:23-28, 36-41)

20 Ta ndaja coo na fariseo naçasáhá na ndáca tuhún na Jesús ña ndá ama casáhá Ndióxi cacomí a cuéntá sahá ñayivi. Anda já nanducú ñehe Jesús tuhun nu ná já nacachi a já xihín ná:

—A cúu cuni ndó nuú cacomí Ndióxi cuéntá sahá ñayivi. 21 Coó toho ñayivi cachi xihín ndo: “Yóho ín a”, á “Cáa ín a.” Mé a ndaa ná cahan i xihín ndo sa naxinu va quivi ta viti tañu mé ndó naçasáhá cómí Ndióxi cuéntá sahá ñayivi —nacachi Jesús xihín na fariseo cán.

22 Anda já naçasáhá cáchí a já xihín na xíca tuun xihín á:

—Vaxi quivi tá cuni ndó cuni ndó yehe, da nachindahá Ndióxi nduu ñayivi vatí ná coo i in quivi cuití va. Joo a coo toho i xihín ndo. 23 Ta queta ñayivi cachi xihín ndo: “Yóho ín da.” Á tá coó ta cachi na xihín ndo: “Cán ín da”, cachi na xihín ndo. Joo coto a cühun ndó candehé ndo. A cándico ndó jatá ná cühun ndo. 24 Jáchí tá ná xinu ndusa quivi quixi yehe já cuni ndó quixi i tá quiahva quixi tasa. Ta ndijáá ñayivi cuni na ndá quiahva ndiyehé a tá xoo tá xoo. Quiahva já coo tá ná xinu quivi quixi yehe, da nachindahá Ndióxi nduu ñayivi. 25 Joo jihna ñúhú ndítahan nuú i ndoho ndivaha ini i. Ta a juú quiahva candají ñayivi ndúu tiempo viti yehe. 26 Tá quiahva nasahin tiempo tá nasahin Noé sanahá

quiahva já coo ri tá ná xinu coo quivi quixi ri yehe, da nachindahá Ndióxi nduu ñayivi. 27 Jáchí mé tiempo cán xíxi na ta xíhi na ta cája na vicó tándaḥa janda quiahva naxinu quivi naquihvi Noé ini barco cáhnu. Já naxinu javi quini ndivaha ta najahvi ñuyiví xihín ticuij já naxihí ndihi ñayivi nasanduu tiempo cán. 28 Ta quiahva já nasahin ri mé tiempo tá nasatacu Lot sanahá. Jandá joho cáxixi ñayivi ta jandá joho cáxihi na ta jandá joho xéen na ñaha ta jandá joho jícó na ñaha ndúu na jandá joho cáxutu na ta jandá joho cávaha na vehe na. 29 Ta tá naxinu quivi najandacoo Lot ñuu Sodoma cán já naqueta da cuahan da xihín na vehe da já nacuyu ñúhu xihín yuu cáyi chí indiví ta já naxihí ndihi ñayivi nasanduu cán. 30 Quiahva já caja ñayivi mé tiempo já jáchí ndihi ini na catacu na janda quiahva xinu coo quivi quixi tucu yehe ñuyiví yóho, mé da nachindahá Ndióxi nduu ñayivi.

31 Ta ndá ndó, na ndúu jatá véhe ndó mé quivi já a quihvi ndó ini vehe ndó ña tavá ndó ñaha cómí ndo. Ta ndá ndó, na ndúu yúcu a ndíxi ndó vehe ndó. 32 Ndítahan ndicuhun ini ndó ndaja nandoho ñá cúu ñájihí Lot jáchí nacava jatá nuu ña sándehe ñá ña najandacoo ñá ta já nandihí saḥa mé ñá cán. 33 Ndá na chínúu ínima jatá ñaha ñuyiví yóho, na cán cúu



na ndihi saha. Joo ndá na ndíquiahva mé ndáha mí i ta in tiahva na quivi na sahá i, na cán cúu na catacu anda ama cáa quivi.

<sup>34</sup> Mé a ndaa ná cahan i xihin ndo ña tá ná xinu quivi cán já ndiquehe e na cúu cuéntá mí i. Cacuu a tátuhun tá ndúu ivi na quiji na in xito ta in na ndiquehe e ta inga na candoo va sahá ña coo nacandúsa na mí i. <sup>35</sup> Ta tá ndúu ivi na ndíco na ta in ña ndindita cuhun xihin i ta inga ña candoo va. <sup>36</sup> Ta tá ndúu ivi dataa yucu xutu da ta in da ndindita cuhun xihin i ta inga da candoo va —nacachi Jesús.

<sup>37</sup> Tá naxini joho na xíca tuun xihin Jesús ña yóho já nandaca tuhún na mé á já nacachi na já xihin á:

—Ta ndachi yaha tóco ndihi ña cáchi ndó xihin nde yóho, xitoho.

Anda já nacachi Jesús já xihin ná:

—Tá quiahva cája tiyocó tá táca ri nu cánduhu in quiti, ri naxihi quiahva já caja ñayivi taca na nuú i tá ná xinu quivi quixi i —nacachi Jesús.

## 18

*Tá naxica in ña cuaan ñamaní nuú da cúu juéxe*

<sup>1</sup> Nasacu Jesús in quiahva nu ná jáchi xihin quiahva yóho cúni a jánaha nu ná ña ní tiempo xini ñúhú caça tahví na nu Ndióxi ta co ndítahan cuitá ini na xihin á. <sup>2</sup> Já nacachi a já xihin ná:

—In ñuu nasahjin in juéxe ta coo nasahjin toni ñúhú da xihin Ndióxi ta ni co sáhní da mé dá cúu ñayivi. <sup>3</sup> Ta mé ñuu cán nasahjin in ña cuaan. Ta ndijáá ní quivi sahan ña cáhan ndahví ña xihin mé juéxe cán ña ná caja víi da sahá ña sahá in na co cúni táhan xihin ña. <sup>4</sup> Ta sa cuahá quivi ta já cúu va ña sahan ña nu dá ta co cúni da caja víi da saha ña. Joo tá nandihí já nacahan da já: “Vatí coo toni ñúhú i xihin Ndióxi ta ni co sáhní i mí i cúu ñayivi <sup>5</sup> joo já caja tá caja víi i saha ña cuaan yóho jáchi jándihí ndivaha ña yehe saha ña cán ndiquehe e saha ña já ná a quixi ga ña jándihí ña ini i”, nacahan da cúu juéxe cán —nacachi Jesús xihin ná.

<sup>6</sup> Anda já nacachi Jesús já xihin na ndúu cán já:

—Ña yóho quéa nacachi juéxe, da co ñéhe ínimá vaha cán. <sup>7</sup> Joo cáhnu ga ví ñaha caja Ndióxi tá ná ndiquehe a sahá na cúu cuéntá mé á tá xíca tahví na nu á ñuu ta ndiví. Jáchi ndáti tiahva chindeé a na cúu cuéntá mé á. <sup>8</sup> Mé a ndaa ná cahan i xihin ndo ña ivi laá ndiquehe mé á saha ná. Joo in ñaha cúni ndaca tuhún i ndohó. Á ndiñhé e ñayivi cándeé ini na yehe tá ná xinu quivi quixi tucu u ñuyiví yóho —nacachi Jesús xihin ná.

*Sácú Jesús quiahva saha in da fariseo xihin saha da jataca jiuhún cuéntá impuesto*

<sup>9</sup> Anda já ñasacu Jesús inga quiahva nuú java ñayivi, na ndíñehe jícó mé, na cáhán ña mé cuiti na cája ña vaħa. Ta já ñacasáhá cáchí a já xih̄in ná:

<sup>10</sup> —In tañu ivi taa ñasahan da veñuhu cac̄a tahví da nu Ndióxi. In táhan da cán cúu fariseo ta inga da cán cúu da játaca jiuħún cuéntá impuesto.

<sup>11</sup> Ta nani xica tahví da fariseo cán nu Ndióxi cándichi da já cáchí da já: “Tátá Ndióxi, ndiquiahva i ndixahvi nu ndo jáchi co cája i tá quiahva cája java ga ñayivi. Jáchi java na cája cuihná na ta quini cája na ta cátóo na coo na xih̄in ñájíhí ñani táhan na. Ta jári ndiquiahva i ndixahvi nu ndo jáchi co cája i tá quiahva cája da játaca jiuħún cuéntá impuesto yóho.

<sup>12</sup> Jáchi yeħe ivi tañu xijuhun i in in semana ta tá cháhvi na yeħe sahá chuun cája i já cávaħa i uxu táhndá ta já jóco i in táhndá nu mé ndó”, cáchí da fariseo cán. <sup>13</sup> Joo da játaca jiuħún cuéntá impuesto cán xica xica ñasandichi da ta chí ni nuú dá co cúni da ndíñehe da indivi sahá ña cáhán da ña coo saħa dá caja da ña. Ña cája da quéa cáni da yica ndicá da ta já cáchí da já xica tahví da nu Ndióxi: “Tátá Ndióxi, candáhvi ini ndó yeħe jáchi cúu u in da cája cuachi”, cáchí da. <sup>14</sup> Mé a ndaa ná caħan i xih̄in ndo ña ñacaja cáhnu ini Ndióxi sahá da játaca jiuħún cuéntá impuesto já cuanúħu va da joo coo ñacaja cáhnu ini a sahá da fariseo cán. Ñacaja cáhnu ini Ndióxi sahá da

játaca jiuħún cuéntá impuesto jáchi ndá na ndíñehe jícó mé jánuu ndáħa Ndióxi na. Joo ndá na jánuu mé nu Ndióxi já jándíñehe jícó mé á na — ñacachi Jesús xih̄in ná.

*Cája yii Jesús na valí*

(Mt. 19:13-15; Mr. 10:13-16)

<sup>15</sup> Ta cuahá ñayivi ñeħe na na valí ñaxinu coo na nu Jesús já ná caní ndaa ndáħa á na. Joo tá ñaxini na xica tuun xih̄in Jesús cán ña yóho, ñacasáhá na cája cueħe na xih̄in mé na ndáca na valí cán. <sup>16</sup> Joo ñacana Jesús na já ñacachi a já xih̄in ná:

—Quiahva ndó ñamaní ná quixi na valí nuú i. Ta a cáji nuu ndó nu ná jáchi cacomí Ndióxi cuéntá sahá ñayivi tá ná caja na tá quiahva cája na valí yóho. <sup>17</sup> Mé a ndaa ná caħan i xih̄in ndo ndá na co cúni ndiquiahva na mé ná ndáħa Ndióxi tátuhun cája na valí yóho já quéa a cúu cacomí Ndióxi cuéntá saħa ná — ñacachi Jesús xih̄in ná.

*Cáħan in da cuicá xih̄in Jesús*

(Mt. 19:16-30; Mr. 10:17-31)

<sup>18</sup> In táhan da sáhndá chuun cán ñandaca tuħún da Jesús já ñacachi da já xih̄in á:

—Maestro, mé ndó cúu ndó taa vaħa ña cán quéa ndáca tuħún i ndohó ndia ndítahan caja i já ná ñeħe táhvi i cuħun i indivi coo i anda ama cáa quivi —ñacachi da xih̄in Jesús.

<sup>19</sup> Anda já ñacachi Jesús já xih̄in dá:

—Ndá cuéntá quéa cáchún xihín i ña cúu u da vaḥa. Ni in tühún toho ñayivi co cúu ná na vaḥa ñuyívi yóho. In tühún Ndióxi cuití va quéa vaḥa. <sup>20</sup> Sa xini vún ña sáhdá Ndióxi nuun cajún já cáchí a já: “Coto a coún xihín ñájíhí á yí ñani táhún. Coto a cáhnún ndii. Coto a cája cuíhnún. Coto a cáhun ña tühún sahá ñayivi. Ta caja cáhnún tátún nánún” —ñacachi Jesús xihín da cuicá cán.

<sup>21</sup> Anda já nanducú ñehe da cán tühun nu Jesús já ñacachi da já xihín á:

—Janda taa loho i ñacasáha i cája i tóco ndihi ña sáhdá Ndióxi caja i —ñacachi da xihín Jesús.

<sup>22</sup> Tá naxini johó Jesús ña ñacachi da yóho xihín á já ñacachi a já xihín dá:

—Inga ñaha cámani cajún: Cuáhán jicún tóco ndihi ñahún jan ta ndicahnda jühún jan nuú na ndahví já ñehe táhvun coo cuahá ñahún indiví. Ta tá nandihí já quisún candicún yehe —ñacachi Jesús xihín dá.

<sup>23</sup> Tá naxini johó da cuicá cán ña ñacachi Jesús xihín dá já ñacacuéha ndivaha ini da jáchí in cuahá ndivaha ñaha dá. <sup>24</sup> Tá naxini Jesús ña ñacacuéha ini da cuicá cán já cáchí a já:

—Ndaja yáncá ndivaha cáa já ndiquiahva na cuicá mé ná ndáha Ndióxi ña ná cacomí a cuéntá saha ná. <sup>25</sup> Jáchí janda cama chága cuu yaha in camello ini in yávi saha yitucú a juú ga ña ná

ndiquiahva in na cuicá mé ná ndáha Ndióxi ña ná cacomí a cuéntá saha ná —ñacachi Jesús.

<sup>26</sup> Tá naxini johó ñayivi ndíta cán ña ñacachi Jesús já ñacachi na cán já:

—Ndá na cúu na cuu cacu ndaa ínimá, dá já.

<sup>27</sup> Anda já ñacachi Jesús já xihín ná:

—Ndióxi quéa cuu caja tóco ndihi ñaha vatí ñayivi a cuú caja na ña —ñacachi Jesús xihín ñayivi ndúu cán.

<sup>28</sup> Anda já ñacachi Pedro já:

—Candehé ndo, xitoho i. Ndehe najándacoo nde tóco ndihi ña nasacomí nde ta ndíco nde ndohó —ñacachi da xihín Jesús.

<sup>29</sup> Anda já nanducú ñehe Jesús tühun nu dá já ñacachi a já:

—Mé a ndaa ná cahan i xihín ndo ña ndá na jándacoo vehe á tátá náná na á ñani na á ñájíhí na á jahyi na sahá ña cúní na ña ná cacomí Ndióxi cuéntá saha ná, <sup>30</sup> na cán cúu na ñehe cuahá chága ñaha ñuyívi yóho jata tóco ndihi ña najándacoo na. Ta vaxi quivi já ñehe táhvi ri na catacu na indiví anda ama cáa quivi —ñacachi Jesús.

*Cáxi tühun tucu Jesús ña quivi a*

(Mt. 20:17-19; Mr. 10:32-34)

<sup>31</sup> Tá nandihí já natavá xóo Jesús ndíhuxu ivi na xíca tuun xihín á cán. Já ñacachi a já xihín ná:

—Viti cohó chí ñuu Jerusalén nuú xinu coo tóco

ndihi ña ñacahyí na profeta sahá yehe, da ñachindahá Ndióxi nduu ñayivi. <sup>32</sup> Jáchi mé ñuu cán tiin na yehe já ndiquiahva na yehe ndahá na tóho. Cuacu ndaa na yehe. Canahá na xihín i. Cuihna ndaa na tójií na yehe. <sup>33</sup> Cani na yehe. Ta tá ñandihí já cahní na yehe. Joo tá ná yaha uní quívi já nditacu tucu u tañu na ñaxihí —ñacachi Jesús.

<sup>34</sup> Joo na xíca tuun xihín á cán ni loho coó ñacandaá ini na ña cúní Jesús cachi a xihín ná. Jáchi cúú á ñaha ña coó ñacuu candaá ini na saha.

*Tá ñandaja vaha Jesús in da cuaá ñuu Jericó*

(Mt. 20:29-34; Mr. 10:46-52)

<sup>35</sup> Tá ñacayati Jesús ñuu Jericó cán ta yati jíin íchi nu xíca mé á cuahan cán íin coo in da cuaá sáti da. <sup>36</sup> Ta tá ñaxini jóho da ña yaha cuahá ñayivi cuahan na já ñacasáhá da ndáca tuhún da ndíá cúu. <sup>37</sup> Anda já ñacachi na já xihín dá:

—Jesús, da ñuu Nazaret, da cán cúú da yaha cuahan yóho —ñacachi na xihín dá.

<sup>38</sup> Anda já ñacasáhá da cuaá cán cáyuhú da já cáchi da já:

—Jesús, da ñaquixi chichi David, caja ndó ñamaní candáhví loho ini ndó yehe —cáchi da.

<sup>39</sup> Joo ñayivi, na cánuú cuahan xihín Jesús cán ñacasáhá na cája cuehe na xihín dá ña ná caji da yúhu

dá. Joo ví ga ví ñacasáhá da cáyuhú da já cáchi tucu da:

—Ndóhó, da ñaquixi chichi David, caja ndó ñamaní candáhví loho ini ndó yehe —cáchi da cáyuhú da.

<sup>40</sup> Anda já ñacandichi Jesús já ñasahnda chuun ña ná cañehe na da cuaá cán nu á. Ta tá ñaxinu da nu á já ñandaca tuhún a da. <sup>41</sup> Já ñacachi a já xihín dá:

—Ndíá cúnun ná caja i xuhun —ñacachi Jesús xihín dá.

Anda já ñanducú ñehe da cuaá cán tuhun nu á já ñacachi da já:

—Ndaca ndehé e cúní i, xi-toho i —ñacachi da.

<sup>42</sup> Tá ñandihí já ñacachi Jesús já xihín dá:

—Candehé viti. Ñandivahún jáchi cándeé inún yehe —ñacachi Jesús xihín dá.

<sup>43</sup> Chí iví laá nanuna nuú da cuaá cán. Ta chí a juú quiahva cája cáhnu da Ndióxi. Ndíco da Jesús cuahan da. Ta jári tóco ndihí ñayivi tá ñaxini na ña yóho já ñacasáhá na cája cáhnu na Ndióxi.

## 19

*Tá cáhan Jesús xihín in da naní Zaqueo*

<sup>1</sup> Tá ñandihí já ñandihvi Jesús ñuu Jericó cán já xíca mahñú ñuu cuahan. <sup>2</sup> Ta cán ñasahin in da cuicá naní Zaqueo, da cúú da sacuahá nuú na jática jihún cuéntá impuesto. <sup>3</sup> Ta cúní da cuni da Jesús joo a cuú cuni ñahá da jáchi cáti cuahá ndivaha ñayivi nu Jesús. Ta mé dá co

xínu coo da cuni ñahá da jáchi cúu dá da ndihí. <sup>4</sup>Chí xínu da ñacanuú da nuú ñayivi cuaha cán já ñandaa da nuú in yíto yati mé jíin íchi, mé nuú yaha Jesús cán ña ná cuni ñahá da. <sup>5</sup>Ta tá ñayaha Jesús yati saha yíto cán já ñandiñehe nuú á nu cánúu da cán. Já ñacachi a já xihín dá:

—Zaqueo, cuánuu quíi jáchi cúni coo tóo i vehún quívi víti —ñacachi Jesús xihín dá.

<sup>6</sup>Anda já ndáva nihni Zaqueo ñanu da nu yíto cán. Já cávatá da ñandiquehe vaha da Jesús cañehe da a cuahan da xihín á vehe da.

<sup>7</sup>Joo tá ñaxini tóco ndihi java ga ñayivi cán ña yóho já ñacasahá ña cáhan núu na saha Jesús. Ta cáchi ña ña cuahan mé á coo tóo a vehe in dataa, da cája cuahá cuachi. <sup>8</sup>Ta tá sa ndúu ndihi na vehe Zaqueo já ñandaca ndichi Zaqueo já ñacachi da já xihín Jesús:

—Candehé ndo, xitoho i. Cahnda java ndaa i ñaha cómi i ta já ndicahnda i ña nuú ña ndahví. Ta ndá ña ñacaja cuihná i ñaha, ña cán quiahva i comi táhndá chága ñaha nuú jáchi najándahvi i ña —ñacachi Zaqueo cán.

<sup>9</sup>Anda já ñacachi Jesús já xihín ná:

—Quívi viti cája cáhnu ini Ndióxi sahá cuachi da yóho xihín cuachi ña vehe da jáchi xihín ña ñacaja da yóho viti náha ña mé a ndaa cándeé ini da Ndióxi tá quiahva ñacaja Abraham. <sup>10</sup>Ta yehe, da ñachindahá Ndióxi nduu

ñayivi ñaquixi i ndinducú u ña xíca nuu cája cuahá cuachi jáchi cacu ndaa ínima ná cúni —ñacachi Jesús xihín ná ta já ñaquee a cuahan tucu a íchi chí ñuu Jerusalén.

*Tá ñasahan in dataa jiuhún da nuú uxu mozo da*  
(Mt. 25:14-30)

<sup>11</sup>Ta nani xínu johó ñayivi ña cáhan Jesús já ñasacu mé á in quiahva nu ná jáchi cáyati chága mé á ñuu Jerusalén cuahan. Ta mé ñayivi ndíco cuahan cán ñacahán ña ña tá xínu coo a ñuu Jerusalén cán chí ivi laá va casahá Ndióxi cacomí a cuénta saha ñayivi vatí a juú a já. <sup>12</sup>Anda já ñacachi Jesús já xihín ná:

—Ñasahíin in dataa, da cúu jahyi in rey. In quívi ñaquee da cuahan xíca da ña ndicojo da chuun cacuu da rey. Tá ñandihí ñasacu ini da nuhu da ñuu da. <sup>13</sup>Joo tá cámaní nuhu da já ñacana da uxu mozo da. Ta ñasahan da in in jiuhún nuú in in da cán ta mé jiuhún cán cúu á ña in ndivaha yahvi. Anda já ñacachi da já xihín mozo dá: “Caja ndó ndahvi xihín jiuhún yóho janda quiahva ná xínu quívi ndicó coo tucu u quixi i”, ñacachi da xihín mozo da. Já ñaquee da cuanúhu dá. <sup>14</sup>Ta ndaja coo ñayivi ñundáhyi xíca cándají ña da. Sahá ña cán queá ñachindahá ña in táhndá táto ña ná cachi na xihín tátá da ña co cúni toho na ña ná cacomí da cán cuénta saha ná. <sup>15</sup>Joo já ñandicojo da cán chuun cacuu da rey mé

ñundáhyi xícá. Ta tá naxinu coo da cán já nasahnda da chuun ña ná cuhun na cana na mozo da, da nasahan da jiuhún nu cán. Jáchi cuni da candaa ini da ndaja jiuhún nañehe in in da cán jatá jiuhún da. <sup>16</sup> Tá nandihí já naxinu coo in táhan da nañehe jiuhún cán nu dá já nacachi da já: “Candehé ndó, xitoho i. Nasahan ndó in jiuhún nuú i ta viti nanduu a uxu”, nacachi da. <sup>17</sup> Anda já nanducú ñehe da cúu rey cán tuhun nu dá já nacachi da já xihín dá: “Vaha ndivaha nacajún xihín ña yóho. Náha ña mé a ndaa cúun in mozo vaha jáchi nacaja ndihún tá ín nacachi i xuhún cajún xihín jiuhún i vatí loho quéa nasahan i nuun caja chúun. Ta viti caja i ña ná cacomún cuéntá sahá uxu ñuu”, nacachi rey cán xihín dá. <sup>18</sup> Tá nandihí já naxinu coo inga táhan da nañehe jiuhún cán nu dá já nacachi da já: “Candehé ndo, xitoho i. Nasahan ndó in jiuhún nuú i ta viti nanduu a uhun”, nacachi mozo cán. <sup>19</sup> Anda já nacachi da cúu rey já xihín dá: “Vaha nacajún sahá ña cán quéa caja i ña ná cacomún cuéntá sahá uhun ñuu”, nacachi rey cán xihín dá. <sup>20</sup> Ta tá nandihí já naxinu coo inga táhan da cán já nacachi da já: “Candehé ndo, xitoho i. Yóho ín mé jiuhún nasahan ndó nuú i. Nachicaan vaha i ña nu jáhma i <sup>21</sup> sahá ña yíhvi i ndohó. Jáchi cúu ndó in taa cuehe ndivaha. Ta cátóo

ndó ndiquehe maní uun ndó ñaha. Ta cátóo ndó ña ná caja chúun inga ñayivi já jandá xinu uun ndó ndiquehe ndó ñaha nañehe ná jatá chuun cája ndó”, nacachi mozo cán. <sup>22</sup> Anda já nanducú ñehe da cúu rey cán tuhun nu mozo da já nacachi da já xihín dá: “Coo cúun in mozo vaha nuú i. Xihín tuhun cáhun chícáun cuachi jatun jáchi coo cúnun caja chúun sahá i. Cáchún ña xini vahún cúu yehe in da cuehe ndivaha ta cátóo i quehe e jiquí jiuhún i vatí coo nacaja chúun i sahá. <sup>23</sup> Sahá ña cán quéa ndá cuéntá quéa coo nasahan tóun jiuhún i, dá já. Já quéa tá ná ndicó coo i já ná ndiquehe e jiquí á nuú na cán, nduu”, nacachi rey cán xihín mozo da. <sup>24</sup> Tá nandihí já nacachi tucu rey xihín java ga ñayivi ndíta cán já: “Candaa ndó jiuhún ndáha dá ta quiahva ndó ña nuú da cómi uxu a jan”, nacachi da cúu rey cán. <sup>25</sup> Anda já nacachi na ndíta cán já xihín rey: “Candehé ndo, xitoho i. Ndá túní quiahva ri nde jiuhún yóho nuú da sa cómi uxu a cáa jáchi sa cuahá va jiuhún cómi da cáa”, nacachi na xihín rey cán. <sup>26</sup> Já nacachi rey cán já: “Mé a ndaa ná cahan i xihín ndo, ña ndá na sa ín ñaha nuu, mé na cán ñehe táhvi ná coo chága ña nu ná. Joo ndá na coo ñaha nuu sahá ña coo cája chúun na já quéa janda ña loho cómi na ndindaa”, nacachi rey cán. <sup>27</sup> Ta nacachi tucu da já: “Cuahán ndó quehe ndó

ñayivi quini, na co cúní yehe, na coo naxeen ña ná cacomí i cuénta sahá na cán já ná quixi na. Ta cahní ndó na ná quivi na nuu táhyi i”, naxachi rey cán —naxachi Jesús ndicani a nuú ñayivi.

*Ndihvi Jesús ñuu Jerusalén*  
(Mt. 21:1-11; Mr. 11:1-11;  
Jn. 12:12-19)

28 Tá nandihhi naxachi Jesús ña yóho xihin ná já naquehe tucu a íchi xica cuahan chí ñuu Jerusalén. 29 Ta tá sa naxinu coo a jini yucu yitó olivo cán nuú ja chá xinu coo a ñuu Betfagé xihin ñuu Betania cán já nasahnda chuun nuú ivi táhan da xica tuun xihin á cán. 30 Já naxachi a já xihin dá:

—Cuáhán ndo ñuu loho ndácaan jan. Ta tá ná xinu coo ndó jan ndiñehe ndó in búrró ndíco ndaa jan, rí a ñaha yii ndaa na. Ndaxí ndó rí ta cañehe ndó rí quixi ndó. 31 Ta ndá na ná ndaca tuhún ndohó ña ndá cuénta quea ndaxí ndó rí já cachi ndó já xihin ná: “Mé a cúu xitoho nde xini ñuhú a rí”, cachi ndó xihin ná —naxachi Jesús xihin da cán.

32 Já naquee ndiví da cuahan da. Ta tá quiahva naxachi Jesús coo chí quiahva já ndusa nasahin. 33 Jáchi nani ndaxí da búrró cán ndúu da já naxahan mé na xihin jana rí cán saha rí já naxachi na cán já:

—Ndá cuénta quea ndaxí ndó búrró jana nde jan —naxachi na cán.

34 Anda já nanducú ñehe da xica tuun xihin Jesús cán tuhun nu ná já naxachi da já:

—Ndaxí nde rí jáchi mé a cúu xitoho nde, xini ñuhú a rí —naxachi da.

35 Já naquehe da rí ñehe da cuahan da nu Jesús. Anda já naxojó ñayivi jáhma ná jata rí já najánda na Jesús jata rí. 36 Ta nani xica búrró cán cuahan rí xihin Jesús já naxinduu ñayivi jáhma ná íchi nuú yaha rí cán xihin á. 37 Ta yati ñuu Jerusalén, mé nuú ndica yucu nani yitó Olivo cán já nacasahá cáyuhú tóco ndihhi na cúu cuénta mé á cán. Cája cáhnu na Ndióxi xihin ña cáji ini na saha tóco ndihhi ña náhnu naxini na naxaja Jesús. 38 Já cáchi na já cáyuhú na:

—Ndicáhnu nahá ná cacuu da cómi cuénta saha yo yóho jáchi cúu dá da vaxi yuhú nuu Ndióxi. Viti cáji ini na ndúu indiví. Cáhnu ná cacuu Ndióxi —cáchi na cáyuhú na.

39 Anda já naxachi java na fariseo ñuhu tañu ñayivi cán já xihin Jesús:

—Maestro, jánani ndó na ndíco jata ndó yóho ná a cáyuhú cóho na —naxachi na xihin Jesús.

40 Joo nanducú ñehe Jesús tuhun nu ná já naxachi a já xihin ná:

—Mé a ndaa ná cahan i xihin ndo ña tá ná catáji yuhú na yóho janda já yuu ndúu jín íchi jan casahá cayuhú a caja cáhnu a yehe —naxachi Jesús.

41 Tá naxayati chága Jesús ñuu Jerusalén cán ta tá naxini

a ñuu cán já ñacasáhá táhvi ini a sácu a sahá. <sup>42</sup> Já ñacachi a já:

—Cúni jánaḥa i ndohó ndía ndítahan caja ndó já ná coo vaḥa ínimá ndó nu Ndióxi. Joo coo cúni toho ndó candaḥa ini ndó ña. Ta viti a cúu ga candaḥa ini ndó ña. <sup>43</sup> Jáchi vaxi quivi tá quixi na coo cúni ndohó ta caji nuu na nu ndo ta cani táhan na xihín ndo. Ta ni in xoo a cúu cunu ndó jáchi ní cúu caji nuu na cán já ná a quée ndó. <sup>44</sup> Ta jándihi na saḥa ndo jáchi cahní na tóco ndihi ndó, na ndúu cán. Ta ni in yuu a cándoo jatá inga yuu jáchi ña cuyu cacuu ndihi a. Já ndoho ndó jáchi coo cándaḥa ini ndó ña ñaquixi i jácacu u ndohó já ná a ndíhi saḥa ndo —ñacachi Jesús.

*Tá ñataxí Jesús na ndúu jícó ñaha yéhe veñuhu*  
(Mt. 21:12-17; Mr. 11:15-19; Jn. 2:13-22)

<sup>45</sup> Tá ñaxinu coo Jesús ñuu Jerusalén cán já ñandihvi a veñuhu cáhnu ndácaan ñuu cán. Já ñacasáhá táxi a na ndúu jícó cán xihín na ndúu xéen cán. <sup>46</sup> Jáchi ñacaja cueḥe a xihín ná ta já ñacachi a já:

—Já cáchí tuhun Ndióxi: “Vehe mí i cacuu a nuú quixi na caḥa táhvi na nuú i”, cáchí a. Joo ndohó ñandai cuu ndó yóho cája cuíhná ndó nuú ñayivi —ñacachi Jesús.

<sup>47</sup> Ndijáá ní quivi saḥan Jesús veñuhu cáhnu cán jánaḥa tuhun Ndióxi nuú ñayivi. Joo na cúu saḥaḥa

nuú jutú xihín na jánaḥa ley Moisés xihín na saḥaḥa ñuu ndúcú na ndá quiaḥva caja na cahní na Jesús. <sup>48</sup> Joo coo ñeḥe íni na ndaja caja na cahní na Jesús jáchi tóco ndihi ñayivi cúni na taa johó na nu jánaḥa Jesús.

## 20

*Tá ñandaca tuhún na Jesús ña yo sahan ñamani nu ájanaḥa ñayivi*

(Mt. 21:23-27; Mr. 11:27-33)

<sup>1</sup> Ta ndaja coo in quivi ndácaan Jesús veñuhu cáhnu jánaḥa ñayivi ndaja cuu caḥu ndaa ínimá ná já ñaxinu na cúu saḥaḥa nuú jutú xihín na jánaḥa ley Moisés ta cátaḥan ri na saḥaḥa veñuhu ñaxinu coo na xihín ná nu ndácaan Jesús cán. <sup>2</sup> Anda já ñacachi na já xihín Jesús:

—Ndá saḥa quée jánaḥún ña yóho. Yo já sahan ñamani nuun cajún ña cajún yóho —ñacachi na cán xihín Jesús.

<sup>3</sup> Anda já ñanducú ñeḥe Jesús tuhun nu ná já ñacachi a já xihín ná:

—Ndáca tuhún ri yeḥe va ndohó. Cachi ndó xihín i: <sup>4</sup> Yo já ñachindahá Juan ña ná quixi da caja ndúta dá ñayivi. Á Ndióxi ñachindahá da, á ñayivi ñachindahá ñahá —ñacachi Jesús xihín na cán ndáca tuhún a na.

<sup>5</sup> Anda já ñacasáhá ndítuhún xihín táhan na saḥaḥa cán já cáchí na já:

—Ndía cachi yó xihín Jesús yóho. Jáchi tá ná cáchí ña Ndióxi quée ñachindahá Juan



já nducú ñehe Jesús tuhun nu yo já cachi a já xoho: “Ndá cuéntá queá coo naxeen ndó candúsa ndó da, dá já”, cachi Jesús xoho. <sup>6</sup> Ta tá ná cachi ñayivi va cúu na nachindahá Juan já ndicuítá ñayivi ta cahní na mí xihín yuu. Jáchi tóco ndihi ñayivi cándaá vaha ini na ña Ndióxi queá nachindahá Juan jáyahá da tuhun cáhan mé á nuú ñayivi —nacachi xihín táhan na cán.

<sup>7</sup> Sahá ña cán queá nacachi na xihín Jesús ña co xini toho na yo já nachindahá Juan ña ná quixi da caja ndúta dá ñayivi. <sup>8</sup> Anda já nanducú ñehe Jesús tuhun nu ná já nacachi a já xihín ná:

—Ta ni yehe a cáxi tuhun i xihín ndó yo já nasahan ñamaní nuú i caja i ña yóho —nacachi Jesús xihín ná.

*Sácú Jesús quiahva sahá java mozo, da nacaja quini xihín xitoho da*

(Mt. 21:33-44; Mr. 12:1-11)

<sup>9</sup> Tá nandihí já nacasáhá Jesús cáhan xihín ñayivi ta já nasacu a quiahva yóho nu ná já nacachi a já:

—Nasahiin in dataa ta najándeé cuaha dá tó uva. Ta tá nandihí já nasahan ndojó na mé dó uva cán. Anda já naquee da cuahan xicá da cuaha tiempo. <sup>10</sup> Ta tá naxinu coo tiempo jáquee na uva nu dó uva ñaha da cán já nachindahá da in mozo da ña ná cuhun da ndiquehe da uva, rí ndítahan nu dá ndiquehe da. Joo mé na cája

chúun tóo ñúhu dá cán natiin na mé mozo cán ta nacani na da ta já cáa uun da nandicó coo da nacaja na. <sup>11</sup> Tá nandihí já nachindahá mé da xihín ñaha ñúhu cán inga tucu mozo da. Joo quiahva já nacaja ri na xihín da cán va. Nacanahá na xihín dá ta nacani na da. Ta já cáa uun da nachindahá tucu na da nuú xitoho da. Coó ñaha nasahan na nu dá. <sup>12</sup> Ta mé da xihín ñaha ñúhu cán nachindahá tucu da inga mozo da ta quiahva já nacaja ri na xihín da cán va. Najándicuehe na da ta já nataxí na da.

<sup>13</sup> Ta tá nu ndihí já nacahán mé da xihín ñaha ñúhu cán já: “Ña caja i viti queá chindahá i jahyi maní i jáchi cája i cuéntá coo toní ñúhú na xihín dá tá ná cuni na da”, nacahán mé da xihín ñaha ñúhu cán. Ta tá nandihí já nachindahá da jahyi maní dá. <sup>14</sup> Joo tá naxini na cája chúun tóo ñúhu dá cán ña vaxi jahyi da já nacachi xihín táhan na cán já: “Candehé ndo. Yóho vaxi da cúu jahyi xitoho í. Ta tá ná xinú quiví quivi xitoho í ta da yóho cacuu da ndicojo chuun saha ñúhu yóho. Cóho cahní yó da já ná candoo ñúhu yóho ndáha mi”, nacachi xihín táhan na cán. <sup>15</sup> Anda já natavá na da cúu jahyi xitoho cán jata cútú ta cán nasahní na da —nacachi Jesús.

Anda já nandaca tuhún Jesús ñayivi ndúu cán já nacachi a já xihín ná:

—Á co xini ndó ndía caja da xihín ñaha ñúhu viti. <sup>16</sup> Ña

caja da quéa quixi da ta cahni ndihi da na nacaja chúun tóo nu ñúhu dá. Já ndiquiahva da ñúhu dá nuú java ga na já ná caja chúun na nu á —nacachi Jesús.

Tá naxini johu na ndíta cán ña yóho já nacachi ndihi na já: —A cándee Ndióxi coo ña jan já —nacachi na cán.

<sup>17</sup> Joo nasandehé Jesús nu ná já nacachi a já:

—Ta viti cachi ndó xihín i ndía cúnj cachi tuhun Ndióxi tá cáchi a já:

Mé yuu ña najácana da cávaha vehe, ña cán cúu ña nanduu yuu ndúhu sahá vehe ña ín chága saha, cáchi tuhun Ndióxi.

<sup>18</sup> Ta yehe cúu u tátuhun in tóto cáhnu. Ta ndá na ná yaha ndicava jatá tóto cán chí chachi ndihi na. Quiahva já ndihi sahá ñayivi tá co cúnj na candúsa na yehe. Ta mé tóto cáhnu cán tá ná yaha ndicava jatá in ñayivi chícaji ndihí ñahá a cán. Quiahva já ndihi sahá ñayivi ini indayá tá co cúnj na candúsa na yehe —nacachi Jesús.

*Ndáca tuhún na Jesús á ndítahan nu ná chahvi na jjuhún cuéntá impuesto*

(Mt. 21:45-46; 22:15-22; Mr. 12:12-17)

<sup>19</sup> Chí sa mé hora já cúnj na cúu sacuahá nuú jutú xihín na jánahá ley Moisés cán tiin na Jesús jáchi nacandaa ini na ña saha mé va na cán sácú Jesús mé quiahva nuú ñayivi cán. Joo coo natii na Jesús jáchi nayihví na ñayivi

ndúu táa johu nu cáhan Jesús cán. <sup>20</sup> Ña nacaja na quéa nachindahá na java dataa ña ná cananí da Jesús. Ta ndája da mé dá ña cúu dá ta vaha ndivaha joo co cúu da tá quiahva ndáa da. Ta xihin ña yóho cúnj da cayati da nu Jesús ná candehé da á yaha yúhu á cahán ndá ñaha ña cuu cuhun da jicó túhún da mé á nuú da cúu gobernador. <sup>21</sup> Sahá ña cán quéa nacayati da nu Jesús ta nandaca tuhún da mé á já nacachi da já xihin á:

—Maestro, cándaa ini nde ña cáhan ndó ta jánahá ndó ña ndaa. Ta cándaa ini nde ña tá cáhan ndó sahá in ñaha cája ñayivi cúu á sahá ña sandehé ndó janda ínima ná. Ta cándaa ini nde ña jánahá ndó ña ndaa saha íchi cuéntá Ndióxi. <sup>22</sup> Sahá ña cán quéa cúnj nde cándaa ini nde viti á ndítahan nuú nde chahvi nde jjuhún cuéntá impuesto nuú da cómi cuéntá saha yo ñuu Roma, á co ndítahan toho nuú nde caja nde ña —nacachi na cán xihin Jesús.

<sup>23</sup> Joo sa nacandaa va ini Jesús ña cáhvi núu va ini na sahá ña cán quéa nanducú ñehe a tuhun nu ná já nacachi a já xihin ná:

—Cándaa cáxi táhyí ini i ña cúnj ndó coto ndojó cuití ndó yehe. <sup>24</sup> Jánahá ndó in táhan jjuhún jan nuú i. Yo nahná ta yo quivi quéa ndáa nu á —nacachi a xihin ná.

Já nacachi na já:

—Ñehe a quivi xihin nahná da cómi cuéntá sahá yo ñuu

Roma —naçachi na xih̄in á.

<sup>25</sup> Andá já naçachi Jesús já xih̄in ná:

—Ndiqiahva ndó ñaha da cómi cuéntá saha ndó ñuu Roma jan nu dá. Ta ndiqiahva ndó nu Ndióxi ña cúu ñaha mé á nu á —naçachi Jesús xih̄in ná.

<sup>26</sup> Chí coó naçuu caja na jándahvi na Jesús nuú ñayivi ndúu cán jáchi vií nanducú ñehe ndihi Jesús tuhun nu ná. Ta chí johó cátóntó ndihi ñayivi xih̄in quiahva nanducú ñehe Jesús tuhun nu ná. Chí naçatáji na cán.

*Ndáca tuhún na saduceo Jesús á mé a ndaa nditacu tucu ndii*

(Mt. 22:23-33; Mr. 12:18-27)

<sup>27</sup> Tá nandihí já naçuee java na saduceo cuahan na çahan na xih̄in Jesús. Ta mé na saduceo co cándúsa na ña ndítacu tucu na sa naçih̄i. Tá naçaa na nu iin Jesús já naçachi na já xih̄in á:

<sup>28</sup> —Maestro, nu ley naçahyi Moisés sanahá natahnda chuun ta cáchi a já: “Tá tandaha in dataa xih̄in ñájihí da ta tá coó jahyi ñá cácu xih̄in dá ta tá ná xinu quiv̄i quivi da já queá cáchi ley Moisés ña ndítahan tandaha tucu ñájihí da xih̄in da cúu ñani mé ndii cán já ná coo jahyi da cán xih̄in yuhú nuú ñani da”, já cáchi ley Moisés. <sup>29</sup> Ta viti cuni johó ndó ná cacu nde in quiahva nu ndo. Naçahjin usa ñani. Ta da nu cuítí cán natandaha dá. Joo nayaha tiempo naçih̄i da

ta coó toho jahyi da naçacu xih̄in ñájihí da. <sup>30</sup> Andá já natandaha tucu ñá cuáan cán xih̄in ñani chí iv̄i mé ndii cán. Joo naçinu quiv̄i naçih̄i ri da yóho va ta chí coó jahyi da naçacu xih̄in ñá cán. <sup>31</sup> Andá já natandahá da chí un̄i cán xih̄in ña. Joo ni da cán ni java ga ñani da coó naçuu cacu jahyi xih̄in ña. Ndihusa da natandaha xih̄in ña ta ndihusa da naçih̄i. Joo ni in da coó naçacu jahyi xih̄in ña. <sup>32</sup> Tá nu ndihí já naçih̄i ri mé va ñá. <sup>33</sup> Ña cún̄i nde candaa ini nde queá, ndá da cacuu ndusa yí ñá cán tá ná xinu quiv̄i nditacu tucu ndii. Jáchi ndihusa va ñani da cán natandahá xih̄in ña —naçachi na cán ndáca tuhún na Jesús.

<sup>34</sup> Andá já nanducú ñehe Jesús tuhun nu ná já naçachi a já:

—Nani ndúu ñayivi ñuyiv̄i yóho cuití va tandaha ná. <sup>35</sup> Jáchi ndá na nanditacu tucu ta nañehe táhvi ná coo na indivi já queá co tandaha na ta ni co sahan toho na jahyi jíhí na tandaha ná. <sup>36</sup> Jáchi mé cán cacuu na tátuhun táto Ndióxi já a quiv̄i ga na. Ta cacuu na jahyi Ndióxi jáchi sa nanditacu na tañu ndii. <sup>37</sup> Ta sa xini yo ña nditacu tucu ndii jáchi já naçachi Moisés sanahá tá naçahyi da sahá ña naçini da tañu tohínú, dó cándaha ñuh̄u cáyi cán. Tá naçahan da sahá Ndióxi, naçachi da ña janda viti cája cáhnu Abraham xih̄in Isaac xih̄in Jacob mé Ndióxi vatí

na\_xih\_i na sanahá. <sup>38</sup> Ta ña yóho cún\_i cachi a ña tácu y\_i va Abraham xihín Isaac xihín Jacob vatí sa na\_xih\_i yiquí cuñu na. Jáchi tóco ndihi na cúu cuénta Ndióxi, tácu na nu mé á —na\_cachi Jesús xihín ná.

<sup>39</sup> Andá já na\_cachi java na jána\_ha ley Moisés cán já xihín á:

—Vaha va na\_cahan ndó, Maestro.

<sup>40</sup> Ta chí coó na\_sahan ndee ga ini na nda\_cá tuhún chága na mé á.

*Jána\_ha Jesús nuú ñayivi ña cúu Cristo ta\_a ta cúu á Ndióxi (Mt. 22:41-46; Mr. 12:35-37)*

<sup>41</sup> Andá já na\_cachi Jesús já xihín ñayivi ndúu cán:

—Ndávaha cáchi ñayivi ña vaxi Cristo chichi David. <sup>42</sup> Ta ndáa ini Salmos ña na\_cahyí David já na\_cachi da já:

Ndióxi quéa na\_cachi já xihín xitoho i:

“Coo xoo cuáha i yóho,

<sup>43</sup> jandá quiahva ná caja i ña ná cacomún cuénta sahá na co cúní yohó”, na\_cachi Ndióxi, já na\_cahyí David sanahá.

<sup>44</sup> Ndávaha cáchi na ña vaxi Cristo chichi David joo mé tiempo cán na\_cachi David ña cúu á xitoho da —na\_cachi Jesús.

*Cahan Jesús sahá cuachi na jána\_ha ley Moisés*

*(Mt. 23:1-36; Mr. 12:38-40; Lc. 11:37-54)*

<sup>45</sup> Tóco ndihi ñayivi ndúu cán na\_xini johó na tá

na\_casáhá Jesús cáchi a xihín na xíca tuun xihín á já:

<sup>46</sup> —Cuénta coo ndó xihín na jána\_ha ley Moisés jáchi cátoó na cándixi na jahmá nán\_i caca nuu na. Ta cátoó na cahan toní ñuhú ndivaha ñayivi xihín ná tá xíca nuu na nuú yahvi. Ta tá cuahan na veñuhu cátoó na cacoo na nu sácoo na íin chága saha. Ta tá cuahan na víco cátoó na coo vaha na. <sup>47</sup> Ta cándaa na vehe najihí cuáan. Ta tá nandihí cán\_i ndivaha cája na xíca tahví na nu Ndióxi jáchi cún\_i na jájahvi na nuú ña núu cája na. Mé a ndaa ná cahan i xihín ndo ña na jána\_ha ley Moisés yóho cacuu na na ndoho chága ini caja Ndióxi nu ndihí —na\_cachi Jesús.

## 21

*Ña najoco in ña cuáan ndáhvi (Mr. 12:41-44)*

<sup>1</sup> Ta ndaja coo ndacaan Jesús ini veñuhu cáhnu cán ta sándehe a ndá quiahva táán na cuicá jiu\_hún ini sató nu jóco ñayivi jiu\_hún nu Ndióxi. <sup>2</sup> Ta jári na\_xini a na\_xinu coo in ña cuáan ndáhvi ta nataán ña ivi jiu\_hún ña núu yahvi ini mé sató cán. <sup>3</sup> Andá já na\_cachi Jesús já xihín na xíca tuun xihín á cán:

—Mé a ndaa ná cahan i xihín ndo ña cuaha chága jiu\_hún na\_sahan ña cuáan ndáhvi yóho a juú ga tóco ndihi java ga na cán. <sup>4</sup> Jáchi tóco ndihi na java cán sahan na ña yójó nu va na. Joo ña

cuáan ndáhvi yóho nasahan ñá nu Ndióxi tóco ndihi ñá cómi ñá catacu ñá —ñacachi Jesús.

*Cáxi tũhun Jesús ña vaxi quivi ndihi sahá veñuhu cáhnu ndácaan Jerusalén cán*

(Mt. 24:1-2; Mr. 13:1-2)

<sup>5</sup> Java ñayivi cán ndítuhún na sahá veñuhu cáhnu ñuu Jerusalén ndíta na. Ta ndítuhún na sahá yuu ndató ndivaha ñacavaha veñuhu cán. Ta cáhan na sahá ñaha najoco ñayivi nu Ndióxi ndáa cán. Anda já ñacachi Jesús já xihín ná:

<sup>6</sup> —Vaxi quivi ndihi sahá tóco ndihi ña ndíta ndó sándehe ndó yóho. Ta ni janda in yuu a cándo jatá inga yuu ña nditani cacuu tóco ndihi ña yóho —ñacachi Jesús xihín ná.

*Ña coo tá ná cayati quivi ndihi sahá ñuyiví*

(Mt. 24:3-28; Mr. 13:3-23)

<sup>7</sup> Anda já nandaca tũhún na Jesús já ñacachi na já xihín á:

—Maestro, ndá ama coo tóco ndihi ña yóho. Ta ndaja coo tá sa ñacayati mé quivi cán —ñacachi na xihín Jesús.

<sup>8</sup> Anda já ñacachi Jesús já:

—Cuéntá coo ndó ta a quiáhva ndó ñamaní jándahvi ñayivi ndohó. Jáchi quixi cuahá ndivaha na cuéntá mí i ta cáhan na ña tũhún tá cachi na já xihín ndó: “Yehe cúu Cristo, da nachindahá Ndióxi cacomí a cuéntá sahá ñayivi.” Ta cachi na já: “Viti ñaxinu coo tiempo ndihi sahá ñuyiví”, cachi na xihín ndó. Joo coto a cándusa ndó

candico ndó jata ná cũhun ndó. <sup>9</sup> Tá ná cuni johó ndó ña cáni táhan ñayivi ñuyiví yóho, a cáyihví toho ndó. Jáchi ndúsa já ndítahan coo. Joo cámaní yii va jáxinu coo quivi ndihi sahá ñuyiví —ñacachi Jesús xihín ná.

<sup>10</sup> Anda já ñacahan chága Jesús xihín ná já ñacachi a já:

—Ñayivi ndúu in nación ndicuítá na caní táhan na xihín na ndúu inga nación ta caní táhan na in ñuu xihín na inga ñuu. <sup>11</sup> Ta quixi cuahá ña taan tá sa ñacayati quivi ndihi sahá ñuyiví. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndivaha ñayivi cuni na ñaha náhnu chí indiví. Ta yihví ndivaha na tá cuni na java ñaha xituhún ndivaha.

<sup>12</sup> Joo tá cámaní xinu coo quivi coo tóco ndihi ña yóho já ndicuítá ñayivi caji xixi na xihín ndó, na cándusa yehe. Ta cañehe na ndohó cũhun ndó ini veñuhu na ta cán caji vii na sahá ndó sahá ña cándeé ini ndó yehe. Ta taán na ndohó ini vecaa ta já cañehe na ndohó cũhun ndó cavií sahá ndó nuú na cúu jutixia xihín nuú na cómi cuéntá sahá ñayivi. Tóco ndihi ña yóho ndoho ndó sahá ña cándeé ini ndó yehe. <sup>13</sup> Ta xihín ña yóho cuu ñehe íní ndó cáhan ndó sahá i nuú na cán. <sup>14</sup> Ta a ndicani ini ndó sahá ndá tũhun cáhan ndó sahá mé ndó nuú na cán tá ná xinu ndó nu ná. <sup>15</sup> Jáchi mí i quiáhva i tũhun nu ndó

ta ndaja ndíchí i jini ndo já ná cuu nducú ñehe vaha ndó tuhun nuú na cán. Ta chí a cuú quee vaha yuhú na cán xihin ndo. <sup>16</sup> Joo cuahá ñayivi jicó túhún na ndohó. Ta chí janda tátá ndo á ñani ndó á táhan ndó á na xini táhan xihin ndo, na cán cacuu na jicó túhún ndohó cuahá tañu. Ta java táhan ndó, na cándeé ini yehe quivi ndó caja na. <sup>17</sup> Ta ndijáá ñayivi ñuyiví candají na ndohó sahá ña cándeé ini ndó yehe. <sup>18</sup> Joo ni in ñaha a ndóho ndó anda ni in iji jini ndó a ndíhi saha. <sup>19</sup> Ta tá coo nacuitá ndo xihin tóco ndíhi ña núu caja na xihin ndo já xinu ndó canduu ndó indivi anda ama cáa quivi.

<sup>20</sup> Tá ná cuni ndó ña nacava tiyivi soldado jatá ñuu Jerusalén ndúu da, xini ñuhú candaá ini ndó ña sa naxinu quivi ndíhi sahá ñuu cán. <sup>21</sup> Ña ndítahan caja ndó mé quivi cán quea cunu ndó cuhun ndó chí yucu tá ndúu ndó chí estado Judea. Ta ndá ndó, na ndúu ñuu Jerusalén xini ñuhú jándacoo ndó ñuu jan ta cunu ndó cuhun ndo. Ta ndá ndó, na ndúu yucu, a ndicó coo ga ndó ndíhvi ndó ñuu Jerusalén yóho. <sup>22</sup> Jáchi mé quivi já cacuu a quivi ndoho ini ñayivi já ná xinu coo tóco ndíhi nuú ña nacachi tuhun Ndióxi coo sanahá ndivaha. <sup>23</sup> Ndáhví nacuu najihí tá ñuhu jahyi na mé quivi já. Ta ndáhví nacuu na tá ñehe ndaa na na valí táhan ña chíchí yij. Jáchi ndoho ndivaha ini ñayivi

ndúu ñuyiví mé quivi já sahá ña xójo ndivaha ini Ndióxi xihin na cán. <sup>24</sup> Java ñayivi quivi na caja soldado ta java na cao ná já cañehe na na cuhun na ndijáá chí ñuu tóho canduu na jáchi ndíhi sahá ñuu Jerusalén yóho. Ta já quixi na ñuu tóho ta casahá na cahnda na chuun nuú ñuu Jerusalén yóho janda quiahva ná xinu coo quivi cacu ini Ndióxi ña ná quee na tóho cán cuhun na.

<sup>25</sup> Anda já cuni ndó ña náhnu ndivaha chí nuú candii xihin nuú yoo xihin nuú quimi viti. Ta ñayivi ñuyiví yóho yíhvi ndivaha na ta chí a candaá ini na ndía caja na jáchi quini ndivaha taçu nuú ndicojo tañuhú. <sup>26</sup> Ta chí janda quivi tóo ñayivi xihin ña yíhvi na jáchi casahá ndicani ndivaha ini na saha tóco ndíhi tondóho vaxi ñuyiví yóho. Jáchi janda mé candii xihin yoo xihin quimi ndiquiji nuu a. <sup>27</sup> Anda já cuni ndó yehe, da nachindahá Ndióxi nduu ñayivi, quixi i tañu vico xihin tóco ndíhi ndée cáhnu i ta chí ndiyihvi ndaa mé nuú quixi i. <sup>28</sup> Tá ná casahá yaha tóco ndíhi ña cáchí i xihin ndo yóho, xini ñuhú ndindeé ini ndó ta ndíñehe ndó nuu ndó jáchi sa nacayati quivi jácaçu Ndióxi ndohó cuhun ndó coo ndó indivi —nacachi Jesús xihin ná.

*Sácú Jesús quiahva sahá titó ñuhú*  
(Mt. 24:32-35; Mr. 13:28-31)

29 Anda já nasacu a in quiahva nu ná já nacachi a já:

—Xíni ñúhú candehé ndo ndá quiahva cája chúun in tító ñuhú, á ndá yító nacuu. 30 Tá ná cuni ndó ña jandá joho cana núma do já cándaá ini ndó ña nacayati tiempo javi. 31 Ta quiahva já tá ná cuni ndó ña sa cúu yáha tóco ndihi ña cáchí i xihin ndo yóho já candaá ini ndó ña sa nacayati quíví casahá Ndióxi cacomí a cuénta sahá ñayivi.

32 Mé a ndaá ná cahan i xihin ndo ña cuni ñayivi ndúu mé tiempo já yaha tóco ndihi ña nacachi i xihin ndo já quivi na. 33 Mé a ndaá ña cúu indiví xihin ñundáhyi yóho ndihi sahá joo tuhun nacahan yehé xihin ndo a ndíhi toho sahá jáchí coo tá coo tá ín nacachi i xihin ndó coo.

34 'Cuénta coo ndó. Xíni ñúhú candati tiahva ndó quíví quixi i ndiquehe e ndohó. A cáca nuu ndó yóho cáa ña caja ndó ña cúni yiquí cuñu ndó. A cóho ndó caca nuu ndó. Ta a ndíhi nahá ini ndó ndicani ini ndó sahá ñaha ñuyíví yóho. 35 Tá ná xinu quíví quixi i cacuu a tátuhun tá sácú jehé in dataa in trampa nuú in quíti sahá ña cúni da tiin da ri. Mé quíti cán co xíni rí ndáchí ín jehé trampa tiin ñahá cán. Quiahva já co xíni ñayivi ndúu ñuyíví ndá quíví quixi tucu u ñuyíví yóho. 36 Xíni ñúhú canduu tiahva ndó quíví quixi i. Níi tiempo

xíni ñúhú caça tahví ndo nu Ndióxi já ná ndindeé ini ndó tá ná quixi tóco ndihi ña yóho nu ndo ta já ná cuu xinu coo vaha ndó indiví já ná cuu coo víi ndo nuú yehé, da nachindahá Ndióxi nduu ñayivi — nacachi Jesús jánaħa nuú ñayivi cán.

37 Nini quíví nasahin Jesús ini veñuhu cáħnu jánaħa tuhun Ndióxi nuú na cán. Ta tá ñuu já sahan quíji a yucu yitó Olivo cán. 38 Ndijáá níi quíví naha chá naxinu coo ñayivi veñuhu cáħnu cán jáchí cúni na cuni joho na ña jánaħa Jesús nu ná.

## 22

*Jándique táhan na tuhun na ña cahni na Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

1 Ta yati tandaa víco pascua tá xíxi ñayivi pan ña co quéé yusá naxiaa xihin. 2 Já nacasahá na sacuaħa nuú jutu xihín na jánaħa ley Moisés ndúcú na ndaja caja na cahni na Jesús. A cuú caja na cahni tívi na ña jáchí yíhvi na canahá ñayivi xihin ná.

3 Joo ndaja coo tiñáhá sacuaħa nandeta nuu rí ínima in táhan uxu ívi da xíca tuun xihin Jesús. Mé da cán naní da Judas ta Judas Iscariote cáħan na xihin dá. 4 Ta nasahan Judas caħan da xihín na sacuaħa nuú jutu ta xihín na sacuaħa nu policía ndáá veñuhu. Ta nandituhún da xihin ná ña cuu caja da jicó tuhún da Jesús ta ndiquiahva ñahá dá mé á nu ná. 5 Xihín

ñā yóho ñacajii ínī nā cán ta ñasahan nā tuhun na nū Judas ñā quiahva na jihún nū dá. <sup>6</sup> Ta ñacandúsa Judas caja da ñā chí ñacasáhá da ndúcú da ndaja caja da ndiquiahva da Jesús nuú nā cán tá coó ñayivi ndúu xihín á.

*Xijini Jesús vicó pascua xihín nā xíca tuun xihín á*

(Mt. 26:17-29; Mr. 14:12-25; Jn. 13:21-30; 1 Co 11:23-26)

<sup>7</sup> Nātanda mé víco tá xíxi na pan ñā co quée yusá naxiaa xihín. Mé víco yóho ñasacaja na ñā tá nū cuía ta sáhní nā ndicachi vání jóco nā nū Ndióxi. <sup>8</sup> Mé quivi já ñasahnda Jesús chuun nū Pedro xihín nū Juan já ñacachi a já xihín dá:

—Cuáhán ndó caja ndíví ndo ñā cajíní vicó pascua — ñacachi a xihín dá.

<sup>9</sup> Anda já ñacachi da cán já xihín á:

—Yo vehe cúni ndó cūhun nde ná caja ndíví nde ñā cuxú.

<sup>10</sup> Anda já ñanducú ñehe Jesús tuhun nū dá já ñacachi a já:

—Tá ná quihvi ndó ñuu Jerusalén jan já cuni ndó in dataa ta ndójo da in yoo ticuij cuahan da. Candico ndó jata dá cūhun ndo janda quiahva cuni ndó ndá vehe quihvi da. <sup>11</sup> Ta já cūhun ndó cahan ndó xihín mé da xihín ñaha vehe cán já cachi ndó já xihín dá: “Da jánaha ndehe cúu da cáhí xūhun: Ndáchí ín nuú coo i cajíni i vicó pascua xihín nā xíca tuun xihín i.” <sup>12</sup> Anda

já jánaha mé da cán in cuarto cáhnu ñā cánúu jini véhe piso nūnu. Sa ín tiahva va ñā. Cán caja ndíví ndó ñā cajíní — ñacachi Jesús.

<sup>13</sup> Anda já ñaquee ndíví da cán cuahan da. Ta tá ín ñacachi Jesús xihín dá coo quiahva já ndusa ñasahin. Ta chí ñacaja ndíví da tóco ndihi ñā cajíní na vicó pascua.

<sup>14</sup> Tá naxinu coo hora cajíní na já ñasacoo Jesús xihín tóco ndihi nā xíca tuun xihín á nū mesa. <sup>15</sup> Anda já ñacachi Jesús já xihín ná:

—Sa xíca ndivaha ini i cajíní i vicó pascua yóho xihín ndó nani ín tóo i xihín ndo jáchi vaxi quivi quivi i. <sup>16</sup> Jáchi mé a ndaa ná cahan i xihín ndo janda ná xinu quivi cacomí Ndióxi cuéntá sahá ñayivi anda jáví cajíní tucu u vicó pascua xihín ndo — ñacachi Jesús xihín ná.

<sup>17</sup> Anda já ñatiin a in vaso nū ñúhu tó uva ta ñandiquiahva ndixahvi nū Ndióxi. Ta já ñacachi a já xihín nā xíca tuun xihín á:

—Coho ndó dó ñúhu ini vaso yóho ta cahnda java ndó dó nū táhan ndó. <sup>18</sup> Jáchi a ndicó coo ga i coho i tó uva janda quiahva ná xinu coo quivi cacomí Ndióxi cuéntá sahá ñayivi — ñacachi Jesús xihín ná.

<sup>19</sup> Tá ñandihí ñatiin a pan ta ñandiquiahva ndixahvi nū Ndióxi sahá. Anda já ñasahnda java ñā já ñasahan ñā nuú nā xíca tuun xihín á cán já ñacachi a já xihín ná:



—Mé pan yóho cúú á tátuhun yiquí cuñu i jáchi ndiquiahva i mí i quivi i sahá ndihi ndó. Xíní ñúhú caja ndó ña yóho ña ná ndicuhun ini ndó ña ñaxihi i saha ndo — ñacachi Jesús xihín ná.

<sup>20</sup> Tá sa ñandihí ñaxijíni na ta já ñatiin a vaso nu ñúhu tó uva ta já ñacachi a já:

—Dó ñúhu ini vaso yóho cúú dó tátuhun níi i jáchi cahní ña yehe ta cuíta níi i saha ndihi ndó. Ta xihín ña yóho xinu coo nuú tuhun ñasahan Ndióxi nuú ñayivi sanahá tá ñacachi a jácacu a ñayivi.

<sup>21</sup> 'Cuni joho vaha ndó ná cahan i xihín ndo. Nu mesa yóho íin coo da jicó túhún yehe. <sup>22</sup> Jáchi janda sanahá ñasacu ini Ndióxi ña ndítahan ndoho ini yehe, da ñachindahá mé á nduu ñayivi. Joo ndáhví ñacuu da jicó túhún yehe — ñacachi Jesús.

<sup>23</sup> Xihín ña ñacachi Jesús yóho ñacasahá ña xíca tuun xihín á cán ndáca tuhún táhan na saha ndá da cúú da sácú ini cuhun jicó túhún ñahá.

*Ndítuhún ihvi xihín táhan ña xíca tuun xihín Jesús*

<sup>24</sup> Tá ñandihí já ñacasahá ndítuhún ihvi xihín táhan da xíca tuun xihín Jesús cán sahá ndá da cúú da íin chága saha.

<sup>25</sup> Sahá ña cán queá ñacachi Jesús já xihín ndihi da cán:

—Ndijáá ñuyiví sáhdá rey chuun nuú ñayivi tá quiahva cúní mé dá. Ta jári cúní da ña ná cachi ñayivi saha dá ña

cúú dá da cája vaha. <sup>26</sup> Joo coo ndítahan coo ña cán tañu mé ndó. Ña ndítahan caja ndó queá tá in ndó cúní ndó cacuu ndó da íin chága saha, xíní ñúhú jánuu ndáha ndó mé ndó tátuhun da loho chága nu ndíhi ndó. Ta ndá da cúní cahnda chuun, xíní ñúhú cacuu da tátuhun in da cája ndíví nu mesa xitoho da. <sup>27</sup> Mé ndó sa cánda vaha ini ndó ña íin chága sahá da íin coo nu mesa a juú ga da cája ndíví ñahá. Joo yehe najánuu ndáha i mí i ta ñanduu u tátuhun in da cája ndíví nu ndo.

<sup>28</sup> 'Ndóhó cúú ndó ña ñasanduu tuun xihín i nu tóco ndihi ña ihvi ñaquixi nuú i. <sup>29</sup> Sahá ña cán queá tá quiahva ñacaja tátá i ñamaní xihín i ña ná cacomí i cuéntá sahá ñayivi quiahva já caja i ñamaní xihín ndó <sup>30</sup> ña ná ndítútú ndó canduu ndó xihín i tá ná cacomí i cuéntá sahá ñayivi. Ta já ná cuu caja víi ndo sahá ña ñaquixi ndíhuxu ivi táhdá ña ñaquixi chichi Israel — ñacachi Jesús xihín ná.

*Cáxi tuhun Jesús ña chijehé tuhun Pedro ña xíní da mé á*  
(Mt. 26:31-35; Mr. 14:27-31; Jn. 13:36-38)

<sup>31</sup> Anda já ñandicahan Jesús já ñacachi a já xihín Pedro:

—Simón, cuni joho vahún. Jáchi ñaxíca Satanás, mé tiñahá sacuaña ñamaní ña ná coto ndojó rí tóco ndihi ndó tá quiahva jáxixi na trigo. <sup>32</sup> Joo sa ñaxíca tahví i nu Ndióxi saha yóhó, Simón já

ná a jándacoún ña cándeé inún yehe. Ta tá sa nandicó coo inún xihín ña cajún jan, ndítahan chindeún java ga na cándeé ini yehe já ná coo ndacú na íchi cuéntá mí i — nācachi Jesús xihín dá.

<sup>33</sup> Anda já nanducú ñehe Pedro tuhun nu Jesús já nācachi da já xihín á:

—Candehé ndo, xitoho i. Yehe sa ín tiahva i cūhūn i vecāa xihín ndo. Ta jandā ná cahni nā yehe xihín ndo tá cūni nā jáchi sa ín tiahva vi — nācachi da xihín Jesús.

<sup>34</sup> Já nācachi Jesús já xihín dá:

—Candehé Pedro ná cahan i ña ndāa xuhun. Mé quiví viti tá cámanj cana chéle já unj tañu chijehé tuhún sahá i ta cahún ña co xini tohún yehe — nācachi Jesús xihín dá.

*Cáxi tuhun Jesús ña sa cáyati hora ndoho ini a*

<sup>35</sup> Tá nandihí já nandaca tuhún Jesús nā xica tuun xihín á cán já nācachi a já xihín ná:

—Jihna nāchindahá i ndohó cūhūn ndó cahan ndó tuhun Ndióxi ta nācachi i xihín ndo ña ná a cáñehe ndó yátí ni jiuhún ta ni inga ndusa a cáñehe ndó cūhūn xihín ndo. Á nandimaní ñaha nu ndo tá nasahan ndo já — nācachi Jesús xihín ná.

Já nācachi nā já:

—Ni in ñaha coó nandimanj nuú nde — nācachi na.

<sup>36</sup> Anda já nācachi tucu a já xihín ná:

—Joo viti coo ga ña cán coo. Viti cáchi i xihín ndo ña tá ín yátí nu ndo, xini ñuhú cañehe

ndó ña cūhūn ndo. Cañehe ndó jiuhún ndo tá ná quee ndó cūhūn ndo. Ta tá coo machiti nu ndó, xini ñuhú jicó ndó jahmá ndeé ndo já cueen ndó machiti ña ná coo tiahva ndó. <sup>37</sup> Jáchi sanahá nācahyi a nu libro yij Ndióxi ta sahá yehe nācahan tá nācachi a já: “Nācachi ñayivi cúu dá taa quini sahá ña cán quea nāchitáhan na da xihín ñayivi quini.” Tóco ndihí ña nācahyi nuú tuhun Ndióxi sahá yehe sanahá xini ñuhú xinu coo a viti — nācachi Jesús.

<sup>38</sup> Anda já nācachi nā xica tuun xihín á cán já:

—Candehé ndo, xitoho nde. Yóho ñehe nde ivi machiti — nācachi na.

—Sa ín vaha — nācachi Jesús xihín ná.

*Cuahan Jesús Getsemani cacā tahví a nu Ndióxi*

(Mt. 26:36-46; Mr. 14:32-42)

<sup>39</sup> Tá nandihí já naquee Jesús cuahan yucu yito Olivo nu sá sahan tuun a cacā tahví a nu Ndióxi. Ta já ndico ndihí nā xica tuun xihín á cán jatá cuahan nā. <sup>40</sup> Ta tá sa naxinu coo na cán já nācachi a já xihín ná:

—Cacā tahví ndó nu Ndióxi já ná a ndicava ndó nuú cuachi tá ná coto ndojó tiñahá ndohó — nācachi Jesús xihín ná.

<sup>41</sup> Tá nandihí já natavá xoo Jesús mé á tañu nā cán já nasahan tátuhun in quiahva nu xinu coo in yuu tá jání yó ña xihín ndaha yo. Quiahva já nācaxicá mé á tañu nā cán

já naçaxítí a xíca tahví a nu Ndióxi.<sup>42</sup> Já naçachi a já:

—Tátá Ndióxi, á cuu caja ndó ñamaní já ná a ndóho i ña ihví ndivaha ña vaxi nuú i ndoho i. Joo ná coo tá ín cúni mé ndó ná a cóo toho ña cúni yehe —cáchi Jesús xíca tahví a.

<sup>43</sup> Anda já naçanáha in táto Ndióxi indiví já naxinu a sáhan tuhun ndeé ini Jesús.<sup>44</sup> Ta naçasáhá ndóho ndivaha ini Jesús jáchi naçacuéha ini a. Sahá ña cán quéa nanducú ndeé chága ví a xíca tahví a nu Ndióxi. Ta chí ndícaa mé teen á nu ñúhu ta dó cán cúu dó tátuhun ní cúyu nu ñúhu.

<sup>45</sup> Ta tá nandihí naxíca tahví a nu Ndióxi já nandaca ndichi a já naquee a cuahan nu ndúu na xíca tuun xihin á cán. Ta nanditahan mé á na ndúu na quíji na. A juú quiahva cándíi ini na sahá ña cán nanaá ini na naquíji na.<sup>46</sup> Anda já naçachi a já xihin ná:

—Ndá cuéntá quéa quíji ndo ndúu ndó. Cuáhan ndacoo ndó ta caça tahví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —naçachi Jesús xihin ná.

*Tá natiin na Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Janda cáhan chá va Jesús xihin na xíca tuun xihin á cán cándichi a já naxinu cuahá ndivaha ñayivi nu ín a. Ta in táhan da uxu ívi xíca tuun xihin á, da nani Judas cán, da

cán cúu da ndáca ñayivi vaxi da. Ta naçayati da tatí yúhu dá sajóho Jesús.<sup>48</sup> Anda já naçachi Jesús já xihin dá:

—Judas, tatí yúhun sajóho i tátuhun da quíhvi ini yehe. Joo xihín ña cájún jan ndíquiahvún yehe ndahá na co cúni yehe, da naçindahá Ndióxi nduu ñayivi —naçachi Jesús.

<sup>49</sup> Tá naxini tócó ndihi na ndúu xihin Jesús cán ña cúu já naçasáhá ndáca tuhún na mé á já naçachi na já:

—Á cúni ndó, xitoho nde ña ná ndicuíta nde xihin machiti cani táhan nde xihin ná —naçachi na.

<sup>50</sup> Joo in táhan da xíca tuun xihin Jesús cán najándicuehe da in da cúu mozo da sacuaha nuú jutu cán jáchi nachitúhun dá joho xoo cuáha da.<sup>51</sup> Joo já naçachi Jesús já xihin ná:

—Sa ín vaha. A cáni táhan ndó xihin ná —naçachi Jesús.

Tá nandihí já naçani ndaa ndáha mé á joho mozo cán já nandaja vaha mé á da.<sup>52</sup> Ta naçasáhá cáhan Jesús xihin na sacuaha nuú jutu cán xihin na sacuaha nu policía ndáá veñuhu xihin na sacuahá veñuhu cán, mé na naçasaá tiin na Jesús já naçachi a já xihin ná:

—Cája ndó xihín i tátuhun cája na xihín taa cuihná jáchi naqueta ndó vaxi ndó tiin ndó yehe xihin machiti ta xihin yító.<sup>53</sup> Joo coó a ná caja toho ndó xihín i tá nasahiin i tañu ndó veñuhu cán. Joo núná nu ndó viti caja núu ndó jáchi nasahan Ndióxi ñamaní da

ñā ná tiin ndó yehe. Jáchi ñacuaá viti ta chíndeé tiñáhá sacuaḥa ndohó caja ndó ñā núu —ñacachi Jesús xihín na cán.

*Tá ñachijehé tūhun Pedro ñā xini da Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Anda já natiin na Jesús. Já ñéhe na a cuahan na vehe da cúu sacuaḥa nuú jutū cán. Ta xíca xíca ndico Pedro jata ná cuahan da. <sup>55</sup> Ta tá naxinu coo ñayivi cán yuhú yéhe da cúu sacuaḥa nuú jutū cán já ñandicahmi na ñúhu ñasacoo na xítúní na. Já naxinu coo ri Pedro ñasacoo da tañu na cán xítúní da. <sup>56</sup> Joo ndaja coo in ñañáhá cája chúun vehe jutū sacuaḥa cán naxini ñá íin coo da xítúní da yávi núhu cán. Ta ñacasáhá sándehe ñá nu dá já cáchí ñá já:

—Da xíca tuun xihín Jesús cúu ri da íin coo yóho va —ñacachi ñá cán.

<sup>57</sup> Joo ñacasáhá Pedro chíjehé tūhun da já ñacachi da já:

—Candehé, ñañáhá. Co xini toho i ndá da cúu da jan —ñacachi Pedro xihín ñá cán.

<sup>58</sup> Chá va ta naxini inga dataa Pedro ta já ñacachi da já xihín dá:

—In táhan da xíca tuun xihín Jesús cáa cúu ri yóho va —ñacachi da cán xihín Pedro.

Anda já ñacachi Pedro já:

—Uhun. A juú toho táhan na cán cúu yehe —ñacachi da.

<sup>59</sup> Ta tá sa ñayaha tátūhun in hora já ñacachi inga dataa já:

—Mé a ndaa da xíca tuun xihín Jesús cúu ri da yóho va jáchi cúu dá da estado Galilea.

<sup>60</sup> Anda já ñacachi Pedro já xihín dá:

—Co xini toho i ndá saha cáhun —ñacachi Pedro.

Tá chí mé hora já nani cáhan Pedro xihín dataa cán já ñacana chéle. <sup>61</sup> Anda já ñandicoto nihni Jesús ñasandehé a nu Pedro. Tá ñandicūhun ini Pedro sahá tūhun ñacachi Jesús xihín dá tá cámaní tiin na a tá ñacachi a já: “Mé quivi viti tá cámaní cana chéle já uní tañu chíjehé tūhún sahá i ta cáhún ñā co xini tohún yehe”, ñacachi a xihín dá. <sup>62</sup> Anda já ñaqueta Pedro cuahan da já ñacasáhá sácu ndivaha da.

*Tá sácu ndaa na Jesús*

(Mt. 26:67-68; Mr. 14:65)

<sup>63</sup> Ta java dataa, da ndúu ndáá Jesús cán ñacasáhá da sácu ndaa da ñā. Ta ñacani ñahá da. <sup>64</sup> Ñachicaji da nuú á ta ñacani da jahndá nuú á já ñacasáhá da ndáca tūhún da mé á já cáchí da já xihín á:

—Cachi yo já ñacani jahndá nuun —cáchí da xihín á.

<sup>65</sup> Ta cuahá chága nuú ñā núu cáhan na xihín á ñā cánahá na xihín á.

*Ndája ndíchi na Jesús*

(Mt. 26:59-66; Mr. 14:55-64; Jn. 18:19-24)

<sup>66</sup> Ta tá sa nativi já nataca na sacuaḥa nuú na Israel cán xihín na sacuaḥa nuú jutū

## 23

cán xihín na jánahá ley Moisés cán viti. Já ñéhe na Jesús cuahān na cavií sahá nuú na cán. Ta tá sa nanditútú ndihi na cán ndúu na já nandaca tuhún na Jesús já nacachi na já xihín á:

67 —Caxi tuhun xihín nde á cúun Cristo, da nachindahá Ndióxi cacomí cuéntá sahá ñayivi —nacachi na xihín á.

Anda já nacachi Jesús já xihín ná:

—Tá ajan ná cachi i xihín ndo ta chí a cándúsa toho ndó yehe. 68 Ta cája i cuéntá a cáhan ndó xihín i tá ná ndaca tuhún i ndohó. Ta cája i cuéntá ni a cándúsa ndó janí ndó yehe. 69 Joo viti sa natandaa quiví cuhun yehe, da nachindahá Ndióxi nduu ñayivi ta coo i xoo cuáha Ndióxi indiví jáchi iin ndée mé á caja tóco ndihi ñaha —nacachi Jesús xihín ná.

70 Anda já nacasáhá tóco ndihi na cán ndaca tuhún na mé á já nacachi na já:

—Á jivi ndusa yóhó cúun in tuhún jiní já jahyi Ndióxi, dá já —nacachi na.

Anda já nacachi Jesús já xihín ná:

—Ajan. Jivi cúu u tá iin cáchi ndó jan —nacachi Jesús.

71 Anda já nacasáhá tóco ndihi na cán cáhan na já nacachi na já:

—Co ndítahan ndinducú chága yó ñayivi cacuu testigo nuú ña cáhan da yóho jáchi sa xini joho í ña cáhan da ta chícān da cuachi jata mé dá —nacachi na cán.

Tá nandiquiahva na Jesús ndáha Pilato

(Mt. 27:1-2, 11-14; Mr. 15:1-5; Jn. 18:28-38)

1 Anda já nandaca ndichi ndihi na cán já ñéhe na Jesús nasahan na nu Pilato. 2 Ta cán nacasáhá na chícān na cuachi jata já nacachi na já sahá:

—Natiin nde da yóho jáchi xica nuu da jándivaa da ñayivi ñuu nde. Cáchi da ña co ndítahan toho nuú nde chahvi nde jjuhún cuéntá impuesto nuú da cómi cuéntá saha yó ñuu Roma. Ta cáchi da ña mé dá cúu dá Cristo, da chindahá Ndióxi cacomí cuéntá sahá ñayivi. Ta cáchi da cúu dá in rey —nacachi na cán xihín Pilato.

3 Anda já nandaca tuhún Pilato Jesús já nacachi da já xihín á:

—Á mé a ndaa cúun in rey, da cómi cuéntá sahá na Israel —nacachi da cán xihín Jesús.

Anda já nacachi Jesús já xihín dá:

—Ajan. Jivi cúu u tá quiahva cáchi ndó jan.

4 Anda já nandicahan Pilato xihín na sacuahā nuú jutū cán ta xihín ñayivi ndúu cán já nacachi da já:

—Co ndíñehe mí vi nda cuachi quēa nacaja da yóho —nacachi Pilato.

5 Joo ñayivi cuaha cán nacasáhá cáyuhú cóhó chága na já cáchi na já:

—Mé da jan naxica nuu da jándivaa da tóco ndihi ñayivi estado Judea xihín ña

jánaḥa da nu ná. Ta janda Galilea naçasáhá da jándivaa da ñayivi. Ta viti naxinu da ñuu nde cája da já —naçachi ñayivi cáyuhú na.

*Tá ñéhe na Jesús cuahan na nu Herodes*

6 Tá naxini johu Pilato ña naçachi ñayivi cán já nandaça tuhún da na á cúu Jesús da estado Galilea. 7 Ta tá naçachi na ña ndusa cúu Jesús da estado Galilea já naçindahá Pilato Jesús ña ná cuhun a nuú Herodes, da cúu gobernador nuú ñayivi estado Galilea. Jáchi mé tañu já naçahin too da ñuu Jerusalén. 8 Tá naxini Herodes Jesús já naçajii iní da jáchi sa janda jihna cuni da Jesús cuni da. Jáchi cuahá tañu nandicaní ñayivi nu dá sahá ña cája Jesús. Ta cuni da cuni da ña ná caja Jesús in ñaha xituhún. 9 Ta cuahá ndivaha ñaha nandaça tuhún Herodes cán Jesús joo coo nanducú ñehe a tuhun nu dá. 10 Ta tañu ñayivi cán ñúhu ri na sacuaḥa nuú jutú xihín na jánaḥa ley Moisés ta chí a juú quiahva nducú ndée na chicaan na cuachi jata Jesús. 11 Anda já naçasáhá Herodes cája xixi da xihín Jesús ta quiahva já cája ri na cúu soldado da cán xihín á. Ta najácandixi na Jesús xihín jahmá lándá tátuhun jáhma sándixi in rey. Naçaja na já xihín á jáchi cuni na cuacu ndaa ñahá na. Tá nandihí já naçindahá tucu Herodes Jesús ña ná cuhun a nu Pilato.

12 Ta chí mé quivi já nandique táhan máni Herodes xihín Pilato jáchi jihna co cuni táhan toho da, nduu.

*Sácú ini na ndaja caja na cahní na Jesús*

(Mt. 27:15-26; Mr. 15:6-15; Jn. 18:39-19:16)

13 Anda já najánditaca Pilato na cúu sacuaḥa nuú jutú cán xihín na jutixia xihín java ñayivi. 14 Já naçachi da já xihín ná:

—Mé ndó ñéhe ndó da yóho naçasaḥa da nuú i. Ta cáchi ndó ña xica nuu da jándivaa da ñayivi. Joo sa naxini ndó ña nandaja ndíchí i da nu ndo. Ta ni in tuhún toho cuachi táhan ña cáhan ndó saḥa jan coo nanditahan i nu dá. 15 Ta ni Herodes coo cuachi ná ndiñehe jata dá sahá ña cán quéa nanducú ñehe da da nuú i. Cuni johu vaha ndó: Coo saḥa cúu á ña quivi da. 16 Ña caja i quéa jándoho i ini da. Anda já janí vi da cuhun da —naçachi Pilato cán xihín ná.

17 Tañu víco pascua cán naçahin costumbre nu Pilato janí da in táhan da ñúhu vecaa ña ná candoo vaha da nuú ñayivi. 18 Sahá ña cán quéa naçasáhá cáyuhú tóco ndihi ñayivi nu dá já cáchi na já:

—Cahní ndó da jan ta janí ndó Barrabás nuú nde —cáchi na cáyuhú na.

19 Mé Barrabás yóho ndácaan da vecaa jáchi najátaca cuaha dá ñayivi ta nandicuítá da xihín na sacuaḥa ñuu Jerusalén cán ta cúu dá da sáhní ndii. Sahá ña cán quéa ndácaan da vecaa.

<sup>20</sup> Joo cúnĭ Pilato janí da Jesús sahá ña cán quéa naçahan tucu da xihín ñayivi. <sup>21</sup> Joo ví ga ví naçasahá na cán cáyuhú cóhó na nu dá já cáchĭ na já:

—Cata caa ndó da ndica crúxu. Cata caa ndó da.

<sup>22</sup> Ta anda já naçahan tucu Pilato ña cúu unĭ xihín ná já naçachi da já:

—Coó toho ña núu nahá naçaja toho da yóho. A cuú cahnda ĩ chuun ña ná cahní na da jáchĭ coó cuachi da. Ña caja ĩ quéa cahnda ĩ chuun ña ná jándoho na ini da. Anda já janí vĭ da —naçachi Pilato.

<sup>23</sup> Joo ví ga ví ndúcú ndéé na cán cáyuhú na ña ná cata caa na Jesús ndica crúxu. Ta xihín ña ndúcú ndéé na cán cahan na ta ndúcú ndéé ri na saçuaha nuú jutú cán cahan na. Sahá ña cán quéa natahnu ini Pilato. <sup>24</sup> Ta naçandúsa da caja da ña cúnĭ na cán xihín Jesús. <sup>25</sup> Ta najaní da Barrabás jáchĭ da cán naçahan mé ná saha ña ná janĭ dá. Ta mé Barrabás yóho nasandacaan da vecaa sahá ña najándivaá da ñayivi ta sahá ña nasahnĭ da ndĭi. Anda já nandiquiahva da Jesús nu ná ña ná caja na tá cúnĭ mé ná xihín á.

*Tá naçata caa na Jesús ndica crúxu*

(Mt. 27:32-44; Mr. 15:21-32; Jn. 19:17-27)

<sup>26</sup> Ta tá ñéhe na Jesús cuahan na cata caa na a já naçini na in da nanĭ Simón, da ñuu Cirene vaxi da ndĭhvi da ñuu Jerusalén. Ta já najácuhun ndáha ná da ña ná

ndacojo da crúxu nuú tacaá Jesús cán. Ta nandico da Jesús cuahan da.

<sup>27</sup> Ta a juú quiahva cuahá ñayivi ndico jatá cuahan na. Ta cuahá najihĭ sácu ndivaaha na ta cáyuhú na cuahan na jatá jáchĭ táhnda ini na sahá. <sup>28</sup> Joo nandicoto nihni Jesús nu ná já naçachi a já xihín ná:

—Najihĭ, na ñuu Jerusalén, a cuácu toho ndó sahá yehe. Saha mé va ndó ta sahá jahyi ndó viti ndítahan cuacu ndó. <sup>29</sup> Jáchĭ vaxi quivĭ já casahá ñayivi cachi na já: “Tahví naçuu najihĭ, na coó naçacu jahyi. Ta tahví naçuu na coó jahyĭ chíchĭ”, cachi na jáchĭ ndóho ndivaaha ini na. <sup>30</sup> Mé tiempo já casahá ñayivi cachi na já: “Vá ná cuyu yúcu jata yo já ná quivĭ”, cachi na. Ta cachi na xihín java yúcu: “Chijehé ndó ndehé”, já cachi na sahá ña ndóho ndivaaha ini na. <sup>31</sup> Candehé ndo ndá quiahva jándoho na inĭ ĩ ta cúu u tátuhun in yitó cuí, dó tácu. Ta cája xixi na xihín ĩ joo xixi chága caja na xihín ndóhó jáchĭ cúu ndó tátuhun in yitó íchĭ —naçachi Jesús xihín na cán.

<sup>32</sup> Ta tá ñéhe na Jesús cuahan cata caa na a ndica crúxu já ñéhe ri na ĩvĭ da cúu da quini cuahan na cata caa na da já ná quivĭ da xihín á. <sup>33</sup> Ta tá naçinu coo na in nuú nanĭ lásá yiquí jínĭ ndĭi cán naçata caa na a ndica crúxu. Ta naçata caa ri na ĩvĭ da quini cán va: in da xoo cuáha Jesús ta inga da xoo íti

a. <sup>34</sup> Ta tá cáta caa na Jesús ndica crúxu já nacachi a já:

—Tátá Ndióxi caja cáhnu ini ndó sahá ña cája ñayivi yóho xihín i. Jáchi co xini na ndía cája na —nacachi Jesús.

Ta ndaja coo java soldado cán nacasáhá da sájiquí da saha jáhma Jesús já quea ndá da ná quee vaha ndiquehe da jáhma á. <sup>35</sup> Ta ñayivi ndúu cán sándehe na nu tácaa Jesús ndica crúxu nani na cúu jutixia nasacuíta na ndúu na sácu ndaa ñahá cán já cáchi na já:

—Najáca cu da java ga ñayivi. Ta viti ná jáca cu da mé dá tá mé a ndaa cúu dá Cristo, da naçaxi Ndióxi cacomí cuéntá sahá ñayivi —cáchi na sácu ndaa ñahá na.

<sup>36</sup> Ta jári java soldado sácu ndaa da Jesús ndúu da. Ta nacayati da cán nu Jesús já nachínee da vino, dó iyá yúhu á ña ná coho a do. <sup>37</sup> Ta já cáchi da já cáyuhú da nu á:

—Tá ta mé a ndaa cúun rey, da cómi cuéntá sahá na Israel chindeé mún já ná a quívún —cáchi da.

<sup>38</sup> Ta nachindaa na in tabla ndica crúxu yati jiní Jesús ta nu mé tabla cán nacahyí na: “Da yóho cúu rey nuú na Israel.” Ta mé ña yóho nacahyí na ña tuhun griego, ña cáhan na nación Grecia xihín tuhun latín, ña cáhan na ñuu Roma xihín tuhun hebrero, ña cáhan na Israel viti.

<sup>39</sup> Ta in táhan da quini tácaa ndica inga crúxu yati jiní á cán nacasáhá da cáhahá da xihín á. Já cáchi da já:

—Tá mé a ndaa cúun Cristo, da nachindahá Ndióxi cacomí cuéntá sahá ñayivi chindeé mún já ná a quívún. Ta chindeé ndehe já ná a quíví nde —cáchi da.

<sup>40</sup> Joo inga táhan da quini tácaa inga xoo jiní a cán nacasáhá da jánani da da cáhan xihín Jesús cán já nacachi da já xihín dá:

—Á co yíhví tohún Ndióxi. Jáchi in cúu yo ndóho ini yóho <sup>41</sup> joo mé Jesús yóho coó toho cuachi nacaja da. Ta mé cuití ví ndítahan ndoho ini ña ná chahví sahá cuachi nacaja í —nacachi da cán jánani da inga da tácaa cán.

<sup>42</sup> Tá nandihí já nacachi da já xihín Jesús:

—Jesús, caja ndó ñamaní ndicuhun ini ndó sahá i tá ná casáhá ndó cacomí ndó cuéntá sahá ñayivi —nacachi da xihín Jesús.

<sup>43</sup> Anda já nacachi Jesús já xihín dá:

—Mé a ndaa ná cáhan i xuhun ña mé quíví viti cuhún coún xihín i indiví —nacachi a xihín dá.

*Tá naçixihí Jesús*

(Mt. 27:45-56; Mr. 15:33-41; Jn. 19:28-30)

<sup>44</sup> Ta tátuhun caçivi já nacanaá níi cúu ñuyíví. Ta janda caa uní sahini já nacasáhá nandiyehé tucu.

<sup>45</sup> Nanaá nuú candii. Ta janda já nandatá java ndaa jáhma ndeé ña tácaa veñuhu cáhnu ñuu Jerusalén ña sáji nuu nuú yíi ndivaha. <sup>46</sup> Anda já nacayuhú cóhó Jesús já cáchi a já:



—Tátá Ndióxi, ndáha mé ndó jándacoo i ínimá i.

Ta tá nācachi a ña yóho já naxihí va.

<sup>47</sup> Ta ndaja coo da sáhnđá chuun nuú soldado cuéntá Roma cán tá naxini da tóco ndihi ña nayaha yóho já nacasáhá cája cáhnu da Ndióxi já nācachi da já:

—Mé a ndaa táhyí coó toho cuachi da yóho —nācachi da.

<sup>48</sup> Ta tóco ndihi ñayivi nasanduu cán, nā naxini nuú naxihí Jesús jándá johó cáni nā yica ndicá nā sahá ña táhnda ini na saha Jesús já cuanúhu va na. <sup>49</sup> Joo tóco ndihi nā xíní táhan xihín Jesús nācandoo na ndíta xicá nā sándehe ná. Ta tañu nā cán nasanduu ri najihí táhan nā naquixi xihín á jánda estado Galilea cán.

*Tá nāchicaan nayiquí cuñu Jesús ini cáva*

(Mt. 27:57-61; Mr. 15:42-47; Jn. 19:38-42)

<sup>50</sup> Ta ndaja coo nasahin in dataa naní José, da ñuu Arimatea ña ndácaan estado Judea cán. Ta cúú dá in ta vaaha, da cája ña ndaa cuití va. Ta cúú da in táhan nā cómí cuéntá sahá nā Israel.

<sup>51</sup> Mé José yóho coó nātahan ini da xihín ña nācaja java ga nā cán jáchi ndáti da casaa quivi cacomí Ndióxi cuéntá sahá ñayivi. <sup>52</sup> Ta nasahan da cahan ndahví da xihín Pilato ña ná ndiquiahva da yiquí cuñu Jesús nu dá. <sup>53</sup> Ta chí nasahan Pilato ñamañi nu dá chí nasahan da najánuu da yiquí cuñu Jesús ndica cruxu

cán. Já nāchitíví ñahá da xihín jáhma vaaha ta já nāchicaan ñahá da ini in yávi ndácaan ndica cáva. Ta ni in túhún toho ndii a ñaha chícaan nā ini mé cáva cán. <sup>54</sup> Mé quivi cán nasacuu a quivi cája ndíví ñayivi ñaha vehe na jáchi ja chá cacuu a quivi ndiquehe ndée ná sahá ña cán quéa ndíhi ini na jáxinu nā chuun cája na.

<sup>55</sup> Ta najihí, nā nasandico jata Jesús jánda tá naquixi a chí estado Galilea cán nasahan nā sándehe nā ndica cáva nuú najáqueta nuu na yiquí cuñu Jesús cán. <sup>56</sup> Ta tá nasaa nā vehe na já nācaja ndíví nā perfume xihín java ga ñaha támi sahan ña ná jándicuchu na yiquí cuñu Jesús. Ta inga quivi itaan nandiquehe ndée ná tá quiahva nasahnda Ndióxi caja na jánda sanahá.

## 24

*Tá nānditacu tucu Jesús*

(Mt. 28:1-10; Mr. 16:1-8; Jn. 20:1-10)

<sup>1</sup> Ta tá sa nayaha quivi ndiquehe ndée ná ta naha chá quivi domingo já naquee tucu najihí cán cuahan nā nuú nāchicaan nā yiquí cuñu Jesús ini cáva cán. Já ñéhe na perfume, dó nācaja tiaha na cán. Ta ndáca táhan java ga najihí xihín ná cuahan nā. <sup>2</sup> Ta tá naxinu coo na cán já naxini na ña coo ga yuu ndájí ndaa yuhú cáva nuú nasandacaan yiquí cuñu Jesús. <sup>3</sup> Anda já naquihvi na ini cáva cán joo coo ga

yiquí cuñu Jesús nanditahan na. <sup>4</sup> Ta chí nayihví na ta co xini na ndia caja na. Ta jonáa va naxini na ndita ivi dataa yati jin ná. Ta a juú quiahva ndató yéhe jáhma ndíxi da cán. <sup>5</sup> Ta chí a juú quiahva yihví najihí já nacandayi na janda quiahva naxinu jini ná nu ñúhu. Anda já nacachi dataa cán já xihin ná:

—Co nditahan toho ndin-ducú ndo in da tácu tañu nu sánduu ndii. <sup>6</sup> Coó toho Jesús in yóho jáchi sa nanditacu va. Xini ñúhú ndicuhun ini ndó ña nacachi a xihin ndo tá nasahin a estado Galilea. <sup>7</sup> Mé á cúú á da nachindahá Ndióxi nduu ñayivi ta sa nacachi a xihin ndo ña ndiquiahva na mé á ndahá ñayivi quini. Ta nacachi a xihin ndó ña cata caa na a ndica cruxu ta tá ná xinu uní quivi já nditacu tucu a —nacachi dataa cán.

<sup>8</sup> Anda já nandicuhun ini najihí cán ña nacachi Jesús xihin ná. <sup>9</sup> Chí naqee na cuahan na já nandicani ndihi na sahá ña yóho nuú na uxu in naxica tuun xihin Jesús xihin nuú java ga na ndúu cán viti. <sup>10</sup> Mé najihí cán, na nasahan cáxi tuhun ña yóho nuú na apóstol cán nasacuu María, ña ñuu Magdala xihin Juana xihin María, ña cúú náná Jacobo xihin java ga najihí. <sup>11</sup> Joo na apóstol, na naxica tuun xihin Jesús cán nacahan na ña cuénto uun va queá. Sahá ña cán queá coó naxeen na candúsa na ña nacachi najihí cán xihin ná.

<sup>12</sup> Joo ndaja coo naqueta Pedro xinu da cuahan da sándehé da ini cava nuú nachicaan na yiquí cuñu Jesús cán. Naxini da jáhma vaha ña nasativí a cán joo coó toho yiquí cuñu a. Ta chí nacatontó da naqee da cuanúhu dá vehe da.

*Cátahan Jesús cuahan xihin ivi na cuahan chí ñuu Emaús (Mr. 16:12-13)*

<sup>13</sup> Ta mé quivi já ivi táhan na cúú cuéntá Jesús naqee na cuahan na in ñuu nani Emaús. Mé ñuu cán ñéhe táhan táyhun uxu in kilometro xihin ñuu Jerusalén. <sup>14</sup> Ta ndítuhún na cán cásahan na saha tóco ndihi ña nacuu ñuu Jerusalén cán. <sup>15</sup> Ta nani ndítuhún na cásahan na já nacayati Jesús nu ná já nacasahá xica mé á xihin ná cuahan na. <sup>16</sup> Ta vatí sándehé na cán nu Jesús joo coó nacuu ndicuni na mé á. <sup>17</sup> Anda já nandaca tuhún Jesús na cán já nacachi a já:

—Ndía ndítuhún ndó cásahan ndo. Ta ndavaha cácuéha ini ndó cásahan ndo —nacachi a xihin ná.

<sup>18</sup> Já in táhan na cán, da nani Cleofas nanducú ñehe da tuhun nu á já nacachi da já:

—Níí cúú va nandicujta nuu tuhun sahá ña nacuu ñuu Jerusalén tañu quivi yóho. In túhún yóhó tañu na ndúu cán cúú da co xini ña nayaha —nacachi da.

<sup>19</sup> Anda já nacachi Jesús já xihin ná:

—Ndía nacuu, vaha.

Já ñacachi na cán já xihín á:  
 —Ñaquixi in da naní Jesús chí ñuu Nazaret ta nasacuu da in profeta cáhnu ndivaha jáchi cuahá ndivaha ña náhnu ñacahan da. Ta cuahá ndivaha ña náhnu ñacaja da nu Ndióxi xihín nuú ñayivi.  
<sup>20</sup> Joo na sacuahá nuú jutú xihín na jutixia ñuu nde ñatiin na mé Jesús ta já ñandiquiahva na da ña ná cahní na da ta já ñacata caa na da ndica crúxu.  
<sup>21</sup> Joo mé nde ñacahán nde ña mé Jesús cán cacuu da da ndáti nde chindeé da ndehe, na Israel yóho já ná a cája xíxi ga na ñuu Roma xihín nde, ñacahán nde. Joo ñandihi va viti jáchi sa nayaha uní quívi ñaxihí da cán.  
<sup>22</sup> Vatí ñaquetá java najihí tañu nde yóho najáyhí na ndehe jáchi naha chá ñasahan na nuú ñanduxu Jesús cán.  
<sup>23</sup> Ta cáchi na ña coo ga yiquí cuñu Jesús ndácaan cán. Sahá ña cán quéa ñaxinu na nuú ñasanduu nde ta ñandicani na nuú nde ña ñacanáha java tátó Ndióxi nu ná ta ñacachi na ña tácu va Jesús.  
<sup>24</sup> Ta java táhan da xíca tuun xihín nde cán ñasahan da sándehe da ini cáva cán ta chí já ndusa cáa tá quiahva cáchi najihí. Ta co mé Jesús ñaxini na —ñacachi na cán xihín Jesús.

<sup>25</sup> Anda já ñacachi Jesús já xihín na cán:

—Ñayivi tóntó ndivaha cúu ndó. Jáchi yáncá ndivaha já xínu ini ndó candúsa ndó ña ndaa ña ñacahan na profeta sanahá.  
<sup>26</sup> Á co cándaq ini ndó

ña jihna ñúhú ñanditahan nuú da cúu Cristo ndoho ini da ta tá sa ñandihi já ndiñehe jíco Ndióxi da já ndacojo da chuun cacomí da cuéntá sahá ñayivi —ñacachi Jesús.

<sup>27</sup> Anda já ñacasahá ndícani a nu ná ña ñacahyi nuú tuhun Ndióxi nu cáhan saha tóco ndihi ña ndítahan ndoho da cúu Cristo. Ñacasahá ndícani a janda libro ñacahyi Moisés sanahá janda quiahva ñaxinu a nu tóco ndihi libro ña ñacahyi na profeta sanahá.

<sup>28</sup> Ta tá ñaxinu coo na ñuu nuú cuahan na cán já ñacaja Jesús tátuhun yáha saa cuahan.  
<sup>29</sup> Joo mé na cán ñacaja ndúsa ná xihín á ña ná coo tóo a xihín ná. Já ñacachi na já xihín á:

—Yóho candoo ndó coo tóo ndó jáchi sa ñahini cuí va ta ja chá cuaá —ñacachi na xihín á.

Anda já ñaquihvi Jesús ini vehe ña candoo a xihín ná.  
<sup>30</sup> Ta tá ñasacoo a nu mesa xihín ná já ñatiin a in pan já ñandiquiahva ndixahvi nu Ndióxi sahá. Ta ñasahnda java ña já ñasahan ña nu ná.  
<sup>31</sup> Ta chí ivi laá ñanuna xini túni ná ta já ñandicuni na mé á ña cúu á Jesús. Joo ivi laá najándiñúhú a mé á nu ná.  
<sup>32</sup> Anda já ñacachi xihín táhan na já:

—Íchi quéa cáji ndivaha ini tá ñandicani Jesús tuhun Ndióxi nu yo tá vaxí íchi xihín á —ñacachi xihín táhan na cán.

33 Ch́i ivi laá naquehe tucu na ích\_i ñ\_a ndicó cõo tucu na ñ\_uu Jerusalén. Tá na\_xinu na cán nandiñeh\_e ná ñ\_a ndítútú ndíhuxu in táhan na na\_xica tuun xihín Jesús cán ndúu na xihín java g\_a na ndúu cán.

34 And\_a já na\_cachi na cán xihín ndív\_i na yóho:

—Mé a ndaa táhyi nanditacu tucu Jesús, xitoho í. Ta na\_xini Simón mé á — na\_cachi na.

35 And\_a já na\_casáhá ndív\_i na cán ndícani na ñ\_a na\_sandaca táhan na xihín Jesús na\_sahan na. Tá nandicani na ñ\_a nandicuni na mé á nani na\_sahnda java mé á pan ñ\_a cuxu na.

*Naha Jesús mé á nuú na na\_xica tuun xihín á*

(Mt. 28:16-20; Mr. 16:14-18; Jn. 20:19-23)

36 Ta nani ndítúhún yii ná ndúu na já na\_xinu cõo Jesús nandaca ndichi a mahñu na cán já na\_cahan Ndióxi á xihín ná já na\_cachi a já:

—Ná caja Ndióxi ñ\_a ná coo vaha ini ndó.

37 Joo nayihví na cán ta na\_cahan na ñ\_a cúu á in ínima ndii va. 38 Joo já na\_cachi Jesús já:

—Ndá cuéntá que\_a yíhví ndõ. Tá ndá cuéntá que\_a cõo cándusa ndó ñ\_a cúu yehe Jesús. 39 Candehé ndó ndahá i ta candehé ndó sahá i. Sa mé yehe cúu v\_i. Cani ndaa ndáh\_a ndó yehe ta candehé vaha ndó yehe. Jáchi in ínima ndii cõo toho yiquí cuñu a tá quiahva sándehe ndó ñ\_a ín

yiquí cuñu yehe —na\_cachi Jesús xihín ná.

40 Ta nani cáhan Jesús xihín ná já na\_casáhá náha ndáh\_a á xihín sahá nu ná. 41 Joo cámaní yii cándusa na cán ñ\_a cúu mé á Jesús jáchi na\_catóntó na ta cájii ndivaha ini na ñ\_a cán que\_a na\_cachi tucu Jesús já xihín ná:

—Ndá ñaha ín nu ndó ná cuxu u —na\_cachi Jesús xihín ná.

42 And\_a já na\_sahan na in túhun tiyacá nayata nu á xihín in ñimá ñuñu nu á. 43 Já nañiin a ñ\_a ndáh\_a ná já na\_xixi a ñ\_a nani sándehe na a. 44 Tá nandihí já na\_cachi a já xihín ná:

—Sa nayaha tá ín na\_cachi i xihín ndó jihna. Sa na\_xinu cõo tá ín na\_cahyí Moisés xihín na profeta sanahá sahá ñ\_a ndítahan ndoho i. Ta jári David tá na\_cahyí da libro Salmos já na\_cahan ri da cán va sahá ñ\_a ndoho i —na\_cachi a xihín ná.

45 And\_a já na\_caja Jesús ñ\_a ná ndinuna xíní túní ná já ná candaa ini na ñ\_a cúni cachi túhun Ndióxi cán. 46 Ta na\_cachi a já xihín ná:

—Janda sanahá na\_cahyí ñ\_a ndítahan quivi yehe, da cúu Cristo, da nachindahá Ndióxi cacomí cuéntá sahá ñayivi. Joo na\_cahyí ri ñ\_a ndítahan nditacu tucu u quiví uní.

47 Ñ\_a cán que\_a ndítahan nuú ñayivi caca nuu na cahan na túhun vaha sahá i níi cúu ñuyiví já ná ndicó cõo ini ñayivi ta jándacoo na cuachi cája na. And\_a já caja cáhnu

ini Ndióxi sahá ndihi cuachi na. Ta janda ñuu Jerusalén xini ñuhú ñayivi casahá na cahan na tuhun vaha sahá i ta já cahun na janda ndijá ñuyivi. <sup>48</sup> Ta ndóhó cúu na naxini ndaja cáa ña nandoho i ña cán quea ndítahan nu ndó cahun ndó caxi tuhun ndó tóco ndihi ña yóho nuú ñayivi. <sup>49</sup> Cuni johó vaha ndó jáchi chindahá i ínima yii Ndióxi já ná cañuhu a ini in in ndó. Jáchi quiahva já nacachi Ndióxi, tátá i tá nasahan tuhun a nu ndo. Joo ndítahan canduu ndihi ndó ñuu Jerusalén yóho janda quiahva ná ndicutú ndaa ínima ndo xihin ndée Ndióxi ña quixi indivi —nacachi Jesús xihin ná.

*Tá nandaa Jesús cuahan indivi*

*(Mr. 16:19-20)*

<sup>50</sup> Anda já ndáca Jesús na cán nasahan na xihin á yuhú ñuu Betania. Ta nandiñehe a ndáha á já nacaja yii á na. <sup>51</sup> Ta tá cája yii á na já natavá xóo a mé á já nandaa cuahan indivi. <sup>52</sup> Tá ndihi nacaja cáhnu na cán Jesús já cávatá ndivaha na nandicó coo na ñuu Jerusalén. <sup>53</sup> Ta ní tiempo nasanduu tuun na veñuhu cáhnu cája cáhnu na Ndióxi. Já ná coo.

## Tuhun vaha naca<sup>h</sup>yí Juan sahá ña naca<sup>j</sup>a Jesucristo

*Jesucristo cúú á tuhun  
Ndióxi ta nanduu a ñayivi*

<sup>1</sup> Tá naca<sup>v</sup>a sáhá sa<sup>h</sup>a ñuyívi sa ín va mé á naní tuhun Ndióxi. Nasah<sup>i</sup>in mé á xih<sup>i</sup>n Ndióxi ta in cúú mé á xih<sup>i</sup>n Ndióxi. <sup>2</sup> Ta janda mé sa<sup>h</sup>a sa ín va xih<sup>i</sup>n Ndióxi. <sup>3</sup> Ta mé a cán cúú á Jesucristo ta naca<sup>j</sup>a Ndióxi ña naca<sup>v</sup>aha mé á tóco ndihi ñaha. Ta ni in túhún toho ñaha ín, a cóo tá ná a cávaha mé á ña, nduu. <sup>4</sup> Ta mé á quéa cája ña ná catacu tóco ndihi ñaha ta mé á jándiyéhe a ínima ñayivi já ná ndicuni na yo cúú mé á. <sup>5</sup> Mé Jesucristo cúú á tátuhun in ñúhú cáyi ña jándiyéhe a xoo naá ta a cúú ndahva ña.

<sup>6</sup> Ta ndaja coo nachindahá Ndióxi in dataa naní Juan. <sup>7</sup> Naquixi da caxi tuhun da xih<sup>i</sup>n ñayivi ña cúú Jesucristo ña jándiyéhe ínima ñayivi, na ndúu nuú naá já ná cuu candúsa na mé á sa<sup>h</sup>á ña naca<sup>h</sup>an da. <sup>8</sup> Mé Juan yóho co cúú dá mé á jándiyéhe ínima ñayivi. Naquixi cuití da caxi tuhun da xih<sup>i</sup>n ñayivi ña mé Jesucristo quéa jándiyéhe ínima ñayivi. <sup>9</sup> Mé Jesucristo naxinu a ñuyívi yóho ta cúú ndusa mé a ña jándiyéhe ínima tóco ndihi ñayivi.

<sup>10</sup> Naquixi mé a naní tuhun Ndióxi ta nasah<sup>i</sup>in a ñuyívi yóho. Ta xih<sup>i</sup>n ña naca<sup>j</sup>a Jesucristo naca<sup>v</sup>aha Ndióxi ñuyívi. Joo ñayivi ndúu ñuyívi yóho coó naxeen na candaa ini na yo cúú mé á. <sup>11</sup> Naquixi Jesucristo ñuyívi ña naca<sup>v</sup>aha mé á joo na ñuu mé á coó naxeen toho na ndiquehe vaha na mé á. <sup>12</sup> Joo ndá na ná ndiquehe vaha mé á ta candeé ini na mé á já quéa sahan mé á ñamani nu ná ña ná nduu na na cúú cuéntá Ndióxi. <sup>13</sup> Ta na cán cúú na nanduu jahyi mé á. Ta co cúú á sa<sup>h</sup>á ña naca<sup>c</sup>u na ñuyívi yóho ta ni co cúú á sa<sup>h</sup>á ña cuni in ta cacu in jahyi da. Nanduu na jahyi mé á jáchi já nasacu ini mé á coo.

<sup>14</sup> Mé Jesucristo, mé a naní tuhun Ndióxi cán nanduu a in ta ta naquixi a nasah<sup>i</sup>in a tañu nde. Ta tóco ndihi ña nasacaja mé á nasacuu a ña ndaa. Ta a juú quiahva quihvi ini a ñayivi. Ta naxini nde ndá quiahva cáhnu cúú mé á jáchi sa<sup>h</sup>á ña cúú mé á in túhún jini já jahyi Ndióxi sa<sup>h</sup>á ña cán quéa naca<sup>j</sup>a Ndióxi ña ná ndicáhnu ndivaha mé á. <sup>15</sup> Tá nandicani mé Juan sa<sup>h</sup>á Jesús nuú ñayivi já naca<sup>h</sup>i da já sa<sup>h</sup>a mé á:

—Mé a yóho cúú á ña naca<sup>h</sup>an i sa<sup>h</sup>á nu ndo tá naca<sup>h</sup>i i xih<sup>i</sup>n ndo ña vaxi inga a jatá yehe. Ta naca<sup>h</sup>i i xih<sup>i</sup>n ndo ña ín chága sa<sup>h</sup>a mé a cán a juú ga yehe jáchi janda tá camaní yi cacu u sa ín va mé á —naca<sup>h</sup>i Juan.

<sup>16</sup> Ta sa<sup>h</sup>á ña ín ndivaha

ñamanj̄ n̄u mé á sahá ña c̄an qūea a juú quiahva ñehe táhvi tóco ndihí n̄u mé á. <sup>17</sup> Nacahyí Moisés ley Ndióxi sanahá. Joo Jesucristo, mé á cúu á ña ndaa naquixi a ñuyívi yóho sahá ña quihvi ndivaha ini a mí. <sup>18</sup> Ta ni in tühún toho ñayivi coo naxini na Ndióxi. In tühún Jesucristo, mé á cúu in tühún jin̄i já jahyi Ndióxi, mé a c̄an qūea xini ndá quiahva ín Ndióxi jáchi in cúu á xih̄in á ta mé a qūea nanaha ña yóho n̄u yo.

*Ndicani Juan nuú ñayivi yo cúu Jesús*

(Mt. 3:11-12; Mr. 1:7-8; Lc. 3:15-17)

<sup>19</sup> Ta ndaja coo java na sacuah̄a nuú na Israel, na ndúu ñuu Jerusalén c̄an nachindahá na java jut̄u xih̄in java na naquixi ch̄ichi Leví n̄u ín Juan ña ná ndaca tühún na da á cúu dá da nasahan Ndióxi tühun a chindahá a ñuyívi. <sup>20</sup> Ta cáxi táhyi nacahan Juan xih̄in ná ña co cúu dá da c̄an ta já nacachi da já:

—A juú toho yehe cúu da nacachi Ndióxi chindahá a cacomí cuéntá sahá ñayivi — nacachi Juan.

<sup>21</sup> Anda já nandaca tühún tucu na da já nacachi na já xih̄in dá:

—Yo já cúu yóhó, dá já. Á a juú yóhó cúu profeta Elías — nacachi na.

—A juú toho yehe cúu profeta Elías — nacachi Juan.

Anda já nacachi tucu na já xih̄in dá:

—Á a juú toho yóhó cúu profeta da nacachi Ndióxi chindahá a, dá já — nacachi na.

Joo nanducú ñehe Juan tühun n̄u ná já nacachi da já xih̄in ná:

—Ni in tühún toho da cáchi ndó jan co cúu yehe.

<sup>22</sup> Anda já nacachi tucu na já xih̄in dá:

—Ndítahan ndicani lohún nuú nde yo cúu yóhó. Jáchi java na nachindahá na ndehe ña ná quixi nde ndaca tühún nde yóhó. Ta tá co cúnun caxi tühún xih̄in nde yo cúu yóhó, ndá cūhun nde quehe nde tühun nducú ñehe nde nuú na nachindahá ndehe c̄an — nacachi na.

<sup>23</sup> Anda já nacachi Juan já xih̄in ná:

—Yehe cúu da xica nuu tañu yucú íchi ta cáyuhú cóhó i já cáchi i já xih̄in ñayivi: “Cuná ndó in íchi ndacú nu mé á ña ná ndihvi a ínima ndo” — nacachi Juan xih̄in ná tá quiahva nacahyí profeta Isaías sanahá.

<sup>24</sup> Ta na nandaca tühún Juan c̄an nasahan na jáchi já natahnda chuun nacaja na fariseo, mé na sáhdá chuun ñuu Jerusalén c̄an. <sup>25</sup> Já nacachi tucu na já xih̄in Juan:

—Ndá cuéntá qūea cája ndúta yóhó ñayivi tá ta co cúun Cristo, da nachindahá Ndióxi cacomí cuéntá sahá ñayivi. Ta ndá cuéntá qūea jácandútun ñayivi tá ta ni co cúun Elías ta ni co cúun mé profeta, da nacachi Ndióxi chindahá a — nacachi na c̄an.

26 Anda já naçachi Juan já xihin ná:

—Yehe cája ndutá i ñayivi xihín ticuúí joo tañu mé ndó íin in da co xíní ndo. 27 Ta vaxi in da jatá yehe ta íin cuaha chága saha dá a juú ga yehe. Ta chí ni coó sahá i ndaxí i correa ndusa dá —naçachi Juan xihín na naşahan ndáca tuhún ñahá cán.

28 Tóco ndihi ña yóho nayaha chí ñuu Betábara ña ndácaan inga xoo yuta Jordán nuú naçaja ndutá Juan ñayivi.

*Jesús cúú á tátuhun in ndicachi rí jóco na nu Ndióxi*

29 Ta inga quíví itaan já naxini Juan cáyati Jesús vaxi a nu íin da. Já naçachi Juan já xihín ñayivi ndúu cán:

—Candehé ndo. Da vaxi jan cúú dá tátuhun ndicachi jóco na nu Ndióxi. Ta da jan cúú da jándoo cuachi ñayivi ndúu ñuyíví. 30 Da jan cúú da cáchí i saha ña vaxi in da jatá yehe ta íin cuaha chága saha dá a juú ga yehe. Já chí janda tá camaní cacu yehe sa íin va mé da jan. 31 Ta ni mí i coó naxini i ndá quiahva cáa da joo naçasáhá i jácandutá i ñayivi xihín ticuúí já ná canda ini na Israel yo cúú mé dá —naçachi Juan.

32 Ta nandicani da ña naxini da já naçachi da já:

—Sa xíní xihín nuu mí i ndá quiahva nanuu ínima yíi Ndióxi jatá Jesús. Mé ínima yíi Ndióxi cán nanuu a indiví ta cáa tá quiahva cáa in ndijata. 33 Mé a nda coó naxini toho yehe yo cúú mé

da yóho, nduu. Joo Ndióxi, mé a naçindahá yehe jácandutá i ñayivi xihín ticuúí, mé a cán quéa naçachi já xihín i: “Ndá da ná cunún ná nuu ínima yíi mí i ta sacoo a jata dá, da cán cúú da jándicutú ini ñayivi xihín ínima yíi mí i”, naçachi Ndióxi xihín i. 34 Ta viti mé a nda sa xíní ví yo cúú mé á ta cáxi tuhun i xihín ndo ña mé á cúú á in tuhún jiní já jahyi Ndióxi —naçachi Juan.

*Tá naçasáhá java ñayivi ndíco na Jesús xíca na xihín á*

35 Ta inga quíví itaan naşahin tucu Juan cán xihín iví na xíca xihín dá. 36 Já naxini da ña yáha Jesús cuahan já naçachi Juan já xihín na xíca xihín dá cán:

—Candehé ndo. Da jan cúú tátuhun ndicachi, rí jóco na nu Ndióxi —naçachi Juan.

37 Tá naxini joho da ndíta xihín da cán ña yóho já ndíco da jatá Jesús cuahan da. 38 Tá naxini Jesús ña ndíco da cán jatá já nandicoto nihni a nu dá já naçachi a xihín ndiví da cán já:

—Ndía cúni ndo —naçachi a.

Já naçachi da cán já xihín á:  
—Maestro, ndájá íin vehe ndó já —naçachi da.

39 Anda já nanducú ñehe Jesús tuhun nu dá já naçachi a já:

—Cóho ná cuni ndó, dá já —naçachi a.

Já ndáca táhan da naşahan da xihín á sándehe da nu íin a. Ta naşacuu a tátuhun caa comí sahini já naşanduu da xihín á.



<sup>40</sup> In táhan da naxini joho ña naxachi Juan ta ndico da jata Jesús cán naní da Andrés, da cúu ñani Simón, da cáhan na Pedro xihin cán. <sup>41</sup> Mé Andrés yóho ndáva da nasahan da ndínducú da ñani da, da naní Simón cán. Ta tá nandínehe ñahá da já naxachi da já xihin dá:

—Nanditahan nde da naxindahá Ndióxi cacomí cuéntá sahá ñayivi, mé a cúu Cristo —naxachi da.

<sup>42</sup> Tá nandíhi já ndáca Andrés cán ñani da nasahan da nu Jesús. Ta tá naxini Jesús da já naxachi a já xihin dá:

—Yóhó cúun Simón, jahyi Jonás. Joo yehe chinúu i quivun cananún Cefas viti —naxachi Jesús.

Quivi Cefas yóho in cúu va xihin Pedro ta cúni cachi a in tóto.

*Cána Jesús Felipe xihin Natanael ña ná caca tuun da xihin á*

<sup>43</sup> Ta inga quivi itaan já naquee Jesús cuahan chí estado Galilea. Ta cán nanditahan mé á da naní Felipe já naxachi a já xihin dá:

—Naha quí caca tuún xihin i —naxachi a xihin dá.

<sup>44</sup> Mé Felipe yóho cúu dá da ñuu Betsaida ta mé ñuu cán cúu ri ñuu Andrés xihin Pedro. <sup>45</sup> Ta ndaja coo Felipe yóho ndáva da nasahan da nandínducú da Natanael ta tá nandínehe ñahá da já naxachi da já xihin dá:

—Nanditahan nde da naxahí Moisés saha nu ley sanahá. Ta jári na profeta

naxahí ri na saha dá. Ta mé dá cúu Jesús, jahyi José, da ñuu Nazaret —naxachi Felipe xihin Natanael cán.

<sup>46</sup> Anda já naxachi Natanael já:

—Ndá quehe ri ñaha vaha quixi chí ñuu Nazaret jan —naxachi da.

Anda já naxachi Felipe já xihin dá:

—Cóho candehún —naxachi da.

Anda já naquee da cuahan da nu íin Jesús.

<sup>47</sup> Ta tá naxini Jesús naxayati Natanael nu á já naxachi a já:

—Da yóho cúu ndusa in da naquixi chíchi Israel ta cúu dá taa cája ña ndaa cuití va —naxachi Jesús.

<sup>48</sup> Tá naxini joho Natanael ña yóho já nandaca tuhún da Jesús já naxachi da já xihin á:

—Á xini ndó yehe, vaha.

Anda já naxachi Jesús já xihin dá:

—Janda tá camaní quee Felipe cuhun da cana da yohó já naxini i íin cóun saha titó ñuhú —naxachi Jesús xihin Natanael.

<sup>49</sup> Anda já nacasahá cáchi da já xihin Jesús:

—Maestro, jivi ndusa cúu ndó in tuhún jini já jahyi Ndióxi ta cúu ndó ña cómi cuéntá sahá ñayivi Israel —naxachi da xihin Jesús.

<sup>50</sup> Anda já nanducú ñehe Jesús tuhun nu dá já naxachi a já:

—Nacandúsun yehe saha ña naxachi i xuhun ña naxini i íin cóun saha titó ñuhú.

Joo náhnu chága ñaha cunún xihín nduchú núún caja i — ñacachi Jesús xihín dá.

<sup>51</sup> Anda já ñacachi tucu Jesús já:

—Mé a ndaa ná cahan i xihín ndo ña cuni ndó xihín nuu ndó ña nuná indiví. Ta cuni ndó tátō Ndióxi ndaa na ta nuu na xinu na nu ín yehe, da ñachindahá Ndióxi nduu ñayivi —ñacachi Jesús.

## 2

*Tá ñasahan Jesús in vicó tándaha*

<sup>1</sup> Tá nayaha uní quivi já ñasahin in vicó tándaha ñuu Caná ña ndácaan estado Galilea cán. Ta ñasahan María, náná Jesús mé víco cán. <sup>2</sup> Ta jári ñacana na Jesús xihín na xíca tuun xihín á ta chí ñasahan ndihi na mé víco cán. <sup>3</sup> Joo ndaja coo nani cúú víco cán ñandihí va vino xíhi na. Ta tá ñaxini náná Jesús ña yóho já ñacachi ñá já xihín Jesús:

—Sa ñandihí va vino xíhi na —ñacachi ñá xihín á.

<sup>4</sup> Já ñacachi Jesús já xihín ñá:

—Co xíní ñúhú toho cahan ndó já xihín i jáchi cámaní yíi va ndindaa hora caja i ñaha xitúhún —ñacachi Jesús xihín ña.

<sup>5</sup> Tá ñandihí já ñacachi náná Jesús já xihín na jácaca vino cán:

—Ndá ñaha ná cahnda Jesús nu ndó caja ndó, caja ndó ña —ñacachi ñá xihín ná.

<sup>6</sup> Tá mé vehe nu cúú víco cán ñasahin iñu yoo náhnu ña ñacavaha na xihín yuu.

Mé yoo cán ñasacuu a nu táán na Israel cán ticuí, dó ndája víi na mé ná tá quiahva sáhndá ley nu ná caja na. Ta tátuhun comí jícó á in ciento litro ticuí quéta ini in in yoo náhnu cán. <sup>7</sup> Tá ñandihí já ñacachi Jesús já xihín na jácaca vino cán:

—Jácutú ndihí ndó yoo náhnu jan xihín ticuí.

Ta chí najácutú jíní ndaa na yoo náhnu cán xihín ticuí. <sup>8</sup> Tá ñandihí já ñacachi tucu Jesús já xihín ná:

—Ta víti tavá loho ndó do ta quiahva ndó do ná coto ndojó da cómí chuun saha víco yóho —ñacachi Jesús.

Já ñéhe na do ñasahan na nuu da cómí chuun saha víco cán. <sup>9</sup> Joo sa ñacaja Jesús ña ná nduu ticuí cán vino. Ta ñaxito ndojó da do joo co xíni da ndájá ñaquixi dó. In túhún na xíni cúú na ñaxini ña ñandaja Jesús cán ticuí ña ná nduu dó vino. Tá ñaxito ndojó mé da cómí chuun yóho do já ñacatóntó da ta ñacana da mé da tándaha cán. <sup>10</sup> Já ñacachi da já xihín dá:

—Ndijáá ñayivi tá cája na in víco já sahan na vino vaha nu cuítí nuú na táhan cán. Ta tá sa ñaxihí cuahá na já sahan na dó núu cán. Joo yóho ñasacu vahún vino vaha ta ja víti sáhún do nuú na táca víco —ñacachi da.

<sup>11</sup> Ña xitúhún yóho ñacaja Jesús ñuu Caná cuénta estado Galilea ñasacuu a ña xitúhún nu cuítí ñacaja Jesús já ná cuni ñayivi ndá quiahva cáhnu cúú mé á. Ta xihín ña

yóho ñacandeeé ini na xíca tuun xihín a cán mé á.

<sup>12</sup> Tá sa ñayahá ña yóho já ñaquee a cuahan xihín na xíca tuun xihín á chí ñuu Capernaum. Ta ndáca táhan náná a xihín ñani a ndíco ña cuahan ña xihín á. Ta ñasanduu na ñuu Capernaum cán chá quivi cuití va.

*Tává Jesús na ndúu jícó veñuhu cáhnu ñuu Jerusalén*

(Mt. 21:12-13; Mr. 11:15-18; Lc. 19:45-46)

<sup>13</sup> Tá ñacayati quivi caja na Israel vicó pascua já ñaquee Jesús ñasahan chí ñuu Jerusalén. <sup>14</sup> Ta tá ñaxinu coo a veñuhu cáhnu ndácaan Jerusalén cán já ñaxini a ña jandá johó ndúu ña jícó. Java na jícó tindiqui xihín ndicachi xihín ndijata viti ta java na ndúu coo ndijama jjuhún. <sup>15</sup> Ta chí ñatiin Jesús yóho ta ñacavaha in churrú xihín á já ñacasáhá táxí ndihi a ña ndúu jícó cán. Ta janda tindiqui xihín ndicachi jana ná ñatavá a rí quee rí cuhun rí. Ta já ñaxinu coo a nu ndúu ña ndijama jjuhún cán já ñaxicó ñehe a mesa ña já ñacuyu ndihi jjuhún ña nu ñúhu. <sup>16</sup> Ta ñasahnda a chuun nuú ña jícó ndijata cán já ñacachi a já:

—Tavá ndihi ndó ña jícó ndó jan. A cája ndó xihín vehe tátá i ña cúu á nu cáyahvi ñaha —ñacachi Jesús xihín ná.

<sup>17</sup> Tá ñandihí já ñandicuhun ini ña xíca tuun xihín Jesús cán ña cáhí tuhun Ndióxi.

Já cáhí a já: “A juú quiahva xójo ini i sahá ña co cája cáhnu ñayivi vehe Ndióxi”, cáhí tuhun Ndióxi.

<sup>18</sup> Tá ñaxini ña Israel cán ña ñacaja Jesús ña yóho já ñandaca tuhún ña mé á já ñacachi na já xihín á:

—Xíni ñúhú cajún in ñaha xituhún já ná cuni nde ña mé a ndaa iin sahún tasún ña ndúu jícó veñuhu yóho —ñacachi na xihín Jesús.

<sup>19</sup> Anda já ñanducú ñehe Jesús tuhun nu ná já ñacachi a já xihín ná:

—Tá ná jánditani ndó veñuhu yóho ta tixi uní quivi já jácandichi tucu u ña —ñacachi Jesús xihín ná.

<sup>20</sup> Anda já ñacachi ña Israel cán já xihín á:

—Coo cándusa nde ña cáchún jáchi ñacaja chúun na ivi jico iñu cuia já ñaxinu veñuhu jan. Ta yóhó cáchún ña tixi uní víxí quivi jácandichi tucún ña, vaha —ñacachi ña cán xihín Jesús.

<sup>21</sup> Joo co cáhan toho Jesús sahá veñuhu cáhnu cán jáchi cáhan mé á saha yiquí cuñu a. <sup>22</sup> Ña cán quea tá ñaxihí Jesús ta ñanditacu tucu a tixi uní quivi já ñandicuhun ini ña xíca tuun xihín á cán sahá tuhun ñacahan mé á nuú ña Israel yóho. Ta chí ñacandúsa na tuhun Ndióxi ta ñacandúsa na tóco ndihi ña ñacahan Jesús xihín ná.

*Sa xini va Jesús ínima ñayivi*

<sup>23</sup> Cuahá ñayivi ñuu Jerusalén cán ñacandúsa na Jesús nani ñasahin a víco

pascua cán sahá ña náhnu xihín ña xitúhún ñacaja nu ná. <sup>24</sup> Vati ñacachi na cándusa na mé á joo coo ñacandusa toho Jesús na jáchi xini va ha mé á ndá ínimá ñéhe in in na cán. <sup>25</sup> Ta co xini ñúhú toho a ña caxi tuhun na xihín á ndá quiahva in in in ñayivi jáchi sa xini ndihi va mé á ínimá ná.

### 3

*Nditúhún Nicodemo xihín Jesús*

<sup>1</sup> Nasahein in da xica cuénta na fariseo naní Nicodemo ta cúu dá da sacua ha nuú na Israel cán. <sup>2</sup> Ta ñuú ñaqueta da cuahan da coto nihni da Jesús. Ta tá naxinu coo da nu á já ñacachi da já xihín á:

—Maestro, cánda a cáxi ini nde ña ñachindahá Ndióxi ndohó vaxi ndó nuú nde ña ná jána ha ndó nuú nde. Jáchi ni in túhún toho ñayivi a cuú caja ña náhnu cája mé ndó tá ta co in Ndióxi xihín ná — ñacachi da xihín Jesús.

<sup>3</sup> Anda já nanducú ñehe Jesús tuhun nu dá já ñacachi a já:

—Mé a ndaa ná cahan i xihín ndo ña ni in túhún ñayivi a cúu cacomí Ndióxi cuénta saha tá ná a ndíco coo tucu na cacu tucu na — ñacachi a.

<sup>4</sup> Anda já nandaca tuhún Nicodemo Jesús já ñacachi da:

—Ndá quiahva cuu cacu tucu na tá sa ñacayatá na. Ama ná ndihvi tucu na tixi náná na já cacu tucu na — ñacachi Nicodemo xihín Jesús.

<sup>5</sup> Anda já ñacachi tucu Jesús já xihín dá:

—Cáhan i ña ndaa xihín ndo. Tá ñacanduta ñayivi xihín ticuú ta tá nandicutú ndaa ínimá ná xihín ínimá yii Ndióxi já cúu á tátuhun cacu tucu na ta anda já cuu cacomí Ndióxi cuénta saha ná. <sup>6</sup> Jáchi ñuyiví yóho cacu jahyi ñayivi ta sa já ñayivi cúu va na. Joo na jándicutú Ndióxi xihín ínimá yii mé á, na cán cúu jahyi mé á. <sup>7</sup> Ta co ndítahan catóntó ndó tá cáchi i xihín ndó ña ndítahan cacu tucu ndihi ñayivi já ná cacomí Ndióxi cuénta saha ná.

<sup>8</sup> Jáchi cúu á tátuhun tá xíco tachí ndá xoo cúni mé á. Vati xini johó í xíco tachí joo co xini yo ndá xoo quíxi a ta co xini yo ndá xoo cuahan. Quiahva já in ínimá yii Ndióxi jáchi vati co xini ñayivi mé á joo xini na ndá quiahva cája mé á tá ñúhu a ini na — ñacachi Jesús xihín Nicodemo.

<sup>9</sup> Tá nandihí já ñacachi Nicodemo já xihín Jesús:

—Coo cánda toho ini i ña cáchi ndo xihín i — ñacachi da.

<sup>10</sup> Anda já ñacachi Jesús já xihín dá:

—Cúu ndó da jána ha nuú ñayivi Israel ta ndítahan canda a ini ndó ña yóho, nduu jáchi cúu ndó maestro cáhnu nu ná. <sup>11</sup> Mé a ndaa ná cahan i xihín ndo. Cáhan nde saha ña cánda a ini nde ta saha ña naxini nde xihín nuú nde joo ndohó co cándusa ndó ña cahan nde xihín ndo. <sup>12</sup> Cáhan i saha ñaha ñuyiví yóho xihín ndo ta co cándusa ndó ña.

Ndaja ga ví caja ndó tá ná cahan i sahá ñaha íin indiví.

<sup>13</sup> Ni in túhún toho ñayivi a ñaha ndaa cuhun chí indiví. In túhún da ndaa indiví cúu da nanuu, da naquixi ñuyíví yóho. Ta da cán cúu yehe, da nachindahá Ndióxi nduu ñayivi. <sup>14</sup> Sanahá ndivaha nacata caa Moisés in coo, rí nacavaha xihín caa nu yito yucú íchí. Quiahva já cata caa ri na yehe, da nachindahá Ndióxi nduu ñayivi ndica crúxu <sup>15</sup> já quéa ná cacu ndaa ínimá ñayivi já ná a cuhun na indayá tá ná candeé ini na yehe. Ta xihín ña yóho catacu na anda ama caa quivi.

*Quíhvi ndivaha ini Ndióxi ñayivi ndúu ñuyíví*

<sup>16</sup> Jáchi saha ña naquihvi ndivaha ini Ndióxi ñayivi ndúu ñuyíví sahá ña cán quéa nachindahá mé á in túhún jini já jahyi a ñuyíví yóho. Já quéa tá ná candeé ini na mé á cuu cacu ndaa ínimá ná já ná catacu na anda ama caa quivi. <sup>17</sup> Coó nachindahá Ndióxi jahyi a ña ná quixi da jándihi da sahá na ndúu ñuyíví yóho. Nachindahá a jahyi a jáchi cúni a jácacu a ñayivi.

<sup>18</sup> Ta ndá na sa candeé ini yehe, ña cúu u jahyi Ndióxi, na cán cúu na cája cáhnu ini Ndióxi saha. Joo na coo naxeen cándúsa ñahá cán, na cán cúu na co cája cáhnu ini Ndióxi saha jáchi coo naxeen na cándúsa na da cúu in túhún jini já jahyi mé á. <sup>19</sup> Ta na coo naxeen cándúsa cán sa nasacu va Ndióxi saha ná cuhun na indayá jáchi na caan

na cája na ña núu. Sahá ña cán quéa naxinu mé á cúu jahyi Ndióxi ñuyíví yóho ta cúni a jándiyéhe a nuú ñayivi. Jáchi cátóo chága na canduu na nuú naá jáchi cája na ña núu. <sup>20</sup> Jáchi tóco ndihi na cája ña núu cándají na ña vaha, ña cúu tátuhun ña yéhe. Ta co cúni na cayati na nuú ña yéhe cán já ná a ndítivi ña núu cája na. <sup>21</sup> Joo na cája ña ndaa, na cán cúu na cáyati chága nuú ña vaha, ña cúu tátuhun ña yéhe já ná ñaha ña mé a ndaa cája na ña cúni Ndióxi — nacachi Jesús.

*Ndicani tucu Juan saha Jesús*

<sup>22</sup> Tá sa nayaha ña yóho já naquee Jesús nasahan chí estado Judea xihín na xica tuun xihin á. Ta cán nasahin a chá tiempo xihin ná jáchi najácandúta ná ñayivi mé cán. <sup>23</sup> Ta jári Juan va najácandúta dá ñayivi chí ñuu naní Enón yati ñuu Salim cán jáchi cán ñuhu cuahá ticui. Ta cuahá ñayivi nasahan na cán candúta ná. <sup>24</sup> Tóco ndihi ña yóho nayaha tá cámaní tiin na Juan chicaan na da vecaa.

<sup>25</sup> In tañu java na xica xihin Juan cán nacasahá na ndítuhún ihvi na xihin java na Israel saha ña yóho: á ndiyahvi chága tá cája ndúta Juan ñayivi á tá cája ndúta na xica tuun xihin Jesús ñayivi. <sup>26</sup> Tá nandihí já ndáva na xica xihin Juan nasahan na cahan na xihin dá já nacachi na já: —Maestro, dataa, da nandituhún xihin ndó inga

xoo yuta Jordán cán, da naçahan mé ndó saha nuú nde cán, viti xíca nuu da jácandúta dá ñayivi ta jandá johó tóco ndihi ñayivi ndíco na da viti —naçachi na cán xihín Juan.

<sup>27</sup> Anda já naçachi Juan já xihín na cán:

—Ni in túhún toho ñaha a cúu caja ñayivi tá co sahan Ndióxi ñamaní nu ná caja na ña. <sup>28</sup> Ta sa naçini johó ndó ña naçaxi tuhun yachi vi xihín ndo ña co cúu yehe da nasahan Ndióxi tuhun a chindahá a cacomí a cuénta sahá ñayivi. Naçindahá Ndióxi yehe já ná cacu tiahva i íchi nuú quixi mé da cán. <sup>29</sup> Candehé ndo. Cúu á tátuhun tá cúu in víco tándaha. Ta da cúu amigo da tándaha cán ndáti da casaa da. Ta cáji ini da tá xini johó da nu cahan vatá da tándaha cán jáchi in ñájíhí da xihín dá. Ta quiahva já cáji ini i jáchi casáhá ñayivi ndíco na jatá Jesús viti. <sup>30</sup> Mé Jesús jan ndicánu johó ga cuhun a. Ta yehe ndítahan nuu ndáha johó i cuhun i —naçachi Juan.

*Jesús quéa naquixi chí indiví*

<sup>31</sup> Mé Jesús naquixi chí indiví ta cánu chága mé á nu ndíhi ñaha. Ta ñayivi naçacu ñuyiví yóho cahan na sahá ñaha ñuyiví cuití va. Joo mé á naquixi chí indiví cán cúu á ña cánu chága nu tóco ndihi ñaha. <sup>32</sup> Ta cahan mé a cán sahá ña naçini xihín nuu a ta cahan sahá ña naçini johó a. Joo ni in na co cuni candúsa

na ña cahan mé á. <sup>33</sup> Joo ndá na cándúsa nu cahan mé á, na cán cúu na cánda cáxi ini na ña cahan Ndióxi ña ndaa. <sup>34</sup> Ndióxi quéa naçindahá mé á ta cahan ndinuhu tuhun Ndióxi jáchi co ndáhvi toho cúu ini Ndióxi jándicutú ndaa mé a cán xihín ínimá yii mé á. <sup>35</sup> Ta Ndióxi, tátá a ña ín indiví quíhvi ndivaha ini a in túhún jini já jahyi a ta nasahan ndée a nuú jahyi a ña ná cuu caja tóco ndihi ñaha. <sup>36</sup> Ta ndá na cándeé ini mé a cúu in túhún jini já jahyi Ndióxi cán, na cán cúu na catacu anda ama cáa quivi. Joo na co cuni candúsa ñahá cán, na cán cúu na a ñehe táhvi toho na catacu na xihín Ndióxi. Ña caja Ndióxi xihín ná quéa chindahá a na cuhun na indayá anda ama cáa quivi.

## 4

*Ndítuhún Jesús xihín in ñañaha cuénta Samaria*

<sup>1</sup> Ta ndaja coo na fariseo naçandaa ini na ña cuaha chága ñayivi ndíco jatá Jesús ta cuaha chága ñayivi jácandúta Jesús a juú ga Juan. <sup>2</sup> Vatí a juú mé Jesús jácandúta ñayivi joo na xíca tuun xihín á cán jácandúta ñahá. <sup>3</sup> Ta tá naçini johó Jesús ña cahan ñayivi sahá já naquee a estado Judea xihín na xíca tuun xihín á cuahan na ndicó coo na chí estado Galilea.

<sup>4</sup> Ta nuú cuhun a Galilea cán ndúsa yaha ndaa estado Samaria já xinu a nuú cuhun a cán. <sup>5</sup> Ta naçinu a in

ñuu loho naní Sicar cuéntá mé Samaria cán yati nuú ñundáhyi ña najándicoo tahvi Jacob nu José, jahyi da. <sup>6</sup> Ta cán nasahiin in chichoho ña naní chichoho Jacob. Ta cúu á tátuhun caxivi tá naxinu coo Jesús ñuu Sicar cán. Ta chí a váha ga nacanaá a sahá ña cán quea nasacoo a yati yuhú chichoho cán. <sup>7</sup> Ta nani ín coo a cán já naxinu in ñañaña cuéntá Samaria tavá ña ticuií ini chichoho cán. Já nacachi Jesús já xihin ñá:

—Quiahva loho ticuií ná coho i —nacachi a xihin ñá. <sup>8</sup> Jáchi sa cuahan na xica tuun xihin á ñuu cueen na ñaha cuxu na.

<sup>9</sup> Anda já nacatóntó ña jáchi co xini táhan vaha na Israel xihin na Samaria. Ta nacachi ñá já xihin Jesús já:

—Ndá cuéntá quea xica yóhó, da Israel, ticuií nuú i cohún ta ñá Samaria va cúu yehe —nacachi ñá cán xihin Jesús.

<sup>10</sup> Já nacachi a já xihin ñá:

—Tá ná candaá inún yo cúu yehe, da xica ticuií nuun ta tá ná candaá inún ndá quiahva in ña cúnj Ndióxi quiahva nuun já cacún ña nuú i. Jáchi yehe cuu caja i ña ná catacún anda ama cáa quivi ta ña yóho cuu a tátuhun ticuií, do a cúu ndihi saha —nacachi Jesús.

<sup>11</sup> Anda já nacachi ñá cán já xihin á:

—Candehé ndo. Ni yáxi co ñehe ndó tavá ndó ticuií ini chichoho yóho ta chichoho cúná ndivaha cúu ña yóho. Ndá cuu caja ri ndó quiahva ndó ticuií cáchi ndo jan nuú

i. <sup>12</sup> Tásáhnú jícó nde, da naní Jacob cán najándicoo chichoho yóho nuú nde. Ta nuú chichoho yóho naxihi da cán ticuií ta sa mé chichoho yóho naxihi ri jahyi da cán ta yóho naxihi ri quiti jana dá. Ama ná cuu quiahva mé ndó ticuií vaha chága a juú ga dó najándicoo Jacob nuú nde —nacachi ñá cán xihin Jesús.

<sup>13</sup> Anda já nanducú ñehe Jesús tuhun nu ñá já nacachi a já:

—Ndá ñayivi nacuu va xihí ticuií chichoho yóho já quea ichi tá ichi ini na. <sup>14</sup> Joo ndá na ná coho ticuií táhan dó sahan yehe, na cán cúu na a ndíco coo ga na ichi ini na anda ama cáa quivi. Jáchi cúu á tátuhun sa mé ini mé va na cana ticuií, dó a ndíhi saha ta catacu na anda ama cáa quivi —nacachi Jesús xihin ñá.

<sup>15</sup> Anda já nacachi ñá cán já xihin Jesús:

—Quiahva mé ndó ticuií, dó co ndíhi saha jan nuú i ña ná a ichi ga ini i ticuií já ná a quixi ga i yóho tavá i dó coho i —nacachi ñá xihin á.

<sup>16</sup> Anda já nacachi Jesús já xihin ña:

—Cuáhán cana yíun ná quixi da yóho xuhun.

<sup>17</sup> Anda já nanducú ñehe ñá cán tuhun nu á já nacachi ñá já:

—Coó toho yíi i.

Anda já nacachi Jesús já xihin ñá:

—Mé a ndaa coó toho yíun.

<sup>18</sup> Joo nasahiin uhun yíun ta da in xuhun viti jan co cúu

toho da yíun. Ndaa ndusa cáhūn —naçachi Jesús.

19 Já naçachi ñá já xihūn á:

—Jivi ndusa in profeta cúu mé ndó. 20 Tásáhnū jícó nde, na Samaria yóho naçaja cáhnu na Ndióxi yati jinī yúcu jan. Joo ndóhó, na Israel cáchí ndo ña ndúsa ndítahan nuú nde cūhūn nde ñuu Jerusalén caja cáhnu nde Ndióxi. Ta mé ndó ndaja cachi ndó —naçachi ñá cán xihūn Jesús.

21 Anda já nanducú ñehe Jesús tuhun nu ñá já naçachi a já xihūn ñá:

—Xíní ñúhú candúsún ña cáhan i jáchi mé a ndaa vaxi quivi caja cáhnu ndihi ndó Ndióxi, tátá yo ndá xoo naçuu va. A cúní ñúhú ga ndó cūhūn ndo jinī yúcu cáa ta ní a cúní ñúhú ga ndó cūhūn ndó ñuu Jerusalén caja cáhnu ndó Ndióxi. 22 Joo ndóhó, na Samaria caja cáhnu cuáa ndo Ndióxi jáchi co xíní ndó a. Joo ndehe, na Israel xíní vaha nde yo cúu Ndióxi caja cáhnu nde. Jáchi chichi mé nde, na Israel naçacu ini Ndióxi quixi mé á jácaçu ñayivi. 23 Ta viti naxinu quivi tá ndítahan caja cáhnu ñayivi Ndióxi, tátá yo xihūn ndinuhu ini na tá quiahva cúní ínimā yī Ndióxi jáchi quiahva já cúní Ndióxi, tátá yo ña ná caja cáhnu ñayivi mé á. 24 A cúu cuni yó Ndióxi jáchi coó toho yiquí cuñu a sahá ña cán quea xíní ñúhú caja cáhnu ñayivi mé á xihūn ínimā ná ta xihūn ndiñuhu ini na —naçachi Jesús xihūn ña.

25 Anda já naçachi tucu ñá cán já:

—Sa cándaā caxí ini i ña vaxi quivi quixi da chindahá Ndióxi cacomí a cuéntá sahá ñayivi, mé da cúu Cristo. Ta tá ná quixi da cán já ndicani ndihi da nuú nde ndaja coo —naçachi ñá cán xihūn Jesús.

26 Anda já naçachi Jesús já xihūn ñá:

—Da cán cúu yehe, da cáhan xūhūn viti —naçachi Jesús xihūn ñá.

27 Ta nani cáhan Jesús xihūn ñá naxinu coo na xíca tuun xihūn á já naçatóntó na jáchi naxini na ndítúhún a xihūn in ñáñáha. Joo ni in túhún na coó naçahan ndeé ini na cūhūn na ndaca tuhún ñahá ndá a cúní ñá cán, á ndá saha ndítúhún a xihūn ñá. 28 Tá nandihí já najándacoo ñá cán yoo ñá ta naçuee ñá cuahan ñá ñuu. Ta cán naçasáhá cáhan ñá xihūn na ñuu cán já cáchí ña já xihūn ná:

29 —Naha quí ndó. Candehé ndó in dataa, da naçahan ndihi da tá quiahva naçaja i. Á a juú da yóho cúu Cristo, da naçachi Ndióxi chindahá a cacomí cuéntá sahá ñayivi —naçachi ñá cán xihūn ná.

30 Tá nandihí já naçqueta ndihi na cán cuahan na xihūn ña nu íin Jesús. 31 Joo tá cámaní xinu coo na nu íin Jesús já najácahan na xíca xihūn á mé á ña ná cuxu a vatí loho.

32 Anda já naçachi Jesús já xihūn na xíca tuun xihūn á cán: —Sa íin va ñaha cuxu u. Ta ndóhó, co xíní toho ndó ndá



a queá —nācachi Jesús xihin ná.

<sup>33</sup> Tá nandihí já nacasáhá na cán ndáca tuhún táhan na já cáhí na já:

—Ndá na sa naquixi ñehe va ñaha cuxu a —cáhí xihin táhan na.

<sup>34</sup> Sahá ña cán queá nācachi Jesús já xihin ná:

—Tá quiahva ndivaha ini ñayivi tá xíxi na quiahva já ndivaha ini i tá cája i chuun ña nāchindahá Ndióxi yehe caja i ñuyiví yóho. Ta xíní ñuhú caja i ña janda quiahva ná jáxinu coo i ña. <sup>35</sup> Xíní ñuhú ndiñehe ndó nuu ndó candehé ndo ñayivi jáchi cúu ná tátuhun nuú naxutu na trigo. Joo co xíní ñuhú caja ndó tá quiahva cája ñayivi tá ndáti na comí yoo jáquee na trigo. Jáchi viti ñuhú in tiahvā ñayivi ndiquehe na tuhun Ndióxi. <sup>36</sup> Ndá na xíca chíndeé ñayivi ndiquehe na tuhun Ndióxi, na cán cúu ná tátuhun na xíca jáquee trigo. Ta a cája chúun uun toho na jáchi quehe na yahvi sahá chuun cája na. Ta na ndiquehe tuhun Ndióxi cán cúu na cūhun catacu indiví anda ama cáa quivi. Ta sahá na cán cavatá da naxutu xihín da najáquee. <sup>37</sup> Jáchi in in tuhun ta ndaa cáhan ña. Já cáhí a já: “In da xutu ta inga da jáquee jáchi cúu ndíví da da cája chúun nuú in xitoho.” <sup>38</sup> Ta quiahva já nayaha xihín mé ndó jáchi yehe nāchindahá i ndohó ña ná cūhun ndó chindeé ndo ñayivi ndihvi na íchi cuéntá Ndióxi vatí coo

nandoho ini ndó caxi tuhun ndó tuhun Ndióxi xihín ná. Jáchi inga na nācaxi tuhun tuhun Ndióxi xihín na cán joo ndóhó ñehe táhvi ndó chíndeé ndó na ndihvi na íchi cuéntá Ndióxi —nācachi Jesús xihín na xíca tuun xihín á cán nani cámani xinu coo ñayivi ñuu cán nu á.

<sup>39</sup> Ta cuahá ñayivi ñuu Samaria cán nācandúsa na Jesús sahá ña nācāhan ñañáhā cán xihín ná jáchi nācachi ña cán já xihín ná: “Nācachi mé á xihín i ndaja cáa tóco ndihí ña nācāja i.” <sup>40</sup> Sahá ña cán queá tá naxinu coo na Samaria cán nu in Jesús já naxíca táhvi na nu á ña ná coo chága xihín ná. Sahá ña cán queá nācandoo Jesús nāsañiin a ivi quivi xihín na cán. <sup>41</sup> Ta cuahá java ga na Samaria cán nācandúsa na Jesús sahá tuhun nācāhan mé á xihín ná. <sup>42</sup> Já nācachi mé na Samaria cán xihín ñañáhā cán já:

—Nācandúsa nde yohó tá nācāhún sahá Jesús nuú nde joo viti cāndeé ini nde mé á jáchi naxini johō nde nu cáhan mé á. Ta viti ndusa cāndúsa nde ña cúu á Cristo, mé á nāchindahá Ndióxi jácaacu a ñayivi ñuyiví —nācachi na Samaria cán xihín ña.

*Tá nandaja vaha Jesús jahyi in da cája chúun cuéntá gobierno*

<sup>43</sup> Tá sa nayaha ivi quivi nāsañiin Jesús mé Samaria cán já naquee tucu a cuahān chí estado Galilea. <sup>44</sup> Jáchi

sa ñacachi mé Jesús já: “Ni in túhún toho profeta cō cāja cáhnu na ña ñuu da”, ñacachi Jesús. <sup>45</sup> Joo tá ñaxinu cōo Jesús estado Galilea cán já ñandiquehe vaha ña cán mé á jáchi sa ñasahan ri ña cán vicó pascua ñuu Jerusalén ta cán ñaxini na ña náhnu ñacaja mé á.

<sup>46</sup> Anda já ñaxinu cōo tucu Jesús ñuu Caná cuéntá Galilea cán nuú ñandaja mé á ticuñi ñanduú dó vino. Ta mé ñuu cán ñasahin in dataa, ña cāja chúun cuéntá gobierno. Ta a juú quiahva quíhvi jahyi da cándúhu dá ñuu Capernaum.

<sup>47</sup> Ta tá ñaxini johó ña cán ña sa ñaquee Jesús estado Judea ta ín a estado Galilea viti já ndáva da ñasahan ña nu á já ñaxica tahví ña nu á ña ná cūhun a vehe ña ndaja vaha jahyi da jáchi sa ndicáhvi ña cándúhu dá. <sup>48</sup> Tá ñandihí já ñacachi Jesús já xihín dá:

—Ndúsa caja i ña náhnu xihín ña xitúhún nu ndó já cuu candúsa ndó yehe á tá cōo ta cōo cūni ndó candúsa ndó yehe —ñacachi Jesús.

<sup>49</sup> Anda já ñanducú ñehe ña cāja chúun cuéntá gobierno cán tuhun nuú Jesús já ñacachi ña já xihín á:

—Á a cuú caja ndó ñamaní cūhun quíi ndó vehe e jáchi cūni quívi jahyi i —ñacachi ña xihín Jesús.

<sup>50</sup> Anda já ñacachi Jesús já xihín dá:

—Cuáhán ndicó cōo ndó vehe ndó jáchi ñandivaha jahyi ndó —ñacachi Jesús xihín dá.

Ta ñacandúsa ña cán ña ñacachi Jesús xihín dá chí ñaquee ña ñandicó cōo da cuanúhu dá. <sup>51</sup> Ta tá sa yati xinu cōo da vehe ña já ndáva nihni ña cúu mozo ña ñasahan ña ñehe ná ña já ñacachi ña já xihín dá:

—Sa cōo quíhvi ga jahyi ndó viti.

<sup>52</sup> Anda já ñandaca tuhún ña cán mozo ña já cáhí ña já: —Ndá hora ñacasáhá ñandivaha jahyi i —ñacachi ña xihín ná.

Já ñacachi ña cán já:

—Cuni tátuhun caa in sahini já ñandindaa ña chícaan cáhni á ña.

<sup>53</sup> Xihín ña yóho ñacandaa ini ña cán ña mé a ndaa ñandaja vaha Jesús jahyi ña jáchi mé hora cán ñacachi Jesús xihín dá ña tácu tá tácu jahyi ña. Sahá ña cán quéa ñacandúsa mé dá xihín ña vehe ña Jesús.

<sup>54</sup> Ta xihín ña yóho ñaxinu iñi ña xitúhún ñacaja Jesús estado Galilea cán anda nani ñaquee a Judea já ñandicó cōo tucu a Galilea.

## 5

*Tá ñandaja vaha Jesús in ña quíhvi, ña ín yuhú ticuñi nani Betesda*

<sup>1</sup> Tá ñayaha ña yóho já ñaquee Jesús cuahan ñuu Jerusalén nu cāja ña Israel víco. <sup>2</sup> Ta mé nu quíhvi johó na ñuu Jerusalén cán ín in yéhe nani yéhe ndicachi. Ta yati cán ñasahin in vehe ta ín uhun yuyéhe nu quíhvi na ini a ta ini mé vehe cán

ndácaan in pila cáhnu nu ñúhu ticuïí ta naní a Betesda tuhun hebreo. <sup>3</sup> Ta níí ini mé vehe cán naçanihni na quíhvi ndúu na. Java na cúú ná na cuaá. Java na quíhvi saha. Ta java na naçihí tuhú. Níí cán naçanihni na ndúu na ndáti na ndicanda ticuïí cán. <sup>4</sup> Jáchi ndá tañu núu tátō Ndióxi ta jándicanda mé á ticuïí cán. Ta ndá na ná queta nuu nu cuítí ini mé ticuïí cán tá nandihí nandicanda do já ndivaha na ta cō cája toho a ndá cuehe ndóho na. <sup>5</sup> Ta tañu tóco ndihí na quíhvi naçanduu cán naçandacaan in dataa, da sa íin oco sahun uní cuia quíhvi da. <sup>6</sup> Ta tá naçini Jesús cándúhu dá tañu na quíhvi cán ta tá naçandaa ini a ña sanahá ndivaha quíhvi da já nandaca tuhún a da já naçachi a já xihín dá:

—Á ndivahún cúnun.

<sup>7</sup> Anda já nanducú ñehe da cán tuhun nu á já naçachi da já:

—Coó ni in ñayivi yóho ña chindeé na yehe queta nuu i ini ticuïí tá ndicanda do. Jáchi tá jacá cáhán uun i jáqueta i mí i, sa naçueve vaha va inga na nuú i. Ña cán quéa a cuú ndivaha i —naçachi da cán xihín Jesús.

<sup>8</sup> Anda já naçachi Jesús já xihín dá:

—Cuáhán ndacōo nditivún yívun ta cuanúhun —naçachi Jesús xihín da cán.

<sup>9</sup> Tá naçachi Jesús já chí ivi laá nandivaha da quíhvi cán já nandiquehe da yívi dá já naçasáhá da xíca da. Ta

sahá ña cúú á quívi ndíquehe ndée ná <sup>10</sup> sahá ña cán quéa naçqueta java na sacuaħa nuú na Israel já naçachi na já xihín dá:

—Viti cúú á quívi ndíquehe ndée yo ta cō ndítahan toho nuun cojún yívun caca nuún —naçachi na xihín dá.

<sup>11</sup> Anda já nanducú ñehe da cán tuhun nu ná já naçachi da já:

—Mé da nandaja vaha yehe cán cúú da naçahnda chuun nuú i ña ná cojo i yívi cuhun i —naçachi da cán xihín ná.

<sup>12</sup> Já nandaca tuhún tucu na Israel cán da já naçachi na já:

—Yo já naçachi xuhun ña ná ndicojún yívun cuhun —naçachi na cán.

<sup>13</sup> Joo da cán cō xini da yo nandaja vaha ñahá jáchi tá nandaja vaha Jesús da já naçuhvi nuu a cán tañu ñayivi cuaha cán cuahan.

<sup>14</sup> Tá nandihí já nanditahan Jesús da cán ini veñuhu cáhnu já naçachi a já xihín dá:

—Candehé. Sa cō quíhvi gaún viti. A ndícó cōo gaún cajún cuachi jáchi tiaħva náa quixi ña ndée chága ví ndohún —naçachi Jesús xihín dá.

<sup>15</sup> Tá nandihí já ndáva da cán naçahan da cáxi tuhun da nuú na Israel ña Jesús cúú ña nandaja vaha ñahá. <sup>16</sup> Sahá ña cán quéa naçasáhá na Israel cán cája xíxi na xihín Jesús. Ndúcú na cahní na a sahá ña cája chúun a ndája vaha mé á na quíhvi quívi

ndíquehe ndéé ná. <sup>17</sup> Andá já nacachi Jesús já xihín ná:

—Cája chúun ta cája chúun Ndióxi, tátá i sahá ña cán queá cája chúun ta cája chúun ri yehe va —nacachi Jesús.

<sup>18</sup> Sahá ña cán queá ví ga ví cúní na Israel cán cahní na Jesús jáchi cáchí na co cája cahnú a Ndióxi quívi ndíquehe ndéé ná tá quiahva cáchí ley. Ta cúní na cahní na mé á jáchi cáchí a ña cúú á in túhún jini já jahyi Ndióxi ta xihín ña yóho ndája mé á tátuhun mé Ndióxi.

*Ña cúú cája Jesús sahá ña cúú á in túhún jini já jahyi Ndióxi*

<sup>19</sup> Já nacachi Jesús já xihín na Israel cán:

—Mé a ndaa ná cahan i xihín ndo. Yehe cúú u in túhún jini já jahyi Ndióxi ta co cája i ni in ñaha cuéntá mí i jáchi cája i ña xini i cája Ndióxi, tátá i. Ta tóco ndihi ña cája tátá i ña cán cúú ña cája ri yehe va. <sup>20</sup> Jáchi sahá ña quíhvi ini Ndióxi, tátá i yehe sahá ña cán queá náha mé á nuú i ndaja táhan ñaha cája mé á. Ta janda ñaha náhnu chága ví nahá mé á nuú i ta chí catóntó ndihi ndó tá ná cuni ndó ña. <sup>21</sup> Jáchi tá quiahva cája Ndióxi, tátá i jánditacu a ndii ña ná catacu na quiahva já cuu cája ri yehe jánditacu u na cúní mí i catacu. <sup>22</sup> Ta mé Ndióxi, tátá i co cája víi toho a sahá ñayivi. Ña nacaja mé á queá nasahan ñamaní nuú i, da cúú in túhún jini já jahyi mé á, ña ná caja

víi i saha ná. <sup>23</sup> Já queá ná caja cahnú ñayivi yehe tá quiahva cája cahnú na Ndióxi, tátá i. Jáchi ndá na co cája cahnú yehe náha ña co cája cahnú na Ndióxi, tátá i jáchi mé a cán nachindahá yehe vaxi i.

<sup>24</sup> 'Mé a ndaa ná cahan i xihín ndo. Ndá na táa johó vaha nu cahan i ta cándusa na Ndióxi, mé a nachindahá yehe quixi i, na cán cúú na catacu anda ama cúa quívi. Ta a jándoho Ndióxi ini na indayá jáchi cúú á tátuhun sa najánditacu tucu Ndióxi na. <sup>25</sup> Mé a ndaa ná cahan i xihín ndo ña vaxi quívi ta cúú á tiempo viti tá na co tácu cuni johó na ña cahan yehe, da cúú in túhún jini já jahyi Ndióxi. Ta ndá na ná ndiquehe vaha túhun cahan i xihín ná catacu na anda ama cúa quívi. <sup>26</sup> Jáchi tá quiahva cuu cája Ndióxi catacu ñayivi quiahva já nacaja mé á ña ná caja ri yehe, da cúú in túhún jini já jahyi mé á, ña ná cuu catacu ñayivi. <sup>27</sup> Ta nasahan mé á ñamaní nuú i ña ná caja víi i sahá ñayivi ñuyivi jáchi yehe cúú da naquixi indiví nduu in ñayivi. <sup>28</sup> A catóntó ndo sahá ña cahan i xihín ndo yóho jáchi mé a ndaa vaxi quívi tá cuni johó tóco ndihi na sa naxihi nuú cahan i xihín ná <sup>29</sup> já queta na camasanto. Ta na nacaja vaha cán nditacu na ta cuhun na catacu na anda ama cúa quívi. Ta na nacaja ña quini nditacu na ta cuhun na indayá ndoho ini na.

*Náha Jesús ña ún saha cája*

*tóco ndihi ña cája*

30 "Tóco ndihi ña cája i a juú in túhún mí i cája ña. Tá quiahva sáhdá Ndióxi, tátá i chuun nuú i ña ná cája víi i sahá ñayivi quiahva já cája víi i saha ná. Ta cája víi ndaa i saha ná jáchi co ndúcú u cája i ña cúní mí i. Ña ndúcú u cája i cúú ña cúní Ndióxi, tátá i cája i jáchi mé á nachindahá yehe quixi i. 31 Jáchi tá saha mí i ná caca nuu i cahan i, co nditahan ndíquehe ndó ña cahan i sahá i. Co nditahan nuú i cahan i saha mí i 32 jáchi ín inga ña cahan sahá i ta ña cahan mé a cán sahá i cúú á ña ndaa. 33 Ta mé ndó nachindahá ndó java na nasahan na ndaca tuhún na Juan sahá i. Ta ña ndaa nasacuu tóco ndihi tuhun nanducú ñehe da cán nu ndo. 34 Vatí co ndátí i cándúsa ndó yehe sahá ña cahan in ñayivi sahá i joo cuu cacu ndaa ínima ndó tá ná cándúsa ndó ña cahan Juan sahá i. 35 Jáchi mé Juan, da nacaja ndúta ñayivi cán nasacuu da tá tuhun in íti, dó jándiyéhe nuu ndo. Joo chá tiempo cuití va nacajii ini ndó xihín tuhun nacahan da. 36 Ín inga ña cáhnu chága a juú ga ña nacahan Juan sahá i. Ta ña cán cúú á ña náhnu xihín ña xituhún naxini ndó nacaja i. Ta ña yóho náha nu ndo yo cúú yehe ta náha ña cúú á ña ndaa ña nachindahá Ndióxi, tátá i yehe. Jáchi tóco ndihi ña cája i cúú á ña nacachi Ndióxi, tátá i xihín i cája i. 37 Ta Ndióxi, tátá i, mé á nachindahá yehe náha

tuhun sahá i. Joo ndóhó, co xini johó ndó nu cahan mé á ta ni co xini tívi ndó a. 38 Ta ni coo tuhun mé á ndacaan ínima ndo jáchi co cándúsa ndó yehe, da nachindahá mé á quixi ñuyiví yóho. 39 Vatí jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cáa quivi joo co cándaa ini ndó ña mé tuhun Ndióxi cán cúú á ña cahan sahá yehe. 40 Ta co cúní ndó quixi ndó nuú i já ná cája i ña ná catacu ndó anda ama cáa quivi.

41 'Co ndúcú toho i ña ná cája cáhnu ndó yehe. 42 Sa xini vaha i ínima ndo ta cándaa ini i ña co quihvi ini ndó Ndióxi. 43 Naxinu i ñuyiví yóho cuéntá Ndióxi, tátá i ta co cúní ndó ndiquehe vaha ndó yehe. Joo tá ná quixi in da cuéntá mé dá já ndiquehe vaha ndusa ndó da. 44 Jáchi mé ndó catóo ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Sahá ña cán queá ihvi ndivaha cúú ini ndó cándéé ini ndó in túhún jini Ndióxi. 45 Coto a juú cahan ndo ña jácojo i cuachi jata ndo nu Ndióxi, tátá i. Mé ley nacahyí Moisés, ña cán cúú á chicaan cuachi jata ndó vatí cándéé ini ndó da. 46 Tá ta mé a ndaa cándúsa ndó ña nacahyí Moisés sanahá já queá cándúsa ndó yehe jáchi sahá yehe nacahyí Moisés sanahá. 47 Joo sahá ña co cándúsa ndó ña nacahyí Moisés sahá i sahá ña cán

quéa cō cándúsa ndó ña cáhan i xihín ndo —ñacachi Jesús xihín na Israel cán.

## 6

*Sáhan Jesús ña cuxu uhun mil taa*

(Mt. 14:13-21; Mr. 6:30-44; Lc. 9:10-17)

<sup>1</sup> Tá sa nayaha tóco ndihi ña yóho já ñaquee Jesús cuahan inga xoo tañuhú Galilea cán. Ta mé tañuhú cán cáhan tucu na xihín dó naní do Tiberias.

<sup>2</sup> Ta cuahá ndivaha ñayivi ndíco jatá Jesús cuahan na jáchi ñaxini na ña náhnu ñacaja mé á tá ñandaja vaha mé á na quíhvi. <sup>3</sup> Tá ñandihí já ñandaa Jesús in xiquí ta cán ñasacoo a xihín na xíca tuun xihín a cán. <sup>4</sup> Ta mé tiempo já sa cáyati vicó pascua ña cája mé na Israel cán. <sup>5</sup> Ta tá ñandicoto nihni Jesús já ñaxini a ña ndíco cuahá ñayivi jatá vaxi na já ñacachi a já xihín Felipe:

—Ndájá cájún cuéntá cohó cueen nahá yo ña cuxu tóco ndihi ñayivi yóho —ñacachi Jesús xihín dá.

<sup>6</sup> Ñacachi Jesús ña yóho xihín Felipe jáchi cuni a cuni a ndía cachi da cán xihín á. Jáchi sa xini vaha Jesús ndáa quéa caha ña ná cuxu ndihi na cán. <sup>7</sup> Anda já ñanducú ñehe Felipe tuhun nuú Jesús já ñacachi da já xihín á:

—Ni ivi ciento denario ná cañehé, a quéta toho ña cán cueén pan ná quiahva in yuhú in yuhú cuxu in in ñayivi ndúu yóho —ñacachi da cán xihín Jesús.

<sup>8</sup> Anda já ñacahan Andrés, da cúu in táhan na xíca tuun xihín Jesús, da cúu ñani Simón Pedro. Já ñacachi da já xihín Jesús:

<sup>9</sup> —Yóho íin in taa loho ta ñehe da uhun pan cebada xihín ivi tiyacá. Joo ama ná queta ri ña yóho cuxu tóco ndihi ñayivi jan —ñacachi Andrés xihín Jesús.

<sup>10</sup> Anda já ñacachi Jesús já: —Cahan ndó xihín ná ña ná cacoo na.

Anda já ñasacoo ndihi na cán. Ta a juú quiahva ndató ñasahnu yucu nuú ñasacoo tátuhun uhun mil taa. <sup>11</sup> Tá ñandihí já ñatiin Jesús pan cán já ñandiquiahva ndixahvi nu Ndióxi. Ta tá ñandihí já ñasahan ña nuú na xíca tuun xihín á ta ñandicahnda na ña nuú na ndúu coo cán. Ta quiahva já ñacaja ri a xihín tiyacá va. Ta ñaxixi ndihi na janda quiahva ñachutú tixi na. <sup>12</sup> Ta tá ñandihí já ñacachi Jesús já xihín na xíca tuun xihín á cán:

—Jánditaca ndó tóco ndihi ña ñacandoo jan já ná a tiví ña —ñacachi Jesús xihín ná.

<sup>13</sup> Sahá ña cán quéa najánditaca na ña ta najándicutú na uxu ivi toyicá xihín ña ñacandoo. <sup>14</sup> Tá ñaxini ndihi ñayivi cán ña xituhún ñacaja Jesús yóho já ñacasahá cáchí xihín táhan na já:

—Jivi ndusa da yóho cúu profeta ñacachi Ndióxi chindahá a ñuyiví yóho —cáchí xihín táhan na.

<sup>15</sup> Joo naq̄uee Jesús cuah̄an in túhún mé á coo a yúcu jáchi xín̄i mé á ñ̄a ndúcú ñ̄ayivi cañehe ndús̄a n̄a mé á jáchi cúni n̄a ndaja na mé á rey nu ná.

*Tá nax̄ica sáh̄a Jesús nuú tañuhú*

(Mt. 14:22-27; Mr. 6:45-52)

<sup>16</sup> Tá sā naçuaá já nanuu na x̄ica tuun x̄ihín Jesús x̄iqui cán cuah̄an chí yuhú tañuhú cán. <sup>17</sup> Ta chí sā naçanaá v̄aha va ta coó Jesús x̄ín̄u coo nu ndúu na sahá ñ̄a cán quéa n̄andaa na jatá in barco ta naçasáh̄a n̄a jándicaca na do jáchi cúni n̄a cuh̄un n̄a ñ̄uu Capernaum. <sup>18</sup> Ta ndaja coo naçasáh̄a ndícojo ticuĩ nuú tañuhú cán jáchi naçasáh̄a x̄ícó in tach̄i ndeé ndivaha. <sup>19</sup> Ta tá sā naçaxícá n̄a uh̄un á iñ̄u kilometro cuah̄an n̄a x̄ih̄in barco cán nuú ticuĩ já nax̄ini na x̄ica sáh̄a Jesús cuah̄an nuú ticuĩ já cáyati a nu barco cándójó n̄a cán. Andā já naçasáh̄a yíhv̄i n̄a ndúu na. <sup>20</sup> Ta tá nax̄ín̄u coo Jesús nu ná já naçachi a já x̄ih̄in ná:

—A cáyh̄iv̄i toho ndó jáchi yehe va cúu u —naçachi a x̄ih̄in ná.

<sup>21</sup> Andā já cávatá na najándāa na a jat̄a barco. Ta iv̄i lāa sā nax̄ín̄u coo na nuú cuah̄an n̄a.

*Nd̄inducú ñ̄ayivi Jesús*

<sup>22</sup> Tá naçivi inga quiv̄i itāan já naçasáh̄a ñ̄ayivi nd̄inducú na Jesús jáchi nax̄ini na ñ̄a coó n̄andaa toho a in túhún barco naçah̄iin cán x̄ih̄in n̄a x̄ica

tuun x̄ih̄in a jáchi mé cuiti na cán sā n̄andaa cuah̄an. <sup>23</sup> Ta nani ndúu na yuhú tañuhú yati nuú n̄andaja cuah̄a Jesús pan tá n̄andihi n̄andiquiah̄va mé á ndixah̄vi nu Ndióxi cán já nax̄ín̄u coo java barco, dó naquixi chí ñ̄uu Tiberias. <sup>24</sup> Ta sahá ñ̄a coó n̄anditahan na Jesús sahá ñ̄a cán quéa n̄andaa na barco cán já naq̄uee na cuah̄an n̄a ñ̄uu Capernaum nd̄inducú ñ̄ahá n̄a.

*Jesús cúu á tátuhun pan x̄ixi ñ̄ayivi já tácu n̄a*

<sup>25</sup> Tá nax̄ín̄u coo na cán inga xoo tañuhú já n̄anditahan na Jesús. Ta naçasáh̄a nd̄aca tuh̄un n̄a mé á já cáchi n̄a já:

—Maestro, ndá hora nax̄ín̄u coo ndó yóho —naçachi na x̄ih̄in á.

<sup>26</sup> Andā já naçachi Jesús já x̄ih̄in ná:

—Mé a ndaa ná cahan i x̄ih̄in ndó. X̄ica ndó nd̄inducú ndó yehe joo co cúu á sahá ñ̄a naçandāa ini ndó yo cúu yehe. Sahá ñ̄a náhnu naçaja i tá naçahan i ñ̄a nax̄ixi ndó janda naçhutú t̄ixi ndó sahá ñ̄a cán quéa nd̄inducú ndó yehe. <sup>27</sup> Co ndítahan nd̄ihi nahá ini ndó sahá ñ̄a cuxu ndó ñ̄uyiv̄i yóho. Ñ̄a ndítahan caja ndó quéa nd̄inducú ndó ndá quiah̄va catacu ndó andā ama cáa quiv̄i. Jáchi yehe cúu da naçindahá Ndióxi nduu ñ̄ayivi ta cuu caja i ñ̄a ná catacu ndó andā ama cáa quiv̄i. Jáchi Ndióxi, tátá i náha ñ̄a mé a ndaa naçaxi a yehe caja i

chuun yóho —nācachi Jesús xihín nā cán.

<sup>28</sup> Andā já nācachi nā cán já xihín á:

—Ndía ndítahan nuú nde caja nde já ná jáxinu cōo nde ña cúnj Ndióxi —nācachi na xihín Jesús.

<sup>29</sup> Já nācachi Jesús já xihín ná:

—Ña cúnj Ndióxi caja ndó quéa ná candúsa ndó yehe, da nāchindahá mé á ñuyívi yóho.

<sup>30</sup> Andā já nācachi tucu na cán já xihín á:

—Ndá ñaha xitúhún chága cuu caja ndó nuú nde viti ña ná cuni nde ña já ná cuu candúsa nde ndohó. Ndá a nāhnu quéa cuu caja ndó.

<sup>31</sup> Jáchi mé tásáhnu jícó nde naxixi na pan tá naxica na yucú íchí nu cō ndúu ñayivi cán. Já cáchí tuhun Ndióxi já: “Naxixi na pan ña naquixi indivi nācāja Moisés” —nācachi nā cán xihín Jesús.

<sup>32</sup> Já nācachi Jesús já xihín ná:

—Mé a ndaa ná cahan j xihín ndo. A juú toho Moisés cúu da nasahan pan ña naquixi indivi nu ná. Jáchi Ndióxi, tátá j cúu ndusa ña nasahan pan naquixi indivi nu ná. Ta viti cúnj Ndióxi quiahva in ñaha vaha chága nu ndo a juú ga ña nasahan Moisés nuú nā cán sanahá.

<sup>33</sup> Jáchi yehe cúu u tátuhun pan ña nanuu indivi nācāja Ndióxi ña ná cuu catacu ñayivi andā ama cáa quivi —nācachi Jesús xihín nā cán.

<sup>34</sup> Andā já nācachi nā cán já xihín á:

—Nini quivi quiahva ndó táhan pan jan nuú nde, xitoho.

<sup>35</sup> Já nācachi Jesús já xihín ná:

—Yehe cúu u tátuhun mé pan jan. Tá ná ndiquehe ñayivi yehe já ndivaha ini na ta cúu á tátuhun a cuico ga nā. Ta ndá nā cándúsa na mí j já cúu á tátuhun a íchj ga ini na ticují. <sup>36</sup> Joo cúu á tá quiahva nācachi j xihín ndo: cō cándúsa toho ndó yehe vatí xínj ndó yehe.

<sup>37</sup> Joo tóco ndihi nā vaxi nuú j cája Ndióxi, nā cán cúu nā cándúsa yehe. Ta ndá nā cándúsa yehe, nā cán cō táxí j nā ña ná quee na cūhun nā.

<sup>38</sup> Jáchi vatí nanuu j indivi nu ín Ndióxi joo cōo naquixi j caja j ña cúnj mí j. Vaxi j caja j ña cúnj Ndióxi, tátá j jáchi mé á nāchindahá yehe. <sup>39</sup> Ta ña cúnj Ndióxi quéa ña ná a quiahva j ñamanj ndihi sahá nā nasahan mé á nuú j. Ña cúnj mé á quéa ná jánditacu u tóco ndihi na tá ná xinu cōo quivi nu ndíhí. <sup>40</sup> Ña cúnj Ndióxi quéa ná catacu ñayivi, nā cāndeé ini yehe andā ama cáa quivi. Ta yehe, da cúu in túhún jinj já jahyi mé á jánditacu u nā quivi nu ndíhí cuí —nācachi Jesús.

<sup>41</sup> Andā já nācasahá nā Israel cán cahan núu na sahá Jesús jáchi sa nācachi a ña cúu á tátuhun pan ta nācachi a ña nanuu a chí indivi. <sup>42</sup> Ta já nācachi xihín táhan nā cán já:

—Á a juú jahyi José va cúu Jesús yóho. Ta xínj vaha va mí yo cúu náná da xihín tátá da.



Ta ndá cuéntá queá cáchí ri da ña naquixi da chí indiví, dá já —nacachi xihin táhan na cán.

43 Anda já nacachi Jesús já xihin ná:

—A cahan núu ga ndó sahá i. 44 Jáchi jácahan Ndióxi, tátá i, ñayivi ña ná candúsa na yehe. Ta ni in túhún toho ñayivi a cuú candúsa na yehe tá ta cō jácahan Ndióxi ínima ná, mé á nachindahá yehe. Ta na cán cuú na jánditacu u quivi nu ndíhi. 45 Já nacahyí na profeta sanahá: “Jána Ndióxi tóco ndihi ñayivi.” Ña cán queá tóco ndihi ñayivi, na xini johó nu cahan Ndióxi ta cája na ña jána mé á nu ná, na cán cuú na vaxi nuú i.

46 Joo a juú cahan ndo ña cuu cuni java ñayivi Ndióxi, tátá i. Jáchi yehe, da nachindahá mé á ñuyivi yóho, cuú in túhún da xini ñahá. 47 Mé a ndaa ná cahan i xihin ndo. Ndá na cándéé ini yehe, na cán cuú na catacu anda ama cáa quivi. 48 Jáchi yehe cuú u tátuhun pan ña cuu caja ña ná catacu na. 49 Sa xini ndó tásáhu jícó ndo naxixi na pan yucú íchí sanahá joo naxihí tá naxihí na. 50 Joo yehe cuú u tátuhun pan ña nanuu chí indiví já queá ndá na cándúsa yehe cuú ná tátuhun na xixi pan ta já a quivi na. Jáchi tá ná cuxu na pan quiahva i nu ná já queá catacu na anda ama cáa quivi. 51 Yehe cuú u tátuhun mé pan xixi na. Nanuu i indiví ta a cuú ndihi sahá i. Ta jivi mé yiquí cuñu i cuú á

tátuhun pan xixi na yóho ta vaxi quivi ndiquiahva i ña nu ná já ná cuu cacu ndaa ínima ná. Ta tá ná cuxu na ña já catacu na anda ama cáa quivi —nacachi Jesús.

52 Anda já nacasáhá na Israel cán ndítuhún cuehe xihin táhan na já nacachi na já:

—Cáchi da yóho ña cuú yiquí cuñu da tátuhun pan xixi ñayivi. Ndaja cuu caja ri da quiahva da ña nu yo cuxú —cáchi xihin táhan na.

53 Anda já nacachi Jesús já xihin ná:

—Mé a ndaa ná cahan i xihin ndo. A cuú catacu ndó anda ama cáa quivi tá ta cō cándúsa ndó yehe. Ta tá cándúsa ndó yehe cuú á tátuhun xixi ndó yiquí cuñu i ta cuú á tátuhun xixi ndó nij i. 54 Ndá na xixi na yiquí cuñu i ta xixi na nij i, na cán cuú na cacu ndaa ínima ná ta jánditacu u na quivi nu ndíhi. 55 Jáchi yiquí cuñu i cuú ndusa tátuhun in ñaha vaha ndivaha cuxu na ta nij i cuú dó tátuhun in dó vaha xixi na. 56 Ndá na ná ndiquehe vaha yehe cuú á tátuhun ndiquehe vaha na in pan cuxu na ta cuú á tátuhun ndiquehe na ticují xixi na. Já queá in nduu na xihín i ta já in nduu ri yehe va xihin mé ná. 57 Ta sahá ña tácu Ndióxi, tátá i, mé a nachindahá yehe sahá ña cán queá tácu ri yehe va cája mé á. Quiahva já vaha ri xihín ñayivi jáchi tá ná ndiquehe vaha na yehe já catacu na caja i. 58 Jáchi yehe cuú u

ndusa tátuhun pan ña nanuu indiví. Ta co cúú á tátuhun ña nayaha xihín tásáhnú jícó ndo tá naxixi na pan naní maná yucú íchí cán jáchi tá nandihí naxihí tá naxihí na cán. Joo ndá na cándéé ini yehe cúú ná tátuhun na xíxi pan ña naquixi indiví. Ta na cán catacu na anda ama cáa quivi —naxachi Jesús.

<sup>59</sup> Tóco ndihí ña yóho najánaha Jesús nu ná ini veñuhu ñuu Capernaum cán.

*Cuu catacu ñayivi anda ama cáa quivi tá ná cándéé ini na Jesús*

<sup>60</sup> Ta cuahá táhan na xíca xihín Jesús cán tá naxini johó na ña naçahan mé á já naçasáhá cáhan núu na sahá já cáchi na já:

—Yáncá ndivaha candúsa í tuhun cáhan Jesús yóho. A cúu toho caja í xihín á —naxachi na cán.

<sup>61</sup> Tá naxini Jesús ña cáhvi núu ini na xíca xihín a cán já naçasáhá cáchi a já xihín ná:

—Ndíhíhvi ndó sahá tuhun naçahan í yóho. <sup>62</sup> Ndaja ga ví ndíhíhvi ndó tá ná cuni ndó yehe ndaa í cuhun í indiví nuú nasahíin í jáchi yehe cúú u da nachindahá Ndióxi nduu ñayivi. <sup>63</sup> Nasahan Ndióxi in ínimá nuú in in ñayivi ña ná chindeé a na ndinducú na mé á. Joo yiquí cuñu ñayivi co chindeé toho a na ndinducú na mé á. Ta tóco ndihí ña naçahan í xihín ndo cúú á ña cuu xinu ini ínimá ndo ña ná catacu ndó anda ama cáa quivi. <sup>64</sup> Joo ndúu java ndó

cámaní yí candúsa ndó ña cáhan í xihín ndo —naxachi a.

Naxachi Jesús ña yóho jáchi sa xini mé á anda saha ndá na cúú na co cándúsa ñahá. Ta sa xini Jesús ndá da cúú da jícó túhún ñahá. <sup>65</sup> Anda já naxachi tucu a já:

—Sahá ña cán quéa cáchi í xihín ndó ña ni in túhún toho ñayivi a cuú candúsa na yehe tá co jácahan Ndióxi ínimá ná —naxachi Jesús.

<sup>66</sup> Tá naxachi Jesús ña yóho já quéa cuaha táhan na nasaxica xihín a cán najándacoo na mé á ta chí coo naxeen ga na caca nuu na xihín á. <sup>67</sup> Anda já nandaca túhún Jesús ndíhuxu ivi na xíca tuun xihín a cán já naxachi a já xihín ná:

—Á cuhun ri ndóhó va cúni ndo —naxachi a.

<sup>68</sup> Anda já nanducú ñehe Simón Pedro tuhun nuú Jesús já naxachi da já:

—Candehé ndo, xitoho í. Yo nuú ga cuu cuhun nde. Tuhun cáhan ndó xihín nde caja ña ná cuhun nde catacu nde anda ama cáa quivi tá ná candúsa nde ña. <sup>69</sup> Ta ndehé sa naçandúsa va nde ndohó. Ta sa xini vaha nde ña cúú ndó Cristo, ña in túhún jini já jahyi Ndióxi, ña tácu indiví —naxachi Pedro cán xihín Jesús.

<sup>70</sup> Anda já naxachi Jesús já:

—Mé a ndaa naxaxi í ndíhuxu ivi ndó ña ná caca tuun ndó xihín í. Ta vatí naxaxi í ndihí ndó joo in táhan ndó cúú dá cuéntá tiñáhá sacuahá —naxachi Jesús.

71 Nacachi Jesús ña yóho saha Judas, jahyi Simón Iscariote jáchi mé Judas cán cúu dá da jicó túhún ñahá chága chí nuu vatí cúu dá in táhan da uxu ivi na xíca tuun xihín Jesús cán.

## 7

*Có cuni na cúu ñani Jesús candúsa na mé á*

1 Tá nayaha ña yóho já naxica nuu Jesús tá ñuu tá ñuu estado Galilea cán. Coo naxeen ga cuhun a chí Judea jáchi cán nacasáhá na ndúcú na mé á cahní na a. 2 Joo sahá ña nacayati víco tá ndúu ñayivi vehe tiyahvá válí cája na Israel 3 sahá ña cán quéa nacachi java ñani Jesús já xihín á:

—Ndía cájún coún yóho. Cuáhán chí Judea já ná cuni na xíca xuhun cán ndaja ndáa ña náhnu cájún. 4 Jáchi tá cuni in dataa nahá da ña náhnu cája da já quéa co ndácco jehé toho da cája da ña. Tá ta mé a ndaa cájún ña náhnu já quéa xíni ñúhú cajún ña já ná cuni ní cúu ñayivi ndaja náhnu ñaha cájún —nacachi ñani Jesús xihín á.

5 Nacachi na cán ña yóho jáchi ni mé ñani a cán coo nacandúsa ñahá. 6 Anda já nacachi Jesús xihín na cán já:

—Camaní yíi ndindaa hora cuhun i. Ta vaha ri ndóhó ndá hora nacuu va cuu cuhun ndó jan. 7 Jáchi ñayivi cája ña núu ñuyívi yóho a cuú candají toho na ndóhó joo candají na yehe jáchi cáxí táhyí cáhan i xihín ná ña cája na

ña núu. 8 Cuáhán mé ndó víco tá cuni ndó cuhun ndo jáchi yehe a cuhun toho i jáchi camaní yíi xinu hora cuhun i —nacachi a.

9 Ña yóho nacachi Jesús xihín ñani a. Ta nacandoo mé á estado Galilea cán.

*Tá naxinu coo Jesús víco vehe tiyahvá cán*

10 Joo tá nandihí naquee ñani Jesús cán cuahan na víco já naquee ri Jesús cuahan mé víco cán. Joo coo naxeen a nahá tívi a mé á nuú ñayivi. 11 Ta mé na sacuahá nuú na Israel cán nacasáhá na ndúcú na Jesús: “Ndá xíca nuu da tañu víco cán”, cáhán na.

12 Ta jandá johó ndítuhún yaá ñayivi sahá Jesús xíca nuu na víco cán. Java na cáchí na sahá Jesús ña cúu dá ta cája vaha. Ta java na cáchí na: “Có cúu toho da ta vaha jáchi xíca nuu cuití da jandahvi da ñayivi”, cáchí na.

13 Joo ni in na co sahan ndeé ini cahan sahá nuú na sacuahá nuú na Israel cán jáchi yíhvi ñahá na.

14 Ta tá natahvi java víco cán já naquihvi Jesús ini veñuhu cáhnu ñuu Jerusalén cán já nacasáhá jánahá nuú ñayivi. 15 Ta tá xíni johó na Israel cán nu cáhan Jesús chí catóntó na já nacasáhá ndáca tuhún táhan na já cáchí na já:

—Ndájá nacatiahva nahá da yóho ña jánahá da nu yo jáchi a juú da naxica jácuaha cúu dá —nacachi xihín táhan na cán.

16 Anda já nacachi Jesús já xihín ná:

—Ñá jánaha i nu ndo yóho co cúu á ña naquixi jini mí i jáchi cúu á ña quixi nu Ndióxi, tátá i, mé á nachindahá yehe. <sup>17</sup> Ta tá mé a ndaa sácú ini ndó caja ndó ña cúní Ndióxi já quéa cuu candaa ini ndó á cáhan i cuéntá Ndióxi, á cáhan i cuéntá mí cuití vi. <sup>18</sup> Jáchi ndá na cáhan cuéntá mé ná já quéa ndúcú na ña ná caja cáhnu ñayivi na. Joo ndá na ndúcú ña ná ndicáhnu mé á nachindahá ñahá cán, na cán cúu ndusa na cáhan ña ndaa ta co cája na ña co ndítahan nu ná caja na.

<sup>19</sup> Mé a ndaa najándacoo Moisés ley nu ndo joo ni in túhún ndo co cája ndó ña cáchí a. Ta viti cúní ndó cahní ndó yehe —nacachi Jesús.

<sup>20</sup> Andá já nanducú ñehe na cán tuhun nu á já nacachi na já:

—Rí quini va ndacaan ini yóho jáchi ni in túhún toho na co ndúcú cahní yohó —nacachi na cán.

<sup>21</sup> Andá já nacachi Jesús já xihín ná:

—Chí cátóntó ndivaha ndó sahá in túhún ña cáhnu nacaja i quivi ndíquehe ndée yo.

<sup>22</sup> Joo candehé ndo. Moisés cúu da nasahnda chuun nu tásáhnu jícó yo ña ná chicaan na marca yiquí cuñu na vatí a juú Moisés natavá sahá, vaha. Mé tásáhnu jícó yo natavá sahá ta mé ndó chicaan tá chicaan ndó marca yiquí cuñu ta valí vatí cúu á quivi ndíquehe ndée yo. <sup>23</sup> Ta viti cáchí ndo xihín i ndaja cáa ri ña yóho. Mé ndó chicaan ndó

marca yiquí cuñu da valí vatí cúu á quivi ndíquehe ndée yo jáchi co cúní ndó yaha nuú ña nasahnda Moisés nu ndó. Ta viti xójo ini ndó xihín i sahá ña nandaja vaha i in ní yiquí cuñu in dataa quivi ndíquehe ndée yo. Ndaja cáa ri ña jan cáa já. <sup>24</sup> Mé ndó ndaja nacuu cáhan núu ndó sahá ñayivi ta co ndítahan toho caja ndó já. Jáchi ndítahan nu ndó candaa ini ndó ña cúu ña ndaa —nacachi Jesús xihín na cán.

*Ndicani Jesús ndáchi naquixi a*

<sup>25</sup> Ta java na ñuu Jerusalén nacasahá ndaca tuhún táhan na já cáchí na já:

—Á a juú da yóho cúu da xíca na ndúcú na cahní na.

<sup>26</sup> Nu ndíhi na cándichi da jánaha da ta ni in na co ndaa cúu da. Á tá coo ta janda na jutixia cáa cándúsa na ña cúu dá Cristo, da nachindahá Ndióxi cacomí a cuéntá sahá ñayivi. <sup>27</sup> Joo mí xini vaha í ndá ñuu naquixi da yóho ña cán quéa xini yo ña co cúu toho da Cristo jáchi tá ná quixi ndusa Cristo cán ni in na a cándaa ini ndá ñuu quixi da —nacachi na cán cáhan na sahá Jesús.

<sup>28</sup> Ta nani jánaha Jesús ini veñuhu cáhnu cán já nacasahá cáhan cóhó a já nacachi a já:

—Mé a ndaa xini vaha ndó yehe ta xini ndó ndá ñuu naquixi i. Joo coo vaxi yehe cuéntá mí i. Mé Ndióxi nachindahá yehe vaxi i, mé a cán cája ña ndaa. Joo mé

ndó cō xínj toho ndó a. <sup>29</sup> Yehe xínj vaha i yo cúu mé á jáchj naquixi i nu ín mé á ta nāchindahá mé á yehe vaxi i —nācachi a.

<sup>30</sup> Anda já ndúcú nā tiin na Jesús chicaan nā a vecaa joo ni in na coó nasahan ndeé ini tiin ñahá jáchj cámaní yí ndindaa hora tiin na a. <sup>31</sup> Ta cuaha táhan ñayivi naxini johō nuú nācahan Jesús cán nācandúsa na mé á ta já cáchj nā já:

—Á a juú da yóho cúu Cristo jáchj tá ná quixi inga da ama ná caja da ñaha xitúhún chága a juú ga da yóho —nācachi na.

*Ndúcú nā fariseo chicaan nā Jesús vecaa*

<sup>32</sup> Tá naxini johō nā fariseo ña cáhan núu ñayivi sahá Jesús já nandindeé ini na ta nandindeé ini ri nā sacuaaha nuú jutū cán chí nāchindahá nā java soldado cuéntá veñuhu cáhnu cán ña ná tiin na Jesús chicaan nā a vecaa. <sup>33</sup> Anda já nācachi tucu Jesús já:

—Chá tiempo cuití va coo tóo i xihj nđo ñuyíví yóho jáchj tá nāndihí já cūhūn tucu u nu ín mé á nāchindahá yehe. <sup>34</sup> Anda jáví caca nuu ndó ndinducú ndó yehe joo a ndítahan ndó yehe jáchj a cúu cūhūn ndó nuú coo i —nācachi Jesús.

<sup>35</sup> Tá naxini johō nā Israel cán ña nācachi Jesús já nācasáhá ndáca tūhūn táhan na já cáchj nā já:

—Ta ndáchí já cūhūn ri da yóho ña cáchj da ña a cúu nditahan í da. Á cūhūn xicá da ñuu nā tóho nu ndúu nā Israel ña ná jānaħa da nuú nā griego. <sup>36</sup> Ndiá cúnj cachi da xihj yó tá nācachi da ña ndinducú yó da ta a ndítahan toho í da. Jáchj nācachi da xihj yó ña a cúu coho nuú coo da —nācachi xihj táhan nā cán jáchj coó nācandaa ini na ña nācachi Jesús xihj ná.

*Jesús cúu á tátuhun yuta ticuúí*

<sup>37</sup> Ta mé quíví nu ndíhí víco cán nasacuu a quíví cáhnu chága nuú nā Israel. Ta mé quíví cán nādaça ndichi Jesús já nācayuhú a já nācachi a já:

—Ndá ndó íchj ini ticuúí, naha ndó nuú i já ná caja i ña ná ndivaha ini ndó. <sup>38</sup> Jáchj já nācahyi a nuú tūhūn Ndióxi: “Ndá nā ná cāndeé ini yehe, ini mé ínimā ná cana tátuhun yuta ticuúí, dó caja ña ná catacu na” —nācachi Jesús xihj nā cán.

<sup>39</sup> Ña cúnj Jesús cachi a xihj nā yóho quéa tá ná cāndeé ini na mé á já xinu quíví ndiquehe na ínimā yí Ndióxi ini ínimā ná. Vatí mé a ndaa a ñaha toho xinu ínimā yí Ndióxi ini ñayivi jáchj cámaní yí va ndindita Jesús ndicáhnu ndivaha mé á indiví.

*Sa jín sa jín ñaha cáhan ñayivi sahá Jesús*

<sup>40</sup> Java nā ndúu tañu ñayivi cuaha cán tá naxini johō na ña yóho já nācasáhá cáchj nā já:

—Jivi ndusa da yóho cúu profeta nacachi Ndióxi chin-dahá a ñuyívi yóho —cáchi na.

41 Ta java na cáchi na sahá Jesús ña cúu á Cristo, da nachindahá Ndióxi cacomí cuénta sahá ñayivi. Ta java na cáchi na ña a juú toho a jáchi cáhan na ña a cúu toho quixi Cristo estado Galilea.

42 Jáchi cáchi tuhun Ndióxi ña tá ná quixi Cristo ñuyívi yóho cacuu da da quixi chichi David, da nasacomí cuénta sahá ñayivi Israel sanahá. Ta cáchi tuhun Ndióxi ña cacu da cán ñuu Belén nuú nacacu mé David cán.

43 Ta chí nacasáhá na sáhdá java táhan na sahá ña coó nandique táhan tuhun na saha Jesús. 44 Ta java na cúni na tiin na a ña ná cañehe ñahá na cuhun a vecaa. Joo ni in na coó natiin ñahá.

*Co cúni na jutixia candúsa na Jesús*

45 Tá nandihí já nandicó coo soldado cuénta veñuhu cán nu ndúu na fariseo xihín na sacuahá nuú jutú cán joo coó Jesús ñehe na ná casaa na. Já nacasáhá na ndúu cán ndáca tuhún ñahá na já cáchi na já:

—Ndá cuénta queá coó natiin ndó da —nacachi na cán xihín soldado.

46 Anda já nanducú ñehe soldado cán tuhun nu ná já cáchi da já xihín ná:

—Nacatóntó nde naxini johó nde nu cáhan da jáchi ñúchí ndivaha cáhan da ta ni in túhún na coó nacahan

tá quiahva cáhan mé dá —nacachi soldado cán.

47 Já nacachi na fariseo já xihín dá:

—Á jári ndóhó va najándahvi da jan viti. 48 Jáchi janda ni in túhún toho táhan na sacuahá ndúu tañu mé nde co candúsa nde da jan. Ta ni in na fariseo co candúsa na nu cáhan Jesús jan. 49 Joo cháhan va vaxi jatá ñayivi cándéé ini Jesús jan jáchi co xini na ña cáchi ley Moisés —nacachi na fariseo xihín soldado.

50 Anda já nandicahan Nicodemo, da cúu in táhan na fariseo cán, mé dá nasahan da nandituhún xihín Jesús in ñuu. Já nacachi da já xihín na java ga cán:

51 —Cáchi ley ña a cuú tiín in taa ta já chicaan ndaja nacuu da vecaa. Ña cáchi ley queá ndítahan cuni johó í nuú cahan da já ná candaa ini ndaja caa ña nacaja da —nacachi Nicodemo.

52 Anda já nacaja cuehe na xihín Nicodemo já nacachi na já xihín dá:

—Á da Galilea cúu ri yóhó va. Cuáhán cahvi vaha tuhun Ndióxi já cunún ña co cána ni in profeta estado Galilea —nacachi na xihín Nicodemo.

53 Tá nandihí já nandicuíta nuu ndihí na cán cuánúhu ná vehe na.

## 8

*Cája cáhnu ini Jesús sahá in ñáñáha*

1 Ta ndaja coo naquee Jesús cuahan chí yucu yitó olivo.

2 Ta tá nativi inga quivi itaan

já nandico coo tucu a veñuhu cáhnu cán. Ta tá nacayati ñayivi nu á já nasacoo a ta nacasáhá jánaha nu ná.

<sup>3</sup> Ta ndaja coo na jánaha ley Moisés xihín na fariseo ñehe na in ñañáha nasaa na nu á. Mé ñañáha cán nanditahan na ña mé hora cándúhu ña xihín in dataa, da co cúu yí ña. Ta já ñehe na ña nasacu ndichi na ña nuú na ndúu cán.

<sup>4</sup> Já nacachi na já xihín Jesús:

—Candehé ndo Maestro. Nanditahan nde ñañáha yoho cándúhu ña xihín in dataa, da co cúu yí ña. <sup>5</sup> Ta nu ley najandacoo Moisés nuú nde táhnda chuun ña ná cuun nde yuu najihí cája já. Ta mé ndó ndía cachi ndó —nacachi na.

<sup>6</sup> Nacachi na cán já xihín Jesús jáchi cúni na coto ndojó cuití ñahá na ta cúni na ñehe íni na jácojo na cuachi jatá Jesús. Tá nandihí já nasacoo Jesús já nacasáhá cáhyí a nu ñúhu cán xihín nducu ndáha á. <sup>7</sup> Ta sahá ña ndúcú ndéé na cán ndaca tuhún ñahá na nandaca ndichi Jesús já nacachi a já xihín ná:

—Ndá ndó, na coo nacaja cuachi jácana jihna ñúhú ndó yuu jatá ña —nacachi a xihín ná.

<sup>8</sup> Já nasacoo tucu a cáhyí a nu ñúhu cán xihín nducu ndáha á. <sup>9</sup> Ta tá naxini joho tóco ndihí na cán ña nacachi Jesús já nacasáhá na cáchan nuu ná ta tá in tá in na nacasáhá quee na cuahan na. Ta jihna ñúhú ga na yatá nacasáhá quee cuahan já ndíco na yuta chága cuahan

na. Ta tá sa naquee ndihí na cuahan na já nacandoo mé Jesús xihín ña cán. <sup>10</sup> Anda já nandaca ndichi a ta nandaca tuhún a ña já nacachi a já xihín ña:

—Ndáchí cuahan na jácojo cuachi jatun. Á coo ga na jácojo cuachi jatun viti —nacachi Jesús xihín ña.

<sup>11</sup> Anda já nacachi ña cán já xihín Jesús:

—Mé a ndaa coo ga na.

Anda já nacachi Jesús já:

—Ta ni yehe a chácan i cuachi jatun. Cuánúhu vehún ta a cája gaún cuachi —nacachi a.

*Jesús cúu á tátuhun ñúhu ña jándiyéhe ínima ñayivi*

<sup>12</sup> Já nacasáhá tucu Jesús cáhan xihín ñayivi já cáhí a já xihín ná:

—Yehe cúu u tátuhun ñúhu ña jándiyéhe ínima ñayivi ta ndá na candeé ini yehe cúu á tátuhun a cáca ga na nuú naá. Jáchi jándiyéhe e nu ná ta cája i ña ná catacu na anda ama cáa quivi.

<sup>13</sup> Anda já nacachi na fariseo já:

—Saha mé vún cáhun ta xihín ña jan náhún ña cúnun ndíñehe jícun mún. Ta xihín ña jan náha ña co cáhun ña ndaa —nacachi na.

<sup>14</sup> Anda já nacachi Jesús já xihín ná:

—Tóco ndihí ña cáhan i saha mí i cúu á ña ndaa ta ín sahá vatí mí i cáhan i ña. Jáchi xini vaña i ndá naquixi i ta xini vaña i ndá cuhun i. Joo ndóhó, co xini toho ndó ndá naquixi i ta co xini toho

ndó ndá cūhūn i. <sup>15</sup> Mé ndó cátoó ndó cándehé ndaa ndó ñayivi tá quiahva cája ñayivi ñuyívi. Joo yehe cō cája toho i já. <sup>16</sup> Joo tá ná caja víi i sahá ñayivi, caja i ña tá quiahva ndítahan caja i jáchi cája i ña ndaa. Ta a juú in túhún yehe caja víi saha ná jáchi Ndióxi, tátá i, mé a nachindahá yehe, mé á cán queá caja víi saha ná xihūn mí i. <sup>17</sup> Nu ley mé ndó cáchi a ña tá in nuú cáhan ivi ñayivi sahá ña nayaha já náha ña cúu á ña ndaa. <sup>18</sup> Ta viti cuni johō ndó jáchi quiahva já yáha ri xihūn yehe va. Jáchi yehe cúu in testigo ta cáhan i saha mí i. Ta inga testigo cúu Ndióxi, tátá i, mé a nachindahá yehe —nācachi Jesús xihūn ná.

<sup>19</sup> Anda já nandaca tuhún na Jesús já cáchi na já xihūn á: —Ndájá iin tátún jan —nācachi na.

Anda já nācachi Jesús já:

—Tá ná cuni ndó yo cúu yehe já cuu candaa ri ini ndó yo cúu tátá i. Joo cō xini ndo yo cúu yehe ta cáchi ga ví tátá i cō xini ndó a —nācachi Jesús.

<sup>20</sup> Tóco ndihi ña yóho nācachi Jesús xihūn ná nani jánaḥa ini veñuhu cánu yati nuú nasahūn satō ndée jūhūn jócō na cán. Joo ni in na cōó nasahan ndée ini tiin ñahá chicaan vecaa jáchi cōó nasahan Ndióxi ñamanī sahá ña cámanī yī ndindaa hora tiin na mé á.

*Cáhan Jesús xihūn ñayivi ña a cúu toho cūhūn na nuú cūhūn mé á*

<sup>21</sup> Anda já nācasáhá tucu Jesús cáchi a já xihūn ná:

—Vaxi quivi quee yehe cūhūn i. Ta caca nuu ndó ndíñehe ndó yehe jáchi cája tá cája ndó cuachi janda quiahva xinu quiví quivi ndó. Ta sahá ña cán queá a cúu cūhūn ndó nuú cūhūn yehe cán —nācachi Jesús.

<sup>22</sup> Anda já nācasáhá na Israel cán ndítuhún xihūn táhan na já cáchi na já:

—Á cahni da yóho mé dá cūni da ña cán queá cáchi da xihūn yo ña a cúu toho caja í cōhó nuú cūhūn da —cáchi na.

<sup>23</sup> Já nācachi tucu Jesús já:

—Mé ndó cúu ndó ñayivi ndúu ñuyívi yóho joo yehe cúu u da naquixi chí indiví. Mé ndó cúu ndó cuéntá ñuyívi yóho joo yehe cō cúu toho i cuéntá ñuyívi yóho. <sup>24</sup> Sahá ña cán queá nācachi i xihūn ndó ña caja ndó cuachi janda quiahva xinu quiví quivi ndó. Jáchi tá cō cándúsa ndó ña cúu yehe da cáchi i cúu u, da nachindahá Ndióxi, já queá quivi ndó sahá cuachi ndó —nācachi Jesús.

<sup>25</sup> Anda já nandaca tuhún na cán Jesús já nācachi na já xihūn á:

—Ta ndá da cúu yóhó, dá já —nācachi na.

Já nācachi Jesús já:

—Janda sahá va nācahan i xihūn ndó yo cúu yehe. <sup>26</sup> Ta ña xini johō i cáhan mé á nachindahá yehe, ña cán cúu ña cáhan i xihūn ñayivi ñuyívi. Ta ndinuhu ña ndaa queá



cáhan mé á. Ta mé a ndaa íin cuahá ndivaha ña núu cája ndó ta cuu tavá i sahá nu ndó tá ná caja vii i saha ndo — nacachi Jesús.

<sup>27</sup> Joo coó nacandaa ini na ña cáhan Jesús saha Ndióxi, tátá a tá nacachi a já xihín ná. <sup>28</sup> Saha ña cán quea nacachi tucu a já xihín ná:

—Tá nandihí ná cata caa ndó yehe, da nachindahá Ndióxi nduu ñayivi ndica crúxu já quea candaa ndusa ini ndó ña yehe cúu u da cáhí i cúu u. Ta ni in túhún ñaha co cája i cuéntá mí i. Ta ña jánaha i nu ndo cúu ña najánaha Ndióxi, tátá i nuú i. <sup>29</sup> Ta mé á nachindahá yehe co najándacoo ndáha toho a yehe jáchi íin tuun Ndióxi, tátá i xihín i. Ta níi tiempo ña cája i cúu ña cáji ini Ndióxi xihín —nacachi Jesús.

<sup>30</sup> Ta chí cuahá ñayivi nacandúsa na Jesús tá naxini johó na tóco ndihí ña yóho.

*Na ndúu ndáha rí quini xihín na ndúu ndáha Ndióxi*

<sup>31</sup> Anda já nacahan Jesús xihín java na Israel, na sa nacandúsa ñahá cán já nacachi a já xihín ná:

—Tá ná caja ndó tá íin nacahan i xihín ndo já nahá ndó ña mé a ndaa táhyí cúu ndó na cuéntá mí i. <sup>32</sup> Ta já candaa ini ndó ña ndaa ta ña cán caja ña ná a cácuu ga ndó tátuhun in mozo, da ndúu ndáha rí quini —nacachi Jesús.

<sup>33</sup> Anda já nacachi na cán já xihín á:

—Na naquixi chichi Abraham cúu nde. Ta janda ni in túhún tañu coó nasacuu nde mozo. Joo yóhó cáchún xihín nde ña a cácuu ga nde mozo. Ndaja cáa ña cáa ri a já —nacachi na.

<sup>34</sup> Já nacachi Jesús já xihín ná:

—Mé a ndaa ná cahan i xihín ndo. Tóco ndihí na sa caja cuachi cúu tá cúu na tátuhun mozo nuú cuachi jáchi cómi a cuéntá saha ná. <sup>35</sup> Ta da cúu mozo nuú in xitoho, coó saha dá coo nahá da xihín xitoho da jáchi vaxi quivi ndítahan quee da cuhun da. Joo da cúu jahyi mé da cúu xitoho cán íin saha dá coo nahá da xihín tátá da jáchi cúu dá da vehe tátá da. <sup>36</sup> Ta quiahva já íin xihín yehe, da cúu jahyi Ndióxi. Cája i ña ná a cácomí ga cuachi cuéntá saha ndo ta já a cácuu ga ndó tátuhun mozo nuú cuachi cája ndó. <sup>37</sup> Ta sa candaa vaha ini i ña cúu ndó ñayivi naquixi chichi Abraham. Joo mé ndó cuni ndó cahni ndó yehe jáchi co cuni ndó ndiquehe vaha ndó tuhun cáhan i. <sup>38</sup> Cáhan i saha tóco ndihí ña nanaha Ndióxi, tátá i nuú i. Joo ndóhó cája ndó ña cáhan tátá ndo xihín ndo —nacachi Jesús.

<sup>39</sup> Anda já nacachi na cán já xihín á:

—Abraham cúu tátá nde jáchi chichi da cán naquixi nde —nacachi na.

Já nacachi Jesús já xihín ná:

—Tá jivi ndusa cúu ndó na naquixi chichi Abraham

já quea caja ndó tá quiahva ñacaja da cán, nduu. <sup>40</sup> Joo ndúcú ndó cahní ndó yehe jáchi cáhan i ña ndaa xihin ndo tá cáchí i ña najánaha Ndióxi nuú i. Mé Abraham coo ñacaja toho da já. <sup>41</sup> Joo cája ndó ña núu tá quiahva cája tátá ndo —ñacachi Jesús.

Já ñacachi na cán já xihin á:

—A juú jahyi ndáhvi toho ñayivi cúu ndehe. Ndióxi cúu ndusa tátá nde —ñacachi na.

<sup>42</sup> Já ñacachi Jesús já:

—Tá Ndióxi ndusa ná cacuu tátá ndo ta quihvi ini va ndó yehe, nduu. Jáchi Ndióxi ñachindahá yehe vaxi i ta ín i yóho viti. Coó vaxi toho i cuéntá mí i. Ndióxi quea ñachindahá yehe vaxi i. <sup>43</sup> Joo co cándaa ini ndó tóco ndihi ña ndícani i nu ndo ta cúu á sahá ña co cúní ndó cuni johó ndó nu cáhan i xihin ndo. <sup>44</sup> Tátá ndo cúu tiñáhá sacuahá ta cája ndó ña cúní rí cán jáchi ñúhu ndó ndáha ri. Ta rí sáhní ndii cúu rí cán janda mé saha. Ta ni in túhún tañu coo ñatiin rí ña ndaa já cahan rí ña. Jáchi cáhan rí ña tuhún cuití va ta cuéntá mé rí quíxi ndihi ña tuhún. <sup>45</sup> Candehé ndo. Co cúní ndó candúsa ndó yehe jáchi cáhan i ña ndaa xihin ndó. <sup>46</sup> Ni in túhún toho ndó a cúu ñaha nuú ñayivi ña ín cuachi i. Ta tá cáhan i ña ndaa cuití va xihin ndó ndá cuéntá quea co cándúsa ndó yehe, dá já. <sup>47</sup> Jáchi ndá na cúu ndusa cuéntá Ndióxi táa johó na ña cúu tuhun Ndióxi. Joo náha cáxi a ña co cúu ndó cuéntá

Ndióxi jáchi co cúní ndó cuni johó ndó nu cáhan mé á xihin ndo —ñacachi Jesús.

*Janda tá cámaní cacu Abraham sa ín va Jesús*

<sup>48</sup> Anda já ñacanáhá na Israel xihín Jesús já ñacachi na já:

—Mé a ndaa cúun in da Samaria ta ndácaan rí quini inún —ñacachi na.

<sup>49</sup> Anda já ñacachi Jesús já xihin ná:

—Coó toho rí quini ndácaan ínima yehe. Ña cája i quea cája cáhnu i Ndióxi, tátá i. Joo quehe núu ndivaha ndó yehe. <sup>50</sup> Co cúní toho i ña ná caja cáhnu ndó yehe vatí mé a ndaa cúní Ndióxi ña ná caja cáhnu ndó yehe. Ta mé a cán quea caja víi saha ndo. <sup>51</sup> Mé a ndaa ná cahan i xihin ndó. Ndá na ná caja ña cáhan i yóho, na cán catacu na anda ama cáa quivi —ñacachi Jesús.

<sup>52</sup> Já ñanducú ñehe na cán tuhun nu á já ñacachi na já xihin á:

—Viti ndusa cándaa ini nde ña ndácaan rí quini inún jáchi cáchún ña tá ná caja nde ña cáhún já quea catacu nde anda ama cáa quivi. Joo xini vaha nde ña ñaxihí tá ñaxihí Abraham, tásáhnú jícó nde ta jári na profeta ñasanduu sanahá ñaxihí na. <sup>53</sup> Á cáhnu chága yóhó a juú ga Abraham, da ñasacuu tásáhnú jícó nde, dá já. Mé Abraham ñaxihí da ta jári mé na profeta ñaxihí ri na cán va. Á cájún cuéntá ña cúun da cáhnu chága a juú

ga na cán, dá já —ñacachi na xihín Jesús.

<sup>54</sup> Já ñacachi Jesús já xihín ná:

—Tá ná caja cáhnu i mí i, coó saha toho ña cája i. Joo Ndióxi, tátá i jándicáhnu a yehe. Ta jári mé ndó cáchí ndo ña jivi mé a cán cúu Ndióxi cája cáhnu ndó. <sup>55</sup> Joo co xini toho ndó yo cúu mé á. Yehe xini yo cúu mé á. Tá ná cachi i ña co xini toho i mé á, cúu u in da tuhún tátuhun mé ndó. Joo mé a ndaa xini vaha i yo cúu Ndióxi ta cája i ña cáchí mé á. <sup>56</sup> Ta mé Abraham, da nasacuu tásáhnu jícó ndo ñacajii íni da jáchi ñañehe dá tuhun ña quixi yehe ñuyívi yóho. Ta a juú quiahva ñacajii ini da tá ñaxini da ña yóho —ñacachi Jesús.

<sup>57</sup> Anda já cánahá chága na Israel xihín á já ñacachi na já xihín á:

—Ni ivi jícó uxu cuia co ndacaan yóhó viti. Ta ndaja cúu cáchún ñaxinún Abraham, da cúu tásáhnu jícó nde —ñacachi na.

<sup>58</sup> Já ñanducú ñehe Jesús tuhun nu ná já ñacachi a já xihín ná:

—Mé a ndaa ná cahan i xihín ndo. Janda tá cámaní cacu Abraham sa íin va yehe jáchi cúu u Ndióxi —ñacachi Jesús.

<sup>59</sup> Anda já ñatiin na Israel cán yuu ña janí na jatá. Joo ñandacoo jehé Jesús já ñayaha tañu na cán ta ñaquee a veñuhu cáhnu cán cuahan.

## 9

*Cája Jesús ña ná ndinuna nuú in dataa ñacacu cuáa*

<sup>1</sup> In tañu tá xíca Jesús cuahan já ñaxini a in dataa, da ñacacu cuáa. <sup>2</sup> Anda já ñacasáhá na xíca tuun xihín Jesús cán ndaca tuhún na mé á sahá da cuáa cán já cáchí na já xihín á:

—Maestro, ndá cuéntá quéa ñacacu cuáa da yóho. Á ñacacu cuáa da sahá cuachi ñacaja tátá da á náná da. Á ñacacu cuáa da sahá cuachi ñacaja mé dá —ñacachi na.

<sup>3</sup> Já ñanducú ñehe Jesús tuhun nu ná já ñacachi a já xihín ná:

—Coó ñacacu cuáa toho da yóho sahá cuachi mé dá ta ni sahá cuachi tátá da á náná da. Ñacacu cuáa da já ná ñaha i nuú ñayivi ndá quiahva náhnu ñaha cúu cája Ndióxi. <sup>4</sup> Jáchi ndítahan caja i chuun, ña ñachindahá tátá i caja i nani xíca nuu i ñuyívi yóho. Ta cúu á tátuhun ndiví táhyí cúu á viti joo vaxi quivi a cóo ga i caja i ña yóho ta já cacuu a tátuhun ñacuaá ndivaha. Ta mé tiempo já ni in na a cúu caja chúun. <sup>5</sup> Nani íin tóo i ñuyívi yóho cúu á tátuhun jándiyéhe mí i nuú na ndúu ñuyívi yóho —ñacachi Jesús.

<sup>6</sup> Tá ñandihi ñacachi Jesús ña yóho já ñaxihnu a tójíi a nu ñúhu. Ta xihín tójíi a cán ñacavaha in mbohla loho ndahyi ta ñachindaa mé á ña nduchú núu da cuáa cán. <sup>7</sup> Tá ñandihi já ñacachi a já xihín dá:

—Cuáhán chicoho naní Siloé ta cán cuchún nuún — ñacachi Jesús xihín dá. Mé tuhun Siloé yóho cúní cachi a: Da ñachindahá ña.

Anda já ñaquee mé da cuáá cán ñasahan da ñachichí nuú da ta tá ñandicó coo da cán sá sándehé va da ñacasaa da. <sup>8</sup> Ta ndaja coo java na cúu ñani táhan da xihín java na ñaxini ña sáti da cán tá ñaxini na ña sándehé tucu da já ñacachi na xihín táhan na já:

—Á a juú da yóho cúu da da cuáá sácco sáti yuhú íchi — cáchí xihín táhan na.

<sup>9</sup> Ta já cáchí java na já:

—Jivi da jan cúu dá.

Ta java na cáchí na:

—A juú toho da jan cúu dá vatí quiahva já cáa da — ñacachi na.

Joo mé da ñasahiin cuáá cán cáhan da xihín ná já cáchí da já:

—Jivi yehe cúu da ñasacuu da cuáá cán — cáchí da.

<sup>10</sup> Anda já ñacasáhá na ndáca tuhún na da já cáchí na já xihín dá:

—Ndaja ñacajún ñanuná nuun — cáchí na.

<sup>11</sup> Já ñacachi da cán já:

—Da naní Jesús cúu da ñacavaha in mbohla loho ndahyi. Ta ñachindaa da ña nuú i ta ñacachi da xihín i ña ná cuhun i cuchú nuú i chicoho naní Siloé. Ta já ñasahan i ñachichí nuú i cán ta xihín ña yóho ñanuná nuú i. Sándehé e viti — ñacachi da.

<sup>12</sup> Já ñandaca tuhún tucu na cán da já cáchí na já:

—Ta ndájá cuahan da ñandaja vaha yohó viti — ñacachi na.

—Co xini toho i — ñacachi da xihín ná.

*Ndája ndichi na fariseo da cuáá, da ñandivaha cán*

<sup>13</sup> Tá ñandihi ndáca na da ñasacuu da cuáá cán ñasahan da nuú na fariseo <sup>14</sup> jáchí ñasacuu a quivi ndíquehe ndée na tá ñandaja vaha Jesús da cuáá cán xihín mbohla loho ndahyi ñachindaa a nuú da cán. <sup>15</sup> Já ñandaca tuhún na fariseo cán da ndá quiahva ñanuná nuu dá sándehé da viti. Já ñanducú ñehe da tuhun nu ná já ñacachi da já xihín na:

—Ñachindaa da ndahyi nuú i ta ñachichí nuú i ta viti tívi nuú i sándehé e — ñacachi da xihín ná.

<sup>16</sup> Joo java na fariseo ñacachi na xihín da ñasacuu da cuáá cán já:

—Da ñandaja vaha yohó coó vaxi toho da cuéntá Ndíoxi jáchí co cája cánu da quivi ndíquehe ndée yo — ñacachi na.

Joo já cáchí java na fariseo já:

—Tá da cája cuachi ná cacuu Jesús jan ta a cúu caja da ñaha xituhún ñaha tátuhun ña yóho, nduu — ñacachi java na.

Chí coó ñacuu ndique táhan vaha tuhun na fariseo cán sahá ña cán quéa ñasahnda táhan ndaja táhan mé va na. <sup>17</sup> Já ñacasáhá ndáca tuhún tucu na da ñasacuu da cuáá cán já cáchí na já xihín dá:

—Ta viti nanuná nuun nacija da jan. Yo já cúú dá cáchún —nacachi na.

Já nanducú ñehe da tuhun nu ná já nacachi da já xihin ná:

—Yehe cáchí i ña cúú dá in profeta —nacachi da.

<sup>18</sup> Joo cóo naxeen na Israel cán candúsa na ña nasacuu da da cuaá ta ni có candúsa na ña nanuná nuu dá. Sahá ña cán quéa nasahan na nacana na tátá náná da. <sup>19</sup> Ta já nandaca tuhún na tátá da xihin náná da já nacachi na já xihin ná:

—Á jahyi ndó cúú da yóho. Á mé a ndaa sa já cuaá já caa da nacacu da. Ta ndá cuéntá quéa sa tívi nuu dá viti —nacachi na.

<sup>20</sup> Anda já nanducú ñehe na cán tuhun nuu na Israel cán já nacachi na já xihin ná:

—Cándaá cáxí ini nde ña jahyi nde cúú da yóho. Ta xini vaha nde ña nacacu cuaá da.

<sup>21</sup> Joo có xini nde ndaja nacuu nanuná nuu dá sándehe da viti. Ta ni có xini nde yo cúú da nasuná nuu dá. Jan ím mé jahyi nde. Ndaca tuhún ndó mé dá. Sa quiahva cahán mé da jan xihin ndo cúú á jáchi a juú da loho ga cúú dá jan —nacachi tátá da nasacuu da cuaá cán xihin na Israel cán.

<sup>22</sup> Nacachi na ña yóho jáchi yíhví na ña ná a quiahva ga na Israel cán ñamaní nu ná ndihvi na veñuhu. Jáchi mé na Israel cán najándique táhan na tuhun na ña a quiahva ga na ñamaní nuú ñayivi quihvi na ini veñuhu tá ta cahán na ña cúú Jesús da nachindahá

Ndióxi cacomí cuéntá sahá ñayivi. <sup>23</sup> Sahá ña cán quéa nacachi tátá náná da nasacuu da cuaá cán xihin na Israel ña ndítahan ndaca tuhún na mé dá jáchi a juú ga da loho cúú da jan.

<sup>24</sup> Tá nandihí já nacana tucu na Israel da nasacuu da cuaá cán já nacachi na já xihin dá:

—Xíní ñúhú caja cáhnún Ndióxi ta a caja cáhnún Jesús jan jáchi xini vaha nde ña cúú dá in da caja cuachi —nacachi na.

<sup>25</sup> Anda já nacachi da cán já xihin na Israel:

—Có xini toho i á cúú dá da caja cuachi á cúú dá da có caja cuachi. Ña xini ndusa i quéa nasacuu u da cuaá ta jivi da jan nasuná nuú i sándehe e viti —nacachi da xihin ná.

<sup>26</sup> Anda já nacasáhá ndaca tuhún tucu na da já cáchí na já xihin dá:

—Ta ndaja nacaja da nasuná da nduchú núún. Ndiá nacaja da xuhun —nacachi na xihin dá.

<sup>27</sup> Anda já nacachi da nasacuu da cuaá cán já xihin ná:

—Sa nacachi vi xihin ndo ndá quiahva nacaja da nasuná da nuú i. Joo có cúni ndó candúsa ndó yehe. Ndá cuéntá quéa ndaca tuhún tucu ndó yehe. Á cuhun ri ndóhó va caca nuu ndó xihin dá cúni ndo, vaha —nacachi da xihin ná.

<sup>28</sup> Já nacasáhá na Israel cán canahá na xihin dá ta já nacachi na já xihin dá:

—Yóhó va cúú da xíca nuu xihín da jan. Joo ndehe jácuaha nde ley Moisés cuití va. <sup>29</sup> Jáchi cándaḡa vaḡa ini nde ña naçahan Ndióxi xihín Moisés. Joo mé Jesús jan co cúú dá cuéntá Ndióxi ta ni co xíní nde ndájá naquixi da jan —naçachi na xihín da naçacuu da cuaá cán.

<sup>30</sup> Anda já naçachi tucu da cán já xihín ná:

—Mé a ndaa cátontó vi xihín ña yóho jáchi jivi Jesús jan naçuná da nuú i ta ndóhó ni co cándaḡa ini ndó ndá da cúú dá ta ni co xíní ndo ndájá naquixi da. <sup>31</sup> Sa xíní yo ña co xíní johó Ndióxi ña xíca taḡví ñayivi cája cuachi nu á. Joo xíní johó mé á nu cáhan ñayivi tá cája cáhnu na mé á ta tá cája na ña cúní a. <sup>32</sup> Ta viti candehé ndo. Janda saha ñuyiví a ñaha cuni johó í ña ndícuná in daḡaa nduchú núú in da naçacu cuaá. <sup>33</sup> Ta Jesús yóho a cúu toho caja cuná a nuú i tá ta co cúú á ña naquixi cuéntá Ndióxi —naçachi da.

<sup>34</sup> Anda já nanducú ñehe na cán tuhun nu dá já naçachi na já xihín dá:

—Anda tá naçacún naçhutú ndaún xihín cuachi. Ta viti chí cúní ri yóho jánaḡhún ndehe —naçachi na Israel cán xihín dá.

Anda já naçaxí na da veñuhu cán.

*Ñayivi, na sándehe cúú ná tátuhun na co tívi nuu*

<sup>35</sup> Tá nandihí já naçandaḡa ini Jesús ña naçaxí na da naçacuu da cuaá cán veñuhu.

Ta tá nanditahan tucu Jesús da já naçachi a já xihín dá:

—Á cándee inún da naçindahá Ndióxi nduu ñayivi —naçachi Jesús xihín dá.

<sup>36</sup> Já naçachi da já xihín á:

—Cachi ndó xihín i yo já cúú dá ña ná cuu candee ini i da —naçachi da.

<sup>37</sup> Anda já naçachi Jesús já xihín dá:

—Sa naçini vún yehe ta jivi yehe, da cáhan xuhun yóho cúú da naçindahá Ndióxi nduu ñayivi —naçachi Jesús.

<sup>38</sup> Ta tá naçachi Jesús ña yóho já naçaxítí da cán nu á caja cáhnu da a já naçachi da já xihín á:

—Mé a ndaa cándee ini i ndohó, xitoho i —naçachi da.

<sup>39</sup> Anda já naçachi tucu Jesús já xihín dá:

—Yehe naquixi i ñuyiví yóho já ná naḡa i nuú ñayivi ndá quiahva ndáa ña cája na. Jáchi ndá na cándee ini yehe cúú ná tátuhun na sa nandiyehé nuu. Joo ndá na cáhán ña cúú ná na sa nandiyehé nuu cúú ná tátuhun na cuaá —naçachi Jesús.

<sup>40</sup> Ta java na fariseo, na ndíta xihín Jesús cán tá naçini johó na ña yóho já nandaça tuhún na mé á já cáchí na já:

—Á co cáhún ña cúú ri ndehe va na cuaá —naçachi na.

<sup>41</sup> Anda já naçachi Jesús já xihín ná:

—Tá ná ndicuni ndó ña cúú ndó tátuhun na cuaá ta co toho cuachi ndó, nduu. Joo tá cáchí ndó ña tívi vaḡa

ndivaha nuu ndo ta co xini ñuhu ndo in na jannah ndohó sahá ña cán quea in tá in cuachi ndó —nacachi Jesús xihin ná.

## 10

*Jesús cúu á tátuhun in da ndáa ndicachi*

<sup>1</sup> Andá já nacachi Jesús já:

—Mé a ndaa ná cahan i xihin ndo. Tá ná quihvi in dataa ini in corra nu ñuhu ndicachi joo co cuni da quihvi da chí yéhe nu quihvi mé rí ta ña cája da quea ndáva ndojó da corra ri já náha xicá a ña cúu dá da cuihná. <sup>2</sup> Joo mé da quihvi chí yéhe cúu dá da ndáa ndicachi. <sup>3</sup> Ta mé da ndáa yéhe corra nu ñuhu ndicachi cán suná da yéhe ña ná ndihvi da ndáa ndicachi ta jácana da rí cán tá quivi in in rí. Ta mé ndicachi cán ndicuni rí tachí dá já queta rí cuahan rí caca nuu rí xihin dá. <sup>4</sup> Ta tá sa naqueta ndihi rí já ndaca da ri. Ta cánúu da nu ri cuahan da já vaha cuahan rí xihin dá jáchi ndicuni vaha rí tachí dá. <sup>5</sup> Joo co ndico rí jatá ñayivi tóho jáchi co ndicuni rí tachí ná jáchi cúu ná na tóho. Ña cája rí quea xinu rí nu ná —nacachi Jesús xihin na fariseo.

<sup>6</sup> Ta ña yóho nasacuu in quiahva nasacu Jesús nuú na fariseo joo coo nacandaa ini na ña cuni mé á cachi a xihin ná.

<sup>7</sup> Andá já nacachi tucu Jesús já xihin ná:

—Mé a ndaa ná cahan i xihin ndo. Yehe cúu u

tátuhun in yéhe nu yáha ndicachi já ndihvi rí corra ri. <sup>8</sup> Tóco ndihi na naquixi tá camaní xinu i ñuyivi yóho najándahvi na ñayivi ta cúu ná tátuhun na cuihná. Joo coo naxeen na cúu cuénta mí i, na cúu tátuhun ndicachi taa joho na nu cahan na cán. <sup>9</sup> Yehe cúu u tátuhun in yéhe ta ndá na ná quixi nuú i quiahva i ñamaní nu ná quihvi na já ná cacu ndaa ínimá ná. Cúu á tátuhun núná nuú ndicachi quihvi rí ini corra ri ta núná nuú rí queta tucu rí jáchi in yucu cuí nu ri xixáhan rí.

<sup>10</sup> Jáchi da cúu da cuihná cán cája cuihná da ri ta sáhní da ri ta jándihi da saha ri. Joo yehe naquixi i ñuyivi yóho já ná cuu catacu vaha ñayivi ta já ná cuu coo vaha na anda ama cáa quivi. <sup>11</sup> Yehe cúu u tátuhun in da ndáa vaha ndicachi. Jáchi da cán co yíhvi da quivi da sahá ndicachi jana dá. <sup>12</sup> Joo da quehe yahvi sahá ña ndáa da ndicachi, ndáa da ri saha yahvi quehe da cán cuití va. Sahá ña cán quea tá xini da vaxi ndivahyí quehe rí in ndicachi, ña cája da quea xinu da cuahan da ta jándacoo da ndicachi ndáhvi cán. Jáchi co cúu dá da ndáa vaha rí ta ni jana dá co cúu ndicachi cán. Ta co sáhní da mé dá tá ná xinu coo ndivahyí ña ná tiin rí ndicachi cán cata nuu ñahá ri. <sup>13</sup> Da quehe yahvi cán jándacoo da ri jáchi co cúu rí jana mé dá ta co sáhní da mé dá cúu ndicachi.

<sup>14</sup> Joo yehe cúu u tátuhun

in da ndáá vaha ndicachi. Tá quiahva xini vaha da cán ndá rí cúu ndicachi janá dá quiahva já xini vaha i ndá na cúu cuéntá mí i. Ta jári xini vaha mé ná yehe. <sup>15</sup> Tá quiahva xini vaha Ndióxi, tátá i yehe ta xini vaha i mé á quiahva já xini vaha i na cúu cuéntá mí i. Ta sahá ña yóho in tiahva i ndiquiahva i mí i quivi i saha ná jáchi cúu ná tátuhun ndicachi janá i. <sup>16</sup> Joo ndúu java ga ñayivi inga ñuu ta cacuu na cuéntá mí i. Xini ñuhú ndiquehe e na cán ña ná cuni joho na nu cáhan i. Ta in nduu ndihi na ña ná candaa i tóco ndihi na.

<sup>17</sup> 'Quíhvi ini Ndióxi, tátá i yehe jáchi ndiquiahva i mí i quivi i sahá na cúu cuéntá mí i ta tá nandihí nditacu tucu u. <sup>18</sup> Ta ni in na a cúu cahni yehe ndaja nacuu joo ndiquiahva i mí i quivi i jáchi cuni caja i ña. Núná nuú i ndiquiahva i mí i quivi i ta núná nuú i nditacu tucu u. Ña yóho cúu chuun nasahnda tátá i nuú i caja i — nacachi Jesús.

<sup>19</sup> Tá naxini joho na Israel cán ña yóho já nacasáhá na sahnda táhan tucu na. <sup>20</sup> Ta cuaha táhan na cán nacasáhá cáchi na já:

—Ndá cuéntá quea táa joho ndó nu cáhan da jan ta da nacatachi va cúu dá. Tiñahá va ndacaan ini da —cáchi xihin táhan na.

<sup>21</sup> Joo java na cáhan vaha na sahá Jesús já cáchi na já:

—Ni in toho ñayivi a cúu cahán vaha nahá tátuhun cáhan Jesús yóho tá ndacaan

tiñahá ini inima ná. Jáchi ama ná cuu caja ri tiñahá jándiyehé rí nuú na cuaá — cáchi java na cán.

### *Cándaji na Israel Jesús*

<sup>22</sup> Naxinu coo quivi caja na víco nu cuía ñuu Jerusalén tá caja cáhnu na quivi naxinu veñuhu cáhnu ñuu Jerusalén. Ta mé tiempo vixi nasacuu a cán. <sup>23</sup> Ta jivi ini mé veñuhu cáhnu cán nasahiin Jesús ta xica nuu a yati yuyéhe naní Salomón. <sup>24</sup> Já nacava tiyivi na Israel cán mé á já nacasáhá ndaca tuhún na mé á já nacachi na já xihin a:

—Ndaja caa chí quivi caxi tuhun ndaun xihin nde ña á jivi ndusa cúun Cristo, da chindahá Ndióxi cacomí cuéntá sahá ñayivi. Jáchi in ivi joho cáhun xini nde ta co cándaa vaha ini nde á jivún á a juú tohún —nacachi na cán.

<sup>25</sup> Anda já nanducú ñehe Jesús tuhun nu ná já nacachi a já:

—Sa nacahan vi xihin ndó joo coo nacandúsa ndó yehe. Tóco ndihi ña náhnu caja i, caja i ña xihin ndeé sahan tátá i nuú i ta jivi mé ña náhnu jan náha nu ndó ña cúu u da nachindahá Ndióxi. <sup>26</sup> Joo ndóhó co cándúsa ndó yehe jáchi co cúu ndó tátuhun ndicachi janá i. <sup>27</sup> Joo ñayivi, na cúu tátuhun ndicachi janá i, na cán cúu na ndícuni nu cáhan i ta ndícuni i na ña cúu ná cuéntá mí i ta já ndico na yehe. <sup>28</sup> Ta caja i ña ná catacu na anda ama caa quivi já ná a ndíhi saha ná. Ta



ni in túhún ñayivi a cúu caja candaa na cán ndahá i tá sa ñúhu na ndahá i. <sup>29</sup> Ndióxi, tátá i nasahan na cán nuú i ta mé á queá cáhnu chága nu tóco ndihi ñaha. Ta ni in na a cúu caja candaa na cán ndaha mé á. <sup>30</sup> Yehe xihin Ndióxi, tátá i in cúu va nde —nacachi Jesús.

<sup>31</sup> Anda já natiin tucu na Israel cán yuu cuun na Jesús ña cahni ñahá na. <sup>32</sup> Anda já nacachi Jesús já xihin ná:

—Cuahá ndivaha ña náhnu nacaja i nu ndó, ña nasahan tátá i ñamaní nuú i caja i nu ndo yóho ta viti cachi ndó xihín i ndá queá co táhan ini ndó xihín. Ndá cuéntá queá vaxi ndó cuun ndó yuú yehe —nacachi Jesús.

<sup>33</sup> Anda já nacachi na cán já xihín á:

—Co ndúcú toho nde cuun nde yuu yohó sahá ña náhnu cájún. Cuun nde yuu yohó cúni nde jáchi ndája núun Ndióxi. Jáchi cúun in ta tátuhun ndehe ta ndájún mún cúun Ndióxi —nacachi na cán.

<sup>34</sup> Anda já nacachi Jesús já xihín ná:

—Nu ley najándaco Moisés nu ndo cáchi a ña cúu ñayivi tátuhun Ndióxi sahá ña cúu ná jahyi mé á. <sup>35</sup> Ta sa cándaá vaha iní ña a cuú tahnu ña cáhan tuhun Ndióxi. Ta nacachi Ndióxi xihín na nandiquehe tuhun mé á ña cúu ná tátuhun Ndióxi. <sup>36</sup> Sahá ña cán queá ndá cuéntá queá cáchi ndo ña nandaja núu i Ndióxi sahá

ña cáchi i cúu u in túhún jini já jahyi Ndióxi. Jáchi mé Ndióxi nacaxi a yehe ta nachindahá a yehe vaxi i ñuyivi yóho. <sup>37</sup> Sahá ña cán queá co ndítahan candúsa ndó yehe tá ta co cája i ña náhnu tátuhun ña cája Ndióxi, tátá i. <sup>38</sup> Joo tá cája i ña já queá xini ñuhú candúsa ndó ña náhnu xini ndo cája i vatí co cúni ndó candúsa ndó yehe. Ta xihín ña yóho cuu candúsa ndó ña in cúu Ndióxi, tátá i xihín i ta in cúu yehe xihín mé á —nacachi Jesús.

<sup>39</sup> Anda já ndúcú tucu na tiin na a chicaan na a vecaá joo nachijehé a nu ná cuahan.

<sup>40</sup> Ta já naquee tucu a cuahan chí inga xoo yuta Jordán nuú nacaja ndúta Juan ñayivi nu cuítí cán. Ta nacandoo Jesús nasahiin a cán. <sup>41</sup> Ta cuahá ñayivi nacasahá na xinu na nu á ta já cáchi xihín táhan na já:

—Mé a ndaa coó toho ñaha xituhún nacaja Juan. Joo tóco ndihi ña nacachi da cán saha Jesús yóho cúu á ña ndaa —nacachi xihín táhan na cán.

<sup>42</sup> Ta cuaha ná nacandúsa na Jesús mé nuú nasahiin a cán.

## 11

*Tá najánditacu Jesús Lázaro*

<sup>1</sup> Ta ndaja coo naqueehe cuehe in da naní Lázaro, da ñuu Betania. Ta jivi mé ñuu yóho cúu ri ñuu María xihín Marta, quihvi ña. <sup>2</sup> Mé María, ña cúu quiahva Lázaro yóho cúu ña ña naxojo

perfume jatá sahá Jesús ta najándihichí ñá dō xihín ijí jini ña. <sup>3</sup> Ta mé ñá xihín quihvi ña nachindahá na chuun cuahan nuú Jesús ña cáahví ndivaha Lázaro, da quihvi ini mé á.

<sup>4</sup> Ta tá ñañehe Jesús tuhun yóho já ñacachi a já:

—A juú cuehe cahní ñahá cúu toho ña yóho. Joo xihín cuehe yóho cuu ñaha ndá quiahva cáhnu cúu Ndióxi. Ta xihín ña yóho ñaha nuú ñayivi ndá quiahva cáhnu cúu yehe, da cúu in túhún jini já jahyi Ndióxi —ñacachi a.

<sup>5</sup> Ta ndaja coo quihvi ndivaha ini Jesús Marta xihín quihvi ñá ta quiahva já quihvi ri ini a Lázaro viti. <sup>6</sup> Joo tá ñañehe Jesús tuhun ña quihvi Lázaro já ñacando a ivi quivi chága mé nuú ñasahin a cán. <sup>7</sup> Ta tá ñandihí já ñacachi Jesús já xihín na xíca tuun xihín á:

—Xihín ndo ná cohō tucú chí Judea —ñacachi a.

<sup>8</sup> Anda já ñacachi na cán já xihín á:

—Maestro, viti chá va ndúcú ñayivi ndúu cán cahní na ndohó xihín yuu ta cáa tucu ri ndó cūhūn ndo cūni ndo —ñacachi na.

<sup>9</sup> Joo sa xini Jesús ña cámani xinu quivi quivi a sahá ña cán queá ñacachi a já xihín ná:

—Candehé ndó. Uxu ivi hora ndáca in quivi ta tá xíca nuu na ndiví a cúu toho cachihin saha ná jáchí tívi xíca yehe nu xíca na. <sup>10</sup> Joo ndá na xíca nuu ñuú cuu cachihin saha

na jáchí co yehe nu xíca na —ñacachi Jesús.

<sup>11</sup> Tá ñandihí já ñacachi tucu a já xihín ná:

—Sa ñaquiji va amigo yo Lázaro viti. Joo vílaá cūhūn i ndiñehe e da —ñacachi Jesús.

<sup>12</sup> Anda já ñacachi na cán já xihín á:

—Maestro, tá ta ñanaá ini da ñaquiji dá já queá in va ha da, dá já —ñacachi na cán.

<sup>13</sup> Joo ña cūni cachi Jesús queá sa ñaxihí va Lázaro vatí na xíca tuun xihín a cán ñacahan na ña cūni mé á cachi a queá ñaquiji Lázaro cán tá quiahva quiji tóco ndihí ñayivi. <sup>14</sup> Anda já ñacahan cáxí táhyí tucu Jesús xihín ná já ñacachi a já:

—Ñaxihí va Lázaro. <sup>15</sup> Joo cájii va ini i ña coó i ná sahin i tá ñaxihí da jáchí ña yóho chindeé a ndohó já ná candúsa chága ndó yehe. Cōhō candehé yo Lázaro —ñacachi Jesús.

<sup>16</sup> Anda já ñacasáhá Tomás, da cahan na cuatí xihín cán cahan da xihín java ga na xíca tuun xihín Jesús já cáchí da já:

—Cōhō ri mí ví quivi xihín mé dá, dá já —cáchí da.

Já ñaquee na cuahan na.

*Cúu cája Jesús ña ná nditacu tucu na sa ñaxihí*

<sup>17</sup> Tá ñaxinu coo Jesús yati ñuu Betania cán já ñañehe á tuhun ña sa ñaxihí Lázaro ta sa in comí quivi nachicaan va na da ini in cáva. <sup>18</sup> Mé ñuu Betania cán ñehe táhan yati a xihín Jerusalén tátuhun uní kilometro ñehe táhan.

19 Ta cuaha táhan na Israel cán nasahan na ndúu tóo na xihin Marta xihin María tá quiahva jáyaha na ini na sahá ña naxihí Lázaro quiahva na. 20 Ta tá nañehe Marta tuhun ña cáyati Jesús ñuu cán cuahan já ndáva ña nasahan ñehe ñahá ña. Joo nacandoo María vehe. 21 Tá nandique táhan Marta xihin Jesús já nacachi ñá já xihin á:

—Xitoho, tá ná coo ndó yóho ta ni a quiví toho Lázaro quiahva i, nduu. 22 Joo cándaqa vaha ini i ña tá ná caca ndó ña cúní mé ndó nu Ndióxi quiahva va mé a cán ña nu ndo —nacachi Marta.

23 Anda já nacachi Jesús já xihin ñá:

—Candehé Marta. A ndícani inún jáchi nditacu tucu va Lázaro, quiahvún jan —nacachi Jesús.

24 Anda já nacachi ñá já xihin á:

—Sa xini vi ña nditacu tucu quiahva i tá ná xinu coo quivi nu ndihí tá ná nditacu tóco ndihi na sa naxihí —nacachi Marta.

25 Já nacachi Jesús já xihin ñá:

—Yehe cúu da cuu caja ña ná nditacu tucu ndji ta cuu caja i ña ná catacu ñayivi anda ama cáa quivi. Ta ndá na candeé ini yehe vatí ná quivi na catacu tá catacu na.

26 Ta tóco ndihi na candeé ini yehe catacu na anda ama cáa quivi ta a ndihi toho saha ná ini indayá. Á cándúsún ña cahan i xuhun —nacachi Jesús.

27 Anda já nacachi Marta já xihin á:

—Cándúsa i ndohó ña cúu ndó in túhún jini já jahyi Ndióxi ta cándúsa i ña mé ndó cúu Cristo, da nachindahá Ndióxi quixi ñuyiví yóho —nacachi ñá xihin á.

### *Sácu Jesús saha Lázaro*

28 Tá nandihí já naquee Marta nasahan ñá cana ñá María quihvi ña. Ta já nacahan yaá ña xihin María já nacachi ñá já xihin ña:

—Sa naxinu coo Jesús, xitoho í ta in a yóho. Cuahán nu in a jáchi cána yohó —nacachi Marta xihin quihvi ñá.

29 Tá naxini joho María cán ña nacachi quihvi ña xihin ña chí ivi laá ndáva ña nasahan ña nu in Jesús. 30 Mé Jesús nasandati a cán yuhú ñuu, mé nuú nandique táhan xihin Marta cán. 31 Ta ndaja coo mé na Israel, na ndúu jáyaha ini ñá cán tá naxini na naquee númi joho ñá cuahan ña já nandicuita na ndíco na jata ñá cuahan na. Jáchi nacahán na cuahan ñá cuacu ñá nu ndácaan Lázaro, quiahva ñá.

32 Ta tá naxinu coo ñá nu in Jesús já nacaxítí ña nu á já nacasáhá cáchi ña já xihin á:

—Tá ná coo ndó yóho, nduu ta ni a quiví toho Lázaro quiahva i —nacachi ñá.

33 Ta tá naxini Jesús ña sácu cóhó María xihin na Israel, na ndíco nasaa xihin ñá cán já natahvi ndivaha ini a janda quiahva nandisaa ini a. 34 Anda já nandaca tuhún

a María cán já ñacachi a já xih̄in ña:

—Ndájá ñachicaan ndó da já —ñacachi Jesús.

—Ñaha quíi ndó, xitoho i. Candehé ndo nuú ñachicaan nde da —ñacachi María.

<sup>35</sup> Anda já ñasacu Jesús.

<sup>36</sup> Tá ñaxini ña Israel ña yóho já ñacasáhá cáchí xih̄in táhan na já:

—Candehé ndo ndaja náha ñaquihvi ini Jesús yóho Lázaro —ñacachi na.

<sup>37</sup> Ta java na ñacasáhá cáchí ña já:

—Mé Jesús yóho ñasuná da nduchú núu ña cuáá. Á chí a cuú cuití caja da chindeé da Lázaro já ná a quíví da, nduu —ñacachi java ña cán.

#### *Jánditacu tucu Jesús Lázaro*

<sup>38</sup> Tá ñandihí já ñacasáhá táhvi ndivaha tucu ini Jesús ta já ñacayati a nuú ñachicaan ña yiquí cuñu Lázaro. Mé nuú ndácaan da cán ñasacuu a in ndica cáva ta in yuu jáhndá cáhnu ñasaji nuu yéhé cán.

<sup>39</sup> Anda já ñandicañan Jesús xih̄in java ña ndúu cán ña ná jácaxoo na yuu ndáji nuu nu ndácaan Lázaro cán. Joo ndaja coo Marta, ña cúu quiahva mé ndii cán ñacasáhá ña cáchí ña já xih̄in Jesús:

—Candehé ndo, xitoho i. Sa quini cúu sáhan ndii quiahva i jan jáchí sa ín comí quíví ñaxih̄i da —ñacachi ña.

<sup>40</sup> Anda já ñacachi Jesús já xih̄in ña:

—Xíní ñúhú ndicuhun inún tá ñacachi i xuhun ña tá ná candúsún Ndióxi já cunún

ndá quiahva cáhnu ñaha cuu caja mé á —ñacachi Jesús.

<sup>41</sup> Tá ñandihí já ñajácaxoo na yuu cáhnu ña ñasaji nuu nuú ñasandacaan Lázaro. Já ñandíñehe Jesús nuu á chí in-diví já ñacachi a já:

—Tátá Ndióxi, ndiquiahva i ndixahvi nu ndo jáchí ñaxini joho ndó nuú ñacahan i xih̄in ndo. <sup>42</sup> Vatí mé a ndaa cándaá vaha ini i ña níi tiempo xini joho ndó nu cáhan i xih̄in ndo. Joo cáhan i ña yóho sahá ña ná cuni joho ñayivi ndúu xih̄in i yóho já ná candúsa na ña mé ndó ñachindahá ndó yehe vaxi i ñuyíví yóho —ñacachi Jesús ndiquiahva ndixahvi nu Ndióxi.

<sup>43</sup> Tá ñandihí já ñacayuhú cóho a já ñacachi a já:

—Lázaro, cuáhán queta.

<sup>44</sup> Tá ñandihí já ñaqueta Lázaro nuú ñasandacaan da. Ñacava nuu ndáha dá anda sahá dá xih̄in ticoto ta ndáji jáhma nuu dá ñaqueta da vaxi da. Anda já ñacachi Jesús xih̄in java ña ndúu cán ña ná ndaxí ña da já ná quee da cuhun da. Ta já ñacaja na.

*Jándique táhan ña Israel tuhun na ña tiin na Jesús chícqaan na vecqa*

(Mt. 26:1-5; Mr. 14:1-2; Lc. 22:1-2)

<sup>45</sup> Ta cuaha táhan ña Israel, ña ndáca táhan ñasahan xih̄in María cán tá ñaxini na ña ñajánditacu tucu Jesús Lázaro cán já ñacandúsa na mé á.

<sup>46</sup> Joo java táhan ña Israel cán ndáva na ñasahan ña cáhan ña xih̄in ña fariseo ta ñandicani na nu ná ña ñacaja

Jesús. <sup>47</sup> Anda já nacasáhá na fariseo xihín na sacuahá nuú jutú cán najátaca na tóco ndihi na sacuahá nuú na Israel já nacachi na já xihín ná:

—Ndía caja í xihín Jesús viti jáchi cuahá ndivaha ñaha xitúhún cája da yóho. <sup>48</sup> Xíní ñúhú caji nuu í nu dá jáchi tá ná a cáji nuu í nu dá vaxi quivi tá tóco ndihi ñayivi candéé ini na mé dá. Ta xihín ña yóho xinú ini na jutixia ñuu Roma quixi na jándicani na veñuhu í ta jándihi na saha tóco ndihi mí, na Israel — nacachi na.

<sup>49</sup> Joo in táhan da ndúu cán nani da Caifás, da nasacuu da sacuahá chága nu ndíhi jutú mé cuiá cán, nandicahan da já nacachi da já:

—Mé ndó cúu ndó ñayivi co xíní túni. <sup>50</sup> Jáchi co cándaá ini ndó ña vaha chága ña ná quivi in taá nu ndíhi ñayivi já ná a ndíhi saha tóco ndihi ñayivi. Ña cán quéa cáhán í ña vaha chága ná quivi Jesús jan já ná a ndíhi saha mí — nacachi Caifás.

<sup>51</sup> Joo coó nacahan Caifás ña yóho sahá ña naquixi a jini mé dá. Ndióxi quéa najácahan ínimá dá ña cáchí da já jáchi mé tiempo já nasacuu da sacuahá chága nu ndíhi jutú ta najácahan Ndióxi ínimá dá ña ná cachi da ña ndítahan quivi Jesús sahá na Israel. <sup>52</sup> Ta a juú sahá in túhún na Israel cuití va vaha jáchi mé Jesús nanditahan quivi a saha tóco ndihi na cúu cuéntá Ndióxi, na ndícuíta

nuu ndúu ndijáá ñuyívi já ná cuu coo in ñuu. <sup>53</sup> Chí janda mé quivi já nasacu ini na Israel cán cahni na Jesús.

<sup>54</sup> Sahá ña cán quéa coó naxica nuu tívi ga Jesús tañu na Israel cán. Ña nacaja mé á quéa naquee a estado Judea cán já nasahan chí in ñuu nani Efraín, ña íin yati xoo yucú íchí nuú coó ñayivi. Cán nasahin a xihín na xica tuun xihin á.

<sup>55</sup> Tá nacayati quivi coo vicó pascua cája na Israel já naquee cuahá ñayivi ndúu ndijáá ñuu cán cuahan na chí Jerusalén jáchi cúni na ndaja vii na mé ná, ná coo tiahva na tá quiahva nasahnda ley Moisés nu ná caja na tá camani chá quivi coo vicó pascua. <sup>56</sup> Tá nataca ñayivi ñuu Jerusalén cán nacasáhá ndúcú na Jesús. Joo nani ñúhu na veñuhu cáhnu cán ndáca tuhún táhan na sahá Jesús já cáchí xihin táhan na já:

—Ndaja xíní ndo á quixi Jesús á a quixi toho a vicó pascua yóho —nacachi xihin táhan na cán.

<sup>57</sup> Ta na fariseo xihín na sacuahá nuú jutú nasahnda na chuun ña ndá na ná cuni Jesús já ná cuhun na caxi tuhun na xihín na cán ndájá íin a jáchi cúni na tiin na a chicaan na a vecaa.

## 12

*Tá nachojó in ñañáha perfume sahá Jesús*

(Mt. 26:6-13; Mr. 14:3-9)

<sup>1</sup> Ta tá camani íñu quivi coo vicó pascua já naquee Jesús

naṣahaṅ ñuu Betania, mé ñuu nu ín Lázaro, da najánditacu tucu mé á cán. <sup>2</sup> Ta cán naṣaja ndíví na ña cajíni Jesús jáchi cúni na caja cáhnu na mé á. Ta mé Marta cúu ñá cája ndíví nu ná. Ta Lázaro cúu in táhan da ín coo nu mesa xíxi xihín Jesús. <sup>3</sup> Ta ndaja coo María naṣahaṅ ñá quehe ñá tátuhun java litro perfume, dó yahvi ndivaha. Jáchi cúu dó dó naṣavaḥa xihín ndinuhu yucu támi saḥan naní nardo. Najácuyu ñá do jaṭa saḥa Jesús. Ta tá nandihí já najáhichí ñá saḥa xihín ijí jini ña. Ta núi ini vehe cán nandicuíta nuu jíco perfume cán. <sup>4</sup> Anda já naṣini in táhan da xíca tuun xihín Jesús, da naní Judas Iscariote cán ña yóho. Mé Judas yóho cúu dá da jíco túhún Jesús tá nu ndihí ta já cáchí da já:

<sup>5</sup> —Ndá cuéntá queá coo naṣayahvi perfume yóho já ná cana jiuḥún jasá yó nuú na ndahví, nduu. Jáchi quiahva na uní ciento denario saḥa dó, nduu —naṣachi Judas cán. Ta in denario cúu ña quehe ñayivi cája chúun na in quívi.

<sup>6</sup> Joo coo naṣachi Judas ña yóho saḥa ña quíhvi ini ndusa da na ndahví, vaha. Naṣachi da já jáchi cúu dá da cuíhná ta ndáha mé dá ñúhu ndihí jiuḥún ta cája cuíhná da ña tá cúni da. <sup>7</sup> Anda já naṣachi Jesús já xihín dá:

—A cáhun xihín ñá jáchi naṣacu vaha ñá do ña ná chojó ñá do yiquí cuñu i. Jáchi sa xini ñá ña sa naṣayati quívi

quívi i. <sup>8</sup> Ta núi tiempo canduu na ndahví jan tañu ndó ta ndá tañu cúni mé ndó cuu chindeé ndó na. Joo yehe a coo tuun toho i xihín ndo —naṣachi Jesús.

*Sácu ini na sacuaḥa nuú jutú cahní na Lázaro*

<sup>9</sup> Cuahá na Israel cán nañeḥe ná tuhun ña ín Jesús ñuu Betania. Saḥa ña cán queá naṣahaṅ na cán jáchi cúni na cuni na Jesús ta cúni na cuni na Lázaro, mé da najánditacu tucu Jesús. <sup>10</sup> Anda já naṣacu ini na sacuaḥa nuú jutú cán cahní ri na Lázaro viti. <sup>11</sup> Jáchi saḥa Lázaro cán cuahá na Israel naṣasáhá na cándeé ini na Jesús. Ta najándacoo na ndíco na jaṭa na sacuaḥa nuú na Israel.

*Tá naquihvi Jesús ñuu Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Ta inga quívi itaan cuahá ndivaha ñayivi naṣinu coo na ñuu Jerusalén nuú coo vicó pascua. Ta tá naṣandaa ini na ña xinu coo Jesús ñuu Jerusalén cán <sup>13</sup> já naṣahaṅ na naṣahnda na ndáha tó ñuu já ndáva na naṣahaṅ na nañeḥe ñahá na. Ta cáyuhú na já cáchí na já:

—Cája cáhnu í Ndióxi. Cáhnu nahá ná cacuu da cómi cuéntá saḥa na Israel jáchi cúu dá da vaxi yuhú nuu Ndióxi —cáchí na.

<sup>14</sup> Nanditahan Jesús in búrru ta naṣanúu a ri tá quiahva naṣachi tuhun Ndióxi sanahá tá cáchí a já:

15 **A** cáyihví toho ndó, na ndúu ñuu Sión. Candehé ndó da cómi cuéntá saha ndó jan, cánúu da jata búrró loho vaxi da, cáchí tuhun Ndióxi.

16 Ta cóo ñacandaa ini na xica tuun xihín Jesús cán ndá cuéntá quéa cája ñayivi já xihín á. Joo chága chí nuu tá sa nandindita Jesús cuahan indivi já ñacandaa ini na ña quiahva já ndáa nuu tuhun Ndióxi sanahá ña caja na xihín Jesús.

17 Mé ñayivi, na nasanduu xihín Jesús tá ñacahan xihín Lázaro ña ná queta da nuu nanduxu da ña nditacu da, mé na cán nandicani na nuu java ga ñayivi ña ñaxini na ñacaja Jesús cán. 18 Saha ña cán quéa ñaqueta ñayivi nasahan na ñehe ná Jesús jáchi ñañehe ná tuhun sahá ña cáhnu ñacaja mé a cán. 19 Tá ñaxini na fariseo ña yóho já ñacasáhá cáchí xihín táhan na já:

—Candehé ndo. Ndá cuu caja í quee vahá í xihín da jan. Jáchi tóco ndihi ñayivi cáti na cuahan na xihín da jan —ñacachi xihín táhan na fariseo cán.

*Java na griego ndínducú na Jesús*

20 Tañu ñayivi cuaha ñaxinu cóo cája cáhnu Ndióxi víco ñuu Jerusalén cán ñaxinu cóo ri java na ñaquixi chí ñundáhyi cuéntá Grecia. 21 Ta mé na griego yóho ñacayati na nu Felipe, da ñuu Betsaida cuéntá Galilea cán. Ta já ñacasáhá na cáhan ndahví

na xihín dá já ñacachi na já xihín dá:

—Cahan nde xihín Jesús cúni nde —ñacachi na.

22 Anda já ñaquee Felipe nasahan da caxi tuhun da xihín Andrés ta já ndáca táhan ndívi da nasahan da ndícani da ña nuu Jesús. 23 Anda já ñacachi Jesús já xihín dá:

—Sa ñaxinu cóo va tiempo caja cáhnu Ndióxi yehe, da ñachindahá mé á nduu ñayivi. 24 Mé a ndaa ná cahan i xihín ndo. Tá quiahva ndihi saha in ndiquí trigo tá ndícava ña ini ñundáhyi quiahva já ndítahan nuu i quivi i. Jáchi tá ná a ndíhi saha ndiquí trigo cán já in já cacuu va ña. Joo tá ná ndihi sahá ña cán já nduta ña ta já ndicuahá ndivaha ña. 25 Ndá na cátóo chága cája ña cúni mé cuití na a juu ga ña cúni Ndióxi, na cán cúu na ndihi saha. Joo na cája ña cúni Ndióxi, na cán cúu na catacu anda ama cáa quivi. 26 Ta ndá na cúni caja chúun cuéntá mí i ndítahan nu ná candico na yehe. Jáchi nuu cóo yehe, cán cóo ri na cája ña cúni yehe. Ta na cán cacuu na na ndiñehe jícó Ndióxi.

*Cáxi tuhun Jesús ña quivi a*

27 Ta viti ñuhú cácuéha ndivaha ini i. Ta a cuú caca tahví i nu Ndióxi ña ná a quiahva mé á ñamaní ndoho ini i jáchi sahá chuun yóho ñaquixi i ñuyívi yóho. 28 Ña ndítahan cachi i quéa: “Tátá Ndióxi, cáhnu ná cacuu mé ndó” —ñacachi Jesús.

Tá naçachi Jesús ña yóho, naçahan Ndióxi indiví já naçachi a já:

—Sa nandaja cáhnui míi ta caja tucu u ña —naçachi a.

<sup>29</sup> Ta ñayivi ndúu cán tá naxini joho na ña yóho já naçachi na ña javi va cána. Ta java na naçachi na tátõ Ndióxi quéa naçahan.

<sup>30</sup> Anda já nandicahan Jesús xihin ná já naçachi a já:

—A juú sahá yehe naxini joho ndó ña yóho. Joo naçatácu a já ná cuni joho mé ndó. <sup>31</sup> Ta sa natandaa quíví cavii sahá ñayivi ndúu ñuyíví ta sa natandaa quíví ndihi sahá ña cája tiñahá sacuaha, mé rí sáhdá chuun ñuyíví yóho. <sup>32</sup> Jáchi tá ná cata caa na yehe já caja i ña ná casahá ñayivi níi cúu ñuyíví candee ini na yehe —naçachi Jesús.

<sup>33</sup> Xihin ña yóho cúni mé á ndicani a nu ná ña quivi a ndica crúxu. <sup>34</sup> Anda já naçachi ñayivi ndúu cán já xihin á:

—Tá cáhvi nde ley Moisés naçahyi sanahá já cándaa ini nde ña anda ama cáa quíví catacu da chindahá Ndióxi cacomí cuéntá sahá ñayivi. Yo já cúu da cáhnun saha. Tá ta mé a ndaa cúun da nachindahá Ndióxi nduu ñayivi, da catacu anda ama cáa quíví ndá cuéntá quéa cáchnun quivún —naçachi na xihin Jesús.

<sup>35</sup> Já naçachi Jesús já xihin ná:

—Yehe cúu da jandiyehé ínima ñayivi ta coo tóo loho chága i xihin ndo. Sahá ña

cán quéa xíní ñuhú caca nuu ndó nani jandiyehé íchi cuhun ndo ta viti núná nu ndó caja ndó ña. Jáchi vaxi quíví quivi i caja na ta anda já cacuu a tátuhun canaá yávi ta já a cándaa ini ndó ndá xoo cuhun ndo. <sup>36</sup> Xíní ñuhú candee ini ndó yehe jáchi cúu u da jandiyehé nu ndó nani íin i xihin ndó. Anda jáví xinu coo ndó cacuu ndó ñayivi cuéntá míi —naçachi Jesús.

Tá nandihi já naquee Jesús cuahan chíjehé a nu ná.

### *Cõ cándúsa na Israel Jesús*

<sup>37</sup> Vatí naçaja Jesús cuahá ña xituhún nuú ñayivi cán joo coo naxeen na candúsa na mé á. <sup>38</sup> Já naçahiin jáchi nanditahan xinu coo nuú tuhun ña naçahyi Isaiás sanahá cán tá naçachi a já:

Tátá Ndióxi, co cúni na candúsa na tuhun ña cáhan i xihin ná.

Vatí xíní na ña náhnui cája mé ndó joo co cúni na candúsa na ndohó, já naçahyi Isaiás sanahá.

<sup>39</sup> Sahá ña cán quéa coo naçuu candúsa ñahá ñayivi cán. Ta inga tucu tuhun naçahyi Isaiás quéa cáchí já:

<sup>40</sup> Mé Ndióxi quéa najácuaa ñahá ta coo nasuná a ínima ná,

já ná a cúu cándaa ini na yo cúu mé á,

já ná a cúu ndicó coo na nu mé á ña ná ndaja vaha mé á na, naçahyi Isaiás.

<sup>41</sup> Quiahva já naçahan Isaiás jáchi naxini mé dá ndá quiahva cáhnui cúu Jesús.



42 Ta cuaha táhan na Israel cán nacandeeé ini na Jesús. Ta janda java na sacuaha nuú na Israel cán nacandeeé ini na Jesús. Joo coó naxeen na nahá tuhun na sahá jáchi nayihví na taxí na fariseo cán na veñuhu. 43 Jáchi cúni na candoo vaha chága na nuú ñayivi a juú ga nu Ndióxi.

*Táhví ini ñayivi sahá cuachi na tá xíni johó na nu cáhan Jesús*

44 Tá nandihí já nacahan cóhó Jesús já nacachi a já:

—Ndá na candeé ini yehe já quéa a juú in túhún yehe candeé ini na, vaha. Jáchi candeé ini ri na Ndióxi, tátá i, mé a nachindahá yehe vaxi i ñuyívi yóho. 45 Ta ndá na xíni yehe xíni ri na mé a nachindahá yehe vaxi i ñuyívi. 46 Yehe naquixi i ñuyívi yóho ña ná jándiyéhe ínimá ñayivi já quéa ndá na ná candeé ini yehe, a canduu ga na nuú naá. 47 Joo na xíni johó nu cáhan i ta co cája na ña, a juú toho yehe chícáan cuachi jatá ná. Joo tuhun cáhan i quéa chícáan cuachi jatá ná. Jáchi coó vaxi i ñuyívi yóho chícáan i cuachi jatá ñayivi. Naquixi i já ná cuu cacu ndaa ínimá ná. 48 Ndá na cándají yehe ta co cúni na caja na ña cáhí i xihín ná, na cán cúu na cuhun índayá jáchi mé tuhun nacahan i cacuu a ña chícáan cuachi jatá ná tá ná xínu coo mé quívi nu ndíhí cuí. 49 Jáchi co jánaħa i ña quíxi jini mé cuití i. Tóco ndihí ña cáhan i ta tóco ndihí ña jánaħa i nuú

ñayivi cúu á ña nachindahá Ndióxi, tátá i yehe jánaħa i nu ná. 50 Ta cándaa cáxi ini i ña tóco ndihí ña jánaħa Ndióxi, tátá i caja ña ná cuhun na coo na indivi anda ama cáa quívi. Ta tóco ndihí ña cáhan i xihín ñayivi, cáhan i ña tá quiahva nasahnda Ndióxi, tátá i nuú i caja i —nacachi Jesús.

## 13

*Jándoo Jesús sahá na xíca tuun xihín á*

1 Tácamaní in quívi coo vicó pascua já sa xíni Jesús ña sa naxínu coo quívi quívi a jándacoo a ñuyívi yóho já ndaa mé á ndique táhan xihín Ndióxi, tátá a. Níi tiempo naquihví ini Jesús tóco ndihí na cúu cuéntá mé á ndúu ñuyívi yóho ta coó najándacoo mé á ña quíhví ini a na.

2 Ta ndaja coo ín Jesús xihín na xíca tuun xihín á xíjini na. Jihna sa najácahan tiñáhá sacuaha Judas Iscariote, da cúu jahyi Simón, ña ná jicó túhún da Jesús. 3 Joo sa xíni vaha Jesús ña nasahan Ndióxi, tátá a tóco ndihí ndéé á nu mé á. Ta sa xíni a ña naquixi a nu Ndióxi ta jivi nu Ndióxi ndindita tucu a cuhun a. 4 Ta nani xíjini na nandaca ndichi Jesús já natavá a cotó níhnu a ta já natiin a in jáhma nachíñee a tóco á. 5 Tá nandihí já nataán a ticuí ini in tisahan loho já nacasáhá jándoo a sahá na xíca tuun xihín a cán. Ta já najándihichí a saħa ná xihín jáhma cáñee tóco á cán.

6 Ta tá nanditahan ndoo saha Simón Pedro já nandaca tuhún da Jesús já cáchí da já:

—Á mé a ndaa jándoo ndó sahá i, xitoho i —nacachi da.

7 Já nacachi Jesús já xihin dá:

—Viti ñúhú co cándaq toho inún ndía quéa cája i yóho joo chága chí nuu já candaq inún ndá cuéntá quéa cája i já —nacachi Jesús.

8 Anda já nacachi Pedro já:

—Chí a quiáhva toho mí i ñamaní nu ndó jándoo ndó sahá i —nacachi da.

Anda já nacachi Jesús já xihin dá:

—Tá ná a quiáhvún ñamaní jándoo i sahún já a cúu cacuún cuéntá mí i —nacachi Jesús.

9 Anda já nacachi tucu da já xihin Jesús:

—Tá ta já cáchí ndo quiáhva va i sahá i jándoo ndó ta quiáhva ri ñamaní jándahá ndó yehe ta quiáhva ri ñamaní chihin ndó jiní i viti —nacachi da.

10 Anda já nanducú ñehe Jesús tuhun nu dá já nacachi a já xihin dá:

—Tá sa nachichi vaha ñayivi já ndúu vií na ta saha cuití va ndó xíní ñúhú ndicata i. Mé ndó, na xíca tuun xihin i, sa ndúu vií ndo jáchí sa najándoo i cuachi ndó sahá ña cándéé ini ndó yehe vatí a juú ndihi ndó ndúu vií —nacachi Jesús.

11 Nacachi Jesús a juú ndihi na ndúu vií jáchí sa nacandaq va ini mé á ndá da cúu da jicó tuhún ñahá.

12 Tá nandihí najándoo Jesús saha ná já nacandixi tucu a cotó níhnu a. Já nasacoo tucu a nu mesa já nacachi a já xihin ná:

—Cája i cuéntá co cándaq vaha ini ndó ndá cuéntá quéa najándoo i saha ndo. Saha ña cán quéa ndicani i ña nu ndo viti. 13 Mé ndó cáchí ndo maestro xihin i ta cáchí ndo cúu u xitoho ndó ta ndaa cahan ndó jáchí jivi ndusa i. 14 Ta viti candehé ndó. Yehe cúu u maestro ndo ta cúu u xitoho ndó ta najándoo i saha ndo. Saha ña cán quéa quiáhva já ndítahan caja ndó xihin ndaja táhan mé ndó. 15 Sa nasacu u in quiáhva nu ndo ta ndítahan caja ndó tá quiáhva nacaja mí i xihin ndo. 16 Xíní ñúhú candaq ini ndó ña ni in tuhún toho mozo a cúu cacuu da da cáhnu chága a juú ga xitoho da. Ta mé a ndaa ín chága sahá in da sáhdá chuun a juú ga mé da cuahan caja chúun cán. 17 Tá nacandaq ini ndó ña cahan i xihin ndo yóho ta tá ná caja ndó ña já quéa cuu cajii ini ndó.

18 'A juú saha tóco ndihi ndó cahan i jáchí sa cándaq vaha ini mí i ndá ndó nacaxi i. Joo sahá in ndó ndítahan xinu coo nuú tuhun Ndióxi tá nacachi a já: “In da sácoo tuun xíxi xihin i, da cán cúu da nandicuíta xihin i”, cáchí tuhun Ndióxi. 19 Sa cáxi tuhun cuéé e ña yóho xihin ndo já quéa tá sa naxinu ña yóho já candéé ini ndó yehe, ña cúu u da cáchí i cúu u. 20 Mé a ndaa ná cahan i xihin

ndō. Ndá nā ná ndiquehe vaha in da ná chindahá i, cúú á tátuhun ndíquehe vaha na yehe. Ta ndá nā ndíquehe vaha yehe, ndíquehe vaha ri na Ndióxi, mé a nachindahá yehe quixi i ñuyíví yóho — nācachi Jesús.

*Cáxi tuhun Jesús ña cúú Judas da jicó túhún ñahá*

(Mt. 26:20-25; Mr. 14:17-21; Lc. 22:21-23)

<sup>21</sup> Tá nāndihi nācachi Jesús ña yóho já nācacuéha ndivaha ini a já nācachi a já:

—Mé a ndaa ná cahan i xihín ndō. In táhan ndó cacuu da cuhun jicó túhún yehe — nācachi Jesús.

<sup>22</sup> Tá nāndihi já nācasáha nā xica tuun xihín Jesús cán sándehe nū táhan na. “Yo saha cahan Jesús”, cahan nā. <sup>23</sup> Jíin Jesús cán ín coo in táhan da xica tuun xihín á, da quihvi ini mé á cán. <sup>24</sup> Sahá ña cán quéa nācuu ndáha Simón Pedro nū dá ña ná ndaca tuhún da mé á saha ndá da cúú da jicó túhún ñahá. <sup>25</sup> Anda já nācativi chága da cán jíin Jesús já nācasáha da ndaca tuhún ñahá da já nācachi da já:

—Ndá da cúú dá, xitoho i — nācachi da.

<sup>26</sup> Anda já nācachi Jesús já xihín dá:

—Viti ñúhú chindaxi i in tuhun pan ta ndá da ná quiahva i tuhun pan cán nū, da cán cúú dá —nācachi Jesús.

Tá nāndihi já nāchindaxi a in tuhun pan já nāsañan ña nū Judas Iscariote, da cúú

jahyi Simón. <sup>27</sup> Ta tá nātiin Judas pan cán chí ivi laá nāndihvi tiñahá saçuaha ini da. Já nācachi Jesús já xihín dá:

—Xíni ñúhú ndihi inún cajún ña nācacu inún cajún —nācachi Jesús.

<sup>28</sup> Joo ni in túhún java ga nā ndúu coo xíxi xihín Jesús cán coo nācandaa ini na ndá cuéntá quéa nācachi Jesús ña yóho xihín Judas. <sup>29</sup> Java na nācahán nā ña nāsañanda Jesús chuun nū Judas ña ná cuhun da cueen da ñaha cuéntá víco pascua. Ta java na nācahán nā ña nāsañanda chuun nū dá ña ná jasá da jjuhún nū nā ndahví jáchi ndáha mé dá ñúhu ndihi jjuhún. <sup>30</sup> Tá nāndihi nātiin Judas pan nāsañan Jesús nū dá chí ivi laá nāquee da cuahan da. Ta sa ñuú va quéa cán.

*Ndítahan quihvi ini táhan nā cúú cuéntá Jesús*

<sup>31</sup> Tá sa nāqueta Judas cuahan da já nācasáha cáchi Jesús já xihín nā xica tuun xihín á:

—Viti ndusa quéa nācasáha ndicáhnū ndivaha yehe, da nāchindahá Ndióxi nduu ñayivi. Ta sahá ña caja i ndicáhnū ndivaha Ndióxi, tátá i. <sup>32</sup> Ta tá náha yehe ndá quiahva cáhnū cúú Ndióxi, tátá i quiahva já náha ri Ndióxi ndá quiahva cáhnū cúú yehe, da nāchindahá Ndióxi nduu ñayivi. Ta ja chá cámaní coo tóco ndihi ña yóho. <sup>33</sup> Candehé ndo, jahyi mání i. Ja chá cuití tiempo coo i xihín

ndo. Anda já ndinducú ndó yehe joo a ndíñehe ndó yehe. Ndítahan ndicuhun ini ndó tá naçachi i xihín na Israel ña a cúu cuhun na nuú cuhun yehe. Quiahva já cáchí ri xihín ndóhó va: A cúu cuhun ndó nuú cuhun i. <sup>34</sup> Ta viti sáhdá i inga chuun nu ndo ta cúu á ña saá. Ta ña yóho cúu á: Ndítahan quihvi ini táhan ndó. Tá quiahva quihvi ini yehe ndóhó quiahva já ndítahan quihvi ri ini táhan ndó. <sup>35</sup> Jáchí tá ná quihvi ini táhan ndó já candaá ini tóco ndihi ñayivi ña mé a ndaa táhyí cúu ndó cuéntá mí i — naçachi Jesús.

*Cáxi tuhun Jesús ña chijehé tuhun Pedro ña xini da mé á*  
(Mt. 26:31-35; Mr. 14:27-31; Lc. 22:31-34)

<sup>36</sup> Anda já nandaca tuhún Simón Pedro cán Jesús já naçachi da já xihín á:

—Xitoho i, ndájá cuhun ndó já —naçachi da.

Anda já naçachi Jesús já xihín dá:

—A cuú toho cuhun yóho nuú cuhun i viti. Joo cacuáchi lohún já xinu cún cán — naçachi Jesús.

<sup>37</sup> Anda já naçachi Pedro já xihín Jesús:

—Ndá cuéntá quéa cáchí ndo ña a cúu candico i ndóhó cuhun i nuú cuhun ndó viti. Jáchí sa ín tiahva i quivi i saha ndo —naçachi Pedro.

<sup>38</sup> Já nanducú ñehe Jesús tuhun nu dá já naçachi a já xihín dá:

—Mé a ndaa ná cahan i xuhun. Vatí ín tiahvún

quivún sahá i joo tá cámani cana chéle já uní tañu chijehé tuhún sahá i ta cahún ña co xini tohún yehe —naçachi Jesús xihín Pedro.

## 14

*Ndáca Jesús ñayivi cuhun na nu Ndióxi, tátá a*

<sup>1</sup> Já naçachi tucu Jesús já:

—Coto a ndícani ini ndó. Ndítahan candeé ini ndó Ndióxi ta ndítahan candeé ini ndó yehe. <sup>2</sup> Mé nu ín Ndióxi, tátá i, cán ín cuahá ndivaha nu núná nu ndó canduu ndó. Tá ná a cóo nuú canduu ndó cán janda mé saha va sa naçaxi tuhun i xihín ndó, nduu. Ta cuhun i cacu tiahva i mé nuú canduu ndó cán.

<sup>3</sup> Tá sa ná quee e cuhun i ta tá sa ná caja ndíví i nuú canduu ndó cán já quixi tucu u ndiquehe e ndóhó já ná cuhun ndó canduu ndó xihín i mé nuú coo i cán. <sup>4</sup> Mé ndó sa xini ndó ndá íchi candico ndó já cuu saá ndó nuú cuhun i —naçachi Jesús xihín na xíca tuun xihín a cán.

<sup>5</sup> Anda já nandican Tomás xihín Jesús já naçachi da já xihín á:

—Mé nde co xini toho nde ndájá cuhun ndo, xitoho nde. Ndaja caja ri nde candaá ini nde ndá íchi quehe nde cuhun nde —naçachi da xihín á.

<sup>6</sup> Já nanducú ñehe Jesús tuhun nu dá já naçachi a já xihín dá:

—Yehe cúu tátuhun íchi ña ndítahan candico ñayivi ta yehe cúu da jánaña ña ndaa. Ta yehe cúu da cája ña

ná catacu ñayivi anda ama cáa quivi. Ta in túhún yehe ndítahan candee ini ñayivi já ná cuu xinu coo na nu Ndióxi, tátá i. <sup>7</sup> Tá xini ndó yo cúu yehe já xini ri ndó yo cúu Ndióxi, tátá i. Ta viti xihin chí nuu xini ndó a jáchi sa ñaxini ndó a —ñacachi Jesús.

<sup>8</sup> Anda já ñacachi Felipe já xihin Jesús:

—Xitoho nde, jánaḥa ndó nuú nde yo cúu tátá ndo já ná cajji ini nde —ñacachi da.

<sup>9</sup> Anda já ñacachi Jesús já xihin dá:

—Ndá cuéntá quea cáchún já jáchi janda jihna ndivaha va ín i xihin ndo ta sa ndítahan canda ini ndó yo cúu yehe. Jáchi ndá na sa xini yo cúu yehe xini ri na yo cúu Ndióxi, tátá i. Saha ña cán quea ndá cuéntá quea cuni ndó ña ná jánaḥa i tátá i nu ndo. <sup>10</sup> Xini ñuhú candúsa ndó ña in cúu va yehe xihin Ndióxi, tátá i ta in cúu va mé á xihin i. Tóco ndihi ña cáhan i xihin ndo yóho co cáhan i ña saḥá ña quixi a jini mé cuití vi. Cáhan i ña quixi nu Ndióxi jáchi ín mé á xihin i. Ta chuun cája i quixi a nu Ndióxi jáchi cája chúun mé á. <sup>11</sup> Xini ñuhú candúsa ndó ña in cúu yehe xihin Ndióxi, tátá i ta in cúu Ndióxi, tátá i xihin i. Ta tá co cuni ndó candúsa ndó ña já quea xini ñuhú candúsa ndó ña saḥá ña náhnu ñaxini ndó ñacaja i. <sup>12</sup> Mé a ndaa ná cahan i xihin ndo. Ndá na candeé ini yehe, cuu caja na ña xitúhún tátuhun ña cája mí i. Ta janda ña náhnu chága

cuu caja na jáchi cuhun i nu ín Ndióxi, tátá i. <sup>13</sup> Ta tóco ndihi ña caça ndó nu Ndióxi, xini ñuhú caça ndó ña xihin quivi mí i já ná caja i ña. Ta ndicáhnu Ndióxi, tátá i xihin ña caja i saḥa ndo. <sup>14</sup> Ta caja i ndá ña ná caça ndo nuú i tá ná caça ndó ña xihin quivi mí i.

*Sáhan Jesús tuhun a ña chindahá a inima yii Ndióxi cañuhu a ini ñayivi*

<sup>15</sup> Tá mé a ndaa quihvi ini ndó yehe, caja tá caja ndó ña sáhdá i nu ndo caja ndó. <sup>16</sup> Ta caça i nu Ndióxi, tátá i ña ná chindahá mé á inima yii mé á nu ndo. Ta chindeé mé á ndohó já ná quiahva tuhun ndéé ini ndó ta já cuu coo tuun a xihin ndo. <sup>17</sup> Joo ñayivi, na co cúu cuéntá mí i, a cúu ndiquehe na ña jáchi co canda ini na yo cúu mé á ta ni co cuni na ndiquehe vaha na ña. Joo ndohó xini vaha ndó a jáchi sa ín a xihin ndo ta ní tiempo cañuhu a ini ndó. <sup>18</sup> A jándacoo ndáḥa toho i ndohó jáchi ndicó coo tucu u já coo i xihin ndo. <sup>19</sup> Já chá cuití ta a cuni ga ñayivi cuéntá ñuyivi yehe. Joo mé ndó cuni tá cuni ndó yehe. Ta saḥá ña nditacu tucu u saḥá ña cán quea cuu catacu mé ndó anda ama cáa quivi. <sup>20</sup> Ta mé quivi cán canda ini ndó ña mé a ndaa in cúu yehe xihin Ndióxi, tátá i. Ta canda ini ndó ña quiahva já in cúu ndó xihin i ta in cúu yehe xihin mé ndó viti. <sup>21</sup> Ndá na ndiquehe vaha tuhun cáhan i ta cája na

ñā, náhā nā xihín ñā yóho ñā mé a ndaa quíhvi ini na yehe. Ta mé Ndióxi, tátá i quíhvi ini a ndijáá nā quíhvi ini yehe. Ta quíhvi ri ini yehe nā ta nahā i mí i nu ná —nācachi Jesús.

<sup>22</sup> Andā já in da naní Judas, da cō cúú toho da naní Judas Iscariote, nandaca tuhún da Jesús já nācachi da já xihín á:

—Xitoho nde, ndá cuéntá queá cáchí ndó ñā nahā ndó mé ndó nuú nde joo a náhā toho ndó mé ndó nuú ñayivi cuéntá ñuyíví —nācachi da.

<sup>23</sup> Já nanducú ñehe Jesús tuhun nu dá já nācachi a já xihín dá:

—Ndá nā quíhvi ini yehe, nā cán cúú nā cāja ñā cáhan i. Ta já quíhvi ini Ndióxi, tátá i nā ta já quixi nde coo nde xihín ná. <sup>24</sup> Joo nā cō quíhvi ini yehe, nā cán cúú nā quehe núu tuhun cáhan i. Ta mé tuhun cáhan i nu ndó yóho cō cúú á ñā quíxi jiní mí i. Cúú á tuhun Ndióxi, tátá i, mé a nāchindahá yehe quixi i ñuyíví yóho.

<sup>25</sup> Tóco ndihi ñā yóho ndícani i ñā nu ndó viti nani ín i xihín ndo. <sup>26</sup> Joo ínima yíi Ndióxi, mé a chindahá Ndióxi yuhú nuú i quixi a, chindeé a ndohó. Mé a cán queá jánahā tóco ndihi ñāha nu ndo. Ta jándicuhun a ini ndó tóco ndihi ñā nācachi i xihín ndo.

<sup>27</sup> Tá sa ná quee e cuhun i já cāja i ñā ná coo vaha ini ndó. Joo a cácuu a tátuhun tá cāja ñayivi cuéntá ñuyíví. “Ná coo vaha ini ndó”, cáchí xihín táhan na joo cō ín vaha ini

xihín táhan na. Coto a ndícani nahá ini ndó ta coto a yíhvi ndo jáchí cāja i ñā ná coo vaha ini ndó. <sup>28</sup> Sa naxini johō ndó ñā nācachi i xihín ndo ñā quee e cuhun i ta ndicó cōo tucu u já coo i xihín ndo. Ta tá mé a ndaa quíhvi ndusa ini ndó yehe já queá cajii ini ndó sahá ñā cáchí i cuhun i nu ín Ndióxi, tátá i. Ta ín chága saha mé á a juú ga yehe. <sup>29</sup> Sa ndícani cuéé vj ñā yóho nu ndo já queá tá ná xinu cōo ñā cáchí i xihín ndo coo já queá cuu candúsa ndó yehe.

<sup>30</sup> Ja chá cuití va coo i ñuyíví yóho ndituhún i xihín ndo jáchí sa nātandaa hora xinu rí quini, rí cómí cuéntá sahá ñayivi ñuyíví yóho vatí mé a ndaa cō ndée rí cāja rí ni in ñāha xihín i. <sup>31</sup> Joo yaha tá yaha ñā cúní rí cāja rí xihín i. Ta xihín ñā yóho candaa ini ñayivi ndúu ñuyíví ñā mé a ndaa quíhvi ini ndusa i Ndióxi, tátá i ta cāja i ñā nāsahnda mé á nuú i cāja i. Candichi ndó. Xihín ndo ná cōho —nācachi Jesús xihín nā xíca tuun xihín a cán.

## 15

*Jesús cúú á tátuhun in tó uva*

<sup>1</sup> Andā já nācachi tucu Jesús já xihín ná:

—Yehe cúú ndusa tátuhun in tó uva ta Ndióxi, tátá i cúú á tátuhun da ndája víi saha mé tó uva cán. <sup>2</sup> Ta ñayivi cúú ná tátuhun ndáha tó uva cán. Ta ndá nā cō xeén cāja ñā cúní Ndióxi jácaxoo a nā nu mé á tá quiahva cāja da

ndája vií dó cán tá chítúh<sub>un</sub> dá ndáha tó uva, ña cō cána uva nu<sub>u</sub>. Joo tá cána cuaha uva nu dō já quéa ndája vií da ndáha dō ta ndíjatá da dō já ná cana cuaha chága uva nu dō. Quiahva já cája ri Ndióxi xihín ñayivi, na cája ña cúní mé á. <sup>3</sup> Joo mé ndó sa nandivií va ndó jáchi naxini johó ndó ña jána<sub>ha</sub> i nu ndo. <sup>4</sup> Xíní ñúhú in cacuu ndó xihín i tá quiahva in cúu yehe xihín ndo. Jáchi in ndáha tó uva a cuú cana uva nu dō tá cō tীন dō tóco tó uva cán. Quiahva já íin ri xihín ndóhó va. A cúu caja ndó ña cúní Ndióxi tá coó in cúu ndó xihín i.

<sup>5</sup> Yehe cúu u tátuhun tó uva ta ndóhó cúu ndó tátuhun ndáha mé tó uva cán. Ta ndá na in cúu xihín i tá quiahva in cúu u xihín ná já quéa cuu caja ndíhi na ña cúní Ndióxi. Cacuu a tátuhun cána cuaha uva vaha nu ndáha tó uva cán. Jáchi mé a ndaa ni in túhún ñaha a cúu caja ndó tá ná a chindeé yehe ndohó. <sup>6</sup> Ta ndá na cō cúní in cacuu xihín i, na cán cúu na jácaxoo Ndióxi. Ta cúu ná tátuhun in ndáha tó uva, dó sa nahichi ta nditaca dó cuhun dó cayi dō.

<sup>7</sup> Tá in ná cacuu ndó xihín i ta tá ná caja ndó ña najána<sub>ha</sub> i nu ndo já cuu caça ndó ndá ña cúní mé ndó nuú i já quiahva i ña nu ndo. <sup>8</sup> Mé Ndióxi, tátá i ndicáhn<sub>u</sub> ndivaha tá ná caja ndó ña cúní a xihín ndinuhu ini ndó. Ta xihín ña yóho náha ndó ña cúu ndó cuéntá mí i. <sup>9</sup> Quíhvi ini i ndohó tá quiahva quíhvi ini Ndióxi,

tátá i yehe. Xíní ñúhú coo tuun ndó xihín i jáchi quíhvi ini i ndohó. <sup>10</sup> Tá ná caja ndó tóco ndíhi ña sáhn<sub>dá</sub> i nu ndo caja ndó já quéa coo tuun ndó xihín i jáchi quíhvi ini i ndohó. Quiahva já cája ri yehe va. Cája i tóco ndíhi ña nasahnda Ndióxi, tátá i caja i ta xihín ña yóho íin tuun i xihín á jáchi quíhvi ini a yehe.

<sup>11</sup> 'Cáxi túhun i ña yóho xihín ndo já ná cajii íní ndo tá quiahva cájii íní yehe. Ta xihín ña yóho ndicutú ndaa ínima ndo xihín ña cájii ini ndó. <sup>12</sup> Cuni johó ndó ña sáhn<sub>dá</sub> i nu ndo yóho: Nditahan quíhvi ini táhan ndó tá quiahva quíhvi ini yehe ndohó. <sup>13</sup> Tá mé a ndaa táhyí quíhvi ini ñayivi ñani táhan na já quéa íin tiahva na quivi na saha ná. <sup>14</sup> Mé ndó cúu ndó amigo i tá cája ndó ña sáhn<sub>dá</sub> i nu ndó caja ndó. <sup>15</sup> Cáchi i xihín ndo ña cúu ndó amigo i jáchi cáxi túhun ndíhi i xihín ndo ña cáhan Ndióxi, tátá i xihín i. Ta a cáhan ga i xihín ndo ña cúu ndó mozo jáchi in mozo cō xíní toho da ndaja cáa ña cája xitoho da. <sup>16</sup> Mé ndó coó naçaxi ndó yehe caca nuu i xihín ndo. Joo mí i naçaxi i ndohó ña ná caca nuu ndó xihín i. Ta najána<sub>ha</sub> i ndohó ndá quiahva caja ndó já ná cacuu ndó tátuhun in yíto, dó sáhan cuahá cuíhi ña a ndíhi saha. Tá ná caja ndó ña cúní Ndióxi já quiahva tátá i ndá a cúní mé ndó tá ná caça ndó ña xihín quívi mí i. <sup>17</sup> Ña yóho quéa sáhn<sub>dá</sub> i nu ndó

caja ndó: Quihvi ini táhan ndó.

*Cándají ñayivi cuéntá ñuyíví Jesús ta cándají ri na na cúu cuéntá mé á*

<sup>18</sup> Candehe ndo. Tá ná casahá candají ñayivi cuéntá ñuyíví ndohó xíní ñúhú ndicuhun ini ndó ña jihna ñúhú ga ñacandají ri na yehe va. <sup>19</sup> Tá ná caja ndó tá quiahva cája ñayivi ñuyíví já queá quihvi ini va na cán ndohó. Jáchi já cája xihin táhan mé na cán. Joo yehe ñacaxi i ndohó ña ná quee ndó tañu na cán. Sahá ña cán queá co cúni na cán ndohó jáchi co cúu ga ndó na ñuyíví yóho. <sup>20</sup> Coto a ndíndójó ndo ña ñacahan i xihin ndo tá ñacachi i ña ni in túhún toho mozo a cúu cacuu da da cáhnu chága nuú xitoho da. Ta ni mé ndó co cúu ndó na náhnu chága a juú ga yehe. Jáchi tá quiahva ñacaja xíxi na xihin yehe quiahva já caja xíxi ri na xihin ndohó va. Tá ná candúsa na ña ñacahan i xihin ná quiahva já candúsa ri na ña ná cahan ri ndohó va xihin ná. <sup>21</sup> Tóco ndihi ña yóho caja na xihin ndo sahá ña cándéé ini ndó yehe. Jáchi co xini na Ndióxi, tátá i, mé a ñachindahá yehe vaxi i ñuyíví yóho.

<sup>22</sup> Tá ná a quíxi toho i ñuyíví yóho caxi tuhun i xihin ñayivi, nduu coó toho na jácojo cuachi jata ná, nduu. Joo viti ñaquixi i ñuyíví yóho ta ndítahan nu ná ndiquiahva na cuéntá sahá cuachi na. <sup>23</sup> Ndá ñayivi cándají yehe,

cándají ri na Ndióxi, tátá i. <sup>24</sup> Ñacaja i ña náhnu nu ná joo coó ñacandúsa na yehe sahá ña cán queá ndójo na cuachi. Ta ni in túhún toho ñayivi coó ñacaja ña náhnu tá quiahva ñacaja i nu ná. Vati ñaxini na ña náhnu ñacaja i joo cándají na yehe ta cándají na Ndióxi, tátá i. <sup>25</sup> Joo xihin tóco ndihi ña cúu yóho xinu coo nu ley najándacoo Moisés nu ná sanahá tá cáhí a já: “Chí coó saha ná candají na yehe”, já ñacachi Moisés sanahá.

<sup>26</sup> Tá ná quixi ínima yii Ndióxi, mé a chindahá i cuéntá Ndióxi, tátá i, mé a cán queá cahan vaha sahá i. Ta jánaha ña ndaa saha Ndióxi ta chindeé a ñayivi. <sup>27</sup> Ta jári mé ndó cahan vaha ndó sahá i jáchi janda saha tá ñacasahá cája chúun i ñuyíví yóho ñasanduu tuun ndó xihin i —ñacachi Jesús.

## 16

<sup>1</sup> Já ñacachi tucu Jesús já:

—Caxi tuhun i ña yóho xihin ndó já ná a jándacoo ndó ña cándéé ini ndó yehe.

<sup>2</sup> Jáchi vaxi quíví tá taxi ñayivi ndohó veñuhu. Ta ndá na ná cahní ndohó cahan na ña cája chúun na cuéntá Ndióxi.

<sup>3</sup> Caja na ña yóho jáchi co xini na yo cúu Ndióxi, tátá i ta ni co xini na yehe. <sup>4</sup> Sa cáxi tuhun cuéé e ña yóho xihin ndo já queá tá ná xinu coo quíví cán já ndicuhun ini ndó ña sa ñacaxi tuhun yachi vi xihin ndo ña já coo.



*Ña cája ínimā yīi Ndióxi*

'Coó naçaxi tuhun i ña yóho xihin ndó jihna jáchi nasahin i xihin ndo. <sup>5</sup> Ja chá cuhun i coo i xihin Ndióxi, tátá i, mé a nachindahá yehe ñuyívi yóho joo ni in ndó co ndáca tuhún ndó yehe ndájá cuhun i. <sup>6</sup> Ña cája ndó queá cacuéha ndivaha ini ndó sahá ña ndícani i tóco ndihi ña yóho nu ndo. <sup>7</sup> Joo mé a ndaa ná cahan i xihin ndo: Vaha chága ná quee e cuhun i. Jáchi tá ná a quee yehe cuhun i já a cúu quixi ínimā yīi Ndióxi coo a xihin ndo ta mé a cán chindeé a ndohó. Joo tá ná quee e cuhun i já chindahá i mé á quixi a nu ndo. <sup>8</sup> Ta tá ná xinu a cán jánaḥa cáxi táhyí a nuú ñayivi ña cája na cuachi. Ta jánaḥa nu ná ndaja íin íchi cuéntá ña ndaa. Ta jánaḥa nu ná ndá quiahva cavií sahá ñayivi caja Ndióxi. <sup>9</sup> Ta jánaḥa cáxi táhyí a ña íin cuachi na jáchi co cándéé ini na yehe. <sup>10</sup> Ta jánaḥa ínimā yīi Ndióxi ndaja íin íchi cuéntá ña ndaa jáchi quee e cuhun i nu íin Ndióxi, tátá i ta a cúní ga ndó yehe. <sup>11</sup> Ta jánaḥa cáxi táhyí a ña caja vií Ndióxi sahá cuachi jáchi sa naçaja vií a sahá tiñáhá sacuahā vatí viti ñuhú cómi rí cuéntá sahá ñayivi ñuyívi yóho.

<sup>12</sup> Íin cuahá ndivaha ñaha cúní cahan chága i xihin ndo. Joo vatí já va viti jáchi a cándo ga jini ndo. <sup>13</sup> Tá ná xinu ínimā yīi Ndióxi, mé a cúu ña ndaa, mé a cán candaca ndohó íchi cuéntá ña ndaa. Ta a cahan toho a cán ña

quixi jini mé á jáchi cahan mé á ña xini johō a cahan Ndióxi. Ta çaxi tuhun a xihin ndo ndá a coo chága chí nuu. <sup>14</sup> Ta mé a cán caja cáhnu a yehe jáchi jánaḥa nu ndó ña cúní mí i jánaḥa i nu ndo. <sup>15</sup> Tóco ndihi ñaha jánaḥa Ndióxi, tátá i cúu ri a ña jánaḥa yehe va. Sahá ña cán queá cáchi i xihin ndó ña ínimā yīi mé á çaxi tuhun a xihin ndó ña cúní mí i jánaḥa i nu ndo.

<sup>16</sup> 'Ja chá cuití coo i xihin ndo ta a cúní ga ndó yehe jáchi quee e cuhun i nu íin Ndióxi, tátá i. Joo tá nandihí já cuni tucu ndó yehe —cáchi Jesús.

<sup>17</sup> Anda já naçasáhá java na xíca tuun xihin á cán ndáca tuhún táhan na já cáchi xihin táhan na já:

—Ndía cúní ri Jesús cachi a xohō tá cáchi a ña ja chá cuití va ta a cúní ga í mé á ta tá nandihí já cuni tucú mé á. Ta cáchi a ña cúu á sahá ña quee a cuhun a nu íin Ndióxi, tátá a. <sup>18</sup> Ndía cúní ri a cachi a ña ja chá cuití va cuni mé á. Co cándaa vaha toho iní ndía cúní mé á cachi a xihin tuhun yóho —naçachi xihin táhan na.

<sup>19</sup> Joo naçandaa ini Jesús ña cúní na ndaca tuhún na mé á sahá ña cán queá naçachi a já xihin ná:

—Naçachi i xihin ndó ña ja chá cuití ta a cúní ga ndó yehe ta tá nandihí já cuni tucu ndó yehe. Ta viti cúní ndo ndaca tuhún ndó yehe ndía cúní cachi ña yóho. <sup>20</sup> Mé a ndaa ná cahan i xihin ndo. Tándaa quivi cuacu ndó ta cacuéha ndivaha ini ndó ta

ñayivi ñuyiví yóho cavatá ndivaha na sahá ña ndoho i. Ta vatí cacuéha ini ndó joo in cuití ndajama ña jan ta já caji ndivaha ini ndó. <sup>21</sup> Cacuu a tátuhun tá xínu coo hora cacu jahyi in ñañáha ta já casáhá ndóho ini ñá. Joo tá sa nacacu jahyi ña ndíndójó ndihi ña sahá ña nandoho ini ña jáchi sa nacacu jahyi ña ta cáji ndivaha ini ña xihín á. <sup>22</sup> Quiahva já ndóho ini ndó xihín ña táhnda ini ndó viti. Joo ndicó coo tucu yehe já cuni táhan tucú ta já ndicutú ndaa ínima ndó xihín ña cáji íní ndó. Ta ni in na a cúu caja caji nuu nuú ña cáji íní ndó jan.

<sup>23</sup> Mé quivi cán coo ga ñaha caça ndó nuú i. Jáchi mé Ndióxi, tátá i quiahva tóco ndihi ña xini ñuhú ndó tá ná caça ndó ña nu á xihín quivi mí i. <sup>24</sup> Janda viti a ñaha caça ndó ñaha nu Ndióxi, tátá i xihín quivi yehe. Joo viti xini ñuhú caça ndó ña cuni ndó nu mé á xihín quivi yehe ta já quiahva mé á ña nu ndó. Ta xihín ña yóho cuu ndicutú ndaa ini ndó xihín ña cáji íní ndó.

*Naquee vaha Jesús nu tóco ndihi ña núu ñuyiví yóho*

<sup>25</sup> Xihín quiahva cuití nacahan i ña yóho xihín ndó. Joo tandaa quivi ta a cahan ga i xihín quiahva nu ndó. Ña caja i quea cáxi táhyí cahan i saha Ndióxi, tátá i nu ndó. <sup>26</sup> Ta mé quivi cán caça ndó ña cuni ndó nu Ndióxi, tátá i xihín quivi mí i. Sa núna nu

ndó caça tahví ndó nu á ta co xini ñuhú ga caça tahví yehe nu mé á saha ndó. <sup>27</sup> Jáchi sa quihvi ini tátá i ndohó sahá ña quihvi ini ndó yehe ta sahá ña nacandúsa ndó ña nachindahá mé á yehe vaxi i. <sup>28</sup> Mé nu ín Ndióxi, tátá i naquee e vaxi i ñuyiví yóho. Ta yachi chá ta jándacoo i ñuyiví yóho já ndicó coo tucu u cahun i nu ín Ndióxi, tátá i —nacachi Jesús.

<sup>29</sup> Anda já nacachi na xica tuun xihín á cán já:

—Viti ndusa quea cahan cáxi táhyí ndó xihín nde ta co sácú ga ndó quiahva nuú nde. <sup>30</sup> Ta viti ndusa cándaa ini nde ña xini ndó tóco ndihi ñaha. Ta ni co xini ñuhú toho ndó ña ná ndaca tuhún nde ndohó jáchi sa xini va ndó ña cuni nde cándaa ini nde. Sahá ña cán quea cándúsa nde ña naquixi ndó nu ín Ndióxi —nacachi na.

<sup>31</sup> Já nanducú ñehe Jesús tuhun nu ná já nacachi a já xihín ná:

—Á ja víti ndusa cándúsa ndó yehe. <sup>32</sup> Joo sa naxinu coo va hora ndicuíta nuu ndó ndá nacuu cahun ndó ta jándacoo in tuhún ndó yehe. Vatí mé a ndaa a cándoo mé toho i jáchi ín Ndióxi, tátá i xihín i. <sup>33</sup> Cáxi tuhun i ña yóho xihín ndó já ná coo vaha ini ndó sahá ña in cúu ndó xihín i. Mé a ndaa ndoho tá ndoho ini ndó ñuyiví yóho. Joo a cáyihví toho ndó jáchi yehe nacandeé e nasahnu i nu tóco ndihi ña núu ñuyiví

yóho —naçachi Jesús xihín na xíca tuun xihín á cán.

## 17

*Xíca tahví Jesús nu Ndióxi sahá na xíca tuun xihín á*

<sup>1</sup> Tá nandihí naçachi Jesús tóco ndihí ña yóho xihín na xíca tuun xihín á cán já nandíhehe a nuú á chí indiví já naçachi a já:

—Tátá Ndióxi, sa naxinu çoo quiví quiví i. Caja ndó ña ndicáhnú ndivaha mí i, da cúu in túhún jini já jahyí mé ndó já ná cuu caja cáhnú ri yehe va ndohó. <sup>2</sup> Jáchi mé ndó nasahan ndó nuú i ña ná cacomí i cuéntá saha tóco ndihí ñayiví já ná cuu caja i ña ná catacu na anda ama cáa quiví jáchi cúu ná na nasahan ndo nuú i. <sup>3</sup> Ta tá xini na yo cúu mé ndó ta tá xini na yo cúu yehe, da nachindahá ndó ñuyiví yóho já cuu catacu na anda ama cáa quiví. Jáchi in túhún mé ndó cúu ndusa Ndióxi.

<sup>4</sup> Sa naçaja cáhnú i ndohó nani ín i ñuyiví yóho ta sa najaxinu çoo ndihí i ña nasahnda ndó nuú i caja i. <sup>5</sup> Ta viti xíca tahví i nu ndo, tátá Ndióxi ña ná naha ndo nuú ñayiví ndaja cáhnú cúu yehe nu mé ndó jáchi quiahva já in cáhnú nasacuu u xihín ndó janda tá cámaní cava sahá saha ñuyiví.

<sup>6</sup> Ta naçaxi ndó na cacuu cuéntá mí i tañu ñayiví cuéntá ñuyiví yóho. Ta sa naçaxi tuhun i xihín ná yo cúu mé ndó. Naçaxi ndó na ta nandiquiahva ndó na nuú

i. Ta naçandúsa na tuhun ndó. <sup>7</sup> Ta viti cándaa ini na ña tóco ndihí ña sahan ndó nuú i quíxi a cuéntá mé ndó. <sup>8</sup> Ta sa naçaxi tuhun i xihín ná tóco ndihí ña nasahan ndó nuú i ta nandiquehe vaha na ña. Ta sa naçandaa ini na ña mé a ndaa naquixi i cuéntá mé ndó. Ta naçandúsa na ña nachindahá ndó yehe.

<sup>9</sup> Co xíca tahví i nu ndó sahá ñayiví cuéntá ñuyiví yóho. Joo xíca tahví i nu ndó sahá na nasahan ndó nuú i jáchi cúu ná cuéntá mé ndó. <sup>10</sup> Tóco ndihí na cúu cuéntá mí i cúu ná cuéntá mé ndó viti. Ta tóco ndihí na cúu cuéntá mé ndó cúu ri na cuéntá yehe va. Ta ndicáhnú ndivaha mí i sahá ña cája na.

<sup>11</sup> A cóo ga i ñuyiví yóho jáchi saa i nu ín mé ndó. Joo na naçaxi ndó yóho canduu tóo na ñuyiví yóho. Tátá Ndióxi, yí ndivaha cúu mé ndó. Xíca tahví i nu ndó ña ná candaa vaha ndó na cúu cuéntá mé ndó jáchi xihín ndée mé ndó cuu candico na íchi cuéntá mé ndó. Já quea in ná nduu ndihí na tá quiahva in cúu mé ndó xihín yehe. <sup>12</sup> Jáchi nani ín i xihín ná ñuyiví yóho ndáa i na xihín ndée mé ndó. Ta ni in túhún toho táhan na nasahan ndó nuú i cacomí i cuéntá saha cán çoo nandihí saha. In túhún da nandihí saha cúu da janda sanahá nasahin saha ña ndihí saha dá já ná cuu xinu çoo nuú ña naçahyí nuú tuhun Ndióxi sanahá.

<sup>13</sup> Ta viti quee e ñuyiví yóho saa i nu ín ndó jan. Joo cáhan

i ña yóho xih̄in ndó nani in̄  
 i ñuyiví yóho já ná ndicutú  
 ndaa ini na yóho xih̄ín ña  
 cáji iní na tá quiahva cáji  
 iní mí i. <sup>14</sup> Sa ñacaxi tuhun  
 i tuhun mé ndó nu ná. Joo  
 na cúu cuéntá ñuyiví cándají  
 na na cúu cuéntá mí i jáchi  
 co cúu ná cuéntá ñuyiví yóho  
 tá quiahva co cúu toho yehe  
 cuéntá ñuyiví yóho. <sup>15</sup> Co xica  
 tahví i nu ndo ña ná tava  
 ndo na ñuyiví yóho. Ña cuni  
 quéa ná chindeé ndó na já ná  
 a quéa vaha tiñáhá sacuaḥa  
 xih̄in ná. <sup>16</sup> Tá quiahva co  
 cúu toho i da cuéntá ñuyiví  
 yóho quiahva já co cúu ga  
 na cán ñayivi cuéntá ñuyiví.  
<sup>17</sup> Ta xica tahví i nu ndo ña ná  
 ndaja vii ndó na xih̄ín tuhun  
 mé ndó ña janaha ndó nu ná  
 jáchi tuhun mé ndó cúu ña  
 ndaa. <sup>18</sup> Ta tá quiahva ñacaja  
 ndó nachindahá ndó yehe  
 tañu na ñuyiví yóho quiahva  
 já chindahá ri yehe va na cúu  
 cuéntá mí i tañu ñayivi cuéntá  
 ñuyiví. <sup>19</sup> Ta ndiquiahva i mí i  
 caja i ña cuni mé ndó já quéa  
 ná cuu ndiquiahva na yóho  
 mé ná ndáha mé ndó sahá ña  
 sa xini na ña ndaa.

<sup>20</sup> Ta a juú sahá na yóho  
 cuití va xica tahví i nu ndo,  
 vaha. Xica tahví ri nu ndó  
 sahá na ná candúsa yehe  
 chága chí nuu sahá tuhun  
 caḥan mé na yóho xih̄in ná.  
<sup>21</sup> Tátá Ndióxi, xica tahví i  
 nu ndó ña ná caja ndó ña in  
 ná nduu tóco ndihi na cúu  
 cuéntá mé ndó yóho. Ta caja  
 ndó ña in ná nduu ndihi na  
 xih̄in yó tá quiahva in cúu  
 ndó xih̄ín yehe ta in cúu yehe

xih̄in mé ndó. Jáchi tá ná caja  
 ndó ña in ná nduu tóco ndihi  
 na já cuu candúsa ñayivi  
 cuéntá ñuyiví ña mé a ndaa  
 nachindahá ndó yehe vaxi i.  
<sup>22</sup> Ñacaja i ña nandicáhn̄u na  
 cán tá quiahva nandaja cáhn̄u  
 ndó yehe. Já quéa in ná nduu  
 ndihi na tá quiahva in cúu  
 mé ndó xih̄ín yehe. <sup>23</sup> Ta in  
 cúu yehe xih̄in ná tá quiahva  
 in cúu mé ndó xih̄ín i já ná  
 xinu coo ndihi na cacuu na  
 tá tuhun in víxi ñayivi. Ta já  
 ná cuni ñayivi cuéntá ñuyiví  
 ña mé a ndaa nachindahá  
 ndó yehe vaxi i. Ta já ná cuni  
 na ña quihvi ini ndó na tá  
 quiahva quihvi ini ndó yehe.

<sup>24</sup> Tátá Ndióxi, ñacaja ndó  
 ña cómi i cuéntá sahá na yóho.  
 Ta cuni ña ná coo na xih̄ín  
 i nuu coo i já ná cuni na  
 ndá quiahva cáhn̄u cúu u jáchi  
 ñacaja ndó ña ná ndicáhn̄u  
 ndivaha i. Jáchi janda tá  
 camaní cava sahá saḥa ñuyiví  
 quihvi ini ndó yehe. <sup>25</sup> Tátá  
 Ndióxi, caja ndó ña ndaa. Ta  
 ñayivi cuéntá ñuyiví yóho co  
 xini toho na ndohó. Joo yehe  
 xini vaha i ndohó ta na cúu  
 cuéntá mí i yóho sa cándaa  
 vaha ini na ña nachindahá  
 ndó yehe. <sup>26</sup> Sa ñacaja i ña ná  
 cándaa ini na yo cúu mé ndó  
 ta caja i ña ná cándaa chága  
 ini na saḥa ndo. Ta xih̄ín ña  
 yóho cándaa ini na ña quihvi  
 ini ndó na tá quiahva quihvi  
 ini ndó yehe ta já in ná nduu  
 na xih̄ín i—ñacachi Jesús xica  
 tahví a nu Ndióxi.

*Tá natiin na Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Tá nandihí naxiča tahví Jesús nu Ndióxi já naqueta mé á xihín na xica tuun xihín a cán cuahān chí inga xoo yivi naní Cedrón. Ta yati cán cáa cuahā yitó cuihi nuú naquihvi Jesús xihín na xica tuun xihín á. <sup>2</sup> Ta Judas Iscariote, mé da jícó túhún ñahá cán sa xini vaha da nu sáhiin Jesús xihín na xica tuun xihín á jáchi cuahá tañu nanditútú ndihi na cán.

<sup>3</sup> Ña cán quéa ndáca da in táhndá soldado ta ndáca da java policia, na ndáa veñuhu cáhnu ñuu Jerusalén cán. Cúu ná na nachindahá na sacuahā nuú jutū xihín na fariseo. Ta jandá joho ñehe na ñaha ná caní na a cuahān na ta ñehe ri na ití yúsá jándiyéhe na nu ná. <sup>4</sup> Joo sa xini vaha Jesús ndíā ndítahan ndoho a sahá ña cán quéa naqueta nu ná já nandaca túhún a na já nacachi a já xihín ná:

—Yo ndínducú ndo já — nacachi a.

<sup>5</sup> Já nanducú ñehe na cán túhún nu á já nacachi na já xihín á:

—Ndínducú nde Jesús, da ñuu Nazaret —nacachi na.

—Yehe cúu u da ndínducú ndo —nacachi a.

Ta tañu na cán ndácaan ri Judas, da nájicó túhún ñahá cán. <sup>6</sup> Tá nacachi Jesús: “Yehe cúu u da ndínducú ndo”, já naxiča játa na ta nacuyu na nu ññhu. <sup>7</sup> Já nandaca túhún

tucu Jesús na já nacachi a já xihín ná:

—Yo ndínducú ndo já — nacachi a.

Já nanducú ñehe na cán túhún nu á já nacachi na já xihín á:

—Jesús, da ñuu Nazaret ndínducú nde —nacachi na.

<sup>8</sup> Andá já nacachi tucu Jesús já xihín ná:

—Sa nacachi vi xihín ndo ña yehe cúu u da ndínducú ndo. Sahá ña cán quéa quiahva ndó ñamaní nuú na yóho ña ná quee na cūhūn na —nacachi Jesús.

<sup>9</sup> Nacachi Jesús ña yóho já ná a tíin na na xica tuun xihín a cán já ná xinu coo nuú túhún ña nacachi mé á tá naxiča tahví a nu Ndióxi tá nacachi a já: “Tátá Ndióxi, ni in túhún toho táhan na nasahan ndó nuú i coo nandihí saha jáchi nasandaa vaha i na.” <sup>10</sup> Ta ndaja coo nasañee in machítí nu tóco Simón Pedro. Já natuhun da ña ta nāchitūhūn dá joho cuáha in da naní Malco, da cúu mozo nuú da cúu sacuahā chága nu ndíhi jutū. <sup>11</sup> Andá já nacachi Jesús já xihín Pedro:

—Chicaan vaha machítí jan. Jáchi sa nasacu ini Ndióxi, tátá i ndoho ini i tóco ndihi ña vaxi nuú i ta in tiahvā i ndoho ini i —nacachi Jesús.

*Ñehe na Jesús cuahān na nuú da sacuahā chága nu ndíhi jutū*

(Mt. 26:57-58; Mr. 14:53-54; Lc. 22:54)

12 Tóco ndihi soldado cán xihín da sáhdá chuun nu dá xihín java na ndáá veñuhu cán natiin na Jesús ta nacató na a. 13 Jihna ñuhú ñehe na a nasahan na nu Anás, da cúu xojo Caifás, da sacuahá chága nu ndíhi jutú mé cuia cán. 14 Mé Caifás yóho cúu dá da nacachi xihín na Israel ña vaha chága ña ná quivi in taa nu ndíhi ñayivi já ná a ndíhi saha tóco ndihi ñayivi.

*Chíjehé tuhun Pedro ña xini da Jesús*

(Mt. 26:69-70; Mr. 14:66-68; Lc. 22:55-57)

15 Ta ndaja coo Simón Pedro xihín inga táhan da xica tuun xihín Jesús cán ndíco na jatá nu ñehe na a cuahan na. Ta da inga cán xini táhan vaha da xihín da sacuahá chága nu ndíhi jutú ña cán quea nañehé dá ñamaní ndíhvi da xihín Jesús yuyéhé vehe jutú cán. 16 Joo nacandoo Pedro jata véhe yati yéhé cán. Joo da inga cán nandicó coo da já naxica da ñamaní nu ña ndáá yéhé vehe jutú cán ña ná quiahva ña ñamaní nu Pedro quíhvi da. Sahá ña cán naquihvi Pedro chí yuyéhé vehe cán. 17 Ta mé ña ndáá yéhé cán nandaca tuhún ña Pedro já nacachi ña já xihín dá:

—Á a juú in táhan da xica tuun xihín Jesús cúu yóho — nacachi ña.

Anda já nacachi Pedro já xihín ña:

—Co cúu toho i in táhan da xica tuun xihín á —nacachi Pedro.

18 Ta mé ñuú cán vixi xini na cúu mozo xihín na ndáá veñuhu cán. Sahá ña cán quea nandicahmi na ñuhu ta nandaca nduu na xitúni na ta tañu na cán cándichi ri Pedro xitúni da.

*Ndaja ndichi da sacuahá chága nu ndíhi jutú Jesús*

(Mt. 26:59-66; Mr. 14:55-64; Lc. 22:66-71)

19 Tá nandíhi já nacasáha da sacuahá chága nu ndíhi jutú cán ndája ndíchi da Jesús já nandaca tuhún da mé á sahá na naxica tuun xihín á. Ta nandaca tuhún da mé á sahá ña najánaña nu ñayivi. 20 Anda já nacachi Jesús já xihín dá:

—Coó nacahan jehé toho i xihín ñayivi tá najánaña i nu ná. Nii tiempo najánaña i tuhun Ndióxi nu ná ini veñuhu ta quiahva já najánaña i nu ná nu táca na ini veñuhu cáhnu ñuu Jerusalén. Ta ni in túhún toho ñaha coo najánaña jehé e nu ná. 21 Ta viti cachi ndó xihín i ndá cuénta quea ndaca tuhún ndó yehe sahá ña yóho. Cuáhán ndó ndaca tuhún ndo ñayivi, na najánaña i nu cán já ná ndicani na cán nu ndo ndaja cáa ña najánaña i nu ná. Jáchí xini vaha na ña nacahan i xihín ná —nacachi Jesús.

22 Tá nacachi Jesús ña yóho já nacani in da ndáá veñuhu cán jahnda nuu á já nacachi da já xihín á:

—A váha toho ndínehe yuhun nuu da sacuahá chága nu ndíhi jutú —nacachi da.

<sup>23</sup> *Anda* já *naçachi* Jesús já *xihin* dá:

—Tá *co* váha ná *caja* *i*, *cahan* *xihin* *i* ndá *cúu* ña *coo* *naçaja* váha *i*. Joo tá *naçaja* váha *i* ndá *cuéntá* *quéa* *cánún* *yehe* —*naçachi* Jesús.

<sup>24</sup> Tá *nandih*i já *nañañe*he na Jesús *nuú* *Caifás*, *da* *sacua*ha *chága* *nu* *ndihi* *jutu* *cán* ta *sa* já *ndico* a *xihin* *yóho* ñehe na a *cuahan* *na*.

*Chíjehé* *tuhun* *tucu* *Pedro* ña *xini* *da* *Jesús*

(*Mt.* 26:71-75; *Mr.* 14:69-72; *Lc.* 22:58-62)

<sup>25</sup> Ta *ndaja* *coo* *iin* *coo* *yii* *Pedro* *xitúni* *da* *xihin* *java* *na* *ndúu* *cán*. Ta já *naçasá*há *na* *cán* *ndáca* *tuhún* *na* *da* já *naçachi* na já *xihin* dá:

—Á a *juú* *táhan* *da* *xíca* *tuun* *xihin* *Jesús* *cúu* *yóho* —*naçachi* na.

Joo *nachijehé* *tuhun* *Pedro* ña *xini* *da* *Jesús* já *naçachi* da já:

—*Co* *cúu* *toho* *i* *in* *táhan* *da* *xíca* *tuun* *xihin* *á* —*naçachi* da.

<sup>26</sup> Joo tá *nandih*i já *nandaca* *tuhún* *in* *da* *cúu* *mozo* *nuú* *da* *sacua*ha *chága* *nu* *ndihi* *jutu* *cán*, *da* *cúu* *in* *táhan* *da* *nachituhun* *Pedro* *joho*. Ta *naçachi* da já *xihin* *Pedro*:

—*Cája* *i* *cuéntá* *naxini* *i* *yóho* *nu* *cáa* *cuaha* *yitó* *cuihi* *nuú* *na*tiin na *Jesús* *cán* —*naçachi* da.

<sup>27</sup> Joo *nachijehé* *tuhun* *tucu* *Pedro* ña *xini* *da* *Jesús* ta *ivi* *laá* *naçana* *chéle* tá *quiahva* *naçachi* *Jesús* *xihin* dá *coo*.

*Ñehe* na *Jesús* *cuahan* *na* *nu* *Pilato*

(*Mt.* 27:1-2, 11-14; *Mr.* 15:1-5; *Lc.* 23:1-5)

<sup>28</sup> Ta tá *na*ti*vi* *yaa* já *na*tavá *na* *Jesús* *vehe* *Caifás* *cán* já *ñehe* na a *cuahan* *na* *vechúun* *nu* *ndácaan* *da* *cúu* *gob*er*nador* *cuéntá* *ñuu* *Roma*. Joo *mé* *na* *Israel* *coo* *naxeen* na *ndihvi* na *vechúun* *cán* *jáchi* *cáchi* *ley* *na* ña tá ná *ndihvi* na *vehe* *na* *tóho* já *cuu* *yuxu* *na* ta já a *cúu* *cajini* na *vicó* *pascua* ña *coo* *quivi* *itaan*. <sup>29</sup> *Sahá* ña *cán* *quéa* *naqueta* *Pilato*, *da* *cúu* *gob*er*nador* *jata* *vehe* *cahan* *da* *xihin* *na* *Israel* já *naçachi* da já:

—*Ndá* *cuachi* *naçaja* *da* *yóho* —*naçachi* *Pilato*.

<sup>30</sup> Já *nanducú* ñehe na *Israel* *cán* *tuhun* *nu* dá já *naçachi* na já:

—Ta tá a *juú* *táa* *quini* ná *cacuu* *da* *yóho* ta a *cañe*he *toho* *nde* *da* *quixi* *da* *nu* *ndó*, *nduu* —*naçachi* na.

<sup>31</sup> Já *naçachi* *Pilato* já *xihin* *ná*:

—*Mé* *ndó* *cañe*he *ndó* *da* *cuhun* *ndó*. *Caja* *vií* *ndó* *saha* *dá* tá *quiahva* *sáhdá* *ley* *mé* *ndó* —*naçachi* *Pilato*.

Já *naçachi* *na* *Israel* *cán* já *xihin* dá:

—Ña *cúni* *nde* *quéa* ná *cata* *caa* *ndó* *da* *ndica* *crúxu* *jáchi* *cúu* *nde* *na* *Israel* ta *co* ñehe *toho* *nde* *ña*ma*ni* *cahní* *nde* *ña*yivi —*naçachi* na.

<sup>32</sup> Ta *xihin* ña *yóho* *naxinu* *coo* *nuú* ña *naçachi* *Jesús* tá *naçachi* a *ndá* *quiahva* *quivi* a. <sup>33</sup> Tá *nandih*i já *nandihvi* *tucu* *Pilato* *ini* *vechúun* *cán* ta

naçana da Jesús já naḁaça tuhún ñahá da já naçachi da já xihín á:

—Á mé a ndaa cúun in rey, da cómi cuéntá sahá na Israel —naçachi da.

<sup>34</sup> Já naçachi Jesús já xihín dá:

—Á jiní mé ndó naquixi ña ndáca tuhún ndó yehe. Á ndáca tuhún ndó yehe sahá ña naçachi ñayivi sahá i —naçachi a.

<sup>35</sup> Andá já naçachi Pilato já xihín Jesús:

—Co cándaa ini i saha ña yóho jáchi co cúu yehe da Israel. Mé ñayivi Israel jan xihín na sacuaḁa nuú jutu cúu na nandiquiahva yohó ndahá i. Ndiá naçajún, vaha —naçachi Pilato.

<sup>36</sup> Já nanducú ñehe Jesús tuhun nu dá já naçachi a já xihín dá:

—Co cómi i cuéntá sahá ñayivi tátuhun cája ñayivi cuéntá ñuyívi. Jáchi tá ná cacomí i cuéntá saha ná tátuhun na ñuyívi já quéa cuu caja i xihín na cómi i cuéntá saha ña ná caní táhan na xihín na Israel ña ná a tীন na yehe. Joo co cómi toho i cuéntá saha ná tátuhun cája ñayivi cuéntá ñuyívi —naçachi a.

<sup>37</sup> Andá já naçachi tucu Pilato já xihín Jesús:

—Á cúun da cómi cuéntá sahá ñayivi, dá já —naçachi da.

Já naçachi Jesús já xihín dá:

—Ña ndaa quéa cáhan ndó jan. Yehe cúu u da cómi cuéntá sahá ñayivi cuéntá mí i jáchi naçacu u ñuyívi yóho ña

ná caja i já. Ta naquixi i já ná çaxi tuhun i ña ndaa xihín ñayivi. Ta tóco ndihi na cúu cuéntá ña ndaa xini johó ña cáhan i —naçachi a.

<sup>38</sup> Já naçachi tucu Pilato já xihín á:

—Yo xini ndia cúu ña ndaa —naçachi da.

Tá nandihí já naqueta tucu Pilato vechúun cáhan da xihín na Israel já naçachi da já xihín ná:

—Chí co ndíñehe mí vi ndá cuachi quéa naçaja da yóho.

<sup>39</sup> Tañu mé víco pascua íin in costumbre ndo ña ná janí i in da sá ndacaan vecaa. Ta viti cachi ndó xihín i á co cúni ndó ña ná janí i da cúu rey nuú na Israel —naçachi Pilato.

<sup>40</sup> Ta já naçasahá tóco ndihi na cán cáyuhú cóhó na já cáchi na já:

—A janí toho ndó Jesús jan. Vaha chága ná janí ndó Barrabás jan —cáchi na cáyuhú na nu Pilato.

Ta Barrabás cán naçacu da in ta cuíhná.

## 19

*Sácu na sahá Jesús quivi a*

<sup>1</sup> Andá já naçahnda Pilato chuun ña ná jácaxáhan na Jesús xihín churrú. <sup>2</sup> Ta da cúu soldado cán najehén da in tiyivi xihín íñu já nachinúu da a jiní á ta nachinúu da in jáhma cuáhá túun jatá. <sup>3</sup> Tá nandihí já naçativi da nu á sácu ndaa ichi ñahá da já naçachi da já xihín á:

—Cáhnú nahá ná cacuu yohó, da cúu rey nuú na Israel —naçachi da.



Anda já cáni da nuu á.

<sup>4</sup> Tá nandihí já naqueta tucu Pilato chí jata já nacachi da já xihín tóco ndihí na ndúu cán:

—Candehé ndo. Tavá ñehe e Jesús nu ndo já ná candaa ini ndó ña coó toho cuachi da ndítahan i —nacachi da.

<sup>5</sup> Tá nandihí já natavá ñehe Pilato Jesús ta sa já cánúu tiyivi iñu jini á. Ta sa já tácaa jahmá cuahá túun jata naqueta. Anda já nacasáhá cáchi Pilato já:

—Candehé ndo. Yóho ín da —nacachi da.

<sup>6</sup> Joo na sacuaña nuu jutu xihín na ndáá veñuhu tá naxini na Jesús já nacasáhá na cáyuhú cóho na já cáchi na já:

—Cata caa ndó da ndica crúxu, cata caa ndó da —cáchi na.

Anda já nacachi Pilato já xihín ná:

—Mé ndó cañehe ndó da cuhun ndo cata caa ndó da ndica crúxu tá cúní ndo. Jáchi yehe co ndítahan i ndá cuachi nacaja da —nacachi Pilato.

<sup>7</sup> Anda já nacachi na Israel cán já xihín Pilato:

—Nu ley mé nde ndítahan quivi da jáchi cáchi da cúu dá in túhún jini já jahyi Ndióxi —nacachi na.

<sup>8</sup> Tá naxini joho Pilato cán ña yóho já nayihvi chága ví da. <sup>9</sup> Já naquihvi tucu Pilato xihín Jesús ini vechúun cán já nandaca tuhún da mé á já nacachi da já xihín á:

—Ndá ñuu naquisún já —nacachi da.

Joo coó nanducú ñehe Jesús tuhun nu dá.

<sup>10</sup> Já nacachi tucu Pilato já:

—Ndá cuénta quéa co cúnun nducú ñehún tuhun nuu i. Á co xini tohún ña cuu cahnda i chuun ña ná cata caa na yohó ndica crúxu. Ta cuu janí ri yohó ña ná queún cuhun tá cúní —nacachi da.

<sup>11</sup> Anda já nanducú ñehe Jesús tuhun nu dá já nacachi a já xihín dá:

—Ni in túhún toho ñaha co núná nu ndó caja ndó xihín i tá co sahan Ndióxi, tátá i ñamaní nu ndo. Joo mé a ndaa ín chága cuachi nuu da nandiquiahva yehe ndáha ndó a juú ga ndóhó —nacachi Jesús.

<sup>12</sup> Anda já nanducú Pilato ndá quiahva caja da janí da Jesús ña ná quee a cuhun a. Joo coó naxeen na Israel ta nacasáhá na cáyuhú cóho na nu dá já cáchi na já:

—Tá ná janí ndó Jesús jan já quéa náha ña co cúu ndó da ñehe táhan vaha xihín da cómi cuénta sahá ñayivi ñuu Roma. Jáchi Jesús jan cáchi da ña cúu dá da cómi cuénta sahá ñayivi ta xihín ña yóho jándihivi da emperador, da cómi cuénta sahá ñayivi ñuu Roma —nacachi na.

<sup>13</sup> Tá naxini joho Pilato ña yóho já nasahnda da chuun ña ná tavá na Jesús. Ta nasacoo mé dá nu sácoo da sáhnda chuun vechúun. Mé nu sácoo da cán naní a Gabata tuhun hebreo. Mé tuhun yóho cúní cachi a nuu naquihvi piso yuu. <sup>14</sup> Nayaha

tóco ndihi ña yóho tá cámaní in quivi coo víco pascua. Ta cúu á tátuhun caxivi ta nandaca ndichi Pilato já nacachi da já xihín na Israel cán:

—Jan ín da cúu rey nu ndo —nacachi da.

<sup>15</sup> Joo na cán nacasáhá tucu na cáyuhú cóhó na nu dá já cáchí na já:

—Cahní ndó da. Ná quivi da. Cata caa ndó da ndica crúxu —cáchí na.

Já nacachi Pilato já xihín ná:

—Ama ná cata caa ri da cúu rey nu ndó ndica crúxu —nacachi Pilato.

Anda já nacachi na sacuahá nuú jutú cán já:

—Da cómí cuéntá sahá ñuu Roma, in túhún da cán cuití va cúu rey nuú nde —nacachi na cán.

<sup>16</sup> Anda já nandiquiahva Pilato Jesús nu ná ña ná cañehe na a cuhun na cata caa na a ndica crúxu.

*Cáta caa na Jesús ndica crúxu*

(Mt. 27:32-44; Mr. 15:21-32; Lc. 23:26-43)

<sup>17</sup> Nacinúu na in crúxu joco Jesús já ndójo a do cuahan chí xiqui naní a nu ndúu lásá yiquí jíní ndii. Ta cáchí na Gólgota xihín á tuhun hebreo. <sup>18</sup> Ta cán nacata caa na a ndica crúxu ta nacata caa ri na inga ivi da xihín á, in in da in in xoo jín á. Ta tácaa Jesús mahñú ndívi da cán. <sup>19</sup> Ta nasahnda Pilato chuun ña ná cuhun java na chítivi ndaa na in tabla ndica crúxu yati jini Jesús cán. Ta

nu tabla cán nacahyi na: “Da yóho cúu Jesús, da ñuu Nazaret, da cúu rey nuú na Israel.” <sup>20</sup> Ta cuahá na Israel nacahvi na ña nacahyi cán jáchi yati yuhú ñuu Jerusalén nacata caa na Jesús. Ta ña ndáa nu tabla cán nacahyi na ña tuhun hebrero ña cáhan na Israel xihín tuhun latín ña cáhan na ñuu Roma xihín tuhun griego ña cáhan na nación Grecia. <sup>21</sup> Ta tá naxini na sacuahá nuú jutú cán ña yóho já nacachi na já xihín Pilato:

—A cáhyi toho ndó ña cúu da jan rey nuú na Israel. Vaha chága ná cáhyi ndó ña cáchí da cúu dá rey nuú na Israel —nacachi na.

<sup>22</sup> Já nanducú ñehe Pilato tuhun nu ná já nacachi da já xihín ná:

—Coo tá coo ña sa nasacu u ta a tává toho i ña —nacachi da.

<sup>23</sup> Tá nandihí nacata caa mé soldado Jesús ndica crúxu, já natiin da jahmá a ta nandicahnda nu táhan ndicomí dá ña. Ta cotó ndéé a cúu á ña nacavaha níi na ña jini á ta janda sahá ta coo nacucu na ña. Ta natiin da ña <sup>24</sup> ta já nacachi xihín táhan da já:

—Ná a jácuachí toho í jáhma jan já ná coo níi yii va. Ña cuu caja í quéa cajiquí yo sahá ta ndá da ná quee vaha, da cán ndiquehe jáhma jan —nacachi xihín táhan da cán.

Nacaja da ña yóho já ná xinú coo nuú tuhun Ndióxi nacahyi sanahá tá nacachi a já: “Nandicahnda nu táhan

mé ná jahmá i ta já ñasajíqui ña sahá cotó ndéé e ta da ñaquee vaha cán ñandiquehe da ña.” Quiahva já ñacahyi tuhun Ndióxi sanahá. Ta quiahva já ñacaja soldado cán xihin jáhma á.

<sup>25</sup> Ta jijn mé cruxu nuú ñacata caa na Jesús cán ñasandichi náná a xihín quihvi ñá cán xihín María, ñá cúu ñájíhí Cleofas xihín María, ñá ñuu Magdala. <sup>26</sup> Tá ñaxini Jesús ña cándichi náná a saha cruxu ta tá ñaxini a cándichi yehe, da naní Juan, da xíca tuun xihín á, da quihvi ndivaha ini mé á chí já ñacachi a já xihin náná a:

—Da jan cúu tátuhun jahyi ndó viti —ñacachi Jesús.

<sup>27</sup> Tá ñandihi já ñacachi a já xihin mé da xíca tuun xihín a cán:

—Candaa vaha ñá jáchi cúu ñá tátuhun nánún viti —ñacachi Jesús.

Tá ñaxini johó da ña yóho já ñandiquehe vaha da María cán ndáa da ñá tátuhun náná da.

### *Tá ñaxihí Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Tá sa ñayaha tóco ndihi ña yóho já sa xini vaha Jesús ña sa ñaxinu coo tóco ndihi ña ñacachi tuhun Ndióxi coo. Ta ñaxinu coo nuú ña ñacahyi nuú tuhun Ndióxi sahá Jesús sanahá tá ñacachi a já:

—Íchi ini i ticuúí.

<sup>29</sup> Mé cán ñasandichi in tindoho ñachutú jíní xihin vino iyá. Ta najándaxi na in ticoto xihin vino cán já

ñacató da ña nuú in yito naní hisopo ta já ñachitivi na ña yati yuhu Jesús ña ná coho a do. <sup>30</sup> Anda já ñaxihí Jesús mé vino iyá cán já ñacachi a já:

—Sa ñayaha tóco ndihi ñaha ña ndítahan ndoho i —ñacachi a.

Já ñanditoo jico á. Ñaxihí a.

### *Tá ñatuxú na in yito tátuhun poyá yicá ndicá Jesús*

<sup>31</sup> Ta ndaja coo ñasahan na Israel cán ñaxica na ñamaní nu Pilato ña ná cahnda da chuun ña ná cahnu da lásá sahá da tácaa ndica cruxu cán já ná quivi yachi da. Jáchi coo ñaxeen na Israel cán ña ná taca ndii ndica cruxu inga quivi itaan. Jáchi cacuu a quivi ndiquehe ndéé ná ta cacuu a in quivi yii ndivaha nu ná. <sup>32</sup> Sahá ña cán quéa ñaquee soldado ñasahan da já ñasahnu da lásá sahá ndiví da tácaa ndica cruxu jijn Jesús cán. <sup>33</sup> Joo tá ñacayati da nu Jesús ña cahnu da lásá sahá, ñaxini da ña sa ñaxihí va mé á sahá ña cán quéa coo ñasahnu da lásá sahá.

<sup>34</sup> Joo in táhan soldado cán ñatuxú da in yito tátuhun poyá yicá ndicá a já ñacana ñii xihín ticuúí cán. <sup>35</sup> Ta yehe cúu u da ndicani ña yóho nu ndo ta ñaxini i ña xihín nuú i. Ta cúu á ña ndaa. Ta cándaa cáxí ini i ña cáhan i ña ndaa já ná candúsa ndó ña ndicani i nu ndo. <sup>36</sup> Jáchi tóco ndihi ña yóho ñayaha já ná xinu coo nuú tuhun Ndióxi tá cáxí a já: “Ni in túhún toho lásá da, a cahnu na”, já cáxí tuhun Ndióxi. <sup>37</sup> Ta inga tucu

cáchí tuhun Ndióxi já: “Cuni tucu na da, da natuxú na poyá yicá ndicá”, já nacahyi na nuú tuhun Ndióxi sanahá.

*Tá najánduxu na Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Tá sa nayaha tóco ndihi ña yóho já naxinu coo in da naní José, da ñuu Arimateo, nu Pilato. Ta naxica da ñamaní nu Pilato ña ná ndiquehe da yiquí cuñu Jesús cañehe da cuhun da. Mé José yóho cúú dá cuéntá Jesús joo coo nanaha tuhun da sahá jáchi yihví da na Israel. Ta ndaja coo nasahan Pilato ñamaní nu dá ña ná ndiquehe da yiquí cuñu Jesús. Chí nasahan da ndiquehe da ña. <sup>39</sup> Ta jári ín in da naní Nicodemo ta ñehe da tátuhun oco uxu kilo perfume, dó nacavaha xihín ña naní mirra ta xihín ña naní aloes. Mé Nicodemo yóho cúú da da nasahan nandituhún xihín Jesús tá ñuú. <sup>40</sup> Ña cán queá natiin José xihín Nicodemo yiquí cuñu Jesús ta nachitivi na ña xihín in jáhma vaha ña nachindaxi da xihín mé perfume cán. Jáchi quiahva já ín costumbre na Israel cája na tá jánduxu na ndii. <sup>41</sup> Ta yati nuú nacata caa na Jesús cán nasahin nu cáa cuaha yitó cuihi. Ta tañu yitó cán nasahin in yávi ndica cáva nuú cuu chicao na ndii. Mé cáva cán nasacuu a ña saá jáchi ni in ndii a ñaha chicao na ini ña cán. <sup>42</sup> Ta cán nachicao da yiquí cuñu Jesús jáchi yati nasahin a.

Ta númi dá jáchi sa nacativi quivi ndiquehe ndée na Israel.

## 20

*Tá nanditacu tucu Jesús*

(Mt. 28:1-10; Mr. 16:1-8; Lc. 24:1-12)

<sup>1</sup> Ta tá sa nayaha mé quivi ndiquehe ndée ná ta naha vaha chá quivi domingo tá cámani queta candii já nasahan María, ña ñuu Magdala nuú nachicao na yiquí cuñu Jesús cán. Já naxini ña ña nacaxoo yuu cáhnu nasandaji yuhú cáva cán. <sup>2</sup> Anda já naxinu ña nasahan ña nu ín Simón Pedro xihín inga da naxica tuun xihín Jesús, da quihvi ndivaha ini mé á cán. Ta tá naxinu coo ña nu dá já nacachi ña já xihín dá:

—Natavá na yiquí cuñu xitoho i ta yo xini ndájá nasacu na ña —nacachi ña.

<sup>3</sup> Anda já naqueta Pedro xihín inga da naxica tuun xihín Jesús cán ndáva da cuahan da nuú nasandacaan Jesús. <sup>4</sup> In nuú xinu ndívi da cuahan da. Joo nihí chága xinu da inga cán a juú ga Pedro ña cán queá jihna ñúhu da naxinu coo da nuú nandacaan Jesús cán. <sup>5</sup> Anda já nacandayi da sándehe da nuú nasandacaan Jesús cán. Já naxini da ñúhu ticoto nasatívi a cán cuití va. Joo coo nandihvi da janda mé ini cáva cán. <sup>6</sup> Anda já naxinu coo Simón Pedro ta nandihvi da cán. Ta naxini da mé ticoto nasatívi yiquí cuñu

Jesús cán. <sup>7</sup> Ta naxini da ticoto ña nasativí jiní á naxaxoo jín ña cán ta nanditivi vaha ña. <sup>8</sup> Anda já nandihvi ri da inga cán, da naxinu jihna ñuhú. Ta tá naxini da ña coó yiquí cuñu Jesús ndácaan já naxandúsa da ña nanditacu tucu a. <sup>9</sup> Jáchi coó naxandaa ini na cúu cuéntá mé á ña cáchi tuhun Ndióxi nu cáchi a ña nditacu tucu Jesús. <sup>10</sup> Tá nandihí já ndáca táhan ndiví da naxica tuun xihín Jesús cán nandicó coo da vehe nuú nasanduu na.

*Tá naxini María, ñá ñuu Magdala Jesús*  
(Mr. 16:9-11)

<sup>11</sup> Ta nani nayaha tóco ndihí ña yóho, nandicó coo María mé nuú nasandacaan yiquí cuñu Jesús. Sácu ñá iin ña yuhú cáva cán. Ta nani sácu ña naxandayi ña ndicoto nihni ñá ini cáva cán. <sup>12</sup> Já naxini ñá ivi tátó Ndióxi, ña ndíxi jahmá yaa. Ndáa ndúu coo a nuú nasahiin yiquí cuñu Jesús: in a nuú nasahiin jiní Jesús ta inga nuú nasahiin sahá. <sup>13</sup> Anda já naxaxoo tuhún tátó Ndióxi cán María já naxachi a já xihín ñá:

—Ndá cuéntá quéa sácún — naxachi a.

Já naxachi ñá já xihín á:

—Sácu u jáchi naxache na yiquí cuñu Jesús, xitoho i ta co xini ndájá nasacu na ña — naxachi ña.

<sup>14</sup> Tá jacá naxachi uun ña ña yóho já nandicoto nihni ñá já naxini ñá in a cándichi a nu ñá já va joo coó nandicuni

ñá ña cúu á Jesús. <sup>15</sup> Anda já naxaxoo tuhún Jesús ña já naxachi a já xihín ñá:

—Ndá cuéntá quéa sácún. Yo já ndínducún — naxachi a.

Ta naxahan María ña mé da cáhan xihín ñá cúu dá da ndáa mé yitó cuñi cáa cán. Sahá ña cán quéa já naxachi ñá já:

—Tá natavún yiquí cuñu Jesús ña nasandacaan ini cáva yóho, caxi tuhún xihín i ndájá nasacún ña já ná cuñun i ndiquehe e ña — naxachi María.

<sup>16</sup> Anda já naxachi Jesús já xihín ña:

—María.

Anda já naxava nuú ñá já nandicuni ñá Jesús ta naxahan ñá tuhun hebreo xihín á já naxachi ñá já:

—Raboni — mé tuhun yóho cúni cachi a maestro.

<sup>17</sup> Já naxachi Jesús já xihín ña:

—A tíin tuún yehe. Jáchi a ñáha toho ndindita i cuñun i indiví nu iin Ndióxi, tátá i. Joo cuáhán caxi tuhún xihín na cúu cuéntá mí i ña cuñun i nu iin Ndióxi, tátá i, mé a cúu tátá mé ndó viti. Cúu á Ndióxi nu mí i ta cúu ri a Ndióxi nu mé ndó — naxachi Jesús.

<sup>18</sup> Anda já ndáva María, ñá ñuu Magdala nasahan ñá nandicani ñá nuú na naxica tuun xihín Jesús cán ña naxini ñá mé á. Ta nandicani ñá ña naxachi Jesús xihín ña.

*Tá naxini na naxica tuun xihín Jesús mé á*

(Mt. 28:16-20; Mr. 16:14-18; Lc. 24:36-49)

19 Ta tá naçuaá mé quiví domingo cán já nanditútú tóco ndihi na naçica tuun xihín Jesús cán. Nuhu tuun na ini vehe ta nachicaji tuun na yéhe jáchi yíhvi na xinu na Israel cán tiin ñahá na. Ta in cuití naxinu coo Jesús nu ná ta nandaca ndichi a mahñú ndaa nu ndúu na cán. Já naçahan Ndióxi a xihín ná já naçachi a já:

—Ná coo vaha ini ndó — naçachi a.

20 Ta tá naçachi a ña yóho já najánaħa ndáħa á xihín yicá ndícá a nu ná ña ná candaa ini na ña jivi cúu mé á. Ta naçajii ín na tá naxini na a.

21 Tá nandihí já naçachi tucu Jesús já xihín ná:

—Ná coo vaha ini ndó. Tá quiahva naçaja Ndióxi, tátá i nachindahá a yehe ñuyiví yóho quiahva já chindahá ri yehe va ndohó cuhun ndo çaxi tuhun ndó xihín ñayivi saħa mí i —naçachi Jesús.

22 Anda já nativi a nu ná já naçachi a já xihín ná:

—Ndiqehé ndó ínimá yii Ndióxi. 23 Ta tá ná caja cáħnu ini ndó saħa cuachi ñayivi, na cán cúu na sa naçaja cáħnu ini Ndióxi saħa. Ta tá ná a caja cáħnu ini ndó saħa cuachi, na cán cúu na coo naçaja cáħnu ini Ndióxi saħa —naçachi Jesús.

*Tá naxini xihín nuu Tomás Jesús*

24 In táhan da naçica tuun xihín Jesús, da naní Tomás, da çahan na cuatí xihín cán, coo toho da naçajin xihín na cán tá naquixi Jesús nu ndúu

na. 25 Tá nandihí já naçaxi tuhun na java cán xihín dá já naçachi na já:

—Naxini nde Jesús, xitoho í —naçachi na.

Já nanducú ñehe Tomás tuhun nu ná já naçachi da já xihín ná:

—A cándusa toho i ña cáchi ndo janda quiahva ná cuni xihín nuú i ndáħa Jesús ta já jáquihvi i nducu ndahá i ini yávi nuú naquihvi clavo naçaja na cán. Ta xíní ñúhú jáquihvi i nducu ndahá i ini yávi naçaán na yicá ndícá a cán. Anda jáví candúsa i ndohó —naçachi da.

26 Tá nayaha una quiví já nandique táhan tucu na naçica tuun xihín Jesús cán ini in vehe. Ta mé tañu já naçajin Tomás xihín ná. Ta quiahva já naçaji tuun tucu na yéhe vehe nu ñúhu na cán. Anda já in cuití naxinu coo Jesús nu ná ta nandaca ndichi a mahñú na cán ta naçahan Ndióxi á xihín ná já naçachi a já xihín ná:

—Ná coo vaha ini ndó — naçachi a.

27 Tá nandihí já naçachi a já xihín Tomás:

—Naha quí jáquihvi nducú ndáħun ini ndahá i ta candehé ini ndahá i nuú naquihvi clavo. Ta jáquihvi nducú ndáħun yicá ndícá i já ná cunún nuú najándicuehe na yehe. A cáhvi ivi joho inún jáchi xíní ñúhú candúsún yehe —naçachi Jesús.

28 Anda já naçatontó Tomás já naçachi da já:

—Mé ndó cúú xitoho i ta cúú ndó Ndióxi ña cája cáhnu i —nācachi da.

<sup>29</sup> Andā já nācachi Jesús já xihín dá:

—Mé a ndaa cándúsún yehe viti jáchi naxinún yehe. Joo caji ini ñayivi, nā cándúsa yehe vatí coó i xíní nā xihín nuu ná —nācachi Jesús.

*Cáhan Juan ndá sahá nācahyí da libro yóho*

<sup>30</sup> Cuahá ndivaha java ga ña xituhún nācaja Jesús nuú nā naxica tuun xihín a cán vatí co ná cahyi a nu libro yóho. <sup>31</sup> Joo ña yóho nācahyi a já ná candúsa ndó ña cúú Jesús da nāchindahá Ndióxi cacomí cuéntá sahá ñayivi, mé a cúú in túhún jini já jahyi Ndióxi. Ta sahá ña cāndeé ini ndó mé á cuu catacu ndó andā ama cá quivi.

## 21

*Naha Jesús mé á nuú usa táhan nā naxica tuun xihín a cán*

<sup>1</sup> Tá sa nayaha ña yóho já nanaha tucu Jesús mé á nuú nā naxica tuun xihín á nani nasanduu na yatí yuhú tañuhú naní Tiberias cán. Ta quiahva joho nasahin a. <sup>2</sup> In tañu ndúu tútú Simón Pedro xihín Tomás, da cáhan nā cuatí xihín cán. Ta jári ndúu Natanael, da ñuu Caná cuéntá Galilea cán xihín ndíví da cúú jahyi Zebedeo cán. Ta nasanduu ri inga ivi ga táhan da naxica tuun xihín Jesús. <sup>3</sup> Andā já nācahan Simón Pedro xihín tóco ndihi nā cán já nācachi da já xihín ná:

—Cuhun i tavá i tiyacá — nācachi da.

—Cuhun ri ndehe va tavá nde tiyacá xuhun —nācachi nā cán xihín dá.

Já nandihvi ndihi na ini barco cuahan nā tavá nā tiyacá. Joo coó tiyacá natavá nā mé ñuu cán. <sup>4</sup> Ta tá sa cuahan ndúcú tivi já nācanaha Jesús yuhú ticui cán. Joo nā naxica tuun xihín a cán co xini nā ña cúú á Jesús. <sup>5</sup> Andā já nācayuhú Jesús ndāca tuhún á nā já nācachi a já xihín ná:

—Á coó toho tiyacá natavá ndo, ñani —nācayuhú a.

—Coó mé rí ná tavá nde — nanducú ñehe na tuhun nu á.

<sup>6</sup> Andā já nācachi tucu Jesús já xihín ná:

—Jácana tucu ndó ñunu ndó chí xoo cuáha barco jan já tavá ndó ri —nācachi a.

Andā já najácana na ñunu ná cán xoo cuáha barco ta tá nandihvi chí co ndéé nā tavá nā ñunu cán jáchi a juú quiahva nachutú ndaa ña xihín tiyacá. <sup>7</sup> Andā já nādicahan yehe, da quihvi ndivaha ini mé a cán já nācachi i já xihín Pedro:

—Cúú á Jesús, xitoho í — nācachi i.

Tá naxini joho Simón Pedro ña cúú a cán Jesús já nādicandixi da cotó da jáchi coó toho cotó da ndíxi da, nduu. Tá nandihvi já ndáva da cuahan da jitá da ticui chí yuhú tañuhú cán. <sup>8</sup> Tá nandihvi já naxinu coo java ga nā naxica tuun xihín Jesús cán xihín barco nā

chí yuhú tañuhú já ñúhu na ñúnu nāchutú xihín tiyacá cán nasaā nā janda yúhu. Jáchi tátuhun in ciento metro nasandichi barco nā yuhú tañuhú cán tá natavá nā tiyacá. <sup>9</sup> Tá naxinu coo nā cán nu ñúhu já naxini na cáyi ñúhu. Ta naxini na cánú in tiyacá yáta rí nu ñúhu cán. Ta naxini na ña sa ín pan cuxu na viti. <sup>10</sup> Andā já nācachi Jesús já xihín ná:

—Taxi ndó java tiyacá, rí jacá natavá ndó jan — nācachi a.

<sup>11</sup> Andā já ndáva Simón Pedro nasahan da nādaa da jata barco cán já ñúhu da ñúnu, ña nāchutú ndaa xihín tiyacá nánu cán, naxinu da janda yúhu. Ta nasacuu rí in ciento ivi jico sahun uní. Ta vatí cuaḥa ndivaha cúu rí coo natahnda ñúnu nuú nasañuhu rí cán. <sup>12</sup> Andā já nācachi Jesús já xihín ná:

—Naha ndó cajini ndó — nācachi a.

Ta ni in túhún nā cán coo nasahan ndeé ini na ndaca tuhún nā yo cúu mé á. Jáchi sa nācandaā cáxi ini na ña cúu á Jesús, xitoho na. <sup>13</sup> Tá nāndihi já natiin Jesús pan cán já nasahnda java ña já nasahan ña nu ná. Ta quiahva já nācaja ri a xihín tiyacá va, nāndicahnda rí já nasahan rí nu ná.

<sup>14</sup> Xihín ña yóho naxinu uní tañu nanaha Jesús mé á nuú nā naxica tuun xihín á janda naní nānditacu tucu a.

*Cáhan Jesús xihín Simón Pedro*

<sup>15</sup> Tá nāndihi naxijini na já nāndaça tuhún Jesús Simón Pedro já nācachi a já xihín dá:

—Simón, da cúu jahyi Jonás á quihvi ini chágún yehe a juú ga nā java yóho — nācachi a.

Já nācachi da cán já:

—Mé ndó cúu ndó xitoho i ta sa xini vaha ndó ña quihvi ini i ndohó — nācachi da.

Já nācachi Jesús já xihín dá:

—Xini ñuhú candaa vahún nā cúu cuéntá mí i tá quiahva ndáa vaha pastó ndicachi válí jana dá — nācachi a.

<sup>16</sup> Andā já nācachi tucu Jesús já xihín dá:

—Simón, da cúu jahyi Jonás, á quihvi inún yehe — nācachi a.

Andā já nācachi da já xihín á:

—Mé ndó cúu ndó xitoho i ta cándaā vaha ini ndó ña quihvi ini i ndohó — nācachi da.

Já nācachi Jesús já xihín dá:

—Xini ñuhú candaa vahún nā cúu cuéntá mí i tá quiahva ndáa vaha pastó ndicachi jana dá — nācachi a xihín dá.

<sup>17</sup> Andā já nāndaça tuhún tucu a da táhnda uní já nācachi a já xihín dá:

—Simón, da cúu jahyi Jonás, á mé a ndaa quihvi inún yehe — nācachi a.

Tá naxini mé Simón Pedro cán ña naxinu uní táhnda ndaca tuhún Jesús da sahá ña yóho já nācacuēḥa ini da já nācachi da já xihín Jesús:

—Jesús, mé ndó xini vaha ndó tóco ndihi ñaha. Mé ndó xini vaha ndó ña quihvi ini i ndohó — nācachi da.

Já nācachi Jesús já xihín dá:



—Xíní ñúhú candaa vahún na cúu cuénta mí i tá quiahva ndáa vaha pastó ndicachi jana dá. <sup>18</sup> Jáchí mé a ndaa ná cahan i xuhun. Tá nasacuún taa yúta chá já ndicandisún jáhmun ña cúnun ta já cuahún ndá nu cúní mún cuhun. Joo tá ná cayatún já jácaún ndáhun ta inga na jácandixi yohó jáhmun. Ta já tiin ndaa na yohó cuhún xihín ná nuú co cúní mún cuhun —nacachi a.

<sup>19</sup> Xihín ña yóho cúní Jesús ndicani a nu Pedro cán ndá quiahva quivi da ña ná caja cáhnu da Ndióxi. Tá nandihí já nacachi Jesús já xihín dá:

—Xíní ñúhú candicún yehe —nacachi a.

*Ndáca tuhún Pedro saha Juan nu Jesús*

<sup>20</sup> Nani xíca na cáshān na xihín Jesús já nandicoto nihni Pedro chí jatā dá já naxini da táca Juan vaxi da. Mé Juan yóho cúu dá da quihvi ndivaha ini mé Jesús. Ta sa mé Juan yóho cúu yehe, da nasahin coo jin á tá naxijini na vicó pascua. Ta cúu yehe, da nandaca tuhún mé á saha ndá da cúu da jicó tuhún ñahá. <sup>21</sup> Tá naxini Pedro ndíco da yóho jatā ná já nandaca tuhún da Jesús já nacachi da já xihín á:

—Ta ndaja coo Juan yóho, xitoho i. Ndaja quivi da —nacachi Pedro.

<sup>22</sup> Anda já nanducú ñehe Jesús tuhun nu dá já nacachi a já xihín dá:

—Tá cúní yehe ña ná catacu da janda quiahva ná xinú coo

quíví ndicó coo i ñuyíví yóho, co ndítahan toho ndihi inún sahá. Ña ndítahan cajún quéa candicún yehe —nacachi a.

<sup>23</sup> Ta sahá ña nacachi Jesús ña yóho sahá ña cán quéa nandicuita nuu tuhun tañu tóco ndihi na naxica tuun xihín Jesús cán. Ta cáhí na sahá i ña a quíví toho i. Joo a juú toho ña yóho quéa cúní Jesús cachi a xihín ná. Ña nacachi Jesús quéa tá cúní mé á catacu u janda quiahva ná ndicó coo mé á, co ndítahan toho ndihi ini Pedro sahá ña cán.

<sup>24</sup> Ta jivi mé da cahan na saha cán cúu yehe, da cáhyí tóco ndihi ña yóho. Ta tóco ndihi na xíní na ña cúu á ña ndaa.

<sup>25</sup> Cuahá ndivaha nuú ñaha nacaja chága Jesús. Tá ná cacu ini i cahyí i tá in tá in ña nacaja mé á, cája i cuénta a quéta toho ñuyíví yóho coo libro cahan sahá ña nacaja mé á. Já ná coo.

## Tuhun vaha nacahyí Lucas sahá ña nacaja na apóstol

*Nasahan Jesús tuhun a quixi ínimayii Ndióxi*

<sup>1</sup> Jihna sa nacahyí i in libro ña ná candoo a nu ndóhó, tá Teófilo. Mé libro cán cáhan ndihi a sahá ña nacaja Jesús ta cáhan ndihi a sahá ña najánaha mé á tá nacasáhá cája chúun a <sup>2</sup> ta janda tá nandaa cuahan indiví. Tá nasahin a ñuyíví yóho ta cámani cahun a indiví já nacaxi Jesús uxu ivi dataa cacuu da apóstol ña ná caja chúun na cuéntá mé á. Ta nacaja ínimayii Ndióxi ña ná cuu jánaha Jesús nuú na cán ña ndítahan nu ná caja na. <sup>3</sup> Ta tá sa naxihí Jesús ta nanditacu tucu a já naxica nuu a ñuyíví yóho tixi ivi jícó quivi. Ta nanaha mé á nuú ndihi na cúu apóstol já ná candaa ini na ña mé a ndaa nanditacu tucu a. Ta najánaha nu ná ña cúní Ndióxi cacomí a cuéntá sahá ñayivi.

<sup>4</sup> Tá cámani ndaa Jesús cahun a indiví já nasahin a xihín na apóstol já nasahnda mé á chuun nu ná já cáchí a já xihín ná:

—Xíní ñúhú candati ndó ñuu Jerusalén yóho anda quiahva xinu ínimayii Ndióxi cañuhu a ini ínimayii ndo. Jáchí nasahan tátá i tuhun a nu ndo ña quixi ínimayii mé

á ndacaan ini ínimayii ndo ña cán quéa najánaha i ndohó ña nacachi mé á. <sup>5</sup> Mé a ndaa najácanduta Juan ñayivi xihín ticuú joo tixi chá quivi jándicutú Ndióxi ndohó xihín ínimayii mé á —cáchí Jesús xihín ná.

*Tá nandaa Jesús cuahan indiví*

<sup>6</sup> Ta ndaja coo tá nataca na cán xihín Jesús já nacasáhá ndaca tuhún na mé á já cáchí na já xihín á:

—Jesús, xitoho nde, á viti quéa quiahva ndó ñamani nuú nde, na Israel cacomí tá nde cuéntá saha mé nde já ná a cacomí ga gobierno ñuu Roma cuéntá sahá nde — nacachi na xihín á.

<sup>7</sup> Anda já nanducú ñehe Jesús tuhun nu ná já nacachi a já:

—Coo ndítahan toho nu ndóhó candaa ini ndó ndá quivi caja Ndióxi, tátá yo ña jan. Jáchí in tuhún mé á cuití va quéa xini a ndá quivi yaha ña sáhdá mé á coo. <sup>8</sup> Joo ndítahan nu ndó candati ndó yóho anda quiahva ná quixi ínimayii Ndióxi cañuhu a ini ndó. Já ná nduu ndeé ini ndó ña ná cuu jánaha ndó nuú ñayivi sahá i. Anda já ndítahan nu mé ndó cahan ndó sahá i ñuu Jerusalén yóho xihín estado Judea xihín estado Samaria. Anda já quee ndó cahun ndó cuahá ñuu xicá ní cúu ñuyíví jánaha ndó nuú ñayivi cán saha mí i —nacachi Jesús xihín ná.

<sup>9</sup> Tá nandihí nacahan Jesús ña yóho xihín ná ta nani

sándehe cáxi na cán nu Jesús ndíta na já nandaa cuahan indivi. Já naxinu in vico nachijahvi ñahá a chí coó naxini ga na mé á. <sup>10</sup> Ta nani ndíta na cán sándehe na nuú nandaa Jesús cuahan indivi já nandicoto nihni na ta sa ndíta ivi taa ndíxi jahmá yaa jijn ná. <sup>11</sup> Já nacachi da já xihin ná:

—Taa Galilea, ndávaha sándehe ndó indivi nuú nandaa Jesús cuahan. Jáchi tá quiahva naxini ndó nandindita cuahan indivi quiahva já cuni tucu ndó a ndicó coo tucu a ñuyívi yóho —nacachi ndívi da cán xihin ná.

*Nacaxi na Matías caja da chuun ña najándacoo Judas*

<sup>12</sup> Tá nandihí nandaa Jesús cuahan indivi já naquee na apóstol yúcu naní yitó olivo cán já nandicó coo na ñuu Jerusalén. Ta mé yúcu cán cándo a tátuhun in kilómetro jatá ñuu Jerusalén. <sup>13</sup> Tá naxinu coo na ñuu Jerusalén cán já nandaa na vehe cánúu jícó jáchi mé vehe cán nasanduu tóo na. Tóco ndihí na nasanduu cán nasacuu Pedro xihin Jacobo xihin Juan xihin Andrés xihin Felipe xihin Tomás xihin Bartolomé xihin Mateo xihin Jacobo, da cúu jahyi Alfeo xihin Simón, da naxica cuénta cananista xihin Judas, da cúu ñani Jacobo. <sup>14</sup> Níi tiempo nasataca ndíhuxu in na yóho xihin ñani Jesús xihin María, náná Jesús xihin java

ga najihí caca tahvi na nu Ndióxi.

<sup>15</sup> Ta ndaja coo in quivi nataca tátuhun in ciento oco na cúu cuénta Jesús. Já nacandichi Pedro mahñú na cán ta já nacachi da já xihin ná:

<sup>16</sup>—Candehé ndo, ñani i, na cúu cuénta Jesús. Nasahijn tá íin nacachi ínima yij Ndióxi coo. Jáchi nacaja Ndióxi ña ná cahan rey David ini tuhun mé á saha Judas, da nasandaca na natiin Jesús ñéhe na a cuahan na vecaa. <sup>17</sup> Mé Judas yóho nasacuu da da naxica xihin yo ta nacaja chuun da cuénta Jesús xihin yo. <sup>18</sup> Joo najicó tuhún da Jesús ta naquee da jiuhún sahá ña núu nacaja da. Ta xihin jiuhún cán naxeen da in ñuhu. Ta tá nandihí já najándicava ndayi da mé dá ta nandata tixi da chí nacana cuyu ndihí xiti da. <sup>19</sup> Tá ñañehé ñayivi ñuu Jerusalén tuhun ña sa naxihí Judas cán já nachinúu na quivi mé ñuhu naxeen da cán cananí a Acéldama. Mé tuhun cán cuni cachi a yójo nuú naxita nij jáchi cán naxita nij Judas tá naxihí da. <sup>20</sup> Jáchi já cáchi in Salmo ndácaan ini libro yij Ndióxi tá nacahan saha Judas já cáchi a já:

Ná candoo ndáha vehe da, ta ni in ñayivi ná a canduu ga ini a.

Ta sa mé cán ndácaan inga tucu Salmo ta cáchi a:

Inga tucu da ná ndicojo chuun nasandojo da, cáchi tuhun Ndióxi.

<sup>21</sup> Anda já ñacachi tucu Pedro já xih̄in ná:

—Tañu mí yóho ndúu java ña ñaxica nuu xih̄in yo tá ñaxica í xih̄in Jesús, xitoho í nani ñasah̄iin a ñuyiví yóho.

<sup>22</sup> Java ña yóho ñasanduu na xih̄in yo tá najácandúta Juan Jesús xih̄in ticuiví ta ñasanduu na xih̄in yo janda quiahva ñandaa Jesús cuahan indiví. Ña cán quea ndítahan nu yó caxí in da tañu ña yóho já ná caca da xih̄in yo caxi tuhun da nuú ñayivi ña ñanditacu tucu Jesús —ñacachi Pedro xih̄in ña cán.

<sup>23</sup> Sahá ña cán quea ñacana ivi da tañu ñayivi cán. Anda já ñasacu ini na caxi na in da tañu ndíví da. In da ñacana ña cán ñasananí José ta nani tucu da Barsabás ta inga tucu quiví dá ñasacuu Justo. Ta da inga cán ñasananí Matías.

<sup>24</sup> Anda já ñaxica tahví ndihi ña cán nu Ndióxi já ñacachi na já:

—Tátá Ndióxi, sa xini ndó ndía cáhvi ini tóco ndihi ñayivi. Ña cán quea caja ndó ñamaní jánaha ndó nuú nde ndá da cúu da sa ñacaxi ndó <sup>25</sup> cacuu apóstol ña ná caja da mé chuun ña najándacoo Judas. Mé Judas ñacaja da cuachi cáhnu nu ndo ña cán quea viti iin da nu ndítahan nu dá coo da —ñacachi na xih̄in Ndióxi.

<sup>26</sup> Anda já ñasajiquí ña ndá da cuu quee vaha. Naquee vaha Matías chí ñandique táhan da xih̄in ña uxu in apóstol cuéntá Jesús cán.

## 2

*Tá ñanuu ínimā yii Ndióxi jatá ña cúu cuéntá Jesús*

<sup>1</sup> Tá ñaxinu coo quiví coo víco Pentecostés já ñanditaca ndihi ña cúu cuéntá Jesús ndúu tútú ña ini in vehe.

<sup>2</sup> In cuití ñaxini johō na in a níhi ñaquixi a chí indiví. Tá quiahva níhi xícó tachí ndeé quiahva já níhi a ñaquixi a. Ta já ñaxini johō ndihi ña ndúu coo vehe cán ña. <sup>3</sup> Anda já ñaxini na in ñaha ña cáa tá quiahva cáa ñuhú ita. Anda já ñanditahnda ña ñasandójó a jini in in ña cán. <sup>4</sup> Ta ñachutú ndaa ínimā ndihi ña cán xih̄in ínimā yii Ndióxi. Chí ñacasáhá ñandicahan ña tuhun, ña coo ñasatiahva na jáchi já ñacaja ínimā yii Ndióxi.

<sup>5</sup> Mé tiempo já ñasanduu java ña Israel, ña cája cáhnu Ndióxi ñuu Jerusalén cán. Mé ña Israel yóho ñaquixi na ndijáá ñuu jatá ñuyiví. <sup>6</sup> Tá ñaxini johō ña cán ña níhi xójo cúu cán já ñacasáhá ndítaca na. Joo tá ñaxinu ña nu ndúu ña cúu cuéntá Jesús cán já ñacatóntó ña jáchi ñaxini johō na cáhan ña cúu cuéntá Jesús cán mé tuhun cáhan ña vatí coo cúu ná ña ñuu na. <sup>7</sup> Chí ñacatóntó ndivaha ña cán já ñacasáhá ndítuhún xih̄in táhan na já cáchi ña já:

—Tóco ndihi ña cúu cuéntá Jesús yóho cúu ná ña ñaquixi estado Galilea. <sup>8</sup> Ndá cuéntá quea cáhan ña tuhun cáhan in in mí. <sup>9</sup> Jáchi sa jín sa jín ñuu ñaquixi mí. Java í ñaquixi nación Partia ta java í ñaquixi

nación Media ta java í ñaꝓuixi nación Elam ta java í ñaꝓuixi nación Mesopotamia ta java í ñaꝓuixi estado Judea ta java í ñaꝓuixi estado Capadocia ta java í ñaꝓuixi estado Ponto ta java í ñaꝓuixi estado Asia <sup>10</sup> ta java í ñaꝓuixi estado Frigia ta java í ñaꝓuixi estado Panfilia ta java í ñaꝓuixi nación Egipto ta java í ñaꝓuixi ñuu cuéntá Africa, ña xícá chága a juú ga ñuu Cirene. Ta ndúu java ñayivi ñaꝓuixi ñuu Roma yóho. Ta java na cán cúu ná na ñaꝓuixi chíchi Israel ta java na co cúu ná na ñaꝓuixi chíchi Israel joo cája cáhnu na Ndióxi, mé a cája cáhnu mí. <sup>11</sup> Ta sa mé yóho ndúu java ñayivi ñaꝓuixi nación Creta xihín nación Arabia. Ta xini johó ndihí cáhan na cúu cuéntá Jesús yóho tuhun cáhan in in mí. Ta cáhan na sahá ñaha xituhún cája Ndióxi xihín ná —cáchi ndihi na sándehe cán.

<sup>12</sup> Ta chí co xini na ndúu sándehe cán ndia cáhan na sahá na cúu cuéntá Jesús cán. Jáchi ñacatóntó ndivaha na janda ndaca tuhún táhan mé ná ndúu na já cáchi na já:

—Ndiá cuni cachi ña cája na yóho.

<sup>13</sup> Joo java na ndúu cán ñacasáhá sácu ndaa ñahá na já cáchi na já:

—Na xihí va cúu na yóho.

*Cáhan ndojó Pedro nuú ñayivi*

<sup>14</sup> Anda já ñacandichi Pedro xihín ndihuxu in ga na

apóstol cán já ñacasáhá cáhan cóhó da xihín tóco ndihi na cán já cáchi da já:

—Cuni johó vaha ndó ña cáhan i xihín ndó, ñayivi Israel, na estado Judea xihín ndihi ndó na tóho ndúu ñuu Jerusalén viti. <sup>15</sup> Mé ndó cáhan ndo ña ñaxini tóco ndihi ñayivi ndúu yóho. Joo co cúu ná na ñaxini jáchi jacá caa in naha va queá. <sup>16</sup> Ña cája na yóho quea ñacachi da naní Joel sanahá tá ñacahan da xihín ñayivi ña ndítahan coo. Mé da cán cúu da ñacachi ña cáchi Ndióxi coo já ñacachi da já:

<sup>17</sup> Tá sa ñacayati quiví ndihi saha ñuyiví yóho já cáchi Ndióxi já:

“Chindahá i ínima yii mí i cañuhu a ini tóco ndihi ñayivi.

Ta tóco ndihi jahyi yii ndo xihín jahyi jíhí ndo caxi tuhun na xihín ndó tuhun cahan i xihín ná.

Ta na tacú cuni ndimáhnú na ñaha ñaha i nu ná.

Ta na yatá quixi sani nu ná caja i.

<sup>18</sup> Ta mé tiempo já chindahá i ínima yii mí i ña ná cañuhu a ini na cája chúun cuéntá mí i, á cúu ná ta a cúu ná ñaha.

Ta caja i ña ná cahan na sahá i nuú ñayivi.

<sup>19</sup> Ta cuhá ndivaha ña náhnu caja i indivi xihín ñuyiví ta cuni ñayivi ña.

Cuni na nij xihín ñuhu cáyi xihín ñihma ña ndin-dita tátuhun vico núhú.

20 Ta canaá nuú candii ta ndicuáhá n̄i nuú yoo.

Ña yóho cacuu ña yaha tá sa nacayati quivi xinu yehe, mé á cúu xitoho na caja vií i sahá ñayivi ñuyiví.

Mé quivi cán cacuu a in quivi cáhnu ndivaha.

21 Joo cacu ndaa ínimá tóco ndihi na ná ndicahán quivi i", nacachi Ndióxi ini libro nacahyí Joel sanahá —nacachi Pedro.

22 Anda já nacachi tucu Pedro já:

—Cuni johó vaha ndó tuhun cáhan i xihín ndó, na Israel. Jáchi cáhan i sahá Jesús, mé a naquixi ñuu Nazaret. Jáchi natahan ini Ndióxi xihín tóco ndihi ñaha nacaja mé Jesús. Ta naxini xihín nuu ndó ña náhnu xihín ña xituhún nacaja mé á nu ndo xihín ndée nasahan Ndióxi nu a. Ta sa cándaá vaha ini mé ndó ña yóho. <sup>23</sup> Joo tá natiin ndó Jesús já najáxinu coo ndó ña nasacu ini Ndióxi coo sanahá ndivaha. Ta mé ndó nandiquiahva ndó Jesús ndáha ta quini. Ta nacaja ndó ña ná cata caa na Jesús ndica crúxu. <sup>24</sup> Joo najánditacu Ndióxi Jesús já ná a cóo a nu ndóho ini na sa naxihí jáchi ni in ñaha a cúu caja ña ná coo Jesucristo nu ndúu na sa naxihí. <sup>25</sup> Sanahá ndivaha nacahyí rey David sahá Jesús já nacachi da já:

Xíni vaha i ña ní tiempo ín ndó xitoho i, xihín i, ta ín ndó xoo cuáha i chíndeé ndó yehe sahá ña cán quéa co yíhvi toho i.

26 Sahá ña cán quéa nacajii ndivaha ini i,

ta nacahan vatá ndivaha i. Jáchi vatí ná quivi i cacuu u ndii joo coo vaha ini i.

27 Jáchi caja ndó ña ná nditacu tucu u já ná a cándoó nahá ínimá i nu ndúu ínimá ndii.

Ta ni a quiahva toho ndó ñamaní tahyí yiquí cuñu i jáchi cúu u jahyí maní ndo.

28 Najánaha ndó nuú i ndaja caja i ña cúni ndo.

Jáchutú ndaa ndó ínimá i xihín ña cájii ini i jáchi já ín va ndó xihín i, nacahyí David sanahá ndivaha —cáchi Pedro xihín na ndúu cán.

29 Anda já nacachi tucu Pedro já xihín ná:

—Candehé ndo, ñani i ná ndicani i nu ndo ña cúni cachi ña yóho. Sa cándaá cáxi iní ña sa naxihí David, da nasacuu tásáhnu jícó yo. Ta najánduxu na da ta ín yii va nuú najánduxu na da. <sup>30</sup> Nacachi David ña yóho jáchi nasacuu da profeta. Jáchi mé Ndióxi quéa nasahan tuhun a nu dá ta nacachi a xihín dá ña quixi Jesucristo chíchi mé dá ta nacachi a ña cacomí mé Jesucristo cán cuénta sahá ñayivi Israel. <sup>31</sup> Sa nacandaá ini David ña caja Ndióxi chí nuu sahá ña cán quéa nacachi da xihín ñayivi ña nditacu

tucu Jesús tá nandihí quivi a. Ta naçaxi tuhun David nu ná ña a jándicoo toho Ndióxi ínimã Jesús nu ndúu ínimã ndji ta ni a quiahva toho mé á ñamaní tahyi yiquí cuñu mé Jesús cán. <sup>32</sup> Ta viti cándaã ini ña naixinu tuhun naçahyí David jáchi naixini tóco ndihí ña najánditacu Ndióxi Jesús. <sup>33</sup> Ta najándindita cáhnu ndivaha Ndióxi Jesús ta nasacu a ña xoo cuáha mé á. Ta nasahan Ndióxi ínimã yji mé á nu Jesús jáchi ña yóho cúu tuhun nasahan Ndióxi sanahá. Ta tóco ndihí ña naixini ndó xihín nuu ndo ta naixini johó ndó yóho cúu á ña naquixi cuéntá Ndióxi. <sup>34</sup> Ta sa xíni yo ña co cáhan David saha mé dá jáchi a juú David cúu da nandaa indiví, vaha. Sa mé David cúu dá da naçachi tuhun yóho:

Naçachi Ndióxi xihín xitoho i: “Naha xoo cuáha jijn i cacouñ, <sup>35</sup> janda quiahva ná cacu u na cándají yohó tixi sahun”, naçachi Ndióxi —já naçahyí David sanahá.

<sup>36</sup> Anda já naçachi tucu Pedro já:

—Ña cán quéa cúní ña na cándaã ini tóco ndihí ndó ña cáhan i xihín ndó, na Israel. Mé Jesús, mé a naçata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuéntá sahá ñayivi —naçachi Pedro xihín na ndúu cán.

<sup>37</sup> Tá naixini johó na cán ña naçachi Pedro xihín ná ivi laá natahvi ini na já naçasahá

ndáca tuhún na Pedro xihín java ga na apóstol cán já cáchi na já xihín ná:

—Ndía ndítahan caja nde, ñani, na cúu cuéntá Jesús.

<sup>38</sup> Anda já nanducú ñehe Pedro tuhun nu ná já cáchi da já xihín ná:

—Xíni ñúhú ndicó coo ini ndó ta jándicoo ndó cuachi cája ndó ta candúta ndó cuéntá Jesucristo já quéa ná caja cáhnu ini Ndióxi sahá cuachi ndó ta já ñehe táhvi ndó quiahva Ndióxi ínimã yji mé á nu ndo. <sup>39</sup> Jáchi nasahan Ndióxi tuhun a caja ña jáchutú ndaa ínimã ndo xihín ínimã yji mé á ta quiahva já caja ri a xihín jahyi ndó ta jári xihín na tóho, na ndúu xicá. Jáchi já caja mé á xihín ñayivi naçaxi mé á —naçachi Pedro xihín ná.

<sup>40</sup> Ta cuahá ndivaha java ga tuhun naçahan Pedro xihín ná ta já najácahan da na já naçachi da já xihín ná:

—Candeé ini ndó Jesús já ná jácacu a ndohó já ná a cùhun ndó indayá nuú cùhun ñayivi cája cuachi —naçachi Pedro xihín ná.

<sup>41</sup> Cuahá ñayivi nandiquehe vaha na tuhun naçahan Pedro ta naçandeé ini na Jesús. Ta mé quivi já naçandúta tátuhun uní mil ñayivi já nandihvi na íchi cuéntá Jesús. Ta nandique táhan na cán xihín java ga na cúu cuéntá Jesús. <sup>42</sup> Ta ndinuhu ini na jácuaha na ña jánaha na apóstol nu ná. Ta cándúsa táhan tóco ndihí na ta ndítutú na xicá tahvi na nu Ndióxi.

Ta níi tiempo sá taca na ndicahnda java táhan na pan cuxu na.

*Ña nacaja ñayivi tá nacasáhá na ndíco na íchi cuéntá Jesús*

<sup>43</sup> Mé tiempo já nasahan Ndióxi ñamaní nuú na apóstol cán ña ná cuu caja na cuahá ndivaha ñaha xitúhún xihín cuahá ña náhnu ndivaha ta chí cátóntó tóco ndihi ñayivi tá xíní na ña yóho. <sup>44</sup> Ta tóco ndihi na cúu cuéntá Jesús cán in nanduu ndihi na ta ndicahnda java ñaha nu táhan na. <sup>45</sup> Ta jícó na ñaha cómí na ta já ndicahnda na jjuhún na nuú na ndímaní ñaha nuu. <sup>46</sup> Ta ndijáá níi quiví ndítútú na cája cáhnu na Ndióxi veñuhu cáhnu ndácaan ñuu Jerusalén cán. Ta tá ndíque táhan na vehe já ndicahnda java táhan na pan cuxu na ta cávatá ndivaha xihín táhan na cája na já. Ta ní in na co ndíñehe jícó mé. <sup>47</sup> Nacaja cáhnu na Ndióxi ta tóco ndihi ñayivi ndúu ñuu Jerusalén ín vaha ini na xihín na cán. Ta nini quiví nacaja Ndióxi ña nandicuahá na cúu cuéntá Jesús, mé na jácaacu ndaa Ndióxi ínimá.

### 3

*Ndivaha in taa rénco cája Pedro*

<sup>1</sup> In quiví tátuhun caa uní sahin cuahan Pedro xihín Juan veñuhu cáhnu Jerusalén cán. Mé hora já táca ñayivi cuahan na veñuhu caça tahví na nu Ndióxi. <sup>2</sup> Ta mé yuyéhe ñuhu cán ín coo in da naxihí

tuchu saha. Ta janda tá nacacu da cáa da já. Ta ndijáá níi quiví ñehe na da cuahan da yuyéhe ñuhu cáhnu naní yéhe ñúchí. Ta cán ín coo da sáti da nuú ñayivi ndíhvi ini veñuhu cán. <sup>3</sup> Ta tá naxini da rénco cán cuahan quíhvi Pedro xihín Juan ini veñuhu cán já nacata ñee da ndáha dá nu ná sáti da. <sup>4</sup> Anda já nandicoto nihni Pedro xihín Juan nuú da rénco cán já nacachi Pedro já xihín dá:

—Candehé nuú nde.

<sup>5</sup> Anda já nasandehé cáxi da cán nu ná jáchí cáhán da quiahva na jjuhún nu dá. <sup>6</sup> Joo já nacachi Pedro xihín dá já:

—Coó toho jjuhún i quiahva i nuun joo ña ín nuú i ña cán quiahva i nuun. Ín ndivaha ndée Jesucristo, mé á ñuu Nazaret sahá ña cán quéa sáhdá i chuun nuun ña ná candichún cacún — nacachi Pedro xihín dá.

<sup>7</sup> Anda já natiin Pedro ndahá cuaha da cán ta nandíñehe da da já nacandichi da chí iví laá nandíhvi ndée saha dá já nanditacu Tuchu saha dá. <sup>8</sup> Anda já nacandita mé da nasahín rénco saha cán já nacandichi da ta já nacasáhá da xíca da. Cándita da cája cáhnu da Ndióxi nandíhvi da xihín ná ini veñuhu cán. <sup>9</sup> Ta tóco ndihi ñayivi ndúu cán naxini na cándita da cája cáhnu da Ndióxi. <sup>10</sup> Ta a juú quiahva nacatóntó na ta nayihví na sahá ña naxini na cán. Jáchí nandicuni na



da cán cúú da da nasacuu réncō, da nasahin coo sáti yéhé ñuhu naní yéhé ñúchí cán.

*Cáhan ndojó Pedro nuú ñayivi ndúu yéhé ñuhu cáhnu cán*

<sup>11</sup> Mé da nasacuu ta réncō cán ñatiin tuun da Pedro xihin Juan ta chí cō cúní da janí ñahá da. Ta tóco ndihi ñayivi ñacatóntó ña xínu na cuahan ña candehé ña da réncō cán nu ndíta da yéhé ñuhu, ña naní yéhé Salomón.

<sup>12</sup> Tá ñaxini Pedro ñacasáhá táca cuahá ñayivi nu ín da já ñacasáhá cáchí da já xihin ná:

—Cuni johō vaha ndó, ñayivi Israel. Cátóntó ndivaha ndó sándehe ndó ndehē jáchí cáhán ndō ña ñandaja vaha ndē da yóho xihin ndéē mé ndē. Á tá cōō ta cáhán ndō ña ñandaja vaha ndē da sahá ña ndícahán ndivaha ndē Ndióxi. <sup>13</sup> Joo cō ín toho a tá quiahva cáhán ndō. Jáchí mé Ndióxi, ña ñacaja cáhnu Abraham xihin Isaac xihin Jacob, tásáhnu jícó yō ñandaja vaha mé á da yóho. Ta mé Ndióxi cán ñacaja ña ná nduu cáhnu ndivaha Jesucristo, jahyi mé á. Joo mé ndó ñandiquiahva ndó a ndahá ña jutixia. Ta tá cúní Pilato janí da Jesús já ñasaji nuu ndó nu dá caja da ña. <sup>14</sup> Mé Jesús cúú á ña yíi ndivaha ta ndinuhu ña ndaa cuití va cája. Joo mé ndó ñacandají ndó a ta ñaxica ndó nu Pilato ña ná janí da in da sáhní ndíi. <sup>15</sup> Tá ñandihí já ñasahní ndó Jesús, mé a

cúú cája ña ná catacu ñayivi andá ama cáa quiví. Ta vatí ñaxihí a nasacuu a ndíi joo ñajánditacu tucu Ndióxi mé á. Ta cándaá cáxí ini ndē ña cáhan ndē ña ndaa xihin ndō. <sup>16</sup> Ta sa mé Jesús cúú á ña cándeé ini ndē. Ta sahá ña cándeé ini ndē mé á sahá ña cán quéa ñandivaha da cándichi nu ndó yóho. Ta xíní ndó da ñandivaha yóho ta cándaá cáxí ini ndó ñandihví ndéē saha dá sahá ña cándeé cáhnu ini ndē Jesús.

<sup>17</sup> 'Candehé ndo, ñani i. Sa xíní vaha ndē viti ña tá ñasahní ndó Jesús cō ñacandaá ini ndó ndía ñacaja ndó. Ta ni ña cúú jefe ndō cōō ñacandaá ini na ndía ñacaja na. <sup>18</sup> Joo xihin ña yóho ñajáxinu cōo Ndióxi tuhun ñasahan nu yó sanahá tá ñacachi ña profeta cuéntá Ndióxi ña ndítahan ndoho ini Jesucristo, mé a ñachindahá Ndióxi cacomí cuéntá sahá ñayivi. <sup>19</sup> Sahá ña cán quéa xíní ñúhú jándacoo ndó cuachi cája ndó ta ndicó cōo ini ndó nu Ndióxi já ná jándoo mé á cuachi ñacaja ndó. Andá já caja Ndióxi ña ná ndivaha ini ndó. <sup>20</sup> Janda jihna ñacaxi Ndióxi Jesucristo ná chindahá a ña ná quixi a ñuyiví yóho já ná cacomí a cuéntá sahá ñayivi. <sup>21</sup> Ta viti ín Jesucristo indiví ndáti a tandaa quiví caja Ndióxi ña nduu vií tóco ndihi ñaha. Já ndítahan coo jáchí sanahá ndivaha ñacahan Ndióxi xihin ña profeta mé á sahá ña yóho ta mé ná ñacaxi tuhun

na ña nuú ñayivi. <sup>22</sup> Ta ña yóho cúu tuhun naçahan Moisés nu tásáhnú jícó yo já naçachi da já xihín ná: “Tañu mé ndó jan cana in profeta caja Ndióxi, xitoho í tá quiahva naçaja mé á xihín mí i. Ta coto a quehe núu ndó ni in túhún tuhun çahan mé profeta jan xihín ndó. <sup>23</sup> Jáchí tóco ndihi ñayivi, na ço cúní candúsa tuhun çahan mé profeta jan ndihi saha ná ta a ñéhe táhví ga na coo na xihín na ñuu Ndióxi”, naçachi Moisés sanahá — naçachi Pedro xihín ná.

<sup>24</sup> Ta naçahan chága Pedro xihín ná já cáchí da já xihín ná:

—Tóco ndihi na profeta naçahan na sahá ña yáha tiempo viti. Ta profeta Samuel cúu da naçasahá çahan sahá ña yóho. Ta tóco ndihi java ga na profeta naquixi tá nu ndihí naçahan na cán saha tiempo viti. <sup>25</sup> Naçindahá Ndióxi na profeta sanahá ña ná çaxi tuhun na xihín yo ña sahan Ndióxi tuhun a nu yó, na Israel. Naçaja vaha mé á saha yo tá naçachi a já xihín Abraham, da naçacuu tásáhnú jícó yo: “Xihín ña caja na quixi çichún chí nuú já caja cuahá ndivaha i ñamaní xihín tóco ndihi ñayivi ndúu ndijáá ñuyiví”, naçachi a. <sup>26</sup> Tá najánditacu Ndióxi Jesucristo, jahyi mé á jihna ñúhú ga nu mé ndó, na Israel naçindahá a ña já ná caja yíi á ndohó já ná jándicoo ndó cuachi caja ndó

—naçachi Pedro.

## 4

*Ndiquehe Pedro xihín Juan saha mé dá nuú na sacuahá veñuhu*

<sup>1</sup> Ta janda çahan chá va Pedro xihín Juan nuú ñayivi cán já naxinu java da cúu jutú xihín da sáhná chuun nu policia veñuhu cán. Ta tañu na yóho naxinu ri na saduceo. <sup>2</sup> Xójo ndivaha ini na jáchí jánaha Pedro xihín Juan nuú ñayivi ña sa nanditacu tucu Jesucristo. Ta xihín ña yóho náha ña vaxi quiví nditacu tucu ndíi. <sup>3</sup> Sahá ña cán quea natiin na cán Pedro xihín Juan ta nataán na da vecaa. Ta cán naçando da janda inga quiví itaan jáchí sa naçuaá va. <sup>4</sup> Joo cuahá ndivaha ñayivi naçandúsa tuhun naçahan Pedro ta xihín ña yóho nandicuaça chága na cúu cuénta Jesús. Jáchí na naçandúsa cán naçacuu na táhuhun uhun mil dataa.

<sup>5</sup> Ta ndaja coo na cúu sacuaça nuú ñayivi Israel cán xihín na sacuaça veñuhu xihín na jánaha ley Moisés nandique táhan ndihi na inga quiví itaan. <sup>6</sup> Ta tañu na cán ndáçaan ri da naní Anás, da cúu sacuaça nuú jutú. Ta tañu na cán naçandacaan ri Caifás xihín Juan xihín Alejandro xihín tóco ndihi na cúu na vehe na sacuaça nuú jutú cán. <sup>7</sup> Anda já natavá na Pedro xihín Juan vecaa. Ta ñéhe na da cuahan na nuú nataca na cán ta

naşani ndichi na da maññú na nataca cán ta já nandaça tuhún na da já cáchí na já xihín dá:

—Ndaja naçaja ndó nandaja vaha ndó da nasaquíhvi saha cán. Yo já naşahan ndée nu ndó ña cúu cája ndó ña yóho —cáchí na ndáca tuhún ñahá na.

8 Ta naçaja Ndióxi ña ná ndicutú ndaa ínima Pedro xihín ínima yi Ndióxi ña cán quea naçasahá da ndúcú ñehe da tuhun nu ná já cáchí da já xihín ná:

—Cuni johu vaha ndó, na sacuaħa ñuu xihín na sacuaħa veñuhu Israel. 9 Nandaça tuhún ndó ndehe ndaja naçaja nde nandaja vaha nde da nasaquíhvi saha cán. 10 Cuni johu ndó ná ndicani nde sahá ña yóho nu ndo ta já ná cuu candaa ri ini tóco ndihi ñayivi Israel ña mé dataa, da cándichi nu ndo yóho nandivaha da xihín ndée Jesucristo, ña ñuu Nazaret. Mé a cán naçata caa mé ndó ndica crúxu cán ta tá nandihí já najánditacu ñahá Ndióxi. 11 Ta mé Jesús yóho cúu á ña cáħan tuhun Ndióxi saha, ña cúu á tátuhun yuu ndúhu, ña naçandají na cávaha vehe. Ta mé ndó cúu ndó tátuhun na cávaha vehe cán, na naçandají Jesús. Joo viti naşinu a cúu á tátuhun yuu ña ín chága saha naçaja Ndióxi. 12 Jáchi ni in túhún toho ñayivi ndúu ñuyiví a cúu jácaacu mí ña ná a cúhun yó indayá. In túhún Jesucristo quea naçindahá Ndióxi nu

yo já ná caçu ndaa ínima yo —naçachi Pedro xihín ná.

13 Tá naşini na sacuaħa cán ña co yíhvi Pedro ni Juan ndíta da cáħan da xihín ná já naçatóntó na jáchi sa xini na ña coo tiaħva da tutu. Ta naşini na ña cúu dá da ndahví, da naşica xihín Jesús. 14 Ta ni co ñeħe ínima na sacuaħa cán cachi na xihín Pedro ña cúu dá da tuhún jáchi sa nuu táhyí na já va cándichi da nandivaha saha cán. 15 Anda já natavá too na da cán já naçasahá ndítuhún xihín táhan na. 16 Já cáchí na já:

—Ndía caja í xihín ndiví da yóho viti jáchi sa naçandaa ini ndihi ñayivi ñuu Jerusalén ña xituhún naçaja da. Ta ni mí, a cúu cachi ña cúu á ña tuhún. 17 Joo cóho jáyihví yó na ná a cáħan chága na saha Jesús nuu ni in túhún toho ga ñayivi. Jáchi co cuni yo ña ná ndicuita nuu tuhun saha Jesús —cáchí na ndítuhún xihín táhan na.

18 Anda já naçana tucu na Pedro xihín Juan ta naşahnda na chuun nu ná ña ná a jánaħa ga na saha Jesús ta ni ná a cáħan ga na quivi Jesús. 19 Anda já nanducú ñeħe Pedro xihín Juan tuhun nu ná já cáchí da já xihín ná:

—Cahvi vaha ini ndó, na sacuaħa. Á cáħan ndó ña vaha chága caja nde ña saħndá ndóhó á ña saħndá Ndióxi nuu nde caja nde. 20 Jáchi a cúu jándacoo nde cáħan nde sahá ña naşini nde xihín sahá ña naşini johu nde

—cáchi da xihín na sacuahá cán.

<sup>21</sup> Anda já nacahan cuehe na sacuahá cán xihín dá ña ná a jánaha chága da saha Jesús. Joo tóco ndihi ñayivi cája cáhnu na Ndióxi sahá ña nacaja da cán. Ña cán quéa najani ñahá na jáchi coo nañehé íni na ndá quiahva caja xíxi na xihín dá. <sup>22</sup> Ta mé da nandivaha cán naxinu chága da nuú ivi jícó cuiá tá nandivaha saha dá.

*Xíca tahví na cúu cuéntá Jesús nu Ndióxi*

<sup>23</sup> Ta tá sa najani Pedro xihín Juan já naquee da cuahan da nuú nasanduu java ga na cúu cuéntá Jesús cán. Ta já nandicani na nuú na cán ña nacahan na sacuahá nuú jutú xihín na sacuahá veñuhu cán xihín ná. <sup>24</sup> Tá naxini joho java ga na cúu cuéntá Jesús cán ña ndicani da nu ná já nacasáhá tóco ndihi na xíca tahví na nu Ndióxi já cáchi na já:

—Tátá Ndióxi. Mé ndó cúu Ndióxi ña nacavaha indivi xihín ñuyiví xihín tañuhú xihín tóco ndihi ñaha. <sup>25</sup> Sanahá ndivaha tá najándicutú ndaa ndó ínima David, tásáhnu jícó nde xihín ínima yíi mé ndó já nacachi ndó já xihín dá ta já nacahyí da:

Ndá cuéntá quéa ndívaá nahá ñayivi ndúu ñuyiví ta ndinuhu ña núu cáhvi ini na caja na.

<sup>26</sup> Tóco ndihi da cómí cuéntá sahá ñayivi ndúu ñuyiví xihín da

sáhndá chuun nuú ñuu nandique táhan na cani táhan na xihín Ndióxi.

Ta cáni táhan na xihín mé a nacaxi Ndióxi chin-dahá a cacomí cuéntá sahá ñayivi, nacachi ndó sanahá.

<sup>27</sup> Ta mé a ndaa quéa yóho jáchi ini ñuu yóho najátaca táhan Herodes xihín Poncio Pilato xihín na tóho xihín na Israel viti. Najátaca táhan na caja núu na xihín Jesús, da cúu jahyi yíi mé ndó, mé a nacaxi ndó. <sup>28</sup> Joo xihín ña nacaja na yóho naxinu coo nuú ña nasacu ini mé ndó coo janda jihna ndivaha jáchi cuu caja ndó tóco ndihi ña cuni ndó caja ndó. <sup>29</sup> Ta viti candehé ndo, tátá Ndióxi ndá quiahva cuni na caja xíxi na xihín nde. Ta quiahva ndó ñamani ná candee ini nde ndohó já ná a yíhvi nde cahan nde tuhun vaha saha mé ndó xihín ndá nuú ñayivi nacuu jáchi mé nde cúu nde na cája chúun nu ndo. <sup>30</sup> Ta xíca tahví nde nu ndo ña ná cuu ndaja vaha nde na quíhvi xihín ndée mé ndó. Ta ná caja ndó ñamani ña ná caja cuahá nde ñaha xituhún xihín cuahá ña náhnu ná cuni ñayivi ña xihín ndée Jesucristo, jahyi yíi mé ndó cája nde tóco ndihi ña yóho —cáchi na xíca tahví na nu Ndióxi.

<sup>31</sup> Tá nandihí naxíca tahví na nu Ndióxi já naquiji nuu vehe nu ndúu tútú na cán. Ta já nandicutú ndaa ínima ndihi na cán xihín ínima yíi Ndióxi

ta nandindeé ini na caḥan na tuhun Ndióxi nuú ñayivi.

*Sáhdá java táhan na cúu cuéntá Jesús ñaha cómi na*

<sup>32</sup> Cuahá ndivaha nasacuu na cúu cuéntá Jesús cán joo chí in jini ndihi na. Ta ni in túhún na co cájihnda ñaha nu táhan jáchi cáchi na: “Ñaha tóco ndihí queá.” <sup>33</sup> Xihin ndée sáhan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamaní xihin tóco ndihi na cúu cuéntá Jesús cán. <sup>34</sup> Ta ni in na coó nandimaní ñaha nuú jáchi na in ñaha nuú tátuhun vehe á ñúhu najicó na ña ta ñéhe na mé jiuhún cán <sup>35</sup> ta sáhan na ña nuú na apóstol já ná ndicahnda mé ná ña nuú in in na xini ñúhú a. <sup>36</sup> Já nacaja in dataa naní José, da naquixi chichi Leví. Ta cúu dá da nacacu in isla naní Chipre. Mé da yóho nachinúu na apóstol quivi dá naní da Bernabé ta mé tuhun yóho cúní cachi a da sáhan tuhun ndeé ini ñayivi. <sup>37</sup> Ta mé da naní Bernabé yóho najicó da ñúhu dá ta já nasahan da mé jiuhún da cán nuú na apóstol.

## 5

*Cája Ananías xihin Safira cuachi nu Ndióxi*

<sup>1</sup> Joo mé tañu já in da naní Ananías xihin Safira, ñajihí da najicó na in ñundáhyi ná. <sup>2</sup> Joo coó nandiquiahva ndihi da jiuhún ña nacayahvi ñúhu cán nuú na apóstol. Ta nacachi da xihin ná ña cán

cúu ndihi va ña naquehe da saha ñúhu. Joo najándique táhan tuhun da xihin ñajihí da ña ná candoo chá jiuhún cán nu ná. <sup>3</sup> Ta tá naxinu coo Ananías ndiquiahva da jiuhún cán nu Pedro já nacachi Pedro já xihin dá:

—Ndá cuéntá queá nasahun ñamaní nu tiñahá sacuahá nandihvi rí ínimun, Ananías. Ta nasacu inún jándahvún ínimá yii Ndióxi ta já naquehún táhan jiuhún nachahvi na sahá ñúhu jan. <sup>4</sup> Ñaha mé vún nasacuu ñúhu jan, nduu. Ta tá najicún ña, ñaha mé vún cúu ri jiuhún jan va. Nacahvi inún cajún ña núu yóho ta xihín ña nacajún yóho a juú nu mé nde cuití va nacahún ña tuhún joo nacahún ña tuhún nu Ndióxi —nacachi Pedro xihin dá.

<sup>5</sup> Tá naxini joho Ananías ña nacachi Pedro xihin dá ivi laá nandicava da naxihí da sahá cuachi nacaja da nu Ndióxi. Ta tóco ndihi na nacandaá ini sahá ña nayaha yóho nayihvi ndivaha na. <sup>6</sup> Anda já naxinu java da tacú já nachitíví na ndii cán já ñéhe na a cuahan na jánduxu na.

<sup>7</sup> Ta tá sa nayaha tátuhun uní hora já naquihvi ñajihí Ananías nu ndácaan Pedro cán. Joo ni co xini ñá ña nandoho yí ña. <sup>8</sup> Anda já nandaca tuhún Pedro ña já cáchi da já xihin ña:

—Á mé a ndaa najicó ndo ñúhu ndo ta nachahvi na tá quiahva nacachi yíun xihín i sahá —nacachi Pedro.

Anda já nanducú ñehe ñá cán tuhun nu dá já cáchi ña já xihin dá:

—Ajan, quiahva já najicó nde ña.

<sup>9</sup> Anda já nacachi Pedro já xihin ña:

—Mé ndó najándique táhan ndó tuhun ndó coto ndojó ndo inima yii Ndióxi. Candehé. Jata vehe jan vaxi na nasahan najánduxu yün. Ta viti cañehe ri na yohó va cuhun na jánduxu na — nacachi Pedro xihin ña.

<sup>10</sup> Tá nacachi Pedro já ivi laá nandicava ñá saha dá naxihí ña sahá cuachi nacaja ñá. Tá naxinu coo da tacú, da nasahan najánduxu yí ñá cán já naxini na cánduhu ri mé va ñá naxihí ña. Anda já natavá na ña ta najánduxu na ña in xoo mé nuú najánduxu na yí ña cán. <sup>11</sup> Ta tóco ndihi na cúu cuéntá Jesús cán xihin tóco ndihi java ga na tá nacandaa ini na sahá ña nayaha yóho nayihví ndivaha na.

*Sáhan Ndióxi ndée nuú na apóstol já ná caja na cuahá ñaha xitúhún*

<sup>12</sup> Ta nacaja Ndióxi ña ná cuu caja na apóstol cán cuahá ñaha xitúhún xihín cuahá ña náhnu tañu ñayivi cán. Ta tóco ndihi na cúu cuéntá Jesús nasataca na yéhe ñuhu cáhnu naní yéhe Salomón. <sup>13</sup> Ta java ga ñayivi, na co ndico ichi cuéntá Jesús cán yihví na catáhan na xihín na cúu cuéntá Jesús yóho. Joo ndijáá java ga ñayivi cán in toni ñúhu na xihín na apóstol cán.

<sup>14</sup> Ta cuahá ndivaha ñayivi

ñacasáhá cándúsa na Ndióxi, ta viti najihí viti. <sup>15</sup> Ta sahá ña náhnu cája na apóstol yóho natavá na na quihvi jata véhe ta nachinduu na na nuú xito á nu yívi mé nuú yaha Pedro cán. Já quéa tá ná yaha da vatí candahvi cuití da ná caní ndaa jatá java na cán ña ná ndivaha na.

<sup>16</sup> Ta cuahá ñayivi ndúu java ñuu válí ndúu yati cán ñehe na na quihvi xihín na ñúhu inima quini ini vaxi na ñuu Jerusalén ta cán nandivaha ndihi na.

*Jándoho na ini na apóstol*

<sup>17</sup> Anda já da cúu sacuaña nuú jutú cán xihín na cúu cuéntá Saduceo cán ñacasáhá cáhivhi ndivaha ini na xihín na apóstol. <sup>18</sup> Sahá ña cán quéa natiin na na apóstol cán ta nataán na na vecaa. <sup>19</sup> Joo ñuu naxinu coo in tátó Ndióxi ta nasuná a yéhe caa cán ta natavá a na ta já nacachi a já xihin ná:

<sup>20</sup> —Cuahán ndó veñuhu cáhnu ta ndicani ndó nuú ñayivi saha tóco ndihi ña cája Ndióxi, mé a ndijama ñayivi ná ndihvi na ichi cuéntá mé á —nacachi a xihín ná.

<sup>21</sup> Ña cán quéa tá nativi inga quivi itaan já nandihvi na apóstol veñuhu cáhnu cán ta ñacasáhá na jánaha na nuú ñayivi cán.

Joo da cúu sacuaña nuú jutú cán xihín tóco ndihi na sacuaña cómi cuéntá sahá nación Israel cán nasahnda na chuun nu policia cán ña ná cuhun na tavá na na apóstol ñúhu vecaa cán ná quixi na

nuú na sacuaḥa cán. <sup>22</sup> Joo tá naxinu coo na cúu policia vecaa cán coo nandíñehe toho ñahá na. Ta já nandicó coo na caxi tuhun na xihín na sacuaḥa cán. <sup>23</sup> Já cáchí na já:

—Tá naxinu nde yéhe caa já naxini nde ndáji tuun a ta ndíta soldado ndáa vaha da ña. Joo tá nandihvi nde ini vecaa sándehe nde coo na apóstol cán ná ndiñehé nde.

<sup>24</sup> Tá naxini johó na sacuaḥa nuú jutú xihín da cúu sacuaḥa nu policia veñuhu xihín java ga na sacuaḥa veñuhu cán ña yóho já naçasahá ndáca tuhún táhan na sahá ña ndítahan quixi nu ná chí nuu sahá ña cája na apóstol yóho.

<sup>25</sup> Mé hora já naxinu coo in dataa ta cáchí da já xihín ná:

—Na apóstol naṭaán ndó vecaa cuni cán, ndíta na jatá veñuhu jánaḥa na ñayivi — naçachi da cán xihín ná.

<sup>26</sup> Anda já naṣahan da cúu sacuaḥa nuú policia xihín java ga policia já naṭiin tucu da na apóstol naṣaṣehe da na nuú na sacuaḥa veñuhu cán. Joo coo naçaja xixi na xihín ná jáchi nayihvi na ndicuita ñayivi cuaha cán cani na na xihín yuu. <sup>27</sup> Ta tá naxinu coo na xihín na apóstol nu ndúu na sacuaḥa veñuhu cán já naçacu ndichi na na nu ná. Anda já naçachi da cúu sacuaḥa nuú jutú cán já xihín ná:

<sup>28</sup> —Mé nde naṣahnda nde chuun nu ndó ña ná a jánaḥa chága ndó sahá Jesús jan. Joo mé ndó sa najándicutú ndó

Jerusalén xihín ña jánaḥa ndó jan. Ta cúní ndó jácojo ndó cuachi jatá nde ña naṣahni nde Jesús jan —cáchí da.

<sup>29</sup> Anda já nanducú ñehe Pedro xihín java ga na apóstol cán tuhun nu ná já cáchí na já xihín ná:

—Ndítahan nuú nde caja jihna ñúhú ga nde ña sáhdá Ndióxi nuú nde, a juú ga ña sáhdá ñayivi nuú nde caja nde. Sahá ña cán quéa coo naçaja nde ña naçachi ndó xihín nde. <sup>30</sup> Ta mé Ndióxi naçaja cáhnu táshnu jícó yo sanahá naçaja ña ná nditacu Jesús, mé a naṣahni ndó tá naçata caa ndó a ndica cruxu.

<sup>31</sup> Joo nandíñehe jícó Ndióxi Jesús ta naçacu a ña xoo cuáha mé á ta naçaja ña ná nduu Jesús ña cacomí cuénta sahá ñayivi Israel ta jácaçu a na já ná a cühun na índayá. Ta tá ná ndicó coo ini na já caja cáhnu ini Ndióxi sahá cuachi cája na. <sup>32</sup> Ta naxini xihín nuú nde tóco ndihi ña yóho ta cáhan nde sahá ta quiahva já cáhan ínimá yii Ndióxi sahá ña yóho. Ta chindahá Ndióxi ínimá yii mé á cañuhu a ini na cája ña cúní mé á —cáchí na apóstol xihín na cán.

<sup>33</sup> Tá naxini johó na sacuaḥa cán ña naçachi na apóstol já ivi laá naçajo ndivaḥa ini na xihín ná chí cúní na cahní ñahá na. <sup>34</sup> Joo ndaja coo ín tañu na cán in da sacuaḥa cúu fariseo naní Gamaliel, da ín toni ñúhú ñayivi xihín. Ta cúu dá da jánaḥa ley Moisés nu ná. Naçandichi da tañu na

sacuaḥa cán já našahnda da chuun ña ná tavá xóo na na apóstol cán jata véhe. <sup>35</sup> Anda já naçachi da já xihín na sacuaḥa cán:

—Candehé ndo, nataa Israel. Cuénta coo ndó a juú caja ndaja naçuu ndó xihín na apóstol yóho. <sup>36</sup> Xíni ñúhú ndicuhun ini ndó ña sanahá nandindita in da naní Teudas ta naçachi da xihín ñayivi ña cúú dá in da ín cuahá saḥa. Ta nasandico tátuhun comi ciento ta jata dá joo našahni na da ta tá naxihi da já nandicuita nuu tóco ndihi ñayivi naxica jata da cán ta xihín ña yóho nanaá saḥá ndihi ña naçaja da. <sup>37</sup> Tá nandihí já nandindita inga tucu da naní Judas, da naquixi estado Galilea mé tiempo cándahvi ñayivi ñuu. Ta cuahá ndivaha ñayivi nandico jata da cán joo našahni ri na da cán va ta tóco ndihi na nasandico jata dá nandicuita nuu ndihi na. <sup>38</sup> Saḥá ña cán quea jácahan i ndohó viti ná a quihvi ndáha ndó na apóstol yóho. A quihvi nuu ndó xihín ña cája na jáchi tá jiní mé va na naquixi ña cája na já quea ndihi va saḥá ña cája na yóho. <sup>39</sup> Joo tá Ndióxi nachindahá na caja na ña cája na yóho já quea a cúú toho caja ndó jándihi ndó saḥá ña cája na. Cuénta coo ndó jáchi tiaḥva náa xihín Ndióxi caní táhan ndó —cáchi Gamaliel xihín na sacuaḥa cán.

<sup>40</sup> Tóco ndihi na sacuaḥa naxini joho nuú naçahan da

cán, natahan ini na xihín ña naçahan da. Anda já naçana na na apóstol ta já naçani na na xihín churú. Ta naçachi na xihín ná ña ná a caḥan ga na saḥa Jesús nuú ñayivi. Anda já najani ñahá na. <sup>41</sup> Ta cáji ndivaha ini na apóstol cán naçqueta na nu ñúhu na sacuaḥa cán jáchi našahan Ndióxi ñamaní nu ná ndoho ini na saḥá Jesús. <sup>42</sup> Ta ndijáá ní quivi ini veñuhu cáhnu xihín ini vehe ñayivi caḥan na ta jánaḥa na saḥa Jesucristo.

## 6

*Cáxi na usa da cacuu diácono, da chindeé na apóstol*

<sup>1</sup> Ta mé tiempo cán ndicuaḥá ndivaha na cúú cuénta Jesús. Ta ndaja coo na caḥan tuhun griego cán naçasáhá caḥan cuachí na nuú na Israel. Mé na caḥan tuhun griego yóho cáchi na ña co nditahnda in nuú ñaha cája na Israel tá nditahnda ña cuxu na cuáan in in quivi. <sup>2</sup> Anda já nandaja tútú ndihuxu ivi na apóstol cán tóco ndihi na cúú cuénta Jesús já naçasáhá cáchi na já xihín ná:

—Ña ndítahan nu mé nde, na apóstol quea caxi tuhun nde tuhun Ndióxi nuú ñayivi. Saḥá ña cán quea co yáchi nde ndicahnda nde ña cuxu ñayivi. <sup>3</sup> Saḥá ña cán quea xíni ñúhú ndinducú mé ndó usa ta tañu ndó já ná caja na chuun yóho. Joo xíni ñúhú cacuu na ñayivi cándeé ini ndó. Ta xíni ñúhú cacuu na na tácu ini. Ta xíni ñúhú



cacuu na na nandicutú ndaa ínimā xihín ínimā yīi Ndióxi já ná cuu quiahva ndó chuun yóho nu ná. <sup>4</sup> Ta ña caja mé nde quéa ndinuhu ini nde caca tahví nde nu Ndióxi ta jánaḥa nde tuhun mé á nuú ñayivi —naçachi na apóstol xihín na cúu cuéntá Jesús cán.

<sup>5</sup> Ta tóco ndihi na natahan ini na xihín ña naçachi na apóstol. Sahá ña cán quéa naçaxi na da naní Esteban. Mé Esteban yóho cúu dá da cándeé cáhnu ini Ndióxi. Ta cúu dá da nandicutú ndaa ínimā xihín ínimā yīi Ndióxi. Ta naçaxi na da naní Felipe xihín Prócoro xihín Nicanor xihín Timón xihín Parmenas xihín Nicolás, da naquixi ñuu Antioquía. Mé Nicolás yóho naçasáhá cándúsa da tá quiahva cándúsa na Israel, nduu joo nandiquehe da íchi cuéntá Jesús. <sup>6</sup> Tá nandihí já ñéhe na cúu cuéntá Jesús cán ndíhusa na naixinu coo na nu ndúu na apóstol cán. Anda já naçica tahví na nu Ndióxi saḥa ná. Ta naçhinúu na apóstol cán ndáḥa ná jiní in in ndíhusa na cán ña ná caja na chuun Ndióxi.

<sup>7</sup> Ta naçasáhá ndicujita nuu tuhun cáḥan saḥa Jesús chí nandicuahá na cúu cuéntá Jesús ñuu Jerusalén. Ta cuahá na cúu jutú cán naçasáhá cándeé ini na Jesús.

### *Tín na Esteban*

<sup>8</sup> Ta ndaja coo naçaja cuahā Ndióxi ñamaní xihín in da naní Esteban cán ta nandicutú ndaa ínimā dá xihín ínimā yīi Ndióxi chí

naçasáhá cája da cuahā ñaha náhnu xihín ña xituhún nuú ñayivi. <sup>9</sup> Joo in quivi naçasáhá java na cáni táhan yúhu ná xihín mé Esteban. Na cán cúu ná cuéntá veñuhu naní Esclavos Libertados xihín java na ñuu Cirene xihín na ñuu Alejandría xihín na ñuu Cilicia xihín java ga na naquixi ñuu válí ndúu estado Asia naçasáhá cáni táhan yúhu ná xihín dá. <sup>10</sup> Joo a cuú quee vaḥa na xihín dá jáchi naçahan ínimā yīi Ndióxi tuhun ndíchi nuú mé Esteban cán ña ná nducú ñehe da nu ná. <sup>11</sup> Anda já naçahvi na cán java na já ná çahan na tuhun túhún saḥa Esteban. Ta naçachi na cán ña naçini joḥo na ña naçanaḥá Esteban xihín Moisés ta naçanaḥá da xihín Ndióxi. <sup>12</sup> Ta xihín ña yóho najándivaḡa ná ñayivi xihín na sacuaḥa veñuhu xihín na jánaḥa ley Moisés. Ta já naṭiin na da já ñéhe na da cuahā da nuú ndihi na sacuaḥa ñuu cán. <sup>13</sup> Ta nducú na da cándúsa cavaḥa tuhun túhún saḥa Esteban ta já naçasáhá cáchi da cávaḥa ña tuhún já:

—Cánaḥá da yóho xihín veñuhu cáhnu Ndióxi yóho ta cánaḥá da xihín ley Moisés. <sup>14</sup> Ta naçini joḥo nde cáchi da ña jáṭani Jesús veñuhu cáhnu yóho, mé da naquixi ñuu Nazaret ta ndijama da costumbre najándacoo Moisés nu yo —cáchi da cáḥan ña tuhún saḥa Esteban.

<sup>15</sup> Anda já nandicoto nihni na sacuaḥa xihín tóco ndihi

na ndúu coo cán nu Esteban já naxini na nandiyéhe nuú dá tátuhun in nuú tátō Ndióxi ndúu indivi.

## 7

*Ndíquehe Esteban saha mé dá nuú na sacuaḥa*

<sup>1</sup> Andá já nandaca tuhún da cúu sacuaḥa nuú jutu cán Esteban já nacachi da já xihín dá:

—Á ña ndaa cúu ndihi ña cáhan na yóho saḥun.

<sup>2</sup> Andá já nanducú ñehe Esteban tuhun nu ná já nacachi da já:

—A juú toho ña ndaa quéa cáhan na jan sahá i. Joo cuni johó ndó ña ná cáhan i xihín ndo, na sacuaḥa xihín ñani i. Saḥahá ndivaḥa tá nasahin tásáhnū jícó yo, da nasananí Abraham ñundáhyi Mesopotamia tá cámaní quee da cūhun da coo da ñuu Harán já nanaha Ndióxi mé á nu dá. Ta mé Ndióxi, xitoho í cúu á in Ndióxi cáhnū ndivaḥa. <sup>3</sup> Ta já nacachi a já xihín Abraham: “Jándacoo táhún ta jándacoo ñuún ta cuáhán inga ñuu nuú naha i nuún coún”, nacachi Ndióxi xihín dá. <sup>4</sup> Andá já najándacoo Abraham ñundáhyi Caldea nuú nasahin da ta já naquee da cuahan da coo da ñuu Harán. Tá nandihí já naxihí tátá da ta janda já nasandaca Ndióxi Abraham naquixi da nu ndúu yó viti. <sup>5</sup> Joo coó nasahan Ndióxi ñundáhyi nu dá tá nasahin da yóho. Ni in loho ñuhū coó nasahan mé á nu dá mé tiempo cán.

Joo nacachi a xihín dá ña quiahva ña nu dá chága chí nuú. Ta nacachi a xihín dá ña nduu a ñaha jahyi da tá ná quivi da vatí cámaní cacu jahyi Abraham mé tiempo já. <sup>6</sup> Ta nacachi Ndióxi xihín dá ña tóco ndihi jahyi da xihín na quixi chichi jahyi da cacuu na tátuhun na tóho jáchi canduu na inga ñuu, ña co cúu ñuu na. Ta cán caja chúun na joo a quéhe yahvi na sahá chuun caja na ta jándoho ndivaḥa na cán ini na tixi comi ciento cuja. <sup>7</sup> Nacachi tucu Ndióxi xihín dá já: “Joo jándoho i ini ñayivi, na caja xixi xihín ñayivi quixi chichún. Ta tá nandihí caja i ña ná queta na quixi chichún ta quixi na chóho já ná caja cáhnū na yehe.” <sup>8</sup> Ña yóho quéa nacachi Ndióxi xihín Abraham tá nasahan tuhun a nu dá. Ta nacachi a xihín dá ña ná chicaan da marca yiquí cuñu da já ná a ndíndójó da sahá tuhun nasahan Ndióxi nu dá. Ta tá nacacu jahyi Abraham, da naní Isaac já nachicaan Abraham marca yiquí cuñu da tá naxinu uná quiví nacacu da. Ta quiahva já nacaja ri Isaac xihín Jacob, jahyi da tá nacacu da. Ta sa mé quiahva já nacaja ri Jacob xihín uxu ivi jahyi da tá nacacu da. Ta jahyi Jacob yóho cúu tátá uxu ivi táhndá ñayivi Israel.

<sup>9</sup> Ta mé jahyi Jacob yóho nasacuu tásáhnū jícó yo joo nacahihvi ini na xihín in ñani na, da naní José. Sahá ña cán quéa najicó na da

cuahān dā naciōn Egipto. Joo nāsahjīn Ndióxi xihīn dá. <sup>10</sup> Ta nāchindeé a dā nū tóco ndihi ña nāndoho ini da ta nāsahān cuahā Ndióxi xini túni dá. Ta nācāja mé á ña ná tahan ini Faraón, mé rey naciōn Egipto cán xihín ña cāja José. Sahá ña cán quéa nāsacu rey cán José ña ná nduu da gobernador saha tóco ndihi naciōn Egipto cán. Ta nācāja rey cán ña ná cacomí dā cuéntá sahá vehe mé rey cán viti.

<sup>11</sup> Ta in tañu naxinu tama ndeé ta nācasáhá ndóho ndivaha ini tóco ndihi ñayivi ndúu naciōn Egipto. Ta quiahva já nāndoho ri ini na ndúu ñundáhyi Canaán ta chí cō ñehe ná ña cuxu tásáhnū jícó yō. <sup>12</sup> Joo tá nācandaa ini Jacob ña iin trigo naciōn Egipto já nāchindahá dā jahyi da, na nāsacu tásáhnū jícó yō cán já nāsahān na nāxēen na ña cuxu na. Ta tá nāsahān na nū cuítí yóho cōo nāndicuni na ñani na José cán. <sup>13</sup> Joo tá nāsahān na ña chí ivi chí Egipto cán já najánahā José mé dá nuú ñani da. Ta xihín ña yóho nācandaa ini dā cúu rey naciōn Egipto cán ña cúu José dā Israel. <sup>14</sup> Anda já nāsahnda José chuun ña ná cañehe na Jacob, tátá dā xihīn tóco ndihi na vehe da quixi na canduu na ñundáhyi Egipto cán. Ta tóco ndihi na nāsahān cán nāsacu na unī jícó sahnū ñayivi. <sup>15</sup> Já naquee Jacob cuahān dā coo da Egipto xihīn tóco ndihi na

vehe da. Ta sa mé cán naxihī dā ta cán naxihī jahyi dā, na nāsacu tásáhnū jícó yō. <sup>16</sup> Já nāchicaān na ndii cán ini cáva mé Egipto cán joo tá nayaha tiempo já natavá na lásá na já ñehe na ña nāsahān na nāchicaān na ini cáva mé cama santo ña nāxēen Abraham nuú jahyi in dā naní Hamor ñuu Siquem cán.

<sup>17</sup> Ta tá nācayati quivi xinu cōo ña nāsahān Ndióxi tuhun a nū Abraham coo já nācasáhá cácu cuahá jahyi na nāquixi chichi Israel. Já nāndicuaahā ná nani ndúu na Egipto cán. <sup>18</sup> Anda já nācasáhá inga tucu rey cómi dā cuéntá sahá ñayivi naciōn Egipto cán ta mé rey saá cán cō xini toho da José. <sup>19</sup> Ta mé rey yóho najándahvi da tásáhnū jícó yō cán ta nācasáhá cāja xixi da xihīn ná. Ta nācāja ndúsá dá xihīn ná ña ná jándacoo na jahyi na, na jacá nācacu já ná quivi na. <sup>20</sup> Ta mé tiempo já nācacu Moisés ta nāsacu da in ticuáhá loho ña natahan ini Ndióxi xihīn. Ta najácuañu tátá náná Moisés yóho mé dá tixi unī yōo mé vehe mé na cán. <sup>21</sup> Joo tá naxinu quivi ndítahan nū ná jándacoo na dā já nāndiquehe ñá cúu jahyi rey Egipto cán dā já najácuañu ñá dā tátuhun jahyi ñá. <sup>22</sup> Ta najácuañu Moisés tóco ndihi ña xini na ndíchí naciōn Egipto cán. Ta nāndindíchí ndivaha jinī dá. Ta nācāja cuahā dá ña náhnū. <sup>23</sup> Ta tá naxinu Moisés ivi jico cuia já nāsacu ini da coto

nihni da ñani táhan da, na ñaquixi chichi Israel. <sup>24</sup> Tá ñacasaa da nu ndúu na cán já ñaxini da cája xixi in da Egipto xihín in da Israel. Ta cuni Moisés ndiquehe da sahá da Israel ña cán quéa ñasahní Moisés mé da Egipto cán. <sup>25</sup> Jáchi ñacahán Moisés ña cuu candaá ini na Israel cán ña chindahá Ndióxi da já ná janí da ña ndáha ña Egipto cán. Joo coó ñacandaá ini na ña yóho. <sup>26</sup> Ta inga quiví itaan tá ñaxinu coo Moisés nu ndúu ña Israel cán já ñaxini da cáni táhan ivi da ñaquixi chichi Israel. Anda já ñacasahá Moisés sáhdá java táhan da da cán já cáhí da já xihín ná: “Ndaja ñani mé va ndó, a váha toho cája ndó cáni táhan ndaja táhan mé va ndó.” <sup>27</sup> Anda já ñachindahá nihni da cája xixi xihín ñani táhan cán Moisés já ñacachi da já xihín dá: “Ni in toho na coó ñasahan chuun nu yóho cacuún da cacomí cuénta sahá nde já ná cuu caja viún sahá nde. <sup>28</sup> Á tá quiahva ñacajún ñasahnún da Egipto cán cuni quiahva já cunún cajún xihín i”, ñacachi da cán xihín Moisés. <sup>29</sup> Tá ñaxini johó Moisés ña yóho já ñayihví ndivaha da chí ñaxinu da cuahan da chí ñundáhyi cuénta Madián já ñasahin da cán tátuhun in da tóho. Ta cán ñatandaha dá ta ñacacu ivi jahyi ta da.

<sup>30</sup> Ta tá sa ñayaha ivi jico cuia ñasahin Moisés Madián cán já ñanaha in tátó Ndióxi mé á nu dá tañu in tohíñú cándaha ñúhu mé yucú íchí

yati yucú naní Sinaí cán. <sup>31</sup> Ta chí ñacatóntó Moisés xihín ña ñaxini da ñacaja Ndióxi cán. Ta tá ñacayati da sándehe da ña já ñaxini johó da cáhan Ndióxi xihín dá já cáhí a já: <sup>32</sup> “Yehe cúu u Ndióxi ñacaja cáhnu tásáhnú jícún Abraham xihín Isaac xihín Jacob.” Anda já ñacasahá quíji Moisés xihín ña yíhví da ta coó ñasahan ndeé ini da ndicoto nihni da nu cáhan Ndióxi cán. <sup>33</sup> Anda já ñacachi tucu Ndióxi já xihín dá: “Tavá ndusa sahun jáchi yí ndivaha cúu nu sánun jan. <sup>34</sup> Sa ñaxini i ndá quiahva ndáhví ndóho ñayivi cuénta mí i, na ndúu Egipto ta ñaxini johó i nu tána na sahá ña jándoho ña Egipto jan ini na. Sahá ña cán quéa vaxi i chindeé e ña ta yóho cacuún da chindahá i cuhun Egipto já ná tavún ña nu ndóho ini na cán”, ñacachi Ndióxi xihín Moisés.

<sup>35</sup> Ñacandají ña Israel cán Moisés ta ñacachi na xihín dá: “Coó ña ñacacu toho yóho ña ná cacomún cuénta sahá nde já ná cuu caja viún sahá nde.” Joo Ndióxi quéa ñachindahá Moisés ña ná cacuu da da cacomí cuénta sahá ña Israel cán ta já ná jácacu da ña. Jáchi já ñacachi tátó Ndióxi xihín dá tá ñanaha mé á tañu tohíñú cándaha ñúhu cán. <sup>36</sup> Ta mé Moisés ñasahan tucu da mé Egipto cán ta ñatavá da tóco ndihi ña Israel, ña ñasanduu Egipto cán ta ñacaja da cuhá ñaha náhnú xihín ña xitúhún mé Egipto cán. Ta quiahva já

naçaja da xihín tañuhú nani Tañuhú Cuáhá tá naşuná da do nuú nayaha na Israel cán. Ta quiahva já naçaja da cuahá ña náhnu yucú íchí nuú naçica na ivi jico cuia cán. <sup>37</sup> Ta mé Moisés naçaxi tuhun da xihín ñayivi já naçachi da já xihín ná: “Tá quiahva naçaja Ndióxi naçindahá a yehe nu ndo quiahva já chindahá mé á inga da cacuu profeta nu ndo. Ta mé da cán cacuu da in da quixi chichi mé ndó”, naçachi Moisés xihín ná. <sup>38</sup> Ta mé Moisés naşahjin da tañu ñayivi Israel, na naşacuu tásáhnu jícó yo tá naçica na yucú íchí cán. Ta xihín mé da cán naçahan táto Ndióxi jini yucu Sinaí cán. Ta cán naşahan Ndióxi ley nu dá já ná nağa da ña nu yo ña ná caca vağa íchí cuéntá Ndióxi.

<sup>39</sup> Joo coó naheen toho tásáhnu jícó yo cuni johu na nuú naçahan Moisés xihín ná. Ña cán quéa naçandají na da ta naçasahá ndúcú na ndicó coo na Egipto. <sup>40</sup> Ta nani naşahjin Moisés jini yucu Sinaí cán já naçachi na xihín Aarón, ñani Moisés já: “Cúni nde ña ná cavahún tiniñu yúu Ndióxi caja cáhnu nde ta ná canuú a cuhun a nuú nde. Jáchi co cándaá ini nde ndía nandoho Moisés, da naşavá ndehe nuú naşanduu nde Egipto cán.” <sup>41</sup> Anda já naçavağa na in yoco ñehe naşná chélo ta já naşahni na quíti najoco na nuú mé yoco cán. Ta naçajii ndivaha ini na xihín yoco ña naçavağa mé

na cán. <sup>42</sup> Anda já najándacoo Ndióxi na já ná caja cáhnu na ndá ña cúni na táyhun quimi xihín yoo xihín candii. Já naçachi Ndióxi ini libro naçahyi na profeta şanahá: Ndóhó, na Israel, a juú nu mí i naşahni toho ndó quíti najoco ndó tañu ivi jico cuia nani naçica nuu ndó yucú íchí jan.

<sup>43</sup> Ña naçaja ndó quéa naçaja cáhnu ndó yoco ña naçavağa mé va ndó.

Ta naçachi ndó ña cúu mé yoco cán inga ndiόxi nani Moloc.

Ta naşañehe ndó ña xihín cáti á tá cuahan ndo.

Ta naçavağa ndó inga tiniñu quimi naçachi ndó cúu á inga tucu ndiόxi nani Renfán.

Ta naşañehe ndó tiniñu cán cuahan ndó caja cáhnu ndó coo naçaja cáhnu ndó yehe.

Ña cán quéa tavá i ndohó ñundáhyi na Israel ta chindahá i ndohó in ñuu tóho xicá chága a juú ga Babilonia, naçachi Ndióxi xihín na cán —naçachi Esteban xihín na sacuahá ñuu cán.

<sup>44</sup> Já naçachi tucu Esteban já xihín ná:

—Vatí naçaja cáhnu tásáhnu jícó yo java ga yoco joo naşañehe tá naşañehe na in veñuhu ní quíti cuéntá Ndióxi tá naçica nuu na yucú íchí nuú co ndúu ñayivi cán. Jáchi janda jihna naşahnda Ndióxi chuun nu Moisés tá quiahva coo mé veñuhu ní

quíti cán ta ñasahnda chuun nu dá ña ná cavaha da ña xihín ní quíti. Ta ini mé veñuhu cán nataán da yuu jáhnda nu ndáa ley ñasahan Ndióxi nu dá sanahá. <sup>45</sup> Tá sa nayaha cuahá cuia já naxihí Moisés já nandiquehe da naní Josué chuun ña cañehe da cuénta saha tásáhnú jícó yo. Ta mé tásáhnú jícó yo ñacani táhan na xihín na ñasanduu ñundáhyi yóho. Ta ñacaja Ndióxi ña ná quee vaha na Israel xihín na cán. Nátavá Ndióxi na cán já ná canduu na Israel ñundáhyi yóho ta mé tiempo já na Israel ñéhe na veñuhu ní quíti cuahan na. Ta já ñasahin a xihín ná janda quiví ñasacomí David cuénta sahá na Israel. <sup>46</sup> Ñacaja Ndióxi cuahá ñamaní xihín David sahá ña cán quea ñasacu ini David cavaha da in nuú coo Ndióxi, mé a ñacaja cáhnú Jacob sanahá. <sup>47</sup> Joo da ñacavaha mé vehe Ndióxi cán ñasacuu Salomón, jahyi David. <sup>48</sup> Ta sa cándaá ini ña a juú quiahva cáhnú cúu Ndióxi ta co ndácaan toho a ini veñuhu cávaha daṭaa. Ín in profeta ta ñacahyi da ña ñacachi Ndióxi já:

<sup>49</sup> Tátuhun in rey, da ín coo silleta vaha,  
ta chínúu da saha dá jatá in táyi loho,  
quiahva já ín coo i indiví  
ta chínúu i sahá i jata  
ñuyiví.

Yehe cómí i cuénta sahá indiví xihín ñuyiví sahá ña cán quea coo toho

vehe cuu cavaha ndó  
coo yehe,

ta co xíní ñúhú i in vehe nu ndíquehe ndée.

<sup>50</sup> Jáchi yehe cúu Ndióxi ña ñacavaha tóco ndihi ñaha, já ñacachi Ndióxi sanahá —ñacachi Esteban xihín ná.

<sup>51</sup> Anda já ñacachi tucu Esteban já xihín ná:

—Joo mé ndó cúu ndó ñayivi sáa ini ta cúu ndó tátuhun na co xíní Ndióxi. Jáchi co cúní ndó cuni joho ndó ña cáhí Ndióxi xihín ndo ta co cúní ndó cándaá ini ndó tuhun Ndióxi. Ta ni co cúní ndó quiahva ndó ñamaní ndihvi ínima yíi Ndióxi ini ínima ndo. Xíxi ndivaha ñasahin ini tásáhnú jícó ndo ta quiahva já cája ri mé ndó viti. <sup>52</sup> Mé tásáhnú jícó ndo ñacaja xíxi ndivaha na xihín ndihi na profeta ta ñasahní ñahá na mé na yóho ñaquixi na cáxi tuhun saha mé a quixi chí nuu, mé a co cája cuachi. Ta tá ñaxinu mé a cán já ñajícó túhún ndó a ta ñasahní ndó a. <sup>53</sup> Ta mé ndó cúu ndó na ñasahan tátó Ndióxi ley nuu joo co cúní ndó caja ndó ña cáhí a —ñacachi Esteban xihín ná.

### *Tá ñasahní na Esteban*

<sup>54</sup> Tá ñaxini joho na sacuaḥa cán tóco ndihi ña ñacahan Esteban já ñaxojo ndivaha ini na xihín dá chí cáhñá nuhu na. <sup>55</sup> Joo nandicutú ndaa ínima Esteban xihín ínima yíi Ndióxi ta já nandicoto nihni da indiví já ñaxini da ndá quiahva

cáhn̄u cúu Ndióxi ta naxini da cándichi Jesús xoo cuáha Ndióxi. <sup>56</sup> Andá já n̄acachi Esteban já xih̄in ná:

—Candehé ndó. Núná indivi xín̄i i ta tív̄i cándichi Jesús xoo cuáha Ndióxi —n̄acachi Esteban xih̄in ná.

<sup>57</sup> Joo n̄achicaji tuun n̄a cán joh̄o na já ná a cún̄i joh̄o na ñ̄a cáhan Esteban. Ta n̄acasáhá cáyuhú cóhó na cáti na cuah̄an n̄a can̄i na da. <sup>58</sup> N̄atavá n̄a mé Esteban yuhú ñ̄uu ta cán n̄acasáhá cúun na yūu dá. Ta mé n̄a najácojo cuachi jat̄a Esteban cán n̄atavá n̄a cotó n̄a ta n̄achinduu tóo na ñ̄a nūu in da tacú naní Saulo cándichi cán. <sup>59</sup> Ta nani cúun n̄a cán yūu Esteban já n̄acasáhá mé Esteban xíca tahví da nū Ndióxi já cách̄i da já:

—Jesús, mé ndó cúu xitoho i. Ndi quehe ndó ínima i viti.

<sup>60</sup> Andá já n̄acaxítí Esteban já n̄acasáhá cáyuhú cóhó da já n̄acachi da já:

—Jesús, xitoho i, a quéhe ndó cuéntá sahá cuachi cája n̄a yóho.

Tá n̄andih̄i n̄acachi Esteban tuh̄un yóho já n̄axih̄i da.

## 8

*Cásáhá Saulo cája xíxi da xih̄in n̄a cúu cuéntá Jesús*

<sup>1</sup> Ta mé hora n̄asahn̄i n̄a Esteban cándichi Saulo s̄andehé da ta n̄atahan ini da xih̄in n̄a n̄asahn̄i Esteban cán.

Ta mé quiv̄i cán n̄acasáhá n̄a cája xíxi chága n̄a xih̄in n̄a cúu cuéntá Jesús ndúu ñ̄uu Jerusalén cán. Chí

tócó ndih̄i n̄a cúu cuéntá Jesús n̄andicuita nuu na ndijáá chí estado Judea xih̄in estado Samaria. Joo mé n̄a apóstol cuití va coó n̄axita nuu toho na. N̄acandoo na ñ̄uu Jerusalén. <sup>2</sup> Ta java dat̄aa n̄andiquehe na yiquí cuñ̄u Esteban cuah̄an n̄a jánduxu n̄a da tá quiahva ín costumbre n̄a ta a juú quiahva nasacu na saha dá. <sup>3</sup> Ta mé Saulo n̄acaja xíxi chága da xih̄in n̄a cúu cuéntá Jesús ta n̄aquihvi da vehe tá vehe na ta ñ̄uhu da n̄a ta táva da n̄a jat̄a véhe. Coó caja toho á cúu ná t̄aa á cúu ná ñ̄aha ta já ñ̄ehe da n̄a cuah̄an n̄a vecaa.

*Cáhan n̄a cúu cuéntá Jesús tuh̄un vaha saha mé á nuu na estado Samaria*

<sup>4</sup> Ta n̄a cúu cuéntá Jesús tá n̄andicuita nuu na jat̄a ñ̄uu Jerusalén cán n̄acaxi tuh̄un na tuh̄un vaha sahá Jesús ní cúu nū xíca na cuah̄an n̄a. <sup>5</sup> Ta ndaja coo in da cúu cuéntá Jesús naní Felipe naquee da cuah̄an da chí in ñ̄uu cuéntá Samaria ta cán n̄acasáhá da cáhan da saha Jesucristo nuú ñ̄ayiv̄i. <sup>6</sup> N̄acasáhá ndítútú cuahá ñ̄ayiv̄i nū dá ta xih̄in ndinuhu ini na t̄aa joh̄o na nū cáhan da xih̄in ná jách̄i n̄axini xih̄in nū ná cuahá ñ̄aha náhn̄u cája Felipe. <sup>7</sup> N̄andaja vaha da cuahá ñ̄ayiv̄i, n̄a n̄asañuhu ínima quini ini chí cáyuhú cóhó mé ínima quini cán tá quéta ini n̄a quihvi cán. Ta n̄andaja vaha ri da cuahá n̄a n̄axih̄i tuchu ta n̄andaja vaha

ri da na xica réncō. <sup>8</sup> Sahá ña cán quea ñacajii ndivaha ini ñayivi ñuu cán xihín ña ñacaja da.

<sup>9</sup> Ta mé ñuu cán ñasahii in da tají naní Simón. Mé Simón yóho ñasacuu da in ñaa, da najándahvi ñayivi Samaria cán jáchi ñasacachi da ña cúú dá in da ín ndivaha saha.

<sup>10</sup> Ta tóco ndihi mé ñayivi ñuu cán, á cúú ná ña ndahví á ña náhnu, ñasaxini jóho na xihín ndinuhu ini na nuú ñasacahan da, nduu. Ta ñacachi na saha dá ña cája da ña náhnu tá quiahva cája Ndióxi. <sup>11</sup> Ta ñasacandúsa na nuú ñasacahan da xihín ná jáchi tixi cuaha tiempo najándahvi da na xihín ña tají.

<sup>12</sup> Ta ndaja coo ñacasáhá na cándúsa na ñuu cán tuhun vaaha cáhan Felipe saha Jesucristo, ña cacomí Ndióxi cuéntá saha ná tá ná candeé ini na Jesucristo. Ta já ñacasáhá na cándúta ná, ñaa xihín ñáha viti. <sup>13</sup> Ta janda mé Simón cán ñacandúsa da ta ñacandúta dá já ñacasáhá xica nuu da xihín Felipe. Ta chí catóntó da xíní da ña náhnu xihín ña xituhún cája Felipe cán.

<sup>14</sup> Ta tá ñañehé na apóstol ndúu ñuu Jerusalén cán tuhun ña ñandiquehe na Samaria cán tuhun vaaha cáhan saha Jesús já ñachindahá na Pedro xihín Juan estado Samaria cán. <sup>15</sup> Ta tá ñaxinu coo Pedro xihín Juan estado Samaria cán já ñaxica tahví na nu Ndióxi sahá na cúú cuéntá Jesús cán ña ná chutú

ndaá ínimá ná xihín ínimá yii Ndióxi. <sup>16</sup> Jáchi sa ñacandúta ná cuéntá Jesucristo sahá ña candeé ini na mé á joo a ñáha chutú ndaa ínimá ná xihín ínimá yii Ndióxi. <sup>17</sup> Anda já chójó Pedro xihín Juan ndáha dá jiní in in na cán nani xica tahví da nu Ndióxi já ñachutú ndaa ínimá ná xihín ínimá yii Ndióxi.

<sup>18</sup> Tá ñaxini Simón ña ñachutú ínimá na cúú cuéntá Jesús cán xihín ínimá yii Ndióxi tá chinúu na apóstol ndáha ná jiní ná já cúni da cueen da ndée Ndióxi cán. <sup>19</sup> Já ñacachi Simón já xihín ná:

—Quiahva ndó ndée cómi ndó ñan nuú i já ná cacomí ri yehe va ña já quea ndá na ná chinúu i ndahá i jiní ná cuu ndicutú ndaa ínimá ná xihín ínimá yii Ndióxi.

<sup>20</sup> Anda já ñanducú ñehe Pedro tuhun nu dá já cáchi da já xihín dá:

—Ná jándihi Ndióxi sahun xihín sahá jiuhún cómun jáchi cáhún ña cuu cueún ña jása maní uun Ndióxi nuú ñayivi. <sup>21</sup> Coó sahá tohún cajún ña cája nde yóho jáchi co ín vaaha toho ínimun nu Ndióxi. <sup>22</sup> Xíní ñuhú jándacoún ña núu cáhvi inún ñan ta ndítahan caça tahvún nu Ndióxi já ná candehe mé á á caja cáhnu ini a sahun jáchi núu ndivaha cáhvi inún. <sup>23</sup> Jáchi náha cáxi ña cáhivi ndivaha inún. Cúú á tátuhun mé ña quini ñacató a yohó chí cájún ña núu.

<sup>24</sup> Anda já ñanducú ñehe Simón tuhun nu Pedro já



cáchí da já:

—Caça tahvi ndó nu Ndióxi sahá i já ná a quíxi ña núu cáhí ndó jan nuú i —nacachi da xihin ná.

<sup>25</sup> Tá nandihí nandicani Pedro xihin Juan sahá ña nacaja Ndióxi xihin ná. Ta tá nandihí nacahan na tuhun Ndióxi nuú na cán já naquee na nasahan na cahan na tuhun Ndióxi, ña cuu jácacu ñayivi ndijáá ñuu válí ñuhu chí estado Samaria cán. Anda jáví nandicó coo tucu na chí ñuu Jerusalén.

*Cahan Felipe saha Jesús nuú in da naquixi nación Etiopía*

<sup>26</sup> Tá sa nayaha ña yóho já naxinu in tátō Ndióxi nuú in Felipe estado Samaria cán ta já cáhí a já xihin dá:

—Cuáhán chí sur nu queé ichi ña quéta ñuu Jerusalén cuahan chí ñuu Gaza —nacachi tátō Ndióxi xihin dá.

Ta mé ichi cán yáha nuú co ndúu ñayivi jáchi íchí ndivaha. <sup>27</sup> Anda já naquee Felipe cuahan da. Ta ichi nuú xíca da cuahan da cán nanditahan da in dataa, da naquixi nación Etiopía. Mé da Etiopía yóho cúu dá in taa cáhnu nación dá jáchi cúu dá da cómí cuéntá sahá jjuhún ña cúu ñaha ña naní Candace, ña cómí cuéntá sahá ñayivi nación Etiopía. Mé da yóho sa nasahan da ñuu Jerusalén caja cáhnu da Ndióxi. <sup>28</sup> Ta tá cuahan tucu da ichi ndicó coo da Etiopía cán ta nani in coo da jatā carreta já cáhvi da libro nacahyí profeta Isaías.

<sup>29</sup> Anda já nacahan ínima yii Ndióxi xihin Felipe já nacachi a já xihin dá:

—Cativi jijn carreta cuahan jan.

<sup>30</sup> Anda já nacayati Felipe jijn carreta cán ta já naxini johō da cáhvi da Etiopía cán libro Isaías. Anda já nandaca tuhún Felipe da já cáhí da já xihin dá:

—Á cándaā inún ña cáhvún jan.

<sup>31</sup> Anda já nanducú ñehe da Etiopía cán tuhun nu Felipe já nacachi da já:

—Ndaja caja i candaā ini i ña cáhvi i tá coo na ndicani nuú i ndíā cúni cachi a —nacachi da Etiopía cán xihin Felipe.

Anda já naxica da ñamaní nu Felipe ña ná ndaa da jatā carreta da já ná cacōo da xihin dá ta ná ndicani da nuú dá ña cúni cachi a. Chí nandaa Felipe carreta cán.

<sup>32</sup> Ta cáhvi da Etiopía cán tuhun Ndióxi nu cáhí a:

Tá quiahva ñehe na in ndicachi cuahan rí quivi rí quiahva já nasañehe na da cuahan da quivi da.

Ta tá quiahva cája ndicachi tá co ndáhyi ri nani ndíjatá na ri quiahva já nacaja mé dá jáchi coo nasuná da yúhu dá cahan da.

<sup>33</sup> Nacaja xíxi ndivaha na xihin dá ta coo nacaja ndaa na xihin dá.

Jáchi janda na naquixi chichi nuú naquixi mé dá coo

nandiquehe na saha dá.

Ña nacaja na quea nasahni na da ja ná a cóo ga da ñuyivi yóho, cáchi tuhun Ndióxi nu cáhvi da Etiopía cán.

<sup>34</sup> Anda ja nandaca tuhun da Etiopía cán Felipe ja cáchi da ja xihin dá:

—Ta viti caja ndó ñamaní ndicani ndó nuú i ndía cúní cachi a yóho. Á saha mé va profeta yóho cáhan da á sahá inga va da cáhan da.

<sup>35</sup> Anda ja nacasáha Felipe ndicani da nuú da cán ña nacahyí Isaías ja nandicani da tuhun vaha saha Jesús nu dá. <sup>36</sup> Ta tá yáha na cuahan na nu ñuhu ticuúí ja nacachi da Etiopía cán ja xihin Felipe:

—Yóho ñuhu ticuúí. Á cuu caja ndúta ndó yehe — nacachi da xihin Felipe.

<sup>37</sup> Anda ja nacachi Felipe xihin dá:

—Tá cándéé ini ndó Jesús xihin ndinuhu ini ndó ta cuu va candúta ndó.

Anda ja nanducú ñehe da cán tuhun nu Felipe ja cáchi da ja:

—Cándúsa i ña cúú Jesu-cristo in túhún jiní ja jahyi Ndióxi —nacachi da Etiopía cán.

<sup>38</sup> Chí ivi laá nasahnda da Etiopía cán chuun ña ná caní ndichi na carreta cándójó na cuahan na cán. Anda ja nanuu ndívi da cuahan da nu ñuhu ticuúí ta ja najácandúta Felipe da Etiopía cán. <sup>39</sup> Tá nandihí naquee na ini ticuúí cán ja ñehe ínima yii Ndióxi

Felipe cuahan da inga xoo chí cóo naxini táhan chága da xihin da Etiopía cán. Joo cájii ini da Etiopía cán cuahan da íchi. <sup>40</sup> Tá nandicoto nihni Felipe sa íin da in ñuu naní Azoto. Ta tá ñuu tá ñuu cuahan da cáhan da tuhun vaha saha Jesús nuú ñayivi anda quiahva naxinu cóo da ñuu Cesarea.

## 9

*Ndiquehe Saulo íchi cuénta Jesús*

(Hch. 22:6-16; 26:12-18)

<sup>1</sup> Joo ndaja coo da naní Saulo cája xíxi tá cája xíxi da xihin na cúú cuénta Jesús. Ta sácú ini da ndaja caja da cahni da na. Ta sahá ña cúní da jándihí da saha ná sahá ña cán quea nasahan da cáhan da xihin da cúú sacuaaha nuú jutú <sup>2</sup> ña ná quiahva na in carta nu cáhan ña ñehe dá ñamaní quihvi da veñuhu ñuhu ñuu Damasco ja ná ndinducú da na ndíco íchi cuénta Jesús ja ná cató da na cañehe da na quixi na cuhun na vecaa ñuu Jerusalén. Co cája toho a á cúú ná taa á ñáha. Chí naquee Saulo ñuu Jerusalén xihin mé carta. <sup>3</sup> Joo nani xíca da cuahan da íchi tá sa yati xinu cóo da ñuu Damasco ja in náá cuití nandiyihvi ndaa ñuhu jata dá. Mé ñuhu yóho naquixi a chí indiví. <sup>4</sup> Chí ivi laá nandicava Saulo nu ñuhu. Anda ja naxini johó da cáhan in a xihin dá ja cáchi a ja xihin dá:

—Saulo, Saulo. Ndá cuéntá quéa cája xísún xihín i —cáchi a xihín dá.

<sup>5</sup> Anda já nacasáhá ndáca tuhún Saulo já cáchi da já:

—Yo cúu ndó, na cáhan. Ndaja naní ndo —cáchi da.

Anda já nanducú ñehe a cán tuhun nu dá já cáchi a já xihín dá:

—Yehe cúu u Jesús, mé a cája xísún xihín. Ta xihín ña cájún yóho cúu á tátuhun cája xísún xihín mé vún jáchi cájún tátuhun cája in tindiquí tá sání ndaa rí nu yóco poya ta jándicuehe rí mé va rí.

<sup>6</sup> Anda já nacasáhá quíji Saulo xihín ña yíhvi da já nacachi da já:

—Cahan ndó xihín i, xitoho i ndía quéa cúní ndó ná caja i —cáchi da.

Anda já nanducú ñehe Jesús tuhun nu dá já cáchi a já xihín dá:

—Cuándacoo ta cuáhán quíhvi ñuu Damasco. Ta jan cahan na xuhun ndía ndítahan cajún —cáchi Jesús.

<sup>7</sup> Ta tóco ndihi da cásahan xihín Saulo cán nayíhvi ndivaha da jáchi naxini joho da ña cáhan cán vatí coó ñayivi ná xini da. <sup>8</sup> Tá nandihí já nandacoo Saulo nu ñúhu. Joo tá nasuná da nduchú núu da chí co tívi ga nuu dá. Sahá ña cán quéa jandá tíin ndaa na da cuahan da chí Damasco.

<sup>9</sup> Cán nasahíin cuáa da tíxi uní quívi ta chí coó naxixi da ta ni ticuí coó naxihi da.

<sup>10</sup> Mé ñuu Damasco cán nasahíin in da cúu cuéntá Jesús naní Ananías. Ta ndaja

coo naxini ndímáhnú da Jesús ta nacahan xihín dá já nacachi a já:

—Ananías.

Anda já nanducú ñehe da tuhun nu á já cáchi da já:

—Yóho íin i. Ndía cúní ndo, xitoho i.

<sup>11</sup> Anda já nacachi Jesús xihín dá:

—Candichi ta cuáhán cáyé naní a Ndacú Ndaa. Ta vehe da naní Judas cán ndaca tuhún sahá in da naní Saulo, da nacacu ñuu Tarso. Viti ñúhú xíca tahví da nu Ndióxi ndácaan da. <sup>12</sup> Jáchi naxini ndímáhnú da ña quíhvi mún, Ananías vehe nu ndácaan da. Ta naxini da ña chínúún ndáhun jiní dá ta já cuu candehé tucu da —nacachi Jesús xihín Ananías.

<sup>13</sup> Tá naxini joho Ananías ña yóho já nacachi da já:

—Candehé ndo, xitoho i. Yíhvi i cuhun i jáchi sa cuahá ndivaha ñayivi ndícani nuú i sahá mé Saulo jan. Ta ndícani na nuú i ndá quiahva xíxi cája da xihín na cúu cuéntá mé á, na ndúu ñuu Jerusalén. <sup>14</sup> Ta viti vaxi da jan ñuu yóho jáchi sa naxíca da ñamaní nuú na sacuahá nuú jutú ña ná cuu játaca da tóco ndihi na cája cáhnu mé ndó já ná cañehe da na cuhun na vecaa —nacachi Ananías.

<sup>15</sup> Anda já nacachi Jesús já xihín Ananías:

—Cuáhán quíi jáchi sa nacaxi i da ña ná cahan da sahá i nuú ñayivi java ga nación ta quiahva já cahan da sahá i nuú na cómí cuéntá sahá na cán. Ta nacaxi i

da ña ná caḥan da sahá i nuú na naquixi chichi Israel viti. <sup>16</sup> Ta jánaḥa i nu dá ndá quiahva ndítahan ndoho ini da sahá i —naçachi Jesús.

<sup>17</sup> Anda já naquee Ananías cuḥan da vehe nu ín Saulo cán. Tá naxinu da cán já naxinu da ndáḥa dá jini Saulo já naçachi da já xihin dá:

—Ñani Saulo. Mé Jesús, xitoho í, mé á naxinún nuú naquisún íchi cán, mé á cán quéa nachindahá yeḥe vaxi i já ná ndinuna nduchú núún já ná cuu candehé tucún. Ta já cuni Ndióxi ña ná ndicutú ndaa ínimun xihin ínima yii mé á —naçachi Ananías xihin Saulo.

<sup>18</sup> Chí ivi laá naçasahá cuyu ñaha tátuhun runchu tiyacá nduchú núú Saulo chí nanuna nuú dá sánehé tucu da. Anda já naḥan Saulo naçandúta dá. <sup>19</sup> Tá nandihí já naxixi da ta nandihvi tucu ndée dá ta naḥiin too da chá quivi xihin na cúú cuénta Jesús ndúú ñuu Damasco cán.

*Cáhan Saulo saḥa Jesús nuú ñayivi ñuu Damasco*

<sup>20</sup> Tá nandihí já naçasahá Saulo jánaḥa da tuhun Ndióxi ini veñuhu ta jánaḥa da ña cúú Jesús in túhún jini já jahyi Ndióxi. <sup>21</sup> Ta tóco ndihí na táa johu nu cáhan da cátóntó na cája da. Já cáhí xihin táhan na já:

—Á a juú da yóho cúú da nandicuítá cája xixi xihin na cúú cuénta Jesús ñuu Jerusalén, nduu. Á a juú sa

mé da yóho vaxi da tiin da na cúú cuénta Jesús mé ñuu yóho já ná cuhun na nuú na sacuaḥa nuú jutú já ná taán ñahá na vecaa —naçachi xihin táhan na.

<sup>22</sup> Joo ví ga ví ndíndeé ini Saulo cáhan da tuhun Ndióxi. Ta náḥa da nuú ñayivi ña mé Jesús cúú Cristo, mé á naçindahá Ndióxi cacomí cuénta sahá ñayivi. Janda quiahva já najajaca da xini túni na naquixi chichi Israel ndúú Damasco cán xihin tuhun cáhan da xihin ná.

*Xinu Saulo nuú java na Israel jáchi cuni na cañi na da*

<sup>23</sup> Tá sa nayaha cuḥa quivi já najándique táhan na naquixi chichi Israel cán tuhun na ña cañi na Saulo.

<sup>24</sup> Joo naçandaa ini Saulo ña ndúcú na cañi na da. Ta mé na ndúcú cañi Saulo cán naçandati na ñuu ta ndivi yéhe ñuu cán janda quiahva ná queta da já ná cañi na da.

<sup>25</sup> Joo in ñuu na cúú cuénta Jesús ndúú ñuu Damasco cán naçicaan na da ini in toyicá cáhnu já najánuu na da ndica náma cáhnu ndájí yuhú ñuu cán já naçacu da ta naquee da cuḥan da.

*Cuḥan Saulo ñuu Jerusalén*

<sup>26</sup> Tá naxinu coo Saulo ñuu Jerusalén já nanducú da ndique táhan da xihin na cúú cuénta Jesús ndúú cán. Joo tóco ndihí na cán nayihvi na da jáchi co cándúsa na ña sa nandiquehe da íchi cuénta Jesús. <sup>27</sup> Joo

nandiquehe Bernabé saha Saulo. Nasahan da najánaha da da nuú na apóstol cán já ná ndique táhan na xihin dá. Ta nandicani Bernabé nu ná ndaja nasahin tá naxini Saulo Jesús íchi nu xica da cuahan da chí ñuu Damasco. Ta nandicani da ña nacahan Jesús xihin Saulo. Ta nandicani da ña coó nayihví Saulo cahan da saha Jesús ñuu Damasco. 28 Anda já nandiquehe na Saulo ta nacando da ñuu Jerusalén. Ta nacasáhá xica nuu da xihin na apóstol. 29 Ta co yihví da cahan da sahá Jesús. Ta nandituhún da xihin na naquixi chichi Israel, na cahan tuhun griego ndúu ñuu cán. Joo mé na cán ndúcu na ndá quiahva caja na cahni na da. 30 Tá nacandaa ini na cúu cuénta Jesús ña ndúcu na cahni na Saulo já ñéhe na da cuahan da ñuu Cesarea. Anda já nachindahá na da cuanúhu dá ñuu Tarso.

31 Anda já nanduu vaha ini tóco ndihi na cúu cuénta Jesús ndúu ndijáá estado Judea xihin estado Galilea xihin estado Samaria. Ta nandindacú chága ví ini na xihin tuhun Ndióxi. Ta xihin ndinuhu ini na cája cáhnu na Ndióxi. Ta chindeé ínima yij mé á na. Ta já nandicua ha chága na cuahan na.

#### *Ndivaha in da naní Eneas*

32 Ta ndaja coo xica nuu Pedro xito nihni da na cúu cuénta Jesús ndúu ñuu válí cán. Ta já nasahan ri da xito nihni da na cúu cuénta

Jesús ndúu ñuu Lida. 33 Cán nanditahan da in dataa naní Eneas, da naxihi tuchu saha. Ta tixi una cuia nasandúhu dá jáchi a cuú caca da. 34 Anda já nacahan Pedro xihin dá já nacachi da já:

—Eneas, viti ndája vaha Jesucristo yohó. Cuahán ndacoo. Nditivún yivun — cáchi Pedro xihin dá.

Chí ivi laá nandacoo Eneas. 35 Tóco ndihi na ndúu ñuu Lida xihin na ñuu Sarón naxini na da nandivaha yoho ta anda já najándacoo na costumbre yatá nasacaja na já nandiquehe na íchi cuénta Jesús, xitoho í.

#### *Nditacu in ñañáha naní Dorcas*

36 Ta ndaja coo nasahin in ñañáha, ña cúu cuénta Jesús ñuu Jope. Ta mé ñañáha yoho naní ña Tabita ta tuhun griego cáchi na Dorcas xihin ña. Ta mé Dorcas yoho ní tiempo nandihí ini ña cája ña ñamaní xihin ñayivi ta nachindeé ña na ndahví. 37 Ta mé tañu já naquehe cuehe Dorcas ta naxihi ña. Ta tá sa nandicata na yiquí cuñu ña já ñéhe na ña nasahan na nachindúhu ná ña piso ninu vehe cán. 38 Ta yati va ñéhe táhan ñuu Jope cán xihin ñuu Lida nu ín Pedro. Tá nacandaa ini na cúu cuénta Jesús ña ín yati Pedro já nachindahá na ivi dataa nasahan da cana da Pedro ña ná cuhun quí dá ñuu Jope cán.

39 Anda já ndaca táhan Pedro cuahan da xihin

ndívi dat̄aa cán. Tá nax̄inu coo Pedro ñuu Jope cán já najáquihvi na da ini vehe nu ndácaan mé ndii Dorcas cán. N̄ataca t̄iyiv̄i cuahá najihí cuáan ndúu na sácu ndivaha na saha ñá nax̄ih̄i cán. Ta najánaḡa na jáhma ña nacavaha Dorcas nu dá tá nas̄atacu ñá. <sup>40</sup> And̄a já nacachi Pedro xihín ndihi ñayivi ndúu cán ña ná quee too na jata véhe. Tá sa naqueta na cán já nacaxíti da xica tahví da nu Ndióxi. And̄a já nacasáhá sándehe da ndii cán já nacasáhá cáchi da já xih̄in ña:

—Cuáhán ndacoo, Tabita.

Tá nacachi da já chí iv̄i laá nanuna nduchú núu ña n̄anditacu ñá. Tá nax̄ini ñá Pedro já nasacoo ñá. <sup>41</sup> And̄a já natiin Pedro ndáha ña já n̄andiñehe da ña. And̄a já nacana da na cúu cuénta Jesús xihín na cuáan cán ná quihvi tucu na cán jáchi sa n̄anditacu ñá. <sup>42</sup> Tóco ndihi ñayivi ñuu Jope cán nacandaa ini na ña n̄anditacu Dorcas chí cuahá ná nacandúsa na Jesús ta n̄andihvi na íchi cuénta mé á. <sup>43</sup> Ta chí nacandoo Pedro cuahá quiv̄i ñuu Jope cán. Nacandoo too da vehe in da naní Simón, da ndája vii níi quít̄i.

## 10

*Cáhan Pedro t̄uhun vaha saha Jesús nu Cornelio*

<sup>1</sup> Ta ndaja coo nasah̄iin in dat̄aa naní Cornelio ñuu Cesarea cán. Ta mé Cornelio yóho cúu dá da cómi chuun

nuú iñu ciento soldado. Ta mé táhndá soldado yóho naní a Táhndá Italiano. <sup>2</sup> Ta mé Cornelio yóho xih̄in tóco ndihi na vehe da cája cáhnu na Ndióxi xih̄in ndinuhu ini na. Ta jásá da jih̄un da ña chindeé da na naquixi chichi Israel. Ta níi tiempo xica tahví da nu Ndióxi. <sup>3</sup> In quiv̄i tátuhun caa un̄i sahin̄i nani xica tahví da nu Ndióxi já nax̄ini cáxi táhyi da naquihvi in tát̄o Ndióxi ini vehe nu ndácaan da já nacachi a já xih̄in dá:

—Cornelio.

<sup>4</sup> Ta chí nayihvi Cornelio sándehe da tát̄o Ndióxi cán. And̄a já nacachi da já:

—Ndía cún̄i ndo, tát̄o Ndióxi.

And̄a já n̄anducú ñehe tát̄o Ndióxi cán t̄uhun nu dá já cáchi a já xih̄in dá:

—Xín̄i joho Ndióxi tá xica tahvún nu á ta sa xín̄i a ña n̄achindeé cuahún na ndahví. Ta táhan ini mé á xih̄in ña cájún. <sup>5</sup> Ta viti cún̄i Ndióxi ña ná chindahún java dat̄aa ná cuh̄un da ñuu Jope já ná cana da da naní Simón, da cáhan tucu na Pedro xih̄in ná quixi da. <sup>6</sup> Íin tóo Pedro vehe inga da naní Simón, da ndája vii níi quít̄i. Ta yati yuhú tañhú íin vehe da. Ta mé Pedro cán caxi t̄uhun da xuh̄un ndía ndítahan nuun cájún —nacachi tát̄o Ndióxi cán.

<sup>7</sup> Tá sa naquee tát̄o Ndióxi cán cuah̄an já nacana Cornelio iv̄i mozo da ta nacana da in táhan soldado, da cómi da cuénta saha. Ta mé soldado

yóho cúú dá in da cája cáhnu Ndióxi. Ta cándeé ini Cornelio da. <sup>8</sup> Ta tá nandihí nandicani Cornelio nu ndíhuni da ña ñacachi táto Ndióxi xihín dá já nachindahá ñahá da cuahan da ñuu Jope.

<sup>9</sup> Ta inga quiví itaan xíca na cán cuahan na íchi ta sa yati xinú coo na ñuu Jope. Ta cúú á tátuhun caxivi ta mé hora já nandaa Pedro jini véhe caça tahví da nu Ndióxi.

<sup>10</sup> A juú quiahva cuíco Pedro chí naxíca da ña cuxu da. Ta nani cája ndívi na ña cuxu da já najánaḥa Ndióxi in ñaha nu dá. <sup>11</sup> Ta ña naxini da queá nandinuna indiví já nanuu in jáhma cáhnu tátuhun in sábaná ña ndíco ndícomí tito ta núu a vaxi ñuyiví yóho xini da. <sup>12</sup> Ta mé ini jáhma cán ñúhu tá nuú quíti, rí comí saḥa xihín coo xihín laa viti. <sup>13</sup> Anda já naxini johó da cáhan in a xihín dá já ñacachi a já:

—Pedro. Candichi ta cahni quíti jan casún.

<sup>14</sup> Anda já nanducú ñehe Pedro tuhun já cáchi da já:

—A cája toho i já, xitoho i jáchi ni in túhún tañu a ñaha caxi i quiti quini tátuhun rí yóho. Jáchi cáchi ley nasahan ndó nuú nde ña ná a caxi toho nde ri —cáchi Pedro xihín á.

<sup>15</sup> Anda já ñacahan tucu a xihín dá já ñacachi a já:

—Sa nandaja vii va Ndióxi rí jan. Sahá ña cán queá co ndítahan cachún ña cúú rí rí quini —cáchi a xihín dá.

<sup>16</sup> Tixi uní táhnda naxini da ña yóho ñacaja Ndióxi.

Anda já nandindita tucu jáhma cán cuahan chí indiví. <sup>17</sup> Chí ñacasáhá ndicani ini Pedro ndíca cuni cachi ña naxini da. Ta xihín ña yóho naxinu coo ndíhuni dataa, da nachindahá Cornelio mé vehe nu in Pedro cán. Jáchi vaxi da ndaca tuhún da sahá vehe Simón janda quiahva nanditahan da ña. <sup>18</sup> Ndíta ndíhuni da cán yuyéhe vehe Simón ta cáyuhú da ndaca tuhún da sahá in da nani Simón, da cáhan tucu na Pedro xihín. <sup>19</sup> Ta nani ndaca tuhún na yóho in yii va Pedro jini véhe cán ndicani ini da sahá ña naxini da ñacaja Ndióxi cán. Anda já ñacahan inima yii Ndióxi xihín dá já cáchi a já:

—Candehé, nandai cuu uní taa vehe yóho ta ndínducú da yohó. <sup>20</sup> Cuáhán nuu cuhún xihín dá ta a ndicani inún jáchi mí i nachindahá i da vaxi —cáchi a xihín Pedro.

<sup>21</sup> Anda já nanuu Pedro já naxinu da nu ndíta dataa nachindahá Cornelio cán. Já ñacachi Pedro já xihín dá:

—Yehe cúú Pedro, da vaxi ndó ndínducú ndó ta viti cachi ndó xihín i ndá queá cuni ndó.

<sup>22</sup> Anda já nanducú ñehe da cán tuhun nu Pedro já cáchi da já:

—Da nani Cornelio cúú da nachindahá ndehe vaxi nde. Mé Cornelio cúú dá in da comí cuénta sahá iñu ciento soldado. Mé dá cúú dá in taa cája ña ndaa. Ta cája cáhnu da Ndióxi. Ta quíhvi ndivaha ini na Israel da. Ta ñacahan in táto Ndióxi xihín dá ña ná

chindahá da ndehe cana nde ndohó cuhun ndó vehe da já ná cahān ndó xihīn dá ndá quéa cūni Ndióxi caja da — cáchi da xihīn Pedro.

<sup>23</sup> Anda já najáyaha Pedro ndihuni dataa cán ini vehe. Já nacandoo da cán naquiji da ñuu vehe Simón cán. Ta inga quiví itaan já naquee Pedro cuahan da xihīn ndihuni dataa cán. Ta ndáca Pedro java na cúu cuéntá Jesús ndúu ñuu Jope cán cuahan na xihīn dá.

<sup>24</sup> Janda inga quiví itaan já naxinu coo na ñuu Cesarea nu ín Cornelio ndáti da na. Mé Cornelio yóho sa najátaca da tóco ndihi na vehe da xihīn java na ñehe táhan vaha xihīn dá ndúu na xihīn dá ndáti na saa Pedro. <sup>25</sup> Tá naxinu coo Pedro vehe cán já naqueta Cornelio ndiquehe ñahá da. Ta tá nandihí já nacaxítí Cornelio nu Pedro ña caja cáhnu ñahá da. <sup>26</sup> Joo nasacu ndichí Pedro da já nacachi Pedro já xihīn dá:

—Candichi jáchi ñayivi xihīn mé vún cúu yehe.

<sup>27</sup> Sa já cahān Pedro xihīn dá ndáca táhan da nandihvi da ini vehe. Ta tá nandihvi da cán já naxini Pedro nanditútú cuahá ñayivi ndúu na cán. <sup>28</sup> Anda já nacasáhá Pedro cahān da xihīn ná já cáchi da já:

—Sa xini vaha ndó ña cúu yehe in da naquixi chichi Israel. Ta sa xini ndó ña sáhdá ley nuú nde ña ná a catáhan nde xihīn ñayivi tóho. Ta ni vehe na ná a ndihvi nde cáchi ley. Joo viti najánaha Ndióxi

nuú i ña co cúu ndehe ñayivi vii chága a juú ga ndohó, na tóho. <sup>29</sup> Sahá ña cán quéa tá nacana ndó yehe ivi laá naquee e vaxi i. Ta ni coo nandaja ndichí i da ndáca yehe vaxi i yóho. Ta viti cūni candaa ini i ndá cuéntá quéa nacana ndó yehe vaxi i — cáchi Pedro.

<sup>30</sup> Anda já nanducú ñehe Cornelio tuhun nu Pedro já cáchi da já:

—Janda comí quivi tátuhun hora viti, xijuhun i ta xíca tahví i nu Ndióxi ndácaan i vehe e. Ta tá nasandehé e já naxini i in dataa ndíxi jahmá yehe cándichi da nuú i. <sup>31</sup> Já nacachi da já xihīn i: “Cornelio, sa xini joho Ndióxi nu xíca tahvún nu á. Ta quehe a cuéntá sahá ñamaní cájún xihīn na ndahví. <sup>32</sup> Ña cán quéa chindahá java dataa ná cuhun da ñuu Jope cana da Simón, da cahān tucu na Pedro xihīn ná quixi da cahān da xuhun. Viti ín tóo da vehe in da naní Simón, da ndája vii níi quítj. Ta yati yuhú tañuhú ndácaan vehe da”, nacachi táto Ndióxi cán xihīn i. <sup>33</sup> Sahá ña cán quéa ivi laá nachindahá i mozo i nasaa da nducú da ndohó. Ta vaha nacaja ndó vaxi ndó. Ta viti nanditútú ndihi nde ndáti nde nu Ndióxi. Ta cūni nde cuni joho nde tóco ndihi ña nasahnda Ndióxi nu ndó cachi ndó xihīn nde —cáchi Cornelio xihīn Pedro.

*Cáxi tuhun Pedro nuú ñayivi vehe Cornelio*



<sup>34</sup> *Anda* já *na*casáhá *cáhan* Pedro já *na*cachi da já:

—Viti cánda*a* ini *i* ñ*a* *coó* na náhn*u* chá*ga* a juú *ga* inga na nu Ndió*x*i já*ch*i nu mé á in cúu ndi*hi* ví. <sup>35</sup> Ñ*a* cá*ja* mé á *quea* ndí*que*he *vaha* ndá ñ*ay*ivi *na*cuu tá cá*nde*é ini na mé á ta cá*ja* na ñ*a* *vaha*. *Coó* *caja* toho a á cúu ná na Israel á na *tóho*. <sup>36</sup> *Na*caxi tu*hun* Ndió*x*i nuú ñ*ay*ivi Israel ndá *quia*hva *cuu* *coo* *vaha* ini na tá cá*nde*é ini na Jesucristo, mé á cúu *xit*oho toco ndi*hi*.

<sup>37</sup> *Sa* cánda*a* ini ndó ndaja *na*sah*in* tá *na*casáhá Juan cá*x*i tu*hun* da nuú ñ*ay*ivi ndúu estado Galilea ñ*a* ná ndicó *coo* ini na nuú *cu*a*ch*i na ta já ná candú*ta* *na*. Ta *na*ndicú*ita* nuu tu*hun* ndi*ja*á nu ndúu *na* Israel. <sup>38</sup> Ta *sa* cánda*a* ini ndó ndaja *na*caja Ndió*x*i *xih*in Jesús, mé a *na*quixi ñ*uu* Nazaret. *Naj*ándic*utu* nd*aa* Ndió*x*i Jesús *xih*in *ín*ima *y*i mé á ta *naj*ándic*utu* a ñ*a* *xih*in ndé*e* mé á. Ta mé Jesús *na*x*ica* nuu a cá*ja* ndinu*hu* ñ*a* *vaha* *xih*in ñ*ay*ivi. Ta *na*ndaja *vaha* mé á *na* *na*sandoho ini *na*caja tiñá*há* *sacua*há. *Na*caja Jesús ñ*a* *yó*ho já*ch*i *na*sah*in* Ndió*x*i *xih*in á.

<sup>39</sup> Ta mé nde, *na* apóstol cúu *na* *na*xini ñ*a* *na*caja Jesús *tó*có ndi*hi* ñ*a* *yó*ho tá *na*sah*in* a estado Judea ta tá *na*sah*in* a ñ*uu* Jerusalén. *Anda* já *na*sah*ni* *na* mé á tá *na*cata *caa* na a ndi*ca* crú*xu*. <sup>40</sup> *Joo* tá *na*yaha *un*i *qu*iv*i* já *naj*ánditacu Ndió*x*i Jesús ta *na*caja Ndió*x*i ñ*a* ná

*na*ha Jesús mé á nuú nde. <sup>41</sup> *Coó* *na*na*ha* toho Jesús mé á nu *tó*có ndi*hi* ñ*ay*ivi. Nuú nde*he*, *na* *na*caxi Ndió*x*i *cu*ití va *na*na*ha* Jesús mé á. Já*ch*i *ja*nda *jih*na *na*caxi mé á nde*he* ñ*a* ná *cun*i nde ñ*a* ta ná *ca*han nde *xih*in ñ*ay*ivi *sa*ha mé á. Ta tá *sa* *na*nditacu tucu a tañ*u* ndi*i* *cán* *ja* *na*xixi nde *xih*in á. <sup>42</sup> Ta mé á *na*chindahá nde*he* *ca*x*i* tu*hun* nde nuú ñ*ay*ivi *sa*ha Jesús ta ná ndicani nde nu ná ñ*a* *na*sacu Ndió*x*i mé Jesús ñ*a* ná *ca*ja *vi*i a *sa*há ñ*ay*ivi. *Coó* *ca*ja toho a á *tá*cú *na* á *na*x*ih*i *na*. <sup>43</sup> Ta *ja*ri *na* *prof*eta va *ja*nda *sa*nahá *na*cahan *na* *sa*ha Jesús ta *na*cachi na ñ*a* *ca*ja cáhn*u* ini Ndió*x*i *sa*há *cu*a*ch*i ndi*ja*á ñ*ay*ivi tá ná *cande*é ini na mé á —cá*ch*i Pedro *xih*in ndi*hi* *na* ndúu *ve*he Cornelio *cán*.

*Jándic*utu* Ndió*x*i na *coó* *na*quixi *ch*ichi Israel *xih*in *ín*ima *y*i mé á*

<sup>44</sup> Ta nani cáhan Pedro cándi*chi* da já *na*x*inu* *ín*ima *y*i Ndió*x*i *naj*ándic*utu* a *ín*ima *tó*có ndi*hi* *na* *táa* *jo*ho ñ*a* cáhan *da* *cán*. <sup>45</sup> Ta *na* cúu *cué*ntá Jesús, *na* *na*quixi *ch*ichi Israel, *na* ndá*ca* Pedro *vaxi* *xih*in dá *cán*, *na*c*at*óntó *na* tá *na*xini na *na*ndic*utu* *na* *tó*ho *cán* *xih*in *ín*ima *y*i Ndió*x*i. <sup>46</sup> Ta *x*in*i* *na* ñ*a* cúu á ñ*a* nd*aa* já*ch*i *na*xini *jo*ho ñ*a* cá*ja* cáhn*u* na Ndió*x*i ta cáhan *na* inga tu*hun* ñ*a* *coó* *na*s*at*iahva na. <sup>47</sup> *Anda* já *na*cachi Pedro já:

—Cá*ja* *i* *cué*ntá ni in *tú*hún *to*ho ñ*ay*ivi a cúu *ca*ji nuu nuú

na tóho yóho ña ná candúta ná jáchi sa nandicutú ínimá ná xihín ínimá yíi Ndióxi tátuhun nandicutú mé nde xihín á — cáchi Pedro.

<sup>48</sup> Andá já nasahnda Pedro chuun ña ná jácandúta ná na cuénta Jesucristo. Tá nandihi já naxica tahví na cán nu Pedro ña ná candoo da chága quívi xihín ná.

## 11

*Ndícani Pedro nuú na cúu cuénta Jesús ndúu ñuu Jerusalén sahá ña nayaha vehe Cornelio*

<sup>1</sup> Tóco ndihi na apóstol xihín na cúu cuénta Jesús ndúu estado Judea ña ñehe ná tuhun ña nandiquehe ri na coo ña quixi chichi Israel tuhun Ndióxi. <sup>2</sup> Ta tá nandicó coo Pedro chí ñuu Jerusalén já ñacasáhá in táhnda na cúu cuénta Jesús ndúu ñuu cán cáhan núu na saha dá. Mé na yóho cáhán na ña ndítahan nuú na tóho cahnda loho na yiquí cuñu na tátuhun in costumbre na Israel. <sup>3</sup> Já cáchi na já xihín dá:

—Ndá cuénta quéa nasahún naxito nihnún na coo ña quixi chichi Israel. Ta ndá cuénta quéa naxisún xihín ná. A váha toho ñacajún cáhán nde —ñacachi na Israel cán xihín Pedro.

<sup>4</sup> Andá já ñacasáhá Pedro ndícani da tóco ndihi ña nayaha janda saha. Já ñacachi da já:

<sup>5</sup> —Ñasahin i ñuu Jope. Ta nani xica tahví i nu Ndióxi já najánaha mé á in ñaha

nuú i. Ta ña naxini i cúu in jáhma cáhnu tátuhun sábaná ñanuu chí indiví ta ndícomí xoo tito á ñacato. Ta chí janda yati nu in i naxinu a. <sup>6</sup> Ta tá nasandehé vaha i ini a já naxini i ñúhu tá nuú quíti, rí comí saha xihín tá nuú quíti yúcu xihín coo xihín laa ñúhu ini a naxini i. <sup>7</sup> Andá já naxini joho i cáhan in a já ñacachi a já xihín i: “Pedro, cuáhán ndacoo cahni quíti jan casún.” <sup>8</sup> Andá já nanducú ñehe e tuhun já ñacachi i já: “A cáxi toho i rí yóho, xitoho i jáchi co xini toho i cáxi i quíti quini tátuhun rí yóho”, cáchi i xihín Ndióxi. <sup>9</sup> Andá já ñacahan tucu a cán chí indiví já ñacachi a já: “Sa nandaja víi va Ndióxi rí jan. Sahá ña cán quéa co ndítahan cachún ña cúu rí rí quini”, ñacachi Ndióxi xihín i. <sup>10</sup> Uní táhnda nayaha ña yóho ñacaja Ndióxi. Andá já nandaa tucu tóco ndihi ña cán cuahan tucu a chí indiví. <sup>11</sup> Ta chí sa mé hora já naxinu coo uní taa ndínducú da yehe mé vehe nuú nasahin tóo i cán. Ta da cán ña quixi da janda ñuu Cesarea ndínducú da yehe. <sup>12</sup> Ta já ñachindahá ínimá yíi Ndióxi yehe cuahan i xihín ná sahá ña cán quéa coo nayihví i cuhun i xihín ná. Ta ndáca i inu ñani yóho nasahan da xihín i. Tá naxinu coo nde ñuu cán já ña quíhví nde vehe Cornelio, da ñachindahá da cán ndínducú yehe. <sup>13</sup> Ta tá sa ñúhu ndihi nde vehe Cornelio cán já ñacasáhá ndícani da

nuú nde ña naxini da cándichi in táto Ndióxi ini vehe da ta naxachi a xihin dá já: “Chindahá java taa ná cuhun da ñuu Jope cana da in da naní Simón, da cáhan tucu na Pedro xihin. <sup>14</sup> Ta da cán caxi tuhun xuhun ta xihin ndihi na vehún ndaja caja ndó cacu ndaa ínimá ndó”, naxachi táto Ndióxi xihin Cornelio cán. <sup>15</sup> Ta tá nacasáhá i cáhan i xihin na vehe Cornelio cán já nandicutú ndaa ínimá ná xihin ínimá yii Ndióxi tá quiahva najándicutú a ínimá mí jihna. <sup>16</sup> Xihin ña yóho nandicuhun ini i ña naxachi Jesús, xitoho í xihin yo tá naxachi a já: “Mé a ndaa najácandúta Juan ndohó xihin ticuú joo vaxi quiví jándicutú Ndióxi ndohó xihin ínimá yii mé á”, naxachi Jesús. <sup>17</sup> Ta tá sa nasahan Ndióxi ínimá yii mé á nuú na cán tá quiahva naxaja xihin mí sahá ña naxandúsa í Jesucristo, xitoho í ama ná cani táhan i xihin Ndióxi sahá ña cája mé á xihin na cán —naxachi Pedro.

<sup>18</sup> Tá naxini johu na cán ña naxachi Pedro já naxatáji ná ta naxaja cáhnu na Ndióxi já naxachi na já:

—Mé a ndaa sahan ri Ndióxi ñamaní nuú na tóho ña ná ndicó coo ini na jándacoo na cuachi cája na já ná coo na xihin mé á anda ama cáa quiví —naxachi na cúu cuéntá Jesús, na naquixi chichi Israel cán.

*Cuahá na ñuu Antioquía ndíquehe na íchi cuéntá Jesús*

<sup>19</sup> Tá nandihí naxahní na Esteban já nacasáhá cája xíxi na xihin na cúu cuéntá Jesús. Anda já nandicujita nuu na cuahan na ta java na naxinu na janda chí estado Fenicia. Java na naxinu na cuahan na chí isla Chipre. Ta java na naxinu na chí ñuu Antioquía. Ta cán nacasáhá cáhan na tuhun Ndióxi nuú na naquixi chichi Israel cuití va. Joo coo naxaxi tuhun na ña nuú na tóho cán. <sup>20</sup> Joo java na cúu cuéntá Jesús, na naquixi chí isla Chipre cán xihin na naquixi ñuu Cirene naxinu coo na ñuu Antioquía ta nacasáhá na cáhan na tuhun vaha saha Jesús, xitoho í xihin na coo naquixi chichi Israel ndúu cán. <sup>21</sup> Ta nasahan Ndióxi cuahá ndée mé á nu ná. Ta cuahá ndivaha ñayivi najándacoo na costumbre yatá na ta nandiquehe na íchi cuéntá Jesús, xitoho í.

<sup>22</sup> Tá naxandaa ini na cúu cuéntá Jesús ndúu ñuu Jerusalén tóco ndihi ña nayaha cán já naxindahá na Bernabé cuahan da janda ñuu Antioquía cán. <sup>23</sup> Tá naxinu coo Bernabé ñuu Antioquía cán já naxini da ndá quiahva naxaja Ndióxi ñamaní xihin ñayivi ñuu cán chí naxajii ndivaha ini da. Ta naxahan da xihin ná ña ná candico na íchi cuéntá Jesús xihin ndinuhu ini na. <sup>24</sup> Mé Bernabé yóho cúu dá in taa vaha. Ta chutú ndaa ínimá da xihin ínimá yii Ndióxi ta candeé cáhnu ini da mé á. Ta cuahá ñayivi nandiquehe na

íchi cuéntá Jesús, xitoho ísahá ña ñacaja da.

<sup>25</sup> Tá nandihí já ñaquee Bernabé cuahan da ndin-  
ducú da Saulo chí ñuu Tarso.  
Ta tá nandiñehe dá Saulo já  
ñehe da da cuahan da chí ñuu  
Antioquía. <sup>26</sup> Ta ñasanduu  
da xihín ña cúu cuéntá Jesús  
mé ñuu cán tátuhun in cuia.  
Ta najánaha da tuhun Ndióxi  
nuú cuahá ndivaha ñayivi.  
Ta mé ñuu Antioquía cán cúu  
nuú nu cuítí ñasacu na quivi  
ná cananí ña ña cúu cuéntá  
Jesús.

<sup>27</sup> Ta mé tiempo já ñaxinu  
cōo java ña profeta mé ñuu  
Antioquía cán. Mé profeta  
yóho ñaquixi na chí ñuu  
Jerusalén ta tiahva na jáyaha  
na tuhun cáhan Ndióxi nuú  
ñayivi. <sup>28</sup> Ta in táhan da  
profeta cán, da naní Agabo  
ñandaça ndíchí da tañu ña  
cúu cuéntá Jesús mé vehe nuú  
ñataca na cán. Já ñacachi da  
já:

—Cáxi tuhun ínimá yii  
Ndióxi xihín i ña quixi in tama  
ndeé ndivaha ndijáá ñuyívi  
yóho —ñacachi da xihín ná.

Ta chí já ndusa ñasahin  
jáchi ñaquixi in tama ndeé  
ndivaha tá ñasacomí Claudio  
cuéntá sahá ñayivi ñuu Roma.  
<sup>29</sup> Anda já ña cúu cuéntá Jesús  
ñuu Antioquía cán najátaca  
na jihún chindeé ñahá ña  
cán. Ta ndá quiahva xinu  
cōo nu mé ná quiahva na,  
quiahva já sahan na. Anda  
já ñachindahá ña ña nuú ña  
cúu cuéntá Jesús ndúu estado  
Judea. <sup>30</sup> Ta mé Saulo xihín  
Bernabé cúu da ñehe jihún

cán cuahan da ndiquiahva  
da ña nuú ña sacuaça cómi  
cuéntá sahá ña cúu cuéntá  
Jesús ndúu estado Judea cán.

## 12

*Tá ñacasahá ndóho chága  
ini ña cúu cuéntá Jesús*

<sup>1</sup> Ta mé tiempo já ñacasahá  
Herodes, da cómi cuéntá  
sahá ñuu Jerusalén cán cája  
xixi da xihín java ña cúu  
cuéntá Jesús. <sup>2</sup> Ñasahnda  
da chuun ña ná cahní ña  
Jacobo, ñani Juan xihín yuchú  
cáni. Ta já ñacaja na. <sup>3</sup> Ta  
tá ñaxini Herodes ña ñacajii  
íní ña sacuaça veñuhu Israel  
xihín ña ñasahní da Jacobo  
já ñatiin ri da Pedro. Ta ña  
yóho ñasacuu a mé tiempo  
tá cája ña Israel vícō tá xixi  
na pan ña cōo cáva táhan  
yusá ñaxaa xihín. <sup>4</sup> Tá sa  
ñachicaan Herodes Pedro  
vecaa já ñasahnda da chuun  
nuú comi táhnda soldado ña  
ná candaa na da. Ta comi  
comi ñaa ndáca in in táhnda  
cán. Mé Herodes ñasacu  
ini da tavá da Pedro vecaa  
ndiquiahva da da nuú ñayivi  
Israel ña ná cahní ña da tá sa  
ná yaha vícō. <sup>5</sup> Nani ndácaan  
Pedro vecaa ndáa vaha na da.  
Joo ña cúu cuéntá Jesús xihín  
ndinuhu ini na xica ñahví ña  
nu Ndióxi saha dá.

*Tává Ndióxi Pedro vecaa*

<sup>6</sup> Ta in ñuú sácú ini Herodes  
tavá da Pedro vecaa inga  
quivi itaan ña ndiquiahva da  
da nuú ñayivi, nduu. Joo mé  
ñuú já nani cánduhu Pedro  
quiji da tañu ivi soldado ta  
ndíco jin ga cadena ndáha dá

ta co cáhan sahá java ga soldado ndíta ndáá yéhe vecaa cán. <sup>7</sup> Ta in náá cuití naxinu coo in tátō Ndióxi ini vecaa cán chí nandiyihvi ndaa ini a. Anda já naxinu coo mé tátō Ndióxi nu cándúhu Pedro já naquiní a ndáha á yica ndicá da já nandicáxi ini da. Anda já nacachi a já xihin dá:

—Camún ndacoo quiún.

Anda já nacuyu cadena ña nasandico ndáha Pedro. <sup>8</sup> Anda já nacachi tucu tátō Ndióxi cán já xihin dá:

—Ndaja tuun níi tisún ta cayihi ndusun.

Ta tá sa nacaja da ña já nacachi tucu tátō Ndióxi já xihin dá:

—Quehe ticachí níhnu chinúú jatun ná cohō candico yehe —cáchi a xihin dá.

<sup>9</sup> Anda já tácaa Pedro jata tátō Ndióxi cán cuahan da. Joo co xini da á jivi quea á a juú a. “Sání ví”, cáhan da. <sup>10</sup> Ta xica na cáshan na já nayaha na nu ndíta in táhndá soldado. Ta anda já nayaha na nu ndíta inga táhndá soldado. Ta tá sa naxinu coo na yéhe caa cán já nanuna mé va já naquee na vecaa cuahan na. Ta tá sa naxica chá na cáyé cán já naquee tátō Ndióxi cán cuahan ta já nacandoo Pedro cán. <sup>11</sup> Anda já nacandaa ini Pedro ña nayaha. Ta nacachi da já xihin mé dá:

—Viti ndusa cándaq ini i ña mé a ndaa táhyí quea nacaja tátō Ndióxi yóho. Mé Ndióxi nachindahá a tátō á já ná tavá a yehe ndáha Herodes já ná a

cáhní da yehe tá quiahva cúni na Israel —nacachi da.

<sup>12</sup> Nani cáhan Pedro xica da cuahan da vehe María, ña cúu náná Juan, da naní tucu Marcos. Cán nanditútú cuahá na cúu cuéntá Jesús ndúu na xica tahví na nu Ndióxi saha Pedro. <sup>13</sup> Ta tá naxinu coo da vehe María cán já nacasáhá catí ndáha dá yéhe cán. Anda já naxinu coo in ña loho naní Rode ña candehé ña ndá na cándichi jata véhe cán. <sup>14</sup> Tá naxini johō ña cáhan da já nandicuni ña tachí Pedro. Joo nandindójó ña cuná ña yéhe sahá ña cájii íni ña. Ta já xinu ña nandicó coo tucu ña ini vehe caxi tuhun ña xihin na java cán ña cándichi Pedro jata véhe. <sup>15</sup> Joo tá nandicani ña ña yóho nu ná já nacachi na já xihin ña:

—Tachí va cúu yóho.

—Jivi da —cáchi ña cán ndúcú ndéé ña cáhan ña xihin ná.

Anda já nacachi na cán já:

—Ndá ínimā va da quea jan jáchi vecaa va ndacaan Pedro —nacachi na.

<sup>16</sup> Joo ndaja coo Pedro catí ndáha yii va da yéhe cán. Já naxinu coo na nasuná na yéhe nu dá ta chí nayihví na tá naxini na da. <sup>17</sup> Joo nacuu ndáha dá nu ná ña ná a cáhan chága na. Anda já nacasáhá da ndicani da nu ná ndaja nacaja Ndióxi natavá a da vecaa cán. Ta já nacachi da xihin ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuéntá Jesús —nacachi Pedro.

Anda já naqueta Pedro cuahan da.

<sup>18</sup> Tá nativi inga quiví itaan já nacatontó soldado vecaa cán tá nacandaa ini da ña coo Pedro in vecaa ta coo naxini da ndáchí cuahan da. <sup>19</sup> Anda já nasahnda Herodes chuun ña ná ndinducú na da. Joo coo nandinhehe ná da. Anda já nacasáhá da ndája ndichí da soldado vecaa cán ndáchí cuahan Pedro. Joo coo nacuu cachi na cán ndáchí cuahan da. Sahá ña cán quea nasahnda Herodes chuun ña ná cahní ndihi na soldado da nasandaa yéhé caa cán. Tá nayaha ña yóho já najándacoo Herodes estado Judea cán ta naquee da cuahan da chí Ce-sarea coo da.

### Quiví naxihí Herodes

<sup>20</sup> A juú quiahva xójo ini Herodes xihín ñayivi ndúu ñuu Tiro xihín na ndúu ñuu Sidón. Joo ndíví ñuu cán najándique táhan na tuhun na cuhun na cahan na xihín dá. Coo vaha ini na xihín dá cúni na jáchi ñundáhyi rey cán cána tóco ndihi ña xíxi na. Joo jihna ñuhú nandique táhan máni ná xihín in da naní Blasto. Mé Blasto yóho nasacuu da in da cáhnu cája chúun nu rey cán. Ta nacahan na ña ná cahan ndahví da cán nu rey saha ná. <sup>21</sup> Ta nasacu Herodes in quiví nditútú ndihi na nu dá. Ta tá natandaa mé quiví já nasacandixi Herodes jáhma vaha ndivaha da, ña sácandixi rey. Ta nasacoo da nu sácoo rey. Ta já nacahan cóho da

xihín ñayivi. <sup>22</sup> Tá naxinu coo ña cáhan da já nacasáhá ñayivi cán cáyuhú na já cáchí na já:

—Ndióxi cúu da yóho ta coo cúu dá ndá ta nacuu —cáchi na cája cáhnu na Herodes cán.

<sup>23</sup> Ta chí sa mé hora já naxinu in táto Ndióxi ta nacaja ña ná quehe Herodes cuehe jáchi coo nacaja cáhnu da Ndióxi ta já nasahan da ñamaní nuú ñayivi ña cáchí na cúu dá ndióxi. Chí sa mé hora já naquihvi ticujú yiquí cuñu da já naxihí da.

<sup>24</sup> Ta ní cúu nandicuítanu tuhun vaha saha Jesús xíca cuahan. Ta chí nandicuaña chága na cúu cuénta Jesús.

<sup>25</sup> Ta ndaja coo nandiquiahva Bernabé xihín Saulo mé jihún nuú na sacuaña veñuhu ndúu ñuu Jerusalén já nandicó coo da cuahan da ñuu Antioquía. Ta ndáca na Juan, da naní tucu Marcos cuahan da xihín ná.

## 13

### Cája chúun Bernabé xihín Saulo cuénta Ndióxi

<sup>1</sup> Ta ndaja coo tañu na cúu cuénta Jesús ndúu ñuu Antioquía cán ndúu na cúu profeta ta ndúu ri na jánaña tuhun Ndióxi. Ta ña yóho cúu quiví ná: Bernabé xihín Saulo xihín Simón, da cáhan na Taa Tuún xihín, xihín Lucio, da ñuu Cirene xihín Manaén, da nasahnu xihín Herodes. Mé Herodes yóho cúu dá da cómi cuénta sahá ñayivi estado Galilea. <sup>2</sup> In

quiv̄i nani n̄anditútú ndihi na ndúu na x̄ijuhun na ta cája cáhnu na Ndióxi já n̄acahan ínim̄a ȳii mé á x̄ih̄in ná já n̄acachi a já:

—Tavá jíin ndó Bernabé x̄ih̄in Saulo jáchi sa n̄acaxi mí i chuun quiahva i nu ná caja na —n̄acachi a.

<sup>3</sup> Ta tá sa n̄andihi n̄axijuhun na ta tá n̄andihi n̄axica tahví na nu Ndióxi já n̄achojó na ndáha ná j̄ini Saulo x̄ih̄in Bernabé já n̄andindayí na na cuahan na caja na chuun Ndióxi.

*Cáhan Saulo x̄ih̄in Bernabé tuhun vaha saha Jesús isla Chipre*

<sup>4</sup> Tá n̄andihi já n̄achindahá ínim̄a ȳii Ndióxi Saulo x̄ih̄in Bernabé cuahan na ñuu Seleucia. Ta cán n̄andaa na barco cuahan na isla Chipre. <sup>5</sup> Ta ndáca na Juan, da naní tucu Marcos cuahan da x̄ih̄in ná já ná chindeé da na. Ta tá n̄axinu ço na ñuu Salamina nu sá ndíchí barco cán já n̄acasáhá na cáhan na tuhun Ndióxi nuú ñayivi táca veñuhu na Israel cán. <sup>6</sup> Níi cúu isla cán n̄axica nuu na janda quiahva n̄axinu ço na ñuu Pafos. Ta cán n̄anditahan na in da taji n̄aquixi ch̄ichi Israel ta naní da Barjesús. Ta cúu dá in da tuhún jáchi cáchi da x̄ih̄in ñayivi ña cáhan da cuéntá Ndióxi. <sup>7</sup> Ta mé da taji yóho nasah̄in tuun da x̄ih̄in in da naní Sergio Paulo, da cúu gobernador nuú ñayivi isla Chipre cán. Ta nasacu da da ndíchí j̄ini. Ta mé gobernador yóho

n̄acana da Bernabé x̄ih̄in Saulo jáchi cún̄i da cuni jóho da tuhun Ndióxi. <sup>8</sup> Joo da taji naní Barjesús, da naní tucu Elimas n̄acasáhá da sáji nuu da nuú Bernabé x̄ih̄in nuú Saulo jáchi ço cún̄i da ña ná candeé ini gobernador cán Jesús. <sup>9</sup> N̄andicutú ndaa ínim̄a ȳii Ndióxi ini Saulo, da cáhan na Pablo x̄ih̄in já n̄acasáhá s̄andehé ndaa da nuú da taji cán. <sup>10</sup> Já n̄acachi da já x̄ih̄in dá:

—Yóhó cúun t̄a quini ta cúun jahyi tiñáhá, da x̄ica j̄andahvi ñayivi. Ço cún̄un tóco ndihi ña vaha jáchi cún̄un caji nuún nuú ñayivi ná a ndíquehe na íchi cuéntá Jesús. <sup>11</sup> Ta viti j̄andoho Ndióxi inún. Jácuá a yóhó ta ni a cún̄un nuú candii t̄ixi chá quiv̄i —n̄acachi Pablo x̄ih̄in da taji cán.

Tá n̄acachi Pablo já chí iv̄i laá n̄acuaá da cán. J̄andá t̄in ndaa na da x̄ica da jáchi ço t̄ivi nuú dá. <sup>12</sup> Tá n̄axini da cúu gobernador cán ña yóho chí iv̄i laá n̄acandúsa da Jesús. Jáchi chí catóntó da x̄ini jóho da tóco ndihi ña cáhan na saha Jesús.

*X̄inu ço Pablo x̄ih̄in Bernabé ñuu Antioquia ña ndácaan estado Pisidia*

<sup>13</sup> N̄andaa Pablo x̄ih̄in na x̄ica x̄ih̄in dá barco ñuu Pafos cuahan na chí ñuu Perge ña ndácaan estado Panfilia. Joo nasahnda táhan Juan, da naní tucu Marcos x̄ih̄in ná já n̄andicó ço da chí ñuu Jerusalén. <sup>14</sup> Tá n̄andihi já naquee Pablo x̄ih̄in na

xíca xihin dá ñuu Perge já naxinu na ñuu Antioquia ña ndacaan estado Pisidia. Ta mé quivi ndiquehe ndée ñayivi nandihvi na veñuhu já nasacoo na. <sup>15</sup> Ta tá sa nandihvi nacahvi na ley Moisés xihín ña nacahyí na profeta já nacana na sacuahá veñuhu cán Pablo xihín na xíca xihin dá já nacachi na já xihin ná:

—Ñani i, tá íin tuhun vaha cuni ndó cahan ndó xihín ñayivi yóho cuu candichi ndó cahan ndó xihin ná viti — nacachi na cán xihin dá.

<sup>16</sup> Anda já nacandichi Pablo já nacuu ndáha dá nu ná catáji yuhu ná já nacasáha cáchi da já xihin ná:

—Cuni joho ndó ñayivi Israel xihin tóco ndihi ndó, na cája cáhnu Ndióxi. <sup>17</sup> Mé Ndióxi, mé a cája cáhnu ñayivi nación Israel nacaxi a tásáhnu jícó yo ta nacaja mé á ña ná ndicuahá ndivaha na nani nasacuu na na tóho nación Egipto cán. Joo tá nandihvi já natavá mé á na xihin ndée mé á. <sup>18</sup> Ta cáhnu nasahjin ini Ndióxi sahá cuachi na tañu ivi jico cuia nani naxica nuu na yucú íchí cán. <sup>19</sup> Ta najándihvi Ndióxi sahá usa nación ñayivi nasanduu ñundáhyi Canaán já najáyaha ñundáhyi jan ndáha tásáhnu jícó yo jáchi janda sanahá nasahan mé á tuhun a nu ná ña caja já xihin ná. <sup>20</sup> Anda já nasahnda Ndióxi chuun nu juexe já ná cacomí na cuéntá saha ná tixi comi ciento java cuia janda quiahva naxinu coo tiempo

tá naquixi profeta Samuel, da jáyaha tuhun cáhan Ndióxi nuu ñayivi. <sup>21</sup> Anda já naxica tahvi na Israel nu Ndióxi ña ná cacu mé á in reyná cacomí da cuéntá saha ná. Sahá ña cán quéa nasacu Ndióxi in da naní Saúl ná cacuu da rey nu ná. Nasacuu da jahyi Cis, da naquixi chichi Benjamín. Ta nasacomí Saúl cuéntá saha ná tixi ivi jico cuia. <sup>22</sup> Tá nandihvi já natavá Ndióxi Saúl já nachinúu a David ña ná cacomí da cuéntá saha ná. Já nacachi Ndióxi já saha dá: “Íin vaha ini i xihin David, jahyi Isaí jáchi xini ña caja mé dá tóco ndihi ña cuni”, nacachi Ndióxi saha David. <sup>23</sup> Ta in da naquixi chichi mé David cán cúu Jesús, mé a nasahan Ndióxi tuhun a chindahá jácacu ñayivi Israel janda sanahá ndivaha. <sup>24</sup> Ta janda tá camaní quixi Jesús já naxica nuu Juan, da jácanduta ñayivi nacahan da xihín ñayivi ña ndítahan nu ná jándicoo na cuachi cája na ta ná canduta ná. <sup>25</sup> Ta tá sa yati quivi da já nacachi da já xihin ñayivi: “A juú cahan ndo ña cúu yehe da nachindahá Ndióxi cacomí cuéntá saha ñayivi, vaha. Jáchi ja chá xinu inga da íin chága saha a juú ga yehe. Ta da cán cacomí cuéntá saha ndo ta cúu ndusa da cáhnu chága ta chí coo saha míj caxítij ndaxí i correa ndusa dá”, nacachi Juan xihín ñayivi cán.

<sup>26</sup> Cuni joho vaha ndó, ñani i, na naquixi chichi Abraham xihin tóco ndihi



ndó, na cája cáhnu Ndióxi xihín ndinuhu ini. Mé Ndióxi cúní a ña ná candaa ini ndó ña nachindahá mé á Jesús ñuyívi yóho já ná jácacu a ndohó já ná a cühun ndó indayá. <sup>27</sup> Tóco ndihi na ndúu ñuu Jerusalén xihín na sacuaḥa coó naḥandaa ini na ña nachindahá Ndióxi Jesús ñuyívi yóho. Ta ni coó naḥandaa ini na tuhun naḥahí profeta saḥa Jesús tá naḥahvi na ña veñuhu tá quívi ndiquehe ndée ná. Saḥá ña cán quea naḥahni na Jesús joo xihín ña naḥaja na yóho najáxinu coo na ña naḥachi profeta sanahá. <sup>28</sup> Ta vatí coó nañeḥe ná cuachi chican na jata Jesús joo naḥica na ñamaní nu Pilato ña ná cahnda da chuun ña ná cahní na Jesús. <sup>29</sup> Ta tá sa naḥinu coo tóco ndihi ña cáchi tuhun Ndióxi saḥa mé á coo andá já najánuu na a ndica crúxu já najánduxu na ña. <sup>30</sup> Joo najánditacu Ndióxi Jesús tañu ndii. <sup>31</sup> Ta tixi cuahá quívi nanaha Jesús mé á nuú na nañeḥe táhan xihín á tá naquee a estado Galilea cuahan chí Jerusalén. Ta mé na cán cúu na xica cáhan saḥa mé á nuú ñayivi viti.

<sup>32</sup> Saḥá ña cán quea cáxi tuhun nde tuhun vaha saḥa Jesús nu ndohó viti jáchi janda saḥa naḥachi Ndióxi xihín tásáhnú jícó yo ña já coo. <sup>33</sup> Ta tá najánditacu Ndióxi Jesús najáxinu coo a tuhun naḥah nu yó, na naquixi chichi na cán. Jáchi já naḥahvi

a nu Salmo ivi ta saḥa Jesús naḥah nu tá naḥachi a já: “Jahyi mí i cúu yóho. Ta yeḥe cája ña ná catacún quívi viti”, cáchi tuhun Ndióxi. <sup>34</sup> Joo Ndióxi sa naḥah nu va tuhun a ña jánditacu a Jesús já ná a táhyi yiquí cuñu a. Jáchi já naḥahvi a ini libro yí mé á já cáchi a já: “Nu yóho quiahva i tóco ndihi ña vaha, ña naḥahni tuhun i nu David quiahva i nu dá”, cáchi tuhun Ndióxi. <sup>35</sup> Já cáchi tucu inga Salmo já: “Mé ndó a quiahva toho ndó ñamaní tahyi yiquí cuñu i jáchi cúu u jahyi máni mé ndo, da cája chúun nu ndo”, cáchi tuhun Ndióxi. <sup>36</sup> Ta sa xini yo co cáhan ña yóho saḥá ña naḥaja David jáchi tá nandihí naḥaja da ña naḥahnda Ndióxi nu dá já naḥihí da ta najánduxu na da nuú nanduxu tásáhnú jícó da. Ta natahyi yiquí cuñu da cán. <sup>37</sup> Joo yiquí cuñu Jesús coo natahyi toho a jáchi najánditacu Ndióxi ña. <sup>38</sup> Ña cán quea vaxi nde caxi tuhun nde ña yóho nu ndo, ñani i já ná candaa ini ndó ña cája cáhnu ini Ndióxi saḥa cuachi ñayivi saḥá ña naḥaja Jesús tá naḥihí a ndica crúxu. <sup>39</sup> Ta cája cáhnu ini Ndióxi saḥa cuachi ñayivi tá cándeé ini na Jesús. Jáchi ni in túhún ñayivi a cúu nduu ndaa nu Ndióxi saḥá ña sácú vaha na ley Moisés. <sup>40</sup> Joo cuénta coo ndó a juú ndoho ndó ña naḥachi na profeta sanahá tá naḥachi na já:

<sup>41</sup> Cuni joho vaha ndó, ndohó

na sácū ndaa ichi ña  
cāhan Ndióxi.

Catóntó ndo jáchi cama chá  
ndihi saha ndo.

Jáchi yehe cúu Ndióxi ta cája i  
ña náhnu ndivaha,

joo co cándúsa ndó ña cája i  
vatí ndicani java na ña  
nu ndo, ñacachi Ndióxi  
sanahá —ñacachi  
Pablo xihin ná.

42 Ta tá ñaqueta Pablo xihin  
na xíca xihin dá veñuhu na  
Israel cán já ñaxíca ñayivi,  
na coo ñaquixi chichi Israel  
ñamaní nu dá ña ná cāhan da  
xihin ná sahá tuhun Ndióxi  
inga quivi ndíquehe ndée ná.

43 Tá ñaqueee ndihi na veñuhu  
cán já cuahá na Israel xihin  
cuahá na tóho, na cándúsa ley  
Moisés ta cája cāhnu na Ndióxi  
ñacasáhá na ndíco na jata  
Pablo xihin jata Bernabé. Ta  
Pablo xihin Bernabé jánaħa  
da na ña ná candeé cāhnu ini  
na Ndióxi já ná caja mé á  
ñamaní xihin ná.

44 Ta tá ñaxinu coo inga  
quivi ndíquehe ndée ná já  
ñataca tátuhun tóco ndihi  
ñayivi ñuu veñuhu cán ña taa  
joho na tuhun Ndióxi cúni na.

45 Joo tá ñaxini na ñaquixi  
chichi Israel cán ña ñataca  
cuahá ndivaha ñayivi já  
ñacasáhá na Israel cáhivi ini  
na. Já ñacasáhá na cāhan núu  
na saħa Pablo ta ñacanahá  
na xihin dá. 46 Xihin ña cán  
ñandindeé chága ini Pablo  
xihin Bernabé já ñacasáhá  
cáchi da já:

—Jihna ñúhú ndítahan nuú  
nde caxi tuhun nde tuhun  
Ndióxi nu mé ndó, na ñaquixi

chichi Israel. Joo sándehé nde  
ña coo cúni toho ndó ndiquehe  
ndó ña. Ta cája nde cuéntá  
ña coo saħa ndó cūhun ndó  
indiví. Sahá ña cán quéa  
vaha chága ná cūhun nde  
cāhan nde tuhun Ndióxi  
xihin na coo ñaquixi chichi  
Israel. 47 Jáchi já cáa chuun  
ñasahnda Ndióxi nuú nde tá  
ñacachi a já xihin nde:

Ñasacu yehe ndohó ña ná  
caxi tuhun ndó nuú  
ñayivi tóho ndúu ndi-  
jáa ñuyíví,

já ná candaa ini na ndaja caja  
na ná cacu ndaa ínimá  
ná, ñacachi Ndióxi —  
ñacachi Pablo xihin  
ná.

48 Tá ñaxini joho na tóho,  
na coo ñaquixi chichi Israel  
cán ña yóho chí ñacajii ini  
na já ñacasáhá na cāhan na  
ña cúu ndusa tuhun Ndióxi  
ña vaha. Ta tóco ndihi na  
ñacaxi Ndióxi cacu ndaa  
ínimá, ñandihvi na ichi cuéntá  
mé á. 49 Já ñasahin nuú

ñaxita nuu tuhun Ndióxi  
nú cúu ñundáhyi cán. 50 Joo  
na ñaquixi chichi Israel cán  
najándivaa na java najihí, na  
cátóo cūhun veñuhu, na coo  
cāhan núu ñayivi saħa. Ta  
najándivaa na java dataa,  
da ín saħa ñuu cán ña ná  
ndicuiġa na xihin Pablo xihin  
Bernabé viti ta anda quiahva  
ná tavá na da ñundáhyi cuéntá  
ñuu cán. 51 Anda já ñaquiji

nihni Pablo xihin Bernabé  
ña yacá ndusá saħa mé dá já  
ná naħa nuú na cán ña coo  
ñatahan ini da xihin ña cája  
na Israel cán. Já ñaqueee da  
ñuu Antioquía cán cuāhan

da inga ñuu naní Iconio.  
 52 Ta na cúu cuénta Jesús,  
 na ñacandoo ñuu Antioquia  
 cán ñandicutú ndaa ínimá ná  
 xihín ínimá yíi Ndióxi ta cájii  
 ndivaha ini na.

## 14

*Cáhan Pablo xihín Bernabé  
 tuhun Ndióxi nuú ñayivi ndúu  
 ñuu Iconio*

1 Tá ñaxinu Pablo xihín  
 Bernabé ñuu Iconio já  
 ñandihvi da veñuhu nu  
 ndítaca na Israel cán. Ta  
 cán ñacahan da tuhun  
 vaha saha Jesús nu ná. Ta  
 cuahá ndivaha na Israel  
 xihín na coo ñaquixi chichi  
 Israel ñacandee ini na Jesús.

2 Joo java na Israel, na coo  
 ñacandúsa tuhun Ndióxi  
 ñacasahá na cáva na jini  
 ñayivi, na coo ñaquixi chichi  
 Israel ña ná cahan núu na  
 sahá na cúu cuénta Jesús.

3 Sahá ña cán quéea ñasanduu  
 nahá chága ví Pablo xihín  
 Bernabé mé ñuu cán. Ta co  
 ná yihví na cahan chága ví  
 na tuhun Ndióxi jáchi cándee  
 ini na Jesús, xitoho na. Ta  
 ñasahan Ndióxi ndée á nu  
 ná ña ná cuu caja na cuahá  
 nuú ña náhnu ta xihín ña

yóho ñacandaa ini ñayivi ña  
 mé a ndaa táhyí quíhvi ini  
 ndusa Ndióxi ñayivi. 4 Joo  
 ñayivi ñuu cán ñacasahá na  
 sáhdá táhan na jáchi java  
 na cuahan na jatá na Israel  
 ta java na cuahan jatá na  
 apóstol cán. 5 Anda já na

Israel xihín na coo ñaquixi  
 chichi Israel ñajándique táhan  
 na tuhun na xihín na jutixia

ñuu cán ña nducú na canahá  
 quini na xihín na apóstol ta  
 nducú na cahní na da xihín  
 yuu. 6 Joo tá ñacandaa ini  
 Pablo xihín Bernabé ña sácú  
 ini na cán caja xíxi na xihín  
 dá já ñaxinu da cuahan da  
 chí estado Licaonia. Ñaxinu  
 coo da ñuu Lистра xihín ñuu  
 Derbe xihín java ga ñuu válí  
 ñúhu ndijáa chí cán. 7 Ta cán  
 ñacahan ri da tuhun vaha  
 saha Jesús nuú ñayivi ndúu  
 cán va.

*Cúun na yuu Pablo ñuu Lis-  
 tra*

8 Tá ñaxinu coo da ñuu Lis-  
 tra cán já ñandique táhan da  
 xihín in dataa, da a cuú caca.  
 Ta ín coo da cán jáchi cúu  
 dá da quíhvi saha janda tá  
 ñacacu da cáa da já. 9 Ta ín  
 coo da quíhvi saha yóho taa  
 johó da nu cahan Pablo. Anda  
 já ñandicoto nihni Pablo nu  
 dá ta cándaa ini Pablo ña cuu  
 ndivaha da jáchi cándee ini da  
 quíhvi cán Ndióxi. 10 Sahá ña  
 cán quéea ñacayuhú Pablo nu  
 dá já cáchi da já:

—Cuahán candichi —  
 ñacachi Pablo.

Ta chí ivi laa ñacandita da  
 ta ñacasahá xíca da. 11 Tá  
 ñaxini ñayivi ñuu cán ña  
 ñandaja vaha Pablo da cán  
 já ñacasahá na cán cáyuhú  
 cóhó na mé tuhun cahan na  
 ñuu Licaonia, ña co cándaa ini  
 Pablo. Já cáchi na já:

—Ndióxi cúu da yóho ña  
 ñaquixi indiví túní a ñéhe  
 cuití da nahná ñayivi —cáchi  
 na cáyuhú na tuhun mé ná.

12 Ñacachi na cán ña  
 Bernabé cúu dá in ndiόxi  
 naní Júpiter. Ta Pablo cúu

dá in ndióxi naní Mercurio cáchi nā jáchi mé dá cúu da cáhan chága. <sup>13</sup> Ta da cúu jutū nuú veñuhu Júpiter, ña ndácaan yuhú ñuu cán ñéhe da tindiQUI xihín cuahá ita jáchi ndúcú ndihi nā cán cahní nā tindiQUI joco nā rí nu Pablo xihín nuú Bernabé caja cáhnu na da. <sup>14</sup> Joo tá nacandaā ini Pablo xihín Bernabé ña ndúcú nā cán caja cáhnu na da já nandata da jáhma dá sahá ña co táhán ini da xihín ña cája na. Ta já nacasáhá nā xínu na naquihvi na tañu ñayivi cán. Ta cáyuhú Pablo já cáchi da já xihín ná:

<sup>15</sup> —Candehé ndo. A váha toho ña ndúcú ndó caja ndó yóho jáchi ñayivi xihín mé va ndó cúu ndehe. Ndá cuéntá quéa cúnj ndó caja cáhnu ndó ndehe. Ta chuun vaxi nde yóho quéa caxi tuhun nde xihín ndó tuhun vaha saha Jesús. Ta já ndítahan nu ndo jándacoo ndó ña a váha jan. Ta candico ndó Ndióxi tácu, mé á nacavaña indivi xihín ñuyiví xihín tañuhú xihín tóco ndihi ñaha ndúu nuú in in ña cán. <sup>16</sup> Anda sanahá najándicoo ndáha Ndióxi ñayivi ndijáá nación caja na ndía cúnj mé va na caja na. <sup>17</sup> Joo ní tiempo najánaha Ndióxi yo cúu mé á nu ná jáchi ní tiempo nacaja vaha mé á xihín ná. Mé a chindahá javi nu yo. Ta mé á cája ña ná cana vaha ñundáhyi yo. Ta cája mé á ña ná a camaní ña cuxú já ná caji iní yo —nacachi Pablo xihín nā cán.

<sup>18</sup> Ta vatí nacahan Pablo tuhun yóho xihín nā joo ihvi ndivaha já nacava da jiní ñayivi cán ña ná a cáhni nā tindiQUI joco nā nu dá ña caja cáhnu na da.

<sup>19</sup> Tá nandihí já naxinu coo java nā Israel, nā naquixi ñuu Antioquía xihín java nā naquixi chí ñuu Iconio. Já nacava na jiní ñayivi já nacati na nacuun na yuu Pablo. Ta tá sa nacahan nā naxihí da já ñuhu na da nasahan na najácana na da yuhú ñuu. <sup>20</sup> Joo nā cúu cuéntá Jesús nafaca nā ta nacava nuu na nu cánduhu Pablo ta já nandacoo da já naquihvi tucu da ñuu cán. Ta inga quivi itaan já naquee da xihín Bernabé cuahan da ñuu Derbe.

<sup>21</sup> Tá naxinu coo ndíví da cán ñuu Derbe já nacasáhá da cáxi tuhun da nuú ñayivi sahá Jesús ta cuaha ná nandiquehe íchi cuéntá Jesús ñuu cán. Anda javí nandicó coo Pablo xihín Bernabé chí ñuu Listra xihín ñuu Iconio já naquee da cuahan da chí Antioquía. <sup>22</sup> Ta mé ñuu cán najácahan da nā cúu cuéntá Jesús ña ná coo ndacú chága nā ta ná a jándacoo na ña cándéé ini na Jesús. Ta nacachi da ña já ndusa ndoho ndivaha ini na janda quiahva ná xinū coo na cacomí Ndióxi cuéntá saha ná. <sup>23</sup> Tá nandihí já nasacu Pablo xihín Bernabé java da sacuahā ña ná cacomí da cuéntá sahá nā cúu cuéntá Jesús in in ñuu cán. Ta tá

nāndihi naxijuhun na ta naxica tahví na nu Ndióxi sahā ná já nāndiquiahva da na ndáha Ndióxi ña ná candaa mé á na jáchi cāndeé ini na mé á.

*Ndicó coo Pablo xihín Bernabé ñuu Antioquia ña ndácaan estado Siria*

<sup>24</sup> Tá nāndihi já nayaha Pablo xihín Bernabé chí estado Pisidia jānda quiahva naxinu coo na ñundáhyi cuéntá Panfilia.

<sup>25</sup> Ta naçahan na tuhun vaha saha Jesús nuú ñayivi ñuu Perge. Andá já naçuee na cuahan na chí ñuu Atalia.

<sup>26</sup> Ta ñuu Atalia cán nāndaa na barco já nāndicó coo na chí Antioquia nuú naçuee na jihna. Jáchi mé cán cúu nuú nāndiquiahva na da ndáha Ndióxi ña ná caja da chuun mé á. Ta viti sa najāndihi da chuun nātañda nu dá cán.

<sup>27</sup> Tá naxinu coo Pablo xihín Bernabé mé ñuu Antioquia cán já najátaca da tóco ndihi na cúu cuéntá Jesús ndúu ñuu cán já nāndicani da tóco ndihi ña naçaja Ndióxi xihín dá. Nāndicani da ndá quiahva naçahan Ndióxi ñamani nuú na coo naquixi chichi Israel ña ná ndiquehe na íchi cuéntá mé á. <sup>28</sup> Ta naçandoo nahá Pablo xihín Bernabé ñuu Antioquia cán xihín na cúu cuéntá Jesús.

## 15

*Ndítaca na sacuaḥa cuéntá Jesús*

<sup>1</sup> Ta ndaja coo mé tiempo já java daṭaa, da naquixi chí

estado Judea naxinu da ñuu Antioquia cán. Ta naçasáhá na jánaḥa na nuú na cúu cuéntá Jesús ña ndítahan nu ná caja na ña cáchi ley Moisés ña ná chicaan na marca yiquí cuñu na já ná cuu jácaçu Ndióxi na. <sup>2</sup> Joo Pablo xihín Bernabé naçasáhá cáni táhan ndeé yúhu dá xihín na Judea cán sahá ña yóho. Ta sahá ña nānditúhún cuahā ná sahá ña yóho sahá ña cán quéa naçacu ini na cúu cuéntá Jesús cán chindahá na Pablo xihín Bernabé xihín java ga da cúu cuéntá Jesús ña ná cuhun na ñuu Jerusalén já ná nditúhún chága na sahá ña yóho xihín na apóstol ta xihín na sacuaḥa cómi cuéntá sahá na cúu cuéntá Jesús ndúu Jerusalén cán.

<sup>3</sup> Andá já na cúu cuéntá Jesús ndúu Antioquia nāchindahá na na cán chí naçuee na cuahan na. Ta nu xica na cuahan na cán nayaha na chí ñundáhyi Fenicia xihín ñundáhyi Samaria. Ta cán nāndicani na nuú na cúu cuéntá Jesús ndá quiahva nāndiquehe na coo naquixi chichi Israel íchi cuéntá Jesús ta já najāndacoo na costumbre yatá naçacaja na jihna. Chí naçajii ndivaḥa ini na cúu cuéntá Jesús cán tá naxini joho na ña yóho.

<sup>4</sup> Tá naxinu coo Pablo xihín Bernabé xihín java ga na cán ñuu Jerusalén já nāndiquehe vaha na cúu cuéntá Jesús ndúu ñuu cán na. Ta jári na apóstol xihín na sacuaḥá veñuhu cán

nandiquehe vaha na na. Anda já nandicani Pablo nuú na cán tóco ndihi ña náhnu ñacaja Ndióxi xihin dá. <sup>5</sup> Joo java na fariseo, na sa ndiquehe íchi cuénta Jesús nandaca ndichi na já ñacasáhá cáchi na já:

—Ndítahan nuú na cúu cuénta Jesús, na coó ñaquixi chichi Israel chicaan na marca yiquí cuñu na. Ta ndítahan nu mí cahan í xihin ná ña ná cacu vaha na ley Moisés —ñacachi na fariseo cán.

<sup>6</sup> Anda já ñacaja na apóstol xihin na sacuahá veñuhu ña ná nditúhún na ndaja coo sahá ña yóho. <sup>7</sup> Sa nanditúhún cuahá ndivaha na cán sahá ña yóho. Anda já nandaca ndichi Pablo tañu na cán ta já ñacachi da já:

—Sa xini vaha ndó, ñani i ña ñacaxi Ndióxi yehe jihna ña ná caxi tuhún i tuhun vaha saha Jesús nuú na coó ñaquixi chichi Israel já ná candeé ri ini na cán va Jesús ña ná jácacu Ndióxi na. <sup>8</sup> Ta mé Ndióxi, mé a xini ndaja cáa ínimá in in ñayivi, mé a cán queá najánaña nu yo ña ndiquehe vaha mé á na tóho. Jáchi nasahan ínimá yii mé á nu ná tá quiahva ñacaja xihin mí, na ñaquixi chichi Israel. <sup>9</sup> Ni in túhún toho í co cúu yo na vaha chága a juú ga inga na nu Ndióxi. Jáchi tá quiahva nandaja vii Ndióxi mí sahá ña candeé iní Jesucristo quiahva já nandaja vii ri a na cán va sahá ña candeé ini na Jesucristo. <sup>10</sup> Ta viti

cúu á tátuhun nandindójó ndó ña ñacaja Ndióxi tá ñachindahá Jesucristo quivi a sahá cuachí. Ta viti cúni ndó caja ndusa ndó xihin na tóho yóho ña ná cacu vaha na ley Moisés. Ta sa candaa ini ndó ña ni mí ta ni tásáhnu jícó yo a cuú caja í cacu vaha í ley cán. <sup>11</sup> Joo ña candeé cáhnu iní queá ña jácacu maní uun Ndióxi mí sahá ña táhvi ini Jesucristo saha mí. Ta quiahva já táhvi ri ini a sahá na tóho cán va —ñacachi Pedro xihin ná.

<sup>12</sup> Ta xihin ña yóho ñacatáji yúhu tóco ndihi na cán. Ta táa johu na tá ñacasáhá Pablo xihin Bernabé ndicani da nu ná tóco ndihi ña náhnu xihin ña xitúhún ña nasahan Ndióxi ñamaní nu dá caja da nuú na coó ñaquixi chichi Israel cán. <sup>13</sup> Tá nandihí ñacahan da cán já ñacasáhá Jacobo cáchi da já:

—Cuni johu ndó ná cahan i xihin ndó, ñani i. <sup>14</sup> Sa ñacaxi tuhún Simón, da naní tucu Pedro nu yo tá nu cuítí ñacaja Ndióxi ñamaní xihin na tóho ta ñacaxi a na ña ná nduu na ñayivi cuénta mé á. <sup>15</sup> Ta in quiahva cáhan ña yóho xihin ña ñacahyí na profeta sanahá tá ñacahyí na ña ñacachi Ndióxi:

<sup>16</sup> Tá sa ñayaha tiempo já ndicó coo tucu ú. Ta tá quiahva ñacaja cáhnu ñayivi yehe tá tiempo nasacomí David cuénta sahá ñayivi Israel,

quiahva já vaxi quivi caja i ña ná caja cáhnu tucu na

yehe.

17 Caja i já jáchi cúni ña ná ndinducú na tóho yehe ña ná cacuu u xitoho tóco ndihi na,

mé ná cúu ná nacaxi yehe ná cacuu na cuéntá mí i.

18 Ña yóho quéa nacachi Ndióxi sanahá ndivaha tá nacaxi tuhun a ndaja coo tiempo viti —nacachi Jacobo xihín na cán.

19 Já nacachi tucu Jacobo já xihín ná:

—Sahá ña cán quéa cahan i ña co ndítahan caja ndúsa yó xihín na tóho cacu vaha na ley Moisés jáchi nacasahá ndíco na íchi cuéntá Ndióxi viti. 20 Joo ña ndítahan caja í quéa cahyí yo in carta ná cuhun a nuú na cúu cuéntá Jesús ndúu ñuu Antioquía já ná caja na ñamaní ña ná a cáxí na cuñu quíti, rí najoco ñayivi nuú tiniñu yúu. Ta ná a cóo na xihín na co cúu ñájíhí na á yí ná. Ta coto ná a cáxí na cuñu quíti, rí nasahnú. Ta coto ná a cáxí na ñíi. 21 Jáchi janda sanahá najánaha na ña yóho nuú ñayivi ndijáá ñuu tá quivi ndíquehe ndée ná tá jánaha na ley Moisés nu ná ini veñuhu —nacachi Jacobo xihín ná.

22 Anda já na apóstol xihín na sacuahá veñuhu cán xihín tóco ndihi na cúu cuéntá Jesús najándique táhan na tuhun na ña caxi na tañu tóco ndihi na cúu cuéntá Jesús cán java da ná cuhun ñuu Antioquía xihín Pablo xihín Bernabé. Ta da nacaxi na cuhun cúu Judas,

da naní tucu Barsabás xihín Silas. Ndívi da yóho cúu da ín saha nuú na cúu cuéntá Jesús cán. 23 Ta ña yóho cúu tuhun ndáa nu carta ñéhe na cán cuahan na:

“Tóco ndihi ndehe, na cúu apóstol xihín na sacuahá veñuhu xihín na cúu cuéntá Jesús ndúu ñuu yóho chindahá nde Ndióxi coo ndóhó, na cúu cuéntá Jesús, na coo naquixi chichi Israel, na ndúu ñuu Antioquía xihín ñundáhyi cuéntá Siria xihín Cilicia jan. 24 Sa ñañehé nde tuhun ña naquee java na cúu cuéntá Jesús ñuu yóho nasaa na chí jan tá coo naxica na ñamaní nuú nde cuhun na. Ta najáquihvi na ndóhó ta najájana na jiní ndó xihín tuhun cahan na jáchi cáxí na xihín ndó ña ndítahan nu ndó chícáan ndó marca yiquí cuñu ndó ta ndítahan cacu vaha ndó ley Moisés já ná cuu cacu ndaa ínima ndo. 25 Sahá ña cán quéa ñúhu johó ndihi nde ña ná caxi nde java ñaní já ná catáhan da xihín Pablo xihín Bernabé saa da coto nihni da ndóhó. 26 Mé Pablo xihín Bernabé yóho ndúu tiañva da quivi da saha Jesucristo, mé a cúu xitoho í. 27 Ta chindahá nde Judas xihín Silas já ná cahan yúhu mé ná xihín ndo já ná ndicani na saha tóco ndihi ña yóho nu ndo. 28 Mé ínima yíi Ndióxi najácahan ndehe ña co ndítahan nuú nde caja ndúsa nde xihín ndó cacu vaha ndó tóco ndihi ña sáhdá ley Moisés. Joo ná cahan

nde xihin ndo ndia quea co ndítahan caja ndó: <sup>29</sup> Coto a cáxi ndó cuñu quíti, rí najoco na nuú tiniñu yúú. Ta coto a cáxi ndo nii ta a cáxi ndó cuñu quíti, rí nasahnú. Ta coto a cóo ndó xihin ñájíhí á yí inga na. Tá ná cacu vaha ndó tóco ndihi ña yóho já quea cúu ndó na cája vaha. Ña yóho cúu tuhun cáhan nde xihin ndo ta ná coo Ndióxi xihin ndo.” Ña yóho cáhí carta nachindahá na nuú na ñuu Antioquía cán.

<sup>30</sup> Anda já naquee na cán cuahan na ñuu Antioquía. Ta tá naxinu na ñuu Antioquía cán já najátaca na tóco ndihi na cúu cuéntá Jesús cán já nandiquiahva na carta nu ná.

<sup>31</sup> Ta tá nandihí naçahvi na cúu cuéntá Jesús mé carta já naçajii ndivaha ini na jáchi nandindeé chága ví ini na naçaja ña cáhí carta cán.

<sup>32</sup> Mé Judas xihin Silas cúu da profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndeé ini na cúu cuéntá Jesús. <sup>33</sup> Nasandu na cán chá quivi ta chí nasacu ini Judas xihin Silas ndicó coo da ñuu Jerusalén jáchi cán ndúu na nachindahá ñahá ñuu Antioquía. Já nandindayí na cúu cuéntá Jesús da ña ná coo vaha da tá cuhun da íchi. <sup>34</sup> Joo nasacu ini Silas candoo da ñuu Antioquía cán.

<sup>35</sup> Ta naçandoo Pablo xihin Bernabé chága quivi ñuu Antioquía cán ta xihín cuahá java ga na najánaça chága na tuhun vaha saha

Jesús nuú ñayivi.

*Cuahan tucu Pablo çahan da tuhun vaha saha Jesús nuú ñayivi*

<sup>36</sup> Tá nayaha quivi já naçachi Pablo já xihín Bernabé:

—Cóho coto nihní na cúu cuéntá Jesús ndúu ndijáá ñuu nuú naxica nuu í naçahan yó tuhun Ndióxi jihna já ná candehé yo á ndíco yii va na Jesús —naçachi da.

<sup>37</sup> Cándúsa Bernabé cuhun da joo cuni da candaca tucu da Juan, da cáhan na Marcos xihin ña cuhun da xihin ná.

<sup>38</sup> Joo Pablo naçahán da ña vaha chága ná a cáñehe na da cuhun da xihin ná jáchi najándacoo da na tá naxinu na estado Panfilia sahá ña coo naxeen ga da caca nuu da caja da chuun Ndióxi xihin ná. <sup>39</sup> Nandituhún cuaha ná sahá ña yóho joo coo nandique táhan tuhun na sahá ña cán quea nasahnda táhan na. Sahá ña cán quea nañehe Bernabé Marcos cuahan xihin dá chí isla Chipre.

<sup>40</sup> Ta naçaxi Pablo Silas candaca táhan xihin dá. Ta naxica tahvi na cúu cuéntá Jesús nu Ndióxi saha dá ña ná chindeé a da nuú cuhun da. Anda já naquee da cuahan da. <sup>41</sup> Nayaha da chí ñundáhyi Siria xihín ñundáhyi Cilicia ta ní cúu nuú cuahan da sahan da tuhun ndeé ini na cúu cuéntá Jesús ña ná candeé chága ini na mé á.



## 16

*Cátahan Timoteo xica da xihin Pablo xihin Silas*

<sup>1</sup> Ta nayaha Pablo xihin Silas ñuu Derbe andá já naxinu coo na ñuu Listra. Ta cán nandinhehe ná in da cúu cuéntá Jesús, naní Timoteo, da cúu jahyi in ñá cúu cuéntá Jesús, ñá naquixi chichi Israel. Ta tátá da cúu griego.

<sup>2</sup> Ta na cúu cuéntá Jesús ndúu ñuu Listra xihín na ndúu ñuu Iconio nacahan vaha na saha Timoteo. <sup>3</sup> Cúni Pablo ña ná catáhan Timoteo xihin dá caca nuu da xihin dá sahá ña cán queá nacaja Pablo ña nachicaan na marca yiquí cuñu Timoteo tá quiahva cáchi ley Moisés já ná a cahan núu na Israel ndúu ndijáá ñuu válí cán saha dá. Jáchi sa xini vaha ndihi na cán ña cúu Timoteo jahyi in taa griego sahá ña cán queá coo nachicaan na marca Timoteo tá loho chá da. <sup>4</sup> Ta já naquee ndihi na cán cuahan na ta ní cúu ñuu nu xica na cuahan na cáxi tuhun na nuú na cúu cuéntá Jesús ña ná caja na ña nacachi na sacuaña xihin na apóstol ndúu ñuu Jerusalén cán. <sup>5</sup> Xihín ña yóho nandindacú chága na cúu cuéntá Jesús ta candeé cáhnu chága ini na mé á. Ta in in quivi yáha johu ndícuaha chága ñayivi ndíhvi íchi cuéntá Jesús.

*Ña naxini Pablo nacaja Ndióxi tá nasahin da ñuu Troas*

<sup>6</sup> Ta nasaji ínimá yii Ndióxi na cán ña ná a cuhun na

estado Asia cahan na tuhun vaha saha Jesús nuú ñayivi cán. Sahá ña cán queá nayaha na ñundáhyi cuéntá Frigia xihín Galacia cuahan na. <sup>7</sup> Já naxinu coo na yúhu estado Misia. Ta chí cán yaha na cuhun na ñundáhyi cuéntá Bitinia nacahan na. Joo coo nasahan ínimá yii Ndióxi ñamaní nu ná caja na ña. <sup>8</sup> Andá já nayaha saa na estado Misia janda quiahva naxinu coo na in ñuu naní Troas. <sup>9</sup> Ta in ñuu nani ín da mé ñuu Troas cán nasani ndímáhnú Pablo. Ta ña naxini da cúu in taa, da naquixi chí estado Macedonia. Ta cándichi da cahan ndahví da xihin Pablo já cáchi da já: “Naha ndó chí Macedonia yóho ña ná chindeé ndó ndehe.” <sup>10</sup> Tá nandicani Pablo ña yóho nuú nde chí ivi laá nacaja tiaha nde ñaha nde jáchi sa nacandaá cáxi ini nde ña mé Ndióxi queá cána ndehe ña ná cuhun nde estado Macedonia cán já ná caxi tuhun nde tuhun vaha saha Jesús nuú ñayivi ndúu cán.

*Xinu coo Pablo xihín na xica xihin dá ñuu Filipos*

<sup>11</sup> Tá nandihí já nandaa nde barco ñuu Troas já naquee nde cuahan ndacú nde isla naní Samotracia. Ta janda quivi itaan já naxinu coo nde ñuu Neápolis. <sup>12</sup> Ta cán nanuu nde mé barco cuahan sahá nde chí ñuu Filipos. Mé ñuu Filipos cán cúu á ñuu ña ín chága saha nuú java

ga ñuu válí ñúhu chí Macedonia cán. Ta ndíco a ñuu Roma. Ta ñasanduu nde ñuu Filipos cán chá quiví. <sup>13</sup> Ta in quiví ndíquehe ndée ná já naquee nde cuahan nde yuhú ñuu yati yuhú yuta nu sá taca ñayivi xíca tahví na nu Ndióxi. Já ñasacoo nde cán ta ñacasáhá nde cáhan nde tuhun vaha saha Jesús nuú najihí, na táca cán. <sup>14</sup> In mé ñañáha cán nani ña Lidia ta cúu ñá ñá ñuu Tiatira. Mé Lidia yóho cúu ñá ñá jíco jáhma vaha ña color ndíhí. Ta cúu ñá in ñá cája cáhnu Ndióxi. Ta nani xíní johó ñá ña cáhan Pablo saha Jesús já ñasuná Ndióxi xíní túní ña já ñacandúsa ñá ña cáhan Pablo cán. <sup>15</sup> Tá ñandihí ñacandúta ñá xihín na vehe ñá ta já cáchí ña já xihín nde:

—Tá ta mé a ndaa ndícuni ndó yehe ña cúu u cuénta Jesús caja ndó ñamaní saa ndó vehe e coo ndó —ñacachí ñá xihín nde.

Ta ñacaja ndúsa ñá xihín nde chí ñacandoo tóo nde vehe ñá cán.

<sup>16</sup> Ta ndaja coo in tañu tá cuahan nde nu sá xíca tahví nde nu Ndióxi já ñanditahan nde in ñá tacú, ñá ndácaan ínimá quini ini. Ta cája ña cán ña ná ndícuni ini ñá. Mé ñá tacú yóho cúu ñá ñaxeen na. Ta mé xitoho ñá cán táva cuaha dá jjuhún sahá ña ndícuni ini ñá. <sup>17</sup> Ta mé ñá tacú yóho ñacasáhá ña ndíco ñá jata Pablo xihín jatá nde ta cáyuhú cóhó ña já cáchí ña já:

—Da cája cáhnu Ndióxi, ña cáhnu íin indiví cúu da

cásahan yóho. Ta xíca da cáxi tuhun da xihín ndó ndá quiahva cuu cacu ndaa ínimá ndo —cáchí ña cáyuhú ña.

<sup>18</sup> Já cuití já cuití cája ña cuahá quiví janda quiahva co ndée ga ini Pablo xihín ña cája ñá. Chí ñandicoto nihni Pablo nu ñá já ñacachi da já xihín ínimá quini ndácaan ini ñá cán:

—Xihín quiví Jesucristo sáhdá i chuun nuun ña ná queún ini ña loho yóho —cáchí Pablo.

Chí iví laá ñaqueta ínimá quini cán cuahan.

<sup>19</sup> Joo tá ñaxini na cúu xitoho ñá cán ña a cóo ga cana jjuhún na caja ñá cán já ñatiin na Pablo xihín Silas já ñéhe na da ñasahan na vechúun nuú na jutixia. <sup>20</sup> Tá ñaxinu coo na cán já ñacachi na já xihín da cúu juéxe cán:

—Da ñaquixi chichi Israel yóho ñandai cuu da jándinihi da ñayivi ñuu í. <sup>21</sup> Jáchi jánaha da costumbre mé va da nuú ñayivi. Ta mí a cuú candúsa í ta ni a cúu caja í costumbre da yóho jáchi cúu yó ñayivi ndíco ñuu Roma —ñacachi na cán xihín juéxe.

<sup>22</sup> Anda já ñandicuita ñayivi xihín dá. Já ñasahnda juéxe cán chuun ña ná tavá na jáhma Pablo xihín Silas ta ná cani na ndíví da xihín yító. <sup>23</sup> Tá ñandihí ñacani quini ndivaha na da já ñataán na da vecaa. Ta ñasahnda na chuun nuú da ndáá vecaa cán ña ná candaa vaha da da. <sup>24</sup> Tá ñatahnda chuun yóho nuú da ndáá vecaa cán

já nāchicaan da Pablo xihin Silas jandā sa véhe cuí vecaa cán. Ta já nāchicaan da saha dá tañu ivi yito naní cepo já ná ndituun vaha da.

<sup>25</sup> Joo tátuhun java ñuú xica tahví Pablo xihin Silas nu Ndióxi ta xita da ña cája cáhnu da mé á nani táa johu java ga na ñuhu ini vecaa cán nu cáhan da. <sup>26</sup> In jonáa cuití nacasáhá táan ndee ndivaha chí jandā yuu ndúhu sahá vecaa cán cánda. Anda já nanuna tóco ndihi yéhe caa cán ta nacuyu cadena nasandico tóco ndihi na nasañuhu vecaa cán. <sup>27</sup> Anda já nandicaxí ini da ndáá vecaa cán ta tá naxini da núná yéhe caa cán já natuhun da yuchú cáni dá ña cahni da mé dá jáchi nācāhān da sa naquee ndihi na nasañuhu vecaa cán cuahan na. <sup>28</sup> Joo nacayuhú Pablo nu dá já nacachi Pablo já xihin dá:

—A cáhni tohún yohó jáchi yoho ndúu ndihi va nde.

<sup>29</sup> Anda já naxica da ndáá vecaa cán in lámpara já xínu da nandihvi da nu ndúu na vecaa. Ta chí quíji mé dá xihín ña yíhvi da já nacaxítí da nu Pablo xihín nu Silas. <sup>30</sup> Tá nandihí já natavá da na já nacasáhá ndáca tuhún da na já nacachi da já:

—Ndía ndítahan caja i já ná jácaçu ndaa Ndióxi ínima i — nacachi da.

<sup>31</sup> Anda já nanducú ñehe Pablo xihin Silas tuhun nu dá já cáhí da já xihín dá:

—Ndítahan candúsún Jesucristo, xitoho í já ná caçu

ndaa ínimum xihin ínima tóco ndihi na vehún — nacachi da.

<sup>32</sup> Anda já nacasáhá Pablo ndicani da tuhun vaha saha Jesús nuú da cán xihín nu tóco ndihi na ndúu vehe da cán. <sup>33</sup> Ta mé hora já nacaja tátá da ndáá vecaa cán nuú nandicuehe jata Pablo xihin jata Silas nuú nacani yito cán. Ta tá nandihí já nacanduta da ndáá vecaa cán xihín tóco ndihi na vehe da. <sup>34</sup> Tá nandihí já ndáca da Pablo xihin Silas nasahan da xihin dá vehe da. Ta cán nacaja ndíví na ña cuxu Pablo xihin Silas. Ta chí nacajii ndivaha ini da ndáá vecaa cán xihín na vehe da jáchi sa nandiquehe na íchi cuéntá Jesús.

<sup>35</sup> Ta naha inga quíví itaan já nāchindahá na cúu juéxe cán policia nuú da ndáá vecaa cán ña ná janí da Pablo xihin Silas vecaa. <sup>36</sup> Anda já nacachi da ndáá vecaa cán já xihin Pablo:

—Nasahnda na cúu juéxe chuun nuú i ña ná janí i ndohó cuhun ndo. Sahá ña cán quéa cáxi tuhun i xihín ndó cuahán quee ndó ta ná cuhun Ndióxi xihín ndo — nacachi da xihín dá.

<sup>37</sup> Joo nacahan Pablo xihín da cúu policia cán já nacachi da já xihín ná:

—A váha toho nacaja na xihín nde jáchi cúu nde na romano ta na jutixia jan nacani quini na ndehe nu táhyí tóco ndihi ñayivi tá cámaní caja víi na sahá nde. Ta tá nandihí já nataán jín ga na ndehe vecaa.

Ta viti cúni nã janí jehé nã ndehe quee nde cuhun nde. Joo a váha toho cája na já. Sahá ñã cán quëa a quëta nde janda quiahva ná quixi mé ná tavá nã ndehe já quee nde —ñacachi Pablo xihin da cúu policia cán.

<sup>38</sup> Andã já ñasahan nã cúu policia nandicani na nuú nã cúu juéxe ñã ñacachi Pablo xihin ná. Tá ñacandaa ini nã cúu juéxe cán ñã cúu Pablo xihin Silas da romano chí nayihvi nã. <sup>39</sup> Andã já ñasahan nã ñaxica nã ñamaní nu Pablo xihín nu Silas ñã ná caja cáhnu ini da sahá ñã ñacaja na. Já ñatavá nã da vecaa ta tá nandihí já ñaxica nã ñamaní nu dá ñã ná quee da ñuu cán cuhun da. <sup>40</sup> Tá ñaquee Pablo xihin Silas vecaa já ñasahan nã vehe ñã naní Lidia. Ta tá nandihí nandique táhan da xihín nã cúu cuéntá Jesús ndúu cán já ñasahan da tuhun ndéé ini na andã já ñaquee da cuahan da.

## 17

*Ndinihi ñayivi ñuu  
Tesalónica*

<sup>1</sup> Nani xíca Pablo xihin Silas cuahan da íchi nayaha da chí ñuu naní Anfípolis xihín inga ñuu naní Apolonia andã quiahva ñaxinu coo na ñuu Tesalónica. Cán ñasahiin veñuhu nu táca nã Israel. <sup>2</sup> Ta sahá ñã ñacaan Pablo sahan da veñuhu quivi ndíquehe ndéé ná sahá ñã cán quëa ñaquihvi da veñuhu cán. Ta tixi uní semana ñacahan

da tuhun Ndióxi xihin ná mé quivi ndíquehe ndéé ná. <sup>3</sup> Ta nu libro yii Ndióxi táva Pablo tuhun ndícani da nu ná ñã ndítahan nuú Jesucristo ndoho ini a. Ta tá sa nandihí ñaxihí a já nditacu a jáchi já cáchi libro yii Ndióxi coo. Já ñacachi Pablo já xihin ná:

—Mé Jesús, mé a cáhan i saha nu ndo yóho, mé a yóho cúu Cristo, ñã ñachindahá Ndióxi cacomí cuéntá sahá ñayivi —ñacachi Pablo.

<sup>4</sup> Ta chí ñacandúsa java nã Israel ñã ñacachi Pablo xihin ná. Andã já ñacatáhan na xihin Pablo xihin Silas xíca nuu na. Ta cuahá ri nã griego, nã sa cája cáhnu Ndióxi ndúu cán ñacandúsa na ñã ñacachi Pablo xihin ná. Ta ñacandúsa ri cuahá najihí, nã ín toní ñúhú ñayivi xihin ta nandihvi na íchi cuéntá Jesús. <sup>5</sup> Joo nã Israel, nã co cándúsa Jesús ñacasáhá cáhivhi ini na. Sahá ñã cán quëa najátaca na java ta quini, da coo chuun nu xíca nuu mé cáyé cán. Já ñacasáhá nã jándinihi na ñayivi mé ñuu Tesalónica cán. Andã já cáti na ñasahan nã vehe in da naní Jasón. Ta xihín ñã ndúsa ñaquihvi na vehe da cán ñã ndínducú nã Pablo xihin Silas ñã tavá nã da ndíquiahva na da nuú nã sacuahã ñuu cán. <sup>6</sup> Joo coo nandíñehe ná Pablo xihin Silas cán sahá ñã cán quëa janda mé Jasón, da xihín ñaha vehe cán ñúhu na da xihín java ga nã cúu cuéntá Jesús cuahan nã nuú nã jutixia ñuu cán. Tá nandihí já cáyuhú nã

já cáhí nā já xihín nā jutixia cán:

—Da nani Pablo xihín da nani Silas xíca nuu da níí cúú ñuyívi jájana da jiní ñayivi. Ta quiahva já cúni da caja da xihín ñayivi ñuu í. <sup>7</sup> Ta da nani Jasón yóho nandiquehe vaha da da cán vehe da. Ta xihín ña cája nā yóho náha ña cō cája na ña sáhdá ley ñuu Roma ta ni cō cája cáhnu na da cómi cuéntá sahá ñuu Roma. Jáchí mé nā yóho xíca na cáhan nā ña íin inga da cómi cuéntá sahá ñayivi. Ta cáhí nā cúú dá in da nani Jesús —nacachi na.

<sup>8</sup> Tá naxini johó ñayivi xihín nā jutixia cán ña yóho chí nacasáhá nā ndívaā nā. <sup>9</sup> Joo nachahvi Jasón xihín java nā cúú cuéntá Jesús cán jjuhún nuú nā jutixia cán já najanani ñahá nā.

### *Cuahān Pablo xihín Silas ñuu Bereā*

<sup>10</sup> Ta tá sa nacuaá mé ñuu já nachindahá nā cúú cuéntá Jesús cán Pablo xihín Silas já ná cūhūn da chí ñuu Berea. Ta tá naxinu cōo da ñuu Berea cán já nandihvi da veñūhu nā Israel cán. <sup>11</sup> Ta nasuná chága nā Israel cán ínimā ná a juú gā nā ndúu ñuu Tesalónica chí cájji íni nā nandiquehe na tūhun Ndióxi. Ta ndijáá ní quivi ndínducú nā nuú tūhun Ndióxi ña á mé a ndaa cúú ña jánaḥā Pablo nu ná. <sup>12</sup> Ta cuahā táhan nā naquixi chichi Israel cán nandiquehe na íchi cuéntá Jesús. Ta cuahā najihí griego, nā tácu ini nación cán xihín cuahá nataa griego nandiquehe na íchi

cuéntá Jesús. <sup>13</sup> Joo tá nañehé nā Israel ñuu Tesalónica tūhun ña íin Pablo ñuu Berea cáhan da tūhun Ndióxi nuú ñayivi chí ivi laá nasahan nā jándinihi na ñayivi ñuu Berea cán já ná ndicujita na xihín Pablo. <sup>14</sup> Joo ivi laá nā cúú cuéntá Jesús cán nachindahá nā Pablo cuahān da yati yuhú tañuhú nani nacandoo Silas xihín Timoteo ñuu Berea cán. <sup>15</sup> Ta java nā cúú cuéntá Jesús ndáca na Pablo ta nasañehe na da jandā ñuu Atenas. Ta tá nandicó cōo nā cán ñuu Berea já ñehe na chuun ña ná cūhūn quí Silas xihín Timoteo ñuu Atenas ná ndique táhan da xihín Pablo.

### *Íin Pablo ñuu Atenas*

<sup>16</sup> Nani ndáti Pablo xinu cōo Silas xihín Timoteo ñuu Atenas cán já nacasáhá ndíhi ini da jáchí níí cúú ñuu cán nachutú ndaa xihín cuahá tñiñu yúú ndícahán ñayivi ñuu cán. <sup>17</sup> Sahá ña cán quéa nacasáhá Pablo cáhan da tūhun Ndióxi xihín nā Israel ini veñūhu na. Ta quiahva já nachahan ri da tūhun Ndióxi xihín java nā tóho, nā cája cáhnu Ndióxi cán. Ta jari ndijáá ní quivi cáhan da tūhun Ndióxi xihín ñayivi táca nuú yahvi ñuu cán. <sup>18</sup> Ta java taā, da jácuaha íchi cuéntá Epicureos xihín da jácuaha íchi cuéntá Estoicos nacasáhá ndítuhún nā xihín Pablo. Joo java nā cán cáhí nā saḥā Pablo ña cuahá ndivaha cáhan da ta cō cándaā ini na ndá quéa cáhan da. Ta java na cáhí nā já saḥā dá:

—Á tá coó ta java ga ndióxi xíca nuu da cáhan da saha — cáchi na.

Naçachi na ña yóho saha Pablo jáchi naxíca nuu mé dá cáhan da tuhun vaha saha Jesús ta cáhan da ña nanditacu tucu Jesús. <sup>19</sup> Saha ña cán quéa ndáca na Pablo cuahan ná in nuú naní Areópago jáchi cán cúu nu ndítaca ñayivi ndituhún na. Ta tá naxinu coo Pablo cán já naçasahá ndáca tuhún na da já cáchi na já xihin dá:

—Á cajún ñamaní caxi tuhún xihín nde ndá cúu ña saá ña xícun jánahún nuú ñayivi. <sup>20</sup> Jáchi sa nañehé nde tuhun ña cátontó ñayivi xihín ña jánahún nu ná ta viti cúní nde candaá ini nde ndía quéa jánahún nu ná —naçachi na xihin Pablo.

<sup>21</sup> Naçachi na já xihin Pablo jáchi tóco ndihi ñayivi Atenas xihín na tóho ndúu cán ndijáá níi quivi ndinuhu ini na ndituhún na ñaha saá, ña naxini johu na jánaha inga na.

<sup>22</sup> Anda já naçandichi Pablo tañu na ndúu mé nuú naní Areópago cán já naçachi da já xihin ná:

—Candehé ndó, ñayivi ñuu Atenas. Candaá cáxi ini i ña cúu ndó ñayivi cátóo ndicahán cuahá nuú tiniñu yúu, ña cúu ndióxi ndo ta ndicahán ndó ña xihín ndinuhu ini ndó. <sup>23</sup> Jáchi tá xíca nuu i ñuu ndó já naxini i cuahá nunáa nu cája cáhnu ndó ña. Ta nu xíca nuu i cán naxini i inga nunáa. Ta nunáa cán ndáa

in tuhun ta cáchi a: “Náa yóho cúu nu ndicahán nde ndióxi co xini nde”, já naxini i cáchi a. Ta vatí co xini ndó Ndióxi ndicahán ndo cán joo cája cáhnu ndó ña. Ta mé Ndióxi cán quéa cúní cahan i saha nu ndó viti.

<sup>24</sup> Mé Ndióxi cán quéa naçavaha ñuyiví xihin tóco ndihi ñaha ín ñuyiví yóho. Ta mé á cómi a cuénta sahá indiví xihin ñuyiví. Ta co ndácaan toho mé á ini veñuhu ña naçavaha ndahá ñayivi. <sup>25</sup> Ta ni co xini ñuhú a chindeé ñayivi mé á jáchi sa mé á quéa cája ña ná catacu mí. Mé Ndióxi quéa sahan tachí yó nu yo ta mé á sahan tóco ndihi ñaha nu yo.

<sup>26</sup> Mé Ndióxi cán naçavaha in taá nu cuítí. Ta tóco ndihi ñayivi ndúu ñuyiví naquixi na chichi mé taá, da naçavaha Ndióxi cán. Tá nandihí já najándicuítita nuu Ndióxi ñayivi naquixi chichi da cán níi cúu ñuyiví já natahnda in in nación canduu a. Ta sa nasacu ini Ndióxi ndaja tiempo canduu in in nación ñuyiví yóho ta nasacu ini mé á ndáchí coo in in nación. <sup>27</sup> Já naçaja Ndióxi jáchi cúní a ña ná ndinducú ñayivi mé á ta já ná ndiñehé ná íchi cuénta mé á. Joo mé a ndaa yati va ín Ndióxi nu tóco ndihi ñayivi. <sup>28</sup> Jáchi mé á cája ña ná catacú ta ná canda yiquí cuñu í. Sañahá naçachi java taá cuénta mé ndó já: “Cúu yó na vehe Ndióxi.” <sup>29</sup> Joo tá mé a ndaa cúu yó na vehe Ndióxi co ndítahan cahan yo

ñā Ndióxi cúú t̄iniñu yúú ñā najándicuchu na xihín j̄iuhun cuáán á xihín j̄iuhun cúxú. Ta ni cō ndítahan cahán yo ñā Ndióxi cúú t̄iniñu yúú cávaha ndahá ñayivi xihín yuū. Jáchi j̄ini mé va na jan cána ñā cávaha na. <sup>30</sup> Jihna nasacu ini Ndióxi ñā a jándoho toho a ini ñayivi sahá cuachi nasacaja na jáchi cō cándaā ini na ñā cúni mé á, nduu. Joo viti sáhdá Ndióxi chuun nu tóco ndihi ñayivi ñā ná ndicó cōo ini na ta ná a cāja cáhnu ga na t̄iniñu yúú. <sup>31</sup> Jáchi sa nasacu Ndióxi in quiví caja víi a saha tóco ndihi ñayivi ndúu ñuyiví yóho. Ta sa naçaxi mé á Jesús ñā caja víi ndaa mé á saha ná. Ta najánditacu tucu Ndióxi Jesús tá nandihí naxihí a. Ta xihín ñā yóho nanaha nuú ñayivi ñā mé a ndaa caja víi Jesús saha ná —nacachi Pablo xihín ndihi na cán.

<sup>32</sup> Tá naxini johō na cán ñā cáchi Pablo ñā vaxi quiví nditacu ndii já naçasáhá java na cán sácū ndaa na da. Joo java na cáchi na já xihín dá:

—Vaha chága ná cahún sahá ñā jan nuú nde inga tañu —cáchi na xihín dá.

<sup>33</sup> Anda já naçuee Pablo nu Areópago cán cuahan da. <sup>34</sup> Joo java ñayivi, na naçandúsa ñā cáchi da naçasáhá ndicō na da xíca na. Tañu na cán nasandacaan in da naní Dionisio, da cúú táhan na ndítaca Areópago cán. Ta tañu na naçandúsa cán ndácaan ri in ñañáha naní Dámaris. Ta jári java chága

na cándúsa nandihvi na íchi cuéntá Jesús.

## 18

*Xinu cōo Pablo ñuu Corinto*

<sup>1</sup> Tá nandihí já naçuee Pablo ñuu Atenas cán já cuahan da chí ñuu Corinto. <sup>2</sup> Ta mé cán nandique táhan da xihín in da Israel naní Aquila, da nasacuu estado Ponto. Ta jacá cúu saá va naxinu cōo Aquila ñuu Corinto cán xihín ñájihí da, ñá naní Priscila. Ta ndíví na yóho sa naçuee na ñuu Roma ndácaan nación Italia jáchi Claudio, da cómi cuéntá sahá na ñuu Roma cán nasahnda da chuun ñā ná quee ndihi na Israel cuhun na. Ñā cán quéa naxinu Aquila xihín ñájihí da ñuu Corinto cán. Anda já nasahan Pablo naxito nihni da na nu ndúu na cán. <sup>3</sup> Ta naçandoo Pablo vehe na cán cāja chúun da xihín ná jáchi sa mé chuun ñā cāja na cán tiáhva ri da cán va. Ta chuun nasacaja na quéa cávaha na vehe lona, ñā ndeé. <sup>4</sup> Ta tá xinu cōo quiví ndíquehe ndéé ná já sahan da veñuhu na Israel cahan da tuhun Ndióxi xihín ná. Ta já najáxinu da ini na Israel xihín na tóho já naçasáhá na cándúsa na Jesús.

<sup>5</sup> Ta ndaja cōo najándacoo Silas xihín Timoteo estado Macedonia ta naxinu cōo na ñuu Corinto cán. Anda jáví najándacoo Pablo chuun cāja da cán já naçasáhá da ndúcú ndeé chága da cahan da tuhun Ndióxi nuú ñayivi. Ta cáxi táhyí cahan da xihín

na ñaquixi chichi Israel ña mé Jesús cúu á ña ndáti na chindahá Ndióxi quixi. <sup>6</sup> Joo na ñaquixi chichi Israel cán coó ñandiquehe na tuhun cáhan Pablo ta ñacasáhá cánahá na xihín dá ta cáhan núu na saha Jesús. Anda já ñaquiji nihni Pablo jáhma dá já ná candaá ini na ña co ndójo ga da cuachi sahá na Israel cán ta já ñacachi da já xihín ná:

—Tá ná cuhun ndó indayá ta cómi mé va ndó cuachi sahá. Joo yehe co ndójo ga i cuachi saha ndo jáchi sa ñacahan i tuhun Ndióxi xihín ndo ta co cuni ndó cándúsa ndó ña. Viti xihín chí nuu cuhun i cahan i tuhun vaha saha Jesús nuu na coó ñaquixi chichi Israel —ñacachi Pablo xihín ná.

<sup>7</sup> Já ñaqueta da veñuhu na cán cuahan da. Já nasaa da vehe in da naní Justo, da cája cáhnu Ndióxi. Ta yati jín veñuhu cán ín vehe da. <sup>8</sup> Ta in da naní Crispo, da sáhdá chuun veñuhu cán ñacandúsa da Jesús, xitoho i xihín tóco ndihi na vehe da. Ta cuaha táhan mé na ñuu Corinto cán ñandiquehe na íchi cuéntá Jesús ta ñacandúta ná tá ñaxini johó na tuhun Ndióxi ñacahan Pablo xihín ná. <sup>9</sup> Ta ndaja coo in ñuu ñaquixi tátuhun in sani nu Pablo ta xihín ña cán ñacahan Ndióxi xihín dá já ñacachi a já:

—A yíhvún cahún sahá i nuú ñayivi ta coto a catáji yuhun cahan chágun xihín ná

saha i. <sup>10</sup> Jáchi ín vi xuhun ta ni in na a cúu tiin yohó ña ná caja xíxi na xuhun. Jáchi sa ndúu cuahá ndivaha ñayivi ñuu yóho, na cacuu cuéntá mí i —ñacachi Ndióxi xihín dá.

<sup>11</sup> Saha ña cán quéa ñasahin too Pablo in cuia java ñuu Corinto cán ta najána ha da tuhun Ndióxi nuú ñayivi cán.

<sup>12</sup> Joo mé tiempo cán ñacasáhá cómi in da naní Galión cuéntá sahá ñayivi estado Acaya nu ndacaan ñuu Corinto cán. Já ñandique táhan ndihi na Israel ña cuni na caja xíxi na xihín Pablo chí ñatiin na da já ñehe na da cuahan da vechúun. <sup>13</sup> Ta mé cán ñacasáhá cáchi na já xihín da cúu gobernador cán:

—Da naní Pablo yóho xíca da jácahan da ñayivi ña ndítahan nu ná caja cáhnu na Ndióxi ta co sáhdá ley yo cája í já —cáchi na cán xihín gobernador.

<sup>14</sup> Anda já ndúcú Pablo candichi da cahan da joo mé Galión cán ñacasáhá cáchi da já xihín na Israel cán:

—Tá cuachi ndeé ná caja da yóho já quéa cuu cuni johó i nu cáhan ndo ná ndaja ndichi i saha dá, nduu. <sup>15</sup> Joo co cuni toho i caja vii sahá ña jan jáchi cúu á sahá tuhun cáhan ndo xihín sahá quivi ñayivi Israel xihín saha ley mé va ndó ña cán quéa vaha chága ná caja vii mé va ndó sahá ña yóho —ñacachi da cúu gobernador cán xihín ná.

<sup>16</sup> Tá ñandihí já ñatavá da na Israel vechúun cán.



17 Anda já natiin tóco ndihi na griego cán da naní Sóstenes, da sáhdá chuun veñuhu cán. Ta natiin na da mé nu táhyí mé da cúu gobernador cán nacani na da. Joo coó nasahní toho Galión mé dá sahá ña nacaja na.

*Ndicó coo tucu Pablo chí Antioquía*

18 Cuahá va quivi nacandoo tóo chága Pablo ñuu Corinto cán. Anda já nandindayí da na cúu cuéntá Jesús ndúu cán já naquee da cuahan da ñundáhyi cuéntá Siria. Ta ndáca da Aquila xihin Priscila cuahan na xihin dá. Ta tá naxinu da ñuu Cencrea tá camani ndaa da barco cuhun chága da chí nuu já najatá lahla da jini dá já ná xinu coo nuu tuhun nacahan da. 19 Ta tá naxinu coo da ñuu Efeso xihin na ndáca táhan xihin dá cán já najándacoo da Priscila xihin Aquila. Ta naquee da cuahan da chí veñuhu ñuu Efeso cán nuu nacahan da tuhun Ndióxi nuu na Israel, na táca cán. 20 Tá nandihí já nacasahá cahan ndahví na Israel cán xihin Pablo ña ná candoo tóo da chága quivi xihin ná. Joo coó naxeen toho da. 21 Ña nacaja da quéa nandindayí da na já nacachi da já xihin ná:

—Ndítahan cuhun i coo i Jerusalén jáchi sa nandindaa quivi vaxi víco. Joo ndicó coo tucu u coto nihni i ndohó tá cuni Ndióxi —nacachi Pablo xihin ná.

Tá nandihí já nandaa da barco naquee da ñuu Efeso. 22 Ta tá naxinu coo da ñuu Cesarea já naquee da cuahan da chí ñuu Jerusalén cahan Ndióxi da xihin na cúu cuéntá Jesús ndúu cán. Tá nandihí já naquee da cuahan da chí inga ñuu naní Antioquía. 23 Ta tá nandihí nasahin da chá quivi cán já naquee tucu da cuahan da tá in tá in ñuu válí ñuhu chí estado Galacia xihin estado Frigia ña quiahva da tuhun ndeé ini na cúu cuéntá Jesús ndúu cán.

*Cahan Apolos tuhun Ndióxi nuu na ñuu Efeso*

24 Mé tañu já naxinu coo in da naquixi chichi Israel naní Apolos mé ñuu Efeso cán. Mé Apolos yóho cúu dá da nacacu ñuu Alejandría. Ta cúu dá in da tiahva vaha tuhun Ndióxi ta tiahva vaha da jannaha da ña nuu ñayivi. 25 Mé Apolos yóho sa najacuaha vaha da ichi cuéntá Jesús, xitoho í ta xihin ndinuhu ini da cahan da saha mé á nuu ñayivi. Ta cáxi táhyí jannaha da saha Jesús nu ná. Ta nacahan da xihin ná ña ndítahan canduta ñayivi tá quiahva najacanduta Juan ñayivi jihna. Joo coo xini vaha da tóco ndihi ña najannaha Jesús. 26 Chí já naquihvi mé Apolos veñuhu cán cahan da tuhun Ndióxi xihin ñayivi jáchi coo yihví da cahan da xihin ná. Ta ndaja coo naxini johó Priscila xihin Aquila nu cahan da. Ta tá nandihí já ñéhe na da cuahan na já nandicani vaha chága na nu dá ndaja ín ichi cuéntá

Ndióxi. <sup>27</sup> Ta tá nasacu ini Apolos cūhūn dā chí estado Acaya já nāchindeé nā cúu cuéntá Jesús dā já ná cuu cūhūn vaha da. Ta nācahyí nā in carta nasahan nā nū dá ná quiahva dā ñā nuú nā cúu cuéntá Jesús ndúu cán já quēa ná ndiquehe vaha na dā. Ta tá naxinu cōo Apolos yóho estado Acaya cán nāchindeé cuahá ndivaha da nā cúu cuéntá Jesús, nā nācandēé ini mé á sahá ñā nātahvi ini Ndióxi saha ná. <sup>28</sup> Ta nū cáxi táhyí ndihi ñayivi nanaha dā ñā a juú ñā ndaa cúu ñā jánaha nā Israel nuú ñayivi. Ta xihín tuhun Ndióxi nanaha dā nū ná ñā mé Jesús cúu Cristo, mé a nāchindahá Ndióxi cacomí cuéntá sahá ñayivi.

## 19

### Tá ún Pablo ñuu Efeso

<sup>1</sup> Ta nani ín Apolos ñuu Corinto cán já nayaha Pablo chí yúcu janda quiahva naxinu cōo da ñuu Efeso. Ta cán nāndiñehe dá java nā cúu cuéntá Jesús. <sup>2</sup> Já nandaca tuhún dā nā já nācachi da já xihín ná:

—Á nāndicutú ndaa ínima ndo xihín ínima yíi Ndióxi tá nācandúsa ndó Jesús — nācachi da xihín ná.

Já nanducú ñehe nā cán tuhun nū dá já cáchi nā já xihín dá:

—Chí a ñaha mé va candaa ini nde saha ínima yíi Ndióxi jan —nācachi nā cán xihín Pablo.

<sup>3</sup> Andā já nandaca tuhún Pablo nā já cáchi dā já xihín ná:

—Ndaja vaha nācandúta ndo, dá já.

Andā já nanducú ñehe nā cán tuhun nū dá já nācachi na já:

—Nācandúta nde tá quiahva najánaḥa Juan — nācachi na.

<sup>4</sup> Andā já nācachi tucu Pablo já xihín ná:

—Najācandúta Juan ñayivi já ná naha nā nuú ñayivi ñā nāndijama na ta cō cája ga nā cuachi nasacaja na jihna. Joo nācahan Juan xihín ná ñā ndítahan nū ná candúsa na inga dā vaxi jata dá. Ta dā nācahan Juan cán saha cúu Jesús, mé a nāchindahá Ndióxi cacomí cuéntá sahá ñayivi —nācachi Pablo xihín ná.

<sup>5</sup> Tá naxini johō nā cán ñā nācachi Pablo xihín ná chí ivi laá nācandúta ná cuéntá Jesús, mé a cúu xitohō í.

<sup>6</sup> Ta tá nāchojó Pablo ndáha dá jini ná já naxinu ínima yíi Ndióxi najāndicutú a ini na. Andā já nācasáhā nā ndícahan nā inga tuhun ñā cōo nasatiahva na. Ta jáyaha na tuhun nācahan Ndióxi nuú nā ndúu cán. <sup>7</sup> Ta tixi ndihi nā cán cúu ná tátuhun uxu ivi ṭaa.

<sup>8</sup> Ta tixi uní yoo nasahiin Pablo ñuu cán sahan dā veñuhu jánaha dā saha Jesús nuú ñayivi xihín ndinuhu ini da. Ta jáxinu dā ini ñayivi ñā ná ndihvi na íchi cuéntá Jesús já cuu cacomí mé á

cuéntá saha ná. <sup>9</sup> Joo java na cán sáá ini na ta coó naxeen na candúsa na nu cáhan da. Ña nacaja na quéa nacasáhá cáhan núu na sahá tuhun vaha cáhan saha Jesús nuú ñayivi. Sahá ña cán quéa natavá xoo Pablo na cúu cuéntá Jesús tañu na cán já nasahan ndaca da na in vehe escuela nu in in da naní Tiranno ta cán jánahá Pablo tuhun Ndióxi nu ná ndijáá ní quivi. <sup>10</sup> Já nasacaja Pablo tixi ivi cuja ta xihín ña cája da naxini johó ndihi na ndúu estado Asia tuhun vaha saha Jesús, xitoho í. Ta na naxini johó tuhun Ndióxi cán cúu ná na naquixi chichi Israel xihín na tóho viti. <sup>11</sup> Ta nacaja Ndióxi ña ná cuu caja Pablo cuahá ña xitúhún nuú ñayivi ndúu cán. <sup>12</sup> Jáchí janda pañito á jáhma ña cáni ndaa Pablo cán ñehe na ña cuahan na ta jácani ndaa na ña na quíhvi xihín á chí ndívaha na. Ta tá ñúhu ínimá quini ini na janda rí cán quéta cuahan.

<sup>13</sup> Joo java na Israel, na co cúu cuéntá Jesús xíca nuu na tává na ínimá quini ñúhu ini ñayivi. Ta ndaja coo nasacu ini na caja chúun na quivi Jesús, xitoho í, ña ná tavá na ínimá quini. Já nacachi na cán já xihín ínimá quini ndacaan ini ñayivi:

—Xihín quivi Jesús ña xíca nuu Pablo cáhan da saha, sáhdá nde chuun nuun ña ná queún cuhun —nacachi na cán.

<sup>14</sup> Já nacaja ndíhusa jahyi in da naní Esceva, da cúu da

sacuahá nuú jutú veñuhu na Israel ndúu ñuu cán. <sup>15</sup> Joo tá nacachi na ña yóho xihín rí quini ñúhu ini in dataa já nanducú ñehe rí cán tuhun nu ná já cáhí rí já:

—Xíni vi yo cúu Jesús ta xíni ri ndá da cúu Pablo va. Joo mé ndó, co xíni toho i ndohó —nacachi rí quini.

<sup>16</sup> Tá nacachi ínimá quini cán já chí ivi laá nandava dataa ndacaan ínimá quini ini cán jata ndíhusa na cán ta nacaja xíxi quini da xihín ná jáchí a juú quiahva ndacú da. Quini nacaja da cán xihín ná anda naxinu lahla ndihi na jata véhe ta chí a váha na nandicuehe na nacaja ínimá quini cán. <sup>17</sup> Ta chí nacandaa ini ndihi ñayivi ndúu ñuu Efeso cán sahá ña nayaha yóho vatí cúu ná na Israel á cúu ná na tóho nañehe ndihi na tuhun. Sahá ña cán quéa nayihví na. Ta cuaha ná nacahan na ña cáhnu cúu quivi Jesús ña cúu xitoho í.

<sup>18</sup> Ta cuaha táhan na cándúsa Jesús cán nacasáhá na náhma na tóco ndihi cuachi nacaja na. <sup>19</sup> Ta cuahá na nasacuu na tají ñehe ndihi na libro ña tají naxinu na ta nachicaan ñúhu ná ña nuú ndihi ñayivi. Tá najitá na cuéntá sahá yahvi tóco ndihi libro nacayi cán naxinu a tátuhun ivi jico uxu mil jihun cúxú. <sup>20</sup> Já nacasáhá xíta nuu tuhun vaha saha Jesús. Ta náha ña mé a ndaa ín ndée Jesús caja tóco ndihi ñaha.

21 Tá sã nayaha ndihi ña yóho já nasacu ini Pablo cuhun da coto nihni da estado Macedonia xihin estado Acaya. Já quehe tucu da ichi cuhun da janda Jerusalén. Ta nacachi da ña tá sã nasahan da ñuu Jerusalén já yaha da cuhun da chí ñuu Roma. 22 Ta mé Pablo yóho nachindahá da ivi táhan da xica chindeé táhan xihin dá ña ná cuhun da chí estado Macedonia. Ta da nachindahá da cán cúu Timoteo xihin Erasto ta mé Pablo nacandoo too chága da estado Asia.

*Ndávaq ñayivi ndúu ñuu Efeso*

23 Mé tiempo já a juú quiahva cuahá ñayivi ñuu Efeso nandivaq na sahá ña nandihvi cuahá ñayivi ichi cuénta Jesús. 24 In da naní Demetrio cúu dá da najándivaq na cán. Mé Demetrio yóho cávaha da tiniñu yúu xihin jiuñun cúxú ta mé tiniñu yúu cán ndáa tá quiahva cáa in veñuhu cuénta Diana, ñá cúu ndióxi cája cáhnu na ñuu cán. Ta a juú quiahva vaha cána jiuñun na cája chúun xihin dá cán. 25 Sahá ña cán quéa mé Demetrio yóho najátaca da tóco ndihi na cája chúun xihin dá ta najátaca ri da java ga táhan na cája mé chuun cávaha tiniñu yúu cán. Já nacachi da já xihin ná:

—Candehé ndo, sã cándaq vaha ini ndó ña vaha ndivaha cána jiuñun yo xihin chuun cája í yóho ta ndúu vaha í cája ña. 26 Joo sã xíní ndo ta

ñehé mé ndó tuhun sahá da naní Pablo. Xica nuu da cáhan da xihín ñayivi ña a juú toho ndióxi cúu ña cávaha ndahá ñayivi. Ta sã cuahá ndivaha ñayivi nacava da jini. Ta a juú in tühun ñuu Efeso yóho cuití va jáchi sã nacandeé da nacava da jini cuahá na ndúu chí estado Asia viti. 27 Ta ihvi ndivaha cáa ña yóho jáchi cuu cahnu da nuú chuun cája í ta nu cána jiuñun yo quéa yóho. Ta janda veñuhu ndióxi yo, ñá naní Diana cuu ndihi saha vatí ní cúu cáhan vaha na saha veñuhu ñá. Joo xihin ña cája Pablo yóho tá xica nuu da cuu casahá ñayivi cahan núu na saha Diana ta cuu casahá na candají na ñá cúu ndióxi yo, mé Diana yóho. Ta mé ñá cúu ñá ñá cáhnu ndivaha ta ñayivi ní cúu estado Asia yóho xihin ñayivi ní cúu ñuyiví cája cáhnu na ña —nacachi Demetrio cán xihin java ga da cávaha tiniñu yúu cán.

28 Ta tá naxini joho ndihi na cán ña nacachi Demetrio chí ivi laq najaa quini na já nacayuhú na já nacachi na já:

—Cáhnu ná cacuu Diana, ñá cúu ndióxi ndícahán na Efeso.

29 Ta xihin ña yóho tóco ndihi ñayivi ñuu cán nacasahá na ndívaq na. Sahá ña cán quéa natiin na ivi dataa, da naní Gayo xihin da naní Aristarco. Ndívi da yóho cúu da da estado Macedonia ta xica nuu da xihin Pablo. Ta mé ñayivi cán natiin na da já ñuhu na da cuahan da vehe nu ndítaca ñayivi cán.

<sup>30</sup> Ndúcu Pablo quihvi nuu da tañu ñayivi cán ña cahan da xihin ná cúni da. Joo na cúu cuénta Jesús cán coó naxeen na ña ná cuhun da. <sup>31</sup> Ta jári java na jutixia cuénta estado Asia ndúu cán ta xini táhan vaha xihin Pablo sahá ña cán quéa nachindahá na chuun nu dá ña ná a quihvi nuu da cahan da xihin na cán. <sup>32</sup> Tañu nu táca ñayivi ndivaá nahá cán sa jín sa jín ñaha cáyuhú na ndúu na. Jáchi cuahá na nataca cán ni co xini na ndá cuénta quéa nataca na tañu ñayivi cuahá cán. <sup>33</sup> Joo java ñayivi ndúu cán nandicani na ndaja cáa ña cúu cán nuú in da naní Alejandro. Ta java na Israel ndúu cán nachindahá na Alejandro já ná candichi da cahan da xihin ñayivi cán. Andá já nandiñehe Alejandro ndáha dá já ná catáji too yuhu ná já nacasahá ndiquehe da sahá na cúu cuénta Jesús. <sup>34</sup> Joo tá naxini ñayivi cán ña cúu Alejandro in da Israel chí ivi laá nacasahá tóco ndihi na cán cáyuhú na já cáchi na já:

—Cáhnú ná cacuu Diana, ña cúu ndióxi ndicahán na Efeso.

Ta coó nacasahá na tixi ivi hora cáyuhú na mé tuhun yóho.

<sup>35</sup> Ta tá sa nacasahá loho ñayivi já nacasahá da cúu da cáhyi tutu ñuu cán cahan da xihin ñayivi já cáchi da já xihin ná:

—Candehé ndó, na Efeso. Sa cándaá ini ndihi ñayivi ndúu ñuyivi ña ndítahan nuú ñayivi ndúu ñuu Efeso candaa

vaha na veñuhu ña cúu ndióxi naní Diana. Jáchi mé ña cúu ña ña cáhnú ndivaha ta indivi naquixi nahná ña nandicava nu yo. <sup>36</sup> Ta ni in na a cúu cachi ña cahan i ña tuhun sahá ña cán quéa caja ndó ñamaní catáji ndo ta ndicani vaha ini ndó sahá ña cúni ndó caja ndó. <sup>37</sup> Jáchi ndívi da ndáca ndó nacasaa ndó yóho co cája cuíhná da veñuhu Diana ta ni co cahan nuu da saha ña. <sup>38</sup> Ta tá co táhan ini Demetrio xihin na cája chuun xihin dá sahá ña cája Pablo já ndítahan nu ná cuhun na vechúun nuú jutixia ta cán cuu ndiquehe in in na saha mé ná jáchi sahá ña cán ndúu juéxe cán caja vii na sahá ñayivi. <sup>39</sup> Joo tá inga ñaha quéa cúni ndó caja vii ndó saha, xini ñuhú nditaca ndihí já ná cuu caja vii yó sahá. <sup>40</sup> Jáchi cája i cuénta cuu chican na cuachi jata yo sahá ña jándicuita i ñayivi cani táhan na saha tóco ndihi ña nayaha quivi viti. Jáchi mé a ndaa co xini yo ndá tuhun nducú ñehé tá ná ndaca tuhun na mí ndá cuénta quéa ndivavaá nahá yo —nacachi da xihin ná.

<sup>41</sup> Tá nandihí nacachi da cáhyi tutu cán tuhun yóho xihin ñayivi cán já najánduta da na.

## 20

*Cuahan Pablo estado Macedonia xihin estado Grecia*

<sup>1</sup> Tá sa nanduta ndihi ñayivi, na nandivaá nahá cán

já naçana Pablo tóco ndihi na cúu cuéntá Jesús jáchi cúni da cahan da xihin ná sahá java ñaha ña ndítahan nu ná caja na. Ta tá nandihí naçahan da xihin ná já nanumi da na ta nandindayí da na já naquee da cuahan da chí Macedonia. <sup>2</sup> Níí cúu estado Macedonia cán naxica nuu da sahan da tuhun ndéé ini na cúu cuéntá Jesús xihin tuhun cahan da. Tá nandihí já naquee da cuahan da ta naxinu da chí estado Grecia. <sup>3</sup> Ta naçandoo da cán tixi uní yoo. Ta tá ja chá quehe da barco cuhun da chí ñundáhyi cuéntá Siria já nañehe dá tuhun ña sácu ini na Israel cán cahní na da. Sahá ña cán quea nasacu ini da ña vaha chága ná cuhun sahá da já ná yaha tucu da chí Macedonia. <sup>4</sup> Ta ndáca táhan java na cúu cuéntá Jesús cuahan na xihin Pablo. Ta na cán cúu na yóho: in da naní Sópater, da ñuu Berea xihin Aristarco xihin Segundo, da ñuu Tesalónica xihin Gayo, da ñuu Derbe xihin Timoteo. Ta tañu na cán cuahan ri Tíquico xihin Trófimo, da naquixi estado Asia. <sup>5</sup> Tóco ndihi na ndáca táhan xihin Pablo yóho nasahan cuéé na chinuu candati na ndehe ñuu Troas. <sup>6</sup> Joo ndehe, da cúu Pablo xihin Lucas tá sa nayaha víco tá xíxi na pan ña co cáva táhan yusá naxaa xihin já nandaa nde barco ñuu Filipos cuahan nde chí Troas. Ta janda quiví uhun já nandique táhan nde xihin ndihi na cán. Ta chí naçandoo tóo chága nde usa quiví ñuu Troas cán.

*Xíto nihni Pablo ñuu Troas*  
<sup>7</sup> Ta quiví domingo nataca ndihi nde, na cúu cuéntá Jesús ña cuxu nde pan yíi. Ta sahá ña queta Pablo cuhun da inga quiví itaan sahá ña cán quea najánaña cuaha dá nu ná janda quiahva naxinu java ñuu. <sup>8</sup> Tóco ndihi na cúu cuéntá Jesús cán nanditútú nde ndúu nde in vehe cánúu jiní ninu. Ta chí ndiyihvi ndaa nu ndúu nde jáchi cuahá lámpara cáyi. <sup>9</sup> Ta ndaja coo in da loho naní Eutico in coo da ventana xini johu da nu cahan Pablo. Joo sahá ña cuaha cahan Pablo sahá ña cán quea nanaá ini da loho cán chí naquiji da. Já najani dá nandicava da janda nu ñuhu piso uní. Ta tá nanuu na cúu cuéntá Jesús cán nandiñehe na da jandá ndii cúu dá. <sup>10</sup> Anda já nanuu Pablo ta najácaa da mé dá jatá da loho cán ta nanumi da da ta já naçachi da já xihin na cúu cuéntá Jesús cán:

—A cáyihvi toho ndó jáchi tácu va da yóho —naçachi Pablo chí najánditacu ñahá da.

<sup>11</sup> Anda já nandaa tucu Pablo cuahan da vehe piso ninu cán. Já nasahnda java da pan yíi cán ta naxixi na ña. Anda já naçahan chága da xihin ná janda quiahva nativi. Já naquee da cuahan da. <sup>12</sup> Ta sahá mé da loho, da nandicava cán cáji ími na ndáca vaha na da cuahan na jáchi nanditacu da.

*Quéé Pablo ñuu Troas ta cuahan da chí ñuu Mileto*

13 Nasacu ini Pablo cūhun sahá da anda űuu Asón. Joo mé nde nandaa nde barco nasahan nde mé űuu cán jáchi janda cán nacandoo nde ndique táhan nde xihín dá. 14 Ta tá nandique táhan nde űuu Asón cán xihín dá já nandaa da xihín ndihi nde ini barco. Já naquee nde cuahan nde űuu Mitilene. 15 Casahan nde ini barco ta inga quiví itaan já nayaha nde yati isla Quío ta janda tá nayaha inga tucu quiví já naxinu coo nde űuu Samos. Ta naquee tucu nde cuahan nde janda quiahva naxinu coo nde űuu Trogilio. Ta cán nandiquehe ndée nde ta janda inga quiví itaan naxinu coo nde űuu Mileto. 16 Co cūni Pablo cayancá da estado Asia sahá ña cán quea coo nasahan nde űuu Efeso. Númi da cūhun da űuu Jerusalén coo da quiví víco Pentecostés jáchi nasacu ini da coo da víco cán tá ná quiahva Ndióxi ñamaní nu dá.

*Cáhan Pablo xihín na sacuahá űuu Efeso*

17 Ta nani ndúu nde űuu Mileto cán já nacana Pablo tóco ndihi na sacuahá veñuhu űuu Efeso cán já ná quixi na. 18 Ta tá sa nataca na nu ndúu nde já nacachi da já xihín ná:

—Sa xíni vaha ndó ndaja nacaja i janda quiví nu cuítí tá naxinu coo i estado Asia yóho. 19 Níi tiempo nasahin i tañu ndó cán nacaja chúun i cuéntá Jesucristo, xitoho í. Ta coo nandinehe jícó i mí i

sahá ña nacaja i. Ta cuahá tañu nasacu u saha ndo. Ta nandoho ini i sahá ña cūni na Israel cahní na yehe. 20 Ta coo najandacoo i cáhan i tuhun Ndióxi xihín ndo jáchi xíni vaha i ña jan cuu chindeé a ndohó. Ta najánaaha i ndohó nu táhyí ñayivi ta jári ini vehe ndó. 21 Ta najánaaha i nuú na Israel xihín nuú na tóho ña ndítahan nu ná ndicó coo ini na ta jándacoo na cuachi cája na. Ta nacachi i xihín ná ña ndítahan candeé ini na Jesucristo, xitoho í. 22 Ta viti cūhun i chí űuu Jerusalén jáchi cūni ínima yíi Ndióxi ña ná cūhun i cán ta co xíni ndía cuu ndoho i űuu cán. 23 Ña xíni ndusa i quea ña nacaxi tuhun ínima yíi Ndióxi xihín i ña ndá űuu nacuu nuú cūhun i ña jivi i chicaan ñayivi yehe vecaa á jivi i caja xíxi na xihín i. 24 Joo ni in ña yóho co cája toho a nuú i. Ta vatí ná cahní na yehe co yíhví toho i. Jáchi ña cūni mí i quea cajii íni i jáxinu coo i chuun nasahan Jesucristo nuú i caja i. Ta ña yóho cúu á cáxi tuhun i nuú ñayivi tuhun vaha saha mé á ta saha ndá quiahva quíhvi ini a ñayivi.

25 'Sa naxica nuu i tañu ndó ta nacahan i xihín ndó ña vaxi quiví cacomí Ndióxi cuéntá sahá ñayivi. Ta viti xíni vaha i ña ni in ndó a cūni ga ndó yehe. 26 Sahá ña cán quea cáxi tuhun i xihín ndó quiví víti ña co ndójo ga i cuachi saha ndo tá ná jándacoo ndó íchi cuéntá Jesús. 27 Jáchi sa nacaxi tuhun i nu

ndō tóco ndihi ña sácú ini Ndióxi caja ta coó nachijehé tuhun toho i sahá nu ndō. <sup>28</sup> Sahá ña cán quea ndítahan candaa vaha ndó mé va ndó ta candaa vaha ndó tóco ndihi na cúu cuéntá Jesús ná cuahnu chága na xihín tuhun Ndióxi. Jáchí mé ínima yii Ndióxi nasacu a ndohó ña ná cacomí ndō cuéntá sahá na cúu cuéntá mé á jáchí naxita nii mé á sahá ndihi na tá naxihí a ndica crúxu. <sup>29</sup> Cáhan i ña yóho xihín ndō jáchí sa cándaa vaha ini i ña tá sa ná quee yehe cūhun i já quixi java ñayivi ta cacu ini na jándihi na sahá na cúu cuéntá Jesús. Ta tá quiahva cája ndivahyí jándihi rí sahá ndicachi quiahva já cacúni na jándihi na sahá na cúu cuéntá Jesús. <sup>30</sup> Ta janda mé tañu mé ndó jan va cana java na ta jánaħa na ña tuhún nuú ñayivi. Ta nducú na ndiquehe na na sa cúu cuéntá Jesús cūhun na jatá na cán. <sup>31</sup> Ña cán quea cuéntá vaha coo ndó ná a jándahvi na ndohó. Xíní ñuhú ndicūhun ini ndó ña tixi uní cuia coó najándacoo i caħan i xihín ndó ndaa quea ndítahan nu ndó caja ndó. Ta ñuú ta ndiví naħan i xihín ndó sahá ña yóho ta chí anda nasacu u saħa ndō ña ná caja ndó ña cúní Ndióxi.

<sup>32</sup> Viti jándacoo i ndohó, ñani i, ndahá Ndióxi jáchí cáchí tuhun mé á ña quihvi ini a tóco ndihi ñayivi. Ín ndée Ndióxi caja ndacú a ndohó já ná cuu coo ndó

xihín tóco ndihi na naħaxi mé á caja ñamaní xihín. <sup>33</sup> Ta xíní ñuhú ndicūhun ini ndó ña coó nandiava ini i quehe e jiuħún á jáhma vaha cómi java ga ñayivi. <sup>34</sup> Ña naħaja i quea naħaja chúun i xihín ndahá i já ná a ndímaní ñaha catacu u ta já ná cuu catacu na xíca xihín i. <sup>35</sup> Ta ní tiempo najánaħa i nu ndō ña quiahva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó na ndímaní ñaha nuu. Ndítahan ndicūhun ini ndó tuhun naħachi Jesucristo tá naħachi a: “Cájí chága ini na jása ñaha a juú ga na ñéhe á”, naħachi Pablo xihín na sacuaħa veñuhu ñuu Efeso cán.

<sup>36</sup> Tá nandihí naħan Pablo já naħaxítí da já naħasáhá xíca tahví da nu Ndióxi xihín ndihí na cúu cuéntá Jesús cán. <sup>37</sup> Ta tóco ndihi na cán nasacu na xihín dá ta naħnumí na da ta já naħatátí yúħu ná sajóho da ña ndíndaŷí na da. <sup>38</sup> Tóco ndihi na naħacuéħa ini na saħa Pablo jáchí naħachi da xihín ná ña a cúní ga na da. Tá nandihí já ndáca táhan ndihí na naħan na xihín dá janda nuú naħdaa da barco cán.

## 21

*Cuħan Pablo chí ñuu Jerusalén*

<sup>1</sup> Tá nandihí nandíndaŷí nde na cúu cuéntá Jesús cán já naħdaa nde barco naħquee nde cuħan ndacú nde in ñuu naní Cos. Ta inga quiví itaan



já naquee tucu nde cuaḥan nde chí inga ñuu naní Rodas. Ta já naquee nde cuaḥan nde chí ñuu naní Pátara. <sup>2</sup> Ta mé cán nandique táhan nde xihín in barco, dó cuḥun chí estado Fenicia ta chí nandaa nde dó cuaḥan nde. <sup>3</sup> Ta nani cásahan nde ini dó já naxini nde isla Chipre xoo íti nde. Joo nayaha saa va nde janda quiahva naxinu coo nde ñuu Tiro ndacaan estado Siria jáchi mé cán ndítahan nu ná jánuu na ñaha ndójo dó. <sup>4</sup> Mé ñuu Tiro cán nanditahan nde na cúu cuéntá Jesús ta naçandoo too nde xihín ná tixi usa quivi. Ta najácahan ínimá yii Ndióxi na cán ña ná caxi tuhun na xihín Pablo ña ná a cúhun da ñuu Jerusalén. <sup>5</sup> Joo tá sa nayaha usa quivi já naquee nde cuaḥan nde chí ñuu Jerusalén. Ta naqueta tóco ndihi na cúu cuéntá Jesús cán xihín ñájíhí na xihín jahyi válí na já ndáca táhan na xihín nde cuaḥan nde anda yuhú ñuu cán. Ta yatí yuhú tañuhú cán naçaxití ndihi nde naxica tahví nde nu Ndióxi. <sup>6</sup> Ta tá nandindayí táhan nde já nandaa nde barco ta na cán naquee na cuanúhu ná vehe na.

<sup>7</sup> Naquee nde mé ñuu Tiro cásahan nde nuú tañuhú janda quiahva naxinu coo nde ñuu Tolemaida. Ta mé cán naçahan Ndióxi nde xihín na cúu cuéntá Jesús ndúu cán. Ta chí naçandoo nde in quivi xihín ná. <sup>8</sup> Ta inga quiví itaan já naquee nde cuaḥan nde janda quiahva naxinu coo nde ñuu Cesarea.

Ta cán naçahan nde vehe in da sáxica nuu cáhan tuhun Ndióxi xihín ñayivi. Mé da yóho naní da Felipe ta naçacuu da in táhan ndíhusa da chindeé na apóstol veñuhu ñuu Jerusalén. Ta chí naçandoo too nde vehe da cán. <sup>9</sup> Ta naçahjin comí jahyi jíhí da, na tacú. Ta tiahva ndícomi ná jáyaha na tuhun cáhan Ndióxi nuú ñayivi. <sup>10</sup> Tá sa naçaja chá quivi ndúu nde vehe da cán já naxinu coo in profeta, da naquixi estado Judea ta naní da Agabo. <sup>11</sup> Mé da yóho naçaa da coto nihni da ndehe nu ndúu nde cán. Ta nani íin da xihín nde cán já nañiin da cinturón ñaha Pablo. Já naçató da ndáha dá xihín saha dá xihín mé cinturón ta já naçachi da já:

—Cáchi ínimá yii Ndióxi ña tá quiahva naçaja i naçató i mí i quiahva já cató na Israel da xihín ñaha cinturón yóho. Ta já ndiquiahva na da ndahá na tóho —naçachi Agabo cán xihín nde.

<sup>12</sup> Tá naxini joho nde ña naçachi Agabo yóho já naçasáhá nde cáhan ndahví nde xihín Pablo ña ná a cúhun da ñuu Jerusalén. Ta jári na cúu cuéntá Jesús ndúu ñuu Cesarea cán cáhan ndahví na xihín dá ña ná a cúhun da. <sup>13</sup> Joo nanducú ñehe Pablo tuhun nuú nde já naçachi da já:

—Ndá cuéntá quea sácu cóhó ndo ta cája ndó ña cándifí ini i. Candehé ndo ná cahan i xihín ndo. Coó caja toho a ná cató na yehe jáchi íin tiahva

ī ndiquiahva ī mí ī quiví ī saha Jesús, xitoho í mé űnuu Jerusalén cán —naçachi da.

14 Coó naçuu caja nde cava nde jini dá ña ná a cuhun da. Chí coó naçahan chága nde sahá ña yóho xihin dá ta naçachi nde:

—Ná coo tá quiahva cuni Ndióxi va.

15 Tá nandihí já naçaja tiahvā nde ñaha nde ta já naçuee nde cuahan nde űnuu Jerusalén. 16 Ta ndáca táhan java ná cúu cuéntá Jesús űnuu Cesarea cán cuahan na xihín nde. Ta tañu ná cán ndácaan in da naní Mnasón, da naquixi isla Chipre. Ta anda sanahá ndíco da íchi cuéntá Jesús. Ta sa mé vehe da yóho sácú ini nde canduu too nde űnuu Jerusalén cán.

*Xíto nihni Pablo da naní Jacobo*

17 Tá naixinu coo nde űnuu Jerusalén já cávatá ná cúu cuéntá Jesús cán nandiquehe na ndehe. 18 Ta inga quiví itaan já ndáca Pablo ndehe nasahan nde coto nihni nde Jacobo. Ta tá naixinu coo nde cán já naixini nde ña nataca tóco ndihí na sacuaħa nuú ná cúu cuéntá Jesús cán. 19 Ta naçahan Ndióxi Pablo xihin ná já naçasáhā ndícani da nu ná tá in tá in ña náhnu nasahan Ndióxi ñamaní nu dá caja da tañu na tóho, na coó naquixi chichi Israel. 20 Tá naixini joho na cán ña yóho já naçaja cáhnu na Ndióxi. Ta tá nandihí já naçasáhā cáchí ná já xihin Pablo:

—Candehé, ñani ī. Sa xini vahún ña cuahá ndivaha táhan ná naquixi chichi Israel sa ndíco ná íchi cuéntá Jesús viti. Ta tóco ndihí na cáchí ná ña ndítahan caja na ña sáhdá ley Moisés. 21 Joo nañeħe ná tuhun ña xica nuún jánahún nuú ná Israel, ná ndúu űnuu tóho ña co xini ñuhú ġa caja na ña sáhdá ley Moisés ta ni marca cán co xini ñuhú chicaan ġa ná yiquí cuñu jahyi na. Ta jánahún ná ña co ndítahan caja na costumbre najándacoo tásáhnu jícó yo nu yo. 22 Ta co xini nde ndía caja nde viti jáchi nditútú ná ndúu Jerusalén yóho tá ná candaa ini na ña naçasaun yóho. 23 Sahá ña cán quéa cája nde cuéntá ña vaha chága ná cajún ña cáchí nde yóho: Cañehún comí taa ndúu tañu nde yóho já ná cuhun na xuhun. Jáchi sa naixinu coo quiví caja ndícomí da yóho ña nasahan da tuhun da nu Ndióxi caja da. 24 Ná cuhún xihin dá já ná ndaja viún mún xihin dá tá quiahva sáhdá ley Moisés ta já ná chahvún nuú jatá jini dá. Ta xihín ña yóho cuni ná Israel ña a juú ña ndaa cúu tóco ndihí tuhun caħan ihvi ná saħun. Ta xihín ña yóho cuni na ña cája tá cajún ña sáhdá ley Moisés. 25 Ta sahá ná tóho, ná cúu cuéntá Jesús, sa naçahyi nde in carta cuahan nu ná ña ná a jándihí ná mé ná caja na ley Moisés. Joo naçachi nde xihin ná ña ná a cáxi ná cuñu quiti, rí najoco ná nuú tinñu yúu. Ta ná a cáxi ná ni ta

ni ná a cúxu na cuñu quíti, rí naşahnú. Ta ná a cóo na xihín ɬaa á ñáha, na cō cúu yí ná á ñájíhi na. Ña yóho cúu tuhun naçahyí nde nu carta cuahān nuú na tóho — naçachi na saçuaha cán xihín Pablo.

<sup>26</sup> Anda já naquehe Pablo ndícomí dataa cán ndáca da cuahān xihín dá. Ta inga quiví itaan já nandaja vii da mé dá nu Ndióxi ta nandivií ndícomí da cán viti. Ta tá nandihí já naquihvi da veñuhu ña çaxi tuhun da xihín ná ndá quiví xinu cō ña ndivií na já ná cuu jōcō in in da cán ñaha nu Ndióxi.

*Tiin na Pablo veñuhu cáhnu ñuu Jerusalén cuahān da vecaa*

<sup>27</sup> Tá ja chá xinu cō quiví usa já naxinu cō java da Israel, da naquixi chí estado cuénta Asia. Ta tá naxini na cán ndácaān Pablo ini veñuhu cáhnu cán já najāndivaa na ñayivi já ná ndicuīta na caja xíxi na xihín dá. <sup>28</sup> Ta naçasáhá cáyuhú na nuú ñayivi já cáchí na já xihín ná:

—Candehé ndó, na Israel. Caja ndó ñamaní chindeé ndó ndehē xihín da yóho jáchi níi cúu nu xíca da yóho cáhan núu da sahá ñayivi Israel ta jánahā da ñayivi ña cō ndítahan nu ná candúsa na ley Moisés ta ni cō ndítahan nu ná caja cáhnu na veñuhu cáhnu ndácaān Jerusalén yóho. Ta viti cája núu chága da jáchi janda java da tóho, da ñuu Grecia najáquihvi da veñuhu í ta jáyuxu da veñuhu yíi yóho xihín da tóho jan —cáchí na.

<sup>29</sup> Tóco ndihí ña yóho naçachi ɬaa Israel naquixi Asia cán xihín ñayivi jáchi naçahán da ña najáquihvi Pablo cán da naní Trófimo, da tóho ñuu Efeso ini veñuhu joo a juú a já. Naçahán na já jáchi naxini na ndáca táhan Trófimo xihín Pablo xíca nuu da ñuu Jerusalén cán.

<sup>30</sup> Xihín ña naçachi da naquixi Asia yóho nandivaa tóco ndihí ñayivi ñuu Jerusalén já xínu na naxinu cōo na ñatiin na Pablo. Já ñúhu na da ñatavá na da jatá veñuhu cán ta ivi laá naçicaji na yéhé veñuhu cán. <sup>31</sup> Chí ndúcú na cahní na da joo da cúu jefe soldado cán nañehē dá tuhun ña nandivaa ndihí ñayivi ñuu Jerusalén cán. <sup>32</sup> Anda já najátaca da cúu jefe soldado xihín java ga da náhnu já xínu da naxinu cōo da nu ndivaa ñayivi cán. Tá naxini ñayivi cán vaxi da cúu jefe soldado cán xihín java soldado já najáyaa ñahá na chí cō cáni ga na Pablo. <sup>33</sup> Anda já naçayati da cúu jefe soldado cán nu Pablo já ñatiin da da cuhun da vecaa. Ta naşahnda da chuun ña ná cató na da xihín ivi cadena. Tá nandihí já naçasáhá ndáca tuhún da ñayivi ña ndá da cúu da yóho ta ndía naçaja da. <sup>34</sup> Joo sa jíin sa jíin tuhun cáyuhú in in ñayivi cán. Sahá ña cán quéa cōo naçuu candaā ini da cúu jefe soldado cán ndá cuachi quéa jácojo na jata Pablo jáchi a juú quiahva ndivaa na cán ndúu na. Sahá

ñā cān quēa ñasahnda mé jefe soldado cān chuun ñā ná cañehe na Pablo vehe nū ndúu soldado. <sup>35</sup> Ta tá ñaxinu cōo na cān ñacahán ñā ndaa na cuañi vehe soldado cān xihín Pablo joo cōo ñacuu ndaa na jáchi chí cándihi táhan ñayivi cúni ñā caní na Pablo. Sahá ñā cān quēa ñasajocó soldado cān Pablo já ñandaa na cuañi vehe soldado cān xihín dá. <sup>36</sup> Ta tóco ndihi ñā cān cáyuhú cóhó ñā ndícaa na jatā soldado já cáchí ñā já:

—Cahní ndó ñā. Ná quivi da —cáyuhú ñā.

*Ndíquehe Pablo saha mé dá nuú ñayivi cān*

<sup>37</sup> Ta tá sa ndúcú ñā jáquihvi na Pablo ini vehe soldado cān já ñacachi Pablo já xihín ñā cūú jefe soldado cān:

—Á quiahva ndó ñāmaní nuú i ná cāhan i ivi joho tūhun xihín ñayivi yóho.

Anda já ñanducú ñehe ñā cūú jefe soldado cān tūhun nū Pablo já ñacachi da já:

—Á tiāhvún cahún tūhun griego, dá já. <sup>38</sup> Á a juú toho yóhó cūú ñā ñaquixi nación Egipto viti chá va, ñā ñajácahan ñayivi ná ndicuíta na caní táhan na xihín gobierno ta ñasandaca da comi mil ñā sáhní ndii ñasahan ñā chí yucú íchí nuú cōo ñayivi. Á a juú toho yóhó cūú mé ñā ñācachi ñā cūú jefe soldado cān xihín Pablo.

<sup>39</sup> Anda já ñanducú ñehe Pablo tūhun nū dá já ñacachi da já:

—Jiin va cūú yehe jáchi cūú ñā in ñā ñaquixi chíchi Israel ta ñacacu ñā ñūu Tarso, in ñūu cáhnu ndácaan estado Cilicia. Ta viti á cuu quiahva loho ndó ñāmaní nuú i ná cāhan i ivi tūhun xihín ñayivi yóho —ñacachi Pablo xihín ñā cūú jefe soldado cān.

<sup>40</sup> Anda já ñasahan ñā cān ñāmaní nū Pablo ñā ná cāhan ñā xihín ñayivi. Anda já ñandaca ndichi Pablo nuú cuañi vehe cān já ñandiñehe ñā ndáha dá ñā ná já ná catáji yúhu ná. Ta tá sa ñacatáji yúhu ná ñā ñacasáhá cáhan ñā tūhun hebreo xihín ná.

## 22

<sup>1</sup> Já ñacasáhá Pablo cáchí ñā ñā xihín ná:

—Cuni joho ndó ñā cáhan i xihín ndóhó, ñā sacuahā xihín ñāni i jáchi cúni ndiquehe e sahá i viti —ñacachi Pablo xihín ná.

<sup>2</sup> Tá ñaxini joho ñā cān ñā cáhan Pablo tūhun hebreo, mé tūhun cáhan mé ná ñā ñacatáji chága yúhu ná. Anda já ñacachi Pablo já xihín ná:

<sup>3</sup> —Yehe cūú ñā ñā ñaquixi chíchi Israel. Ta ñacacu ñā ñūu Tarso ndácaan estado Cilicia. Joo ñasahnu ñā ñūu Jerusalén yóho ta mé yóho ñā ñajácuaha vi xihín in ñā ñāní Gamaliel. Ta tá quiahva sáhdá ley Moisés, ñā ñasacu vaña tásáhnū jícó yo quiahva ñā ñandihi ini i cája i. Ní tiempo ñandihi ini i cája chúun i cuéntá Ndióxi xihín ndinuhu ini i tá quiahva cája mé ndó anda quivi viti. <sup>4</sup> Naxica nuu i

cája xíxi i xihín nā ndíco íchi cuéntá Jesús jandá quiahva sáhní i nā. Ta cuahá taa, ñáha viti naxica nuu i jataca i nā ña ná cuhun nā vecaa. <sup>5</sup> Ta xíni vaha dá cúu sacuahá nuu jutú xihín ndihi nā sacuahá veñuhu ña cáhan i ña ndaa xihín ndo. Jáchí mé nā yóho cúu nā nacahyí tutu nasahan nā nuú i já ná ndiquiahva i ña nuú ñaní, nā naquixi chichi Israel ndúu ñuu Damasco cán. Ta nasahan i cán ndínducú u nā cúu cuéntá Jesús ña cañehe e nā quixi i ñuu Jerusalén yóho caja xíxi nde xihín ná.

*Ndícani Pablo ndaja nacuu nandiquehe da íchi cuéntá Jesús*

*(Hch. 9:1-19; 26:12-18)*

<sup>6</sup> Joo nani xíca i íchi cuahan i tátuhun çaxivi cáa tá sa yati xinu çoo i ñuu Damasco cán já in cuiti nandiyehé ndaa nu ín i ta mé a yóho naquixi a indiví. <sup>7</sup> Chí nandicava i nu ñúhu ta já naxini johó i in a cáhan xihín i já nacachi a já: “Saulo, Saulo ndá cuéntá quéa ndícuítún cája xísún xihín i”, nacachi a xihín i. <sup>8</sup> Andá já nacasáhá ndáca tuhún i já cáchí i já: “Ndá nā cúu ndóhó ta ndaja naní ndo”, nacachi i xihín á. Andá já nanducú ñehe a tuhun nuú i já cáchí a já: “Yehe cúu Jesús, dá ñuu Nazaret ta xihín yehe ndícuítún cája xísún viti”, nacachi a cán xihín i. <sup>9</sup> Ta nā cuahan xihín i cán nayihví nā tá naxini na ña nandiyehé nu ín i cán. Joo çoo naxini johó na ña cáhan xihín i cán. <sup>10</sup> Andá já nacachi i já xihín

Jesús: “Cáhan ndó xihín i, xitoho i ndía ndítahan caja i.” Andá jáví nacachi a já xihín i: “Candichi ta cuahán ñuu Damasco nu cáhún cuhun jan. Ta ñuu jan ndicani in da nuun ndía ndítahan cajún”, nacachi Jesús xihín i. <sup>11</sup> Ta chí nacuaá nuú i nacaja ña nandiyihvi cán. Sahá ña cán quéa jandá natiin ndaa nā ndáca táhan i cán yehe cuahan nde jandá quiahva naxinu çoo nde ñuu Damasco cán.

<sup>12</sup> Ta mé cán nasahin in dá naní Ananías, dá cája ña sáhdá ley Moisés xihín ndinuhu ini da. Ta tóco ndihi nā Israel ndúu Damasco cán cáhan nā saha dá ña cúu dá taa vaha. <sup>13</sup> Ta mé Ananías yóho nasaa dá naxito nihni da yehe. Já nacasáhá cáchí dá já xihín i: “Saulo, ñani i candehé tucu viti.” Tá nacachi da já chí ivi laá nanuna nuú i já naxini i dá. <sup>14</sup> Andá já nacachi da cán já xihín i: “Mé Ndióxi, ña nacaja cáhnu tásáhnu jícó yo, mé a cán quéa naxaxi a yohó já ná candaa inún ndá quéa sácú ini mé á caja xuhun. Ta naxaxi a yohó já ná cunún Jesús, mé a cája ndinuhu ña ndaa. Ta naxaxi a yohó já ná cuni johún nu cáhan Jesús. <sup>15</sup> Já quéa cuhún cahún saha mé á nu tóco ndihi ñayivi. Já ná ndicanún nu ná sahá ña naxinún xihín ña naxini johún. <sup>16</sup> A cándati chágun viti. Cuándacoo. Cándéé inún Jesucristo viti chí cuahán candúta já ná ndoo cuachún, caja Ndióxi”, nacachi Ananías

xihín i.

*Ndicani Pablo ña nachindahá Ndióxi da cahan da tuhun vaha saha Jesús nuu na tóho*

17 "Tá nandihí já nandico coo i ñuu Jerusalén ta nasahan i veñuhu cáhnu cán cacá tahví i nu Ndióxi. Ta nani xíca tahví i cán já naquixi tátuhun in sani nuú i vatí ndíta i. 18 Ta naxini i Jesús, xitoho i já nacachi a já xihín i: "Camún cuáqueún ñuu Jerusalén yóho jáchi a cándusa toho na yóho tuhun vaha cahun sahá i", nacachi Jesús xihín i. 19 Anda já nanducú ñehe e tuhun nu Jesús já cáchi i já xihín á: "Candehé ndo, xitoho i. Sa xini vaha tóco ndihi ñayivi ña naxica nuu i ndijáa veñuhu tiin i na cándeé ini ndohó ta já nacani i na ta nataán i na vecaa. 20 Ta sa xini na ña tá nasahní na Esteban, mé da naxica nuu cahan tuhun vaha saha mé ndó, in nasacuu u xihín na nasahní ñahá cán. Jáchi táhán ini i cándichi i ndáa i jahmá ñayivi cán nani sáhní na Esteban", nacachi i xihín Jesús. 21 Anda já nacachi Jesús já xihín i: "Cuáqueún cuhun jáchi chindahá xíca i yohó cuhún cahún sahá i nuú ñayivi tóho, na coo naquixi chichi Israel", nacachi Jesús xihín i —nacachi Pablo xihín na cán.

*Cahan chaga Pablo xihín mé da cúu jefe nu ndíhi soldado*

22 Nasanduu táji na Israel cán nani cahan Pablo xihín ná. Joo tá nacahan da sahá na

tóho cán já nacasáhá cáyuhú na já cáchi na já:

—Cahní ndó da jan. Ná quivi da. Co ndítahan ga nu dá coo da ñuyiví yóho —cáchi na cán cáyuhú na.

23 Ta sahá ña ndúcú ndeé na cáyuhú na ta jáni na jáhma ná nu táchi ta janda ña yácá jácana nihni na nu táchi. 24 Sahá ña cán quéa nasahnda da cúu jefe soldado cán chuun ña ná jáquihvi na Pablo cán ini vehe soldado. Ta tá nandihvi da já nasahnda da chuun ña ná jácaxáhan na da xihín churú níj ná nahma da ndia nacaja da ta ndá saha quéa ndícuíta ñayivi cán xihín dá. 25 Joo tá sa nacató na Pablo ta ndúcú na jácaxáhan na da já nacachi Pablo já xihín in soldado cán:

—Ta viti cahan ndó xihín i á núná nu ndo jácaxáhan ndó in da cúu ta romano tá cámaní yíi caja víi ndó saha dá tá quiahva sáhdá ley romano jáchi yehe cúu u da romano —nacachi Pablo xihín soldado cán.

26 Tá naxini joho da ña yóho chí ivi laá nasahan da cáxi tuhun da nu da cúu jefe soldado cán já cáchi da já xihín dá:

—Cuénta vaha coo ndó ta coto a cája xíxi ndó xihín da jan jáchi cúu dá ta romano —nacachi in soldado cán.

27 Anda já nacayatí da cúu jefe soldado cán nu Pablo já nacasáhá ndáca tuhún ñahá da já cáchi da já:

—Á ndaa cúun taa romano —cáchi dā.

—Ajan, taa romano cúu u —nācachi Pablo xihin dá.

<sup>28</sup> Andā já nācasáhá cáchi mé dā cúu jefe soldado cán já xihin Pablo:

—Yehe nāchahvi i cuahá ndivaha jjuhún já nācuu nānduu u in taa romano —nācachi dā cán xihin Pablo.

Ta já cáchi Pablo já xihin dá:

—Joo yehe cúu u taa romano jáchi já nācacu u —nācachi Pablo.

<sup>29</sup> Tá naxini johō nā cúni jácaxáhan Pablo cán ña yóho chí nayihví nā já nācasáhá xíca jātá nā cáxoo na nu dá. Ta janda mé dā cúu jefe soldado cán nayihví dā jáchi sa natiin na dā vatí cúu dá taa romano.

*Ndiq̄ehe Pablo saha mé dá nuú nā sacuaḥa Israel*

<sup>30</sup> Ta inga quivi itaan natavá dā cúu jefe soldado cán cadena nāsandico ndáha Pablo. Ta sahá ña cúni dā cán candaa ini da ndá cuachi quéa jácojo na jata Pablo sahá ña cán quéa najátaca da nā sacuaḥa nuú jutū xihín nā sacuaḥa Israel. Andā já ñehe da Pablo já nāsacu da dā nuú nā cán.

## 23

<sup>1</sup> Andā já nāsandehé Pablo nu tóco ndihi nā sacuaḥa nuú nā Israel cán já nācasáhá cáchi dā já xihín ná:

—Candehé ndo, ñani i. Janda jihna ta janda quivi víti cája i ña cúni Ndióxi ta xini mé á ndaja ndácaan jiní i —nācachi Pablo.

<sup>2</sup> Joo dā cúu sacuaḥa nuú jutū naní Ananías cán nāsahnda da chuun nuú nā ndíta yati xihín Pablo cán ña ná cani na jahnda yuhū dá.

<sup>3</sup> Andā já nācachi Pablo xihín Ananías cán:

—Tā quiahva nācāni na jahnda yuhú i quiahva já cani Ndióxi yohó, dā cō cúu tá quiahva ndáa da. Íun jan ndaja ndichún yehe jáchi jácojo na cuachi jātá i ña cō sácú vaha i ley. Joo yóho nāndava ndojún ña sáhdá ley jáchi nāsahndún chuun ña ná cani na yehe —nācachi Pablo xihín Ananías cán.

<sup>4</sup> Andā já nācasáhá nā ndúu cán cáhan nā xihín Pablo já cáchi nā já xihín dá:

—Cuéntá coún jáchi cánahún xihín dā cúu jutū sacuaḥa chága nu ndíhi jutū cuéntá Ndióxi —nācachi na xihín Pablo.

<sup>5</sup> Andā já nācachi Pablo já:

—Cáhnū coo ini ndó, ñani i jáchi cō xini toho i ña cúu dā jan jutū sacuaḥa chága nu ndíhi jutū cuéntá Ndióxi. Mé tuhun Ndióxi sáhdá chuun já cáchi a já: “A cánahún xihín dā cómi chuun sahá ñuu ndó” —nācachi Pablo.

<sup>6</sup> Tá nāndihi já nāndicuni Pablo ña ndúu java nā sādúceo ta ndúu ri java nā fariseo mé cán. Sahá ña cán quéa nācahan cóho Pablo já nācachi dā já:

—Candehé ndo, ñani i. Yehe cúu u in dā fariseo ta in fariseo nāsacuu ri tátá i. Ta viti cája vii nā yóho sahá i sahá ña cándúsa i ña vaxi

quíví nditacu tucu ndii —  
naçachi Pablo.

7 Tá naçachi Pablo já ivi laá  
nandicuïta na fariseo xihín  
na saduceo ndítuhún xihín  
táhan na já naçahnda java  
táhan na. 8 Jáchi na saduceo  
cán co cándúsa na ña vaxi  
quíví nditacu tucu ndii. Ta  
ni co cándúsa na ña ndúu táto  
Ndióxi. Ta ni co cándúsa na ña  
iin ínimá ñayivi. Joo na fariseo  
cándúsa va na tóco ndihi ña  
yóho. 9 Tóco ndihi na cán  
cáyuhú na ndúu na. Sahá ña  
cán queá nandaca ndichi java  
na jánaħa ley Moisés, mé na  
cuahañ xoo na fariseo cán.  
Já naçasáhá cáchi na já xihín  
tóco ndihi ñayivi cán:

—Coó toho cuachi ná caja  
da naní Pablo yóho. Jáchi ndá  
ínimá yii queá naçahan xihín  
da yóho á tá coó ta ndá táto  
Ndióxi queá naçahan xihín da  
yóho. Sahá ña cán queá tá  
ná çahan ihvi yó xihín da  
yóho cúu á tátuhun cáni táhan  
í xihín Ndióxi —naçachi na  
jánaħa ley Moisés xihín ná.

10 A juú quiahva naçasáhá  
ndívaá ñayivi cán saħá ña cán  
queá naçasáhá yíhví da cúu  
jefe soldado cán ña tiaħva  
náa tiin na Pablo ta jácuachi  
na da. Sahá ña cán queá  
naçahnda da chuun ña ná  
quixi soldado tavá da Pablo  
tañu ñayivi cuahañ cán. Ta já  
ná cañehe tucu na da cuħun  
da vehe soldado cán.

11 Ta ñuú inga quíví itaħa já  
naçanáħa nuu Jesús, xitoho í  
nu Pablo ta naçahan xihín dá  
já naçachi a já:

—A ndícani inún, Pablo  
jáchi tá quiahva naçahún  
sahá í nuú ñayivi ñuu  
Jerusalén yóho quiahva já  
caħún saħá í nuú ñayivi ndúu  
ñuu Roma —naçachi Jesús  
xihín dá.

*Sácú ini na Israel cañí na  
Pablo*

12 Ta inga quíví itaħa já  
najándique táhan java na  
Israel tuħun na ña cañí na  
Pablo. Ta naçachi na a cúxu  
na ta ni ticuúí a cóho na janda  
quiahva ná cañí na Pablo.  
Ta naçachi xihín táhan na ña  
cuħun cháhan jata ndá da  
naçixi á naçixi ticuúí nani  
tácú Pablo. 13 Ta yáħa ga nuú  
ivi jico ta çuú da najándique  
táhan tuħun caja ña yóho.  
14 Tá nandihí já naçee na  
naçahan na çahan na xihín  
da saçuaha nuú jutú cán xihín  
na saçuaha nuú na Israel cán  
já naçachi na já xihín ná:

—Tóco ndihi nde najándique  
táhan nde tuħun nde cañí  
nde Pablo. Ta naçicaħa nde  
cháhan jata ndá da ná çuxu  
nani tácú Pablo. 15 Sahá ña  
cán queá caja ndó ñamaní  
jándique táhan ndó tuħun ndó  
xihín java ga na saçuaha ĵan  
já ná çahan ndó xihín da cúu  
jefe soldado já ná cañehe tucu  
da Pablo quixi da nu ndo. Ta  
çahan loho ndó xihín dá ña  
cúni ndó caja vii cuéé chága  
ndó saħá ña naçaja Pablo. Já  
va cachi ndó xihín da cúu jefe  
soldado cán ta ndeħe canduu  
tiaħva nde cañí nde da tá  
ná quixi da íchi —naçachi na  
xihín na saçuahañ cán.



16 Joo in t̄a loho, d̄a cúu jaxi Pablo nañehe dá t̄uhun ña sácú ini na cahní na Pablo sahá ña cán queá xínu da nasahan d̄a cáxi t̄uhun da nu Pablo vehe soldado cán. 17 Tá n̄andihí n̄andicani t̄a loho cán ña yóho nu Pablo já naçana da in táhan d̄a cúu soldado cán já naçachi da já xihín dá:

—Cajún ñamaní candacún d̄a loho yóho ná cuhun d̄a nuú d̄a cúu jefe nu soldado. Jáchí in t̄uhun cúni d̄a yóho cahan d̄a xihín d̄a cán —naçachi Pablo xihín dá.

18 Anda já ndáca soldado cán d̄a cúu jaxi Pablo nasahan d̄a nuú d̄a cúu jefe soldado cán já naçachi da já xihín dá:

—Da naní Pablo ndácaan vehe soldado naxica d̄a ñamaní nuú i ña ná candaca i d̄a loho yóho quixi i ñehé e d̄a jáchí in t̄uhun cúni d̄a cahan d̄a xihín ndo —naçachi da.

19 Anda já natiin jefe soldado cán ndahá t̄a loho cán já natavá xóo da d̄a já naçasahá ndáca t̄uhun ñahá d̄a já naçachi da já xihín dá:

—Ndía cúnun cahún xihín i —naçachi da.

20 Anda já naçasahá t̄a loho cán cáxi t̄uhun da já naçachi da já:

—Najándique táhan na Israel t̄uhun na ña caça na ñamaní nu mé ndó ña ná cañehe tucu ndó Pablo nuú na sacuaña nuú na Israel cán ña cavií vaha chága saha dá.

21 Joo a cándusa ndó caja ndó ña cúni na jáchí yáha chága nuú ivi jico t̄a ndáti jehé

na íchi ña cahní na Pablo. Ta n̄andique táhan t̄uhun na ña a cúxu na ni a cóho na ticuú janda quiahva ná cahní na Pablo. Ta viti ndáti na candehé na á caja ndó ña cúni na —naçachi jaxi Pablo cán xihín d̄a cúu jefe soldado.

22 Ta tá n̄andihí já naçachi d̄a cúu jefe soldado cán xihín dá ña ná a ndicani da nuú ni in ñayivi sahá ña sácú ini na Israel caja na xihín Pablo. Chí naçaque d̄a loho cán cuahan d̄a.

*Chíndahá na Pablo cuahan d̄a nuú gobernador naní Félix*

23 Anda já naçana jefe soldado cán ivi d̄a sáhdá chuun nuú soldado ta nasahnda da chuun nu dá ña ná caja tiaha da ivi ciento soldado táhan d̄a xica sahá xihín uní jico uxu soldado táhan d̄a cándójó cuáyí. Ta natahnda chuun nu dá ña ná caja tiaha da inga ivi ciento táhan d̄a ñéhe lanza já ná candaca na Pablo cuhun d̄a ñuu Cesarea cán. Ta ná quee na cuhun na tátuhun caa in sacuaá. 24 Ta nasahnda da chuun ña ná caja tiaha na cuáyí canúu Pablo cuhun d̄a. Ta nasahnda da chuun ña ná candaa vaha na Pablo já ná cuu xínu coo vaha da nuú d̄a cúu gobernador naní Félix ñuu Cesarea cán. 25 Ta nachindahá d̄a in carta cuahan xihín ná já ná ndiquiahva na ña nuú d̄a cúu gobernador cán ta ña yóho cúu mé t̄uhun naçahyi nu carta cán:

26 “Yehe cúu Claudio Lisias ta chíndahá i carta yóho nu

ndo, tá Felix. Ta nu carta yóho cáhan Ndióxi yehe xihin ndo, da cúu da cáhnu ñuu Cesarea cán. <sup>27</sup> Candehé ndo, tá Felix. Chindahá i da yóho nu ndo jáchi natiin na Israel da ta ndúcú na cahní na da. Joo tá ñacandaá ini i ña cúu dá da romano já ñasahan i xihin java soldado ta ñacandaá nde da ndáha na cán. <sup>28</sup> Ta sahá ña cúní candaá ini i ndá cuachi jácojo na jata dá sahá ña cán queá ñasañehe e da ñasahan i nuú na sacuaña nuú na Israel cán. <sup>29</sup> Já ñacandaá ini i ña jácojo na cuachi jata dá saha ley mé va na. Ta sahá ña coó cuachi ñacaja da nu mí sahá ña cán queá coó ñaxeen nde ña ná cahní na da ta ni janda vecaa co cáni nu dá cuhun da, cáhan i. <sup>30</sup> Joo ñacandaá ini i ña sácú ini na Israel cahní na da sahá ña cán queá chindahá vaha i da nu mé ndó. Ta ñacachi i xihin na xójo ini xihin dá ña ná saa na nu mé ndó cacu na saha dá ndía ndóho na xihin dá. Ña yóho cúu ndihi ña cáhan i xihin ndo, tá Felix. Ndióxi ná coo xihin ndo”, cáhí carta cuahan xihin Pablo.

<sup>31</sup> Ta ñacaja mé soldado cán tá ín natahnda chuun nu dá. Ta já ñéhe ñuu na Pablo ñasahan na janda ñuu Antípatris. <sup>32</sup> Ta inga quiví itaan já ñandicó coo java soldado, da ñasahan sahá cán chí vehe soldado. Joo java da cándójó cuáyí cán cátahan yíi dá xihin Pablo cuahan da. <sup>33</sup> Ta tá ñaxinu coo da ñuu Cesarea já ñandiquiahva da

carta cán nuú da cúu gobernador. Ta ñandiquiahva ri da Pablo nuú da cán. <sup>34</sup> Ta tá sa ñandihí ñacahvi da cúu gobernador carta cán já ñacasáhá ndáca tuhún da Pablo saha ndá ñuu ñaguixi da. Ta tá ñacandaá ini da ña cúu Pablo da ñuu Cilicia <sup>35</sup> já ñacachi da já xihin dá:

—Janda quiahva ná xinu coo na jácojo cuachi jatun anda já caja víi i sahún — ñacachi Felix cán xihin Pablo.

Tá ñandihí já ñasahnda da chuun ña ná candaá vaha na Pablo nani ndácaan da vechúun Herodes cán.

## 24

*Ndíquehe Pablo saha mé dá nuú da cúu gobernador nani Felix cán*

<sup>1</sup> Ta tá sa ñayaha uhun quiví já ñaxinu coo da cúu sacuaña nuú jutú, da nani Ananías cán. Ñaxinu coo da ñuu Cesarea xihin java ga na sacuaña ta ndáca da in da ndíquehe sahá na Israel nani da Tértulo. Tóco ndihí na yóho ñacatóhan na ñasahan na sácú na saha Pablo nuú gobernador cán. <sup>2</sup> Ta tá ñandihí já ñasahan quehe na Pablo já ñaxinu da nuú ndihí na cán. Anda já ñacasáhá Tértulo cán sácú da saha Pablo já ñacachi da já:

—Ndíquiahva nde ndixahvi nu ndó, tá gobernador jáchi sahá ña ndíchí jiní ndó cúu ndáá vaha ndó ndehe. Ta coó tandóhó tañu nde ta tóco ndihí nde ndúu táji nde. <sup>3</sup> Ñayivi ndúu ndijáá ñuu ín

toni ñúhú nā xihín ndo ta ndíquiahva na ndixahvi nu ndo, tá Felix jáchi cāja cuaha ndó ñamaní xihín nde. <sup>4</sup> Ta viti co cúní nde jáquihvi nde ndohó joo caja ndó ñamaní cuni johoho loho ndó ña cúní nde cahan nde xihín ndo yóho. <sup>5</sup> Candehé ndo, tá Felix. Nanditahan nde da naní Pablo yóho xíca nuu da jáquihvi da ñayivi. Ta níí cúú xíca nuu da sáhdá java táhan da ñayivi naquixi chichi Israel. Ta mé Pablo yóho cúú dá jiní nuú in táhdá ñayivi, nā naní nazarenos. <sup>6</sup> Ta jivi mé da yóho nanducú da jáyuxu da veñuhu cáhnu nde ndácaan ñuu Jerusalén cán. Sahá ña cán queá natiin nde da ta nanducú nde caja vií nde saha dá tá quiahva sáhdá ley mé nde caja nde. <sup>7</sup> Joo da cúú jefe soldado, da naní Lisias cán naquihvi da tañu nde ta xihín ña tóyí nacandaa da Pablo ndahá nde. <sup>8</sup> Ta nacachi da xihín nde ña ná quixi nde cahan cuachí nde nu mé ndó saha Pablo. Ta viti, tá Felix cuu ndaça tuhún ndó Pablo jan ta já nahma mé va da nu ndo. Ta xihín ña yóho cuu candaa ini ndó ña ndaa cahan nde sácú nde saha dá nu ndo —nacachi Tértulo cán xihín Felix.

<sup>9</sup> Ta jári nā Israel ndúu cán nacachi na ña jivi ndusa ña ndaa queá. <sup>10</sup> Anda já nandínehe gobernador cán ndáha dá ña ná cahan Pablo. Ta já cáhí Pablo já:

—Cáji ini i ndiquehe e sahá i nu mé ndó, tá Felix jáchi

sa cuahá cuja cāja vií ndó sahá ñayivi Israel. <sup>11</sup> Tá ná ndaca tuhún ndó ñayivi yóho já candaa ini ndó ña sa ín uxu ivi quivi naxinu coo i ñuu Jerusalén caja cáhnu i Ndióxi. <sup>12</sup> Ta ni in túhún toho ñayivi co ndítuhún ihvi yehe xihín. Ta ni in túhún toho ñayivi coo najándinihi i veñuhu cáhnu ndácaan Jerusalén cán. Ta ni nā táca veñuhu válí ta ni nā táca cáyé ñuu Jerusalén cán coo najándinihi i. <sup>13</sup> Ta nā jácojo cuachi jatá i yóho a cúu caja na nahā nā nu mé ndó ña ndaa cahan nā sahá i. <sup>14</sup> Ña cúní ndusa i caxi tuhún i xihín ndihi ndó queá cāja cáhnu i Ndióxi, mé a nacaja cáhnu tásáhnu jícó i tá quiahva najánaħa Jesús caja i. Vatí cáhí nā Israel yóho ña co xíca i íchi ña ndaa. Joo cándúsa i tóco ndihi ley nacahyí Moisés ta cándúsa i ña nacahyí nā profeta sanahá. <sup>15</sup> Ta tá quiahva cándúsa nā yóho quiahva já cándúsa ri yehe va jáchi cándúsa nde ña vaxi quivi nditacu tóco ndihi nā sa naxihí. Coó caja toho á cúú ná nā vaha á nā quini. <sup>16</sup> Sahá ña cán queá xini Ndióxi ña ndijáá ní quivi cāja i ña vaha xihín ndinuhu ini i nu mé á xihín nuú ñayivi.

<sup>17</sup> 'Sa ín chá cuja naxica nuu i java ga ñuu. Anda jávi nandicó coo tucu u ñuu Jerusalén ña quiahva i jiuhún nuú nā Israel ta joco i nu Ndióxi ña ndítahan nuú i joco i nu á. <sup>18</sup> Ta nani cāja i mé ña yóho ndácaan i veñuhu cáhnu

Jerusalén cán já java da Israel, da naquixi chí estado Asia cán naxini da yehe nu ndácaan i ve ñuhu cán. Ta tá nandihí nandaja vii i mí i tá quiahva sáhdá ley cája nde, coó ñayivi cuaha nasanduu cán ta ni in túhún toho na cán coó najándinihi i. <sup>19</sup> Ta na naquixi chí Asia cán, na cán va cúu na ndítahan cacu sahá i nu ndo, tá Felix tá in a ndóho na xihín i. <sup>20</sup> Joo na ndúu yóho coó saha toho na cacu na sahá i nu mé ndó. Á tá coó ná cahan na tá nandínehe ná cuachi i tá nacaja vii na sahá i nuú na sacuaha nuú na Israel cán, dá já. <sup>21</sup> In túhún ña nacaja i tá cája vii na yóho sahá i quea nacayuhú u ta nacachi i: “Cája vii ndó sahá i sahá ña cándusa i ña vaxi quiví nditacu tucu ndii”, ña cán cúu ndihi va nacachi i xihín ná —nacachi Pablo cán xihín da cúu gobernador cán.

<sup>22</sup> Sa xini vaha Felix cán ndaja in ña janaha na cúu cuénta Jesús cán sahá ña cán quea cuni da candati too da caja vii da saha Pablo. Sahá ña cán quea já nacachi da já xihín na Israel cán:

—Candati ndó janda quiahva ná casa da naní Lisias, da cúu jefe soldado ñuu Jerusalén já cuu caja vii i sahá da yóho —nacachi Felix.

<sup>23</sup> Tá nandihí já nasahnda Felix chuun nuú da sáhdá chuun nuú soldado cán ña ná chicaan tucu na Pablo veca. Ta nasahnda da chuun ña ná caja vaha da xihín Pablo ta ná quiahva da ñamaní nuú na

xíca xihín Pablo coto nihni na da ña ná caja ndívi na nu dá.

<sup>24</sup> Tá nayaha chá quivi já nacasa tucu Felix cán xihín Drusila, ñájihí da, ña cúu ña Israel. Nacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuénta Jesús. <sup>25</sup> Ta nandicani Pablo nu ná ña ndítahan nu ná caja na ña ndaa cuití va ta ndítahan nu ná cahnu na nuú ña xíca ini yiquí cuñu na caja. Ta nandicani Pablo nu ná ña vaxi quiví caja vii Ndióxi sahá cuachi ñayivi. Anda já nayihví Felix cán já nacachi da já xihín Pablo:

—Cuáhán viti. Tá núná nuú i já cana tucu u yohó quisun —nacachi Felix xihín Pablo.

<sup>26</sup> Mé Felix yóho ndáti da quiahva Pablo jiuhún nu dá já janí ñahá da. Sahá ña cán quea cuahá ndivaha tañu nacana da da nditúhún da xihín dá. <sup>27</sup> Ta tixi ivi cuia já cuití nacaja da xihín Pablo janda quiahva nandicojo da naní Porcio Festo chuun cacuu da gobernador saá cán. Ta mé Felix cán coó naxeen da janí da Pablo jáchi cuni da candoo vaha da nuú na Israel cán.

## 25

*Ndíquehe Pablo saha mé dá nuú gobernador Festo*

<sup>1</sup> Tá sa nayaha uni quivi nandicojo Festo chuun cúu dá gobernador já naquee da ñuu Cesarea cán nasahan da chí ñuu Jerusalén. <sup>2</sup> Ta tá

naxinu coo da cán nasahan na sacuaha nuú jutú xihín java ga na Israel, na in chága saha cahan cuachi na saha Pablo nu Festo. <sup>3</sup> Ta ñamani cáhnu naxica na nu dá quea ña ná cahnda da chuun ná quixi Pablo chí ñuu Jerusalén yóho. Jáchi mé na cán nasacu ini na tiin na Pablo íchi cahní na da. <sup>4</sup> Joo coo nacandúsa Festo caja da ña cúní na sahá ña cán quea nacachi da xihín ná ña ndáa vaha na Pablo ñuu Cesarea cán. Ta sahá ña sácú ini da cuhun yachi da mé cán <sup>5</sup> sahá ña cán quea nacachi da xihín ná já:

—Ndá na cúu na sacuaha nu ndó jan xíní ñúhú cuhun na ñuu Cesarea xihín i já ná cuu cacu na saha Pablo tá in cuachi nacaja da —nacachi Festo xihín na Israel cán.

<sup>6</sup> Ta nasahin Festo tátuhun una á uxu quivi cuití va ñuu Jerusalén cán já nandicó coo tucu da chí ñuu Cesarea. Ta inga quivi itaan já nasacoo da nu silleta nu sácoo na cája víi sahá ñayivi. Anda já nasahnda da chuun ña ná cana na Pablo quixi da nu dá. <sup>7</sup> Ta tá naxinu coo Pablo nu Festo cán já tóco ndihi na Israel, na naquixi ñuu Jerusalén cán nacava nuu na jata Pablo já nacasáhá jácojo cuaha ná cuachi ndeé jata dá. Joo co ñehe ná ndaja naha na nu Festo cán ña cahan na ña ndaa saha dá. <sup>8</sup> Ta nacasáhá Pablo ndiquehe da saha mé dá já nacachi da já:

—Ni in túhún toho cuachi coo nacaja i xihín ley na Is-

rael ta ni xihín veñuhu cáhnu coo nacaja i cuachi. Ta ni nuú da cómi cuénta sahá ñuu Roma coo nacaja i cuachi —nacachi Pablo xihín tóco ndihi ñayivi ndúu cán.

<sup>9</sup> Ta sahá ña cúní Festo candoo vaha da nuú na Israel sahá ña cán quea nandaca tuhún da Pablo já nacachi da já:

—Á cándúsún cuhún ñuu Jerusalén já ná caja víi i sahun cán —nacachi da xihín Pablo.

<sup>10</sup> Anda já nanducú ñehe Pablo tuhun nu dá já nacachi da já:

—Uhun. Coó saha cúu á cuhun i ñuu Jerusalén jáchi viti ñúhú cándichi i nu mé ndó ta cúu ndó gobernador romano. Ta mé ndó ndítahan nuú caja víi sahá i jáchi sa cándaá cáxí ini ndó ña coo cuachi toho nacaja i xihín na Israel jan. <sup>11</sup> Joo tá nacaja ndusa i cuachi, mé a ndaa co yíhvi toho i quivi i sahá cuachi i. Joo a juú toho ña ndaa cúu tóco ndihi cuachi jíquí jácojo na Israel jan jata i sahá ña cán quea co ndítahan nu ndó ndiquiahva ndó yehe nuú na yóho. Ta viti xíca i ñamani nu ndo ña ná chindahá ndó yehe ná cuhun i nuú emperador ñuu Roma ná caja víi mé dá sahá i —nacachi Pablo xihín Festo cán.

<sup>12</sup> Tá nandihí já nandituhún Festo cán xihín na sacuaha cája chúun nu dá cán ndaja ndítahan coo caja da. Anda já nacachi tucu Festo cán já xihín Pablo:

—Vaha dá já. Nu emperador in ñuu Roma ñacachún cuhun cúnun. Ta cán cuhun cavií sahun —ñacachi Festo xihin Pablo.

*Tá in Pablo nu rey Agripa*

<sup>13</sup> Tá nayaha chá quivi já ñaxinu cõo in rey naní Agripa xihin ñá naní Berenice ñuu Cesarea cán coto nihni na Festo. <sup>14</sup> Ta ñasanduu na chá quivi xihin Festo cán. Ta nani ndúu na cán ñandicani Festo nu rey Agripa ndaja cáa ña ndóho Pablo já ñacachi da já xihin dá:

—Ini vechúun yóho ndácaan in da naní Pablo ta anda tá ñasacuu Felix gobernador já ñatiin na da. <sup>15</sup> Ta tá ñasahan i ñuu Jerusalén já sácú ña sacuaḥa nuú jutú xihin ña sacuaḥa nuú ña Israel saḥa dá ña ná quivi da caja i. <sup>16</sup> Anda já ñanducú ñehe e tuhun nu ná ña cõo sáhan ley ñuu Roma ñamaní ña cahní na ñayivi tá cõo ña sácú saḥa dá ndíta nu táhyí da já ná cuu ndiquehe da saḥa dá nu ná. <sup>17</sup> Sahá ña cán queá tá ñandai cuu ña Israel cán ñuu Cesarea yóho já ñandihí ini i já ñasahan i ñasacõo i inga quiví itaan nu sácõo na caja vii saḥá ñayivi. Já ñasahnda i chuun ña ná cañehe na Pablo quixi da nuú i. <sup>18</sup> Tá ñaxinu cõo ña cán sácú ña saḥa dá cõo ñasacu na cuachi cáhnu saḥa dá tá quiahva cáhan i. <sup>19</sup> Joo cáchí ña ña cõo cuni da candúsa da tá quiahva cándúsa mé ná. Ta sácú ña saḥa dá jáchí xíca da jánaḥa

dá saḥa Jesús, mé a ñaxihí jihna. Joo jánaḥa Pablo ña tácu yii va mé Jesús. <sup>20</sup> Ta saḥá ña cõo cándaḥa ini i ndaja caja i caja vii i saḥá ña yóho saḥá ña cán queá ñandaca tuhún i Pablo ña á cándúsa da cuhun da ñuu Jerusalén caja vii i saḥa dá. <sup>21</sup> Joo ñacachi da xihin i ña cuni da cavií saḥa dá nuú da cúu emperador naní Augusto, da in ñuu Roma cán. Sahá ña cán queá ñasahnda i chuun ña ná candaa vaha na da janda quiahva ná cuu chindahá i da nuú emperador já ná caja vii da cán saḥa dá —ñacachi Festo xihin rey Agripa cán.

<sup>22</sup> Anda já ñacachi rey Agripa cán já xihin Festo:

—Cuni ri yeḥe va cuni joho i ndá quiahva cáhan da naní Pablo ñan —cáchí Agripa.

Anda já ñacachi Festo já xihin dá:

—Itaan já cuni johún nuú cahan da —cáchí Festo.

<sup>23</sup> Ta inga quiví itaan ñaxinu cõo rey Agripa xihin Berenice nu in Festo cán. Ta ndíxi vaha ndivaha na ñandihvi na xihin in yíco da cúu sacuaḥa nu soldado xihin ñataa in saḥa ñuu cán. Ta tá ñasanduu na já ñasahnda Festo chuun ña ná cuhun ña quehe na Pablo. <sup>24</sup> Ta tá ñasaa da nu ná já ñacachi Festo já:

—Mé ndó, rey Agripa xihin ndihí ndó, ña ñataca ndúu xihin nde yóho. Candehé ndó da naní Pablo cándichi yóho. Cuahá ndivaha táhan ña Israel, ña ndúu ñuu Jerusalén

xihín nā ndúu ñuu Cesarea yóho sácú nā saha dá nuú i. Ta a juú quiahva ndúcú ndéé nā cáhan nā ña ndítahan quivi da caja i. <sup>25</sup> Joo yehe cáhán i ña co ndítahan toho nu dá quivi da jáchi coo cuachi cáhnu ná caja da. Ta sahá ña naxica mé dá caví saha dá nuú emperador Augusto iin ñuu Roma cán sahá ña cán queá sácú ini i chindahá i da cuhun da cán caví saha dá. <sup>26</sup> Joo co xíní ndía cahyí i nuú da cúu emperador ñuu Roma sahá cuachi sácú nā saha dá. Sahá ña cán queá nasani ndichi i da nuú ndihi ndó xihín nu mé ndó rey Agripa já ná ndaja ndichi ndó da já ná ñehe íní i ndáa cahyí i nu carta chindahá i nu emperador ñuu Roma cán. <sup>27</sup> Jáchi coo saha cúu á chindahá i da ñuu Roma tá a cuú cahyí i ndá cuachi jácojo na jatá dá —nacachi Festo xihín nā cán.

## 26

*Ndiquehe Pablo saha mé dá nu rey Agripa*

<sup>1</sup> Anda já nacachi rey Agripa cán já xihín Pablo:

—Viti va sahan nde ñamani nuun ndiquehún sahan.

Anda já nandiñehe Pablo ndáha da já nacasáha cáchi da já:

<sup>2</sup> —Cáji íní i ña cuu ndiquehe e saha mí i nu ndó, rey Agripa jáchi a juú quiahva cuahá cuachi jíquí jácojo nā Israel jatá i. <sup>3</sup> Cáji íní i cáhan i nu mé ndó, rey Agripa jáchi cándaá vaha ini ndó ndaja iin costumbre nā Israel. Ta

cándaá ini ndó ndá ñaha queá ndítuhún táhan nde saha. Sahá ña cán queá xica tahví i nu ndó ña ná caja ndó ñamani cáhnu coo ini ndó cuni johó ndó ña cáhan i xihín ndo yóho.

<sup>4</sup> Tóco ndihi nā Israel xíní vaha na ña nacaja i tá nasacuu u da tacú. Ta anda viti xíní nā yehe ta xíní nā ña nacaja i ñuu i xihín ñuu Jerusalén. <sup>5</sup> Ta xíní vaha na ña janda yúta i nasacuu u ta fariseo ta chí cuu ndicani na nu mé ndó tá cúní nā. Ta ndehe, nā fariseo cúu nde nā cája ley Moisés xihín ndinuhu chága ini nde a juú ga inga na.

<sup>6</sup> Ta sahá ña cándeé cáhnu ini i ña vaxi quivi jánditacu tucu Ndióxi tóco ndihi nā naxihi sahá ña cán queá nā Israel yóho ñehe na yehe nacasaá nā caja víi nā sahá i nu mé ndó. Ta mé Ndióxi queá nasahan tuhun a nu tásáhnu jícó nde ña nditacu tucu ndii. <sup>7</sup> Tóco ndihi ñayivi táhan nā naquixi chichi ndíhuxu ivi jahyi Israel cán ndáti na cuni na nuú jáxinu coo Ndióxi nuú tuhun a. Sahá ña cán queá ñuu ta ndiví cája cáhnu na Ndióxi. Candehé ndo, rey Agripa. Sahá ña cándúsa i tá quiahva cándúsa nā cán sahá ña cán queá jácojo nā Israel cuachi jatá i viti —nacachi Pablo xihín rey Agripa.

<sup>8</sup> Anda já nacahan Pablo xihín nā Israel ndúu cán já:

—Á mé a ndaa cándúsa ndó ña cuu caja Ndióxi ña nditacu tucu ndii —nacachi Pablo xihín nā Israel ndúu cán.

<sup>9</sup> Anda já nacachi tucu Pablo xihin rey Agripa já:

—Yehe nacahan i jihna ña ndítahan caja xíxi i xihín na cúu cuéntá Jesús, mé a naquixi ñuu Nazaret. <sup>10</sup> Sahá ña cán quéa já nacaja i ñuu Jerusalén jihna. Ta nasahan i naxica i ñamaní nuú na sacuahá nuú jutú já ná quiahva na ñamaní nuú i caja i ña yóho. Ta tá nañehé e ñamaní já nataán cuahá i na cúu cuéntá Jesús vecaa. Ta tá nasahní ñahá na, cájji ini i sahá ña cája na já xihín ná. <sup>11</sup> Ta cuahá tañu nacaja xíxi i xihín ná ña ná cahan ihvi na saha Jesús, mé a cándéé ini na. Níí cúu veñuhu naxica nuu i cája i já xihín ná. Ta janda ñuu tóho nasahan i nandicuita ñee e na jáchi nasaxojo ndivaha ini i xihín ná.

*Ndicani Pablo ndaja nandihvi da íchi cuéntá Jesús (Hch. 9:1-19; 22:6-16)*

<sup>12</sup> In tañu nañehé e ñamaní nuú na cúu sacuahá nuú jutú ñuu Jerusalén ña ná cuhun i ñuu Damasco taán i na cúu cuéntá Jesús vecaa. Sahá ña cán quéa naquee e cuahan i. <sup>13</sup> Candehé ndó, rey Agripa. Nani xíca i cuahan i íchi cán cúu á tátuhun caxivi já naxini i nandiyihvi ndaa in ñúhu indivi ta yehe chága ña a juú ga candii. Ta nacava nuu a jatá i xihín jatá da casahan xihín i cán. <sup>14</sup> Anda já nacuyu ndihi nde nu ñúhu ta já naxini johó nde in a cahan tuhun hebreo já nacachi a já xihín i: “Saulo, Saulo ndá

cuéntá quéa ndicuitún cája xísún xihín i. Candehé. Cája xísún xihín mé vún. Ña cájun xihín i cúu á tátuhun ña cája tindiqui tá sání ndaa rí nu poyá”, nacachi a cán xihín i. <sup>15</sup> Anda já nacasahá ndaca tuhún i já cáchi i já: “Yo cúu mé ndó cahan xihín i.” Anda já nanducú ñeehe a cán tuhun nuú i já nacachi a já: “Yehe cúu Jesús, mé a xíca nuún cája xísún xihín. <sup>16</sup> Ta viti cuahán ndacoo, candichi. Nanaha i mí i nuun já ná caja chúun cuéntá mí i viti já ná ndicanún nuú ñayivi ndaja cáa ña naxinún viti ta já ná ndicanún nu ná java ga ñaha jánaha i nuun chága chí nuu. <sup>17</sup> Mí i jácacu u yohó já ná a cáhni na Israel yohó ni na tóho a cáhni na yohó jáchi nu mé na tóho cán chindahá i yohó cuhún cahún sahá i viti. <sup>18</sup> Ta jánahún nu ná ndaja caja na jándicoo na íchi naá ndivaha nu xíca na viti. Jáchi ndítahan nu ná ndicaca na íchi mí i nu yehe ndivaha. Ta jánahún nu ná ña ná a ndiquiahva ga na mé ná ndahá tiñahá sacuahá. Ña ndítahan caja na quéa ndiquiahva na mé ná ndaha Ndióxi ta ná caja na ña cúní mé á. Ta ndítahan cándéé ini na yehe já ná caja cáhnu ini i sahá cuachi na. Ta já ná cuu in nduu na xihín na nacaxi i ñeehe táhvi ña cúní Ndióxi quiahva nu na”, nacachi Jesús xihín i tá nasahan i íchi ñuu Damasco.

*Ndicani Pablo sahá chuun*



*cája da*

19 'Candehé ndó, rey Agripa. Coó ñacaja sáá ini i. Jáchi ñacaja i tá iin ñasahnda Jesús nuú i caja i. 20 Sahá ña cán quéa ivi laá ñacasáhá cáhan i tuhun vaha saha Jesús nuú ñayivi ñuu Damasco cán. Tá ñandihí já ñaquee e ñasahan i cáhan i ña xihín ña ndúu ñuu Jerusalén xihín ña ndúu ndijáá ñuu estado Judea. Ta janda xihín ña coó ñaquixi chichi Israel ñacahan i saha Jesús. Ta ñacachi i xihín ná ña ndítahan nu ná jándacoo na ña núu cája na ta ná ndicó coo na nu Ndióxi. Ta ndítahan caja na ña vaha já ná ñaha ña mé a ndaa táhyí ñandiquehe na íchi cuéntá Jesús. 21 Ta sahá ña yóho cuití ñatiin ña Israel yehe nani ndácaan i veñuhu cáhnu ñuu Jerusalén ta viti ndúcú ña cahní ña yehe. 22 Joo Ndióxi ñachindeé a yehe sahá ña cán quéa coó ñajándihí na sahá i. Ta anda viti xíca nuu i cáhan i tuhun Ndióxi nuú ñayivi ta coó caja toho a á cúu ná ña ndahví á cúu ná ña iin cuahá saha. Ta tóco ndihí ña jáñaha i nu ná coo cúu á ña quíxi jini mí i jáchi cúu á ña ñacachi ña profeta xihín ña ñacachi Moisés coo. 23 Ta ña ñacachi ña cán quéa vaxi quiví quixi Jesucristo ñuyiví yóho ta a juú quiahva jándoho na ini a. Ta cahní ña ña ta tá ñandihí jánditacu tucu a. Ta mé á cacuu ña nu cuití nditacu nuú tóco ndihí ña sa ñaxihí. Ta mé á jáñaha nuú ñayivi ndaja cuu cacu

ndaa ínimá ná coo caja toho a á cúu ná ña Israel á cúu ná ña tóho —ñacachi Pablo xihín rey Agripa cán.

*Cúni Pablo ná ndihvi Agripa íchi cuéntá Jesús*

24 Tá ñacatáji loho Pablo nu cáhan da já ñacayúhú cóho Festo nu dá já cáchi da já:

—Ñacatachi vún, Pablo. Nayaha ndivaha quiahva ñajácuahún sahá ña cán quéa ñacatachun —ñacachi Festo cán xihín Pablo.

25 Anda já ñacachi Pablo já xihín dá:

—Coo ñacatachi toho i, tá Festo jáchi ndinuhu ña ndaa cáhan i xihín ndo. 26 Ta xini vaha mé rey Agripa yóho ña cáhan i ña ndaa. Ta co yíhvi cáhan i nu dá jáchi cándaa ini i ña xini vaha mé dá ndá saha cáhan i jáchi coo cúu á ñaha nayaha nuú jehé. 27 Ta viti cachi ndó xihín i, rey Agripa á cándusa ndó ña ñacahan ña profeta sanahá. Cája i cuéntá cándusa ndó ña ñacachi na —ñacachi Pablo.

28 Anda já ñanducú ñehe rey Agripa cán tuhun já ñacachi da xihín Pablo:

—Ja lóho cuití ta cavún jini i ña ná nduu u cuéntá Jesús, nduu —ñacachi rey Agripa.

29 Anda já ñacachi Pablo já xihín dá:

—Á yachi á cuee coo caja toho a. Ña xíca tahví i nu Ndióxi quéa ná xinu coo mé ndó, rey Agripa xihín tóco ndihí ña ndúu yóho cacuu ndó tátuhun mí i jáchi cándeé cáhnu ini i Jesús vatí mé a ndaa coo cúni ña ná candico

ndáha ndo tátuhun yehe —  
naçachi Pablo xihin dá.

<sup>30</sup> Tá nandihí naçahan Pablo já nandaca ndichi rey Agripa cán xihin Berenice ta nandaca ndichi Festo xihin java ga na nasanduu coo xihin dá cán. <sup>31</sup> Já natavá táhan na ndítuhún na saha Pablo já cáchi xihin táhan na já:

—Co ndítahan toho nuú da yóho quivi da jáchi coo cuachi ndeé ná caja da ta janda ni vecaa co ndítahan ndacaan da —cáchi na.

<sup>32</sup> Anda já naçachi rey Agripa cán já xihin Festo:

—Tá ná a çahan da yóho ña cúni da cavií saha dá nuú da cúu emperador ñuu Roma ta cuu janí vún da, nduu —naçachi Agripa cán xihin Festo.

## 27

*Chindahá na Pablo ñuu Roma*

<sup>1</sup> Tá nasacu ini na chindahá na Pablo ná cuhun da chí nación Italia nu ndácaan ñuu Roma cavií saha dá já nandiquiahva na da xihín java ga da ndácaan vecaa cán nuú da naní Julio, da sáhdá chuun nu soldado cuénta Roma. Mé Julio yóho cúu dá da cómi cuénta saha in táhdá soldado naní Augusto. Ta tañu na cuhun xihin Pablo cán cuahan ri yehe, da naní Lucas. <sup>2</sup> Ta tañu nde cán cuahan ri da naní Aristarco, da ñuu Tesalónica, ña ndácaan estado Macedonia. Nandaa nde ini barco, dó naquixi chí Adramitio. Mé barco

yóho cúu dó cuhun ndijáá ñuu válí ñuhu estado Asia cán. Cándójó nde barco cán cuahan nde. <sup>3</sup> Ta inga quiví itaan naxinu coo nde ñuu Sidón. Ta cán naçaja vaha da naní Julio cán xihin Pablo jáchi nasahan da ñamaní nu Pablo ña ná coto nihni da na xíní táhan xihin dá ndúu ñuu Sidón cán já ná caja ndíví na nu dá. <sup>4</sup> Ta inga quiví itaan já nandihvi tucu nde barco já naquee nde ñuu Sidón cán. Ta sahá ña vaxi tachí xoo nuú cuhun barco cán sahá ña cán quéa nayaha nde xoo íti isla Chipre jáchi coo xicó cuahá tachí cán. <sup>5</sup> Naxojo cava nde anda inga xoo tañuhú ta já nayaha nde in xoo estado Cilicia xihin estado Panfilia. Anda já naxinu coo nde ñuu Mira ndácaan estado Licia.

<sup>6</sup> Mé ñuu Mira cán nandiñehé da sáhdá chuun nu soldado cán in barco, dó naquixi chí Alejandria ta cuhun do chí Italia. Ta najándaa da ndehe jata dó cán já naquee tucu nde cuahan nde. <sup>7</sup> Cuéé vaha va cuahan nde ta nandoho chá ini nde cuahan nde sahá ña cán quéa cuahá quiví naçaja nde janda quiahva naxinu coo nde ñuu Gnido. Ta sahá ña xicó ndivaha tachí xoo nuú cuhun nde cán sahá ña cán quéa nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. <sup>8</sup> Cuéé ndivaha cuahan nde já yaha nde yati yuhú tañuhú isla Creta cán. Anda jáví naxinu coo nde nuú coo vaha barco

naní Puerto Vaha yati ñuu Lasea.

<sup>9</sup> Sa nayaha cuahá quivi ta nacacuáchi nde. Ta iyo ndivaha cáa cuhun nde xihin barco jáchi nacayati tiempo vixi. Sahá ña cán quea nacañan Pablo xihin ndihi na cán já cáchi da já xihin ná:

<sup>10</sup> —Candehé ndo. Cája i cuénta iyo ndivaha cáa coho xihin barco jáchi cuu ndihi saha barco xihin ña ndójo dó cuahān do. Ta janda mí cuu quivi —nacachi Pablo xihin ná.

<sup>11</sup> Joo coo naxeen da sáhdá chuun nuú soldado cán cuni johō da nu cáñan Pablo. Nacandúsa chága da nuú nacañan da ñehe barco xihin da xiñaha barco a juú ga nuú nacañan Pablo. <sup>12</sup> Ña nacachi na quea a cuú candoo na yóho tiempo vixi jáchi xícó ndivaha tachi. Ta tóco ndihi na nacachi na ña vaha chága ná cuhun nde. Tiahva náa jana quee vaha nde xinu coo nde janda ñuu Fenice cáhān na. Mé ñuu Fenice cán ndacañan isla Creta ta co xícó ndeé nahá tachi cán. Sahá ña cán quea nasacu ini na canduu na cán tiempo vixi.

*Tá naxicó ndivaha tachi nuú tañuhú*

<sup>13</sup> Tá nandihí já nacasáhá vitá uun xícó tachi sahá ña cán quea nacañan na ña cuu va quee nde cuhun nde. Andá já naquee nde cuahān nde yati yuhū isla Creta cán xíca nde cuahān nde. <sup>14</sup> Joo tá nandihí já naxinu tachi ndeé jata barco. Mé tachi

ndeé cán vaxi a chí xoo norte xihin chí nu cána candii. <sup>15</sup> Ta nacasáhá ñuhu mé tachi ndeé cán barco cuahān do. Ta sahá ña coo nacuu caja nde jándicaca nde barco cán xoo nuú vaxi tachi sahá ña cán quea nacañan nde ñamani ña ná cañehe a barco cuhun do tá quiahva cuni tachi. <sup>16</sup> Tá nandihí já nayaha nde jata in isla loho naní Clauda. Ta mé cán coo naxicó nahá tachi ndeé. Andá já nacasáhá nde jándaa nde lancha loho, dó jítá barco cáhnu cán. Joo nandoho chá ini nde já nacuu najánda nde do jata barco cáhnu cán. <sup>17</sup> Tá nandihí já nacava nuu na rieta jata mé barco cáhnu já ná coo tóyí do. Tá nandihí já najánuu na jáhma cáhnu sándaca barco cán ña ná cañehe mé tachi do. Nacaja na ña yóho jáchi yihví na xinu coo barco xoo naní Sirte nu yáji tañuhú ta cán cuu cachihin dó ñuti. <sup>18</sup> Ta chí coo nasacuijn tachi ndeé nahá cán inga quivi itaān sahá ña cán quea nacasáhá na jácana nihni na ñaha ndójo barco cán ini tañuhú já ná ndicama dó. <sup>19</sup> Ta tá naxinu quivi uni janda mé nde viti nacasáhá nde jácana nde ña sácaja chúun barco cán ini tañuhú já ná ndicama chága do. <sup>20</sup> Ta tixi cuahá ndivaha quivi coo naxini nde nuú candii ta ni quimi co tívi. Ta javi nacuun quini ndivaha dó ta a juú quiahva naxicó ndivaha tachi. Sahá ña cán quea chí nacañanda vaha ini nde: “Yóho quivi viti”,

naçahán nde.

21 Cuahá ndivaha quiví nayaha ta ni in nde co cúni cuxu. Sahá ña cán nandaca ndichi Pablo tañu tóco ndihi na cán já naçasáhá cáchí da já:

—Tá ná coo johó ndó tá naçahan i xihin ndo ta ná candoo í ñuu Creta, nduu. Ta ni a ndóho í ña ndóho í yóho viti ta ni a tiví toho ndihi ñaha nasandojo barco yóho, nduu. Joo coó naxeen ndó candúsa ndó ña naçahan i xihin ndo. 22 Joo cáchí i xihin ndó viti ña co ndítahan ndicani ini ndó. Jáchí ni in túhún toho ndó a quiví vatí mé barco ndihi saha do. 23 Jáchí yehe cúu u cuéntá Ndióxi ta cája cáhnu i mé á. Ta mé ñuu janda véhe nanaha in tátō Ndióxi mé á nuú i. 24 Ta já naçachi a já xihín i: “A cáyihví tohún, Pablo. Jáchí ndítahan xinun tá xinun nuú da cúu emperador ñuu Roma cán. Ta saha yóhó jácaacu ri Ndióxi tóco ndihi na ñúhu xuhun ini barco jan já ná a quiví na ini tañuhú”, já naçachi tátō Ndióxi xihín i. 25 Sahá ña cán quéa a ndícani ga ini ndó jáchí cándeé cáhnu ini i Ndióxi ta cándaá cáxí ini i ña coo tá iin naçachi tátō Ndióxi xihín i. 26 Joo in tachí ndeé caja ña ná tiví barco yóho yati in isla —naçachi Pablo xihín na cán.

27 Sa naxinu sahun quivi xíca nde ini barco cán cuahan nde. Ta in ñuu naxinu coo nde in xoo tañuhú naní Adria. Joo tá xoo johó tá xoo cáa ñehe tachí nde cuahan nde. Joo

tátuhun java ñuu já naxini da ñehe barco cán ña cáyati nde yuhú tañuhú cuahan nde. 28 Anda já naçasáhá chíquiahvá na ndá quiahva cúná tañuhú yati yúhu nu nduu nde cán. Ta quiahva cúná do nasacuu oco sahun in metro. Tá naçasáhá cáyati chága barco yúhu cán já nachiquiahva tucu na. Ta cán sa yájí chága ta cúu á oco usa metro quiahva cúná a. 29 Ta sahá ña yíhví na xinu coo barco cani ndaa dó tótō ñúhu yati cán sahá ña cán quéa natiin na rieta ña ndíco comí caa gáncho cáhnu nu cán. Ta najácana na ña ini tañuhú chí xoo cáha mé barco cán já ná tiin a barco ná a cáca ga dó cuhun do chí nuu. Ta a juú quiahva yíhví na ndáti na ná tiví. 30 Joo ndaja coo java da cája chúun xihin barco cán naçahán da quee jehé da xihin lancha loho cán cuhun da. Sahá ña cán quéa naçasáhá da ndaxí da lancha loho cán ña jánuu da do nuú tañuhú ta já cuhun da, cáhán da. Ta naçasáhá cája da tátuhun táán chága da caa gáncho cán ini tañuhú já ná tiin a barco xoo chí nuu do. 31 Joo naxini Pablo ña cája da sahá ña cán quéa naçaxi tuhun da nuú da sáhdá chuun nuú soldado ta xihín nuú soldado cán já cáchí da já xihin ná:

—Tá ná quee da jan cuhun da já quéa ndihi saha ndó ini tañuhú —naçachi Pablo.

32 Anda já nasahan soldado cán nasahnda da rieta ndíco

lancha loho cán já najándicava da dó ini tañuhú.

<sup>33</sup> Ta tá sa yati tivi yaa já najácahan Pablo tóco ndihi na cán ña ná cuxu na vaŕí loho. Já naçachi da já xihin ná:

—Sa nayaha sahun quivi co xíxi ndó ta ni co quíji ndo.

<sup>34</sup> Sahá ña cán xíca i ñamaní nu ndó ña ná cuxu ndó vaŕí chá va. Xíni ñuhú cuxu ndó já ná coo ndée ndo chindeé ndó mé ndó já ná cacu ndó. Jáchi cacu ndihí. Ta ni janda in túhún ijí jiní yo a ndíhi saha —naçachi Pablo xihin ná.

<sup>35</sup> Tá nandihí naçachi Pablo ña yóho xihin ná já natiin da in pan ta nu táhyí ndihi na cán nandiquiahva da ndixahvi nu Ndióxi. Tá nandihí já nasahnda java da ña ta naçasáhá da xíxi da.

<sup>36</sup> Xihín ña yóho nandindeé ri ini na java cán ta naçasáhá na xíxi na. <sup>37</sup> Ta tóco ndihi nde, na nasañuhu ini barco cán nasacuu nde ivi ciento uní jícó sahun in ñayivi. <sup>38</sup> Tá nandihí naxixi nde ña cúni nde já nasata na trigo ini tañuhú já ná ndicama chága jata barco cán.

### *Cácoo barco caha tañuhú*

<sup>39</sup> Joo tá nativi yaa já naxini na ñundáhyi. Joo coo naçuu ndicuni da cája chuun xihin barco cán ndá ñuu cúu á. Ta tá nandihí já naxini na ña in ñuti nu yáji yuhú tañuhú cán. Anda já naçahan na jácayati na barco yati yuhú cán. <sup>40</sup> Sahá ña cán quea nasahnda na rieta ndico barco cán já najani dó. Ta naçandoo caa

gáncho ini tañuhú naçaja na. Ta tá nandihí já najánditayi na yitó nuú jahnda ta xihin yitó cán naçasáhá na jándicaca na barco cán nuú tañuhú. Ta najándindita tucu na jahmá cáhnu xoo nu barco cán já ná cuu caca dó xihín tachi. Ta xihín ña yóho naçasáhá barco cán cáyati dó yuhú tañuhú.

<sup>41</sup> Ta in cuití naxinu barco cán nu ndíque táhan ivi táhnda tañuhú. Ta sahá ña naçayáji tañuhú nuú ñuti cán sahá ña cán quea naçatiin nuú barco cán. Ta ni loho ga coo naçuu cuhun do. Joo xihín ña quiahva ndeé ndacú cáni ndaa tañuhú cán xoo cáha do sahá ña cán quea naçasáhá cháchi dó. <sup>42</sup> Anda já nanducú soldado cahní ndihi da na cuahan veca ñuu Roma cán. Jáchi tiahva náa jítá na cuhun na nuú tañuhú ta cunu na cuhun na tá sa naqueta na yuhú tañuhú, cáhan na. <sup>43</sup> Joo da sáhnda chuun nuú soldado cán coo nasahan da ñamaní ña ná caja na já jáchi cúni da jácacu da Pablo. Ña naçaja da quea nasahnda da chuun nuú na tiahva jítá ticuú ña ná jácana na mé ná ini tañuhú cán já ná xinu na nu ñuhú.

<sup>44</sup> Ta na java, na co tiahva jítá ticuú cán naçachi da xihin ná ña ná ndaa na jata yitó á jata túhun barco cán já ná xinu na nu ñuhú. Anda jáví naxinu coo vaha tóco ndihi nde nu ñuhú.

<sup>1</sup> Tá sa naxinu coo vaha ndihi nde yuhú ñundáhyi cán já nacandaa ini nde ña naní a isla Malta. <sup>2</sup> Ta vaha ndivaha nacaja ñayivi ndúu isla cán xihín nde. Nandicahmi na ñúhu jáchi nacasáhá cúun ga javi ta a juú quiahva vixi xíní nde. Chí nacahan na xihín nde ña ná cativi nde catúní nde. <sup>3</sup> Anda já najátaca Pablo java titó íchí, dó quee yávi núhu. Ta tá chójó da títo cán nu ñúhu já naqueta in coo tañu títo cán xínu rí sahá ña ihní ñúhu. Ta natiin rí ndáha Pablo. <sup>4</sup> Ta tá naxini na isla Malta cán ña ndícaa coo ndáha Pablo já nacasáhá cáhí xihín táhan na já:

—Ndá da sáhní ndii cúu da yóho jáchi vatí coo naxihí da ini tañuhú joo yóho cuni Ndióxi jándihi a saha dá — nacachi na.

<sup>5</sup> Joo mé Pablo naquiji nihni da coo ndícaa ndáha dá cán nu ñúhu cándaha cán ta coo ña ná ndoho da. <sup>6</sup> Tóco ndihi na cán ndáti na cuni na ña ná quihvi cuiñu ndáha dá á tá coo ta in cuití ndicava da quivi da, nacahan na. Ndáti na java cán cuni na ndaa ndoho Pablo joo tá sa nacanahá ndáti na coo ñaha ná ndoho toho Pablo cán. Anda já nandijama jini ná ta nacasáhá na cahan na ña cúu dá in ndiόxi.

<sup>7</sup> Yati nuú naxinu nde cán nasacuu a ñundáhyi da naní Publio, da cómi cuénta saha isla cán. Ta tixi uní quivi nandiquehe vaha ndivaha da ndehe ta vaha nacaja da xihín nde. <sup>8</sup> Ta ndaja coo

quihvi tátá Publio cándúhu dá ndóho da cuehe nji ta chícáan cáhni ñahá. Ta já nasahan Pablo naxito nihni da da ta nacasáhá Pablo xíca tahví da nu Ndióxi saha dá ta naxinúu Pablo ndáha dá jini dá ta já nandivaha da. <sup>9</sup> Tá naxini java ga na quihvi ndúu isla cán ña nacaja Pablo já naquixi na nu dá ña ná ndaja vaha da na chí nandivaha na. <sup>10</sup> Ta nandiquiahva na ndixahvi nuú nde ta najasá na cuahá ñaha nuú nde. Tá naxinu coo quivi ndaa nde barco cuhun nde já nasahan na ña xíní ñúhú nde cuhun nde.

#### *Xínu coo Pablo ñuu Roma*

<sup>11</sup> Nasanduu nde tátuhun uní yoó isla cán janda quiahva nandaa nde in barco, dó nasandati yaha tiempo vixi mé isla Malta cán. Mé barco cán naquixi dó chí Alejandría. Ta nuu do cándaa ivi tiniñu yúu ndiόxi cája cáhnu na cán. In a naní a Cástor ta inga a naní Pólux. <sup>12</sup> Naquee nde cuahan nde já naxinu nde in ñuu naní Siracusa ta cán nasanduu nde uní quivi. <sup>13</sup> Ta naquee nde cuahan nde yati yúhu tañuhú janda quiahva naxinu coo nde ñuu Regio. Joo inga quivi itaan já nacasáhá víi uun xíco tachi chí sur sahá ña cán quea tá sa nayaha ivi quivi já naxinu nde ñuu Puteoli. <sup>14</sup> Ta cán nanditahan nde java na cúu cuénta Jesús. Ta nacahan na xihín nde ña ná canduu nde in semana xihín ná ta já

naçaja nde. Ta tá nandihí já naçuee nde cuaḥan sáhá nde chí ñuu Roma. <sup>15</sup> Ta na cúu cuéntá Jesús ndúu ñuu Roma cán sa nañeḥe ná tuhun ña xinu coo nde cán. Sahá ña cán quéa naçqueta na vaxi na ñeḥe ná ndeḥe. Java na naquixi janda ñuu nu sáhjin yahvi cáhnu naní a Apio ta java na naquixi janda ñuu naní Uní Taberna. Tá naxini Pablo na cán já naçasáhá ndíquiahva da ndixahvi nu Ndióxi ta nandindacú ini da. <sup>16</sup> Ta tá naxinu coo nde ñuu Roma já nandiquiahva da sáhndá chuun nuú soldado cán tóco ndihí da cuaḥan vecaa cán nuú in da cómi chuun saha mé vecaa ñuu Roma cán. Joo naṣaḥan na ñamaní nu Pablo coo jín da vaṭí naṣacu na in soldado ndáá ñahá.

*Cáḥan Pablo tuhun Ndióxi xihín na ñuu Roma*

<sup>17</sup> Tá sa naxinu uní quivi naxinu coo nde ñuu Roma cán já naçana Pablo tóco ndihí na saçuaḥa nuú na Israel ndúu ñuu Roma cán. Ta tá sa naṭaca ndihí na ndúu na já naçachi da já xihín ná:

—Candehé ndó, ñani i. Ni in túhún toho ñaha núu coo naçaja yeḥe xihín na Israel mé ñuu Jerusalén cán ta ni xihín costumbre naçaja tásáhnu jícó yo. Joo naṭiin na Israel yeḥe ta nandiquiahva na yeḥe nuú na cúu cuéntá gobierno ñuu Roma yóho. <sup>18</sup> Ta tá nandihí nandaja ndíchí na yeḥe já naṣacu ini na janí na yeḥe jáchi coo nañeḥe ná cuaçhi i sahá ña

cuu cahní na yeḥe. <sup>19</sup> Joo ndaja coo na Israel coo naçeen na ña ná janí na cán yeḥe. Sahá ña cán quéa naçica i ñamaní ña ná cavií sahá i nu emperador ñuu Roma yóho. Joo yeḥe coo cúni toho i jácojo i cuaçhi jatá na Israel jáchi cúu ná na naquixi chichi nuú naquixi mí i. <sup>20</sup> Sahá ña cán quéa naçana i ndohó viti jáchi cúni cuni i ndohó já ná nditúhún i xihín ndo. Cúni ndicani i nu ndo ña ndíco ndáha i xihín cadena yóho sahá mé a naçindahá Ndióxi jáçacu a ndihí yó, na Israel —naçachi Pablo xihín na Israel cán.

<sup>21</sup> Anda já nanducú ñeḥe na cán tuhun nu Pablo já cáchi na já xihín dá:

—A ñaha quixi carta estado Judea nuú nde ña cáḥan sahá ña cájún. Ta ni na cúu táhan na Israel tá nandai cuu na ñuu yóho coo toho tuhun núu ñeḥe na ná casaḥa na nuú nde saḥa yóhó. <sup>22</sup> Joo cúni nde ña ná ndicanún nuú nde ndía cándúsún jáchi níí cúu ñuyiví cáḥan núu ñayivi sahá na cúu cuéntá Jesús —naçachi na Israel cán xihín Pablo.

<sup>23</sup> Tá nandihí naṣacu na in quivi caḥan Pablo xihín ná ta tá naxinu coo mé quivi cán naṭaca cuaḥá ndivaha ñayivi mé vehe nu ín Pablo cán. Ta naha ta janda sahini najánaḥa da nu ná ña cúni Ndióxi cacomí a cuéntá sahá ñayivi. Ta xihín ña naçahyí Moisés sanahá ta xihín ña naçahyí na profeta já nandicani da nu ná saḥa

Jesús ña ná candeé ini na mé á. <sup>24</sup> Java na cán ñacandúsa na ña ñacachi Pablo xihin ná joo java na coó ñaxeen na candúsa na. <sup>25</sup> Ta sahá ña coó ñacuu ndique táhan vaha tuhun na Israel cán sahá ña jánáha Pablo sahá ña cán quéa ñacasáhá na quée na cuahan na. Tá ñaxini Pablo ña yóho já ñacasáhá cáchi da já xihin ná:

—Mé a ndaa ñacahan ínima yii Ndióxi nuú tásáhnú jíco yo tá ñacahyí Isaías já:

<sup>26</sup> Cuáhán cahan xihín ñayivi Israel jan já cachún já xihin ná:

Mé a ndaa táhyí cuni johó ndó joo a cándaá ini ndó.

Ta vatí sándeheé ndó in ñaha joo co ndícuni ndó ña.

<sup>27</sup> Jáchi ihvi ndivaha cúu ini ndó ta co cúni ndó caja ndó ña cáchi í.

Ta co cúni ndó cuni johó ndó ña cahan í xihin ndó.

Ta co cúni ndó ndicuni ndó ña cája ndó cuachi.

Jáchi tá ná jándacoo ndó cuachi cája ndó,

já quéa cuu caja cáhnú ini í saha ndó,

ta já cuu coo vaha ini ndó, já ñacachi ínima yii Ndióxi xihin tásáhnú jíco yo.

<sup>28</sup> Anda já ñacachi tucu Pablo já xihin ná:

—Ta viti xíní ñúhú candaá ini ndó, na Israel ña sa ñaxini johó na coó ñaquixi chichi Israel tuhun vaha saha Jesús. Ta cája í cuéntá candúsa mé na cán ña —ñacachi Pablo xihin ná.

<sup>29</sup> Tá ñandihí ñacahan Pablo ña yóho já ñanditúhnú cuéhe xihin táhan na Israel cán ta já ñaquee na cuahan na.

<sup>30</sup> Ñacandoo Pablo ivi ní cuia vehe nuú ñachahvi ndojo da. Ta ñandiquehe vaha da tóco ndihí na sahan xito nihni ñahá. <sup>31</sup> Ta ni co yíhvi da cáxi tuhun da xihín ñayivi ña cúni Ndióxi cacomí a cuéntá saha ná. Ta najánaaha da tuhun vaha saha Jesucristo, xitoho í ta ni in na coó nasaji nuu nu dá caja da ña.



## Carta nachindahá Pablo nuú na cúu cuéntá Jesús ndúu ñuu Roma

*Cáhan Ndióxi Pablo xihín  
na cúu cuéntá Jesús*

<sup>1</sup> Yehe cúu Pablo ta Jesucristo cúu xitoho i. Naçaxi Ndióxi yehe cacuu u in apóstol cuéntá mé á ta nachindahá a yehe cuhun i çahan i tuhun vaha saha Jesús nuú ñayivi.

<sup>2</sup> Sañahá ndivaha naçaja Ndióxi ña ná çahyí na profeta mé á tuhun vaha sahá ini libro yji Ndióxi. <sup>3</sup> Mé tuhun vaha yóho çahan saha Jesucristo, xitoho í, mé a cúu in túhún jini já jahyi Ndióxi. Ta nanduu a in ñayivi naçacu ñuyívi yóho ta naquixi a çichi rey David.

<sup>4</sup> Ta najánaña inima yji Ndióxi ñayivi ña cúu Jesús in túhún jini já jahyi Ndióxi, mé a cúu çaja tóco ndihi ñaha. Jáchi tá sa naxihí Jesús já nanditacu tucu a ta xihín ña yóho náha ña cúu á in túhún jini já jahyi Ndióxi. <sup>5</sup> Ta sahá ña naçaja Jesucristo ndica crúxu sahá ña yóho naçaja Ndióxi ñamaní xihín ndihí. Já nachindahá Ndióxi mí ña ná cuhun i cuéntá mé á çahan í saha Jesús nu tóco ndihi ñayivi ndúu ñuyívi já ná cuu candeé ini na mé á ta já ná çaja na ña cuni a. <sup>6</sup> Ta mé ndó, na cúu cuéntá Jesús ndúu ñuu Roma

jan, naçaxi Ndióxi ndohó cacuu ndó cuéntá mé á.

<sup>7</sup> Ña cán quea çahyí i carta yóho nu ndó, na ndúu ñuu Roma jan. Jáchi cuni ndivaha Ndióxi ndohó ta naçaxi a ndohó nduu ndó ñayivi mé á. Ta ná çaja Ndióxi, tátá yo xihín Jesucristo, xitoho í cuahá ñamaní xihín ndo ta ná çaja ña ná coo vaha ini ndó.

*Cuni Pablo cuhun da ñuu  
Roma coto nihni da na cúu  
cuéntá Jesús ndúu cán*

<sup>8</sup> Ndiquiahva i ndixahvi nu Ndióxi sahá ña naçaja Jesucristo xihín in in ndó jáchi ñayivi ndúu ndijáa ñuyívi xini joho na ña candeé ini ndó Jesús. <sup>9</sup> Yehe çaja chún i cuéntá Ndióxi ta ndinuhu ini i çaxi tuhun i tuhun vaha saha Jesús, mé a cúu in túhún jini já jahyi Ndióxi nuú ñayivi. Ta xini vaha Ndióxi ña tóco ndihi quívi xica tahví i nu mé á sahá ndihi ndó. <sup>10</sup> Ta ndijáa ní quívi xica tahví i nu Ndióxi ña ná quiahva ñamaní nuú i saa i jan coto nihni i ndohó tá cuni a. <sup>11</sup> Jáchi cuni cuni i ndohó já ná çaxi tuhun i xihín ndo ndá quiahva cuni inima yji Ndióxi çaja ñamaní xihín ndo já ná ndindacú chága ndó cuéntá mé á. <sup>12</sup> Ña cuni quea ná quiahva tuhun ndeé ini táhan í jáchi in candeé ini ndihí Ndióxi.

<sup>13</sup> Cuni ña ná candaa ini ndó, ñani mí i, na cúu cuéntá Jesús ña sa cuahá tañu sácu ini i saa i coto nihni i ndohó joo in cuahá ña sáji nuu nuú i sahá ña cán quea çamaní saa i jan. Cuni chindeé e ndohó

ñā ná caca vaha ndó íchi cuéntá Jesús. Jáchí quiahva já nāchindeé e java gā ñayivi, nā cō cúú chichi Israel. <sup>14</sup> Joo ndítahan nuú i caxi tuhun i tuhun Ndióxi nu tóco ndihi ñayivi ndúu ñuu náhnu xihín nā ndúu yucú ñúhú. Ta cahan i tuhun Ndióxi xihín nā ndíchí jini ta xihín nā cō ndíchí jini. <sup>15</sup> Ñā cán queá xica ndivaha ini i saá i nu ndúu ndó ñuu Roma jan cahan i tuhun vaha saha Jesús xihín ndo.

*Jácaacu Ndióxi ñayivi sahá tuhun vaha cahan saha Jesús*

<sup>16</sup> Cō cáchan nuú i sahá tuhun vaha cahan saha Jesús jáchi cúú á ndéé Ndióxi jácaacu a tóco ndihi ñayivi, nā candeé ini mé á. Ta jihna ñúhú naçasahá Ndióxi jácaacu a ñayivi naquixi chichi Israel ta viti jácaacu a tóco ndihi ñayivi tá candeé ini na mé á vatí cúú ná nā tóho á cúú ná nā Israel. <sup>17</sup> Jáchí náha tuhun Ndióxi nu yo ndá quiahva ndúu ñayivi ndaa nu mé á. Ta cúú á sahá ñā candeé ini mé á ta sahá ñā yóho cuítí va jáchi cōó a inga nuú ñā caja í cacúú ñayivi ndaa nu Ndióxi. Já cáchi tuhun Ndióxi já: “Ndá nā cúú ñayivi ndaa nu Ndióxi catacu na sahá ñā candeé ini na mé á.”

*Tóco ndihi ñayivi ndúu ñuyíví cómí nā cuachi nu Ndióxi*

<sup>18</sup> Jānda indiví nu íin Ndióxi xójo ini a xihín tóco ndihi ñayivi cája cuachi ñuyíví yóho ta jándoho a ini na sahá cuachi cája na. Ta sahá ñā

núu cája na sáji nuu na nuú java gā ñayivi, nā cúni candaa ini ñā ndaa saha Ndióxi. <sup>19</sup> Jándoho Ndióxi ini ñayivi sahá cuachi cája na jáchi sa najánaha mé á ñā ndaa nu ná ta sa xini nā saha mé á joo cō cándúsa na ñā. <sup>20</sup> Jānda sahá ñuyíví xini ñayivi ñā naçavaha Ndióxi ñuyíví xihín indiví xihín tóco ndihi ñāha. Ta xihín ñā yóho cuu candaa ini na ñā íin Ndióxi ta cuu candaa ini na ñā íin ndéé mé á caja ñā cúni a anda ama cáa quivi. Sahá ñā cán queá a cúu cachi na ñā cō xini nā á íin Ndióxi á cōó a. <sup>21</sup> Vatí cándaa vaha ini na ñā íin Ndióxi joo cō cája cáhnu na mé á tátuhun ndítahan nu ná caja na. Ta ni cō ndiquiahva na ndixahvi nu á. Ñā cája na queá cáhvi núu ini na ta cōó saha toho ñā cáhvi ini na. Ta cúú ná tátuhun ñayivi tóntó jini, nā xica nuu nuú naá yávi. <sup>22</sup> Ta vatí cáchi nā cúú ná nā ndíchí jini joo cúú ná nā tóntó jini. <sup>23</sup> Najándacoo na ñā cája cáhnu na Ndióxi, mé a tácu anda ama cáa quivi ta naçavaha na tiniñu yúú ñā ñéhe nahná ñā, ñā xihí yachi. Ta naçavaha na nahná laa xihín nahná quiti xihín nahná cōo. Ta naçasahá cája cáhnu na ñā.

<sup>24</sup> Sahá ñā cán queá najándacoo Ndióxi nā ñā ná caja na tá nuú ñā núu ñā cúni nā caja na. Anda jávi naçasahá nā cája quini na xihín yiquí cuñu táhan na. <sup>25</sup> Cō xeén nā candúsa na ñā ndaa cahan saha Ndióxi joo naçandúsa na ñā tuhún. Ta

naçaja cáhnu na ña naçavaħa Ndióxi ta çoq naçaja cáhnu na mé Ndióxi, mé a naçavaħa tóco ndihi ñaha. Jáchi Ndióxi quéa xíni ñúhú caja cáhnu í anda ama cáa quívi. Já ná coo.

26 Sahá ña cán quéa najándacoo Ndióxi na ña ná caja na ña xíca ini na caja na, ña ço ndítahan caja na. Ta naxinu na janda nuú najándacoo najihí ña quíji na xihín yí na ta já naçasáhá quíji xihín táhan ndaja jhí mé va na. Ta ña yóho cúú á ña çoq naçacu ini Ndióxi caja na. 27 Ta quiahva já naçaja ri dataa. Najándacoo da ña quíji da xihín ñájihí da ta naçasáhá ndicají ini da caja da ña núu xihín táhan mé va da janda quiahva naçasáhá quíji xihín táhan mé dá. Chí nuú cacahan nuú yo quéa cája xihín táhan da. Ta tá nandihí já cásáhá ndóho ini yiquí cuñu na sahá ña núu cája na.

28 Naxinu na nuú najándacoo xóo na Ndióxi ta ço cúni ga na candaa ini na sahá. Sahá ña cán quéa najándacoo xóo Ndióxi na ña ná cahvi núu ini na ta já cája tá cája na ña ço ndítahan nu ná caja na. 29 Nandicutú ndaa ínimá ná xihín tá nuú ña núu, ña cúú cuachi. Ta ndiáva íni na quehe na ñaha cómi inga ñayivi ta cája xíxi na xihín ná ta cáhíhvi ini na ta sáhní na ndii ta cáni táhan na ta jándahvi na ñayivi ta cáhvi núu ini na sahá inga na ta xíca nuu na cáhan túhún na. 30 Ta cánahá quini ndivaha

na xihín inga na ta cándají na Ndióxi ta yáha yúhu na xihín inga na ta cája ichi ini na ta cája cáhnu na mé va na. Ndiáva íni na ndaja caja chága na cuachi ta sáa ini na caja na ña cúni tátá náná na. 31 Co xíni túni na ta ço jáxinu ço na tuhun sahan na nuú ñayivi. Co quíhvi ini na ñani táhan na ta ço cája cáhnu ini na saha ná ta ço táhnda ini na sahá ñayivi. 32 Xíni vaha na ña naçahnda Ndióxi nu ná ta xíni na ña ndítahan quívi na sahá cuachi cája na. Vatí cándaq ini na ña yóho joo xihín ndinuhu ini na cája tá cája na ña núu. Ta janda cáji ini na tá cája java ñayivi mé ña núu.

## 2

*Caja vii Ndióxi saha tóco ndihi cuachi*

1 Mé a ndaa cómi ndó cuachi nu Ndióxi. Sándehé ndaa ndó inga ñayivi sahá cuachi cája na joo chícaan ndó cuachi jata mé va ndó jáchi cája ndó mé cuachi cán. 2 Sa xíni vaha í ña cája ndaa Ndióxi tá jándoho á ini ñayivi sahá cuachi cája na. 3 Mé ndó sándehé ndaa ndó cuachi cája java ga ñayivi ta cáhán ndo vaha cája Ndióxi tá chíndahá na cuhun na indayá. Joo cáhán ndo ña caja cáhnu ini a saha mé ndó vatí cája ndó mé cuachi cája na cán. 4 Ndaja núu ndó Ndióxi, mé a cúni caja cuahá ñamaní xihín ndo jáchi xíni ndó ña ço jándoho yachi Ndióxi ini na cája cuachi. Cúni Ndióxi ña

ná ndicó coo ini ndó jándacoo ndó cuachi cája ndó. <sup>5</sup> Ihvi ndivaha cúu ini ndó jáchi co jándacoo ndó cuachi cája ndó. Nandicuahá cuachi ndó ta jándoho chága Ndióxi ini ndó tá ná tandaa quivi caja vii a sahá cuachi nacaja ñayivi. Mé quivi já ndaca náha ña cojo ini mé á saha cuachi ñayivi ta náha ña ín saha mé á jándoho a ini na cán. <sup>6</sup> Mé tiempo cán quiahva Ndióxi nuú in in ñayivi ña ndítahan nu ná ndiquehe na sahá ña nacaja na ñuyiví yóho. <sup>7</sup> Java ñayivi nacaja na ña vaha xihín ndinuhu ini na ta nacacúni na caja na ña ná cajii ini Ndióxi xihín já ná cachi Ndióxi ña cúu ná ñayivi vaha. Ta nacacúni na coo na nu ín Ndióxi anda ama cáa quivi. Ta mé na cán cúu na cuhun coo xihín Ndióxi anda ama cáa quivi. <sup>8</sup> Joo cojo ini Ndióxi tá jándoho a ini na sáa ini, na co cuni cuhun xoo ña ndaa jáchi cátóo na cuhun na xoo ña núu. <sup>9</sup> Ndoho ndivaha ini tóco ndihi ñayivi cája cuachi ta cacuéha ndivaha ini na. Jihna ñúhú na naquixi chichi Israel ndoho ini já casáhá ndoho ini na coo naquixi chichi Israel. <sup>10</sup> Joo cajii ini Ndióxi xihín na cája ña vaha ta ndaja cáhnu a na ta caja mé á ña ná coo vaha ini ná. Jihna ñúhú já caja mé á xihín na naquixi chichi Israel já casáhá caja ri a já xihín na coo naquixi chichi Israel.

<sup>11</sup> Jáchi co cúu á tátuhun cuni Ndióxi in ñayivi ta cándají

a inga na jáchi in cúu ndihi ví nu Ndióxi. <sup>12</sup> Vatí co cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. Ta vatí cándaa ini ñayivi ña sáhdá ley Moisés joo cuhun tá cuhun na indayá sahá cuachi nacaja na. <sup>13</sup> Jáchi tá cándaa ini na ña sáhdá ley Moisés ta co cája na ña jáchi co cáchi Ndióxi ña cúu ná ñayivi ndaa nu mé á. Ta tá cája na ña sáhdá mé ley Moisés anda jáví cáchi Ndióxi ña cúu ná ñayivi ndaa nu mé á. <sup>14</sup> Ñayivi, na coo naquixi chichi Israel co xini na ña sáhdá ley Moisés. Cája mé ná ña sáhdá ley Moisés jáchi co xinu ini na caja na ña vatí co xini na mé ley Moisés. <sup>15</sup> Ña cája mé ná náha nuú ñayivi ña nasacu Ndióxi ley mé á ini xini túni ná. Ta xihín xini túni ná cándaa ini na tá cája na ña vaha á tá cája na ña núu. Ta quiahva já xihín mé xini túni ná xini vaha na á cája na cuachi á cája na ña vaha <sup>16</sup> tá ná xinu quivi quiahva Ndióxi chuun nu Jesucristo caja vii a sahá ña nacaja tóco ndihi ñayivi vatí nacaja jehé na ña. Jáchi já cáhan tuhun vaha saha Jesús ña jánaha i nu ndo.

*Na naquixi chichi Israel cándusa na ley Moisés*

<sup>17</sup> Ta mé ndó cáchi ndo cúu ndó na naquixi chichi Israel, na cándusa ley Moisés. Ta cáchi ndo cája chága Ndióxi ñamaní xihín mé ndó a juu ga xihín java ga ñayivi. <sup>18</sup> Ta

cáchí ndo ña sa xini ndó ña cuni Ndióxi caja ndó ta cáchi ndo ña sa xini ndó caxi ndó ña vaha jáchi sa najacuaha ndó ley Moisés. <sup>19</sup> Ta cáchi ndó tiahva vaha ndó chindeé ndó ñayivi ña ná ndihvi na ichi Ndióxi ta cáchi ndo ña cúu ndo tátuhun in lámpara jándiyéhe nuú ñayivi xica nuu nuú naá. <sup>20</sup> Ta cáchi ndo ña tiahva ndó jánaḥa ndó nuú ñayivi, na co xini túni ta cáchi ndo ña tiahva ndó jánaḥa ndó nuú ñayivi, na cámanj catacu vaha ini. Cómí ndo ley Moisés sahá ña cán queá cáhan ndo xini ndó tóco ndihi ña ndaa xihjín tóco ndihi ñaha. <sup>21</sup> Mé ndó jánaḥa ndo ley Moisés nuú ñayivi joo jihna ñúhú ndítahan caja ndó ña. Mé ndó jánaḥa ndó nuú ñayivi ña a váha toho caja cuihná na joo cúu ndó na cuihná. <sup>22</sup> Mé ndó jánaḥa ndó nuú ñayivi ña a váha toho coo in ta xihín in ñánaḥa, ña co cúu ñájíhí da joo ín ndó xihjín ñájíhí inga na. Mé ndó co cuni ndó yoco ndindojo veñuhu ñayivi, na coo naquixi chichi Israel joo caja cuihná ndo ña cuicá ñúhu veñuhu na cán. <sup>23</sup> Caja cáhnu ndó mé va ndó jáchi cómí ndo ley Ndióxi joo co caja cáhnu ndó mé á jáchi co cuni ndó caja ndó ña sáhdá mé ley. <sup>24</sup> Ña cán queá ndaa cáhan tuhun Ndióxi saḥa ndó tá cáchi a já: “Ñayivi, na coo naquixi chichi Israel cáhan núu na saḥa Ndióxi saḥa ña caja mé ndó, na Israel”, cáchi tuhun Ndióxi.

<sup>25</sup> Tá caja ndó ña sáhdá

ley Moisés já queá ndiyahvi marca nachicaan na yiquí cuñu ndó. Joo tá co caja ndó ña sáhdá ley Moisés já queá co ndiyahvi toho marca nachicaan na yiquí cuñu ndó. <sup>26</sup> Na coo naquixi chichi Israel co chicaan toho na mé marca jan yiquí cuñu na joo tá caja na ña sáhdá ley Moisés já ndiquehe Ndióxi na tá quiahva ndiquehe ri mé á na ín marca yiquí cuñu. <sup>27</sup> Ndá na caja ña cáchi ley vatí coo naquihvi marca yiquí cuñu na, ín sahá na cán chicaan na cuachi jatá na co caja ña cáchi ley vatí ín a nu ná ta naquihvi marca yiquí cuñu na. <sup>28</sup> Ña cán queá tá ná caja in na naquixi chichi Israel mé costumbre ña ná cuni cuití va ñayivi ña já queá a juú ña ndaa ña cúu ná cuéntá Ndióxi. Ta ndá na chicaan na marca yiquí cuñu na co caja na mé costumbre cuéntá yiquí cuñu cuití va na. <sup>29</sup> Ta ndá na naquixi chichi Israel tá mé a ndaa cúu ná cuéntá Ndióxi ta caja na ña cuni mé á co cúu á sahá ña nasahnda loho na yiquí cuñu na. Cúu á sahá ña nacaja ínimaj yij Ndióxi ini na. Ta mé na cán jácavatá na ini Ndióxi jáchi xihjín ínimaj yij mé á caja na ña cuni mé á.

### 3

<sup>1</sup> Sahá ña cán queá ná ndaca tuhún i ndohó ña yóho: Á ín cuahá chága saḥa ñayivi naquixi chichi Israel a juú ga saḥa java ga ñayivi. Á ndiyahvi nu Ndióxi ña

nachicaan na marca yiquí cuñu na. <sup>2</sup> Ajan. Ín cuahá sahá ñayivi naquixi chichi Israel ta tá nachicaan na marca yiquí cuñu na ndiyahvi a nu Ndióxi jáchi nasacu ini a jándacoo a tuhun a nuú na naquixi chichi Israel já ná cacomí na cuéntá sahá. <sup>3</sup> Ta vatí ná caja java ñayivi, na cándee ini mé á ña co cúni mé á caja na joo ama sahá ña cán a ndíjama toho Ndióxi jiní á ña ná caja ña núu xihín ná, vaha. <sup>4</sup> Co cája toho Ndióxi já. Ña cája Ndióxi ní tiempo cúu ndinuhu ña ndaa vatí tóco ndihi ñayivi cáhan na ña tuhún. Já cáchi tuhun Ndióxi já:

Xihín tuhun cáhan Ndióxi cándaa ini ña cúu á Ndióxi ña ndaa

ta a cúu quee vaha na chicaan cuachí jíquí jatá jáchi cúu mé á in Ndióxi ndaa, já cáchi tuhun mé á.

<sup>5</sup> Ta viti ná cahan i xihín ndó tá quiahva cáhan ñayivi ñuyíví. Cáhan na ña co cája vaha Ndióxi tá jándoho a mí sahá cuachí jáchi xihín cuachí jándindita jíco chága yó Ndióxi. Ta xihín ña cája í náha ña cúu Ndióxi in Ndióxi ña ndaa ta mí cúu yó ñayivi cuachí. <sup>6</sup> Joo co cáhan vaha na jáchi tá co cája ndaa Ndióxi, nduu já quéa a cúu caja vií mé á sahá ndihi cuachí cája tóco ndihi ñayivi ndúu ñuyíví.

<sup>7</sup> Já cáchi ñayivi já: “Cóho ná caja yó cuachí já ná candaa chága ini ñayivi ña cája ndaa Ndióxi ta xihín ña yóho caja

cáhnú chága na mé á”, cáchi na. Joo co cáhan vaha na jáchi tá cáhan yo ña xihín cuachí cája í ndicáhnú chága Ndióxi já quéa co cándaa ini ndá saha quéa jándoho Ndióxi ini ñayivi sahá cuachí na. <sup>8</sup> Joo java ñayivi cáchi na: “Cóho ná caja í cuachí já ná caja cáhnú ini mé á sahá cuachí já ndicáhnú chága Ndióxi”, cáchi na joo co cáhan vaha na. Ta java ñayivi cáhan ihvi na sahá yehe ta chicaan na cuachí jatá i ta cáchi na ña jánahe yehe ña yóho nuú ñayivi. Ndítahan jándoho Ndióxi ini tóco ndihi ñayivi, na jánahe ña yóho.

*Tóco ndihi ñayivi ndúu ñuyíví cómi na cuachí nu Ndióxi*

<sup>9</sup> Ña cán quéa a cúu cachi yó ña cúu mí na vaha chága a juú ga inga ñayivi sahá ña naquixí chichi Israel. Jáchi sa najánahe i nu ndo ña mí, na naquixi chichi Israel xihín na coo naquixi chichi Israel cúu yó ñayivi cája cuachí. <sup>10</sup> Já cáchi tuhun Ndióxi já:

Coó toho ni in ñayivi cája ña ndaa.

<sup>11</sup> Ta coó toho ni in na cándaa ini ña ndaa,

ta coó ni in na ndínducú Ndióxi.

<sup>12</sup> Nacaxoo na nu Ndióxi já naquehe na ichí núu cahan na.

Coó ñayivi cája ña vaha janda ni in tuhún na coó.

<sup>13</sup> Quini ndivaha yúhu ná jáchi cúu á tátuhun in yávi ndii ña cámaní ndee ñúhu.

Cúu ná ñayivi túhún ndivaha. Tá quiahva cája cōo tá tūn rí ñayivi já cája na cán tá cáhan na ña tuhún.

14 Ta mé cháhan cuití cáhan yúhu ná ta xihín ña yóho játahví na ini ñayivi.

15 Níi tiempo ndícají ini na cahní na ndii ta xihí ndii cája na.

16 Ta ndá nu xínu na jándoho na ini ñayivi jándacoo ndáhvi ñahá na.

17 Ta cōo xíní na ndá a quéa canduu vaha na xihín ñayivi.

18 Ta ni cōo cándaá ini na ña ndítahan nu ná cayihví na Ndióxi, cáchí tuhun Ndióxi.

19 Sa xíní yó ña ndítahan nuú na Israel caja na tóco ndihi ña sáhdá ley Moisés jáchí cúu á cuéntá na naquixi chíchi Israel. Ta xihín ña yóho chícaan ley Moisés cuachi jata mé na cán ta náha ña tóco ndihi ñayivi ndúu ñuyíví cómí na cuachi nu Ndióxi ta a cuú cachi na ña cōo cómí na cuachi. 20 Ni in ñayivi a cuú nduu ndaa na nu Ndióxi sahá ña cája na tóco ndihi ñaha sáhdá ley Moisés. Ña cája mé ley quéa ña ná candaá ini ña cómí yō cuachi nu Ndióxi.

*Jácacu Ndióxi mí jáchí cándéé ini mé á*

21 Viti jánaha Ndióxi nu yō ndá quiahva nduu ndaa yō nu mé á. Ta jári cáchí mé ley xihín na profeta sahá ña yóho. Ta cōo cúu á sahá ña cája í ña cáchí mé ley 22 joo sahá ña cándéé ini ñayivi

Jesucristo já cája Ndióxi ña ná nduu ndaa na nu mé á. Já caja mé á xihín tóco ndihi na cándéé ini Jesucristo jáchí tá quiahva cája Ndióxi xihín na Israel quiahva já cája ri a xihín na cōo cúu na Israel. 23 Tóco ndihí ñayivi cómí na cuachi nu Ndióxi ta nacaxicá na nu á ta a cuú nduu na ñayivi vaha tá quiahva cúni mé á. 24 Joo nacaja Ndióxi in ñamaní cáhnu xihín yō já ná nduu ndaa yō nu mé á. Ta cōo nachahví sahá jáchí nachahví Jesucristo sahá cuachí tá naxihí a ndica crúxu. Ta viti cōo cómí ga yō cuachi nu mé á. 25 Nachindahá Ndióxi Jesucristo ña ná cuita nii a sahá cuachí já ná cuu caja cáhnu ini Ndióxi saha yō tá ná cándéé ini Jesucristo. Xihín ña yóho náha ña cúu á in Ndióxi ndaa. Tá cámaní quivi Jesucristo sahá cuachí já cōo naquehe Ndióxi cuéntá sahá cuachi. Já nacaja mé á jáchí cáhnu ndivaha ini a. 26 Ta xihín ña yóho náha ña mé a ndaa táhyí cúu á in Ndióxi ña ndaa janda quivi viti. Tóco ndihi na cándéé ini Jesús cúu ná na ndaa nu Ndióxi jáchí najándoo Jesús cuachi na. Ta xihín ña yóho náha ña cúu á Ndióxi ndaa.

27 Ndá sahá cája cáhnu í mí, vaha. Ama ná cuu caja cáhnu í mí sahá ña nacaja í. Jáchí a cuú nduu ndaa yō nu Ndióxi sahá ña nasacu vaha í ley Moisés. Cúu á sahá ña cándéé ini Jesús. 28 Sahá ña cán quéa sa xíní yō viti ña nduu ndaa yō nu Ndióxi tá ná cándéé

iní Jesús cuití va. Ta cō cúu á sahá ña nasacu vaha í ña sáhdá ley Moisés.

29 Á cája Ndióxi ña yóho sahá na ñaquixi chichi Israel cuití va, vaha. Uñun. Jáchi jácacu Ndióxi na ñaquixi chichi Israel xihín na cō ñaquixi chichi Israel. 30 Jáchi ín in táláa Ndióxi ta mé Ndióxi yóho jácacu a ñayivi tá ná candeé ini na mé á vatí cúu ná na Israel á cō cúu toho ná. 31 Á cacu xoo í ley Moisés, da já. Uñun. Vatí candeé iní Jesús joo a cúu cacu xoo í ley Moisés jáchi náha ña cúu á ña ndaa ta ndiyahvi a nu yo.

#### 4

*Ña nacaja Abraham sanahá ndivaha*

1 Ta ndá saha nacachi Ndióxi sahá Abraham, tásáhnú jícó yo ña nanduu da ta ndaa nu mé á. 2 Cō cúu á sahá ña nacaja da ña nanduu da ta ndaa nu Ndióxi já ná a cája cáhnú da mé dá. Ta cō toho ñaha ña cuu caja cáhnú da mé dá saha. 3 Jáchi já cáhí tuhun Ndióxi: “Ñacandéé ini Abraham Ndióxi sahá ña cán quéa nanduu ndaa da nu mé á”, cáhí tuhun Ndióxi. 4 Ta viti ná caja í cuéntá cája chúun in dātaa. Ta tá nandihí cháhvi na nu dá ta mé jjuhún cán cō cúu á ña jása na nu dá. Cháhvi na nu dá jáchi cáni a nu dá quehe da ña sahá chuun nacaja da. 5 Jáchi a cúu ndaja ndaa ñayivi mé ná nu Ndióxi sahá ña cája na. Tá ná candeé ini ñayivi Jesús, mé a nachahvi sahá cuachí anda

jáví ndaja Ndióxi na ñayivi ndaa nu mé á. 6 Ta quiahva já nacahan rey David sahá ña yóho tá nacachi da ña tahví nahá nacuu da ndája ndaa Ndióxi vatí cō ñacaja da ñaha ña ná cuu ndaja ndaa da mé dá nu Ndióxi. 7 Já nacachi David já:

Tahví nahá nacuu ñayivi tá nacaja cáhnú ini Ndióxi sahá ña núu nacaja na ta tá najándoo a cuachi na.

8 Ta tahví nahá nacuu ñayivi tá cō ñaquehe Ndióxi cuéntá sahá cuachi nacaja na, nacachi David sanahá ndivaha.

9 Á tahví nahá nacuu na nachicaan marca yiquí cuñu cuití va. Uñun. Jáchi ndúu ndaa ñayivi nu Ndióxi sahá ña candeé ini na mé á ta cō cúu á sahá ña nachicaan na marca yiquí cuñu á cō a. Ta sa xini yó ña nacachi Ndióxi ña nanduu Abraham ta ndaa nu mé á sahá ña nacandéé ini da mé á. 10 Á nacachi Ndióxi ña cúu Abraham ta ndaa nu mé á tá cámaní chicaan da marca yiquí cuñu da á tá nandihí nachicaan da marca yiquí cuñu da. Nacachi a já xihín dá tá cámaní chicaan dá marca yiquí cuñu da. 11 Jihna ñuhú nacandéé ini Abraham Ndióxi anda javí nacachi a ña cúu Abraham ta ndaa nu á. Tá nandihí já nachicaan da in marca yiquí cuñu da já náha ña mé a ndaa nanduu da ta ndaa nu Ndióxi jáchi nacandéé ini da mé á. Xihín ña yóho naxinu Abraham



ñanduú da tátuhun tátá tóco ndihi ñayivi, ña candeé ini Ndióxi vatí coó nachicaan ña marca yiquí cuñu na. Ta vatí coó nachicaan ña mé marca yóho yiquí cuñu na joo cúu ná ñayivi ndaa nu Ndióxi. <sup>12</sup> Ta quiahva já ñanduú Abraham tátá ña in mé marca yiquí cuñu. Ta a juú sahá mé marca yóho cuití va jáchi ñanduú da tátá ña sahá ña candeé cáhnu ini na Ndióxi tá quiahva ñacandeeé ini Abraham mé á tá cámaní chicaan ña marca yiquí cuñu da.

*Jáxinu coo Ndióxi tuhun sahan nu yo tá ná candeé ini mé á*

<sup>13</sup> Sañahá ndivaha ñasahan Ndióxi tuhun a nu Abraham xihín nuú ña ñaquixi chichi da. Ñacachi Ndióxi ña tandaa quiví ñehe táhvi ná ña ná nduu ñuyiví ñaha mé ná. Coó ñasahan Ndióxi tuhun a nu Abraham sahá ña ñacaja da ña sáhdá ley Moisés. Ñasahan mé á tuhun a nu dá sahá ña ñacandeeé ini da mé á ta já ñanduú ndaa ña nu Ndióxi. <sup>14</sup> Joo tá mé a ndaa ña ñasacu vaha ley cúu ña ñehe táhvi cuhun indiví já queá coó chuun candeé ini Ndióxi, dá já. Jáchi xihín ña yóho jándacoo núu í tuhun ñasahan Ndióxi nu yo ña caja mé á xohó. <sup>15</sup> Nditahan nu Ndióxi jándoho a ini ñayivi tá coó caja na ña sáhdá ley Moisés. Joo tá coó toho mé ley já queá coó toho cuachi ñayivi nu ley.

<sup>16</sup> Ñasahan Ndióxi tuhun a nu Abraham sahá ña

ñacandeeé ini da mé á. Ta sahan mé á tuhun a nu yo tá candeé ini mé á. Coó a caja toho a á caja í ña sáhdá ley Moisés á coó caja toho í ña jáchi mé a ndaa ndiquehé ña vaha sahan Ndióxi nu yo tá candeé ini mé á tátuhun ñacandeeé ini Abraham mé á. Ta cúu á tátuhun ñanduú Abraham tátá tóco ndihi ña candeé ini Ndióxi. <sup>17</sup> Já cáchi Ndióxi já xihín Abraham: “Ñacaja í ña ná nduu mún tátá ñayivi nduu cuahá nación”, já cáchi tuhun Ndióxi sañahá. Mé Abraham cúu dá tátuhun tátá ndihí nu Ndióxi. Ñacandeeé ini da Ndióxi, mé á cuu jánditacu tucu ndii ta xihín tuhun cáhan mé á caja ña ná coo ña coó ñasahin jihna.

<sup>18</sup> Vatí coó ñaxinu nuú tuhun ñasahan Ndióxi nu Abraham joo ñacandeeé tá ñacandeeé ini da Ndióxi ta ñasandati da jáxinu coo mé á tuhun a. Já ñanduú da chichi nuú ñaquixi cuahá ñayivi, ña nduu cuahá nación. Já ñayaha jáchi já ñacachi Ndióxi xihín dá sañahá: “Ndicuahá ndivaha ñayivi quixi chichún”, ñacachi Ndióxi xihín dá. <sup>19</sup> Ta ñacandeeé ini Abraham Ndióxi ña cacu jahyi da vatí sa ñacayati quiví xinu ña in ciento cuja ta vatí sa cándaa cáxi ini da ña jalóho cuití va quiví catacu da ñuyiví yóho xihín Sara, ñájihí ña. Ta sa cándaa ini da ña a cuú ga cacu jahyi ná joo ñacandeeé ini da Ndióxi. <sup>20</sup> Ta coó ñacavitá ini da ta coó ñandicaní ivi johó

ini da sahá tũhun naſahañ Ndióxi nu dá. Joo nanduu ndeé chága ví ini da já ná candeé cáhnu chága ví ini da Ndióxi ta naçaja cáhnu da mé á. <sup>21</sup> Já naxinu ini da ña mé a ndaa táhyí ín ndée Ndióxi ná jáxinu a tũhun sahan nuú ñayivi. <sup>22</sup> Naçandeé ini Abraham Ndióxi sahá ña cán quea naçachi a ña nanduu da ta ndaa nu mé á.

<sup>23</sup> Ta tá cáchi tũhun Ndióxi ña nanduu Abraham ta ndaa nu Ndióxi sahá ña naçandeé ini da mé á já quea coo naçahyi ña yóho sahá Abraham cuití va. <sup>24</sup> Naçahyi ri a saha mí jáchi tá ná candeé ini Ndióxi, mé á najánditacu Jesús, xitoho í tañu ndii já quea ndiquehe Ndióxi mí ta ndaja mé á mí ña ná nduú ñayivi ndaa nu mé á. <sup>25</sup> Ta nandiquiahva na Jesús ña ná quivi a ndica cruxu sahá cuachí. Ta tá nandihí nanditacu tucu a ña ná nduú ñayivi ndaa nu mé á.

## 5

*Naçaja Ndióxi ña ná nduu ndaa yó nu mé á*

<sup>1</sup> Sahá ña cán quea coo ga cuachi jata yo jáchi naçandeé ini Ndióxi ta nandique táhan maní yó xihin á sahá ña naçaja Jesucristo, xitoho í. <sup>2</sup> Ta sahá ña candeé ini Jesucristo sahá ña cán quea cája Ndióxi cuahá ñamaní xoho. Candeé ini mé á ta cáji ini ndátí cuhun í coo í xihin mé á. <sup>3</sup> Ta quiahva já cáji ini tá ná quixi tondóho nu yo jáchi sa xini yo ña

ndindacú chága ini cuéntá Ndióxi tá ndóho í tondóho. <sup>4</sup> Tá sa nandindacú ini cuéntá Ndióxi naçaja tondóho anda jávi táhan ini Ndióxi xihin yo jáchi naxito ndojó mé á mí ta nandindacú chága ini cuéntá mé á. Tá natahan ini Ndióxi xihin yo anda jávi candaa vaha ini ña jáxinu coo mé á tũhun naſahañ a nu yo. <sup>5</sup> Tá ndátí ña naſahañ Ndióxi tũhun a quiahva nu yo já a cándo nuu toho Ndióxi xihin yo jáchi najándicutú Ndióxi ínima yo xihin ña quihvi ini a mí. Naçaja Ndióxi ña yóho xihin ínima yii mé á ña naſahañ nu yo.

<sup>6</sup> Sahá ña co ndée yo jácacú mí sahá ña cán quea naxihí Jesucristo saha yo ta coo naçayáncá a quivi a ta ni coo naxihí yachi a. Naxihí a mé quivi nanditahan quivi a sahá cuachi ñayivi quini. <sup>7</sup> Ihvi ndivaha cája já queta in ñayivi quivi na sahá inga ñayivi vatí cúu ná na vaha. Joo mé a ndaa cuu queta in ñayivi coo tiahva na quivi na sahá in na cúu na vaha ndivaha. <sup>8</sup> Náha Ndióxi nu yo ña mé a ndaa táhyí quihvi ini a mí jáchi vatí cúu yó ñayivi cája cuachi joo naxihí tá naxihí Jesucristo saha yo. <sup>9</sup> Ta viti sa nanduu ñayivi ndaa nu mé á sahá nii Jesucristo, dó naxita saha yo. Ta sa saha mé á çacu ndaa ínima yo já ná a cójo ini Ndióxi sahá cuachí. <sup>10</sup> Nasacuú na coo naxini táhan vaha xihin Ndióxi joo sahá ña naxihí in túhún jini já jahyi mé á sahá ña cán

quéa nandique táhan máni yó xihín á viti. Xihín ña yóho cuu cacu ndaa ínima yo jáchi nanditacu tucu Jesucristo ta sa nandique táhan máni yó xihín Ndióxi viti. <sup>11</sup> Ta a juú ña yóho cuití va vaha jáchi cájii ndivaha iní xihín Ndióxi sahá ña ñacaja Jesucristo, xitoho í. Sahá ña cán quéa naxinu yó nandique táhan máni yó xihín Ndióxi.

*Ña ñacaja Adán xihín ña ñacaja Jesucristo*

<sup>12</sup> Ta sahá cuachi ñacaja in ña naní Adán sahá ña cán quéa nandihvi cuachi ñuyiví yóho ta tá nandihvi cuachi ñuyiví já ñacasáhá xihí ñayivi. Tóco ndihí cája í cuachi ta sahá ña yóho ndítahan quivi ndihí. <sup>13</sup> Tá cámani quiahva Ndióxi ley mé á nu Moisés nasacomí tóco ndihí ñayivi cuachi. Joo co quéhe Ndióxi cuéntá sahá cuachi jáchi coó toho ley nasahiin tiempo já. <sup>14</sup> Janda tiempo nasahiin Adán ñacasáhá xihí ñayivi sahá cuachi na ta janda naxinu tiempo nasahiin Moisés naxihí na vatí coó ñacaja na mé cuachi ñacaja Adán. Nasacomí Adán cuachi jáchi ñaquehe núu da ña ñacachi Ndióxi xihín dá. Ta mé Adán yóho nasacuu da tátuhun yuhú nuú da quixi tá nu ndihí.

<sup>15</sup> Joo a cuú jándique táhan í cuachi ñacaja Adán xihín tóco ndihí ña vaha sáhan Ndióxi nu yo. Jáchi sahá cuachi ñacaja in túhún ña, xihí cuahá ndivaha ñayivi.

Joo ñamaní ñacaja Ndióxi xoho sahá ña ñacaja in túhún ña naní Jesucristo cúu á in ñamaní cáhnu ndivaha ña ñéhe táhvi cuahá ndivaha ñayivi. <sup>16</sup> A cuú jácatáhan í cuachi ñacaja in dataa xihín ñamaní cája Ndióxi xoho jáchi saha in túhún cuachi naxinu cháhan jatá ñayivi ta já ñacasáhá xihí na. Vatí nandicuahá cuachi ñayivi joo ñacaja Ndióxi ñamaní xihín ná já ñandaja ndaa mé á na ta ñacachi a ña coó ga cuachi na nu mé á. <sup>17</sup> Sahá cuachi ñacaja in túhún ña naní Adán ñacasáhá xihí ñayivi. Joo sahá ña ñacaja in túhún ña naní Jesucristo ñéhe táhvi yó ndoo máni uun cuachí nu Ndióxi. Jáchi cáhnu ndivaha ñamaní cája Ndióxi xoho ña cán quéa ñéhe ndeé chága iní yo caca í ichí cuéntá Ndióxi sahá ña ñacaja Jesucristo.

<sup>18</sup> Sahá cuachi ñacaja Adán ñacachi Ndióxi ña cómi tóco ndihí ñayivi cuachi nu á. Joo sahá ña ndaa ñacaja Jesucristo ñacachi Ndióxi ña ndá ñayivi ñacuu cuu nduu ndaa na nu mé á jáchi co cómi ga na cuachi nu á. <sup>19</sup> Sáa nasahiin ini Adán jáchi coó naxeén da caja da ña cúní Ndióxi. Ta sahá ña ñacaja Adán cuahá ndivaha ñayivi ñandu na ñayivi cuachi. Joo ñacaja Jesucristo tóco ndihí ña cúní Ndióxi ta xihín ña ñacaja in túhún ña Jesucristo ñandu ndaa cuahá ndivaha ñayivi nu Ndióxi.

<sup>20</sup> Tá nasahan Ndióxi ley nu Moisés já ñacandaa ini ñayivi.

ñā cuḡahā chāgā cúú cuḡachi na. Joo tá nandicuḡahā cuḡachi ñayivi já natahvi chāgā ini Ndióxi saḡa ná. <sup>21</sup> Nandihvi cuḡachi ñuyívi ta nasacomí a cuéntá saḡá ñayivi. Ta saḡá ñā naḡaja na cuḡachi saḡá ñā cán queá naḡasáhá xihí na. Joo naḡaja Ndióxi cuḡahā ñamaní xihín yó ta nasacomí a cuéntá saḡa yó já ná cuu nduú ñayivi ndaa nu mé á ta já ná cuu cacu ndaa ínimā yó andā ama cáa quívi saḡá ñā naḡaja Jesucristo, xitoho í.

## 6

*Naxihí yó nuú cuḡachi joo tácu yó xoo Jesucristo*

<sup>1</sup> Ama ná cachi xihín táhan í: “Cóho caja tá caja í cuḡachi já ná coo cáhnu chāgā ini Ndióxi saḡa yó.” <sup>2</sup> Ama ná cachi rí já jáchí cúú yó tátuhun na sa naxihí nuú cuḡachi ta tá sa naxihí yó nuú cuḡachi ama ná cacomí ga cuḡachi cuéntá saḡa yó. <sup>3</sup> Tá naḡandúta yó cuéntá Jesucristo cúú á tátuhun in yó naxihí xihín Jesucristo. <sup>4</sup> Jáchí tá naḡandúta yó já cúú á tátuhun in yó nanduxu xihín Jesucristo ta naxihí yó nuú cuḡachi. Ta tá najánditacu Ndióxi Jesucristo já cúú á tátuhun in yó nanditacu xihín mé á. Jáchí xihín ndée cáhnu Ndióxi, tátá yó nanditacu Jesucristo ta sa xihín mé ndée cán cuu caca í íchí saá viti.

<sup>5</sup> Tá quiahva in nanduú xihín Jesucristo tá naxihí a quiahva já in nanduú xihín á tá nanditacu a. <sup>6</sup> Tá cámani

cándeé iní Jesús já naḡatóó ndivaha í cája í cuḡachi jáchí naḡahnda cuḡachi chuun nu yó. Joo saḡá ñā naxihí Jesucristo ndica crúxu saḡá ñā cán queá najándacoo í cuḡachi cája í ta viti co sáhnda ga cuḡachi chuun nu yó. <sup>7</sup> Jáchí tá sa naxihí in dataa co sáhnda ga cuḡachi chuun nu dá ñā cán queá cúú á tátuhun sa naxihí yó xihín Jesucristo saḡá ñā cán queá co sáhnda ga cuḡachi chuun nu yó viti. <sup>8</sup> Ta cúú á tátuhun naxihí yó tá naxihí Jesucristo ñā cán queá xíní vaha í ñā cuḡhun yó coo í nu ín mé á andā ama cáa quívi. <sup>9</sup> Sa xíní yó ñā nanditacu tucu Jesucristo ta a ndicó coo ga quívi a jáchí ní in ñaha a cuú caja ñā ná quívi tucu a. <sup>10</sup> In tálaá tañu naxihí a saḡá cuḡachí ta viti xihín chí nuu co ndítahan ga nu á quívi a saḡá cuḡachí. Ta viti tácu Jesucristo cuéntá Ndióxi. <sup>11</sup> Ñā cán queá ndítahan catacu ndó ñuyívi yóho tátuhun na sa naxihí nuú cuḡachi já ná a cáhnda ga cuḡachi chuun nu ndó. Ndítahan catacu ndó cuéntá Ndióxi ñā in ná nduu ndó xihín Jesucristo.

<sup>12</sup> Ñā cán queá a quiahva ndó ñamaní nuú cuḡachi ñā ná cacomí a cuéntá saḡa yiquí cuñu ndó jáchí tá ná ndiquiahva ndó mé ndó ndahá cuḡachi já queá caja ndó cuḡachi ñā xíca ini ndó caja ndó. <sup>13</sup> A ndiquiahva ga ndó yiquí cuñu ndó ndáha cuḡachi ná a cája ndó ñā núu. Joo vaha chāgā ná ndiquiahva ndó yiquí cuñu

ndó ndáha Ndióxi. Nasacuu ndó tátuhun in ndji nu Ndióxi jáchi nacaja ndó cuachi joo viti cúú ndó tátuhun ñayivi, na nanditacu tucu nacaja Ndióxi. Ndítahan ndiquahva ndó mé ndó ndáha Ndióxi ña ná caja ndó ña vaha. <sup>14</sup> Co cómi ga cuachi cuéntá saha ndó viti jáchi tácu ndo sahá ñamaní cája Ndióxi ta co tácu ndo sahá ña sácú vaha ndó ley Moisés.

*Ndítahan nu yo ndicaxí ndá íchi candico yo*

<sup>15</sup> Ama ná caja rí cuachi sahá ña co cómi ga ley Moisés cuéntá saha yo. Uhun. A cája toho í ña jáchi xihín ñamaní cája Ndióxi xihín yo cándaq iní ña cómi mé á cuéntá saha yo. <sup>16</sup> Sa xini ndó ña ndiquahva in mozo mé dá ndáha xitoho da ta cája da ndá chuun nacuu ña sahan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cuhun ndó indayá. Ta tá ná ndicaxi ndó caja ndó ña cuni Ndióxi já quéa cacuu ndó cuéntá mé á ta caja mé á ña ná nduu ndaa ndó nu á viti. <sup>17</sup> Jihna nacaja ndó cuachi cuití va joo ndixahvi Ndióxi jáchi xihín ndinuhu ini ndó cája ndó ña ndaa, ña nacatiahva ndó cuéntá Ndióxi. <sup>18</sup> Nandoo cuachi ndó ta co cúú ga ndó mozo cuéntá cuachi viti. Nanduu ndó mozo cuéntá Ndióxi ta cája ndó ña ndaa viti. <sup>19</sup> Najána ha i sahá in mozo nu ndó já ná

candaq vaha chaga ini ndó ña ndaa. Mé ndó nasacuu ndó tátuhun mozo jáchi jihna nandiquahva ndó mé ndó ndahá cuachi ta mí cuachi nasacuu a tátuhun xitoho ndó. Nacaja ndó tá nuú ña núu, ña nacahvi ini ndó caja ndó. Joo viti nandiquahva ndó mé ndó ndahá Ndióxi ta nasacu ini ndó caja ndó ña ndaa xihín ndinuhu ini ndó jáchi já cáni a nu ndó caja ndó ña ná cacuu ndó ñayivi yji nu mé á.

<sup>20</sup> Tá nasacuu ndó mozo cuachi coo naxeén ndó caja ndó ña ndaa ña cuni Ndióxi. <sup>21</sup> Ni in ña vaha coo nañehe ndó saha cuachi nacaja ndó. Ta viti cácahan nuu ndo saha mé cuachi nacaja ndó. Ta ndá ñayivi sá cája cuachi cuhun na coo na indayá anda ama cáa quivi. <sup>22</sup> Joo co cómi ga cuachi cuéntá saha ndo viti jáchi nanduu Ndióxi xitoho ndó. Vaha quehe ndó tá ná caja ndó ña cuni mé á jáchi já xinu coo ndó cacuu ndó ñayivi yji nu Ndióxi ta já cuhun ndó coo ndó xihín mé á anda ama cáa quivi. <sup>23</sup> Jáchi tá cája í cuachi cúú á tátuhun ndiyíca yo nu Ndióxi sahá ña nacaja í ta ini indayá chahví sahá. Joo ñamaní cája Ndióxi xoho sahá ña naxihi Jesucristo, xitoho í cúú á ña cohó catacú indivi xihín mé á anda ama cáa quivi.

## 7

*Co cómi ga ley cuéntá saha yo*

1 Candehé ndo ñani mí i, na cúu cuéntá Jesús. Sa xini vaha ndó ley Moisés ta sa xini ndó ña cómi ley cuéntá sahá ñayivi nani tácu cuití va na.

2 Cúu á tátuhun tá natandaha in ñañaha xihin in dataa já queá cáchi ley cúu ña ñájihí da anda ná xinu coo quivi quivi da. Joo cáchi mé ley ña tá sa naxihí da co cúu ga ña ñájihí da. 3 Sahá ña cán queá cuu tandaha tucu ña xihin inga ta jáchi co sáhdá ga mé ley chuun nu ña. Ta co cája ña cuachi nu Ndióxi tá ná tandaha tucu ña jáchi sa naxihí va yí ña. Joo tá ná tandaha tucu ña nani tácu yí ña já queá cája ña cuachi nu Ndióxi.

4 Ta quiahva já ndóho ri ndóho va ñani mí i, na cúu cuéntá Jesús. Cúu á tátuhun naxihí ndó nu ley Moisés ña cán queá co cómi ga mé ley cuéntá saha ndo. Ta viti núná nuú Jesucristo cacomí a cuéntá saha ndo ña ná cacuu ndó cuéntá mé a nanditacu tucu. Ta viti cuu caja í ña vaha, ña cuni Ndióxi. 5 Tá cámaní candeé iní Jesucristo nacaja í ndinuhu ña núu ña nasacahvi iní caja í. Vatí sa xini yó ña cáchi mé ley joo nacaja chága yó cuachi ña nacahvi iní caja í. Ña cán queá nanditahan nu yó quivi ná cuhun í ndoho iní indayá, nduu. 6 Joo nacaja Ndióxi ña ná janí yó nuú ña sáhdá ley Moisés ña nasacomí cuéntá saha yo. Ta viti núná nu yó caja í ña cuni mé á jáchi nandijama ínimá yíi Ndióxi

mí sahá ña cán queá co cómi ga ley, ña nacahvi na jihna cuéntá saha yo viti.

*Cája tá cája í cuachi vatí candeé iní Jesucristo*

7 Á cuni cachi ña yóho ña a váha toho ley Moisés. Uhun. Ña vaha cúu á jáchi xihin ña cáhan mé ley cándaá vaha iní ndá a cúu cuachi. Já cáchi mé ley já: “A ndiáva toho ini ndó cacomí ndó ñaha cómi inga na”, cáchi a. Ña cán queá cándaá iní viti ña a váha toho tá ná caja i já. 8 Tá ná a cóo toho ley, nduu já queá a cándaá iní i ña cúu cuachi. Ta coó toho cuachi caja i tá coó ley, nduu. Joo viti cándaá iní i ña a váha toho ndiáva iní i cacomí i ñaha ñani táhan i jáchi cáchi ley a cája i ña. Ña cán queá nandihvi cuachi iní i ta nacasáhá cáhvi iní i ndaja caja i cacomí i ñaha inga na. 9 Tá cámaní candaa iní i ña cáchi ley Moisés já nacahán i cúu u da vaha. Joo tá natandaa quivi natacu iní i xihin ña cáchi ley Moisés anda jáví nacandaá iní i ña núhu cuachi iní i ta nacandaá iní i ña cúu u da cája cuachi ta ndítahan nuú i cuhun i indayá sahá. 10 Tá ná cuu caja ñayivi tóco ndihi ña cáchi ley Moisés já cuhun na coo na nu íin Ndióxi anda ama cáa quivi. Joo coó nacuu caja i ña cáchi mé ley sahá ña cán queá nditahan nuú i cuhun i indayá sahá. 11 Najándahvi cuachi yehe jáchi nacahán i cuu cuhun i indiví sahá ña cája i ña cáchi ley joo sahá ña

coó n̄acuu x̄inu coo i caja i ña sahá ña cán quéa cuhun i indayá.

12 Ta ȳii ndivaha cúu ley Moisés. Ta ȳii ndivaha cúu tuhun nasahnda Ndióxi caja í. Ta cúu á ña ndaa ta cúu á ña vaha. 13 Ama ná jáqueta nuu ley yehe ini indayá nani cúu á ña vaha. Uhun. A cúu cuití caja ley jáqueta nuu a yehe ini indayá. Cuachi quéa ndúcú chindahá yehe cuhun i indayá. Nañehe íni cuachi cañehe a yehe cuhun i indayá saha ley. Xihín ña yóho cándaá ini i ña quini ndivaha cúu cuachi ta vaha ndivaha cúu mé ley.

14 Sa x̄ini yo ña cúu ley cuéntá Ndióxi joo yehe cúu u in da cája cuachi ta cája i ña núu jáchi mé cuachi cómi a cuéntá sahá i. 15 Co cándaá ini i ña cája i jáchi cún̄i caja i ña vaha joo co cája i ña. Ña cája i quéa mé ñaha ña cándají i. 16 Tá cája i cuachi ña co cún̄i caja i já cándaá ini i ña vaha cúu ley. 17 Mé a ndaa co cún̄i caja i cuachi joo cuachi ndácaan ini i cúu á ña jácahan yehe cája i ña. 18 Sa x̄ini ña co ndeé yiquí cuñu i caja ña vaha jáchi coó ña vaha ndácaan ini i. Vatí cún̄i caja i ña vaha joo co sahan mé á caja i ña. 19 Cún̄i caja i ña vaha joo co cája toho i ña. Ña cája i cúu á ña núu ña co cún̄i caja i. 20 Caja i ña co cún̄i caja i já cándaá ini i ña cuachi ndácaan ini i quéa chindahá nihni a yehe cája i ña núu.

21 Cándehé ndo ña yóho:

Vatí cún̄i caja i ña vaha joo cája i ña núu jáchi ña cán cuití va x̄inu íni i caja i. 22 Janda ínima i x̄inu coo ña cátoó i caja i ña cáhan ley Ndióxi. 23 Joo ndácaan inga ñaha ini i ta cáni táhan mé ñaha cán x̄ihin x̄ini túni i. Ta mé ñaha ndácaan ini i cúu á cuachi. Ta cándéé cuachi x̄ihin i já sáhdá a chuun nuú i.

24 Ndáhvi nahá n̄acuu u. Yo cuu jácau yehe ná a cája ga i cuachi ña cañehe yehe cuhun i indayá. 25 Ndiqiahva i ndixahvi nu Ndióxi jáchi x̄ihin ña nacaja Jesucristo, xitoho í cuu jácau Ndióxi yehe já ná a cája ga i cuachi. Ña cán quéa cándaá ini i ña ndítahan cája i ña sáhdá ley Ndióxi joo cuachi ndácaan ini i sáhdá chuun nuú i.

## 8

*Ndico í in íchi nu cája í ña cún̄i ínima ȳii Ndióxi*

1 Ta sahá ña in nanduú x̄ihin Jesucristo sahá ña cán quéa a chínúu Ndióxi cuachi jata yo viti. Jáchi co cája ga í ña x̄ica ini yiquí cuñu í. Ña cája í cúu ña cún̄i ínima ȳii Ndióxi. 2 Jáchi x̄ihin ña nacaja Jesucristo najácau ínima ȳii Ndióxi mí ta nasahnu a cuachí já ná a cuhun yó indayá. 3 Coó n̄acuu caja í tóco ndihi ña sáhdá ley Moisés ña cán quéa coó n̄acuu nduu ndaa yó nu Ndióxi x̄ihin mé ley. Ña cán quéa nacaja Ndióxi inga ñaha tá nachindahá mé á Jesucristo, jahyi a. Nanduú Jesucristo

in ñayivi ta tá quiahva cácu ñayivi quiahva já nacacu Jesucristo ñuyiví. Ta tá naxihí mé á ndica crúxu já nachahví a saha tóco ndihí cuachi saha ña cán quéa co sáhdá ga cuachi chuun nu yo. <sup>4</sup> Ta nacaja Ndióxi ña yóho já ná cuu xinu coo í caja í ña sáhdá ley mé á tá ndáca ínimá yíi Ndióxi mí. Jíin va caja í viti jáchi co ndúu ga yó ndahá cuachi.

<sup>5</sup> Ñayivi, na cája ña xíca ini yiquí cuñu, na cán cúu na ndícani cuahá ini sahá yiquí cuñu. Joo na cája ña cúní ínimá yíi Ndióxi na cán cúu ná ndúcú jácavatá na Ndióxi. <sup>6</sup> Tá ná ndicani cuahá ini na sahá ña cúní yiquí cuñu na já quéa cuhun na indayá. Joo tá ná ndicani ini na sahá ña cúní ínimá yíi Ndióxi já quéa coo vaha ini na ta ñehe táhvi ná cuhun na indiví. <sup>7</sup> Joo ñayivi ndícani ini saha yiquí cuñu, na cán cúu ná na ihvi Ndióxi jáchi co cúní na caja na ña cáchí ley Ndióxi ta ni a cuú caja na ña. <sup>8</sup> Sahá ña cán quéa tá cómi cuachi cuéntá saha ná já quéa a cuú caja na ña cájii ini Ndióxi xihín.

<sup>9</sup> Ta tá mé a ndaa ndácaan ínimá yíi Ndióxi ini ndó já quéa co ndíco ga ndó íchi cuéntá ña núu, ña nasacaja ndó jihna. Ta viti ndíco ndó íchi vaha ta cája ndó ña cúní Ndióxi. Jáchi ndá na co ndácaan ínimá Jesucristo ini, na cán co cúu ná cuéntá mé á. <sup>10</sup> Tá ndácaan Jesucristo ini ínimá ndo vaxi quiví quivi yiquí cuñu ndó sahá cuachi

naçaja ndó. Joo mé a ndaa catacu ínimá ndo nu íin Ndióxi anda ama cáa quiví jáchi nanduu ndaa ndó nu Ndióxi nacaja mé á. <sup>11</sup> Nacaja ínimá yíi Ndióxi ña ná nditacu tucu Jesucristo ta tá ndácaan ínimá yíi Ndióxi ini ínimá ndo já tandaa quiví caja mé á ña ná nditacu tucu yiquí cuñu ndó saha mé ínimá yíi Ndióxi ndícaan ini ndó.

<sup>12</sup> Candehé ndó ñani míi, na cúu cuéntá Jesús. Co ndítahan nu ndó caja ndó ña núu, ña xíca ini ndó caja ndó. <sup>13</sup> Jáchi tá ndinuhu ini ndó caja ndó ña núu, ña xíca ini ndó já quéa ndítahan nu ndó cuhun ndó indayá. Joo tá xihín ndée ínimá yíi Ndióxi jándihi ndó sahá ña núu xíca ini ndó caja ndó já quéa vaxi quiví cuhun ndó coo ndó xihín mé á anda ama cáa quiví.

<sup>14</sup> Ndá na nandiquiahva mé ndáha ínimá yíi Ndióxi ña ná candaca a na, mé a ndaa táhyí cúu ná jahyi Ndióxi. <sup>15</sup> Nasahan Ndióxi ínimá yíi mé á nu ndo joo coo nasahan ña nu ndo ña ná catavi nihni a ndohó ta já quixi ña jáyihví a ndohó. Nasahan Ndióxi ínimá yíi mé á nu ndo jáchi xihín ña yóho ndája Ndióxi ndohó jahyi mé á ta saha mé ínimá yíi yóho cáhan yó xihín Ndióxi ta cáchí yo: “Tátá maní i.” <sup>16</sup> Ta cáchí ínimá yíi Ndióxi xihín ínimá yo ña mé a ndaa cúu yó jahyi Ndióxi. <sup>17</sup> Ta sahá ña cúu yó jahyi mé á sahá ña cán quéa ñehe táhvi mí ví ndiquehé ña nacachi Ndióxi quiahva nu yo. Ta sa mé ña



ñehē táhvi yō yóho tahnda java ña xih̄in Jesucristo. Tá ta mé a ndaa táhyi ndoho iní xih̄in á já quéa tá nandih̄i cohó coo í xih̄in mé á indivi ta cán ndicáhnu í xih̄in á.

18 Coó a caja toho a tá ná ndoho iní í ñuyiví yóho jáchi vaxi quiví ndicáhnu ndivaha í xih̄in Jesucristo caja Ndióxi. 19 Tóco ndih̄i ña ñacavaaha mé á ndátí ndih̄i a ta ndiáva iní a ña ná tandaa quiví quiví cachí Ndióxi ndá ñayivi cúu cuéntá mé á. 20 Nacaja Ndióxi ña ná ndoho iní tóco ndih̄i ña ñacavaaha mé á. Mé ñaha ñacavaaha Ndióxi co cúní a ndoho iní a joo sácú iní Ndióxi ña ná ndoho iní tóco ndih̄i ña ñacavaaha mé á. Ta ndátí tiahva ndih̄i ñaha 21 anda tandaa quiví caja Ndióxi ña janí ña já ná a cácomí ga cuachi cuéntá sahá já ná a tíví ga ña. Ta ñúchí ndivaha mé quiví já tá cajji iní tóco ndih̄i ñaha ñacavaaha Ndióxi xih̄in tóco ndih̄i na cúu jahyi mé á. Jáchi a cácomí ga cuachi cuéntá sahá ná. 22 Sa xíní yō ña janda sanahá ndivaha ta anda viti tána ndivaha tóco ndih̄i ña ñacavaaha Ndióxi ta ndóho ndivaha iní a tátuhun ndóho iní in ñáñaha tá ndúcú ndéé ña cacu jahyi ña. 23 Ta quiahva já ndóho ri iní mí ví. Ínima yji Ndióxi cúu ña sahan tiahva mé á nu yō já ná candaa iní ndá quiahva ín ña quiahva mé á nu yō chága chí nuu. Ta tána ndivaha í anda quiahva ná yaha ña ndóho iní. Ta ndátí tandaa quiví ndaja Ndióxi tóco

ndih̄i mí ná nduú jahyi mé á já ná ndiquehé yiquí cuñu saá. 24 Najácacu Ndióxi mí jáchi ñacandee iní mé á vatí coó ñaxiní ña ñacachi mé á quiahva nu yō. Tá xíní cáxi yō in ñaha já candaa iní ña co xíní ñúhú toho candatí quehé ña jáchi co xíní ñúhú candatí ñaha cómí yō. 25 Joo tá ná candatí in ñaha ña co xíní yō já quéa co ndíhi iní nani ndátí ña.

26 Tá cávitá iní já chindeé ínima yji Ndióxi mí jáchi co tiahva í ndaja caça tahví yō nu Ndióxi tá quiahva ndítahan caça tahví yó nu á. Joo sa mé ínima yji Ndióxi yóho tána ta cáhan xih̄in tuhun ña a cuú cahan yō. Já caja mé á tá xíca tahví a nu Ndióxi saha yō. 27 Ta sa xíní Ndióxi ña cáhvi iní ta sa xíní a ña xíca tahví ínima yji mé á saha yō. Ña cúní Ndióxi caja saha yō ña jan quéa xíca tahví ínima yji mé á saha yō, na cúu ñayivi cuéntá mé á.

*Ni in ñaha a cúu cahnu a mí tá candeé iní Jesucristo*

28 Ta sa xíní yō ña tóco ndih̄i ña ndóho í ndaja Ndióxi ña ná nduu a ña vaha tá quihvi iní mé á. Jáchi mí cúu yó na sa ñasacu iní Ndióxi ña ná caja í ña cúní mé á.

29 Ndá ñayivi ñacaxi Ndióxi anda saha ñacaxi a na ña ná nduu na tátuhun Jesucristo, mé á cúu jahyi Ndióxi. Jáchi cúní Ndióxi ña ná nduu Jesucristo jini nuú ndih̄i na cúu cuéntá mé á. 30 Ta ñacana Ndióxi na ñacaxi a ña ná candee iní na mé á. Ta nacaja mé

á ña ná nduu ndaa na nu á. Ta vaxi quivi caja mé á ña ná ndináhnu ndihi na cán xihín á.

<sup>31</sup> Ndiá cachí sahá ña yóho. Ni in túhún ñaha a cúu cani táhan xoho ta ni a cúu quee vaha xoho jáchi cuahan Ndióxi xoo í. <sup>32</sup> Ta coó ñacajíhnda Ndióxi jahyi a jáchi nandiquiahva Ndióxi Jesucristo, jahyi a ña ná quivi a saha yo. Xihín ña yóho cándaá iní ña co ndáhví cúu ini a quiahva tóco ndihi ñaha nu yo. <sup>33</sup> Yo já cuu chícáan cuachi jatá na ñacaxi Ndióxi. Ni in ñayivi a cúu chícáan cuachi jatá na jáchi sa mé Ndióxi nandaja mé á na ñayivi ndaa nu á. <sup>34</sup> Yo já cuu jácojo cuachi jatá na cúu cuéntá mé á. Ni in ñayivi jáchi na xihí Jesucristo saha yo. Nanditacu tucu a ta ín coo a xoo cuáha Ndióxi indiví xíca tahví a nu Ndióxi saha yo. <sup>35</sup> Yo já cuu caji nuu nu Jesucristo quihvi ini a mí. Ni in ñaha a cúu caja ña jándacoo Jesucristo ña quihvi ini a mí. Vatí ná ndoho ndivaha ini ta vatí ná quixi ña yíhví yo ta vatí ná ndicuita na caja xíxi na xoho ta vatí ná quixi joco ta vatí janda jáhma yo ná ndimaní ta vatí tondóho vaxi nu yo á ñayivi ndúcú cahní mí joo ni in ña yóho a cúu caji nuu a nu Jesucristo ña quihvi ini a mí. <sup>36</sup> Já cachí tuhun Ndióxi já:

Saha Ndióxi sácú ini ñayivi cahní na ndehe ndijáá ní quivi.

Tá quiahva cája na xihín

ndicachi, rí cūhun quivi quiahva já cája na xihín nde, cáchí tuhun Ndióxi.

<sup>37</sup> Vatí ndóho í tóco ndihi ña yóho joo quee vaha tá quee vaha í caja Jesucristo jáchi quihvi ini a mí. <sup>38</sup> Sa xíní vaha i ña ni in ñaha a cuú caja tavá mí ndáha Jesucristo, mé a quihvi ini mí. Ta coó a caja toho a á tácu yo á sa na xihí yo. Ni táto Ndióxi ni ña sáhdá chuun nuú ñayivi ta ni ña ndóho iní viti ni ña ndoho iní chí nuu <sup>39</sup> ta ni in ñaha ín indiví ta ni in ñaha ín tíxi ñúhu ta ni in ñaha ñacavaha Ndióxi a cuú tavá mí ndáha Ndióxi, mé a quihvi ini mí. Ta najána ha Jesucristo, xitoho í nu yo ña quihvi ndivaha ini Ndióxi mí.

## 9

*Ñayivi naquixi chichi Israel cúu na ñacaxi Ndióxi*

<sup>1</sup> Ña ndaa cúu ña cáhan i xihín ndó viti ta co cávaha i ña tuhún jáchi cúu u cuéntá Jesucristo. Sáhdá ínima yíi Ndióxi chuun nu xíní túní i sahá ña cán quea co cáhan i ña tuhún. <sup>2</sup> Ín cuéha ndivaha ini i ta já táhví ndivaha ini i sahá na Israel. <sup>3</sup> Mé a ndaa cúní yehe chindee e na naquixi chichi nuú naquixi mí i ña ná candeé ini na Jesucristo. Ta janda ín tiaha i cacuu u da chícáan na cháhan jata tá ta xihín ña yóho cuu cacu ndaa ínima ná. Joo a cuú caja i ña. <sup>4</sup> Mé na cán naquixi na chichi Israel ta ñacaxi Ndióxi na já ná nduu na

ñayivi cuéntá mé á. Najánaha Ndióxi nu ná ndá quiahva cáhnu cúu mé á. Ta nasahan tuhun a nu ná ña nasacu ini a caja saha ná. Nasahan Ndióxi ley Moisés nu ná ta najánaha mé á na ndaja ndítahan nu ná caja cáhnu na mé á. Nacaxi tuhun a xihin ná sahá ñamaní caja mé á xihin ná chí nuu. <sup>5</sup> Ta ñayivi Israel naquixi na chichi na nasanduu sanahá. Ta nacacu Jesucristo chichi mé na cán ta nanduu a in ñayivi. Chí andá ama cáa quivi ná caja cáhnu yó Jesucristo, mé á cúu Ndióxi, mé á cómi cuéntá saha tóco ndihi ñaha. Já ná coo.

<sup>6</sup> A juú cahán ndo ña coo najáxinu Ndióxi tuhun a nasahan nuú na Israel. A juú ndihi ñayivi jan cúu na cuéntá Ndióxi vatí naquixi na chichi Israel. <sup>7</sup> A juú tóco ndihi na naquixi chichi Abraham cúu ná cuéntá Ndióxi jáchi janda saha nacachi Ndióxi xihin dá: “Ñayivi cuaha quixi chichún cacuu na jahyi Isaac”, cáchi a xihin Abraham. <sup>8</sup> Ña yóho cúní cachi a ña ni in túhún ñayivi co cúu ná jahyi Ndióxi sahá ña naquixi na chichi Abraham. Na cúu ndusa jahyi Ndióxi cúu ná naquixi chichi Isaac jáchi cuéntá Isaac najáxinu coo Ndióxi tuhun nasahan nu Abraham. <sup>9</sup> Sanahá ndivaha nasahan Ndióxi tuhun a nu Abraham já cáchi a já: “Xinu cuia já quixi tucu u ta cacu jahyi taa ñájihún, Sara.”

<sup>10</sup> Candehé ndo ná ndicani i nu ndo ña nayaha chaga

chínu. Isaac, da cúu tásáhnu jícó yo nasacuu da tátá ndíví taa valí jahyi Rebeca. <sup>11</sup> Tá cámaní cacu taa cuatí jahyi na já nasacu ini Ndióxi caxi a in a ta cacu xóo a inga vatí a ñaha caja ndíví taa valí ni ña vaha ni ña núu. Já nasacu ini a caja <sup>12</sup> ta já nacachi a xihin Rebeca: “Jahyún, da cacu chí ivi cahnda chuun nuú da cacu nu cuítí.” <sup>13</sup> Ta já cáchi tucu tuhun Ndióxi já sahá jahyi Rebeca: “Nacaxi i Jacobo, da nacacu chí ivi caja i ñamaní xihin dá joo nasacu xóo i Esaú, da nacacu nu cuítí.” Já nacaja Ndióxi jáchi já nasacu ini a caja.

<sup>14</sup> Ama ná cachi rí ña co cája ndaa Ndióxi. A cáchi toho í já. <sup>15</sup> Já nacachi Ndióxi xihin Moisés sanahá: “Tahvi ini i sahá ñayivi joo mí i caxi i yo tahvi ini i saha. Ta tahnda ini i sahá ñayivi, joo mí i caxi i yo tahnda ini i saha”, nacachi Ndióxi sanahá. <sup>16</sup> Ña cán quéa co cája Ndióxi ña cúní ñayivi ta a cúu caja ndusa ñayivi xihin á ña ná tahnda ini a saha ná jáchi táhnda ini a sahá ñayivi, na cúní mé á tahnda ini a saha. <sup>17</sup> Já cáchi tuhun Ndióxi já xihin da cúu rey nuú nación Egipto: “Nandaja i yóho rey jáchi cúní jánaha i nuun ña cuu cája i tóco ndihi ñaha tá cúní já ná candaa ini tóco ndihi ñayivi ndúu ñuyíví ña cáhnu ndivaha cúu yehe”, nacachi Ndióxi. <sup>18</sup> Ña cán quéa tá cúní Ndióxi tahnda ini a sahá ñayivi já cuu tahnda ini a saha ná. Ta tá cúní a ndaja táhyí a ínima ná já cuu

ndaja táhyí a ña.

19 Joo a cuú cachí ña co cája ndaa Ndióxi tá cáchí a ña cómi yo cuachi. Vatí sácú ini Ndióxi ña caja in in ñayivi joo co chindahá a na caja na cuachi. 20 Co ndítahan nuú ñayivi ndaja ndichi na Ndióxi sahá ña cája mé á. Jáchi sa xíni yo ña co ndítahan nuú in quiji cachí a xihín da cávaha ñaha: “Co cátoó i coo i tá quiahva nacavaha ndó yehe.” 21 A cuú cachí quiji cán já jáchi mé da cávaha quiji cán, cávaha da ña tá quiahva cúni mé dá. Xihín in mbohla loho ñuhú quíji cuu cávaha da in quiji cacuu a javí á in quiji cuéntá yávi núhu.

22 Ta quiahva já cája Ndióxi xihín ñayivi. Íin tiahvha mé á jánaħa nu ná ña xójo ndivaha ini a sahá cuachi na. Ta íin tiahvha mé á jánaħa nu ná ña cuu caja mé á tóco ndihi ñaha. Joo nacaja ndeé ini Ndióxi ta nasandati a jándoho a ini ñayivi vatí nanditahan nu ná ndoho ini na sahá cuachi na. 23 Mé a ndaa táhnda ini Ndióxi sahá ñayivi ta cúni a jánaħa nu ná ña cáhnu ndivaha cúú mé á ta cúni a jánaħa nu ná ndá quiahva quíhvi ini a na. Anda sanahá ndivaha sácú ini a jánaħa nu yo ndá quiahva cáhnu cacuu yó nu mé á. 24 Nacaxi a ñayivi tañu na naquixi chichi Israel ta nacaxi mé á ñayivi tañu na coó naquixi chichi Israel. Ta mí cúú yó na nacaxi a. 25 Já nacachi Ndióxi já sanahá ta já nacahyí Oseas ini tuhun Ndióxi:

Tandaa quívi caxi yehe ñayivi, na co cúú cuéntá mí i ta ndaja i na cuéntá mí i.

Ta na coó naquíhvi ini i jihna quíhvi ini i na viti.

26 Ta sa mé nu ndúu ñayivi, na coó nasacuu cuéntá Ndióxi,

cán cuhun mé á caxi a na ta caja ña ná nduu na cuéntá mé á jáchi cúú á in Ndióxi tácu, já cáchí tuhun mé á.

27 Ta sahá na naquixi chichi Israel já nacachi Isaías: “Vatí ndícuahá ñayivi Israel tá quiahva cuahá ñutí yuhú tañuhú joo chá va cacuu na cacu ndaa ínima. 28 Jáchi jonáa va jáxinu coo Ndióxi tuhun a ta anda javí caja víi a saħa tóco ndihi ñayivi ndúu ñuyívi”, nacachi Isaías. 29 Ta já nacachi tucu Isaías já sanahá: Tá quiahva nacaja Ndióxi najándihi a sahá ñayivi ñuu Sodoma xihín ñuu Gomorra quiahva já caja Ndióxi jándihi a saħa yo, nduu.

Joo sahá ña natahvi ini Ndióxi sahá na Israel sahá ña cán quea coó najándihi a saħa ná, já cáchí tuhun Ndióxi.

*Ndítahan nuú na Israel candeé ini na Jesucristo*

30 Ña cán quea ndícani i nu ndo sahá ñayivi, na coó naquixi chichi Israel. Co ndínducú na nduu ndaa na nu Ndióxi joo tá nacasáhá na candeé ini na Jesucristo já nacaja Ndióxi ña ná nduu

ndaꝯ na nu mé á. <sup>31</sup> Joo ñayivi Israel cája na ña sáhdá ley Moisés xihín ndinuhu ini na jáchi cáhán na cuu nduu ndaa na nu Ndióxi sahá ña sácú vaha na ley Moisés. Joo coó ñacuu nduu ndaa na nu Ndióxi xihín ña yóho. <sup>32</sup> Já nandoho na Israel jáchi nanditahan nu ná candeé ini na Jesucristo. Xihín ndinuhu ini na cája na ña cáchi ley joo coó ñacuu nduu ndaa na nu Ndióxi xihín ñaha cája na. Ña cán quéa cúú ná tátuhun in na ñacachihin saha xihín yuu cáhnu. <sup>33</sup> Jáchi cáchi tuhun Ndióxi ña cúú Jesucristo tátuhun yuu cáhnu nu cáchihin sahá ñayivi. Já cáchi tuhun Ndióxi já:

Ñasacu yehe in yuu tóto cáhnu ñuu Sión ta xihín yuu cáhnu cán cuaha ná cachihin saha.

Joo ndá na ná candeé ini mé a ñachindahá i, na cán cúú ná na a cáchan nuu, já ñacachi tuhun Ndióxi.

## 10

<sup>1</sup> Cuni johó vaha ndó, ñani i, na cúú cuéntá Jesús. Jáchi ndinuhu ini i xíca tahví i nu Ndióxi sahá ñayivi Israel ña ná candeé ini na Jesús já ná cuu jácaçu Ndióxi na nuú cuachi na. <sup>2</sup> Mé a ndaa ná cahan i xihín ndo ña cája cáhnu na Israel Ndióxi xihín ndinuhu ini na joo coó cándaꝯ cáxi ini na ña cúni Ndióxi caja na. <sup>3</sup> Jáchi coó xíni na ndaja cája Ndióxi ña ná nduu ndaa ñayivi nu mé á sahá ña cán

quéa ndúcú na nduu ndaa na nu mé á xihín ña cája mé va na. Ta coó cúni na ndiquiahva na mé ná ndáha Ndióxi ña ná caja na ña ñasacu ini mé á caja na. <sup>4</sup> Coó xíni na ña ñaquixi Jesucristo ta ñaxihí a saha yo já najáxinu coo a caja ña cáchi ley ña ná nduu ndaa tóco ndihi na candeé ini mé á.

<sup>5</sup> Sañahá ndivaha ñacahyí Moisés sahá ñayivi, na cúni nduu ndaa nu Ndióxi xihín ley Moisés. Já cáchi a já: “Ndá na coó cómi cuachi nu Ndióxi, na cán cuu nduu ndaa nu mé á ta jácaçu a na”, já ñacahyí da. <sup>6</sup> Joo tá ná jácaçu Ndióxi mí sahá ña candeé ini mé á já quéa coó xíni ñúhú cuhun yo indivi jánuu í Jesucristo ña ná nuu a chindeé a mí jáchi sa ñacaja mé á ña. <sup>7</sup> Ta coó xíni ñúhú cuhun yo nu ndúu ínimá ndii ña ná ndiquehé Jesucristo tañu na sa ñaxihí jáchi mé Jesucristo sa nanditacu tucu a. <sup>8</sup> Coó xíni ñúhú cuhun xíca ñahá yo ndinducú yo Jesucristo jáchi íin yati ndivaha mé á nu yo jáchi íin a xoho. Ta mé tuhun cáhan nde yóho cúú á tuhun cáhan saha Jesucristo já ná candeé ini ndó mé á. <sup>9</sup> Ta tá cachún ña cúú Jesús xitohún ta tá cándúsún xihín ndinuhu ínimun ña najánditacu Ndióxi Jesús tañu na ñaxihí já quéa cuu caçu ndaa ínimun. <sup>10</sup> Jáchi tá candeé ini ñayivi Ndióxi xihín ndinuhu ini na já nduu ndaa na caja Ndióxi. Ta tá cáhan na xihín java ga ñayivi ña candeé ini na mé á já quéa cuu caçu ndaa ínimá ná.

<sup>11</sup> Já cáchi tuhun Ndióxi

já: “Ndá nā ná candeeé ini Jesús a xínu toho quivi cahán nā ña najándahvi Ndióxi nā.”

<sup>12</sup> In cúu tóco ndihi ñayivi nu Ndióxi. Tá quiahva jácacu Ndióxi nā naquixi chichí Israel quiahva já jácacu a nā coó naquixi chichí Israel. Jáchi sa mé Ndióxi cán cúu Ndióxi nu tóco ndihi ñayivi ta co ndáhvi cúu ini a quiahva ñaha nuú nā xíca tahví nu mé á. <sup>13</sup> Já cáchi tuhun Ndióxi: “Ndá nā ná caça tahví nu Ndióxi ña ná chindeé a na, nā cán cacu ndaa ínima.” <sup>14</sup> Ta ndaja caja na caça tahví nā nu Jesús tá ta cámani candeeé ini na mé á. Ta ndaja caja na candeeé ini na mé á tá a ñaha cuni johu na tuhun vaha cáhan saha Jesús. Ta ndaja caja na cuni johu nā tuhun vaha saha Jesús tá cámani cuhun in na caxi tuhun na ña nu ná. <sup>15</sup> Ta ndaja caja na cuhun na cahán nā tuhun Ndióxi xihín ná tá ta co ín in nā chindahá nā cuhun nā. Já cáchi tuhun Ndióxi já: “Ndaja ñúchí chá tá xínu coo nā ñehe tuhun vaha saha Ndióxi ña ná coo vaha í xihín mé á.”

<sup>16</sup> Joo a juú ndihi ñayivi cándúsa tuhun Ndióxi. Ña yóho cúu á tá quiahva nacachi Isaías: “Ndióxi, mé ndó cúu ndó xitoho nde. Chá cuití ñayivi cándúsa tuhun nacahan nde xihín ná.” <sup>17</sup> Jáchi jihna ñúhú cáhan nā tuhun vaha saha Jesucristo nuú ñayivi ta xihín ña xíni johu nā cán jáxínu ini na xihín á. Anda jáví casáhá nā candeeé ini na mé á ta cája na

ña cúni a.

<sup>18</sup> Á sa naxini johu na tuhun vaha cáhan saha Jesús. Ajan. Sa naxini johu na ña. Jáchi já cáchi tuhun Ndióxi já:

Nasahan nā cahán nā tuhun Ndióxi nuú ñayivi, ta níi cúu sahá ñuyívi naxinu tuhun cáhan nā, já cáchi tuhun Ndióxi.

<sup>19</sup> Á nacandaa ini ñayivi Israel ña yóho. Ajan. Cándaa vaha ini ná ña. Jáchi já nacahyí Moisés sanahá:

Ndióxi quéa nacachi a: Caja i ña ná candúsa nā tóho yehe já ná cahíhvi ini nā Israel.

Ta cojo ini na xihín nā tóho sahá ña cája i ña ná candúsa mé nā tóho cán yehe, nacachi tuhun Ndióxi.

<sup>20</sup> Xihín ña yóho nasahan ndeé ini Isaías cahyí da ña nacachi Ndióxi tá nacachi a já:

Mé nā co ndínducú yehe, nā cán cúu nā nandiñehé yehe.

Ta najánaña i mí i nu ná vatí coó nandaca tuhun nā sahá i, nacachi tuhun Ndióxi.

<sup>21</sup> Joo já nacachi Ndióxi sahá ñayivi Israel: “Níi tiempo cúni ndiquehe vaha i ñayivi Israel joo co cúni nā quixi na nuú i jáchi sáá ini na ta co cúni nā caja na ña cúni”, nacachi tuhun Ndióxi.

## 11

*Cája Ndióxi ñamani xihín ñayivi Israel*

1 Ta viti ná ndaca tuhún i ndohó ña yóho: Á cáhán ndo ña najándacoo ndáha Ndióxi ñayivi Israel. A juú ña ndaa cúú á jáchi sa mé yehe cúú u da Israel, da naquixi chichi Abraham ta naquixi i chichi Benjamín, da nasacuu jahyi ñání jícó Abraham. 2 Janda mé saha nacachi Ndióxi ña nacaxi mé á na Israel cacuu na cuénta mé á ta co cándají a na viti. Sa xini ndó ña nacachi tuhun Ndióxi saha da nasacuu profeta Elías. Mé da yóho tá naxica tahvi da nu Ndióxi já najácho da cuachi jatá na Israel. 3 Já nacachi da já: “Cándehe ndo Ndióxi, xitoho i. Sa nasahní na profeta cuénta mé ndó ta nandicani na nu náa ndo. Ta viti nú laá in tuhún yehe cuití va cája ña sáhdá ndo. Ta ndúcú na cahní na yehe”, já nacachi Elías xihin Ndióxi. 4 Ta já nacachi Ndióxi xihin dá: “A juú in talaá yóho cája ña cuni jáchi ndúu yii va usa mil ta cája ña cuni ta coo nacaxítí na nuú tijnínu yúu Baal”, nacachi Ndióxi xihin dá. 5 Quiahva já in a viti. Ndúu chá na cája ña cuni Ndióxi jáchi nacaja Ndióxi ñamaní xihin ná ta nasacu ini a jácacu a na. 6 Nacaxi Ndióxi na jáchi natahvi ini a saha ná. Coó nasacuu a saha ña nacaja na jáchi tá ná cacuu a saha ña cája na já co cúú ga ñamaní Ndióxi ta ña yóho cúú ña cuni Ndióxi caja.

7 Ña cán quéa cuahá ndivaha ñayivi Israel coo nanduu ndaa na nu Ndióxi

sahá ña nacaja na jáchi nandaja táhyí na ínimá ná. Joo na nacaxi Ndióxi, na cán cúú na nanduu ndaa nu mé á. 8 Já cáchí tuhun Ndióxi já: “Co cuni na candúsa na Ndióxi saha ña cán quéa nasaji Ndióxi xini túni ná chí in ndeé. Ta quiahva já ndaa na janda viti jáchi co cándaa ini na ña cáhan Ndióxi xihin ná.” 9 Já nacahyi David sanahá:

Ná cáhán na ña cuahan vaha na ichí Ndióxi saha cuahá ñaha cómi na, ta ná ndoho ini na saha cuachi cája na.

10 Ta ná cuaá na já ná a cuni na, ta ná nditojo jata ná ní tiempo saha ña vee ndójo na, nacachi David.

*Jácacu Ndióxi na coo naquixi chichi Israel*

11 Ta viti ná ndaca tuhún i ndohó ña yóho: Á cáhán ndo ña a cuú cacu ndaa ínimá na Israel. A juú ña ndaa cúú á. Jáchi vatí sáa ini na Israel ta vatí co cuni na candee ini na Jesús joo xihin ña nacaja na yóho nanuna nuú na tóho cuni johó na tuhun vaha saha Jesús ta já cuu cacu ndaa ínimá ná nu mé á. Ta saha ña yóho casahá na Israel cahihvi ini na xihin na tóho. 12 Nacaja Ndióxi cuahá ñamaní xihin tóco ndihi na tóho jáchi nacaja ña ná cuu ndihvi na ichi cuénta mé á saha ña najándacoo na Israel ichi cuénta mé á. Joo cuaha chága ñamaní caja Ndióxi

xih̄in tóco ndihí tá ná xinu quiv̄i ndiquehe na Israel íchi cuéntá mé á.

<sup>13</sup> Joo in in ñaha ña cún̄i cahan̄ i xih̄in ndo, na tóho. Ndióxi quéa nachindahá yehe tañu ndóhó, na coó naquixi chichi Israel ta chuun cáhnu ndivaha quéa ndójo i xín̄i i.

<sup>14</sup> Jách̄i ña cún̄i mí i quéa ná cah̄iv̄i ini na Israel xih̄in ndo sahá tuhun Ndióxi ta já ná ndinducú mé ná Ndióxi já ná cacu ndaa ínim̄a na Israel nu Ndióxi jáchi mé ná cúu ná ch̄ichi nuú naquixi mí i.

<sup>15</sup> Nasacu xóo tóo Ndióxi na naquixi ch̄ichi Israel jáchi nasacu ini a jándique táhan mán̄i á tóco ndihi ñayivi ndúu ñuyiv̄i xih̄in mé á. Ta tá ná xinu quiv̄i casáhá na Israel ndiquehe na tuhun Ndióxi cacuu a in ñaha ñúch̄i ndivaha. Cacuu a tátuhun casáhá nditacu tucu na jáchi viti cúu ná tátuhun na naxih̄i jáchi coó naxeén̄ na ndiquehe na tuhun Ndióxi. <sup>16</sup> Abraham nasacuu da cuéntá Ndióxi ña cán quéa jah̄yi da, na nacacu ch̄ichi da cúu ná ñayivi cuéntá Ndióxi. Abraham, da cúu cuéntá mé á cúu dá tátuhun yóho in yitó olivo. Ta ñayivi nacacu ch̄ichi da cúu ná cuéntá mé á ta cúu ná tátuhun ndáha mé yitó olivo cán.

<sup>17</sup> Cúu á tátuhun nasahnda Ndióxi java ndáha, dó vaha ta nachitivi ndaa mé á ndáha yitó olivo yúcu mé nuú nasah̄in ndáha cán. Ta viti quiahva dó ndée nu ndáha yitó olivo yúcu cán ña ná catacu dó. Quiahva já nacaja

Ndióxi nasacu xóo a na Israel ta nacaja mé á ñaman̄i xih̄in mé ndó, na tóho já ná nduu ndó cuéntá mé á. Ta viti cája Ndióxi cuahá ñaman̄i xih̄in ndo tá quiahva cája xih̄in na Israel. <sup>18</sup> Joo ndóhó, na cúu na tóho a cáhán ndo ña vaha chága mé ndó a juú ga na Israel. Co ndítahan cahán ndo já. Co cúu ndó tátuhun yohó yitó jáchi cúu ndó tátuhun ndáha do. Ta tá co yóho dá já quéa a cúu catacu ndáha do. Sahá ña cán quéa co ndítahan caju cáhnu ndó mé ndó.

<sup>19</sup> A váha cahvi ini ndó ña náhnu chága mé ndó nu Ndióxi a juú ga na Israel sahá ña nasacu xóo mé á na Israel ta nasuná a íchi nu ndóhó candeé ini ndó mé á. <sup>20</sup> Cándehé ndo. Nasacu xóo Ndióxi na Israel sahá ña coó nacandeé ini na mé á ta nandacaxi a ndóhó sahá ña candeé ini ndó mé á ña cán quéa co ndítahan caju cáhnu ndó mé ndó. Ña ndítahan caju ndó quéa cayih̄vi ndo Ndióxi.

<sup>21</sup> Xín̄i ñúhú ndicuhun ini ndó ña cuu jácaxoo tucu Ndióxi ndóhó. Coó natahnda ini a jándacoo xóo a na Israel, mé na nacaxi á. Sahá ña cán quéa cachí ga ví mé ndó, na tóho ndáa náha caju Ndióxi cacu xóo tucu a ndóhó. <sup>22</sup> Cándehé ndo jáchi táhvi ini Ndióxi sahá ñayivi tá candeé ini na mé á joo cuehe ndivaha mé á xih̄in na sáa ini. Ña cán quéa tá co candeé ini ndó mé á ta ní co quih̄vi ini ndó a já cacu xóo a ndóhó tá quiahva nacaja xih̄in na Israel. <sup>23</sup> Joo



tá ná ndihvi na Israel íchi Ndióxi candeé ini na mé á já quéa ndiquehe tucu Ndióxi na jáchi cuu caja mé á tóco ndihi ñaha. <sup>24</sup> Nandiquehe Ndióxi ndohó vatí nasanduu xicá ndó nu á ta nandaja mé á ndohó cuéntá mé á vatí cúu ndó na tóho. Mé ndó cúu ndó tátuhun ndáha yitó olivo, dó yúcú, dó nachitivi ndaa Ndióxi tóco dó vaha. Ta ña yóho quéa a cúu coo já, nduu. Joo nacaja Ndióxi já xihin ndo. Ta ndaa náha cuu caja tucu Ndióxi xihin na Israel ña ndiquehe tucu a na ta cacu tucu a na nu ndahá yító olivo, dó vaha nuú nasandaa na jihna.

*Vaxi quivi tá candeé ini na Israel Jesús*

<sup>25</sup> Ñani mí i, na cúu cuéntá Jesús. Cúni ña ná candaa ini ndó ña nasacu ini Ndióxi caja chága chí nuu já ná a cája cáhnu ndó mé ndó. Cuahá na Israel nandaja táhyí na ínima ná ta co cúni na ndiquehe na tuhun Ndióxi. Joo tá sa nandiquehe ndihi na tóho, na nasacu ini Ndióxi jácacu a anda jávi casahá na Israel ndiquehe na tuhun Ndióxi. <sup>26</sup> Anda jávi cacu ndaa ínima ndihi na Israel. Ta já cáchi tuhun Ndióxi sahá ña yóho: Ñuu Sión quixi in da jácacu ñayivi Israel, na naquixi chichi Jacob ná a cája ga na cuachi. <sup>27</sup> Ta jándoo i cuachi nacaja na, tá quiahva nacachi i xihin ná caja i, cáchi Ndióxi.

<sup>28</sup> Tiempo viti cuahá ndivaha na Israel co cúni na tuhun vaha saha Jesús saha ña cán quéa co cúni na Ndióxi. Joo cája na ña yóho ña ná nuná nu ndohó, na tóho já ná cuu candeé ini ndó Ndióxi. Vatí cája na Israel ña yóho joo quihvi ini tá quihvi ini Ndióxi na sahá tuhun nasahan nu tásahnu jícó na. <sup>29</sup> Tá sahan Ndióxi ña cáchi a quiahva nu yo já quéa co ndimaní mé á nuú tuhun a ta co ndíco coo a cándaa ña sahan nu yo. Ta ni co ndíco coo ini a tá sa nandacaxi a mí. <sup>30</sup> Sáa nasahin ini ndohó, na tóho sanahá joo viti nacaja mé á cuahá ñamaní xihin ndó sahá ña sáa ini na Israel. <sup>31</sup> Ta vatí sáa ini na Israel viti joo xihin ña yóho núná nu ndohó, na tóho ndiquehe ndó ñamaní Ndióxi. Joo vaxi quivi tá tahvi ini Ndióxi sahá na Israel tá quiahva natahvi ini a saha ndohó, na tóho. <sup>32</sup> Nachicaji Ndióxi xini túni na Israel xihin na tóho ña ná nduu na na sáa ini. Nacaja Ndióxi ña yóho já ná cuu tahvi in nuú ini a saha tóco ndihi ñayivi.

<sup>33</sup> Cáhnu ndivaha cúu tóco ndihi ñaha Ndióxi. Ndíchi ndivaha jini mé á ta candaa ini a tóco ndihi ñaha. Ni in ñayivi a cuú ndicani na ña cáhvi ini Ndióxi. Ta ni in na a cuú candaa ini ña cája Ndióxi. <sup>34</sup> Já cáchi tuhun Ndióxi já: “Ni in ñayivi a cuú candaa ini na ña cáhvi ini Ndióxi. Ta ni in ñayivi a cuú jácahan na mé á caja ña ndítahan caja. <sup>35</sup> Coó ñayivi

cája ñamanì xihìn Ndióxi ña ná ndaca na ña nu mé á”, cáchí tuhun Ndióxi. <sup>36</sup> Jáchi Ndióxi quéa nacavaha tóco ndihi ñaha ta ndúu a saha mé á ta ndúu a cuéntá mé á. Anda ama cáa quivi ná caja cáhnu í Ndióxi. Já ná coo.

## 12

*Tácú yo caja chúun í cuéntá Ndióxi*

<sup>1</sup> Natahvi ini Ndióxi saha ndó, ñani mí í, na cúu cuéntá Jesús. Sahá ña cán quéa xíca tahví í nu ndo ña ná ndiquiahva ndó mé ndó ndáha Ndióxi já ná cacuu a tátuhun joco ndó mé ndó nu Ndióxi. Ta caja ndó tóco ndihi ña cúni Ndióxi caja ndó ña ná cajii ini a. Jáchi xihín ña yóho náha ña mé a ndaa táhyí cája cáhnu ndó Ndióxi ta ña yóho cúu á ña ndítahan nu ndó caja ndó. <sup>2</sup> A cája ga ndó ña núu ña cája ñayivi ñuyívi. Quiahva ndó ñamanì nu Ndióxi ña ná ndaja vií a xíní túni ndo. Anda jávi candaa ini ndó ña cúni mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúni mé á xihín ndinuhu ini ndó.

<sup>3</sup> Nacaja Ndióxi ñamanì xihín í tá nacaxi a yehe. Ña cán quéa cáhan í xihín ndihi ndó ña co ndítahan cáhán ndo ña cúu ndó na náhnu ndivaha joo ná cahvi ini ndó ña ndaa saha mé va ndó. Ña ndítahan caja ndó quéa coto ndojó ndo mé ndó jáchi nasacu ini Ndióxi ña ná candeé ini ndó mé á já ná cuu caja ndó

ñá cúni a. <sup>4</sup> Candehe ndó tá quiahva íin yiquí cuñu í. In túhún cúu yiquí cuñu í joo cuahá nuú ñaha ndáca ta sa jíin sa jíin chuun cája in in ña ndáca yiquí cuñu í. <sup>5</sup> Quiahva já íin tóco ndihí, na cúu cuéntá Jesús. Sa jíin sa jíin chuun cája in in í joo in va cúu yo xihín Jesucristo. Ta sa jíin sa jíin chuun cája in in í.

<sup>6</sup> Sa jíin sa jíin chuun nasahan Ndióxi nuú in in í caja í ta mé á nasacu ini a ndá chuun quéa quiahva nuú in in í. Sahá ña cán quéa tá nasahan Ndióxi chuun nu ndó jáyaha ndó tuhun mé á nuú ñayivi, caja ndó ña xihín ndée mé á jáchi candeé ini ndó a. <sup>7</sup> Ta tá nasahan Ndióxi chuun nu ndó ña ná chindeé ndó ñayivi já quéa ndítahan nu ndó chindeé vaha ndó na. Ta tá nasahan Ndióxi chuun nu ndó jánaaha ndó ñayivi já quéa ndítahan nu ndó jánaaha vaha ndó na. <sup>8</sup> Tá ta nasacu Ndióxi ini ínima ndo quiahva ndó tuhun ndeé ini na, caja ndó ña xihín ndinuhu ini ndó. Ta ndá ñaha jása ndo nuú ñayivi xíní ñúhú cajii ini ndó jása ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóo chindeé ñayivi ná cajii ini ndó chindeé ndó na.

*Ña ndítahan caja na cúu cuéntá Jesús*

<sup>9</sup> Xihín ndinuhu ini ndó quihvi ini táhan ndó. Candají ndó ña núu ta caja ndó ña vaha xihín ndinuhu ini ndó. <sup>10</sup> Xíní ñúhú quihvi ini ndó na

cúu cuéntá Jesús jáchi cúu ná tátuhun na vehe ndó ta cajii ini ndó tá caja cáhnu táhan ndó.

<sup>11</sup> Nducú ndéé ndo ta a cácuu ndó na jusá ta xihín nd-inuhu ini ndó caja chúun ndó cuéntá Ndióxi, xitoho í.

<sup>12</sup> Xíní ñúhú cajii ini ndó candatí ndó xinu coo tuhun nasahan Ndióxi nu ndo. Quiáhva ndeé vaha ini ndó tá ndóho ini ndó ta a jándacoo ndó ña caça tahví ndo nu Ndióxi.

<sup>13</sup> Ndá ñaha ndímaní nuú java ga na cúu cuéntá Jesús ná chindeé ndó na. Ta ndiquehe vaha ndó ñayivi xito nihni ndohó.

<sup>14</sup> Caça tahví ndo nu Ndióxi sahá na cája xíxi xihín ndo ña ná caja Ndióxi ñamaní xihín ná. Caça tahví ndo nu Ndióxi saha ná ta a chícaan ndó cháhan jata ná.

<sup>15</sup> Cajii ini ndó xihín na cájii ini ta cuacu ndó xihín na sácu.

<sup>16</sup> In nuú quihví ini táhan ndó. A cája ichí ini ndó. Ña ndítahan caja ndó queá jánuu ndáha ndó mé ndó xihín ñayivi ndáhví, na co ndíñehe jíco mé. Ta a cáhán ndo ña cúu ndó na ndíchí ndivaha.

<sup>17</sup> Tá cája núu na xihín ndó, a ndícó coo ndó caja ndó ña núu xihín ná. Joo nducú ndó quiahva caja ndó ña vaha já ná a cáhan núu ñayivi saha ndo. <sup>18</sup> A ndúcú ndo caní táhan ndó xihín ñayivi ta ndihí ini ndó coo vaha ndó xihín ndihi na. <sup>19</sup> Ñani míj, na cúu cuéntá Jesús. Tá cája xíxi na xihín ndo a ndúcú ñehe

toho ndó ña núu nu ná jáchi cojo ini Ndióxi xihín na cája já ta ndítahan nu mé á jándoho a ini na. Já cáhí tuhun Ndióxi: “Yehe ndítahan nuú jándoho j ini ñayivi, na cája ña núu”, cáhí Ndióxi. <sup>20</sup> Vaha chága ná caja ndó ña cáhí tuhun Ndióxi: “Tá cuíco ñayivi, na co cúní ndohó quiahva ndó ná cuxu na. Ta tá ichí ini na co cúní ndohó quiahva ndó tícuij nu ná coho na. Tá ná caja ndó ña yóho já queá cacahan nuú na cán sahá ña núu cája na xihín ndó.” <sup>21</sup> A quiahva ndó ñamaní quee vaha ña quini xihín ndó. Ña ndítahan caja ndó queá caja ndó ña vaha já ná cuu quee vaha ndó cahnu ndó ña quini.

## 13

<sup>1</sup> Xíní ñúhú coo johó ndó nuú ña cáhan na jutixia xihín ndo. Jáchi sahan Ndióxi ñamaní nuú na cán cahnda na chuun nuú ñayivi. Ta mé Ndióxi queá nasacu a na. <sup>2</sup> Ta ndá na co cúní cuni johó nu sáhdá na jutixia cúu ná na sáji nuu nu Ndióxi jáchi Ndióxi queá nasacu a na cán. Ta ndá na co cúní caja ña sáhdá na ndoho ini na. <sup>3</sup> Jáchi coo nasacu Ndióxi na jutixia ña ná jáyihví na ñayivi, na cája ña vaha. Nasacu Ndióxi na ña ná jáyihví na ñayivi, na cája ña núu. Tá co cúní ndó cayihví ndo na jutixia xíní ñúhú caja ndó ña vaha já ná cajii ini na jutixia xihín ndo. <sup>4</sup> Nasacu Ndióxi na jutixia ña ná chindeé na ndohó. Joo tá cája ndó ña núu

já quéa xíní ñúhú cayihví ndó na jáchi mé na cán cahnda na chuun ña ná chahvi ndó sahá ña núu cája ndó. Sahá ña cán nasacu Ndióxi na ña ná jándoho na ini na cája ña núu. <sup>5</sup> Ña cán quéa ndítahan nu ndó caja ndó ña sáhndá na jutixia já ná a jándoho na ini ndó jáchi sa náha mé va xíní túni yo cahan xoho ña xíní ñúhú candúsa í ña sáhndá na jutixia nu yo. <sup>6</sup> Sahá ña cán quéa chahvi ndó jjuhún cuéntá impuesto jáchi sa xíní ndó ña ndítahan nu ndó chahvi ndó ña. Na jutixia cája chúun na cuéntá Ndióxi tá cája na ña xihín ndinuhu ini na.

<sup>7</sup> Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú na játaca ña. Caja cáhnu ndó ñayivi, na ndítahan caja cáhnu ndó ta coo toní ñúhú ndó xihín na ndítahan coo toní ñúhú ndó xihín. <sup>8</sup> A cáyicá ndo ñaha nuú ni in ñayivi. Ña ndíyicá ndo quéa quihvi ini táhan ndó. Jáchi ndá na quihvi ini ñayivi, na cán cúu na cája ña sáhndá ley Moisés. <sup>9</sup> Jáchi tá quihvi ini ndó ñani táhan ndó já quéa a ndiáva ini ndó caja ndó ña núu xihín na. Ta a cáhvi ini ndó coo ndó xihín ñájihí ñani táhan ndó. Ta a cáhni ndó ndii. Ta a cáhvi ini ndó caja cuíhna ndo ñaha inga na. Ta ni a ndiáva ini ndó cacomí ndo ñaha cómi inga na. Tá quihvi ini ndó ñani táhan ndó já quéa cúni cachi a ña cája ndó ña sáhndá ley Moisés tá cáhí a já: “Quihvi

ini ndó ñani táhan ndó tá quiahva quihvi ini ndó mé ndó.” <sup>10</sup> Ndá na quihvi ini ñani táhan, na cán cúu na cája va ha xihín ñani táhan na. Ña cán quéa tá quihvi ini ñani táhan í já quéa jáxinu yó nuú ña sáhndá ley Moisés.

<sup>11</sup> Sahá tóco ndihi ña cahan í xihín ndo yóho xíní ñúhú candehé ndo ndá quiahva cáa tiempo ndúu viti. Xíní ñúhú ndicáxi va ha ini ndó caja ndó ña cúni Ndióxi jáchi viti sa nacayati chága quivi jácacu Ndióxi mí a juú ga tá jacá nacandúsa í tuhun Ndióxi. <sup>12</sup> Cúu á tátuhun ja chá cúni yaha ñuu ta casahá tivi yaa. Ña yóho cúni cachi a ña sa nacayati quivi quixi tucu Jesucristo. Ña cán quéa xíní ñúhú jándacoo í ña núu cája í tátuhun cája ñayivi xica nuu naá. Ta xíní ñúhú caja í ña va ha já quéa quee va ha í xihín ña núu. <sup>13</sup> Ndísáhnu ná coo ini caja í tóco ndihi ñaha tátuhun cúu yó na ndúu nu yehe. A cacuu ñayivi xíhi ta ni a cája í vicó lándá ndiva ha. Ta ni a cáca nuu jii yo xihín ñájihí ñani táhan í ta a ndiáva ini coo í xihín najihí. Ta a ndúcú yo caní táhan í xihín ñani táhan í ta ni a cáhivi ini xihín ná. <sup>14</sup> Ña ndítahan caja í quéa cacá chága yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cáni táhan. Ta coto a quiahva ndó ñamaní nuú yiquí cuñu ndó caja ña núu.

## 14

*Co ndítahan candehé ndaa táhan í*

<sup>1</sup> Ndiqeehe vaha ndó na cúu cuéntá Jesús vatí co cándaá vaha ini na ña jána ha tuhun Ndióxi. Ta a cáni táhan yúhu ndó xihin ná sahá ña cándúsa na. <sup>2</sup> Ín java na cúu cuéntá Jesús cáhán na ña cuu cuxu na cuñu, ña najoco na nuú yoco. Joo java na cúu cuéntá Jesús, na saá xihin tuhun Ndióxi cáhán na ña a cúu toho cuxu na cuñu, ña najoco na nuú yoco sahá ña cán queá co xixi na ña. <sup>3</sup> Na xixi mé cuñu cán co ndítahan nu ná candehé ndaa na na co xixi ña ta na co xixi cuñu cán co ndítahan nu ná candehé ndaa na na xixi ña. Jáchi ndíqeehe vaha Ndióxi ndívi na cán vatí sa jíin cáhán na. <sup>4</sup> Ta quiahva já co ndítahan nu ndó candehé ndaa ndó mozo ñani táhan ndó á cája vaha da á co cája vaha da nuú xitoho da. Vaha ri caja vaha da tá vaha ri co cája vaha da jáchi mé va xitoho da cán xini sahá ña cán. Joo cuu caja Ndióxi ña ná candoo vaha mozo cán nuú xitoho da.

<sup>5</sup> Java ñayivi cáchi na ña ín quívi náhnu chága nuú java ga quívi. Ta java na cáchi na ña ín cúu tóco ndihi quívi. Ta ndítahan nuú in in na caxi na ña cáhvi ini na sahá ña yóho. <sup>6</sup> Tá sácú ini na caxi na in quívi caja cáhnu na Ndióxi ta vaha va cája na. Ta tá cáhán na cuu caja cáhnu na Ndióxi ndá quívi nacuu va ta vaha ri já va. Ta vatí xixi na cuñu,

ña sa najoco na nuú yoco á co xixi toho na ña joo ndíquiahva na ndixahvi nu Ndióxi sahá ta xihin ña yóho cája cáhnu na mé á.

<sup>7</sup> Ni in yó co tácu saha mí ta ni in yó co xihí saha mí. <sup>8</sup> Ta tá tácu yo á tá naxihí yo mé a ndaa cúu yó na cómi Ndióxi cuéntá saha ta cúu mé á xitoho í. <sup>9</sup> Sahá ña cán queá naxihí Jesucristo ta nanditacu tucu a já nanduu a xitoho ñayivi, na tácu xihin na sa naxihí.

<sup>10</sup> Ña cán queá a váha toho cája ndó tá sándehe ndaa ndó ñani táhan ndó. A váha caja ndó candají ndó na jáchi vaxi quívi ndique táhan ndihí candita í nu Ndióxi ña caja víi a saha yo. <sup>11</sup> Jáchi já cáchi tuhun Ndióxi já:

Yóho ín i cáchi i xihin ndo ña xinu quívi ndica xítí tóco ndihi ñayivi nuú i, ta casahá na caja cáhnu na yehe, ña cúu Ndióxi, cáchi Ndióxi, xitoho í.

<sup>12</sup> Jáchi ndítahan nuú in in í ndíquiahva í cuéntá sahá ña nacaja í nu Ndióxi.

*A cája ndó ñaha ña cuu jándicava ñayivi nuú cuachi*

<sup>13</sup> Sahá ña cán queá co ndítahan candehé ndaa táhan í. A cácu ini ndó caja ndó ñaha, ña cuu jándacava na cúu cuéntá Jesús nuú cuachi ta já ná jándacoo na ña cándeé ini na Ndióxi. <sup>14</sup> Sahá ña cándeé ini i Jesús, xitoho i sahá ña cán queá cándaá vaha ini i ña co cája i cuachi tá xixi i ña najoco na nuú yoco. Joo tá ndúu na

cáhán ña a váha toho cuxu na ña já quea co ndítahan cuxu na ña jáchi cuu candojo na cuachi sahá tá ná cuxu na ña. <sup>15</sup> Joo tá ndíhiví ñanún, na cúu cuéntá Jesús sahá ñaha xísún já quea cúní cachi a ña cándajún na. Cuéntá coún ná a cájún ña ndicava na cán nuú cuachi sahá ña xísún jáchi cúu ná na naxihí Jesucristo saha. <sup>16</sup> Vatí cándaá ini ndó ña cuu cuxu ndó ña najoco na nuú yoco joo a cúxu toho ndó ña tá ná cahan núu ñayivi sahá ña cája ndó. <sup>17</sup> Jáchi a juú sahá ña xíxí ni sahá ña xihí cacomí Ndióxi cuéntá saha yo. Ña cúní Ndióxi caja í quea ná canduu ndaa yo nu mé á ta ná coo vaha iní xihín ñayivi ta ná cají iní. Tóco ndihi ña yóho cúu á ña quixi nu ínima yí Ndióxi. <sup>18</sup> Tá ná caja ndó ña yóho já quea caja cáhnu ndó Jesucristo ta cají iní Ndióxi caja ndó ta candoo vaha ndó nuú ñayivi.

<sup>19</sup> Ña cán quea xíní ñúhú ndinducú yo tóco ndihi ñaha, ña cuu candaca mí canduu táj yó xihín ñani táhan í ta já ná cuu jácuahnu táhan í xihín ñaha Ndióxi. <sup>20</sup> Nasacu ini Ndióxi jácacu a ñayivi sahá ña cán quea coto a cájí nuu ndó nuú ña cúní Ndióxi caja sahá ñaha xíxí ndó. Mé a ndaa tóco ndihi ñaha cúu á ña vaha cuxú. Ña co váha quea jándacava í ñayivi nuú cuachi sahá ña xíxí. <sup>21</sup> Vaha chága ná a cúxu ndó cuñu ta ni a cóho ndó vino ta ni a cája ndó inga ñaha ña cuu jándacava ñani táhan ndó nuú

cuachi. <sup>22</sup> Tá ta cándaá cáxi ini ndó ña co cája ndó cuachi nu Ndióxi, a ndícani ndó ña nuú java ga ñayivi. Jáchi tahví nacuu ñayivi tá xíní na co cája na cuachi nu Ndióxi. <sup>23</sup> Joo ndá na ndúcú cuxu in ñaha ta cáhvi iví johó ini na xihín á tá xíxí na ña já quea xínu cuachi jatá ná. Jáchi ndá ñaha nacuu ná caja í ta tá ta cándúsa yó ña cúu á cuachi já quea xínu a cacuu a cuachi nu yo.

## 15

*Chindeé ndó na cáhvi iví johó ini*

<sup>1</sup> Tá ndacú cuahan yó xihín tuhun Ndióxi já quea co ndítahan cacu xóo í na vitá xihín tuhun Ndióxi. A ndúcú ndo caja ndó ña jándivaha ini mé cuití va ndó. <sup>2</sup> Tóco ndihí xíní ñúhú caja í ñaha ña táhan ini ñani táhan í xihín. Ta xíní ñúhú caja í ña já ná chindeé yó na ña ná canduu vaha na ta já ná cuu cuahnu chága na xihín tuhun Ndióxi. <sup>3</sup> Jáchi mé Jesucristo coó nanducú a caja ña táhan ini mé cuití a. Ña nacaja mé á quea najáxinu coo a nuú tuhun Ndióxi tá nacachi a já: “Tuhun núu ña najácana na nu mé ndó naxinu ri a jatá yehe viti.” <sup>4</sup> Tóco ndihi ña nacahyi nuú tuhun Ndióxi sanahá nacahyi a já ná jáñaha nu yo ña co ndítahan ndicani iní. Ta, náha ña ndítahan quiahva tuhun ndeé iní nani ndátí jáxinu Ndióxi tuhun nasahan nu yo. <sup>5</sup> Ndióxi quea sahan ndeé nu yo ña ná coo cáhnu iní ta sa mé á sahan tuhun ndeé iní.

Ñá cúní Ndióxi quéa chindeé a ndohó caja ndó tá quiahva ñacaja Jesucristo ta já in ná nduu xihín táhan ndó. <sup>6</sup> Ta já in ná jándique táhan ndihí caja cáhnu í Ndióxi, mé a cúú tátá Jesucristo, xitoho í.

*Xíni johó na coó ñaquixi chichi Israel tūhun vaha saha Jesús*

<sup>7</sup> Ndiqhehe vaha ndó tóco ndihi na cúú cuéntá Jesús tá quiahva ñandiquehe vaha Jesucristo ndohó já ná ndicáhnu Ndióxi. <sup>8</sup> Ndítahan ndicūhun ini ndó ña ñaquixi Jesucristo chindeé a ñayivi Israel. Ta ñaquixi a jáñaha nu ná ña mé a ndaa táhyí jáxinu coo Ndióxi tóco ndihi nuú tūhun ña ñasahan nuú tásáhnú jícó yo jáchi co ndímaní Ndióxi nuú tūhun a. <sup>9</sup> Ta ñaquixi a jácacu a ñayivi, na coó ñaquixi chichi Israel ña ná caja cáhnu na mé á sahá ñamaní ñacaja mé á xihín ná. Jáchi já cáhí tūhun Ndióxi:

Yehe xihín na coó ñaquixi chichi Israel caja cáhnu nde ndohó, Ndióxi, ta yehe cata í nu ndo caja cáhnu í quivi ndo.

<sup>10</sup> Ta ín inga tucu nu cáhí a já:

Ndóhó, na coó ñaquixi chichi Israel xíní ñúhú ndique táhan ndó cajji ini ndó xihín na ñaquixi chichi Israel.

<sup>11</sup> Anda já ñacachi tucu a já:

Tóco ndihi ndó, na coó ñaquixi chichi Israel caja cáhnu ndó Ndióxi, xitoho í,

ta ná a jándacoo toho ndihi ñayivi caja cáhnu na Ndióxi.

<sup>12</sup> Tá ñacahyí Isaías nuú tūhun Ndióxi já ñacahyí da tūhun yóho:

Vaxi quivi cacu in da chichi Isaí,

ña ná cacomí da cuéntá sahá ñayivi, na coó ñaquixi chichi Israel.

Ta mé ñayivi yóho candeé ini na mé da quixi chichi Isaí cán.

<sup>13</sup> Ndióxi quéa cája ña ná candeé ini ndó mé á ta já cuu jácacu a ndohó. Ná caja mé á ña ná ndicutú ini ndó xihín ña cájji ini ndó ta ná caja mé á ña ná coo vaha ini ndó jáchi candeé ini ndó a. Xihín ndée ínimá yji Ndióxi ná quiahva mé á cuaha ndee nu ndó candeé chága ini ndó a.

<sup>14</sup> Cándehé ndó ñani í, na cúú cuéntá Jesús. Sa xíni vaha í ña ñachutú ndo xihín ña vaha ta cándaá vaha ini ndó tūhun Ndióxi. Ta xihín ña jan cuu jáñaha táhan ndó. <sup>15</sup> Joo tá ñacahyí í carta yóho nu ndo já ñacaja ndeé ini í cáhyí í saha java ñaha jáchi coo cúní ña ná ndindójó ndo ña. Cáhyí í ña yóho jáchi ñacaja Ndióxi ñamaní xihín í <sup>16</sup> cája chúun í cuéntá Jesucristo cáxi tūhun í tūhun vaha saha mé á nuú ñayivi, na coó ñaquixi chichi Israel. Ta cúú u tátūhun jutū jáchi xíca í cáhan í tūhun Ndióxi xihín ná já ná cuu cacu ndaa ínimá ná. Cúú á tátūhun jóco í na nu Ndióxi já ná cajji ini mé á xihín ná ta já ná cuu

ndaja ínimã yîi mé á ñã ná nduu na ñayivi vií nu mé á.

17 Ta sahá ñã cándúsa i Jesucristo sahá ñã cán queá ndivaha ini i caja chúun i cuéntá Ndióxi.

18 Jáchî sáhan ndeé ini i cáhan i sahá ñã ñacaja Jesucristo tá ñacaja chúun mé á yehe ñã candaca i na cóo ñaquixi chîchi Israel ñã ná caja na ñã cúni Ndióxi. Ta sahá ñã ñacahan i xihín na cán já naxini johó na ta ñacaja na ñã cáchî tuhun Ndióxi.

19 Ta sa naxini na ñã xitúhún xihín ñã náhnu ndivaha ñacaja i nu ná xihín ndée ínimã yîi Ndióxi. Ta quiahva já ñacaxi tuhun i tuhun vaha saha Jesucristo nuú ñayivi ndúu ñuu Jerusalén xihín nu tóco ndihi na ndúu ndijáá ñuu anda estado Ilírico.

20 Ñã ndúcú u caja i queá cahan i xihín ñayivi ñã cúni Ndióxi jácacu a na. Ta sá cahan i ñã yóho nuú ñayivi, na a ñáha cuni johó saha Jesucristo jáchî có cúni ndiquehe e chuun ñã sa najácava sahá inga na.

21 Cáhvi ini i ñã vaha chága ná cuhun i nuú ñayivi, na cóo naxini johó tuhun vaha saha Jesús jáchî já cáchî tuhun Ndióxi já:

Vatí cóo naxini johó na tuhun vaha saha mé á joo vaxi quivî xinu cóo na cahan xihín ná, ñã ná cándaã ini na ñã cóo ñacandaã ini na jihna, cáchî tuhun Ndióxi.

*Sácú ini Pablo cuhun da ñuu Roma*

22 Ta sahá chuun cája i yóho cóo ñacuu saa i coto nihni i ndohó vatí sa cuahá tañu ñasacu ini i saa i jan.

23 Joo viti sa najándihi i chuun ñacaja i tañu ñayivi ndúu yóho. Ta sa cáhvi ini i saa i coto nihni i ndohó anda sanahá.

24 Sahá ñã cán queá sácú ini i saa i coto nihni i ndohó tá ná yaha i cuhun i chí España. Ta tá ná ndihi cajî ini i cuni i ndohó anda jávi ndiquehe tucu u íchî cuhun i.

Joo cúni ñã ná chindeé ndó yehe já ná cuu ndiquehe tucu u íchî cuhun i.

25 Joo viti cuhun i chí ñuu Jerusalén chindeé na cúu cuéntá Jesús ndúu cán.

26 Jáchî na cúu cuéntá Jesús ndúu estado Macedonia xihín na ndúu estado Acaya ñasacu ini na játaca na jiuhún ta chíndahá na ñã nuú na cúu cuéntá Jesús, na cándáhvi ndúu ñuu Jerusalén.

27 Mé na tóho yóho ñasacu ini na caja na ñã ta vaha cája na jáchî cáhan na ñã ndítahan nu ná chahvi na sahá ñã ñacaja na Israel, mé na cúu cuéntá Jesús ndúu ñuu Jerusalén xihín ná.

Jáchî ñasahan na Israel ñacaxi tuhun na tuhun vaha saha Jesús nu ná. Ta viti ndúcú ñehe na tóho yóho ñamanî ñacaja na Israel xihín ná.

Ñã cán queá chindeé ñahá na toho xihín ñã cómi na.

28 Ta tá sa najándihi i caja i chuun yóho ta tá sa nandihî ndiquiahva i jiuhún ñataca na tóho nuú na cúu cuéntá Jesús ndúu ñuu Jerusalén anda já nuná nuú i cuhun i España ta já yaha i



jan coto nihni i ndohó. <sup>29</sup> Ta xini vaha i ña tá ná saa i jan caja Jesucristo cuahá ñamani xihin ndo sahá tuhun vaha cahan i xihin ndo.

<sup>30</sup> Xíca tahví i nu ndo ñani mí i, na cúu cuéntá Jesús, ña in nuú ná caça tahví yo nu Ndióxi sahá chuun cája i. Jáchi cándeé ini ndó Jesucristo ta quíhvi ini ndo yehe nacaja ínimá yíi Ndióxi. <sup>31</sup> Caça tahví ndo nu á ña ná chindeé a yehe ná a cája ñayivi, na co cándúsa Ndióxi ndúu estado Judea ni in ñaha xihin i. Ta caça tahví ndo nu Ndióxi ña ná candúsa na cúu cuéntá Jesús ndúu ñuu Jerusalén cán ndiquehe vaha na jjuhún ñéhe cuahan i nu ná. <sup>32</sup> Já queá tá ná cúni Ndióxi já cajii ini i saa i coto nihni i ndohó ta ndiquehe ndeé e nani xito nihni i ndohó. <sup>33</sup> Ndióxi ná coo xihin ndo ta ná caja mé á ña ná coo vaha ini ndó. Já ná coo.

## 16

*Chíndahá Pablo Ndióxi coo na ndúu ñuu Roma*

<sup>1</sup> Já chá va casaa ñá nani Febe, ñá cúu cuéntá Jesús nu ndo. Mé Febe yóho nacaja chúun ñá veñuhu Cencrea. <sup>2</sup> Caja ndó ñamani ndiquehe vaha ndó ña sahá ña cúu ña cuéntá Jesús, xitoho í ta já ndítahan caja na cándeé ini Jesús. Chindeé ndó ña yóho xihin ndihi ñaha ña cámani nu ña jáchi nachindeé ña cuahá ndivaha ñayivi ta nachindeé ri ña yehe va.

<sup>3</sup> Chíndahá i Ndióxi coo Priscila xihin Aquila jáchi in

cúu ná xihin i cája chúun na cuéntá Jesucristo. <sup>4</sup> Mé na yóho nasahiin tiahva na quivi na já ná cuu cacu yehe tá naquixi tondóho nuú i. Ta a juú in túhún yehe ndiquiahva ndixahvi nu ná vaha. Tóco ndihi na cúu cuéntá Jesús, na coó naquixi chichi Israel ndiquiahva na ndixahvi nu ná. <sup>5</sup> Ta jári chíndahá i Ndióxi coo na cúu cuéntá Jesús, na ndique táhan vehe Priscila xihin Aquila. Ta cahan Ndióxi ndó xihin Epeneto jáchi quíhvi ndivaha ini i da. Mé dá nasacuu da nu cuíti nandihvi íchi cuéntá Jesús estado Acaya. <sup>6</sup> Ta cahan Ndióxi ndó xihin María, ñá chindeé cuahá ndohó. <sup>7</sup> Ta chíndahá i Ndióxi coo Andrónico xihin Junias. Ndívi da yóho cúu dá da naquixi chichi nuú naquixi mí i. Ta in nasañuhu nde vecaa xihin dá. Ta cúu dá da náhnu tañu na apóstol. Ta jihna ñuhú ndívi mé da yóho nacasahá cándúsa da Jesucristo a juú ga yehe.

<sup>8</sup> Ta cahan Ndióxi ndó xihin Amplias jáchi quíhvi ndivaha ini i da. Ta in cúu nde cuéntá Jesús. <sup>9</sup> Ta chíndahá i Ndióxi coo Urbano. In cúu mé dá xihin nde cája chúun da xihin nde cuéntá Jesucristo. Ta chíndahá i Ndióxi coo Estaquis, da quíhvi ndivaha ini i. <sup>10</sup> Ta chíndahá i Ndióxi coo Apeles jáchi cuahá tañu najánaña da nuú ñayivi ña mé a ndaa táhyí cándeé cáhnu ini da Jesucristo. Ta quiahva já chíndahá i Ndióxi coo na vehe Aristóbulo. <sup>11</sup> Ta cahan Ndióxi in

ndó xih̄in Herodión jáchi in naquixi nde ch̄ichi Israel. Ta cahan Ndióxi ndó xih̄in na vehe Narciso jáchi cándusa na Jesús, xitoho í. <sup>12</sup> Ta cahan Ndióxi ndó xih̄in Trifena ta xih̄in Trifosa, na cája chúun cuéntá Jesucristo, xitoho í. Ta cahan Ndióxi ndó xih̄in Pérsida, jáchi quih̄vi ndivaha ini i ña ta cuahá ndivaha nacaja chúun ñá cuéntá Jesucristo, xitoho í. <sup>13</sup> Ta cahan Ndióxi ndó xih̄in Rufo jáchi cúu dá da cáhnu ndivaha tañu na cúu cuéntá Jesús. Ta cahan Ndióxi ndó xih̄in náná da jáchi cúu ñá tátuhun náná mí i viti. <sup>14</sup> Ta chindahá i Ndióxi coo Asíncrito xih̄in Flegonte xih̄in Hermas xih̄in Patrobas xih̄in Hermes. Ta chindahá i Ndióxi coo tóco ndihi na cúu cuéntá Jesús ndúu xih̄in na cán. <sup>15</sup> Ta cahan Ndióxi ndó xih̄in Filólogo xih̄in Julia xih̄in Nereo ta xih̄in quiahva da. Ta cahan Ndióxi ndó xih̄in Olimpas ta xih̄in tóco ndihi na cúu cuéntá Jesús ndúu xih̄in na cán.

<sup>16</sup> Ña cúni quéa ná cahan Ndióxi xih̄in táhan ndó ta ná tatí yuh̄u táhan ndó ta yii caja ndó ña. Tóco ndihi na cúu cuéntá Jesús, na táca veñuhu yóho chindahá na Ndióxi coo ndihi ndó.

<sup>17</sup> Cándehé ndó ñani mí i, na cúu cuéntá Jesús. Xíca tahvi i nu ndo ña ná coo cuéntá ndó xih̄in na cátoó ndicahnda ñayivi, na cúu cuéntá Jesús jáchi sáji nuu na nuú na cája ña cúni Ndióxi. Ña cája na jan quéa cáxoo na nuú ña

najánaḥa nde nu ndo. Coto a cátaḥan ndó xih̄in ná. <sup>18</sup> Jáchi mé na yóho co cúu ná na cája chúun cuéntá Jesucristo, xitoho í. Ña cája na quéa ndúcú na ña vaḥa mé cuití va na. Ta xih̄in tuhun ñúchí ta xih̄in tuhun vií jándahvi na ñayivi, na co tácu vaḥa ini. <sup>19</sup> Tóco ndihi ñayivi xini na ña cája ndó ña cúni Ndióxi ña cán quéa cáji ndivaha ini i. Ña cúni quéa ná naḥa ndó ña ndíchi jini ndo xih̄in ña vaḥa cája ndó. Ta a cáñuhu ini ndó caja ndó ña núu. <sup>20</sup> Yachi chá jándihi Ndióxi sahá Satanás, rí cúu tiñáhá sacuaḥa ta já cuu cañnu ndó ri xih̄in ndée Ndióxi. Cacuu a tátuhun chin̄hni saḥa ndó ri. Ná caja Ndióxi ña ná coo vaḥa ini ndó. Ta ná caja cuahá Jesucristo, xitoho í ñaman̄i xih̄in ndihi ndo.

<sup>21</sup> Chindahá Timoteo Ndióxi coo ndó ta in cúu dá cája chúun da xih̄in i. Ta chindahá ri Lucio xih̄in Jasón xih̄in Sosípater Ndióxi coo ndó. Tóco ndihi da yóho naquixi da ch̄ichi Israel nuú naquixi mí i.

<sup>22</sup> Yehe naní Tercio ta cáhyí i carta yóho ta chindahá ri yehe va Ndióxi coo ndó cuéntá Jesucristo, xitoho í.

<sup>23</sup> Chindahá Gayo Ndióxi coo ndó. Vehe mé dá in i ta sa mé yóho táca na cúu cuéntá Jesús. Ta chindahá ri da naní Erasto Ndióxi coo ndó. Mé Erasto cómi da cuéntá sahá jjuhún ñuu yóho. Ta chindahá ri Cuarto, da cúu cuéntá Jesús Ndióxi coo ndó.

<sup>24</sup> Ná caja cuahá Jesucristo, xitoho í ñamaní xihín ndihi ndó. Já ná coo.

*Cája cáhnu Pablo Ndióxi*

<sup>25</sup> Coho caja cáhnu í Ndióxi jáchi mé á cuu ndaja ndacú a ndohó xihín tuhun vaha saha Jesús ña jánaḥa nde nu ndo. Anda sanahá tá cámani cava sahá saha ñuyívi nasacu ini Ndióxi jácacu a ndohó ta viti naxinu quívi jánaḥa mé á ña nu ndo. Nahá ndivaha nasahiin jehé tuhun vaha saha Jesús. <sup>26</sup> Ta viti cándaḥa ini ña naçahan Ndióxi saha Jesús nuú na profeta ta na yóho naçahyí na ña nuú tutu. Ta nasahnda Ndióxi chuun nuú na cúu cuéntá mé á ña ná cuhun na çaxi tuhun na ña nu tóco ndihi ñayivi ndúu ñuyívi. Ta xihín mé ña yóho naçaja Ndióxi ña ná cuu candeé ini ñayivi mé á ta já ná caja na ña cúni a, mé a tácu anda ama cáa quívi.

<sup>27</sup> Ta mé cuití va cúu Ndióxi ta mé cuití va ndíchi jiní sahá ña cán quéa ndítahan caja cáhnu yó a anda ama cáa quívi sahá ña naçaja Jesucristo, xitoho í. Já ná coo.

## Carta nu cuítí nacahyí Pablo nuú na cúú cuéntá Jesús ndúu ñuu Corinto

*Cáhan Ndióxi Pablo xihín na cúú cuéntá Jesús ndúu ñuu Corinto*

<sup>1</sup>Yehe cúú Pablo, da naçaxi Ndióxi cacuu apóstol cuéntá Jesucristo jáchi já cúni a caja. Yehe xihín ñani Sóstenes <sup>2</sup>chíndahá nde Ndióxi coo ndó, na cúú cuéntá Jesús ndúu ñuu Corinto jan jáchi in cúú ndó xihín Jesucristo. Mé Ndióxi naçaxi a ndohó cacuu ndó ñayivi yji, na nandiquiahva mé ná ndáha mé á. Ta quiahva já naçaxi ri a java ga na ndúu ndijáá ñuu cacuu na cuéntá mé á, na cája cáhnu Jesucristo, xitoho í jáchi cúú ri a xitoho mé ná. <sup>3</sup>Ña cúni quéa ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

*Ñamaní cája Ndióxi xoho sahá ña cándee ini Jesucristo*

<sup>4</sup>Níi tiempo ndíquiahva i ndixahvi nu Ndióxi jáchi naçaja mé á cuahá ñamaní xihín ndo sahá ña cándee ini ndó Jesucristo. <sup>5</sup>Ta sahá ña in nanduu ndó xihín mé á sahá ña cán quéa naçaja Ndióxi cuahá ñamaní xihín ndo já ná cuu çahan vaha ndó saha mé á. Ta já nasuná a xíní túní ndo

já ná candaa vaha ini ndó saha mé á. <sup>6</sup>Ta ña naçachi i xihín ndó sahá Jesucristo naxinu a ini ndó ta viti cája ndó ña cúni mé á caja ndó. <sup>7</sup>Ta viti nani ndáti ndó quiví quixi tucu Jesucristo, xitoho í ñuyiví yóho ni in túhún toho ñaha a ndímaní nu ndo ña ná caja ndó ña cúni Ndióxi jáchi nasahan mé á tóco ndihi ñaha nu ndo. <sup>8</sup>Mé Ndióxi chindee a ndohó já ná caca tuun ndó íchi cuéntá mé á janda quiví nu ndíhi. Ta já ná a cúú chícaan ñayivi cuachi jata ndo tá ná xinu coo quiví quixi tucu Jesucristo, xitoho í ñuyiví yóho. <sup>9</sup>Jáchi cája tá cája Ndióxi ña sáhan mé á tuhun a caja. Ta mé á quéa naçaxi a mí ña ná in cacuu xihín Jesucristo, xitoho í ña cúú in túhún jiní já jahyi mé á.

*Tává xoo java na cúú cuéntá Jesús mé ná*

<sup>10</sup>Candehé ndo, ñani mí i, na cúú cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan vií tuhun ndihi ndó ta a cáhndá táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jiní ndihi ndó. <sup>11</sup>Candehé ndo, ñani mí i, na cúú cuéntá Jesús. Cáhan i ña yóho xihín ndo jáchi naçaxi tuhun na vehe Cloé xihín i ña ndaja mé ndó cáni táhan ndó. <sup>12</sup>Jáchi nañehé e tuhun ña java ndó cáhí ndo ña cúú ndó cuéntá yehe, da cúú Pablo. Ta java ndó cáhí ndo ña cúú ndó cuéntá Apolos.

Ta java ndó cáchí ndo cúu ndó cuéntá Pedro. Ta java ndó cáchí ndo cúu ndó cuéntá Jesucristo. <sup>13</sup> Ta xihín ña yóho ña cája ndó quéa sáhndá java táhan ndó. Cándehé ndo. Coó naxihí i, da cúu Pablo ndica crúxu saha ndo já ná jácacu u ndohó. Ta ni coó nacandúta ndó cuéntá mí i. <sup>14</sup> Ndixahvi Ndióxi coó najácandúta i ndohó. Jáchí ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuití va. <sup>15</sup> Ña cán quéa ni in túhún ndó a cúu cachi ndó ña nacandúta ndó cuéntá mí i jáchí coó najácandúta toho i ndohó. <sup>16</sup> Ta ndícuahun ini i ña najácandúta ri na vehe Estéfanos. Na yóho cuití cúu na ñúhu ini i najácandúta i. <sup>17</sup> Jáchí coó nachindahá toho Jesucristo yehe ña ná caca nuu i jácandúta i ñayivi. Nachindahá mé á yehe ña ná caca nuu i cahan i tuhun vaha saha mé á xihín ñayivi já ná cuu cacu ndaa ínimá ná. Ta coó toho tuhun ndíchí cáhan i xihín ná jáchí coó cúní jánuu ndáha i xihín tuhun cáhan i yóho tóco ndihí ña nacaja Jesucristo tá naxihí a ndica crúxu saha yo.

*Ndíchí jini Jesucristo ta ín ndéé mé á quíxi nu Ndióxi*

<sup>18</sup> Ñayivi, na xíca cuahan ndihí saha ná ini indayá, mé na cán cáhán na ña cúu yó na tachí tá cáhan yó ña naxihí Jesucristo ndica crúxu já ná cacu ndaa ínimá ná. Joo nu mí, na nasacu ini Ndióxi

jácacu a cávatá yo cándaa ini ña xihín ndéé Ndióxi naxinu tuhun mé á nu yo. <sup>19</sup> Já cáchí tuhun Ndióxi já:

Jándihí i sahá ña ndíchí jini ñayivi ñuyiví,

ta a quéhe e cuéntá sahá ña cándaa ini ñayivi, já nacahyi a nuú tuhun Ndióxi.

<sup>20</sup> Sahá ña cán quéa coó saha toho ñaha ñuyiví yóho nu Ndióxi vatí da ndíchí jini xihín da tácu ini cáhán da ña cúu dá da ndíchí ndivaha sahá ña xini da cahan da sahá ñaha ñuyiví yóho. Joo nacaja Ndióxi ña ná cacuu a ña coó saha. <sup>21</sup> Sahá ña ndíchí jini Ndióxi, coó cúní mé á ña ná cuu cándaa ini ñayivi saha mé á xihín ña ndíchí quixi jini ñayivi ñuyiví. Ña nacaja mé á quéa nachindahá a java ñayivi ña ná cahan na tuhun vaha saha mé á já quéa ndá na cándúsa ña ta cándéé ini na Ndióxi já cuu cacu ndaa ínimá ná. Ta ña yóho cúu á in ña tachí ndivaha nuú ñayivi ñuyiví.

<sup>22</sup> Jáchí ñayivi Israel cáchí na ña ndúsa cuni na ña xitúhún ndivaha já cuu cándúsa na tuhun vaha saha Jesús. Ta na tóho, na ñuu Grecia cúní na ña ná cahan ndíchí ndivaha ñayivi xihín ná já cuu cándúsa na ña. <sup>23</sup> Joo mé nde xíca nuu nde cáxi tuhun nde nuú ñayivi sahá Jesucristo, mé a naxihí ndica crúxu saha ñayivi. Joo tá xini johó na Israel ña yóho já ndíhíhví na. Ta tá xini johó na tóho ña yóho já cáhán na

ñā cúú á ñā tóntó ndivaha. <sup>24</sup> Joo tóco ndihi na ñaçaxi Ndióxi cacuu na cuéntá mé á, á cúú ná na tóho á cúú ná na Israel, cándaā ini na ñā cáhan nde sahá Jesucristo, ñā iin ndée mé á jácaçu a ñayivi. Ta xini vaha na ñā ndíchi ndivaha jini mé á ñaçaja Ndióxi. <sup>25</sup> Nuú ñayivi ñuyívi ñā cája Ndióxi cúú á ñā tóntó ndivaha. Joo ñā cája Ndióxi cúú á ñā ndíchi chága nu ndíhi ñaha cája ñayivi ñuyívi. Ta vatí cáchi ñayivi ñā co ndiyahvi ñā ñaxihi Jesucristo ndica crúxu joo yahvi chága ñā yóho a juú ga inga ñaha cuu caja ñayivi. <sup>26</sup> Candehé ndo, ñani i, na cúú cuéntá Jesús. Ñaçaxi Ndióxi ndohó cacuu ndó cuéntá mé á vatí chá cuití ndó cúú ndó na ndíchi jini nuú ñayivi ñuyívi. Ta chá ndó cúú ndó na náhnu nuú ñayivi ta chá cuití ndo cúú ndó na cuicá. <sup>27</sup> Joo ñaçaxi Ndióxi ñayivi, na cáchi ñayivi ñuyívi cúú ná na tóntó jini já quéa ná cacahan nuú na ndíchi jini. Mé Ndióxi ñaçaxi a ñayivi vitá ná cacuu na cuéntá mé á já ná cacahan nuú na náhnu ndúu ñuyívi yóho. <sup>28</sup> Ñayivi, na coó saha ñuyívi yóho, na quéhe núu ñayivi saha, na cán cúú na ñaçaxi Ndióxi. Ta ñaçaxi a na co ndayahvi toho ñuyívi yóho ñā ná nuu ndáha na náhnu cuéntá ñuyívi yóho. <sup>29</sup> Ta xihín ñā yóho cándaā ini ñayivi ñā a cúu ndiñehe jícó na mé ná nu Ndióxi. <sup>30</sup> Mé Ndióxi quéa ñaçaja ñā ná in nduú xihín Jesucristo. Ta ñaçaja mé á

ñā ná ndindíchi jini yo. Ta ñaçaja mé á ñā ná canduu ndaa yó nu Ndióxi. Ñaçaja mé á ñā ná nduú ñayivi yii, na cúú cuéntá mé á. Ta mé á najácaçu a mí nuú cuachi. <sup>31</sup> Ta já cáchi tuhun Ndióxi já: “Ndá na cúni caja lánda, xini ñúhú caja lánda na sahá ñā náhnu ñaçaja Ndióxi saha ná.”

## 2

*Cáxi tuhun Pablo ñā ñaxihi Jesucristo ndica crúxu saha cuachi ñayivi*

<sup>1</sup> Candehé ndó, ñani i, na cúú cuéntá Jesús. Tá ñasahan i ñaçahan i ñā ndaa cuéntá Ndióxi nu ndo, coó ñaçahan i ñā xihín tuhun ndíchi ñuyívi yóho. <sup>2</sup> Joo ñasacu ini i çahan i sahá Jesucristo cuití va tañu ndó, mé a ñaxihi ndica crúxu. <sup>3</sup> Tá ñasahin i tañu ndó, coó ñandiñehe jícó i mí i. Ñā ñaçaja i quéa yíhvi yíhvi cúú u anda quíji ninu i. <sup>4</sup> Ta tá ñacasáha i cáxi tuhun i tuhun vaha sahá Jesucristo nu ndo, coó toho tuhun ndíchi ñaçahan i xihín ndo ñā ná cava i jini ndó xihín á, vaha. Ñā ñaçaja i quéa ñaçahan i xihín ndo xihín ndée ínimá yii Ndióxi ta mé a najáxinu a ini ndó xihín ndée mé á. <sup>5</sup> Já quéa ná cándaā ini ndó ñā Ndióxi quéa cája ñā ná candee ini ndó mé á xihín ndée mé á. Ta co cúú á sahá ñā ndíchi quíxi jini ñayivi ñuyívi yóho.

*Ínimá yii Ndióxi cája ñā ná cándaā ini ñayivi saha mé á*

<sup>6</sup> Joo tá ndítuhún nde xihín na sa cándaã vaha ini ñaha Ndióxi já cáhan nde tuhun ndíchí xihín ná. Joo co cáhan nde tátuhun cáhan ãa ndíchí ndúu ñuyíví yóho. Ta ni co cúú á tátuhun ña cáhan da ndíchí, da cómí cuéntá sahá ñuyíví yóho. Jáchi yachi ndihi sahá na cán. <sup>7</sup> Ña cáhan nde cúú á ña ndíchí cuéntá Ndióxi. Ta cúú á ña nasahin jehé, ña co xíni ñayivi saha janda tá cámaní cava sahá saha ñuyíví. Jáchi janda mé tiempo já nasacu ini Ndióxi ndá quiahva caja jácacu a mí anda ama cáa quivi. <sup>8</sup> Ta ni in túhún na náhnu cómí cuéntá sahá ñuyíví yóho co cándaã ini na ña nasacu ini Ndióxi jácacu a mí. Jáchi tá ná candúsa na ña já quéa a cáta caa toho na Jesucristo, xitoho í ndica crúxu, nduu. Jáchi mé Jesucristo cúú á ña cáhnu ndivaha. <sup>9</sup> Ta já cáhí tuhun Ndióxi já:

Ni in túhún ñayivi a ñaha cuni  
na ta a ñaha cuni joho  
na,

ta ni a ñaha cahvi ini na,  
ndá quiahva íin ña náhnu sácú  
ini Ndióxi quiahva nuú  
ñayivi tá quíhvi ini  
na mé á, cáhí tuhun  
Ndióxi.

<sup>10</sup> Nacaja ínimã yii Ndióxi ña ná candaa ini tóco ndihi ña yóho. Jáchi ínimã yii mé á sádehé a tóco ndihi ñaha ta xíni a janda ña cáhvi ini mé Ndióxi.

<sup>11</sup> Ni in túhún ñayivi co xíni na ña cáhvi ini inga na. Ínimã in in na cuití va xíni a ña cáhvi ini in in na. Quiahva

já íin ri xihín Ndióxi va. In túhún ínimã yii mé á xíni ndia cáhvi ini a. <sup>12</sup> Nasahan Ndióxi ínimã yii mé á nu yó ta co cúú á tátuhun ínimã ñayivi ñuyíví. Ta nacaja mé á ña ná candaa ini ndaja íin ña náhnu sahan mé á nu yó. <sup>13</sup> Ta tá cáhan nde sahá ña yóho, cáhan nde tá quiahva najánaã ínimã yii Ndióxi nuú nde. Ta co cáhan nde ña xihín tuhun ndíchí nacatiahva nde ñuyíví yóho. Quiahva já ndícani nde ñaha Ndióxi xihín na ñúhu ínimã yii Ndióxi ini.

<sup>14</sup> Tóco ndihi ña yóho cúú á ña tóntó ndivaha nuú ñayivi, na co ñúhu ínimã yii Ndióxi ini. Co ndíquehe vaha na ña ta ni a cuú candaa ini na ndaja íin a jáchi na ñúhu ínimã yii Ndióxi ini, na cán cúú ndusa na cándaã ini ñaha Ndióxi. <sup>15</sup> Joo na ñúhu ínimã yii Ndióxi ini, na cán cúú na cándaã ini ndá ñaha cúú ña vaha ta ndá ñaha co cúú toho ña vaha. Ta xihín ña yóho cántóntó ñayivi ñuyíví jáchi co cándaã ini na ña cúú cuéntá Ndióxi. <sup>16</sup> Jáchi cáhí tuhun Ndióxi: “Ni in túhún ñayivi a cúu candaa ini na ña cáhvi ini Ndióxi, xitoho í. Ta ni in túhún na a cúu cachi xihín mé á ña ndítahan nu á caja”, cáhí tuhun Ndióxi. Joo mí, na cúú cuéntá Jesús, cáhvi ini tá quiahva cáhvi ini Jesucristo jáchi ñúhu ínimã yii Ndióxi ini mí, na cúú cuéntá mé á.

### 3

*Na cája chúun cuéntá Ndióxi*

1 Candehé ndó, ñani i, na cúu cuéntá Jesús. Coó nācuu cahān i xihīn ndo tá quiahva cáhan i xihīn na nāchutú ndāa xihīn ínimā yīi Ndióxi. Jáchī mé ndó cúu ndó tátuhun léē loho ña chíhí jáchī a ñaha cuahnu ndó xihīn tuhun Ndióxi jáchī cája ndó ña xíca ini yiquí cuñu ndó caja tá quiahva cája ñayivi ñuyiví. 2 Sahá ña cán quéa tá najánaha i tuhun Ndióxi nu ndo, coó nācuu jánaha i ña ihvi chága nu ndo jáchī a cúu candaā ini ndó ña. Ña nācaja i xihīn ndo quéa nasahan i tátuhun leche nu ndo jáchī cúu ndó tátuhun na valí chíhí sahá ña a cúu cuxu ndó ñaha veē. Ta janda viti co íin tiahva ndó jácuaha ndó ña ihvi chága cuéntá tuhun Ndióxi. 3 Jáchī cúu yīi va ndó tátuhun ñayivi ñuyiví. Ndaja táhan mé ndó cáhīhvi ini xihīn táhan ndó ta cáni táhan ndó ta sáhdá java táhan ndó. Ta xihīn ña yóho cája ndó ña cúnī mé cuití ndo tá quiahva cája ñayivi ñuyiví. 4 Java ndó cáhí ndo ña cúu ndó cuéntá yehe, da cúu Pablo. Ta java ndó cáhí ndo ña cúu ndó cuéntá Apolos. Ta xihīn ña yóho sáhdá java táhan ndó ta náha ndó ña cája ndó tá quiahva cája ñayivi ñuyiví.

5 Ndá da cúu Apolos xihīn yehe ña ná caní táhan ndó sahá nde. Co ndítahan caja ndó já jáchī mé nde cúu nde da xíca nuu cája chúun cuéntá Jesucristo, xitoho í cuití va. Ta sahá chuun cája nde yóho nācuu nācandúsa ndó mé

á. Ta ña yóho cúu chuun nanaha Jesucristo, xitoho í nuu yehe xihīn nu Apolos caja nde. 6 Ña nācaja nde cúu á tátuhun ña cája na tá xútu na. Ta yehe cúu u tátuhun da nāchihīn tata jáchī nācaxi tuhun i tuhun Ndióxi nu ndo. Ta Apolos cúu dá tátuhun da nāxojo ticuī nuu a cán jáchī najánaha chága da tuhun Ndióxi nu ndo. Joo Ndióxi quéa nācaja ña ná cuahnu a jáchī cája mé á ña ná cuu cuahnu ndó xihīn tuhun mé á. 7 Sahá ña cán quéa vatí yehe cúu u da nāxutu ta Apolos cúu dá da nāxojo ticuī joo ni in túhún nde coó saha. Cáhnu cúu Ndióxi jáchī mé á quéa nācaja ña ná cuahnu mé tata nāxutu nde cán. 8 Xíní ñúhú candaā ini ndó ña in cúu va na chíhīn tata xihīn na xójo ticuī nu á. Ta tá in tá in chuun nācaja in in na cán quehe na yahvi saha. 9 Yehe xihīn Apolos in cúu nde cája chúun nde cuéntá Ndióxi. Ta mé ndó cúu ndó tátuhun in yójo nuu nasacu Ndióxi ndehe caja chúun nde cuéntá mé á.

Ta jári cúu ndó tátuhun in vehe ña cávaha Ndióxi. 10 Ta yehe cúu u tátuhun da cávaha mé vehe yóho. Ta mé Ndióxi quéa nasahan ñamanī nuu i ña ná taán i yuu ndúhu sahá ta ná jácava sáhdá i ña. Ta inga na xíní ñúhú caja chúun xihīn á. Joo ndítahan candehé vaha na ndaja caja na chuun yóho. 11 Jáchī in túhún Jesucristo cúu á tátuhun yuu ndúhu sahá vehe yóho. Ta ni



in na a cúu tavá xóo na ña ta já cacu na inga ñaha. <sup>12</sup> Mé na cávaha vehe nuú yuu ndúhu yóho cuu jáxinu na ña xihín jiuhun cuáán ta cuu caja na ña xihín jiuhun cúxú ta cuu caja ri na ña xihín yuu ñúchí. Ta jári cuu caja na ña xihín yíto ta cuu caja ri na ña xihín xehe ndíyoho ta jandá xihín toñámá cuu caja na ña. <sup>13</sup> Joo vaxi quivi quixi tucu Jesucristo coto ndojó mé á chuun ñacaja in in ñayivi cuéntá mé á. Cacu a tátuhun coto ndojó a ña xihín ñuhú cáyi já quéa ná ñaha nu á, á ndihi sahá, á co ndihi sahá. Ta xihín ña yóho ñaha nu á, á vaha ñacaja chuun ñayivi cuéntá mé á, á a váha toho ñacaja na. <sup>14</sup> Ta tá coo ñandihí sahá ña ñacaja na cán já quéa चाहvi Ndióxi na sahá chuun ñacaja na. <sup>15</sup> Joo tá ná cáyi ña ñacavaha na cán já ndihi sahá tóco ndihi chuun ñacaja na vatí mé ná cacu ndaa ínimá ná. Ta ña yóho cacu a tátuhun tá jácacu in dataa mé dá tá quéta da ini in vehe tá cáyi a xihín ñúhu jta.

<sup>16</sup> Á co xini ndó ña cúu ndó tátuhun veñuhu Ndióxi tá ndacaan ínimá yii mé á ini ínimá in in ndó. <sup>17</sup> Ta ndá na ná jándihí na sahá veñuhu Ndióxi yóho já quéa jándihí Ndióxi sahá na cán. Jáchi yii ndivaha veñuhu Ndióxi. Ta mé ndó cúu ndó tátuhun veñuhu Ndióxi cáhan i saha jan.

<sup>18</sup> Candehé ndo. Ndá ndó cáhan ña cúu ndó na ndíchí jini sahá ña xini ndó ñaha

ñuyiví yóho, xini ñúhú candaa ini ndó ña cúu á tátuhun jándahvi ndó mé ndó. Xini ñúhú ndaja ndó mé ndó tátuhun na co xini já quéa ná nuná nu Ndióxi jáñaha nu ndo ndaa cúu ndusa na ndíchí jini. <sup>19</sup> Jáchi ña ndíchí quíxi jini ñayivi ñuyiví cúu á ña tóntó ndivaha nu Ndióxi. Já cáchi tuhun Ndióxi já: “Ña cája mé á quéa ná cachihin saha ná xihín ña ndíchí quíxi jini mé va na.” <sup>20</sup> Quiahva já cáchi ri tuhun Ndióxi: “Candaa cáxi ini Ndióxi ña coo sahá ña cáhvi jini na ndíchí ndúu ñuyiví yóho”, já cáchi tuhun Ndióxi. <sup>21</sup> Sahá ña cán quéa ni in túhún ñayivi co ndítahan ndínehe jícó na mé ná sahá ña tiahva in ñayivi ñuyiví yóho cája na. Xini ñúhú ndicuhun ini ndó ña nasahan Ndióxi tóco ndihi ñaha nu ndo. <sup>22</sup> Ñandiquiahva mé á ndehe, da cúu Pablo xihín Apolos xihín Pedro nu mé ndó já ná cuu jáñaha nde tuhun Ndióxi nu ndo. Nasahan mé á ñuyiví yóho nu ndo já ná cuu catacu ndó. Ta nasacu ini mé á quivi quivi ndó ta já tandaa quivi cuhun ndó coo ndó xihín mé á. Tóco ndihi ña yóho nasahan Ndióxi nu ndo. <sup>23</sup> Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

#### 4

*Ndicani Pablo ndaja in chuun cája na apóstol*

<sup>1</sup> Co ndítahan toho ndaja cáhnu ndó ndehe. Xini

ñúhú quehe ndó cuéntá ña natahnda chuun nuú nde caja chúun nde cuéntá Jesucristo jánaḥa nde ña coó nasaxini ñayivi jihna, ña nasacu ini Ndióxi caja. <sup>2</sup> Ta ndá da ndíquehe in chuun, xini ñúhú naha da ña mé a ndaa cuu candeé ini na da, ña mé a ndaa caja tá caja da chuun natahnda nu dá caja da. <sup>3</sup> Ta cája i cuéntá nacaja vaha i chuun nasahnda Ndióxi nuú i caja i. Sahá ña cán queá co sáhní toho i mí i tá chícáan ndó cuachi jatá i. Ta co ndícani ini i tá java ga ñayivi chícáan na cuachi jatá i. Jáchi cája i cuéntá coó toho cuachi nacaja i. <sup>4</sup> Tá ná cachi i xihin ndo ña coó toho cuachi nacaja i, co cuni cachi i ña mé a ndaa co ndójo ga i cuachi. Jáchi xini vaha Jesucristo, xitoho i á nacaja vaha i á coó nacaja vaha i. <sup>5</sup> Sahá ña cán queá co xini ñúhú ndihi ini ndó candehe ndaa ndó ñayivi. Xini ñúhú candati ndó janda quiahva ná quixi Jesucristo caja vii mé á sahá ñayivi já ná nditivi ña ñúhu ínima in in ñayivi. Ta xihín ña yóho cuni tóco ndihi ñayivi ña cáhvi ini na. Anda jávi ndaja cáhnu Ndióxi na nacaja vaha.

<sup>6</sup> Candehe ndo ñani i, na cúu cuéntá Jesús. Sahá ña cuni nde ña ná candaa ini ndó ndia ndítahan caja ndo sahá ña cán queá ndícani i nu ndo saha Apolos xihín saha mí i. Jáchi in in tuhun ta cáhí a ña co ndítahan nu ndó caja cáhnu ndó in ñayivi nani

quehe núu ndó inga na. Ta xihín ña yóho cuu candaa ini ndó ña co ndítahan ndiñehe jícó ndo mé ndó sahá ña cúu ndó cuéntá in da jáchi xihín ña yóho jánuu ndáha ndó inga na táhan nde. <sup>7</sup> Jáchi ni in ndó co cúu ndó na náhnu chága a juú ga inga na. Xini ñúhú candaa ini ndó ña tóco ndihi ña cómi ndo cúu á ña nasahan Ndióxi nu ndo. Sahá ña cán queá co ndítahan caja cáhnu ndó mé ndó sahá ña nañehe táhvi ndo nu Ndióxi.

<sup>8</sup> Cáhán ndo ña ni in ñaha co ndímaní nu ndo joo co cúu á ña ndaa. Cáhán ndo ña cúu ndó na cuicá joo co cúu á ña ndaa. Ta cáhán ndo cúu ndó na cómi cuéntá sahá ñayivi joo co cúu á ña ndaa. Cája ndó tátuhun co xini ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá saha ná xihín ndo. <sup>9</sup> Cúu á tátuhun nasacu Ndióxi ndehe, na cúu apóstol janda nu ndihí. Cúu nde tátuhun na ndícuita yico cuhun quivi. Ta janda joho sándehe ñayivi ñuyiví ndehe ta sácu ndaa na ndehe. Ta janda mé tátó Ndióxi sándehe na ndehe cuahan nde. <sup>10</sup> Sahá ña quihvi ini nde Jesucristo cúu nde tátuhun ñayivi tóntó ndivaha nuú ñayivi ñuyiví. Joo mé ndó nandaja ndó mé ndó tátuhun na xini ndivaha saha mé á. Mé nde cúu nde tátuhun ñayivi vitá nuú ñayivi ñuyiví joo cája ndó tátuhun na ndacú ini. Ndája cáhnu ñayivi ñuyiví mé ndó nani quehe núu na

ndehe. <sup>11</sup> Ta janda viti ndóho tá ndóho ini nde. Java tañu coó ña cuxu nde ta coó ticují coho nde ta ni jáhma candixi nde coó. Ta janda johó cája xíxi ñayivi xihín nde. Ta ni vehe nde coó. <sup>12</sup> Ta a juú quiahva ndúcú ndéé nde cája chúun nde catacu nde. Ta tá chícáan ñayivi cuachi jatá nde já xíca tahví nde nu Ndióxi ña ná cajú mé á ñamaní xihín ná. Ta cajú ndeé ini nde tá cajú xíxi na xihín nde. <sup>13</sup> Ta vitá cáhan nde tá ndúcú ñehe nde tuhun nuú ñayivi vatí cáhan núu na sahá nde. Mé nde cúu nde tátuhun xehe nuú ñayivi ñuyíví. Ta cajú na xihín nde tá quiahva cajú na xihín ñaha coó saha, ña nacandoo cahun cuíta. Ta quiahva já cajú na xihín nde janda viti.

<sup>14</sup> Xíní ñúhú candaá ini ndó ña co cáhyí i ña yóho nu ndo sahá ña cúní jácacahan i nuu ndo. Cáhyí i ña nu ndo jáchi cúu ndó tátuhun jahyí i. Ta jánaha i ña nu ndo tá quiahva cajú in dataa xihín jahyí da jáchi quíhvi ini i ndohó. <sup>15</sup> Jáchi vatí ná coo uxu mil ñayivi jánaha na ndohó sahá Jesucristo joo in túhún yehe cúu tátuhun tátá ndo. Jáchi yehe cúu u da nacahan tuhun vaha sahá Jesucristo nu ndó nu cuítí ta já nacandeeé ini ndó mé á. <sup>16</sup> Sahá ña cán queá xíca tahví i nu ndó ña ná cajú ndó tá quiahva cajú i.

<sup>17</sup> Sahá ña cán queá chindahá i Timoteo nu ndo jáchi cúu dá tátuhun jahyí

maní i ta cajú chúun da cuéntá Jesucristo, xitoho i xihín ndinuhu ini da. Ta jándicuhun ini da ndohó ndá quiahva cajú i tañu na cúu cuéntá Jesús ta ndá quiahva jánaha i nu ná ndijáá veñuhu nu xíca i cuahan i. <sup>18</sup> Java ndó nacasáhá ndo cajú lándá ndó jáchi cáhan ndo ña a sáa ga i coto nihni i ndohó. <sup>19</sup> Joo yachi saa i coto nihni i ndohó tá cúní Ndióxi. Andá já candehé e, á mé a ndaa ín ndeé Ndióxi ini na xíca cajú lándá jan á yúhu uun na cáhan na. <sup>20</sup> Tá mé a ndaa cómí Ndióxi cuéntá sahá in ñayivi já queá ín ndeé mé á ini na cajú na ña cúní mé á. Ta coó saha toho a á tiahva ndivaha na cahan na. <sup>21</sup> Ta viti cachi ndó xihín i ndía queá catóo chága ndo. Á catóo chága ndo ña ná saa i jánani i ndohó sahá ña cajú ndó ña núu. Á catóo chága ndó ña ná saa i ta víí víí cahan i xihín ndo jáchi najándacoo ndó ña núu cajú ndó. Ndía cúní ndó.

## 5

*Cáhan Pablo sahá in da ín xihín náná queén da*

<sup>1</sup> Sa ñañehé e tuhun ña ín in da cúu cuéntá Jesús tañu ndó jan ta ín da xihín náná queén da. Ta ña yóho cúu á in cuachi cáhnu ndivaha. Ta ni ñayivi ñuyíví co cajú ña yóho. <sup>2</sup> Ta vatí ín cuachi cáhnu yóho tañu ndó joo cáa ga ri ndohó cajú cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó

da cája cuachi yóho tañu ndó jan. <sup>3</sup> Vati co ín i xihín ndo jan joo ndícani ndivaha ini i sahá ña cúu jan. Ta cúu á tátuhun ín i xihín ndó jan ña cán queá sa nasacu ini i ña xíní ñúhú caja ndó xihín da cája cuachi jan. <sup>4</sup> Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndéé á nu ndo caja ndó ña cúní mé á. Ta cacuu a tátuhun coo i xihín ndó jan. <sup>5</sup> Anda já xíní ñúhú ndiquiahva ndó da jan ndáha tiñáhá sacuaaha já ná jándoho rí ini yiquí cuñu da viti ta já ná cuu cacu ndaa ínimá dá tá ná xinu coo quiví quixi tucu Jesucristo.

<sup>6</sup> Co ndítahan caja lándá ndo sahá ña cája ndó. Xíní ñúhú ndicuhun ini ndó in tuhun ña cáhí já: “Chá cuití yusa naxaa játiví ndihi a java yusa ña ín vaha.” <sup>7</sup> Xíní ñúhú tavá ndo da jan tañu ndó jáchi cúu dá tátuhun yusá naxaa, ña játiví ña ín vaha. Ta xihín ña yóho quee ña núu veñuhu nu táca ndó jan jáchi sahá da jan cuu caquini inga na ta caja na cuachi. Xíní ñúhú canduu víi ndo tátuhun mé pan xíxi na vicó pascua jáchi coo yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachí já ná cuu cacu ndaa ínimá yo. <sup>8</sup> Sahá ña cán queá ndítahan cajii íní sahá ña nacaja Jesucristo. Xíní ñúhú jándacoo í ña núu sa nacaja í jihna, ña cúu tátuhun pan

naxaa. Ta xíní ñúhú caja í ña ndaa xihín ndinuhu ini. Ta ña yóho cúu á tátuhun pan ña coo nacava táhan yusá naxaa xihín.

<sup>9</sup> Nu carta nachindahá i nu ndó jihna ga, nacachi i xihín ndo ña ná a catáhan ndó xihín ñayivi, na ndúu xihín na coo cúu yíi ná á ñájihí na. <sup>10</sup> Tá nacachi i ña yóho xihín ndo coo cúní cachi a ña xíní ñúhú tavá xóo ndó mé ndó chí in ndéé nuú ñayivi ñuyiví yóho jáchi a cuú quee ndó ñuyiví yóho cuhun ndo. Ta mé a ndaa ndúu cuahá na ñuyiví yóho cája na cuahá cuachi xihín yiquí cuñu na ta catóo ndivaha na jjuhún ta cája cuihná na ta cája cáhnu na yoco. <sup>11</sup> Ña cúní cachi i xihín ndo queá co ndítahan catáhan ndó xihín na cáhí cúu cuéntá Jesús nani cája na ña núu xihín yiquí cuñu na, á tá cúu ná na catóo ndivaha jjuhún, á tá cúu ná na cája cáhnu yoco, á tá cúu ná na tuhún, á tá cúu ná na xíhi, á tá cúu ná na cuihná. Ta ni a cácoo ndó cuxu ndó xihín ná tá cája na ña yóho. <sup>12</sup> Co cáhan i sahá ñayivi ñuyiví jáchi co ndítahan nuú i caja víi i saha ná. Joo ndítahan nu ndó candehé ndo ndaja cája na cúu cuéntá Jesús ndúu tañu ndó jan. <sup>13</sup> Jáchi mé Ndióxi queá caja víi a sahá cuachi ñayivi ñuyiví. Ña cán queá ndítahan nu ndó tavá ndó da cája cuachi tañu ndó jan.

## 6

*Tá sácú saha táhan na cúu*

*cuénta Jesús nuú na jutixia*

<sup>1</sup> Tá cō táhán ini ndó xihín ña cāja ñani ndó, na cúu cuénta Jesús cō ndítahan nu ndó cūhūn ndó cacu ndó saha ná nuú na jutixia, na cō cúu cuénta Jesús. Ña ndítahan cāja ndó quéa cahan ndó xihín mé na cúu cuénta Jesús ña ná cāja vii na sahá ña cō táhán ini ndó xihín jan. <sup>2</sup> Á cō xini ndó tandaa quivi cāja vii na cúu cuénta Jesús saha tóco ndihi ñayivi ñuyivi. Ta tá mé ndó cacuu ndó na cāja vii saha tóco ndihi ñayivi ñuyivi, ndá cuénta quéa cō cūni ndó cāja vii ndó sahá ña válí cúu tañu mé ndó jan. <sup>3</sup> Ña xini ñúhú cāja ndó quéa nducú ndo cāja vii ndo sahá ña cúu tañu ndó jan. Jáchi xini ñúhú ndicūhūn ini ndó ña janda tátō Ndióxi cāja vii yo saha. <sup>4</sup> Sahá ña cán quéa tá cáni táhan ndó sahá ñaha válí ñuyivi yóho cō xini ñúhú toho cūhūn ndó cavií saha ndó nuú na cō cúu cuénta Jesús. <sup>5</sup> Candehé ndó. Cáhan i ña yóho xihín ndo já ná cacahan nuu ndo. Á cō ín in da tácu ini tañu ndó jan ña ná cāja vii da saha ndó, vaha. Xini ñúhú ndindita in da tácu ini já ná cuu cāja vii da sahá ña cúu tañu ndó jan. <sup>6</sup> Joo ña cāja ndó quéa cáni táhan ndaja táhan mé ndó ta já ndáca táhan ndó cuahan ndó cavií saha ndó nuú na cō cúu cuénta Jesús. Cō ndítahan toho cāja ndó já.

<sup>7</sup> Sa cuachi cáhnu ndivaha quéa cāja ndó tá cáni táhan ndaja táhan mé ndó jan. Vaha

na cāja ndeé ini ndó tá cō cāja vaha in na xihín ndo. Vaha ná cāja ndeé ini ndó tá ná cāja cuíhná na ñaha ndó. Jáchi cō ndítahan cacu saha táhan ndó nuú na cō cúu cuénta Jesús. <sup>8</sup> Joo ña cāja ndó quéa ña núu xihín ñani táhan ndó ta janda cāja cuíhná ndo ñaha ñani ndó, na cúu cuénta Jesús.

<sup>9</sup> Xini ñúhú candaa ini ndó ña cōo saha toho ñayivi cāja ña núu jan cūhūn na nuú cacomí Ndióxi cuénta saha ná. A jandahvi ndó mé ndó jáchi na ndúu xihín na cō cúu yí ná á ñájihí na a cūhūn toho na nuú cacomí Ndióxi cuénta saha ná. Ta ni na cāja cáhnu yoco ni na ndúu xihín yí á ñájihí inga na ta ni da cúu taa líhi a cūhūn toho na nu Ndióxi. <sup>10</sup> Ta ni na cuíhná ta ni na xihí ta ni na ndahnda yuhū ta ni na jandahvi ñahá ta ni in táhan na yóho a cūhūn toho na nuú cacomí Ndióxi cuénta saha ná. <sup>11</sup> Ta táhan na yóho nasacuu ri java ndóhó va, nduu. Joo viti sa nandaja vii Ndióxi ndohó ta naçaxi a ndohó cacuu ndó cuénta mé á. Nanduu ndó ñayivi ndaa nu Ndióxi sahá ña naçaja Jesucristo, xitoho í ta sahá ña cāja ínima yii Ndióxi.

*Xini ñúhú candaa í yiquí cuñu í jáchi cúu á ña yii*

<sup>12</sup> Ndúu java ñayivi ta cáchi na ña ña núná nu ná cāja na ña cūni mé va na. Vatí mé a ndaa núná nu ná cāja na ña cūni mé ná joo xini ñúhú candehé na á vaha, á a váha ña cāja na. Jáchi mé a ndaa

núná nu yō caja í ña cúní mí joo cō ndítahan quiahva í ñamaní ña ná cahnu ña núu yiquí cuñu í. <sup>13</sup> Ta cáhí na ña ín tixi yó sahá ña cán quéa xíní ñúhú cuxú. Ta cáhí na ña xíní ñúhú cuxú jáchi ín tixí. Joo vaxi quivi jándihi Ndióxi saha ndívi ña yóho. Ta coó nasahan Ndióxi yiquí cuñu í nu yō ña ná caja í cuachi xihín á tátuhun ña ná coo í xihín na cō cúu ñájíhí yō á yí yō. Nasahan Ndióxi yiquí cuñu í nu yō já ná caja í ña cúní mé á. Ta nacaja mé á ña ná cacomí a cuéntá saha yō. <sup>14</sup> Ta tá quiahva nacaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndée mé á.

<sup>15</sup> Xíní ñúhú candaá ini ndó ña in cúu ndó xihín Jesucristo. Ta tá cuahan ndó cāja ndó cuachi xihín najíhí xíca jii, cúu á tátuhun ñéhe ndó Jesucristo cuahan cāja ña núu. Cō ndítahan caja ndó já. <sup>16</sup> Sa xíní vaha ndó ña tá quíhvi nuu in dataa xihín najíhí xíca jii já quéa ndúu na tátuhun in víxí ñayivi. Jáchi cáhí tuhun Ndióxi já: “Tá ná ndique táhan in dataa xihín in ñáñáha já quéa ndúu na tátuhun in víxí ñayivi.” <sup>17</sup> Ndá na ndiquiahva mé ndáha Jesucristo, xitoho í já quéa in ndúu na xihín mé á jáchi ñúhu ínimá yii Ndióxi ini na.

<sup>18</sup> Cama caxoo ndó nu tóco ndihi ña núu xíca ini yiquí cuñu ndó caja. Cō ndítahan coo ndó xihín na cō cúu ñájíhí ndó á yí ndó jáchi ni in túhún

toho cuachi cō cāja quini nahá xihín yiquí cuñu ñayivi tátuhun cuachi yóho. Jáchi ndá na ín xihín na cō cúu yí ná á ñájíhí na já quéa cāja na cuachi nuú yiquí cuñu mé va na. <sup>19</sup> Xíní ñúhú ndicuhun ini ndó ña mé yiquí cuñu ndó jan cúu á tátuhun in veñuhu nu ndácaan ínimá yii Ndióxi, mé a nasahan Ndióxi nu ndo. Ta viti yiquí cuñu ndó a juú ñaha mé ndó cúu á jáchi cúu á ñaha Ndióxi. <sup>20</sup> Jáchi yahvi ndivaha nachahvi Ndióxi saha ndó tá naxihí Jesucristo ndíca cruxu. Sahá ña cán quéa ndítahan caja cáhnu ndó Ndióxi xihín yiquí cuñu ndó ta jári xihín ínimá ndo jáchi ndívi a cúu á cuéntá Ndióxi.

## 7

### *Tá tandaha ñayivi*

<sup>1</sup> Ta viti cúní nducú ñehé e tuhun nu ndo sahá ña nandaca tuhún ndó yehe nu carta nachindahá ndó nuú i. Cáhí i xihín ndó sahá da cámaní tandaha ña vaha cāja da tá ná coo tacú da. <sup>2</sup> Joo sahá cuachi cāja ñayivi tá ndúu na xihín na cō cúu ñájíhí na á yí ná sahá ña cán quéa vaha chága ná tandaha ná já ná coo ñájíhí in in ta ta jári najíhí va ná coo yí in in na. <sup>3</sup> Ta in dataa ndítahan ndiquiahva da mé dá nu ñájíhí da ta jári ñáñáha ndítahan ndiquiahva ñá mé ñá nu yí ña jáchi quiahva já sáhdá a coo a. <sup>4</sup> Jáchi in ñáñáha, ñá natandaha cō cómi ga ñá cuéntá saha mé ñá jáchi yí ña cúu da cómi

cuéntá saha yiquí cuñu ña. Ta ni in dataa, da natandaha co cómi ga da cuéntá saha yiquí cuñu da. Ñájíhi da cúu ña cómi cuéntá sahá yiquí cuñu da. <sup>5</sup> Sahá ña cán queá ndítahan ndiquiahva nu táhan ndó ta a cándají táhan ndó. Ta tá co cúni ndó cuju xitáhan ndó xíní ñúhú cacuu a sahá ña sa najándique táhan tuhun ndó ña a cúju xitáhan ndo sahá ña cúni ndó caça tahví ndó nu Ndióxi chá tiempo. Joo tá nandíhi xíní ñúhú ndique táhan tucu ndó jáchi tiahva náá jácahan Satanás, mé tiñáhá sacuahá ndohó ña ná caja ndó cuachí sahá ña a cuú cahnu ndó nuú ña xíca ini yiquí cuñu ndó caja.

<sup>6</sup> Tóco ndíhi ña cáhan i xihín ndo yóho co cúni cachi a ña xíní ñúhú tándaha ndo vatí cuu tandaha ndo tá cúni ndo. <sup>7</sup> Vatí mé a ndaa cájii íni i tá ná canduu tacú ndíhi ndó tátuhun yehe. Joo sa jiin sa jiin nacaja Ndióxi xihín in in í. Java na ñehe táhvi ná tandaha na ta java na ñehe táhvi na canduu tacú na.

<sup>8</sup> Ndá na ndúu tacú xihín ndá na ndúu cuáan, ña vaha chága queá ná a tándaha ná ta ná canduu na tátuhun yehe. <sup>9</sup> Joo tá co ndeé ini na cahnu na yiquí cuñu na, vaha chága ná tandaha ná jáchi vaha chága ná tandahá ñayivi a juú ga ña ná ndiava íni na coo na xihín na co cúu yíi ná a ñájíhi ña.

<sup>10</sup> Ta nu ndóhó, na sa ín yíi a ñájíhi, sáhdá i chuun nu ndó ña ná a jándacoo táhan

ndó. Ta ña sáhdá i nu ndo yóho co cúu a ña naquixi jiní mí i. Cúu a ña sáhdá Ndióxi caja ndó. Co ndítahan nuú in ñañáha jándacoo ña yíi ña. <sup>11</sup> Ta tá ná jándacoo ña da, co ndítahan nu ña tandaha ña xihín inga da. Á tá coo ta ña ndítahan caja ña queá ndique táhan maní tucu ña xihín yíi ña. Ta jári in dataa co ndítahan nu dá jándacoo da ñájíhi da.

<sup>12</sup> Ín java ga ñaha cúni cahan i xihín ndo. Mí i cáhán i ña vaha caja ndó ña vatí mé a ndaa co cúu a ña nasahnda Ndióxi nuú i jánaaha i nu ndo. Ta ña yóho queá ña cahan xihín ndo: Tá ín in da cúu cuéntá Jesús ta ín ñájíhi da, ña co cúu cuéntá Jesús. Ta tá cájii ini ña coo ña xihín dá já queá co ndítahan nu dá jándacoo da ña. <sup>13</sup> Ta tá ín in ña cúu cuéntá Jesús ta ín yíi ña, da co cúu cuéntá Jesús. Ta tá cájii ini da coo da xihín ña já queá co ndítahan jándacoo ña da. <sup>14</sup> Jáchi cája yíi Ndióxi in dataa sahá ña ín da xihín ñájíhi da, ña cúu cuéntá Jesús. Ta jári cája yíi Ndióxi in ñañáha sahá ña ín ña xihín yíi ña, da cúu cuéntá Jesús. Jári cája yíi Ndióxi jahyi na yóho ná a cacuu na tátuhun na co xíní Ndióxi. Ta xihín ña yóho cuu candaa ini na ndaja ín íchi cuéntá Jesús. <sup>15</sup> Joo tá cúni yíi ndo a ñájíhi ndo, na co cúu cuéntá Jesús jan, quee na cuhun na já queá quiahva ndó ñamaní nu ná caja na ña. Jáchi co ndítahan nu ndó caja ndúsa ndó xihín na co xíní Ndióxi cán ña ná coo na xihín

ndo. Jáchí cúní Ndióxi ña ná canduu vií ndo. <sup>16</sup> Ta ni co xíní ndo á ndiquehe yíí ndó á ñájíhí ndo íchí cuéntá Jesús, á a ndiquehe na ña.

<sup>17</sup> Ta cáxi tuhun i nu tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva nasahiin na tá nandihvi na íchí cuéntá Jesús jáchí quiahva já cúní Ndióxi. <sup>18</sup> Ta tá naquihvi ndó íchí cuéntá Jesús ta sa ndácaan marca yiquí cuñu ndó coo caja toho a. Joo tá coo marca jan yiquí cuñu ndó co ndítahan chícaan ndó ña yiquí cuñu ndó. <sup>19</sup> Jáchí coo caja toho a á lin marca yiquí cuñu ndó á coo a. Ña cúní Ndióxi quéa ná caja ndó ña sáhdá mé á nu ndo caja ndó xihín ndinuhu ini ndó. <sup>20</sup> Ta ndítahan coo ndó tá quiahva nasahiin ndó tá nandiquehe ndó íchí cuéntá Jesús. <sup>21</sup> Ta tá nasacuu ndó na naxeen xitoho ndó caja chúun ndó tá nandiquehe ndó íchí cuéntá Jesús já quéa co ndítahan ndicani ini ndó sahá. Joo tá ná quiahva xitoho ndó íchí nu ndó ña ná quee ndó cuhun ndo já quéa caja ndó ña. <sup>22</sup> Jáchí da cúu cuéntá Jesús cúu dá da najaní Ndióxi nuú cuachi da vatí cándo da cája chúun da cuéntá xitoho da, da naxeen ñahá. Ta da naxica núná mé tá nandiquehe da íchí cuéntá Jesús cúu dá mozo cuéntá Jesucristo. <sup>23</sup> Jáchí yahvi ndivaha nachahvi Ndióxi saha ndo tá naxihí Jesucristo ndica crúxu ña ná cacomí a

cuéntá saha ndo. Sahá ña cán quéa a ndiquiahva toho ndó mé ndó ndáha ñayivi ña ná cahnu na ndohó. <sup>24</sup> Candehé ndo ñani mí i, na cúu cuéntá Jesús. Ndítahan coo ndó tá quiahva nasahiin ndó tá nacana Ndióxi ndohó cacuu ndó cuéntá mé á jáchí iin mé á xihin ndo.

<sup>25</sup> Ta viti cúní cahan i saha na tacú, na cámani tandaha. Coo nacachi toho Ndióxi xihín i saha ña yóho ña cán quéa cahan i ña cáhvi ini mí i saha. Ta cuu candúsa ndó ña cahan i xihin ndo jáchí nacaja Ndióxi ñamani xihín i ña cúu u in da tácu ini. <sup>26</sup> Ta cáhan i ña ndítahan coo tacú in dataa jáchí ihvi ndivaha cáa tiempo ndúu viti. <sup>27</sup> Joo tá lin ñájíhí ndo, a jándacoo ndó ña. Ta tá coo ñájíhí ndo, a ndúcú ndó ña. <sup>28</sup> Joo a juú cuachi quéa cája ndó tá ná tandaha ndo. Ta ni a juú cuachi quéa cája in ña tacú tá ná tandaha ña. Joo mé a ndaa ná cahan i xihin ndo, yáncá a tá ná tandaha ñayivi jáchí cuahá ndivaha ndoho ini na. Ta co cúní ña ná ndoho ini ndó já saha ña cán quéa cahan i ña yóho xihin ndo.

<sup>29</sup> Candehé ndo ñani i, na cúu cuéntá Jesús. Ña cúní cachi i cúu ña yóho: Sa nacayati tiempo quixi Jesucristo. Sahá ña cán quéa na lin ñájíhí xíní ñuhú ndihi ini na caja chúun na cuéntá mé á tá quiahva cája chúun na tacú cuéntá mé á. <sup>30</sup> Ta ndá na ndúu cuéha ndivaha ndítahan caja na tátuhun na cáji ini.



Ta na cájii ini ndítahan caja na tátuhun na ndúu cuéha ndivaha ini. Ta na xéen ñaha ñuyívi yóho ndítahan caja na tátuhun naxeen na ña co cúu ñaha na. <sup>31</sup> Ta na cómi ñaha ñuyívi yóho, xíni ñúhú ndindójó na sahá ñaha cán. Jáchi vaxi quívi ndihi saha ñuyívi yóho xihín tóco ndihi ñaha ín nu á.

<sup>32</sup> Ña cúni yehe quéa ña na a ndícani nahá ini ndó sahá ñaha ñuyívi yóho. Jáchi tá cámani tandaha in dataa já quéa núná nu dá caja chúun da cuénta Ndióxi xihín ndinuhu ini da. Ta ndúcú da ndá quiahva caja da ña cájii ini Ndióxi xihín. <sup>33</sup> Joo da sa natandaha ndítahan caja chúun da ñuyívi yóho já ná cana ña cuxu na vehe da. Ta cája da ña cájii ini ñájihí da xihín. <sup>34</sup> In da natandaha co xíni da ndía ndihi chága ini da saha, á Ndióxi á ñájihí da. Ta jári najihí tá cúu ná na tacú ndíhi ini na caja na ña cúni Ndióxi jáchi ndiquiahva na mé ná ndáha Ndióxi ña ná cacomí a cuénta saha yiquí cuñu na ta sahá inima ná. Joo najihí ndúu yíi ndíhi ini na sahá chuun vehe na jáchi cúni na ña ná tahan ini yíi ná xihín ná.

<sup>35</sup> Cahan i ña yóho xihín ndo jáchi cúni chindeé e ndohó ta co cahan i ña sahá ña co cúni ña ná tandaha ndo. Ña cúni quéa ná núná nu ndó caja chúun ndó cuénta Ndióxi xihín ndinuhu ini ndó ta ná a cáji nuu ni in ñaha nu ndó caja ndó ña cúni Ndióxi.

<sup>36</sup> Ta ndá da ín jahyi jíhi ta

cáhán da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cúni da. A juú toho cuachi cúu ña yóho. <sup>37</sup> Ta tá cáhán ndo ña co ndítahan toho tandaha jahyi ndó ta cáhán ndo ña cájii ini ñá ña coo mé ñá já quéa vaha va cája ndó tá co cája ndúsa ndó xihín ñá ná tandaha ña. <sup>38</sup> Vaha cája in dataa tá sahan da ñamani nuú jahyi jíhi da ña ná tandaha ña. Joo vaha chága cája da tá co cája ndúsa dá xihín ña ña ná tandaha ña.

<sup>39</sup> Ta a cuú tandaha in ñáñáha xihín inga dataa nani tácu yíi ña. Joo tá naxihí yíi ña já quéa candoo núná nu ñá tandaha tucu ñá. Joo ndítahan tandaha ña xihín da cúu cuénta Jesús. <sup>40</sup> Vatí cáhán i ña cajii chága ini ñá tá ná a tandaha tucu ñá. Ña yóho quéa cáhvi ini i sahá ña yóho. Ta inima yii Ndióxi quéa jácahan yehe cáhí i ña yóho xihín ndo.

## 8

*Cahan Pablo sahá ña najoco ñayivi nuú yoco*

<sup>1</sup> Ta viti cúni ndicani i nu ndo sahá ña ndítahan caja ndó xihín ña najoco na nuú yoco. Vatí cúu á ña ndaa tá cáhí java na ña xíni vaha na sahá ña yóho joo tá cáhán yo cúu yó na xíni vaha já quéa cásahá yo ndíñehe jícó yo mí. Joo tá quíhvi iní ñani táhan i já ndindacú chága yó xihín ñaha Ndióxi. <sup>2</sup> Tá ndúu java na tañu ndó ta cáhán na ña sa xíni na ndaja táhan ñaha, na

yóho náha ña cámanj cándaaj ini na ña ndítahan candaaj ini na. <sup>3</sup>Jáchj mé a ndaa xínj vaha Ndióxi ndá na cúu na quíhvi ini mé á.

<sup>4</sup> Ta viti cáhan j xihjin ndo sahá ña najoco na nuú yoco. Cándaa cáxi ini ña coó a cúu toho yoco ndúu ñuyívi. Ta cándaaj cáxi ini ña in tálaá Ndióxi cúu ndusa Ndióxi. <sup>5</sup> Vatí cáchi ñayivi ña ndúu cuahá ndiόxi ta ndúu cuahá xitoho indivi xihín ñuyívi <sup>6</sup>Joo mí cándaaj vaha ini ña íin in túhún Ndióxi, mé a cúu tátá yo. Ta mé á quea nacavaha tóco ndihi ñaha. Ta nacavaha mé á mí ña ná caja cáhnu í mé á. Ta íin in túhún xitoho í ña cúu Jesucristo. Ta mé á quea caja ña ná coo tóco ndihi ñaha ta caja ña ná catacu mí viti.

<sup>7</sup> Joo a juú tóco ndihi na cúu cuéntá Jesús xínj ña yóho. Jáchj java táhan na sa caja cáhnu yoco sanahá cán tá xíxi na ña najoco ñayivi nuú yoco cáhan na ña cúu á ña najoco na nuú java ndiόxi. Ta xihín ña yóho cáhan na ña cúu ná na sa nayuxu sahá ña naxixi na ña najoco ñayivi nuú yoco. Ta co xínj na á ndítahan cuxu na ña á co ndítahan cuxu na ña. <sup>8</sup> Cándehé ndo. Co ndíquehe toho Ndióxi mí sahá ña xíxi. Jáchj co cúu yó na íin chága saha tá xíxi in ñaha. Ta ni co cúu yó na coó saha tá co xíxi ñaha. <sup>9</sup> Joo xínj ñuhú candehé ndo ña ná a jándicava ndó inga na nuú cuachi sahá ña caja ndó jan. Jáchj vatí xínj vaha ndó ña cuu cuxu ndó ña cán joo ndúu java na vitá cuahan

íchi cuéntá Jesús. <sup>10</sup> Cúu á tátuhun sacoo ndó cuxu ndó nu cáyahvi ña najoco na nuú yoco jáchi sa xínj ndo sahá ña yóho. Ta nani íin ndó xíxi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xínj da ndohó já quíhvi da jan xíxi da xihín ndo vatí cáhan da cúu á cuachi. <sup>11</sup> Xihín ña caja ndó jan cuu jándicava ndó da vitá xihín ñaha Ndióxi cán nuú cuachi vatí xínj vaha ndó ña co caja ndó cuachi tá ná cuxu ndó ña najoco na nuú yoco. Xínj ñuhú ndicuhun ini ndó ña naxihj Jesucristo sahá da jan. <sup>12</sup> Tá jándicava ndó ñani ndó, da vitá xihín ñaha Ndióxi cán nuú cuachi já quea caja ndó cuachi nuú Jesucristo viti. <sup>13</sup> Sahá ña cán quea tá ná jándicava j ñani j nuú cuachi sahá ña xíxi j cuñu, ña najoco na nuú yoco caja j cuéntá a cúxu ga j ña já ná a jándicava j inga da nuú cuachi.

## 9

*Ña núná nuú in na apóstol caja*

<sup>1</sup> Mé a ndaa yehe cúu u in apóstol cuéntá Jesucristo sahá ña cán quea núná nuú j caja j ña caja in apóstol. Jáchj mí j sa naxini j xihín nuú j Jesucristo, xitoho í. Ta mé ndó nandiquehe ndó íchi cuéntá mé á sahá chuun nacaja j ta ña yóho náha ña mé a ndaa caja chúun j cuéntá mé á. <sup>2</sup> Caja j cuéntá ndúu java na ta co ndíquehe na yehe tátuhun in apóstol

cuéntá Jesucristo. Joo ndóhó ndítahan ndiquehe ndó yehe jáchi nanduu ndó cuéntá mé á sahá chuun nacaja i. Ta xihín ña yóho náha ña mé a ndaa cúu u in apóstol cuéntá mé á.

3 Ta ña yóho cúu tuhun ndúcú ñehe e nuú na cáhan núu sahá i jan: 4 Ín sahá i ña ná coto ndó yehe. 5 Ta tá ná coo ñájíhí i, ña cúu cuéntá Jesús ín sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. 6 Á cáhán ndo ña in túhún yehe xihín Bernabé cúu nde da coo saha ña ná coto na cúu cuéntá Jesús ndehe, vaha. 7 Jáchi ni in túhún toho soldado co quehe da jjuhún mé dá ta já xító da mé dá. Jári ndá da xútu yitó uva, cuu caxí da uva cána nu dó cán jáchi já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchi já cáni a coo a. 8 Ta a juú cahán ndo ña cáhan i ña quíxi jiní mé cuití vj jáchi cáchí ley mé Moisés ña yóho viti. 9 Já cáchí a já: “A chícayun ñunú yuhú tindiQUI nani cája chúun rí sání rí trigo. Joo xíní ñuhú quiahvún ñamaní nu rí caxí rí a”, cáchí tuhun Ndióxi. Joo co ndíhi ini Ndióxi sahá tindiQUI cuití va. 10 Saha mí ví nacahyí Moisés ña yóho ta saha mí ví cáhan ña yóho tá cáchí a já. Cúu á tátuhun cája da xútu tátí xihín da jáquee tátí jáchi ndátí ndíví da ndiquehe da táhan nuní cán sahá ña nacaja chúun da xihín á. 11 Tá

nacahan nde tuhun Ndióxi xihín ndó já cúu á tátuhun nachihin nde tata cuéntá Ndióxi ini ínimá ndo. Sahá ña cán quea ndítahan nu ndo chindeé loho ndó ndehe xihín ña cómi ndo jáchi najánaña nde tuhun Ndióxi nu ndo. 12 Ta mé a ndaa ín chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coo nacaja ndusa nde xihín ndo ña ná caja ndó ña. Ta cuahá tañu cája ndeé ini nde jáchi co cúní nde caji nuu nde ña ná ndicuita nuu tuhun vaha sahá Jesucristo. 13 Mé ndó sa cándaá vaha ini ndó ña núná nuú na cája chúun ini veñuhu cuxu na ña jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quítí, rí najoco ñayivi nu Ndióxi. 14 Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe saha chuun cája nde. 15 Joo ni in túhún tañu coo nacaja ndusa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchi mé a ndaa ín vaha ini i cáhan i tuhun Ndióxi xihín ndo ta coo caja toho a ña ná quivi i joco.

16 Yehe co ndíñehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchi cúu á chuun

ndítahan nuú i caja i. Ta ndáhví nahá nacuu u tá ná caja sáá ini i caxi tuhun i ña. <sup>17</sup> Tá ná cája i chuun yóho sahá ña cúní mí i cuití va já quéa cuu quehe e yahvi sahá. Joo cō cája toho i já jáchi nacaxi Ndióxi yehe cahan i tuhun mé á sahá ña cán quéa ndúsa cája i ña. <sup>18</sup> Ta sa mé yahvi quehe e sahá chuun cája i quéa cájii ini i tá cahan i tuhun vaha sahá Jesús nuú ñayivi ta cō cháhvi na sahá. Ta cájii ini i jáchi cō cája ndúsa i xihín ndo ña ná coto ndó yehe tá quiahva cája ndó xihín java ga na cahan tuhun Ndióxi xihín ndo.

<sup>19</sup> Vatí mí i cō cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchi caxi tuhun i tuhun vaha sahá Jesucristo nu ná já ná cuu ndicuaaha chága na cúu cuéntá Jesús. <sup>20</sup> Tá xíca nuu i tañu na Israel ndája i mí i tátuhun in da Israel jáchi ña cúní quéa ná ndiquehe na íchi cuéntá Jesús. Ña cúní cachi i quéa tá íin i tañu na cája ley Moisés in cája i xihín ná vatí cō ndíco i íchi cuéntá ley Moisés viti. Joo cája i ña sahá ña cúní i ña ná ndiquehe na íchi cuéntá Jesús. <sup>21</sup> Ta tá xíca nuu i tañu na cō cája ña sáhdá ley Moisés já cája i tá quiahva cája mé ná jáchi cúní ña ná ndiquehe na íchi cuéntá Jesús. Joo cō cája i cuachi tá quiahva cája na cán jáchi sáhdá ley Ndióxi chuun nuú i viti ta cája i ña cúní Jesucristo cuití va. <sup>22</sup> Ta tá xíca nuu i tañu na vitá xihín ñaha

Ndióxi já quéa jánuu ndáha i mí i jáchi cúní ña ná ndindacú na xihín tuhun mé á. Ña cúní cachi i xihín ndo quéa ndája i mí i tátuhun ndá na nacuu va jáchi cúní quee vaha i xihín ná já ná ndihvi na íchi cuéntá Jesús ña ná cacu ndaa ínima ná. <sup>23</sup> Cája i tóco ndihi ña yóho já quéa ná ndicuita nuu tuhun vaha cahan sahá Jesucristo. Jáchi xihín ña yóho caja cuaha Ndióxi ñamaní xihín i.

<sup>24</sup> Candehé ndo. Sa xíni vaha ndó ña tá jáquehe táhan java taa tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíni ñuhú nducú ndo cuhun vaha ndó íchi cuéntá Jesús janda quiahva ná xínu cō ndó janda nu ndíhi cuí já ná quiahva Ndióxi nu ndo ña ndítahan ndiquehe ndó. <sup>25</sup> Tóco ndihi ñayivi tá cája tiahva na mé ná ña ná cuhun na cunu na, cō cúní na caja na ndá ña nacuu jáchi ndáá na mé ná. Tóco ndihi ña yóho cája na sahá ña cúní na quee vaha na ña ná ñehe ná in tiyivi ita sánúu jini ná vatí cama chá íchi ita cán. Joo mí ndúcú ndéé yō cuahan yó íchi cuéntá Jesús jáchi ña ndátí mí quiahva Ndióxi nu yō cō ndíhi saha anda ama cáa quivi. <sup>26</sup> Joo cō cúu u in da xínu cuáá. Ta ni cō cúu u tátuhun in da jácana yiquí nuú tachí. Jáchi ndúcú ndéé e quee vaha i já ná ndiquehe e

ñā quiahva Ndióxi nuú i. <sup>27</sup> Ñā cája i quéa cája ndúsa i xihín yiquí cuñu i ñā ná caja i ñā cúni Ndióxi. Jáchi a juú tiahva náá jándacoo Ndióxi yehe vatí mí i cúu u da najánaha tuhun Ndióxi nuú ñayivi.

## 10

*Cáhan Pablo ñā cō ndítahan caja cáhnu na yoco*

<sup>1</sup> Candehé ndo ñani i, na cúu cuénta Jesús. Cō cúni ñā ná ndindójó ndo ndá quiahva ñacaja Ndióxi sanahá xihín tásáhnu jícó yo tá ñasandaca mé á ñā yucú íchí cán. Ñacaja mé á ñā ná xinu in vico núhú xoo nuú cuahan ñā ná candaca a ñā. Ta ñachindeé a ñā ñā ná cuu cojo cava na tañuhú naní tañuhú cuáhá. <sup>2</sup> Ta tóco ndihi ñā cán in ñanduu ndihi na xihín Moisés tá ñayaha na tañuhú nani ndáca vico núhú ñā. Ñasacuu a tátuhun ñacandúta ná ñā ná cacomí Moisés cuénta saha ná. <sup>3</sup> Ta tóco ndihi ñā cán ñaxixi na ñā ñachindahá Ndióxi, ñā ñaqui xi a nu ná chí indiví. <sup>4</sup> Ta quiahva já tóco ndihi ñā cán ñaxihi na ticuií, dó ñasahan mé á nu ná coho na. Mé ticuií cán cúu dó dó ñacana tixi in tóto. Ta mé tóto cán cúu á tátuhun yuhú nuú Jesucristo, mé a ñasahin xihín ná nani ñaxica nuu na yucú íchí cán. <sup>5</sup> Joo cuahá ndivaha táhan ñā cán ñacaja na ñā núu ñā cō cájii íní Ndióxi xihín. Saha ñā cán quéa ñaxihí ñā mé yucú íchí nu xica na cuahan ñā cán.

<sup>6</sup> Tóco ndihi ñā ñayaha yóho jáñaha nu mí ñā cō ndítahan ndiava iní ñā cō táhan ini Ndióxi xihín tá quiahva ñacaja ñā cán. <sup>7</sup> Saha ñā cán quéa coto a juú caja cáhnu ndó yoco tá quiahva ñacaja java ñā cán jáchi já cáchi tuhun Ndióxi já: “Tóco ndihi ñayivi cán ñasacanduu na xixi na ta xíhi na ta já ñandicuita na xíta sáhá ñā ñā cája cáhnu na yoco”, já ñacaja na cáchi tuhun Ndióxi. <sup>8</sup> Joo mí xíní ñúhú candaa í mí já ná a cája í cuachi ñā quihvi nuu í xihín inga najihí á xihín inga dataa tá quiahva ñacaja java ñā cán. Ta saha cuachi ñacaja ñā cán ñaxihí oco uní mil na in túhún quívi. <sup>9</sup> Ta cō ndítahan nu yo coto ndojó yo Jesucristo, xitoho í ñā ná candehé yo á mé a ndaa jándoho a iní sahá cuachi cája í. Jáchi quiahva já ñacaja java ñā cán va ta sahá ñā cán ñaxihí ñā ñacaja cuahá cō. <sup>10</sup> Coto a cáhan cuéhé ndó saha Ndióxi tá quiahva ñacaja java tásáhnu jícó yo cán. Jáchi sahá ñā ñacaja na ñaxihí ñā ñacaja tátō Ndióxi, mé a xica sáhní ñahá.

<sup>11</sup> Tóco ndihi ñā ñayaha xihín tásáhnu jícó yo cúu á ñā náha nu yo ñā cō ndítahan quehe núu í Ndióxi. Ta ñacahyi a nuú tuhun Ndióxi já ná cuni mí, yó ndúu tiempo yóho ñā cō ndítahan caja í tá quiahva ñacaja ñā cán jáchi sa ñacayati quívi ndihi saha ñuyívi. <sup>12</sup> Ñā cán quéa tá cáhan ndo cuahan vaha

ndó íchi cuéntá Ndióxi já queá xíní ñúhú candaa vaha ndó mé ndó já ná a ndícava ndó nuú cuachi. <sup>13</sup> Candehé ndo. Xíní ñúhú ndicuhun ini ndó ña a juú mé ndó cuití quixi tondóhó nuú jáchi quíxi tondóhó jan nu tóco ndihi java ga ñayivi. Ta ndítahan candee ini ndó Ndióxi jáchi a quiahva toho mé á ñamani ña ná quixi tondóhó náhnu nu ndo ña co cándeé ndó xihin. Ña cája Ndióxi queá chindeé a ndohó tá ná quixi tondóhó nu ndo já ná cuu caja ndeé ini ndó tá ná ndoho ndó ña.

<sup>14</sup> Cándehé ndo ñani i, na cúu cuéntá Jesús. Xíní ñúhú jándacoo vaha ndó ña cája cáhnu ndó yoco. <sup>15</sup> Tá quiahva cáhan i xihín ñayivi tácu ini quiahva já cáhan i xihin ndo. Ta mé ndó cándaa vaha ini ndó á ndaa á a ndáa queá cáhan i xihin ndo. <sup>16</sup> Ná ndiquiahva í ndixahvi nu Ndióxi tá ndicuhun ini sahá ña nacaja Jesucristo tá naxihí a saha yo. Jáchi tá xihí vino ña yíi já cúní cachi a ña in nanduú xihin mé á sahá ña naxita nii mé á ndica crúxu saha yo. Ta jári tá xixí pan ña yíi ña sáhdá java nu táhan í cúní cachi a ña in nanduú xihin mé á jáchi nandiquiahva yiquí cuñu a saha yo. <sup>17</sup> Ta vatí cuhá ndivaha cúu yó joo in túhún pan sáhdá java í xixí jáchi xihín ña yóho náha ña in cúu ndihí xihín Jesucristo.

<sup>18</sup> Xíní ñúhú candehé ndo ndá quiahva cája na Israel jáchi tá sáxi na cuñu quítí, rí

najoco inga na nu náa cán já cúu á tátuhun mé ná nasahní na mé quítí cán ta najoco na ri. Quiahva já yáha xihin mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. <sup>19</sup> Joo xíní ñúhú ndicuhun ini ndó tá cáchí i ña yóho xihin ndo co cúní cachi i ña íin sahá yoco. Ta ni co cúní cachi i ña íin chága sahá cuñu najoco na nuú yoco a juú ga inga cuñu. <sup>20</sup> Ña cúní cachi i xihin ndo queá tá ná joco ñayivi, na co xíní Ndióxi jan in quítí nuú yoco cúu á tátuhun jóco na jan ri nuú tiñahá va. Ta co cája toho na ña nu Ndióxi. Ta cáxi tuhun i ña yóho xihin ndo já ná a cáxi ndó cuñu jan jáchi tá ná caxí ndó ña cacuu a tátuhun najoco ri ndóhó va ña nuú tiñahá. <sup>21</sup> Jáchi a cuú cuhun ndo coho ndó ña najoco na nuú rí quini ta já quixi ndó coho ndó ña yíi cuéntá Jesucristo, xitoho í. Ta ni a cuú cuxu ndó ña najoco na nuú rí quini ta já cuxu ndó ña yíi, ña xixi na tá ndicuhun ini na ña naxihí Jesucristo, xitoho í. <sup>22</sup> A cája ndó ña yóho jáchi cúu á tátuhun cúní ndó jácojo ndó ini Ndióxi. Xíní ñúhú ndicuhun ini ndó ña co cúu ndó na ndacú chága a juú ga Ndióxi.

*Sahá ña quíhvi ini ñani táhan í co ndítahan caja í ndá ña nacuu cúní mí caja í*

<sup>23</sup> Ndúu java na ta cáchí na já: “Núná nu yo caja í ndá ña cúní mí caja í.” Vatí ña yóho cúu á ña ndaa joo a juú ndihi

ñā cāja í cāja vaha xohō. Mé a ndaa núná nu yō cāja í ndá ñā cúní mí joo cō chindeé a mí cuahnu í xihín ñaha Ndióxi. <sup>24</sup> Cō ndítahan nu yō nducú yó ñā vaha mí cuití yō. Ndítahan ndíhi iní cāja í ñā vaha sahá ñani táhan í.

<sup>25</sup> Cuu caxí ndó ndijáá cuñu cáyahvi nuú yahvi ta a ndáca tuhún ndō ndájá naquixi a já ná a cáhvi ivi joho ini ndó xihín á. <sup>26</sup> Jáchí ñaha Ndióxi, xitoho í cúú ñuyiví yóho xihín tóco ndihi ñā ín nu á.

<sup>27</sup> Candehé ndō. Tá ná cana in na cō cúú cuéntá Jesús ndohó ñā ná cūhun ndó cuxu ndó xihín ná, cuáhán ndō tá cúní ndō ta cuxu ndó tóco ndihi ñā sácú na nu ndó cuxu ndó. Ta a ndáca tuhún ndó na á naquixi a nuú yoco. Cuxu ndó ñā jáchí tá ná ndaca tuhún ndō na já cuu casáhá ndicani ini ndó xihín á. <sup>28</sup> Joo tá sa nacaxi tuhun yachi na xihín ndō ñā cúú á cuñu najoco na nuú yoco já queá a cūxu toho ndó ñā. Jáchí tá ná cuxu ndó ñā já queá cāja ndó ñā ná a váha cuu ini mé na cán. <sup>29</sup> Cahan í ñā yóho jáchí cúní ñā ná cāja vaha ndó sahá inga na. Cō cahan í ñā saha mé ndó.

Mé a ndaa ndúu java ndó ta cáhán ndō ñā cō ndítahan ndíhi ini ndó sahá ñā cáhvi ini inga na jáchí cáhán ndō ñā núná nu ndó cāja ndó ñā cúní ndō. <sup>30</sup> Ta java ndó cáhán ndō ñā tá sa nandiquiahva ndó ndixahvi nu Ndióxi sahá ñā xíxi ndó já queá a cuú cahan núu ñayivi sahá ñā cāja ndó.

<sup>31</sup> Joo cáchí í xihín ndó ñā xíní ñúhú candehé vaha í ñā cāja í ná a jándicava í inga na nuú cuachi. Jáchí janda xihín ñā xíxi ta xihín ñā xíhí, xíní ñúhú cāja cáhnu í Ndióxi. <sup>32</sup> Cō ndítahan cacuú na jándicava inga ñayivi nuú cuachi jáchí tá cāja í já cúú yó tátuhun yuú cándúhu jácachihin sahá ñayivi. A cāja ndó já xihín na Israel ta ni xihín na tóho ta ni xihín na cúú cuéntá Jesús. <sup>33</sup> Ta tóco ndihi ñā cāja í, cāja í ñā ná cajii ini ndihi ñayivi xihín. Ta cō nducú u ñā vaha mí í jáchí nducú u ñā ná cajii ini ñayivi já ná cuu cacu ndaa ínima ná.

## 11

1 Xíní ñúhú cāja ndó tá quiahva cāja yehe jáchí quiahva já cāja í ñā nacaja Jesucristo, xitoho í.

*Ñā ndítahan nuú najihí cāja na tá cāja cáhnu na Ndióxi*

<sup>2</sup> Cájii íní í xihín ndō, ñani í, na cúú cuéntá Jesús. Jáchí ní tiempo ñúhu ini ndó sahá í ta cāja ta cāja ndó ñā najánaha í nu ndō. <sup>3</sup> Joo cúní ñā ná candaá ini ndó ñā cúú Jesucristo jiní nuú in in ta. Ta quiahva já in in ta cúú dá jiní nu ñájihí da. Ta quiahva já Ndióxi cúú á jiní nuú Jesucristo. <sup>4</sup> Sahá ñā cán queá tá cō cándaa in dataa yijiní dá nani xíca tahví da nu Ndióxi á nani cahan da tuhun Ndióxi nu táca ñayivi já queá náha ñā cō cāja cáhnu da Jesucristo, mé a cúú jiní nu mé dá. <sup>5</sup> Ta in ñañaha tá

co chíjahvi ña jini ña nani xica tahvi ña nu Ndióxi á nani cáhan ña tuhun Ndióxi nuú ñayivi veñuhu já quea náha ña quehe núu ña yí ña, da cúu jini nu mé ña. Cúu á tátuhun najatá ña jini ña. <sup>6</sup> Jáchi tá co chíjahvi in ñañaha jini ña janda vaha chága ví ná jatá táhyí ña jini ña. Joo tá cáhan ña ña quini canaha jini ña tá ná jatá táhyí ña jini ña já quea xini ñuhú chijahvi ña jini ña. <sup>7</sup> Co ndítahan toho nuú in dataa chijahvi da jini dá veñuhu jáchi mé dá cúu dá da nacavaha Ndióxi xihín yuhú nuú mé á. Ta mé dá cúu dá da náha ndá quiahva cáhnu cúu Ndióxi. Ta náha in ñañaha ña yí ña cúu da jini nu ña. <sup>8</sup> Jáchi xini ñuhú ndicuhun ini ndó ña coó natavá toho Ndióxi lásá yiquí ndicá ñañaha já nacavaha mé á dataa, vaha. Ña nacaja mé á quea natavá a lásá yiquí ndicá dataa ta já nacavaha mé á ñañaha. <sup>9</sup> Jihna ñuhú nacavaha Ndióxi dataa ta já nacavaha mé á in ñañaha chindeé ña da. <sup>10</sup> Ta sahá ña jihna ñuhú ga nacavaha Ndióxi dataa sahá ña cán quea ndítahan nuú in ñañaha chijahvi ña jini ña ná nahá ña nu tátó Ndióxi ña mé a ndaa cája cáhnu ña yí ña. <sup>11</sup> Joo mí, na cúu cuéntá Jesús ndítahan candaa ini ña xini ñuhú táhan ta xihín ñaha. <sup>12</sup> Vatí nacavaha Ndióxi ñañaha nu cuítí xihín lásá yiquí ndicá dataa joo viti tóco ndihi dataa cácu da ñuyívi yóho cája najihí. Joo tóco ndihi ñayivi tácu na jáchi já

cúni Ndióxi.

<sup>13</sup> Mé ndó xini ñuhú candehé ndó á vaha á a vaha toho ña ná a chíjahvi in ñañaha jini ña nani xica tahvi ña nu Ndióxi veñuhu. <sup>14</sup> Jáchi sa candaa vaha ini ña a vaha toho cája dataa tá in nani ijí jini dá. <sup>15</sup> Joo ndisáhnu náha ñañaha tá in nani ijí jini ña jáchi Ndióxi nasahan ijí jini ña nu ña já ná chijahvi a jini ña. <sup>16</sup> Joo tá ndúu java na ta co táhan ini na xihín ña cáhan i yóho já quea co cúni toho i nditúhún ihvi i xihín ná sahá ña yóho. Jáchi xini ñuhú candaa ini na ña ndijáá java ga na cúu cuéntá Jesús cája na tá quiahva cáchi i yóho tá táca na veñuhu.

*Jámani Pablo na cúu cuéntá Jesús jáchi co cája ndisáhnu na tá táca na cajini na ña yíi cuéntá Jesús*

<sup>17</sup> Ta in inga ñaha cúni cáhan i xihín ndó saha ta co táhan ini i xihín á. Jáchi nañehé e tuhun ña co cája vaha ndó tá táca ndó veñuhu. <sup>18</sup> Candehé ndó. Sa nañehé e tuhun ña sáhdá java táhan ndó tá táca ndó cája cáhnu ndó Ndióxi. Ta cája i cuéntá cándusa i ña cáchi na saha ndó. <sup>19</sup> Vatí mé a ndaa náha xicá a ña ndítahan cahnda táhan ndó já ná cuu cuni ñayivi ndá ndó cúu ndusa cuéntá Jesús ta ndá ndó co cúu cuéntá Jesús. <sup>20</sup> Ta sahá ña sáhdá táhan ndó nu táca ndó jan, náha ña quehe núu ndó ña yíi xijini ndó ta xihín ña yóho co cúu ga ña cuéntá Jesucristo, xitoho í. <sup>21</sup> Jáchi tá



ndíndaa hora cajíni ndó tá in tá in ndó sa jihna ñúhú ndo ndáva ndó cuahān ndó quehe ndó ña cajíni mé cuití ndo. Ta java ndó ni co ñéhe ndó ña cuxu ndó. Joo java ndó xíhi ndó janda jáxini ndó mé ndó. <sup>22</sup> Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a váha cája ndó jáchi co ñéhe na ndahví ña cuxu na cája ndó ta xihín ña yóho cácahan nu ná. A cándati toho ndó ña cajii íni i xihín ña cája ndó yóho jáchi a juú ña vaha quéa cája ndó.

*Ña ndítahan caja na cúu cuénta Jesús tá xijíni na ña yii cuénta Jesús*

*(Mt. 26:26-29; Mr. 14:22-25; Lc 22:14-20)*

<sup>23</sup> Ña jánaḥa i nu ndo yóho cúu ña najánaḥa Jesucristo, xitoho í nuú i. Jáchi mé ñuu tá cámani ndiquiahva na mé á ndáha na ihvi a já natiin a in pan. <sup>24</sup> Tá nandihhi nandiquiahva ndixahvi nu Ndióxi já nasahnda java ña ta já nacachi a já xihín ná: “Mé pan yóho cúu á tátuhun yiquí cuñu i ña ndiquiahva i saha mé ndó. Xíni ñúhú caja ndó ña yóho ña ná ndicuhun ini ndó ña naxihí i saha ndo”, nacachi Jesús. <sup>25</sup> Ta tá nandihhi naxijíni na cán já natiin a in vaso nu ñúhu tó uva. Ta já nacachi a já: “Dó ñúhu ini vaso yóho cúu dó tátuhun níi i, dó cuíta saha ndó. Ta xihín dó yóho xinu coo nuú tuhun nasahan Ndióxi nuú ñayivi sanahá

tá nacachi a jácau a ñayivi. Ndijáa tañu tá ná coho ndó mé tó uva, dó yii ndítahan ndicuhun ini ndó ña naxihí i saha ndo”, nacachi Jesús. <sup>26</sup> Sahá ña cán quéa ndijáa tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naxihí Jesucristo, xitoho í saha ndo. Ta xíni ñúhú caja ndó ña janda quiahva ná quixi tucu mé á ñuyiví yóho.

<sup>27</sup> Candehé ndo. Tá ná cuxu ndó pan ta tá ná coho ndó tó uva, ña yii cuénta Jesucristo, xitoho í ta co ín vií ínima ndo já quéa cája ndó cuachi nu mé á ta quéhe núu ndó ña naxihí a ndica crúxu saha ndo. <sup>28</sup> Sahá ña cán quéa tá cámani casahá cajíni ndó ña yii cuénta Jesús xíni ñúhú coto ndojó jihna ndó mé ndó á vií ínima ndo nu Ndióxi á coo vií a. <sup>29</sup> Jáchi tá ná cuxu ndaja nacuu ndó ña yii cuénta Jesús já quéa náha ña quéhe núu ndó mé á. Jáchi ña xíxi ndó jan cúu á tátuhun yiquí cuñu mé á ta dó xíhi ndó jan cúu dó tátuhun níi á. Ta tá ná quehe núu ndó ña já quixi ña ndoho ini ndó caja Ndióxi. <sup>30</sup> Sahá ña cája ndó jan cuaha táhan ndó quíhví ta cuaha ndó cávitá ndó ta anda java na sa naxihí ná sahá ña naquehe núu na ña yii cuénta Jesús. <sup>31</sup> Joo tá ná coto ndojó yo mí ña á ín vií ínima yo nu Ndióxi já quéa a ndítahan toho nu mé a cúu xitoho í caja vií a sahá cuachí. <sup>32</sup> Joo tá jándoho mé á ini mí cúu á sahá ña co cúni a ña ná ndoho íni xihín ñayivi

ñuyiví tá ná xinu coo quivi  
 caja vii mé a cúu xitoho í sahá  
 cuachi nacaja na cán.

<sup>33</sup> Candehé ndo, ñani i, na  
 cúu cuéntá Jesús. Ña nditahan  
 caja ndó cúu ña yóho. Tá ná  
 nditaca ndó cajíni ndó ña yii  
 cuéntá Jesús xini ñúhú can-  
 dati táhan ndó janda quiahva  
 ná taca tóco ndihi ndó. <sup>34</sup> Ta  
 tá cuíco ndó já quea xini ñúhú  
 cuxu ndó vehe ndó já ná a  
 jándoho Ndióxi ini ndó sahá  
 ña cája ndó ña núu tá táca ndo  
 cajíni ndó ña yii jan. Ta caja  
 vii i sahá java ga ñaha tá ná  
 saa i coto nihni i ndohó jan.

## 12

*Ña ñéhe táhvi ñayivi nu ínima  
 yii Ndióxi*

<sup>1</sup> Candehé ndó, ñani i, na  
 cúu cuéntá Jesús. Cáhyi i ña  
 yóho nu ndo jáchi cúni ña ná  
 candaa ini ndó ndaja íin ña  
 sahan ínima yii Ndióxi nu yo.

<sup>2</sup> Mé ndó sa candaa vaha ini  
 ndó ña tá camani ndiquehe  
 ndó íchi cuéntá Jesús já  
 nasacuu ndó tátuhun ñayivi  
 cuáá jáchi nasanduu ndó  
 ndáha tá nuú yoco, ña coo  
 tachí cahan. <sup>3</sup> Ta viti cúni  
 caxi tuhún i xihin ndo ña ni  
 in ñayivi a cúu chícana na  
 chahan jata Jesús tá ta ínima  
 yii Ndióxi quea sahan tuhun  
 nu ná cahan na. Ta tá cáchi  
 na xihin ndinuhu ini na ña  
 Jesús cúu xitoho na já quea  
 náha ña ínima yii Ndióxi quea  
 sahan tuhun nu ná cahan na.

<sup>4</sup> Cuahá nuú ñaha ñéhe  
 táhvi ñayivi caja na cuéntá  
 Ndióxi ta in tuhún ínima  
 yii Ndióxi sahan ña nu ná.

<sup>5</sup> Cuahá nuú chuun cuu caja  
 ñayivi cuéntá Ndióxi ta tóco  
 ndihí cája chúun í cuéntá mé  
 a cúu xitoho í. <sup>6</sup> Ta sa jíin sa  
 jíin cája in in í chuun nasahan  
 Ndióxi nu yó caja í. Joo in  
 tuhún mé á quea sahan ña  
 yóho nuú in in í caja í. <sup>7</sup> Ta  
 sahan Ndióxi in ñaha nuú in  
 in í já náha ña ñúhu ínima yii  
 Ndióxi ini ta xihin ña yóho cuu  
 chindeé yo tóco ndihi na cúu  
 cuéntá Jesús. <sup>8</sup> Ínima yii Ndióxi  
 yóho quea cája ña ná cuu  
 candaa ini java ñayivi ndaja  
 íin ña vaha xihin ña a váha ta  
 já ndicani na ña nuú ñayivi.  
 Ta sa mé ínima yii Ndióxi quea  
 cája ña ná cuu cahan ñayivi  
 ña ndichí ndivaha. <sup>9</sup> Ta cája  
 mé ínima yii Ndióxi yóho xihin  
 java na ña ná candeé cáhnu  
 ini na mé á. Ta sahan mé ínima  
 yii Ndióxi nuú java na ña ná  
 cuu ndaja vaha na na quíhvi.  
<sup>10</sup> Java na ñéhe táhvi ná caja  
 na ña xituhún. Ta java na  
 ñéhe táhvi ná jáyaha na tuhun  
 nasahan Ndióxi xihin ná nuú  
 ñayivi. Ta java na ñéhe táhvi  
 ná ndicuni na ndá na cúu na  
 cája chúun cuéntá ínima yii  
 Ndióxi ta ndá na coo cája chúun  
 toho cuéntá mé á. Ta java na  
 ñéhe táhvi ná cahan na tuhun  
 ña coo nasatiahva na. Ta java  
 na ñéhe táhvi ná nducú ñehe  
 na ña cúni cachi tuhun cahan  
 na cán nuú ñayivi. <sup>11</sup> Ta sa mé  
 ínima yii Ndióxi cája tóco ndihi  
 ña yóho ta in tuhún mé á sahan  
 nuú in in ñayivi ña sácú ini a  
 caja chúun vaha na xihin.

*In cúu tóco ndihi na cúu  
 cuéntá Jesús sahá ña candeé ini*

na mé á

<sup>12</sup> Candehé ndo. Cuahá ndivaha nu ndáca yiquí cuñu í joo in víxí cúú á. Quiahva já in xihín na cúú cuéntá Jesús. <sup>13</sup> Ta quiahva já yáha xihín tóco ndihi mí, coo caja toho a á cúú yó na Israel á co cúú yó na Israel. Ta coo caja toho a á cúú yó na cómi in xitoho cuéntá saha, á cúú yó na xica núná mé. Jáchi cája ínima yij Ndióxi ña cúú yó tátuhun in víxí ñayivi sahá ña in nanduú xihín Jesucristo tá nacanduta yó cuéntá mé á. Ta in túhún ínima yij mé á nasacu a ini ínima in in í.

<sup>14</sup> Xíní ñúhú ndicuhun iní ña a juú in víxí nu ndáca yiquí cuñu í jáchi cuahá ndivaha nu ndáca yiquí cuñu ñayivi. <sup>15</sup> Candehé ndo. Cúú á tátuhun tá ná cahán in xoo saha yo já cáchi a já: “Yehe co cúú toho i ndáha ñayivi sahá ña cán quea coo chuun toho i nuú yiquí cuñu na”, cáchi a. Joo co cája toho ña cáhan saha yo yóho jáchi cúú á cuéntá yiquí cuñu í. <sup>16</sup> Ta cúú á tátuhun tá ná cachi in johó í já cáchi a já: “Yehe co cúú toho i nduchú núú ñayivi sahá ña cán quea coo chuun toho i nuú yiquí cuñu na”, cáchi a. Joo co cája toho ña cáhan johó í yóho jáchi cúú á cuéntá yiquí cuñu í. <sup>17</sup> Jáchi caja mé ndó cuéntá ndaja caja í cuni johó í tá níí cúú yiquí cuñu í ná cacuu a nduchú núú yo. Ta ndaja caja í tahmí ñaha tá níí cúú yiquí cuñu í ná cacuu a johó í. <sup>18</sup> Joo in in ña ndáca yiquí cuñu í

yóho nasacu Ndióxi ña mé nu ndítahan coo a jáchi já nasacu ini a caja. <sup>19</sup> Xíní ñúhú caja ndó cuéntá tá in víxí johó ná candaca níí cúú yiquí cuñu í já quea co in ndihi toho yiquí cuñu í. <sup>20</sup> Ta vatí cuahá ndivaha nu ndáca yiquí cuñu in in í joo in víxí cúú yiquí cuñu í. Ta quiahva já in a xihín na cúú cuéntá Jesús.

<sup>21</sup> Candehé ndo jáchi sácú u in quiahva nu ndo: Nduchú núú yo a cúu cachi a xihín ndáha yo ña co xíní ñúhú a ña. Ta ni yiquí jíní yo a cúu cachi a xihín saha yo ña co xíní ñúhú a ña. <sup>22</sup> Ña yáha xihín yiquí cuñu í cúú ña yóho. Java tañu cáhán yo ña vitá in ñaha ndáca yiquí cuñu í joo ña jan xíní ñúhú chága yó ña. <sup>23</sup> Ta mé xoo yiquí cuñu í ña cáhán yo coo cuahá saha, ña co cúní yo ña ná candehé ñayivi, ña cán cúú ña chíjahví vaha í <sup>24</sup> vatí co xíní ñúhú caja í já xihín ñaha ña cuu candehé ñayivi. Xihín ña yóho cuu candaá iní ndá quiahva nacavaha Ndióxi in in xoo yiquí cuñu í ta cuu candaá iní ndaja candaá vaha chága yó ña cáhán yo coo cuahá saha. <sup>25</sup> Ta xihín ña yóho co sáhdá java táhan yiquí cuñu í jáchi in in xoo yiquí cuñu í ndíhi ini a sahá java ga xoo yiquí cuñu í. <sup>26</sup> Ña cán quea tá ndícuehe in xoo yiquí cuñu í ndijáá java ga ña cán ndíhíhví a sahá ña ndóho in xoo yiquí cuñu í. Joo tá víí cája na xihín in xoo yiquí cuñu í já quea cájij ini java ga xoo yiquí cuñu í.

27 Ta tóco ndihi ndó, na cúu cuéntá Jesús cúu ndó tátuhun yiquí cuñu Jesucristo jáchi in nanduu ndihi ndó xihín á ta in in ndó cúu ndó tátuhun in xoo yiquí cuñu a. 28 Ta tá quiahva ín chuun cája in in xoo yiquí cuñu í quiahva já ín chuun caja in in na cúu cuéntá Jesús. Jihna ñúhú naçaxi Ndióxi na apóstol ta já naçaxi a na jáyaha tuhun Ndióxi nuú ñayivi ta já naçaxi a na jáyaha tuhun Ndióxi nuú ñayivi ta já naçaxi a na cája ña xitúhún. Ta já naçaxi a na ndája vaha na quíhvi xihín na chindeé ñayivi xihín na sáhdá chuun nuú java ga ñayivi xihín na cáhan tuhun ña coó nasatiahva na. 29 Joo a juú ndihi na cán cúu apóstol. Ta ni a juú ndihi na cúu ná na jáyaha tuhun cáhan Ndióxi nuú ñayivi. Ta ni a juú ndihi na jáyaha ñayivi. Ta ni a juú ndihi na cája ña xitúhún. 30 Ta ni a juú ndihi na ndája vaha na na quíhvi. Ta ni a juú ndihi na cáhan tuhun ña coó nasatiahva na. Ta ni a juú ndihi na tiahva nducú ñehe ña cúnj cachi tuhun cáhan na cán. 31 Joo mé ndó xíní ñúhú ndinducú ndo ña ná quiahva Ndióxi in ña vaha chága nu ndo. Ta viti cúnj jáyaha í ña cúu ña vaha chága nu ndo.

### 13

*Ña ndítahan caja í tá quíhvi iní ñayivi*

1 Tá ná cuu cahan í tá nuú tuhun cáhan ñayivi ndúu ñuyívi yóho ta tá ná cuu cahan

í tuhun cáhan tát Ndióxi joo tá co quíhvi iní í ñayivi já quéa coó saha toho ña cáhan í. Jáchi xihín ña jan cúu u tátuhun in caa jácasá na, á tátuhun in caa xoo tá jácasá na ña. Quiahva já ín í tá co quíhvi iní í ñayivi. 2 Ta ni coó sahá ña ná cacuu u in da jáyaha tuhun cáhan Ndióxi nuú ñayivi tá co quíhvi iní í ñani táhan í. Jáchi tá co quíhvi iní í ñayivi coó caja toho ña ná cuu candaa iní í tóco ndihi ñaha ta ni coó caja toho a tá xínj tóco ndihi ña xínj da ndichí ta ni coó saha toho tá cándéé cáhnu ndivaha iní í Ndióxi janda quiahva cuu cahan í xihín in yucu ña ná ndicanda ña. Coó saha toho tóco ndihi ña yóho tá co quíhvi iní í ñani táhan í. 3 Ta vatí ná ndicahnda í tóco ndihi ña cómí í ta já quiahva í ña nuú na ndahví coó sahá toho ña cája í tá co quíhvi iní í ñayivi. Ta ni coó caja toho ña ná ndiquiahva í yiquí cuñu í ña ná cayí a sahá ña cáhan í tuhun Ndióxi tá co quíhvi iní í ñayivi.

4 Jáchi tá mé a ndaa táhyí quíhvi iní ñayivi co ndíhi iní xihín ná. Ta tá quíhvi iní na táhvi iní saha ná ta co cáhíhvi toho iní xihín ná. Ta ni co cája lándá yo nu ná ta ni co cája cáhnu í mí nu ná. 5 Tá quíhvi iní ñayivi ín toní ñúhú yo xihín ná ta co cájhdá yo ñaha nu ná jáchi co ndúcú yo ña vaha mé cuití yo. Ta ni co xójo iní xihín ná. Ta ni co quéhé cuéntá sahá ña núu cája na xihín yo tá quíhvi iní na. 6 Ta tá quíhvi iní ñayivi co cájji

toho iní tá cája núu na joo cájii iní tá cája na ña ndaa. <sup>7</sup> Tá quíhvi iní ñayivi in tiahva í ndoho iní saha ná ta cáhvi iní ña vaha cuití va saha ná. Ta cándúsa í ña cája na ña ndaa. Ta sáhan ndeé iní xihín tóco ndihi ñaha.

<sup>8</sup> Tá mé a ndaa quíhvi iní ñani táhan í já quea anda ama cáa quivi a ndíhi sahá ña quíhvi iní na. Joo vaxi quivi a jáyaha ga ñayivi tuhun cáhan Ndióxi xihín ná nuú ñayivi jáchi vaxi quivi ndihi sahá. Ta a cáhan ga na tuhun ña coó nasatiahva na. Ta vaxi quivi ndihi sahá ña ndíchi jini ñayivi. Joo a ndíhi toho saha ña quíhvi iní táhan í. <sup>9</sup> Jáchi chá cuití xini yó saha Ndióxi ta chá cuití tiahva í jáyaha í tuhun cáhan Ndióxi nuú ñayivi. <sup>10</sup> Joo tá ná xinu coo quivi ndaja Ndióxi ña ná nduú ñayivi vii já quea a cuni ñuhú ga yó ña tóco ndihi java ga ña ndihi saha cán jáchi sa nanduú ñayivi vii nu mé á.

<sup>11</sup> Candehé ndo. Tá nasacuu u in taa loho nacahan i tá quiahva cáhan na valí ta quiahva já nacahvi iní i ta quiahva já nacaja i. Joo tá nasahnu i najándacoo i ña cája na valí. <sup>12</sup> Viti co cándaa vaha iní ndá quiahva cáa Ndióxi. Cúu á tátuhun tá sándehe yó nuú in yutátá ña co jínú vaha ga. Joo vaxi quivi cuni mé á tá quiahva cáa. Viti cuahá ñaha co cándaa iní saha mé á. Joo vaxi quivi cándaa iní saha mé á tá quiahva xini mé á mí viti. <sup>13</sup> In uní nuú ñaha ña a ndíhi sahá. Ta ña

yóho cúu á: ña cándeé iní Ndióxi, ta inga cúu ña ndatí casaa, ta inga cúu ña quíhvi iní Ndióxi xihín ñani táhan í. Ta cuni Ndióxi ña ná caja í ndihuni ña yóho joo ña cáhnu chága cúu ña quíhvi iní Ndióxi xihín ñani táhan í.

## 14

*Tá cáhan ñayivi tuhun ña coó nacatiahva na*

<sup>1</sup> Xini ñuhú ndihi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínimá yii Ndióxi nu yo. Ña xini ñuhú ndihi chága ini ndó ndinducú ndo cúu ña ná cuu jáyaha ndó tuhun cáhan Ndióxi xihín ndó nuú ñayivi. <sup>2</sup> Jáchi ndá na nacuu cáhan tuhun ña coó nacatiahva na já quea cáhan na xihín Ndióxi joo co cáhan na xihín ñayivi jáchi co cándaa iní ñayivi ña cáhan na. Ña cáhan na cúu ña naquixi cuéntá ínimá yii Ndióxi ta cúu á ña co xini ndihi ga ñayivi. <sup>3</sup> Joo ñayivi tiahva jáyaha tuhun cáhan Ndióxi xihín ná nuú ñayivi cája na ña ná cuu cuahnu chága na cúu cuéntá Jesús xihín tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán. <sup>4</sup> Ta na ñehe táhvi cáhan tuhun ña coó nacatiahva na sáhnu mé cuití va na xihín tuhun sáhan Ndióxi nu ná cahan na. Joo na tiahva jáyaha tuhun cáhan Ndióxi nuú ñayivi chindeé na na cúu cuéntá Jesús ña ná

cuahnu chága na xihín ñaha cuéntá Ndióxi.

<sup>5</sup> Mí i cájii ínii i tá ná cuu cahan ndihi ndó tuhun ña coó nasatiahva ndó. Joo cájii chága ini i tá ná jáyaha ndó tuhun cahan Ndióxi xihín ndó nuú ñayivi jáchi xínii ñúhú chága ña yóho a juú ga ña ná cahan ndó tuhun ña coó nacatiahva ndó. Vaha cája ndó ña ná cahan ndó tuhun ña coó nacatiahva ndó tá in in na tiahva nducú ñehe ña cúnii cachi tuhun cahan ndó nuú ñayivi já queá ná cuu cuahnu na cúu cuéntá Jesús xihín mé tuhun cán. <sup>6</sup> Xínii ñúhú candehé vaha ndó ña cahan i xihín ndó, ñani mí i na cúu cuéntá Jesús. Coó saha toho ña cája i tá ná saa i coto nihni i ndohó ta já casahá i cahan i inga tuhun ña co cándaa ini ndó. Tá ná caja i já ndaja caja ndó candaa ini ndó tuhun Ndióxi. Ña ndítahan caja i queá cahan i xihín ndó ña najánaha Ndióxi nuú i. Ta ndítahan cahan i ña ndichí cuéntá Ndióxi. Ta ndítahan cahan i tuhun nasahan Ndióxi nuú i jáyaha i ña nu ndó. Ta ndítahan jánaha i ña ndaa cuéntá Ndióxi nu ndó.

<sup>7</sup> Sácú u in quiahva nu ndó sahá in tóyoo xihín dó jácaha. Ndaja caja ñayivi candaa ini na ndá yaa tiví yo tá co tiáhva í tiví vaha í, á tá co tiáhva í jácaha vaha í. <sup>8</sup> Ta ndaja caja na soldado cacu tiahva na mé ná ña ná cuhun na cani táhan na tá ta co tiáhva vaha da tiví trompeta tiví da

do. <sup>9</sup> Quiahva já yáha ri xihín mé ndó jáchi tá co cahan ndó tuhun ña cuu candaa ini ñayivi ndaja caja ri na cán candaa ini na ña cáchi ndó. Cúu á tátuhun cahan ndó nu táchi cuití va. <sup>10</sup> Cája i cuéntá in cuahá ndivaha nuú tuhun cahan ñayivi ndijáá ñuyiví. Joo ndijáá tuhun yóho cáxi cahan nuú ñayivi cahan na mé tuhun yóho. <sup>11</sup> Joo tá co cándaa ini i ña cahan inga ñayivi xihín i já cúu u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co cándaa ini i tuhun cahan na. <sup>12</sup> Sahá ña cán queá tá mé a ndaa cúnii ndó ndiquehe ndó ña sahan ínimá yii Ndióxi nu ndó já queá xínii ñúhú ndin-ducú ndó ña ná cuu chindeé ndó na cúu cuéntá Jesús ná cuahnu chága na xihín tuhun Ndióxi.

<sup>13</sup> Ña cán queá ndá ndó ñehe táhvi cahan ndó tuhun ña coó nacatiahva ndó já queá xínii ñúhú caça ndó nu Ndióxi ña ná cuu ndicani ndó ña cúnii cachi a nuú ñayivi. <sup>14</sup> Jáchi tá ná casahá cahan i tuhun ña coó nacatiahva i nani xíca tahví i nu Ndióxi já queá mé a ndaa cája cahnú i Ndióxi xihín ínimá i joo co cája i ña xihín xínii túnii i jáchi co cándaa ini i ña cahan i. <sup>15</sup> Ndiá caja i. Ña xínii ñúhú caja i queá caça tahví i nu Ndióxi xihín ínimá i ta xihín xínii túnii i. Ta quiahva já xínii ñúhú cata i xihín ínimá i ta xihín xínii túnii i vití. <sup>16</sup> Candehé ndó. Ná caja í cuéntá tá ndúu ndó veñuhu ta

cásáhá ndo cáhan ndó tuhun ña coo ñacatiahva ndó nani cája cáhnu ndó Ndióxi xihín inima ndo ta ndaja coo quíhvi in ñayivi ini veñuhu, na co cándaá cuahá ini sahá ñaha cuéntá Ndióxi. Ta xini johó na ña cáhan ndo joo a cúu caja na ndiquiahva na ndixahvi nu Ndióxi in nuú xihín ndo jáchi co cándaá ini na tuhun cáhan ndo. <sup>17</sup> Vatí ndató ndivaha cáhan ndo ndiquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaá ini na tuhun cáhan ndo. <sup>18</sup> Ndíquiahva i ndixahvi nu Ndióxi jáchi cáhan cuahá chága i tuhun ña coo ñacatiahva i a juú ga ndóhó. <sup>19</sup> Joo nani jánaha i ndohó ini veñuhu cájji chága iníi cahán chá cuití va i tuhun já ná cuu candaa cáxi ini ndó ña cáhan i. Jáchi ndá chuun quéa ná cahán cuahá nahá i tuhun ña co cándaá ini ndó.

<sup>20</sup> Candehé ndo ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na co cája cuachi. <sup>21</sup> Xíní ñúhú ndicuhun ini ndó ndaja cáchí ley ñacahyi Moisés sanahá tá ñacachi Ndióxi já: “Vatí ná chindahá i na cáhan java tuhun tóho nuú ñayivi Israel joo a cúni johó na nuú cahán na tóho cán jáchi sáa ini na Israel”, ñacachi Ndióxi. <sup>22</sup> Tá cahán ndó tuhun ña

coo ñacatiahva ndó nani cája cáhnu ndó Ndióxi co chindeé cuahá ña yóho na cúu cuéntá Jesús cuahnu na xihín tuhun Ndióxi vatí mé a ndaa na co xini tuhun Ndióxi catóntó na xihín ña yóho. Joo tá jáyaha ndó tuhun cáhan Ndióxi xihín ndó nuú na cúu cuéntá Jesús já cuu cuahnu chága na xihín tuhun Ndióxi vatí co chindeé cuahá ña yóho na cámani ndihvi íchi cuéntá Jesús. <sup>23</sup> Caja mé ndó cuéntá tá ná taca cuahá na cúu cuéntá Jesús ta casáhá cáhan ndo tuhun ña coo ñacatiahva ndó nani cája cáhnu ndó Ndióxi ta ndaja coo quíhvi na co xini tuhun Ndióxi nu ndúu ndó jan. Ta tá ná cuni na ña sa jín tuhun cáhan ndihi ndó já quéa cahán na ña cúu ndó na tachí. <sup>24</sup> Joo tá ná jáyaha tóco ndihi ndó tuhun cáhan Ndióxi nuú ñayivi ta ndaja coo quíhvi in na co xini tuhun Ndióxi. Ta tá ná cuni johó na ña cáhan ndo já quéa tahnda ini na sahá cuachi na ta já casáhá ndicani ini na sahá ña núu cája na. <sup>25</sup> Ta já nahma na cuachi na nuú ñayivi ta já ndicava xítí na caja cáhnu na Ndióxi. Ta xihín ña yóho candaa ini na ña mé a ndaa táhyí iin Ndióxi tañu ndó.

*Tóco ndihi ña cája ndó cuéntá Ndióxi xíní ñúhú caja ndó ña xihín toní ñúhú*

<sup>26</sup> Candehé ndó, ñani i, na cúu cuéntá Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaha ndó nuú

ñayivi. Ta ndítahan nuú java ndó jáyaha ndó tuhun cáhan Ndióxi xihín ndó nuú ñayivi ta java ndó cáhan ndó tuhun ña coó nacatiahva ndó. Ta ndítahan nuú java ndó nducú ñehe ndó ña cúní cachi tuhun cáhan na cán. Tóco ndihi ña cája ndó xíní ñúhú chindeé a ndohó ná cuahnu chága ndó xihín tuhun Ndióxi. <sup>27</sup> Ta ndítahan nuú ivi á uní ñayivi cuití va cáhan na tuhun ña coó nacatiahva na. Joo tá in tá in na caja na ña. Ta ndítahan canduu na tiahva nducú ñehe na ña cúní cachi tuhun cáhan na jan. <sup>28</sup> Ta nu táca ndo tá coó ni in na tiahva nducú ñehe ña cúní cachi tuhun cáhan na jan já quéa vaha chága ná a cáhan na tuhun ña coó nacatiahva na. Ña vaha chága quéa ná cáhan yaá na ña ná cuni johó mé ná xihín Ndióxi cuití va. <sup>29</sup> Ta quiahva já tá jáyaha na tuhun cáhan Ndióxi xihín ná nuú ñayivi ná cáhan ivi á uní na cuití va. Ta xíní ñúhú cáhan na nani ndúu tútú java ga na veñuhu sándehe ná á mé a ndaa cáhan na cuéntá Ndióxi. <sup>30</sup> Cája i cuéntá nani jáyaha in na tuhun cáhan Ndióxi xihín ná nuú ñayivi ta jácáhan Ndióxi ini inga na ña ná jáyaha na tuhun cáhan Ndióxi xihín na nuú ñayivi já quéa xíní ñúhú cacoo na nu cuití cán. <sup>31</sup> Xihín ña yóho tá in tá in ndó cuu jáyaha ndó tuhun cáhan Ndióxi xihín ndó nuú ñayivi. Já cuu catiahva na xíní johó ña yóho ña ná ndindeé chága ini na xihín

tuhun Ndióxi. <sup>32</sup> Na jáyaha tuhun Ndióxi nuú ñayivi xíní ñúhú cañehe na quiahva xihín ña cája na nani ndáti na jáyaha na tuhun cán. <sup>33</sup> Jáchí cúní Ndióxi ña ná coo vaha ini caja í tóco ndihi ñaha ta ná a jána í nuú cája í ña.

Ta cáji ini mé á tá cája vaha ndó tá quiahva cája java ga na cúu cuéntá Jesús ndúu ndijáá ga ñuu. <sup>34</sup> Nani táca ndo veñuhu co ndítahan nuú najihí cáhan na jáchí co cáni a nu ná cáhan na. Ta co ndítahan nu ná cacomí na cuéntá sahá na veñuhu jáchí quiahva já sáhdá ley Moisés. <sup>35</sup> Ta tá cúní na candaá ini na sahá ña jánaha na veñuhu xíní ñúhú ndaca tuhún na yí ná sahá tá casaá na vehe na. Jáchí co náha vaha tá cáhan in ñañaha nani táca na veñuhu.

<sup>36</sup> Xíní ñúhú ndicuhun ini ndó ña a juú ndohó cúu na nandiquehe tuhun Ndióxi nu cuití. Ta a juú ndohó cuití xíní tuhun Ndióxi, vaha. <sup>37</sup> Ta ndá na cáhan ña nachutú ndaa ínimá ná xihín ínimá yí Ndióxi ña ná jáyaha na tuhun cáhan Ndióxi xihín ná nuú ñayivi, mé na cán ndítahan nu ná ndicuni na ña cáhan i ña sáhdá Ndióxi nuú i cáhan i. <sup>38</sup> Joo tá co cúní na cán cuni johó na ña cáhan i cuéntá Ndióxi já quéa a cúní johó ndó ña cáhan na cán.

<sup>39</sup> Candehé ndo, ñani i, na cúu cuéntá Jesús. Xíní ñúhú ndihi ini ndó nducú ndó ña ná jáyaha ndó tuhun cáhan Ndióxi xihín ndó nuú ñayivi. Ta a cáji nuu ndó nuú na cúu



cuéntá Jesús tá ñéhe táhvi ná nu Ndióxi cahan na tuhun ña coo nasatiahva na. <sup>40</sup>Joo tóco ndihi ña cája ndó xíní ñúhú caja ndó ña xihín toní ñúhú já ná a jána ndó nu cája ndó ña.

## 15

*Ndicani Pablo sahá quivi tá nanditacu Jesús*

<sup>1</sup> Candehé ndó, ñani i, na cúu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánaħa i nu ndo. Mé tuhun vaha yóho sa nandiquehe vaha ndó ña ta cándéé vaha ini ndó a janda viti. <sup>2</sup> Ta jivi saħa mé tuhun vaha najánaħa i nu ndo yóho cuu cacu ndaa ínima ndo tá ná caja ndó ña najánaħa i nu ndo xihín ndinuhu ini ndó. Joo tá ná a cája ndó ña já quéa mé a uun va quéa nacandúsa ndó ña.

<sup>3</sup> Candehé ndó. Ña jihna ñúhú nacaja i quéa najánaħa i ndohó ña nacatiahva mí i cuéntá Jesucristo, mé á naxihí ndica crúxu sahá cuachí tá quiahva cáchí tuhun Ndióxi. <sup>4</sup> Ta najánaħa i ndohó ña najánduxu na mé á joo tá naxinu quivi uní já nanditacu tucu a tá quiahva cáchí tuhun Ndióxi coo. <sup>5</sup> Ta já nanaha mé á nu Pedro xihín nuú java ga táhan da uxu ivi naxica tuun xihín a cán. <sup>6</sup> Ta tá nandihí já nanaha mé á nu yáha ga nuú uhun ciento na cúu cuéntá mé á. Ta in naxini tocó ndihi na mé á. Ta cuaha táhan na naxini ñahá cán tácu yíi va na vatí java na sa naxihí na. <sup>7</sup> Ta tá nandihí

já nanaha mé á nu Jacobo ta anda já nanaha mé á nu tóco ndihi na naxica tuun xihín á.

<sup>8</sup> Ta tá nu ndihí já nanaha ri Jesús mé á nuú i vatí cúu u da nacacu tá sa nayaha mé tiempo tá naxica nuu Jesús ñuyívi yóho. <sup>9</sup> Yehe cúu u in apóstol joo ín chága saħa tóco ndihi java ga na apóstol a juú ga yehe. Ta ni coo sahá i cahan na apóstol xihín i jáchí naxica nuu i nacaja xixi i xihín na cúu cuéntá Ndióxi jihna. <sup>10</sup> Joo mé a ndaa cúu u in apóstol jáchí nacamáni Ndióxi yehe. Ta a juú ña uun cúu ñamaní nacaja Ndióxi xihín i jáchí cuaha ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihín ndéé mí i. Sahá ña táhvi ini Ndióxi sahá i sahá ña cán quéa chindeé a yehe cája i chuun mé á yóho. <sup>11</sup> Joo co cája toho a á yehe á na java apóstol cán cája chúun chága. Ña vaha quéa tóco ndihi nde jánaħa nde sahá Jesucristo ta mé ndó sa nacandúsa ndó ña najánaħa nde nu ndo.

*Vaxi quivi nditacu tóco ndihi ndii*

<sup>12</sup> Tá nacahan nde tuhun Ndióxi xihín ndo najánaħa nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co ndítacu toho na sa naxihí. <sup>13</sup> Joo tá cáchí ndo ña co ndítacu toho na sa naxihí cúu á tátuhun co cándúsa ndó ña nanditacu tucu Jesucristo. <sup>14</sup> Ta tá co cándúsa ndó ña

nanditacu tucu Jesucristo já queá coó saha toho tuhun Ndióxi ña xíca nde jána nde nuú ñayivi. Ta xihín ña yóho mé a uun va cándéé ini ndó mé á. <sup>15</sup> Ta tá mé a ndaa coó nanditacu Jesucristo já queá cúu nde na cáhan ña tuhún saha Ndióxi jáchi cáchi nde xihín ndo ña mé Ndióxi najánditacu a Jesucristo. Joo tá co nditacu toho ndii ta ndehe cáchi nde ña nanditacu Jesucristo já queá cúu nde na tuhún. <sup>16</sup> Jáchi tá co nditacu ndii já queá cúní cachi a ña coó nanditacu toho Jesucristo. <sup>17</sup> Ta tá coó nanditacu Jesucristo já queá coó saha toho ña cándéé ini ndó mé á ta cómí yii va cuachi cuéntá saha ndó. <sup>18</sup> Ta xihín ña yóho cúní cachi a ña a cácu ndaa toho ínima na cúu cuéntá Jesús tá ná quivi na. <sup>19</sup> Tá ndiyahvi ña cúu yó cuéntá Jesús nani tácu yo ñuyíví yóho cuití va já queá ndáhví nahá nacuú.

<sup>20</sup> Joo mé a ndaa nanditacu ndusa Jesucristo. Ta mé á cúu á ña nu cuití nanditacu. Ta vaxi quiví nditacu tóco ndihi yó, na cúu cuéntá mé á. <sup>21</sup> Candehé ndo. Naquihvi cuachi ñuyíví sahá ña nacaja Adán, da nasacuu taa nu cuití ta sahá cuachi yóho nacasahá xíhi ñayivi. Ta jivi sahá ña nacaja Jesucristo tá naxihí a ndica crúxu cuu nditacu tóco ndihi na sa naxihí. <sup>22</sup> Xíhi ñayivi sahá ña naquixi na chichi Adán ta cája na ña núu tá quiahva nacaja Adán sanahá. Ta viti sahá ña cúu

yó cuéntá Jesucristo catacú anda ama cáa quiví sahá ña nacaja mé á. <sup>23</sup> Ta tá ná ndindaa nuú in in na nditacu na já nditacu na caja Ndióxi. Mé Jesucristo queá nanditacu nu cuití. Ta tá ná ndicó coo tucu mé á ñuyíví yóho já caja mé á ña ná nditacu tóco ndihi na cúu cuéntá mé á. <sup>24</sup> Anda já ndihi saha tóco ndihi ñaha ñuyíví yóho jáchi jándihi Jesucristo saha tóco ndihi na cómí cuéntá sahá ñayivi ñuyíví yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá saha ná. <sup>25</sup> Jáchi Jesucristo queá nditahan nu cacomí cuéntá sahá na cúu cuéntá mé á janda quiahva ná xinu coo quiví jándihi Ndióxi saha tóco ndihi na co cúní ñahá. <sup>26</sup> Ta janda nu ndihí jándihi mé á sahá ña ná quivi ñayivi. Ta xihín ña yóho a quiví ga ñayivi. <sup>27</sup> Jáchi mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchi tuhun Ndióxi ña cómí Jesucristo cuéntá saha tóco ndihi ñaha, co cúní cachi a ña cómí a cuéntá saha Ndióxi viti jáchi mé Ndióxi queá nandiquiahva tóco ndihi ñaha ndáha mé á ña ná cacomí a cuéntá sahá. <sup>28</sup> Ta tá sa cómí Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchi cúu á in tuhún jiní já jahyi Ndióxi ta mé Ndióxi queá

nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

<sup>29</sup> Ndúu java ñayivi ta cándúta ná sahá na sa naxihí já ná cacu ndaa ínimá ná. Joo cáchí na co cándúsa toho na ña ndítacu ndii. Ta ndá sahá quéa cája na já tá co cándúsa na nditacu ndii. Joo xíni vaha í ña nditacu ndii.

<sup>30</sup> Ndá chuun quéa chícaan yo mí ndijáá ní quívi nuú tondóhó nuú cuu cahní na mí tá co cándúsa í ña nditacu tucu ndii. <sup>31</sup> Candehé ndo, ñani í, na cúu cuéntá Jesús. Ndijáá ní quívi vaxi tondóhó nuú í. Ta jalóho cúní quívi í. Mé ndó cándaá vaha ini ndó ña cájii ini í sahá in nanduu ndó xihín Jesucristo, xitoho í. Sahá ña cán quéa ndítahan nu ndo cándúsa ndó ña cáhan í xihín ndo. <sup>32</sup> Cuahá tañu naquihvi táhan í xihín ñayivi quini ñuu Efeso. Mé na cán cúu ná tátuhun quití yúcú. Joo coó saha toho ña ndóho ini í yóho tá mé a ndaa co ndítacu toho ndii. Jáchi tá co ndítacu toho ndii já quéa cuu cohó caja í tá quiahva cáchí java ñayivi tá cáchí na já: “Cóho cuxu vaha í ta coho vaha í jáchi yó quívi itaan á iajá cúu yó.”

<sup>33</sup> A quiahva ndó ñamaní jándahvi inga na ndohó. Xíni ñúhú ndicuhun ini ndó in tuhun ña cáchí já: “Tá catáhan í xihín ñayivi, na co cája vaha já quéa játiví na mí.” <sup>34</sup> Xíni ñúhú ndicaxí vaha ini ndó ta a cája ndó cuachi jáchi ndúu

java ndó ta co xíni toho ndó Ndióxi. Cáhan í ña yóho xihín ndo já ná cacahan nuu ndo sahá ña núu cája ndó.

*Ndaja coo tá ná nditacu ndii*

<sup>35</sup> Cája í cuéntá ña ndúu java ndó ta ndícani ini ndó já cáhan ndo já: “Ndaja caja Ndióxi jánditacu a na sa naxihí. Ndá yiquí cuñu ndiquehe na caja Ndióxi.” Já ndaca tuhún java ndó ndícani ini ndó. <sup>36</sup> Joo ña ndícani ini ndó saha jan cúu á ña tóntó ndivaha. Xíni ñúhú candehé ndo ndá quiahva yáha xihín in tata tá chíhin na ña. Mé tata yóho xíni ñúhú quívi a já ná nduta utu loho nu á. <sup>37</sup> Tá xútu ñayivi, co xútu toho na in yucu. Ña xútu na cúu mé tata ta co cája toho a á cúu á trigo á inga nuú tata. <sup>38</sup> Ta mé Ndióxi quéa cája ña ná ñehe táhvi in in a cán ndá quiahva coo a ta ndá javi cañehe in in a. <sup>39</sup> Ta a juú in javi ñehe tóco ndihi ñaha. Sa jíin sa jíin javi in in a. Tátuhun yiquí cuñu in dataa, sa jíin ín yiquí cuñu da xihín yiquí cuñu quítj. Ta yiquí cuñu laa sa jíin ín a xihín yiquí cuñu tiyaca. Sa jíin nacaja Ndióxi xihín in in ña nacavaha mé á. <sup>40</sup> Ta quiahva já nacavaha Ndióxi ña ndúu indiví ta jíin va ndaa a. Ta jíin yiquí cuñu ñayivi ñuyíví yóho. Ta sa jíin quiahva ndató ña ín indiví ta sa jíin quiahva ndató ña ín ñuyíví. <sup>41</sup> Jíin nacaja Ndióxi ña ná yehe candii ta jíin nacaja mé á ña ná yehe yoo. Ta jíin nacaja

mé á ña ná yehe quimi ta ín java quimi sa jíin sa jíin yehe rí nuú inga rí. <sup>42</sup> Quiahva já yaha ri xihín ñayivi tá ná xinu coo quiví jánditacu Ndióxi na. Jáchi yiquí cuñu yó ña jánduxu na tixi ñúhu cúú á ña ndihi saha. Joo tá ná nditacu tucú já a ndíhi ga saha yo anda ama cáa quiví. <sup>43</sup> Mé yiquí cuñu í jánduxu na tixi ñúhu yóho cúú á tátuhun in ña núu ndivaha jáchi ndihi sahá. Joo tá ná xinu coo quiví ndicoo tucu a caja Ndióxi já cacuu a ña ndató ndivaha jáchi a ndíhi sahá. Ña jánduxu na tixi ñúhu cúú á ña vitá ndivaha joo ña nditacu tucu cacuu a ña ndacú vaha. <sup>44</sup> Jáchi tá ná jánduxu na mí tixi ñúhu, ña jánduxu na cúú yiquí cuñu cuéntá ñuyíví yóho. Joo tá ná nditacu tucú já ñehé yó inga yiquí cuñu, ña cúú cuéntá indiví. Jáchi tá ín yiquí cuñu cuéntá ñuyíví, ña ndíhi saha ta já ín ri yiquí cuñu cuéntá indiví, ña a cuú ndihi saha.

<sup>45</sup> Cáchi tuhun Ndióxi ña tá nacavaha Ndióxi Adán, da nasacuu ta nū cuití já nacaja mé á ña ná catacu da. Joo cáhnu chága Jesucristo a juú ga Adán jáchi mé á cája ña ná catacu ñayivi anda ama cáa quiví. <sup>46</sup> Ña jihna ñúhú sahan Ndióxi nu yo cúú yiquí cuñu í, ña ndíhi yachí saha. Ta tá nu ndíhi já sahan mé á inga yiquí cuñu nu yo cuéntá indiví ta ña cán cúú á ña co ndíhi saha. <sup>47</sup> Mé Adán, da nacavaha Ndióxi nu cuití nasacuu da da nacavaha mé á xihín ñundáhyi ta cúú dá da ñuyíví

yóho. Ta Jesucristo, xitoho í, cúú á inga táhan dataa joo cúú á ña naquixi chí indiví. <sup>48</sup> Tá in tá in ñayivi ñéhe na yiquí cuñu tátuhun yiquí cuñu Adán jáchi cúú á ña nacavaha Ndióxi xihín ñundáhyi. Joo ñayivi, na ndiquiahva mé ndáha Jesucristo vaxi quiví ndiquehe na inga yiquí cuñu cuéntá indiví, ña co ndíhi saha. <sup>49</sup> Ta viti ín yiquí cuñu í tátuhun yiquí cuñu Adán joo vaxi quiví ndiquehé inga yiquí cuñu í cuéntá indiví ta cacuu a tátuhun yiquí cuñu Jesucristo.

<sup>50</sup> Candehé ndo, ñani i, na cúú cuéntá Jesús. Cúni caxi tuhun i xihín ndo ña a cúu toho cūhun yiquí cuñu í yóho indiví ña ná cacomí Ndióxi cuéntá sahá jáchi mé yiquí cuñu í yóho co cúú á ña cuu catacu anda ama cáa quiví. Joo ña inga, ña quiahva mé á nu yo cán, a ndíhi toho sahá. <sup>51</sup> Ta viti cúni caxi tuhun i nu ndo sahá in ñaha nasahin jehé nuú ñayivi ta ña yóho quéa: A juú ndíhi toho í quiví jáchi tá ná xinu coo quiví quixi tucu Jesucristo ñuyíví yóho anda jáví ndijama ndíhi tá quiahva ndáa í ta mé Ndióxi quiahva inga yiquí cuñu nu yo. <sup>52</sup> Ta in náa cuití yaha ña yóho jáchi cacuu a tátuhun in ndicuaní nuu yo ta já ndahyi trompeta, mé dó ndahyi nu ndíhi cuí cán já nditacu tóco ndíhi na sa naxihí ta a ndíco coo ga na quiví na. Ta mí, tá tacute yo, ña caja Ndióxi xihín yo quéa ndijama yiquí cuñu í.

## 16

53 Jáchí mé yiquí cuñu í ña ndíhi saha yóho a cuú toho nduu a tátuhun yiquí cuñu ña quiahva Ndióxi nu yo. Sahá ña cán quéa xíní ñúhú ndijama mé á yiquí cuñu í yóho já ná cuu cohó coo í xihín mé á anda ama cáa quívi. 54 Ta tá sa nandijama yiquí cuñu í ta nanduu a ña co ndíhi saha anda ama cáa quívi já quéa xínu coo nuú tuhun ña nacachi na profeta sanahá: “Vaxi quívi ndihi sahá ña xíhi ñayivi jáchi nacandee Jesucristo nasahnu a nuú ña xíhi na. 55 Ta xihín ña yóho cája cáhnu í mé á jáchi a quívi ga ñayivi sahá ña naquee vaha Jesucristo”, cáchi tuhun Ndióxi. 56 Tá cája ñayivi cuachi já quívi tá quívi na sahá ña cája na. Ta cuú á tátuhun tá tíin líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quívi ñayivi sahá cuachi na jáchi ñehe íni cuachi caja ña ná quívi ñayivi. 57 Joo ndixahvi Ndióxi jáchi chindee a mí ña ná cuu quee vaha í sahá ña nacaja Jesucristo, xitoho í saha yo.

58 Sahá ña cán quéa ndítahan nu ndó, ñani máni i, na cúu cuéntá Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándée ini ndó mé á. Ta ndítahan nu ndó ndíhi ini ndó caja chúun ndó cuéntá mé á jáchi sa cánda a vaha ini ndó ña a juú ña uun cúu toho chuun cája ndó jáchi íin Jesucristo, xitoho í xihín ndo.

*Tá ndítaca jjuhún ña jasá na nuú na cúu cuéntá Jesús*

1 Ta viti cúni ndicani i nu ndo ndá quiahva ndítahan caja ndó tá jánditaca ndó jjuhún ña jasá ndo nuú na cúu cuéntá Jesús ndúu ñuu Jerusalén. Xíní ñúhú caja ndó tá quiahva najánaha i nuú na cúu cuéntá Jesús ndúu estado Galacia. 2 Ña ndítahan caja ndó quéa: tá in in domingo xíní ñúhú tavá xóo ndó táhan jjuhún ña sácú ini ndó jasá ndo jatá ña nandiquehe ndó sahá chuun nacaja ndó. A cándati toho ndó janda quiahva ná saa i jan jáchi xíní ñúhú jánditaca cuéé ndó ña. 3 Ta caxi mé ndó ndá na cúni ndó cañehe jjuhún jan ñuu Jerusalén. Ta tá ná xínu coo i jan chindahá i na ña ná cuhun ñehe na jjuhún ñuu cán. Ta chindahá i in carta xihín ná ña ná quiahva na ña xihín jjuhún jan nuú na cúu cuéntá Jesús ndúu mé cán. 4 Ta tá cúni Ndióxi já cuhun ri yehe va xihín na jan anda ñuu Jerusalén.

*Sácú ini Pablo cuhun da coto nihni da na cúu cuéntá Jesús ndúu java ga ñuu*

5 Saa i coto nihni i ndohó cúni. Joo jihna ñúhú yaha i coto nihni i na cúu cuéntá Jesús ndúu estado Macedo-nia. Ta anda javí saa i ñuu Corinto jan. 6 Ta tá cúni Ndióxi candoo nahá chá i xihín ndo. Á tá coo ta coo i ní tiempo vixi xihín ndó jan. Ta tá sa ná quee e cuhun i

inga ñuu já cuu chindeé ndó yehe. <sup>7</sup> Co cúni toho i coto nihni númí i ndohó. Ña cúni quéa candoo too i coo nahá chá i xihín ndo jan tá cúni Ndióxi. <sup>8</sup> Joo candoo too i coo i ñuu Efeso yóho janda quiahva ná yaha vicó Pentecostés. <sup>9</sup> Jáchi mé a ndaa núná nuú i cája chúun i cuéntá Ndióxi yóho jáchi cuahá ndivaha na ndiquehe vaha na tuhun Ndióxi vatí ndúu cuahá na co cúni yehe sahá chuun cája i yóho.

<sup>10</sup> Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná caji iní da coo da xihín ndo. Jáchi cája chúun da cuéntá Jesucristo, xitoho í tá quiahva cája chúun yehe. <sup>11</sup> A cándají ndó da. Ña ndítahan caja ndó quéa chindeé ndó da já ná coo vaha ini da quixi da nuú i. Jáchi yehe xihín java ga na cúu cuéntá Jesús ndáti nde xinu coo da nu ndúu nde yóho.

<sup>12</sup> Ta viti cúni ndicani loho i nu ndó sahá ñani, da naní Apolos. Mí i naxica tahví ndivaha i nu dá ña ná saa da xihín java ga na cúu cuéntá Jesús coto nihni da ndohó. Joo co cúni da caja da ña viti. Cája i cuéntá tá ná nuná nu dá já saa da coto nihni da ndohó.

*Ndındayí Pablo na cúu cuéntá Jesús ndúu ñuu Corinto*

<sup>13</sup> Cuéntá vaha coo ndó. Xíní ñuhú ndacú coo ini ndó jáchi cándeé ini ndó Jesús. A yíhví toho ndó. Canduu ndacú ndó íchi cuéntá Jesús.

<sup>14</sup> Xíní ñuhú caja ndó tóco ndihi ñaha sahá ña quíhvi ini ndó ñani táhan ndó.

<sup>15</sup> Candehé ndo ñani i, na cúu cuéntá Jesús. Sa xíní vaha ndó sahá na vehe Estéfanos, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé na na cúu cuéntá Jesús. <sup>16</sup> Ña cúni caca i nu ndo cúu ña ná cuni johó ndó ña sáhdá na cán nu ndó caja ndó. Ta xíní ñuhú caja ndó tá quiahva cúni ndihi na cán jáchi chindeé na ñayivi ta cája chúun vaha na cuéntá Jesús. <sup>17</sup> Caji ini i jáchi naxinu coo Estéfanos xihín Fortunato xihín Acaico nu in i ta nachindeé na yehe. Ta vatí a cuú quixi mé ndó nuú i <sup>18</sup> joo na yóho sáhan na tuhun ndéé ini i xihín ñaha cuéntá Ndióxi tá quiahva nacaja na xihín mé ndó. Mé a ndaa ndítahan nu yo caja cáhnu i na cája tátuhun na yóho.

<sup>19</sup> Na cúu cuéntá Jesús ndúu estado Asia chindahá na Ndióxi coo ndó. Ta jári Aquila xihín Priscila chindahá na Ndióxi coo ndó. Ta jári na cúu cuéntá Jesús táca cája cáhnu Ndióxi vehe na cán chindahá na Ndióxi coo ndó. <sup>20</sup> Tóco ndihi na cúu cuéntá Jesús ndúu chóho chindahá na Ndióxi coo ndó. Ta xíní ñuhú cahan Ndióxi xihín táhan ndó ta tatí yúhu táhan ndó ta yii caja ndó ña.

<sup>21</sup> Yehe cúu Pablo ta xihín ndáha mí i cáhyí i ña yóho nu ndó ta chindahá i Ndióxi coo ndó.

<sup>22</sup> Ta ndá nā cō quíhvi ini Jesucristo já ná cūhūn cháhan jātā ná. Cama chá ná quixi Jesucristo, xitoho í.

<sup>23</sup> Ñā cúni quéa ná caja cuaḥa Jesucristo, xitoho í ñamanī xihīn ndo. <sup>24</sup> Quíhvi ini í tóco ndihi ndó jáchi tóco ndihí cúú yó cuéntá Jesucristo, xitoho í. Já ná coo.

## Carta chí ivi nacahyí Pablo nuú na cúu cuéntá Jesús ndúu ñuu Corinto

*Cáhan Ndióxi Pablo xihín na cúu cuéntá Jesús ndúu ñuu Corinto*

<sup>1</sup> Yehe cúu Pablo, da nacaxi Ndióxi cacuu apóstol cuéntá Jesucristo jáchi já cúní a caja. Yehe xihín ñani, Timoteo cáhyí nde carta yóho nu ndóhó, na cúu cuéntá Ndióxi ndúu ñuu Corinto ta nu tóco ndihi na cúu cuéntá Ndióxi ndúu estado Acaya. <sup>2</sup> Ña cúní queá ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

*Ndóho ini Pablo*

<sup>3</sup> Cóho caja cáhnu í Ndióxi, mé a cúu tátá xitoho í, Jesucristo. Jáchi Ndióxi cúu á tátá yo, mé á sá tahvi ini saha yo ta cúu á Ndióxi ña chindeé mí tá ndóho ini. <sup>4</sup> Mé a cán sahan tuhun ndeé ini nu tóco ndihi ña ndóho ini já queá ná cuu caja ri mé ví quiahva í tuhun ndeé ini ñayivi tá ndóho ini na. Tá quiahva cája mé á xoho quiahva já ndítahan caja í xihín ñayivi. <sup>5</sup> Jáchi tá quiahva ndóho ndivaha ini saha Jesucristo ta sa mé quiahva já sahan cuahá ndivaha mé á tuhun ndeé ini tá ndóho ini. <sup>6</sup> Tá ndóho ini mé nde já cuu quixi tuhun

ndeé ini mé ndó ta já cuu cacu ndaa ínima ndo. Tá sahan Ndióxi tuhun ndeé ini nde já queá sahan ri mé á tuhun ndeé ini mé ndó viti. Ta xihín ña yóho cuu coo ndacú vaha ini ndó tá ná quixi ña ndoho ini ndó tá quiahva ndóho ini mé nde. <sup>7</sup> Cándéé ini nde ña a jándacoo ndó tuhun Ndióxi jáchi cándaq cáxi ini nde ña tá quiahva ndóho ini quiahva já sahan Ndióxi tuhun ndeé ini.

<sup>8</sup> Candehé ndó, ñani i, na cúu cuéntá Jesús. Cúní nde caxi tuhun nde nu ndo tá quiahva nandoho ini nde estado Asia. Nasacuu a tondóho chicachnu nuú nde ta chí a cándéé ga ini nde nacahán nde, nduu. Ta chí nasahnda ini nde: “Yóho quiví”, nacahán nde. <sup>9</sup> Nacahán nde ña jándá ndáti cuití nde quivi nde joo nachindeé ña yóho ndehe jáchi náha nuú nde ña co ndítahan candeeé ini nde mé nde. Jáchi ña ndítahan candeeé ini nde cúu Ndióxi, mé a jánditacu tucu ndii. <sup>10</sup> Najácacu Ndióxi ndehe tañu tondóho ná a quiví toho nde. Ta mé á queá jácacu a ndehe nuú ndihi tondóho vaxi chága chí nuu. Jáchi cándéé ini nde mé á ña chindeé tá chindeé a ndehe nuú ndihi tondóho. <sup>11</sup> Ta mé ndó chindeé ndó ndehe tá xica tahví ndó nu Ndióxi sahá nde. Jáchi tá ná caca tahví cuahá ñayivi nu Ndióxi sahá nde, sa mé quiahva já ndiquiahva cuahá ñayivi ndixahvi nu Ndióxi sahá



ñamanj cája Ndióxi xihín nde.

*Ndicani Pablo ndá saha quea coo nasahan da ñuu Corinto*

<sup>12</sup> Íin java ñaha cája ña ná coo vaha ini nde ta cúu á ña yóho: cándaá cáxi ini nde ña co cája nde ña núu ta tóco ndihi ña cája nde ñuyíví yóho cája nde ña xihín ndinuhu ini nde. Ta xihín ndinuhu chága ini nde cája nde ña cán tañu mé ndó. Ta ni in ña cája nde co cája nde ña sahá ña ndíchí quixi jini mé nde jáchi mé Ndióxi quea táhvi ini sahá nde ta chindeé a ndehé cája vaha nde. <sup>13</sup> Tá naçahyí nde carta nu ndo jihna coo naçahyí nde tuhun ña a cuú candaa ini ndó jáchi ndacú ndacú cáhan nde xihín ndo nu carta cáhyí nde. Jáchi cúni nde ña ná candaa vaha ini ndó <sup>14</sup> ña co cándaá cuahá ini ndó viti. Ta cúni nde ña ná cajji ini ndó saha mé nde tá quiahva cajji ini nde saha ndo tá ná tandaa quiví quixi tucu Jesucristo ñuyíví yóho.

<sup>15</sup> Sahá ña cándeé ini i ndohó sahá ña cán quea nasacu ini i coto nihni jihna ñuhú i ndohó ña ná cajji ndivaha ini ndó tá ná cuni ndó yehe ivi tañu. <sup>16</sup> Jáchi nasacu ini i coto nihni i ndohó tá ná yaha i cuhun i chí estado Macedonia ta já coto nihni tucu u ndohó tá ná ndicó coo i cán. Anda já cuu chindeé ndó yehe quehé e íchi cuhun i chí estado Judea. <sup>17</sup> Coto a cáhan ndo ña naçahvi ivi joho ini i tá nasacu ini i caja i ña yóho.

Ta ni a cáhan ndo ña sácú ivi joho ini i xihín ña cája i tá quiahva cája ñayivi ñuyíví jáchi ndá chuun quea cáchi i jivi a tá a juú a. <sup>18</sup> Sándehé cáxi Ndióxi ña co jándahvi nde ndohó jáchi co cáchi nde xihín ndo “ajan” tá cúni cachi nde “uhun.” <sup>19</sup> Jáchi co cája Jesucristo já. Co cáchi a “ajan” tá cúni a cachi a “uhun.” Ndinuhu ña ndaa quea cáhan Jesucristo jáchi mé á cúu á in túhún jini já jahyi Ndióxi, mé a cáhan Timoteo xihín Silvano xihín yehe sahá nu ndo. <sup>20</sup> Jáchi xihín Jesucristo jáxinu coo Ndióxi tóco ndihi tuhun nasahan mé á nu yo. Sahá ña cán quea tá cája cáhnu í Ndióxi cuu cachi yó “Já ná coo.” Ta tá cáchi yo “Já ná coo” cúu á sahá ña naçaja Jesucristo. <sup>21</sup> Ta mé Ndióxi nandaja ndacú a ndehé ta nandaja ndacú a ndohó. Ta naçaxi a mí cacuú ñayivi cuéntá mé á. <sup>22</sup> Jáchi mé á cúu á xitoho mí ta cómi a cuéntá saha yo. Ta nasacu a ínima yji mé á ini ínima yo já ná candaa vaha ini ndá quiahva íin ñamanj caja Ndióxi xihín yo chí nuu.

<sup>23</sup> Sándehé cáxi Ndióxi ña mé a ndaa táhyí cáhan i xihín ndo. A ñaha saa i ñuu Corinto jan tá quiahva nasacu ini i caja i jáchi co cúni jácacuéha i ini ndó. <sup>24</sup> Co cúu á sahá ña cúni nde caja ndusa nde sahá ña ndítahan candusa ndó. Jáchi sa xini nde ña sa nduu ndacú ndó cándeé ini ndó Jesucristo. Ña cúni nde quea chindeé táhan nde xihín

ndo já ná cajji ini ndó.

## 2

<sup>1</sup> Sahá ña cán quéa nasacu ini i ña ná a cùhun tucu u coto nihni i ndohó já ná a cacuéha ini ndó. <sup>2</sup> Jáchì tá ná jácacuéha yehe ini ndó a cúu caja ndó jácajji ndó ini i jáchì mé ndó cúu na jácajji ini i. Joo ndaja caja ndó jácajji ndó ini i tá sa najácacuéha i ini ndó. A cúu caja ndó ña. <sup>3</sup> Sahá ña cán quéa naçahyí i in carta ña nachindahá i nu ndo cán jáchì co cùni xinu i jan ta jácacuéha ndó ini i sahá ña cája ndó. Jáchì ndítahan jácajji ndó ini i nani íin i xihin ndo. Jáchì xini vaha i ña tá cájji ini i já cájji ini ri ndohó va. <sup>4</sup> Joo nani naçahyí i mé carta cán já naçasáhá táhvi ini i ta ndícani ini i janda quiahva naçasáhá sácu u. Coó naçahyí i ña sahá ña cùni ña ná catati ini ndó xihin á joo cùni ña ná candaa ini ndó ndá quiahva quíhvi ndivaha ini i ndohó.

*Ndítahan caja cáhnu ini na ndúu ñuu Corinto sahá in da naçaja cuachi*

<sup>5</sup> Ta mé da naçaja cuéha ini i cán coó naçaja cuéha da ini in túhún yehe tá naçaja da cuachi. Joo cúu á tátuhun naçaja cuéha ri da ini ndihi ndó. Cáhan i ña yóho xihin ndo ña ná a jánani ndivaha ndó da. <sup>6</sup> Jáchì cuaha ndó sa najánani ndó da cán. Vati já va caja xíxi ndó xihin dá. Ndáhvi da. <sup>7</sup> Ña ndítahan caja ndó quéa caja cáhnu ini ndó saha dá viti ta quiahva

ndo túhun ndeé ini da jáchì a juú tiahva náa cacuéha ini da xihin ña cája ndó xihin dá. <sup>8</sup> Sahá ña cán quéa xíca tahví tucu u nu ndo ña ná jánaha ndó nu dá ña mé a ndaa quíhvi ini ndó da. <sup>9</sup> Sa naçahyí vi in carta nu ndo nu ndícani i sahá ña yóho. Naçahyí i ña sahá ña nasacu ini i coto ndojó i ndohó á mé a ndaa táhvi cája ndó tá íin naçachi i xihin ndo. <sup>10</sup> Ña cán quéa ndá na ná caja cáhnu ini ndó saha já caja cáhnu ri ini yehe va saha ná. Ta tá íin in ñaha ndítahan caja cáhnu ini i saha já quéa cája i ña saha mé ndó. Ta sándehe cáxi Jesucristo ña cája i. <sup>11</sup> Jáchì tá ná a cája i ña já quéa cándéé tiñáhá saçuaha xihin yo jáchì sa xini vaha i ña cùni rí jándahvi rí ñayivi.

*Ndícani ini Pablo nani íin da ñuu Troas*

<sup>12</sup> Tá naxinu coo i ñuu Troas ña caxi túhun i túhun vaha saha Jesucristo já nanuná nuú i caja chúun vaha i cuéntá mé á cúu xitoho í. <sup>13</sup> Joo coó naçahin vaha ini i jáchì coó nañehé e ñaní Tito. Sahá ña cán quéa nandindayí i ñaní, na ndúu ñuu Troas já naquee e cuahan i chí estado Macedonia ndinducú u da.

*Sáhan Jesucristo ndéé á nu yó quee vaha í*

<sup>14</sup> Ndiquiahva i ndixahvi nu Ndioxí jáchì sahá ña naçaja Jesucristo quée vaha í níi tiempo. Tá quiahva ndícuíta nuu in jíco támi sahan quiahva já ndícuíta

nuu tuhun Ndióxi cája nde já queá ná cuu candaa ini ñayivi tuhun vaha saha Jesucristo. <sup>15</sup> Jáchi mí cúú yó tátuhun jusa vaha ña támi sahan ña jóco Jesucristo nu Ndióxi. Ta ndícuíta nuu a tañu na jácacu Ndióxi sahá ña cándéé ini na mé á. Ta jári ndícuíta nuu a tañu na cuhun indayá sahá ña coó nacandúsa na mé á. <sup>16</sup> Mí cúú yó tátuhun jusa támi sahan nuú na sa cándaa ini tuhun Ndióxi jáchi xini na ñéhe yó tuhun ña cuu jácacu ínimá ná. Ta nuú na co xini tuhun Ndióxi cúú yó tátuhun in ña quini ndivaha sahan jáchi cuhun na indayá. Ndá na cúú caja jáxinu ini ñayivi, da já. <sup>17</sup> Jáchi xini Ndióxi ña mé nde co xica nuu nde cáhan nde tuhun Ndióxi sahá jiuhún ta co jáma nde ña tá quiahva cája cuahá ñayivi. Ña cája nde queá cáhan nde xihín ñayivi xihín ndinuhu ini nde ña sahan Ndióxi nuú nde cahan nde. Jáchi mé nde cúú nde na nachindahá Ndióxi ta cája chúun nde saha Jesucristo.

### 3

*Cáxi tuhun Pablo sahá tuhun saá ña sahan Ndióxi nuú ñayivi*

<sup>1</sup> Co cáhan nde ña yóho xihín ndo sahá ña cuni nde caja cáhnu nde mé nde. Jáchi co xini ñuhú nde caça nde in tutu ña cáchi cúú nde ñayivi ndísáhnu ini nu ndo tá quiahva cája java na. <sup>2</sup> Mé va ndó cuu quiahva ndó tuhun vaha sahá nde jáchi tá ná cuni ñayivi tá quiahva nandijama

Ndióxi ínimá ndo xihín tuhun nacahan nde xihín ndo já candaa ini na ña nacaja vaha nde tá nacaja chúun nde tañu mé ndó. <sup>3</sup> Jáchi náha cáxi táhyí a ña cúú ndó tátuhun in carta nacahyí Jesucristo ta mé nde jánaña nde ña nuú ñayivi. Co cúú á in carta nacahyí nuú tutu. Cúú á ña nacahyí ínimá yii Ndióxi, mé a tácu indiví. Ta cúú á in carta ña coó nacahyí nuú yuu jáchi cúú á tátuhun nacahyí a ini ínimá ñayivi.

<sup>4</sup> Ta cáhan nde ña yóho jáchi cándéé cáhnu ini nde Ndióxi sahá ña nacaja Jesucristo. <sup>5</sup> Co cúú á sahá ña quíxi jini mé nde cája nde ña. Jáchi Ndióxi queá sahan ndeé á nuú nde caja nde chuun yóho. <sup>6</sup> Ta mé á queá chindeé ndehe caja chúun nde cuéntá mé á xihín cuéntá tuhun saá nasahan nu yo. Co cája chúun nde saha ley nacahyí nuú tutu joo cája chúun nde saha ínimá yii Ndióxi. Mé ley cája ña ná quivi ñayivi joo cája ínimá yii Ndióxi ña ná catacu ñayivi anda ama cá quivi.

<sup>7</sup> Tá nacahyí ley Moisés nuú yuu, já nandiyehé ndivaha nuú Moisés janda quiahva coó nacuu ga candehé na Israel nuú dá. Joo nuú nandiyehé nahá cán nacasahá ndáhva ña janda quiahva nandahva ña. Candehé ndó. Vati nandiyehé ndivaha nuú naquixi mé ley, ña cuu chindahá ñayivi cuhun na indayá <sup>8</sup> joo ndaja ga ví ndiyehé chága nuú quixi tuhun vaha cáhan saha Jesús

nuú ñayivi jáchi sáhan ínima yii Ndióxi tühun yóho nu yo. <sup>9</sup> Candehé ndo. Vatí ndató nasahjin tá naquixi mé ley ña cuu chindahá ñayivi indayá joo ndaja ga ví ndató coo tá cáxi tühun í xihín ñayivi ña coo ga cuachi na nu Ndióxi. <sup>10</sup> Jáchi coo sahá ga ña ndató mé ley naquixi jihna cán tá ná jácátahan í ña xihín ña ndató chága nasahan Ndióxi nu yo viti. <sup>11</sup> Ta tá ndató nasahjin nuú naquixi ña nandihí saha cán ndaja ga ví ndató chága coo ña sáhan Ndióxi nu yo yóho jáchi a ndíhi toho sahá.

<sup>12</sup> Ta sahá ña ndáti tiahva nde coo ña yóho sahá ña cán quéa co yíhvi nde cáhan nde ña xihín ñayivi. <sup>13</sup> Co cája nde tá quiahva nacaja Moisés tá nachijahvi da nuu dá xihín in jáhma ña ná a cúní na Israel ña sa cuahan ndáhva ña nandiyehé nuu dá cán. <sup>14</sup> Joo mé na Israel cán coo nacandaa ini na ndá cuéntá quéa nachijahvi Moisés nuu dá. Ta janda viti ndájí yii xíní túní ná jáchi vatí cáhvi na tühun Ndióxi ña nacahyi sanahá joo co cándaa ini na ña jáchi najahvi xíní túní na ta a cúu nuná. Jesucristo cuití va cuu jándinuna xíní túní ná tá cándéé ini na mé á. <sup>15</sup> Mé na Israel ndájí yii xíní túní ná janda viti jáchi tá cáhvi na ña nacahyi Moisés co cándaa ini na ña. Cúu ná tátuhun in na jáhvi jáhma nuu. <sup>16</sup> Joo tá ná ndicó coo ini ñayivi nu Ndióxi já ndinuna xíní túní ná. Cúu á tátuhun ndicava jáhma nasandaji nuu

ná. <sup>17</sup> Jáchi ínima yii Ndióxi cúu á xitoho í. Ta nu in mé á, cán nuná xíní túní ñayivi. <sup>18</sup> Ta viti cúu yo tátuhun in yutátá nuú cuu cuni ñayivi tá quiahva cáhnu cúu Ndióxi. Jáchi co ndájí ga xíní túní yo viti sahá ña nacasahá ndijama Ndióxi mí viti ná nduú tá quiahva cáa Jesucristo. Ta tá quiahva cáhnu cúu mé á quiahva já loho loho nduu cáhnu yó tá quiahva cáa mé á. Já cája xitoho í, mé a cúu ínima yii Ndióxi.

#### 4

<sup>1</sup> Sahá ña cán quéa in ndacú ini nde cáhan nde tühun Ndióxi xihín ñayivi jáchi sahá ña natahvi ini Ndióxi sahá nde sahá ña cán quéa nasahan mé á chuun yóho nuu nde. <sup>2</sup> Mé nde nasacu xóo nde tóco ndihí ña núu cája jehé ñayivi. Ta co sácú ini nde jándahvi nde ñayivi tá cáhan nde tühun Ndióxi xihín ná. Ña cája nde quéa cáhan nde ndinuhu ña ndaa ta xihín ña yóho sándehe cáxi Ndióxi tá quiahva náha nde nuú ñayivi ña cája nde ña vaha. <sup>3</sup> Tá co cándaa ini ñayivi tühun vaha sahá Jesús ña cáhan nde xihín ná, cúu á sahá ña xíca na íchi cuahan indayá. <sup>4</sup> Jáchi sahá ña co cándúsa na ña cáhan nde xihín ná sahá ña cán quéa nandaji xíní túní ná nacaja tiñáhá, mé rí cúu xitoho ñuyívi yóho ña ná a cúní na ndá quiahva ndató ndiyehé tühun vaha cáhan saha Jesucristo, mé a cáhnu ndivaha, mé a cúu á

yuhú nuu Ndióxi. <sup>5</sup> Mé nde co xíca nuu nde cáhan nde saha mé va nde. Ña cája nde quéa xíca nuu nde cáhan nde saha Jesucristo, mé á cúu xitoho í. Ta cáhan nde xihín ndo ña cája chúun nde nu ndo sahá ña cúni nde Jesús. <sup>6</sup> Jáchi nasahnda Ndióxi chuun ña ná queta ña yéhe tañu ña naá cán. Ta mé a cán quéa nacija ña ná ndiyehé ínimá yo xihín tuhun Ndióxi já quéa ná cuu candehé yo ndá quiahva yéhe nuu Jesucristo, ña náha ndá quiahva cáhnu cúu Ndióxi.

*Ndá quiahva cuu canduí tá cándéé iní Jesucristo*

<sup>7</sup> Joo tóco ndihi ña ndáyahvi ña nasahan Ndióxi nu yo yóho cúu á ña ndácaan yiquí cuñu í vatí yiquí cuñu í cúu á tátuhun in quiji ndahyi. Nasahan Ndióxi ña ndáyahvi nu yo já quéa ná cuu cuni ñayivi ña íin ndée Ndióxi cája tóco ndihi ñaha ta co cúu á ndée mí. <sup>8</sup> Ta vatí vaxi cuahá tondóhó nu yo joo jáyaha tá jáyaha Ndióxi mí. Ta vatí ndicani ndivaha iní joo co jándihi nahá yo mí. <sup>9</sup> Ta vatí ndícuíta ñee na mí joo co jándacoo ndáha toho Ndióxi mí. Ta vatí jándicava na mí joo co jándihi na sahá yo chí uun. <sup>10</sup> Ta ndá nacuu nu xíca nuu í a íhvi toho cahní na mí tá quiahva nacija na xihín Jesús. Ta xihín ña ndóho yiquí cuñu í náha ña tácu yií va Jesucristo ta íin a xoho. <sup>11</sup> Jáchi ndijáá ní quivi ndúcú na cahní na mí sahá Jesucristo. Joo xihín

ña yóho núná nu yo jánaha í nuú ñayivi ña ndácaan ndée mé á ini yiquí cuñu í nani ndúu ñuyivi yóho. <sup>12</sup> Ta sahá ña xíca nuu nde cáhan nde tuhun Ndióxi xihín ndo sahá ña cán quéa ndúcú na cahní na ndehé. Joo sahá ña ndóho ini nde yóho cuu cacu ndaa ínimá ndóhó anda ama cáa quivi.

<sup>13</sup> Jáchi já cáhí tuhun Ndióxi: “Sahá ña nacandéé ini i Ndióxi sahá ña cán quéa nacaan i cuéntá mé á.” Ta quiahva já cája ri ndehé va sahá ña cándéé ini nde Ndióxi. Ña cán quéa co yíhvi nde cahan nde saha mé á nuú ñayivi. <sup>14</sup> Jáchi cándaqa cáxí ini nde ña tá quiahva najánditacu Ndióxi Jesucristo, xitoho í quiahva já jánditacu a mí coo í xihín mé á. Ta já ndóhó xihín ndehé xinu coo í nu íin mé á. <sup>15</sup> Nasacu ini Ndióxi ndoho ini nde tóco ndihi ña yóho saha mé ndó. Ña cán quéa tá ná caha Ndióxi cuahá ñamaní xihín cuaha chága ñayivi já nduu cuahá na ndiquiahva ndixahvi nu á ña ná ndicáhnu mé á.

<sup>16</sup> Sahá ña cán quéa co cátaí iní xihín ña ndóho í vatí sa cáyatá yiquí cuñu í. Joo ndíyuta iní in in quivi yáha. <sup>17</sup> Cama chá yáha tóco ndihi ña válí ndóho iní ñuyivi yóho joo tá nandihí nandoho iní já vaxi cuahá ndivaha ña náhnu chága cuéntá mé á nu yo ta anda ama cáa quivi a ndíhi sahá. <sup>18</sup> Ta co ndítahan nu yo quehé cuéntá sahá ña sándehé yó viti. Ña ndítahan

caja í quéa cahvi iní sahá ña a cūú cuní xihín nuu yō. Jáchí vaxi quiví ndihi saha tóco ndihi ña sándehe yō viti joo ña a cūú cuní coo a anda ama caa quiví.

## 5

<sup>1</sup> Jáchí sa cándaā iní ña cūú yiquí cuñu í tátuhun vehe nu ndácaan ínima yō. Mé vehe nu ndácaan ínima yō yóho cūú á ña vaxi quiví ndihi sahá. Ta anda jáví nasacu iní Ndióxi quiahva nu yō inga yiquí cuñu nuú coo ínima yó indiví. Ta mé nuú coo ínima yó cán a ndíhi sahá anda ama caa quiví jáchí nacavaḥa Ndióxi ña. <sup>2</sup> Nani ndácaan ínima yó yiquí cuñu í yóho já ndóho iní ta tána í jáchí xíca quí iní ndiquehé inga tucu yiquí cuñu saá cuéntá indiví. <sup>3</sup> Jáchí jácandixi Ndióxi mí xihín yiquí cuñu saá cuéntá indiví já ná a cácuú tátuhun na coó jáhma. <sup>4</sup> Jáchí nani ndácaan ínima yō iní yiquí cuñu í yóho tána í ta táhnda iní vatí co cūú á sahá ña cūni yō jándacoo í yiquí cuñu í. Cūú á sahá ña ndiáva cáhnu iní coo ínima yō iní in yiquí cuñu saá. Anda jáví jándacoo í yiquí cuñu í ña ndíhi saha ta ndiquehé yiquí cuñu saá ña cuu cañehé anda ama caa quiví. <sup>5</sup> Jáchí mé Ndióxi quéa nasacu tiahva mí ndiquehé in yiquí cuñu saá jáchí mé á quéa nasahan ínima yíi á nu yō já ná candaa vaḥa iní ndá quiahva in ña sácú iní Ndióxi quiahva nu yō chí nuu.

<sup>6</sup> Sahá ña cán quéa in ndeé iní jáchí cándaā iní ña nani ndácaan ínima yó yiquí cuñu í yóho ndúu xíca yō nu Jesucristo, xitoho í. <sup>7</sup> Ta vatí co xíní yō mé á joo xíca í íchi cuéntá mé á sahá ña cándee iní mé á. <sup>8</sup> Ta co yíhví ga yó quiví viti jáchí cūni chága í jándacoo í yiquí cuñu í yóho já ná cuu cohó coo í xihín Jesucristo, xitoho í indiví. <sup>9</sup> Sahá ña cán quéa níi tiempo ndúcú yó caja í ña táhán ini mé á xihín. Vatí tácu yō á naxihí yō cūni tá cūni yó cája í ña táhán ini mé á xihín. <sup>10</sup> Jáchí vaxi quiví tá ná ndique táhan ndihí candita í nuú Jesucristo ndiquiahva tá in tá in í cuéntá nu mé á sahá ña nacaja í xihín yiquí cuñu í ñuyiví yóho, á cūú á ña vaḥa á cūú á ña núu.

*Nandique táhan máni yó xihín Ndióxi sahá ña nacaja Jesucristo*

<sup>11</sup> Cája cáhnu í Jesucristo xihín ndinuhu iní ta cándaā iní ña vaxi quiví cohó candita í nu mé á. Sahá ña cán quéa ndíhi ini nde jácahan nde ñayivi ña ná ndicó coo ini na. Ta xíní vaḥa Ndióxi ña cája nde ta cūni nde ña ná candaa ini ri mé va ndó ña. <sup>12</sup> Ña cáhan nde yóho co cūú á sahá ña cūni tucu nde ndiñehe jícó nde mé nde. Ña cūni nde quéa ná coo vaḥa ini ndó xihín ña cája nde já ná cuu nducú ñehe ndó tuhun nuú na xíca ndiñehe jícó mé, na xíca cáhan lándá ta coó ña vaḥa quíxi ínima ná. <sup>13</sup> Vatí cūú nde na tachí nuú ñayivi joo cūú

á sahá ña cája nde chuun Ndióxi. Ta tá co cúu nde na tachí já quea cúu á sahá ña vaha mé ndó. <sup>14</sup> Ta sahá ña quíhvi ini Jesucristo ndehe sahá ña cán quea ndusa cája nde ña cúní mé á. Jáchi cánda cáxí ini nde ña naxihí Jesucristo saha tóco ndihi ñayivi ta in nanduú xihín Jesucristo tá naxihí a. <sup>15</sup> Naxihí Jesucristo saha tóco ndihí ña ná a cátaquí ga í saha mé cuití yo. Joo cúní a ña ná catacú saha mé a naxihí saha yo ta tá nandihí nanditacu tucu a. <sup>16</sup> Sahá ña cán quea co sándehe ndaa ga nde ñayivi tá quiahva cája ñayivi ñuyíví. Vatí naçahan núu nde saha Jesucristo sanahá joo co cája ga nde já viti. <sup>17</sup> Jáchi tá in nanduú xihín Jesucristo já nanduú tátuhun ñayivi saá. Ña cán quea nandihí sahá ña yatá ta nanduú ñayivi saá naçaja Ndióxi.

<sup>18</sup> Ta tóco ndihi ña yóho cúu á ña cája Ndióxi jáchi najándique táhan mání á mí xihín mé á sahá ña naçaja Jesucristo. Ta najándacoo a chuun yóho nuú nde ña ná jándique táhan mání nde tóco ndihi ñayivi xihín mé á. <sup>19</sup> Ta nasahan ñamaní nuú ñayivi ndique táhan mání ná xihín á sahá ña naçaja Jesucristo. Ta coo naquehe Ndióxi cuénta sahá cuachi naçaja na. Ta ña yóho cúu chuun naçahnda nuú nde naçaja Ndióxi ña ná çaxi tuhun nde nuú ñayivi ña cúní mé á ndique táhan mání á xihín ná. <sup>20</sup> Mé nde

cúu nde na nachindahá Jesucristo ta xíca nde cáhan nde saha mé á. Ta viti cúu á tátuhun xíca tahví Ndióxi nu ndo tá cáhan mé nde. Ta viti xíca tahví nde nu ndo saha Jesucristo ña ná ndique táhan mání ndo xihín mé á. <sup>21</sup> Mé Jesucristo coo naçaja ni in cuachi joo sahá mí naçaja Ndióxi ña ná ndoho Jesucristo tátuhun in da naçaja cuachi. Ta sahá ña naçaja mé á co quehe ga Ndióxi cuénta sahá cuachi naçaja í ta nanduú ñayivi ndaa nu mé á tátuhun cúní mé á.

## 6

<sup>1</sup> Ta sahá ña in cúu ndo xihín nde cája chúun yó cuénta Ndióxi sahá ña cán quea xíca tahví nde nu ndo ña ná a quehe núu ndo ñamaní cája Ndióxi xihín ndo. <sup>2</sup> Jáchi já cáchi tuhun Ndióxi já:

Tá naçandaa tiempo caja í ñamaní xuhun já naxini johó í nuú naçahun.

Ta tá naxinu quivi jáçacu u yohó já nachindeé e yohó, cáchi tuhun Ndióxi.

Candehé vaha ndó. Viti ñuhú cúní Ndióxi caja cuahá ñamaní xihín ndo. Ta viti ñuhú cúní a jáçacu a ndohó.

<sup>3</sup> Ta ni in túhún ña núu co cája nde já ná a cáhan núu ñayivi sahá chuun cája nde. <sup>4</sup> Ña cája nde quea jánaña nde nuú ñayivi ní tiempo ña cúu nde na cája chúun cuénta Ndióxi. Jáchi sahan ndeé ini nde tá ndóho ini

nde. Ta tá ndímaní ñaha nuú nde ta tá vaxi tondóhó nuú nde co ndíhi ini nde. <sup>5</sup> Jáchi ñacani na ndehe ta ñataán ná ndehe vecaa ta ndívaa na xoo nde. Ta a juú quiahva najácaja chúun na ndehe ta java tañu co quíji nde ta java tañu vaxi joco nuú nde. <sup>6</sup> Joo jánaha nde nuú ñayivi ña cúu nde ñayivi cuéntá Ndióxi jáchi ndúu víi nde ta cándaq ini nde ña ndaa ta íin cáhnu ini nde xihín ñayivi ta cúu nde na vaha ini. Ta sahá ña ndácaan ínimá yíi Ndióxi ini nde ta sahá ña quíhvi ini ndusa nde ndohó <sup>7</sup> ta sahá ña cáhan nde ña ndaa xihín ndée nasahan mé á nuú nde sahá ña cán jánaha nde nuú ñayivi ña cája chúun nde cuéntá mé á. Ta sahá ña cúu nde ñayivi ndaa nu Ndióxi sahá ña cán quéa quíhvi nuu nde cáni táhan nde xihín rí quini tá cúní rí caja xíxi rí xihín nde. <sup>8</sup> Java tañu cája cáhnu ñayivi ndehe ta java tañu cáhan ihvi na xihín nde. Java tañu cáhan vaha na sahá nde ta java tañu cáhan núu na sahá nde. Ta java tañu tá quiahva cája na xihín na tuhún quiahva já cája na xihín nde vatí cáhan nde ña ndaa. <sup>9</sup> Ta java tañu cája na tátuhun co xíni na ndehe vatí xíni vaha na ndehe. Ta mé a ndaa cúu nde tátuhun na sa xíhi vatí tácu yíi va nde. Cája xíxi na xihín nde joo co sáhní na ndehe. <sup>10</sup> Ta java tañu ndúu cuéha ini nde joo ní tiempo cájii ini nde. Ta java tañu cándahví ndivaha nde joo já cuahá ndivaha na

cúu ná tátuhun na cuicá viti jáchi ñacaxi tuhun nde tuhun Ndióxi nu ná. Ta ndáa nde tátuhun na coó ñaha nuu joo íin ndihi ñaha cuéntá Ndióxi nuú nde.

<sup>11</sup> Ñani mí i, na ndúu ñuu Corinto jan. Tá cáhan nde xihín ndo co chíjehé tuhun nde nu ndo jáchi quíhvi ini nde ndohó xihín ndinuhu ini nde. <sup>12</sup> Vatí co quíhvi ini ndó ndehe tá quiahva quíhvi ini nde ndohó joo co jándacoo nde ña quíhvi ini nde ndohó. <sup>13</sup> Sahá ña cán quéa xíca tahví i nu ndo tá quiahva cája in dataa tá xíca tahví da nuú jahyi da. Ña cúní quéa ña ná quíhvi vaha ini ndó yehe tá quiahva quíhvi ndivaha ini i ndohó.

*Co ndítahan quíhvi nuu na cúu cuéntá Jesús xihín ñayivi cuéntá ñuyívi*

<sup>14</sup> Cuéntá coo ndó ná a ndíque táhan ndó xihín na co cúu cuéntá Jesús jáchi coó in cúu na xihín ndo. Jáchi ndaja cuu ndique táhan ña vaha xihín ña núu. Ta ndaja cuu ndique táhan ña yehe xihín ña naá. Ni in ña yóho a cúu coo já. <sup>15</sup> Ta ama cuéhé Jesucristo coo a xihín Satanás, mé rí quini. Ta quiahva já ama ná cuu ndique táhan in na ndíco íchi cuéntá Jesús xihín in na co cúu cuéntá mé á. <sup>16</sup> Ta ama ná cuu cachi ndó ña in cuu nu cája cáhnu na Ndióxi xihín nu cája cáhnu na yoco. Jáchi mí cúu yó tátuhun veñuhu Ndióxi, mé á tácu indiví. Ta já ñacachi a já:



Ndacaan i ínimã na cúu  
cuéntá mé i ta caca nuu  
i xihín ná.

Yehe cacuu u Ndióxi ña caja  
cáhnna,  
ta mé ná cacuu na ñayivi, na  
cacomí i cuéntá saha,  
cáchi Ndióxi.

<sup>17</sup> Sahá ña cán queá já nacachi  
Ndióxi, xitoho í já xihín ná:

Tavá ndo mé ndó tañu ñayivi  
quini jan.

Caxoo ndó nu ná ta a cája  
ndó ña núu ña cája na já  
ná cuu ndiquehe vaha  
i ndohó.

<sup>18</sup> Ta já yehe cacuu u tátá ndo,  
ta mé ndó cacuu jahyi ta i  
xihín jahyi jíhí i, cáchi  
Ndióxi, mé a cúu cája  
tóco ndihi ñaha.

## 7

<sup>1</sup> Candehé ndó ñani máni,  
na cúu cuéntá Jesús. Ña yóho  
cúu tuhun nasahan Ndióxi nu  
yo. Sahá ña cán queá co  
ndítahan nu yo caja í in ña núu  
ña cuu jácaquini yiquí cuñu í  
á ínimã yo. Ña ndítahan caja  
í queá cayihví yo Ndióxi ta  
cacu iní ndaja víi yo mí já  
ndiquiahva í mí ndáha mé á.

*Cájii ini Pablo jáchi nandico  
coo ini na ndúu ñuu Corinto*

<sup>2</sup> Xíca tahví nde nu ndo  
ña ná a cáji nuu ga ndó nu  
ínimã ndo ta ná quihvi ini  
ndó ndehe. Jáchi ni in ndó  
coo nacaja xíxi nde xihín ta  
ni in ndó coo najátiví nde ta  
ni in ndó coo najándahvi nde.

<sup>3</sup> Co cáhan i ña yóho xihín ndo  
sahá ña cúní candehé ndaa  
i ndohó, vaha. Jáchi janda  
jihna va nacachi i xihín ndo

ña ñúhu ndó ínimã i. Ta vaha  
ri catacu u ta vaha ri quivi i  
joo quihvi ini tá quihvi ini i  
ndohó. <sup>4</sup> Mé a ndaa cándeé  
cáhnna ndivaha ini i ndohó ta  
cájii ini i xihín ña cája ndó. Ta  
tá ndícuhun ini i saha ndo já  
ndíndacú ini i ta ndícutú ndaa  
ini i xihín ña cáji ini i vatí  
ndóho ini i.

<sup>5</sup> Janda naní naxinu nde  
estado Macedonia chí a cúu  
canduu vaha nde jáchi ndáchi  
nacuu ndáca náha tondóho  
núu nde. Jáchi ndijáa quixi  
ñaha jáquihvi ndehe janda  
quiahva yíhví nde ndúu nde  
yóho. <sup>6</sup> Joo sahan Ndióxi  
tuhun ndeé ini ñayivi ndúu  
cuéha ini. Ña cán queá  
nasahan tuhun ndeé ini nde

jáchi naxinu Tito nu ndúu  
nde yóho. <sup>7</sup> Ta a juu sahá  
ña naxinu da yóho cuití va,  
vaha. Nandihvi tuhun ndeé  
ini nde jáchi nacajii ndivaha  
ini mé dá nacaja ndóho. Ta  
nandicani da nuu nde ña  
xíca ndivaha ini ndó cuni  
ndó ndehe ta anda quiahva  
táhnnda ini ndó sahá nde.  
Ta nacachi da xihín i ndá  
quiahva ndícani ini ndó sahá i  
ta xihín ña yóho nacajii chága  
ví ini i.

<sup>8</sup> Vatí nacacuéha ini ndó  
xihín carta nacahyí i nu ndo  
joo viti co táhnnda toho ini i  
ña nachindahá i ña nu ndo.  
Vatí natahnnda ini i tá naxini i  
ña nacacuéha ini ndó tixi chá  
tiempo <sup>9</sup> joo cáji ini i viti. Co  
cúu á sahá ña nacaja cuéha  
carta cán ndohó. Cájii ini  
i jáchi tóco ndihi ña nacaja  
cuéha ini ndó cán nanducú

ñehe a ndohó nu Ndióxi. Mé ndó ñacaja ndeé ini ndó tá quiahva cúní Ndióxi. Sahá ña cán quéa cándaá ini nde ña coó ñacaja núu nde xihín ndo. <sup>10</sup> Jáchi tá cácuéha ini tá cája ndeé ini tá quiahva cúní Ndióxi caja í já quéa chindeé a mí ndicó coo ini. Ta xihín ña yóho jácacu a mí ta coó ñaha ndítahan tahnda ini saha. Joo tá cácuéha ini ñayivi ñuyiví co ndicó coo ini na sahá ña cán quéa ndihi saha ná indayá. <sup>11</sup> Cándehé ndó ndaja ñacaja ndeé ini ndó tá ñacacuéha ini ndó tá quiahva cúní Ndióxi. Joo tá coó ña yóho ná yaha ta a jándacoo toho ndó cuachi ñasacaja ndó, nduu. Joo viti a juú quiahva ñaxojo ini ndó saha mé cuachi ta nayihví ndo sahá. Ta tá ñandihí já ñaxica ini ndó cuni ndó yehe ña ná chindeé e ndohó. Ta anda já ñasahjin tiaha ndó jándoho ndó ini da ñacaja cuachi cán. Ta xihín ña yóho náha ña co táhan ini ndó xihín cuachi ñacaja da cán. <sup>12</sup> Ña cán quéa tá ñacahyí i carta cán nu ndo coó ñacaja i ña sahá da ñacaja cuachi cán. Ta ni coó ñacaja i ña sahá ñayivi ñandoho ini sahá cuachi ñacaja da. ñacahyí i ña jáchi xihín ña yóho cuu jánaha ndó nu Ndióxi ndá quiahva quíhvi ini ndó ndehe. <sup>13</sup> Ta ña yóho quéa sahan tuhun ndeé ini nde.

Joo ñandindeé chága ví ini nde ta ñacajii íni nde tá ñaxini nde ña cájii ini Tito. Jáchi mé ndó ñachindeé ndó

da ña ná ndivaha ini da. <sup>14</sup> Jáchi mí i sa ñacachi i xihín Tito ña cájii ini i xihín ña cája ndó ta coó ñacandoo núu i nu Tito xihín ña ñacachi i xihín dá saha ndo. Joho ñacandoo vaha johó i nu dá jáchi tá quiahva cáhan nde ña ndaa xihín ndo quiahva já ñacahan ndaa nde xihín mé dá. Ta ña cáchí nde quéa cájii ini nde xihín ña cája ndó. <sup>15</sup> Ta cásahá quíhvi ini chága da ndohó tá ndicuhun ini da ña ñacaja ndó ña cúní mé dá. Ta ñasahjin toní ñúhú ndó xihín dá ta ñandiquehe ndó da xihín ndinuhu ini ndó. <sup>16</sup> Ta cájii ndivaha ini i jáchi cuu candeé ini i ndohó sahá ña cája vaha ndó.

## 8

*Játaca na jiuhún quiahva na nuú na ndahví*

<sup>1</sup> Ta viti cúní nde ndicani nde nu ndohó, ñani i ndá quiahva cája Ndióxi ñamani xihín na cúu cuéntá Jesús ndúu estado Macedonia. <sup>2</sup> Vatí a juú quiahva cuahá tondóhó quíxi nu ná joo cájii tá cájii ndivaha ini na. Ta vatí cúu ná ñayivi cándahví ndivaha joo ín vaha ndivaha ini na jóco ná jiuhún tátuhun na cuicá. <sup>3</sup> Cáhan ndaa i nu ndo ña cájii ini na jása na ña ín nu ná ta janda java na coó cuahá nu ná sahdá java na ña. <sup>4</sup> Ta xihín ndinuhu ini na ñaxica tahví na nuú nde ña ná quiahva nde ñamani nu ná ñehe táhvi ná chindeé na na cúu cuéntá Jesús ndúu Jerusalén. <sup>5</sup> Chí

nayaha quiahva najasá na ñaha na chí coó naçahán nde caja na já. Jáchí jihna ñúhú nandiquiahva na mé ná ndáha Ndióxi, xitoho í ña ná caja na ña cúní mé á. Anda já nandiquiahva na mé ná ndáha mé nde ná chindeé na ndehe. <sup>6</sup> Sahá ña cán quéa naxica tahví nde nu Tito ña ná saa tucu da nu ndó jan já ná jáxinu coo da nuú chuun naçasáhá cája da jihna ña játaca da ña jóco maní uun ndó. <sup>7</sup> Jáchí mé ndó yójó johó ndó nu ndíhi ña cája ndó. Yójó ndó xihín ña cándéé ini ndó Ndióxi. Ta yójó ndó xihín tuhun cáhan ndo cuéntá Ndióxi. Ta yójó ndó xihín ña xíní ndo. Ta yójó ndó xihín ña ndíhi ini ndó cája ndó ña vaha xihín ñayivi. Ta quiahva já yójó ndó xihín ña quíhvi ini ndó ndehe. Ta quiahva já ndítahan cayojó ndo nuú ña jásá ndo nuú na ndahví.

<sup>8</sup> Ña cáhan í xihín ndo yóho coo cúú á in chuun sáhdá í nu ndo. Ña cúní quéa ná candaá ini ndó ndá quiahva chindeé na cán ñayivi xihín ndinuhu ini na. Ta tá cája ndó tá quiahva cája na cán já quéa jánaha ndó ña mé a ndaa quíhvi ini ndó ñayivi. <sup>9</sup> Jáchí sa candaá vaha ini ndó ña natahvi ini Jesucristo, xitoho í saha yo. Ta vatí nasacomí a tóco ndíhi ñaha joo najándacoo a ña ta nandaja ndahví a mé á ña ná cuu nduu ndó tátuhun na cuicá ndivaha. Ta naçaja mé á ña yóho jáchí quíhvi ndivaha ini a ndohó.

<sup>10</sup> Cája í cuéntá ña vaha chága ná jáxinu coo ndó ña naçasáhá cája ndó ava. Jáchí jihna ñúhú mé ndó naçasáhá ndó játaca ndó jjuhún jan ta naçaja ndó ña xihín ndinuhu ini ndó. <sup>11</sup> Candehé ndo. Xíní ñúhú jáxinu coo ndó ña naçasáhá cája ndó jan. Ta ná caja ndó ña xihín ndinuhu ini ndó tá quiahva naçaja ndó janda tá mé saha. Ta xíní ñúhú quiahva ndó ña cuu jásá ndo <sup>12</sup> jáchí ndá na cúní jásá ñaha já ndíquehe vaha Ndióxi ndá ña cuu jásá na. Sahá ña cán quéa xíní ñúhú quiahva ndó ña cuu quiahva ndó jáchí coo xíca Ndióxi nu yo quiahva í ña coo cómi yo.

<sup>13</sup> A cáhan ndo ña coo ndítahan nuú na cán caja chúun na nani cája chúun mé ndó ña ná chindeé ndó na. <sup>14</sup> Ña cúní Ndióxi quéa ná a ndímani ni in ñaha nu táhan ndó. Jáchí ña ndímani nuú na cán, in cuahá nu ndóhó viti ña ná cuu chindeé ndó na. Joo inga tañu ña ndímani nu ndóhó, coo a nuú na cán ta já cuu chindeé na cán ndohó. Ta quiahva já canduu in nuú xihín táhan ndó. <sup>15</sup> Já cáchí tuhun Ndióxi já: “Ni coo naçayojó a nuú na najátaca cuahá. Ta ni coo nandímani a nuú na najátaca chá ña.”

*Tito xihín na xíca xihín dá*

<sup>16</sup> Ndíquiahva í ndixahvi nu Ndióxi jáchí naçaja mé á ña ná ndíhi ini Tito saha ndo tá quiahva ndíhi ini mí í saha ndo. <sup>17</sup> Jáchí naçandúsa da caja da ña nasahnda í nu dá.

Ta sa ndícani ini ri mé dá saha ndo ta sahá ña cán quéa cúní da coto nihni da ndohó cuéntá mé dá viti.

<sup>18</sup> Ta chindahá i in dataa, da cúu cuéntá Jesús saa da xihín Tito jan. Ta tóco ndihi ñayivi ndúu java ga veñuhu cahan vaha na sahá da cán ta sahá ña cája chúun vaha da cáxi tuhun da tuhun vaha saha Jesús nuú ñayivi. <sup>19</sup> Ta mé na cúu cuéntá Jesús, na táca ndijáa veñuhu yóho nandacaxi na da ña ná caca da xihín nde cañehe nde jjuhún cuhun nde ñuu Jerusalén. Ta tá cája nde ñamaní xihín ñayivi cán já quéa jánaha nde ña mé a ndaa táhyí cúní nde chindeé nde na. Ta xihín ña yóho cája cáhnu nde Ndióxi. <sup>20</sup> Jáchi co cúní nde ña ná cahan núu ñayivi sahá ña cája nde xihín jjuhún cuaha cán, ña najátaca ndó. <sup>21</sup> Sahá ña cán quéa ndíhi ini nde cája nde ña vaha. Ta a juú nu Ndióxi cuití va ndíhi ini nde cája nde ña vaha jáchi cúní nde caja nde ña vaha nuú ñayivi viti.

<sup>22</sup> Ta xihín mé ñaní, da chindahá i nu ndó jan chindahá i inga tucu da cúu cuéntá Jesús. Mé da yóho cuahá ndivaha tañu nanaha da ña ín ini da caja da ña vaha xihín ñayivi. Ta viti xíca chága ini da caja da ña jáchi cándeé ini da ña a jándacoo núu ndó da. <sup>23</sup> Ta ndá na ná ndaca tuhún ndohó saha Tito ndítahan cahan ndó xihín ná ña cúu dá da xíca xihín mí i. Ta cahan ndó ña in nuú cája chúun da xihín i chindeé nde

ndohó. Ta tá ná ndaca tuhún na ndohó sahá java ga na cúu cuéntá Jesús cuahan xihín dá ndítahan cahan ndó ña cúu ná na nachindahá na cúu cuéntá Jesús táca veñuhu chóho. Ta cahan ndó xihín ná ña cúu ná na cája cáhnu Jesucristo. <sup>24</sup> Ta xíní ñuhú jánaha ndó nuú na cán ña mé a ndaa táhyí quíhvi ini ndó na já ná candaa ini na táca veñuhu cán ña ín sahá nde cáji ini nde xihín ndo.

## 9

*Sa natata jjuhún cuhun nuú na cúu cuéntá Jesús*

<sup>1</sup> Co xíní ñuhú cahyí chága i nu ndo sahá jjuhún ña játacá ndó chindeé ndó na cúu cuéntá Jesús ñuu Jerusalén. <sup>2</sup> Jáchi sa xíní vñ ña ín vaha ini ndó caja ndó ña. Ta ndivaha ini i tá cáxi tuhun i nuú na ndúu estado Macedonia ña mé ndó, na ndúu estado Acaya jan nasacu ini ndó chindeé ndó ñayivi janda ava. Ta cuahá na ndúu estado Macedonia nandindeé ini na chindeé na ñayivi sahá ña vaha ini mé ndó. <sup>3</sup> Joo chindahá i na cúu cuéntá Jesús yóho nu ndo já quéa ná a cándo nuú i jáchi nacahan vaha i saha ndo nuú na yóho. Ta ña cúní quéa ña ná coo tiahva ndó ndiquiahva ndó jjuhún ña najátaca ndó jan tá quiahva nacachi i xihín ná. <sup>4</sup> Jáchi tiahva náá java na ndúu estado Macedonia saa na xihín i ta cuni na ña co ndúu tiahva ndó xihín mé jjuhún. Tá ná yaha ña yóho ta já cacahan ndivaha nuú nde

caja ndó xihín ña jan sahá ña nasandeé cáhnu ini i ndohó ta sa mé quiahva já cacahan ri nuu ndohó va. <sup>5</sup> Ta saha mé ña jan quéa nacahán i ña xíní ñúhú caca i ñamaní nuu na cúu cuéntá Jesús yóho ña ná cuhun na coto nihni jihna ñúhú na ndohó. Ta já ná chindeé na ndohó nu játaca ndó jjuhún ña nasahan ndó tuhun ndó quiahva ndó jan. Já quéa ná coo tiahva jjuhún cán tá ná saa i ña ná nahá ña sahan ndó jjuhún jan sahá ña in maní ini ndó ta co sahan ndó ña xihín ña ndúsa.

<sup>6</sup> Xíní ñúhú ndicuhun ini ndó ña yóho: Da xútu loho, chá va jáquee da. Da xútu cuaha, cuaha jáquee da. <sup>7</sup> Tá in tá in ndó xíní ñúhú quiahva ndó tá quiahva nasacu ini ndó quiahva ndó. A quiahva cajihnda joho ini ndó ñaha ta ni a quiahva ndó ña xihín ña ndúsa. Jáchi quihvi ini Ndióxi na cájii ini jasá ñaha. <sup>8</sup> Ta cuu quiahva Ndióxi cuahá ndivaha nuu ña vaha nu ndó já quéa ná a ndímani ni in ñaha nu ndo. Jáchi joho cayojó joho a nu ndo já ná cuu chindeé ndó na ndímani ñaha nuu nani ná cacuu a nuu ña vaha. <sup>9</sup> Jáchi já cáchi tuhun Ndióxi já:

Cuahá ndivaha ñaha jasá Ndióxi nuu na ndahví, ta já coo ña vaha cája mé á xihín ñayivi anda ama cáa quivi, cáchi tuhun Ndióxi.

<sup>10</sup> Jáchi Ndióxi quéa sahan tata nuu in dataa já ná cutu da ña. Ta mé a cán sahan ña

cuxu da viti. Ta quiahva já caja Ndióxi xihín ndo. Quiahva mé á ña xíní ñúhú ndo já ná cuu chindeé chága ví ndó ñayivi. Ta já quéa ñehe táhvi ndó canduu vaha ndó sahá ñamaní cája ndó. <sup>11</sup> Ta já xinu ndó cacomí ndo cuahá ndivaha nuu ña cuicá tá xihín ña yóho cuu chindeé cuaha ndó ñayivi xihín á. Ta mé jjuhún játaca ndó jan tá ndiquiahva nde ña nuu na ñuu Jerusalén já quéa ndiquiahva na cán ndixahvi nu Ndióxi sahá. <sup>12</sup> Jáchi mé jjuhún játaca ndó cán tá ná ndiquiahva nde ña nuu na cúu cuéntá Jesús cán já quéa chindeé a na xihín ña ndímani nu ná. Ta xihín ña yóho ndiquiahva ndivaha na cán ndixahvi nu Ndióxi. <sup>13</sup> Ta já caja cáhnu na Ndióxi jáchi xihín ña cája ndó yóho náha ña co quéhe núu ndó tuhun vaha cáhan sahá Jesucristo. Jári caja cáhnu na Ndióxi sahá ña vaha in ini ndó xihín ná. Jáchi chindeé ndó na xihín ña jasá ndó nu ná ta chindeé ri ndó java ga ñayivi. <sup>14</sup> Ta ndiquiahva na ndixahvi nu Ndióxi saha ndo jáchi xihín ña cája ndó náha cáxi a ña cája cuaha Ndióxi ñamaní xihín ñayivi. <sup>15</sup> Ndixahvi Ndióxi jáchi najasá mé á in ña cáhnu ndivaha nu yo ta ni co ñehe yó tuhun ndá quiahva ndicaní ña.

## 10

*Cáhan Pablo saha mé dá*

<sup>1</sup> Yehe cúu Pablo ta cúnii caca i ñamaní nu ndo. Joo

cúni cahan vii i ña nu ndo tá quiahva cahan vii Jesucristo xoho. Ndúu java na tañu ndó ta cáchi na ña tá íin i tañu ndóhó já cúu u in tañu uun ini. Joo cáchi na tá íin xíca i já cúu u da co yihvi cahan ndacú xihin ndo. <sup>2</sup> Ta viti xíca tahvi i nu ndo ña ná a cajú ndó ni in ñaha ña cuu jánani i ndohó saha. Tá ná saa i coto ni-hni i ndohó jan co cúni jánani i java ndó, na jácojo cuachi jatá nde, na cáchi ña cajú nde tóco ndihi ñaha tá quiahva cajú ñayivi ñuyivi. Jáchí mé a ndaa sácú ini i saa i quihvi táhan i xihín na jan. <sup>3</sup> Vatí cúu yó ñayivi ndúu ñuyivi joo co cajú nde tá quiahva cajú ñayivi ñuyivi. <sup>4</sup> Jáchí ña chindeé ndehe co cúu á ña chindeé ñayivi ñuyivi. Joo ña chindeé ndehe cúu ndée Ndióxi ña sáhan mé á nuú nde já ná cuu jándihi nde sahá ña cajú tiñáhá sacuaña. <sup>5</sup> Ta quiahva já jándihi nde sahá ña cajú ihvi xihin Ndióxi ta xihin ndée mé á jándihi nde sahá ña cahan ñayivi, na cajú cahnú mé jáchi co xini na Ndióxi. Ta tóco ndihi ña cáhvi ini nde ndiquiahva nde ña ndáha mé á já ná cajú nde tóco ndihi ña cúni Jesucristo. <sup>6</sup> Ña cán quea tá ná nahá ña íin tiahva ndó cajú ndó tóco ndihi ña nasahnda nde nu ndó já quea cacu ini nde jánani nde ndá na nacuu, na co cúni cajú ña sáhdá Jesucristo.

<sup>7</sup> Mé ndó co xini ndó ndá quiahva cáa ínima ñayivi jáchi sándehe ndó ña cáa chí jata cuití va. Joo tá mé a ndaa

táhyi cahan java ndó ña cómi Jesucristo cuénta saha ndo xini ñuhú quehe ndó cuénta ña cúu ri ndehe va na cómi Jesucristo cuénta saha. <sup>8</sup> Co cahuan nuú i cajú cahnú loho i mí i sahá chuun nasahan Ndióxi nuú i. Jáchí nacaja mé á ña ná cahnda i chuun nu ndo jáchi mé Jesucristo, xitoho i nasahan chuun nuú i ña ná jácuahnu i ndohó tá quiahva cúni mé á. Ta co cúni a ña ná jándihi i saha ndo. <sup>9</sup> Co cúni ña ná cahan ndo ña jáyihvi i ndohó xihin carta chindahá i nu ndo. <sup>10</sup> Ndúu java na ta cáchi na ndacú ndivaha yuhú u cahan i nu carta cáhyi i. Joo tá íin i xihin ndo co náha i ña cúu u da jáyihvi ndóhó jáchi tá cásahá cahan i xihin ndo co náha i ña cúu u da ndítahan coo toni ñuhú ñayivi xihin. <sup>11</sup> Joo na xíca cahan ña yóho xini ñuhú candañ ini na ña tá quiahva ndacú yuhú i tá cahan i xihin carta tá íin xíca i quiahva já cajú i tá ná xinu coo i tañu ndó jan.

<sup>12</sup> Mé a ndaa co sáhan i ínima i jácatáhan i mí i xihín na cajú cahnú mé jan. Joo ndía cáa mé cajú na jan tá jácatáhan ndaja táhan mé va na ta xihín ña yóho náha ña tóntó ndivaha cajú na. <sup>13</sup> Co cajú cahnú i mí i jáchi co ndítahan nuú i cajú i ña. Cahan cuití va i sahá chuun nasahan Ndióxi nuú i cajú i cuénta mé á ta mé á quea nachindahá yehe saa i anda nu ndúu ndó jan. <sup>14</sup> Co cajú cahnú i mí i tá cahan i sahá chuun

na<sub>s</sub>aha<sub>n</sub> Ndióxi nuú i caja i. Jáchi mé nde cúu nde na nu cuítí na<sub>s</sub>aha<sub>n</sub> na<sub>c</sub>aha<sub>n</sub> nde tuhun va<sub>h</sub>a sa<sub>h</sub>a Jesucristo nu ndo. <sup>15</sup> Sa<sub>h</sub>a ná ná cán quéa cánda<sub>a</sub> va<sub>h</sub>a ini ndó ná co cáhan nde sa<sub>h</sub>a chuun najáca<sub>v</sub>a sa<sub>h</sub>a inga na. Ta ni co yáha nde cája cáhnu nde mé nde sa<sub>h</sub>a chuun cája nde yóho. Ná cúni nde quéa ná candeé chága ini ndó Jesucristo nani caja chúun chága nde tañu ndó tá cúni Ndióxi. <sup>16</sup> Ta cúni nde ca<sub>h</sub>an nde tuhun va<sub>h</sub>a sa<sub>h</sub>a Jesús nuú ñayivi, na ndúu xicá chága nuú ñuu Corinto jan. Joo co cúni nde quihvi nuu nde nuú sa na<sub>c</sub>aja chúun inga na já ná a cája lánda nde sa<sub>h</sub>a chuun na<sub>c</sub>aja inga na.

<sup>17</sup> Ta já cáchi tuhun Ndióxi já: “Ndá na cúni caja lánda, xini ñuhú caja lánda na sa<sub>h</sub>a ná náhnu na<sub>c</sub>aja Ndióxi xihin ná.” <sup>18</sup> Jáchi co táhán ini Ndióxi xihin na ndiñehe jícó mé joo ndiñehe jícó Ndióxi ñayivi tá táhán ini a xihin ná cája na.

## 11

*Cáhan Pablo sa<sub>h</sub>a ná co cúu apóstol*

<sup>1</sup> Xicá tahví i nu ndo ná ná a quéhe ndó cuénta sa<sub>h</sub>a ná cája i tá ná caja i tá tuhun in ta<sub>a</sub> tachí. Caja ndó ñamaní xihin i. <sup>2</sup> Ndióxi quéa na<sub>c</sub>aja ná ná quihvi ndivaha ini i ndohó sa<sub>h</sub>a ná cán quéa co cúni ná ná jándacoo ndó íchi cuénta mé á. Cája i tá tuhun cája da cuiñú jáchi na<sub>s</sub>acu

ini i ndiquiahva vií i ndohó ndáha Jesucristo tá tuhun cája in dataa ndiquiahva da jahyi jíhi da, ná cúu ná tacú ndinuhu nuú da cacuu yíi ná. <sup>3</sup> Á co ndicuhun ini ndó ndaja na<sub>c</sub>aja tiñahá sa<sub>c</sub>uaha tá najándahvi rí ná nani Eva sanahá. Ta viti yíhvi i ná ná jándahvi java ñayivi ndohó tá quiahva najándahvi rí mé ná. Jáchi viti candeé ini ndó Jesús ta cája cáhnu ndó mé á xihín ndinuhu ini ndó. Joo yíhvi i jándacoo ndó ná jan. <sup>4</sup> Jáchi mé ndó sahan ndó ñamaní ná ná saa ndá ñayivi na<sub>c</sub>uu va vatí jána<sub>h</sub>a na ná tuhún sa<sub>h</sub>a Jesucristo. Co jána<sub>h</sub>a na ndohó tá quiahva najána<sub>h</sub>a mé nde nu ndo jáchi jíin va cáhan na sa<sub>h</sub>a ínimá yíi Ndióxi ta jíin va cáchi na jáca<sub>c</sub>u Ndióxi ñayivi. Joo na<sub>n</sub>diquehe va<sub>h</sub>a ndó na. <sup>5</sup> Ta cáhán ndo ná cúu ná na apóstol, na náhnu ndivaha joo xini va<sub>h</sub>a i ná co cúu ná na va<sub>h</sub>a chága a juú ga ye<sub>h</sub>e. <sup>6</sup> Vatí co tiahva i ca<sub>h</sub>an vií i joo íin va<sub>h</sub>a xini túni i jána<sub>h</sub>a i tuhun Ndióxi nu ndo. Ta xini va<sub>h</sub>a ndó ná yóho jáchi cuahá tañu najána<sub>h</sub>a va<sub>h</sub>a i tuhun Ndióxi nu ndo.

<sup>7</sup> Java tañu cáhán i ná co<sub>o</sub> na<sub>c</sub>aja va<sub>h</sub>a i jáchi co<sub>o</sub> na<sub>c</sub>uehe e yahvi nu ndo tá na<sub>c</sub>aha<sub>n</sub> i tuhun Ndióxi xihin ndo. Ta java tañu cáhán i ná co<sub>o</sub> na<sub>c</sub>aja va<sub>h</sub>a i tá najánuu i mí i já ná cuu ndindita jícó ndohó. <sup>8</sup> Mé a ndaa cúu á tá tuhun na<sub>c</sub>anda<sub>a</sub> joho i jiuhún nuú java na cúu

cuéntá Jesús ta ñaquehe e yahvi i nuú na cán ña ná quixi i caja chúun i tañu mé ndo.

<sup>9</sup> Ta tá naxini ñuhú i in ñaha tá ñasahin tañu ndó ñan coó najáquihvi toho i ndohó sahá ña naxini ñuhú i. Jáchí mé na cúu cuéntá Jesús, na ñaquixi Macedonia ñasahan na nuú i ña naxini ñuhú i catacu u. Mí i coó naxeen toho i jáquihvi i ndohó. Ta a cája toho i ña viti.

<sup>10</sup> Cahan i ña ndaa xihin ndo jáchi iin Jesucristo xihin i. Ta ni in ñaha a cáji nuu toho nuú i cahan i ña yóho nuú na ndúu estado Acaya. <sup>11</sup> Coto a cahan ndo ña co quihvi ini i ndohó sahá ña cahan i quiahva já xihin ndo. Jáchí xini vaha Ndióxi ña quihvi ndivaha ini i ndohó.

<sup>12</sup> Joo a jándacoo toho i caja i ña cája i yóho já ná a quiahva i ñamaní nuú na cán ndiñehe jícó na mé ná. Jáchí cáhí na cája chúun na cuéntá Ndióxi tá quiahva cája ndehe. Joo co cúu á ña ndaa. <sup>13</sup> Mé a ndaa co cúu toho na ñan apóstol cuéntá Jesucristo vatí ndája na mé ná tátuhun apóstol. Ta jándahvi na ñayivi tá cáhí na ña cúu ná na apóstol. <sup>14</sup> Joo co ndítahan catóntó yo sahá ña yóho jáchi janda Satanás, mé tiñahá sacuahá ndája rí mé rí tátuhun in tátó Ndióxi, ña yehe ndivaha. <sup>15</sup> Ta jári na ndíco jata rí cán co yáncá toho na ndája na mé ná tátuhun ñayivi cája ña vaha. Joo vaxi quiví ndiquehe na yahvi sahá ñaha ñacaja na.

*Ndóho ini Pablo sahá ña*

*cúu dá apóstol*

<sup>16</sup> Ta ná cahan tucu u ña yóho xihin ndo: coto a cahan ndo ña cúu u da ñacatachi. Joo tá cahan ndo ña cúu u da ñacatachi i quiahva loho ndó ñamaní nuú i ña ná cahan i xihin ndó tátuhun in da tachi já ná cuu ndiñehe jícó loho i mí i. <sup>17</sup> Tá cahan lándá i yóho co cúu á tuhun ñasahan Ndióxi nuú i. Cahan i ña tátuhun in da ñacatachi cuití va. <sup>18</sup> Ta sahá ña ndúu cuahá na cátóo ndiñehe jícó mé sahá ña cája na ñuyiví yóho sahá ña cán quéa ná caja ri yehe va quiahva já. <sup>19</sup> Mé ndó cahan ndo cúu ndó ñayivi ndíhí ndivaha jini joo cáji ini ndó táa johó ndó nu cahan ñayivi tachi cán xihin ndo. <sup>20</sup> Ta ni co sáhní ndo mé ndó tá cája ndúsa na cán xihin ndo caja ndívi ndó nu ná vatí quéhe na ñaha cómi ndo. Ta jándahvi na ndohó ta quéhe núu na ndohó janda cáni na jahndá nuu ndo. <sup>21</sup> Á cahan ndo ña ndítahan cacahan nuú i sahá ña coó ñasahan ndeé toho ini nde caja nde tá quiahva cája na ñan xihin ndo.

Joo tá co sáhní na ñan mé ná cája lándá na, caja ri yehe va já vatí cahan i ña yóho tátuhun in da tachi. <sup>22</sup> Ta tá cahan lándá na ñan ña cúu ná na hebreo, mé a ndaa da hebreo cúu ri yehe va. Ta tá cahan lándá na ñan ña cúu ná na Israel, mé a ndaa da Israel cúu ri yehe va. Ta tá cahan lándá na ñan ña ñaquixi na chichi Abraham, mé a ndaa da ñaquixi chichi Abraham



cúu ri yehe va. <sup>23</sup> Ta tá cáhan lándā nā jan ñā cúu ná nā cája chúun cuéntá Jesucristo, mé a ndaa yehe cúu da cája chúun chága cuéntá mé á. Vatí cáhan i tátuhun in da tachí joo mé a ndaa cuaha chága cája chúun yehe a juú ga nā jan. Cuaha chága tañu nachicaan nā yehe vecaa a juú ga nā jan. Ta cuaha chága tañu ñacaja xíxi na xihín yehe a juú ga nā jan. Ta cuahá ndivaha tañu sa yáti quivi i a juú ga nā jan. <sup>24</sup> Ta uhun tañu najácaxáhan nā Israel yehe xihín churú. Ta in tá in táhndá cán najáxiñu nā churú jatá i oco sañun comi tañu. <sup>25</sup> Ta uní tañu najácaxáhan na yehe xihín vara ta in tañu ñacati na ñacuun na yuú yehe. Ta sa uní tañu ñasacoo barco, mé dó cuahan i cán cahá tañuhú. Ta ñasanúu i nuú tañuhú in ñuu tá in ndiví. <sup>26</sup> Ta ndóho ndivaha ini i nu xíca nuu i jáchi cuahá tañu ndúcú tani i xihín yuta. Ta jandā taa cuihná a íhvi queta nuú i. Ta ñaxíca iyo i tañu nā ñuu i xihín tañu nā tóho. Ta tá ín i ñuu náhnu á ín i yúcu á ín i tañuhú já vaxi tá vaxi tondóho nuú i. Ta jandā tañu nā cáhí cúu cuéntá Jesús vatí co cúu nā ñaquixi tondóho nuú i. <sup>27</sup> Ta cánaá i cája chúun i jandā ndíhivi ndivaha i. Ta cuahá tañu co quíji vaha i. Ta cuahá tañu ñaquixi joco nuú i ta ñaquixi ñā íchi ini i ticuí ta jandā ínima uun i ín i jáchi co ñéhe e ñā cuxu u. Ta cuahá tañu ndóho ini i sahá ñā víxi xíní i jáchi coó jáhma candíxi

i.

<sup>28</sup> Ta vatí ndóho i ñā yóho xihín java ga ñaha joo ndícani tá ndícani ini i saha tóco ndihi nā cúu cuéntá Jesús, nā táca ndijáá veñuhu. <sup>29</sup> Jáchi tá cuitá ini ñayivi já cúu á tátuhun cuitá ri ini yehe va xihín ná. Ta tá ndícava in na nuú cuachi cája inga na já quéa xójo ndivaha ini i xihín nā najándicava ñahá cán. <sup>30</sup> Ta tá ín in ñaha ñā cuu cahan lándā i sahá já ná cahan lándā i sahá ñā náha ñā coó cuahá ndée mí i. <sup>31</sup> Ta Ndióxi, tátá Jesucristo, xitoho í, mé a ndítahan caja cáhnu í anda ama cáa quivi xíní vaha ñā cáhan i ñā ndaa xihín ndo. <sup>32</sup> Jáchi in tañu ñasahiin i ñuu Damasco ta ndaja coo da cúu gobernador, da ñacaja chúun nu rey Aretas ñasahnda da chuun ñā ná chicaji na yéhe ñuu cán já ná cuu tiin na yehe. <sup>33</sup> Joo java nā cúu cuéntá Jesús najánuu na yehe ini in toyicá chí ventana mé corra yuu ndájí ñuu cán já ñacuu najácacu na yehe.

## 12

*Ñā ñaxini Pablo ñacaja Ndióxi*

<sup>1</sup> Ni in ñaha co ñéhe e tá ndíñehe jícó i mí i. Joo já ndítahan nuú i ndicani i nu ndo sahá ñā ñaxini i cuéntá indiví, ñā najánaña Ndióxi nuú i ta sahá ñā ñacachi mé á xihín i coo. <sup>2</sup> Sa ín uxu comi cuia ñayaha ñā yóho. Najándaa Ndióxi yehe, da cándéé ini i Jesucristo ñasahan i indiví uní nu ín mé

á. Co xini yehe á nandaa yiquí cuñu i xihín i á naçandoo a ñuyivi yóho. In túhún Ndióxi xini. <sup>3</sup> Joo xini vaha i ña yehe cúu da nasahan cán vatí co xini i á nandaa yiquí cuñu i á naçandoo a ñuyivi yóho. Ndióxi cuití va xini. <sup>4</sup> Joo xini vaha i ña nasahan i nu ndató ndivaha indiví. Ta mé cán naxini johó i tuhun, ña co ndiñehé e ndaja ndicani i ña nuú ñayivi ta ni co sahan Ndióxi ñamaní nuú i ndicani i ña nu ná. <sup>5</sup> Cuu ndiñehé jícó i mí i sahá ña naxini i yóho joo a cája toho i ña. Vaha chága ná caha lándá i sahá ña coó toho ndée mí i. <sup>6</sup> Ta tá ná cacu ini i ndiñehé jícó i mí i já queá a cacuu toho i da tachi jáchi ña ndaa táhyí cacuu tuhun cahan i. Joo co cája toho i ña jáchi cúni ña ná cahan ñayivi ña ndaa cuití va sahá i ta sahá ña naçaja i xihín sahá ña naçahan i.

<sup>7</sup> Ta sahá ña co cúni Ndióxi ña ná caha cáhnu i mí i sahá ña naxini i sahá ña cán queá naquixi in ña ndóho i. Cúu á tátuhun in íñu sa cáñee nuú yiquí cuñu i xini i, ña quixi nuú tiñahá sacuahá cája xíxi rí xihín i já ná a cája cáhnu i mí i. <sup>8</sup> Ta sa uní tañu naxica tahví i nu Ndióxi, xitoho i ña ná tavá a ña ndóho i yóho. <sup>9</sup> Joo nanducú ñehé mé á tuhun nuú i já naçachi a já: “Sa quiahva cúu mé a quihvi ini i yohó jan va jáchi ña cúu cája i xihín ñayivi náha cáxi chága tá co ndée ná”, naçachi Ndióxi. Ña cán queá cáji ini i cúu u in da cámaní ndée já queá náha

ña xihín ndée Jesucristo cája i tóco ndihi ñaha. <sup>10</sup> Sahá ña quihvi ini i Jesucristo, cáji tá cáji ini i tá cávitá ini i, á tá cánahá na xihín i, á tá cámaní ñaha nuú i, á tá ndúcú na yehe ña caha xíxi na xihín i. Jáchi tá cávitá ini i já ndíndacú chága i xihín ndée Ndióxi.

*Ndicani ini Pablo sahá na cúu cuénta Jesús nduu ñuu Corinto*

<sup>11</sup> Tá quiahva cája da tachi já cája i joo ndóho cúu na naçaja ndúsa xihín i caha i ña. Jáchi mé ndó cúu na ndítahan cahan vaha sahá i, nduu. Joo já coó toho chága sahá na cahan ndó cúu apóstol jan a juú ga yehe vatí mé a ndaa nu Ndióxi coó saha toho i. <sup>12</sup> Jáchi xihín ña náhnu naçaja i nu ndo jan ta xihín ña xitúhún naxini ndó naçaja i jan najánaha i nu ndo ña mé a ndaa táhyí cúu u in apóstol. Coó nandihí ini i tá naçaja i ña xitúhún jan nu ndo. <sup>13</sup> Ta tá quiahva naçaja i xihín java ga na cúu cuénta Jesús quiahva já naçaja ri xihín ndóho va. In túhún ña coó naçaja i xihín ndó queá coó najáquihvi toho i ndóho sahá ña xini ñuhú i catacu u tá quiahva naçaja i xihín java ga na cúu cuénta Jesús. Á cahan ndo ña vaha chága ná caha ndúsa i xihín ndó quiahva ndó nuú i ña xini ñuhú i.

<sup>14</sup> Ta viti sa ín tiahva i saa i coto nihni i ndóho ña chí uní. Ta ni viti a jáquihvi toho i ndóho jáchi co xica toho ini i quehe e ña cómi ndo. Ña

cúni quéa ná quihvi ini ndó yehe tá quiahva quihvi ini i ndohó. Jáchí mé ndó cúú ndó tátuhun jahyi i sahá ña najánaña i tuhun Ndióxi nu ndo. Ta ndá nacuu na valí co xito na tátá na joo mé tátá na cúú na xito mé na valí. <sup>15</sup> Ta cáji ini i jándihi i tóco ndihi ñaha cómi i já ná chindeé e ndohó. Ta janda ndiquiahva i mí i já ná cacu ndaa ínima ndo. Cája i cuéntá tá quihvi chága ini i ndohó já co cúú chága ini ndó xihín i.

<sup>16</sup> Mé a ndaa coó najáquihvi toho i ndohó. Joo ndúu java na tañu ndó ta cáchí na ña nacaja ndúsa i xihín ndo já najándahvi tá najándahvi i ndohó. <sup>17</sup> Á cáhán ndó ña najándahvi i ndohó tá nachindahá i java ñayivi nu ndo jan. A juú a já. <sup>18</sup> Jáchí naxica tahví i nu Tito ña ná saa da coto nihni da ndohó jan. Ta nachindahá i inga da cúú cuéntá Jesús xihín dá. Á najándahvi da ndohó, vaha. Sa xíní vaha i ña coó najándahvi da ndohó. Ta tá quiahva cája Tito quiahva já cája ri yehe va jáchí in ínima ñehe nde xihín dá.

<sup>19</sup> Á cáhán ndo ña sa nacasáhá cáhan chíjín tucu nde xihín ndo viti. Co cúú á já. Jáchí sándehe cáxí Ndióxi ña cáhan nde ña yóho xihín ndo tá quiahva cúni Jesucristo. Ta cája nde tóco ndihi ña yóho jáchí quihvi ini nde ndohó ta cúni nde ña ná cuahnu chága ndó xihín tuhun Ndióxi. <sup>20</sup> Yíhvi i jáchí

tá ná saa i coto nihni i ndohó co cúni i ndiñehé e ndohó cája ndó ña núu, ña co cátóo i. Ta sa mé quiahva já yíhvi i ña cuni ndó yehe caja i ña co cátóo ndo. Yíhvi i jáchí tiahva náa cani táhan ndó, á cahihvi ini xihín táhan ndó, á cojo ini xihín táhan ndó, á ndacahnda táhan ndó, á cahan ndó ña tuhún sahá ñani táhan ndó, á candehe ndaa táhan ndó, á ndiñehe jícó ndo mé ndó, á sa jíin sa jíin cája in in ndó. <sup>21</sup> Ta yíhvi i ña tá ná saa i coto nihni i ndohó jan caja Ndióxi ña ná cacahan nuú i saha tóco ndihi ña cája ndó jan. Ta yíhvi i cuacu u sahá cuahá na cája cuachi, na sa janda jihna nacasáhá cája cuachi ña a ñaha jándacoo na cája na xihín yiquí cuñu na. Ta cuacu u jáchí a ñaha jándacoo na ña ndúu na xihín na co cúú ñájihí na á yí ná. Ta ni a ñaha jándacoo na tóco ndihi ña núu, ña xíca ini yiquí cuñu na caja.

## 13

*Jáxinu coo Pablo tuhun cáhan da xihín na ñuu Corinto*

<sup>1</sup> Ta xihín ña yóho xinu uní táhndá saa i coto nihni i ndohó. Ta xíní ñuhú ndicuñun ini ndó ña sáhndá tuhun Ndióxi chuun nu yo ta cáchí a ña tá ná cahan ivi á uní testigo sahá cuachi nacaja in ñayivi anda javí candaá ini ndó ña mé a ndaa in cuachi na. <sup>2</sup> Tá quiahva nacahan i xihín ndo tá naxito nihni i ndohó ña chí ivi quiahva já cáhan i xihín ndo viti vatí in xíca i. Ta tá quiahva nacahan

i xihín na nacaja cuachi jihna jan quiahva já cáhan i xihín ndihi ndó viti. Ta tá ná casaa tucu u coto nihni i ndohó jan já quéa a táhnda ga ini i saha ndo sahá cuachi cája ndó. <sup>3</sup> Ta xihín ña yóho candaa ini ndó ña mé a ndaa táhyí cáhan i ña sáhdá Jesucristo cahán i. Cúni ña ná candaa ini ndó ña co cáhan chíjín toho Jesucristo xihín ndo. Ña cája mé á xihín ndo quéa náha nu ndo ña ín ndée mé á cája ña cúni a. <sup>4</sup> Mé Jesucristo quéa nacata caa na ndica crúxu tátuhun in da co ndée. Joo viti tácu mé á saha ndée Ndióxi. Ta tá quiahva vitá nasahin yiquí cuñu a quiahva já vitá ndúu yó viti. Joo sahá ña in nanduú xihín mé á já cuu catacú xihín ndée a. Ta xihín ña yóho cája chúun nde tañu mé ndó.

<sup>5</sup> Xíní ñúhú candehé vaha ndó mé ndó á mé a ndaa táhyí cándéé cáhnu ini ndó Ndióxi. Xíní ñúhú coto ndojó ndó mé ndó. Ta tá mé a ndaa táhyí cúu ndó cuéntá Jesús xíní ñúhú ndicuhun ini ndó ña ndácaan Jesucristo ini ínima ndo á tá coo yúhu uun va ndó cúu ndó cuéntá Jesús. <sup>6</sup> Ta ndátí i xinu quiví candaa ini ndó ña coo najándahvi nde ndohó. <sup>7</sup> Xíca tahví nde nu Ndióxi ña ná a cája ndó ni in ña núu. Ta coo cúu á sahá ña cúni nde cahán vaha ñayivi sahá nde, vaha. Ña cúni nde quéa ná a jándacoo ndó caja ndó ña vaha vatí ná cahán ñayivi ña coo nacaja vaha nde xihín ña najánaaha nde nu

ndo. <sup>8</sup> Co xíní ñúhú nde jánani nde ndohó nani cája ndó ña ndaa joo tá cája ndó ña núu já quéa xíní ñúhú jánani nde ndohó. <sup>9</sup> Ta cájii ini nde tá ndaa nde tá quiahva ndaa na vitá ini tá cúu á sahá ña ndacú ini mé ndó cuéntá Ndióxi. Ta a jándacoo toho nde caça tahví nde nu Ndióxi saha ndo ña ná xinu coo ndó cacuu ndó ñayivi coo cuachi nu mé á. <sup>10</sup> Jihna ñúhú cáhyí i carta yóho nu ndo já saa i coto nihni tucu u ndohó. Jáchí tá ná saa i jan coo cúni cahán ihvi nahá i xihín ndo vatí nasahan Ndióxi chuun yóho nuú i. Ta coo nasahan mé á ña nuú i ña ná jándihi i saha ndo. Nasahan mé á chuun yóho nuú i já ná cuu ndaja ndacú u ndohó cuéntá mé á.

<sup>11</sup> Candehé ndo, ñani i, na cúu cuéntá Jesús. Xihín tuhun yóho jáxinu coo i tuhun cáhan i xihín ndo. Ná coo Ndióxi xihín ndó. Ta ná ndindacú chága ndó já ná nduu ndó ñayivi ndaa. Ta quiahva tuhun ndée ini táhan ndó. Coo vaha ndó xihín ñani táhan ndó já quéa coo Ndióxi xihín ndo. Mé a cán quíhvi ini a ndohó ta cúni a ña ná coo vaha ini ndó. <sup>12</sup> Cahán Ndióxi xihín táhan ndó ta tatí yúhu táhan ndó ta yii caja ndó ña. <sup>13</sup> Tóco ndihi na cúu cuéntá Jesús chindahá na Ndióxi coo ndó.

<sup>14</sup> Ná tahvi ini Jesucristo, xitoho í saha ndo jáchí quíhvi ini Ndióxi ndohó. Ta ná coo tuun ínima yii mé á xihín ndo. Ña yóho quéa cúni ña ná caja

Ndióxi xihin ndo. Já ná coo.

## Carta nachindahá Pablo nuú na cúu cuéntá Jesús ndúu ñundáhyi Galacia

*Chíndahá Pablo Ndióxi coo na cúu cuéntá Jesús ndúu ñundáhyi Galacia*

<sup>1</sup> Yehe cúu Pablo, da cáhyi carta yóho nu ndo. Naçaxi Ndióxi yehe cacuu u in apóstol ta a juú toho ñayivi naçaxi yehe. Ta ni coo nachindahá ñayivi yehe jáchi Jesucristo xihin Ndióxi, tátá yo, mé a najánditacu Jesucristo, mé a cán queá naçaxi a yehe cacuu u in apóstol. <sup>2</sup> Yehe xihin tóco ndihi java ga na cúu cuéntá Jesús ndúu xihín i yóho, chíndahá nde carta yóho nu ndóhó, na ndúu ñundáhyi cuéntá Galacia jan. <sup>3</sup> Ña cúní nde queá ná caja Ndióxi, tátá yo xihín Jesucristo, xitoho í cuahá ñamaní xihin ndo ta ná caja mé á ña ná coo vaha ini ndó. <sup>4</sup> Xíni ñúhú ndicuhun ini ndó ña nandiquiahva Jesucristo mé á quivi a saha cuachi cája í ta xihín ña yóho najáçacu a mí nuú ña núu cája ñayivi ñuyíví. Ta nayaha ña yóho jáchi já cúní Ndióxi, tátá yo. <sup>5</sup> Cáhnu ndivaha ná cacuu Ndióxi anda ama cáa quivi. Já ná coo.

*Coó ga inga tuhun cáhan sahá Jesucristo ña cuu jáçacu a mí*

<sup>6</sup> Mé a ndaa naçatónto ndivaha i jáchi cama chá naçasáhá ndo cáxoo ndo nu Ndióxi, mé a naçana ndohó cacuu ndó cuéntá mé á sahá ña quíhvi ini Jesucristo ndohó. Ta viti naçasáhá ndo xíní johó ndó inga tuhun ña cáchí ñayivi cuu jáçacu a ndohó. <sup>7</sup> Mé a ndaa coo toho inga tuhun ña cuu jáçacu a ñayivi. In tühún va cúu tuhun Ndióxi ta cáhan sahá Jesucristo. Joo ndúu java ñayivi ta cúní na jájana na jiní ndo ta cúní na ndijama na tuhun vaha cáhan sahá Jesucristo, mé a jáçacu mí. <sup>8</sup> Joo tá vaxi in na ta jánaħa na inga tuhun ña cáchí na cuu jáçacu a ndohó ta coo cúu á tuhun vaha ña najánaħa nde nu ndó já queá ná cuhún cháhan jata ná ta coo caja toho a ndá ñayivi cúu ná janda mí i á janda in táto Ndióxi ná quixi indiví. <sup>9</sup> Sa naçachi i ña yóho xihín ndó jihna ta viti ndicó coo tucu u caħan i ña xihín ndo: tá jánaħa in ñayivi inga tuhun ña cáchí na cuu jáçacu a ndohó ta coo cúu á tuhun najánaħa nde nu ndo já queá ná cuhún cháhan jata ná.

<sup>10</sup> Co ndúcú u candoo vaha i nuú ñayivi. Ña cúní queá candoo vaha i nu Ndióxi jáchi tá cúní candoo vaha i nuú ñayivi já cúní cachi a ña coo cúu ga i da cája chún cuéntá Jesucristo xihín ndinuhu ini i.

*Ndicani Pablo ndaja nanduu da apóstol*

<sup>11</sup> Candehé ndó ñani mí i, na cúu cuéntá Jesús. Mé tuhun

naçahan i xihin ndó coó naquixi a jiní ñayivi ñuyiví. <sup>12</sup> Ta coó nandiquehe e ña nuú ñayivi. Ta ni in túhún toho ñayivi coó najánaḥa na ña nuú i jáchi Jesucristo quéa najánaḥa ña nuú i. <sup>13</sup> Cája i cuéntá sa naxini joho ndó sahá ña naçaja i jihna tá na sandico i costumbre na Israel. Jáchi naxojo ndivaha ini i xihin na cúu cuéntá Jesús mé tiempo cán. Ta naçaja xixi ndivaha i xihin ná ta nasacu ini i jándihi i saḥa ná. <sup>14</sup> Ta mí i nasacuu u da naçayojó chága cája costumbre na Israel nuú ndihi na ñuu i, na nasahnu xihin i. Jáchi nasativi i xihin ndinuhu ini i costumbre tásáhnú jícó nde. <sup>15</sup> Joo Ndióxi naçaxi a yeḥe janda tá cámaní cacu u ñuyiví yóho ta sahá ña cúní a caja ñamaní xihin i sahá ña cán quéa naçana mé á yeḥe. Ta tá naxinu coo quiví nasacu ini mé á <sup>16</sup> já najánaḥa Ndióxi Jesucristo, jahyi a nuú i já ná cuu çaxi tuhun i tuhun vaha saḥa mé á nuú na coó naquixi chichi Israel. Ta mé tiempo cán coó nasahan i çahan i xihin ni in ñayivi sahá ña najánaḥa Ndióxi nuú i. <sup>17</sup> Ta ni coó nasahan i ñuu Jerusalén çahan i xihin na cúu apóstol nu cuítí a juú ga yeḥe. Ña naçaja i quéa ivi laá naquee nasahan i ñundáhyi cuéntá Arabia. Ta tá nandihí nandico coo i chí ñuu Damasco.

<sup>18</sup> Ta tá sa nayaha uní cuia já nasahan i ñuu Jerusalén ndicuni táhan i xihin Pedro ta nasahin i saḥun quiví xihin

dá. <sup>19</sup> Ta cán naxini ri da cúu Jacobo, ñani Jesucristo joo coó naxini toho i na java ga cúu apóstol cán. <sup>20</sup> Sándehé caxí Ndióxi ña coo jándahvi toho i ndohó. Ña ndaa quéa cáhyí i nu ndó yóho.

<sup>21</sup> Tá nandihí já naquee e cuahan i chí ñundáhyi cuéntá Siria xihin Cilicia. <sup>22</sup> Joo mé tiempo cán na cúu cuéntá Jesús ndúu estado Judea a ñáha cuni na yeḥe, nduu. <sup>23</sup> Joo naxini joho na ña çahan java ñayivi sahá i: “Da naçaja xixi xihin yo jihna, da cán cúu da xica nuu çahan tuhun Ndióxi xihin ñayivi viti. Da naçuní jándihi sahá tuhun Ndióxi jihna, da cán cúu da jánaḥa ñayivi cándéé ini na mé á”, cáchí na. <sup>24</sup> Ta viti cája çahnu na Ndióxi sahá ña nandijama mé á yeḥe.

## 2

*Na apóstol ndiquehe vaha na Pablo.*

<sup>1</sup> Tá sa nayaha uxu comí cuia já nasahan tucu u ñuu Jerusalén. Nasahan Bernabé xihin i ta nasañehe ri i Tito nasahan da xihin nde. <sup>2</sup> Ta nasahan i jáchi nanaha Ndióxi nuú i ña ndítahan cuhun i. Ta tá nataca jín ndihi na náhnú, na comí cuéntá sahá na cúu cuéntá Jesús ñuu Jerusalén cán, já naçasáhá i ndícani i nu ná ndaja caa tuhun vaha saḥa Jesús ña jánaḥa i nuú na coó naquixi chichi Israel. Naçaja i ña yóho jáchi coo naçuní ña ná cachi na náhnú cán ña coo saḥa toho ña jánaḥa i. <sup>3</sup> Ta

nandiquehe vaha na ndehe ta ni coo nacaja ndusa na xihin Tito, da nasahin xihin i na ná chican da marca yiqui cuñu da vatí co cúu dá da naquixi chichi Israel. <sup>4</sup> Joo java na, na co xica ndaa ichi cuénta Jesús, nandihvi jehé na tañu nde na ná candehe na ndá quiahva núná nuú nde cája cáhnu nde Ndióxi sahá na candeé ini nde Jesús. Jáchí nanducú na cája ndusa na xihin nde na ná ndicó coo nde caja nde tóco ndihi na sáhdá ley Moisés. <sup>5</sup> Joo coo nacandusa toho nde tuhun cáhan na xihin nde jáchí cuni nde candaá ini ndó na ndaa cáhan saha Jesucristo, na cuu jáca cu ndaa ínima ndó tá ná candeé ini ndó mé á.

<sup>6</sup> Joo mé na náhnu, na cómi cuénta sahá na cúu cuénta Jesús cán coo nacachi na xihin i na ná ndijama i na jánaha i nuú ñayivi. Cáchi i na cúu ná na náhnu vatí co cája toho a nuú i ndá quiahva náhnu chuun ndójo na jáchí in cúu tóco ndihí nu Ndióxi. <sup>7</sup> Táhán ini na náhnu cán xihin na cája i jáchí nandicuni na na mé Ndióxi quea nasahan chuun yóho nuú i na caca nuu i cahan i tuhun vaha sahá Jesús nuú na coo naquixi chichi Israel. Ta sa mé Ndióxi quea nasahan chuun nu Pedro na ná cuhun da cahan da tuhun vaha sahá Jesús nuú na naquixi chichi Israel. <sup>8</sup> Ta sa mé Ndióxi, mé a nachindahá Pedro cahan da tuhun mé á nuú na naquixi chichi Israel, mé a yóho cúu

ri na nachindahá yehe cahan i tuhun mé á nuú na coo naquixi chichi Israel.

<sup>9</sup> Jacobo xihin Pedro xihin Juan cúu ná na náhnu cómi cuénta sahá na cúu cuénta Jesús nuu Jerusalén cán. Ta nandicuni na cán na nacaja Ndióxi cuahá ñamani xihin i tá nasahan mé á chuun yóho nuú i. Sahá na cán quea natiin na ndahá yehe xihin ndaha Bernabé ta xihin na yóho náha na in cúu nde cája chúun nde xihin tuhun Ndióxi. Na cája na cán quea cája chúun na xihin na naquixi chichi Israel nani ndehe cája chúun nde xihin na coo naquixi chichi Israel. <sup>10</sup> Ta in túhún ñamani naxica na nuú nde cája nde quea na ná a ndindójo nde chindeé nde na ndahví. Ta na yóho cúu ndusa na ndihi ini i cája i.

*Pablo jánani da Pedro nuu Antioquia*

<sup>11</sup> Joo tá nandique táhan i xihin Pedro nuu Antioquia já nu táhyi da najánani i da jáchí coo nacaja vaha da. <sup>12</sup> Na nacaja da quea naxixi da xihin na coo naquixi chichi Israel tá camani xinu coo java na Israel, na nachindahá Jacobo. Joo tá naxinu coo na Israel cán já nacasahá tává jiin Pedro mé dá nuú na coo naquixi chichi Israel ta ni co xixi ga da xihin ná. Jáchí nayihví da ndia cachi na Israel, na jánaha na co ndítahan cuxu na xihin na co cúu na Israel. <sup>13</sup> Ta xihin na yóho nachijehé Pedro na cáhvi ini da sahá na cán. Ta



java nã cúú cuéntá Jesús, nã naquixi chichi Israel cã nãcasáhá cája na tá quiahva cája Pedro. Ta jãnda Bernabé nãcaja da tá quiahva cája nã cã. <sup>14</sup> Andã já nãxini i ñã cõ xica na ichi cuéntá ñã ndaa xihín ndinuhu ini na tá quiahva sãhndá tuhun Ndióxi cája na sahã ñã cã quẽa najãnani i Pedro nu táhyí tóco ndihi ñayivi ndúu cã. Já nãcachi i já xihín dá: “Yóhó cúún dã Israel joo nãcasáhá cájún tá quiahva cája nã cõo naquixi chichi Israel jáchi cõ cájún ñã sãhndá ley Moisés viti. Sahã ñã cã quẽa cõ ndítahan nuún caja ndúsa tohún xihín nã cõo naquixi chichi Israel ñã ná caja na ñã sãhndá ley Moisés”, nãcachi i xihín dá.

*Jãcãcu Ndióxi ñayivi sahã ñã cãndeé ini na mé á*

<sup>15</sup> Jãnda quiví nãcacú cúú yó nã Israel ta cõ cúú yó tátuhun nã tóho, nã cáchi yõ cája cuachi sahã ñã cõ cája na ñã sãhndá ley Moisés. <sup>16</sup> Joo sã cándaã vaha ini ñã cõ ndúu ndaa ñayivi nu Ndióxi sahã ñã cája na ñã sãhndá ley Moisés. Jáchi nduu ndaa nã nu Ndióxi sahã ñã cãndeé ini na Jesucristo cuití va. Ta sã sahã mé ñã cã nãcãndeé ini Jesucristo já nãnduu ndaa yó nu Ndióxi ta cõ cúú á sahã ñã cája i ñã sãhndá ley Moisés jáchi ni in na a cuú nduu ndaa na nu Ndióxi sahã ñã cája na ñã sãhndá ley Moisés.

<sup>17</sup> Cãndehé ndo. Sahã ñã cúni yõ canduu ndaa yõ nu

Ndióxi sahã ñã cãndeé ini Jesucristo cuití va sahã ñã cã quẽa cõ cája ga i ñã sãhndá ley Moisés. Joo cáchi java ñayivi ñã ndójo i cuachi sahã ñã cõ cája i ñã cáchi mé ley. Vatí cõ cája i ñã cáchi ley Moisés, cõ cúni cachi ñã yóho ñã jácãhan Jesucristo mí caja i cuachi. Ñã yóho cõ cúú á ñã ndaa jáchi cõ jácãhan Jesucristo mí caja i cuachi. <sup>18</sup> Joo mé a ndaa caja i cuachi tá ná casáhá tucu cãndeé ini ley Moisés ñã ná jácãcu a mí jáchi sã najãndacoo i ñã tá nãcãndeé ini Jesucristo. <sup>19</sup> Ta viti cúú á tátuhun nãxihí yehe cuéntá ley jáchi cõ cómi ga ley cuéntá sahã i jáchi sahã ñã cãndeé ini i Jesucristo sahã ñã cã jácãcu Ndióxi yehe ñã ná catacu u cuéntá mé á. <sup>20</sup> Cúú á tátuhun nãxihí i ndica crúxu xihín Jesucristo tá nãxihí a. Sahã ñã cã quẽa cõ cája i tá quiahva cúni mé vi jáchi Jesucristo quẽa ndicaan ini i ta mé a cã quẽa ndãca yehe. Ta viti tóco ndihi ñã cája i ñuyiví yóho cája i ñã jáchi cãndeé ini i Jesucristo, jahyi Ndióxi, mé á nãxihí ndica crúxu sahã i sahã ñã quíhví ini a yehe. <sup>21</sup> Ta cõ cúni quehe núu i ñãmaní cája Ndióxi xihín i jáchi tá ná cuu nduu ndaa yõ nu Ndióxi sahã ñã cája i ñã sãhndá ley Moisés já quẽa mé a uun va quẽa nãxihí Jesucristo, nduu.

### 3

*Vaha chága cãndeé ini Jesús a juú ga cãndeé ini ñã sãhndá ley Moisés*

1 Á jána va jini ndó, na ndúu ñundáhyi Galacia. Yo já najándahvi ndohó ña ná jándacoo ndó ña ndaa. Jáchi tá naçahan nde tuhun Ndióxi xihin ndo já nandicani cáxi nde nu ndo ndá quiahva na xihí Jesucristo sahá cuachí. 2 Cuni johó ndó ná ndaça tuhún i ndohó: Á nandihvi ínimá yíi Ndióxi ini ínimá ndo sahá ña naçaja ndó ña sáhdá ley Moisés. Co cúu toho a já. Nasacuu a sahá ña naçandúsa ndó tuhun vaha sahá Jesucristo ña naçahan nde xihin ndo. 3 Mé a ndaa táhyi cúu ndó na najana jini. Jáchi tá naçasahá ndó xica ndó íchi cuéntá Jesús já nasandaca ínimá yíi Ndióxi ndohó. Ta viti cúni ndó ndicó coo ndó caha ndó ña sáhdá ley Moisés jáchi cáhan ndo ña cuu xinu coo ndó cacuu ndó ñayivi ndaa nu Ndióxi sahá ña caha ndó. Joo a cuú toho a. 4 Xini ñuhú ndicuhun ini ndo ndá quiahva nandoho nahá ini ndó sahá tuhun Ndióxi. Á mé a uun va nasacuu ña nandoho ndó jan. Caha i cuéntá uhun. 5 Jáchi sahan Ndióxi ínimá yíi mé á nu ndó ta cuahá ndivaha ña náhnu caha mé á tañu ndó ta coo cúu á sahá ña caha ndó ña sáhdá ley Moisés. Cúu á sahá ña candeé ini ndó mé á.

6 Cáchi tuhun Ndióxi ña nanduu Abraham ta ndaa nu mé á sahá ña naçandéé ini da Ndióxi. 7 Sahá ña cán quea ndítahan candaa ini ndó ña ndá na candeé ini Ndióxi, mé na cán cúu

ndusa na tátuhun na naquixi chichi Abraham. 8 Jáchi sa janda jihna naçachi tuhun Ndióxi ña vaxi quivi casahá Ndióxi jácacu a ñayivi, na coo naquixi chichi Israel tá ná candeé ini na mé á. Ña cán quea naçahan Ndióxi tuhun vaha yóho xihin Abraham já naçachi a já: “Saha mún tandaa tiempo caha cuahá i ñamaní xihin ñayivi canduu ndijáá ñuyívi”, cáchi a. 9 Sahá ña cán quea tá quiahva naçaja Ndióxi cuahá ñamaní xihin Abraham quiahva já caha ri a xihin tóco ndihi ñayivi tá candeé ini na mé á tá quiahva naçaja Abraham.

10 Joo ndá ñayivi nducú nduu ndaa nu Ndióxi sahá ña caha na ña cáchi ley Moisés já quea cuahan chahan jata ná. Jáchi cáchi tuhun Ndióxi já: “Chahan va cuahan jata tóco ndihi na coo xinu coo caha tóco ndihi cuíi ña cáchi ley ña naçahyí Moisés.” 11 Ta cáxi táhyi cáhan ña yóho xihin yo ña a cuú nduu ndaa ñayivi nu Ndióxi sahá ña sácú vaha na ley Moisés. Já cáchi tuhun Ndióxi já: “Ndá na cúu ñayivi ndaa nu Ndióxi catacu na sahá ña candeé ini na mé á”, cáchi a. 12 Joo jiin va cáchi ley Moisés jáchi cáchi a ña tá cúni na nduu ndaa na nu Ndióxi saha ley Moisés xini ñuhú caha na tóco ndihi cuíi ña cáchi mé ley. Ta coo cahan mé ley sahá ña candeé ini na Ndióxi.

13 Joo najácacu Jesucristo mí já ná a xinu coo chahan jata yo caha ley. Jáchi naquixi

cháhan jata mé á saha mí tá naxihí a ndica crúxu. Jáchi cáchi tuhun Ndióxi: “Cháhan cuahan jata ndihi na xihí ndica crúxu.” <sup>14</sup> Ta sahá ña nacaja Jesucristo tá naxihí a ndica crúxu sahá ña cán quéa tóco ndihí vatí cúu yó na Israel á na co cúu na Israel, ñehe táhvi yo ñamaní Ndióxi tá cándéé iní mé á. Jáchi já nasahan Ndióxi tuhun a nu Abraham jihna. Ta viti quiahva mé á ínima yíi á nu yo tá cándéé iní mé á jáchi já nasahan Ndióxi tuhun a nu yo.

*Ña cáchi ley Moisés xihín ña cáchi tuhun nasahan Ndióxi nuú Abraham*

<sup>15</sup> Ñani mí i, na cúu cuénta Jesús, candehé ndo ná cahan i xihín ndo ndá quiahva cája ñayivi tá sahan na tuhun na nuú inga ñayivi. Tá cávaha na in tutu ta tá nandihí nacahyi na quivi ná nu á já quéa ni in túhún toho ñayivi a cuú ndijama na ña sa nacahyi cán ta a cuú chicaan chága na tuhun nuú mé tutu. <sup>16</sup> Cándehé ndo. Nasahan Ndióxi tuhun a nuú Abraham ta nuú in da quixi chichi da. Joo coo nacahan Ndióxi sahá cuahá ñayivi quixi chichi da. Nacahan Ndióxi sahá in tálaá jahyi da ta mé a cán cúu á Jesucristo. <sup>17</sup> Ña cúní cachi i quéa: Nasahan Ndióxi tuhun a nuú Abraham ta nasacuu a tátuhun nacahyi Ndióxi quivi á nuú in tutu. Sahá ña cán quéa a cuú jándihí ley Moisés sahá tuhun nasahan Ndióxi nuú Abraham. Jáchi jihna

ñuhú nasahan Ndióxi tuhun a nuú Abraham ta tá sa nayaha comi ciento oco uxu cuiá já nasahan Ndióxi ley nuú Moisés. Ta mé ley yóho a cuú toho ndijama tuhun nasahan Ndióxi nuú Abraham. Ta mé ley a cuú ndaja núu a tuhun nasahan Ndióxi nu dá jihna. <sup>18</sup> Joo ña sahan Ndióxi nuú ñayivi co quixi a sahá ña sácú vaha na ley Moisés. Jáchi tá ná quixi a quiahva já co cúu ga sahá ña nasahan Ndióxi tuhun a ña caja mé á ña. Ña nayaha quéa nacacúni Ndióxi caja ñamaní uun xihín Abraham ta coo nasacuu a sahá ña nasacu vaha da ley Moisés.

<sup>19</sup> Ta viti, á ndaca tuhún ndo ndá saha nasahan Ndióxi ley nuú Moisés. Nasahan Ndióxi ña jáchi cúní a ña ná candaa ini ñayivi ndá quiahva sáa ini na caja na ña cúní Ndióxi. Ta nasacu ini a candoo ley janda quiahva ná xinu coo mé a quixi chichi Abraham cán. Jáchi mé a cán quéa nasahan Ndióxi tuhun a quixi. Ta táto Ndióxi quéa nacahan ley yóho xihín Moisés ta najáyaha da ña nuú ñayivi. <sup>20</sup> Joo tá nasahan Ndióxi tuhun a nuú Abraham coo naxini ñuhú toho a ñayivi jáyaha na ña. Ta coo nacaja chúun a tátó mé á jáchi in túhún Ndióxi nacaja mé á ña.

*Ña cúní ley caja í*

<sup>21</sup> Jihna ñuhú nasahan Ndióxi tuhun a nuú Abraham anda jáví nasahan ley nuú Moisés. Á cúní cachi ña yóho

ñā cō ndique táhan ley Moisés xihín tuhun nasahan Ndióxi nuú Abraham. Cō cúú a já. Jáchi tá ná cuu jácacu ley Moisés ñayivi já quēa cuu nduu ndaa na nu Ndióxi sahá ña sácú vaha na ña sáhdá mé ley. Joo cō cúú a já. <sup>22</sup> Jáchi cáchi tuhun Ndióxi ña mé cuachi cándíhi a tóco ndihi ñayivi. Joo tá ná candéé iní Jesucristo já cuu ndiquehé ña nasahan Ndióxi tuhun a quiahva nu tóco ndihi ñayivi sahá ña candéé ini na mé á.

<sup>23</sup> Tá cámani quixi Jesucristo já nasacomí ley cuéntá saha yō ta nasandaca mí janda quiahva naxinu quiví nanaha Ndióxi nu yō ña ndítahan candéé iní Jesucristo. <sup>24</sup> Nasandaca ley mí tá quiahva cája in dataa xihín jahyi válí da anda quiahva naquixi Jesucristo, mé á nacaja ña ná canduu ndaa yō nu Ndióxi sahá ña candéé iní mé á. <sup>25</sup> Ta viti cō cómí ga ley cuéntá saha yō jáchi cómí Jesucristo cuéntá saha yō tá cándúsa í mé á.

<sup>26</sup> Ta in nanduu ndó xihín Jesucristo sahá ña candéé ini ndó mé á ta já nanduu ndó jahyi Ndióxi. <sup>27</sup> Ta tá nacandúta ndo já in nanduu ndó xihín Jesucristo ta nanduu ndó tá quiahva ín mé á. <sup>28</sup> Ta cō cája toho a tá cúú ndó na naquixi chichi Israel, á cō cúú toho ndó na. Ta cō cája toho a á cúú ndó na naxeen ñayivi caja chúun nu ná, á cō cúú toho ndó na. Ta cō cája toho a á cúú ndó taá á ñaha. Jáchi tá nacandúsa ndó

Jesucristo já in nanduu tóco ndihi ndó jáchi in nanduu ndó xihín mé á. <sup>29</sup> Ta sahá ña cómí Jesucristo cuéntá saha ndo sahá ña cán quēa cúú ndó tátuhun na naquixi chichi Abraham. Ta sahá ña cán quēa ñehē táhvi ndó ña nacachi Ndióxi quiahva nuú da cán tá nasahan tuhun a nuú Abraham sanahá.

## 4

<sup>1</sup> Ña cúní cáchi i cúú ña yóho: Cúú á tátuhun tá sahan in dataa tóco ndihi ña cómí da nuú jahyi da. Joo nani cúú dá taá loho já a cuú cacomí da cuéntá sahá ña nandiquehe da ndaha tátá da. Cúú dá tátuhun mozo vatí tandaa quiví cacomí da cuéntá saha tóco ndihi ñaha tátá da. <sup>2</sup> Jáchi ndúu java ñayivi, na cómí tóo cuéntá saha mé dá ta saha tóco ndihi ña najandacoo tátá da nu dá janda quiahva ná xinu cōo quiví nasacu ini tátá da. <sup>3</sup> Quiahva já yaha ri xihín mé ví. Jáchi jihna nasacuú tátuhun navalí. Nasacomí ley na Israel cuéntá saha yō tátuhun cája xitoho xihín mozo da. <sup>4</sup> Joo tá naxinu cōo quiví nasacu ini Ndióxi já nachindahá mé á Jesucristo, jahyi a. Ta in ñañaña ñuyiví yóho nasacuu ña najácacu ñahá. Ta nacaja mé á ña sáhdá ley Moisés. <sup>5</sup> Ta naxihí a ndica crúxu já ná cuu chahvi a saha cuachi ña ná janí yó nu ley ña nasacomí cuéntá saha yō. Ta xihín ña yóho nacuu nanduu jahyi Ndióxi.

<sup>6</sup> Ta sahá ña nanduú jahyi mé á sahá ña cán quea nanchindahá Ndióxi ínimá jahyi a ña ná ndicaan mé á ini ínimá yo já quea ná cuu cahan yó xihín Ndióxi já cachi yó já: “Tátá maní i.” <sup>7</sup> Ta viti co cúu ga yó tátuhun mozo jáchi co cómi ga ley cuéntá saha yo ta nanduú jahyi Ndióxi viti. Ta viti cuu ñehe táhvi yó quehé ña nasacu ini mé á quiahva nuú na cúu cuéntá mé á sahá ña nacaja Jesucristo.

*Ndicani ini Pablo sahá na cúu cuéntá Jesús ñundáhyi Galacia*

<sup>8</sup> Jihna ga tá coo nacandaa ini ndó saha Ndióxi já nacaja cáhnu ndó java ga ndiόxi ña co cúu toho ndiόxi joo nasacomí a cuéntá saha ndo. <sup>9</sup> Ta viti sa xini ndó Ndiόxi joo vaha chága ná cachi i ña sa xini Ndiόxi ndohó. Ta ndivaha cúni ndó ndicó coo tucu ndó caja ndó tá quiahva nacaja ndó jihna. Jáchi co ndiyahvi toho ña nacaja ndó cán ta ni a cuú chindeé a ndohó. <sup>10</sup> Joo cája tucu ndó víco ta xihín ña yóho cája cáhnu ndó java quivi xihín yo xihín cuia. <sup>11</sup> Ndicani ndivaha ini i saha ña cája ndó jan. Jáchi viti co cándaá ini i á mé a uun va nasacuu chuun nacaja i tañu ndó jan.

<sup>12</sup> Candehé ndó, ñani mí i, na cúu cuéntá Jesús. Xíca tahvi i nu ndo ña ná caja ndó tá quiahva cája i viti. Jáchi najándacoo i cája i ña sáhdá ley tá ndihvi i íchi cuéntá Jesús. Vaha ndivaha nacaja ndó xihín i tá nasahin i xihín

ndó jan. <sup>13</sup> Ta cája i cuéntá ndicuhun ini ndó ña quihvi ndivaha i tá nu cuítí nasahan i caxi tuhun i tuhun vaha sahá Jesús tañu ndó jan. <sup>14</sup> Ta sahá cuehe nandoho i nacuu candají ndó yehe, nduu. Joo coo nacaja ndó ña. Ña nacaja ndó quea nandiquehe vaha ndó yehe ta nacaja ndó xihín i tá quiahva ná caja ndó xihín in táto Ndiόxi á xihín Jesucristo. <sup>15</sup> Ta nacajii ndivaha ini ndó mé tiempo cán. Jáchi xini vaha i ña nasahin tiaha ndó tavá ndó nduchú nuú ndo quiahva ndó ña nuú i, nduu tá ná cuu caja ña ná ndivaha i. <sup>16</sup> Joo viti nanduú u tátuhun in da ihvi ndo sahá ña cahan i ña ndaa sahá Jesucristo xihín ndo.

<sup>17</sup> Ndúu java ñayivi tañu ndó jan ta co jánaha na ña ndaa nu ndo. Cája cuaha ná ñamaní xihín ndo joo a juú ña vaha quea cúni na xihín ndo. Ña cúni na quea ná jácaxoo táhan í ta ná ndihi ini ndó saha ña jánaha mé ná. <sup>18</sup> Co cúni cachi i ña a váha toho ndihi ini sahá ñayivi. Vaha va ná caja í ña nú tiempo ta xihín ndinuhu ini. Joo ñayivi jan ndihi ini na saha ndó tá íin yehe tañu ndó cuití va. <sup>19</sup> Candehé ndó, jahyi a. Nacasáhá ndihivi tucu ini i saha ndo. Tá quiahva ndihivi in ñánáha tá sáhdá a tíxi ná cácu jahyi ña quiahva já ndihivi ini i saha ndo. Ta ndoho tá ndoho chága ini i saha ndo janda quiahva ná caja ndó ña cúni Jesucristo. <sup>20</sup> Viti ñuhú cúu

ini i coo i jan já ná cuu cahan vaha chága i xihín ndo jáchi janda nu íin i yóho ndícani ndivaha ini i saha ndo.

*Ña nacaja Agar xihín ña nacaja Sara sanahá*

<sup>21</sup> Candehé ndo. Mé ndó, na cuni ndiquiahva tucu ndáha ley Moisés, xini ñuhú candehé vaha ndó ña cáchi mé ley cán. <sup>22</sup> Cáchi a ña nacacu ivi jahyi ta Abraham. In jahyi da nacacu xihín Agar, ña cúu mozo ñájíhí da ta inga jahyi da nacacu xihín Sara, ña cúu ñájíhí vaha da. <sup>23</sup> Tá nacacu jahyi ta Abraham xihín Agar cán, nacacu a tá quiahva cacu tóco ndihi ñayivi. Joo jahyi ta da, da nacacu xihín ñájíhí vaha da, ña naní Sara cán nacacu a jáchi nasahan Ndióxi tuhun a nu dá ña ná cacu a. <sup>24</sup> Candehé ndo ña náha ña yóho nu yo. Ndívi najihí yóho cúu ná tátuhun ivi tuhun nasahan Ndióxi nu yo. In táhan tuhun yóho cúu á ley nasahan Ndióxi nu Moisés jini yucu naní Sinaí cán. Ta Agar cúu yuhú nu ley yóho. Ta jahyi ña cán tá nacacu a nandu a mozo. Ta na ndico ley cúu ná tátuhun jahyi Agar jáchi cómi ley cuénta saha ná. <sup>25</sup> Ta Agar cúu ña yuhú nu ley ña nasahan Ndióxi nu Moisés yucu naní Sinaí, ña ndacaan chí ñundahyi Arabia cán. Ta jari mé ña cúu ña yuhú nu Jerusalén, ña cúu jini nu tóco ndihi na cája ña sáhdá ley Moisés. Ta mé ña xihín na ndúu cán cúu ná

tátuhun mozo jáchi cómi ley cuénta saha ná. <sup>26</sup> Joo íin inga ñuu Jerusalén, ña íin indivi cán. Ta ñayivi ndúu cán co cúu toho na mozo jáchi cúu ná tátuhun jahyi Sara, ñájíhí vaha Abraham. Ta mí cúu yó tátuhun na ndúu ñuu cán jáchi cándeé iní Jesucristo. <sup>27</sup> Já cáchi tuhun Ndióxi já:

Xini ñuhú cajii ini ndó najihí, na a cuu cacu jahyi.

Cayuhú ndó xihín ña cáji íni ndo,

vatí a ñaha cahnda tixi ndó cacu jahyi ndó.

Jáchi najihí, na najándacoo tóo yi canduu chága jahyi na a juu ga najihí ndúu yi, cáchi tuhun Ndióxi.

<sup>28</sup> Candehé ndo, ñani i, na cúu cuénta Jesús. Cúu yó tátuhun Isaac, jahyi Sara cán saha ña cándeé iní Jesús jáchi cúu yó jahyi nasahan Ndióxi tuhun a quiahva nu Abraham. <sup>29</sup> Joo tá quiahva nacaja da cúu jahyi Agar sanahá tá nacasahá da cája xixi da xihín da cúu jahyi Sara quiahva já íin a viti jáchi na sácú vaha ley Moisés cája xixi na xihín na cándeé ini Jesucristo. <sup>30</sup> Joo cuni joho ndó ña cáchi tuhun Ndióxi tá nacahan Ndióxi xihín Abraham: “Tavá ña cúu mozo jan ná quee ña cuhun ña xihín jahyi ña. Jáchi da cúu jahyi mozo jan a cúu ñehe táhvi dá ndiquehe da ña quiahva i nuu da cúu jahyi ñájíhí vahún jan”, nacachi Ndióxi sanahá. <sup>31</sup> Candehé ndó, ñani i, na cúu cuénta Jesús. Co cúu yó tátuhun jahyi

ñá cúú mozo jan jáchi cō cómi ga ley cuéntá saha yo. Viti cúú yó tátuhun jahyi Sara, ñá cúú ñájíhí vaha Abraham cán jáchi cō ndúu ga yó ndáha ley Moisés sahá ña cándéé ini Jesucristo.

## 5

*Sa najani yo ndáha ley Moisés naçaja Jesucristo*

<sup>1</sup> Cō ndúu ga yó ndáha ley Moisés sahá ña naçaja Jesucristo. Ta viti cándéé ini ndó mé á sahá ña cán queá xini ñúhú canduu ndacu ndo ta cō ndítahan nu ndó ndicó cōo ndó caja ndó ña sáhdá mé ley cán.

<sup>2</sup> Cuni johó ndó ña cáhan i xihín ndo. Tá ná cándéé ini ndó ña cuu nduu ndaa ndó nu Ndióxi sahá ña chícaan na marca yiquí cuñu ndó já queá cuni cachi a ña quehe núu ndó ña naçaja Jesucristo tá naxihi a ndica crúxu saha ndo. <sup>3</sup> Cándéhé ndó ná cahan tucu u xihín ndo. Tá cuni ndó canduu ndaa ndó nu Ndióxi sahá ña chícaan ndó marca yiquí cuñu ndó já queá ndítahan nu ndó caja ndó tóco ndihi cuií ña sáhdá ley Moisés. <sup>4</sup> Mé ndó cúú ndó na cuni canduu ndaa nu Ndióxi sahá ña sácú vaha ndó ley Moisés. Ta viti naçaxoo ndó nu Jesucristo ta naçaxoo ndó nuú ñamaní cuni Ndióxi caja xihín ndo. <sup>5</sup> Joo mé nde xini vaha nde ndúu ndaa nde nu Ndióxi sahá ña cándéé ini nde Jesucristo. Ta ndáti tiaha nde jáchi chindeé ínima yii Ndióxi ndehe. <sup>6</sup> Jáchi tá

in nanduú xihín Jesucristo já queá cōo caja toho a á naquihvi marca yiquí cuñu í á cōo a. Ña ndiyahvi ndusa queá ña cándéé ini Jesucristo jáchi xihín ña yóho cuu quihvi ini ñani táhan í.

<sup>7</sup> Sa vaha ndivaha va cuahan ndó xihín ña cándéé ini ndó Jesús. Yo já nandijama jini ndo ña ná a cándúsa ga ndó ña ndaa. <sup>8</sup> A juú toho Ndióxi nandijama jini ndo jáchi mé a cán queá naçana ndohó ña ná cacuu ndó cuéntá mé á. <sup>9</sup> Xini ñúhú ndicuhun ini ndó in tuhun ta já cáchi a “Vatí loho yusá naxaa ná cava táhan í xihín yusá cuaha cán jativí ñahá a.” Quiahva já cája na cuni ndijama jini ndo jan. <sup>10</sup> Joo cándéé ini i Jesucristo, xitoho í sahá ña cán queá xini vaha i ña a cándúsa ndó na jan ta ndicó cōo ndó cahvi ini ndó tá quiahva cáhvi ini yehe. Ta jándoho Ndióxi ini na xíca jájaca xini túni ndó jan ta cōo caja toho a ndá na cúú ná.

<sup>11</sup> Joo yehe jánaha i nuú na cúú cuéntá Jesús ña cō ndítahan ga chícaan na marca yiquí cuñu na ta sahá ña cán queá ndicuita na Israel xihín i. Tá ná jánaha i nuú ñayivi ña ndítahan chícaan na marca yiquí cuñu na já queá a ndicuita ga na cán xihín i. Joo mé a ndaa cándají na cán yehe jáchi jánaha i nuú ñayivi ña cuu cacu ndaa ínima ná sahá ña cándéé ini na Jesucristo cuití va, mé a naxihi ndica crúxu saha yo. <sup>12</sup> Sahá ña cuni na cán caja ndúsa na xihín

ndó chicaan ndó marca yiquí cuñu ndó sahá ña cán quéa cája i cuéntá vaha chága ná chitúhun ndihi mé ná yiquí cuñu na ta ná jándacoo táji ná ndohó.

13 Candehé ndó, ñani i. Co ndúu ga ndó ndáha ley Moisés nacaja Jesucristo. Joo co cuni cachi ña yóho ña najani ndo já ná cuu caja ndó ndá ña núu ña xíca ini yiquí cuñu ndó caja. Jáchi nacana Ndióxi ndohó ña ná quihvi ini táhan ndó ta ná chindeé táhan ndó. 14 Joo tóco ndihi ña cúu ley Moisés in cáchi ndihi a tá cáchi a já: “Quihvi inún ñani táhún tá quiahva quihvi inún mún.” 15 Joo cuéntá coo ndó jáchi tá casáhá ndo cája xíxi xihin táhan ndó ta cája quini xihin táhan ndó já quéa xinu quivi jándihi saha táhan ndó.

*Ña cuni inima yii Ndióxi caja í xihín ña cuni yiquí cuñu í caja í*

16 Candehé ndo, ñani i. Nditahan caja ndó ña cuni inima yii Ndióxi ta co ndítahan caja ndó ña xíca ini yiquí cuñu ndó caja. 17 Jáchi tóco ndihi ña núu ña cuni yiquí cuñu yó caja í cáni táhan xihín ña vaha ña cuni inima yii Ndióxi caja í. Ta a cuú cuni táhan inima yii Ndióxi xihín ña núu jáchi co ndíque táhan vaha ña núu xihín ña vaha sahá ña cán quéa a cuú caja í ndá ña nacuu cuni yó caja í. 18 Ta tá ná ndiquiahva ndó mé ndó ña ná candaca inima yii Ndióxi ndohó já quéa a cacomí ga ley Moisés cuéntá saha ndo.

19 Ta co yancá toho ndícuni ndá na cúu na cája ña núu ña cuni mé ná caja na. Jáchi ña cája na cúu ña yóho: ndúu na xihín na co cúu ñájíhi na á yíi ná ta cája na tá nuú ña núu xihín yiquí cuñu na. Ta ndícaji ini na cuju na xihín ñáha á ta. 20 Cája cáhnu na yoco xihín tiniñu yúu ta cája na ña táji. Ta cándaji táhan na. Ta cáni táhan na ta ndácaan ña cuiñú jini ná. Ta cama chá jáa xihín táhan na. Ta cáhvi ini na saha mé cuití va na. Ta cátóo na jácani táhan na ñayivi já ná canduu jín na. Ta xihín ña yóho sáhdá táhan na ñayivi. 21 Cúu ná ñayivi ihvi ini ta cúu ná na sáhní ndii ta cúu ná na xíhi. Ta a juú quiahva ndehé na ta cuahá ndivaha java ga táhan ña yóho cája na. Joo mé ndó cuni johó ndó ná cahán tucu u ña sa nacachi i jihna xihín ndo: Ndá na cája já a ñehe táhvi toho na cacomí Ndióxi cuéntá saha ná.

22 Joo tá ndícaan inima yii Ndióxi iní já quéa cája mé á ña ná quihvi ini táhan í ta cája ña ná cajii iní ta cája ña ná coo vaha iní ta cája ña ná a cójo cama iní ta cája ña ná chindeé yó ñayivi ta cája ña ná cacuú ñayivi vaha ini ta cája inima yii Ndióxi yóho ña ná cacuú ñayivi, na co cáhvi ivi johó ini. 23 Ta cája ña ná cacuú ñayivi, na co ndíñehe jícó mé, na cúu sáhnü mé. Ta ni in túhún toho ley a cuú chicaan cuachi jatá ñayivi tá sácú vaha na tóco ndihi ña cáchi túhun yóho. 24 Tóco ndihi na cómi Jesucristo cuéntá



saha, sa najándacoo na ña núu nasacahvi ini na caja na xihín yiquí cuñu na. Ta cúu ná tátuhun na sa naxihí nuú cuachi nasacaja na. <sup>25</sup> Co cája ga yó cuachi nacaja í jihna sahá ña ndácaan ínimayí Ndióxi ini. Ta xíní ñúhú quiahva í ñamaní nuú mé á ña ná candaca a mí nuú ndihi ña caja í.

<sup>26</sup> Ta co ndítahan ndiñehe jícó yo mí ta ni co ndítahan jácani táhan í ñayivi ta ni co ndítahan cahihvi ini xihín táhan í.

## 6

*Ndítahan nuú na cúu cuénta Jesús chindeé táhan na*

<sup>1</sup> Candehé ndó, ñani í. Tá naxini ndó nandicava in na cúu cuénta Jesús nuú cuachi já queá ndítahan nuú ndóhó, na nachutú ndaa ínimayí xihín ínimayí Ndióxi, chindeé ndó na já ná ndicaca vaha na íchi cuénta Jesús. Joo víi víi cahan ndó xihín ná jáchi ndítahan cahvi ini ndó ña vaxi quiví tá cuu ndicava ri ndóhó va nuú cuachi. <sup>2</sup> Xíní ñúhú chindeé táhan ndó tá ndóho ini ndó. Ta xihín ña yóho jáxinu coo ndó ña sáhdá Jesucristo nuú ndó caja ndó.

<sup>3</sup> Tá ndúu java na tañu ndó ta cáhan na cúu ná na náhnu ndivaha vatí co cúu á ña ndaa já queá jándahvi na mé va na. <sup>4</sup> Tá in tá in ndó ndítahan candehé ndó ndá quiahva cája ndó já ná cuu cajii ini ndó tá cája vaha ndó. Ta co ndítahan ndiñehe jícó ndo mé ndó sahá ña cáhan ndo ña

vaha chága cája mé ndó a juú ga inga ga na. <sup>5</sup> Jáchi tá in tá in ndó ndítahan nuú ndó candehé ndó ña cája ndó, á cúu á ña vaha á cúu á ña núu.

<sup>6</sup> Tóco ndihi ndó, na jácuaha tuhun Ndióxi ndítahan nuú ndó chindeé ndó na jánaha ndohó xihín ña cómi ndo.

<sup>7</sup> Jándahvi ndó mé ndó tá cáhan ndo ña cuu jándahvi ndó Ndióxi jáchi a cuú jándahvi ñayivi Ndióxi. Sa xíní ndó tá xútu ndó in tata nuú ñúhu já queá vaxi quiví tá jáquee ndó mé ñaha naxutu ndó. <sup>8</sup> Tá cája ñayivi ña núu ña cúní mé cuití na já queá vaxi quiví cuhun na indayá sahá ña núu nacaja na. Joo tá cája na ña vaha ña cájii ini ínimayí Ndióxi xihín já queá ñehe táhvi na cuhun na coo na xihín Ndióxi anda ama cáa quiví, caja ínimayí Ndióxi. <sup>9</sup> Sahá ña cán queá a cánaá yó cája í ña vaha jáchi tá ná a jándacoo í cája í ña cúní Ndióxi já queá vaxi quiví quiahva Ndióxi nuú yo ña ndítahan ndiquehé sahá ña táhan ini mé á xihín ña nacaja í. <sup>10</sup> Sahá ña cán queá tá núná nuú yó caja vaha í xihín tóco ndihi ñayivi cóho caja í ña. Ta cachí ga ví tá cúu ná na cándeé ini Jesús.

*Ndindayí Pablo na cúu cuénta Jesús*

<sup>11</sup> Candehé ndó ndaja náhnu letra cáhyí í nuú ndo xihín ndáha mí í viti. <sup>12</sup> Cúní ña ná candaa ini ndó sahá java ga ñayivi, na cúní caja ndúsa xihín ndo ña ná chícáan ndó marca yiquí cuñu ndó.

Cája na ña yóho jáchi cún̄i na candoo vaha na nuú na Israel. Ta yíhvi na ndicuīta ñayivi xih̄in ná sahá ña cándúsa na Jesucristo, mé a naxih̄i ndica crúxu sahá cuachí. <sup>13</sup> Joo mé na chicaan marca yiquí cuñu cán co sácú vaha na tóco ndihi ña sáhndá ley Moisés. Joo cún̄i na ña ná chicaan ndó marca yiquí cuñu ndó já ná cuu cahan lándá na nuú na Israel sahá ña naja ndúsa ná xih̄in ndo.

<sup>14</sup> Joo yehe, ni in túhún toho ñaha co cún̄i cahan lándá i saha. Ña cún̄i caja i quéa cahan i sahá Jesucristo, mé á naxih̄i ndica crúxu. Ta sahá ña cándeé ini i Jesucristo sahá ña cán quéa cúu á tátuhun naxih̄i i nuú ña núu ñuyíví yóho. Co cún̄i ga i cája i ña cája ñayivi ñuyíví ta co cún̄i na cán catáhan na xih̄in i.

<sup>15</sup> Ta co ndiyahvi nu Ndióxi á naquihvi marca yiquí cuñu í á coó a. Ña ndiyahvi ndusa quéa ña nanduú ñayivi saá sahá ña cándeé ini Jesucristo. <sup>16</sup> Cún̄i ña ná coo vaha ini ndó, na cája ña cahan i yóho. Ta ná caja Ndióxi cuahá ñaman̄i xih̄in ndó ta xih̄in tóco ndihi na cúu cuéntá mé á.

<sup>17</sup> Ta viti xih̄in chinuu co cún̄i ga i ña ná jáquihvi ga ñayivi yehe. Jáchi tóco ndihi yanda ndáá a nu yiquí cuñu i náha ña mé a ndaa cúu u da cája chúun cuéntá Jesucristo.

<sup>18</sup> Ñani i na cúu cuéntá Jesús, ña cún̄i quéa ná caja Jesucristo, xitoho í cuahá ñaman̄i xih̄in ndihi ndó. Já ná coo.

## Carta nacahyí Pablo nuú na cúu cuéntá Jesús ndúu ñuu Efeso

*Chíndahá Pablo Ndióxi coo na cúu cuéntá Jesús ndúu ñuu Efeso*

<sup>1</sup>Yehe cúu Pablo, da nacaxi Ndióxi cacuu apóstol cuéntá Jesucristo. Cáhyí i carta yóho nuú na cúu cuéntá Ndióxi ndúu ñuu Efeso, na cándéé ini Jesucristo. <sup>2</sup>Ña cúni queá ná caja Ndióxi, tátá yo xihín Jesucristo, xitoho í cuahá ñamaní xihín ndó ta ná caja mé á ña ná coo vaha ini ndó.

*Ñehe táhvi yó cuahá ñamaní cája Ndióxi sahá ña cándéé ini Jesucristo*

<sup>3</sup>Cóho caja cáhnu í Ndióxi, mé a cúu tátá Jesucristo, xitoho í. Cóho caja cáhnu í mé á jáchi cuahá ndivaha ñamaní nacaja xoho. Ta tá nuú ña vaha quíxi indiví nasahan ndihi mé á nu yo jáchi in cúu yo xihín Jesucristo. <sup>4</sup>Janda tá camaní cava sáhá saha ñuyiví já nacaxi Ndióxi mí ña ná cacuu cuéntá mé á sahá ña nacaja Jesucristo. Ta nasacu ini a ndaja mí ña ná cacuu ñayivi yí, na cóo ga cuachi nu mé á. <sup>5</sup>Quíhvi ndivaha ini a mí sahá ña cán queá sa nasacu ini mé á ña ná quivi Jesucristo saha yo já ná nduú jahyi mé á. Já nacaja jáchi já cúni a coo. <sup>6</sup>Sahá ña cán queá ndítahan nu yo caja cáhnu í Ndióxi ní

tiempo jáchi cuahá ndivaha ñamaní cája mé á xihín yo tá nacaja mé á ña in nanduú xihín Jesucristo, jahyi máni á. <sup>7</sup>Nacaja Ndióxi ñamaní cáhnu xihín yo tá naxita ní Jesucristo ndica crúxu saha yo. Anda jáví cuu jácacu a mí ta cuu caja cáhnu ini a sahá cuachi. <sup>8</sup>Mé a ndaa nacaja cuahá ndivaha Ndióxi ñamaní xihín yo. Nacaja mé á ña ná ndindichí jini yo já ná candaá ini tuhun mé á. <sup>9</sup>Ta nasahan ñamaní nu yo ña ná candaá ini ña nasacu ini mé á caja jáchi janda sanahá nasahin jehé a nu yo joo viti sa candaá ini ndá saha nachindahá mé á Jesucristo. <sup>10</sup>Ta vaxi quivi coo ña nasacu ini mé á coo. Ta mé quivi cán caja Ndióxi ña ná cacomí Jesucristo cuéntá saha tóco ndihi ñaha ndúu ñuyiví xihín ña ndúu indiví jáchi tóco ndihi ñaha xinu a canduu a ndáha Jesucristo.

<sup>11</sup>Ta coo tá quiahva nasacu ini Ndióxi coo jáchi cája mé á tóco ndihi ña sácú ini a caja. Janda sanahá ndivaha nasacu ini a caxi a mí cacuu ñayivi ñehe táhvi ndiquehé ña vaha, ña quíxi nu iin mé á sahá ña in nanduú xihín Jesucristo. <sup>12</sup>Sahá ña cán queá ndítahan nuú nde caja cáhnu nde Ndióxi ña ná nahá ndaja cáhnu cúu mé á jáchi jhna ñuhú nde nacasáhá cándéé ini nde Jesucristo. <sup>13</sup>Ta quiahva já nacaja ri ndóhó va jáchi tá naxini johó ndó ña ndaa sahá Jesucristo já nacandéé ini ndó mé á. Mé

tuhun yóho najánaha nu ndo ndá quiahva najácaacu mé á ndohó. Ta tá nācandúsa ndó a já in nanduu ndó xihin á ta cúu á tátuhun nanani marca Ndióxi ndohó ña náha ña mé a ndaa cúu ndó cuéntá mé á. Ta mé marca yóho cúu ínima yii mé á ña nasahan tuhun a nu ndó quiahva nu ndo. <sup>14</sup> Ta ndácaan ínima yii mé á ini ínima yo sahá ña cán quéa cāndaā vaha iní ña vaxi quivi ndiquehé ña vaha, ña quiahva Ndióxi nu yo jáchi sa nasahan mé á tuhun a caja ña. Ta sa já ndácaan ínima yii mé á ini ínima yo janda quiahva ná xinu quivi jácaacu a mí nuu cuachí. Sahá ña cán quéa cóho caja cáhnu í mé á ña ná naha ndaja cáhnu cúu mé á.

*Xíca tahví Pablo nu Ndióxi ña ná quiahva mé á ña ndichí jini na cúu cuéntá Jesús*

<sup>15</sup> Ta sahá ña sa cāndaā vaha ini i ña cāndeé ini ndó Jesucristo, xitoho í ta sahá ña sa cāndaā ini i ña quihvi ini ndó tóco ndihi na cúu cuéntá Ndióxi <sup>16</sup> sahá ña cán quéa co jándacoo i ña ndiquiahva i ndixahvi nu Ndióxi saha ndo. Ta co ndíndójó i caca tahví i nu Ndióxi saha ndo. <sup>17</sup> Ta tá xíca tahví i nu Ndióxi, mé a cúu tátá Jesucristo, xitoho í, mé a cúu Ndióxi cáhnu ndivaha já xíca tahví i nu á ña ná quiahva ínima yii mé á nu ndó. Anda já caja mé á ña ná ndindichí jini ndo já ná naha ndaja cáa Jesucristo. Ta xihín ña yóho cāndaā vaha chága ini ndó saha mé á. <sup>18</sup> Ta

xíca tahví i nu Ndióxi ña ná jándiyehé a xini túni ndo já ná cāndaā ini ndó sahá ña vaha caja mé á chága chí nuu xihin ndo. Ta ñúchí ndivaha coo tá ná xinu quivi ndiquehe Ndióxi ndohó cuhun ndó coo ndó xihin mé á anda ama cáa quivi sahá ña cúu ndó cuéntá mé á. <sup>19</sup> Ta xíca tahví i nu á ña ná cāndaā ini ndó ña co vāja xinu coo nu ndihi ndée Ndióxi jáchi in ndivaha ndée mé á. Ta in mé ndée yóho tañu mí, na cúu cuéntá mé á. Ta sa mé ndée yóho quéa nācaja chúun Ndióxi <sup>20</sup> tá najānditacu a Jesucristo. Anda jávi nasacu coo a ña xoo cuáha mé á indivi. <sup>21</sup> Ta nācaja Ndióxi ña ná nduu Jesucristo jini nu tóco ndihi na in ndée cahnda chuun ñuyiví yóho xihín na in ndée cahnda chuun indivi. Sáhndá Jesucristo chuun nu tóco ndihi na cán vatí cúu ná na ndúu tiempo viti á cúu ná na vaxi chága chí nuu. <sup>22</sup> Tóco ndihi ñaha ndúu indivi xihín ñuyiví nandiquiahva Ndióxi ña ndáha Jesucristo ña ná cacomí mé á cuéntá sahá. Ta sa mé á cúu á jini nu tóco ndihi na cāndeé ini mé á. <sup>23</sup> Ta tóco ndihi na cúu cuéntá Jesucristo cúu ná tátuhun yiquí cuñu mé á sahá ña nandicutú ndaa ínima ná xihin mé á. Ta mé a cán jáchutú a tóco ndihi na ndúu ñuyiví xihín indivi.

## 2

*Najácaacu Ndióxi mí jáchi quihvi ini a mí*

<sup>1</sup> Ta jihna nasacuu ndó tátuhun na sa naxihí jáchi

naṣaċaja ndó cuahá cuachi. Joo viti cúú ndó tátuhun na nanditacu tucu jáchi Ndióxi najáċacu ndohó. <sup>2</sup> Ta naṣaċaja ndó tá quiahva cája ñayivi ñuyíví yóho. Ta naṣaċaja ndó ña cúní tiñáhá saċuaha, rí cúú jiní nu tóco ndihi rí quini. Ta mé rí cán cómí rí cuéntá sahá ñayivi, na co cája ña cúní Ndióxi. <sup>3</sup> Ta quiahva já naṣanduú jihna jáchi naṣaċaja í ña xíca ini mí ví ta naṣaċaja í tóco ndihi ña núu, ña naṣaċahvi iní caja í. Ta saha tóco ndihi ña núu naċaja í yóho nanditahan nu yo jándoho ndivaha Ndióxi iní tá quiahva cája mé á xihín java ga na co cúní candúsa mé á. <sup>4</sup> Joo natahvi ndivaha ini Ndióxi saha yo ta naquihvi ini ndivaha mé á mí. <sup>5</sup> Ta vatí naṣacuú tátuhun ndii ta coó naċuu ndique táhan máni yó xihín Ndióxi sahá cuachi naṣaċaja í joo natahvi ini Ndióxi saha yó sahá ña cán quea najáċacu a mí sahá ña naċaja Jesucristo. <sup>6</sup> Vatí naṣacuú tátuhun ndii sahá cuachi naṣaċaja í joo tá nanditacu Jesucristo já naṣacuú a tátuhun nanditacu yó xihín mé á naċaja Ndióxi. Ta naċaja mé á ña ná cacoo í xihín Jesucristo tá ná xinu coo í indiví. <sup>7</sup> Naċaja Ndióxi ña yóho jáchi naṣacu ini a jánaha nu yo viti xihín chága chí nuu ña quíhvi ndivaha ini a mí ta táhvi ndivaha ini a saha yo sahá ña naċaja Jesucristo. <sup>8</sup> Ta sahá ña natahvi ini Ndióxi saha ndo nañehé táhvi ndó ċacu ndaa

ínima ndo jáchi cándeé ini ndó mé á. Ta co cúú á sahá ña cája mé ndó jáchi cúú á ñamani naċaja Ndióxi xihín ndo. <sup>9</sup> Ta coó najáċacu a ndohó sahá ña vaha cája ndó jáchi co cúní a ña ná caja cáhnu ndó mé ndó. <sup>10</sup> Jáchi naċavaha Ndióxi mí tá quiahva cúní a ña in ná nduú xihín Jesucristo já ná caja í ndinuhu ña vaha, ña naṣacu ini a caja í anda jihna.

### *Ín vaha iní sahá ña naċaja Jesucristo xoho*

<sup>11</sup> Candehé ndó, na tóho, na cúú cuéntá Jesús. Ná ndicuhun ini ndó ndaja naṣacuú ndó jihna. Naċachi na Israel saha ndó ña coó yahvi toho ndó jáchi coó naċicaan na marca yiquí cuñu ndó. <sup>12</sup> Ndítahan ndicuhun ini ndó ña mé tiempo cán co xini toho ndó Jesucristo. Ta ni coó naṣacuú ndó na Israel, na naċaxi Ndióxi. Ta ni coó naṣacuú ndó ñayivi naṣahan Ndióxi tuhun a nuu. Naṣanduú uun ndó ñuyíví yóho jáchi coó naṣaxíni ndo Ndióxi ta ni coó naċahán ndo ċuhun ndó indiví. <sup>13</sup> Vatí coó naṣacuú ndó na cúú cuéntá Ndióxi joo viti naċayati ndó nu á ta já in naṣanduú ndó xihín Jesucristo sahá ña naċixi a ndica crúxu saha ndo. <sup>14</sup> Ta naċaja Jesucristo ña ná coo vaha ini na Israel xihín na tóho. Ta naċaja ña in naṣanduú na cuéntá mé á. Jáchi najándihi á sahá ña naṣaji nuu nuú na cán ña ná ndique táhan máni xihín táhan na. <sup>15</sup> Ta tá naċixi Jesucristo najáxinu coo a nu

ley ña ñasahnda chuun nu yo sahá ña ñanditahan caja í. Ta ñandaja mé á ña in ñandu na Israel xihín na coó ñaquixi chichi Israel. Ta tá ñandihi já ñandaja mé á ña ñandu na cuéntá mé á já ñandu vaha ini xihín táhan na. <sup>16</sup> Tá ñaxihí Jesucristo ndica cruxu já ñacaja mé á ña ná ndique táhan máni xihín táhan na ta já ñandihi sahá ña cáni táhan na. Anda já najándique táhan máni á ña xihín Ndióxi ta já in ñandu na.

<sup>17</sup> Ta ñaquixi Jesucristo caxi tuhun a tuhun vaha nu yo ña ná coo vaha ini xihín Ndióxi. Ta coó caja toho a á cúu ná ña tóho, ña nasacuu xicá nu á tátuhun mé ndó, á cúu ná ña Israel, ña nasandu yati nu á tátuhun mé nde jáchi nasahan mé á tuhun vaha nu tóco ndihí. <sup>18</sup> Ta sahá ña ñacaja Jesucristo cuu cayatí nu Ndióxi viti. Coó caja toho a á cúu yó ña ñaquixi chichi Israel á co cúu yó ña ñaquixi chichi Israel jáchi ínima yí mé á quéa chindeé a mí cayatí nu Ndióxi. <sup>19</sup> Sahá ña cán quéa co cúu ga ndó ña tóho, ña ñaquixi xicá jáchi in ñandu ndó xihín ña cúu cuéntá Ndióxi viti ta cúu ndó ña vehe mé á. <sup>20</sup> Ta viti tóco ndihí, ña cúu cuéntá mé á cúu yó tátuhun in vehe. Ta ña apóstol xihín ña profeta cúu ná tátuhun yuu ndúhu sahá vehe ñan jáchi najánaña ña tuhun Ndióxi nu ndó nu cuití. Ta Jesucristo cúu á tátuhun yuu ndúhu cuahan titó vehe ñan ña sahan

ndée vehe ñan. <sup>21</sup> Ta ñacaja Jesucristo ña ñandique táhan vaha tóco ndihí ña cúu cuéntá mé á. Ta ñandaja mé á mí ña loho loho ná nduú tátuhun in veñuhu yí nu sá ndacaan Ndióxi, xitoho í. <sup>22</sup> Sahá ña in ñandu ndó xihín Jesucristo sahá ña cán quéa ñandique táhan máni xihín táhan ndó. Ta ñacaja Ndióxi ña ná nduú ndó tátuhun in vehe nu í in Ndióxi jáchi ndacaan ínima yí mé á chí ini ndó.

### 3

*Ñachindahá Ndióxi Pablo cahan da tuhun mé á nuú ña coó ñaquixi chichi Israel*

<sup>1</sup> Yehe cúu Pablo ta sahá ña xicá nuú í cahan í tuhun vaha sahá Jesucristo nuú ña coó ñaquixi chichi Israel saha ña cán quéa ndacaan í vecaa viti. <sup>2</sup> Ta sa cándaã ini ndó ña sahá ña ñatahvi ini Ndióxi saha ndó sahá ña cán quéa nasahan mé á chuun yóho nuú í ña ná cahan í tuhun Ndióxi xihín ndo. <sup>3</sup> Jihna ñachijehé Ndióxi ña nasacu ini a caja joo viti najánaña mé á nuú í ña nasacu ini a caja. Ta sa ñacahan chá í sahá ña ñan tá ñacahyí í carta nu ndo. <sup>4</sup> Tá ná cahvi tucu ndó ña já cuni ndó ña mé á ndaa táhyí sa cándaã ini í ña nasahin jehé sahá Jesucristo. <sup>5</sup> Coó ñacandaã ini ñayivi ña yóho jáchi nasahin jehé ña. Joo viti ñacaja ínima yí Ndióxi ña ná candaã ini ña apóstol xihín ña profeta, ña cúu cuéntá mé á sahá ña yóho. <sup>6</sup> Ta ña nasahin jehé jihna cúu ña

yóho: xihín ña ñacaja Jesucristo ña in ñandu nā cúu chichi Israel xihín nā cō cúu chichi Israel já ná ñehe ná ña vaha ña ñasacu ini Ndióxi quiahva nuú nā cúu jahyi mé á. Jáchí in ñandu nā Israel xihín nā tóho ta in cúu ná ndáti na ñehe ná ña ñacachi Ndióxi quiahva nuú ná sahá ña ñacaja Jesucristo.

<sup>7</sup> Joo ñacaja Ndióxi ñamaní xihín i ta xihín ndée mé á xíca nuu i cáhan i tuhun vaha saha mé á nuú ñayivi. <sup>8</sup> Ñacaja Ndióxi ñamaní xihín i jáchí ñasahan mé á chuun yóho nuú i ña ná cahan i tuhun vaha sahá Jesucristo nuú nā cō ñaquixi chichi Israel. Vatí cúu u tátuhun in ña cō saha tañu nā cúu cuéntá Jesús joo ñacaja mé á ñamaní xihín i ña ná ndicani i nuú nā tóho ndá quiahva náhnu nahá cāja Jesucristo xihín ná. <sup>9</sup> Ta ñasahan Ndióxi chuun nuú i ña ná jánaña i tuhun vaha ña ñasahiin jehé nuú ndihi ñayivi. Ta anda sanahá ñasahiin jehé a ñacaja Ndióxi, mé a ñacavaha tóco ndihi ñaha. <sup>10</sup> Ñacaja Ndióxi ña yóho jáchí sahá ña in ñandu nā Israel xihín nā tóho anda jáví náha nuú tóco ndihi nā sáhdá chuun nuú nā ndúu indiví ndá quiahva ndíchí ndivaha jiní mé á. <sup>11</sup> Sanahá ndivaha ñasacu ini Ndióxi ña yaha chága chí nuu. Ta viti xihín ña ñacaja Jesucristo, xitoho í ñaxinu cō nuú ña ñasacu ini mé á cō anda ama cáa quivi. <sup>12</sup> Ta sahá ña in ñandu xihín

Jesucristo sahá ña cán quéa cō yíhví ga í cayatí nuú Ndióxi. Ta xini vaha í ña ndiquehe mé á mí jáchí cándée ini mé á. <sup>13</sup> Sahá ña cán quéa xíca tahví i nuú ndo ña ná a cávitá ini ndó sahá ña ndóho ini i. Jáchí sahá ña ñacahan i tuhun Ndióxi nuú ndo sahá ña cán quéa ndóho ini i viti já ná cuu canduu vaha mé ndó. Ta xini ñuhú cají ini ndó sahá ña cāja i saha ndo.

*Quíhví ini Jesucristo ñayivi*

<sup>14</sup> Sahá ña cán quéa ndáca xítí i nuú Ndióxi, mé a cúu tátá Jesucristo, xitoho í tá cáhvi ini i ndá quiahva náhnu cāja mé á. <sup>15</sup> Jáchí mé á cúu tátá tóco ndihi nā ndúu indiví xihín tóco ndihi nā ndúu ñuyiví yóho sahá ña cúu ná ña vehe mé á. <sup>16</sup> Ta cúní mé á cāja cuahá ndivaha ñamaní xihín yo sahá ña cán quéa xíca tahví i nuú á ña ná chindahá ínimá yíí á nuú ndo já ná quiahva tuhun ndeé ini ndó ta já ná cō ndacú ini ndó. <sup>17</sup> Ta xíca tahví i nuú Ndióxi ña ná ndacaan Jesucristo ínimá ndo sahá ña cándée ini ndó mé á ta ná cō ndeé ini ndó sahá ña quíhví ini a ndohó. Ta tá quiahva tíin yohó yíto ñundáhyi quiahva já ndítahan cō ndó xihín Jesucristo. <sup>18</sup> Ta anda jáví mé ndó xihín tóco ndihi nā cúu cuéntá Jesús cuu candaá ini ndó ndá quiahva quíhví ini a ndohó. <sup>19</sup> Ta xíca tahví i nuú Ndióxi ña ná candaá ini ndó ndá quiahva quíhví ini Jesucristo ndohó já quéa ná ndicutú ndaa ínimá ndó xihín Ndióxi. Joo mé

a ndaa a cuú xinu coo ndó candaa ini ndó ndá quiahva quíhvi ini a ndohó.

<sup>20</sup> Ta viti cáhnu nahá ná cacuu Ndióxi, mé a íin ndivaha ndée cája cuahá nuú ñaha jáchi cája cuaha chága mé á ñamaní xihín yó a juú ga nuú ña cáhvi iní caça yó nu á jáchi chindeé Ndióxi mí xihín ndée mé á. <sup>21</sup> Cóho ndihí, na cuú cuéntá Jesús ña ná caja cáhnu í Ndióxi sahá ña ñacaja Jesucristo. Viti xihín ndijáá ní quiví ta anda ama cáa quiví ná caja cáhnu í mé á. Já ná coo.

#### 4

*Cája ínimá yíi Ndióxi ña in nanduu tóco ndihi na cuú cuéntá Jesús*

<sup>1</sup> Yehe ndácaan í vecaa sahá ña cája chúun í cuéntá Jesucristo, xitoho í. Sahá ña cán quéa xíca tahví í nu ndó ña ná caja ndó ña cúní Ndióxi caja na cuú cuéntá mé á. Jáchi ñacaxi a ndohó sahá ña cán quéa ndítahan caja ndó tá quiahva cúní mé á. <sup>2</sup> Coto a cája cáhnu ndó mé ndó. Vii caja ndó xihín ñayivi. A cójo cama ini ndó xihín ná. Ta tá yáha nu cája xihín táhan ndó caja cáhnu ini saha táhan ndó jáchi quíhvi ini táhan ndó. <sup>3</sup> Xíní ñuhú ndinducú ndo in ná nduu ndó jáchi chindeé ínimá yíi Ndióxi ndohó caja ndó ña. Ta coto a ndacahnda táhan ndó já ná coo vaha ini xihín táhan ndó. <sup>4</sup> Tóco ndihí mí, na cuú cuéntá Jesús naxinu coo í cuú yó tátuhun in túhún ñayivi. Jáchi íin in

túhún ínimá yíi Ndióxi iní ta in túhún cuú ri ña ndatí quiahva Ndióxi nu yo sahá ña ñacaxi a mí ndiquehé ña. <sup>5</sup> In túhún jini Jesucristo, xitoho í quéa íin. Ta in túhún jini mé á ndítahan candeé iní jáchi in ñacandúta yo cuéntá mé á. <sup>6</sup> Ta íin in túhún Ndióxi, mé a cuú á tátá tóco ndihí. Ta mé a cán cómí a cuéntá saha tóco ndihí. Ta sahan mé á ndée yó caja í ña cúní a. Ta ndácaan ínimá mé á iní tóco ndihí ñayivi cuéntá mé á.

<sup>7</sup> Joo tá in tá in mí ñañehe táhvi yo nasacu ini Jesucristo quiahva nu yo. <sup>8</sup> Sahá ña cán quéa cáhí tuhun Ndióxi já:

Naquee vaha mé á xihín na íhvi a ta nasandaca mé á na tá nandicó coo a nandaa indiví.

Anda já nasahan tahvi nuú in in ñayivi, ñacachi tuhun Ndióxi.

<sup>9</sup> Tá cáhí a ña nandaa Jesucristo indiví já cúní cachi a ña nu cuítí nanuu a indiví anda ñuyíví yóho. <sup>10</sup> Ta mé Jesucristo, mé á naquee indiví cán ta nanuu a ñuyíví yóho nandaa tucu a cuahan janda nu jícó cuí indiví ta já najándicutú a ñuyíví xihín indiví xihín ña ñacaja mé á. <sup>11</sup> Ta tá nasahan tahvi nuú in in ñayivi já ñañehe táhvi java na cacuu na apóstol ta java na cacuu na profeta ta java na caca nuu na cahan na tuhun Ndióxi ña cuu jácacu ñayivi. Ta java na ñañehe táhvi ná cacuu na na cómí cuéntá sahá na cuú cuéntá mé á ta java na cacuu na na jána



tuhun Ndióxi nuú ñayivi. <sup>12</sup> Já ñacaja Ndióxi xihín na cán já ná canduu tiahva na caja chúun na cuéntá mé á ta já ná cuu caja na jácuahnu na na cúu cuéntá Jesús. <sup>13</sup> Já quéa ná xinu coo ndihí in canduú xihín na cúu cuéntá Jesús sahá ña cándéé iní mé á. Já ná cuu xinu coo í candaa vaha chága iní sahá Jesucristo, mé a cúu in túhún jiní já jahyi Ndióxi. Ta xihín ña yóho cuu ndindacú yo cuéntá mé á janda quiahva cuahnu vaha í jáxinu coo í ndicutú ndaa yó xihín mé á. <sup>14</sup> Ná a cácuu ga í tátuhun na valí, na co tácu ini, na ndíjama jiní tá too. Ta tá nandihí ndíco na jatá ña jánahá inga na janda quiahva jándahvi na na. Ta mé na jándahvi ñahá yóho xíní vaha na ndá quiahva cája na cañehe na na cuhún na in íchi ña co cúu ichí vaha. <sup>15</sup> Ña ndítahan caja í quéa cahan ndaa xihín táhan í xihín ndinuhu iní sahá ña quihvi ini táhan í ta já cuahnu í xihín Jesucristo, mé a cúu jiní nu tóco ndihi na cúu cuéntá mé á janda quiahva ná nduú tá quiahva cáa mé á. <sup>16</sup> Sahá ña cúu mé á jiní nu yo sahá ña cán quéa cuu ndique táhan vaha í xihín java ga na cúu cuéntá Jesús. Ta ñúchí ndivaha ndique táhan na cúu cuéntá mé á tá cája in in na ña cúní mé á. Ta xihín ña yóho cuu canduu vaha í ta cuu ndindacú chága yó cuéntá mé á ta já cuu quihvi ini táhan í.

*Ña saá cája í viti*

<sup>17</sup> Ña yóho quéa cáxi tuhun í xihín ndo. Xíca tahví í nu ndó cuéntá Jesucristo, xitoho í ña ná a cája ga ndó cuachi tá quiahva cája ñayivi ñuyiví jáchi coo yahvi toho tá nuú ña núu cáhvi ini na caja na. <sup>18</sup> Mé na cán nandaji xíní túni ná. Ta co cúu ná na jácaçu Ndióxi jáchi nachicaji na xíní túni ná nu mé á ta nandaja táhyí na ínima ná. <sup>19</sup> Co cácahan nuu ná jáchi nayaha va quiahva cája na ña núu xihín ndinuhu ini na. Ta co sáji nuu na nuú yiquí cuñu na tá cúní a caja tá nuú ña núu. <sup>20</sup> Joo tá nandiquehe ndó íchi cuéntá Jesús já najánaha nde ndohó ña ná caxoo ndó nuú cuachi tátuhun ña yóho. <sup>21</sup> Jáchi naxini johó ndó saha mé á ta nandiquehe ndó tuhun ndaa, ña najánaha nde nu ndo, ña cáhan saha mé á. <sup>22</sup> Sahá ña cán quéa ndítahan nu ndó jácaxoo ndó nu tóco ndihi ña núu nasacaja ndó jihna. Jáchi cuachi quéa ñacaja ndusa xihín ndó ña ná caja ndó ña núu ta játiví a ndohó sahá ña nandiava iní ndo caja ndó ña núu, ña jándahvi ndohó. <sup>23</sup> Xíní ñúhú cacuu ndó na nanduu saá ínima xihín xíní túni sahá ña cúu ndó cuéntá Jesús. <sup>24</sup> Ta xihín ña yóho cuu xinu coo ndó cacuu ndó tátuhun ñayivi saá, na cáa tá quiahva cáa mé á. Ta náha ña mé a ndaa táhyí cúu ndó ñayivi ndaa, na nandivií nu mé á.

<sup>25</sup> Sahá ña cán quéa a cáhan ga ndó ña túhún. Ña ndítahan nu ndó caja ndó quéa cahan ndó ña ndaa xihín ñani táhan

ndó jáchi in nanduu ndihí cuéntá Jesucristo.

26 Ta tá jáa ndo xihín ñayivi coto a cája ndó cuachi jáchi xíní ñúhú yaha yachi ña xójo ini ndó xihín ná. Ta tá sa nahini sa co ndítahan ndácaan ga ña xójo ini ndó xihín ná.

27 Ta a quiahva ndó ñamaní nuu tiñáhá sacuahá ña ná caja rí ña cúní rí xihín ndo.

28 Ndá na nasacaja cuíhná jihna coto ná a cája cuíhná ga na viti. Ndítahan caja chúun vaha na ña ná cuu chindeé na na camaní ñaha nuu.

29 A cáhan ga ndó tuhun núu. Ña ndítahan nu ndó queá chindeé ndo ñayivi xihín tuhun cáhan ndó. Ta já cuu cuahnu na xihín á ña ná ñehe ná ñamaní nu Ndióxi. 30 A cája ndó ña ná cacuéha ínima yíi Ndióxi xihín ndo jáchi mé ínima yíi Ndióxi cán queá náha ña mé a ndaa cúu ndó cuéntá mé á. Cúu á tátuhun nanani marca Ndióxi ndohó ña náha ña a jándacoo toho a ndohó janda quiahva ná xinu coo quivi tá chí in ndeé va jácacu Ndióxi ndohó.

31 Xíní ñúhú tavá xoo ndó tóco ndihi ña núu, ña co sáhan ñamaní nu ndó canduu vaha xihín táhan ndó. Ta co ndítahan jaá ndo xihín ñayivi ta ni co ndítahan cojo ini ndó. Ta co ndítahan cayuhú nu táhan ndó ta ni a cáhá ndó xihín ná. Ña ndítahan caja ndó queá tavá xoo ndó mé ndó nu tóco ndihi ña núu.

32 Ña ndítahan caja ndó queá ná caja vaha xihín táhan ndó ta candáhví ini táhan ndó.

Ta caja cáhnu ini saha táhan ndó tá quiahva nacaja cáhnu ini Ndióxi saha ndó sahá ña nacaja Jesucristo saha ndo.

## 5

*Ña ndítahan caja na cúu jahyi Ndióxi*

1 Mé ndó cúu ndó jahyi máni Ndióxi sahá ña cán queá ndítahan ndihi ini ndó caja ndó tá quiahva cája mé á. 2 Xíní ñúhú quihvi ini ndó ñani táhan ndó tá quiahva nacaja Jesucristo. Naquihvi ini a mí ta nandiquiahva mé á quivi a ndica crúxu saha yo tátuhun in quiti, rí nasahní na joco na nu Ndióxi. Ta mé a ndaa nasacuu a ña nacajii ini Ndióxi xihín.

3 Co cúní cuni joho i ña cája ndó cuachi tátuhun tá ín in ñayivi xihín ñájíhí á yíi ñani táhan na á tá cája na ña núu xihín yiquí cuñu na á tá chínúu na ínima ná jatá jiuhún na. Co ndítahan nu ndó caja ndó ña yóho jáchi cúu ndó na cúu cuéntá Ndióxi viti. 4 Coto a cáhan ndó ña núu ña coo saha. Ta ni a ndítuhún jiquí xihín táhan ndó xihín tuhun núu. Jáchi co cája vaha toho ña yóho xoho. Ña ndítahan caja ndó queá ndiquiahva ndó ndixahvi nu Ndióxi. 5 Jáchi sa cándaá ini ndó ña ndá na ndúu xihín na co cúu ñájíhí na á yíi ná, á tá cája na ña núu xihín yiquí cuñu na á tá cúu ná na chínúu ínima jatá jiuhún, mé na cán a ñehe táhvi toho na cacomí Jesucristo xihín Ndióxi cuéntá

sahá ná. Jáchi nā chínúu ínima jatá jjuhún cúu ná tátuhun nā cája cáhnu yoco. <sup>6</sup> A cándúsa ndó caja ndó cuachi cája nā jan jáchi cúnj nā jándahvi na ndohó xihín ña tuhún. Jáchi cúu ná ñayivi sáá ini, nā jácojo ini Ndióxi. Ta tandaa quivj jándoho a ini nā cán. <sup>7</sup> Sahá ña cán quea co ndítahan ndique táhan ndó caja ndó ña núu xihín nā jan.

<sup>8</sup> Mé ndó naşanduú ndó nuú naá ndivaha jihna joo sahá ña in nanduú ndó xihín Jesucristo ndúu ndó nu yehe viti. Sahá ña cán quea ndítahan caja vaha ndó já ná nahá ña mé a ndaa cúu ndó ñayivi mé á, nā xíca nu yehe. <sup>9</sup> Jáchi tóco ndihi nā ndúu nu yehe cája na ndinuhu ña vaha ta xíca ndacú nā íchi cuéntá ña ndaa. <sup>10</sup> Xíní ñúhú jácuaha ndó caja ndó ña cájij ini Ndióxi xihín. <sup>11</sup> A catáhan ndó xihín ñayivi ndúu nuú naá yávi ta a cája ndó ña núu xihín ná, ña co ndayahvi. Ña ndítahan caja ndó quea jánani ndó nā ta nahá tuhun ndó sahá ña núu cája na. <sup>12</sup> Jáchi chínúu cacahan nuú yo nditúhún yo sahá ña cája jehé nā jan. <sup>13</sup> Joo tá ná xinu quivj canáha ndihi ña cája nā jan já candaa ini tóco ndihi ñayivi ña nacaja jehé nā. Jáchi tóco ndihi ña ñúhu jehé quee ndihi a nu yehe. <sup>14</sup> Sahá ña cán quea já cáchi tuhun Ndióxi já:

Xíní ñúhú ndicáxi inún jáchi cúun tátuhun da quíji tañu nā naxihj.

Ta tá ná ndicáxi inún já jándiyehé Jesucristo inimun já ná a cájun cuachi, cáchi tuhun Ndióxi.

<sup>15</sup> Xíní ñúhú candehé vaha ndó ndá quiahva ndítahan caja ndó. A cája ndó tá quiahva cája ñayivi co xíní túni. Ndítahan cacuu ndó ñayivi ndíchí jini. <sup>16</sup> Xíní ñúhú ndihi ini ndó caja ndó ña cúnj Ndióxi jáchi quini ndivaha cáa tiempo viti. <sup>17</sup> Coto a cája ndó ña tóntó. Xíní ñúhú ndicani vaha ini ndó sahá ña cúnj Ndióxi, xitoho í caja ndó. <sup>18</sup> A jáxini ndó mé ndó jáchi co cája vaha ña jan xihín ndo. Ña ndítahan caja ndó quea quiahva ndó ñamanj nu Ndióxi ña ná jándicutú a ínima ndo xihín ínima yij mé á. <sup>19</sup> Ta tá ná nditúhún ndo xíní ñúhú ndinuhu ini ndó caja cáhnu ndó Ndióxi, xitoho ndó xihín tuhun cáhan ndó. Xíní ñúhú cata ndó salmo xihín himno xihín canto, ña sáhan ínima yij Ndióxi nu ndo. Joo xíní ñúhú cacuu a ña quíxi ínima ndó cája cáhnu ndó Ndióxi. <sup>20</sup> Níi tiempo ndítahan ndiquiahva ndó ndixahvi nu Ndióxi, tátá yo saha tóco ndihi nahá. Ta cahan ndó quivj Jesucristo, xitoho í tá ná caja ndó ña.

*Ña ndítahan caja nā sa natandaha*

<sup>21</sup> Ndítahan nu ndó candúsa táhan ndó já ná cuu ndicáhnu Ndióxi sahá ña cája ndó.

<sup>22</sup> Ndóhó, najihí ndúu yij ndítahan candúsa ndó yij ndo

tá quiahva cándúsa ndó Jesucristo, xitoho í. <sup>23</sup> Jáchí yí ndó cúú da cómí cuéntá saha ndo tá quiahva cómí Jesucristo cuéntá sahá na ndíco íchí mé á. Ta tóco ndihi na cúú cuéntá mé á cúú ná na ndáca tátuhun yiquí cuñu mé á. Ta mé á quéa jácaacu a na nuú cuachi. <sup>24</sup> Tá quiahva cája na cúú cuéntá Jesús cándúsa na ña sáhdá mé á nu ná quiahva já ndítahan caja najihí ndúu yí. Xíní ñúhú caja ndihi na ña cúní yí na caja na.

<sup>25</sup> Ta ndóhó, da ndúu ñájihí, xíní ñúhú quihvi ini ndó na tá quiahva naquihvi ini Jesucristo na cúú cuéntá mé á tá na xihí a saha ná. <sup>26</sup> Nacaja Jesucristo ña yóho jáchí cúní mé á ña ná nduu na cúú cuéntá mé á ñayivi víi sahá ña nandoo na xihín ticuú ta sahá ña sácú vaha na ña cáchí tuhun Ndióxi. <sup>27</sup> Sahá ña cán quéa cuu cayati na nu Ndióxi sahá ña cúú ná ñayivi víi cuéntá mé á, na naquee vaha xihín ña núu, na co jácaquini mé xihín cuachi. Ta viti cúú ná ñayivi yí nu mé á jáchí co cája ga na cuachi. <sup>28</sup> Ndítahan nuú in dataa quihvi ini da ñájihí da tá quiahva quihvi ini da yiquí cuñu da jáchí in nanduu na. Tá quihvi ini da ñájihí da já quéa quihvi ini da mé dá. <sup>29</sup> Jáchí ni in túhún toho ñayivi co cándají na yiquí cuñu na. Ña cája na quéa sáhan na ña cuxu a ta ndáá vaha na ña ta quiahva já ndáá Jesucristo na cúú cuéntá mé á. <sup>30</sup> Jáchí tóco ndihí mí, na cúú cuéntá Jesús

cúú yó java na ndáca yiquí cuñu mé á. <sup>31</sup> Sahá ña cán quéa cáchí tuhun Ndióxi já: “Tá ná tandaha in dataa já ndítahan quee xóo da nu tátá náná da já ná ndique táhan da coo da xihín ñájihí da. Ta já ná nduu ndíví na tátuhun in túhún jiní ñayivi”, cáchí tuhun Ndióxi. <sup>32</sup> Mé a ndaa yáncá ndivaha cándaa iní tóco ndihi ña yóho. Joo náha nu yo ndá quiahva cúú yó tátuhun yiquí cuñu Jesucristo tá in nanduu xihín á. <sup>33</sup> Xíní ñúhú ndicuhun ini ndó ña ndítahan quihvi ini in in ndó ñájihí ndo tá quiahva quihvi ini ndó mé ndó. Ta jári ndóhó, najihí xíní ñúhú caja cáhnu ndó yí ndo.

## 6

<sup>1</sup> Ndóhó, na valí xihín na tacú, xíní ñúhú coo johó ndó nu sáhdá tátá náná ndo chuun nu ndo. Jáchí ña yóho quéa cúní Ndióxi caja ndó. <sup>2</sup> Xíní ñúhú caja cáhnu ndó tátá ndo ta caja cáhnu ndó náná ndo jáchí jihna ñúhú nasahnda Ndióxi ña yóho nu yó caja í. Ta jatá ña yóho nasahan mé á tuhun a nu yo tá cáchí a já: <sup>3</sup> “Tá ná cajún ña yóho já cuahnu yatún ta quixi cuahá ña vaha nuun.”

<sup>4</sup> Ta ndóhó, na ndúu jahyi, a jácojo ndó ini jahyi ndó. Ña ndítahan caja ndó quéa jánaaha vaha ndó nu ná ña ndítahan caja na. Ta jánaaha ndó nu ná ndá quiahva caca na íchí cuéntá Ndióxi, xitoho í.

<sup>5</sup> Ta ndóhó, na naxeen na caja chúun nu ná xíní ñúhú coo johó ndó nu cáhan xitoho

ndó, na cómi cuéntá saha ndo ñuyívi yóho. Ta ndítahan caja cáhnu ndó na ta cayihví ndó na. Joo xíní ñúhú caja ndó ña xihín ndinuhu ini ndó jáchi cúu á tátuhun cája chúun ndó nuú Jesucristo.

6 Ndítahan nu ndó caja chúun vaha ndó nu ná ta a juú tá ndíta cuití na sándehe ná nu cája chúun ndó sahá ña cúni ndó candoo vaha ndó nuú na cán, vaha. Ndítahan caja chúun ndó xihín ndinuhu ini ndó nuú xitoho ndó jáchi cúu á tátuhun cája chúun ndó nuú Jesucristo. Sahá ña cán quea ndítahan caja ndó ña cúni Ndióxi xihín ndinuhu ini ndó. 7 Xíní ñúhú caji ini ndó ta ndinuhu ini ndó tá cája chúun ndó. Ta ndítahan caja ndó cuéntá ña cája chúun ndó nu Ndióxi ta co cája chúun ndó nuú ñayivi cuití va. 8 Jáchi sa cánda ini ndó ña vaxi quívi xinu yó nuú Jesucristo, xitoho í ndiquehé yahvi sahá ña vaha nacaja í ñuyívi yóho. Ta coo caja toho a á cúu yó xitoho á cúu yó na cája chúun nuú xitoho.

9 Ta jári ndóhó va, na cúu xitoho mozo naxeen ndó jan ndítahan nu ndó caja vaha ndó xihín ná ta co ndítahan jáyihví ndó na xihín tuhun cáhan ndó xihín ná. Ndítahan ndicuhun ini ndó ña ín Jesucristo indivi ta cúu á xitoho mé ndó ta sa mé á cán cúu xitoho na cája chúun xihín ndo. Ta co sáhní toho a cán mé á saha ndá ñayivi ín chága saha a juú ga inga na jáchi in cúu ndihí nu mé á.

*Ndaja caja í quee vaha í xihín ña quini*

10 Ta viti xíní ñúhú caja ndacú ndo mé ndó xihín ndée cáhnu Jesucristo, xitoho í jáchi in nanduu ndó xihín mé á viti. 11 Xíní ñúhú caja chúun ndó xihín tóco ndihi ndée sahan Ndióxi nu ndo já ná cuu quee vaha ndó xihín tiñahá sacuahá tá cúni rí jándahvi rí ndohó. 12 Jáchi a juú xihín ñayivi, na ín yiquí cuñu cáni táhan í, vaha. Ña cáni táhan í xihín cúu tátó tiñahá sacuahá, rí xíca nuu nu táchi indivi ta rí cán cúu rí rí cómi cuéntá sahá ñayivi ndúu nuú naá yávi ñuyívi yóho. 13 Sahá ña cán quea xíní ñúhú caja chúun ndó xihín tóco ndihi ndée sahan Ndióxi nu ndó já quea ná cuu quee vaha ndó xihín rí quini tá ná xinu rí caní táhan rí xihín ndo. Ta xihín ña yóho cuu candita ndacú ndó tá sa nandihí nacani táhan ndó xihín rí. 14 Ta candita ndacú ndó xihín ña ndaa ña sahan Ndióxi nu ndo jáchi cúu á tátuhun in cinturón pañi tixi sahan ndée ndácaan tóco ndo. Ndicuhun ini ndó ña cúu ndó ñayivi ndaa nu Ndióxi. Sahá ña cán quea cúu á tátuhun ndíxi ndó cotó caa. 15 Xíní ñúhú canduu tiahva ndó cahan ndó tuhun vaha sahá Jesús xihín ñayivi jáchi tuhun yóho quea cája ña ná coo vaha ini na xihín Ndióxi. Sahá ña cán quea cúu á tátuhun yíhi ndó tuhun Ndióxi. 16 Xíní ñúhú candeé ini ndó Ndióxi já quea ná cuu quee vaha ndó caji nuu ndó nuú ña núu cúni

tiñáhá sacuaha chindahá rí nu ndo. Sahá ña cán quéa cúu á tátuhun ñéhe ndó in caa jáhndá ña chícajì a ndohó. Tá xihín mé ña yóho cuu candaji nuu nu ndo nuú ña ñéhe ñuhú ita jácana mé rí cán nu ndo. <sup>17</sup> Ndicuhun ini ndó ña najácacu Ndióxi ndohó nuú cuachi sahá ña cán quéa cúu á tátuhun ñuhu ndó yijini caa. Tá ná cahan cáxí ndó tuhun sahan ínimá yijì Ndióxi nu ndó já quéa cúu á tátuhun ñéhe ndó machiti, ña cúu tuhun Ndióxi. <sup>18</sup> A jándacoo ndó caca tahví ndó nu Ndióxi. Ní tiempo xini ñuhú caca tahví ndo nu mé á. Joo ndítahan caca ndó ña jánaha ínimá yijì mé á nu ndo caca ndo. Xini ñuhú canduu tiahva ndó ta a cáva ini ndó ta xini ñuhú caca tahví ndó saha tóco ndihi na cúu cuénta Ndióxi. <sup>19</sup> Ta caca tahví ndó nu Ndióxi saha mí i víti já ná chindeé Ndióxi yehe cahan i xihín ñayivi tuhun mé á ta caca tahví ndó nu á ña ná quiahva mé á ndée a nuú i já ná cuu cahan i tuhun mé á ña coó nasaxini na jihna, nduu. Jáchi ña yóho quéa cuu jácacu a na nuú cuachi. <sup>20</sup> Ndióxi quéa nachindahá a yehe cuhun i cahan i tuhun yóho ta sahá ña xíca i cáhan i tuhun yóho ndácaan i vecaa víti. Caca tahví ndó sahá i já ná a cáyihví i cahan i sahá Jesús nuú ñayivi ndúu yóho tá quiahva ndítahan nuú i caja i.

*Ndindayí Pablo ñayivi, na cúu cuénta Jesús*

<sup>21</sup> Ñani máni yo, da naní Tíquico mé a ndaa cúu dá da

chindeé táhan xihín i chuun Jesucristo, xitoho í. Ta mé dá cán cañehe da tuhun sahá i tá ná saa da nu ndo já ná candaa ini ndó ndátahvi yáha i. <sup>22</sup> Sahá ña cán chindahá i da nu ndo já ná caxi tuhun da nu ndó ndá quiahva yáha nde ndúu nde yóho ta xihín ña yóho ná cuu quiahva da tuhun ndeé ini ndó.

<sup>23</sup> Ña cúni quéa ná caja Ndióxi, tátá yo xihín Jesucristo, xitoho í ña ná coo vaha ini tóco ndihi ndó, na cúu cuénta Jesús. Ta ná caja mé á ña ná quíhvi ini táhan ndó sahá ña cándeé ini ndó mé á. <sup>24</sup> Ta ná jándicutú ndaa mé á ñamaní jata tóco ndihi na quíhvi ini Jesucristo, xitoho í xihín ndinuhu ini na. Já ná coo.

## Carta nachindahá Pablo nuú na cúu cuéntá Jesús ndúu ñuu Filipos

*Carta nacahyí Pablo nuú na cúu cuéntá Jesús ndúu ñuu Filipos nani nasandacaan da vecaa*

<sup>1</sup> Yehe cúu Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihi na cúu cuéntá Jesús, na ndúu ñuu Filipos jáchi in nanduu na xihín Jesucristo. Ta cáhyí ri nde carta yóho nuú na sacuaḥa nuú na cúu cuéntá Jesús xihín nuú na chindeé mé na sacuaḥa veñuhu. <sup>2</sup> Xíca tahví i nu Ndióxi, tátá yo xihín nuú Jesucristo, xitoho í ña ná caja cuaḥa mé á ñamaní xihín ndo ta ná caja mé á ña ná coo vaḥa ini ndó.

*Xíca tahví Pablo nu Ndióxi sahá na cúu cuéntá Jesús*

<sup>3</sup> Ndiquiaḥva ndivaḥa i ndixahvi nu Ndióxi tá ndícuḥun ini i saḥa ndo. <sup>4</sup> Níi tiempo tá xíca tahví i nu Ndióxi saḥa ndihi ndo cájii ini i. <sup>5</sup> Jáchi janda tá nandiquehe ndó íchi cuéntá Jesús ta janda viti nachindeé ndó yehe cáhan i tuhun Ndióxi xihín ñayivi. <sup>6</sup> Nacasahá Ndióxi cája ña ná nduu ndó ñayivi ndaa nu mé á ta xini vaḥa i ña jáxinu coo a ña janda quiaḥva ná xinu coo quiví

quixi tucu Jesucristo ñuyiví yóho. <sup>7</sup> Cája i cuéntá vaḥa ndivaḥa va ndíquiaḥva i ndixahvi nu Ndióxi saḥa ndo jáchi mé a ndaa quíhvi ndivaḥa ini i ndohó. Tá quiaḥva cája Ndióxi ñamaní xihín i quiaḥva já cája ri a ñamaní xihín mé ndó. Ta coo caja toho a tá ndacaan i vecaa. Ta coo caja toho a tá ná ndiquehe vaḥa i saḥa tuhun Ndióxi nuú na jutixia á tá caxi tuhun i xihín ñayivi ña mé a ndaa cúu á tuhun Ndióxi, ña cúu jácaḥu ñayivi. <sup>8</sup> Ta cándaḥa cáxi ini Ndióxi ña quíhvi ndivaḥa ini i ndohó tá quiaḥva quíhvi ini Jesucristo ndohó. <sup>9</sup> Xíca tahví i nu Ndióxi ña ná xinu ini ndó quíhvi chága ini ndó ñayivi. Ta ná ndindíchi chága jiní ndó ta ná coo chága xini túni ndo. <sup>10</sup> Já ná cuo caxi ndó ña vaḥa chága níi tiempo ta xihín ña yóho cacuu ndó ñayivi ndaa, na coo ndójo cuachi tá ná xinu quiví quixi tucu Jesucristo. <sup>11</sup> Ndítahan caja ndó ña vaḥa xihín ndinuhu ini ndó jáchi xihín ña yóho jánaḥa ndó nuú ñayivi ña mé a ndaa cúu ndó cuéntá Jesús ta xihín ña yóho ndicáhnu ndivaḥa Ndióxi.

*Ná caja í ña cúni Jesucristo xihín ndinuhu ini i*

<sup>12</sup> Candehé ndó, ñani mí i, na cúu cuéntá Jesús. Cúni ña ná candaḥa ini ndó ña ndóho i vecaa yóho. Mé a ndaa saḥa ña ndacaan i vecaa yóho naxini joḥo cuaḥa chága ñayivi tuhun vaḥa saḥa Jesucristo. <sup>13</sup> Tóco ndihi

soldado, na ndúu vehe rey yóho xihín java ga ñayivi sa cándaā ndihi iní na ña ndácaan i vecaa sahá ña ndíco i íchi cuéntá Jesucristo. <sup>14</sup> Ta sahá ña nacandaā ini cuahá na cúu cuéntá Jesús ña ndácaan i vecaa yóho, nandindeé ini na caca nuu na cahan na tuhun Ndióxi xihín ñayivi ta co yíhvi na caja na ña jáchi cándeé cáhnu chága ini na Ndióxi viti.

<sup>15</sup> Mé a ndaa ndúu java na xíca nuu cahan tuhun Ndióxi nuú ñayivi sahá ña cáhiví cuití ini na. Ta java na cája na ña jáchi cúni na cayojó na nuú i. Joo mé a ndaa java na cahan na tuhun Ndióxi sahá ña cúni na caja na ña vaha. <sup>16</sup> Joo java na cahan na tuhun Ndióxi sahá ña vaha mé cuití va na ta co cája na ña xihín ndinuhu ini na. Ña cúni na caja na quea jáquihvi chága na yehe nani ndácaan i vecaa yóho. <sup>17</sup> Joo mé a ndaa java na cahan na sahá Jesucristo jáchi quíhvi ndusa ini na yehe ta sa cándaā ini na ña nasacu Ndióxi yehe yóho ña ná ndiquehe e sahá tuhun vaha cahan sahá Jesucristo. <sup>18</sup> Joo co sáhní toho i mí i ndá saha cája na ña jáchi cájii ini i tá cahan na sahá Jesucristo nuú ñayivi. Ta cájii chága ini i <sup>19</sup> jáchi cándaā ini i ña quee vaha i nu tóco ndihi ña ndóho i yóho sahá ña chindeé ínimā Jesucristo yehe ta sahá ña xíca tahví ndó nu Ndióxi sahá i. <sup>20</sup> Cándéé ini i ña a cándo nuu i. Ta ndáti tiahva i chindeé Ndióxi yehe já ná

cuu cahan i sahá Jesucristo nuú ñayivi. Xihín ña cahan i yóho jánaha i ndá quiahva cáhnu cúu Jesucristo. Ta co cája toho a á tácu u á naxihí i jáchi caja cáhnu tá caja cáhnu i Jesucristo. <sup>21</sup> Ta nani tácu u ín i ñuyiví yóho cája cáhnu i Jesucristo xihín ndinuhu ini i. Ta tá ná quivi i já vaha chága ví jáchi cuhun i coo i xihín mé á. <sup>22</sup> Ta co cándaā ini i ndía vaha chága jáchi tá ná catacu u já cuu ñehe chága ín i cahan i sahá Jesucristo xihín ñayivi. <sup>23</sup> Ivi joho cáhvi ini i ña á vaha chága ná catacu u á vaha chága ná quivi i. Jáchi tá ná quivi i ivi laá xinu coo i coo i xihín Jesucristo. Ta vaha chága ná cuhun i coo i cán a juú ga ña ná coo i ñuyiví yóho. <sup>24</sup> Joo saha mé ndó xíní ñuhú coo tóo chága i ñuyiví yóho. <sup>25</sup> Ta viti cándaā vaha ini i ña coo chága i ñuyiví yóho ña ná chindeé e ndohó catiahva chága ndó tuhun Ndióxi já ná cajii chága ini ndó sahá ña cándeé ini ndó mé á. <sup>26</sup> Sahá ña cán quea cuu cajii ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

<sup>27</sup> Cúni ña ná ndihi ini ndó caja ndó tá quiahva cáhí tuhun vaha cahan sahá Jesucristo. Já quea tá ná saa i á tá ná a saa toho i coto nihni i ndohó cúni ñehé e tuhun ña in cúu ndihi ndó ta ndúu ndacú ndo cuéntá Ndióxi. Ta cúni ñehé e tuhun ña in cúu ndó ndúcú ndéé ndo cahan ndó tuhun vaha sahá Jesucristo nuú ñayivi ña ná can-



deé ini na mé á. <sup>28</sup> Ta coto a quiáhva ndó ñamanj nuú nā ihvi ndo jan ña ná jáyihvi nā ndohó. Jáchi xihín ña yóho cándaā ini na cán ña xíca na cuahan nā nuú ndihi saha ná. Joo mé ndó cándaā ini ndó ña xíca ndó íchi nuú cacu ndaa ínimā ndo caja Ndióxi. <sup>29</sup> Jáchi sahá ña nacaja Jesucristo ñéhe táhvi ndó candeé ini ndó mé á. Ta quiahva já ñéhe táhvi ri ndó ndóho ini ndó sahá ña candeé ini ndó mé á. <sup>30</sup> In nuú ndóho ini sahá Jesucristo. Sa naxini ndó ndá quiahva nandoho ini i jihna. Ta sa ñéhe ndó tuhun ndá quiahva ndóho ini i viti.

## 2

*Nanduu Jesucristo ñayivi vatí cúú á Ndióxi*

<sup>1</sup> Xíni vaha i ña sahan Jesucristo tuhun ndeé ini ndó ta quíhvi ini a ndohó. Xíni vaha i ña in nanduu ndó jáchi ndácaan ínimā yii Ndióxi ini ínimā ndo. Xíni vaha i ña quíhvi ini táhan ndó ta táhnda ini saha táhan ndó. <sup>2</sup> Sahá ña cán quéa ndítahan caja ndó ña ná cajii ndivaha ini i sahá ña in cúú ndihi ndó ta sahá ña quíhvi chága ini táhan ndó. Ta sahá ña in nanduu ndó nacaja ínimā yii Ndióxi já in nanduu xíni túnj ndo nuú ña cúni ndó caja ndó. <sup>3</sup> Coto a ndúcú cuachi xihín táhan ndó. Ta coto a ndíñehe jícó ndo mé ndó. Ndítahan coo ndisáhnú ini ndó. Ta ndítahan cahán ndo ña cáhnú chága inga ñayivi a juú ga mé ndó. <sup>4</sup> Ta co ndítahan ndíhi ini ndó sahá ña vaha mé ndó cuití

va. Xíni ñúhú ndíhi ri ini ndó sahá ña vaha inga na.

<sup>5</sup> Xíni ñúhú cahvi ini ndó tá quiahva nasacahvi ini Jesucristo. <sup>6</sup> Jáchi tá quiahva íin Ndióxi quiahva já íin Jesucristo. Ta vatí cúú á Ndióxi joo coo nandaja cáhnú a mé á vatí cuu caja ña, nduu. <sup>7</sup> Ña nacaja Jesucristo quéa nasacu xóo a tóco ndihi ña cáhnú cúú mé á cán ta naquixi a nacacu a ñuyíví yóho tá quiahva cacu ñayivi. Ta nasacuu a in dātaā, dā cāja chúun cuéntá xitoho da. <sup>8</sup> Tá nandíhi nanduu a ñayivi já najánuu a mé á janda quiahva nasahan mé á quivi a ndíca crúxu nuú naxihí a tátuhun dā cāja cuachi quini. <sup>9</sup> Sahá ña cán quéa najándindita jícó ndivaha Ndióxi Jesucristo ta nasahan in quivi á nu á ta quíví Jesucristo yóho quéa cáhnú chága nu tóco ndihi quivi. <sup>10</sup> Sahá ña cán quéa tóco ndihi nā ndúu indiví xihín nā ndúu ñuyíví cuni joho na quivi Jesucristo ta já ndaca xítí nā nu á. Ta janda nā ndúu tixi ñúhú ndaca xítí nā nuú Jesucristo ña caja cáhnú na mé á. <sup>11</sup> Anda jáví cahan in in nā cán ña cúú Jesucristo xitoho na ta xihín ña yóho ndicáhnú ndivaha Ndióxi, tátá yo.

*Nā cúú cuéntá Jesús cúú ná tátuhun ñúhú, ña jándiyehé ñuyíví yóho*

<sup>12</sup> Candehé ndó ñani mí i, nā cúú cuéntá Jesús. Tá quiahva nacandúsa ndó caja ndó ña nasahnda i nu ndo tá nasahiin i tañu ndó jan

quiahva já ndítahan candúsa chága ndó yehe viti nani in xíca i nu ndó. Xíní ñúhú ndíhi ini ndó caja ndó ña cúní Ndióxi jáchi najácaacu a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhu ini ndó. <sup>13</sup> Jáchi Ndióxi quéa cája ña xíca ini ndó cája ndó ña vaha ta chindeé a ndohó cája ndó ña táhan ini mé á xihín.

<sup>14</sup> Ta a cáhan cuachi ndo saha tóco ndíhi ña cája ndó. Ta ni a ndítuhún ihví xihín táhan ndó. <sup>15</sup> Já ná ñaha ña cúu ndó ñayivi ví, na coo cuachi. Ndítahan caja ndó tá quiahva cája na cúu jahyi Ndióxi, na coo cáquini xihín cuachi ña cája ñayivi quini cuéntá ñuyívi yóho. Cúu á tátuhun ndíyihví ndaa ndó xihín ña vaha cája ndó tá quiahva ndíyihví ndaa quimi indiví. <sup>16</sup> Jáchi cáhan ndó tuhun vaha sahá Jesucristo nuú ñayivi já ná cuu catacu na anda ama cáa quívi. Tá ná caja ndó ña yóho já quéa cajii ini i xihín ndó tá ná xinu quívi quixi tucu Jesucristo. Jáchi xihín ña yóho candaá ini i ña a juú ña uun nasacuu chuun nacaja i. <sup>17</sup> Ta vatí ná ndiquiahva i mí i quivi i saha ndo joo cajii tá cajii ini i. Jáchi tá ná quivi i cúu á tátuhun catáhan i xihín ña joco ndó nu Ndióxi sahá ña cándéé ini ndó mé á. Ta sahá ña yóho cajii ini i ta in nuú cajii ini ndíhi. <sup>18</sup> Sahá ña cán quéa ndítahan cajii ini mé va ndó já ná cajii ini ndíhi.

*Sácú ini Pablo chindahá da Timoteo xihín Epafrodito nuú na ñuu Filipos*

<sup>19</sup> Ta cúní Jesucristo, xitoho í chindahá yachi i Timoteo nu ndo ña ná cañehe da tuhun saha ndó nuú i. Anda javí cajii ini i tá ná candaá ini i saha ndo. <sup>20</sup> Mé a ndaa quíhvi ini da ndohó ta coo ga inga da ñúhu ini saha ndo tá quiahva ñúhu ini yehe saha ndo. <sup>21</sup> Jáchi java ga na cúu cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo. <sup>22</sup> Joo sa xíní ndó ña cúu Timoteo ña vaha ndivaha ta sa candaá ini ndó ndá quiahva chindeé da yehe nu xíca i cáhan i tuhun Ndióxi xihín ñayivi. Cúu dá tátuhun jahyi i jáchi chindeé cuahá da yehe. <sup>23</sup> Sahá ña cán quéa sácú ini i chindahá i da nu ndo tá sa nacandaá ini i ndaja cáa sahá i. <sup>24</sup> Ta cándéé ini i ña quiahva Ndióxi ñamaní nuú i saa yachi mé vi coto nihni i ndohó jan.

<sup>25</sup> Cája i cuéntá xíní ñúhú chindahá i ñani Epafrodito ña ná ndicó coo tucu da nu ndo jáchi mé ndó nachindahá ndó da nuú i ña ná chindeé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i. <sup>26</sup> Joo viti xíca ndivaha ini da cuni ndíhi da ndohó. Ndícani ini da saha ndo jáchi nañehé ndó tuhun ña sa naquíhvi da. <sup>27</sup> Ta mé a ndaa nandoho da cuehe ta jalóho quívi da, nduu. Joo nacaja Ndióxi ñamaní xihín

da ta já nandivaha da. Ta xihín ña yóho nacaja ri mé á ñamaní xihín yehe ña ná a cácuéha chága ví ini i jáchi sa ín cuaha ña ndóho i viti. <sup>28</sup> Sahá ña cán queá chindahá númí i da ña ná saa quíi dá nu ndo já ná cajji ini ndó cuni tucu ndó da ta xihín ña yóho ndivaha ri ini yehe va. <sup>29</sup> Ndítahan cajji ini ndó ndiquehe ndó da jáchi cúu dá ñani ndó da cúu cuéntá Jesús. Ta ndítahan coo toní ñúhú ndó xihín tóco ndihi na cája tá quiahva cája mé dá. <sup>30</sup> Jáchi mé a ndaa jalóho quivi da sahá chuun nacaja da cuéntá Jesucristo. Cuahá ndivaha tondóho naquixi nu dá sahá ña nachindeé da yehe jáchi nacaja mé dá ña a cuú caja mé ndó yóho sahá i.

### 3

*Ña ín chága saha nu Ndióxi*

<sup>1</sup> Candehé ndó ñani mí i, na cúu cuéntá Jesús. Xini ñúhú cajji ini ndó xihín ña cája Ndióxi. Co cája toho a nu mí i cáhyi ivi tucu u ña sa nacahyí i nu ndó jihna jáchi chindeé a ndohó. <sup>2</sup> Cuéntá coo ndó xihín ñayivi quini, na xíca cája ña núu jan. Jáchi jánaha na ña ndítahan cahnda ndó yiquí cuñu ndó ña ná chícáan ndó marca yiquí cuñu ndó já ná cacuu ndó cuéntá Ndióxi. <sup>3</sup> Joo mí co cándúsa í ña cúu yó cuéntá Ndióxi sahá ña sáhná yó yiquí cuñu í vatí mé a ndaa cúu yó tátuhun na naquihvi marca yiquí cuñu sahá ña cája cáhnu í Ndióxi jáchi ndácaan ínimá yji mé á ini ínimá yó.

Ta viti cájji ini yo sahá ña cúu yó cuéntá Jesucristo. Co cándeé ini ña cája í <sup>4</sup> vatí mí i cuu cachi i ña cándeé ini i ñaha nacaja i, nduu. Jáchi nasacaja i ña cáchi ley xihín ndinuhu chága ini i a juú ga inga na. <sup>5</sup> Jáchi tá naxinu una quiví nacacu u já nachicaan na marca jan yiquí cuñu i. Ta mí i cúu u da Israel, da naquixi chichi Benjamín. Ta tátá náná i naquixi na chichi Israel ta cáhan nde tuhun hebreo. Ta nasandico i táhan da cúu fariseo, da sácú vaha ley Moisés. Ta nacaja i tóco ndihi ña nasahnda ley Moisés. <sup>6</sup> Nasandico cáhnu ndivaha i íchi cuéntá na fariseo cán sahá ña cán queá nacasáhá nandicuíta i cája xíxi i xihín na cúu cuéntá Jesús. Xihín ndinuhu ini i nacaja i tóco ndihi ña cáchi ley sahá ña cán queá ni in na coo nacuu chícáan na cuachi jatá i saha ley Moisés. <sup>7</sup> Tóco ndihi ña yóho nasacuu a ña náhnu ndivaha nuú i. Joo viti coo sahá ga ña cán nuú i jáchi nacasáhá cándeé ini i Jesucristo. <sup>8</sup> Ta mé a ndaa yahvi chága ña cándeé ini i Jesucristo a juú ga tóco ndihi ña nacaja i jihna. Sahá ña cúni candaa chága ini i sahá Jesucristo, xitoho i sahá ña cán queá najándacoo i tóco ndihi ña nacaja i cán. Ta tóco ndihi ña cán cúu á tátuhun xehe ta coo sahá toho a nuú i viti jáchi cúni candico chága i Jesús. <sup>9</sup> Ta cúni cacuu u in da in ná nduu xihín Jesucristo. Joo co ndátí i nduu ndaa i

nu mé á sahá ña sácú vaha i ley Moisés jáchi xini vaha i ña cája Ndióxi ña ná nduu ndaa i nu mé á sahá ña cándéé ini i Jesucristo cuití va. <sup>10</sup> Ña cúní quéa candaa chága ini i sahá Jesucristo. Ta cúní ña ná chutú ndaa ínima i xihin ndéé Ndióxi, mé ndéé ña ñacaja ña nanditacu tucu Jesucristo. Ta cúní ndoho ini i tá quiahva nandoho ini mé á tá naxihí a ndica crúxu. <sup>11</sup> Já quéa ndáti i xinu coo quiví nditacu u tá ná nditacu na sa naxihí.

*Ndítahan nducú ndéé yo janda quiahva ná xinu coo í ndiquehé ña quiahva Ndióxi nu yo*

<sup>12</sup> Co cúní cachi i ña sa ñaquee vaha vi. Ni co cúní cachi i ña sa naxinu coo i cúu u in taa ndaa tátuhun cúní Ndióxi. Ña cája i quéa ndíhi ini i jáxinu coo i cacuu u in da cája tá quiahva cúní Jesucristo jáchi sahá ña cán najáca a yehe. <sup>13</sup> Candehé ndo ñani i, na cúu cuéntá Jesús. Co cúní cachi i ña sa nanduu u tá quiahva cúní mé á. Ña cája ndusa i quéa ndíndójó i sahá ña ñasacaja i jihna ta ndíhi ini i jáxinu coo i cája i ña sácú ini Ndióxi caja i. <sup>14</sup> Já caja i janda quiahva ná xinu coo i ndiquehe e ña sácú ini Ndióxi quiahva nuú i sahá ña ñacaja Jesucristo. Jáchi cána Ndióxi yehe cuhun i coo i indiví xihin mé á.

<sup>15</sup> Tóco ndihi mé ndó, na sa nandindacú xihin ña cándéé ini ndó Ndióxi, xini ñúhú cahvi ini ndó tá quiahva cáhvi

ini yehe. Ta tá co cáhvi ini ndó tá quiahva cáhvi ini yehe já quéa jándiyéhe Ndióxi xini túni ndo ña ná cajii ini ndó xihin á. <sup>16</sup> Joo ndítahan nu yo caja í ña ndaa, ña coo najándacoo í cája í anda viti.

<sup>17</sup> Candehé ndo ñani i, na cúu cuéntá Jesús. Ndítahan candehé ndo ndá quiahva cája yehe ña ná caja ndó ña. Ta ndítahan candehé ndo ndá quiahva cája java ga na sa najánaña nde jáchi ñacatiahva na cája na tá quiahva cája mé nde. <sup>18</sup> Sa cuahá ndivaha tañu ñacachi i ña yóho xihin ndó ta viti táhvi ticuú nuú i cáhan tucu u ña xihin ndo. Ndúu cuahá ñayivi ta cáchi na cúu ná cuéntá Jesús joo cája na tátuhun na co cándusa ña naxihí Jesucristo ndica crúxu. <sup>19</sup> Joo vaxi quiví ndihi sahá ná anda ama cáa quiví sahá ña núu cája na jáchi a juú quiahva ndíhi ini ná sahá ña xixi na. Ta ndínehe jíco na mé ná sahá ña núu cája na ta chí coo a cáchan nuu ná. Ñaha ñuyiví yóho cuití va cáhvi ini na saha. <sup>20</sup> Joo mí cúu yó ñayivi cuéntá Ndióxi, na canduu indiví xihin mé á. Ta ndáti tiahva i ña quixi Jesucristo, xitoho í chí indiví, mé á jáca a mí. <sup>21</sup> Ta ndijama mé á yiquí cuñu í, ña ñacavitá já ná nduu a tátuhun yiquí cuñu mé á jáchi cáhnu ndivaha cúu á. Ta ndijama mé á mí xihin ndéé a jáchi mé á sáhdá chuun nu tóco ndihi ñaha xihin ndéé á.

## 4

*Xíni ñúhú cajii ini ndó xihín ña cája Ndióxi xihín ndo*

<sup>1</sup> Candehé ndo ñani mí i, na cúu cuéntá Jesús. Xíca ndivaha ini i cuni i ndohó jáchi quíhvi ini i ndohó. Ta cájii ndivaha ini i xihín ndo jáchi co cácahan nuu i saha ndo. Cúni ña ná candico ndacú ndo íchi cuéntá Jesucristo, xitoho í.

<sup>2</sup> Xíca tahví i nu Evodia xihín nu Síntique ña ná ndique táhan vaha na jáchi in quíhvi cúu ná cuéntá Jesús. <sup>3</sup> Ta xíca tahví i nu mún, da cája chúun tuun xihín i ña ná cajún ñamaní cahún xihín ndíví quiahva i jan ña ná ndique táhan máni ná. Jáchi ndíví na jan nachindeé cuahá na yehe tá naxica nuu i nacahan i tuhun Ndióxi, mé tuhun cúu jácacu ñayivi. Ta quiahva já nachindeé ri ñani, da nani Clemente yehe. Ta java ga da cúu cuéntá Jesús nachindeé táhan na xihín i. Sa ndáa va quivi ná nu libro nu ndáa quivi tóco ndihi na catacu anda ama cáa quivi.

<sup>4</sup> Níi tiempo ndítahan cajii ini ndó xihín ña cája Ndióxi xihín ndo. Á sa xíni johó ndó. Níi tiempo ndítahan cajii ini ndó. <sup>5</sup> Ta xihín ña yóho candaá ini tóco ndihi ñayivi ña cúu ndó ñayivi vaha ini. Sa nacayati quivi quixi tucu Jesucristo, xitoho í.

<sup>6</sup> A ndícani nahá ini ndó sahá ni in ñaha. Ña ndítahan caja ndó quéa caça tahví ndo

nu Ndióxi níi tiempo ta ndícani ndó nu mé á ndaja cáa ña ndóho ndó. Caça tahví ndó nu á ta a ndíndójó ndo ndiquiahva ndó ndixahvi nu mé á. <sup>7</sup> Anda já caja Ndióxi ña ná coo vaha ini ndó ta cáhnu chága ña yóho a juú ga tóco ndihi ña cuu candaá ini ñayivi. Ta tá ná caja Ndióxi ña ná coo vaha ini ndó já quéa chindeé a ndohó já ná ndindacú ínima ndo xihín xíni túni ndo sahá ña in nanduu ndó xihín Jesucristo.

*Xíni ñúhú cahvi ini ndó caja ndó ndinuhu ña vaha*

<sup>8</sup> Jandá ña yóho cuití va cúni cahan i xihín ndo, ñani i, na cúu cuéntá Jesús. Xíni ñúhú cahvi ini ndó sahá ña ndaa ta sahá ña cuu coo toni ñúhú ndó xihín. Ta xíni ñúhú cahvi ini ndó sahá ndaja caja ndó ña ndaa. Ta xíni ñúhú cahvi ini ndó sahá ñaha víi. Ta xíni ñúhú cahvi ini ndó sahá ñaha cuu cajii ini ñayivi xihín, ña cuu cahan vaha na saha. Ta xíni ñúhú cahvi ini ndó sahá ña vaha cuu caja ndó ña ná cuu caja cáhnu ñayivi Ndióxi saha.

<sup>9</sup> Caja ndó tóco ndihi ña najánaaha i nu ndó caja ndó. Ndítahan caja ndó ña naxini johó ndó nacahan i xihín ña naxini ndó nacaja i. Ta ná coo Ndióxi xihín ndo ta mé á quéa caja ña ná coo vaha ini ndó.

*Na cúu cuéntá Jesús ndúu ñuu Filipos chindeé na Pablo*

<sup>10</sup> Cájii ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó

sahá i. Co cúní cachi i ña sa nandindójó ndó sahá i, vaha. Ña cúní i cachi i quea co núná nu ndo chindee ndó yehe. <sup>11</sup> Co cáhan i ña yóho xihín ndó sahá ña ndímaní ñaha nuú i jáchi sa nacatiahva i cájii íní i xihín ña íin nuú i. <sup>12</sup> Sa xíní coo ndáhvi ndivaha i ta sa xíní i coo cuahá ndivaha ñaha nuú i. Nacatiahva i coo ndéé ini i nu tóco ndihi ña quíxi nuú i. Sahá ña cán quea íin vaha ini i vatí íin cuahá ña cuxu u á coó a. Ta vatí yójó ñaha nuú i á ndímaní ña nuú i íin vaha ini i. <sup>13</sup> Sahán ndéé ini i nu tóco ndihi ña quíxi nuú i jáchi Jesucristo quea chindee a yehe caha i ña. <sup>14</sup> Joo vaha nacaja ndó jáchi nachindee ndó yehe tá nandoho ini i sahá ña nandímaní nuú i.

<sup>15</sup> Sa xíní ndó ña in túhún mé ndó, na cúu cuéntá Jesús ndúu ñuu Filipos jan cúu ndó na nachindee yehe tá naquee e cahan i chí Macedonia cahan i tuhun Ndióxi, ña cuu jácacu ñayivi. Ta nacaja ndó ña yóho jáchi nacamáni ndó yehe sahá ña nachindee e ndohó xihín tuhun Ndióxi. <sup>16</sup> Jáchi tá nasahíin i ñuu Tesalónica cán já nachindahá ta nachindahá ndó ñaha nandímaní nuú i. Ta a juú in tañu cuití va nacaja ndó ña. <sup>17</sup> Co cáhan i ña yóho xihín ndó sahá ña cúní ñehe cuití vi ñaha. Ña cúní quea ná chahvi Ndióxi sahá ñamaní nacaja ndó. <sup>18</sup> Ta viti coó ga ñaha ndímaní nuú i. Janda yójó johó a nuú i viti xihín tóco ndihi ña nachindahá

ndó xihín Epafrodito ñehe da naquixi da nuú i yóho. Tóco ndihi ña nachindahá ndó nuú i yóho cúu á ña cájii ndivaha ini Ndióxi xihín. Cúu á tátuhun jóco ndó in ña támi sahan nu mé á. <sup>19</sup> Ta Ndióxi, mé a caha cáhnu i chindee a ndohó ná a ndímaní ga ni in ñaha nu ndo. Jáchi cuahá ndivaha ña cuicá cómi Ndióxi ta quiahva mé á ña nu ndo sahá ña cúu ndó cuéntá Jesucristo. <sup>20</sup> Cáhnu ná cacuu Ndióxi, tátá yo anda ama cáa quívi. Já ná coo.

*Ndíndayí Pablo na cúu cuéntá Jesús*

<sup>21</sup> Sahá ña in cúu yó cuéntá Jesucristo chindahá i Ndióxi coo tóco ndihi na cúu cuéntá mé á cán. Ta ñaní, na cúu cuéntá Jesús ndúu xihín i yóho chindahá na Ndióxi coo ndó. <sup>22</sup> Ta jári java ga na cúu cuéntá Ndióxi ndúu chí yóho chindahá na Ndióxi coo ndó. Ta na chindahá chága ví Ndióxi coo ndó cúu na caha chúun vehe da cómi cuéntá sahá ñuu Roma.

<sup>23</sup> Ná caha Jesucristo, xitoho i cuahá ñamaní xihín tóco ndihi ndó. Já ná coo.

## Carta nachindahá Pablo nuú na cúu cuéntá Jesús ñuu Colosas

*Chíndahá Pablo Ndióxi  
coo na cúu cuéntá Jesús ñuu  
Colosas*

<sup>1</sup> Yehe cúu Pablo, da nandicaxi Ndióxi cacuu u apóstol cuéntá Jesucristo. Ta yóho íin Timoteo, ñaní, da cúu cuéntá Jesús. <sup>2</sup> Chíndahá nde carta yóho nu ndo, na cúu cuéntá Ndióxi ndúu ñuu Colosas jan. Jáchí cúu ndó na cúu cuéntá Jesucristo, na cándeé cáhnu ini mé á. Ña cúní nde quéa ná caja cuaha Ndióxi, tátá yo ñamaní xihín ndo ta ná caja ña ná coo vaha ínimá ndo.

*Xíca tahví Pablo sahá na  
cúu cuéntá Jesús cán*

<sup>3</sup> Níi tiempo ndíquiahva nde ndixahví nu Ndióxi, mé a cúu tátá Jesucristo, xitoho í tá xíca tahví nde nu mé á saha ndo. <sup>4</sup> Jáchí sa ñañehé nde tühun ña cándeé ini ndó Jesucristo ta ñañehé nde tühun ña quíhvi ini ndó tóco ndihi na cúu cuéntá mé á. <sup>5</sup> Ta cája ndó ña yóho jáchí sa ñacandaa ini ndó ña ndaa sahá Jesucristo ta ndáti ndó ndiquehe ndó ña quiahva Ndióxi nu ndó indiví. Ta jandá naní ñaxini johó ndó tühun vaha cáhan sahá Jesucristo já ñacasáhá cúní ndó cühun ndó indiví.

<sup>6</sup> Mé tühun vaha ñaxini johó ndó sahá Jesucristo yóho ñacasáhá ndícuíta nuu a nuú ñayivi ta cuahá na sa cándúsa ña ndijáá níi cúu saha ñuyívi. Ta tóco ndihi na cán cája na tá quiahva ñacaja mé ndó tá ñaxini johó ndó ña quíhvi ini Ndióxi ndohó ta já ñacandaa ini ndó ña mé a ndaa táhyí quíhvi ini Ndióxi ndohó. <sup>7</sup> Ña yóho quéa najánaḥa da naní Epafraḥ nu ndo. Mé a ndaa quíhvi ini nde da jáchí in cúu da cája chúun da xihín nde ta mé a ndaa ñacaja chúun da nu mé ndó xihín ndinuhu ini da tá najánaḥa da ndohó tühun Ndióxi. <sup>8</sup> Ta tá ñaquixi da yóho já ñacaxi tühun da xihín nde ña cája ínimá yíi Ndióxi ña quíhvi ini ndó na cúu cuéntá Jesús.

<sup>9</sup> Ta jandá naní ñacandaa ini nde sahá ña cája ndó já ñacasáhá xíca tahví nde nu Ndióxi saha ndó ndijáá níi quívi. Ta xíca tahví nde nu á ña ná ñaha nu ndo ña cúní mé á caja ndó. Ta xíca tahví nde nu á ña ná quiahva mé á ndaja táhan ña ndichí nu ndo ta ná caja mé á ña ná candaa ini ndó tóco ndihi ñaha cuéntá mé á. <sup>10</sup> Já quéa ná cuu caja ndó tá quiahva ndítahan caja ndó jáchí cúu ndó ñayivi cómí Ndióxi cuéntá saha. Níi tiempo xíní ñúhú caja ndó ña cáji ini mé á xihín. Ta quiahva já xíní ñúhú ñaha ndó ña cája tá cája ndó ña vaha xihín ñayivi ta quiahva já xíní ñúhú candaa chága ini ndó saha Ndióxi.

11 Ta quiahva já xíca tahví nde nū Ndióxi ña ná ndaja ndacú a ndohó xihín ndée cáhnu ndivaha mé á já quéa cuu caja ndeé ini ndó ta já a ndíhi ini ndó tá ná quixi cuahá tondóhó nū ndo. Ta caji ini ndó <sup>12</sup> ndiquiahva ndó ndixahvi nū Ndióxi jáchi nasacu tiahva mé á ndohó ña ná ndiquehe ndó ña nasacu ini mé á quiahva nū tóco ndihi na cúu cuéntá mé á tá ná xīnū coo na nū yéhe ndivaha nuú cacomí mé á cuéntá saha ná. <sup>13</sup> Nasanduu yó nuú naá ndivaha ta cán natavá Ndióxi mí ndáha ña quini ta nandiquiahva mé a mí ndáha Jesucristo, jahyi máni á ña ná cacomí a cuéntá saha yo. <sup>14</sup> Ta mé Jesucristo najáca cu a mí tá naxihí a ndica crúxu ta nacaja cáhnu ini a sahá cuachí.

*Jesucristo cúu á jini nū tóco ndihi ñaha*

<sup>15</sup> Ta Jesucristo cúu yuhú nuū Ndióxi, ña a cuú cuni tiví ta janda tá cámaní casahá cavaha Ndióxi ñuyiví yóho sa íin jahyi a, Jesucristo. <sup>16</sup> Ta sa mé Jesucristo nacavaha tóco ndihi ñaha ndúu ñuyiví yóho xihín ña ndúu indiví. Ta mé á nacavaha tóco ndihi ña xíní xihín nuū yo xihín ña a cuú cuni. Ta nacavaha mé á táto Ndióxi, ña cómi chuun cuéntá Ndióxi ta nacavaha java ga táto a, na íin cuaha ndée cahnda chuun. Tóco ndihi ña yóho nacavaha Jesucristo ña ná cacuu a ñaha mé á. <sup>17</sup> Ta sa íin va mé á tá cámaní cava sahá saha tóco ndihi ñaha ta

cája mé á ña ná cuu canduu tóco ndihi ñaha indiví xihín ñuyiví. <sup>18</sup> Ta cúu á jini nū tóco ndihi na cúu cuéntá mé á, na cúu tátuhun yiquí cuñu a. Ta mé a cán caja ña ná ndihvi ñayivi íchi mé á catacu na xihín ndée a jáchi anda saha nasahíin mé á ta jihna ñúhú nanditacu tucu a tañu na sa naxihí. Ta xihín ña yóho naxinū coo a nanduu a jini nū tóco ndihi ñaha. <sup>19</sup> Tá quiahva cáa Ndióxi quiahva cáa ri Jesucristo jáchi já cuni Ndióxi coo. <sup>20</sup> Ta cuni ri Ndióxi ndique táhan máni tucu a xihín tóco ndihi ña nacavaha. Ña cán quéa naxihí Jesucristo ndica crúxu já ná cuu ndique táhan máni tóco ndihi ña ndúu ñuyiví xihín indiví xihín Ndióxi.

<sup>21</sup> Mé ndó nasanduu xíca ndo nū Ndióxi ta naxini ihvi ndó a jáchi ndinuhu ña núu nasacahvi ini ndó caja ndó, nduu. Joo viti najándique táhan máni Ndióxi ndohó xihín mé á <sup>22</sup> sahá ña nacaja Jesucristo, jahyi a tá naxihí yiquí cuñu a ndica crúxu. Já nacaja mé á ña ná cuu xīnū ndó canduu víi ndó nu á. Ta nandiquiahva mé á ndohó ndáha Ndióxi já ná cacuu ndó ñayivi víi, na coo ga cuachi nū á. <sup>23</sup> Joo xíní ñúhú candeé cáhnu ini ndó Jesús ta a jándacoo xóo ndó ña ndáti ndó quiahva Ndióxi nū ndo. Jáchi tá naxini johó ndó tuhun vaha sahá Jesucristo já nacandaá ini ndó ña cuu jáca cu a ndohó. Ta sa mé tuhun yóho ndícuíta nuu



ndijáá níí cúú saha ñuyívi ta yehé cúú da chindeé táhan jándicujta nuu a nuú ñayivi.

*Cája chúun Pablo cuéntá na cúú cuéntá Jesús*

24 Ta viti cájji ini i jáchi ndóho ini i saha ndo ta ña cája i quéa jáxinu cōo i ña nasacu ini Jesucristo ndoho i sahá na cúú cuéntá mé á, na cúú tátuhun yiquí cuñu a. 25 Nandaja Ndióxi yehé ña ná nduu u in da caja chúun nuú na cúú cuéntá Jesús. Jáchi nasahan mé á chuun yóho nuú i ña ná chindeé e ndohó sahá ña jánaḥa cáxi i tuhun Ndióxi nu ndo. 26 Ta janda tá nacava sahá saha ñuyívi nasahjin jehé a nuú ñayivi joo viti najánaḥa Ndióxi nuú na cúú cuéntá mé á ña nasahjin jehé jihna. 27 Ta viti sácú ini Ndióxi naḥa nuú na cúú cuéntá mé á ndá quiahva náhnu ñamanj cúnj caja mé á xihín na tóho. Ta ña nasahjin jehé cúú ña yóho: ndácaan Jesucristo ini ínima ndo ta xihín ña yóho vaxi quivj ndicáhnu ndó xihín mé á.

28 Cáxi tuhun nde nuú ndihi ñayivi sahá Jesucristo. Ta jácaḥan nde na ña ná a cája na cuachi. Ta xihín ndinuhu ini nde jánaḥa nde nu ná ña ndítahan caja na já ná nduu na ñayivi ndaa nu Ndióxi sahá ña nacaja Jesucristo. 29 Ta ña yóho cúú chuun ndúcú ndéé e caja i xihín ndéé cáhnu sahan Jesucristo nuú i.

## 2

1 Cúnj ña ná candaḥa ini ndó ña ndúcú ndéé e xíca tahví i nu Ndióxi saha ndó xihín sahá na cúú cuéntá Jesús ndúu ñuu Laodicea. Ta quiahva já ndúcú ndéé e xíca tahví i nu Ndióxi sahá na cúú cuéntá Jesús, na a ñaha cuni táhan xihín i. 2 Ndúcú ndéé e xíca tahví i nu Ndióxi saha ná já ná ndihvi ndéé Ndióxi ini ínima na ta in ná nduu na sahá ña quihvi ini táhan na. Ta xíca tahví i nu Ndióxi ña ná candaḥa vaha ini ná ña ndaa sahá Jesucristo, ña mé a ndaa ndiyahvi ndivaha. Jáchi ña nasahjin jehé jihna najánaḥa Ndióxi nu ná viti ta ña yóho cúú Jesucristo. 3 Ta mé Jesucristo cándaḥa ini a tóco ndihi ñaha. Candaḥa ini a ndia quéa ña núu ta ndia quéa ña vaha ta cúnj mé á ña ná candaḥa ri ini mé ví ña jan. 4 Cáxi tuhun i ña yóho xihín ndó ná a jándahvi inga na ndohó jáchi ndúu java na ta ndató ndivaha cáhan na joo cúú ná na jándahvi ñayivi. 5 Ta vatí cō íin mí i xihín ndo nu ndúu ndó jan joo ñúhu ini i saha ndo níí tiempo. Ta cájji ini i tá xínj i ña ndúu víi xihín táhan ndó. Ta cájji ini i sándeḥé e ña cō jándacoo ndó ña cándéé ini ndó Jesucristo.

6 Tá nandiquehe ndó ichi cuéntá Jesús já nanduu mé á xitoho ndó. Ta viti ndítahan nu ndó caca nuu ndó xihín á ndijáá níí quivj. 7 Xínj ñúhú cativi tuun ndó Jesucristo já ná quiahva mé á ndéé á nu ndo. Xihín tuhun Ndióxi ña najánaḥa nde nu ndó

jan ndítahan candeé chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

*Íchi saá xíca í viti*

8 Cuéntá coo ndó ná a jándahvi na ndohó xihín ña tuhún cúni na jánahá na nu ndo. Jáchí náha ña quíxi a nu Ndióxi joo cúu á ña quíxi jini mé va na cuití va. Ta cáhan na sahá ña jánahá ñayivi ñuyíví ta co cúu á ña jánahá Jesucristo nu yo.

9 Tá quiahva cáa Ndióxi quiahva já cáa Jesucristo vatí nanduu a in ñayivi. 10 Ta nandicutú ndaa mé ndó xihín mé á jáchí in nanduu ndó xihín Jesucristo, mé a sáhdá chuun nu tóco ndihi na cómi cuéntá sahá indiví xihín ñuyíví yóho. 11 Ta sahá ña in nanduu ndó xihín Jesucristo sahá ña cán quéa nanduu ndó ñayivi cuéntá mé á ta cúu á tátuhun nachicaan Ndióxi marca ndohó ta co cúu á tátuhun marca chicaan ñayivi yiquí cuñu na. Ña cája Jesucristo quéa jácaxoo a mí nuú cuachí já quéa ná a cája ga yó ña. 12 Jáchí tá nacandúta ndo cuéntá Jesucristo já nasacuu a tátuhun naxihi ndó ta nanduxu ndó xihín Jesucristo jáchí najándacoo ndó cuachi nacaja ndó. Ta tá nanditacu mé á nasacuu a tátuhun nanditacu ri mé va ndó xihín á sahá ña cán quéa cúu ndó ñayivi saá viti jáchí nacandee ini ndó ña iin ndée Ndióxi caja ña ná nditacu Jesucristo. 13 Jihna nasacuu ndó tátuhun ndii

sahá cuahá cuachi nacaja ndó ta sahá ña coo naxeen ndó caja ndó ña sáhdá Ndióxi. Ta nasacaja ndó tá quiahva cúni mé va ndó jáchí nasacomí cuachi cuéntá saha ndo. Joo viti nacaja Ndióxi ña ná ñehe táhvi ndó catacu ndó xihín Jesucristo ta nacaja cáhnu ini a saha tóco ndihi cuachi ndó. 14 Nasacomí yo cuachi nu Ndióxi jáchí naquehe núu í ña nasahnda mé á caja í. Ta ndácaan cuachi jata yó nacaja ley joo najándoo Ndióxi cuachí tá naxihi Jesucristo ndica cruxu saha yo. 15 Ta tá naxihi a ndica cruxu já naquee vaha mé á xihín tiñáhá sacuaaha ta naquee vaha mé á xihín rí quini, rí sáhdá chuun nuú ñayivi ñuyíví. Ta sahá ña najácacahan Jesús nuú ri nuú ñayivi sahá ña cán quéa a cuú chinúu ga rí cuachi jata yó viti. Xihín ña nacaja Jesucristo yóho najánaaha Ndióxi nu yo ña a cuú ga caja tiñáhá sacuaaha ni in ñaha xoho.

*Ndítahan ndinducú yo ñaha iin indiví*

16 A quéhe ndó cuéntá sahá ñayivi tá ná candehé ndaa na ndohó sahá ña xíxi ndó á sahá ña xíxi ndó. Ta ni a quéhe ndó cuéntá tá sáhdéhe ndaa na ndohó sahá ña co cája ndó víco cája mé ná ta ni sahá ña co cája ndó víco quiví cája cáhnu na yoó saá. Ta ni a quéhe ndó cuéntá tá sáhdéhe ndaa na ndohó sahá ña co cája cáhnu ndó quiví ndiquehe ndée na. 17 Sanahá tá cámaní

cacu Jesucristo já ñasahnda Ndióxi chuun nuú ñayivi ña ná caja na ley Moisés joo coó chuun a viti jáchi sa najáxi nu coo Jesucristo tóco ndihi ña ñasahnda ley Moisés. <sup>18</sup> A cándusa ndó ñayivi tá cáchí na xihín ndó ña cuhun ndó indayá sahá ña co caja ndó ña cáchí mé ná. Caja cáhnu na tát Ndióxi ta sahá ña jan ndája tohó ndivaha na mé ná. Ta cáchí na ñacahan tívi Ndióxi xihín ná sahá ña cán quéa ndíñehe jíco ndivaha na mé ná. Xíní túní na yóho cúú á xíní túní ñayivi ñuyíví cuití va. <sup>19</sup> Jáchi co xíca tuun na jan xihín Jesucristo, mé a cúú jiní nu mí. Mé á sahan ndée á nu yo cuahnu í ta jándique táhan mé á mí xihín á tá quiahva nasacu ini Ndióxi.

<sup>20</sup> Tá ñaxihí Jesucristo ndíca crúxu já cúú á tátuhun ñaxihí ndó nuú cuachi, jáchi co cómí ga ñaha ñuyíví yóho cuéntá saha ndó viti. Sahá ña cán quéa co ndítahan nu ndó caja ndó tá quiahva caja ñayivi ñuyíví yóho. Co ndítahan caja ndó ña cáchí na xihín ndó tátuhun ña yóho: <sup>21</sup> “A tiiin toho ndó ña jan. A cáxí toho ndó ña cáa. A cáni ndaa ndáha ndó ña yóho”, cáchí na xihín ndó. <sup>22</sup> Tóco ndihi ña yóho ndihi saha. Tóco ndihi ña caja na yóho cúú á ña sáhdá ñayivi ñuyíví cuití va ta co cúú á ña ñaquixi nu Ndióxi. <sup>23</sup> Jáchi tóco ndihi ña jánaħa na jan cúú á ña quíxi jiní mé va na vatí ndáa na tátuhun na ndíchí jiní. Ta jánaħa na ña ndítahan caja

cáhnu ñayivi Ndióxi xihín costumbre ñacavaha mé va na. Ta náha na tátuhun ñayivi tohó joo ndíñehe jíco na mé ná. Ta jánaħa na ña xíní ñúhú jándoho í yiquí cuñu í joo coó saha toho ña yóho jáchi co chíndeé a mí jándihi sahá ña xíca ini yiquí cuñu í caja.

### 3

<sup>1</sup> Tá ñanditacu Jesucristo tañu na sa ñaxihí cúú á tátuhun ñanditacu ndó xihín mé á. Sahá ña cán quéa xíní ñúhú ndinducú ndó ñaha cúú cuéntá Ndióxi, mé ñaha quíxi indiví nu ín coo Jesucristo xoo cuáha Ndióxi. <sup>2</sup> Xíní ñúhú cáhvi ini ndó sahá ñaha cúú cuéntá Ndióxi ta co xíní ñúhú ndicani ini ndó sahá ñaha ñuyíví yóho. <sup>3</sup> Jáchi mé ndó cúú ndó tátuhun na sa ñaxihí tá ñaxihí Jesucristo. Sahá ña cán quéa co xíní ñúhú ndiava ini ndó cacomí ndó ñaha ñuyíví yóho jáchi cuhun ndó coo ndó xihín Jesucristo indiví nu ín Ndióxi. <sup>4</sup> Ta sahá ña ñacaja Jesucristo sahá ña cán quéa tácu yo viti ta tá ná canáha nuu Jesucristo ñuyíví yóho já ndacanáha nuu ndó xihín á. Tá quiahva ndiyehé ndivaha mé á quiahva já ndiyehé ri ndóhó va ta ndicáhnu ndó xihín mé á.

*Jihna ñaxica í ichí cuachi joo viti xíca í ichí saq*

<sup>5</sup> Ndítahan jácaxoo ndó nuú cuachi, ña caja ñayivi ñuyíví. Coto a cóo ndó xihín ñayivi, na co cúú ñájihí ndó á yíi ndó. Ta ni a caja ndó ña

núu xihín yiquí cuñu ndó ta ni a cája ndó ña núu, ña xíca ini yiquí cuñu ndó caja. Ta ni a chínúu ndó ínima ndó jatá jiuhún ndo jáchi cúu ndó tátuhun na cája cáhnu yoco tá cája ndó já. <sup>6</sup> Jáchi vaxi quiví jándoho Ndióxi ini na cája ña yóho sahá ña co xéen na caja na ña cúní Ndióxi. <sup>7</sup> Ta janda mé ndó tá naxica nuu ndó ichí cuachi já nacaja ndó ña jan. <sup>8</sup> Joo viti xíní ñúhú jándacoo ndó tóco ndihi ña jan: a cójo ga ini ndó xihín ñayivi ta ni a cája ga ndó ña xíca ini yiquí cuñu ndó caja ta a cája ga ndó ña núu ta ni a cáhahá ga ndó xihín ñani táhan ndó ta a cáhan ga ndó tuhun quini. <sup>9</sup> Ta a cáhan túhún xihín táhan ndó jáchi co cúu ga ndó na nasacuu ndó jihna ta tóco ndihi ña núu nasacaja ndó jihna jan co cómi ga cuéntá saha ndó viti. <sup>10</sup> Jáchi viti sa nanduu ndó ñayivi saá, na loho loho ndivi chága ínima na cája Ndióxi janda quiahva ná xinu coo ndó nduu ndó tá quiahva cáa Jesucristo ta já candaa vaha chága ini ndó a. <sup>11</sup> Jáchi viti coó sahá ga á tá cúu yó na Israel á tá co cúu yó na Israel, á tá cúu yó na naquihvi marca yiquí cuñu í á tá coó naquihvi marca yiquí cuñu í, á tá cúu yó na tóho á tá co cúu toho í na. Ta ni coó saha toho a á tá cúu yó na yucú ñúhú ta ni coó saha toho a á tá cúu yó na cómi xitoho cuéntá saha, á tá cúu yó na xíca núná mé. Joo ña ín saha

quéa tá ná ndiquiahva ndó mé ndó ndáha Jesucristo ña ná cacomí a cuéntá saha ndo jáchi tóco ndihi na cán cúu ná na ndacaan Jesucristo ínima.

<sup>12</sup> Quíhvi ini Ndióxi ndohó ta nacaxi a ndohó ña ná cacuu ndó ñayivi cuéntá mé á. Ta tá quiahva natahnda ini Ndióxi saha ndo quiahva já xíní ñúhú tahnda ini ndó sahá ñayivi. Xíní ñúhú caja vaha ndó xihín ná. Coto a cája cáhnu ndó mé ndó. Xíní ñúhú coo vií ini ndó xihín ñayivi ta a ndíhi ini ndó xihín ná. <sup>13</sup> Xíní ñúhú coo cáhnu ini xihín táhan ndó. Ta caja cáhnu ini saha táhan ndó tá yáha nu cája xihín táhan ndó. Tá quiahva nacaja Jesucristo, xitoho í tá nacaja cáhnu ini a saha ndó quiahva já ndítahan caja cáhnu ini saha táhan ndó. <sup>14</sup> Xíní ñúhú ndicutú ndaa ndó xihín ña quíhvi ini táhan ndó já quéa ná cuu canduu in nuú xihín táhan ndó ta já a cúu cahnda java táhan ndó. <sup>15</sup> Ta ná caja Ndióxi ña ná coo vaha ini xihín táhan ndó já ná caja ndaa ndó xihín ná. Jáchi nasacu ini mé á ña ná caja ndó já ta nacaxi a ndohó nduu ndó tátuhun yiquí cuñu a. Ta ndítahan ndiquiahva ndó ndixahvi nu Ndióxi ní tiempo.

<sup>16</sup> Ta ná ndicutú ndaa ínima ndó xihín tuhun vaha cáhan saha Jesucristo. Ta xihín tuhun yóho xíní ñúhú jánaha táhan ndó ta xíní ñúhú quiahva tuhun ndeé ini táhan ndó ña ná candaa vaha ini ndó ña. Ta xihín

ndinuhu ini ndó xíní ñúhú ndiquiahva ndó ndixahvi nu Ndióxi. Cata ndó salmo xihin himno xihin canto ña sáhan ínimá yíi Ndióxi nu ndo. <sup>17</sup> Ta tóco ndihi ña cája ndó xíní ñúhú caja ndó ña cuéntá Jesucristo, xitoho í. Ta xíní ñúhú ndiquiahva ndó ndixahvi nu Ndióxi, tátá yo sahá ña ñacaja Jesucristo, xitoho í.

*Ndá quiahva ndítahan canduu na cúu cuéntá Jesús*

<sup>18</sup> Ndóhó, najihí ndúu yíi, xíní ñúhú coo johó ndó nu cáhan yíi ndó xihin ndo jáchi já ndítahan caja najihí, na cúu cuéntá Jesús. <sup>19</sup> Ta jári ndóhó, dataa, xíní ñúhú quihvi ini ndó ñájihí ndo ta co ndítahan caja ndó ndaja ñacuu xihin ná. <sup>20</sup> Ta jári ndóhó va, na valí xíní ñúhú taa johó ndó tóco ndihi ña sáhdná tátá náná ndo nu ndo jáchi ña yóho quéa cájii ini Ndióxi xihin. <sup>21</sup> Ta jári ndóhó va, na ndúu jahyi, a jácojo quini ndó ini jahyi ndó já quéa ná a cávitá ini na caja na ña vaha. <sup>22</sup> Ta ndóhó, na ñaxeen xitoho caja chúun uun va ndó, xíní ñúhú caja ndó tóco ndihi ña sáhdná xitoho ndó, na ndúu ñuyívi yóho nu ndo. Ta a juú tá ndíta cuití na sándehe na nu cája chúun ndó sahá ña cúni ndó candoo vaha ndó nuú na cúu xitoho ndó cán. Ña xíní ñúhú caja ndó quéa caja chúun ndó xihin ndinuhu ini ndó nu ná jáchi cúu ndó na cája cáhnu Ndióxi. <sup>23</sup> Ndítahan cajii ini ndó caja ndó tóco ndihi ñaha. Ta ndicuhun ini

ndó ña nu Ndióxi cája ndó ña ta co cúu á nuú ñayivi cuití va. <sup>24</sup> Jáchi sa cándaá ini ndó ña chahvi Jesucristo nu ndó saha tóco ndihi ña cája ndó. Ta ñehe táhvi ndo cuhun ndo indivi jáchi cája cáhnu ndó Jesucristo, mé á cúu ndusa xitoho ndó. <sup>25</sup> Joo ndá na cája ña núu tandaa quivi ndoho ini na sahá ña núu ñacaja na jáchi caja Ndióxi ña ná chahvi in in na sahá ña ñacaja na.

## 4

<sup>1</sup> Ta jári ndóhó va, na cúu xitoho co ndítahan jándoho ñahá ndó na ñaxeen ndó caja chúun nu ndó jan. Ndítahan caja vaha ndó xihin ná jáchi vaxi quivi ndiquiahva ri ndóhó va cuéntá nuú Ndióxi, xitoho ndó, ña íin indivi.

<sup>2</sup> A jándacoo ndó caça tahvi ndó nu Ndióxi xihin ndinuhu ini ndó. Ta ndítahan coo tiahva vaha ndó ndiquiahva ndó ndixahvi nu mé á. <sup>3</sup> Caça tahvi ndó nu Ndióxi sahá nde ña ná cuná mé á íchi nuú nde cahan nde tuhun vaha sahá Jesucristo, mé tuhun ñasahin jehé anda viti. Ta saha mé ña yóho ndácaan i vecaa viti. <sup>4</sup> Caça tahvi ndó nu Ndióxi ña ná cuu cahan cáxi i tuhun Ndióxi nuú ñayivi tá quiahva ndítahan nuú i caja i.

<sup>5</sup> Co ndítahan caja ndó ña yóho á ña cáa nuú na co cúu cuéntá Jesús. Ta xíní núhú ndihi ini ndó cahan ndó tuhun Ndióxi xihin ná. <sup>6</sup> Tóco ndihi ña cahan ndó xíní ñúhú cacuu a ña vaha, ña cuu cajii ini Ndióxi xihin. Ta xíní ñúhú

candaa ini ndó ndaja caja ndó nducú ñehe vaha ndó tuhun nuú ñayivi.

*Ndindayi Pablo na ndúu ñuu Colosas*

<sup>7</sup> Chindahá i da naní Tíquico nu ndó jan já ndicani da sahá i nu ndó. Mé da cúu ñani máni yo ta xihín ndinuhu ini da in cúu dá cája chúun da xihín i. <sup>8</sup> Chindahá i da saa da nu ndó já ná caxi tuhun da xihín ndó ndá quiahva ndóho nde yóho. Ta chindahá i da já ná quiahva da tuhun ndeé ini ndó. <sup>9</sup> Ta chindahá ri ñani máni yo Onésimo, da ndíco cáhnu íchi cuéntá Jesús cuahan xihín dá ta mé Onésimo yóho cúu da ñuu ndó jan. Ta mé dá xihín Tíquico caxi tuhun da nu ndó ndaja cándo nde janda viti.

<sup>10</sup> Aristarco, da ndácaan vecaa xihín i chindahá da Ndióxi coo ndó. Ta jári Marcos, da cúu ñani cuachí Bernabé chindahá da Ndióxi coo ndó. Ta sa nacaxi tuhun i xihín ndó ndá quiahva ndítahan caja ndó xihín Marcos tá ná saa da coto nihni da ndohó. Xíní ñúhú ndiquehe vaha ndó da. <sup>11</sup> Ta jári da naní Jesús, da naní tucu Justo chindahá da Ndióxi coo ndó. Janda ndihuni na yóho cuití va cúu na cuéntá Jesús, na naquixi chichi Israel cája chúun na xihín i tá xica nuu nde cahan nde nuú ñayivi ña cómi Ndióxi cuéntá saha ná. Ta mé a ndaa nachindeé cuaha ndihuni na cán yehe. <sup>12</sup> Ta jári Epafras, da ñuu ndó jan chindahá da Ndióxi coo ndó. Mé da cán

cúu dá da cája chúun cuéntá Jesucristo. Ta ní tiempo xica tahví da nu Ndióxi saha ndó xihín ndinuhu ini da já ná candita ndacú ndó ta ná ndiquiahva ní ndó mé ndó caja ndó ña cuni Ndióxi. <sup>13</sup> Ta xíní i xihín nuú i ndá quiahva ndíhi ini Epafras xica tahví da nu Ndióxi saha ndó ta sahá na cúu cuéntá Jesús ndúu ñuu Laodicea xihín na ndúu ñuu Hierápolis viti. <sup>14</sup> Lucas, da cúu doctor maní yo chindahá da Ndióxi coo ndó. Ta jári Demas chindahá da Ndióxi coo ndó.

<sup>15</sup> Cahan Ndióxi ndó xihín na cúu cuéntá Jesús, na ndúu ñuu Laodicea ta cahan Ndióxi ndó xihín ña naní Ninfas ta xihín tóco ndíhi na cúu cuéntá Jesús táca vehe ña. <sup>16</sup> Ta tá nandíhi nacahvi ndó carta yóho caja ndó ñamaní chindahá ndó ña ná cuhun a nuú na cúu cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña nachindahá i nuú na cán. <sup>17</sup> Ta caja ndó ñamaní caxi tuhun ndó nu Arquipo ña xíní ñúhú ndíhi ini da caja chúun vaha da chuun nasahan Ndióxi nu dá caja da.

<sup>18</sup> Ta yehe, da cúu Pablo cáhyí i java tuhun yóho nu ndó xihín ndahá i ña ná chindahá i Ndióxi coo ndó. Xíní ñúhú ndicuhun ini ndó ña ndácaan i vecaa. Ta ña cuni quéa ná caja cuaha Ndióxi ñamaní xihín ndó. Já ná coo.

# Carta nu cuití nacaḡyí Pablo nuú na cúú cuéntá Jesús ñuu Tesalónica

*Pablo xihín da xíca xihín dá  
chíndahá da Ndióxi coo na cúú  
cuéntá Jesús ñuu Tesalónica*

<sup>1</sup> Yeḡe cúú Pablo, da cáḡyí carta yóho xihín Silvano xihín Timoteo ta chíndahá i ña nuú ndihi ndó, na cúú cuéntá Jesús ndúu ñuu Tesalónica. Ta in nanduu ndó xihín Ndióxi, tátá yó ta in nanduu ndó xihín Jesucristo, xitoho í. Ná caja Ndióxi, tátá yó xihín Jesucristo, xitoho í cuahá ñamaní xihín ndihi ndó ta ná caja mé á ña ná coo vaḡa ini ndó.

*Cándeé cáhnu ini na  
Tesalónica Jesús*

<sup>2</sup> Já cuití ndíquiāḡva nde ndixahvi nu Ndióxi saḡhá ndihi ndó. Ta co ndíndójo nde xíca taḡví nde nu mé á saḡa ndó. <sup>3</sup> Ndíquiāḡva nde ndixahvi nu Ndióxi, tátá yó saḡa ndó jáchi cándeé cáhnu ini ndó mé á. Ta saḡá ña quíhvī ini ndó mé á saḡá ña cán queá cāja chúun vaḡa ndó cuéntá mé á. Saḡá ña cándeé ini ndó Jesucristo ña quixi tucu a ñuyívī yóho saḡá ña cán queá cāja ndeé ini ndó tá ndóho ini ndó. <sup>4</sup> Cuni joho vaḡa ndó, ñani mí i, na cúú cuéntá Jesús. Sa xínī nde ña quíhvī ini Ndióxi ndóḡo ta

naḡaxi a ndóḡo cacuu ndó cuéntá mé á. <sup>5</sup> Tá naḡaxi tuhun nde tuhun vaḡa saḡá Jesús nu ndó a juú tuhun uun naḡaḡan nde xihín ndó. Naḡaḡan nde mé tuhun xihín ndéé ña naḡaḡan ínimā yīi Ndióxi nuú nde. Ña cán queá sa xínī ndó ña ndaa cuití va naḡaḡan nde xihín ndó. Ta sa xínī vaḡa ndó ña naḡaja ndaa nde tá naḡanduu nde xihín ndó jáchi cúnī nde chíndeé nde ndóḡo.

<sup>6</sup> Anda jáví naḡasáhá ndó cāja ndó ña naḡaja mé nde xihín ña naḡaja Jesucristo. Jáchi nandiquehe vaḡa ndó ña najānaḡa nde nu ndó. Ta vaḡí nandoho ndivaḡa ini ndó joo naḡavatá ndó naḡaja ínimā yīi Ndióxi. <sup>7</sup> Ta tá nandihī nanduu ndó na jánaḡa nu tóco ndihī na cúú cuéntá Jesús, na ndúu estado Macedonia xihín estado Acaya ña ndítahan caja na. <sup>8</sup> Ta a juú Macedonia xihín Acaya cuití va vaḡa jáchi ndijáá ñuu nandicuiḡa nuu tuhun vaḡa saḡá Jesús naḡaja ndó. Ña cán queá sa xínī tóco ndihī ñayivi ña cándeé cáhnu ini ndó Ndióxi. Ña cán queá ndá ñuu cásaḡa nde cáxi tuhun na cán nuú nde saḡa ndó chí co xínī ñúhú ga nde caḡan nde saḡa ndó nu ná. <sup>9</sup> Ta viti tóco ndihī na cán cáxi tuhun na nuú nde ndaja nandiquehe vaḡa ndó tuhun naḡaḡan nde xihín ndó tá naḡanduu nde xihín ndó ñuu Tesalónica cán. Ta cáxi tuhun na ndaja nandijama ndó tá nandicoo ndó ña cāja cáhnu

ndó yoco jáchi viti cája cáhnu ndó Ndióxi cuití va. Ta cáxi tuhun na ndaja nandicó coo ini ndó ta nacasáhá ndo cája chúun ndó cuéntá Ndióxi, mé a cája ña ndaa cuití va, ña tácu a íin a indiví viti. <sup>10</sup> Ta cáxi tuhun na nuú nde ndá quiahva ndáti ndó ndicó coo Jesucristo quixi a indiví, mé a cúu jahyi Ndióxi. Ta Ndióxi najánditacu a Jesús, mé á jácacu mí ná a ndóho iní tá ná xinu quiví cajú vií Ndióxi sahá cuachi ñayivi.

## 2

*Chuun nacaja Pablo tá nasahin da ñuu Tesalónica*

<sup>1</sup> Ta sa xini ndihi ndó, ñani mí i, na cúu cuéntá Jesús ña coo nacasaá uun va nde ñuu Tesalónica jan jáchi nandiquehe vaha ndó tuhun Ndióxi. <sup>2</sup> Joo tá cámani saa nde ñuu ndó jan sa xini ndo ndaja nacaja xixi na ñuu Filipos xihin nde ta nacanahá na xihin nde. Joo tá nacasaá nde ñuu ndó nasahan ndée ini nde nacaja Ndióxi já nacaxi tuhun nde tuhun vaha saha Jesús nu ndo vatí ndúu cuahá na co cúní ndehe. <sup>3</sup> Ta coo nacahan nde ña tuhún xihin ndo jáchi tuhun ndaa cuití va cúu ña najánaaha nde nu ndo. Ta coo nacahvi núu ini nde ta coo najándahvi nde ndohó. <sup>4</sup> Joo nacaxi Ndióxi ndehe ta nasahnda mé á chuun nuú nde ña ná caxi tuhun nde tuhun vaha saha Jesús nuú ñayivi. Ta vatí co táhán ini ñayivi xihin ña cahan nde joo coo nandijama

toho nde ña. Jáchi Ndióxi quéa sándehe ínima yo ta táhán ini a xihin ña cahan nde. <sup>5</sup> Sa xini vaha ndó nacahan ndaa nde xihin ndo ta coo nacahan chíjin nde xihin ndo. Ta coo najándahvi nde ndohó sahá jihún. Joo xini ndaa táhyi Ndióxi ña ndaa cuití va nacahan nde xihin ndo. <sup>6</sup> Ta sa xini vaha ndó ña ni tañu mé ndó ta ni tañu java ga ñayivi coo nandinducú nde ña ná cajú cáhnu ñayivi ndehe vatí íin saha nde cahnda nde chuun nu ndo jáchi cúu nde na apóstol nachindahá Ndióxi nu ndo. <sup>7</sup> Joo nacaja vií nde xihin ndo tá quiahva ndaa vaha in ñañaaha jahyi ña. <sup>8</sup> Ta cúní ndivaha nde ndohó ña cán quéa nacaxi tuhun nde tuhun vaha sahá Jesús nu ndo. Ta íin tiaha nde quivi nde saha ndo jáchi quihvi ini nde ndohó. <sup>9</sup> Ñani nde, na cúu cuéntá Jesús, á co ndicuhun ini ndó ndá quiahva nacaja nde tá nasanduu nde xihin ndo cán. Nuú tá ndivi nacaja chúun nde já ná cuu chahvi nde sahá ña xixi nde. Jáchi co cúní nde jáquihvi nde ndohó nani cáxi tuhun nde tuhun vaha sahá Jesús nu ndo.

<sup>10</sup> Ta sa xini ndaa táhyi ndihi ndó, na cúu cuéntá Jesús ña nacaja vaha nde xihin ndo ta cuu cahan ndó saha nde. Ta xini táhyi Ndióxi ña nacaja ndaa nde xihin ndo ta nacaja vií nde xihin ndo ña cán quéa a cúu chicaan ñayivi cuachi jatá nde. <sup>11</sup> Sa xini vaha ndó ndaja najácahan nde in in



ndó ta ndaja nasahan nde tuhun ndeé ini ndó ña ná candico cáhnu ndó íchi cuéntá Jesús. Tátuhun cája in dataa xihín jahyi da já nacaja nde xihin ndo. <sup>12</sup> Ta nasahnda nde chuun nu ndo caja ndó ña cúni Ndióxi jáchi cúu ndó cuéntá mé á. Mé Ndióxi, mé a sáhdá chuun indiví, mé a cán quéa nacaxi a ndohó cahnda ndó chuun xihin á. Mé á cúu á in Ndióxi cáhnu ndivaha ta ndaja cáhnu mé á ndohó xihin á.

<sup>13</sup> Ña cán quéa níi tiempo ndiquiahva nde ndixahvi nu Ndióxi jáchi nandiquehe vaha ndó tuhun Ndióxi ña nacaxi tuhun nde nu ndo. Tá naxini johó ndó ña já nacandaá ini ndó ña cúu á tuhun Ndióxi ta co cúu á tuhun ñayivi ñuyívi. Ta mé a ndaa cúu á tuhun Ndióxi jáchi tá naxini johó ndó ña já quéa najándicoo ndó cuachi cája ndó sahá ña cándéé ini ndó Jesús. <sup>14</sup> Anda jávi mé ñayivi ñuu ndó nacasahá na jándoho na ini ndóhó, ñani mí i ta nacaja xíxi na xihin ndó. Ta quiahva já nándoho na cúu cuéntá Jesús estado Judea. Jáchi na Israel, na ndúu estado Judea nacaja xíxi na xihin ná. <sup>15</sup> Jihna nasahni java na Israel na profeta cuéntá Ndióxi. Ta quiahva já nasahni java ri na Israel Jesucristo, xitoho í. Ta viti java na Israel cája xíxi na xihín nde ta nataxi na ndehé veñuhu. Co cájii ini Ndióxi xihin ná jáchi cándají na tóco ndihi ñayivi. <sup>16</sup> Ta coó

nasahan na ñamani nuú nde caxi tuhun nde tuhun vaha sahá Jesús nuú ñayivi, na coó naquixi chichi Israel ña ná jácacu Ndióxi na. Ta sahá ña yóho nandicuhá cuachi na nu Ndióxi ta sahá ña cán quéa xójo ini a xihin ná ta viti naxinu coo hora jándoho a ini na.

*Cúni Pablo coto nihni tucu da ñayivi ñuu Tesalónica*

<sup>17</sup> Ñani mí i, na cúu cuéntá Jesús, tá nandihí naquee nde ñuu ndó jan já nandicuhun ini nde saha ndo. Ñuhu ini nde saha ndo vatí co xini nde ndohó xihin nuú nde. Ta ndiáva ini nde ndicó coo nde ñuu ndó coto nihni nde ndohó. <sup>18</sup> Nasacu ini nde saa nde nu ndo. Ta yehe, da cúu Pablo cuahá tañu nacacúni saa i ñuu ndó joo tiñahá sacuahá nasaji nuu rí nuú i sahá ña cán quéa coo nacuu saa i jan. <sup>19</sup> Ndá saha quéa cándéé ini nde ndohó ta ndá saha quéa cájii ini nde ta ndá saha quéa coo vaha ini nde tá tandaa quivi quixi tucu Jesucristo ñuyívi yóho. Sahá ña ndico ndo íchi cuéntá Jesucristo, xitoho í sahá ña cán quéa cájii ini nde. <sup>20</sup> Mé a ndaa lín vaha ini nde ta cájii ini nde cája ndó.

### 3

<sup>1</sup> Ta sahá ña cúni ndivaha i candaá ini i ndaja ndúu ndó cán sahá ña cán quéa nasacu ini i candoo in talaá mí i ñuu Atenas. <sup>2</sup> Ta nachindahá i ñaní Timoteo, mé da cája chúun xihin nde cuéntá

Ndióxi cáxi tũhun da tũhun vaha sahá Jesucristo nuú ñayivi. Nachindahá i da saa da coto nihni da ndohó já quéa jácahan da ndohó ña ná coo ndacú chága ínimã ndó nu Ndióxi ta ná chindeé da ndohó candeé cáhnu chága ini ndó Ndióxi. <sup>3</sup> Jáchi cúni nde ña ná coo ndacú ini ndó ná a jándicoo ndó íchi cuéntá Jesús vatí cája xíxi ñayivi xihín ndo. Jáchi sa xíni vaha ndó ña ndítahan nu yo ndóho tá ndóho iní sahá Jesucristo. <sup>4</sup> Á co ndícuhun ini ndó tá nasanduu nde xihín ndo nacaxi tũhun nde nu ndo ña vaxi quiví ndoho iní saha mé á. Ta viti sa xíni ndó ña nayaha ña nacahan nde xihín ndo. <sup>5</sup> Sahá ña coó nañehé e tũhun saha ndo sahá ña cán quéa nachindahá i Timoteo nu ndo ná cañehe da tũhun saha ndó quixi a nuú i já ná candaa ini i á mé a ndaa táhyí ndíco cáhnu ndó íchi cuéntá Jesús. Jáchi nayihví i ña jándahvi tiñáhá sacuaña ndohó. Ta tá ná quee vaha tiñáhá sacuaña xihín ndo, nduu já quéa mé a uun quéa nacahan nde tũhun Ndióxi xihín ndo.

<sup>6</sup> Joo viti chá va naquixi Timoteo yóho tá nandihí naxito nihni da ndohó jan. Ta nañehe dá tũhun vaha saha ndo ña candeé ini ndó Jesucristo ta quíhvi ini táhan ndó. Ta cáchí da ña ñúhu ndivaha ini ndó sahá nde. Ta xíca ndivaha ini ndó cuni ndó ndehe tá quiahva xíca ndivaha ini nde cuni nde

ndohó. <sup>7</sup> Cándehé ndó, ñani i. Vatí ndóho ndivaha ini nde yóho joo nasahan ndeé ini nde jáchi nañehé nde tũhun ña candeé cáhnu ini ndó Jesús ta ndíco cáhnu ndó íchi cuéntá mé á. <sup>8</sup> Ta nandivaha ini nde jáchi cándaa ini nde ña ndacú ín ini ndó xihín Jesucristo, xitoho í. <sup>9</sup> Ta co ñehe ga nde ndá quiahva ndiquiahva nde ndixahví nu Ndióxi saha mé ndó jáchi cájii ndivaha ini nde nacaja ndó. <sup>10</sup> Chí ñuú ta ndiví xíca tahví nde nu Ndióxi ña ná quiahva ñamaní nuú nde saa nde coto nihni nde ndohó jáchi cúni nde xinú coo nde jánaña chága nde tũhun Ndióxi nu ndo já ná candeé cáhnu chága ini ndó mé á.

<sup>11</sup> Ña cán quéa xíca tahví nde nu Ndióxi, tátá yo xihín Jesucristo, xitoho í ña ná chindeé a ndehe saa nde nu ndo coto nihni nde ndohó. <sup>12</sup> Ta ná caja Ndióxi ña ná quíhvi chága ini táhan ndó. Ta ná chutú ndaa ini ndó xihín ña quíhvi ini ndó tóco ndihí ñayivi tá quiahva quíhvi ini nde ndohó. <sup>13</sup> Ta ná caja Ndióxi ña ná coo ndacú ínimã ndo nu mé á. Ta ná jándoo a ínimã ndo já ná coo víi a nu mé á tá ná quixi tucu Jesucristo ñuyiví xihín ndihí na cúu cuéntá mé á.

#### 4

*Ña ndítahan nu yo caja i já ná tãhan ini Ndióxi xihín yo*

<sup>1</sup> Cuni johu vaha ndó ñani mí i, na cúu cuéntá Jesús. Jihna najánaña nde ndohó ndaja ndítahan caja ndó já ná

tahan ini Ndióxi xihin ndo. Ta xini nde já cãja ndó anda viti. Xihin ndeé sáhan Jesucristo nuú nde xica tahví nde nu ndo ta sáhdá nde chuun nu ndo ña ná a jándicoo ndó cãja ndó ña najánaãa nde nu ndo.

<sup>2</sup> Sa xini vaha ndó ña sáhdá nde chuun nu ndó jáchi nasahnda Jesucristo, xitoho í chuun nuú nde cahan nde ña yóho xihin ndo. <sup>3</sup> Ña cuni Ndióxi queá ná coo vii ínima ndó nu mé á ta ná a cãja ndó cuachi ña coo ndó xihín najihí á taa, na co cúu ñájihí ndo á yíi ndo. <sup>4</sup> Ña cuni Ndióxi queá ná tandaha ndó xihín in táláá ñáñaãa. Ta ná coo vii ndó xihin ña ta ná cãja cáhnu ndó ña. <sup>5</sup> Ta ná a ndiáva ini ndó cãja núu ndó xihin ña tá quiahva cãja ñayivi, na co xini Ndióxi. <sup>6</sup> Co ndítahan cãja ndó cuachi xihin ñájihí ñani táhan ndó jáchi xihín ña yóho jándahvi ndó yíi ña. Ta jándoho ndivaha Ndióxi ini tóco ndihi na cãja já. Ta sa xini vaha ndó ña yóho jáchi naçaxi tuhun nde ña nu ndó jihna. <sup>7</sup> Jáchi coo naçana Ndióxi mí ña ná cãja í cuachi. Naçana mé á mí jáchi cuni a ña ná cacuú ñayivi yíi, na ín vii ínima. <sup>8</sup> Ta ndá na co cuni cuni joho ña jánaãa nde já queá cándaãa ini ndó ña a juú ndehe cuití va cándají na. Jáchi quehe núu na Ndióxi sahá ña co cãja na ña cuni mé á. Ta Ndióxi queá nasahan ínima yíi mé á nu yo cañuhu a iní.

<sup>9</sup> Sa najánaãa va Ndióxi ndohó ndá quiahva ndítahan

quihvi ini táhan ndó, na cúu cuéntá Jesús. Sahá ña cán queá nu carta yóho co ndítahan cahyí tucu u ña nu ndo. <sup>10</sup> Ta sa xini vi ña mé a ndaa quihvi ini ndó tóco ndihi na cúu cuéntá Jesús ndúu estado Macedonia. Joo xica tahví i nu ndó, ñani mí i ña ná quihvi chága ini ndó na. <sup>11</sup> Xini ñúhú nducú ndo coo vaha ini ndó xihín ndihi ñayivi. Ta nducú ndo coo ndisáhnu ini ndó. Ta ndítahan nu in in ndó cãja ndó chuun mé ndó jáchi já najánaãa nde nu ndó jihna. <sup>12</sup> Ta tá ná cãja chúun vaha ndó já queá cahan vaha ñayivi, na co cúu cuéntá Jesús saha ndo. Ta tá ná cãja chúun vaha ndó já queá a ndimaní ni in ñaha nu ndo catacu ndó.

*Vaxi quivi quixi tucu Jesucristo ñuyívi yóho*

<sup>13</sup> Ta viti cuni nde ndicani nde nu ndó, ñani i, na cúu cuéntá Jesús ña ná candaãa vaha ini ndó ña ndaa sahá ñayivi, na sa naçihí. A cácuéha ini ndó saha ná tá quiahva cãja ñayivi, na co cándeé ini Ndióxi. <sup>14</sup> Tá quiahva cándusa nde ña naçihí Jesucristo ta nanditacu tucu a quiahva já cándusa nde ña jánditacu tucu Ndióxi na sa naçihí, na nasandee ini mé á tá nasatacu na. Cãja Ndióxi ña ná quixi na cán xihín Jesús tá ná quixi tucu a ñuyívi yóho.

<sup>15</sup> Ña cán queá cahan nde ña yóho xihin ndo ta cúu á ña najánaãa Jesucristo, xitoho í nuú nde. Tá ná quixi tucu mé

á ñuyíví yóho ndiquehe a mí já queá a cùhun toho jihna ñúhú na tácu ñuyíví yóho jáchi jihna ñúhú ndindita na sa naxihí. <sup>16</sup> Jihna ñúhú nuu Jesucristo quixi tucu a ñuyíví yóho. Ta mé já cayuhú a cahnda a chuun nuú ndihi ñayivi. Já cayuhú táto sacuaḥa Ndióxi ta ndaḥyi trompeta Ndióxi. Já nditacu nu cuití na sa naxihí, na cándusa Jesucristo. <sup>17</sup> Andá javí tóco ndihi mí, na tácu ndique táhan í xihín na nanditacu nu cuití ta cañehe Ndióxi mí tañu vico. Já ndique táhan í xihín Jesucristo, xitoho í nu táchi ta já coo í xihín mé á anda ama cáa quivi. <sup>18</sup> Sahá ña cán queá ndítahan nu ndó quiahva tūhun ndeé ini táhan ndó xihín tūhun yóho.

## 5

<sup>1</sup> Candehé ndo, ñani í, na cúu cuéntá Jesús. Co xíní ñúhú cahyí í nu ndo saḥa ndá ama quixi tucu Jesucristo ñuyíví yóho. <sup>2</sup> Jáchi cándaḥ vaḥa ini ndó ña mé quivi co cáhán yo quixi Jesucristo ñuyíví yóho já quixi mé á. Tá quiahva jonáá cuití va xínu in da cuihná tá ñuú quiahva já jonáá xínu Jesucristo ñuyíví yóho. <sup>3</sup> Tá ná cahán ñayivi sa ndúu vaḥa ndivaḥa na ta ni in ñaha a cúu yihví na anda javí jonáá xínu ña ndoho ndivaḥa ini na. Tá quiahva jonáá xínu ña sáhdá a tixi in ñáñáḥa tá cúni cacu jahyi ña quiahva já xínu quivi ndihi saḥa ná. Ta ni in na a cuú cacu toho. <sup>4</sup> Joo mé ndó, ñani

mí í, na cúu cuéntá Jesús co ndúu ga ndó nuú naá saḥa ña cándaḥ ini ndó ña quixi tucu Jesucristo ñuyíví yóho. Ta vatí catóntó ndo tá ná xínu in da cuihná nu ndo joo co ndítahan catóntó ndo tá ná quixi tucu Jesucristo. <sup>5</sup> Jáchi tóco ndihi ndó, na cándeé ini Jesucristo ndúu ndó nu yeḥe saḥa ña xíca ndó íchi cuéntá Jesús. Co xíca toho ndó íchi nuú naá nu xíca ñayivi ñuyíví, na co cándeé ini Jesucristo. <sup>6</sup> Sahá ña cán queá ndítahan coo tiaḥva í candatí quixi Jesucristo ta a cúju yo tá quiahva cája java ga ñayivi. Ña ndítahan cajú í queá cañuhu táhyí iní xihín tóco ndihi xíní túni yo candatí xínu Jesucristo. <sup>7</sup> Jáchi na quiji, quiji na tá ñuú ta na xíhi, xíhi na tá ñuú. <sup>8</sup> Joo mí sa xíca í nu yeḥe ta ndítahan cañuhu táhyí iní. Ndítahan nu yó chindeé yo mí. Tá cándeé iní Jesucristo ta tá quihvi ini táhan í já cúu á tátūhun ndíxi yó cotó caa. Tá ndatí quixi tucu Jesucristo jácacu a mí já cúu á tátūhun ñúhu ndó yijini caa. <sup>9</sup> Jáchi coo naçaxi Ndióxi mí ndicueḥe a xihín yo jáchi naxihí Jesucristo, xitoho í saḥa cuachí saḥa ña cúni a jácacu a mí ná a cùhun yó indayá. <sup>10</sup> Naxihí Jesucristo saḥa yo ta tá tácu yo á sa naxihí yo mé quivi quixi tucu a ñuyíví yóho já queá cañehe a mí cohó coo í xihín mé á anda ama cáa quivi. <sup>11</sup> Ña cán queá quiahva tūhun ndeé ini táhan ndó ta chindeé táhan ndó tá quiahva sa cája ndó.

*Ndícani Pablo nuú na cúu cuéntá Jesús ña ndítahan caja na*

<sup>12</sup> Ta viti xíca tahví nde nu mé ndó, na cúu cuéntá Jesús ña ná caja cáhnu ndó ñayivi, na caja chúun tañu ndó jáchi ndáca na ndohó íchi cuéntá Jesucristo, xitoho í ta jánaḡa na tuhun Ndióxi nu ndo. <sup>13</sup> Ndítahan coo toní ñuhú ndo xihín ná ta quihvi ini ndó na xihín ndinuhu ini ndó jáchi caja chúun na cuéntá Ndióxi tañu ndó. Coo vaha ini ndó xihín ñani táhan ndó.

<sup>14</sup> Xíca tahví nde nu ndó ña ná jánani ndó ndá na co cúní caja chúun. Quiahva ndó tuhun ndeé ini ndá na cácuéḡa ini. Chindeé ndó ñayivi, na vitá ini xihín tuhun Ndióxi. Ta coo cáhnu ini ndó xihín ndihi ñayivi.

<sup>15</sup> Candehé ndo. A ndúcú ñehe ndó ña núu cája inga na xihín ndo. Ta ndinducú ndo caja vaha xihín táhan ndó ní tiempo ta quiahva já caja ndó ña vaha xihín tóco ndihi ñayivi.

<sup>16</sup> Ná coo vatá ini ndó ní tiempo. <sup>17</sup> Ta caça tahví ndó nu Ndióxi ní tiempo. <sup>18</sup> Ndá na cuu ña ndóho ndó ndítahan nu ndo ndiquiahva ndó ndixahvi nu Ndióxi sahá jáchi ña yóho cúní Ndióxi caja mé ndó, na cúu cuéntá Jesús.

<sup>19</sup> A cáji nuu ndó nuú ña cúní ínimá yí Ndióxi caja xihín ndo. <sup>20</sup> A quéhe núu ndó ñayivi, na jáyaha tuhun, ña nasahan Ndióxi nu ná caḡan na xihín ndo. <sup>21</sup> Coto ndojó ndo tóco ndihi ña cáḡan na xihín ndo. Caxi ndó ña vaha

<sup>22</sup> ta caxoo ndó nu tóco ndihi ña núu.

<sup>23</sup> Ta Ndióxi, mé a cája ña coo vaha ini ndó, ná caja yí ndihi a ndohó. Ná caja yí á ínimá ndo xihín yiquí cuñu ndó já ná coo víi ndo tá ná xinu quiví quixi tucu Jesucristo, xitoho í. <sup>24</sup> Jáchi sa naçaxi Ndióxi mí ta a jándicoo a mí anda quiahva jáxinu coo a tóco ndihi ña naçachi a.

*Jáxinu coo Pablo ña cáḡan da ta ndíndayí da na*

<sup>25</sup> Ñani mí í, na cúu cuéntá Jesús, caça tahví ndo nu Ndióxi sahá nde.

<sup>26</sup> Caḡan Ndióxi ndó xihín ndihi na cúu cuéntá Jesús ta tatí yúhu táhan ndó ta yí caja ndó ña.

<sup>27</sup> Candehé ndo, ñani í, na cúu cuéntá Jesús. Sáhndá í chuun nu ndó cuéntá Jesucristo, xitoho í ña ná cahvi ndó carta yóho nuú ndihi na cúu cuéntá Jesús ndúu xihín ndó jan.

<sup>28</sup> Ná caja Jesucristo, xitoho í cuahá ñamaní xihín ndo. Já ná coo.

## Carta chí ivi nacahyí Pablo nuú na cúu cuéntá Jesús ñuu Tesalónica

*Pablo xihín da xíca xihín dá chindahá da Ndióxi coo na cúu cuéntá Jesús ñuu Tesalónica*

<sup>1</sup> Yehe cúu Pablo, da cáhyi carta yóho xihín Silvano xihín Timoteo ta chindahá i ña nuú ndihi ndó, na cúu cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. <sup>2</sup> Ná caja Ndióxi, tátá yo xihín Jesucristo, xitoho í cuhá ñamanj xihín ndihi ndó ta ná caja mé á ña ná coo vaha ini ndó.

*Caja vii Ndióxi sahá na caja cuachi tá ná quixi tucu Jesucristo ñuyívi yóho*

<sup>3</sup> Ndijáá ní quivi ndítahan nuú nde ndiquiahva nde ndixahvi nu Ndióxi saha ndóhó, na cúu cuéntá Jesús. Ta in saha caja nde já jáchi nini quivi cándéé chága ini ndó Jesús ta quíhvi chága ini táhan ndó na cúu cuéntá Jesús. <sup>4</sup> Sahá ña cán quéa cáji ini nde cáhan nde saha ndo nuú java ga na cúu cuéntá Jesús ndá nacuu nu táca na jáchi cándéé ini ndó Jesús ta sahan ndeé ini ndó tá ndóho ini ndó sahá ña caja xixi ñayivi xihín ndo. <sup>5</sup> Jánaha Ndióxi nu yo ña ndaa caja mé á tá

cája vii a saha yo. Ta sahá ña yóho sácú tiahva mé á ndóho cuhun ndó indivi cacomí a cuéntá saha ndó jáchi ndóho ini ndó cuéntá mé á viti.

<sup>6</sup> Ta ndaa caja Ndióxi tá jándoho a ini ñayivi, na caja xixi xihín ndó viti. <sup>7</sup> Ta sahá ña ndóho ini ndó ná caja mé á ña ná ndiquehe ndée ndo tá quiahva caja mé á ña ná ndiquehe ndée ri ndehe va mé quivi quixi tucu Jesucristo ñuyívi yóho. Ta quixi a xihín tátó ndée mé á ta cuni yó a ña quixi a indivi tañu ñúhu ita. <sup>8</sup> Quixi a jándoho a ini na co cándéé ini Ndióxi ta ni co cándúsa na tuhun vaha sahá Jesús, xitoho í, mé a cuu jáca cu mí. <sup>9</sup> Ta ndá na co cándéé ini Jesucristo já quéa ndoho ndivaha ini na anda ama cáa quivi ini indayá ta a cóo ga na nu Ndióxi. Ta tavá jín Ndióxi na já ná a cúní ga na nu á anda ama cáa quivi. Ta a cúní ga na ña náhnu caja Ndióxi xihín ndée mé á. <sup>10</sup> Tá ná quixi tucu Jesucristo ñuyívi yóho já caja cáhnu ndivaha tóco ndihi na cúu cuéntá Jesús mé á nuú quixi a. Ta já catóntó ndivaha tóco ndihi na sahá ña náhnu ndivaha caja Jesucristo. Ta quiahva já caja cáhnu ri ndóhó va Jesucristo mé quivi cán jáchi cándéé ini ndó tuhun vaha sahá Jesús ña nacahan nde xihín ndo.

<sup>11</sup> Ña cán quéa ndijáá ní quivi xíca tahví nde nu Ndióxi saha ndo ña ná cacuu ndó ñayivi ndaa tá quiahva cúní mé á jáchi sahá ña yóho

nandicaxi a ndohó. Ta xíca tahví nde nu Ndióxi saha ndo ña ná quiahva mé á ndée á nu ndo já ná cuu jáxinu coo ndo ña vaha ña cúní ndó caja ndó nani cája chúun ndó cuéntá mé á sahá ña cándéé ini ndó mé á. <sup>12</sup> Ta sahá ña vaha cája ndó, caja cáhnu ñayivi Jesucristo. Anda jáví ndiñehe jícó Jesucristo ndohó jáchi cúu ndó cuéntá mé á ta cája ndó ña cúní mé á. Mé a ndaa cúní Ndióxi xihín Jesucristo, xitoho í caja cuahá ñamaní xihín yo.

## 2

*Cáhan Pablo sahá da ihvi Jesucristo, mé da quixi chí nuu*

<sup>1</sup> Cuni johó vaha ndó, ñani mí i, na cúu cuéntá Jesús jáchi cáxi tuhun i xihín ndo saha mé quivi quixi tucu Jesucristo ñuyíví játaca mé a mí ndique táhan í xihín á. Xíca tahví i nu ndó <sup>2</sup> ña ná a cándúsa ndó java ñayivi tá cáchí na ña sa naxinu quivi ndicó coo Jesucristo ñuyíví. A ndícani ga ini ndó sahá ña cáchí na jáchi a juú ña ndaa cúu á. Tá ná cachi na cán ña nacahan Ndióxi xihín ná á tá ná cachi na ña nacachi mé nde ña nandindaa mé quivi cán á tá ná cachi na cán ña nacahyí nde in carta nu ná já quéa a cándúsa toho ndó na jáchi a juú ña ndaa cúu á. <sup>3</sup> A cándúsa ndó ña cáchí na cán jáchi cúní na jándahvi na ndohó. Ta viti cáhan nde ña ndaa xihín ndo saha mé quivi quixi tucu Jesucristo. Jáchi jihna ñuhú

casahá cuahá ndivaha ñayivi nduu na na ihvi Ndióxi ta jándicoo na íchi cuéntá mé á. Anda jáví casaa in da quini, da cája cuahá ndivaha nuú cuachi. Joo vaxi quivi tá jándihi Ndióxi saha dá ini in-dayá. <sup>4</sup> Ta mé da quini yóho, da cúu da ihvi Ndióxi cándají da mé á ta cándají da tóco ndihi ña cúu cuéntá mé á. Anda jáví casaa da veñuhu cáhnu ndácaan ñuu Jerusalén cacao da cán tátuhun Ndióxi. Ta cachi da xihín ñayivi ña cúu dá Ndióxi.

<sup>5</sup> Á co ndícuhun ini ndó tá nasahiin i xihín ndo já cuiti nacahan i ña yóho xihín ndo. <sup>6</sup> Ta viti sa cándaa ini ndó ndía sájí nuu nuú da ihvi cán ña ná a xínu coo da mé quivi ña co ndítahan nu dá xínu da. <sup>7</sup> Vatí cámani jánaha da ihvi mé dá nuú ñayivi joo cája chúun jehé da viti ñuhú jándihi da sahá ñaha Ndióxi cúní da. Ta viti ín in a sájí nuu nuú da ihvi ta co sahan ñamaní jánaha da ihvi mé dá nuú ñayivi. Joo vaxi quivi caxoo ña sájí nuu nuú da ihvi cán. <sup>8</sup> Ta anda jáví jánaha da mé dá nuú ñayivi. Ta cahní Jesucristo mé da ihvi cán xihín tachí yúhu a tá ná quixi a ñuyíví yóho. Ta jándihi a saha dá xihín ña ndiyihvi ndaa nuú quixi a. <sup>9</sup> Tá cámani quixi tucu Jesucristo ñuyíví já casaa mé da ihvi xihín cuahá ndivaha ndée ña nasahan tiñahá sacuaaha nu dá. Ta jándahvi da ñayivi jáchi caja da cuahá ñaha náhnu, ña co cúu ña ndaa. <sup>10</sup> Ta caja da

tóco ndihi nuú cuachi jáchi cúni da jándahvi da ñayivi, mé na xíca íchi cuahan indayá. Cuhun na indayá jáchi coo naxeen na candúsa na ña ndaa saha Jesucristo ta coo naxeen na quihvi ini na ña ndaa, ña cuu jácacu ñahá. <sup>11</sup> Ña cán quéa quiahva Ndióxi ñamaní jándahvi da ihvi cán na já ná candúsa na ña tuhún. <sup>12</sup> Já quéa jándoho Ndióxi ini tóco ndihi na cán jáchi coo nacandúsa na ña ndaa ta ndinuhu cuachi nacatoo na cája na.

*Nacaxi Ndióxi ndohó ña ná jácacu a ndohó*

<sup>13</sup> Ta ndijáá ní quivi ndítahan nuú nde ndiquiahva nde ndixahvi nu Ndióxi saha ndó, na cúu ñani nde cuéntá Jesús sahá ña quihvi ini a ndohó. Jáchi janda tá cámaní cava sáhá saha ñuyivi nacaxi Ndióxi ndohó ña ná jácacu a ndohó. Jáchi nandaja víi ínimá yí mé á ínimá ndo sahá ña cándéé ini ndó ña ndaa saha Jesús. <sup>14</sup> Cúni Ndióxi ña ná cándéé ini ndó mé á ña cán quéa nachindahá a ndehe caxi tuhun nde tuhun vaha saha Jesucristo nu ndo. Nacaxi Ndióxi ndohó ña ná in nduu ndó xihin Jesucristo, xitoho í. Cáhnu ndivaha cúu mé á ta ndaja cáhnu a mí xihin á.

<sup>15</sup> Ñani mí i, na cúu cuéntá Jesús coo ndacú ini ndó xihín ña cándéé ini ndó Jesucristo. A ndíndójó ndo tiin tuun ndó ña ndaa ña najánaḡa nde nu ndo tá nasanduu nde xihin ndó. Ta tiin tuun ndó ña

nacahyi nde nu ndó viti. <sup>16</sup> Jesucristo, xitoho í xihin Ndióxi, tátá yo, mé a quihvi ini mí ná quiahva tuhun ndeé ini ta anda ama cáa quivi a ndíhi sahá. Ta viti ndátí tiahva caja Ndióxi cuahá ñamaní xihin yo. <sup>17</sup> Ta xíca tahví nde nu Ndióxi ña ná jachutú a ínimá ndó xihin ndéé mé á. Ta ná chindeé a ndohó cahan ndó tuhun vaha ta caja ndó ña vaha cuití va.

### 3

*Cúni Pablo ña ná caca tahví na nu Ndióxi saha dá*

<sup>1</sup> Candehé ndó, ñani i, na cúu cuéntá Jesús. Nu ndíhí cahan i tuhun yóho xihin ndo. Caca tahví ndo nu Ndióxi sahá nde. Ta caca tahví ndo nu mé á ña ná ndicuíta nuu yachi tuhun vaha saha Jesús ndijáá ñuu ta ná ndiquehe vaha ñayivi mé tuhun vaha tá quiahva nandiquehe ndó ña. <sup>2</sup> Ta caca tahví ndó nu Ndióxi sahá nde ña ná jácacu a ndehe ndahá ñayivi quini. Vatí ndúu cuahá na co cándéé ini Jesucristo <sup>3</sup> joo jáxinu coo Ndióxi tuhun mé á. Já quéa quiahva mé á tuhun ndeé ini ndó ta candaa mé á ndohó já ná a cája tiñáhá sacuaḡa ña núu xihin ndo. <sup>4</sup> Cándéé ini nde Jesucristo ta cándéé ini nde ndohó ña cája tá cája ndó ña najánaḡa nde nu ndo. <sup>5</sup> Ná chindeé Ndióxi ndohó candaa ini ndó ndá quiahva quihvi ini á ndohó. Ta ná chindeé a ndohó caja ndeé ini ndó tá ndoho ini ndó



tá quiahva ñacaja ndeé ini Jesucristo tá ñandoho ini a.

*Xíni ñúhú caja chúun í cat-acú*

<sup>6</sup> Cuni joho vaha ndó, ñani mí i, ña cúu cuéntá Jesús. Ñasahnda Jesucristo chuun nu yó sahá ña cán quéa sáhndá nde chuun nu ndo ña ná caxoo ndó nuú ña cúu cuéntá Jesús tá cájúsá ña caja chúun na tá quiahva najánaha nde nu ndó. <sup>7</sup> Ta sa xíni ndó ña ndítahan nu ndó caja ndó tá quiahva ñacaja mé nde tá

ñasanduu nde xihín ndo jáchi coo ñacajúsá nde caja chúun nde. <sup>8</sup> Nachahvi nde sahá ña ñaxixi nde cán. Ñacaja chúun vaha nde ñuú ta ndiví já ñañehé nde jiuhún cat-acu nde já ná a ndóho ni in ndó sahá ña ñaxito ndó ndehe. <sup>9</sup> Vati íin sahá nde cachi nde xihín ndo ña ná coto uun ndó ndehe joo coo ñacaja nde já. Ña ñacaja nde quéa ñacaja chúun vaha nde já najánaha nde nu ndo ndá quiahva ndítahan nu ndó caja ndó. <sup>10</sup> Á co ndícuhun ini ndó chuun ñasahnda nde nu ndo tá ñasanduu nde xihín ndo. Já ñacachi nde já: Ndá

ña co cúni caja chúun, ná a cúxu toho na, ñacachi nde. <sup>11</sup> Jáchi ñañehé nde tuhun ña ndúu java ña jusá tañu ndó ta co cúni ña caja chúun na ta xíca nuu na játaca na tuhun sahá ñayivi. <sup>12</sup> Ta sáhndá nde chuun nuú ña jan ta jácahan nde ña xihín ndeé ñasahan Jesucristo, xitoho í nuú nde ña ná caja chúun ndísáhnua na já ná ñehé ná ña cúxu na.

<sup>13</sup> Candehé ndo, ñani i, ña cúu cuéntá Jesús. A cánaá ndo caja ndó ña vaha. <sup>14</sup> Tá ña canduu java ña tañu ndó ta co cúni ña caja na ña cáchi nde xihín carta yóho já quéa xíni ñúhú candehé vaha ndó ndá ña cúu ná ta a cáca nuu ga ndó xihín ná já ná cacahan nuu ná sahá ña cája na. <sup>15</sup> Joo a cája ndó cuéntá ña cúu ná ña ihvi Jesucristo. Xíni ñúhú jácahan ndó ña ña ná caja vaha na jáchi cúu ná ñani ndó, ña cúu cuéntá Jesús.

*Ndíndayí Pablo ñayivi Tesalónica*

<sup>16</sup> Ta Jesucristo, xitoho í, mé a íin vaha ini ná quiahva mé á nu ndo ña ná coo vaha ini ndó ndaja táhan quivi. Ta ná coo vaha ini ndó xihín ndá ñaha ñacuu vaxi nu ndo. Ná coo Jesucristo, xitoho í xihín ndihi ndó.

<sup>17</sup> Yehe cúu Pablo ta chindahá i Ndióxi coo ndó ta cáhyí i quivi i xihín ndáha i já ná candaá vaha ini ndó ña mé a ndaa yehe cúu ña ñacahyí i ña yóho nu ndo.

<sup>18</sup> Ná caja Jesucristo, xitoho í cuahá ñamaní xihín ndo. Já ná coo.

## Carta nu cuití nacahyí Pablo nuú Timoteo

*Chíndahá Pablo Ndióxi coo  
Timoteo*

<sup>1</sup> Yehe cúu Pablo, da cúu in apóstol cuéntá Jesucristo sahá ña ñasahnda Ndióxi xihín Jesucristo chuun yóho nuú i. Ta Ndióxi cúu á ña jácaacu mí ta Jesucristo cúu á ña ndátí quixi. <sup>2</sup> Cáhyí i carta yóho nu mún, Timoteo jáchi cúun tátuhun jahyi maní i sahá ña cándéé inún Jesucristo. Ta cúni ña ná caja Ndióxi, tátá yo xihín Jesucristo, xitoho í cuahá ñamaní xuhun. Ta ná tahví ini a sahun ta ná caja ña ná coo vaha inún.

*Ndicani Pablo sahá na co  
jánaha ña ndaa*

<sup>3</sup> Tá jalóho cámani quee e ñuu Efeso quixi i estado Macedonia yóho já naxica tahví i nuun ña ná candoun ñuu Efeso jan. Ta viti xíca tahví tucu u nuun ña ná coun cán. Jáchi ndúu java ñayivi cán ta jánaha na ña tuhún nuú ñayivi. Ta ndítahan nu mún cahndún chuun nu ná ña ná a jánaha ga na ña tuhún. <sup>4</sup> Ta ná a táa joho na cuento nání, ña cáhan sahá chichi naquixi tásáhnú jícó yo. Jáchi ndítuhún uun va na sahá ña yóho ta co chindeé a na cándéé ini na Ndióxi, mé á nasacu ini jácaacu a mí.

<sup>5</sup> Ndítahan cahún ña yóho xihín ná jáchi cúni Ndióxi ña

ná quihvi ini táhan í xihín ndihi ínima yo ta cúni a ña ná caja í ña vaha cuití va ta cúni a ña ná cándéé ini mé á xihín ndinuhu ini. <sup>6</sup> Joo java ñayivi najándicoo na ña ndaa ta najátivi na ña cája na jáchi ña quihvi cuití va ndítuhún xihín táhan na. <sup>7</sup> Vatí cúni na cán jánaha na ley Moisés joo co cándaq ini na ña jánaha na ta ni co cándaq ini na ña cáhan mé ley.

<sup>8</sup> Joo sa xini yo ña mé ley Moisés cúu á ña vaha tá ná caja chúun vaha í ña tá quiahva cúni Ndióxi. <sup>9</sup> Xini ñuhú ndicuhun ini ña ni in ley co chícāan cuachi jatá ñayivi vaha. Joo chícāan cuachi jatá ñayivi quini, na sáá ini jáchi co cája na ña cúni Ndióxi. Ta chícāan cuachi jatá ñayivi núu, na cája cuahá nuú cuachi. Ta chícāan cuachi jatá ñayivi co cája cáhnú Ndióxi, na cánahá xihín mé á. Ta chícāan cuachi jatá ñayivi sáhní tátá náná na xihín jata tóco ndihi na sáhní ndii. <sup>10</sup> Ta chícāan cuachi jatá ñayivi ndúu xihín ta a á ñáha, na co cúu yíí ná á ñájhí na. Ta chícāan cuachi jatá ta líhi, da quihvi nuu xihín inga ta. Ta chícāan cuachi jatá na cája cuíhná ñayivi sahá ña cúni na jicó ñahá na. Ta chícāan cuachi jatá ñayivi cáhan ña tuhún, mé na janda quivi Ndióxi táva na tá cáhan na ña tuhún. Ta chícāan cuachi jata tóco ndihi ñayivi tá co cája na ña ndaa, ña jánaha Ndióxi nu yó caja í. <sup>11</sup> Ta ñasahnda Ndióxi chuun nuú i ña ná

jánaḥa i ña ndaa yóho nu ndo jáchi cúní a jácaçu a tóco ndihi ñayivi. Cáhnu ndivaḥa cúu mé á ta ndítahan caja cáhnu í mé á.

*Ndiquiahva Pablo ndixahvi nu Ndióxi jáchi táhnda ini a saha dá*

<sup>12</sup> Ndiquiahva i ndixahvi nu Jesucristo, xitoho í jáchi naçaxi a yeḥe caja chúun i cuéntá mé á ta naṣahan mé á tuhun ndée ini i ña ná caja i ña xihín ndinuhu ini i. <sup>13</sup> Vatí jihna naçahan ihvi i saha Ndióxi ta naçaja xíxi i xihín á ta naçanahá i xihín á joo naçaxi a yeḥe. Ta natahnda ini a sahá i tá cámaní candeé ini i Jesucristo jáchi coó naçandaa ini i ña naçaja i. <sup>14</sup> Naçaja Ndióxi cuaḥá ñamaní xihín i tá naçaja ña ná candeé ini i mé á. Ta naçaja mé á ña naçhutú ndaa ini i xihín ña quihvi ini i na cúu cuéntá mé á sahá ña in nanduu u xihín mé á.

<sup>15</sup> Ña yóho cúu á ña ndaa ta ndítahan nuú ndihi ñayivi candúsa na ña cáchi i yóho: naquixi Jesucristo ñuyíví yóho jácaçu a ñayivi, na cája cuaçi. Ta yeḥe cúu u da yójó nu ndihi na cája cuaçi. <sup>16</sup> Ta sahá ña yóho natahvi ini Ndióxi sahá i já ná cuu naḥa Jesucristo ndaja cáhnu coo ini mé á. Ta vatí naçaja cuaḥa chága i cuaçi a juú ga java ga ñayivi joo já naçacuu u yuhú nuú tóco ndihi na vaçi chága chí nuu ña ná candeé ini na mé á ta já coo na xihín mé á anda ama cáa quivi. <sup>17</sup> Ña cán

quéa cóho caja cáhnu í Ndióxi anda ama cáa quivi jáchi mé á cómi a cuéntá saḥa yo anda ama cáa quivi. Ta mé Ndióxi a cuú quivi a ta ndíchí ndivaḥa jini á ta ín a indiví vatí a cuú cuní a. Cáhnu ndivaḥa cúu mé á. Já ná coo.

<sup>18</sup> Candehún Timoteo, da cúu tátuhun jahyi mí i. Jándacoo i chuun yóho nu mún jáchi quiahva já naçachi profeta saḥún jihna. Ta xíní ñúhú quiahva ndeé inún cajún ña jáchi cúu á tátuhun cáni táhún xihín ña núu. <sup>19</sup> A jándacoún ña candeé inún Jesucristo ta xihín ndinuhu inún cajún ña ndaa. Jáchi java ñayivi coó naçaja na ña xíní na cúní Ndióxi caja na ta chí nandihí sahá ña candeé ini na Jesucristo. <sup>20</sup> Ivi táhan da cán cúu Himeneo xihín Alejandro. Nandiquiahva i da cán ndáḥa tiñáhá saçuaḥa va já ná candaa ini da ña a cuú quehe núu da Ndióxi xihín tuhun cáhan da.

## 2

*Ndaja caja í caça tahví yo nu Ndióxi*

<sup>1</sup> Ña xíní ñúhú chága caja ndó quéa caça tahví ndó nu Ndióxi sahá ndihi ñayivi ña ná tahvi ini a saḥa ná. Ndiquiahva ndó ndixahvi nu Ndióxi sahá ñamaní cája mé á xihín ndó. <sup>2</sup> Ta sa mé quiahva já ndítahan caça tahví ndó nu Ndióxi saḥa tóco ndihi na cómi cuéntá saḥa yo. Jáchi tá cája í ña yóho já cuu coo vaḥa iní xihín ndihi ñayivi ta já coo toní ñúhú xihín táhan í.

Ta já nuna nu yo caja cáhnu í Ndióxi. <sup>3</sup> Tá xíca tahví yo nu Ndióxi sahá ndihi ñayivi já quéa cája í ña vaha ta cájii ini Ndióxi, mé á jácacu mí. <sup>4</sup> Jáchi cuni a jácacu a tóco ndihi ñayivi ña ná candaá ini na ña ndaa saha mé á. <sup>5</sup> Jáchi íin in tálaá Ndióxi. Ta íin in tálaá Jesucristo, mé á cúu á taa ta cája mé á ña ná ndique táhan máni ñayivi xihín Ndióxi. <sup>6</sup> Ta nandiquiahva Jesucristo mé á quivi a sahá cuachi tóco ndihi ñayivi. Xihín ña yóho náha Ndióxi nu yo ña nandindaa tiempo tá cuni a jácacu a tóco ndihi ñayivi. <sup>7</sup> Sahá ña cán quéa nacaxi Ndióxi yehé cacuu u apóstol ña ná caxi tuhun i tuhun vaha sahá Jesús nuú na tóho, na co cúu na Israel. Jáchi cuni Ndióxi ña ná candaá ini na ña ndaa já ná cuu candeé ini na Jesús. Cáhan i ndinuhu ña ndaa xihín ndo ta co cáhan i ña tuhún xihín ndo.

<sup>8</sup> Ña cuni quéa ná caça tahví nataa nu Ndióxi tóco ndihi nu táca ndo. Ta ndítahan nu ná coo víi ínima ná já ná cuu ndiñehe na ndáha ná nu Ndióxi. Ta ndítahan nu ná jándicoo na ña xójo ini na ta ná a cáni táhan yúhu ná. <sup>9</sup> Jári co ndítahan nuú najihí candixi na jahmá lándá. Ta ná a cája lándá ná xihín ijí jini ná. Ta ná a ndíhi ini na caja cutú na mé ná xihín ñaha jjuhún cuáán á xihín jíqui yahvi tátuhun perla. Ta ná a cándixi na jahmá yahvi ña cája lándá ná xihín. <sup>10</sup> Vaha chága ná caja na ndinuhu ña vaha tá

quiahva ndítahan nuú najihí, na cúu cuéntá Jesús caja na. <sup>11</sup> Ndítahan nuú najihí canduu táji ná cuni johó na tuhun Ndióxi ta coto ná a ndiñehe jícó na mé ná. <sup>12</sup> Ta co sahan i ñamaní nuú najihí ña ná jánaaha na nu táca ñayivi. Ta ni co sahan i ñamaní nu ná ña ná cacomí na cuéntá sahá dataa. Joo ndítahan nu ná coo táji ná. <sup>13</sup> Jáchi jihna ñúhú nacavaha Ndióxi Adan ta anda jávi nacavaha mé á Eva. <sup>14</sup> Ta a juú Adan cúu da najándahvi tiñáhá sacuahá, vaha. Joo najándahvi tiñáhá sacuahá Eva ta já nandicava ña nuú cuachi. <sup>15</sup> Sahá ña cán quéa nacaja Ndióxi xihín najihí ña ná ndoho ini na tá cacu jahyi na. Joo jácacu Ndióxi na tá ná a jándacoo na ña candeé ini na mé á. Ta já ndítahan nu ná quihvi ini na ñayivi. Ta ná a cája lándá ná ta ná ndiquiahva víi na mé ná ndáha Ndióxi.

### 3

*Ndaja ndítahan caja na sacuahá nuú na cúu cuéntá Jesús*

<sup>1</sup> Ta ña ndaa cúu tuhun yóho: ndá da cuni cacuu da sacuahá nuú na cúu cuéntá Jesús, ña vaha quéa cuni da. <sup>2</sup> Jáchi ndítahan nuú da sacuahá caja da ndinuhu ña ndaa já ná a ñehe íni ñayivi cahán núu na saha dá. Ta in tuhún ñájihí da ndítahan coo. Ta ndítahan cacuu da da tácu ini ta ndítahan nu dá cañehe vaha da quiahva ta ndítahan cacuu da da íin

toní ñúhú ñayivi xihín. Ta ndítahan nu dá cajii ini da ndiquehe vaha da ñayivi vehe da. Ta xíní ñúhú cacuu da da tiahvava vaha jánahá da ñayivi. <sup>3</sup> Co ndítahan cacuu da da xihí ta co ndítahan cacuu da da ndúcú cuachi xihín ñayivi. Joo ndítahan coo víi da xihín ñayivi ta ná a cáni táhan da xihín ná. Ta co ndítahan cacuu da da ndiáva ini quehe cuahá da jiuhún. <sup>4</sup> Ta ndítahan nuú da sacuahá cacomí vaha da cuéntá saha na vehe da. Ta ndítahan nuú jahyi da coo johoh na nu cáhan tátá na xihín ná ta ná coo toní ñúhú na xihín dá. <sup>5</sup> Jáchí tá ta a cúu cañehe vaha da cuéntá sahá na vehe da já queá a cúu caja da cacomí da cuéntá sahá na cúu cuéntá Jesús. <sup>6</sup> Ta mé da sacuahá co ndítahan cacuu da da jacá nandihvi íchi cuéntá Jesús. Jáchí tiahvava náa casahá da ndiñehe jícó da mé dá ta sahá ña yóho jándoho Ndióxi ini da tá quiahva ñacaja mé á xihín tiñahá sacuahá. <sup>7</sup> Mé da sacuahá nuú na cúu cuéntá Jesús yóho ndítahan cacuu da da ín toní ñúhú ñayivi, na coo cúu cuéntá Jesús xihín. Jáchí tiahvava náa ndicava da ndáha tiñahá sacuahá ta xihín ña yóho cahán núu ñayivi ñuyívi saha dá.

*Ndaja ndítahan caja na tá ná chindeé na na sacuahá veñuhu*

<sup>8</sup> Ta ndá da cúní cacuu da chindeé na sacuahá veñuhu ndítahan nu dá cacuu da da ín toní ñúhú ñayivi xihín.

Ta xíní ñúhú cacuu da da cáhan ndinuhu ña ndaa. Co ndítahan cacuu da da xihí ta co ndítahan nu dá cacuu da da ndiáva ini coo cuahá jiuhún nuu. <sup>9</sup> Ta xíní ñúhú tiin tuun da ña ndaa ña nanaha Ndióxi nu yo ta ña yóho cúu á ña ndítahan candeé ini mé á. Ta ná a cáhvi ivi johoh ini da. <sup>10</sup> Jihna ñúhú xíní ñúhú coto ndojó ndo mé da cúní chindeé na sacuahá veñuhu. Ta tá coo cája da cuachi nu Ndióxi já queá cuu chindeé da na sacuahá veñuhu. <sup>11</sup> Ta jári najihí viti ndítahan cacuu na na ín toní ñúhú ñayivi xihín. Co ndítahan cacuu na na ndahnda yuhu. Ná cacuu na na ndísáhnú ini ta ná caja chúun na xihín ndinuhu ini na. <sup>12</sup> Ta mé da chindeé na sacuahá veñuhu ndítahan nu dá cacuu da da coo inga ñaha xihín ta in túhún ñájihí da ndítahan coo. Ta ndítahan nu dá cacomí vaha da cuéntá sahá jahyi da xihín sahá ndihi na vehe da. <sup>13</sup> Jáchí tá ná chindeé vaha da yóho na sacuahá veñuhu já casahá cahvi vaha ini ñayivi saha dá ta xihín ña yóho ñeñe ini da cahán chága da sahá ña candeé ini da Jesucristo.

*Cáhan Pablo saha ndá a cúu mé Jesucristo*

<sup>14</sup> Vatí ndúcú u saa yachi i jan joo cáhyí i carta yóho nuun. <sup>15</sup> Jáchí tá ná cacuáchi loho i saa i jan já queá sa cándaa ínún xihín carta yóho ndaja ndítahan caja mí, na cúu na vehe Ndióxi. Mé a ndaa cúu yó cuéntá Ndióxi,

mé á tácu ta ndítahan nu yo quiahva ndeé iní ndiquehé sahá ña ndaa cáhan saha Jesucristo. <sup>16</sup> Jáchí mé a ndaa cáhnu ndivaha cúu ña náha Ndióxi nu yo:

Naquixi Jesucristo ñuyivi yóho ta nasacuu a ñayivi.

Ta nacahan ínima yji Ndióxi saha mé á ña coo nacaja ni in cuachi.

Ta naxini tátó Ndióxi Jesús.

Ta ndijáa ñuyivi nacaxi tuhun na tuhun vaha saha mé á ta cuahá ndivaha ñayivi nacandee ini na mé á ta tá nandihí nandaa cuahan indivi.

#### 4

*Cáhan Pablo sahá na co jánaha ña ndaa*

<sup>1</sup> Cáhan cáxi ínima yji Ndióxi ña vaxi quivi jándacoo java ñayivi ña candee ini na Jesús. Ta casahá na candico na na jándahvi ñahá, na jánaha ña naquixi nuú tiñahá sacuahá.

<sup>2</sup> Ta mé na jánaha ña tuhún yóho co cúu ná tá quiahva ndaa na. Jáchí cúu ná ñayivi túhún, na nandaji xíní túni xihín ña núu. <sup>3</sup> Ta jánaha na yóho ña a cuú tandaha ñayivi ta jánaha na ña a cuú

cuxu ñayivi java ñaha, ña nacavaha Ndióxi cúxú. Joo cúni Ndióxi ña ná cúxú ña jan tá ná ndiquiahva í ndixahvi nu mé á sahá jáchí candee ini mé á ta xíní vaha í ña ndaa. <sup>4</sup> Jáchí tóco ndihí ña nacavaha Ndióxi cúu á ña vaha ta ni in ñaha co ndítahan candají yo.

Joo ná ndiquehe vaha í ña ta

ná ndiquiahva í ndixahvi nu Ndióxi sahá. <sup>5</sup> Jáchí tá ná caça tahví yo nu Ndióxi já caja yji mé á ña xihín tuhun mé á.

*Ña ndítahan caja da caja chúun vaha cuénta Jesucristo*

<sup>6</sup> Tá ná jánahún ña yóho nuú na cúu cuénta Jesús já quea caja chúun vahún cuénta mé á. Ta quiahva ndeé inún tá jácuaha chágun ña ndaa sahá Jesucristo já ná candico cáhnu chágun íchi cuénta mé á. <sup>7</sup> Coto a táa johún cuento ña cáhan ñayivi ñuyivi jáchí coo saha toho ña jan. Ña ndítahan cajún quea jácuaha chágun ndá quiahva caja cáhnún Ndióxi. <sup>8</sup> Tá ná caja chúun cuaha í xihín yiquí cuñu í já quea chindee a mí ñuyivi yóho cuití va. Joo tá ná caja cáhnu í Ndióxi já quea chindee chaga yó mí jáchí xihín ña yóho cuu coo vaha ini ñuyivi yóho ta sa xihín mé ña yóho cuu coo vaha í xihín Ndióxi tá ná cuhun yó coo í xihín mé á. <sup>9</sup> Ta ña yóho cúu á ña ndaa ta xíní ñuhú candúsa í ña. <sup>10</sup> Ta sa saha mé ña ndaa yóho cája chúun vaha í jáchí candee ini Ndióxi, mé á tácu. Mé a cán cúni a jácacu a tóco ndihí ñayivi ta mé a ndaa jácacu a tóco ndihí na candee ini mé á.

<sup>11</sup> Ta xíní ñuhú jánahún nuú ñayivi tóco ndihí ña cáhí í xuhun yóho ta xíní ñuhú cahndún chuun nu ná ña ná caja na ña. <sup>12</sup> Coto a quiahvún ñamaní nuú ñayivi quehe núu na yohó sahá ña cúun da yuta. Joo xihín

ñā cájún xíní ñúhú jáñahún nuú nā cúú cuéntá Jesús ndá quiahva ndítahan caja na ta ndá quiahva ndítahan cahān nā. Ta xíní ñúhú jáñahún nu ná ndá quiahva ndítahan quihvi ini na ñayivi ta ndá quiahva ndítahan candeé ini na Ndióxi. Ta víi uun cajún tóco ndihi ñaha já ná a cáhvi núu ini ñayivi sahūn. <sup>13</sup> Nani ndátún saā i jān xíní ñúhú cahvún tuhun Ndióxi nuú nā cúú cuéntá Jesús nu táca nā. Ta quiahvún tuhun ndeé ini na ta jáñahún nā. <sup>14</sup> Coto a ndíndójún sahā ñā nasahan Ndióxi nuun tá naxica tahví nā cúú profeta nu mé á sahūn tá nachojó nā sacuaḥa ndáha ná jinun.

<sup>15</sup> Xihín ndinuhu inún caja chúun cuéntá Ndióxi já ná cuu cuni tóco ndihi ñayivi ndá quiahva xica vahún xihín ñaha Ndióxi. <sup>16</sup> Cuéntá vaha coún xihín mún ta cuéntá vaha coún xihín ñā jáñahún nuú ñayivi. Ta xíní ñúhú coo ndacú inún xihín ndihi ñā cajún. Jáchi tá ná cajún ñā yóho já quéa cacu ndaa ínimun ta jári cacu ndaa ínima nā xíní johu nu cáhūn.

## 5

*Jāñahā Pablo nu Timoteo ndaja ndítahan caja da xihín nā cúú cuéntá Jesús*

<sup>1</sup> Co ndítahan jāñanún da sáhnū. Ñā ndítahan cajún quéa jácahūn dá tá quiahva cáhūn xihín tátún. Ta xíní ñúhú cajún xihín da yúta chága tá quiahva cájún xihín ñanún.

<sup>2</sup> Ta xihín nā sáhnū xíní ñúhú cajún tá quiahva cájún xihín nánún. Ta xihín nā tacú xíní ñúhú cajún tá quiahva cájún xihín quiahvún. Víi uun cajún xihín ná ta a cáhvi núu inún saḥa ná.

<sup>3</sup> Xíní ñúhú chindeé ndó nā cuāan tá co ndíni cúu na tá ta coo nā vehe na. <sup>4</sup> Joo tá íin in ñā cuāan ta ndúu jahyi ñā á ndúu jahyi ñání ñā já quéa ndítahan nuú nā cán chindeé nā ñā. Jáchi táhán ini Ndióxi xihín ñayivi tá chindeé nā tátá náná nā ta xihín ñā yóho chahvi na ñamanī nācaja tátá nā xihín ná tá najacuahnu ñahá nā. <sup>5</sup> Jáchi mé ñā cuāan ñā mé a ndaa coo nā vehe ñā chindeé nā ñā mé ñā cán cúú ñā candeé chága ini ñā Ndióxi. Ta ñuú ta ndiví xica tahví ñā nu mé á ñā ná chindeé a ñā. <sup>6</sup> Joo ñā cuāan, ñā cája ñā núu ñā cúní mé cuití ñā, ñā cán cúú ñā tátuhun ndii vatí tácu ñā. <sup>7</sup> Ñā cúní quéa ná cahndún chuun yóho nuú nā cán já ná a ñeḥe íni yo jāñaní nā. <sup>8</sup> Jáchi ndá nā co chindeé nā táhan na ta ni co chindeé nā nā vehe na já quéa náha cáxi a ñā co candeé ini na Jesucristo ta jānda núu chága cája na a juu ga nā co cúú cuéntá Jesús.

<sup>9</sup> Tá ndúu nā cuāan ta tá cúní nā chindeé nā nā sacuaḥa veñuhu já quéa cahyún quivi ná nuú tutu. Xíní ñúhú cacuu na nā naxinu uní jícó cuiā á chága ta xíní ñúhú cacuu na nā nasahūn xihín in túhún yí. <sup>10</sup> Mé nā yóho xíní ñúhú cacuu na nā cáhān vaha ñayivi sahā

ñā vaha cája na. Tátuhun tá nasandaa vaha na jahyi na á tá nandiquehe vaha na ñayivi xínu coo vehe na. Ta xíní ñúhú cacuu na na cája ndívi nuú na cúu cuéntá Jesús. Ta ndítahan coo tiahvā na chindeé na ñayivi tá ndóho ini na. Tá cája na ñā yóho xihín java gā ñaha vaha já cuu quehe ndó na ná chindeé na na sacuaḥa veñuhu.

11 Joo a cáhyi tohún nuú tutu jan quiví na cuáan, na yúta chá jáchi tiahvā ná casáhā ndiava ini na tandaha tucu na ta andā javí jándicoo na chuun cája na cuéntá Jesucristo. 12 Ta xihín ñā yóho cája na cuachi nu Ndióxi jáchi coo najáxinu coo na tuhun nasahan na nu Ndióxi. 13 Ta jári cásáhā xíca nuu na tá vehe tá vehe ta ndúu na na jusá. Ta a juú ñā cán cuití va vaha jáchi cásáhā na ndahnda yúhu ná ta quíhvi nuu na nuú co ndítahan coo na ta cásáhā cahān na ñā co ndítahan cahān na. 14 Sahá ñā cán queá cáchí i xuhun ñā vaha chága ná tandahá najihí cuáan, na yúta ta ná cacu jahyi na ta ná candaa vaha na vehe na. Ta xihín ñā yóho a quiahva toho na ñamaní nuú na ihvi yo cahān núu na saḥā ná. 15 Jáchi ndúu java najihí cuáan ta sa nacaxoo na nu íchi cuéntá Jesús ta nacasáhā na ndíco na tiñhá sacuaḥa.

16 Joo ndóhó, na cúu cuéntá Jesús tá ín ñā cuáan nu ndo ndítahan chindeé mé ndó ñā já queá ná nuná nuú java gā na cúu cuéntá Jesús chindeé

na na cuáan, na coo na vehe.

17 Na sacuaḥa, na cája chúun vaha na veñuhu ta cómi na cuéntá sahá na cúu cuéntá Jesús, na cán cúu na ndítahan ndiquehe cuahá chága yahvi sahá chuun cája na. Ta chága ví tá xíca nuu na jánaha na tuhun Ndióxi nuú ñayivi. 18 Jáchi já cáchí tuhun Ndióxi já: “A chícaun ñunu yuhú tindiqui nani cája chúun rí sání rí trigo. Joo xíní ñúhú quiahvún ñamaní nu rí caxí rí ñā.” Ta ín inga tucu nu cáchí a: “Da cája chúun ndítahan quehe da yahvi sahá chuun cája da.”

19 A cándúsa tohún na chícaan cuachi jatá in da sacuaḥa veñuhu tá ta co ndúu ivi á uni testigo na sahan tuhun sahá ñā nacaja da cán. 20 Joo ndá na co cúni jándacoo cuachi cája na já queá xíní ñúhú jánanún na nu táhyi ndihi na cúu cuéntá Jesús já queá ná cayihví na java cán caja na cuachi. 21 Nu Ndióxi ta xihín nu Jesucristo xitoho í ta xihín nu tátō Ndióxi sáhdá i chuun nu mún Timoteo ñā ná cajún ñā nacahyí i yóho. Tá jánanún in da cúu cuéntá Jesús sahá cuachi cája da xíní ñúhú jánanún da vatí cúu dá da xíní táhan vaha xuhun. 22 Coto a chójó yachún ndáhún jiní in da cúni cacuu da sacuaḥa nuú na cúu cuéntá Jesús. Jáchi nu cuití xíní ñúhú ndicani vaha inún sahá ñā cajún. Jáchi tá ná caja da cán cuachi já queá cahān java ñayivi ñā ín vaha inún xihín cuachi cája da. Coto a



cájún ña núu.

<sup>23</sup> Ta sahá ña já cuití quíhvi tísún sahá ña cán cō ndítahan cohún ticuñí uun va. Joo ndítahan coho lohún vino.

<sup>24</sup> Ndúu java ñayivi ta náha cáxí táhyí cuachi cája na nuú ñayivi vatí cámaní nahma na ña. Joo ndúu java ga ñayivi ta ñúhu jehé cuachi na joo vaxi quiví tá ndacanaha cuachi na. <sup>25</sup> Ta sa mé quiahva já ndacanaha cáxí táhyí ña vaha cája java ñayivi. Ta vatí ná caha jehé na ña vaha joo vaxi quiví ndacanaha nuú ña vaha nacaja na.

## 6

<sup>1</sup> Ta ndúu na cúu cuénta Jesús ta cómi xitoho na cuénta saha ná já quea xíní ñúhú caha cáhnu na xitoho na xihín nd-inuhu ini na já ná a cahan núu ñayivi sahá quiví Ndióxi ta ni ná a quehe núu na ña jánaha nde. <sup>2</sup> Ta tá ndúu java na ta xitoho na cúu dá cuénta Jesús já quea xíní ñúhú caha cáhnu na xitoho na sahá ña cúu da cán da candeé ini Jesús. Ña ndítahan caha na cán quea caha ndíví vaha chága na nu sáhdá xitoho na caha na jáchi xíní ñúhú ndicuhun ini na ña tá cája ndíví vaha na nuú da cán já quea cája ndíví vaha na nuú ñani máni ná, da cúu cuénta Jesús. Ña yóho quea xíní ñúhú jánahún nuú ñayivi ta xíní ñúhú cahndún chuun nu ná ña ná caha na ña.

*Ñayivi, na jánaha ña cō cúu ña ndaa*

<sup>3</sup> Ta ndá ñayivi tá jánaha na ña cō cúu ña ndaa, ña cō ndíque táhan vaha xihín tuhun nacahan Jesucristo, xitoho í nu yó ta ni cō ndíque táhan vaha xihín tuhun Ndióxi <sup>4</sup> já quea na cán cúu ná na ndínehe jícó ndivaha mé ta cō xíní na ni in ñaha. Ndiava ini na cani táhan yúhu ná ta cásahá cáhivvi ini na xihín ñayivi ta ndícuehe xihín táhan na. Cánahá na xihín ñayivi ta cō candeé ini táhan na. <sup>5</sup> Ta cō jándacoo na ña cáni táhan na sahá ña najaca xíní túni na ta nandindójo na ña ndaa. Ta cúni na ndicuicá na xihín ña jánaha na nuú ñayivi sahá Jesús. Candehún. Xíní ñúhú caxóun nuú na cán. <sup>6</sup> Vatí mé a ndaa tá ndíco yó íchi cuénta Jesús cúu yó na cuicá ndivaha nani íin vaha ini xihín ña cómi yo. <sup>7</sup> Jáchi coó ñaha ñéhé tá naquixí ñuyiví yóho ta ni coó ñaha cuu cañehé cohō tá ná quiví. <sup>8</sup> Sahá ña cán quea tá íin ña cuxú ta tá íin ña candixí já quea ndítahan coo vaha ini. <sup>9</sup> Joo na cúni ndicuicá cō candeé na cahnu na nuú ña cúni yiquí cuñu na ta já ndícava na nuú cuachi. Ta xihín ña yóho cásahá ndícají ini na caha na cuahá nuú ña núu. Ta cája ña yóho ña ná ndihi saha ná. <sup>10</sup> Ta sahá ña cátóo ndivaha ñayivi jiyuhún sahá ña cán quea quixi cuahá ña núu jini ná. Ndúu java na najándacoo na ña candeé ini na Jesús sahá ña cátóo na jiyuhún. Ta sahá ña yóho nacasahá ndóho ini na janda nuú cō ndéé ga ini na.

*Ndítahan nuú na cúu cuéntá Jesús candico cáhnu na mé á*

<sup>11</sup> Candehún, Timoteo, da cúu cuéntá Ndióxi. Xíni ñúhú caxóun nuú tóco ndihi ña núu já ná candico cáhnún íchi cuéntá ña ndaa. Cajún ña vaha, ña cúni Ndióxi ta candeé inún Jesús. Xíni ñúhú quihvi inún ñani táhún. Quiahva ndeé inún tá ndóho inún ta víi cajún tóco ndihi ñaha. <sup>12</sup> Xíni ñúhú candico cáhnún íchi ña candeé inún Jesús. Coto a jándacoún íchi ña cañehe yohó cuhún coún indivi xihín Ndióxi. Jáchi saha mé ña jan nacana Ndióxi yohó tá nacaxi tuhún nuú cuahá ñayivi ña candeé inún Jesucristo. <sup>13</sup> Nu Ndióxi, mé á cája ña tácu tóco ndihi ñaha ndúu ñuyívi, xihín nu Jesucristo, mé á coó nayihvi cahán ña ndaa tá nasandichi a nu Poncio Pilato, nu ndívi a cán sáhdá i chuun nu mún, Timoteo <sup>14</sup> ña ná cajún xihín ndinuhu inún tóco ndihi ña sáhdá Ndióxi nuun. Ta coto a ndíjama tohún ña jáchi quiahva já ñehe íni ñayivi jananí na yohó. Ta xíni ñúhú cajún ña yóho janda quiahva ná tandaa quivi quixi tucu Jesucristo, xitoho í. <sup>15</sup> Ta tá ná xinu coo quivi nasacu ini Ndióxi já caja mé á ña ná coo tóco ndihi ña yóho. Jáchi in tuhún Ndióxi cúu á ña yi ta cúu á xitoho nu tóco ndihi ñaha. Ta mé á cúu á jini nuú in in da cómi cuéntá sahá ñayivi ndúu ñuyívi. Ta mé á cúu á xitoho nuú ndihi da cúu xitoho nuú ñayivi ndúu

ñuyívi. <sup>16</sup> Mé á cúu á in tuhún jini Ndióxi, ña a cúu quivi. Ta ni in ñayivi a cúu cativi yati nu in mé á jáchi yehe ndivaha nu in mé á. Ta ni in ñayivi ndúu ñuyívi coó naxini na mé á jáchi a cuú cuni ñayivi Ndióxi. Ndítahan caja cáhnu í mé á anda ama cáa quivi jáchi a ndíhi toho sahá ña sáhdá mé á chuun. Já ná coo.

<sup>17</sup> Ndítahan nu mún, Timoteo cahndún chuun nuú na cómi cuahá ñaha cuíca ñuyívi yóho ña ná a cácuu na ñayivi catóo ndiñehe jícó mé. Ta xíni ñúhú cahndún chuun nu ná ña ná a candeé ini na ñaha cuíca cómi na jáchi cuu ndihi saha tóco ndihi ñaha cómi na. Ña ndítahan caja na quea candeé ini na Ndióxi, mé á quiahva tóco ndihi ñaha nu yo já ná cajii íni yo. <sup>18</sup> Cahndún chuun nu ná ña ná caja vaha na ta ná cayojó joho ña vaha cája na. Ta xíni ñúhú coo tiahva na cahnda java na ña cómi na xihín java ga ñayivi. <sup>19</sup> Jáchi xihín ña yóho ñehe táhvi ná coo cuahá ñaha cuíca na indivi tá ná tandaa quivi cuhun na coo na xihín Ndióxi anda ama cáa quivi.

<sup>20</sup> Candehún Timoteo. Xíni ñúhú quehe cuéntá vahún ña jánaha i nuun. Coto a cúni johún tuhun ña cahán ñayivi ñuyívi jáchi coó saha toho a ta ni coo xíni na ña cahán na saha. <sup>21</sup> Jáchi java na cán cáchí na xíni ndivaha na joo najándacoo na ña candeé ini na Ndióxi.

Ná caja Ndióxi cuahá

ñamānī xihín ndihi ndó. Já  
ná coo.

## Carta ivi nacahyí Pablo nuú Timoteo

*Chindahá Pablo Ndióxi coo  
Timoteo*

<sup>1</sup>Yehe cúu Pablo ta cúu u da apóstol, da cája chúun cuéntá Jesucristo. Nacaxi Ndióxi yehe ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasahan Ndióxi tuhun a nuú ñayivi ña cán quéa tá cándéé ini na mé á já quéa cuhun na coo na xihin mé á andá ama cáa quivi. <sup>2</sup>Cáhyi i carta yóho nu mún, Timoteo jáchi cúun tátuhun jahyi mí i ta quihvi ndivaha ini i yohó. Ná caja cuaha Ndióxi, tátá yo xihin Jesucristo, xitoho í ñamaní xuhun ta ná tahnda ini a sahun ta ná caja mé á ña ná coo vaha inún.

*Jácahan Pablo Timoteo ña  
ná ndicani da nuú ñayivi sahá  
Jesucristo*

<sup>3</sup>Ndíquiahva i ndixahvi nu Ndióxi saha mún, Timoteo jáchi ndicuhun ini i yohó tá xíca tahví i nu Ndióxi ñuú ta ndiví. Cája chúun vaha i cuéntá mé á tátuhun nacaja chúun tásahnu jícó i sanahá. Ta xini ña ín vaha ínima i nu Ndióxi. <sup>4</sup>Ndicuhun ini i ndaja nasacu ndivahún ta natahnda inún sahá i tá naquee e cán vaxi i yóho. Jári yehe va cuni ndivaha i cuni tucu u yohó já ná chutú ndaa ini i xihin ña cájii

ndivaha ini i. <sup>5</sup>Ndíquiahva i ndixahvi nu Ndióxi tá ndicuhun ini i ña mé a ndaa cándéé inún Jesucristo. Nu cuítí nacandéé cáhnu ini ná chéhun, Loida xihin nánún, Eunice Jesucristo ta quiahva já xini vaha i ña cándéé cáhnu inún mé á.

<sup>6</sup>Ña cán quéa jácahan i yohó ña ná ndicuhun inún caja chúun chágun xihin ña nañehe táhvun nu Ndióxi tá nachinúu i ndahá i jinun. <sup>7</sup>Jáchi co cuni Ndióxi ña ná cayihví yo. Já quéa nasahan ínima yii á nu yo já ná nduu ndeé ini ta ná quihvi ini táhan í ta ná cahnu yo mí cañehe vaha í quiahva xihin á. <sup>8</sup>A cácahan toho nun cahun tuhun vaha sahá Jesucristo, xitoho í. Ta a cácahan nun saha mí i vatí ndacaan i vecaa sahá Jesucristo. Joo ña ndítahan cajún quéa quiahva ndeé inún tá ná ndoho inún sahá Jesucristo jáchi sahan Ndióxi ndée mé á nun. <sup>9</sup>Najácaacu Ndióxi mí ta nacaxi a mí ña ná cacuú ñayivi yii cuéntá mé á. Ta a juú sahá ña nacaja vaha í joo nacaxi a mí jáchi nasacu ini a caja ñamaní xoho anda tá cámaní cava sahá saha ñuyiví. Sahá ña cán quéa nachindahá a Jesucristo quivi a sahá cuachí. <sup>10</sup>Ta anda viti naxinu coo ña nasacu ini a jáchi naquixi Jesucristo ñuyiví yóho ta naxihi a ndica cruxu. Ta sahá ña nacaja mé á co ndítahan yihví yo quivi jáchi cuhun í coo í xihin mé á anda ama cáa quivi tá ná candéé

iní tuhun vaha cáhan sahá Jesucristo.

11 Naçaxi Ndióxi yehe ná cacuu u in apóstol cuéntá mé á ña ná jánaḥa i tuhun vaha sahá Jesús nuú ñayivi, na coo naquixi chichi Israel. 12 Ta vatí ndóho ini i sahá ña yóho joo co cácahan toho nuú i jáchi xini vaha i yo cúu Jesucristo, mé a cándéé ini i. Nandiquiahva i mí i ndáha mé á ta xini vaha i ña candaa mé á yehe anda quiahva ná tandaa quivi quixi tucu a ñuyivi yóho.

13 Ta jácahan i yohó ña ná candico cáhnún íchi ndaa, ña najánaḥa i nuun. A jándicoún ña cándéé inún Jesucristo ta a jándicoún ña quíhvi inún ñayivi jáchi in nanduú xihín Jesucristo sahá ña cándéé ini mé á. 14 Sahá ña ndácaan ínimá yii Ndióxi ini in in yó ta sahá ña chindeé a mí sahá ña cán queá xini ñuhú cacu vahún ña nasahan Ndióxi nuun.

15 Sa xini vahún ña najándicoo tóco ndihi na cúu cuéntá Jesús ndúu estado Asia yehe. Tañu mé na cán ndácaan Figelo xihín Hermógenes. 16 Cúni ña ná tahvi ini Ndióxi sahá Onesíforo xihín na vehe da jáchi cuahá tañu nachindeé da yehe ta já nandivaha ini i. Ta coo naçacahan nuu da sahá ña ndácaan i vecaa. 17 Ña naçaja da queá nandinducú da yehe tá naçaa da ñuu Roma yóho ta coo nandiquehe ndée dá anda quiahva nandiñehe dá yehe. 18 Ná tahvi ini Ndióxi

sahá da cán tá ná ndindaa quivi quixi tucu Jesucristo ñuyivi yóho. Ta sa xini vahún ña nachindeé da yehe tá nasahin i ñuu Efeso.

## 2

*Ná quiahva ndeé ini tá ndóho ini sahá Jesucristo*

1 Ta mún, Timoteo cúun tátuhun jahyi mí i ña cán queá jácahan i yohó ña ná coo ndacú inún xihín ndée ña nasahan Jesucristo nuun.

2 Sa xini johún tuhun vaha naçaxi tuhun i nuú cuahá ñayivi. Ta vití ndítahan nu mún jánaḥún ña cán nuú java ñayivi, na cúu ñayivi ndísáhnú ini já ná cúu jánaḥa ná ña nuú java ga ñayivi.

3 Quiahva ndeé inún tá ndóho inún sahá Jesucristo jáchi cúun tátuhun in soldado vaha cuéntá mé á. 4 Jáchi in soldado cája cuití da ña sáhdá jefe da nu dá ta co cája da inga ga ñaha jáchi cúni da ña ná tahan ini jefe da sahá ña cája da. Tá quiahva cája mé soldado yóho quiahva já ndítahan nu yo caja í. 5 Jári sa xini vaha ndó ndaja cája da sájiquí pelota. Tá co sájiquí vii da já queá a cuú quee vaha da. Quiahva já cúu á xihín mí jáchi tá co cája í ña cúni Ndióxi já queá a cuú quee vaha í. 6 Tá ndihi ini in da xútu já queá ndítahan nu dá jáquee da nu cuití ñaha naçutu da. Ta quiahva já ndítahan ndihi ini caja chúun í cuéntá Jesucristo já queá cuu ndiquehé ña quiahva Ndióxi

nu yo. <sup>7</sup> Ndicani vaha inún saha tóco ndihi ña naçahan i xuhun ta já chindeé Ndióxi yohó canda vaha inún tóco ndihi ña cáchi i xuhun.

<sup>8</sup> Xíni ñúhú ndicuhun inún Jesucristo, mé á naquixi chichi David. Najánditacu Ndióxi mé á tá naxihi a. Ta viti cáxi tuhun i tuhun vaha saha mé á nuú ñayivi. <sup>9</sup> Ta ndóho ndivaha ini i sahá tuhun cáhan i nuú ñayivi. Naçató na yehe xihín cadena ta naçicaan na yehe vecaa tá quiahva cája na xihín in da quini. Joo a cuú caja na ña yóho xihín tuhun Ndióxi jáchi cuaha chága ñayivi cáhan na sahá Jesús viti. <sup>10</sup> Ña cán quea ín tiaha i ndoho ini i sahá ñayivi, na naçaxi Ndióxi cacuu na cuéntá mé á. Jáchi cúni Jesucristo jáçacu a ndihi na cándéé ini mé á já ná coo na xihín mé á anda ama cáa quivi. Ta ñúchí ndivaha cán. <sup>11</sup> Ña cáchi mé ña yóho cúú á ña ndaa:

Tá ná quivi sahá Jesucristo já quea cuu canduú xihín mé á anda ama cáa quivi.

<sup>12</sup> Tá ná caja ndeé iní ña ndóho iní sahá Jesucristo já quea vaxi quivi cahnda í chuun xihín mé á.

Tá ná cachí ña co cúú yo cuéntá Jesucristo já quea cachi mé á ña co xíni toho a mí.

<sup>13</sup> Vati ná ndindójó yo sahá Jesucristo joo a ndindójó toho mé á saha yo,

jáchi mé a ndaa jáxinu coo mé á tuhun sahan nu yó caja.

*Táhán ini Ndióxi xihín da cája chúun vaha cuéntá mé á*

<sup>14</sup> Ña yóho ndítahan jándicuhun inún ñayivi. Cahndún chuun nu ná ña ná a cáni táhan yuhu ná saha ndá tuhun cúú ña vaha chága jáchi coo saha cúú á. Joo ña cája na cán quea játivi na xíni túni mé ñayivi xíni joho ña cán. <sup>15</sup> Ndinuhu inún caja chúun vahún cuéntá Ndióxi já ná tahan ini mé á xuhun. Tá ná cajún ña yóho já quea a cáçahan nuun jáchi ndinuhu ña ndaa najánañún nuú ñayivi. <sup>16</sup> A quíhvi nuún nditúhún xihín ñayivi tá nditúhún quíhvi na jáchi quéta nuu chága na tañu cuachi tá nditúhún quíhvi na. <sup>17</sup> Ta java tañu ña cáhan xihín táhan na jan jándihíhvi a ñani táhan na jáchi tá quiahva jándihi cuhe táhyi sahá yiquí cuñu ñayivi quiahva já jándihi tuhun cáhan na sahá ñayivi. Já nandoho Himeneo xihín Fileto. <sup>18</sup> Naçaxoo ndívi da nu íchi ña ndaa ta viti jánañá da ña tuhún jáchi cáchi da ña sa nayaha va quivi tá nditacu tucu na sa naxihi. Jájana da jiní java ñayivi ña ná a cándéé ga ini na Jesús. <sup>19</sup> Joo Ndióxi cáhan ña ndaa ta a cuú ndijama mé á ña naçahan. Ta já cáchi tuhun Ndióxi sahá ñayivi cuéntá mé á: “Xíni Ndióxi ndá na cúú na cuéntá mé á.” Já cáchi tucu tuhun Ndióxi já: “Tá ná cachi ñayivi

ñā cāndeé ini na Jesucristo, xitoho na já queá ndítahan nu ná jándicoo na cuachi cája na”, cáchí tūhun Ndióxi.

20 Ta viti ná cacu u in quiahva nuun: ini in vehe cáhnu ín ñaha jiuħun cuáán xihín ñaha jiuħun cúxú. Jári ñúhu ri ñaha ñacavaħa xihín yító ta ñúhu ri ñaha ñacavaħa xihín ndahyi. Ta java ña cán ín javí a ta java ña cán ín chuun a ndijáá ní quivi. 21 Tá najándicoo í cuachi cája í já queá cacuú ñayivi víi nu Ndióxi. Ta cacuú tátuhun in coħo vaħa jáchí cuu caja chúun í cuéntá Ndióxi ta já cuu coo tiaħva í caja í tóco ndihi ña vaħa.

22 Cama chá caxoún nuú cuachi ña ndiáva ini da tacú caja da. Ta candico cáhnún ichi cuéntá ña ndaa ta candeé ínún Ndióxi ta quihvi ínún ñayivi ta coo vaħa ínún xihín ná. Tá ná cajún ña yóho in cacuún xihín tóco ndihi na cúu cuéntá Jesús, na ín víi ínima nu Ndióxi jáchí xíca na nu Ndióxi ña ná chindeé a na. 23 A quihvi nuún nditúhún quihvún xihín ñayivi jáchí tá ná cajún ña yóho já queá vaxi quivi tá casáhá caní táhan na xuhun. 24 Ta ndá da ndíco ichi cuéntá Jesús co ndítahan nu dá nducú da cuachi xihín ñayivi. Ña ndítahan caja da queá caja vaħa da xihín tóco ndihi ñayivi ta ná cacuu da in da tiaħva jánaħa vaħa ñayivi ta ná coo cáhnu ini da xihín ná. 25 Ta co ndítahan nu dá ndiñeħe jíco da mé dá nani jánaħa da nuú ñayivi, na sáa

ini xihín tūhun Ndióxi jáchí tiaħva náá caja Ndióxi ña ná ndicó coo ini na ta já candaa ini na ña ndaa sahá Jesucristo. 26 Jáchí tá ná ndicó coo ini na já queá janí ná ndáħa tiñáhá sacuaħa jáchí ñasacomí mé rí cuéntá saħa ná ña ná caja na ña cúni mé rí.

### 3

*Ña tandaa caja ñayivi tá jalóho cúni ndihi saħá ñuyivi*

1 Ta ndítahan candaa vaħa ínún, Timoteo ña tá ná cayati quivi quixi tucu Jesucristo ñuyivi yóho já queá ndoho ndivaħa ini na cúu cuéntá Jesús. 2 Jáchí vaxi quivi tá caja ñayivi cuahá ndivaħa cuachi. Cuahá ñayivi cajihnda ná ta quihvi ndivaħa ini na jiuħún na. Ta já caja cáhnu na mé ná ta ichi ndivaħa coo ini na ta candají na Ndióxi ta a cúni joħo na nuú caħan tátá náná na xihín ná. Ta ni ndixahvi a ndiquiahva na nu Ndióxi ta ni a cája cáhnu na mé á. 3 Ta a quihvi ini táhan na ta ni a cája cáhnu ini saħa táhan na. Ta caħan jíquí na saħa java ga ñayivi ta catúhún na. Ta a cuú caħnu na nuú ña xíca ini na caja na. Xíxi coo ini na xihín ñayivi ta candají na tóco ndihi ña vaħa. 4 Jíco túhún táhan na. Ta cacuu na ñayivi cama jiní. Ta caja ichi ndivaħa ini na. Catóo chága na cájii ini na xihín ñaha ñuyivi yóho a juú ga xihín ñaha Ndióxi. 5 Ta caja na tá quiahva cája na cúu cuéntá Ndióxi joo chijehé tūhun na

saha Ndióxi, mé á sahan ndée nu ná caja na ña cúní mé á.

Caxóun nuú ndihi na cája cuachi yóho. <sup>6</sup> Jáchi tañu na jan ndúu java ñayivi, na quíhvi vehe tá vehe jándahvi na najihí quíhvi xihín ña jánaħa na. Ta mé najihí yóho ndójo cuahá ndivaha na cuachi jáchi nayaha quiahva cája na tá nuú ña núu xíca ini na caja na. <sup>7</sup> Ta mé najihí yóho jácuaha ta jácuaha na joo co xínu coo nu ná candaa ini na ña ndaa. <sup>8</sup> Saħhá ndivaha nasanduu ivi da tají. In da naní da Janes ta inga da naní da Jambres. Tá quiahva nasaji nuu da cán nuú Moisés quiahva já sáji nuu java ñayivi nuú ña ndaa viti. Ña núu ndacaan xíní túní na ta coo naxeen na candeé ini na Jesucristo. <sup>9</sup> Joo vaxi quivi tá a cúu ga jándahvi na ñayivi jáchi mé quivi cán candaa cáxí ini ñayivi ndaja tóntó ñacaja na cán. Já nandoho Janes xihín Jambres saħhá jáchi nacandaa cáxí ini ñayivi ña ñacaja núu da xihín Moisés.

*Sáħndá tucu Pablo chuun nuú Timoteo*

<sup>10</sup> Joo sa xíní vahún tá quiahva ñacaja i tá najánaħa i nuun. Ta sa xínun ña cája i catacu u xihín ña nasacu ini i caja i chága chí nuu. Ta sa xínun ndaja candeé ini i Jesús. Ta sa mé quiahva já xíní vahún ña co xójo ini i xihín ñayivi. Ta sa xíní vahún ña quíhvi ini i tóco ndihi ñayivi. Ta xínun ndaja nasahaħan ndeé

ini i <sup>11</sup> tá ñacaja xíxi na xihín i ta ndaja najándoho na ini i tá nasahin i ñuu Antioquía xihín ñuu Iconio xihín ñuu Listra. Joo nachindeé Ndióxi yehe ta natavá mé á yehe nu tóco ndihi ña nandoho i. <sup>12</sup> Ta mé a ndaa ndoho tá ndoho ini ñayivi tá cúní na candico cáhnu na íchi cuéntá Jesús. <sup>13</sup> Ta ñayivi quini, mé na jándahvi ñayivi cája chága ví na cuachi ta co xíní na ndájá xínu coo nuú ndihi cuachi cája na. Xíca na jándahvi na ñayivi ta janda mé na cán najándahvi ñayivi.

<sup>14</sup> Joo jácaħan i yohó, Timoteo ña ná a jándicoún ña ndaa, ña ñacatiaħvún tá najácuahún xihín nde jáchi xíní vahún ña cúu á ña ndaa. Ta sa xíní vahún ndá ñayivi cúu nde. <sup>15</sup> Ta candaa vaha inún tuħun Ndióxi jáchi anda tá lohún najácuahún ña. Ta mé tuħun Ndióxi cuu jánaħa yohó cajún ña cúní mé á ta cuu jácacu a yohó jáchi candeé inún Jesucristo. <sup>16</sup> Nacahyí ñayivi tóco ndihi tuħun Ndióxi yóho jáchi najácaħan Ndióxi ínima ná ña ná caja na ña. Ta mé tuħun Ndióxi yóho chindeé a mí jáchi jánaħa mí caja í ña cúní Ndióxi ta jánaħi ri a mé ví tá co cája vaha í. Ta jándicaca vaha mí tá co xíca vaha í íchi cuéntá Ndióxi. Ta sa mé quiahva já jánaħa mí ña ná cacuú ñayivi ndaa, na co cája cuachi. <sup>17</sup> Já quea ná cuu nduu ndacú chága ini na candeé ini Ndióxi xihín tuħun mé á ta xihín ña yóho cuu coo tiaħva na caja na tá nuú ña



vaha.

#### 4

1 Vaxi quivi quixi tucu Jesucristo ñuyivi yóho cacomí a cuénta sahá yo ta mé já caja vii a sahá na tácu xihín sahá na sa naxihi. Sahá ña cán quea nu Ndióxi xihín nuú Jesucristo, xitoho í sahnda i chuun nu mún, Timoteo <sup>2</sup> ña ná coo tiahvún cahun tuhun Ndióxi nuú ñayivi níi tiempo tá núná nuún á tá coó. Ta nditahan nuun cavún jiní na cája cuachi ta jácahun na ña ná caja na ña cúní Ndióxi. Ta nditahan quiahvún tuhun ndeé ini na. Ta vii vii jánahún tuhun Ndióxi nu ná níi tiempo. <sup>3</sup> Jáchi vaxi quivi tá a cándusa ga ñayivi cuni johó na tuhun ña ndaa. Joo ndihi ini na nducú cuahá na maestro, da jánaha ña xica ini mé ná taa johó na. <sup>4</sup> Ta a cándusa na taa johó na ña ndaa jáchi cájii chága ini na taa johó na ña tuhún cuénta ñayivi ñuyivi. <sup>5</sup> Sahá ña cán quea sahnda i chuun nu mún, Timoteo ña ná cañehe vahún quiahva xihín ña cajún. Ta quiahva ndeé inún tá ná ndoho inún. Caxi tuhún tuhun vaha sahá Jesús nuú ñayivi xihín ndinuhu inún. Ta xini ñuhú jáxinu coún tóco ndihi chuun nasahan Ndióxi nuun cajún.

<sup>6</sup> Sa ín tiahva i joco i mí i nu Ndióxi. Sa xini vi ña sa nacayati quivi quivi vi. <sup>7</sup> Nacaja chún vaha i cuénta Ndióxi tátuhun cája chún vaha in soldado nu jefe da.

Najáxinu coo ndihi i chuun nasahan Ndióxi nuú i tátuhun cája in da xinu tá sa naquee vaha da. Ta nandico cáhnu i íchi ña candeé ini i Jesús. <sup>8</sup> Ta viti ndati i casaa quivi caja vii Jesucristo, xitoho í saha tóco ndihi ñayivi. Mé tiempo cán ndiquehe e ña quiahva mé á nuú i sahá ña nacaja i ña ndaa. Ta quiahva já caja Jesucristo, mé á cúu ña ndaa xihín java ga ñayivi, mé na cájii ini ndati na casaa quivi quixi tucu a ñuyivi.

*Cáhan Pablo cuénta mé da viti*

<sup>9</sup> Ndihi inún quixi camún coto nihnú yehé. <sup>10</sup> Najándicoo Demas yehé jáchi nacatóo chága da ñaha ñuyivi yóho ta cuahan da ñuu Tesalónica viti. Ta naquee Crescente cuahan da estado Galacia ta já naquee Tito cuahan da chí estado Dalmacia. <sup>11</sup> In tuhún Lucas ín da xihín i. Ndinducún Marcos ná quixi da xuhun tá ná quisún yóho jáchi cuu chindeé vaha da yehé xihín chuun cája i yóho. <sup>12</sup> Sa nachindahá i Tiquico ñuu Efeso. <sup>13</sup> Tá ná quisún yóho cajún ñamaní cañehún cotó ndeé e ña najándicoo i ñuu Troas vehe Carpo. Ta jári libro va cañehún ña quisún yóho. Ta a ndíndójún cañehún níi quiti ña nacahyí i nuun.

<sup>14</sup> Á co ndicuhun inún Alejandro, da cája chún cáni caa. Cuahá ndivaha ña núu nacaja da xihín i joo vaxi quivi tá chahvi da sahá, caja Jesucristo, xitoho í. <sup>15</sup> Cuénta

coún xihín dá jáchi cándají ndivaha da tuhun Ndióxi, ña jánaḥa yó nuú ñayivi.

<sup>16</sup> Tá nandiquehe e sahá i nu cuítí nuú na jutixia ni in ñayivi coó nachindeé yehe. Tóco ndihi na najándicoo na yehe. Ná caja cáhnu ini Ndióxi sahá ña naḥaja na cán. <sup>17</sup> Joo Ndióxi quéa nachindeé a yehe ta nasahan ndéé á nuú i ña ná cuu caxi tuhun i tuhun vaha sahá Jesús ná cuni joho tóco ndihi na coó naquixi chichi Israel. Tá nachindeé Ndióxi yehe já cúú á tátuhun naḥacu yehe yuhú león. <sup>18</sup> Ta cándeé ini i ña jácacu a yehe nuú ndihi ña núu. Ta candaa vaha Ndióxi yehe anda quiví cuhun i indiví coo i xihín mé á nu cahnda Ndióxi chuun anda ama cáa quiví. Cóho caja cáhnu í mé á anda ama cáa quiví. Já ná coo.

*Ndindayí Pablo na cúú cuéntá Jesús*

<sup>19</sup> Chindahá i Ndióxi coo Prisca xihín Aquila xihín na vehe Onesíforo. <sup>20</sup> Naḥandoo Erasto ñuu Corinto. Ta naḥandoo Trófimo ñuu Mileto jáchi quíhvi da. <sup>21</sup> Ndihi inún quisún yóho tá cámani xinu coo tiempo vixi. Eubulo xihín Pudente xihín Lino xihín Claudia chindahá na Ndióxi coún. Ta jári ndihi na cúú cuéntá Jesús ñuu yóho chindahá na Ndióxi coún.

<sup>22</sup> Ná coo Jesucristo, xitoho í xuhun. Ná caja Ndióxi cuahá ñamani xihín ndihi ndó.

## Carta nachindahá Pablo nu Tito

*Cáhan Ndióxi Pablo xihin  
Tito*

<sup>1</sup> Yehe cúu u Pablo, da cája chúun cuéntá Ndióxi ta cúu u in apóstol cuéntá Jesucristo. Nachindahá Ndióxi yehe caxi tuhun i tuhun vaha saha mé á nuú ñayivi ña ná candeé ini na mé á. Ta já ná candaa ini na ña ndaa saha mé á jáchi nandicaxi a na. <sup>2</sup> Ta ndáti tiahva na cuhun na coo na xihin mé á anda ama cáa quivi jáchi já nasahan Ndióxi tuhun a nu yó tá camani cava sahá saha ñuyivi. Ta co cáhan Ndióxi ña tuhun. <sup>3</sup> Ta viti naxinu coo quivi nasacu ini Ndióxi jánaha nuú ñayivi ndá quiahva cuu candeé ini na mé á. Ta viti ndójo i chuun ña nasahnda Ndióxi nuú i ña ná caxi tuhun i tuhun vaha saha Jesucristo nuú ñayivi, mé a jácacu mí. <sup>4</sup> Chindahá i tutu yóho nu mún, Tito, da cúu tátuhun jahyi mí i jáchi in nuú candeé ini Jesucristo. Ta xica tahvi i nu Ndióxi, tátá yó xihín nuú Jesucristo, xitoho í, mé a jácacu mí ña ná caja cuahá ñamaní xuhun ta ná caja ña ná coo vaha inún.

*Chuun nacaja Tito isla  
Creta*

<sup>5</sup> Najándicoo i yohó isla Creta jan ña ná jáxinu coún chuun ña najándicoo ñáñu i jan. Ndítahan ndicasún na

sacuahá nuú na cúu cuéntá Jesús in in ñuu tá quiahva nandicani i nuun cajún. <sup>6</sup> Ta mé da sacuahá yóho ndítahan cacuu da ñayivi vaha, da a cúu ñehe ini ñayivi jánani na sahá ña cája da. Ta ndítahan nu dá cacuu da da coo inga ñáha xihin ta in túhún ñájihí da ndítahan coo. Ta ndítahan nuú jahyi da candeé ini na Ndióxi. Ta co ndítahan nuú jahyi da caja na ña núu joo ndítahan nu ná candúsa na caja na ña cáchi náná tátá na já ná a cúu chícáan ñayivi cuachi jata ná. <sup>7</sup> Jáchi ndá da cúu da sacuahá cája chúun da cuéntá Ndióxi sahá ña cán quéa ndítahan cacuu da in ñayivi ndaa. Ta co ndítahan nu dá caja ichi ini da ta ni co ndítahan nu dá caja cama ini da xihín ñayivi. Ta ni ná a cácuu da da xihí ta ni ná a cátóo da cani táhan da xihín ñayivi ta ni ná a cátóo da ñehe cuahá dá jjuhún. <sup>8</sup> Ña ndítahan nu dá caja da quéa cajii ini da ndiquehe vaha da ñayivi vehe da ta ná caja da ña vaha cuití va ta ná cacuu da da ndísáhnú ini, da cañehe vaha quiahva. Ta ndítahan nu dá caja da ña ndaa cuití va ta ná candico cáhnú da íchi cuéntá Ndióxi ta ná candaca vii da yiquí cuñu da ná a cája da cuachi. <sup>9</sup> Ta ndítahan nu dá cativi tuun da ña ndaa sahá Jesucristo, ña nacatiahva da já quéa cuu chindeé da ñayivi xihín ña ndaa jánaha da nu na. Ta xihin mé tuhun vaha yóho cuu jáxinu da ini java ga ñayivi, na cáhan núu sahá

tuhun Ndióxi.

<sup>10</sup> Jáchí cuahá ñayivi co cúni na caja na ña cáchí tuhun Ndióxi. Ta tañu na yóho ndúu cuahá na Israel. Coó saha toho tuhun cáhan na ta xihín ña yóho jándahvi na ñayivi.

<sup>11</sup> Yuhú na yóho ndítahan chicají jáchí xíca na jájaca na jiní ñayivi ta janda tóco ndihi na ndúu vehe nacava na jiní ná xihín ña co cúu ña ndaa já ná ñehe cuahá na jjuhún jatá ñayivi jándahvi ñahá na.

<sup>12</sup> Ta tañu na yóho nasahiin in profeta ta já nacachi da já sahá ñayivi ñuu da, na ndúu isla Creta cán: “Na ndúu Creta cáhan na ña tuhún ní tiempo. Yucú na ta ndehé na ta júsa ndivaha na caja chúun na”, nacachi da. <sup>13</sup> Ta ña ndaa cúu ña nacahan da cán saha ná. Ña cán queá ndítahan nuun jánani vahún na ña ná candee cáhnu ini na Jesús <sup>14</sup> ta ná a táa johu na cuéntó ña ndícani ñayivi Israel nu ná jáchí ña quíxi jiní mé va na queá. Ta ná a táa johu na nu cáhan ñayivi, na nacaxoo nuú ña ndaa.

<sup>15</sup> Ta tá ndacaan vií xíní túni ñayivi já queá tóco ndihi ñaha cúu á ñaha vií nu ná. Joo tá co cándusa ñayivi Ndióxi ta ndacaan ña núu xíní túni na já queá tóco ndihi ñaha cúu á ña núu nu ná jáchí co ín vií ínimá ná xihín xíní túni na.

<sup>16</sup> Vatí cáchí na yóho ña candee ini na Ndióxi joo xihín ña núu cája na náha ña mé a ndaa co candee ini na mé á. Sáa ndivaha ini na ta a xeén toho na caja na ña ndaa sahá ña

cán queá ni in ñaha vaha a cuú caja na.

## 2

*Ndítahan jánaha yo tuhun vaha sahá Jesús nuú ñayivi*

<sup>1</sup> Ta ndítahan nu mún, Tito jánahún ñayivi ndaja caja na ña ndaa, ña cáchí tuhun Ndióxi caja na. <sup>2</sup> Jánahún na sacuaña ña ndítahan cacuu na ñayivi ndisáhnu ini, na ín toní ñúhú ñayivi xihín, na ñehe vaha quiahva xihín ñaha. Ta ndítahan candee vaha ini na Ndióxi ta ndítahan quihvi ini na ñayivi ta ndítahan coo ndacú ini na já ná cuu candee ini na tá ná ndoho ini na.

<sup>3</sup> Ta quiahva já ndítahan coo toní ñúhú najihí sacuaña xihín ñayivi. Ta co ndítahan cacuu na najihí túhún ta ni ná a cacuu na na xihí. Jáchí ndítahan nu ná cacuu na na ín toní ñúhú ñayivi xihín sahá ña vaha cája na. <sup>4</sup> Ta ndítahan jánaha na najihí yúta ña ná quihvi ini na yí ná xihín jahyi na. <sup>5</sup> Ta ndítahan cahnu na mé ná ta ndítahan cacuu na ñayivi vií ta ná candaa vaha na vehe na ta ná caja na ña vaha cuití va. Ta ndítahan candúsa na caja na ña sáhdá yí ná nu ná. Tá cája na tóco ndihi ña yóho já queá a ñehe ín ñayivi cahán núu na saha tuhun Ndióxi.

<sup>6</sup> Ta quiahva já ndítahan jácáhn da tacú ná coo ndisáhnu ini da. <sup>7</sup> Xihín ña cájún jánahún nu ná ndaja caja na ña vaha. Ta xíní ñúhú jánaha ndisáhnu ña yóho nu ná ta ná cajún ña xihín

ndinuhu inún. <sup>8</sup> Ta ná cahún ña vaha cuití va já queá a cúu chicaoan ñayivi cuachi jatun. Ta xihín ña yóho cacahan nuu na co cúní yohó jáchi a cúu cahan ihvi ná saha ndihi ndó, na cúu cuéntá Jesús.

<sup>9</sup> Ta jácahún ndá na cája chúun xihín xitoho na ña ná caja na tóco ndihi ña sáhdá xitoho na nu ná jáchi xíní ñúhú coo toní ñúhú na xihin ná ta ná a ndúcú ñehe ichi na tuhun nuú xitoho na. <sup>10</sup> Ta ná a cája cuíhná na nu ná joo ná cacuu na ndinuhu ñayivi ndaa. Ta xihín ña yóho náha ndá quiahva ndató ndivaha cúu tuhun Ndióxi, ña cahan saha mé á jácau a mí.

<sup>11</sup> Najánaha Ndióxi mí ña cúní a caja cuahá ñamaní xihin ñayivi ta ín tiahva mé á jácau a tóco ndihi ñayivi. <sup>12</sup> Ta jánaha mé á nu yo ña ndítahan jándicoo í tóco ndihi ña núu, ña xíca iní caja í ñuyíví yóho. Jáchi ndítahan nu yo cahnu í mí ta ná caja í ña ndaa cuití va ta ná candico cáhnu í ichi cuéntá Ndióxi. <sup>13</sup> Ta cáji iní nani ndáti tiahva í xinu coo quivi ndicó coo tucu Jesucristo xihin ndée á. Ta cúu á Ndióxi cáhnu ta jácau a mí. <sup>14</sup> Nandiquiahva Jesucristo mé á quivi a sahá ndihí jáchi cúní a jácau a mí ná a cája ga yo ña núu. Ta cúní a jándoo a tóco ndihi cuachí já ná nduu ñayivi cuéntá mé á ña ná ndihi iní caja í ña vaha.

<sup>15</sup> Ndítahan jánahún tóco ndihi ña yóho nuú ñayivi ta jácahún na ña ná caja na ña nacahyí í yóho. Ta

ndítahan nu mún jánanún ñayivi cája cuachi jáchi ín sahun cahndún chuun nu ná. Coto a quiahvún ñamaní nuú ñayivi quehe núu na yohó.

### 3

*Ña ndítahan caja na cúu cuéntá Jesús*

<sup>1</sup> Xíní ñúhú jándicuhun inún na cúu cuéntá Jesús ña ná coo johó na nu sáhdá na jutixia nu ná. Ta ná coo tiahva na caja na ndá ña nacuu nani cúu á ña vaha. <sup>2</sup> Ta xíní ñúhú cahún xihin ná ña ná a cahan núu na sahá inga ñayivi ta ná a cáni táhan na xihin inga na joo víi caja na xihin ná. Ta ná a ndíñehe jícó na mé ná nuú ndihi ñayivi.

<sup>3</sup> Jáchi ndítahan ndícuhun iní ña tá cámani ndihví ichi cuéntá Jesús já nacaja í cuahá nuú cuachi. Quíhví nasacaja í ta coo nacaja í ña cúní Ndióxi. Nacandúsa í ña tuhún, ña nacachi na jándahvi mí. Ta nasacaja í tá nuú ña núu jáchi nandiava iní yo caja í ña ta mé cuachi nasahnda chuun nu yo. Tóco ndihi quivi nasacaja í ña núu ta nasacuú ñayivi ihvi ini. Nasandají ñayivi mí ta ndaja mí nasandají táhan í viti. <sup>4</sup> Andá javí Ndióxi, mé a jácau mí najánaha nu yo ña táhvi ini a saha yo ta quíhvi ini a mí. <sup>5</sup> Sahá ña cán queá najácau a mí. Ta coo nacaja ña sahá ña vaha nacaja í. Joo najácau a mí jáchi táhnda ini a saha yo. Najándoo a cuachí ta xihin ña yóho nacaja ínima yí Ndióxi ña nanduu ñayivi

saá, na xíca ichí saá viti. <sup>6</sup> Naxihí Jesucristo saha yo ña ná jácacu a mí ta xihín ña yóho naxhutú ndaa ínima yo xihín ínima yíi mé á. <sup>7</sup> Nacaja Ndióxi ñamaní uun xihín yo ña ná canduu ndaa yó nu mé á sahá ña cán quea ndáti tiahva í cuhun yo coo í xihín mé á anda ama cáa quívi.

<sup>8</sup> Ta tóco ndihi ña cáhyí i yóho cúu á ña ndaa. Sahá ña cán quea cúni ña ná ndinuhu inún jánahún ña yóho nuú ñayivi, na cúu cuénta Jesús ña ná ndihi ini na caja na ña vaha. Jáchi ña nacahyí i yóho cúu á ña vaha ta cuu chindee a tóco ndihi ñayivi. <sup>9</sup> Joo coto a quíhvi nuún nditúhún xihín ñayivi cáhan tuhun quíhvi, ña ndícani sahá chíchi tásáhnú jíco yo. Ta a ndíhvi ndó caní táhan yúhu ndó xihín ná saha ley Moisés jáchi coo saha toho ña yóho ta mé a uun va quea caní táhan ndó xihín ná.

<sup>10</sup> Tá ín in na cúu cuénta Jesús ta tá cúni na caní táhan na xihín java ga na cúu cuénta Jesús, xíní ñúhú jánanún na ña ná a cája ga na ña yóho. In á iví tañu cuití va cahún xihín na ta tá co cúni na cuni jóho na ña cáhun xihín ná já quea tavún na ña ná cuhun na. <sup>11</sup> Jáchi sa xíní vahún ña nandeta nuu ña núu xíní túni ná ta sa xíní vaha na ña cája na cuachi.

*Sáhdá Pablo chuun nu Tito*

<sup>12</sup> Tá ná chindahá i Artemas á Tíquico nuun já quea ndihi inún cuhun ñuu Nicópolis jáchi cán cája

i cuénta coo i tiempo vixi. <sup>13</sup> Xíní ñúhú ndinducún ndaja cuu chindeún Apolos xihín Zenas, mé da tiahva ley. Quiahvún ñaha nu ná já ná a ndímaní ñaha tá ná quee na cuhun na viaje na. <sup>14</sup> Ta ndítahan nu ndihi na cúu cuénta Jesús jácuaha na ndaja caja na ña vaha xihín java ga ñayivi. Ta ndítahan nu ná chindee na ndá ñayivi nacuu na ndímaní ñaha nu. Tá ná caja na ña yóho já quea a cóo uun va na ñuyívi yóho.

*Ndíndayí Pablo Tito*

<sup>15</sup> Tóco ndihi na ndúu xihín i chindahá na Ndióxi coún ta chindahá nde Ndióxi coo ndihi na cúu cuénta Jesús cán jáchi xíní vaha i ña quíhvi ini na ndehe sahá ña cándeé iní Jesús. Ná caja Ndióxi cuahá ñamaní xihín ndihi ndó. Já ná coo.

## Carta nacahyí Pablo nuú Filemón

*Chíndahá Pablo Ndióxi coo  
Filemón*

<sup>1</sup> Yehe cúú u Pablo ta ndácaan i vecaa yóho saha ña cúú u cuéntá Jesucristo. Yehe xihín Timoteo, ñani í, da cúú cuéntá Jesús cáhyí nde carta yóho nu mún, Filemón. Quíhvī ini nde yohó ta in cúún xihín nde sahá ña cája chúún cuéntá Jesucristo. <sup>2</sup> Ta jári cáhyí nde carta yóho nuú na cúú cuéntá Jesús táca vehún jan xihín nu Apia, ña cúú quiahva í sahá ña cándéé ini ña Jesús. Ta quiahva já cáhyí nde carta yóho nu Arquipo jáchi in cúú da ndóho ini da cája chúún da cuéntá Jesucristo. <sup>3</sup> Ndióxi, tátá yo xihín Jesucristo, xitoho í ná caja cuahá ñamanī xihín ndo ta ná caja ña ná coo vaha ini ndó.

*Cándéé cáhnu ini Filemón Jesucristo*

<sup>4</sup> Tá xíca tahví i nu Ndióxi sahun co ndíndójó i ndiquiahva i ndixahvi nu mé á saha mún. <sup>5</sup> Jáchi nañehé e tuhun ña cándéé inún Jesucristo, xitoho í ta quíhvī inún mé á xihín ndihi na cúú cuéntá mé á. <sup>6</sup> Ta xíca tahví i nu Ndióxi ña ná ndicanún nuú java ñayivi ndá quiahva cándéé inún mé á. Ta xihín ña yóho cuu candaā vaha ini na ndaja náhnu ñamanī cája

Ndióxi xihín tóco ndihi mí, na cándéé ini Jesucristo. <sup>7</sup> Caji ini i ñani mí i ta sahan tuhun ndeé ini i jáchi quíhvī inún na cúú cuéntá Jesús. Ta jári sahan tuhun ndeé ini cuahá na cúú cuéntá Jesús jáchi quíhvī inún na.

*Xíca Pablo ñamanī nu  
Filemón saha Onésimo, da  
naxeen Filemón caja chúún nu  
dá*

<sup>8</sup> Yehe cúú u in apóstol Jesucristo ña cán quéa ín sahá i cahnda i chuun nuun cajún ña ndítahan nuun cajún. <sup>9</sup> Joo co cája i ña. Ña cája i quéa xíca i ñamanī nuun jáchi quíhvī ini i yohó. Xíní ñúhú ndicuhun inún ña cúú u Pablo, da sáhnū, da ndácaan vecaa saha Jesucristo. <sup>10</sup> Ta viti xíca i ñamanī nuun saha Onésimo, da nanduu tátuhun jahyi mí i cuéntá Jesús nani ndácaan i vecaa yóho.

<sup>11</sup> Jihna ga nasacuu Onésimo da coó chuun nuun joo viti ín chuun da nu ndíví yo. <sup>12</sup> Ta viti chíndahá i da nuun. Ndiqeehe vahún da saha mí i jáchi quíhvī ndivaha ini i da. <sup>13</sup> Cúni ña ná candoo da yóho xihín i já ná cuu chindeé da yehe nu mún. Jáchi ndácaan i vecaa yóho sahá ña cáhan i tuhun vaha sahá Jesucristo nuú ñayivi. <sup>14</sup> Joo nasacu ini i chindahá i da nuun jáchi tiahva náá a vaha cúú inún xihín i tá ná candoo da yóho xihín i. Jáchi tá ná cajún ñamanī xihín i cúni ña ná caji inún cajún ña ta co cúni caja ndúsa i xuhun. <sup>15</sup> Cája i cuéntá nacaxoo tóo

Onésimo nūn joo viti ndicó coo da ná coo da níi tiempo xuhun. <sup>16</sup> A cája gaún cuéntá ña cúú dá da naxeún. Joo vaha chága viti jáchi cúú da ñani máni yohó cuéntá Jesucristo. Quíhvī ndivaha ini i da joo xíní ñúhú quíhvī ini chágūn da jáchi cája chúun da nūn ta cúú da ñanún cuéntá Jesús viti.

<sup>17</sup> Ta tá mé a ndaa quíhvī inún yehe já quéa ndiquehe vahún da tá quiahva ndiquehe vahún yehe tá ná xīnu coo i nu iún jan. <sup>18</sup> Ta tá naçaja da in cuachi nūn á tá yicá da nūn já quéa ndacún ña nuú i ta já chahvi i sahá. <sup>19</sup> Yehe cúú u Pablo ta cáhyí i ña yóho xihīn ndáha i já ná candaā inún ña sáhan i tūhun i nūn ña chahvi i ña. Xíní ñúhú ndicuhun inún ña yícún nuú i jáchi nandihvún íchi cuéntá Jesús sahá tūhun naçahan i xuhun. <sup>20</sup> Inga tucu xíca i ñamanī nūn ña ná ndiquehe vahún Onésimo jáchi cúún ñani mí i, da cúú cuéntá Jesús. Tá ná cajún ña yóho sahá ña cándéé inún mé á já quéa quiahvún tūhun ndeé ini i.

<sup>21</sup> Cándaa vaha ini i ña cajún ña xíca i nūn cajún sahá ña cán quéa cáhyí i carta yóho nūn ta cándaa ini i ña yaha chága cajún nuú ña xíca i nūn. <sup>22</sup> Inga tucu xíca i ñamanī nūn ña ná caja tiahvún in vehe loho nuú coo i. Jáchi sahá ña xíca tahví ndihi ndó nu Ndióxi ña ná saa i coto nihni i ndohó sahá ña

cán quéa cája i cuéntá caja mé á ñamanī xihīn i saa i jan.

*Ndindayí Pablo Filemón*

<sup>23</sup> In da naní Epafras, da ndacaan vecaa xihīn i saha Jesucristo chindahá da Ndióxi coún. <sup>24</sup> Chindahá Marcos xihīn Aristarco xihīn Demas xihīn Lucas Ndióxi coún. Mé na yóho cája chúun na xihīn i cuéntá Jesucristo.

<sup>25</sup> Ná caja Jesucristo, xitoho í cuahá ñamanī xihīn ndihi ndó, na ndúu jan. Já ná coo.



## Hebreos, mé carta cuahan nuú na Israel

*Nachindahá Ndióxi Jesucristo ña ná quixi a jáyaha tuhun Ndióxi nu yó*

<sup>1</sup> Cuahá ndivaha tañu naçahan Ndióxi sanahá xihín tásáñnu jícó yó. Ta cuahá ndivaha nuú naçahan xihín ná tá najáyaha na profeta tuhun cáhan mé á nuú ñayivi.

<sup>2</sup> Joo tiempo nu ndihí yóho naçindahá mé á Jesucristo, in túhún jini já jahyi a ña ná jáyaha tuhun Ndióxi nu yó viti. Ta naçaja Ndióxi ña naçavaha Jesucristo ndijáá ñaha ñuyiví xihín ñaha indiví. Ta najándacoo Ndióxi tóco ndihi ñaha yóho ndáha mé á. <sup>3</sup> Ta mé á quea náha ndá quiahva cáhnu cúu Ndióxi jáchi yéhe a tá quiahva yéhe Ndióxi. Ta tá quiahva cáa Ndióxi quiahva já cáa ri Jesucristo, jahyi a. Ta xihín tuhun cáhan yúhu mé á cómi a cuéntá saha tóco ndihi ñaha jáchi in ndivaha ndée tuhun mé á. Ta nandaja vii mé a mí nuú ndihi cuachí ta já nasacoo a indiví xoo cuáha Ndióxi, tátá a.

*Cáhnu chága Jesucristo a juú ga tátó Ndióxi*

<sup>4</sup> Ta Jesucristo, mé jahyi Ndióxi naxinu a nanduu a ña cáhnu chága a juú ga tátó Ndióxi. Ta naçaja Ndióxi ña ná ñehe táhvi á ña cáhnu chága

quivi naní a a juú ga quivi tátó mé á. <sup>5</sup> Jáchi a ñaha cachi Ndióxi xihín ni in túhún toho tátó mé á tá quiahva naçachi a xihín jahyi a já:

Jahyi yehe cúu yóho, ta viti cáchí i ña nanduu u tátún, cáchí a.

Ta ni coó naçachi Ndióxi xihín ni in túhún toho tátó á tá quiahva naçachi a xihín jahyi a já:

Yehe cacuu u tátún, ta yóho cacuún in túhún jini já jahyi yehe, cáchí a.

<sup>6</sup> Joo tá jalóho cuni chindahá Ndióxi Jesucristo, jahyi a ñuyiví yóho já naçachi a já:

Nditahan nu tóco ndihi tátó mí i caja cáhnu na jahyi i, naçachi a.

<sup>7</sup> Já naçachi Ndióxi já saha tátó mé á:

Tá quiahva cama chá xícó tachí quiahva já cama chá cuahan tátó mí i.

Ta yehe na tá quiahva yehe ñuhú cáyi ita, já naçachi Ndióxi.

<sup>8</sup> Joo tá naçahan Ndióxi sahá jahyi a já naçachi a já:

Yóho cúun Ndióxi ta cacomún cuéntá sahá ñayivi anda ama cáa quivi,

ta cáhndún chuun xihín ña ndaa.

<sup>9</sup> Ta a juú quiahva cátóun ña vaha ta naçandajún ña núu.

Sahá ña cán quea naçaxi i yóho jáchi yehe cúu u Ndióxi ta cúu u tátún.

Ta najácutú ndaa i yóho xihín ña cáji inún já ná cajji chága inún a

juú gā nā xíca xuhun,  
naçachi a.

<sup>10</sup> Ta jári já naçachi a já xihín  
jahyi a:

Naçavañun tóco ndihi ñaha  
tá naçava sáhá saha  
ñuyiví ta cúun xitoho  
nuú ña cán.

Ta xihín ndáhun naçavañun  
indiví.

<sup>11</sup> Ta vaxi quiví tá ndihi saha  
tóco ndihi ña yóho joo  
mún coo tá coún anda  
ama cáa quiví.

Ta tóco ndihi ña jan cayatá  
ña tá quiahva cayatá  
jáhma ndíxi na.

<sup>12</sup> Tá quiahva sáhnü ñayivi  
jáhma quiahva já  
chicañun ñuyiví xihín  
indiví.

Ta tá quiahva ndíjama ñayivi  
jáhma ndíxi na quiahva  
já ndijama ña jan  
cajún.

Joo mún a ndíjama tohún jáchi  
coo tá coún anda ama  
cáa quiví,

ta a ndíjama tohún ta a ndíhi  
toho sañun, naçachi  
Ndióxi xihín Jesucristo.

<sup>13</sup> A ñaha cachi Ndióxi xihín  
ni ín túhún toho táto mé á tá  
quiahva naçachi a xihín jahyi  
a já:

Naha quí cacoún xoo cuáha i  
yóho,

janda quiahva ná cañnu i  
nu tóco ndihi na co  
cúní yohó ta janda ná  
chinduu u na sañun  
jan, naçachi Ndióxi  
xihín Jesucristo.

<sup>14</sup> Jáchi tóco ndihi táto Ndióxi  
cúu ná na tácu ta ín ínima  
ná joo coó toho yiquí cuñu

na. Cája chúun na cuéntá  
Ndióxi ta mé á chindahá a  
na ñuyiví ña ná chindeé na  
ñayivi, na naçaxi Ndióxi cacu  
ndaá ínima.

## 2

*Naquixi Jesucristo jácacu a  
mí*

<sup>1</sup> Sáhá ña cán quéa ndítahan  
nu yó taa joho í ña ndaa, ña  
naçini joho í já ná a cáxoo í  
íchi cuéntá Ndióxi. <sup>2</sup> Naçahan  
táto Ndióxi tuñun naçahan  
mé á nu ná ta cúu á ña ndaa  
joo coó naçeen ñayivi cacu  
vaha na ña. Sáhá ña cán  
quéa najándoho Ndióxi ini na  
tá quiahva ndítahan ndoho  
ini na sahá cuachi naçaja na.

<sup>3</sup> Joo mí, ndaja caja í cacu  
ndaá ínima yo tá ta co táa joho  
í tuñun cáhan sahá Jesús, mé  
a jácacu mí. Ta ña yóho cúu á  
ña cáhnu ndivaha jáchi jihna  
ñuhú ga mé Jesucristo, xitoho  
í naçaxi tuñun a ña yóho nuú  
ñayivi. Ta na naçaa joho nu  
cáhan mé á, na cán sahan na  
tuñun na nu yo ña cúu á ña  
ndaá. <sup>4</sup> Ta náha Ndióxi ña  
cúu á ña ndaa jáchi cája mé  
á cuhá ndivaha ña náhnü  
xihín ña xituhún ndivaha. Ta  
naçindahá Ndióxi ínima yii  
mé á nuú na cúu cuéntá Jesús  
ña ná caja na ña xituhún tá  
quiahva naçacu ini mé á caja  
na.

*Nanduu Jesucristo in  
ñayivi*

<sup>5</sup> Coó naçahan toho Ndióxi  
ñamaní nu táto mé á ña ná  
cacomí na cuéntá sahá ñuyiví  
saá, ña vaxi chága chí nuu.

6 Jáchĭ já cáchĭ tũhun Ndióxi já:

Tátá Ndióxi, coó saha toho ñayivi ta coó ña náha cúu ná.

Joo mé ndó ñúhu ini ndó saha ná ta ndĭhi ini ndó saha ná.

7 Tá ñacavaĥa ndó ñayivi ñandaja ndó ña ñandu na ña náhnu ndivaĥa.

Ta tátō mé ndó cuití va cúu ná ñasayojó loho nu ná tixi chá tiempo.

Ta tóco ndiĥi ña ñacavaĥa ndó ñandiquiaĥva ndó ña ndahá ñayivi,

8 já ná cacomí ña cuéntá saĥá, cáchĭ tũhun Ndióxi.

Ta mé a ndaa ni in ñaha coó ñacandoo xoo jáchĭ ñasacu ini Ndióxi cacomí ñayivi cuéntá saĥa tóco ndiĥi ñaha joo cámanĭ yĭi va xĭnu coo mé quĭvi cán. <sup>9</sup> Vatĭ cámanĭ yaĥa ña yóho joo xĭni yo ña ñandoho Jesús. Tixi chá tiempo ñacaja Ndióxi ña ná nuu ndáĥa chága mé á nu tátō Ndióxi jáchĭ saĥá ña quĭhvĭ ini Ndióxi mí saĥá ña cán quĕa ñasacu ini a ña ná quĭvi Jesucristo saĥá ndiĥi ñayivi. Ta viti ñandĭndita mé á ñandu a ña cáhnu ndivaĥa saĥá ña ñandoho a tá ñaxĭĥi a ndĭca crúxu.

<sup>10</sup> Tóco ndiĥi ñaha ña ñacavaĥa Ndióxi cúu á cuéntá mé á saĥá ña ñacachi mé á ña ná coo a. Ta ñasacu ini a ña ná ndoho ini Jesucristo quĭvi a saĥa yo. Ta xĭhĭn ña yóho najáxĭnu coo a nuú chuun ñatahnda nu á ña ná jácaĥu a mí. Jáchĭ ña

cúni Ndióxi cúu ña ná canduu ndiĥi, ña cúu cuéntá mé á nu ĩn a. <sup>11</sup> Ñandaja viĭ Jesucristo mí ta saĥá ña yóho cúu yó jahyi Ndióxi. Ta viti Ndióxi cúu tátá ndiĥi ta cúu á tátá Jesucristo. Ña cán quĕa co cácaĥan toho nuú Jesucristo caĥan ñani a mí ta caĥan quĭaĥva mí viti. <sup>12</sup> Jáchĭ ñacahyi ini tũhun Ndióxi ña ñacahān Jesús xĭhĭn tátá a. Ta ñacachi a já:

Ndicani ĭ nuú ñani ĭ saĥa mé ndó.

Ta nu ndĭtútú ña cata ĭ caja cáhnu ĭ ndohó, cáchĭ Jesús.

<sup>13</sup> Ta cáchĭ tucu a já:

Yeĥe cándeé ini ĭ Ndióxi, tátá ĭ. Ta cáchĭ tucu a já xĭhĭn Ndióxi:

Yóho ĩn ĭ xĭhĭn ndiĥi jahyi ndó, ña ñasahān mé ndó nuú ĭ cacomí ĭ cuéntá saĥa, cáchĭ Jesús.

<sup>14</sup> Saĥá ña ĩn yiquí cuñu ñayivi, ña cúu jahyi Ndióxi saĥá ña cán quĕa ñandu Jesús in ñayivi ta ñasahĭin yiquí cuñu a tátũhun mí. Ta tá ñaxĭĥi yiquí cuñu a já ñacandeé a ñasahnu a nuú tiñáhá sacuaĥa, rí cája ña xĭĥi ñayivi. <sup>15</sup> Ta xĭhĭn ña yóho najácaĥu a tóco ndiĥi ña ñasayĭhvĭ quĭvi jáchĭ níi tiempo ñasandu na ndáĥa tiñáhá sacuaĥa saĥá ña yĭhvĭ ña. <sup>16</sup> Jáchĭ mé a ndaa coó ñaquixi Jesucristo ña ná chindeé a ña cúu tátō Ndióxi. Ña ñaquixi mé á caja quĕa chindeé a ñayivi, ña cándeé ini Ndióxi

tá quiahva ñacandee ini Abraham Ndióxi. <sup>17</sup> Ña cán quea ñaxini ñúhú Jesús nduu a in ñayivi cácu ñuyíví yóho tátuhun mí. Ta xihín ña ñandoho a ñaxinu a ñanduu a in jutú sacuaḥa nu Ndióxi indiví. Ta ñaxihí a ndica crúxu sahá cuachí jáchi cája ndaa mé á tóco ndihi ñaha ta táhvi ini a saḥa yo. Ta xihín ña yóho ñacaja cáhnu ini a sahá cuachí. <sup>18</sup> Ta sahá ña ñandoho ini mé á ta sahá ña ñaxito ndojó rí quini mé á sahá ña cán quea xini a ndá quiahva ndóho iní. Ña cán quea cuu chindee a ndaja táhan na ndóho ini, na xito ndojó tiñahá sacuaḥa.

### 3

*Cáhnu chága Jesús a juú ga Moisés*

<sup>1</sup> Candehé ndo, ñani i, na cúu cuéntá Jesús. Mé ndó cúu ndó na ñacaxi Ndióxi cacomí a cuéntá saḥa. Candehé ndó Jesucristo, mé á cúu á tátuhun apóstol, ña ñachindahá Ndióxi cacuu jutú sacuaḥa saḥa yo nu Ndióxi sahá ña cándee iní mé á. <sup>2</sup> Ta xihín ndinuhu ini a ñacaja chúun a cuéntá Ndióxi, mé a ñacaxi ñahá. Jáchi tá quiahva ñacaja Moisés tóco ndihi ña cuni Ndióxi tañu na cúu cuéntá mé á quiahva já ñacaja Jesús tóco ndihi ña cuni Ndióxi, tátá a. <sup>3</sup> Joo ndítahan ndicáhnu chága Jesús a juú ga Moisés jáchi cáhnu chága Jesús a juú ga Moisés. Cúu á tátuhun tá cávaha in dataa in vehe ta ndítahan

ndicáhnu chága mé dá a juú ga vehe da. <sup>4</sup> Ndúsa coo in dá cávaha vehe já cuu cávaha ña joo tóco ndihi ñaha ín a jáchi ñacavaḥa Ndióxi ña. <sup>5</sup> Ña cán quea ñacaja chúun Moisés cuéntá Ndióxi xihín ndinuhu ini da tañu ñayivi mé á. Ta chuun ñacaja da quea cáxi tuhun jini da xihín ná ña cuni Ndióxi caḥan xihín ná chága chí nuu. <sup>6</sup> Joo jiin va chuun ñacaja Jesús, mé á cúu in túhún jini já jahyi Ndióxi jáchi cómi a cuéntá sahá na cúu cuéntá mé á xihín ndinuhu ini a. Cuéntá mé á cúu mí tá ndacú coo ínima yó ta tá ná candeé iní mé á. Ta xini ñúhú cajii iní candatí anda quixi mé á.

*Cuni Ndióxi ña ná ndihvi na cúu cuéntá mé á nuú ndiquehe ndé na*

<sup>7</sup> Candehé ndó ndá quiahva cáchi ínima yii Ndióxi ini tuhun mé á tá cáchi a já: Tá ná cuni johó ndó ña caḥan Ndióxi xihín ndó quivi víti,

<sup>8</sup> a cája sáa ini ndó xihín á tá quiahva ñacaja na Israel tá ñaxica nuu na yucú íchí cán.

Jáchi ñandiñehe yúhu ná nu Ndióxi ta ihvi ndivaḥa ñasacuu ini na xihín Ndióxi.

<sup>9</sup> Ta já cáchi Ndióxi já:

“Mé yucú íchí ñan ñaxito ndojó tásáhnu jícó ndó yehe,

vatí ñaxini na ña náhnu ndivaḥa ñacaja i tixi ivi jico cuja.

10 Sahá ña cán quéa naxojo ini i xihin tóco ndihi na cán,

ta nacachi i saha ná ña cúu ná na cáhvi ivi, joho ini,

ta sáa ini na caca na íchi cuéntá mí i.

11 Sahá ña cán quéa naxojo ini i xihin ná, ta nasahan i tuhun i ña a quiahva toho i ñamaní nu ná

ndihvi na nuú ndiquehe ndée na xihín i", nacachi Ndióxi xihín na Israel.

12 Ña cán quéa cuéntá vaha coo ndó, ñani i já ná a cáñehe ndó ínimá quini ña jácaxoo ndó nu Ndióxi, ña tácu, sahá ña co cúní ndó candúsa ndó mé á. 13 Ña ndítahan caja ndó quéa quiahva tuhun ndée ini táhan ndó nini quivi. Ta a quiahva ndó ñamaní yaha quivi víti tá núná nu ndó caja ndó ña cúní Ndióxi. Jáchi co cúní a ña ná jándahvi ña núu ñuyívi yóho ndohó ta já ná ndisáa ini ndó nu Ndióxi.

14 Jáchi tá ná candeé ndusa ini mé á janda quiahva ná xinu quivi nu ndíhí cuíi tá quiahva nacaja í janda saha já quéa cúní cachi a ña in nanduú xihín Jesucristo.

15 Jáchi quiahva já cáhí tuhun Ndióxi:

Tá xini joho ndó ña cáhan Ndióxi xihín ndo quivi víti,

a cája sáa ini ndó xihín á tá quiahva nacaja na Israel tá nandiñehe yúhu ná nu Ndióxi yucú íchí cán, cáhí a.

16 Jáchi sa xini ndó ndá na nandiñehe yúhu nu Ndióxi tá

naxini joho na ña nasahnda mé á nu ná. Na cán cúu na tóco ndihi na nasandaca Moisés tá naqueta na nación Egipto. 17 Ta xihín mé na cán naxojo ini Ndióxi tixi ivi jico cuía jáchi nacaja na cuachi nu mé á ta sahá ña cán quéa nacuyu na naxihí na yucú íchí cán. 18 Ta sahá ña coó naxeen na caja na ña cúní Ndióxi sahá ña cán quéa nasahan Ndióxi tuhun a ña a quiahva toho a ñamaní nu ná canduu na nuú ndiquehe ndée na xihín á. 19 Ta mé a ndaa cándaá ini ña coó nacuu ndihvi na nuú nasacu ini Ndióxi coo na sahá ña co naxeen na candúsa na mé á.

## 4

1 Sahá ña cán quéa viti sahan yii va Ndióxi ñamaní nu yó yaha í nuú nasacu ini mé á ndiquehe ndée yo xihín á. Joo xini ñuhú cuéntá vaha coo ndó jáchi tiahva náa a xinu coo java ndó ndihvi ndó cán. 2 Jáchi tá quiahva naxini joho na Israel tuhun Ndióxi quiahva já naxini joho í tuhun mé á, ña cáhí a cúní jácacu Ndióxi ñayivi. Joo coó nacandúsa na cán ña sahá ña cán quéa coo chuun a nu ná. 3 Joo mí cúu yó na candeé ini Ndióxi ta sahá ña yóho tandaa quivi xinu coo í ndihví nuú ndiquehe ndée yó xihín á. Ta já cáhí Ndióxi já sahá ña yóho:

Naxojo ini i xihín na co cándúsa yehe, sahá ña cán quéa nasahan i tuhun i

ñā ná a ndíhvi toho na nuú  
nasacu ini i ndiquehe  
ndée ná xihín i, cáchí a.

Naçachi Ndióxi ñā yóho vatí  
sa naçaja tiaħva mé á nuú  
ndihvi na ndiquehe ndée na  
anda tá naçava sahá saħa  
ñuyívi. <sup>4</sup> Ndáa ini tuhun  
Ndióxi ñā naçaja mé á quiví  
usa. Já cáchí a já:

Quiví usa nandiquehe ndée  
Ndióxi nuú chuun  
naçaja tá naçavaħa  
tóco ndihi ñaha, cáchí  
tuhun Ndióxi.

<sup>5</sup> Ta já cáchí tucu a já sahá na  
co cándúsa Ndióxi:

A ndíhvi toho na canduu na  
nuú ndiquehe ndée ná  
xihín i, naçachi a.

<sup>6</sup> Ta coó nandihvi toho na  
naçahan Ndióxi xihín nu  
cuítí cán jáchí coó naheen na  
candúsa na mé á. Joo núná  
yii va nuú java ñayivi ndihvi  
na ndiquehe ndée ná xihín  
mé á. <sup>7</sup> Jáchí nasacu Ndióxi  
inga quiví ta cúú á quiví  
vítí ta já cuu ndihvi ñayivi  
ndiquehe ndée na xihín mé  
á. Sanahá ndivaha naçahan  
Ndióxi xihín rey David sahá  
ñā yóho ta naçahyí da ñā ta já  
cáchí a já:

Tá xíní joho ndó ñā cáħan  
Ndióxi xihín ndó quiví  
vítí a cája sáá ini ndó  
xihín á, cáchí tuhun  
Ndióxi.

<sup>8</sup> Ta sa xíní yo ñā coó  
najándihvi Josué ñayivi nu  
ndíquehe ndée na xihín  
Ndióxi jáchí naçahan Ndióxi  
sahá inga quiví vaxi chága  
chínū. <sup>9</sup> Sahá ñā cán quéa  
sa xíní yo ñā cámaní xínū

coo quiví ndiquehe ndée na  
cúú cuéntá mé á tá quiaħva  
nandiquehe ndée mé á quiví  
usa. <sup>10</sup> Jáchí ndá na ná ndihvi  
ndiquehe ndée nu ín mé á  
cán já quéa ndíquehe ndée  
ná nuú chuun naçaja na tá  
quiaħva nandiquehe ndée  
Ndióxi nuú chuun naçaja  
mé á. <sup>11</sup> Sahá ñā cán quéa  
ndítahan ndihí ini ndihví nuú  
ndiquehe ndée yo cán. Ta ná  
a cája í tá quiaħva naçaja na  
Israel cán tá coó naheen na  
candúsa na nuú naçahan mé  
á xihín ná.

<sup>12</sup> Ín cuaħa ndée tuhun  
Ndióxi ta cúú á tátuhun ñā  
tácú. Ta ín chága ndée tuhun  
Ndióxi a juú ga in yúchu ñā  
iví yúħu. Ta tá quiaħva quíhvi  
yúchu ñā iví yúħu tá sáħndá  
yiquí cuñu quiaħva já quíhvi  
tuhun Ndióxi janda maá ini  
ínima ñayivi xihín xíní túni ná  
ta já xínū a ini na. Ta náħa ndá  
quiaħva cáhvi ini na. <sup>13</sup> Jáchí  
xíní Ndióxi tóco ndihi ñaha ta  
a cúú chijehé yo ñā cáhvi ini  
jáchí sáñdehé mé á tóco ndihi  
ñaha naçavaħa mé á. Ta vaxi  
quiví nahma yó nu mé á tóco  
ndihi ñā naçaja í.

*Jesús cúú á jutū saçuaħa  
nuú ndihí indiví*

<sup>14</sup> Mé Jesús cúú á jutū  
saçuaħa nuú ndihí sahá ñā  
cán quéa co ndítahan jáñdacoo  
í ñā cándéé ini Jesús, mé a  
cúú in túhún jiní já jahyí  
Ndióxi. Ta nandihvi a indiví  
nu ín Ndióxi. <sup>15</sup> Ta cáñdáhví  
ini Jesús mí jáchí cúú á jutū  
saçuaħa nu yo ta cáñdaa ini a  
ñā cúú yó ñayivi vitá ndivaha

ini. Jáchi tá naxica nuu a ñuyíví yóho naxito ndojó tiñháa sacuaḥa mé á xihin tá nuú ñaha tá quiahva cája rí xihin mí joo ni in túhún cuachi coo ñacaja mé á. <sup>16</sup> Ña cán quea a cáyhívi toho í cayatí nu íin coo Ndióxi, mé a quíhvi ini a mí jáchi táhvi ini a saḥa yo ta chindee a mí tá ná caca i ñamaní nu á.

## 5

<sup>1</sup> Tóco ndihi da cúu jutu sacuaḥa chága nu ndíhi jutu cúu dá da sá caxi na tañu ñayivi Israel já ná caḥan cuachí da saḥá ñayivi nu Ndióxi. Ta jári jóco da ñaha nu Ndióxi ta sáhní da quítí nu ná saḥá cuachi na. <sup>2</sup> Ta saḥá ña cúu dá da vitá ini, da ñuyíví yóho saḥá ña cán quea cuu candáhví ini da ñayivi, na co xíní ña sáhdá Ndióxi. Ta cuu candáhví ini da na cája cuachi. <sup>3</sup> Ta saḥá ña vitá ini da saḥá ña cán quea ndítahan cahní da quítí jóco da rí nu Ndióxi saḥá cuachi mé dá xihín saḥá cuachi ñayivi viti.

<sup>4</sup> Ta ni in da cán a cúu chinúu da mé dá cacuu da jutú sacuaḥa chága nu ndíhi jutú. Jáchi xíní ñuhú cacuu da da ñacana Ndióxi caja chúun cuéntá mé á tá quiahva ñacaja Ndióxi saḥa tá ñacana mé á Aarón ña ná caja chúun da cuéntá mé á. <sup>5</sup> Quiahva já nayaha xihín Jesucristo jáchi coo nachinúu a mé á ña ná nduu a jutú sacuaḥa. Ndióxi quea nachinúu ñahá tá ñandaja

cáhuu a Jesús. Ta já ñacachi Ndióxi já xihín á:

Jahyi yehe cúu yóho,  
ta viti cáhí i ña ñanduu u  
tátún, cáhí a.

<sup>6</sup> Ta inga nu cáhan tuhun Ndióxi já cáhí a já:

Anda ama cáa quívi cacuún  
jutú,

ta cajún tá quiahva ñacaja  
in jutú, da ñasananí  
Melquisedec saḥa,  
cáhí a.

<sup>7</sup> Nani ñasahíin Jesucristo ñuyíví yóho a juú quiahva naxica tahví a nu Ndióxi. Ta java tañu ñasacu a ta java tañu ñacayuhú a nu Ndióxi, mé a cúu chindee ñahá ña ná a quívi toho a. Ta saḥá ña ñasacaja Jesús tóco ndihi ña sáhdá Ndióxi, tátá a saḥá ña cán quea ñaxini jóho Ndióxi nu cáhan mé á. <sup>8</sup> Ta vatí cúu Jesucristo in túhún jiní já jahyi Ndióxi joo xihín ña ñandoho ini a ñuyíví yóho ñacatiaḥva coo jóho a nu cáhan Ndióxi, tátá a xihín á. <sup>9</sup> Ta xihín ña yóho najáxinu coo mé á ñacaja tóco ndihi ña ñataḥnda nu á caja. Janda jáví ñacuu jácacu a mí ña ná coo í xihín mé á anda ama cáa quívi tá ná caja í ña sáhdá mé á. <sup>10</sup> Ta ñandicojo a chuun ñacaja Ndióxi ña ná nduu a jutú sacuaḥa tá tuhun mé jutú, da ñasananí Melquisedec.

*Cuénta coo ndó ná a  
jándacoo ndó ña cándeé ini ndó  
Jesús*

<sup>11</sup> Íin cuahá ndivaha ñaha cúni ndicani i nu ndo saḥá ña

yóho joo yáncá ndivaha ndi-  
cani í ña nu ndo jáchi co cún-  
ndo taa johó ndó nu cáhan  
i. <sup>12</sup> Anda jihna nandihvi  
ndó íchi cuéntá Jesús ta viti sa  
ndítahan nu ndó jánaḥa ndó  
tuhun Ndióxi nuú ñayivi. Joo  
co cája ndó já jáchi nacavitá  
ndo ta tucu tucu jácuaha ndó  
ña co íhvi toho. Ta viti cúú á  
tátuhun co ndeé ini ndó cuxu  
ndó ña xíxi ñayivi náhnu joo  
ña cája ndó queá xíhi yíi va  
ndó leche tátuhun na valí va.  
<sup>13</sup> Ta tá quiahva xíhi na valí  
leche quiahva já cája ri na  
co tiáhva ndícuni ndíá cúú ña  
vaha ta ndíá cúú ña núu. <sup>14</sup> Joo  
ñayivi, na cándaḥa vaha ini  
tuhun Ndióxi cúú ná tátuhun  
ñayivi náhnu, na tácu ini, na  
xíxi cuñu va jáchi sá tiáhva na  
ndícuni na ndíá cúú ña vaha ta  
ndíá cúú ña núu.

## 6

<sup>1</sup> Sahá ña cán queá ña  
ndítahan caja í queá ndindacú  
chága yo xihín ñaha Ndióxi  
janda quiahva ná xinu coo  
í cacuu ñayivi tácu ini xihín  
ñaha Ndióxi. Co ndítahan  
jácuaha tucú ña najácuaha í  
tá jacá nandihví íchi cuéntá  
Jesús jáchi ndítahan catiahva  
í ña jan. Ndítahan cándaḥa ini  
ña cacu ndaa ínima yo sahá  
ña cándéé ini Jesucristo cuití  
va ta co cúú á sahá ña cája í  
ña vaha. <sup>2</sup> Ta sa cándaḥa ini  
ña ndítahan candúta na cúú  
cuéntá Jesús. Ta sa cándaḥa ini  
ndaja cája í chinúu ndáḥa yó  
jiní ñayivi tá xíca tahví yó nu  
Ndióxi saḥa ná. Ta sa cándaḥa  
ini ña vaxi quiví nditacu tucu

tócó ndihi ndji ña ná caja víi  
Ndióxi saḥa ná. <sup>3</sup> Sahá ña cán  
queá cáchi í xihín ndó: Coho  
ndindacú chága yó xihín ñaha  
Ndióxi, tá ná quiahva Ndióxi  
ñamaní nu yo.

<sup>4</sup> Ta a cuú ga ndicó coo  
ñayivi nu Ndióxi tá sa  
najándacoo na ña nasandéé  
ini na mé á. Jáchi sa  
najándiyéhe Ndióxi ínima ná  
ña ná candaḥa ini na saḥa mé  
á ta sa xíní na ndá quiahva  
ín ñaha Ndióxi. Ta janda  
ínima yíi Ndióxi sa nandacaan  
ínima ná. <sup>5</sup> Ta sa nacandaḥa  
ini na tuhun vaha cáhan sahá  
Jesucristo ta sa nacandaḥa ini  
na ndá quiahva náhnu caja  
Ndióxi chága chí nuu. <sup>6</sup> Joo tá  
ná jándacoo na jan ña cándéé  
ini na Ndióxi já queá a cuú  
ga ndicó coo na nu mé á jáchi  
xihín ña cája na cúú á tátuhun  
cata caa tucu na Jesucristo,  
jahyi Ndióxi ndica crúxu ta  
já sácu ndaa na mé á nuú  
ñayivi. <sup>7</sup> Jáchi sa xíní ndo  
ndaja ín ñundáhyi nu cúun  
vaha javi ta ndíndahyi a. Ta  
tá ná cana cuahá ñaha nuú  
naxutu ñayivi cán já queá  
cúní cachi a ña cája Ndióxi  
ñamaní xihín ñundáhyi cán.  
<sup>8</sup> Joo tá ná nana tohíñú xihín  
tochihmá nu núhu cán já queá  
coo saḥa toho a ta ña yóho  
cúní cachi a ña co cája toho  
Ndióxi ñamaní xihín á ta vaxi  
quiví cayi a caja Ndióxi.

*Vaxi quiví coo í xihín  
Ndióxi tá co jándacoo í íchi  
cuéntá mé á*

<sup>9</sup> Candehé ndó, ñani maní  
í, na cúú cuéntá Jesús. Vatí



cáhan nde ña yóho xihin ndo joo cándeé ini nde ndohó ña cája tá cája ndó ña vaha ña ndítahan caja na cándeé ini Jesús. <sup>10</sup> Ta xini nde ña cája Ndióxi ña ndaa cuití va ta a ndíndójó toho mé á sahá ña vaha nacaja ndó tá nachindeé ndó na cúu cuéntá Jesús jáchi xihín ña yóho náha ña quihvi ini ndusa ndó mé á. Ta mé a ndaa janda viti chindeé ndó na cán. <sup>11</sup> Ta a juú quiahva cuni nde ña ná ndihi ini in in ndó chindeé ndo na cúu cuéntá Jesús anda quivi nu ndíhi. Ta xihín ña yóho vaxi quivi tá quiahva Ndióxi nu ndo tóco ndihi ña ndáti ndó quiahva mé á nu ndo. <sup>12</sup> Co cuni nde ña ná cajúsá ndo caca ndó íchi cuéntá Jesús. Ña cuni nde quea ná ndihi ini ndó caja ndó tá quiahva cája na cándeé ini Ndióxi, na coo najándacoo ña cándeé ini na mé á ta xihín ña yóho ñehe táhvi ná ña nasahan Ndióxi tuhun a quiahva nu ná.

<sup>13</sup> Tá nasahan Ndióxi tuhun a nu Abraham sanahá já natavá a quivi mé á tátuhun testigo jáchi coo inga ga ña cáhnu chága a juú ga mé á. <sup>14</sup> Ta tá nasahan mé á tuhun a nu dá já nacachi a já xihín dá: “Mé a ndaa caja cuahá i ñamaní xuhun ta caja i ña ná ndicuahá ndivaha na quixi chichún.” Já nacachi Ndióxi xihín Abraham tá nasahan tuhun a nu dá. <sup>15</sup> Ta coo nandíhi ini Abraham nani nasandati da jáxinu coo Ndióxi tuhun a ta chí ñañehe

dá ña nasahan Ndióxi tuhun a quiahva nu dá. <sup>16</sup> Tá sahan ñayivi tuhun na nuú inga ñayivi já tává na quivi in na cáhnu chága a juú ga mé ná ña ná cacuu na testigo. Jáchi cája ndusa in testigo xihín ná jáxinu coo na ña nasahan na tuhun na caja na. <sup>17</sup> Sahá ña cán quea natavá Ndióxi quivi mé á jáchi cuni a janaha cáxi a nuú ñayivi ña a ndíjama toho a tuhun nasahan nu ná ta ndusa jáxinu coo a tuhun a nuú na ñehe táhvi ndiquehe a. <sup>18</sup> Ta cándaa ini ña nasahan Ndióxi tuhun a nu yó ta natavá a quivi á cacuu a testigo ta xihín ndívi ña yóho sa xini ví ña a cuú ndijama Ndióxi ta ni a cuú cahán mé á ña tuhún. Ta xihín ña yóho sahan mé á tuhun ndeé ini jáchi cándeé ini mé á ta sa nandiquiahva í mí ndáha mé á ña ná jaccu a mí. <sup>19</sup> Sahá ña cán quea cativi tuun í xihín Ndióxi ta cándeé ini ña quiahva mé á nu yo ña sahan tuhun a quiahva nu yo. Ta sahá ña cándeé cáhnu ini mé á sahá ña cán quea co yíhvi toho í cayati nu mé á jáchi sa nandíhvi Jesús nuú yíi ndivaha indivi. <sup>20</sup> Ta cuni Jesús chindeé a mí ña ná xinu coo í nu in a cán sahá ña cán quea nandíhvi jihna ñuhú ga cán a juú ga mí. Ta cuu caja Jesús ña yóho jáchi nanduu a jutú sacuahá nu Ndióxi ta anda ama cáa quivi cája mé á chuun yóho tá quiahva nacaja da naní Melquisedec sanahá ndivaha.

## 7

*Chuun naçaja Melquisedec sanahá*

<sup>1</sup> Mé Melquisedec yóho nasacuu da rey nuú ñayivi ñuu Salem ta nasacuu da jutú nu Ndióxi, mé á cúú ña cáhnu chága a juú ga inga ga. In tañu tá nandicó coo Abraham nasahan da nacani táhan da xihín java rey ta najándihi da sahá na cán já naqueta Melquisedec íchi nuú vaxi Abraham ta já naçaja yii dá Abraham.

<sup>2</sup> Ta mé Abraham nandaja da uxu táhndá tóco ndihi ña naçandaa da ndáha java rey tá naqueee vaha da xihín na cán. Ta já nasahan da in táhndá nuú Melquisedec. Ta quiví Melquisedec yóho cúní cachi a rey, da cája ña ndaa. Ta sahá ña cómí da cuéntá sahá ñuu Salem, ña cúní cachi a nuú in vaha ini ñayivi sahá ña cán quea cúú dá rey, da cája ña ná coo vaha ini ñayivi. <sup>3</sup> Ta ni in ñayivi co xini na saha tátá náná mé Melquisedec yóho ta co ndaa nuú tutu quiví tásáhnu jícó da. Ta co xini na ndá tañu nacacu da ta ni co xini na ndá tañu naxihí da. Joo ña xini na quea cúú dá jutú anda ama cáa quiví tá quiahva cúú Jesucristo jutú anda ama cáa quiví, mé a cúú in túhún jini já jahyi Ndióxi.

<sup>4</sup> Ta viti cuu candehé ndó ndaja cáhnu nasacuu Melquisedec jáchi janda mé Abraham, da nasacuu tásáhnu jícó yo nasahan da nuú Melquisedec in táhndá

nuú uxu táhndá ñaha ña naçandaa da ndáha rey, da naqueee vaha da xihín cán. <sup>5</sup> Ta sa xini ndo ña cáhí ley Moisés ña in saha nuú jutú, na naquixi chichi Leví ndiquehe na in táhndá nuú uxu táhndá ña cómí na Israel. Jáchi mé jutú cán cája chúun na nu Ndióxi cuéntá táhan na na Israel vatí in cúú tóco ndihi na sahá ña naquixi ndihi na chichi Abraham. <sup>6</sup> Vatí coo naquixi Melquisedec yóho chichi Leví joo naquehe tá naquehe da in táhndá nuú uxu táhndá ñaha nu Abraham, da nasahan Ndióxi tuhun a nuú ña caja cuahá ñamaní xihín. Tá naçaja yii Melquisedec Abraham <sup>7</sup> náha ña mé a ndaa cáhnu chága da cája yii ñayivi a juú ga na naçayii cán. Ta ni in na a cuú cachi na ña co cúú ña yóho ña ndaa. <sup>8</sup> Ta sa xini yo ña cáhnu chága Melquisedec a juú ga jutú, na naquixi chichi Leví, na quehe in táhndá nuú uxu ñaha jáchi cúú ná ñayivi, na ndíhi saha. Joo cáhan tuhun Ndióxi sahá Melquisedec tátuhun tácu yii va da. <sup>9</sup> Ta náha ña cáhnu chága Melquisedec a juú ga Leví, da cúú tásáhnu jícó tóco ndihi jutú, na quehe in táhndá nuú uxu a cán. Jáchi cúú á tátuhun nachahvi Leví in táhndá nuú uxu a tá nachahvi Abraham ña nu Melquisedec. <sup>10</sup> Jáchi tá naquehe Melquisedec in táhndá nuú uxu ñaha nu Abraham, cúú á tátuhun

naşañehe Abraham tóco ndihi na vaxi chichi da ini yiquí cuñu da jáchi cámaní yí cacu na mé tiempo já.

11 Ta tóco ndihi jutü, na naquixi chichi Aarón, naquixi na chichi Leví viti. Ta vatí naçaja na chuun Ndióxi ña jáyaha na ley Moisés nuú ñayivi joo a cuú nduu ndaa ñayivi nu Ndióxi xihín mé ley. Sahá ña cán quea nachindahá Ndióxi Jesucristo ñuyívi yóho já ná cacuu a inga jutü, ña ná caja tá quiahva naçaja Melquisedec sanahá. Ta coó naçaja mé á tá quiahva naçaja Aarón, da nasacuu tásáñnu jícó jutü cán. 12 Ta tá nachindahá Ndióxi in jutü saá xíní ñuhú a ndijama ri a ley va. 13 Ta mé jutü saá cuú Jesucristo, xitoho í, mé a cáhan tuhun Ndióxi saha. Ta coó naquixi Jesucristo chichi Leví ta ni coó naquixi a chichi Aarón. Jíin va chichi naquixi a ta ni in da taa naquixi chichi cán a ñaha cacuu da jutü. 14 Joo cándaã vaha ini ñayivi ña naquixi Jesucristo chichi Judá ta coó cuú á chichi nu sá cana jutü ta ni coó naçahan Moisés sahá na quíxi chichi Judá tá naçahan da sahá na cacuu jutü.

15 Ta cándaã vaha chága ini ña yóho jáchi sa xíní yo ña mé jutü saá ña cuú Jesucristo nandiquehe a chuun tátuhun naçaja Melquisedec sanahá. 16 Ta coó nanduu a jutü sahá ña naçacu a chichi Leví nu sá cacu jutü. Joo nanduu a jutü sahá ña cuú cája tóco ndihi

ñaha ta sahá ña tácu a anda ama cáa quívi. 17 Jáchi tá cáhan Ndióxi saha Jesucristo já cáchi a já:

Yóho cúun jutü anda ama cáa quívi,

tátuhun mé jutü, da nasananí Melquisedec jáchi cájún chuun tá quiahva naçaja mé dá, cáchi tuhun Ndióxi.

18 Sahá ña cán quea naçandoo xóo ley Moisés jáchi coó chuun a ta a cuú chindeé a ñayivi. 19 Ta ni coó naçuu caja mé ley Moisés ña ná nduu ndaa ñayivi nu Ndióxi. Joo viti cájii ini jáchi xihín ña naçaja Jesucristo já cuu nduu ndaa yó nu Ndióxi ta já cuu cayati nu mé á.

20 Ta tá naçaja Ndióxi ña nanduu Jesucristo jutü já nasahan tuhun a ta nasacu a mé á cuú á testigo sahá.

21 Joo tá nanduu na naquixi chichi Leví cán jutü coó nasahan Ndióxi tuhun a saha ná tá quiahva naçaja xihín Jesucristo tá nanduu a jutü. Ta já naçachi Ndióxi ini tuhun mé á:

Yehe cuú Ndióxi ta nasahan i tuhun i nu yóho ta a ndijama toho i tuhun cáhan i:

“Nachinúu i yóho cacuún jutü anda ama cáa quívi.

Ta cajún chuun tá quiahva naçaja Melquisedec sanahá”, cáchi Ndióxi.

22 Sahá ña nandicojo Jesucristo chuun nasahan Ndióxi nu á sahá ña cán quea cándéé ini ña jáxinu coo Ndióxi tuhun nasahan nu yo. Ta vaha

chága ña yóho a juú ga ley Moisés. <sup>23</sup> Ta ndaja coo nasanduu cuahá jutú, na naquixi chichi Leví cán jáchi naxihí ndihi na ta nacandoo chuun na nuú inga na. <sup>24</sup> Joo tácu Jesucristo anda ama cáa quivi ña cán quéa a jándacoo toho a chuun a nuú inga ga.

<sup>25</sup> Ña cán quéa anda ama cáa quivi ín tiahva Jesucristo jácacu a mí tá ná cayatí nu Ndióxi sahá ña nacaja Jesucristo tá naxihí a ndica crúxu. Ta ín mé á nu Ndióxi xíca tahví a nu mé á sahá na cándeé ín mé á.

<sup>26</sup> Mé a ndaa xíní ñuhú yo Jesucristo ña ná cacuu a jutú sacuahá nu Ndióxi saha yo. Jáchi mé á cúu á ña yí ndivaha ta ni in cuachi coo nacaja mé á ta ni in cuachi a cúu chicaan yó jatá. Ta co xíca nuu ga mé á tañu na cája cuachi jáchi ín a indiví nu ndicáhnu ndivaha mé á. <sup>27</sup> Co xíní ñuhú caja Jesucristo tá quiahva nacaja java ga jutú sacuahá, na naquixi chichi Leví. Jáchi nini quivi nasahní na cán quítí jóco na rí nu Ndióxi sahá cuachi ñayivi. Ta nu cuítí nacaja na ña sahá cuachi mé va na ta anda jávi nacaja na ña sahá cuachi ñayivi. Joo jín va nacaja Jesucristo jáchi in túhún tañu cuítí va najoco a mé á tá naxihí a ndica crúxu sahá cuachi tóco ndihi ñayivi. <sup>28</sup> Tá nacaja na ña cáchí ley Moisés já nasacu na in dataa, da cája cuachi ña ná cacuu da jutú sacuahá. Joo tá nandihí já nacinúu Ndióxi Jesucristo, jahyi a ña

ná cacuu a jutú sacuahá, ña cája ña ndaa anda ama cáa quivi. Ta nasahan Ndióxi tuhun a nu yo ña jáxinu coo a tóco ndihi ña cáchí a.

## 8

*Jesús cúu á jutú sacuahá saha yo indiví*

<sup>1</sup> Nacachi nde ña yóho ña ná candaa ini ndó ña cúu Jesucristo jutú sacuahá saha yo nu Ndióxi ta ín coo a xoo cuáha Ndióxi indiví nu ndicáhnu ndivaha mé á. <sup>2</sup> Cúu á jutú sacuahá cája ndíví a veñuhu indiví ña nacavaha Ndióxi ta co cúu á ña nacavaha ñayivi. <sup>3</sup> Ndítahan nu tóco ndihi na cúu jutú sacuahá cahní na quítí nu Ndióxi ta jóco na ñaha nu á. Ña cán quéa ndítahan ri nu Jesucristo jóco a ñaha nu Ndióxi. <sup>4</sup> Tá ná caca nuu Jesucristo ñuyiví yóho, nduu já quéa a cácuu toho a jutú, nduu. Jáchi sa ndúu cuahá ndivaha jutú ñuyiví yóho ta jóco na ñaha nu Ndióxi tá quiahva sahnda ley Moisés. <sup>5</sup> Joo ña cája mé ndihi jutú ñuyiví yóho cúu á tátuhun yuhú nu ña cája Jesucristo indiví. Ta cándaa ín ña cúu á tátuhun yuhú nu ña ín indiví jáchi sanahá ndivaha tá nasahnda Ndióxi chuun nu Moisés ña ná cavaha da veñuhu xihin ní quítí já nacachi Ndióxi já xihin da: “Cuénta coún ndaja cavahún veñuhu xihin ní quítí jan. Jáchi xíní ñuhú coo a tá quiahva cáa ña nanaha i nuún jini yucu cán”,

naçachi Ndióxi xihín Moisés.  
 6 Joo Jesucristo, mé á cúu  
 jutü sacuaḥa saḥa yo indivi  
 nandicojo a in chuun ña vaḥa  
 chága a juú ga chuun cája jutü  
 ñuyivi. Vaḥa chága ña naçaja  
 Jesucristo a juú ga ley Moisés  
 jáchi jándique táhan máni a  
 mí xihín Ndióxi ta xihín ña  
 yóho xínu coo tuhun naṣaḥan  
 Ndióxi nu yó jihna.

7 Tá ná cuu caja ley Moisés  
 ña jácaçu a mí ná a cühun  
 toho í indayá, nduu já quéa  
 co xíní ñúhú quivi Jesucristo  
 jándique táhan máni a mí xihín  
 Ndióxi, nduu. 8 Joo xíni vaḥa  
 Ndióxi ña mé ley Moisés a cuú  
 jácaçu a ñayivi saḥá ña cán  
 quéa já naçachi a já:

Vaxi quivi tá quiahva i tuhun  
 saá nuú ñayivi Israel ta  
 nuú na naquixi chichi  
 Judá.

9 Jíin va cúu tuhun saá  
 quiahva i nu ná,

jáchi co cúu toho a tuhun  
 naṣaḥan i nu tásáhn  
 jícó na sanahá  
 ndivaḥa,

tá natiin ndahá i na ta natavá  
 i na nuú naṣanduu na  
 nación Egipto.

Ta saḥá ña coó najáxi nu  
 coo na tóco ndihi ña  
 naṣahnda i nu ná caja  
 na saḥá ña cán quéa  
 najándacoo i na.

10 Ta vaxi quivi tá quiahva i  
 tuhun saá nuú ñayivi  
 Israel.

Ta caja i ña ná candaḥa vaḥa  
 ini na ley mí i ta cañuhu  
 a ini ínimá ná ña ná caja  
 na ña cúni mí i.

Ta yeḥe cacuu Ndióxi caja  
 cáhnua,

ta mé na cán cacuu ñayivi ca-  
 comi i cuénta saḥa.

11 Ta a cúni ñúhú ga na jánaḥa  
 ñani táhan mé ná ña  
 ná candaḥa ini na saḥa  
 Ndióxi,

jáchi tóco ndihi ñayivi anda  
 na valí anda na sáhnua  
 candaḥa ini na yo cúu  
 yeḥe.

12 Ta caja cáhnua ini i saḥa  
 ndaja táhan ña núu  
 naçaja na,

ta a ndícuḥun ga ini i  
 saḥa cuachi na, cáchi  
 Ndióxi.

13 Tá naçahān Ndióxi saḥá  
 tuhun saá ña quiahva mé  
 á nuú ñayivi já quéa náḥa  
 ña coó chuun ga mé tuhun  
 naṣaḥan nu ná jihna ta cama  
 chá ndihi saḥá.

## 9

*Veñuhu ñuyivi xihín veñuhu  
 indivi*

1 Tá naṣaḥan Ndióxi tuhun  
 a nuú na Israel sanahá  
 ndivaḥa já naṣahnda chuun  
 saḥá ndaja caja cáhnua mé  
 á ini veñuhu ña cávaḥa na  
 ñuyivi yóho. 2 Ta ndácaan ivi  
 cuarto ini mé veñuhu cán. Ta  
 ña ndácaan ini cuarto nu cuítí  
 cúu in candelero xihín in  
 mesa nu cándójó pan yii. Ta  
 mé cuarto nu cuítí yóho naní  
 a in nuú yii. 3 Ta íin in jahmá  
 ndeé ña ndájí nuu táhan tañu  
 ndívi cuarto yóho. Ta cuarto  
 ndácaan maá naní a nuú yii  
 ndivaḥa. 4 Ta mé cán íin in nu  
 ná ña naçavaḥa xihín jiuhun  
 cuáan nu chínílmá jutü jusa

vaḥa. Ta jári cán ín saṭo arca ñaha Ndióxi ta tóco ndihi jata mé saṭo arca nandicuchu xihín jiuḥun cuáán. Ta chí ini saṭo cán ndácaan in tindoḥo jiuḥun cuáán nu ñúhu maná ña naxixi na Israel tá naxica nuu na yucú íchí cán. Ta jári ndácaan mé yíto ñaha Aarón, dó nasaa núma sanahá. Ta chí ini arca cán ndácaan ri ivi yuu jáhndá nu ndáa ley nasahan Ndióxi nuú Moisés. <sup>5</sup> Ta jiní mé saṭo arca cán ndíndójó ña cúu yuhú nuu táto Ndióxi naní a querubines. Cándójó a cán ña ná ndicuhun ini ñayivi ña ín Ndióxi cán cája cáhnu ini a sahá cuachi na. Ta mé táto Ndióxi cán ndícaā ndixi a cándójó a jata arca. Joo a cúu ndicani chága yo sahá ña yóho viti.

<sup>6</sup> Já nasahjin tiahva tóco ndihi ñaha veñuhu. Ta ndijáá ní quivi nandihvi jutú cuarto nu cuítí cán cája ndívi na ñaha caja cáhnu na Ndióxi. <sup>7</sup> Joo in tañu tá nu cuía in túhún da cúu jutú sacuaḥa naquihvi da cuarto maá cán. Ta ñéhe da nji quítí ña joco da nu Ndióxi sahá cuachi mé dá xihín sahá cuachi ñayivi. <sup>8</sup> Ta xihín ña yóho jánaḥa ínima yji Ndióxi nu yo ña a cúu ndihvi ndá ñayivi nacuu cuarto maá nuú yji ndivaha jáchi sa ín va cuarto nu cuítí. <sup>9</sup> Ta tóco ndihi ña yóho cúu á tátuhun yuhú nuu nuú ña ín tiempo viti. Ta sa xini yo ña a cuú ndaja vii ñayivi ínima ná xihín ña joco na nu Ndióxi tá sáhní na quítí ña quiahva na nji rí nu mé á. <sup>10</sup> Jáchi tóco ndihi

ñā nācāja nā cán nāsaṭuu a cuéntá ñā sáxí nā xihín ñā xíhi na ta nāsaṭuu a cuéntá ndaja nandaja vii nā mé ná xihín ticuú. Joo já nanditahan cája na janda quiahva tandaa quivi ndijama Ndióxi tóco ndihi ñaha jáchi a cúu ndaja vii na ínima ná xihín ña yóho.

<sup>11</sup> Ta ndaja coo naquixi Jesucristo ñuyiví yóho ta nanduu a jutú, da sacuaḥa chága nu yo. Naquixi a ña ná quiahva mé á ña vaḥa Ndióxi nu yo. Joo viti ín a indiví cája chúun a tátuhun jutú veñuhu ña vaḥa chága cán. Cúu á veñuhu ña coo nacavaḥa ñayivi ta coo cúu á ñaha ñuyiví. <sup>12</sup> In tañu cuití va nandihvi a nuú yji ndivaha ta coo nasañehe a nji tijúhu ni nji chélo ña joco a nu Ndióxi. Nji mé á cúu dó naxita ndíca crúxu saḥa yo ña ná cacu ndaa ínima yo anda ama cáa quivi. <sup>13</sup> Jihna nācāja ñayivi ña nācachi ley Moisés ta nu yiquí cuñu na naxihnu ndaa jutú nji tindi quí á nji tijúhu ta naxihnu ndaa rí da na xihín yaā chélo, rí nasahmi na nu náa. Ta xihín ña yóho nandivií yiquí cuñu na nu Ndióxi. <sup>14</sup> Joo ndiyahvi chága nji Jesucristo a juú ga nji quítí. Jáchi tá naxihí Jesucristo já nandivií ínima yo já ná a cája ga yo ña coo ndiyahvi cán ta ná caja í tóco ndihí ña cúni Ndióxi. Nācāja ínima yji Ndióxi, mé a tácu a anda ama cáa quivi ña ná ndiquiahva Jesucristo mé á ndáḥa Ndióxi já naxihí a ndíca crúxu saḥa cuachí vatí

coo toho cuachi mé á.

15 Ta sahá tuhun saá nasahan Ndióxi nu yo sahá ña cán quéa cáhan Jesucristo xoo mí nu Ndióxi. Ta sahá ña nacaja Jesucristo tá naxihí a ndica crúxu cája cáhnu ini Ndióxi sahá cuachi nacaja í tá nasandico yó ley Moisés. Ta nandacaxi Ndióxi ñayivi, na cúní candúsa mé á já ná ndiquehe na ña vaha Ndióxi ña a ndíhi toho saha jáchi já cáa tuhun nasahan Ndióxi nu ná. 16 Cúú á tátuhun tá cávaha in dataa tutu cuénta ña ñehe táhvi ná candoo ñaha nu ná. Joo xíní ñuhú candaá ini na ña mé a ndaa naxihí da jándacoo ñaha cán anda jáví ndiyahvi mé tutu cán. 17 Jáchi nani tácu da co ndiyahvi toho tutu nacavaha da sahá ñaha ndicoo táhvi da. Janda quiahva ná quivi da já ndiyahvi a. 18 Ña cán quéa tá nu cuití nasahan Ndióxi tuhun a nuú ñayivi nacaja mé á ña ná quivi quítí ta xihín nji rí cán nandoo cuachi ñayivi. 19 Jáchi tá nandihi nacahan Moisés ley nasahan Ndióxi nuú ñayivi Israel já natiin da in yíto, dó naní hisopo ta nacató da loho cachi cuahá nu do. Ta nachindaxi da dó cán xihín nji chélo xihín nji tjuhu, dó nacava táhan xihín ticuí. Ta naxihnu ndaa da do nu libro nu ndaa ley Moisés. Ta naxihnu ndaa da dó nuú ñayivi Israel. 20 Anda já nacachi da já xihín na Israel: “Xihín nji quítí yóho jáxinu coo Ndióxi tuhun a ña nasahnda nu ndó caja

ndó”, nacachi Moisés. 21 Ta quiahva já naxihnu ndaa Moisés nji quítí nuú veñuhu nji quítí xihín nuú tóco ndihi ñaha ñuhu cán ña cája chúun na cája cáhnu na Ndióxi. 22 Jáchi cáchi ley Moisés ña xihín nji cuití va ndivií ndaja táhan ñaha, vatí a juú ndihi a. Ta janda quiahva ná cuita nji já cuu caja cáhnu ini Ndióxi sahá cuachi ñayivi.

### *Nandoo cuachi xihín nji Jesucristo*

23 Sahá ña cán quéa nanditahan nu Moisés ndaja víi da ñaha veñuhu ñuyíví yóho xihín nji quítí. Ta mé ñaha cán cúú á yuhú nuú ña ín indiví. Joo ñaha ín indiví ndivií a xihín nji, dó vaha chága a juú ga nji quítí. 24 Ta veñuhu ñuyíví cúú á yuhú nuú cuití va ña ín indiví. Coo nandihvi Jesucristo nuú yji ndivaha veñuhu, ña nacavaha ñayivi. Joo nandihvi mé á indiví ta cán ín a viti ta cáhan mé á xoo mí nu Ndióxi. 25 Jáchi da cúú jutú sacuaña nandihvi da tá nu cuía nuú yji ndivaha veñuhu joco da nji quítí nu Ndióxi. Joo ña nacaja Jesucristo quéa nandiquiahva a mé á quivi a saha yo ta in tañu cuití va naxita nji á ndica crúxu. 26 Jáchi tá ná nditahan nuú Jesucristo quivi a cuahá tañu já quéa janda mé saha tá nacava sahá saha ñuyíví casahá quivi a, nduu. Joo a juú a já jáchi tá jalóho cúní ndihi saha tiempo viti já nacasaá Jesucristo

ñuyiví yóho ta in tañu cuití va naxihí a sahá cuachi ñayivi. <sup>27</sup> Quiahva já yáha xihín ñayivi jáchi in táláa tañu quivi na ta anda jáví ndítahan candichi na nu Ndióxi caja vií mé á sahá ña ñacaja na tá nasandu na ñuyiví yóho. <sup>28</sup> Ta quiahva já in tañu cuití va naxihí Jesucristo ndica crúxu jándoo a cuachi cuahá ñayivi. Ta tandaa quivi quixi tucu mé á ñuyiví yóho joo a quiví ga ña jáchi quixi a ndiquehe a na ndátia tiahva cuhun coo xihín mé á indiví.

## 10

<sup>1</sup> Ta mé ley ñacahyí Moisés yóho nasacuu a tátuhun in candañvi mé ña ndaa ña coo chága chínuu. Nasacuu a yuhú nuu uun ña vaha ña vaxi nu yo. Jáchi mé ley yóho coo ñacuu caja ndaja vií a ínimá ñayivi vatí ná cayati na nu Ndióxi tá nu cuía sá sáhní na quítí joco na nu Ndióxi. <sup>2</sup> Jáchi tá ná cuu ndivií ínimá ná sahá ña cája na ña cáhí ley Moisés já queá in tañu cuití va joco na ñi quítí nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. <sup>3</sup> Joo tá nu cuía tá sá sáhní na quítí joco na ñi rí nu Ndióxi já queá ndicuhun ini na ña cómi na cuachi nu Ndióxi. <sup>4</sup> Jáchi a cuú jándoo na cuachi na xihín ñi tindiquí á xihín ñi tijúhu.

<sup>5</sup> Ña cán queá tá jalóho cúní casaá Jesucristo ñuyiví yóho já ñacachi a já xihín Ndióxi, tátá a:

Có cúní ndó ña ná cahní ñayivi quítí joco na rí nu ndo ta ni có cúní ndo ña ná joco na java ga ñaha nu ndo.

Sahá ña cán queá nasahan ndó in yiquí cunu nuú i já ná ndiquiahva i ña nu ndo.

<sup>6</sup> Có cájji ini ndó tá ná cahmi na quítí nu náa joco na rí nu ndo. Ta ni có táhán ini ndó tá ná joco na java ga ñaha nu ndo ña ná jándoo na cuachi na.

<sup>7</sup> Sahá ña cán queá já ñacachi i já xihín ndo:

“Tátá Ndióxi, yóho íin i ta íin tiahva vi caja i ndá ña ñacuu cúní ndo.

Jáchi quiahva já ndaa ini tuhun mé ndó sahá i”, ñacachi Jesucristo.

<sup>8</sup> Nu cuití ñacachi Jesucristo ña có cúní Ndióxi ña ná cahní ñayivi quítí quiahva na ñi rí nu á. Ta ni có táhán ini a tá ná cahmi na quítí nu ná ña ná ndivií ínimá ná. Ta ñacachi a ña yóho vatí sáhní ley Moisés caja ñayivi já. <sup>9</sup> Joo tá ñandihi ñacachi Jesucristo já xihín Ndióxi: “Yóho íin i ta íin tiahva vi caja i ndá ña ñacuu cúní ndo”, ñacachi a. Ña cán queá nasacu xoo Ndióxi ña ñacaja na jihna ta viti ndiquehe vaha mé á ñayivi sahá ña naxihí Jesucristo ndica crúxu. <sup>10</sup> Ñacaja Jesucristo ña nasacu ini Ndióxi caja sahá ña cán queá ñacandoo vií uun tóco ndihi mí jáchi in táláa tañu ñandiquiahva



Jesucristo yiquí cuñu a tá naxihí a sahá cuachi.

<sup>11</sup> Jihna ga ña nacaja ndihi jutū cúú á ña nini quiví sándita da nu náa jóco da quítí nu Ndióxi. Ta vatí cuahá tañu sá cája da já joo a cuú jándoo da cuachi ñayivi xihín ña yóho. <sup>12</sup> Joo in tañu cuití va naxihí Jesucristo sahá cuachi tóco ndihi ñayivi já ná cuu cacu ndaa ínimá ná anda ama cáa quiví. Anda javí nasacoo a xoo cuáha Ndióxi, tátá a indiví. <sup>13</sup> Ta cán íin coo a viti cándati a janda quiahva ná cacu Ndióxi na cándají mé á tixi sahá. <sup>14</sup> Jáchí in táláá tañu naxihí Jesucristo ndica crúxu ta xihín ña yóho nandaja vií a ínimá ñayivi, na nacaxi mé á. <sup>15</sup> Ta sa xíní yo ña cúú ña yóho ña ndaa jáchí já cáhí ínimá yíi Ndióxi já:

<sup>16</sup> Vaxi quiví tá quiahva í tuhun saá nuú ñayivi Israel ta quiahva johoo a.

Caja í ña ná candaa vaha ini na ley mí í ta caja í ña cañuhu a ini ínimá ná.

<sup>17</sup> Ta já cáhí tucu a já:

Caja cáhnu ini í sahá ndaja táhan ña núu nacaja na ta a ndícuhun ga ini í sahá cuachi na, cáhí tuhun Ndióxi.

<sup>18</sup> Ta sahá ña nacaja cáhnu ini Ndióxi sahá cuachi ñayivi sahá ña cán quea co xíní ñúhú ga cahni na quítí ña jóco na rí nu mé á sahá cuachi na.

*Xíní ñúhú cayatí nu Ndióxi*

<sup>19</sup> Candehé ndo, ñani í, na cúú cuéntá Jesús. A cáyhví toho í viti ndihví nu íin

Ndióxi, mé nuú yíi ndivaha jáchí naxihí Jesucristo sahá cuachi. <sup>20</sup> Ta tá nandiquiahva mé á yiquí cuñu a já naxihí a ta xihín ña yóho nasuná a íchí saá já ná cuu cayatí nu íin mé á. <sup>21</sup> Ta mé Jesús cúú á jutū sacuahá saha yo nu Ndióxi jáchí cómí a cuéntá sahá ndihí, na cúú cuéntá mé á. <sup>22</sup> Ña cán quea xíní ñúhú cayatí nu íin Ndióxi xihín ndinuhu iní jáchí cándeé iní mé á. Cúú á tátuhun nandoo yiquí cuñu í tá naxihí Jesucristo ndica crúxu. Ta viti co ndítahan ndicani iní sahá cuachi nacaja í jáchí najándoo mé á cuachi. <sup>23</sup> A jándacoo í ña cándeé iní Ndióxi ta ná candati tiahva í janda ná yaha ña cáhí mé á jáchí xíní vaha í ña jáxinu coo Ndióxi tuhun nasahan nu yo. <sup>24</sup> Ta ndítahan nu yo ndinducú yo ndaja caja í chindeé táhan í já ná quihví chága iní ñani táhan í. Ta ndítahan caja chága yo ña vaha. <sup>25</sup> Co ndítahan toho caja í tá quiahva cája java na cúú cuéntá Jesús, na co cúní nditaca xihín ndihi java ga na cúú cuéntá Jesús. Ña ndítahan caja í quea jácahan chága táhan í ña ná taca í xihín java ga na cúú cuéntá Jesús jáchí sa xíní yo ña vaxi quiví quixi tucu Jesucristo ñuyíví yóho.

<sup>26</sup> Tá sa cándaa vaha ini ña co ndítahan caja í cuachi ta chíñee tucú mí cuahan í cája í cuachi vatí sa cándaa iní ña ndaa, a cuú ga ndoo cuachi nu Ndióxi. <sup>27</sup> Ta cáyhví yo

candatí janda quiahva ndoho ndivaha ini caja Ndióxi. Jáchi jácana mé á ñayivi nu ñúhu cáyi ita, mé nu ndihi sahá na ihvi mé á. <sup>28</sup> Jáchi ndá na Israel, na co cúní caja ña sáhdá ley Moisés já quéa ndítahan quivi na tá ná cacu ivi á uní testigo sahá na nu juéxe. Ta ni in na a cándahví ini ñahá. <sup>29</sup> Joo ndaja ga ví ndítahan ndoho ini na quéhe núu Jesús, mé in túhún jini já jahyi Ndióxi. Jáchi cúú á tátuhun sání nihni na a ta co sáhní toho na mé ná ña naxihí a jándoo a cuachi na tá quiahva nasahan Ndióxi tuhun a caja. Cánahá na xihín ínima yii Ndióxi, mé a cája cuahá ñamani xoho. <sup>30</sup> Cándaa vaha ini yo cúú mé a nacachi ña yóho: “Yehe jándoho i ini ñayivi, na cája cuachi. Ta caja i ña ná chahvi na sahá cuachi na”, cáchí a. Ta já cáchí tucu Ndióxi, xitoho í já: “Yehe caja ví i sahá na cúú cuéntá mí i”, cáchí a. <sup>31</sup> Mé a ndaa ndáhví nahá nacuu tá ná tiin Ndióxi mí ña ná chahví sahá cuachí jáchi mé á cúú á Ndióxi, ña tácu indiví.

<sup>32</sup> Ndítahan ndicuhun ini ndó ña nayaha tá jacá nacandee ini ndó Jesús. Vatí nandoho ndivaha ini ndó nacaja java ñayivi joo nasahan ndee ini ndó. <sup>33</sup> Java tañu nasacu ndaa ichi na ndohó nuú ñayivi ta java tañu nacaja xíxi na xihin ndo ta java tañu nacatáhan ndó xihín java ga na tá nandoho ri ini na sahá Jesús. <sup>34</sup> Ta

táhdá ini ndó sahá na cúú cuéntá Jesús ñúhu vecaa. Ta coo nacahan cuachí ndo ta janda cájii ini ndó vatí nacaja cuíhná na ñaha ndó jáchi cándaa vaha ini ndó ña cómí ndó ña vaha chága indiví ta a ndihi toho sahá ña cán. <sup>35</sup> Ña cán quéa a jándacoo ndó ña cándee ini ndó Jesús jáchi tandaa quivi quiahva cuahá Ndióxi ña vaha nu ndo tá cándee ini ndó mé á. <sup>36</sup> Ndítahan nu ndó quiahva ndee ini ndó caja ndó ña cúní Ndióxi já quéa ndiquehe ndó ña vaha nasahan mé á tuhun a quiahva nu ndo. <sup>37</sup> Jáchi já cáchí tuhun Ndióxi já:

Jalóho cúní ta já quixi mé a ndítahan nuu quixi ta a cáyancá toho a.

<sup>38</sup> Joo ndá na cúú ñayivi ndaa nu mí i catacu na sahá ña cándee ini na yehe.

Ta tá co cúní ga na cándee ini na yehe ta já ndicó coo na caja na cuachi já quéa a cájii ini i xihin ná, já cáchí Ndióxi.

<sup>39</sup> Joo a cája toho í tá quiahva cája java ñayivi jáchi co cúní na cándee ga ini na Jesús ta tandaa quivi cuhun na indayá. Joo mí cúú yó na cándee ini Jesús ta tandaa quivi coo i nu in mé á.

## 11

*Ndítahan nu yó cándee ini Ndióxi*

<sup>1</sup> Tá ná cándee ini Ndióxi já quéa cúní cachi a ña sa xíni vaha í ña yaha tá yaha ña ndati yó yaha. Ta vatí co xíni yó ña ndatí joo cándee

iní ña já coo. <sup>2</sup> Jáchi sahá ña ñacandeeé ini tásáhnú jíco yó Ndióxi sanahá ndivaha sahá ña cán queá cáji ini Ndióxi xihín ná.

<sup>3</sup> Ta sahá ña cándeeé ini Ndióxi sahá ña cán queá cándaá vaha ini ña ñacahan Ndióxi ta já ñacavaha mé á ñuyívi xihín indiví. Jihna coó ñasahin ni in ñaha joo viti náha nuú ña ñacavaha mé á.

<sup>4</sup> Ta sahá ña ñacandeeé ini da naní Abel Ndióxi sahá ña cán queá ñatahan ini Ndióxi xihín ña ñacaja da tá najocó da ñaha nu á. Ta coó ñatahan ini a xihín ña najocó da naní Caín, da cúu ñani Abel jáchi coó ñacandeeé ini Caín mé á. Sahá ña cán queá ñandiquehe Ndióxi ña najoco Abel nu á ta xihín ña yóho ñandu da da ndaa nu á. Ta vatí ñaxihí Abel joo xihín ña ñacaja da sanahá jáñaha da nu yó ndaja ndítahan nu yó candeé ini Ndióxi.

<sup>5</sup> Ta sahá ña ñacandeeé ini da naní Enoc Ndióxi sahá ña cán queá coó ñaxihí toho da. Joo ñasañehe Ndióxi da indiví ta coó ñacuu ndiñehé ñayivi mé dá jáchi ñandaa da cuahan da indiví ñacaja Ndióxi. Ta cáchí tuhun Ndióxi já ñacaja mé á jáchi táhán ini a xihín ña ñacaja Enoc nani ñasahin da ñuyívi yóho. <sup>6</sup> Tá co cándeeé ini Ndióxi já queá co táhán ini Ndióxi xoho. Jáchi ndá ña cúni cayati nu Ndióxi xini ñúhú cándúsa na ña ín mé á indiví ta xini ñúhú cándúsa na ña quiahva mé á ña vaha nuú ñayivi tá ndinducú ña mé á.

<sup>7</sup> Ta sahá ña ñacandeeé ini da naní Noé Ndióxi sahá ña cán queá ñataa johó da tá ñacaxi tuhun Ndióxi xihín dá ña ndoho ini ñayivi chága chí nuú vatí coó ñasanaha nu á. ñacandúsa Noé Ndióxi ta chí ñacasahá da cávaha da in barco cáhnú nuú cuu cacu ndaa mé dá xihín ña vehe da. Ta sahá ña ñacandeeé ini da Ndióxi sahá ña cán queá ñandu da ñaa ndaa nu mé á. Ta xihín ña ñacaja da najácojo da cuachi jatá ñayivi ñuyívi jáchi náha cáxi a ña coó ñacandúsa na caja na ña cáchí Ndióxi.

<sup>8</sup> Ta sahá ña ñacandeeé ini da naní Abraham Ndióxi sahá ña cán queá ñacandúsa da ña ñacahan Ndióxi xihín dá. Ta chí ñaquee da ñuu da ta cuahan da in ñundáhyi, ña ñasahan Ndióxi tuhun a quiahva nu dá. Najándacoo da ñuu da vatí coó ñasaxini da ndaja naní mé ñuu nuú cuhun da. <sup>9</sup> Ta sahá ña cándeeé ini Abraham Ndióxi sahá ña cán queá ñaxinu coo da ñundáhyi ña ñasahan Ndióxi tuhun a quiahva nu dá. Joo ñandiñehe dá java ñayivi ndúu cán chí ñasahin da tá quiahva ndúu ña tóho. Vehe tienda ñasahin da xihín ña vehe da. Ta quiahva já ñasahin Isaac xihín Jacob jáchi ñasahan Ndióxi tuhun a nu mé dá xihín nuú ña vehe da. <sup>10</sup> ñacaja Abraham ña yóho jáchi ndáti da coo da in ñuu ña ín indiví, ña ñacavaha Ndióxi nuú coo a anda ama cáa quivi.

<sup>11</sup> Ta jári ñacandeeé ini Sara,

mé ñájíhí Abraham Ndióxi sahá ña cán quéa ñacaja Ndióxi ña ñacuu quee jahyi ña vatí sa ñacayatá ña. Ta tá ñandihí já ñacacu jahyi ña ta ñasacuu a sahá ña ñacandeeé ini ña jáxínu coo Ndióxi tuhun ñasahan nu ña. <sup>12</sup> Sahá ña cán quéa vatí ñacayatá ndivaha Abraham ta ñacayati quiví quivi da joo ñacacu jahyi da xihín ña ta ñanduú da tásáhnú jíco ña Israel. Ta cuahá ndivaha na cúu chichi da jandá a cuú candahvi na. Cúu á tátuhun quimi ña íin indiví á tátuhun ñutí yuhú tañuhú jáchi a cuú candahvi a.

<sup>13</sup> Tóco ndihí ña ñaquixi chichi Abraham yóho vatí ñaxihí ña joo ñacandeeé tá ñacandeeé ini na Ndióxi. Ta vatí coo ñaxini na ña ñasahan mé á tuhun a quiahva nu ná joo ñasacuu a tátuhun ñaxini na ña. Jáchi ñacandeeé ini na ña ñacachi Ndióxi xihín ná ta ñacajii íni ña. Ña cán quéa ñacachi na ña ndúu tóo cuití ña ñuyiví yóho ta cúu ná tátuhun ña tóho jáchi coo ñuu na ñuyiví yóho. <sup>14</sup> Cándaa ini ña ndá ña cáchi já cúní cachi a ña ndinducú ña inga ñuu nuú canduu na. <sup>15</sup> Ta coo ñatahnda ini na sahá ñuu ñaquee na cán jáchi cuu ndicó coo na, nduu joo coo ñacacúní na caja na ña. <sup>16</sup> Joo ña ndúcú ña cúu in ñuu ña vaha chága, ña íin indiví. Ta ñacaja tiahva Ndióxi mé ñuu indiví nuú cuu coo na já quéa a cácahan nuú mé á cachi a ña cúu ná cuéntá mé á.

<sup>17</sup> Ta sahá ña ñacandeeé ini Abraham Ndióxi sahá ña cán quéa ñasahíin tiahva da cahní da Isaac, jahyi da joco ñahá da nu Ndióxi tá ñaxito ndojó Ndióxi da. Já ñacaja Abraham vatí ñasahíin in tuhún jini jahyi da ta sa ñasahan Ndióxi tuhun a nu Abraham <sup>18</sup> tá ñacachi a já xihín dá: “Cacu jahyún, da cananí Isaac ta xihín da cán ndicuahá ndivaha chichún chága chí nuú”, ñacachi Ndióxi. <sup>19</sup> Sa ñacandaa vaha ini Abraham ña cuu caja Ndióxi ña ná nditacu tucu Isaac tá sa ñaxihí da. Ta vatí coo ñasahní toho Abraham Isaac joo cúu á tátuhun ñaxihí da ta ñanditacu tucu da jáchi ñasahíin tiahva da cahní da da sahá ña ñacandeeé ini da Ndióxi.

<sup>20</sup> Ta sahá ña ñacandeeé ini Isaac Ndióxi sahá ña cán quéa ñasahan da tuhun da nu ndiví jahyi da, da naní Jacob xihín da naní Esaú ña caja cuaha Ndióxi ñamaní xihín ndiví da chága chí nuú. <sup>21</sup> Ta sahá ña ñacandeeé ini Jacob Ndióxi sahá ña cán quéa tá jalóho cúní quivi da já quéa ñacachi da ña caja cuaha Ndióxi ñamaní xihín iví jahyi ñaní da, da cúu jahyi da naní José. Andá javí ñacaja cáhnu da Ndióxi nani tíin ndaa da garrote da. <sup>22</sup> Ta sahá ña ñacandeeé ini José Ndióxi sahá ña cán quéa tá jalóho cúní quivi da ñacahan da xihín ña Israel sahá mé quiví tá ná quee na nación Egipto cuhun ña. Ta ñasahnda da chuun nu ná ña ná cañehe na lasa yiquí

cuñu mé dá cūhūn ña xihūn nā.

<sup>23</sup> Ta sahá ña ñacandeeé ini náná tátá Moisés Ndióxi sahá ña cán queá tá nandihí ñacacu da já ñachicaan jehé na da tañu uní yoo. Náha ña cúu dá in léé ñúchí ndivaha ta chí coó ñayihví toho na tuhun ñacahan rey cán tá ñasahnda da chuun ña quivi ndihi tavalí jacá ñacacu nuu na Israel. <sup>24</sup> Ta sahá ña ñacandeeé ini Moisés Ndióxi sahá ña cán queá tá ñasahnu da najándacoo da vehe rey Egipto vatí najácuahnu ñá cúu jahyi jíhí rey cán da tátuhun jahyi ñá. <sup>25</sup> Ta ña ñacaja da queá ñasahan da nandoho ini da xihín na cúu cuéntá Ndióxi. Jáchí coó cúní da cájii ini da cája da cuachi vatí chá tiempo. <sup>26</sup> Ta ñacahán da ña vaha chága ná ndoho ini da saha Jesucristo, mé a chindahá Ndióxi cacomí cuéntá sahá ñayivi a juú ga ña ná cacomí da cuahá ñaha cuicá nación Egipto cán. Jáchí ñacahvi ini da sahá ñamaní caja Ndióxi xihūn da chága chí nuu. <sup>27</sup> Ta sahá ña ñacandeeé ini Moisés Ndióxi sahá ña cán queá najándacoo da nación Egipto ta coó ñayihví da ña ná ndicuehe rey Egipto cán xihūn dá. Ta ñasahan ndeeé ini da jáchí ñaxica da tátuhun in da xica xihūn Ndióxi vatí coó ñaxini da mé á.

<sup>28</sup> Ta sahá ña ñacandeeé ini Moisés Ndióxi sahá ña cán queá ñasahnda da chuun ña ná caja na Israel vicó pas-cua. ñasahnda da chuun ña ná cahní na ndicachi ta já

cuihna ndaa na ñii rí yuyéhe vehe na Israel ña ná a quívi jahyi taa na, da ñacacu nu cuítí tá ná yaha tátó Ndióxi, mé a cája ña ná quivi ñayivi. <sup>29</sup> Ta sahá ña ñacandeeé ini na Israel Ndióxi sahá ña cán queá ñayaha na mahñú ndaa tañuhú naní tañuhú cuahá. Ñasacuu a tátuhun xica na nu ñundahyi íchí uun. Joo tá ñacasahá na Egipto yaha na mé tañuhú cán já queá coó ñacuu caja na ña. Ñacandaa na ini ticuúí ta já ñaxihí ndihi na.

<sup>30</sup> Ta sahá ña ñacandeeé ini na Israel Ndióxi sahá ña cán queá ñacava nuu na ñuu Jericó tañu usa quívi ta já ñacuyu ndihi náma ñuu cán. <sup>31</sup> Ta sahá ña ñacandeeé ini ñá xica jii naní Rahab cán Ndióxi sahá ña cán queá coó ñaxihí ñá xihín ndihi ñayivi ñuu Jericó, na coó ñacandúsa Ndióxi. Najácaacu Ndióxi Rahab cán jáchí sa nandiquehe vaha ñá java taa Israel tá ñasasaá da nu cuítí sándehe da ñuu cán.

<sup>32</sup> Ndá chága cahan i xihūn ndo. Sa ñacahan cuahá i xihūn ndo joo cámaní cahan i sahá da naní Gedeón xihūn da naní Barac xihūn da naní Sansón xihūn da naní Jefeé xihūn da naní David xihūn da naní Samuel xihūn java ga na ñasacuu profeta.

<sup>33</sup> Sahá ña ñacandeeé ini na cán Ndióxi sahá ña cán queá ñaquee vaha na tá ñacani táhan na xihūn java nación ta ñasacomí vaha na cuéntá sahá ñayivi ta nandiquehe na ña vaha ñasahan Ndióxi

tuhun a quiahva nu ná. Java na nachicaji na yuhu león.  
 34 Ta java na nandahva na ñuhu cáyi ña ná a cáyi toho na. Ta java na nacacu na ndahá ñayivi, na nacacuni cahni ñahá xihin machiti. Ta java na vatí vitá ini na joo nandihvi ndée ná. Ta java na naquee vaha na tá nacani táhan na xihin na ihvi na.  
 35 Ta java najihí nacandeeé ini na Ndióxi ta sahá ña cán queá naxini na ña nanditacu tucu na vehe na nacaja Ndióxi.

Joo java na nandoho ndivaha ini na janda quiahva naxihí na. Ta coó nacandúsa na cacu xoo na Ndióxi jáchi nacandaá vaha ini na ña cuhun na coo na in ñuu vaha chága nu íin mé á.  
 36 Java na nandoho ini na tá nasacu ndaa ichi ñahá na ta nacani ñahá na. Ta java na nasandico na xihin cadena ta nachicaan na na vecaa.  
 37 Ta java na naxihí na jáchi nacuun ñayivi yuu ná ta java na naxihí na tá nasahnda tuhun ñahá na. Ta java na naxito ndojó ñayivi na ña ná caja na cuachi. Ta java na naxihí xihin machiti. Ta java na nasandíxi na xihin ní ndicachi xihin ní tjuhú cuití va jáchi coó toho jjuhún na. Nacaja xíxi ñayivi xihin ná ta najándoho na ini na. 38 Naxica ndáhví na nu íchí ndivaha ta naxica nuu na yucú ñuhú ta nasanduu na tixi cáva xihin yávi nu ñuhu. Mé a ndaa cúu ná ñayivi vaha ndivaha ta co ndítahan nu ná ndoho ini na ñuyívi yóho. 39 Ta cájii

ini Ndióxi xihin tóco ndihi na cán jáchi nacandeeé ini na mé á. Joo cámaní ndiquehe na ña nasahan mé á tuhun a quiahva nu ná. 40 Jáchi cúni Ndióxi ña ná candati na cán anda tandaa quivi ndiquehe tóco ndihí ña vaha chága quiahva Ndióxi nu yo.

## 12

*Ná candeeé iní Jesús cuití va*

1 Mé ñayivi cuaha cán naquee vaha na jáchi nacandeeé ini na Ndióxi. Ta jaha na nu yo ndaja caja í ña ná quiahva ndeeé iní tá ná ndoho iní. Ña cán queá ná jándacoo í tóco ndihi cuachi cája í, ña tíin tuun mí. Ta ná jácaxoo í tóco ndihi ña sáji nuu nu yo caja í ña cúni Ndióxi. Ta ná candico yó ichi Ndióxi xihin ndinuhu iní tá quiahva ndítahan caja í.  
 2 Ta ná candehé cáxi yo nuu Jesús jáchi mé á cán cája ña ná casahá candeé iní Ndióxi ta cája ña ná candeé iní mé á anda tandaa quiví quiví. Nandoho ini Jesús tá naxihí a ndica crúxu ta coó nacacahan nuu á vatí cacahan nuu ñayivi quivi na quiahva já. Jáchi nacandaá ini a ña tá ná ndihi ndoho iní a já tandaa quivi cajii ndivaha ini a. Ta viti íin coo a xoo cuáha Ndióxi indiví.  
 3 Xíni ñuhú ndicuhun ini ndó ndaja nacaja Jesús jáchi a juú quiahva nandoho ini a ndahá ñayivi cája cuachi. Sahá ña cán queá a jándacoo ndó ña candeé ini ndó Jesús ta a cácuitá ínimá ndó tá ndóho ini ndó. 4 Jáchi cámaní yii va

cahní nā cája cuachi ndohó sahá ña co xeén ndó caja ndó cuachi. <sup>5</sup> Á nandindójó ndó tuhun naçahan Ndióxi xihín ndo sahá ña cúú ndó jahyi mé á. Já cáchi tuhun Ndióxi já:

Jahyi maní i, a quéhe núu ndó Ndióxi tá jándoho a ini ndó ña ná ndacaca vaha ndó.

Ta a cáva ivi joho ini ndó tá janani mé á ndohó.

<sup>6</sup> Jáchi já cája Ndióxi xihín na quíhvi ini a.

Jándoho a ini na já ná jándacoo na ña núu ta já nduu na jahyi mé á, cáchi tuhun Ndióxi.

<sup>7</sup> Quiahva ndeé ini ndó tá cája Ndióxi ña ná ndoho ini ndó. Jáchi tá quiahva cája in da ta xihín jahyi da quiahva já cája mé á xihín ndo. Jáchi tóco ndihi dataa jácaxáhan da jahyi da já ná ndacaca vaha da. <sup>8</sup> Ta tá co jándoho Ndióxi ini ndó já quéa co cúú ndó jahyi mé á. Cúú ndó tátuhun jahyi ndáhví na. Joo tá ná jándoho Ndióxi ini ndó já cándaá ini ndó ña mé a ndaa cúú ndó jahyi mé á. <sup>9</sup> Tá nasacuú na valí naçaja cáhnu yó tátá yo vatí najácaxáhan na mí. Joo íin chága saha caja cáhnu í Ndióxi, tátá yo, mé á íin indiví vatí jándoho a ini mí jáchi xihín ña yóho cuu coo í xihín mé á anda ama cáa quívi. <sup>10</sup> Tá valí yo najándacaca vaha tátá yo mí tá najánani na mí jáchi já vaha xíní na vatí mé ñuyiví yóho cúú á nu ndúu tóo cuití ví. Joo tá janani Ndióxi, tátá yo,

mí cúú á ña vaha chága jáchi xihín ña yóho ndaja yii á mí tá quiahva íin yii mé á. <sup>11</sup> Mé a ndaa co táhán ini tá janani na mí jáchi cáhíhvi yo xihín á. Joo tá nandihí já coo vaha ini jáchi naçatiahva í ndaja caca vaha í sahá ña nandoho ini ta xihín ña yóho cacuú ñayivi ndaa nu mé á.

*Ndítahan nu yó táa joho í nu cáhan Ndióxi*

<sup>12</sup> Ña cán quéa ndicuíta ndó ta a jándacoo ndó mé ndó. <sup>13</sup> Ta ndinducú ndó ichí ndacú já ná cuu chindeé ndó ñayivi, na cáva ivi joho ini ña ná a ndicó coo na nuú cuachi.

<sup>14</sup> Xíní ñúhú ndinducú ndó ndaja caja ndó coo vaha ini ndó xihín tóco ndihi ñayivi. Jándacoo ndó cuachi cája ndó ta ndinuhu ini ndó caja ndó ña cúni Ndióxi já ná cuu coo ndó nu íin mé á. <sup>15</sup> Cuéntá coo ndó ná a jándacoo ni in ndó íchi cuéntá Ndióxi jáchi cúni a caja cuahá ñamaní xihín ndo. Cuéntá coo ndó ná a cácuu ndó tátuhun in yucu ova ña jativí ña xíxi na jáchi na cája cuachi cája quini na ta jativí na java ga na cúú cuéntá Ndióxi. <sup>16</sup> Coto a quíhvi nuu ndó coo ndó xihín in na co cúú yí ndo á ñájíhí ndo. Coto a quéhe núu ndó ñaha Ndióxi tá quiahva naçaja Esau. Jáchi in quívi cuíco ndivaha da ta najicó da tóco ndihi ñaha ndítahan ndiquehe da nu tátá da sahá ña ná cuxu da in coho cuití va. <sup>17</sup> Joo cándaá ini ña tá nandindaa nu dá ndiquehe da ñaha ndáha tátá da coo naçuu ndiquehe da ni

in ñaha. Jáchi najicó da ña nuú ñani da sahá ña ná cuxu da in cohó. Ta vatí nasacu ndivaha da joo coó ñacuu caja da ndijama da tuhun da ña sa nasahan da nuú ñani da.

18 Ta mé ndó coó ñacayati ndó nu Ndióxi tá quiahva ñacaja na Israel sanahá. Mé na cán nataca na saha in yúcu naní Sinaí xihín da naní Moisés. Ta ñacayi ñúhu cán ta nanaá ndivaha ta ñaxicó ndivaha tachí ñaxini na.

19 Ta ñaxini johó na nativi trompeta ta ñacahan Ndióxi xihín ná. A juú quiahva nayihví na tá ñaxini johó na nu cáhan Ndióxi chí ñaxica tahví na nu á ña ná a cáhan ga xihín ná. 20 Jáchi coó ñacandee ini na táa johó na ña sáhdá Ndióxi nu ná tá ñacachi a já: “Tá ná cani ndaa in ñayivi á in quití yúcu Sinaí yóho já quea xini ñúhú cuun ndó yuu ná á tuxú ndó na xihín poyá anda ná quivi na”, cáchi Ndióxi.

21 Ta a juú quiahva nayihví na sahá ña ñaxini na cán. Ta anda Moisés viti nayihví ndivaha da ta já ñacachi da já: “Quíji ninu i xihín ña yihví i”, cáchi da.

22 Joo ña ñacaja mé ndó quea sa ñacayati ndó in nuú naní Sión, mé nu ín Ndióxi, mé a tácu indiví. Mé ñuu cán cúu á tátuhun inga Jerusalén, ña ín indiví ta ndúu cuaha mil tátó Ndióxi cán. 23 Sa nataca ndó cán caja cáhnu ndó Ndióxi xihín tóco ndihi ñayivi, na mé a ndaa cúu jahyi Ndióxi, mé na ndaa

quivi nu libro Ndióxi indiví. Ta sa ñacasaá ndó nu Ndióxi, mé a cája vii saha tóco ndihi ñayivi. Ta nataca ndó xihín tóco ndihi ñayivi, na sa ñaxihí sanahá, mé na sa ñanduu ndaa nu Ndióxi ñacaja mé á. 24 Ta sa ñacayati ndó nuú Jesús, mé a cáhan xoo mí nu Ndióxi. Jáchi sahá ña ñacaja Jesús tá ñaxita nii á ndica crúxu sahá ña cán quea nasahan Ndióxi tuhun a nu yo ña ná ndoo cuachí. Joo jín va ñacaja Ndióxi tá ñaxita nii Abel sanahá ndivaha jáchi najándoho a ini ñani da, da naní Caín sahá ña nasahní ñahá da.

25 Cuénta coo ndó já ná a quehe núu ndó nu cáhan Ndióxi xihín yo. Jáchi ñayivi cán, na coó ñaxeen cája ña cáchi Ndióxi ñachahvi na sahá ña núu ñacaja na mé ñuyivi yóho. Ta já caja ri Ndióxi xihín mí tá ná quehe núu í tuhun mé á jáchi janda indiví ín mé á cáhan xohó.

26 Mé tiempo cán najátaan Ndióxi ñuyivi yóho tá ñacahan mé á. Joo já cáchi a já viti: “Vaxi quivi ta játaan tucu i ñuyivi ta mé tiempo cán jáquiji nuu i indiví viti”, cáchi a.

27 Tá ñacachi Ndióxi ña inga tucu játaan mé á ñuyivi yóho já cándaá ini ña ndihi sahá ñaha ñacavaha mé á. Ta tóco ndihi ñaha, ña a cuú quíji nuu, ña cán coo a anda ama cáa quivi. 28 Ñehe táhvi yo coo í nuú cacomí Ndióxi cuénta saha yo ta mé cán a cuú quíji nuu a. Sahá ña cán quea ná ndiquiahva í



ndixahvi nu Ndióxi ta ná caja cáhnu í mé á xihín ndinuhu ini jáchi cájii ini mé á xihín ña yóho. <sup>29</sup> Jáchi mé a ndaa Ndióxi cúu á tátuhun ñúhu ña cáyi ña jándihi sahá ñaha. Ña cán quea caja mé á ña ná ndihi saha tóco ndihi cuachi.

## 13

*Ná caja í ña táhan ini Ndióxi xihin*

<sup>1</sup> A jándacoo ndó ña quihvi ini ndó na cúu cuénta Jesús jáchi cúu ná tátuhun ñani ndó á quiahva ndó. <sup>2</sup> A ndíndójó ndo ndiquehe vaha ndó na toho tá ná casa na vehe ndó jáchi xihín ña yóho java na nandiquehe vaha na tát Ndióxi vatí coo nacandaa ini na ña.

<sup>3</sup> A ndíndójó ndo saha ñayivi ñúhu vecaa ta xini ñúhú tahnda ini ndó xihin ná jáchi xini ñúhú cacuu a tátuhun ndacaan mé ndó vecaa xihin ná. Ta a ndíndójó ndo saha ñayivi, na cája xixi na xihin ta xini ñúhú tahnda ini ndó xihin ná jáchi cuu ndoho ini ri ndóho va tá quiahva ndóho ini na cán.

<sup>4</sup> Vaha va cája ndó tá tándaha ndo ta xini ñúhú caja cáhnu ndó yí ndo á ñájíhí ndo. Ta a ndúcú toho ndó coo ndó xihin inga na jáchi jándoho Ndióxi ini ndá na quihvi nuu coo xihin na coo cúu yí na á ñájíhí na.

<sup>5</sup> A ndiava ini ndó cacomí ndó cuahá jihún. Ndítahan cajii ini ndó xihin ña cómí ndo jáchi já cáhí Ndióxi já: “A jándacoo toho i ndóho ta ni a

ndíndójó i saha ndo”, cáhí a. <sup>6</sup> Sahá ña cán quea cuu candeé ini Ndióxi ta cuu cachí já:

Mé á cúu Ndióxi, xitoho i ta chindeé a yehe.

Ta a cáyihví toho i ndá ñaha ndúcú ñayivi caja na xihin i.

<sup>7</sup> A ndíndójó ndo saha na nasacomí cuénta saha ndo ta ni saha na nacaxi tuhun tuhun Ndióxi nu ndo. Candehé ndó ndaja nacaja na ñuyivi yóho jáchi nacandee ini na Ndióxi anda quiahva naxihi na. Ta ndítahan nu mé ndó candeé ini ndó a tá quiahva nacaja na cán.

<sup>8</sup> Co ndíjama toho Jesucristo. Tá quiahva nasacuu a sanahá ndivaha quiahva já cúu ri a anda viti ta quiahva já coo a anda ama cáa quivi.

<sup>9</sup> A quiahva toho ndó ñamani nuú ñayivi ña ná jándahvi na ndóho xihin ña jánaha na nu ndo. Jáchi cúu á saha ñamani cája Ndióxi xoho ña ndíndacú ínimá yo. Ta coo cúu á saha ña jánaha java ñayivi tá cáhí na ña a cúu cuxú java ñaha ña ná nduu ndaa ínimá yo. Mé a ndaa ña yóho coo chindeé a mí.

<sup>10</sup> Tá naxihi Jesucristo ndica cruxu já najoco a mé a nu Ndióxi saha yo. Joo jín va nacaja jutú cuénta na Israel sanahá tá najoco na quíti nu Ndióxi. <sup>11</sup> Jáchi da cúu jutú sacuaña nasañehe da nii rí naxihi cán ini veñuhu nuú yí ndivaha ta já najoco da dó nu Ndióxi saha cuachi ñayivi. Joo natavá da yiquí cuñu rí jatá ñuu nu sáhmi na ri. <sup>12</sup> Ta quiahva já naxihi

Jesús jatá ñuu Jerusalén. Ta naxita ñii a ña ná jándoo a cuachi ñayivi. <sup>13</sup> Ña cán quea cóho nuú Jesús. Cúú á tátuhun cūhun í jatá ñuu ta a cácahan nuú yó ndoho iní xihín mé á. <sup>14</sup> Jáchi ñuyivi yóho cóo toho ni in nuú cuu coo í anda ama cáa quivi. Joo ndínducú yo inga ñuu nuú cuu coo í chága chí nuu. <sup>15</sup> Cóho caja cáhnu í Ndióxi ní tiempo ta chindeé Jesús mí caja í ña. Ta ña yóho cúú á tátuhun ña jóco yo nu mé á sahá ña ñacaja tá naxihí a ndica crúxu. Cóho caja cáhnu í mé á xihín yúhu yo jáchi cúú yó cuéntá mé á. <sup>16</sup> A ndíndójó ndo caja vaha ndó ta ná chindeé ndo ñani táhan ndó xihín ña cómí ndo. Jáchi ña yóho cúú á tátuhun ñaha jóco ndo nu Ndióxi ta cájii ini mé á xihín á.

<sup>17</sup> Candúsa ndó ña cómí cuéntá saha ndo ta caja ndó ña cúni ña. Jáchi ñasahan Ndióxi chuun yóho nu ná. Ta tandaa quivi nditahan ndicani na nu Ndióxi sahá ña ñacaja na. Caja ndó ña cúni ña já ná cajii ini na ta ná a cóo cuéha ini na jáchi a cuú quee vaha ndó já.

<sup>18</sup> Caca tahví ndo nu Ndióxi sahá nde jáchi ñandivii ínimā nde ta cúni nde caja vaha nde ní tiempo. <sup>19</sup> Caja ndó ñamaní caca tahví ndo sahá í ña ná quiahva Ndióxi ñamaní nuú í saa yachi í nu ndó coto nihni í ndohó.

<sup>20</sup> Ña cúni quea ná quiahva Ndióxi ña ná coo vaha iní. Mé a cán najánditacu tucu a Jesucristo, mé a cúú xitoho í. Ta sahá ña ñacaja Jesucristo tá naxita ñii a ndica crúxu sahá ña cán quea ñasahan Ndióxi tuhun a nu yo ta a ndíhi toho sahá. Ta mé Jesús cómí a cuéntá saha yo tá quiahva in pastó cómí da cuéntá sahá ndicachi jana dá. <sup>21</sup> Ta ná caja Ndióxi ña ná ndindacú ínimā ndó já ná cuu caja ndó tóco ndíhi ña cúni a. Ta sahá ña ñacaja Jesucristo ná caja Ndióxi xihín yo ndá ña ñacuu ña táhan ini mé á xihín. Ná caja cáhnu í Jesucristo anda ama cáa quivi. Já ná coo.

<sup>22</sup> Xíca tahví í nu ndo ña ná coo cáhnu ini ndó xihín tuhun cáhan í xihín ndo, ñani í, ña cúú cuéntá Jesús. Jáchi carta loho cuití va ñacahyí í nu ndo já ná ndindacú ínimā ndo. <sup>23</sup> Ta cáxi tuhun í xihín ndo sahá Timoteo, mé da ñasandacaan vecaa joo sa najani dá viti. Tá ná casaa yachi da yóho já saa da xihín í coto nihni nde ndohó.

<sup>24</sup> Cahan Ndióxi ndó xihín tóco ndíhi ña janaḡa tuhun Ndióxi nuú ñayivi ta cahan Ndióxi ndó xihín tóco ndíhi ña cúú cuéntá Jesús. Tóco ndíhi ña cúú cuéntá Jesús, ña ndúu nación Italia yóho chindahá ña Ndióxi coo ndó.

<sup>25</sup> Ná caja cuaha Ndióxi ñamaní xihín tóco ndíhi ndó. Já ná coo.

*Xihín tuhun yóho ndíhi carta yóho*

## Carta nacahyí Santiago nuú na cúu cuéntá Jesús

*Cáhan Ndióxi Santiago  
xihín na cúu cuéntá Jesús*

<sup>1</sup>Yehe cúu Santiago, da cajú chún cuéntá Ndióxi ta cajú chún i cuéntá Jesucristo, xitoho í. Chíndahá i Ndióxi coo na Israel, na cúu cuéntá Jesús, mé na nandicujta nuu ndúu ní cúu ñuyíví.

*Ndaja cajú í candaq ini ña  
cúni Ndióxi cajú í*

<sup>2</sup>Cuni johu vaha ndó, ñani mí i, na cúu cuéntá Jesús. Ndítahan cájii ini ndó tá vaxi tá nuú ña ndóho ini ndó.

<sup>3</sup>Jáchí sa xíni ndo ña tá ndóho ini ndó sahá ña cándéé ini ndó Jesucristo já queá catiahva chága ndó quiahva ndeé ini ndó sahá ña ndóho ini ndó.

<sup>4</sup>Quiahva ndeé ini ndó tá ndóho ini ndó anda quiahva ná xinu coo ña cúni Ndióxi já queá cacuu ndó ñayivi ndaa nu mé á. Ta cuahnu vaha ndó xihín tuhun a ta ni in ñaha a camani ga nu ndo.

<sup>5</sup>Tá co candaq ini ndó ña cúni Ndióxi cajú ndó já queá xíni ñuhú caça tahví ndó nu mé á ta quiahva mé á cuahá ña candaq ini ndó. Jáchí co ndáhví cúu ini a quiahva ña nuú ndihi ñayivi. <sup>6</sup>Joo tá xíca tahví ndo nu Ndióxi xíni ñuhú candeé ini ndó mé á ta a cáhvi ivi johu ini ndó jáchí mé na cáhvi ivi johu ini, na cán cúu

na tátuhun tañuhú tá ndácojo do cajú tachí. Ta co ín táji do jáchí xíca do tá xoo yóho tá xoo cáa cajú tachí. <sup>7</sup>Jáchí tá ná cahvi ivi johu ini na já queá a cáhán na ña quiahva Ndióxi ñaha nu ná. <sup>8</sup>Mé na cáhvi ivi johu ini co xíca ndaa na ta tucu tucu ndijama na íchi nu xíca na.

<sup>9</sup>Ta na cúu cuéntá Jesús tá cúu ná na ndahví ndítahan cájii ini na jáchí na náhnu cúu ná nu Ndióxi. <sup>10</sup>Ta na cuicá, na cúu cuéntá Jesús ndítahan cajii ini na jáchí co yáhvi toho jiuhún na nu Ndióxi. Jáchí tá quiahva ín itá yucu yáchí íchi a ta ndicava ña quiahva já yáchí quivi na cuicá. <sup>11</sup>Jáchí tá naxinu coo candii ta nacahihni já queá cama ndivaha íchi mé yucu ta ndicava ita nu á. Já ndihi va ña ñúchí ndaa jáchí nandihí sahá. Quiahva já ndoho na cuicá jáchí jonáa va ndihi saha ná ta jándicoo na ña cajú na.

*Tá ndóho ndó tondóhó*

<sup>12</sup>Ndaja tahví nacuu na sahan ndeé ini tá ndóho ini na jáchí tá nandihí nasahan ndeé ini na já queá ñehe táhvi ná coo na xihín Ndióxi anda ama cáa quivi. Jáchí nasahan Ndióxi tuhun a nu yo ña tá cúni yo mé á já queá coo í xihín á anda ama cáa quivi. <sup>13</sup>Tá ná ndicají ini ndó cajú ndó ña núu já queá a cáhán ndo ña xíto ndojó Ndióxi ndohó. Jáchí a cúu cajú Ndióxi ña núu ta co cúni a ña ná cajú ñayivi ña núu. <sup>14</sup>Joo tá cajú ndó ña núu cúu á sahá

ñā xīcā ini ndó caja ndó ñā ta xihín ñā yóho ndicava ndó nuú cuachi. <sup>15</sup> Jáchī sahá ñā núu xīcā ini ñayivi caja na sahá ñā cán cásahá na cāja na cuachi. Ta tá sa nandicuahá cuachi na já queá cuhun na chahvi na sahá ñā cāja na ini indayá anda ama cáa quivi.

<sup>16</sup> Cúni ndivaha i ndohó, ñani mí i na cúu cuéntá Jesús. A jándahvi ndó mé ndó.

<sup>17</sup> Jáchī tóco ndihi ñā vaha quíxi a indiví nu ín Ndióxi ta mé á sahan ñā vaha nu yo. Já ín va Ndióxi jáchi cāja tá cāja ñā vaha cuití va. Ta co ndíjama toho Ndióxi. Ta mé Ndióxi, tátá yo nacavaha ñā ndíyéhe ín indiví. Ta ndá tañu ndíjama táhan ñā ín indiví joo Ndióxi co ndíjama toho a. <sup>18</sup> Jáchī cúni Ndióxi jácācu a mí sahá ñā cándúsa í tuhun mé á ñā cúu ñā ndaa. Jáchī cúni Ndióxi ñā ná cacuú na nu cuití tañu tóco ndihi ñaha nacavaha mé á.

*Ndaja caja í ndiquehe vaha í tuhun vaha cáhan sahá Jesús*

<sup>19</sup> A ndíndójó ndo ñā cáhan i xihín ndo jáchi cúni ndivaha i ndohó, na cúu cuéntá Jesús. Ndítahan nu ndó cuni johó vaha ndó tá cáhan inga na xihín ndo. Ta a cácoma ini ndó nducú ñehe ndó tuhun ñā cáhan inga na xihín ndo. Ta a cójo ini ndó xihín ná. <sup>20</sup> Jáchī tá xójo ini ndó xihín inga na já queá cāja ndó ñā co cúni Ndióxi. <sup>21</sup> Ñā cán queá cacu xóo ndó ndihi ñā núu ta jándicoo ndó ndihi cuachi cāja ndó jáchi ndúu cuahá na cāja

tá nuú cuachi tañu ndó. Joo xíní ñúhú jánuu ndáha ndó mé ndó nu Ndióxi ta ndiquehe vaha ndó tuhun mé á ñā nacahan na xihín ndo jáchi tá ná candúsa ndó ñā já queá jácācu Ndióxi ndohó.

<sup>22</sup> Xíní ñúhú candúsa ndó caja ndó tuhun Ndióxi jáchi co yáhvi toho a tá xíní johó uun va ndó ñā. Ta xihín ñā yóho jándahvi ndó mé ndó. <sup>23</sup> Ndá na co cándúsa caja ñā cáchi tuhun Ndióxi cúu ná tátuhun in da sándehe nuu nuú yutátá. <sup>24</sup> Tá nandihí nasándehe da nuu dá já quee da cuahan da ta cama chá ndíndójó da ndaja cáa nuu dá. <sup>25</sup> Joo mé ñayivi tá jácuaha na tuhun Ndióxi ta co ndíndójó na caja na ñā cáchi a já queá caja yíi Ndióxi tóco ndihi ñā cāja na jáchi ñā ndaa cúu tuhun Ndióxi. Tá cāja í ñā sáhdá tuhun Ndióxi nu yo caja í já queá co sáhdá ga cuachi chuun nu yo ta já ndinuhu ini caja í ñā cúni Ndióxi.

<sup>26</sup> Cúu á tátuhun tá ín in dataa tañu ndó ta cáhan da cāja da ñā cúni Ndióxi joo co ndáa da yúhu dá tá cáhan da sahá ñani táhan da já queá jándahvi da mé va da ta cóo saha toho ñā cāja da nu Ndióxi jáchi co cāja da ñā cáchi tuhun Ndióxi. <sup>27</sup> Jáchī tá mé a ndaa nandihvi in da íchi cuéntá Jesús já cúu dá ta ndaa nu Ndióxi, tátá yo. Ta chindeé da na cuaan ta chindeé da na sánchó tá ndóho ini na. Ta cándéé ini da Ndióxi ta táva da mé dá nuú cuachi jáchi co cāja da ñā núu tá quiahva cāja

ñayivi ñuyiví.

## 2

*A cája ichi ini ndó xihín na ndahví*

<sup>1</sup> Cuni johó vaha ndó, ñani mí i, na cúu cuéntá Jesús. Mé ndó cándéé ini ndó Jesucristo, xitoho í, mé a cúu ña cáhnu ndivaha. Ndítahan quihvi ini ndó na ndahví tá quiahva quihvi ini ndó na cuicá. <sup>2</sup> Ña ndítahan caja ndó cúu ña yóho: Tá ná taca ndó caja cáhnu ndó Ndióxi ta vaxi in da cuicá ndihvi da nu táca ndo ta ndíxi da jáhma vaha ndivaha ta ndacaan jéhe jjuhun cuáan nducu ndáha dá. Ta mé tañu já vaxi in da ndahví, da ndíxi jáhma núu ña yatá. <sup>3</sup> Ta ndíquehe vaha ndó mé da cuicá ta cáchí ndó xihín dá: “Silleta vaha coo ndó”, cáchí ndó xihín da cuicá. Joo xihín da ndahví cáchí ndó já: “Candichi ndó jan á coo ndó nu ñúhu yóho”, cáchí ndó xihín da ndahví. <sup>4</sup> Tá cája ndó ña yóho já quéa cája ichi ini ndó xihín da ndahví ta cája cáhnu ndó da cuicá sahá jjuhún da. Ta cáhvi núu ini ndó jáchi cáhán ndo ña in chága sahá da cuicá a juú ga da ndahví.

<sup>5</sup> Cúni ndivaha i ndohó, ñani i, na cúu cuéntá Jesús. Ña cán quéa cúni ña ná candaá vaha ini ndó ña naçaxi Ndióxi na ndahví ndúu ñuyiví yóho ná cacuu na na náhnu nu Ndióxi tá cándéé ini na mé á. Jáchi nasahan Ndióxi tuhun a nuú ndihi na cán ña ná cacúni na mé á já quéa ñehé táhvi ná

cuahun na indivi coo na xihín mé á anda ama cáa quivi. <sup>6</sup> Joo mé ndó cája ichi ini ndó xihín na ndahví. Á co ndícuahun ini ndó ña mé na cuicá cúu ná na cája xíxi xihín ndó ta ñúhu na ndohó cuahan na nuú na jutixia chácan na cuachi jata ndo. <sup>7</sup> Jáchi mé na cuicá cáhan núu na saha Jesucristo ta mé ndó cúu ndó cuéntá mé á.

<sup>8</sup> Sáhndá tuhun Ndióxi chuun nu yo já cáchí a já: “Tá quiahva quihvi ini ndó mé ndó quiahva já ndítahan quihvi ini ndó ñani táhan ndó”, cáchí tuhun Ndióxi. Tá ná caja ndó ña cáchí a yóho já quéa cája vaha ndó jáchi ña yóho cúu á ley cáhnu nu Ndióxi. <sup>9</sup> Joo cája ndó cuachi nu Ndióxi tá ndíquehe vaha chága ndó na cuicá a juú ga na ndahví. Ta xihín ña yóho chácan ley Moisés cuachi jata ndo. <sup>10</sup> Jáchi vatí nasacu vaha in ñayivi ndihi ley Moisés joo sahá in ñaha coo naçaja na sahá ña cán quéa ndójo na cuachi saha tóco ndihi ley. <sup>11</sup> Jáchi sa mé Ndióxi cáchí a já: “A quihvi nuu ndó xihín ñájihí ñani táhan ndó”, ta já cáchí tucu a já: “A cáhni ndó ndii”, cáchí a. Ña cán quéa cája ndó cuachi nu Ndióxi tá sáhni ndo ñayivi vatí co quihvi nuu ndó coo ndó xihín ñájihí ñani táhan ndó. <sup>12</sup> Ndítahan caja vaha cuití va ndó ta cahan ndaa cuití va ndó jáchi vaxi quivi caja vii Ndióxi saha yó xihín ley mé á ña jácaçu mí. <sup>13</sup> Tá co táhnda ini ndó sahá ñayivi já quéa a táhnda ini

Ndióxi saha ndó tá ná casaa quivi caja vii a sahá cuachi nacaja ndó. Joo tá natahnda ini ndó sahá ñayivi já quea quee vaha ndó tá ná caja vii Ndióxi sahá ña nacaja ndó ñuyivi yóho.

*Tá cándéé ini Ndióxi já cája í ña cuni mé á*

<sup>14</sup> Cuni johó vaha ndó, ñani mí i, na cúu cuéntá Jesús. Tá cáchí ndo cándéé ini ndó Jesucristo joo co cája ndó ña vaha já quea co yáhví toho nu Ndióxi ña cándéé ini ndó mé á. Ta sahá ña yóho a cúu toho jácaacu Ndióxi ndohó. <sup>15</sup> Cúu á tátuhun tá íin in na cúu cuéntá Jesús ta cámaní jáhma candixi na ta cámaní ña cuxu na quivi víti. <sup>16</sup> Ta cáchí ndo xihín na cán já: “Ná coo vahún ta ná candixi vahún ta ná cuxu vahún”, cáchí ndó xihín ná. Joo co sahan ndó jáhma candixi na ta ni ña cuxu na co sahan ndó nu ná ña cán quea coo chuun cúu ña cáhan ndo xihín ná. <sup>17</sup> Ña cán quea tá cáchí ndo cándéé ini ndó Jesucristo joo co cuni ndó caja ndó ña vaha, ña cuni Ndióxi caja ndó já quea mé a uun cándúsa ndó Jesucristo.

<sup>18</sup> Tá íin in da cúu cuéntá Jesús ta co cuni da caja da ña cuni Ndióxi já quea co jánaha da nuú ñayivi ña mé a ndaa cándéé ini da Jesucristo. Tá íin inga da ta cája tá cája da ña cuni Ndióxi já quea jánaha da nuú ñayivi ña mé a ndaa cándéé ini da Jesucristo. <sup>19</sup> Tá cándúsa ndó ña íin in tálaá cuití Ndióxi já quea vaha cája

ndó. Jári rí quini cándúsa rí ña íin in tálaá cuití Ndióxi. Joo co cándúsa rí caja rí ña cuni Ndióxi ta yíhví ndivaha rí mé á janda quiji ninu rí. <sup>20</sup> Á natatontó jini ndo. Candehé vaha ndó. Tá cáchí ndo cándéé ini ndó Ndióxi joo co náha ndó xihín ña cája ndó ña mé a ndaa cándéé ini ndó mé á já quea coo saha mé va ña cája ndó. <sup>21</sup> Á co ndicuhun ini ndó Abraham, tásáhnú jícó yo. Nandiquehe vaha Ndióxi Abraham sahá ña nacaja da ta cáchí Ndióxi ña cúu dá taa ndaa nu mé á jáchí nacandúsa mé Abraham cahni da Isaac, jahyi da, ña joco ñahá da nu mé á. <sup>22</sup> Candehé ndo. Tá nacandúsa Abraham joco da jahyi da nu Ndióxi já najánaaha da nuú ndihi ñayivi ña cándéé ini da Ndióxi. Ta sahá ña nacaja da já naxinu coo da cándéé cáhnu ini da Ndióxi. <sup>23</sup> Já tá ña nacaja Abraham naxinu coo tuhun Ndióxi tá cáchí a já: “Nacandéé ini Abraham Ndióxi ña cán quea nanduu da taa ndaa nu mé á”, cáchí tuhun Ndióxi. Nacachi na sahá Abraham ña cúu dá da nandique táhan máni xihín Ndióxi.

<sup>24</sup> Ña cán quea cándaa vaha ini ña nduu ndaa yo nu Ndióxi sahá ña cándéé ini Ndióxi anda quiahva cándúsa í caja í ña cuni mé á. <sup>25</sup> Já nayaha xihín Rahab, mé ña naxica jii sanahá ndivaha. Nanduu ndaa ña nu Ndióxi sahá ña nacaja ña xihín ñayivi Israel jáchí nandiquehe vaha ña

java d̄at̄aa n̄achindahá Josué ñuu Jericó. Ta n̄achindeé ñá da ña ná ndijama da ích̄i nuu cuh̄un da. <sup>26</sup> Ña cán quéa tá cách̄i yó cándúsa í Ndióxi joo c̄o c̄aja í ña cún̄i mé á já quéa cúu yó tátuhun ñayivi sa nax̄ih̄i, na sa cuah̄an ínima.

### 3

<sup>1</sup> Cuni joh̄o vaha ndó, ñani mí i, na cúu cuéntá Jesús. A ndúcú cuah̄a ndó cacuu ndó na jánaḥa tuhun Ndióxi nuu ñayivi jách̄i cándaḥa vaha ini ndó ña tá c̄o jánaḥa ndó ña ndaa já quéa jándoho chága Ndióxi ini ndó a juú ga java ga ñayivi. <sup>2</sup> Tóco ndihí c̄aja cuah̄a yó cuachi. Joo ndá na cuu cahnda chuun nu yúhu ná ña ná a cáhan quini a já quéa cuu cahnda na chuun nuu yiquí cuñu na viti ña ná a c̄aja na cuachi ta já x̄inu c̄o na cacuu na ñayivi ndaa nu Ndióxi. <sup>3</sup> Á c̄o ndícuhun ini ndó ndaja ch̄icaan na in freno yúhu cuáȳi ña ná candaca na r̄i. Vatí loho ndivaha cúu mé freno joo cuu cañehe na r̄i nu cún̄i mé ná cuh̄un na. <sup>4</sup> Candehé ndó in barco. Vatí cáhnu ndivaha cúu dó ta vax̄i tach̄i ndeé ndivaha joo mé da ñehe dó cuu candaca da d̄o x̄ih̄in in timon loho ta cuu cañehe da d̄o cuh̄un dó nu cún̄i mé dá. <sup>5</sup> Tá quiahva sáhdá na chuun nu cuáȳi x̄ih̄in barco quiahva já c̄aja í x̄ih̄in yúhu yó. Vatí loho ndivaha cúu mé yúhu yó joo x̄ih̄in mé yúhu yó cuu c̄aja cáhnu í mé ví. Candehé ndó ndaja náhnu

yúcu jáquihvi ñúhu in titó loho tá ndicava dó nu á ta ch̄icáȳi yúcu and̄a quiahva ndihi sahá. <sup>6</sup> Tátuhun in ñuhú cáȳi cúu yúhu yó. Cúu á in ña núu ndivaha ndacaan tañu yiquí cuñu í ta játiví ndihi a mí. Ta cúu á tátuhun ña sa mé indayá sáhan chága ví a ñúhu nu á ña ná c̄aja quini a ta jándihi a saḥa yó. <sup>7</sup> Vatí ñayivi cándeé na sáhn̄u na nu tóco ndihi quít̄i x̄ih̄in laa x̄ih̄in c̄o x̄ih̄in quít̄i ñúhu tañuhú ta cúu sáhdá na chuun nu r̄i. <sup>8</sup> Joo ni in ñayivi a cuú cahnu na yúhu na jách̄i c̄o s̄aj̄i yó yúhu yó tá cáhan quini sahá ñayivi. Cúu á tá quiahva c̄aja c̄o tá t̄in r̄i ñayivi ch̄icaan r̄i veneno r̄i na já sáhn̄i r̄i na. <sup>9</sup> X̄ih̄in mé yúhu yó cuah̄a tañu c̄aja cáhnu í Ndióxi ta sa x̄ih̄in mé yúhu yó yóho cánaḥa yó x̄ih̄in ñayivi, na nacavaha Ndióxi yuhú nuu mé á. <sup>10</sup> Ndá tañu cáhan vaha í x̄ih̄in yúhu yó ta java tañu quini cáhan yó x̄ih̄in mé yúhu yó. Candehé ndó, ñani mí i, na cúu cuéntá Jesús. C̄o ndítahan toho c̄aja í ña yóho. <sup>11</sup> Jách̄i cúu á tátuhun in ch̄icoḥo nu cána ticūi. A cuú cana ticūi v̄iji x̄ih̄in ticūi ova ini in ch̄icoḥo. <sup>12</sup> Ta sa x̄ini vaha ndó, ñani mí i ña in t̄itó ñuhú c̄o sáhan dó aceituna jách̄i cúu dó t̄itó ñuhú va. Já in yucu uva c̄o sáhan toho a t̄itó ñuhú jách̄i cúu á yucu mé uva va. Ña cán quéa sa x̄ini vaha ndó ña c̄o ñúhu ticūi v̄iji x̄ih̄in ticūi ova ini in ch̄icoḥo.

*Ndaja ín na ndíchí jiní*

## cuénta Ndióxi

13 Tá ín in ta ndichí, da tácu ini tañu ndó já quéa ndítahan caja vaha da ta xihín ña yóho jána da nuú ñayivi ña cúu dá ta ndichí. Tá co cá ja lá nda da sahá ña cá ja da já quéa jána da nuú ñayivi ña mé a nda cúu dá ta ndichí. 14 Tá ná ndicutú nda ini ndó xihín ña ihvi ini ndó já quéa a cá han ndo cúu ndó na ndichí. Ta tá ná ca ja ndó ñaha sahá ña cú ni ndó ndiñehe jí có ndo mé ndó já quéa a cá han ndo ña cúu ndó na ndichí. Já chi mé da ndichí co cá ja cá hnu da mé dá ta co cá han tú hún da já chi mé a nda cúu dá ta ndichí. 15 Joo tá cá ja cá hnu da mé dá já quéa cá nda ini ndó ña co ndichí jí ni dá nu Ndióxi já chi tú hun cá han da co o na quixi a in diví nu ín Ndióxi. Cá han da tú hun ñayivi ñuyíví yóho va ta jí ni mé va da vaxi a. Ta tú hun cá han da cúu á tú hun núu, ña quixi nuú tiñáhá sacua ha. 16 Já chi nu ndúu na ihvi ini mé cán ndúu na co cú ni táhan ta sa mé cán cá ni táhan na ta cá ja na tó có ndihi nuú cu achi. 17 Joo na ndichí jí ni cá han na tú hun quí xi in diví nu ín Ndióxi. N d i n u h u ña v a h a cá ja na ta co xó jo ini na xihín ñayivi. Cá ja cá hnu ini na sahá ñayivi. Co xí xi ini na xihín ñayivi já chi tá hnda ini na saha ná. Cá ja na ña v a h a cu ití va. Cá han na ña nda cu ití va ta co já nda hvi na ñayivi. 18 Va tí cú ni ñayivi cá ni táhan na xihín na ndichí joo ndúcu na coo v a h a ini na xihín ndihi ñayivi ta já cúu ná ñayivi nda nu

## Ndióxi.

## 4

*A cándico toho ndó ichi cuénta na ñuyíví*

1 Ndávaha ri cá ni táhan ndó ta já quí hvi ndó ton dó hó ta ñu ñayivi. Cá ni táhan ndó sahá ña ndícají ini ndó ca ja ndó cu ahá nuú cu achi ña xí ca ín ima ndo. Ta cúu á tát uhun cá ni táhan ña v a h a xihín ña núu ini ín ima ndo <sup>2</sup> já chi xí ca ini ndó coo cu ahá ñaha nu ndo jo o cu ú ñehe ndó a. Ña cán quéa sá hni ndó ñayivi já ñehe ndó ña cú ni ndo. Cá hi hvi ini ndó tá xí ni ndo ñaha inga na ta a cu ú ñehe ndó a, ña cán quéa cá ni táhan ndó xihín ná. Joo co ñehe ndó ña cú ni ndo já chi co xí ca ta hvi ndo nu Ndióxi sahá ñaha cá ma ni nu ndo. <sup>3</sup> Tá xí ca ndo ñaha nu Ndióxi ta co sá han mé á ñaha nu ndo já quéa cá nda v a h a ini ndó ña co ín v a h a ín ima ndó nu Ndióxi já chi na sacu ini ndó ca ja ndó ña cú ni mé cu ití ndo. <sup>4</sup> Tá quí ahva cá ja ñáñáhá tá já nda hvi ñá yí ñá xihín inga da ta quí ahva já cá ja ndó cu achi ña co tá han ini Ndióxi xihín. Á co cá nda ini ndó ña tá ná ca ja í tá quí ahva cá ja ñayivi ñuyíví yóho já quéa ndu ú na co cú ni táhan xihín Ndióxi. Ta a cu ú ndique táhan má ni yó xihín mé á tá ná ca ja í ña núu ñuyíví yóho. <sup>5</sup> Já chi sa xí ni v a h a ndó ña ín saha cá han tú hun Ndióxi tá cá chí a já: “N a chí ca an Ndióxi ín ima yí mé á ini in í já chi cú ni ndi v a h a mé a mí ta chí tá hvi ndi v a h a ini a



sahá yo.”<sup>6</sup> Joo cája Ndióxi cuahá ga ñamaní xihín yo ta chindeé a mí. Já cáchí tuhun Ndióxi já: “Co táhan ini Ndióxi xihín ñayivi, na ndíñehe jícó mé. Joo chindeé Ndióxi ñayivi vaha, mé na co ndíñehe jícó mé”, cáchí tuhun Ndióxi.<sup>7</sup> Ndiqúahva ndó mé ndó ndáha Ndióxi ta chijaji ndó ínima ndo nuú tiñáhá sacuahá ná a cája ndó ña cúní rí. Andá javí cunu rí cuhun rí.<sup>8</sup> Cayati ndó nu Ndióxi ta já cayati Ndióxi nu ndo. Jándicoo ndó cuachi cája ndó ta ndaja víí ndó ínima ndo ña ná candico ndó in túhún íchi cuéntá Jesús cuití va.<sup>9</sup> Cajuchú ini ndó ta ndahyi cóhó ndo sahá cuachi cája ndó. Ndi jama ndó ña cájii ini ndó ta ná nduu a ña cacuéha ini ndó sahá cuachi ndó.<sup>10</sup> A ndíñehe jícó ndo mé ndó nu Ndióxi já quéa ndíñehe jícó Ndióxi ndohó.

*A cáhan núu ndó sahá inga na*

<sup>11</sup> Candehé ndo, ñani mí i, na cúu cuéntá Jesús. A cáhan núu sahá táhan ndó ta a candehé ndaa táhan ndó. Jáchí ndá da cáhan núu sahá inga na já cáhan núu da sahá ley Ndióxi ta sájí nuu da nu ley. Co ndítahan nu yo caji nuu í nu ley Ndióxi jáchí tá cája í já já quéa quéhe núu í ley Ndióxi ta sándehe ndaa í ña. Ña ndítahan nu yo caja í quéa candúsa í ña ta caja í ña.<sup>12</sup> Jáchí in túhún Ndióxi nasahan ley nu yo. Ta mé Ndióxi cúu á juéxe cáhnu nuú

ndihi ñayivi ta mé á cuu caja víí a sahá cuachí. Ndióxi cuití va cuu jácacu mí ta sa mé Ndióxi cuu chindahá mí in-dayá. Ña cán quéa co ndítahan nu yo candehé ndaa táhan í.

*Tá cáhan í sahá ña caja í itaan*

<sup>13</sup> Ndúu java na tañu ndó ta cáchí na: “Viti á itaan cuhun tá cuhun nde in ñuu cáhnu ta cán canduu nde in cuia caja chúun nde ta ñehe cuahá nde jiuhún”, já cáchí java na. Tá cáhán ndo já ndítahan cuni johó vaha ndó ña cáhan i xihín ndo.<sup>14</sup> Co xini toho ndó ndía ndoho ndó itaan. Co xini toho ndó ndá quivi quivi ndó. Cúu ndó tátuhun in vico ña in too loho ta tá nandihí sa coó a.<sup>15</sup> Vaha chága ná cachi ndó já: “Catacu nde quivi itaan tá cúní Ndióxi. Ta caja nde ña jan á ña yóho tá cúní Ndióxi”, já cachi ndó.<sup>16</sup> Joo cája cáhnu ndó mé ndó tá cáchí ndó ña cándaá ini ndó ndía ndoho ndó quivi itaan. Ta núu ndivaha cája ndó tá cája cáhnu ndó mé ndó.<sup>17</sup> Cuachi ndácaan nuú na tiaha caja ña vaha ta co caja na ña.

## 5

*Cáhan Santiago nuú na cuicá*

<sup>1</sup> Cuni johó vaha ndó na cuicá. Ndítahan nu ndó ndahyi cóhó ndo ta tahnda ini ndó jáchí vaxi quivi ndoho ini ndó.<sup>2</sup> Nacasáhá táhyi tóco ndihi ñaha najátaca ndó ta nasaxi ndihi tiquijí jáhma ndo.<sup>3</sup> Nacuju ndihi jiuhun cuáán xihín jiuhun cúxú ña

najátaca ndó catacu vaha ndó quiví chága chí nuu. Joo co yáhvi ga viti jáchi vaxi quiví tá nahá ña nacajíhnda ndivaha ndó xihín jiuhún ndó. Tá quiahva jándihi ñuhú cáyi sahá tutu quiahva já ndihi saha ndó tá chínúu ndó ínimá ndó jatá jiuhún ndó. <sup>4</sup> Candehé ndó. Mé ndó coo nachahvi ndó mozo ndo tá najácaja chúun ndó na nuú utu ndó. Ta viti sácu cóhó na ndáca na cuéntá nu ndo. Ta tá xíca tahví na nu ndo já queá anda nu Ndióxi, mé á cáhnu ndivaha, xínu coo ña cáhan na xihín ndo. <sup>5</sup> Mé ñuyiví yóho ndúu vaha ndó xihín ña cuicá ndo ta cája ndó ña xíca ini cuití va ndó. Xíxáhan vaha ndó ta viti nandaha ndó tátuhun tindiquí, rí najándaha chuun na cahní na. <sup>6</sup> Ta chícaan ndó cuachi jatá ñayivi ndaa ta ndá tañu sáhní ndó ñayivi vaha, mé na a cuú chindeé mé.

*A cándati númi ndó quiví quixi tucu Jesucristo*

<sup>7</sup> Candehé ndo, ñani mí i, na cúu cuéntá Jesús. A ndíhi ini ndó ta cuéé coo ini ndó candati ndó quiví quixi tucu Jesucristo, mé a cuú xitoho í. Tá quiahva ndáti in dataa jáquee da nuú utu da quiahva já ndítahan candatí Jesucristo ña quixi tucu a. Jáchi sa xíni ndo ndaja cája in dataa tá ndáti da cuun vaha javí nuú tata ña nachihin da. Joo co ndáti númi dá ña ná jáquee da nu á. <sup>8</sup> Quiahva já ndítahan cuéé coo ini ndó candati ndó quiví quixi tucu Jesucristo.

Cacu ndacú ndó ínimá ndo jáchi jalóho cúni ndindaa quiví quixi tucu Jesucristo. <sup>9</sup> Candehé ndo, ñani mí i. A cáhan cuachi nu táhan ndó ná a jándoho Ndióxi ini ndó. Ta viti jalóho cúni quixi Ndióxi, ña cúu juéxe cáhnu caja víi a sahá cuachi ñayivi. <sup>10</sup> A co ndícuhun ini ndó, ñani mí i. Sanahá ndivaha mé na profeta Ndióxi nacahan na tuhun Ndióxi nuú ñayivi. Tá quiahva nasahan ndeé ini na tá nandoho ini na quiahva já ndítahan nu mí quiahva ndeé ini tá ná casaá quiví ndoho ini. <sup>11</sup> Ta ñehe táhvi mé profeta ña cáji ini na viti jáchi nasahan ndeé ini na tá nandoho ini na. A coo naxini joho ndó saha in da naní Job. Vatí nandoho ndivaha ini da joo nasahan ndeé ini da tá nandoho ini da já queá nacaja cuahá Ndióxi ñamaní xihín dá. Xihín ña yóho cándaá ini ña táhnda ini Ndióxi sahá ñayivi jáchi quíhvi ini a na.

<sup>12</sup> Cuni joho vaha ndo, ñani mí i jáchi cáhnu chága tuhun yóho nuú ndihi tuhun. Co ndítahan tává ndo quiví indiví ni quiví ñuyiví ni quiví inga ñaha. Jáchi ndítahan cahan ndó ña ndaa cuití va. Ta tá ndúcú ñehe ndó tuhun já cáhí ndó já: “ajan”, á tá coo já cáhí ndó: “uhun.” Já cuití va cachi ndó ná a jándoho Ndióxi ini ndó.

<sup>13</sup> Tá íin in na ndóho ini tañu ndó, ndítahan nu ná caca tahví na nu Ndióxi sahá ña ndóho ini na. Tá íin in na

cájji ini tañu ndó, ndítahan nu ná cata na nu Ndióxi já ná caja cáhnu na mé á. <sup>14</sup> Tá íin in na quíhvi tañu ndó já quéa ndítahan nu ná caça na ñamaní nuú na sacuaħa veñuhu ña ná quixi na caça taħví na nu Ndióxi saħa ná. Ta ná cuyu na sítí jini na quíhvi ña ná ndivaħa na. <sup>15</sup> Ndítahan nu ndó candeé ini ndó Ndióxi tá ná caça taħví ndo nu á saħa na quíhvi já quéa ndivaħa na quíhvi caja Ndióxi. Ta tá naçaja na cuachi já quéa caja cáhnu ini Ndióxi saħa cuachi na. <sup>16</sup> Ña cán quéa ndítahan nu ndó nahma nu táhan ndó cuachi ndó. Ta ndítahan nu ndo caça taħví ndo nu Ndióxi saħa ndaja táhan ndo já quéa ndaja vaħa Ndióxi ndohó tá quíhvi ndo. Jáchi chíndeé Ndióxi ñayivi vaħa tá xihín ndinuhu ínima ná xica taħví na nu mé á. <sup>17</sup> Á co ndícuħun ini ndó da naní Elías, da naçacuu profeta sanahá. Naçacuu da ñayivi tátuhun mí. Ta xihín ndinuhu ini da naxica taħví da nu Ndióxi ña ná a cúun javi. Ña cán quéa tañu uní cuiã java coó naçuun toho javi. <sup>18</sup> Ta tá nandihi cán naxica taħví tucu da nu Ndióxi ña ná casáhá cuun tucu javi. Ña cán quéa naçasáhá cúun tucu javi chí nanana ndihi yucu cuií ñundáhyi cán.

tucu na íchi cuéntá Jesús <sup>20</sup> já quéa najáçacu ndó mé na cán ña ná a cúhun toho na indayá. Ta já caja cáhnu ini Ndióxi saħa cuahá cuachi naçaja na.

<sup>19</sup> Candehé vaħa ndó, ñani mí i, na cúú cuéntá Jesús. Tá íin in na tañu ndó ta najándicoo na íchi cuéntá ña ndaa ta tá in ndó najándicó coo ndó na cán ña ná caca

## Cártá n̄acahyí Pedro nu cuítí

*Cáhan Ndióxi Pedro xihín na cúu cuéntá Jesús*

<sup>1</sup> Yehe cúu Pedro ta cúu u in apóstol cuéntá Jesucristo. Ta ch́indahá i Ndióxi coo ndó, na n̄acaxi mé á jáchi cúu ndó na tóho ñuu jan sahá ña n̄ataxi ñayivi ndohó ñuu ndó. Ta viti n̄andicuita nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia. <sup>2</sup> Cúu ndó na n̄acaxi Ndióxi, tátá yo jáchi janda saha nasacu ini mé á caja já xihín ndo. Ta xihín ínimā yii mé á n̄andaja ndohó ña ná nduu ndó cuéntá mé á já ná caja ndó ña sáhdá a nu ndó caja ndó. Ta n̄acaxi a ndohó já ná ndivií ndo xihín nii Jesucristo. Ná caja cuahá ndivaha Ndióxi ñamaní xihín ndo ta ná caja mé á ña ná coo vaha ndivaha ini ndó.

*Jácaacu Ndióxi ñayivi*

<sup>3</sup> Ná caja cáhnu yó Ndióxi, mé á cúu tátá Jesucristo, xitoho í jáchi táhdá ndivaha ini mé á saha yo ta n̄acaja ña tácu yó cuéntá mé á viti. Já n̄acaja jáchi n̄anditacu tucu Jesucristo ta mé a ndaa cándaā vaha ini ña jáxinu coo Ndióxi tūhun a nasahan nu yo. <sup>4</sup> Ta nasacu ini a quiahva cuahá ndivaha ña vaha in indivi cán nu ndo. Mé ña vaha in cán a cuú ndihi sahá ta ni co íchi a ta a cáyatá toho

ña. Ta nasacu vaha Ndióxi mé ña vaha in indivi cán anda tandaa quivi saā ndó cán. <sup>5</sup> Cándéé ini ndó Ndióxi sahá ña cán queā xihín ndéé mé á chindeé a ndohó nuú ña ihvi vaxi nu ndo anda xinu coo quivi nu ndihí. Janda jávi cuni ndó ndá quiahva jácaacu a ndohó.

<sup>6</sup> Ña cán queā ndítahan nu ndó cajii ndivaha ini ndó viti vatí vaxi quivi ndoho ini ndó sahá tondóhó quixi nu ndo. <sup>7</sup> Tá ná cándéé cáhnu ini ndó Ndióxi cúu á tátūhun jiuhun cuáán. Ta tá quiahva cája in dataa tá jáyaha da jiuhun cuáán nu ñuhú cáyi ña xito ndojó da ña quiahva já cája ri Ndióxi coto ndojó a ndohó ña ná naha ña mé a ndaa cándéé cáhnu ini ndó mé á. Ta ndiyahvi chága ña cándéé ini ndó mé á a juú ga jiuhun cuáán, ña ndihi saha. Ña cán queā tá ná quixi tucu Jesucristo já cahan vaha mé á sahá ña n̄acaja ndó ta já ndaja cáhnu a ndohó jáchi n̄acandéé ini ndó mé á.

<sup>8</sup> Quíhvi ini ndó Jesucristo ta cándéé ini ndó a vatí a ñáha cuni ndó a. Ña cán queā n̄acāan ndó cájii ini ndó ta ña yóho cúu á ña cáhnu ndivaha nu mé á. Ta ni co ñéhe ndó tūhun ndá quiahva ndicani ndó ña yóho nuú ñayivi. <sup>9</sup> Cájii ini ndó jáchi cándaā ini ndó ña jácaacu Ndióxi ndohó sahá ña cándéé ini ndó mé á.

<sup>10</sup> Anda sanahá ndivaha najáyaha na profeta tūhun n̄acahan Ndióxi xihín ná nuú ñayivi. Ta cáchi na ña

vaxi quivi caja cuahá Ndióxi ñamaní xihín ñayivi ña jácacu a na nuú cuachi na. Ta vatí najácuaaha na tuhun mé á joo coó ñacandaá ini na ndaja caja Ndióxi jácacu a ñayivi. <sup>11</sup> Ta ñúhu ínimá yíi Jesucristo ini ínimá ña profeta ta ñacaja mé á ña ná cahyí ña nuú tutu ña ñacahan mé á xihín ná. Ta ñacahyí ña ña vaxi quivi ndoho ndivaha ini Jesucristo joo tá nandihí já ndicáhnú ndivaha mé á. Ta nanducú ña cán candaá ini na yo cacuu Jesucristo ta ndá tiempo cacu a. <sup>12</sup> Ñacaja Ndióxi ña ná candaá ini ña profeta ña a yáha yachi toho ña ñacahyí ña nuú tutu jáchi cacuu a ña coo tiempo vaxi chí nuú. Jáchi saha mé ndó ñacahyí ña ña nuú tutu ta java ñayivi sa ñacaxi tuhun na mé tuhun vaha saha Jesucristo nu ndo. Ta ñachindahá Ndióxi mé ínimá yíi mé á ña ná quixi a indivi ta ñachindeé a ña ña ná cahan ña tuhun vaha saha Jesucristo nu ndó. Ta janda mé tátó Ndióxi cúni ña candaá ini na ña yóho.

*Ndítahan nu yo caja í tá quiahva cája Ndióxi*

<sup>13</sup> Ña cán quéa caja tiahva ndó xíní túní ndo ña ná caja ndó ña cúni Ndióxi. Cahnu ndó xíní túní ndo ta coo tiahva ndó candati ndó ná jáxinu coo Ndióxi tuhun a ña caja cuaha mé á ñamaní xihín ndo tá ná xinu quivi quixi tucu Jesucristo. <sup>14</sup> A cácuu ndó ñayivi sáá ini jáchi cúu ndó jahyi Ndióxi. Co ndítahan

ga cája ndó ña núu ña ñaxica ini ndó caja ndó tá cámani candaá ini ndó tuhun Ndióxi. <sup>15</sup> Ña ndítahan caja ndó quéa caja ndó ña cúni Ndióxi xihín ndinuhu ini ndó já ná cacuu ndó ñayivi yíi. Jáchi Ndióxi, mé á ñacaxi ndohó cúu á ña yíi. <sup>16</sup> Jáchi já cáchí tuhun Ndióxi: “Ndítahan cacuu ndó ñayivi yíi jáchi yehe cúu u Ndióxi yíi.”

<sup>17</sup> Ta tá ná cachi ndó “tátá Ndióxi” já ndítahan caja cáhnú ndó a nani ndúu ndó ñuyíví yóho. Jáchi mé á cája víi a sahá ña cája in in ñayivi ta co sáhní toho a mé á ndá ñayivi cúu ná. In nuú cája mé á xihín ndihí na. <sup>18</sup> Jáchi mé Ndióxi najácacu a ndohó nuú ndihí ña núu ñacaja ndó sanahá. Ta ña yóho cúu ña ñacatiahva ndó ñacaja tásáhnú jícó ndo. Ta sa candaá vaha ini ndó ña coó ñachahvi Jesucristo sahá cuachi ndó ña xihín jiuhun cuáán á xihín jiuhun cúxú, ña ndihí saha. <sup>19</sup> Ña ñacaja mé á quéa ñachahvi a sahá cuachi ndó xihín níi mé á, dó yahvi ndivaha. Ñaxita do cán tá ñaxihí a ndica crúxu vatí coó ñacaja mé á cuachi. Najoco a mé á nu Ndióxi sahá cuachí tá quiahva ñasacaja ñayivi tá najoco ña in ndicachi víi nu Ndióxi sanahá sahá cuachi na. <sup>20</sup> Tá cámani cava sáha saha ñuyíví já ñasacu ini Ndióxi quivi Jesucristo sahá cuachi ñayivi. Tá ñaxinu tiempo já ñaquixi a ñuyíví ña ná chindeé a ndohó. <sup>21</sup> Xihín ña ñacaja Jesucristo cándéé ini ndó Ndióxi viti, mé á

najánditacu a Jesús ta ñacaja cáhnu ndivaha Ndióxi Jesús. Sahá ña ñacaja Ndióxi cándéé ini ndó mé á ta ndáti ndó xinu quivi quiahva mé á ña vaha, ña íin indivi nu ndó.

<sup>22</sup> Ta viti ñacasáhá ndo cája ndó ña ndaa já ñandaja víi ndó ínima ndo ña ná quihvi ini ndó ña cúu cuéntá Jesús. Sahá ña cán quéa xíní ñúhú quihvi ini ndó ña xihín ndinuhu ini ndó. <sup>23</sup> Cúu á tátuhun ñacacu tucu ndó joo a juú ñayivi ñacaja ña ñacacu tucu ndó. Jáchi cúu á sahá ña cándéé ini ndó tuhun Ndióxi, ña co ndíhi saha anda ama cáa quivi. Sahá ña cán quéa cúu á tátuhun ñacacu tucu ndó ñacaja tuhun Ndióxi. <sup>24</sup> Jáchi já cáchi tuhun Ndióxi:

Tócó ndihi ñayivi cúu ná tátuhun yucu cuí ña cáa yucu ña ndíhi yachi saha.

Ta tóco ndihi ña náhnu cája na cúu á tátuhun in ita cánúu nuú yucu cán.

Jáchi mé yucu cán ichi a ta ndicava ita nu á ta quiahva já ndíhi ri sahá ña cája ña cán.

<sup>25</sup> Joo tuhun Ndióxi, xitoho í a ndíhi sahá anda ama cáa quivi.

Ta mé tuhun yóho cúu á ña sa ñacaxi tuhun i xihín ndo. Ta cúu á tuhun vaha cáhan sahá Jesucristo.

## 2

<sup>1</sup> Xíní ñúhú jándacoo ndó tóco ndihi ña núu cája ndó ta a jándahvi ga ndó ñayivi. Ndítahan cacuu ndó tá

quiahva ndáa ndó ta a cáhivi ga ini ndó ta a cácuu ga ndó ñayivi ndahnda yuhu. <sup>2</sup> Tá quiahva cája ña valí ndúcú ña chíchí ña quiahva já ndítahan ndinducú ndó candaa ini ndó tuhun Ndióxi já ná cuu cuahnu ndó xihín á ña ná jácacu Ndióxi ndohó. <sup>3</sup> Tá ná caja ndó já jánaha ndó ña mé a ndaa táhyí ñacandaa ini ndó ña vaha ndivaha ini Ndióxi, xitoho í.

*Jesús cúu á tátuhun in yuu cáhnu ndácaqan titó vehe*

<sup>4</sup> Cayati ndó nuú Jesucristo, xitoho í jáchi tácu va mé á ta cúu á tátuhun yuu ndúhu ña ñacandají ña cávaha vehe. Joo nu Ndióxi cúu Jesucristo tátuhun in yuu vaha ndivaha ña ñacaxi a. <sup>5</sup> Ta caja Ndióxi xihín ndóhó ña ná cacuu ndó tátuhun yuu tácu ta cavaha Ndióxi veñuhu mé á xihín ndihi ndó. Ta sa cúu ndó jutú yii nu á. Ta sahá ña ñacaja Jesucristo xihín ndó cuu joco ndó mé ndó caja ndó ña cúní mé cuití va jáchi ña ñan quéa cájii ini Ndióxi xihín. <sup>6</sup> Sahá ña cán quéa cáchi tuhun Ndióxi tá cáhan sahá Jesús já cáchi a já:

Yehe ñasacu u in a ñuu Sión ta cúu á tátuhun in yuu ndúhu ta mé yuu yóho cúu á ña ñacaxi mí i ta cúu á ña yahvi ndivaha.

Ta ndá ña ná cándéé ini mé á a cándoó núu toho na caja i, cáchi tuhun Ndióxi.

<sup>7</sup> Mé yuu cáhan Ndióxi saha yóho cúu á Jesucristo ta

ndíyahvi ndivaha nu mé ndó jáchi cándeé ini ndó a. Joo na co cándeé ini Jesús na cán cúu na jáxinu nuú tuhun Ndióxi tá nacachi a já:

Mé yuu ndúhu, ña nacandají da cávaha vehe, nanduu a yuu ña íin chága saha.

8 Ta íin inga tucu nu cáchí a sahá Jesús:

Cúu á tátuhun in yuu cáhnu nuú cachihin saha ná ta jándicava a na, cáchí tuhun Ndióxi.

Ta mé na cán cáchihin saha ná jáchi co cúni na cuni johu na tuhun vaha cáhan saha Jesucristo. Ta janda saha nasacu ini Ndióxi ndoho na.

*Ñayivi, na cúu cuénta mé á*

9 Joo mé ndó cúu ndó na nacaxi Ndióxi ña ná nduu ndó na vehe mé á. Ta nanduu ndó jutú cuénta mé á ta mé á cúu á rey. Ta cúu ndó in táhnda cáhnu ñayivi yí ndácaan ndó in ñuu ña nandiquehe Ndióxi cacomí a cuénta saha. Ta nacaxi Ndióxi ndóhó ña ná cahan ndó xihin ñayivi ndaja ndáa ña náhnu cája Ndióxi. Mé a nacana ndohó tá nasanduu ndó nuú naá cán já ná quixi ndó nuú ndató ndivaha yéhe nu íin a. <sup>10</sup> Coó nasacuu toho ndó ñayivi cuénta Ndióxi jihna joo viti cúu ndó cuénta mé á. Coó natahvi ini Ndióxi saha ndó jihna joo viti táhvi ini a saha ndo.

*Xíni ñúhú caja í ña cúni Ndióxi*

<sup>11</sup> Candehé ndo, ñani í. Xíca tahví í nu ndó, na cúu

tátuhun na ndúu ñuu tóho jáchi indiví cúu ñuu ndó. Sahá ña quíhvi ini í ndohó sahá ña cán quéa xíca í ñamaní nu ndo ña ná a cája ndó ña xíca ini yiquí cuñu ndó caja. Jáchi cúu á tátuhun cani táhan yiquí cuñu ndó xihin ínima ndo. <sup>12</sup> Mé ndó ndúu ndó tañu ñayivi ñuyíví, na co xíca íchi cuénta Ndióxi. Xíni ñúhú caja vaha ndó já ná cuni na jan ndá quíahva cája ndó. Vatí viti cáhan núu na saha ndo ta cáchí na ña cúu ndó na quini joo tá ná cuni na ña vaha cája ndó já quéa caja cáhnu na Ndióxi tá ná xinu quivi caja vií mé á saha tóco ndihi ñayivi.

<sup>13</sup> Sahá ña cája cáhnu ndó Jesucristo, xitoho í xíni ñúhú coo johu ndó nu sáhnda na jutixia ndúu ñuyíví yóho nu ndo. Coo johu ndó nu cáhan presidente, da ndójo chuun cáhnu chága. <sup>14</sup> Ta coo johu ndó nu sáhnda da cúu gobernador jáchi mé presidente cúu da sáhnda chuun nuú gobernador ña ná caja vií da sahá na co cája vaha. Ta ndítahan nu dá cahan vaha da sahá na cája vaha. <sup>15</sup> Cúni Ndióxi ña ná caja vaha ndó. Já quéa na tóntó jini, na co xíca íchi cuénta Ndióxi cuni na ña vaha cája ndó já ná a ñéhe íni na cahan núu na saha ndo.

<sup>16</sup> Vatí najani ndó ndáha ley Moisés ña nasacomí cuénta saha ndó jihna joo co cúni cachi a ña núná nu ndó caja ndó ndá cuachi cúni ndo. Jáchi xíni ñúhú ndicuhun ini ndó ña cúu ndó na cája chúun

cuéntá Ndióxi viti. <sup>17</sup> Xíni ñúhú coo toni ñúhú ndo xihín tóco ndihi ñayivi. Ta ndítahan quihvi ini ndó na cúu cuéntá Jesús. Ta ndítahan nu ndó caja cáhnu ndó Ndióxi. Ta ndítahan coo toni ñúhú ndó xihín da cómi chuun ñuyívi yóho.

*Coó nacahan núu Jesús xihín na nacaja xíxi xihín á ta quiahvaja ndítahan cajari mé ví*

<sup>18</sup> Ndóhó, na cómi xitoho cuéntá saha xíni ñúhú caja ndó xihín ndinuhu ini ndó ña sáhdá xitoho ndó nu ndo. Ta a ndíñehe yúhu ndó nu ná. Coó a caja toho a á cúu ná ñayivi xíxi ini xihín ndo á cúu ná na quihvi ini ndohó, na co jándoho nahá ini ndó. <sup>19</sup> Sa xíni ndó ña cuni Ndióxi caja ndó. Saha ña can quéa caja ndeé ini ndó tá cajú xíxi na xihín ndó sahá in ñaha coó nacaja ndó. Jáchí sahá ña yóho cajii ini Ndióxi xihín ndó. <sup>20</sup> Vatí cajú ndeé ini ndó tá ndóho ini ndó sahá cuachi nacaja ndó, co ñehe táhvi toho ndó ñamaní nu Ndióxi. Joo tá cajú ndeé ini ndó tá ndóho ini ndó sahá ña vaha cajú ndó já quéa cajii ini Ndióxi xihín ndo. <sup>21</sup> Jáchí sahá ña yóho nacana mé á ndohó. Ta najánañaha Jesucristo ña yóho nu ndo tá nandoho ini mé á saha ndo vatí coó nacaja mé á cuachi. Ta ña yóho cúu in quiahva nasacu a caja ndó. <sup>22</sup> Ni in túhún toho tañu coó nacaja mé á cuachi ta ni in túhún tañu coó najándahvi a ñayivi. <sup>23</sup> Tá nacasahá na cáñahá

quini na xihín á coó nanducú ñehe mé á túhun quini nu na. Ta tá najándoho na ini a coó nasacu ini a caja núu a xihín na cán. Ña nacaja mé á quéa nasacu ndihi a ña ndáha Ndióxi, mé a cajú vii ndaa saha tóco ndihi ñaha. <sup>24</sup> Mé Jesucristo nandicojo a cuachi jatá yiquí cuñu a cuahan tá naxihí a ndica crúxu. Ta cúu á tátuhun naxihí yó nuú cuachi ña ná cuu catacú cuéntá mé á tá ná caja í ña vaha cuití va. Najándicuehe na Jesucristo ña ná cuu ndivaha mé ndó. <sup>25</sup> Jáchí mé ndó naxica nuu ndó ñuyívi yóho tá quiahva xica nuu in ndicachi, rí nandiñúhú nuú xitoho. Joo viti nandico coo ndó nu Jesucristo ta mé a cán ndáa a ndohó tá quiahva ndáa in dataa ndicachi jana dá. Ta co jándacoo ndáha mé á ndohó.

### 3

*Ña ndítahan caja na sa natandaha*

<sup>1</sup> Candehé ndó, najihí, na ndúu yí. Xíni ñúhú caja ndó ña sáhdá yí ndó nu ndo. Já quéa tá co cándusa da túhun Ndióxi cuu xinu ini da candúsa da ña sahá ña cajú ndó ta a juú ga sahá ña cáhan ndó xihín dá. <sup>2</sup> Jáchí tá ná cuni yí ndó ña cajú vaha ndó ta cáhan toni ñúhú ndó xihín dá já quéa cuu jáxinu ndó ini da xihín ña cajú ndó. <sup>3</sup> A ndíhi nahá ini ndó caja cutú ndó mé ndó xihín ñaha ña cuu canaha lándá ndó xihín, tátuhun ña chuun lándá ndó yútu jini



ndo á tátuhun ña cañuhulánda jíqui jíco ndo. Ta a ndíhi ini ndó cañuhu lánda jéhe ndáha ndo. Ta a ndíhi ini ndó candixi ndó jáhma lánda. A ndíhi ini ndó saha tóco ndíhi ña yóho. <sup>4</sup> Ña ndítahan ndíhi ini ndó sahá cúu ña ndíyahvi nu Ndióxi. Ta ña yóho cúu in ínima ña nandicutú xihín ña vaha já ná coo vii ini ndó. Tóco ndíhi ña yóho cúu ña co ndíhi saha. <sup>5</sup> Jáchi quiahva já ñúchí ndivaha nasacaja najihí yíi, na nasacuu cuéntá Ndióxi sanahá. Nacandee ini na Ndióxi ta nacaja na chuun nasahnda yíi ná nu ná. <sup>6</sup> Quiahva já ñúchí ndivaha nacaja ña nasananí Sara tá nacandúsa ñá yíi ñá, da nasananí Abraham. Ta mé ñá cán nacachi ñá sahá Abraham ña cúu dá xitoho ñá. Ta viti mé ndó cúu ndó tátuhun jahyi mé Sara cán tá cája ndó ña vaha ta tá co yíhvi ndo ni in ñaha.

<sup>7</sup> Ta jári ndóhó va dataa, da ín ñájihí, a cája ndivaha ndó xihín ñájihí ndo. Co toni ñúhú ndó xihín ña jáchi cúu ñá ña chíjín chága nu mé ndó. Ta ñamaní, ña nasacu ini Ndióxi quiahva nu ndóhó, dataa, nasacu ini mé á quiahva ri a nuú ña cán va. Sahá ña cán quéa ndítahan caja vaha ndó xihín ñájihí ndo já ná cuni johó Ndióxi ña xíca tahví ndó nu á.

*Ndóho ini java na sahá ña vaha cája na*

<sup>8</sup> Candehé ndo. In ndítahan cacuu ndíhi ndó. Co ndítahan cahnda táhan ndó. Ndítahan

quihvi ini táhan ndó tátuhun in cúu tátá ndíhi ndó. Ta ndítahan candahví ini ndó ñayivi. Ta coto a ndíñehe jíco ndo mé ndó. <sup>9</sup> Tá ná caja núu ñayivi xihín ndo a ndícó coo ndó caja ndó já xihín ná. Ta ni tá ná canahá na xihín ndo a ndícó coo ndó canahá ndó xihín ná. Vaha chága ná caca tahví ndó nu Ndióxi ña ná caja vaha mé á xihín na cán. Ta nacana Ndióxi ndohó ñá ná caja mé á ñamaní xihín ndo. <sup>10</sup> Jáchi já cáchí tuhun Ndióxi já:

Ndá na cúni canduu nahá ñuyíví yóho ta co cúni na quixi tondóhó nu ná nani íin na yóho,

já quéa ndítahan nu ná can-daa na yúhu ná já ná a cáhan quini na.

Ta quiahva já ndítahan can-daa na yúhu ná já ná a cáhan na ña tuhún.

<sup>11</sup> Ndítahan caxoo na nu tóco ndíhi ña núu ta caja na ña vaha cuití va.

Ta ndítahan ndinducú na ña coo vaha ini na xihín ñayivi ta a jándacoo na caja na ña.

<sup>12</sup> Jáchi ndáá Ndióxi na cája ndaa,

ta táa johó a nu cáhan na tá xíca tahví na nu mé á.

Joo xójo ini a xihín ñayivi cája cuachi, já cáchí tuhun Ndióxi.

<sup>13</sup> Ni in ñayivi a cuú ndusa caja xíxi xihín ndó tá ná ndíhi ini ndó caja ndó ña vaha.

<sup>14</sup> Joo tá cája xíxi na xihín ndó vatí cája ndó ña vaha, tahví nahá nacuu ndó. A

cáyihví toho ndó ñayivi ta a ndícani toho ini ndó. <sup>15</sup> Ña ndítahan caja ndó quea caja cáhnu ndó Jesucristo, xitoho í xihín ndinuhu ínimā ndo. Ta xíní ñúhú coo tiahvā ndó nducú ñehe vií ndó tuhun nuú ñayivi, na cúní candaa ini sahá ña cāndeé ini ndó Jesús. Ta ná coo tōni ñúhú ndó xihín ná ta a ndíñehe jícó ndo mé ndó nani ndícani ndó tuhun Ndióxi nuú na cán. <sup>16</sup> Ndítahan caja ndó ña vaha já ná a cácahan nuú ndo. Ta tá cáhan núu na saha ndo sahá ña cúu ndó cuéntá Jesús já quea cacahan nuú mé na cán sahá tuhun núu cáhan na saha ndó. <sup>17</sup> Ta tá mé Ndióxi quea cúní ña ná ndoho ini ndó já quea vaha chága ná ndoho ini ndó sahá ña vaha cája ndó a juú ga sahá ña núu.

<sup>18</sup> Ta in túhún tañu cuití va naxihí Jesucristo sahá cuachí. Ni in túhún toho cuachi coo ñacaja mé á joo ñandoho ini a sahá ñayivi quini já ná cuu ndihvi ndihí íchi cuéntá Ndióxi. Ta sahá ña ñasacomí a in yiquí cuñu ñayivi naxihí a joo mé á cúu á ña ñaquixi indiví sahá ña cán quea ñanditacu tucu a ta tácu yijí va ínimā mé á. <sup>19</sup> Ta ñasahan ínimā mé á nu ndájí ínimā ndji ta cán ñacahan mé á tuhun Ndióxi xihín na. <sup>20</sup> Mé ínimā ndji cán ñasacuu na na coo ñaxeen cuni joho tuhun Ndióxi sanahá ndivaha. Tá ñasatacu Noé já ñasandatí Ndióxi ña ná cava ini na cán nani cava Noé mé barco cáhnu, dó jácacu

ñahá. Joo chá cuití ñasacuu na ñacacu. Uña víxí laá na ñacacu nuú ticuñí cán. <sup>21</sup> Ta viti tá cánduta yo xihín ticuñí já cacu ínimā yó tá quiahva ñacacu na cán ini barco sanahá. Tá cánduta yo xihín ticuñí co ndóo cuachí sahá ña ñandoo yiquí cuñu í xihín ticuñí cán. Ñacacú nuú cuachí jáchi cāndeé ini Jesucristo ta cúní yó ña ná ndaja vií mé á ínimā yo. Ta náha ña ñacacú nuú indayá tá ñanditacu tucu Jesucristo <sup>22</sup> ta sa ñandaa mé á indiví ta íin a xoo cuáha Ndióxi. Ta sáhdá mé á chuun nu tátō Ndióxi xihín nuú na cómi cuéntá sahá na ndúu indiví.

#### 4

*Náha Ndióxi nu yo ndá quiahva ndítahan nu yo caja chuun í ña ná ñehe táhvi yó nu mé á*

<sup>1</sup> Tá quiahva ñandoho yiquí cuñu Jesús quiahva já ndítahan canduu tiahvā ri ndóhó va ndoho ini ndó, Jáchi ndá na ndóho ini yiquí cuñu, na cán cúu na co cája cuachi ndaja ñacuu. <sup>2</sup> Ta viti co cája ga yiquí cuñu ndó ña núu cuéntá ñuyiví yóho. Ta nú tiempo ndúcú ndó caja ndó ña cúní Ndióxi. <sup>3</sup> Jáchi sa ñayaha ndivaha quiahva ñacaja ndó ña núu jihna tá quiahva cája ñayivi, na co xíní Ndióxi. Mé tiempo tá cámaní candaa ini ndó saha íchi cuéntá Jesús já ñasacaja ndó tá nuú ña núu tátuhun ña xíca ini ndó caja ndó xihín yiquí cuñu ndó. Ta ñasacuu ndó ñayivi xihí.

Ta naçatóó ndó cája ndó vicó lándã ndivaha. Ta chí najáyaha quini ndivaha ndó ñã nasaxihi ndó. Ta naçaja cáhnu ndó yoco ñã naçachi Ndióxi co ndítahan caja cáhnu ndó. <sup>4</sup> Ta naçasáhá cáhan núu ñayivi nasatáhan xihín ndó tá nasacaja ndó ñã núu jihna. Jáchí viti co xíca nuu ga ndó cája ndó tá nuú ñã núu xihín ná. Ta viti sa naçasáhá ndíhi ini na ndáti na ndicó coo ndó xihín ná. <sup>5</sup> Joo vaxí quiví cuhun na cán cavií saha ná nu Ndióxi, mé a ín tiaha caja vií sahá na tácu xihín sahá na sa naixihí. <sup>6</sup> Jáchí sa naixini johó va ñayivi, na sa naixihí cán tuhun vaaha sahá Jesús tá nasatacu na. Naixini johó na tuhun vaaha sahá Jesús ñã ná cuu catacu ínima ná tá quiahva tácu Ndióxi vatí naçavií saha ná ñuyiví yóho tá quiahva cávií saha tóco ndihi ñayivi.

<sup>7</sup> Jalóho cúní xinu coo quiví ndihi saha tóco ndihi ñaha. Sahá ñã cán quéa ndítahan nu ndo coo cáxi táhyí ini ndó ta xihín ndinuhu ini ndó ndítahan caça tahví ndó nu Ndióxi. <sup>8</sup> Ñã cúní quéa ná quihví ini táhan ndó jáchí tá quihví ini táhan ndó já cája cáhnu ini saha táhan ndó tá ná yaha xihín táhan ndó. <sup>9</sup> Ta a cójo ini ndó tá xínu coo ñani táhan ndó xíto nihni na ndohó vehe ndó jáchí ndítahan ndiquehe vaaha ndó na. <sup>10</sup> Nasahan Ndióxi nuú in in ndó ñã ná ñehe táhvi ndó in in ñamaní mé á. Ta ndítahan caja chúun ndó a

ñã ná chindeé ndó na cúu cuéntá Jesús. Ta ndítahan caja ndó ñã tá quiahva sahan Ndióxi ndée ndó caja ndó ñã. <sup>11</sup> Ta ndá tuhun ná cahan ndó xihín ñani táhan ndó, ná cacuu a tuhun yíi tátuhun ñã cáhan Ndióxi. Ta ndá ndó cája ñamaní xihín inga na, ná caja ndó ñã xihín ndée sahan Ndióxi nu ndo. Jáchí tóco ndihi ñã cája ndó ndítahan cacuu a ñã cuu caja cáhnu í Ndióxi xihín. Ta cája Jesucristo ñã ná cuu caja cáhnu í Ndióxi. Cáhnu ndivaha cúu a ta sáhdá a chuun nuú tóco ndihi ñaha anda ama cáa quiví. Já ná coo.

*Ndóho iní jáchí cándeé iní Jesús*

<sup>12</sup> Candehé ndo, ñani i. Coto a catóntó nahá ndo tá quixi tondóhó nahnu nu ndo. A cája ndó tátuhun na co xíní quixi tondóhó nuu. <sup>13</sup> Ñã ndítahan caja ndó quéa cajíi ini ndó jáchí xihín ñã yóho cándaã ini ndó ndá quiahva nandoho ini Jesús. Ta xihín ñã yóho cajíi ndivaha ini ndó tá ná cuni ndó ndá quiahva cáhnu cúu mé á tá ná quixi tucu a. <sup>14</sup> Tá cánahá ñayivi xihín ndo sahá ñã cándeé ini ndó Jesucristo, tahví naçuu ndó. Jáchí sa nandicutú ndaa ínima in in ndó xihín ínima yíi Ndióxi ta mé á cúu á ñã cáhnu ndivaha. Mé ñayivi cán cáhan núu na sahá joo mé ndó cája cáhnu ndó a. <sup>15</sup> Tá naçasáhá cája xíxi na xihín ndó co ndítahan cacuu a sahá ñã cúu ndó ta sáhní ndíi. Ta ni co

ndítahan cacuu a sahá ña cája cuihná ndo. Ta ni co ndítahan cacuu a sahá ña a váha toho naçaja ndó. Ta ni co ndítahan cacuu a sahá ña naquihvi nuu ndó nuú co ndítahan nu ndo. <sup>16</sup> Joo tá ndóho ini ndó sahá ña cúu ndó cuéntá Jesucristo co ndítahan cácahan nuu ndo. Ña ndítahan caja ndó quea caja cáhnu ndó Ndióxi jáchi nañehe táhvi ndó cacuu ndó cuéntá Jesús.

<sup>17</sup> Viti sa naxinu coo tiempo casahá Ndióxi caja vii a sahá na cúu cuéntá mé á. Ta jihna mé yó, na cúu cuéntá mé á caja vii a saha. Ta a juú quiahva jándoho a ini java ga ñayivi, na co cuni coo joho nuú ña sáhdá mé á nu ná caja na. <sup>18</sup> Jáchi cáchi tuhun Ndióxi ña janda mí, na cúu ñayivi ndaa nu Ndióxi ta ihvi cáa saha yo jáca cu Ndióxi mí. Ndaja ga ví caja Ndióxi xihín ñayivi sáa ini, na co cuni jándacoo cuachi. <sup>19</sup> Sahá ña cán quea tá ndóho ini ndó tá quiahva cuni Ndióxi, ndítahan nu ndó caja vaaha ndó. Ta jári ndítahan nu ndó ndiquiahva ndó mé ndó ndáha Ndióxi, mé á naçavaaha ndóhó. Ta cája mé Ndióxi ña sáhan tuhun a caja.

## 5

*Ndicani Pedro nuú na cúu cuéntá Jesús ndia ndítahan nu ná caja na*

<sup>1</sup> Ta viti cuni cahan loho i xihín na sacuaaha nuú na cúu cuéntá Jesús ndúu tañu ndó jan jáchi da sacuaaha cúu ri yehe va. Ta cúu u in da naxini xihín nuú i tá quiahva

nañdoho ini Jesucristo. Ta tá quiahva cuni na sacuaaha ndaja cáhnu cacuu na nu Ndióxi tá cuhun na coo na xihín mé á quiahva já caja ri Ndióxi xihín yehe va tá ná xinu coo quivi nu ndíhi. <sup>2</sup> Xica tahví i nu ndó ña ná cacomí vaaha ndó cuéntá sahá na cúu cuéntá Jesús. Caja ndó ña xihín ndinuhu ini ndó jáchi mé Ndióxi najándicoo a na ndáha ndo. Sahá ña cán quea xini ñuhú coo cuéntá vaaha ndó xihín ná tá quiahva cuni Ndióxi. Ta coto a cája ndó ña xihín ña ndúsa. Ta ni a cája ndó ña sahá jjuhún. Ña ndítahan caja ndó quea cajii ini ndó xihín chuun yóho. <sup>3</sup> Ta co ndítahan cahvi ini ndo ña cúu ndó xitoho na cúu cuéntá Jesús jan jáchi na jan cúu ná na najándacoo Ndióxi nu ndó candaa ndó. Xini ñuhú caja vaaha ndó já ná cuni ri na jan va caja na ña. Jáchi na jan cúu ná tátuhun ndicachi ta ndóhó cúu ndó tátuhun da ndáa ñahá. <sup>4</sup> Ña cán quea tá ná quixi Jesucristo, mé á cúu da sacuaaha nuú ndihi da ndáa na cúu cuéntá mé á anda já ndiquiahva mé á ña ndítahan ndiquehe ndó sahá chuun naçaja ndó yóho. Ta ña quiahva mé á nu ndó a cácuu toho a in ñaha ña ndihi saha.

<sup>5</sup> Ta viti cahan ri xihín ndóhó, da tacú. Xini ñuhú coo joho ndó nu sáhdá na sacuaaha nu ndo. Tóco ndihi ndó ndítahan candúsa táhan ndó ta co ndítahan nu ndó ndiñehe jícó ndo mé ndó jáchi já cáchi tuhun Ndióxi:

Xójo ini Ndióxi xihín na cátóó ndiñehe jícó mé, joo cája ñamaní xihín na jánuu ndáha mé.

<sup>6</sup> Ña cán quéa ndítahan jánuu ndáha ndó mé ndó nu Ndióxi jáchi sa cándaá ini ndó ña cáhnu ndivaha cúu mé á. Vaxi quivi jándiñehe jícó mé á ndohó sahá ña najánuu ndáha ndó mé ndó. <sup>7</sup> Tá ndícani ndivaha ini ndó ndítahan caça tahví ndó nu Ndióxi ña ná chindeé a ndohó jáchi ñúhu ini a saha ndo.

<sup>8</sup> Cuéntá coo ndó ta coto a náá ini ndó jáchi tiñahá sacuahá cúu rí rí ihvi yo ta xíca nuu rí tañu mí yóho. Ta tá quiahva cája in león ndáhyi rí ndúcú rí yo caxí rí quiahva já cája tiñahá sacuahá yóho jándicava rí ñayivi nuú cuachi. <sup>9</sup> Xíni ñúhú coo ndacú ini ndó ta candeé ndusa ini ndó Ndióxi já cuu quee vaha ndó xihín rí. Ta ndítahan ndicuhun ini ndó ña tá quiahva ndóho ini ndó quiahva já ndóho ri java ga na cúu cuéntá Jesús ndúu ndijáá ñuyívi. <sup>10</sup> Ta tá sa nayaha chá tiempo ndóho ini ndó anda jáví caja Ndióxi ña ná ndoo cuachi ndó ta jándihvi mé á ndéé a ini ínima ndo. Níí tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamaní xihín yo. Ta ñacana mé á mí ña ná cohó coo í indiví ña ná ndaja cáhnu Ndióxi mí anda ama cáa quivi sahá ña in nanduú xihín Jesucristo. <sup>11</sup> Cáhnu ná cacuu mé á ta ín ndéé a cája

tócó ndihi ña cúni a anda ama cáa quivi. Já ná coo.

*Ndindayí Pedro na cáhyi da carta nuu cán*

<sup>12</sup> Chindeé Silvano yehe cáhyi i carta yóho ta chindahá i ña nu ndo. Ta cája i cuéntá mé Silvano yóho cája chúun da cuéntá Ndióxi xihín ndinuhu ini da. Na cáhyi i mé carta loho nu ndo jáchi cúni ndicani i ña ndaa nu ndó ña cája tá cája Ndióxi ñamaní xihín ndo. Xíni ñúhú coo ndacú ini ndó ta a ndíndójo ndó tóco ndihi ña nacachi i xihín ndó yóho.

<sup>13</sup> Na cúu cuéntá Jesús ndúu ñuu Babilonia chindahá na Ndióxi coo ndó. Ta tá quiahva nandacaxi Ndióxi ndohó quiahva já nandacaxi ri á na cán va. Ta jári Marcos, da cúu tátuhun jahyi i chindahá da Ndióxi coo ndó. <sup>14</sup> Cahan Ndióxi xihín táhan ndó ta tatí yúhu sajóho táhan ndó jáchi quiahva já ndítahan caja ndó sahá ña quihvi ini táhan ndó.

Ta ña cúni quéa ná coo vaha ini ndihi ndó, na cúu cuéntá Jesucristo. Já ná coo.

## Carta nacahyí Pedro chí ivi

*Cáhyí tucu Pedro inga carta nuú na cúu cuéntá Jesús*

<sup>1</sup> Yehe cúu Simón Pedro ta cája chúun i cuéntá Jesucristo ta cúu u in apóstol nachindahá mé á ña ná cahan i sahá tuhun a. Cáhyí i carta yóho nu ndóhó, na nañehe táhvi candeé ini Ndióxi tá quiahva candeé ini ndehe mé á. Jáchí cája ndaa Jesucristo tóco ndihi ñaha ta mé á cúu Ndióxi cája cáhnu í. Ta mé á quéa jácacu mí. <sup>2</sup> Ña cúni quéa ná caha cuaha Ndióxi ñamaní xihín ndo ta ná caha mé á ña ná coo vaha ini ndó sahá ña xini ndó yo cúu Ndióxi ta sahá ña xini ndo yo cúu Jesús, xitoho í.

*Jáxinu Ndióxi ini ña ná caha i ña cúni mé á*

<sup>3</sup> Xihín ndée Ndióxi nacaja ña ná a ndimaní ñaha nu yo catacu ñuyívi yóho. Ta náha mé á nu yo ndá quiahva caha cáhnu í mé á xihín ña cája í. Jáchí nacaja mé á ña ná candaa ini saha Jesucristo. Ta xihín ndée mé á ta xihín tóco ndihi ña náhnu cája mé á nacaxi a mí candeé ini mé á. <sup>4</sup> Ta sahá ña yóho nasahan tuhun a nu yo. Ta náhnu ndivaha cúu tuhun nasahan mé á nu yo ta ndiyahvi ndivaha ña. Jáchí xihín tuhun nasahan mé á nu yo já cuu xinu coo í coo í tá quiahva in mé á. Ta xihín

ña yóho cuu caxoo í nuú ña nuu xica ini yiquí cuñu í caha ñuyívi yóho. <sup>5</sup> Sahá ña cán quéa tá cúni ndó ñehe táhvi ndó ñamaní nu Ndióxi xini ñuhú candeé ini ndó Jesús. Ta vatí sa candeé ini ndó Jesús joo xini ñuhú caha vaha ndó. Ta vatí sa cája vaha ndó joo xini ñuhú candaa vaha ini ndó tuhun Ndióxi. <sup>6</sup> Ta vatí sa candaa ini ndó tuhun Ndióxi joo xini ñuhú cahnu ndó nuú ña nuu ña xica ini yiquí cuñu ndó caha. Ta vatí sa sáhnú ndó nuú ña xica ini yiquí cuñu ndó caha joo ndítahan coo cáhnu ini ndó. Ta vatí sa in cáhnu ini ndó joo ndítahan ndinducú ndo caha ndó ña cúni Ndióxi. <sup>7</sup> Ta vatí sa cája ndó ña cúni Ndióxi joo ndítahan quihvi ini ndó ñani táhan ndó, na cúu cuéntá Jesús. Ta xihín ña yóho cuu quihvi ini ndó tóco ndihi ñayivi.

<sup>8</sup> Tá cája ndó tóco ndihi ña yóho ta tá ndíhi ini ndó cuahnu ndó xihín á, a cácuu toho ndó ñayivi coo chúun nu Ndióxi. Ta tá ná xinu coo ndó candaa ini ndó saha Jesucristo, xitoho í já quéa a cácuu a ña uun. <sup>9</sup> Joo ndá na coo cája tóco ndihi ña nacachi i xihín ndo cúu ná tátuhun in na cuaa, in na a cuú candehe vaha. Jáchí nandindójó na ña najándoo Ndióxi cuachi nacaja na sanahá. <sup>10</sup> Sahá ña cán quéa ndítahan nu mé ndó, ñani i, na cúu cuéntá Jesús ndíhi ini ndó nahá ndo nuú ñayivi ña mé a ndaa táhyí cúu ndó na nacana Ndióxi cacomí a cuéntá saha. Jáchí tá ná

caja ndó tóco ndihi ña vaha ñacachi i xihin ndo yoho a ndícava toho ndó nuú cuachi.

<sup>11</sup> Ta xihín ña yoho núná nu ndó cuhun ndo indivi nu iin Jesucristo, xitoho í, mé á jácaacu mí ta cacomí a cuénta saha yó anda ama cáa quivi.

<sup>12</sup> Saha ña cán quéa cáhan tá cáhan i sahá ña yoho nu ndo vatí sa xini va ndó ña ta vatí sa cándeé ini ndó ña ndaa, ña najánaḥa i nu ndo yoho.

<sup>13</sup> Cája i ña yoho jáchi cáhan i ña ndítahan caja i ña nani tácu u ñuyiví yoho. Jáchi xini ñúhú ndicani i nu ndo ndía quéa vaha ta ndía quéa a váha.

<sup>14</sup> Jáchi sa ñacaja Jesucristo, xitoho í ña ná candaa ini i ña sa ñacayati quivi quivi i ta jándacoo i ñuyiví yoho.

<sup>15</sup> Joo ndúcú ndéé e ndinducú u ndá quiahva caja i já ná a ndíndójó ndó saha tóco ndihi ña yoho tá sa ñaxihí i.

*Ndicani Pedro ña ñaxini da ndá quiahva cáhnu cúu Jesús*

<sup>16</sup> Tá najánaḥa nde ndohó ña iin cuahá ndéé Jesucristo, xitoho í ta tá ñacachi nde xihin ndo quixi tucu mé á, coó ñasacuu a tuhun ñacana jini mé nde ña jándahvi nde ndohó vaha. Jáchi ñaxini xihín nuu mé nde ndá quiahva cáhnu cúu Jesucristo, xitoho í.

<sup>17</sup> Ñaxini nde xihín nuú nde tá ñandaja cáhnu Ndióxi, tátá yo Jesucristo já ñandicáhnu ndivaha mé á. Ta ñúchí ndivaha ñasahjin tá ñaxini johó nde ñacachi Ndióxi já: “Mé a yoho cúu jahyi maní i ta cájii ndivaha ini

i xihin tóco ndihi ña cája”, ñacachi Ndióxi sahá Jesús. <sup>18</sup> Ta mé nde ñaxini johó nde ñacahan Ndióxi chí indivi jáchi ñasanduu nde xihín Jesús jini mé yucu yii cán.

<sup>19</sup> Ta iin inga tucu ñaha cáhan ndá quiahva cáhnu cúu Jesús ta ña cán cúu ña ñacahyi na profeta sanahá. Ta sa xini vaha yó cúu á ña ndaa. Vaha cája ndó táa johó ndó ña ñacahyi na profeta cán jáchi cúu á tátuhun in lámpara ña jándiyéhe nuú naá janda quiahva ná quixi Jesucristo. Ta mé á cúu á tátuhun quimi cáhnu, rí quéta tá ñativi jáchi jándiyéhe a ínimá ñayivi. <sup>20</sup> Joo coto a ndíndójó ndo ña ni in tuhún toho na a cuú nducú ñehe ña cáchi tuhun Ndióxi nuú inga na sahá ña cána jini mé va na. <sup>21</sup> Jáchi ni in profeta coó ñacahyi na ña ñasacu ini mé ná cahyi. Ña ñacaja na quéa ñandiquiahva na mé ná ndáḥa ínimá yii Ndióxi ta mé Ndióxi ñasahan tóco ndihi ña ñacahan na.

## 2

*Na xica jánaḥa ña tuhún (Judas 4-13)*

<sup>1</sup> Joo mé tiempo já ñasanduu ri profeta tuhún tañu na Israel cán. Quiahva já canduu ri na jánaḥa ña tuhún tañu ndohó. Ta na cán casahá na jácahan jehé na ñayivi sahá ña cáhvi jini mé va na. Joo jáquihvi ndivaha na ñayivi xihín á. Ta xihín ña yoho a ndícuni na ña najácaacu Jesús na ta casahá na cácahan

nuu ná sahá ña ñacaja mé á saha ná. Ta ña yóho quéa caja ña ná ndihi yachi chága sahá na cán. <sup>2</sup> Cuahá ndivaha ñayivi casahá candico na jatá na cán ta casahá na cája na ña núu xihín na. Ta sahá ña núu cája na cán casahá ñayivi cahan núu na saha tuhun vaha cahan saha Jesús vatí cúú á ichi ndaa. <sup>3</sup> Ta sahá ña catóo ndivaha na jihún sahá ña cán quéa nducú na tavá na jihún xihin ndo xihin mé ña tuhún jánaha na cán. Ta xini Ndióxi ña cája na ña cán quéa ndihi tá ndihi saha ná. Jachi sa janda sanahá nasacu ini mé á taán a ñayivi jan ini indayá.

<sup>4</sup> Coó ñacaja cáhnu toho ini Ndióxi saha táto mé á tá ñacaja na cuachi nu mé á. Ña ñacaja mé á quéa nachindahá a na indayá. Ta najándicoo a na nuú naá ndivaha ta nacató a na xihin cadena ndúu na ndati na xinu coo quivi caja vii Ndióxi saha ná. <sup>5</sup> Ta ni coó ñacaja cáhnu ini Ndióxi sahá ñayivi nasanduu sanahá ndivaha. Ña ñacaja mé á quéa najácuun ndeé ndivaha javi já naxihí ndihi ñayivi quini cán. Ta in túhún da naní Noé xihin ndihusa na vehe da najáacu a. Najáacu Ndióxi Noé jachi nacandúsa da mé á ta najácahan da ñayivi ña ná caja vaha na. <sup>6</sup> Ta quiahva já najándihi ri Ndióxi sahá ñayivi nasanduu ñuu Sodoma xihin ñuu Gomorra. Nachicaan ñuhu a na janda quiahva nanduu na yaa uun. Ñacaja Ndióxi ña

yóho já ná cuni ñayivi vaxi chága chí nuu ña quiahva já caja Ndióxi jándihi a sahá ñayivi quini. <sup>7</sup> Joo najáacu Ndióxi in da naní Lot jáchi nasacu da in taa vaha ta mé Lot yóho natahvi ndivaha ini da saha tóco ndihi cuachi nasacaja ñayivi quini nasanduu tiempo cán. <sup>8</sup> Ndijáá ní quivi nacacuéha ini Lot cán sahá cuachi ñayivi cán jáchi quini nasacahan na ta quini nasacaja na. <sup>9</sup> Ta tá quiahva ñacaja Ndióxi xihin Lot quiahva já cuu caja mé á jáacu a ñayivi, na ndiquiahva mé ndáha mé á. Ta chindeé a na tá casahá ndóho ini na. Joo sácú xoo mé á ñayivi quini já ná canduu xóo na candati na xinu quivi caja vii a sahá cuachi na.

<sup>10</sup> Mé Ndióxi jándoho a ini tóco ndihi na catóo caja ña xica ini yiquí cuñu na jáchi cándají na caja na ña sáhdá Ndióxi nu ná. Cúú ná na ñihi ini ta ni co sáhní na mé ná ta ni co yihví na canahá na xihin na ndójo chuun náhnu <sup>11</sup> jáchi ni mé táto Ndióxi, na ndúu nu íin mé á vatí íin chága ndeé ná a juú ga ñayivi, na canahá xihin mé na ndójo chuun cán. Joo co sahan ndeé ini mé táto Ndióxi chícaan na cháhan jatá na náhnu sáhdá chuun cán.

<sup>12</sup> Joo ñayivi quini jan cúú ná tátuhun quíti, rí co xini túni. Nacacu rí ñuyivi yóho ta tíin táhan rí ta sáhní táhan rí. Ta quiahva já cája na cán jáchi cája na ndá ña xinu ini na caja na ta cahan núu na sahá ñaha, ña co cánda ini na saha. Ta tá



quiahva xih̄i quít̄i já quivi n̄a cán. <sup>13</sup> Tá quiahva jándoho na ini ñayivi quiahva já ndoho ini mé ná. Cáhán n̄a ña ndató ndivaha ndúu na jách̄i tá yéhe cand̄i xica nuu na cája na ña núu. Ta tá ndúu na xih̄in ndó in víco cátóo n̄a ndítati na, ch̄inuú cácahan nuu ndo quéa cája na. Cáj̄i ndivaha ini na xih̄in ña cája na joo jándahvi uun na mé ná.

<sup>14</sup> Ta tá xín̄i uun na najih̄i iv̄i laá casáhá cáhvi núu ini na xih̄in ná. Chí co cánaá loho na cája na cuachi. Ta jándahvi na n̄a coó ndacú cuahan ích̄i cuéntá Ndióxi ta xín̄i vaha na ndaja caja na quehe na ña cún̄i n̄a. N̄a jan cúu ná ñayivi natav̄i cháhan jat̄a, n̄a cuhun indayá. <sup>15</sup> Mé n̄a jan n̄andiñúhú n̄a jách̄i najándacoo na ích̄i cuéntá ña ndaa. Cája na tá quiahva nacaja da naní Balaam, jahyi Beor sanahá, da nacacún̄i ñehe cuahá juhún jat̄a ña núu nacaja da. <sup>16</sup> Joo nanani da sahá cuachi da nacaja in búrr̄o jíh̄i jách̄i tá quiahva cáhan ñayivi quiahva já nacahan rí cán xih̄in dá ta nasaji nuu rí nu dá ña ná a cája ga da ña núu.

<sup>17</sup> Tóco ndihi t̄aa, n̄a jánaha ña tuhún yóho cúu ná tátuhun chicoho nuú co ñúhu ticuif̄i jách̄i coó chuun na. Ta cúu ná tátuhun víco jácuicó tach̄i xoo nu cún̄i a ta viti ña ñañehe ná quéa cuhun n̄a coo na nuú naá yávi anda ama cáa quiv̄i. <sup>18</sup> Jách̄i tuhun cáhan n̄a cúu á ña jándindita jícó n̄a mé ná xih̄in joo tóco ndihi

ñ̄a cáhan n̄a cúu á ña coó saha. Ta xih̄in ña núu, ña xica ini yiquí cuñu na caja, xih̄in ña jan jándahvi na n̄a jacá nacaxoo nuú cuachi. <sup>19</sup> Mé n̄a jánaha ña tuhún yóho jácahan ná ñayivi ña nún̄a nu ná caja na ña cún̄i mé va na. Joo mé n̄a cán cúu ná tátuhun mozo nuú cuachi jách̄i cóm̄i tá cóm̄i cuachi cuéntá saha ná. N̄uhu ñayivi ndahá ña t̄in ñahá jách̄i sáhdá a chuun nu ná. <sup>20</sup> Ta ndá ñayivi nacaxoo nuú ña núu ñuyiv̄i yóho sahá ña nacandaa ini na yo cúu Jesucristo, xitoho í, mé á jacacu mí joo tá n̄andihi casáhá tucu na cája na ña núu ta ndiquiahva na mé ná ndaha ña núu cán já quéa ndiquini chága ví n̄a a juú ga tá cáman̄i ndiquehe na ích̄i cuéntá Jesús. <sup>21</sup> Janda vaha chága ná a ndihv̄i n̄a ích̄i cuéntá Jesucristo, nduu. Jách̄i a váha toho tá sa xín̄i n̄a ña cúu á ña ȳi ña nasahan Ndióxi nu ná ta tá n̄andihi já jándacoo na ña. <sup>22</sup> Joo xih̄in ña cája n̄a yóho xín̄u nuú tuhun ña cách̄i: “Ndícó coo tucu t̄ina sáx̄i r̄i ña sa n̄andusa rí. Ta cóch̄i, rí jacá n̄andihi najácuchu na ndícó coo tucu rí chin̄ihni rí mé rí nuú ndahyi.”

### 3

*Vaxi tucu Jesucristo, xitoho í*

<sup>1</sup> Candehé ndo, ñani máni. Xih̄in ña yóho xín̄u carta iv̄i ch̄indahá i nu ndo. Ta nu ndiv̄i carta ndicani i nu ndo ndá quéa ndítahan caja ndó

já ná ndicani ini ndó nd-inuhu ña vaha. <sup>2</sup> Ndítahan ndicuhun ini ndó ña ñacachi na profeta yii Ndióxi sanahá ta ndítahan ndicuhun ini ndó ña ñacachi Jesucristo, xitoho í, mé á jácacu mí jáchi cúu á ña najánaha na apóstol nu ndo.

<sup>3</sup> Nu cuití cúní ña ná candaa ini ndó ña tá sa ñacayati quiví quixi tucu Jesucristo já queta ñayivi ta casáhá na cuacu ndaa na tóco ndihi ña yii cuéntá Ndióxi. Ta caja na tóco ndihi ña núu, ña xíca ini yiquí cuñu na caja. <sup>4</sup> Ta casáhá na ndaca tuhún ichi na já cachi na já: “Nasahan Jesucristo tuhun a quixi tucu a ta ndá cuéntá quéa a ñaha quixi a. Jáchi janda tá nasatacu tásáhnú jícó yo, tá cáa ñuyíví yóho anda saha já cáa yii va.” <sup>5</sup> Ta cachi na ña yóho jáchi co cúní na candúsa na ña sa janda sanahá ndivaha va ñacahan Ndióxi ta já ñacavaha indiví xihin ñuyíví. Ta mé Ndióxi quéa nasahnda chuun ña ná ndinuna ticuúí cán já ná canáha nuú ñundáhyi ta ín ticuúí tóco ndihi xoo ñundáhyi viti. <sup>6</sup> Ta xihin ticuúí najánaa a saha ñayivi ñuyíví sanahá tá najácuun mé á javi quíni. <sup>7</sup> Joo indiví xihin ñuyíví ña ín viti yóho, ndúu a ndátí a xinu quiví chicaan ñúhu Ndióxi ña já ná ndihi sahá. Cája Ndióxi ña yóho já ná ndoho ini ñayivi quini cán ta jándihi a saha ná quiví caja víi Ndióxi sahá ñayivi quini cán.

<sup>8</sup> Ta viti candehé ndo, ñani maníj. In quiví cúu á tátuhun

in mil cuja nu Ndióxi ta in mil cuja cúu á tátuhun in quiví nu Ndióxi. A ndíndójó ndó ña yóho. <sup>9</sup> A cáhán ndo ña cácuáchi Jesús jáxinu coo a nuú tuhun a tá ñacachi a ña quixi tucu a tá quiahva cáhán java na. Joo a ñaha quixi Jesucristo jáchi táhvi ndivaha ini mé á sahá ñayivi. Ta co cúní mé á ña ná cuhun ní in túhún na indayá ndihi saha ná. Ña cúní mé á quéa ná ndicó coo ini na ña ná jándacoo na cuachi cája na.

<sup>10</sup> Mé quiví co cáhán na quixi Jesucristo já quixi mé á. Tá quiahva cája taa cuíhná tá xinu coo da ñuú ta ni in na co xíní na ña xinu da cája cuíhná da ñaha na quiahva já coo nuú quixi ri Jesucristo va. Ta mé quiví cán in cuití cuni johó ñayivi ñihi ndivaha indiví ta já casáhá ña nditani a. Ta já cayi ñuyíví yóho xihin tóco ndihi ñaha ín nu á. Ta já cayi ñaha ndúu nu táchi indiví ta ndihi saha tóco ndihi ñaha.

<sup>11</sup> Mé a ndaa vaxi quiví coo tóco ndihi ña yóho sahá ña cán quéa ndítahan nu ndó caca vaha ndó ichi cuéntá Ndióxi ta caja ndó ña cúní mé á xihin ndinuhu ini ndó. <sup>12</sup> Candati ndó xinu quiví quixi tucu Jesucristo ñuyíví yóho. Ta nducú ndéé ndo cája chúun ndó cuéntá mé á já ná xinu yachi quiví cán. Tá ná xinu quiví cán já jándihi Ndióxi sahá indiví xihin ñúhu ita. Ta tóco ndihi ñuyíví jándutu mé á ña xihin ñúhu cáyi. <sup>13</sup> Joo mí, yó cúu cuéntá Jesús ndátí inga indiví saá xihin in ñuyíví saá

jáchí ñasahan Ndióxi tūhun a nu yo ña quiahva ña nu yo. Ta cán tóco ndihi ñaha cacuu a ña vaha ta ndinuhu ña ndaa coo cán.

<sup>14</sup> Ñani i, quíhvi ndivaha ini i ndohó sahá ña cán quéa cáhan i ña yóho xihín ndo. Nani cámaní xinu quívi caja Ndióxi tóco ndihi ña cán, ndítahan ndihi ini ndó caja ndó ña vaha já quéa ná cuni Ndióxi ña íin vaha ini ndó xihín mé á ta já ná cuni a ña coo cuachi ndó. <sup>15</sup> Ta a ndíndójó ndo ña ndátí yij Jesucristo quixi tucu a ñuyívi yóho jáchi táhvi ndivaha ini mé á saha yo ta cuni a jácacu a mí. Ta tá quiahva cáhyí yehe nu ndo yóho quiahva já ñachahí ri ñani maní yo, da cúu Pablo carta ñachindahá da nu ndo jáchi ñacaja Ndióxi ña ná candaa ini da cán ña cuni mé á. <sup>16</sup> Nu tóco ndihi carta ñachahí Pablo nu ndo cáhan da xihín ndo saha tóco ndihi ña yóho. Java ña yóho cúu á ña yáncá ndivaha cándaa ini saha. Ta ña co cándaa ini xihín ña co cándeé vaha ini Ndióxi ñacasahá ndíjama na ña ñachahí da. Quiahva já cája na ndíjama na java ga ña cáchí tūhun Ndióxi joo ndihi saha tóco ndihi ña cán.

<sup>17</sup> Candehé ndo, ñani maní i. Sahá ña sa xini vaha ndó saha tóco ndihi ña ñandicani i nu ndo yóho, xini ñúhú candaa vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahan vaha ndó íchi cuéntá Ndióxi

viti. <sup>18</sup> Xini ñúhú candaa vaha chága ini ndó yo cúu Jesucristo, xitoho í jáchi mé á quéa jácacu mí. Ta xini ñúhú candaa vaha chága ini ndó ña cája Ndióxi cuahá ñamaní xoho. Cáhnu ná cacuu Jesucristo anda ama cáa quívi. Já ná coo.

## Carta nu cuití naçahyí Juan nuú na cúu cuéntá Jesús

*Cáxi tuhun Juan nuú ñayivi  
sahá Jesucristo*

1 Cáhyí nde carta yóho nu ndó sahá Jesucristo, mé á nasahiin janda tá cámaní cava sahá saha ñuyivi. Mé nde naxini johó nde ña naçahan mé á ta chí naxini xihín nuú nde mé á. Nasandehé nde a ta naçani ndaa ndahá nde a. Cañan nde sahá Jesucristo mé á cúu tuhun Ndióxi, ña cája ña ná catacu ñayivi anda ama cáa quivi. 2 Najánaña mé á nuú ñayivi ta mé nde naxini nde a sahá ña cán quea cáxi tuhun nde nuú ñayivi saha mé á. Ta ndícani nde nu mé ndó viti saha Jesucristo, mé á sa janda ama cáa quivi íin a xihín Ndióxi, tátá a ta co ndíhi toho sahá. Viti naquixi a najánaña mé á nu yo. 3 Ta cáxi tuhun nde nu ndo ña naxini nde xihín ña naxini johó nde já ná cuu in canduu ndó xihín mé nde. Jáchi in nanduú yó xihín Ndióxi, tátá yo ta xihín Jesucristo, mé a cúu in túhún jini já jahyi Ndióxi. 4 Ta cáhyí nde ña yóho nu ndo já ná ndicutú ndaa ínimá yo xihín ña cajii íni yo.

*Jándiyehé ndaa Ndióxi nu íin  
a*

5 Ña najánaña Jesucristo nuú nde cúu á ña jánaña nde nu ndó viti: Jándiyehé ndaa Ndióxi nu íin a ta ni loho ña naá co íin nu íin mé á. 6 Tá ná cachi yó ña in nanduú xihín Jesucristo nani cája í cuachi já quea cúu á tátuhun ndúu yii yó nuú naá jáchi cátuhún yo ta co cája í ña ndaa. 7 Joo tá ndúu yó nu yehé tá quiahva íin Ndióxi nuú ña yehé já quea in nduu ndihí. Ta Jesucristo, mé a cúu in túhún jini já jahyi Ndióxi jándoo ndihi a cuachí jáchi naxita nii á saha yo tá naxihí a ndica crúxu.

8 Ta tá ná cachi yó ña coo toho cuachi cája í já quea jándahví mé ví ta co ndacaan ña ndaa íni. 9 Joo tá ná nahma yó cuachí nu Ndióxi já quea cuu candee íni ña caja ndaa Ndióxi xihín yo jáchi caja cáhnu íni a sahá cuachí ta ndaja víi a mí nu tóco ndihi ña núu. 10 Joo tá ná cachi ña ni in túhún toho cuachi coo naçaja í já quea ndája túhún yo Ndióxi ta xihín ña yóho náña ña mé a ndaa táhyí coo nandiquehe vaha í tuhun vaha cañan saha mé á.

## 2

*Jesucristo quea cañan  
cuachí a saha yó nu Ndióxi*

1 Candehé ndó. Mé ndó cúu ndó tátuhun jahyi válí i ta cáhyí i ña yóho nu ndo ña ná a cája ndó cuachi. Ta vatí ná caja ndó cuachi joo íin Jesucristo cañan cuachí a saha yó nu Ndióxi, tátá a. Ta cája mé á ña ndaa cuití

va. <sup>2</sup> Jáchi naxahvi Jesucristo sahá cuachí tá naxihí a ndica crúxu. Já quéa xihín ña yóho cuu caja cáhnu ini Ndióxi sahá cuachí. Ta a juú sahá cuachi mé cuití yo, vaha jáchi naxihí rí a sahá cuachi ndaja táhan na ndúu ñuyívi.

<sup>3</sup> Jáchi tá cája í ña sáhdá Ndióxi já quéa náha ña mé a ndaa táhyí xini yo mé á. <sup>4</sup> Joo tá cáchí in na ña xini na Ndióxi nani co cája na ña sáhdá mé á já quéa cúu ná na tuhún ta co ndacaan ña ndaa ini na. <sup>5</sup> Joo na cája ña sáhdá Ndióxi, náha ña mé a ndaa táhyí quihvi ini na mé á ta xihín ña yóho cándaá ini yó ña in nanduu na xihín mé á. <sup>6</sup> Ta ndá na cáchí ña in nanduu na xihín Ndióxi, xini ñuhú caja na tá quiahva nacaja Jesucristo tá nasahin a ñuyívi yóho.

*Sáhdá Ndióxi chuun ña ná quihvi ini táhan í*

<sup>7</sup> Candehé ndó ñani i, na cúu cuéntá Jesús. Co cáhyí i nu ndó in chuun saá ña nasahnda Ndióxi caja ndó. Cúu á mé chuun natahnda nu ndó caja ndó janda mé saha tá nandihvi ndó ichi cuéntá Jesús. Ta cúu á ña sa naxini johó ndó anda mé cán. <sup>8</sup> Joo mé a ndaa ña cáhyí i yóho cúu á chuun saá jáchi sáhdá Ndióxi ña ná quihvi ini táhan í. Ta tá cája í ña sáhdá Ndióxi já quéa quéé ndihi ña naá cuahan ta mé a ndaa jándiyehé Jesucristo ínimá yo jáchi quihvi ini táhan í tá quiahva nacaja mé á.

<sup>9</sup> Ta ndá na ná cachi ña sa nandiyehé ínimá ná nacaja Jesucristo nani cándají na ñani na, na cúu cuéntá Jesús já quéa cuni cachi a ña ndúu yii ná nuú naá ndivaha. <sup>10</sup> Ta ndá na quihvi ndusa ini ñani na já quéa cuni cachi a ña mé a ndaa jándiyehé Jesucristo ínimá ná ta ni in ñaha a cúu caja ña ná ndacava na nuú cuachi. <sup>11</sup> Joo ndá na cándají ñani na já quéa ndúu na nuú naá ta xica na nuú naá yáve. Ta ni co xini na ndáchí xica na jáchi cúu ná tathun na cuaá jáchi ndúu na nuú naá.

<sup>12</sup> Mé ndó cúu ndó tathun jahyi i ta cáhyí i carta yóho nu ndo jáchi sahá ña nacaja Jesucristo nacaja cáhnu ini Ndióxi sahá cuachí. <sup>13</sup> Ta cáhyí i carta yóho nu ndó, nataa, na cúu tátá jáchi nacandaá ini ndó sahá Jesucristo, mé a sa in janda tá nacava sahá saha ñuyívi. Ta cáhyí ri carta yóho nu ndó, ta yuta jáchi nacandee ndó nasahnu ndó nuú tiñahá sacuaña.

Candehé ndo. Mé ndó cúu ndó tathun jahyi i ta cáhyí i carta yóho nu ndo jáchi nacandaá ini ndó yo cúu Ndióxi, tátá yo. <sup>14</sup> Ta cáhyí ri carta yóho nu ndó, na cúu tátá jáchi nacandaá ini ndó sahá Jesucristo, mé a sa in janda tá nacava sahá saha ñuyívi. Ta cáhyí ri carta yóho nu ndó, ta yuta jáchi sahan ndee ini ndó ta ndacaan tuhun Ndióxi ini ínimá ndo ta nacandee ndó nasahnu ndó nuú tiñahá sacuaña.

<sup>15</sup> Ta coto a catóo ndó ña

cúu cuéntá ñuyiví yóho ta ni a ndiáva ini ndo cacomí ndó ña ndúu ñuyiví yóho. Jáchí ndá na cúní ñaha ñuyiví yóho já quéa cúní cachi a ña co cúní na Ndióxi, tátá yo. <sup>16</sup> Jáchí ni in ña núu ndúu ñuyiví yóho coó vaxi a cuéntá Ndióxi, tátá yo. Ta ña yóho cúu á ña a váha toho cáhvi ini ñayivi caja na ta jári ndiáva ini na cacomí na ña xíní na xihín nuu ná ta jári ndíñehe jícó ndivaha na mé ná sahá ña cómí na. Ndijáa ña yóho cúu á ña núu quíxi mé ñuyiví yóho. <sup>17</sup> Vaxi quiví ndihi saha tóco ndihi ña ndiáva ini ñayivi ta janda mé ñuyiví yóho ndihi sahá joo ndá na cája ña sáhndá Ndióxi, na cán cúu na catacu nu ín mé á anda ama cáa quiví.

*Na co cúní táhan xihín Jesucristo*

<sup>18</sup> Candehé ndo jáchí cúu ndó tátuhun jahyi í. Jalóho cúní ndihi saha ñuyiví ta sa xíní johó ndó sahá in da vaxi caja ihvi xihín Jesucristo. Ta mé tiempo yóho sa naqueta cuahá na co cúní táhan xihín mé á. Sahá ña yóho sa cándaá ini yó ña sa nacayati quiví ndihi sahá ñuyiví yóho. <sup>19</sup> Mé na co cúní táhan xihín Jesucristo yóho nasañúhu na tañu mí. Joo a juú toho na cuéntá mí nasacuu na. Jáchí tá ná cacuu na cuéntá mí já canduu na tañu mí, nduu. Joo naqueta na cuahan na já ná nahá ña mé a ndaa co cúu ná cuéntá mí.

<sup>20</sup> Joo nu mé ndó nasahan Jesucristo ínima yii mé á sahá ña cán quéa tóco ndihi ndó

cúu ndó ñayivi xíní ña ndaa. <sup>21</sup> Tá cáhyí í carta yóho nu ndo, co cúu á sahá ña co xíní ndó ña ndaa. Joo cúu á sahá ña sa xíní ndó ña ndaa ta sa xíní ndo ña ni in túhún ña túhún a cúu quixi tañu ña ndaa.

<sup>22</sup> Na túhún cúu ná na co cúní ndicuni ña cúu Jesucristo mé á nachindahá Ndióxi jácacu a ñayivi. Mé na túhún yóho cúu ná na co cúní táhan xihín Jesucristo jáchí co cúní na ndicuni na Ndióxi, tátá yo ta ni co cúní na ndicuni na Jesucristo, mé a cúu in túhún jiní já jahyi Ndióxi. <sup>23</sup> Jáchí ndá na chíjehé túhun ña xíní na Jesucristo, jahyi Ndióxi já cúní cachi a ña coó in nanduu na xihín Ndióxi, tátá yo. Joo na cuahan xoo Jesucristo, jahyi Ndióxi in nanduu na xihín Ndióxi, tátá yo.

<sup>24</sup> Sahá ña cán quéa xíní ñuhú cacu váha ndó túhun Ndióxi ini ínima ndó, jáchí cúu á ña naxini johó ndó janda mé saha tá nandiquehe ndó íchí cuéntá Jesús. Ta tá mé a ndaa ndicaan ña naxini johó ndó ini ínima ndo já quéa anda ama cáa quiví in nduu ndó xihín Ndióxi, tátá yo ta in nduu ndó xihín Jesucristo, mé a cúu in túhún jiní já jahyi Ndióxi. <sup>25</sup> Ta nasahan Jesucristo túhun a nu yo ña cat-acú xihín mé á anda ama cáa quiví.

<sup>26</sup> Cáhyí í ña yóho nu ndo já ná cándaá ini ndó sahá na cúní jándahvi ndohó. <sup>27</sup> Joo ndacaan ínima yii Ndióxi ini

ndó, mé a nasahan Jesucristo nu ndo. Sahá ña cán quea co xini ñuhú toho ndó inga na jánaha na ndohó jáchi mé inima yii Ndióxi, ña ndacaan ini ndó jan jánaha tóco ndihi ñaha nu ndo. Ta ña jánaha mé á nu ndó cúu á ña ndaa ta co cúu á ña tuhún. Sahá ña cán quea xini ñuhú catáhan tuun ndó xihín Jesucristo tá quiahva sácaya ndó jáchi quiahva já najánaha inima yii Ndióxi nu ndo.

<sup>28</sup> Candehé ndo jáchi cúu ndó tátuhun jahyi i. Xini ñuhú catáhan tuun í xihín Jesucristo já ná cuu candee ini mé á tá ná canáha mé á quixi a ta já ná a cácahan nuu yo tá ná cuní mé á. <sup>29</sup> Mé ndó sa cándaq ini ndó ña cája Jesucristo ndinuhu ña ndaa cuití va. Ta tá cája mé ndó ña ndaa já quea jánaha ndó ña mé a ndaa cúu ndó jahyi Ndióxi.

### 3

#### *Na cúu jahyi Ndióxi*

<sup>1</sup> Candehé ndó. A juú quiahva quíhvi ini Ndióxi, tátá yo mí anda nasahan ñamaní nu yo cananí yo jahyi Ndióxi ta mé a ndaa cúu yó jahyi mé á. Joo ñayivi ñuyívi co xini na Ndióxi sahá ña cán quea co ndícuni na ña cúu yó jahyi mé á. <sup>2</sup> Candehé ndo, ñani máni, na cúu cuéntá Jesús. Sa cúu yó jahyi Ndióxi vatí viti ñuhú co cándaq ini ndá quiahva nduú. Joo cándaq vaha ini ña tá ná quixi Jesucristo já nduú tá quiahva cáa mé á jáchi cuní mé á tá quiahva cáa tá ín a. <sup>3</sup> Ta

tóco ndihi na ndáti nduu na tá quiahva cáa mé á já quea ndaja vii na mé ná jáchi cuní na coo vii na tá quiahva ín vii Jesucristo.

<sup>4</sup> Tóco ndihi na cája cuachi sáhnú na nu ley Ndióxi jáchi tóco ndihi ña núu cúu á cuachi nu ley Ndióxi. <sup>5</sup> Mé ndó sa cándaq ini ndó ña naquixi Jesucristo ñuyívi yóho ta naxihí a já ná cuu ndoo cuachi ñayivi. Ta coo ni in tuhún toho cuachi mé á. <sup>6</sup> Sahá ña cán quea tóco ndihi na cátivi tuun xihín mé á co xíca nuu ga na cája na cuachi. Joo na xíca cája cuachi jánaha na ña co xini toho na mé á ta jánaha na ña co cúu na cuéntá mé á. <sup>7</sup> Candehé ndó jáchi cúu ndó tátuhun jahyi i. Cuéntá coo ndó ná a jándahvi ni in na ndohó. Jáchi ñayivi ndaa cája ndaa na tá quiahva cája Jesucristo. <sup>8</sup> Joo na xíca nuu cája cuachi cúu ná cuéntá tiñahá sacuahá jáchi janda mé saha nacaja rí cuachi. Sahá ña cán quea naxinu Jesucristo ñuyívi yóho, mé á cúu in tuhún jini já jahyi Ndióxi ta naquixi a jándihi a sahá ña núu cája tiñahá sacuahá.

<sup>9</sup> Ni in tuhún toho na cúu jahyi Ndióxi co xíca na cája na cuachi jáchi viti nanduu na tá quiahva ín mé á. Ta co cuní ga na caca nuu na caja na cuachi jáchi cúu ná jahyi Ndióxi. <sup>10</sup> A íhvi toho ndicuní ndá na cúu jahyi Ndióxi ta ndá na cúu jahyi tiñahá sacuahá. Jáchi na co cája ña ndaa ta na co quíhvi ini ñani

táhan na cán cúú ná jánaha ña  
co cúú ná cuéntá Ndióxi.

*Nditahan nu yo quihvi ini  
táhan í*

<sup>11</sup> Janda mé saha tá  
nandiquehe ndó íchi cuéntá  
Jesús já naxini joho ndó  
ña cáchi tuhun Ndióxi ña  
ndítahan quihvi ini táhan  
í. <sup>12</sup> Co ndítahan caja í tá  
quiahva nacija Caín sanahá  
jáchi nasacuu da cuéntá  
tiñahá sacuaha. Ta nasahní  
da ñani da jáchi mé Caín  
nasacaja da ña núu cuití va  
ta nandicuni da ña vaha cuití  
va nasacaja ñani da.

<sup>13</sup> Candehé ndó, ñani mí  
í, na cúú cuéntá Jesús. A  
cátontó ndo tá cándají ñayivi  
ñuyiví ndohó. <sup>14</sup> Tá quihvi  
iní na cúú cuéntá Jesús já  
quéa sa xini yo sa najáacu  
mé á mí ná a cuhun toho  
í indayá joo cuhun í coo í  
nu ín mé á indiví. Joo ndá  
na co quihvi ini ñani táhan  
na, cúú ná tátuhun in ndii.  
<sup>15</sup> Ta tóco ndihi na cándají ñani  
táhan cúú ná tátuhun in na  
sahní ndii jáchi sahní na ñani  
táhan na ini ínimá na. Ta  
mé ndó sa cándaa ini ndó ña  
ni in na sahní ndii co núná  
nu ná cuhun na indiví cat-  
acu na andá ama cáa quivi.  
<sup>16</sup> Mé Jesucristo najánaha nu  
yo ndá quiahva cája ndusa in  
na quihvi ini ñani táhan jáchi  
naxihí a saha yo. Quiahva  
já ndítahan ri nu mí ví coo  
tiahva í quiví sahá ñani táhan  
í, na cúú cuéntá Jesús. <sup>17</sup> Joo tá  
ín in na ta ín cuahá ndivaha  
ñaha nu ná ta co cuni na chin-  
deé na na cúú cuéntá Jesús,

na ndímaní ñaha nuu já quéa  
a cuú cachi na ña quihvi ini  
na Ndióxi. <sup>18</sup> Mé ndó cúú ndó  
tátuhun jahyi í sahá ña cán  
quéa cáhan í xihin ndo ña xini  
ñuhú jánaha yó xihín ña cája  
í ña quihvi ini ñani táhan í ta  
a juú xihin yuhú ninu uun í  
cuití va.

*Co ndítahan cayihvi yo  
Ndióxi tá cája í ña sahná a*

<sup>19</sup> Tá cája í ña ndaa, ña cuni  
Ndióxi já quéa cándaa ini ña  
cúú yó cuéntá mé á ta ín vaha  
iní xihín mé á. <sup>20</sup> Ta vatí cáhvi  
iní ña coo nacija vaha í joo  
xini vaha chága Ndióxi á mé a  
ndaa nacija núu í á coo a jáchi  
xini mé á tóco ndihi ñaha.  
<sup>21</sup> Candehé ndó ñani máni, na  
cúú cuéntá Jesús. Tá xini vaha  
í ña ndácaan ña vaha ínimá yo  
já quéa co yihvi toho í cahan í  
xihin á. <sup>22</sup> Ta mé Ndióxi quéa  
quiahva tóco ndihi ña xica yó  
nu á jáchi mé a ndaa cája í  
ña sahná a nu yo ta cáji ini  
mé á xihín ña cája í. <sup>23</sup> Ta ña  
sahná Ndióxi nu yo cúú á ña  
ná candeé ini Jesucristo, mé a  
cúú in tuhún jini já jahyi mé  
á. Ta sahná a nu yo ña ná  
quihvi ini táhan í tá quiahva  
natahnda chuun nu yó caja í.  
<sup>24</sup> Ta na cája ña sahná Ndióxi  
in nanduu na xihin mé á ta  
in nanduu mé á xihin na. Ta  
sahá ña nasacu Ndióxi ínimá  
yii mé á ini in in í sahá ña  
cán quéa náha ña in nanduu  
yó xihin mé á.

## 4

*Ínimá yii Ndióxi co ndique  
táhan xihin ínimá quini ña*



*ndácaan ini na cō cúní táhan xihín Jesucristo*

<sup>1</sup> Candehé ndo, ñani mí i, na cúu cuéntá Jesús. A cándúsa ndó tóco ndihi na cáchí ña cúu ná cuéntá Ndióxi jáchi cuaha ná cúu ná na tuhún. Ña xíní ñúhú caja ndó queá coto ndojó ndó na já ná candaa ini ndó á mé a ndaa ndácaan ínimá yii Ndióxi ini na á cōó a. Jáchi cuahá ndivaha na tuhún nandicuita nuu na ñuyiví yóho jándahvi na ñayivi vatí cáchí na cáhan na cuéntá Ndióxi. <sup>2</sup> Xihín ña yóho cuu candaa ini ndó ndá na cúu na ñúhu ínimá yii Ndióxi ini jáchi tóco ndihi na cándúsa ña nanduu Jesucristo in ñayivi ñuyiví yóho na cán cúu ná na ñúhu ínimá yii Ndióxi ini. <sup>3</sup> Joo na cō cándúsa ña nanduu Jesucristo in ñayivi ñuyiví yóho, na cán cúu ná na cō ñúhu ínimá yii Ndióxi ini jáchi ña ndácaan ini na cán cúu ínimá quini, ña cō cúní táhan xihín Jesucristo. Sa naxini johó ndó ña quixi tá quixi mé ínimá quini, ña cō cúní táhan xihín Jesucristo ta sa ín a ñuyiví yóho viti.

<sup>4</sup> Candehé ndo jáchi cúu ndó tátuhun jahyi i ta cúu ndó cuéntá Ndióxi. Nacandee ndó nasahnu ndó nuú na jánaha ña tuhún jan jáchi tóyí chága ínimá yii Ndióxi ndácaan ínimá ndo a juú ga ínimá quini ndácaan ínimá ñayivi ñuyiví.

<sup>5</sup> Mé na jan cúu ná cuéntá ña núu ñuyiví yóho ta ñaha ñuyiví yóho cuití cáhan na saha. Ta ñayivi ñuyiví táa johó na ña cáhan na. <sup>6</sup> Joo mí cúu yó

cuéntá Ndióxi. Sahá ña cán queá na cúu cuéntá Ndióxi xíní johó na ña cáhan yo. Joo na cō cúu cuéntá Ndióxi cō xíní johó na ña cáhan yo. Ta xihín ña yóho cuu ndicuní ndá na cúu na ndácaan ínimá yii Ndióxi ini ta ndá na cúu na ndácaan ínimá quini ini. Jáchi ña ndaa cúu ínimá yii Ndióxi ta ínimá quini cúu á ña tuhún.

*Quíhvi ini ndusa Ndióxi ñayivi*

<sup>7</sup> Candehé ndo, ñani máni, na cúu cuéntá Jesús. Xíní ñúhú quíhvi ini táhan í jáchi ña yóho quixi a cuéntá Ndióxi. Tóco ndihi na quíhvi ini ñani táhan cúu ná jahyi Ndióxi ta xíní na yo cúu Ndióxi.

<sup>8</sup> Na cō quíhvi ini ñani táhan jánaha na ña cō xíní na Ndióxi jáchi Ndióxi queá sahan nu yo ña ná quíhvi ini táhan í. <sup>9</sup> Ta nachindahá Ndióxi Jesucristo, mé in tuhún jiní já jahyi a ñuyiví yóho ña ná quivi a saha yo já ná catacú anda ama cáa quivi. Xihín ña yóho najánaaha Ndióxi ndá quiahva quíhvi ini a mí.

<sup>10</sup> Candehé ndo ndá quiahva quíhvi ini Ndióxi mí. A juú jihna ñúhú mí naquíhvi ini Ndióxi jáchi jihna ñúhú ga Ndióxi naquíhvi ini a mí. Ta nachindahá a Jesucristo, mé in tuhún jiní já jahyi a ña ná chahvi mé Jesús sahá ndihi cuachí tá naxihí a ndica crúxu.

<sup>11</sup> Candehé ndo, ñani máni, na cúu cuéntá Jesús. Tá ta quiahva johó nacaja Ndióxi sahá ña quíhvi ini a mí já queá

ndítahan ri nu mí ví quíhvi ini táhan í. <sup>12</sup> Ni in ñayivi coo naxini xihín nuu ná Ndióxi. Joo ñúhú mé á iní tá quíhvi ini táhan í. Ta xihín ña yóho jáxinu coo í ña quíhvi ndusa iní ñani táhan í. <sup>13</sup> Ta sahá ña nasacu Ndióxi ínima yíí mé á ini in in yó sahá ña cán queá náha ña in nanduú xihín mé á ta in nanduú mé á xihín yo. <sup>14</sup> Ta mé nde naxini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cúu in túhún jini já jahyi a ña ná jácacu a ndaja táhan na ndúu ñuyívi. <sup>15</sup> Ndá na cándúsa ña cúu Jesucristo in túhún jini já jahyi Ndióxi, na jan cúu na in nanduú xihín Ndióxi ta in nanduú Ndióxi xihín ná.

<sup>16</sup> Ta viti sa nacandaa iní ta cándúsa í ña mé a ndaa quíhvi ini Ndióxi mí. Ta ndá na quíhvi ini Ndióxi já in nanduú na xihín Ndióxi ta in nanduú Ndióxi xihín ná. <sup>17</sup> Ta xihín ña yóho jáxinu coo í ña quíhvi ini ñani táhan í xihín ndinuhu iní. Sahá ña cán queá tá ná xinu coo quívi caja víi Ndióxi sahá ñayivi já queá a cácahan nuu yo tá candichí nu Ndióxi. Jáchí tá quiahva nasacaja Jesucristo tá nasahjin a ñuyívi yóho quiahva já cája í viti. <sup>18</sup> Mé a ndaa quíhvi ini Ndióxi mí ña cán queá co yíhvi toho í mé á. Jáchí tá ná cahán yo jándoho Ndióxi iní já queá cayíhvi yo mé á. Joo tá ná candaá vaha iní ña mé a ndaa quíhvi ndusa ini Ndióxi mí já queá a cáyíhvi toho í mé á.

Ña cán queá tá yíhvi yo mé á já queá co xini yo ña quíhvi ndusa ini a mí.

<sup>19</sup> Quíhvi iní Ndióxi jáchí jhna ñúhú ga mé á naquíhvi ini a mí. <sup>20</sup> Joo tá in in na ta cáchí na quíhvi ini na Ndióxi joo cándají na ñani táhan na já queá jánaħa na ña cúu ná na túhún. Jáchí tá co quíhvi ini na ñani táhan na, da sándeħé na xihín nuu ná ndaja caja na cachi na quíhvi ini na Ndióxi, ña a cúu cuni tívi na. <sup>21</sup> Nasahnda Jesucristo chuun yóho nu yo: Ndá na quíhvi ini Ndióxi já ndítahan nu ná quíhvi ri ini na ñani táhan na viti.

## 5

*Ndaja caja í quee vaha í xihín ña núu ndúu ñuyívi yóho*

<sup>1</sup> Tóco ndihi na cándúsa ña cúu Jesús mé á nachindahá Ndióxi cacomí a cuéntá sahá ñayivi, na jan cúu ndusa jahyi Ndióxi. Ta ndá na quíhvi ini Ndióxi, tátá yo, xini ñúhú quíhvi ri ini na tóco ndihi na cúu jahyi mé á. <sup>2</sup> Tá quíhvi iní Ndióxi ta tá cája í ña sáhdá mé á nu yó caja í, xihín ña yóho cándaá cáxi iní ña quíhvi iní na cúu jahyi Ndióxi. <sup>3</sup> Ta na cája ña sáhdá Ndióxi, na cán cúu na jánaħa ña mé a ndaa táhyí quíhvi ini na mé á ta chuun sáhdá mé á nu yo co cúu á in ñaha ña a cúu candéé yó xihín. <sup>4</sup> Ta tóco ndihi na cúu ndusa jahyi Ndióxi candéé na sáħnu na nuú ña núu ñuyívi yóho. Sahá ña cán queá tá candéé iní Jesucristo já queá quee vaha í xihín ña

núu ndúu ñuyíví yóho. <sup>5</sup> Ndá na cándúsa ña cúú Jesucristo in túhún jini já jahyi Ndióxi, na cán cúú na cándeé sáhnú núú ña núu ndúu ñuyíví yóho.

*Sáhan ínimayii Ndióxi tūhun sahá Jesús ña cúú á in túhún jini já jahyi Ndióxi*

<sup>6</sup> Tá naquixi Jesucristo ñuyíví yóho já naçandúta mé á xihín ticuúí. Ta jári naxita nji á tá naxihí a ndica crúxu saha yo. Naçaja Jesucristo ndíví ña yóho: naçandúta xihín ticuúí ta naxita nji á tá naxihí a ndica crúxu. Ta mé ínimayii Ndióxi sáhan tūhun sahá ña yóho ta ña cáhan mé á cúú á ña ndaa. <sup>7</sup> Ndúu uní testigo indiví ta sáhan tūhun sahá Jesús ña cúú á in túhún jini já jahyi Ndióxi: In testigo cúú Ndióxi, tátá yo ta inga testigo cúú tūhun Ndióxi ta inga testigo cúú ínimayii Ndióxi. Ta in cúú ndihuni a sáhan tūhun sahá Jesús. <sup>8</sup> Ta ndúu uní testigo ñuyíví yóho. Ta in testigo cúú á ínimayii Ndióxi ta inga testigo cúú á tá naçandúta Jesús ta testigo cáhuni cúú á tá naxita nji Jesús ndica crúxu. Ta ndihuni testigo yóho sáhan tūhun a sahá Jesús ña cúú á in túhún jini já jahyi Ndióxi. <sup>9</sup> In tiahva í cándúsa í ña cáhan ñayivi xihin yo tá sáhan na tūhun sahá in ñaha. Ña cán quéa ama ná a cándúsa í ña cáhan Ndióxi xihin yo jáchi ña cája mé á quéa sáhan tūhun sahá Jesucristo, jahyi a ta ña yóho cúú á ña ndiyahvi chaga a juú ga ña cáhan ñayivi.

<sup>10</sup> Ta tá cándúsa í ña cúú Jesucristo in túhún jini já jahyi Ndióxi já cúú á tátūhun ndiquehe vaha í ña cáchi mé á ini ínimay yo. Joo na co cándúsa ña yóho ndája na ña ná nduu Ndióxi ña tūhún jáchi co cándúsa na ña cáhan mé á sahá Jesucristo, jahyi a. <sup>11</sup> Ta tūhun sáhan Ndióxi cúú ña yóho: Nasahan mé á ñamaní catacú anda ama cáa quivi. Ta Jesucristo, jahyi mé á quéa cája ña ná catacú indiví anda ama cáa quivi. <sup>12</sup> Ta ndá na nandiquiahva mé ndáha Jesucristo, mé á cúú in túhún jini já jahyi Ndióxi, na jan cúú na catacu na anda ama cáa quivi nu íin mé á. Joo ndá na coo naxeen ndiquiahva mé ndáha mé á a cúu catacu na anda ama cáa quivi xihin mé á.

*Cáhyí chaga Juan sahá ña ndítahan caja í*

<sup>13</sup> Cáhyí í ña yóho nu ndóhó, na cándeé ini Jesucristo, jahyi Ndióxi já ná candaa ini ndó ña catacu ndó indiví anda ama cáa quivi.

<sup>14</sup> Ta co yihví toho í xica í nu mé á in ñaha, ña cuni a quiahva nu yo jáchi candaa cáxí iní ña xini joho a nu cáhan yo. <sup>15</sup> Ta tá candaa iní ña xini joho Ndióxi nu cáhan yo já quéa cándeé iní ña quiahva tá quiahva mé á ña nu yo.

<sup>16</sup> Tá ná cuni ndó ñani ndó, na cúú cuéntá Jesús ta caja na cuachi ña cuu caja cáhnu ini Ndióxi saha já quéa ndítahan caça tahví ndó nu Ndióxi sahá na cán. Ta xihín ña yóho caja cáhnu ini Ndióxi sahá na jan

já ná catacu na anda ama  
 cáa quivi. Joo ín cuachi ña  
 cañehe ñahá cuhun indayá ta  
 co ndítahan caça tahví yo nu  
 Ndióxi sahá ña jan. <sup>17</sup> Tóco  
 ndihi ña núu cája í ñuyívi yóho  
 cúu á cuachi nu Ndióxi joo  
 cuahá ndivaha cuachi cája  
 cáhnu ini Ndióxi saha.

<sup>18</sup> Ta cándaá ini ña tóco  
 ndihi na cúu jahyi Ndióxi co  
 xíca ga na núu cuachi jáchi  
 ndáá Jesucristo mé ná, mé  
 á cúu in túhún jini já jahyi  
 Ndióxi já ná a cája tiñahá  
 sacuaḥa ni in ña núu xihin ná.

<sup>19</sup> Cándaa vaha ini ña cómi  
 Ndióxi cuéntá saha yo joo  
 tóco ndihi ñayivi cuéntá  
 ñuyívi ñúhu na ndahá tiñahá  
 sacuaḥa ta cómi rí cuéntá  
 saha ná.

<sup>20</sup> Ta cándaá cáxi ini ña  
 naquixi Jesucristo, mé á cúu  
 jahyi Ndióxi ta najándiyehé a  
 xini túni yo já quéa ná candaá  
 ini ña cúu mé á ña ndaa. Ta  
 viti in nanduú xihin mé á  
 jáchi in nanduú xihin Jesu-  
 cristo, mé a cúu in túhún jini  
 já jahyi Ndióxi. Mé a yóho cúu  
 ndusa Ndióxi ta cúu á ña cája  
 ña ná catacú anda ama cáa  
 quivi. <sup>21</sup> Candehé ndo. Mé  
 ndó cúu ndó tátuhun jahyi i  
 ña cán quéa cáhan i ña yóho  
 xihin ndo. Coto a cája cáhnu  
 ndó ni in yoco ta ni a cája  
 cáhnu ndó ni in ñaha tá co cúu  
 á Ndióxi. Já ná coo.

## Carta chí ivi naca<sub>h</sub>yí Juan nuú na cúu cuéntá Jesús

*Cáhan Ndióxi Juan xihín na cúu cuéntá Jesús*

<sup>1</sup> Yehe cúu u in da sacua<sub>h</sub>a ta cáhyí i carta yóho nu ndóhó, quiahva i na cúu cuéntá Jesús jáchi naca<sub>x</sub>i Ndióxi ndohó. Tá jári cáhyí i carta yóho nuú jáhyi ndó jáchi mé a ndaa quíhvi ndivaha ini i ndihi ndó. Ta a juú yehe cuití va jáchi tóco ndihi na nacandaa ini ña ndaa quíhvi ini na ndohó. <sup>2</sup> Quíhvi ini i ndohó jáchi ndacaan ña ndaa ini ínimá ndihí ta anda ama cáa quívi coo a xihín yó. <sup>3</sup> Ña cúni quéa ña ná caja Ndióxi, tátá yo xihín Jesucristo, jáhyi mé á cuahá ñamani xihín yo. Ta ná tahnda ini mé á saha yó ta ná caja mé á ña ná coo vaha iní. Ta cuu caja mé á ña yóho jáchi cúu á ña ndaa ta quíhvi ini a mí.

<sup>4</sup> Cáji ndivaha ini i jáchi nanditahan i java jáhyi ndó ta cája na ña ndaa tá quiahva nasahnda Ndióxi, tátá yo caja í. <sup>5</sup> Candehé ndo quiahva i, na cúu cuéntá Jesús. Xíca tahví i nu ndó ña ná quíhvi ini táhan í. Ta ña cáhyí i yóho co cúu á chuun saá jáchi cúu á ña sa naxini joho í janda mé saha tá nandiquehé íchi cuéntá Jesús. <sup>6</sup> Ta tá mé a ndaa quíhvi iní Ndióxi náha ña mé a ndaa cája

í ña sáhnda Ndióxi caja í. Ta ña nasahnda Ndióxi caja í janda mé saha cúu á ña ná quíhvi ini táhan í.

*Na xíca nuu jándahvi na cúu cuéntá Jesús*

<sup>7</sup> Níi cúu ñuyíví nandicuita cuahá na xíca nuu jándahvi na na cúu cuéntá Jesús. Ta na cán co cúni na ndicuni na ña nanduu Jesucristo in ñayivi ñuyíví yóho. Ta na cán cúu ná na tuhún ta cúu ná na co cúni táhan xihín Jesucristo. <sup>8</sup> Cuéntá coo ndó ná a jándahvi na ndohó já ná a tívi chuun naca<sub>j</sub>a ndó sahá Jesucristo. Xiní ñuhú jáxinu coo ndó chuun cája ndó cuéntá mé á já ná cuu quiahva mé á tóco ndihi ña ndítahan nu ndó ndiquehe ndó sahá mé chuun naca<sub>j</sub>a ndó.

<sup>9</sup> Ta ndá na quéta xoo nuú ña najána<sub>h</sub>a Jesucristo ta co xíca ndacú na íchi cuéntá mé á, na cán náha ña coo in nanduu na xihín Ndióxi. Joo ndá na xíca na cája na ña najána<sub>h</sub>a Jesucristo, na cán cúu na in nanduu xihín Ndióxi, tátá yo ta in nanduu na xihín Jesucristo, jáhyi mé á. <sup>10</sup> Ta ndá na vaxi nu ndo ta co jána<sub>h</sub>a na ña najána<sub>h</sub>a Jesucristo nu ndo já quéa a ndíquehe ndó na cán vehe ndó ta ni a cáhan Ndióxi ndó xihín ná. <sup>11</sup> Jáchi tá ná jáyaha ndó na cán vehe ndó já quéa in nanduu ri mé ndó xihín na ta catáhan ndó xihín ña núu cája na.

*Ndíndayí Juan na cúu cuéntá Jesús*

<sup>12</sup> Íin cuahá ndivaha ñaha  
 cúni cahan i xihin ndo joo co  
 cúni cahyí i ña nu ndo. Jáchi  
 ña cúni quéa saa i coto nihni  
 i ndohó já ná cuu nditúhún  
 yo ña ná cavatá ndivaha ini  
 ndihí.

<sup>13</sup> Ta na cúu jahyi quihvi  
 ndo chindahá na Ndióxi coo  
 ndó jáchi mé ñá cúu ñá ñá  
 nacaxi Ndióxi viti. Já ná coo.

## Carta chí uní nacahyí Juan nuú na cúu cuéntá Jesús

*Cáhan Ndióxi Juan xihín in da naní Gayo*

<sup>1</sup> Yehe cúu u in da sacuaaha ta cáhyí i carta yóho nu mún ñani máni, da naní Gayo. Ta mé a ndaa quíhvi ndusa ini i yohó.

<sup>2</sup> Candehé, ñani máni, da cúu cuéntá Jesús. Xíca tahví i nu Ndióxi ña ná quiahva mé á tá nuú ña vaha nuun. Ta ná caja mé á ña ná a quíhvun ta já coo vaha inún tá quiahva íin vaha inún xihín Ndióxi. <sup>3</sup> A juú quiahva ná cajii íni i tá naquixi java na cúu cuéntá Jesús yóho ta nandicani na nuú i ña co caxóun nuú ña ndaa jáchi cája tá cájún ña. <sup>4</sup> A juú quiahva cajii íni i tá ñéhé e tuhun ña xíca ndó íchi cuéntá ña ndaa jáchi mé ndó cúu ndó tátuhun jahyi i.

<sup>5</sup> Candehé, ñani máni. Vaha ndivaha cájún jáchi xihín ndinuhu inún chindeún na cúu cuéntá Jesús tá saa na jan vatí cúu ná na quíxi ñuu tóho. <sup>6</sup> Ta nu tóco ndihi na táca veñuhu yóho ndícani mé na tóho ndá quiahva quíhvi ndivaha inún na. Ña cán quéa xíca i ñamaní nu yóhó, Gayo ña ná chindeún na tá ná saa tucu na cán ta ná quiahvún ña ndímaní nu ná cañehe na íchi cuhun na jáchi ña yóho cúu á ña cajii íni

Ndióxi xihín. <sup>7</sup> Ndítahan chindeún na jáchi naqueta na xíca nuu na cája na chuun cuéntá Jesucristo ta co cúni na caca na ñaha catacu na nuú na co cúu cuéntá Jesús. <sup>8</sup> Sahá ña cán quéa ndítahan nu mí, na cúu cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cáhan na ña ndaa xihín ñayivi.

*Cuachi cája in da naní Diótrefes*

<sup>9</sup> Sa nachindahá i in carta nu tóco ndihi na cúu cuéntá Jesús ndúu jan joo Diótrefes coo naxeen da cándusa da ña cáchi nde. Jáchi cája cáhnu da mé dá ta cúni da cacuu da jini nu tóco ndihi na cúu cuéntá Jesús ndúu jan. <sup>10</sup> Sahá ña cán quéa tá ná saa i jan caxi tuhun i nuun sahá ña cája da jáchi xíca nuu da cáhan ndivaha da ña tuhún sahá nde. Ta a juú ña yóho cuití cája da, vaha jáchi ni co cúni da ndiquehe da na cúu cuéntá Jesús xínu coo jan. Ta sáji nuu da nuú na cúni ndiquehe vaha ñaha ta janda táxi da na veñuhu.

<sup>11</sup> Candehé, ñani máni. A cájún ña núu tá quiahva cája Diótrefes jan. Xíni ñúhú cajún ndinuhu ña vaha jáchi da cája ña vaha cúu dá cuéntá Ndióxi joo da cája quini co xini da Ndióxi.

*Ña vaha cája Demetrio*

<sup>12</sup> Joo tóco ndihi na cúu cuéntá Jesús cáhan vaha na sahá da naní Demetrio jáchi ña ndaa cuití va cája da. Ta quiahva já cáhan vaha ri

ndehe va saha dá ta cándaã  
inún ñã cáhan nde ñã ndaa.

*Ndíndayí Juan Gayo*

<sup>13</sup> Mé a ndaa ín cuahá  
ndivaha ñaha cúni cahan  
i xuhun joo co cúni cahyí  
i ñã nuú tutu yóho <sup>14</sup> jáchi  
cúni cuni yachi i yohó já ná  
nditúhún yúhu mí i xuhun.

<sup>15</sup> Ñã xíca i nu Ndióxi quéa  
ná caja mé á ñã ná coo vaha  
inún. Na cúu cuéntá Jesús  
ndúu yóho chindahá na Ndióxi  
coún. Ta cajún ñamaní cahan  
Ndióxi lohún xihín in in na  
cúu cuéntá Jesús ndúu jan.



## Carta nacahyí Judas nuú na cúú cuéntá Jesús

*Cáhyí Judas carta nuú na nacaxi Ndióxi cacuu na cuéntá mé á*

<sup>1</sup> Yehe cúú Judas, da cája chúun cuéntá Jesucristo ta cúú u ñani Jacobo. Cáhyí i carta yóho nu ndóhó jáchi cúú ndó na nacana Ndióxi, tátá yo. Cúú ndó na quíhvi ini mé á ta cúú ndó na ndáá Jesucristo jáchi in nanduu ndó xihín mé á. <sup>2</sup> Ña xíca tahví i nu Ndióxi queá ña ná tahnda ndivaha ini mé á saha ndo. Ta ná caja mé á ña ná coo vaha ndivaha ini ndó. Ta ná chutú ndaa ini ndó xihín ña quíhvi ini a ndohó.

*Cáhan Judas sahá na jánaħa ña tuhún  
(2 Pedro 2:1-17)*

<sup>3</sup> Candehé ndo, ñani mí i, na cúú cuéntá Jesús. A juú quiahva naxinu ini i cáhyí i nu ndo saha ndá quiahva najáca cu Ndióxi ndihí. Joo viti ndíhi ini i cáhyí i carta yóho nu ndo ná caça tahví i nu ndo ña ná a jándacoo ndó ña cándéé ini ndó Jesucristo jáchi ña yóho cúú á ña in tañu cuití va nasahan Ndióxi nu yo, na cúú cuéntá mé á. <sup>4</sup> Jáchi java ñayivi nandaja na mé ná tátuhun na cúú cuéntá Jesús ta naquihvi nuu na tañu ndó jan. Mé ñayivi yóho cúú ná na sa cáhan tuhun Ndióxi saha janda jihna ndivaha ta

cáchí a ndítahan nu ná cuhun na indayá. Cúú ná ñayivi quini jáchi jánaħa na ña tá sa nacaja cáhnu ini Ndióxi sahá cuachi na já cuu caja na tá nuú cuachi ña cúni mé ná. Ta xihín ña yóho náħa ña co xéen na candúsa na Ndióxi, mé á cómi cuéntá saħa tóco ndihi ñaha. Ta jári náħa ña co cúú ná cuéntá Jesucristo, xitoho í.

<sup>5</sup> Sa xini ndo ña nandoho na Israel tá natavá Ndióxi na ñundáhyi Egipto sanahá. Ta viti jándicuhun ini i ndohó ña vatí natavá Ndióxi tóco ndihi na Israel cán Egipto joo tá nandihí najándihí a sahá na coó naxeen candúsa ñahá. <sup>6</sup> Ta quiahva já nacaja ri mé á xihín na nasacuu tátó mé á jáchi coó naxeen na caja na ña cúni Ndióxi ta najándacoo na nuú nasanduu na. Sahá ña cán queá nachicaji Ndióxi na nu naá ndivaha nu ñúhu na anda ama cáa quivi. Ta ndáti na cán xinu quivi caja vii mé á saħa ná. <sup>7</sup> Ta tá quiahva nacaja Ndióxi xihín mé tátó cán quiahva já nacaja ri a xihín ñayivi ñuu Sodoma xihín na ñuu Gomorra ta xihín na nanduu ñuu ñéhe táhan xihín ndívi ñuu yóho. Najándihí Ndióxi saħa ná jáchi nandiquiahva na yiquí cuñu na ña ná caja na tá nuú cuachi. Ta ndaja táhan mé taa nacaja cuachi xihín táhan da. Sahá ña cán queá najácuyu Ndióxi ñúhu cáyi jata ná. Ta quiahva já ndoho na anda ama cáa quivi. Ta xihín ña yóho jánaħa Ndióxi nu yo ña quiahva já cuu ndoho ri mé

ví tá cō cája í ña cúní mé á.

<sup>8</sup> Tá quiahva ñacaja ñayivi sanahá quiahva já cája ri na jándahvi ndohó viti. Jáchi cúú ná ñayivi quini, na cája cuachi ta tá xíní na cája na in cuachi já cuahan na cája ná ña. Mé na cán cája na ña núu xihín yiquí cuñu na ta quehe núu na Ndióxi jáchi cō quehe na cuéntá nu cáhan mé á xihín ná ta cō yíhví na cánahá na xihín táto Ndióxi indivi, mé á in ndée cája cuahá ñaha.

<sup>9</sup> Ta janda mé á cúú sacuahá nu tóco ndihi táto Ndióxi naní a Miguel ni cōo ñacanahá a xihín tiñahá sacuahá. Ta ni cō naxeen a cahan núu a xihín rí tá ñacani táhan mé á xihín rí sahá yiquí cuñu Moisés. Ña ñacachi a xihín rí queá: “Ndióxi ná jananí a yohó”, ñacachi a xihín rí. <sup>10</sup> Joo ñayivi quini, na xíca jándahvi na cúú cuéntá Jesús yóho, cō yíhví na cánahá na xihín ña cō cándaá ini na saha. Joo cája na ña xíca ini yiquí cuñu jáchi cúú ná tátuhun quiti, rí cō xíní túní ta ña núu cája na yóho jándihi a saha ná.

<sup>11</sup> Ndáhví ndivaha ñacuu na jan jáchi cája na tá quiahva ñacaja Caín, da ñasahní ñani sanahá ndivaha. Ta jatá jjuhún cuití va cája na ñaha tá quiahva ñacaja Balaam sanahá. Ta cája ri na tá quiahva ñacaja Coré sanahá tá ñandiñehe yúhu dá nu Ndióxi. Ta sahá ña yóho ndihi saha ná. <sup>12</sup> Jáchi na jándahvi ndohó jan jácacahan na nu ndo tá táca ndo xíxi ndó xihín java na cúú cuéntá Jesús.

Jáchi yáha ndivaha ña xíxi na jan ta cōo toní ñuhú na xihín ña cája na. Ta saha mé cuití va na ndíhi ini na. Cúú ná tátuhun víco núhú, ña xíca nuu cája tachí ña cō ndójo javí. Ta cúú ná tátuhun yíto cuihi, do cō cúun ñaha nuu tá ndítahan cuun cuihi nu do. Cúú ná tátuhun yíto, dó ñatuhun na janda yóho dó jáchi cōo ñacuu cuihi nu do. Ta cúú ná tátuhun na ñandihí saha chí in ndee. <sup>13</sup> Ña cája na jan cúú á tátuhun yáco cándo nuu chíquiñu tañuhú tá ndícojo do jáchi ña cácahan nuu yo cúú ña cája na jan. Cúú ná tátuhun quimi, rí najana ta cō ndíñehe rí nuú ñasahjin rí. Ta sahá ña cája na cañuhu na nuú naá ndivaha anda ama cáa quivi caja Ndióxi.

<sup>14</sup> Ta janda sanahá da naní Enoc, da ñasacuu da usa nuú chíchi Adán najáyaha da tuhun ñacahan Ndióxi sahá ña núu cája na jándahvi ndohó cán. Ta já ñacachi da já: “Candehé ndó. Sa vaxi Jesucristo, xitoho í xihín cuaha mil táto yíi mé á <sup>15</sup> ña ná caja víi a saha tóco ndihi na ndúu ñuyíví. Ta jándoho a ini tóco ndihi ñayivi sahá ndihi ña núu ñacaja na. Ta quiahva já jándoho a ini na saha tóco ndihi tuhun ihví ñacahan na saha mé á”, ñacachi Enoc saha ná. <sup>16</sup> Mé ñayivi quini yóho ni in ñaha cō táhan ini na xihín ta cáhan núu na saha tóco ndihi ñaha. Ta núi tiempo cája na ña xíca yiquí cuñu na cuití va. Ta

ndíñehe jícó ndivaha na mé ná tá cáhan na nuú ñayivi. Ta cáhan vaha na sahá ñayivi ña ná nuná nuu ná jándahvi ñahá na.

*Jácahan Judas na cúu cuéntá Jesús ña ná candee cáhnu ini na Ndióxi*

<sup>17</sup> Candehé ndo, ñani máni, na cúu cuéntá Jesús. Xíní ñúhú ndicuhun ini ndó ña nacachi na apóstol cuéntá Jesucristo, xitoho í xihin ndo sanahá. <sup>18</sup> Mé na cán nacachi na xihin ndó já: “Tá ná cayati quiví ndihi sahá ñuyiví yóho já quéa cacu nuu ñayivi cuacu ndaa na Ndióxi. Ta caja na tá nuú ña núu ña xica ini mé ná caja na”, nacachi na cán. <sup>19</sup> Mé ñayivi quini yóho cúu ná na xica sáhdá java táhan na cúu cuéntá Jesús. Ta cája na ña núu ña cáhvi ini na caja na ta co ndacaan ínimá yii Ndióxi ini na.

<sup>20</sup> Joo mé ndó, ñani máni, na cúu cuéntá Jesús xíní ñúhú coo ndacú ini ndo xihín ña cándee ini ndó Jesús jáchi ña jan cúu á ña yii ndivaha. Ta xíní ñúhú caça táhvi ndo nu Ndióxi xihin ndée ña sahan ínimá yii mé á nu ndo. <sup>21</sup> A cáxoo ndó nu Ndióxi jáchi quíhvi ini a ndohó. Ta candati tiahva ndó xinu coo quiví caja Jesucristo, xitoho í ña ná catacú anda ama cáa quiví jáchi mé a ndaa táhvi ini a saha yo.

<sup>22</sup> Ta ndítahan candáhvi ini ndó ndá na cáhvi ivi joho ini saha Jesús. <sup>23</sup> Já quéa jácacu Ndióxi na ña ná a cuhun toho na indayá. Xíní ñúhú

candáhvi ini ndó na. Joo cuéntá coo ndó xihin ná já ná a casáhá ndo caja ndó cuachi tá quiahva cája mé ná jáchi na cán cuu jácaquini na ndohó.

*Cája cáhnu Judas Ndióxi*

<sup>24</sup> Mé Ndióxi quéa íin tóco ndihi ndée chindeé a mí ña ná a ndácava í nuú cuachi já ná cuu coo víi yo tá ná xinu coo í nu íin mé á. Ta caja mé á ña ná chutú ndaa yo xihín ña cájii ini tá ná xinu coo í nu íin mé á ta a juú quiahva ndató cáa cán. <sup>25</sup> In túhún jini mé á cúu Ndióxi, mé á jácacu mí sahá ña nacaja Jesucristo, xitoho í. Cóho caja cáhnu í Ndióxi jáchi yéhe ndivaha mé á ta cáhnu ndivaha cúu á ta íin cuahá ndée á ta mé á quéa cómi cuéntá saha tóco ndihi ñaha. Cáhnu cúu mé á viti ta anda saha ta anda ama cáa quiví cáhnu cúu mé á. Já ná coo.

## Ña najánaha Jesucristo nu Juan

*Tá nanaha Jesucristo mé á nu Juan*

<sup>1</sup> Ña yóho cúú ña nanaha Ndióxi nuú Jesucristo ña ná cuu jánaha mé á ña nuú na cúú cuéntá mé á. Ta nāchindahá Jesucristo in táto mé á nuú yehe, da cúú Juan, da cája chúun cuéntá mé á já ná caxi tuhun táto mé á xihín i ndá a quéa yaha chága chí nuu. Ta cúú á ña sa cáyati vaxi. <sup>2</sup> Ta ndícani ndaa ndihi i sahá ña naxini i xihín nuú i ta nācahyí i tóco ndihi ña yóho. Ta nāsañan Jesucristo tuhun a nuú i ña cúú á ña ndaa.

<sup>3</sup> Cajji ini ñayivi tá cáhvi na ña nācahyí i yóho ta cajji ini na xini joho na ña yóho nani cáhvi inga na ña jáchi cúú á ña naquixi cuéntá Ndióxi. Cajji ini ñayivi tá cája na ña cáchí a jáchi sa nācayati quiví coo tóco ndihi ña yóho.

*Cáhyí Juan ña yóho nu ndíhusa ñuu nu ndítaca na cúú cuéntá Jesús*

<sup>4</sup> Yehe cúú Juan ta cáhyí i carta yóho nuú ndíhusa ñuu nu ndúu na cúú cuéntá Jesús estado Asia. Ña cúni quéa ná caja cuaha Ndióxi ñamaní xihín ndó ta ná caja mé á ña ná coo vaha ini ndó. Mé Ndióxi ín a viti ta nāsañin a janda tá cámaní cava sáha saha ñuyiví ta quixi a ñuyiví

yóho. Ta cúni ña ná caja cuahá ínima yii Ndióxi ñamaní xihín ndo. Mé a cán cáa tátuhun usa ínima yii ta ndúu na nu Ndióxi, mé nu ín coo a cómi a cuéntá sahá indiví cán. <sup>5</sup> Ta cúni ña ná caja cuahá Jesucristo ñamaní xihín ndo, mé á cáhan ña ndaa sahá ña naxini a. Ta mé á nāsaucu ña nu cuítí nānditacu tañu na sa naxihí. Ta cómi a cuéntá saha tóco ndihi rey, na cómi cuéntá sahá ñayivi ñuyiví yóho. Ta quíhvi ini Jesucristo mí ta najándoo a cuachí tá naxita nii á ndica crúxu. <sup>6</sup> Ta tóco ndihi mí, na cāndeé ini mé á najándique táhan mé á mí já ná cacomí a cuéntá saha yo. Ta nāndaja mé á mí nānduú tátuhun jutú ña ná caja cáhnu yó Ndióxi, mé a cúú tátá Jesucristo. Cáhnu ná cacuu mé á anda ama cáa quiví jáchi ín ndée mé á caja tóco ndihi ñaha anda ama cáa quiví. Já ná coo.

<sup>7</sup> Sa nācayati quiví quixi Jesucristo tañu viço. Ta tóco ndihi ñayivi cuni ñahá ta janda na nāsañni ñahá cán cuni na a. Ta tóco ndihi ñayivi ndúu ndijáá ñuu ní cúú saha ñuyiví canduu cuéha ndivaha ini na saha mé á. Já ná coo.

<sup>8</sup> Ta já cáchí Jesucristo, xi-toho í saha mé á: “Yehe cúú mé a nu cuítí ta yehe cúú mé a nu ndihí jáchi janda tá cámaní cava sáha saha tóco ndihi ñaha sa ín va yehe ta coo tá coo i vatí ná ndihi saha”, cáchí a. Mé a cúú Ndióxi, ña ín ndée cája tóco ndihi ñaha. Ta mé á ín a viti ta nāsañin a janda tá cámaní

çava sáhá saha ñuyíví ta quixi a ñuyíví yóho.

*Náha Jesucristo nu Juan ndá quiahva cáhnu cúu mé á*

<sup>9</sup> Yehe cúu Juan ta cúu u ñani ndó, na cúu cuéntá Jesús. Ta sahá ña cándéé ini i Jesús sahá ña cán quea ñañehe táhvi i xihín mé ndó cacomí Ndióxi cuéntá saha ndihí. Ta coó caja toho ña ná ndoho iní ñuyíví yóho jáchi sahan Ndióxi tuhun ndéé iní já ná cuu caja ndéé iní tá ndóho iní. Natava xóo na yehe ta nasahan ñehe na yehe isla naní Patmos sahá ña naxica nuu i nacahan i tuhun Ndióxi, ña cúu ña ndaa, ña najánaaha Jesucristo nuu i. <sup>10</sup> Ta ndaja coo nandindaa quivi coo ña nasacu ini Jesucristo, xitoho í ta mé tañu já nachutú ndaa ínimá i xihín ínimá yíi Ndióxi ta já naxini johó i cáhan cóhó in a chí jatá i ta nasacuu a tátuhun tá tívi na trompeta. <sup>11</sup> Ta mé tuhun naxini johó i cán nacachi a já xihín i:

—Yehe cúu mé a nu cuítí ta yehe cúu mé a nu ndihí jáchi janda tá cámaní çava sahá saha tóco ndihi ñaha sa íin va yehe ta coo tá coo i vatí ná ndihi sahá. Tóco ndihi ña ná cunún yóho xíní ñúhú çahyún ña nuú in libro. Ta já chindahún ña nuú ndihusa ñuu estado Asia nu ndúu na cúu cuéntá mí i. Chindahún ña nuú na ndúu ñuu Efeso xihín nuú na ndúu ñuu Esmirna xihín nuú na ndúu ñuu Pérgamo xihín nuú na ndúu ñuu Tiatira xihín nuú na ndúu ñuu Sardis xihín nuú

na ndúu ñuu Filadelfia xihín nuú na ndúu ñuu Laodicea viti —nacachi a xihín i.

<sup>12</sup> Tá naxini johó i ña yóho já nandicoto nihni jatá i sándehe e yo cáhan xihín i. Ta já naxini i usa ña jjuhun cuáán nu sándójó ña túun. <sup>13</sup> Ta tañu ña cán naxini i in a cúni coo tá cúni coo ñayivi ta ndíxi a in jáhma cáni ña janda sahá xínu coo a xihín quiahva cáni á. Ta naxini i ndáçaan in cinturón ña jjuhun cuáán tóco á ta cáni a janda yati yicá ndicá a. <sup>14</sup> Ta íjii jini á cúu á ña yaa çachi tátuhun yaa yucú yáhvá. Ta nduchú núu a cúu á tátuhun ñúhu ita. <sup>15</sup> Ta tá quiahva yehe çaa ña jándutu na ini horno quiahva já yehe sahá. Ta ñihi ndivaha cáhan mé á ta cúu á tátuhun tá xójo cýyu ticuú yuta tañu çava. <sup>16</sup> Ta naxini i ñúhu usa quimi ini ndahá cuáha mé á. Ta ini yúhu a naxini i quéta in yuchú cáni ña jeen ndíví xoo yúhu. Ta naxini i yehe ndivaha nuu á tá quiahva yehe candii çaxivi ndaa.

<sup>17</sup> Tá naxini i mé á já nandicava i sahá tátuhun in ndii. Joo mé á nachinúu a ndahá cuáha jatá i já nacachi a já xihín i:

—A cáyihví tohún. Yehe cúu mé á nu cuítí ta cúu u mé a nu ndihí. <sup>18</sup> Tácú tá tácu va yehe. Mé a ndaa nasacuu u ndii joo viti tácu u ta catacu u anda ama cáa quivi. Ta yehe naquee vaha i tá nanditacu tucu u tañu ndii ta viti cómi i cuéntá sahá nu ndúu ínimá na sa

naxihí. <sup>19</sup> Xíní ñúhú cahyún ña naxinún. Ta xíní ñúhú cahyún sahá ña cúu viti ta já cahyún sahá ña coo chága chí nuu. <sup>20</sup> Ña yóho quéa cúní cachi ndíhusa quimi naxinún ñúhu ini ndahá cuáha i xihín ndíhusa ña jihun cuáan nu sándójó ña túun. Ndíhusa quimi cán cúu rí yuhú nuu in in na cómi cuénta sahá usa veñuhu nu táca na cúu cuénta Jesús. Ta ndíhusa nu sándójó ña túun cán cúu á yuhú nuu usa veñuhu. Ta ña yóho coo naxini ñayivi jáchi nasacuu a ña jehé.

## 2

*Ña nacachi Jesús xihín na cúu cuénta mé á ndúu ñuu Efeso*

<sup>1</sup> Cahyún in carta nuu da cómi cuénta sahá na cúu cuénta mí i ndúu ñuu Efeso. Ta ña cahyún cúu ña yóho: “Ña yóho cúu tuhun cáhan Jesús, mé a ñúhu usa quimi ini ndahá cuáha, mé a xíca nuu tañu usa ña jihun cuáan nu sándójó ña túun. Ta ña yóho quéa cáhan Jesús xihín ndó, na ñuu Efeso: <sup>2</sup> Sa cánda a ndihi ini i ndá quiahva cája ndó. Cánda a vaha ini i ña ndúcú ndéé ndo cája chúun ndó cuénta mí i. Ta co jándacoo ndó chuun cája ndó cuénta mí i. Ta sa cánda a vaha ini i ña co ndéé ini ndó xihín ña cája ñayivi quini. Ta sa cánda a ini i ña sa naxito ndojó ndó na cáchi cúu apóstol cuénta Ndióxi joo coo cúu toho na apóstol jáchi cúu ná na tuhún cuití va. <sup>3</sup> Ta sa cánda a

caxí ini i ña co jándacoo ndó cája chúun ndó cuénta mí i. Ta cuahá ndivaha tañu ndóho ini ndó sahá i. Ta co cánaa ndó xihín ña yóho. <sup>4</sup> Joo in in ñaha cáhan cuachi i nu ndó saha: Ta ña cúní cáhan i saha cán quéa co cúní ga ndó yehe tá quiahva nacacúni ndó yehe janda mé saha. <sup>5</sup> Ña cán quéa ndítahan ndicuhun ini ndó ndá quiahva nacacúni ndó yehe jihna. Ta ndítahan nu ndó ndicó coo ini ndó ta caja ndó tá quiahva nacaja ndó janda mé saha. Á tá coo ta xinu yachi i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. <sup>6</sup> Joo mé a ndaa cájji ini i xihín ndo jáchi cándají ndó ña núu cája na xíca cuénta nicolaítas jan. Jáchi coo táhan ri ini yehe xihín ña núu cája na jan. <sup>7</sup> Cuni johó vaha ndó, na vaha johó ña cáhan ínima yii Ndióxi xihín na cúu cuénta mí i, na táca veñuhu: Ndá na ná quee vaha tañu tóco ndihi ña núu ñuyiví yóho, na cán cúu na quiahva i ñamaní nuu caxí cuíhi cúun nu yíto, dó cája ña ná catacu ñayivi anda ama cáa quivi. Mé yíto cán cándichi dó nu in Ndióxi.”

*Carta cuahan nuu na cúu cuénta Jesús ndúu ñuu Esmirna*

<sup>8</sup> Cahyún inga carta cuhun nuu da cómi cuénta sahá na cúu cuénta mí i ndúu ñuu Esmirna. Ta ña cahyún nu ná cúu ña yóho: “Ña yóho quéa cáchi Jesús, mé a cúu á nu cuití ta cúu á nu ndíhí, mé á sa

naxihí ta já nanditacu tucu a. Ta já cáchí a já xihín ndó, na ñuu Esmirna: <sup>9</sup> Sa xíní vaha i ndá quiahva ndóho ini ndó. Ta xíní ndá quiahva cándáhví ndó. Joo mé a ndaa cúú ndó na cuicá nu Ndióxi. Ta sa xíní ndá quiahva cáhan núu na saha ndó jáchi cáchí na cúú ná na Israel joo a juú na. Cúú ná in táhndá na cája cáhnu Satanás, mé tiñáhá sacuaḥa va. <sup>10</sup> A cáyihví toho ndó sahá ña vaxi nu ndó ndoho ini ndó. Jáchi ñayivi quini, na cúú cuéntá tiñáhá sacuaḥa taán na java ndohó vecaa já coto ndojó na ndohó. Ta tixi uxu quivi ndoho ini ndó. Ta xíní ñúhú cándeé tá cándeé ini ndó yeḥe vatí ná cahní na ndohó ta já ná caja i ña ñeḥe táhvi ndó catacu ndó andá ama cáa quivi. <sup>11</sup> Cuni johó vaha ndó, na vaha johó ña cáhan ínimá yíi Ndióxi xihín na cúú cuéntá mí i, na táca veñuhu: Ndá na ná quee vaha nu tóco ndihi ña núu ñuyiví yóho, na cán cúú na a cúhun toho na ndoho ini na indayá. Jáchi tá ndóho ini ñayivi indayá cúú á tátuhun xihí na chí ivi.”

*Carta cuḥan nuú na cúú cuéntá Jesús ndúu ñuu Pérgamo*

<sup>12</sup> Cahyún inga carta cuhun nuú da cómi cuéntá sahá na cúú cuéntá mí i ndúu ñuu Pérgamo. Ta já cachún já nu carta jan: “Jesús, mé a ñeḥe yúchu cáni ña jeen ndíví xoo yúhu cán quea cáchí já: <sup>13</sup> Sa xíní vaha i ña íin ndó ñuu Pérgamo nu cája Satanás, mé tiñáhá sacuaḥa ña cúní mé rí xihín ñayivi. Joo xihín

ndinuhu ini ndó cája ndó ña táhan ini i xihín. Ta coó najándacoo ndó ña cándeé ini ndó yeḥe vatí naxini ndó ndá quiahva naçaja na xihín Antipas, mé da naçandeé cáhnu ini yeḥe cán. Jáchi naṣahní na da mé ñuu jan nu cómi Satanás, mé tiñáhá sacuaḥa cuéntá sahá ñayivi. <sup>14</sup> Joo íin in ñaha cáhan cuachi i nu ndó saha. Jáchi sahan ndó ñamaní nuú java ñayivi cán ña ná candico cáhnu na ña najánaḥa Balaam. Mé Balaam jan cúú dá da najánaḥa Balac ndaja caja da jácahan da na Israel caja na cuachi tátuhun ná cuxu na ña najoco ñayivi nuú yoco ta ná cuju xihín táhan ñayivi vatí co cúú ná yíi ná á ñájihí na. <sup>15</sup> Ta co íin vaha ini i xihín ndó, na ñuu Pérgamo jáchi sahan ndó ñamaní nuú java ñayivi ña ná candico na jatá na nicolaitas. Ta cándají ndivaha i ña jánaḥa na jan. <sup>16</sup> Xíní ñúhú ndicó coo ini ndó ta caca vaha ndó íchi cuéntá mí i. Á tá coó ta saa yachi nu ndúu ndó jan. Ta xihín tuhun cahan i caní táhan i xihín na cája cuachi jan. Ta mé tuhun cahan i cacuu a tátuhun yúchu cáni ña cana yuhú u. <sup>17</sup> Cuni johó vaha ndó, na vaha johó ña cáhan ínimá yíi Ndióxi xihín na cúú cuéntá mí i, na táca veñuhu: Ndá na ná quee vaha nuú ña núu já quea quiahva i ñamaní nu ná cuxu na pan yíi, ña cúú tátuhun maná, ña naquixi indiví. Ta ña yóho cúú á ña naṣahin jehé nuú ñayivi. Ta

já quiahva ri in yuú yaa nuú in in ñayivi nu ndáa quiví saá na. In túhún na ná ndiquehe yuú yaa cán cúu na xini yo quiví queá ndáa nu á.”

*Carta cuahan nuú na cúu cuéntá Jesús ndúu ñuu Tiatira*

18 'Cahyún inga tucu carta ná cuhun a nuú da cómi cuéntá sahá na cúu cuéntá mí i ndúu ñuu Tiatira. Ta já cachún já xihin ná: “Ña yóho queá cáhí Jesús, mé a cúu in túhún jini já jahyi Ndióxi. Ta mé á queá yehe nduchú núu a tátuhun ñuhú ita ta yehe saha tá quiahva yehe caa, ña jándutu na ini horno. Ta mé á cáhí a já xihin ndóhó, na ñuu Tiatira: 19 Sa xini vaha i tóco ndihi ña cája ndó. Xini vaha i ña cuni ndó yehe. Ta xini vaha i ña candeé cáhnu ini ndó yehe. Ta sa xini vaha i ña co jándacoo ndó cája ndó ña cáji ini i xihin. Ta sa cándaá vaha ini i ña ndíhi chága ini ndó cája chúun ndó cuéntá mí i a juú ga tá ñacasahá ndo candeé ini ndó yehe. 20 Joo in in ñaha ña cuni cahan cuachí i xihin ndó saha. Jáchi co cuni ndó jánani ndó ña naní Jezabel, ña in tañu ndó jan. Vati cáhí ña ña cahan ña cuéntá Ndióxi joo xihin ña quixi jini mé ña jándahvi ña na cúu cuéntá mí i. Jáchi jácahan ña na ná cuju xihin táhan na, na co cúu yíi ná á ñajihí na. Ta jánaha ña na ña ná cuxu na ña najoco ñayivi nuú yoco. 21 Sa nasandati ndivaha i ña ná ndicó co ini ña sahá cuachi cája ña joo co cuni ña jándacoo

ñá ña quiji ña xihin na co cúu yíi ña. 22 Sahá ña cán queá caja i ña ná quihvi ndeé ña candúhu ña xito ña. Ta caja i ña ná ndoho ndivaha ini ndihi da quiji xihin ña tá ná a jándacoo da cuachi cája da xihin ña jáchi ña jan cúu ña najánaha ña nu dá caja da. 23 Ta caja i ña ná quivi ndihi jahyi ña. Ta xihin tóco ndihi ña yóho cuni na cúu cuéntá mí i, na ndúu ndijáá ñuu ña mé a ndaa xini vaha i ña cáhvi ini ñayivi ta xini ndaja in inima ná. Ta quiahva i nuú in in ndó ña ndítahan quehe ndó sahá ña ñacaja ndó. 24 Ta viti cuni cahan i xihin java ga ndó, na cúu cuéntá mí i ndúu ñuu Tiatira jan. Jáchi co ndicó ndo jatá ña jánaha ña cán ta co ndicó ndó jatá ña cáhí ñayivi cúu ña ndíhí ndivaha cuéntá Satanás, mé tiñahá sacuaḥa. Ña cuni cachi i xihin mé ndó queá co ga inga chuun sáhdá i nu ndo. 25 Joo xini ñuhú candita ndacú ndo janda quiahva ná saḥa i nu ndúu ndó jan. 26 Ta ndá na ná quee vaha nuú ña núu ñuyiví yóho ta cája na ña cuni yehe xihin ndinuhu ini na janda quiví nu ndíhí já queá caja i ña ná ñeḥe táhvi ná cahnda na chuun nuú ndijáá ñayivi ndúu ñuyiví. 27 Tá quiahva ñacaja Ndióxi, tátá i xihin i tá nasahan mé á ndeé á nuú i quiahva já caja i xihin na candeé ini yehe. Ñeḥe táhvi ná cacomí na cuéntá saḥa ñayivi ñuyiví ta cuu caja na tá quiahva cuni mé ná. Ta cuu jándihi na saḥa mé ñayivi



ñuyiví tá quiahva cája ñayivi tá táhvi na quiji ndahyi. <sup>28</sup> Ta quiahva ri yehe ñamaní nuú na cúu cuéntá mí i ña ná cacomí na quimi cáhnu, rí quéta tá nativi. <sup>29</sup> Cuni johoh vaha ndó, na vaha johoh ña cáhan ínimayii Ndióxi xihín na cúu cuéntá mí i, na táca veñuhu.”

### 3

*Carta cuahan nuú na cúu cuéntá Jesús ndúu ñuu Sardis*

<sup>1</sup> Cahyún inga tucu carta cuhun nuú da cómi cuéntá sahá na cúu cuéntá mí i ndúu ñuu Sardis ta já cachún já xihín dá: “Ña yóho quea cáchi Jesús, mé a ñuhu ínimayii Ndióxi ini, ña cúu ndihusa yuhú nuú ínimayii mé á. Ta mé á cómi a ndihusa quimi ta ña yóho quea cáchi a xihín ndó, na ñuu Sardis jan: Xíni vaha i tóco ndihi ña cája ndó. Ta sa xíni vaha i ña cáhan ñayivi ña cája ndó tátuhun ñayivi tácu vatí mé a ndaa cúu ndó tátuhun ndii. <sup>2</sup> Xíni ñuhú ndicaxi vaha ini ndó ta a jándacoo ndó ña vaha cája ndó jan jáchi jalóho cúni ndihi sahá. Sándehé vaha i ña co cája ndó ña ndaa nu Ndióxi, tátá i. <sup>3</sup> Xíni ñuhú ndicuhun ini ndó ña nacatiahva ndó cuéntá mí i ta a jándacoo ndó caja ndó ña. Ta xíni ñuhú ndicó coo ndó nu Ndióxi ta ndicaxi vaha ini ndó. Á tá coo ta jonáa cuití xinu coo i nu ndo já caja vii i saha ndo. Mé quiví co cáhan ndo xinu coo i nu ndo tá quiahva jonáa xinu da cuíhná. <sup>4</sup> Joo mé a ndaa

ndúu java ndó mé Sardis jan, na coo nacaja quini mé xihín cuachi. Sahá ña cán quea cuu candixi na jahmá yaa ta já cuu caca tuun na xihín i jáchi ín sahá caja na já. <sup>5</sup> Jáchi ndá na ná quee vaha nuú ña núu ñuyiví yóho já quea candixi na jahmá yaa. Ta a jándoo i quivi ná nu libro, mé nu ndaa quivi tóco ndihi na catacu anda ama cáa quivi. Ta nu Ndióxi, tátá i xihín nu tátó mé á cáhan cáxi i ña jivi ndusa cúu ná cuéntá mí i. <sup>6</sup> Cuni johoh vaha ndó, na vaha johoh ña cáhan ínimayii Ndióxi xihín na cúu cuéntá mí i, na táca veñuhu.”

*Carta cuahan nuú na cúu cuéntá Jesús ndúu ñuu Filadelfia*

<sup>7</sup> Cahyún inga tucu carta cuhun nuú da cómi cuéntá sahá na cúu cuéntá mí i ndúu ñuu Filadelfia ta já cachún já xihín dá: “Ña yóho quea cáchi Jesús, mé á cúu ña yii ndivaha ta cúu á ña ndaa. Ta nu mé á ín yávi, ña nasacomí rey David. Ta tá suná mé á in yéhe ni in na a cuú chicaji ña. Ta tá chicaji mé á in yéhe ni in na a cuú cuná ña. Ta ña yóho quea cáchi a xihín ndó, na ndúu ñuu Filadelfia jan: <sup>8</sup> Xíni vaha i tóco ndihi ña cája ndó. Nasuná i yéhe nu ndo ta ni in túhún na a cuú chicaji ña. Ta cánda vaha ini i ña cája tá cája ndó ña nasahnda i nu ndo caja ndó vatí coo cuaha ndee ndó. Ta co chíjehé tuhun ndó ña xíni ndó yehe. <sup>9</sup> Candehé ndo ña caja i xihín na tuhún, na

cája cáhnu Satanás, mé tiñáhá saçuaha sahá ña cáchí na cúu ná nā Israel joo a juú toho na. Caja i ña ná caxítí na nu ndo já ná ndicuni na ña mé a ndaa quíhvi ini i ndohó. <sup>10</sup> Coó najándacoo ndó cája ndó ña nasahnda i nu ndó cája ndó ta nasahan ndeé ini ndó sahá ña cán quea chindeé vi ndohó ná a ndóho toho ndó ña núu vaxi jatá ñayivi ñuyíví yóho. Jáchí tá ná cayati mé hora já casáhá coto ndojó i tóco ndihi ñayivi ndúu ñuyíví. <sup>11</sup> Yachí saa i nu ndo. Ta coto a jándacoo ndó ña cándéé ini ndó yehe já quea ná a ndíquiahva i nuú inga na ña sácú vaha i quiahva i nu mé ndó. <sup>12</sup> Ta ndá na ná quee vaha nu tóco ndihi ña núu ñuyíví yóho, ndaja i na cán ná cacuu na tátuhun jihin, dó cúu ndéé veñuhu Ndióxi, tátá i. Ta cán canduu na anda ama cáa quívi. Ta jatá mé ná cahyí i quívi Ndióxi, tátá i. Ta sa mé yóho cahyí i quívi ñuu nu íin Ndióxi. Mé ñuu yóho cúu á inga Jerusalén, ña saá, ña vaxi chí indiví nu íin Ndióxi. Ta jivi jatá mé ná cahyí i inga quívi saá i. <sup>13</sup> Cuni johó vaha ndó, na vaha johó ña cáhan ínima yíi Ndióxi xihín na cúu cuéntá mí i, na táca veñuhu.”

*Carta cuahan nuú na cúu cuéntá Jesús ndúu ñuu Laodicea*

<sup>14</sup> Cahyún inga tucu carta cuhun nuú da cómi cuéntá sahá na cúu cuéntá mí i ndúu ñuu Laodicea ta já cachún já xihín dá: “Ña yóho quea cáchí Jesús, mé a cúu ña ndaa. Mé a cáhan ña ndaa sahá

ña naxini a xihín nuu á ta sahan tuhun a sahá. Ta mé á cúu á ña nacavaha tóco ndihi ñaha, ña sácú ini Ndióxi coo. Ta ña yóho quea cáchí a xihín ndó, na ñuu Laodicea: <sup>15</sup> Xíni vaha i tóco ndihi ña cája ndó. Ta xíni vaha i ña mé ndó co cúu ndó tátuhun in ñaha ihní ndinuhu. Ta ni co cúu ndó tátuhun in ñaha víxi ndinuhu jáchí co cája cáhnu ndó yehe xihín ndinuhu ini ndó. Vaha ná ndinuhu ña víxi ná cacuu ndó á tá ndinuhu ña ihní ná cacuu ndó. <sup>16</sup> Joo mé ndó íin java uun ndó jáchí in ivi ndacaan ínima ndo ta sahá ña cán quea tavá xóo i ndohó nuú i. <sup>17</sup> Jáchí mé ndó cáchí ndo ña cúu ndó na cuicá ndivaha. Ta cáchí ndo ña vaha ndivaha quehe ndó jáchí ñéhe cuaha ndó jihún. Ta cáchí ndo ña ni in ñaha co ndímaní nu ndo. Joo mé ndó cúu ndó tátuhun na cuaá ndáhví ndivaha jáchí a ñaha cuni ndó ña co ñéhe táhvi ndó nu Ndióxi. Cúu ndó na ndáhví ndivaha ta cúu ndó tátuhun na cuaá xíca lahla. <sup>18</sup> Sahá ña cán quea cúní jácahan i ndohó ña ná quixi ndó nuú i cueen ndó jihun cuaán nuú i ña sa naxito ndojó na nu ñuhu ita ta já quea ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cachi nuú i candixi ndó já ná chijahví ndó mé ndó jáchí cacahan nuu ndó sahá ña xíca lahla uun va ndó. Ta sa mé nuú yehe ndítahan cueen ndó tata chicaan ndó nduchú núu ndo já quea ná cuu candehé

vaha ndó. <sup>19</sup> Jáchi jánani i tóco ndihi ñayivi, na quihvi ini i ta jándoho i ini na ña ná caja vaha na. Sahá ña cán quéa xihín ndinuhu ini ndó ndítahan ndicó coo ini ndó caja ndó ña cúni Ndióxi. <sup>20</sup> Candehé ndó. Yehé cúu u tátuhun in da cándichi cáni ndáha yehé vehe ndó ta cána i ndohó. Ta ndá na xíni johó nu cáhan i ta súná na yehé vehe na nuú i já quihvi i vehe na ta cajíni i xihín ná ta mé ná cajíni na xihín i. <sup>21</sup> Ta ndá na ná quee vaha nu tóco ndihi ña núu ñuyívi yóho, caja i ña ná cuu cacoo na xihín i indivi nuú cacomí i cuéntá saha ná indivi. Jáchi quiahva já naquee vaha i nuú ña núu ta viti ín coo i xihín Ndióxi, tátá i nu ín coo mé á sáhdá chuun indivi. <sup>22</sup> Cuni johó vaha ndó, na vaha johó ña cáhan ínimá yíi Ndióxi xihín na cúu cuéntá mí i, na táca veñuhu” —ñacachi a.

## 4

*Tá cája cáhnu na Ndióxi indivi*

<sup>1</sup> Tá sa nayaha tóco ndihi ña yóho já ñaxini i núná in yehé indivi. Ta mé a ñaxini johó i nu cuítí ña cáhan tátuhun trompeta ta ñacahan tucu a jatá i já ñacachi a já:

—Cuáhán ndaa xoo chóho já ná nahá i nuun ndá quéa coo chága chí nuu —já ñacachi a já xihín i.

<sup>2</sup> Chí mé hora já ñandeta nuu ínimá yíi Ndióxi ini i. Já ñaxini i mé indivi cán in nu sácoo rey ta ín coo in a cán.

<sup>3</sup> Ta mé a ín coo cán ñasayéhe nuu á tátuhun yehé in yuu naníjaspe xihín yuu naní cornalina. Ta ñaxini i ñacava nuu in coyánquí nu ín coo a. Ta mé coyánquí cán yehé ri tá quiahva yehé yuu cuí naní esmeralda. <sup>4</sup> Ta nu ín coo mé a cán ñaxini i ñacava tiyivi inga oco comi táyi vaha nu sácoo na cómi chuun. Ta ñaxini i oco comi na sacuaña, in in na ín coo nuú in in táyi vaha cán. Ta ndíhoco comi mé na sacuaña cán ndíxi na jahmá yaa cachi. Ta cándójó in tiyivi jiuhun cuáan jini in in na cán. <sup>5</sup> Ta ñaxini i ña quéta tasa nu ín coo mé a cán. Ta sa mé cán cáhndi tátuhun tá cána javi ta yati mé cán cáyi usa ití xihín ñuhú ita. Ta ña yóho cúu á ndíhusa yuhú nuu ínimá yíi Ndióxi. <sup>6</sup> Ta yati mé cán ñaxini i in ñaha ta náha tátuhun in tañuhú, ña yehé tátuhun in yutátá.

Ta yati jini nu ín coo a cán ñacava tiyivi comi ña tácu. Ta chí a juú quiahva cuaha nduchú núu a chí nuu á ta chí jatá. <sup>7</sup> Ta in táhan mé ña tácu cán, ña nu cuítí cán cáa tá quiahva cáa in león. Ta ña inga cán ña chí ivi cáa tá quiahva cáa tindiqui. Ta nuú ña cáhuni cán cúni coo a tá quiahva cúni coo nuú ñayivi. Ta ña comi cán cáa tá quiahva cáa in tíyaha tá ndáchí ri. <sup>8</sup> Ta in in mé ña tácu yóho ñasahin iñu ndíxi a. Ta nuu á ta jatá ñachutú ndaa ña xihín nducú núu. Ta ni ñuu ta ni ndiví co jándacoo ndícomi ña cán cáhan já cáchi a já:

Yii ndivaha cúú mé ndó,  
Ndióxi, xitoho nde.

Ta cuu caja ndó tóco ndihi  
ñaha.

Mé ndó sa já iin va ndó  
tá nacava sáhá saha  
ñuyívi.

Ta sa já iin ndó viti ta já coo  
tá coo ndó anda ama  
cáa quivi —nacachi  
ndícomi ña tácu cán.

<sup>9</sup> Ta tá cahan mé ña tácu  
cán já cája cáhnu a Ndióxi ta  
ndíquiahva ndixahvi nu mé  
a iin coo nu sácoo rey, mé  
a tácu anda ama cáa quivi.

Ta tá cahan mé ña tácu cán  
<sup>10</sup> já ndíaxítí ndíhoco comí  
na sacuahá cán cája cáhnu na  
Ndióxi, mé a tácu anda ama  
cáa quivi. Ta já tiiin na tiyivi  
cándójó jini na jáxinu na ña  
nu iin coo Ndióxi cán ta já  
cáchi na já:

<sup>11</sup> Ndióxi maní nde, cúú ndó  
xitoho nde ta ndítahan  
nuú nde caja cáhnu  
nde ndohó jáchi mé  
ndó ndítahan ndicáhnu  
ndivaha.

Iin ndée ndo caja ndó tóco  
ndihi ñaha ta ndítahan  
caja cáhnu nde ndohó.  
Jáchi nacavaha ndó tóco ndihi  
ñaha,

ta ndúu ndihi ñaha jáchi cúni  
mé ndó ña ná canduu  
a.

Ta ndúu a jáchi cúni mé  
ndó cavaha ndó ña, já  
nacachi ndíhoco comí  
na sacuahá cán cája  
cáhnu na Ndióxi.

## 5

*Tá naxini Juan in libro  
xihín in ndicachi*

<sup>1</sup> Tá nandihi já naxini i in  
libro indivi ini ndáha cuáha  
mé a iin coo nu sácoo rey. Ta  
mé libro cán cúú á tutu nativi  
tuun a ta nacahyi ndívi xoo  
nu á. Ta ndáji tuun a xihín usa  
sello. <sup>2</sup> Ta já naxini i in táto  
Ndióxi, ña iin ndivaha ndée a.  
Ta naxini johó i cahan cóhó a  
ta ndáca tuhún a já cáchi a já:

—Ndá na cúú na iin saha  
cahnda ndíhusa sello yóho já  
ná cuná na mé libro ña nativi  
tuun cán —nacachi mé táto  
Ndióxi cán.

<sup>3</sup> Joo coo nañehe ná ni in  
na iin saha cahnda ndíhusa  
sello cán. Ni indivi ni ñuyívi  
ni nu ndúu na naxihí coo  
nandiñehe ná ni in na cuu  
cahnda ndíhusa sello cán  
ña ná candehé na ña ndáa  
nu mé libro cán. <sup>4</sup> Ta já  
nacasáhá sacú ndivaha i jáchi  
coo nandiñehe ná ni in tuhún  
na iin saha cahnda ndíhusa  
sello cán ña candehé na ini  
mé libro cán cahvi na ña ndáa  
nu á. <sup>5</sup> Joo in táhan na sacuahá  
cán nacachi a já xihín i:

—A cuácu gaún jáchi Jesús,  
mé á cúú tátuhun león,  
ña naquixi chichi Judá ta  
naquixi a chichi rey David,  
mé a cán naquee vaha ta  
nasahnu a nu tóco ndihi ña  
núu ñuyívi. Sáhá ña cán quea  
cuu cahnda ndíhusa sello ta  
já cuná mé á libro cán —  
nacachi a xihín i.

<sup>6</sup> Ta naxini i cándichi Jesús,  
mé á cúú tátuhun ndicachi  
loho tañu na sacuahá ta tañu  
ndícomí ña tácu cán. Ta mé  
a cúú tátuhun ndicachi loho  
cán cándichi a nu sácoo rey ta  
náha xicá ña najándicuehe na

mé á tá ñasahní ñahá ña. Ta ñaxini i ñin usa ndíqui a xihín usa nduchú núú a. Ta ña yóho cúú á ndíhusa yuhú nuu ínima yii Ndióxi, ña ñachindahá mé á níí cúú sahá ñuyiví. <sup>7</sup> Ta mé á cúú tátuhun ndicachi loho cán ñaxinu a ta ñatiin a mé libro cán ndahá cuáha mé á ñin coo nu sácoo rey. <sup>8</sup> Ta tá ñatiin a mé libro ña ñativí tuun cán já ñandica xítí ndícomi ña tácu cán xihín ndíhoco comi ña sacuahá cán nu mé a cúú tátuhun ndicachi loho cán. Ta tóco ndihi ña cán cáñee arpa ndáha ná jácaha na. Ta cáñee cohó chíñíhmá, ña jiuhun cuáán ndáha ná ta ñachutú ndaa ña xihín jusa támi sáhan. Ta ña cán cúú yuhú nuu tuhun ña xíca tahví ña cúú cuéntá Ndióxi nu á. <sup>9</sup> Ta xihín ña saá xíta na cája cáhnu na mé á já cáhí ña já: Nu mé ndó cáni ndiquehe ndó mé libro ñan ta cahnda ndó sello ña ná cuná ndó ña. Jáchí mé ndó ñaxihí ndó ñacaja ñayivi. Ta tá ñaxita ñi ndo já ñaxeen ndó ñayivi ná cacuu na cuéntá Ndióxi. Ta mé ndó ñachahvi ndó sahá ña ñaquixi ndijáá chichi xihín ña cáhan tá nuu tuhun xihín ña ndúu ndijáá ñuu xihín ndijáá nación. <sup>10</sup> Ta mé ndó ñandaja ndó ñayivi yóho cacuu na tátuhun jutú já ná caha cáhnu na Ndióxi. Ta mé ña cán cacomí ña cuéntá sahá ñayiví ndúu ñuyiví, cáhí ña

cája cáhnu na mé a cúú tátuhun ndicachi loho cán.

<sup>11</sup> Tá ñandihí já ñasandehé tucu u. Anda já ñaxini joho i cáhan cuahá ndivaha millón tátó Ndióxi cája cáhnu na mé á ñin coo nu sácoo rey. Nacava tiyivi ña ndúu na jatá ndícomi mé ña tácu cán xihín jatá ndíhoco comi ña sacuahá cán. <sup>12</sup> Ta já cáhan cohó tóco ndihi mé tátó Ndióxi cán já cáhí ña já:

Mé Jesús, mé a cúú tátuhun ndicachi loho, rí ñaxihí ñacaja ñayivi, ñin sahá caha tóco ndihi ñaha xihín ndéé á.

Ta ñin sahá ndiquehe a tóco ndihi ña cuíca ta ñin sahá ndiquehe ndihi a ña ndichí ta ñin sahá ndiquehe a tóco ndihi ndéé.

Ta ñin sahá ña ná ndiñehe jíco ñayivi mé á.

Ta ñin sahá caha cáhnu na mé á ta ñin sahá ña ná cata na nu mé á, cáhí tóco ndihi ña cán cája cáhnu na mé á.

<sup>13</sup> Ta quíahva já ñaxini joho rí cáhan tóco ndihi ñaha ña ñacavaha Ndióxi ndúu indiví xihín ña ndúu ñuyiví xihín ña ndúu tixi ñundáhyi ta xihín ña ñúhu ini tañuhú. Tóco ndihi ña ñacavaha Ndióxi yóho cája cáhnu a mé á ta já cáhí a já:

Ná ndicáhnu ndivaha Ndióxi, mé á ñin coo nu sácoo rey.

Ta ná ndicáhnu ndivaha Jesús, mé á cúú tátuhun ndicachi loho.

Ná caja cáhnu í mé á ta ná ndiñehe jícó ñayivi mé á jáchi mé á queá in ndée caja tóco ndihi ñaha.

Ná caja cáhnu yó mé á anda ama cáa quivi, já cáchi tóco ndihi na cán.

<sup>14</sup> Já nanducú ñehe ndícomi mé ña tácu cán tuhun já cáchi a já:

—Já ná coo.

Ta tá ñacachi a ña yóho já ñacaxítí ndíhocó comi na sacuaḥa cán cája cáhnu na Ndióxi, mé á tácu anda ama cáa quivi.

## 6

*Tá ñasahnda Jesucristo ndíhusa sello*

<sup>1</sup> Tá nandihí já ñaxini í ñasahnda Jesús, mé á cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihí já ñaxini joho í cáhan in táhan ndícomi mé ña tácu cán xihín í ta tachí yúhu a cúu á tátuhun tá cána javi. Ta já ñacachi a já xihín í:

—Naha quí, candehún yóho —ñacachi a xihín í.

<sup>2</sup> Anda já ñasandehé e ta já ñaxini í in cuáyí cúxú ta ñaxini í cánúu in dataa jata ri. Ta ndáha da cán ñaxini í cáñee in arco. Ta ñaxini í ña ñañehe dá in tivivi cánúu jiní dá. Ta cájii íní da ñaqueta da jáchi cúu dá da sa ñaquee vaha ta ñeñe táhvi dá quee vaha tucu da.

<sup>3</sup> Ta anda já ñaxini í ñasahnda Jesús, mé a cúu tátuhun ndicachi loho cán

inga sello, ña cáhvi cán. Já ñaxini joho í ña ñacahan inga tucu táhan ndícomi mé a tácu cán xihín í. Já cáchi a já xihín í:

—Naha quí, candehún yóho —ñacachi a xihín í.

<sup>4</sup> Ta já ñaxini í ñaqueta inga cuáyí ta cúu rí rí cuáhá. Ta mé da cánúu jata ri cán ñañehe táhvi dá jácani táhan da ñayivi ndúu ñuyiví. Ta ñañehe táhvi dá caja da ña ná cahní ndaja táhan mé ñayivi ndúu ñuyiví. Ta ñaxini í ñañehe dá in yuchú cáni ña cáhnu cáñee a ndáha dá.

<sup>5</sup> Ta tá ñasahnda Jesús, mé a cúu tátuhun ndicachi loho inga sello, ña cáhni já ñaxini joho í ñacahan mé ña tácu, ña cáhni cán xihín í já ñacachi a já:

—Naha quí candehún yóho —ñacachi a xihín í.

Ta tá ñasandehé e já ñaxini í in cuáyí ndáhyí tun ta já ñaxini í ña cáñee in ña sácuita ñaha ndáha mé da cánúu jata rí cán. <sup>6</sup> Ta tañu ndícomi mé ña tácu cán ñaxini joho í cáhan in a ta já cáchi a já:

—Ndiví yaa xíní ñuhú caja chúun í já cuu cueén in túhún laá kilo trigo. Ta in quivi ní xíní ñuhú caja chúun í já cuu cueén uní kilo cebada. Joo a quiáhva ndó ñamaní ña ná tiví sítí xihín vino —ñacachi a.

<sup>7</sup> Ta tá ñasahnda Jesús, mé a cúu tátuhun ndicachi loho inga sello, ña cácomi cán já ñaxini joho í ñacahan mé ña tácu, ña cácomi cán xihín í já ñacachi a já:

—Naha quíj candehún yóho  
—nācachi a xihín i.

<sup>8</sup> Ta tá nasandehé e já naxini i in cuáyí cuáán joho. Ta da cánúu jata rí cája ña ná quivi ñayivi. Ta jata mé da cán naxini i ndíco da sáhná chuun sahá nu ndúu ndii. Ta nañehé táhvi ndívi da cava ha da tondóhó ñuyívi já ná caja da ña ná cahní táhan cuahá ndivaha ñayivi ndúu ñuyívi. Ta jári nasahní da na xihín tamā ndeé ta xihín cuehe ta xihín ndijáá quití yúcú ndúu ñuyívi janda quiahva naxihí in táhná nuú comí táhná ñayivi ndúu ní cúu saha ñuyívi.

<sup>9</sup> Ta tá nasahnda Jesús, mé a cúu tátuhun ndicachi loho cán inga sello, ña cáhuhun já naxini i in nu náa ta tíxi mé cán ndúu ínima ñayivi, na naxihí sahá ña naxaxi tuhun na tuhun Ndióxi nuú ñayivi xihín ndinuhu ini na. <sup>10</sup> Ta cáyuhú cóhó na já cáchí na já:

—Tátá Ndióxi, mé ndó cúu ndó ña yíi ndivaha ta cája ndó ña ndaa cuití va. Ta cuu caja ndó tóco ndihi ñaha. Ndaja cáa chá quívi caja víi ndó sahá ñayivi ndúu ñuyívi. Ta já caja ndó ña ná chahvi na sahá ña nācāja na nasahní na ndehé —cáchí na ndúu tíxi náa cán.

<sup>11</sup> Andá já nañehé ná jahmá yaa candixi na ta natahnda chuun nu ná ña ná candati tóo chága na janda quiahva ná xinu coo nuú java ga na cúu cuéntá Jesús quivi na caja ñayivi ñuyívi sahá ña cája chúun na cuéntá Jesucristo.

Ta janda quiahva ná quivi ndihi na yóho já cavií sahá ñayivi nācāja quini xihín ná.

<sup>12</sup> Tá nandihí já naxini i nasahnda Jesús, mé a cúu tátuhun ndicachi loho inga sello, ña cáhñu cán. Já naxini i nataan ndivaha ta naxini i nanduu tuún candii tátuhun in jáhma tuún sá ndíxi na ndúu ndii. Ta níi cúu yoo naxinu cuahá nii ri. <sup>13</sup> Ta ndijáá quimi naquee rí indiví ta nacuyu rí nu ñúhu. Cúu á tátuhun tá quíji nihni tachi ndeé ndivaha tító ñuhú ta já cúu cuíhi, rí cuíi nu ñúhu.

<sup>14</sup> Nandihí saha indiví ta nandacoo vaha ña tátuhun tá ndítivi in yívi ña co xíní ñuhú ga na. Ta tóco ndihi yucu xihín tóco ndihi isla mahñú tañuhú nandijama ndihi ña ta co ndúu ga ña nuú nasanduu a. <sup>15</sup> Ta tóco ndihi na cómí cuéntá sahá ñuyívi nandacoo jehé na tañu cáva. Ta nachínee na tañu tóto chí yucu cuahan na. Ta cán nachijehé ri na sáhná chuun nu soldado xihín tóco ndihi na cuicá xihín tóco ndihi na ín ndeé cája ña náhnu ñuyívi yóho. Ta jári tóco ndihi na cómí in xitoho cuéntá saha xihín tóco ndihi na xíca núná mé nandacoo jehé na tañu cáva xihín tañu tóto cán. <sup>16</sup> Ta cáchí na cáhan na xihín yucu ta cáhan na xihín cáva ña ná cuyu a jata ná ta ná chijehé a na ña ná a cúni mé a ín coo nu sácoo rey cán na. Ta yíhvi na Jesús, mé á cúu tátuhun ndicachi loho cán jáchí sa naxojo ini a ta vaxi a jándihí

a saha ná. <sup>17</sup> Jáchi sa naxinu coo quivi jándoho mé á ini na ta ni in na co ndéé ini.

## 7

*Ndicaxi Ndióxi in táhnda na Israel*

<sup>1</sup> Tá sa nayaha tóco ndihi ña yóho já naxini i ndíta comi táto Ndióxi ndicomí xoo nu quixi tachi nu ndicomí xoo ní cúu saha ñuyívi. Ta tীন a tachi já ná a cuíco ga tachi jatá ñuyívi ta ná a cuíco ga tachi nuú tañuhú ta ni nuú ni in yíto. <sup>2</sup> Ta já naxini i naquixi inga táto Ndióxi xoo nu quéta candii. Ta mé táto Ndióxi yóho naxini i ñéhe a sello Ndióxi, mé á tácu indiví. Ta já naxini johó i nacayuhú mé táto Ndióxi yóho nuú ndicomí java ga táto Ndióxi, mé na ñañehé táhvi caja ña núu xihín ñuyívi ta xihín tañuhú viti ta já nacachi a já xihín ná:

<sup>3</sup> —Candati ndó. A cája núu ndó xihín ñuyívi ta ni xihín tañuhú ta ni xihín ni in yíto. Jáchi jihna ñuhú xini ñuhú cacú in sello taan na cúu cuéntá Ndióxi, mé a cája cáhnu mí —nacachi a.

<sup>4</sup> Ta naxini johó i cáhan in a ndaja cúu ñayivi nanani sello yóho taan na. Cúu ná in ciento ivi jico comi mil ñayivi Israel ta cúu ná na naquixi ndíhuxu ivi chichi na Israel. <sup>5</sup> In táhnda cúu uxu ivi mil na naquixi chichi Judá ta nanani sello taan na cán. Ta inga uxu ivi mil na naquixi chichi Rubén naquehe sello taan na. Ta quiahva já naquihvi

ri sello taan uxu ivi mil na naquixi chichi Gad <sup>6</sup> xihín uxu ivi mil na naquixi chichi Aser xihín uxu ivi mil na naquixi chichi Neftalí xihín uxu ivi mil na naquixi chichi Manasés <sup>7</sup> xihín uxu ivi mil na naquixi chichi Simeón xihín uxu ivi mil na naquixi chichi Leví xihín uxu ivi mil na naquixi chichi Isacar <sup>8</sup> xihín uxu ivi mil na naquixi chichi Zabulón xihín uxu ivi mil na naquixi chichi José xihín uxu ivi mil na naquixi chichi Bejamín nanani sello taan na.

*Tá naxini Juan cuahá ndivaha ñayivi ndíxi jahmá yaa*

<sup>9</sup> Tá nandihí já nasandehé e já naxini i cuahá ndivaha ñayivi. Ta ni in na a cuú cahvi ñahá sahá ña cuaha cúu ná. Ta cúu ná na naquixi ndijáá chichi ñayivi ndúu ñuyívi. Ta cúu ná na cáhan tá nuú tuhun. Ta cúu ná na ndúu ndijáá ñuu xihín ndijáá nación ñuyívi. Ta naxini i ndíta na nu Ndióxi, mé a in coo nu sácco rey. Ta ndíta na nu Jesús, mé a cúu tátuhun ndicachi loho cán. Ta tóco ndihí na ndíxi na jahmá yaa cachí ta cánee ñuu ndáha ná. <sup>10</sup> Ta tóco ndihí na cáyuhú cóhó na já cáchí na já: Ndióxi, mé a in coo nu sácco rey xihín Jesús, mé a cúu tátuhun ndicachi loho cán najáacu a mí, cáchí na.

<sup>11</sup> Ta naxini i ndíta tóco ndihí táto Ndióxi cája cáhnu na mé á in coo nu sácco rey. Ta nacava tiyivi na ndúu na jatá



na sacuaḥa cán xihín jatá ndícomi mé ña tácu cán. Ta já naçaxítí tóco ndihi na janda quiahva naçani ndaa taan na nu ñúhu ta já naçasáhá na cája cáhnu na Ndióxi. <sup>12</sup> Já cáhí na já:

Já ná coo. Cája cáhnu nde ndohó ta ndíñehe jícó nde quivi mé ndó.

Jáchí ndíchí ndivaḥa jini ndo ta ndiquiahva nde ndixahvi nu ndo.

Ta ndítahan coo toní ñúhú nde xihín ndo jáchí mé ndó cúu ndó ña íin ndéé cája tóco ndihi ñaha.

Ta já ná coo tóco ndihi ña yóho nu mé ndó anda ama cáa quivi. Já ná coo, naçachi na cán cája cáhnu na Ndióxi.

<sup>13</sup> Anda já naçinu in táhan na sacuaḥa cán nuú i já nandaca tuhún na yehe já naçachi na já xihín i:

—Á co xínun ndá na cúu na ndíxi jahmá yaa yóho ta ndá naquixi na —naçachi na xihín i.

<sup>14</sup> Já nanducú ñehe e tuhun nu ná já naçachi i já xihín ná:

—Yehe co xini toho i joo mé ndó sa xini vaḥa ndó ndá na cúu ñayivi yóho —naçachi i xihín ná.

Ta já naçachi na já xihín i:

—Na ndíxi jahmá yaa yóho cúu ná na nayaha nuú cuahá ndivaḥa tondóhó mé quivi tá nandoho ndivaḥa ini na. Ta viti sa nandoo cuachi na xihín ni Jesús, mé a cúu tátuhun ndicachi loho. <sup>15</sup> Sahá ña cán quea ndita na nu Ndióxi, mé á íin coo nu

sácoo rey. Ta ñuu ta ndiví cája ndiví na nu mé á ini veñuhu a. Ta mé Ndióxi, mé a íin coo nu sácoo rey cán ndáa vaḥa mé á na jáchí íin tuun a xihín ná. <sup>16</sup> Ta coo ga joco quixi nu ná ta ni a ichi ga ini na ticuii ta ni a cáyi ga na cája candii ta ni a ndíhi ga ini na sahá ña ihní. <sup>17</sup> Jáchí Jesús, mé a cúu tátuhun ndicachi loho cán ndácaan mahñú nu sácoo rey cán ta candaa mé á na tá quiahva ndáa in pastó ndicachi jana dá. Ta candaca mé á na cuhun na nu cána ticuii, dó cája ña ná catacu na anda ama cáa quivi. Ta yaco Ndióxi ticuii nu tóco ndihi na sácu —naçachi na sacuaḥa cán xihín i.

## 8

*Tá naçahnda Jesús, mé a cúu tátuhun ndicachi loho cán inga sello, ña cáhusa*

<sup>1</sup> Tá naçahnda Jesús, mé a cúu tátuhun ndicachi loho cán inga sello, ña cáhusa já naçatáji ní tóco ndihi ñaha indiví tátuhun tixi java hora.

<sup>2</sup> Tá nandíhi já naçini i ndíta usa tátō Ndióxi nu á. Ta in in mé tátō Ndióxi cán nañeḥe ná in in trompeta. <sup>3</sup> Já naçinu inga tátō Ndióxi candichi a nu náa ña íin yati nu íin coo Ndióxi nu sácoo rey cán. Ta cáñee in coho chíñíhmá ndáha á, ña jiuḥun cuáán. Ta nañeḥe á cuahá ndivaḥa jusa, ña joco a ña nu náa, ña naçavaḥa xihín jiuḥun cuáán. Ta quiahva já joco ri a nu náa cán ña xica tahvi na cúu cuéntá Jesús nu Ndióxi.

4 Ta mé ñihma ñacana nuú cohó chíñihmá cáñee ndáha táto Ndióxi cán nandindita cuahán nu Ndióxi tá quiahva ndíndita ña xica tahví na cúu cuénta mé á nu á. <sup>5</sup> Anda já ñatiin táto Ndióxi cán cohó chíñihmá ta já najácutú a ña xihín tití ñúhu, ña ñaquehe a nu náa cán. Ta já ñacuihna ña jatá ñuyíví. Anda já ñacasáhá cáhndí tátuhun tá cána javí. Ta jandá johó xójo cúu ta cána tasa ta ñaquixi in nditáan ndeé ndivaha jatá ñuyíví.

*Tá nativí ndíhusa táto Ndióxi trompeta*

<sup>6</sup> Tá ñandihi já ñasacanduu tiahvá ndíhusa táto Ndióxi tiví ña trompeta ña cáñee ndáha ña.

<sup>7</sup> Ta in táhan ndíhusa táto Ndióxi cán ñacasáhá nativí a mé trompeta cán. Ta já ñacuyú ñúhu cáyi xihín ñíí ña ñacava táhan xihín ñíí jatá ñuyíví. Ta chí ñacayí in táhndá nuú uní táhndá ñuyíví yóho ta jári ñaquihvi ñúhu in táhndá nuú uní táhndá yíto ndíta yúcu ta jári yúcu cui ñacayí ndihi a.

<sup>8</sup> Tá ñandihi já nativí táto Ndióxi ña cáhiví cán inga trompeta. Ta ñaxini í najani tátuhun in yúcu cándaha xihín ñúhu cuahán ndicava nuú tañuhú. Ta in táhndá nuú uní táhndá tañuhú cán ñanduú dó ñíí. <sup>9</sup> Ta in táhndá nuú uní táhndá tóco ndihi ñaha ñúhu ini tañuhú ñaxihí a. Ta quiahva já ñandihi saha in táhndá nuú uní táhndá barco ñasandojó nuú tañuhú cán.

<sup>10</sup> Ta táto Ndióxi ña cáhuni cán nativí a inga trompeta ta já ñaxini í ñaquee in quimi cáhnu cándaha xihín ñúhu ita vaxi rí ndícava rí ñuyíví. Ñaquee rí indiví ta ñandicava rí nu ñúhu nuú in táhndá nuú uní táhndá yuta xihín chícohó nu cána ticuíí. <sup>11</sup> Ta mé quimi cán naní rí ña ova. Ta ñacaja rí ña ñacahova in táhndá nuú uní táhndá ticuíí. Ta ñaxihí cuahá ndivaha ñayivi tá ñaxihí na dó ova cán.

<sup>12</sup> Tá ñandihi já nativí táto Ndióxi ña cácomí cán inga trompeta já ñanaá in táhndá nuú uní táhndá nuú candii cán. Ta quiahva já ñacaja rí a xihín yoo ta xihín quimi. Saha ña cán quéa coo ñacuu tuun vaha candii xihín yoo xihín quimi cán. Ña cán quéa ñacamaní tátuhun in táhndá nuú uní táhndá tuun candii cán jatá ñuyíví. Ta quiahva já ñacamaní tuun yoo xihín quimi ñuú.

<sup>13</sup> Tá ñandihi já ñasandehé e ta já ñaxini johó í catí ndixí in táto Ndióxi ndáchí a maññú indiví. Ta cáyuhú cóho a já cáhí a já:

—Ay, ay, ay ndáhví nahá ñacuu ñayivi ndúu ñuyíví jáchí ndají ndoho ini na tá ná tiví uní ga táto Ndióxi trompeta —cáhí a.

## 9

<sup>1</sup> Tá ñandihi já ñaxini í nativí táto Ndióxi ña cáhuhun cán inga trompeta. Ta ñaxini í ñaquee in quimi indiví ta ñandicava rí jatá ñuyíví. Ta

nañehe táhvi rí cacomí rí yávi ña cuu cuná rí yávi cúná ndivaha, ña co xínu nu ndíhi nuu. <sup>2</sup> Ta mé quimi nasuná rí yuyehé mé yávi cúná já nandindita ñihma tátuhun ña ndíndita yúhu horno cáyi. Ta mé ñihma nacana cán najánaa nuú candii xihín nuú tachí viti. <sup>3</sup> Ta tañu ñihma cán naqueta cuahá ndivaha tica, rí nandicuita nuu níi cúu ñuyívi. Ta nañehe táhvi rí cacuu rí rí cuehe tá quiahva cuehe líhma. <sup>4</sup> Ta natahnda chuun nu rí ña ná a jándihi toho rí sahá yucu ni sahá ñaha cuí ni saha yitó cuí ñuyívi yóho. Jáchi natahnda chuun nu rí ña ná tiin rí ñayivi cuití va, na co cándaa marca Ndióxi taan. <sup>5</sup> Joo coo nañehe rí ñamaní cahní rí na. Ña nacaja rí xihín ná quéa ná tiin rí na ña ná cahma na tixi uhun yoo. Ta tá quiahva cáhma na tá tiin líhma na quiahva já cáhma na tiin rí na. <sup>6</sup> Mé quivi já nducú ñayivi quivi vaha na joo a cúu quivi na. Vatí cúni quivi na joo a cúu quivi na.

<sup>7</sup> Mé tica tiin ñahá cán ndáa rí tá quiahva ndáa cuáyi, rí ndúu tiahva cuhun cani táhan. Ta tá quiahva cúni coo tiyivi, ña jiuahun cuáán sándójó jini rey quiahva já cúni coo ña cándójó jini rí cán. Ta tá quiahva cúni coo nuú ñayivi quiahva já cúni coo nuu rí. <sup>8</sup> Ta tá quiahva íin íj jini najihí quiahva já íin íj jini rí. Ta tá quiahva ndáa nuhu león quiahva já ndáa nuhu rí. <sup>9</sup> Ta jáhvi yicá

ndicá mé tica cán xihín jahmá caa, ña sándixi soldado cáni táhan na. Ta tá cáhma cáti ndixi rí cúu á tátuhun tá cáti saha cuaha cuáyi tá ñuhu rí carreta xínu rí cuahan rí cani táhan rí. <sup>10</sup> Ta íin ínu ndóho rí ña tiin tátuhun ndohó líhma. Ta xihín ña cán nañehe táhvi rí tiin rí ñayivi ña ná cahma na tixi uhun yoo. <sup>11</sup> Ta mé da cómi cuénta saha mé tica cán naní da Abadón tuhun hebreo ta naní da Apolión tuhun griego. Ta quivi dá cúni cachi a da jándihi saha tóco ndihi ñaha. Ta da cán cúu da cómi cuénta saha yávi, ña co xínu nu ndíhi nuu cán.

<sup>12</sup> Sa nayaha in tondóho cáhnu joo cámani ivi chága ña quixi.

<sup>13</sup> Tá nandihí já nativí táto Ndióxi ña cáhiñu cán inga trompeta ta já naxini johó i cáhan in a naqueta tañu ndícomí ndíqui quéta in in xoo tito nu náa, ña jiuahun cuáán, ña cándichi nu íin Ndióxi cán. <sup>14</sup> Ta já nacachi mé a cán já xihín mé táto Ndióxi cáhiñu, ña ñéhe trompeta cán:

—Janí ndícomi táto ña ndíco yuhú yuta cáhnu naní Eufraates jan —nacachi a.

<sup>15</sup> Tá nandihí já naxini i najani ndícomi táto nasandíco cán ña ná cahní na in táhnda nuú uní táhnda ñayivi ndúu ñuyívi. Jáchi sa naquee jini va na chuun ña caja na ña yóho. Ta sa xini na ndá hora ta ndá quivi ta ndá yoo ta ndá cuia caja na ña. <sup>16</sup> Ta naxini johó i cáhan in a ndaja cúu na soldado cándójó

cuáy<sub>i</sub> cuah<sub>an</sub> cán. Ta cúú ná iv<sub>i</sub> ciento millón soldado.

<sup>17</sup> Ta cúni ndicani i nu ndo ndaja ndáa cuáy<sub>i</sub> janá ná, rí naxini i cán. Naxini i ña yóho tátuhun in saní joo co quíji toho i. Ta naxini i mé da cándójó cuáy<sub>i</sub> cán naxih<sub>ahvi</sub> da yicá ndicá da xihín in caa, ña cúú á color cuáhá ni<sub>i</sub> xihín color ndihí ticay<sub>i</sub> xihín color cuáán ita. Ta ndáa jin<sub>i</sub> cuáy<sub>i</sub> tá quiahva ndáa jin<sub>i</sub> león ta yúhu r<sub>i</sub> quéta ñúhu ita xihín ñihma xihín azufre. <sup>18</sup> Ta in táhndá nuú un<sub>i</sub> táhndá ñayivi naxih<sub>i</sub> na ñacaja un<sub>i</sub> nuú tondóhó naquixi jatá ñuyívi yóho. Naxih<sub>i</sub> na xihín ñúhu cáy<sub>i</sub> ta xihín ñihma ta xihín azufre, ña ñaqueta yuhú cuáy<sub>i</sub>. <sup>19</sup> Jách<sub>i</sub> yúhu mé cuáy<sub>i</sub> cán xihín ndóho r<sub>i</sub> cúú nu ndacaan ndé<sub>e</sub> r<sub>i</sub>. Tá quiahva ndáa co quiahva já ndáa ndóho r<sub>i</sub>. Ta xihín mé yiquí jin<sub>i</sub> coo cán cája quini rí xihín ñayivi.

<sup>20</sup> Tóco ndihi java ga ñayivi, na coo nandih<sub>i</sub> saha xihín tondóhó naquixi jatá ñuyívi, na cán ñacaja y<sub>i</sub> va na ña núu ñacaja na. Ta ñacaja cáhnu y<sub>i</sub> va na ña quini. Ta coo najándacoo na cája cáhnu na yoco, ña ñacavaha na xihín j<sub>i</sub>uhun cuáán ta xihín j<sub>i</sub>uhun cúxú ta xihín caa cuáán ta xihín yuú ta janda ña ñacavaha na xihín yíto viti. Ta mé yoco yóho a cuú candehé a ta ni co tácu j<sub>i</sub>oho a ta ni a cuú caca nuu a. Joo ñacaja cáhnu tá ñacaja cáhnu na ña. <sup>21</sup> Ta ni coo najándacoo na ña sáhní na ndi<sub>i</sub>. Ta ni

coo najándacoo na ña tají cája na. Ta ni coo najándacoo na ña ndúu na xihín na coo cúú y<sub>i</sub> ná á ñájihí na. Ta ni coo najándacoo na ña cája cuíhná nā.

## 10

*Tá naxini Juan ña cáñee in libro loho ini ndáha inga táto Ndióxi*

<sup>1</sup> Anda já naxini i inga táto Ndióxi, ña iin cuahá ndivaha ndé<sub>e</sub>. Nanuu a indiví ñaquee a vaxi a tañu in vico ta cánúu in coo yánqui jin<sub>i</sub> á. Ta yéhe nuú á tá quiahva yéhe candii. Ta sahá cúú á tátuhun iv<sub>i</sub> jihín cándaha xihín ñúhu. <sup>2</sup> Ta ini ndáha mé á naxini i cáñee in libro loho ña nativ<sub>i</sub> tátuhun yiv<sub>i</sub> joo nandindica ña. Ta naxinúu mé á saha cuáha nuú tañuhú ta naxinúu a saha íti a nu ñúhu. <sup>3</sup> Ta ñacayuhú cóhó a tátuhun tá ndáhy<sub>i</sub> león. Ta tá ñacayuhú a já naxini j<sub>i</sub>oho i ña ñacahan cóhó usá tasa tá ñacana ña. <sup>4</sup> Tá nandih<sub>i</sub> ñacahan ndihusa tasa cán já ñanducú u cahyí i ña ñacachi a joo naxini j<sub>i</sub>oho i cáhan in a ñaquixi chí indiví ta já cách<sub>i</sub> a já xihín i:

—A cáhyún ña ñacachi ndihusa tasa ñacana jan. Xíní ñúhú coo jehé a —ñacachi mé a cán xihín i.

<sup>5</sup> Anda já naxini i mé táto Ndióxi ña cánúu in sahá nuú tañuhú ta inga sahá nu ñúhu cán, nandínehe a ndahá cuáha indiví. <sup>6</sup> Ta já ñacahan mé á quiv<sub>i</sub> Ndióxi ta já ñacahan tuhun a jách<sub>i</sub> Ndióxi tácu a

andá ama cáa quivi, mé á nacavaha indivi xihin ñuyivi xihin tañuhú xihin tóco ndihi ñaha ín nuu á. Ta já nacachi mé tátō Ndióxi já:

—A cáyancá ga <sup>7</sup> jáchi tá ná casahá tiví tátō Ndióxi ña cáhusa cán trompeta já xinū coo nu tóco ndihi ña nasacu ini Ndióxi coo jehé janda sanahá. Jáchi sa nacaxi tuhun mé á xihin profeta cuéntá mé á ña ná cahan na sahá ña yóho nuú ñayivi —cáchi tátō Ndióxi.

<sup>8</sup> Anda jávi naxini joho i nacahan tucu mé tátō Ndióxi indivi já nacachi a já xihin i:

—Cuáhán quehe libro loho núná nuu cán. Ndi quehe a ndáha tátō Ndióxi, mé a cánúu in saha nuú tañuhú ta inga sahá nu ñuhū jan —nacachi a.

<sup>9</sup> Tá nasaa i nu tátō Ndióxi cán já naxica i nu á ña ná quiahva libro loho cán nuú i. Ta já nanducú ñehe tátō Ndióxi cán tuhun nuú i já nacachi a já xihin i:

—Yóho ín libro loho joo xini ñuhú casún ña. Vatí mé a ndaa tá ná casún ña cacuu a tátuhun tá casún ñuñu jáchi caviji ndivaha yuhun caja ña. Joo tá nandihí nduu a ña ova ini tisún —nacachi a xihin i.

<sup>10</sup> Tá nandihí já natiin i mé libro loho ndáha tátō Ndióxi cán ta já nasaxí i ña. Ta nacaviji yuhú u xihin á tátuhun ñuñu. Joo tá sa nacocó i ña já nacahova ña ini tixi i. <sup>11</sup> Anda já natahnda chuun nuú i já nacachi a já xihin i:

—Ndítahan nuun caxi tuhun tucún xihin ñayivi ña cáhan Ndióxi sahá cuahá ndivaha ñuu xihin cuahá ndivaha naciún nu cáhan na ndijáá tuhun. Ta xini ñuhú caxi tuhún ña nuú ndijáá na cómi cuéntá sahá ñuyivi — nacachi a xihin i.

## 11

### *Ivi na cúu testigo*

<sup>1</sup> Tá nandihí já nasahan na in yító vara, dó chiquiahvá nuú i. Ta tá cuni coo ndoo já cuni coo mé vara cán. Ta já nacachi na já xihin i:

—Candichi ta chiquiahvún veñuhu cáhnu Ndióxi. Ta ndítahan chiquiahvún nu náa Ndióxi vití. Ta ndítahan cahvún ndaja cúu na cája cáhnu Ndióxi mé jan. <sup>2</sup> Joo coto a chíquiahvún ñundáhyi, ña cáva nuu ndícomí tito yéhe veñuhu cán. Jáchi sa nandiquiahva Ndióxi ña yóho nuú ñayivi tóho ña ná caja tá quiahva cuni mé ná xihin Jerusalén, ña cúu ñuu yii ñaha Ndióxi tixi ivi jico ivi yoo. <sup>3</sup> Ta já chindahá yehe ivi testigo, na candixi jahmá ndáhyí, ña ndíxi ñayivi tá cándií ini na. Ta cuhun na cahan na sahá yehe tixi in mil ivi ciento uní jico quivi —nacachi na.

<sup>4</sup> Ta naxini i ivi yitó olivo xihin ivi nu sándójó íti, dó cúu yuhú nuu testigo ndíta nu Ndióxi, mé a sahnda chuun nuú ñuyivi. <sup>5</sup> Ta ni in na a cúu caja ni in ñaha xihin ndívi testigo Ndióxi yóho jáchi cuu caja na ña ná cana ñuhū ita ini yuhú ná ta cuu chicaan

ñúhu na já ná jándihi na sahá na ihvi na. Ta quiahva já quivi ndá na ná nducú caja xíxi xihín ná. <sup>6</sup> Ndíví mé testigo Ndióxi yóho íin ndée ná chicaji na indiví já ná a cúun javi nani cáhan na cuéntá Ndióxi nuú ñayivi. Ta íin ndée ná ndaja na ticuij ña ná nduu dó nji. Ta íin ndée ná chicaoan na ndá cuehe cúnj mé ná chicaoan na jatá ñuyíví yóho. Ta núná nu ná caja na ña ndaja tañu cúnj mé ná. <sup>7</sup> Joo tá sa nandihí naçahan ndíví testigo yóho xihín ñayivi janda jáví quixi in quití quini, rí queta tañu yávi, ña co xínu nu ndíhi nuu cán. Ta já caní táhan rí xihín ndíví na cán ta quee vaha rí xihín ná ta cahní rí na. <sup>8</sup> Ta já canduu yiquí cuñu ndíví na cán mahñú java ndaa cáyé ñuu Jerusalén nuú nasahní na Jesucristo, mé á cúú xitoho í. Ta mé ñuu Jerusalén yóho cúú á yuhú nuu ñuu Sodoma xihín nación Egipto sahá cuachi cuahá cája ñayivi ndúu cán. <sup>9</sup> Ta ñayivi ndúu ndijáá ñuu xihín ndijáá nación xihín na cáhan tá nuú tuhun xihín na naquixi ndijáá chichi cuni na yiquí cuñu mé testigo Ndióxi yóho tixi unj quiví java. Ta a quiahva toho na ñamanj jánduxu na ndíví testigo Ndióxi yóho. <sup>10</sup> Ta ñayivi ndúu ñuyíví cajji ndivaha ini na sahá ña naxihí ndíví testigo Ndióxi yóho. Ta cávatá na janda quiahva jasá ñaha nu táhan johu na sahá ña naxihí ndíví testigo Ndióxi na najándoho ndivaha ini ñayivi

ñuyíví xihín ña naçahan na. <sup>11</sup> Joo tá sa nayaha unj quiví java chí jánditacu Ndióxi ndíví testigo cán já ná ndacoo tucu na. Ta tá ná cuni ñayivi ña yóho casahá quiji ninu na xihín ña yíhví na. <sup>12</sup> Anda já cuni johu ndíví testigo cán in a cáhan cóhó indiví. Ta já cachi a já xihín ná:

—Cuándaa ndó chóho —  
cachi a já xihín ná.

Já ndaa na indiví tañu in vico nuú ndihi na ihvi na. <sup>13</sup> Ta mé hora já taan ndée ndivaha. Ta jándihi a in táhndá nuú uxu táhndá mé ñuu cáhnu cán ta já quivi usa mil ñayivi. Ta na coo naxihí cán chutú ndaa na xihín ña yíhví na ta já casahá na caja cáhnu na Ndióxi, mé a íin indiví.

<sup>14</sup> Sa nayaha va tondóhó cáhiví. Joo sa cátivi tondóhó cáhunj vaxi a.

*Tá nativí tátø Ndióxi trompeta cáhusa*

<sup>15</sup> Ta tátø Ndióxi ña cáhusa cán nativí a inga trompeta. Ta tá nativí a do já naxini johu i cáhan cóhó cuaha ná indiví. Já cáhí na já:

Ta viti nandindaa hora sahndá Ndióxi, xitoho í xihín Jesucristo chuun.

Ta mé á quéa nachindahá Ndióxi cacomí a cuéntá sahá ñayivi.

Ta íin ndée a cahnda chuun nuú ñuyíví yóho anda ama cáa quiví, naçachi cuaha ná mé indiví.

<sup>16</sup> Ta ndíhoco comí na sacuaça, na naçava tiyiví

naşanduú coo nu táyi vaha  
yati nu in coo Ndióxi cán,  
naçaxítí na janda quiahva  
naçani ndaa taan na nu ñúhu  
ta naçaja cáhnu na Ndióxi.

17 Já naçachi na já xihín á:

Ndíquiahva nde ndixahvi nu  
ndóhó, Ndióxi, xitoho  
nde, mé a in ndée caja  
tóco ndihi ñaha.

Janda tá camaní cava sáhá  
saha ñuyívi naşahin  
va mé ndó.

Ta sa já in ndó viti ta quixi  
tucu ndó.

Ndáha mé ndó in ndihi ndée  
viti sahá ña cán quéa  
naçasáhá ndo sahdá  
ndo chuun nuú ñayivi.

18 Ta ñayivi ndúu ní cúu  
ñuyívi naçasáhá na  
xójo ndivaha ini na.

Joo viti naşinu coo quivi caja  
xíxi ndó xihín na cán.

Ta viti naşinu coo hora caja  
víí ndó sahá na sa  
naşihí.

Ta sa naşinu coo hora chaşvi  
ndó nuú na profeta, na  
cáhan cuéntá mé ndó.

Já naşinu coo hora chaşvi  
ndó nuú na cúu cuéntá  
mé ndó, na cája cáhnu  
mé ndó,

ta coo caja toho a á cúu ná na  
náhnu á cúu ná na válí.

Ta naşinu coo hora jándihi  
ndó sahá ñayivi quini,  
na cája ña núu xihín  
ñuyívi yóho, cáhí na  
cán cája cáhnu na  
Ndióxi.

19 Tá nandihí já naşini i  
nanuna yéhe veñuhu Ndióxi,  
ña in indiví. Ta cán tívi  
ndácaan saço arca ñaha  
Ndióxi. Ta já naçasáhá cána

tasa. Ta naşini johó i jandá  
johó vaa cúu tácu cáhan na.  
Ta naçasáhá cána javi ta  
taan ndeé ndivaha ta cúun  
ndivaha ñíí.

## 12

*Naşini Juan ña ndúcu in  
coo quini caja xíxi rí xihín in  
ñáñáha*

1 Tá nandihí já naşini  
i nayaha in ña xituhún  
ndivaha indiví. Naqueta  
in ñáñáha, ña cátví jáhma  
ña cúu candii. Ta cándichi  
ña jatá yoo. Ta cánúu in  
tiyivi jini ña, ña naçacutú  
xihín uxu ivi quimi. 2 Ta  
sa víxi ña cacu jahyi ña. Ta  
ndáhví ndáhyi ña jáchi ndóho  
ndivaha ini ña janda quiahva  
ná cacu jahyi ña. 3 Tá nandihí  
já nayaha inga ñaha cáhnu  
indiví. Naşini i in coo quini,  
rí cuáhá. Ta in usa jini rí  
xihín uxu ndíqui rí. Ta cánúu  
in tiyivi jatá in in yiquí jini  
rí cán. 4 Ta mé coo quini  
cán nañuhu rí in táhdá nuú  
uni táhdá quimi ndúu indiví  
xihín ndóho rí. Ta já najaní  
rí mé quimi cán jatá ñuyívi.  
Ta mé coo quini cán nandaca  
ndichi rí yati nu in ñáñáha  
cácu jahyi cán jáchi cúni rí  
caxí rí jahyi ña tá ná cacu  
a. 5 Tá nandihí já naçacu in  
ta jahyi ña, da cahnda ndeé  
chuun saha tóco ndihi ñayivi  
ñuyívi. Joo naşañehe Ndióxi  
a ninu nu in coo mé á. 6 Ta  
naşinu ñáñáha cán cuahan  
ña chí xoo yucú íchí jáchi mé  
cán sa naşacu tiaşva Ndióxi  
nuú cuu coo ña coto ñahá tíxi  
in mil ivi ciento uni jico quivi.

7 Tá nandihí já nacasáhá cúu tondóhó indiví. Ta naxini i Miguel xihín tátō Ndióxi naxani táhan na xihín coo quini cán ta xihín tátō mé rí. 8 Joo coo naxuu quee vaha coo quini cán xihín tátō Ndióxi ña cán quea coo naxuu canduu chága rí cán indiví. 9 Ña cán quea najácana Ndióxi mé rí cán janda ñuyiví yóho. Mé rí nasahiin rí janda sanahá ndivaha. Ta naní rí Satanás, mé tiñáhá sacuaḥa, rí jándahvi tóco ndihí ñayivi ndúu ñuyiví. Mé rí xihín tóco ndihí tátō rí ndíco jata rí najácana Ndióxi rí janda ñuyiví yóho.

10 Tá nandihí já naxini johó i cáhan cóhó in a indiví já cáhí a já:

—Sa naxinu coo quiví cacu ndaa ínimā ñayivi jáchi cómí Ndióxi cuéntá saḥa ná xihín ndée mé á. Ta sa naxinu coo quiví cahnda Jesucristo chuun, mé a nachindahá Ndióxi cacomí cuéntá saḥa ñayivi. Saḥa ña cán quea sa nataxí Ndióxi tiñáhá sacuaḥa nu in mé á jáchi ñuu ta ndiví nasahiin rí nu mé á chicaan rí cuachi jatá na cúu cuéntá Jesús. 11 Mé na cúu cuéntá Jesús naquee vaha na xihín rí saḥa ña naxaja Jesús, mé a cúu tátuhun ndicachi loho tá naxita ñi á ndica crúxu saḥa ná. Ta naquee vaha na xihín rí jáchi coo najándacoo na cáhan na ña ndaa saḥa Jesús. Ta co yíhví toho na quivi na saḥa mé á. 12 Tóco ndihí ndó, na ndúu indiví xíní ñúhú cajji ini ndó. Joo ndáhví nahá

naxuu na ndúu ñuyiví xihín na ndúu ini tañuhú. Jáchi xójo ndivaha ini tiñáhá sacuaḥa ta nanuu rí caja xíxi rí xihín ndó jáchi cándaḥ vaha ini rí ña sa ja chá cuití cúni ndihí saḥa rí —naxachi a indiví.

13 Tá naxandaḥ ini mé coo quini cán ña najácana Ndióxi rí ñuyiví já nacasáhá rí ndicuṭta ñee rí ñáñáḥa, ñá naxacu jahyi cán. 14 Joo nañeḥe ñá ivi ndixi náhnu ndivaha, ña cúu tátuhun ndixi tiyaha. Saḥa ña cán quea nandachí xíca ña nu mé coo quini cán cuahan ña yucú íchí nuú nasahiin ñá. Ta cán coto na ña tixi uní cuja java. 15 Tá nandihí já naxaja mé coo quini cán ña ná queta cuahá ndivaha ticuiví yúhu rí. Ta já naxavaha rí in yuta jáchi cúni rí jatañu rí mé ñáñáḥa cán. 16 Joo nachindee ñundáhyi ñáñáḥa cán jáchi nandata ta naxihi ndihí a ticuiví naxana yúhu mé rí cán. 17 Ta xihín ña yóho ví ga ví naxojo ini coo quini cán xihín ñáñáḥa. Saḥa ña cán quea naquee rí cuahan rí caní táhan rí xihín java ga táhan na naquixi chichi mé ñá. Mé na yóho cúu ná na cája ña sáhdá tuhun Ndióxi ta co jándacoo na cája na ña ndaa ña najánaḥa Jesucristo nu ná.

## 13

*Tá naxini Juan ivi quití quini*

1 Tá cándichi i nuú ñuti yuhú tañuhú já naxini i naqueta in quití quini tañu tañuhú cán. Ta nasahiin usa yiquí jíní rí xihín uxu ndíqui rí. Ta cánúu



in tijiví jatá in in ndíqui rí. Ta ndáa tuhun ña cánahá xihín Ndióxi nuú in in yiquí jíní rí.  
 2 Mé quití quini naxini i yóho, cáa rí tá quiahva cáa ndicaha. Ta saha rí ndáa ña tá quiahva ndáa saha oso. Ta yúhu rí cúu á tátuhun yúhu león. Ta mé coo quini cán nasahan rí ndée rí nu mé quití quini, rí naqueta ini tañuhú yóho ña ná cuu cacomí rí cuéntá sahá ña cómí mé coo quini cán cuéntá saha. Ta cúu cája rí ña cúu cája mé coo quini.  
 3 Ta in táhan ndihusa yiquí jíní mé quití quini cán nandicuehe cáhví ña. Joo tá nandihí já nandivaha ña. Sahá ña cán quéa ndaja táhan ñayivi ndúu ñuyiví ñacatóntó ndivaha na. Ta já ñacasáhá na ndíco na jatá mé quití quini cán.  
 4 Ta ñacaja cáhnú ñayivi coo quini cán jáchí nasahan rí ndée rí nuú quití quini cán. Ta quiahva já ñacaja cáhnú na mé quití quini cán já cáchí na já:

—Coó ga inga rí cáhnú chága nu quití quini yóho. Ta ni in rí a cúu quihvi cani táhan xihín rí —cáchí na cája cáhnú na mé quití quini cán.

5 Ta mé quití quini cán ñañehe rí ñamaní ña ná cahan rí tuhun quini ndivaha, ña jándihihví rí Ndióxi. Ta ñañehe rí ñamaní cahnda rí chuun tixi iví jico iví yoo.  
 6 Sahá ña cán quéa ñacasáhá cáhan quini rí saha Ndióxi ta jándihihví rí mé á xihín ña núu cáhan rí. Ta cáhan núu rí saha mé nu ín Ndióxi cán xihín

saha tóco ndihi na ndúu indiví.  
 7 Ta ñañehe rí ñamaní cani táhan rí xihín na cúu cuéntá Ndióxi janda quiahva quee vaha rí xihín ná. Ta ñañehe rí ñamaní cahnda rí chuun sahá ndaja táhan ñayivi naquixi ndijáa chichi xihín na cáhan tá nuú tuhun xihín na ndúu ndijáa ñuu xihín ndijáa nación.  
 8 Tóco ndihi ñayivi ñuyiví caja cáhnú na quití quini cán jáchí janda tá camaní cava sahá saha ñuyiví coo ñacahyi toho quiví ná nu libro nu ndáa quiví tóco ndihi na catacu anda ama cáa quiví. Mé libro yóho ín a nu Jesús, mé á cúu tátuhun ndicachi loho, rí naxihí ndica crúxu.

9 Cuni joho vaha ndó, na vaha joho.  
 10 Ndá na ná chicaan in na vecaa, cuhun ri mé va na vecaa. Ta ndá na ná cahní inga na xihín yuchú cáni, xihín yuchú cáni quivi ri mé va na. Sahá ña cán quéa xíní ñuhú quiahva ndeé ini na cúu cuéntá Ndióxi ta xíní ñuhú candee cáhnú ini na mé á.

11 Tá nandihí já naxini i inga tucu quití quini, rí naqueta nuú ñundáhyi. Ta nasahiin iví ndíqui rí ta ndáa ña tá quiahva ndáa ndiquí ndicachi. Joo cáhan rí tátuhun cáhan in coo quini.  
 12 Ta ñacaja chúun rí tóco ndihi ndée mé quití quini nu cuítí cán nu ín mé rí. Ñacaja rí ña ná caja cáhnú tóco ndihi ñayivi ndúu ñuyiví mé rí naqueta nu cuítí cán. Jáchí nandicuehe cáhví jini rí

nū cuítí cán joo nandivaha rí. <sup>13</sup> Mé inga quití quini cáhivi cán nacaja cuahá ndivaha rí ñaha xitúhún. Nacaja rí ña ná quixi ñúhu cáyi chí indivi ta naxinu a nacuyu a ñuyívi nū tóco ndihi ñayivi. <sup>14</sup> Ta najándahvi rí ñayivi ndúu ñuyívi xihín tóco ndihi ña xitúhún, ña nañehe rí ñamani caja rí yóho nū mé rí nū cuítí cán. Ta nasahnda mé inga rí cán chuun nuú ñayivi ñuyívi ña ná cavaha na in tiniñu yúu quití quini nū cuítí cán. Mé rí nandicuehe quini ndivaha rí xihín yuchú cáni joo nandivaha rí. <sup>15</sup> Ta mé rí cáhivi cán nañehe rí ñamani ña jánditacu rí tiniñu yúu mé rí nū cuítí cán já ná cuu cahán rí. Ta já ná cuu cahnda rí chuun ña ná cahni rí ñayivi, na co cuni caja cáhnu mé rí quini cán. <sup>16</sup> Ta mé rí cáhivi cán nacaja rí ña ná quihvi marca ndahá cuáha ñayivi á taan na. Ta coó caja toho a á cúu ná na valí á na náhnu, á cúu ná na cuicá á na ndahví. Ta ni coó caja toho a á cúu ná na xíca núná, á cúu ná na cómi xitoho cuéntá saha. Nū tóco ndihi ñayivi naquihvi marca nacaja mé rí cán. <sup>17</sup> Ta ni in ñayivi a cuú cueen na ñaha ta ni a cuú jicó na ñaha tá coó nanani mé marca cán na. Ta tá co cándaa quivi mé quití quini, rí nū cuítí cán taan na á tá coó numero mé rí cándaa taan na já quea a cuú cueen na ñaha jáchi numero yóho náha ndaja naní mé rí nū cuítí cán. <sup>18</sup> Xihín ña yóho cuu candaa ini ndó ndá na cúu

na ndichí jini. Ndá ndó, na cándaa ini xini ñúhu jitá ndo cuéntá xihín numero ña cúu quivi mé rí nū cuítí cán jáchi cúu á tátuhun quivi ñayivi. Ta numero yóho cúu á iñu ciento uni jico iñu.

## 14

*Tá xíta in ciento ivi jico comi mil ñayivi caja cáhnu na Ndióxi*

<sup>1</sup> Tá nandihí já naxini i Jesús, mé á cúu tátuhun ndicachi loho cándichi a jata yucu naní Sión. Ta xihín mé á ndíta in ciento ivi jico comi mil ñayivi, na ndaa quivi Jesús taan, mé a cúu tátuhun ndicachi loho cán. Ta quiahva já ndaa quivi Ndióxi, tátá a taan na. <sup>2</sup> Ta naxini johó i in a cahán chí indivi. Ta tá cahán mé a cán cúu á tátuhun tá níhi cuyu ticui tañu tóto. Ta níhi a tátuhun tasa tá cána. Ta tácu a tá quiahva tácu nū jácaha cuahá ndivaha na arpa. <sup>3</sup> Ta naxini johó i ña saá xíta mé in ciento ivi jico comi mil ñayivi nū ín coo Ndióxi cán xihín nuú comi mé ña tácu cán xihín nuú na sacuahá cán. Mé na xíta cán cuítí va cúu na cuu catiahva cata na ña jáchi cúu ná na nacaxi Ndióxi jácacu a tañu ñayivi ndúu ñuyívi. <sup>4</sup> Ta na yóho cúu ná na vií, na coó nacaja quini mé jáchi coó nasanduu na xihín najihí. Cúu ná na nasandico ní tiempo jata Jesús, mé a cúu tátuhun ndicachi loho. Cúu ná na nacaxi Ndióxi jácacu a nū cuítí ña ná joco a na nū

mé á xihín nu Jesús, mé a cúu tátuhun ndicachi loho. <sup>5</sup> Ta ni in táláá ña tühún coó ñacahan na. Ta ni in na coó ñacuu ñeñe íni chícaan cuachi jata ná.

*Tá cahan uni tátō Ndióxi tühun vaha sahā Jesucristo nuú ñayivi ndúu ñuyiví*

<sup>6</sup> Tá nandihí já naxini i inga tátō Ndióxi ndáchí a mañnú ndaa indiví. Ta ñeñe a tühun vaha sahā Jesucristo ña íin anda ama cáa quiví caxi tühun a ña nuú ñayivi ndúu ñuyiví, mé na ñaquixi ndijáa chíchi xihín na cahan tá nuú tühun xihín na ndúu ndijáa ñuu xihín ndijáa nación. <sup>7</sup> Ta já cáyuhú mé tátō Ndióxi cán já cáchí a já:

—Xíní ñúhú cayihví ndó Ndióxi ta xíní ñúhú caja cáhnu ndó mé á jáchi sa naxinu coo quiví caja vií mé á sahā ñayivi. Xíní ñúhú caja cáhnu ndó mé á jáchi mé á quéa ñacavaha indiví xihín ñuyiví ta mé á quéa ñacavaha tañuhú xihín ndijáa nu cána ticuúí —cáchi tátō Ndióxi cán.

<sup>8</sup> Tá nandihí já naxini i inga tátō Ndióxi ta já ñacachi a já:

—Ay, ay, sa nandihí va sahā ñuu cáhnu naní Babilonia xihín sahā ñayivi ñasanduu jan. Ta na jan ñasacuu na na najánañaha íchí quini nuú ñayivi ndúu ñuyiví já ná caja na tá nuú ña núu. Joo viti sa nandicava va mé Babilonia —cáchi tátō Ndióxi, ña cáhiví cán.

<sup>9</sup> Tá nandihí já naxini i ñaqueta inga tátō Ndióxi, ña

cáhuñi. Ta ñacasahá cáyuhú cóhó a já cáchí a já:

—Ndá na ná caja cáhnu quití quini xihín tñiñu yúu rí ta sahan na ñamaní ña ná ñani marca mé rí cán taan na á ndáha na <sup>10</sup> já quéa ndoho ndivaha ini na caja Ndióxi jáchi xójo ndivaha ini mé á xihín ñayivi quini. Jácana Ndióxi na nu cándaha ñúhu cáyí xihín azufre ta candehé tóco ndihí tátō Ndióxi ta candehé Jesús, mé a cúu tátuhun ndicachi loho cán ña ndóho na. <sup>11</sup> Ta cána ñihma ini nu ñúhu mé na ndóho ini cán anda ama cáa quiví. Ta ni ñuu ni ndiví co ndíquehe ndée ná nu ndóho ini na jáchi ñacaja cáhnu na quití quini cán xihín tñiñu yúu rí ta ñasahan na ñamaní ña ñanani marca quiví rí cán yiquí cuñu na. <sup>12</sup> Xíní ñúhú quiahva ndee ini na cúu cuéntá Ndióxi, mé na cája tóco ndihí ña sáhdá Ndióxi ta co jándacoo na ña cája cáhnu na Jesús —cáchi tátō Ndióxi cáhuñi.

<sup>13</sup> Tá nandihí já naxini joho i ñaquixi in a cahan chí indiví já ñacachi a já xihín i:

—Cahyún ña ná cahan i xuhun yóho: “Viti ta chí nuu cajii ini na ñaxihí, na cándeé ini Jesús, xitoho na” —cáchí a.

Ta já cáchí ínimá yii Ndióxi já:

—Mé a ndaa cajii ini na cán jáchi ndiquehe ndée ná sahā ña ñacaja chúun vaha na cuéntá míi. Ta ña vaha ñacaja na cán coo a níi tiempo xihín ná —cáchí ínimá yii Ndióxi.

*Tá jándoho Ndióxi ini ñayivi*

14 Tá nandihí já ñasandehé e ta já ñaxini i in vico yaa. Ta cánúu in ña cáa tá quiahva cáa in ñayivi jatá mé vico. Ta cánúu in tiyivi jiuñun cuáan yiquí jini ña ta cáñee in machiti tojo jeen ndáha dá. 15 Tá nandihí já ñaqueta inga táto Ndióxi ini veñuhu Ndióxi cán ta já cáyuhú cóhó a já cáchí a já xihín mé ña in coo jatá vico cán:

—Xini ñúhú casáhún jáqueún ña in ñuyivi xihín machiti tojo ñéhún ñan jáchí sa ñaxinu coo va hora jáqueún ña in jatá ñuyivi jáchí sa ñachichi va viti —ñacachi a.

16 Anda já ñaxini i ñacasáhá mé ña ñasanúu jatá vico cán jáquihvi da machiti tojo da jatá ñuyivi ta já ñajáquee da ñaha jatá ñundáhyi.

17 Tá nandihí já ñaxini i ñaqueta inga tucu táto Ndióxi ini veñuhu in indivi cán ta quiahva já cáñee inga machiti tojo jeen ndahá a. 18 Ta nu in nu náa mé veñuhu cán ñaqueta inga táto Ndióxi, mé a cómi cuénta saha ñúhu ita ña cáyi. Ta já ñacahan cóhó a xihín mé táto Ndióxi nu cuítí cán, ña cáñee machiti tojo jeen ndáha cán já ñacachi a já:

—Xini ñúhú jáquihvún machiti tojo jeen cáñee ndáñun ñan ta casáhá cahnúu uva cúun nu dó uva ndúu ñuyivi jáchí sa ñachichi uva nu do —ñacachi a.

19 Anda já jáyaha táto Ndióxi cán machiti tojo nuú

ñundáhyi ta já ñasahnda ndihí a uva nu tó uva cán ta ñataán a uva cán ini in pila cáhnu ña ná cuñni ri. Ta ña yóho náha ndá quiahva quini ndoho ini ñayivi caja Ndióxi jáchí xójo ndivaha ini a xihín ná sahá cuachi cája na. 20 Ta tá ñasuhní uva cán ini mé pila cáhnu yuhú ñuu cán já ñacana ñii, dó cúu tátuhun yuta cúna janda quiahva cani ndaa dó yati yuhú in cuayi. Ta tá quiahva cani xica dó cuahan do cúu á tátuhun uní ciento kilómetro.

## 15

*Tá xinu coo táto Ndióxi xihín usa chága tondóho quixi jatá ñuyivi*

1 Tá nandihí já ñaxini i inga tucu ña cáhnu chí indivi ta chí ñacatóntó i. Ta ña ñaxini i cúu usa táto Ndióxi ta in in ña yóho ñéhe a chága tondóho quixi jatá ñuyivi ña ná jándihí a ña xójo ini Ndióxi.

2 Ta ñaxini i in ñaha ta náha tátuhun in tañuhú ta tá quiahva in nuú yutátá quiahva já in nuú do joo cúu dó dó cáva táhan xihín ñúhu cáyi. Ta yati jini mé tañuhú náha tátuhun yutátá cán ndíta ñayivi, ña ñacandee ñasahnu nu tóco ndihí ña núu sahá ña coo ñacaja cáhnu na quití quini xihín tiniñu yúu ri. Ta ni coo ñaquehe na túni ña cúu numero mé rí quini cán. Ta mé ña ndíta cán cáñee arpa ndáha ña, dó ñasahan Ndióxi nu ná. 3 Ta xita na ña ñaxita Moisés, mé ña ñacaja chúun cuénta Ndióxi. Ta xita

na ña naxita Jesús, mé a cúu tátuhun ndicachi loho cán ta já cáchi na já:

Cátontó nde tá xíní nde tóco ndihi ña nacavaha mé ndó, Ndióxi, xitoho nde,

jáchi in ndée ndó caja ndó tóco ndihi ñaha.

Íchi cuénta mé ndó cúu á íchi ndacú ta cúu á íchi cuénta ña ndaa.

Ta mé ndó cúu ndó ña cómi cuénta sahá ndaja táhan nación ndúu ñuyívi yóho.

4 Tóco ndihi ñayivi yíhvi na ndohó, mé a cúu xitoho nde ta cáhan na ndaja cáhnu cúu mé ndó.

Jáchi in túhún mé ndó cúu ndó Ndióxi yij.

Ta tóco ndihi ñayivi ndúu ndijáa nación xinu na caja cáhnu na mé ndó,

jáchi náha ndá quiahva cája ndó ña ndaa, cáchi na xíta na.

5 Ta tá sa nayaha ña yóho já nasandehé ta naxini i nanuna veñuhu indivi, ña nacavaha na xihin ñijí quití. Ta nasañuhu ley Moisés cán.

6 Ta ini mé veñuhu indivi naqueta ndihusa táto Ndióxi, mé a ñéhe usa nuú tondóhó quixi jatá ñuyívi. Ta ndíxi táto Ndióxi cán jahmá vií, ña lino, ña ndató ndivaha yéhe. Ta ndacaan in cinturón ña jjuhun cuáán tóco á ta cáni a janda yati yicá ndicá a. 7 Ta in táhan ndícomi mé ña tácu cán nasahan in in cóhó, ña jjuhun cuáán nuú in in táhan ndihusa táto Ndióxi cán. Ta ini in in

cóhó cán ñúhu ndaja táhan tondóhó ña vaxi jatá ñayivi ndúu ñuyívi caja Ndióxi, mé a tácu anda ama cáa quívi. 8 Ta nachutú ndaa veñuhu cán xihin ñihma, ña náha ndá quiahva cáhnu cúu Ndióxi xihin ndá quiahva cáhnu cúu ndée mé á. Ta ni in na cóo nañehé ñamaní quíhvi ini veñuhu cán janda quiahva naxinu ndihusa tondóhó, ña ñéhe ndihusa táto Ndióxi cán.

## 16

*Usa cohó ña ñúhu usa tondóhó*

1 Tá nandihí já naxini johó i nacahan cóhó in a tañu veñuhu indivi cán. Ta já cáchi a xihin ndihusa táto Ndióxi cán já:

—Cuáhán ndó cuyu ndó ndihusa cohó jan jatá ñuyívi. In in a cán cúu á in tondóhó chindahá Ndióxi jatá ñuyívi ta ndoho ndivaha ini ñayivi xihin á —cáchi a.

2 Anda já in táto Ndióxi, mé a nu cuití nasahan nacuyu a ña ñúhu ini cohó ñéhe a cán jatá ñuyívi. Ta já naxinu cuehe táhyi, ña ihvi ndivaha yiquí cuñu ñayivi, na naquehe marca quití quini cán, mé na nacaja cáhnu tiníñu yúu ri.

3 Tá nandihí já inga táto Ndióxi ña cáhivi cán nacuyu a ña ñúhu ini cohó ñéhe a jatá tañuhú. Ta tóco ndihí dó nanduu dó ñijí tátuhun ñijí ndii. Ta tóco ndihí ña tácu ini tañuhú cán naxihí ndihí a.

4 Ta tá nandihí já nacuyu táto Ndióxi ña cáhuni cán ña

ñúhu ini cohō ñéhe a jata ndijáa yuta xihín ndijáa nu cána ticuúí ta nanduu dó nui.  
 5 Tá nandihí já naxini johō i cáhan in tátō Ndióxi, mé a cómí cuéntá sahá ticuúí cán já cáhí a já:

—Tátá Ndióxi, mé ndó cája ndó ña ndaa jáchi nacaja vií ndó sahá ñayivi jan. Yii ndivaha cúu ndó ta íin ndó viti ta janda saha nasahiin ndó. 6 Najándoho ndó ini ñayivi jan jáchi nasata na níj na cúu cuéntá mé ndó xihín níj na profeta tá nasahní ñahá na. Joo viti nacaja ndó xihin ná ña ná coho na nui já ná ndoho ini na. Ta quiahva já cáni a coo a —nacachi tátō Ndióxi cán.

7 Tá nandihí já naxini johō i in a cáhan nu náa Ndióxi cán já cáhí a já:

—Tátá Ndióxi, mé ndó cúu ndó xitoho ndé ta íin ndée ndó caja ndó tóco ndihí ñaha. Ta nacaja ndó ña ndaa tá nacaja vií ndó sahá ñayivi —cáhí a.

8 Tá nandihí já naxini i inga tátō Ndióxi ña cácomí cán ta nacuyu a ña ñúhu ini cohō ñéhe a jatá candii. Ta xihín ña yóho nañehé candii cán ndée á chicaan ñúhu a ñayivi xihin ñúhu cáyi. 9 Ta já nacayi quini ndivaha tóco ndihí ñayivi. Joo coó naxeen na ndicó coo ini na ta ni coó nacaja cáhnu na Ndióxi. Ña nacaja na quea nacasáhá na cánahá ndivaha na xihin Ndióxi, mé a íin ndée nu tóco ndihí tondóhó quíxi jata ñuyíví yóho.

10 Tá nandihí já naxini i inga tátō Ndióxi, ña cáhuhun cán ta nacuyu a ña ñúhu ini cohō ñéhe a jatá táyi nu íin coo quití quini cán. Ta já naxini i nacanaa yávi mé nu ndúu na sáhdá rí chuun nu cán. Ta já nacasáhá mé na cán sáxí yihí na yáa ná jáchi nacasáhá ndóho ndivaha ini na. 11 Joo coó najándacoo na ña núu cája na. Ta sahá ña nacahihvi ndivaha yiquí cuñu na cán xihín cuehe ndóho na já nacanahá ndivaha na xihin Ndióxi, mé a íin indiví.

12 Tá nandihí já naxini i inga tátō Ndióxi, ña cáhíñu cán ta nacuyu a ña ñúhu ini cohō ñéhe a jatá in yuta cáhnu naní Eufrates. Ta já nahichí ndihí ticuúí nasañuhu ini yuta cáhnu cán ta já nanuná nuú yaha na cúu rey, na naquixi chí xoo nu cána candii.

13 Tá nandihí já naxini i naqueta uní ínima quini. In rí naqueta yúhu coo quini ta inga rí naqueta yúhu quití quini ta inga rí naqueta yúhu da cúu profeta túhún cán. Ta mé ínima quini cán ndaa tá quiahva ndaa láhva cúhndó. 14 Ta rí cán cúu ínima rí quini, rí nacaja ña xitúhún nuú ñayivi. Ta cúu rí rí queta cuahan jataca ndaja táhan rey sáhdá chuun nuú ñayivi ndúu ñuyíví já ná cani táhan na xihin Ndióxi. Jáchi sa nacayati quíví nahá ndá quiahva cáhnu cúu Ndióxi jáchi mé á quea íin ndée cája tóco ndihí ñaha. 15 Anda já nacachi Ndióxi já: “Cuéntá coo ndó jáchi tá quiahva

jonáá xínu da cujhná quiahva  
 já jonáá xínu i nu ndo. Ín  
 saha cájii ini ndá na sa ndáti  
 tiahva saa i jáchi cúú ná  
 tátuhun na nasandíxi tiahva  
 jáhma. Já quéa ná a cácahan  
 nuú ná tá ndáa lahla na nuú  
 ñayivi”, cáchí a. <sup>16</sup> Ta rí quini  
 cán najátaca rí tóco ndihi rey  
 sáhdá chuun nuú ñayivi in  
 nuú naní Armagedón tuhun  
 hebreo.

<sup>17</sup> Tá nandihí já inga táto  
 Ndióxi ña cáhusa cán nacuyu  
 a ña ñúhu ini cohó ñéhe a nu  
 táchi. Ta já naxini johó i cáhan  
 in a ini veñuhu indiví nu ín  
 coo Ndióxi nu sácoo rey cán.  
 Ta cáhan cohó á já cáchí a já:

—Sa nayaha tóco ndihi ña  
 ndítahan coo —nacachi a.

<sup>18</sup> Tá nandihí já naxini i  
 nacasáhá cána tasa. Ta naxini  
 johó i jandá vaa johó cúu tácu  
 cáhan na. Ta naxini johó  
 i jandá johó cána javi. Ta  
 nacasáhá quíji ninu ñundáhyi  
 jáchi nacasáhá táan ndeé  
 ndivaha. Ta mé nditáan yóho  
 nasacuu a ña ndeé chága  
 nu tóco ndihi ña táan jáchi  
 janda quiví nasacu Ndióxi  
 ñayivi ñuyiví coo naquixi  
 inga nditáan ndeé tátuhun  
 ña yóho. <sup>19</sup> Ta mé ñuu cáhnu  
 ndivaha cán nandata uní ña.  
 Ta ndijáa ga ñuu náhnu ndúu  
 ñuyiví nacuyu ndihi a. Ta  
 nandicuhun ini Ndióxi sahá  
 ñuu cáhnu naní Babilonia cán  
 ta najándoho mé á ini na ndúu  
 cán jáchi xójo ndivaha ini a  
 xihín ná. Ta ña ndóho na cúu  
 á tátuhun xíhi na vino cuéntá  
 tondóhó. <sup>20</sup> Ta tóco ndihi  
 isla ñúhu ini tañuhú xihín

ndijáa java ga yúcu ndúu jata  
 ñundáhyi nandihí sahá. <sup>21</sup> Ta  
 naxini i nacuun ñíí náhnu ña  
 vee ndivaha tátuhun ivi jico  
 kilo in in a. Ta janda indiví  
 naquee a nacuyu a jatá ñayivi  
 ndúu ñuyiví. Ta nacasáhá  
 na cánahá na xihín Ndióxi  
 sahá ña najácuyu a ñíí yóho  
 jata ná. Jáchi mé a ndaa ña  
 yóho nasacuu a in tondóhó  
 cáhnu ndivaha naquixi nu ná  
 nacaja Ndióxi.

## 17

*Tá jándihí Ndióxi saha ña  
 xíca jii*

<sup>1</sup> In táhan ndíhusa táto  
 Ndióxi ña cáñee in táhan usa  
 cohó ndáha cán naxinu a nuú  
 i já nacachi a já xihín i:

—Naha quíi yóho jáchi cúni  
 jánaha i nuun ndá quiahva  
 ndoho ini ña xíca jii, ña cáhnu,  
 ña ín coo nuú cuahá ticuúí.  
<sup>2</sup> Tóco ndihi na cúu rey ndúu  
 ñuyiví yóho naquiji na xihín  
 ña cán. Najáxini ña tóco ndihi  
 ñayivi ñuyiví xihín ña núu  
 nacaja ña tá naquiji ña xihín  
 na coo cúu yí ña —nacachi táto  
 Ndióxi cán xihín i.

<sup>3</sup> Anda já nacaja ínima yii  
 Ndióxi xihín i ña ndáca táto  
 Ndióxi yehe nasahan i yucú  
 íchí xihín á. Ta cán naxini  
 i in ñañáha cánúu jatá in  
 quití quini, rí cuahá. Ta  
 níí cúu rí nacacutú xihín  
 tuhun quini ña cánahá xihín  
 Ndióxi. Ta naxini i ín usa  
 yiquí jíní rí xihín uxu ndíqui  
 rí. <sup>4</sup> Ta mé ña cánúu jata  
 rí cán ndíxi ña jáhma ndihí  
 ticayí, ña nacava táhan xihín  
 ña cuahá. Ta nacacutú ña

xihín jjuhun cuáán xihín yuu yáhví ndivaha xihín perla. Ta naxini i cáñee in cohó jjuhun cuáán ndáha ña. Ta nachutú ndaa cohó cán xihín ña núu ta xihín ña tiqúni nacaja ña xihín dataa. <sup>5</sup> Ta ndaa in tuhun taan ña, ña co cánda ini ñayivi. Ta já cúní cachi mé tuhun cán: “Ñuu Babilonia cúu ñuu cáhnu ta cúu á tátuhun náná tóco ndihi najihí xíca jii. Ta cúu á tátuhun náná ndaja táhan ga ña núu ndúu ñuyiví yóho.” <sup>6</sup> Tá nandihí já náha ña naxini ndivaha mé ñañáha jáchi naxihí ña níj na cúu cuéntá Ndióxi, na naxihí sahá ña coó najándaco na cáhan na saha Jesús. Ta tá naxini i ña yóho já nacatontó ndivaha i. <sup>7</sup> Ta já nacachi tátó Ndióxi cán já xihín i:

—Ndá cuéntá quea catontó nahún. Xíni ñuhú cuni johó vahún ña cahan i xuhun jáchi ndicani i nuun ndía cúní cachi ña ín jehé saha ñañáha yóho. Ta jári ndicani i nuun ndía cúní cachi quití quini, mé rí cánúu ña, rí ín usa yiquí jíní xihín uxu ndíqui cán. <sup>8</sup> Mé quití quini naxinún yóho nasatacu rí sanahá joo viti co tácu ga ri. Joo vaxi quivi ndindita rí ta queta rí tañu yávi, ña co xínu nu ndíhi nuu cán. Ta tá nandihí já cuhun rí ndihi saha ri chí uun. Ta catontó ndivaha tóco ndihi ñayivi ndúu ñuyiví, na coó nacahyi quivi janda tá cámaní cava sahá saha ñuyiví nu libro nu ndaa quivi tóco ndihi na catacu anda ama

cáa quivi. Catontó ndivaha na tá ná cuni na mé quití quini yóho, rí nasahin sanahá ta co tácu ga rí viti joo nditacu tucu rí nu ná.

<sup>9</sup> Ta ndá ndó, na ndíchi jini, cuu canda ini ndó ña yóho: Ndihsa yiquí jíní quití quini cán cúu á yuhú nuu usa yúcu nu ín coo mé ñañáha xíca jii cán. <sup>10</sup> Ta jári cúu á yuhú nuu usa rey. Ta uhun táhan rey yóho sa nandihí va saha. Ta inga táhan rey yóho sáhdá da chuun nuú ñayivi viti ñuhú. Ta inga ga rey ña cáhsa cán cámaní xínu coo. Joo tá ná xínu coo da yóho já a coo nahá toho da cahnda da chuun nuú ñayivi. <sup>11</sup> Ta quití quini, rí nasatacu sanahá ta viti sa coó ga ri, rí cán cúu rí yuhú nuu rey, da cáhuna cán. Vati cúu dá táhan java ndíhsa rey cán joo tá nandihí cahnda da chuun cuhun da ndihi saha dá chí uun.

<sup>12</sup> Ta ndíhuxu ndíqui naxinún yóho cúu á yuhú nuu uxu rey, mé na cámaní casahá cahnda chuun nuú ñayivi ndúu ñuyiví. Joo ín talaá hora ñehé táhvi na cahnda na chuun xihín mé quití quini cán nuú ñayivi tátuhun rey. <sup>13</sup> Ta ndíhuxu rey yóho jándique táhan tuhun na ña ná quíahva na ndée ná nu mé quití quini já ná cahnda rí chuun. <sup>14</sup> Ta caní táhan ndíhsa na cán xihín Jesús, mé a cúu tátuhun ndicachi loho cán. Joo quee vaha Jesús xihín ná jáchi cúu á xitoho na náhnu ndúu ñuyiví yóho ta cúu á rey nuú ndaja



táhan rey. Ta xoo Jesús cán canduu nā nācana Ndióxi, mé nā nācaxi a cacomí a cuénta saha. Cúu ná nā coo najándacoo ña cāndeé ini nā mé á —nācachi tátō Ndióxi xihín i.

<sup>15</sup> Tá nandihí já nācachi tucu tátō Ndióxi cán já xihín i:

—Ticuij, dó naxinún nu ín coo ña xíca jii jan cúu dó yuhú nuu ndijáa ñuu xihín ndijáa nación xihín ndijáa ñayivi, nā cáhan tá nuú tuhun. <sup>16</sup> Ta ndíhuxu ndíqui naxinún nuú quití quini jan cúu á yuhú nuu mé uxu rey, nā candají ñá xíca jii jan. Ta jándacoo na ña ta já caca lahla ñá. Ta caxí ndáa nā yiquí cuñu ñá. Ta chicaan ñúhu ná ña xihín ñúhu cáyi. <sup>17</sup> Jáchijáxi nu Ndióxi ini nā cán ña ná caja na ña cúni mé á. Ta jándique táhan nā cán tuhun na ña ná ndiquiahva nā chuun ndójo na nu mé quití quini cán ña ná cacuu rí tátuhun rey janda quiahva ná xinu coo nuú ña nacachi Ndióxi coo. <sup>18</sup> Ta ñáñáha naxinún cán cúu ñá yuhú nuu ñuu cáhnu cán ña sáhdá chuun nuú ndaja táhan nā cúu rey —cáchi tátō Ndióxi cán.

## 18

*Tá jándihí Ndióxi sahá ñuu Babilonia*

<sup>1</sup> Tá sa nayaha tóco ndihí ña yóho já naxini i inga tátō Ndióxi, ña ndójo chuun cáhnu ta nanuu a chí indiví. Ta chí nandiyihvi ndaa jatá ñuyívi xihín quiahva yéhe mé tátō

Ndióxi cán. <sup>2</sup> Ta já nācasáha cáyuhú cóhó a já cáchi a já:

—Ay, ay, sa nandihí va sahá ñuu cáhnu Babilonia cán ta nanduu a tátuhun cavá tiñáhá. Cúu á tátuhun nuú nandicutú ndaa ínima quini ñúhu rí. Ta nanduu a tátuhun in choho nu ñúhu tá nuú laa quini, rí cándají ñayivi. <sup>3</sup> Nandihí sahá ñuu Babilonia yóho, mé a cúu tátuhun in ñáñáha xíca jii. Jáchijáxi ñá ndaja táhan ñayivi ndúu ñuyívi ta najácahan ñá nā ña ná caja na tá nuú ña núu ña xíca ini na caja na. Ta mé nā ñuu Babilonia jan nasahan nā ñamani ña ná xinu coo ndaja táhan da náhnu sáhdá chuun nuú nación ña ná xinu da ñuu Babilonia jan cuju da xihín ñá xíca jii jan. Ta nā cája ndahvi ndicuicá nā xihín tá nuú ña núu caja ñá jáchijáxi sáta johó ñá ña cuicá ña —cáchi tátō Ndióxi cán.

<sup>4</sup> Tá nandihí já naxini johó i inga cáhan chí indiví ta já cáchi a já:

—Ndóhó, nā cúu cuénta mí i, cuáqueta ndó jatá ñuu jan já ná a cája ndó cuachi cája nā ñuu jan. Ta já ná a xinu coo tondóhó vaxi nuú nā ñuu jan jatá ndo. <sup>5</sup> Jáchijáxi sa nācacuahá ndivaha cuachi na ta janda indiví xinu coo cuachi na. Ta co ndíndójó Ndióxi sahá cuachi cája na. <sup>6</sup> Ta tá quiahva nācaja nā jan xihín inga ñayivi quiahva já ndítahan caja ndó xihín ná viti. Ta janda ivi táhdá chága ví ndicó coo ndó caja ndó xihín ná. Ta tá quiahva

najácoho na ñan inga ñayivi quiahva já ivi táhnda chága ví ndítahan quiahva ndó nu ná coho na. <sup>7</sup> Nandiñehe jícó ndivaha na mé ná sahá ña cán quéa ndítahan jándoho ndivaha ndó ini na viti. A juú quiahva nanduu cuicá na sahá ña cán quéa ndítahan caja xíxi ndó xihín ná viti. Cáhán na ña cahnda na chuun nuú in nación. Ta cáhán na ña a ndóho toho ini na. Ta cáhán na ña co cúu ná tátuhun in ña cuáan. <sup>8</sup> Sahá ña cán quéa tixi in táláa quivi quixi tá nuú ña núu nu ná. Já casahá quivi na ta cacuéha ndivaha ini na ta xinu joco nu ná. Ta já chicaan Ndióxi na nu ñúhu cáyi jáchi jándihi Ndióxi, xitoho í saha ná, mé a íin ndéé cája tóco ndihi ñaha —cáchi a.

<sup>9</sup> Ta já casahá cuacu ndijáa rey, na sáhnda chuun nuú ñayivi ndúu ñuyiví. Ta tahnda ini na tá ná cuni na ñihma cána ñuu Babilonia cán. Jáchi mé na náhnu yóho naquihvi nuu na xihín ña xíca jii cán ta najátivi na jjuhún na xihín ña. <sup>10</sup> Ta xíca xíca nasacandichi na jáchi yíhvi na sahá ndá quiahva quini ndóho ini ña cúu yuhú nuu ñuu Babilonia cán. Ta já casahá cáchi mé rey cán já:

—Ay, ay, ndáhvi nahá nacuu ndó, ñuu Babilonia jáchi vatí cúu ndó ñuu cáhnu ndivaha joo in too johoho naxinu hora ndóho ini ndó —cáchi na cán.

<sup>11</sup> Ta ndijáa na cája ndahvi ndúu ñuyiví cuacu ri na cán va ta tahnda ndivaha ini na sahá

ñuu Babilonia ñan jáchi a cóo ga na cuen ñaha ndójo na xínu coo na. <sup>12</sup> Ta ña sádojo na cán quixi na jícó na cúu jjuhún cuáan xihín jjuhún cúxú xihín yuu yahvi ndivaha xihín perla vaha xihín jahmá vaha ndivaha ña cávaha xihín yahva naní lino xihín jahmá seda xihín jahma ndíhi ticayí xihín jahma cuahá nij xihín ndijáa nuú yito támi sahan xihín ñaha cávaha xihín nuhu yóco elefante xihín ndijáa yito yahvi ndivaha xihín ndijáa ñaha cávaha xihín caa cuáan xihín ña cávaha xihín caa uun ta jári ñaha cávaha xihín yuu naní mármol. <sup>13</sup> Ta quiahva já sañehe na canela xínu coo na xihín ndijáa ñaha támi sahan. Ta ñehe na jusa xihín mirra xihín perfume viti. Ta quiahva já ñehe ri na vino xihín aceite xihín harina vaha xihín trigo. Ta quiahva já sañehe ri na quití xójo xihín ndicachi xihín cuáyí xihín carreta. Ta janda ñayivi xéen na caja chúun nu ná sañehe na. Ña yóho sádojo na quíxi na joo ni in na a cuéen ga ñaha na. <sup>14</sup> Ndjáa na cája ndahvi cán cahan na xihín ñuu Babilonia cán já cachi na já:

—Coó ga cuíhi vaha, rí cátoó nahá ndó caxí ndó. Ta viti sa nandihí saha tóco ndihí ña lándá xihín ña cuicá nasanduu nu ndó ñan —cáchi na.

<sup>15</sup> Ta na nacaja ndahvi xihín tóco ndihí ñaha yóho nandicuicá ndivaha na xihín ndahvi nacaja na xihín na

ñuu Babilonia cán. Ta xíca xíca candita na candehé na ñuu Babilonia cán jáchi yíhví na ndoho na tá quiahva ndóho ini na cán. Ta cuacu ndivaha na ta tahnda ndivaha ini na. <sup>16</sup> Ta já cáchi na já:

—Ay, ay, ndáhví nahá ñacuu ñuu cáhnu Babilonia jan. Ndató ndivaha ñasanaha ñuu yóho tátuhun in ñáñáha ndíxi jahmá lino vaha ndivaha xihín jahmá ndíhí ticayí xihín jahmá cuahá nij. Ta ñacacutú ñá xihín jiuhun cuáán ta xihín yuú yahvi ndivaha ta xihín perla. <sup>17</sup> Joo in too joho ñandihi saha tóco ndihi ña cuíca ñasacomí mé ñuu Babilonia jan —ñacachi na.

Ta ndijáá na sáhdá chuun nuú na ñéhe barco, xihín ndijáá na cándójó xíca xihín ndijáá na cája chúun ini mé barco cán xihín ndaja táhan na cája ndahvi xihín ña quixi chí tañuhú cán ñasandita xíca na sándehe na. <sup>18</sup> Ta tá ñaxini na ndíndita ñihma ña cáyi ñuu cán já ñacayuhú na já ñacachi na já:

—Ni in túhún toho inga ga ñuu co quée táhan xihín ñuu Babilonia ña cáhnu yóho —ñacachi na.

<sup>19</sup> Ta xihín ña táhnda ini na ñachojó na ña yáca jini ná. Ta ñacasahá sácu ndivaha na já cáyuhú na já cáchi na já:

—Ay, ay, ndáhví nahá ñacuu ñayivi ñasanduu ñuu cáhnu jan jáchi xihín ña cuíca ñasacomí na najácacuícá na ndijáá da xíca nuú tañuhú

xihín barco. Joo in too joho ñandihi sahá ña jan —cáchi na cán sácu na.

<sup>20</sup> Ta ndítahan cajji ini na ndúu indiví sahá ña ñandoho ñuu cáhnu yóho. Ta quiahva já ndítahan cajji ri ini ndijáá na cúu cuéntá Ndióxi xihín na cúu apóstol xihín na cúu profeta. Jáchi xihín ña ñacaja Ndióxi xihín ñuu Babilonia yóho ñandiquehe a cuéntá sahá ña núu ñacaja mé na cán xihín ndó, na cúu cuéntá Ndióxi.

<sup>21</sup> Tá ñandihi já ñaxini i in táto Ndióxi, ña in cuaha ndée. Ndiñehe a in yuú cáhnu ña cúu á tátuhun in yuú yojó. Ta najácana a ña ini tañuhú ta já ñacachi a já:

—Tá quiahva najácana i yuú yojó yóho ini tañuhú ta ñasacoo a cahá tañuhú cuahan quiahva já yaha ri xihín ñuu Babilonia. Vatí cúu a in ñuu cáhnu ndivaha joo anda ama cáa quivi a ndíco coo ga ñayivi cuni na ña. <sup>22</sup> Ta ni música a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu jan jáchi ni in túhún toho ndahvi a cája na. Ta ni a tácu ga yuú yojó ña ndíco najihí. <sup>23</sup> Ta janda ni in íti loho a túun ga ñuu jan. Ta ni a cáhan ga ñayivi vicó tándaha jáchi coo ga ña jan coo. Jáchi na najícó ñaha cán ñasacuu na na náhnu ndúu ñuyíví ta najándahvi na ndaja táhan ñayivi ndúu ñuyíví xihín ña tají ñacaja na —cáchi táto Ndióxi.

24 Ta ndoho ini na jáchi mé ñayivi ñuu Babilonia jan nasahní na na profeta xihín na cúu cuéntá Jesús ta anda cuahá ñayivi ndijáá ñuu ñuyívi nasahní ñahá na.

## 19

1 Tá sa nayaha tóco ndihi ña yóho já ñaxini johó i cáhan cóhó cuahá ndivaha ñayivi indivi ta já cáchi na já:

Cáhnú cúu Ndióxi jáchi in túhún mé á quea jácacu mí.

Ta ín ndée mé á caja tóco ndihi ñaha ta cáni nu yó caja cáhnú ndivaha í mé á.

2 Jáchi ndaa caja ndihi mé á ñaha tá caja vii a sahá ñayivi.

Ta ndaa ñacaja mé á tá nasacu ini a jándihi a sahá ñuu Babilonia jan jáchi nasacuu a tátuhun ñá xíca jii.

Jáchi xihín tóco ndihi ña núu nasacaja ñá ña quíji ñá xihín na co cúu yí ña najátivi ndihi ñá ñayivi ndúu ñuyívi.

Sahá ña cán quea najándihi Ndióxi saha ña ta já ñatahnda cuéntá sahá ña ñacaja ñá tá nasahní ñá na cúu cuéntá Ndióxi, cáchi na cáhan indivi cán.

3 Tá ñandihí já ñacasahá tucu na cán cáhan na já cáchi na já:

—Cáhnú cúu Ndióxi jáchi ñacaja mé á ña cáyi ñuu cán ta anda ama cáa quívi ndíndita

ñihma ña —já cáchi na indivi cán.

4 Ta ndíhoco comí na sacuahá ndúu cán xihín ndícomí mé ña tácu cán ñacaxítí na janda quiahva ñacani ndaa taan na nu ñúhu ta já ñacaja cáhnú na Ndióxi, mé a ín coo nu sácco rey cán. Ta tá cája cáhnú na Ndióxi já cáchi na já:

—Já ná coo. Cáhnú cúu Ndióxi—cáchi na.

5 Ta janda nu ín coo Ndióxi cán ñaxini johó i cáhan in a ta já ñacachi a já:

—Tóco ndihi ndó, na cája chúun cuéntá mé á xíní ñúhú caja cáhnú ndó Ndióxi, mé a cája cáhnú í. Coó caja toho a á cúu ndó na náhnú á na valí jáchi cája ndó ña sáhdá mé á —cáchi a.

*Tá coo víco indivi sahá ña ndiquehe Jesucristo na cúu cuéntá mé á*

6 Tá ñandihí já ñaxini johó tucu u ña tácu tátuhun tá cáhan cuahá ndivaha ñayivi. Ta tácu ña tátuhun tá cáha cúyu ticuí tañu cáva ta tácu ña tátuhun tá cána tasa. Ta já cáchi na já:

Cáhnú cúu Ndióxi, xitoho í, mé á cája cáhnú í jáchi sa ñacasahá mé á comí a cuéntá sahá ñayivi viti.

Ta ín ndée mé á caja tóco ndihi ñaha.

7 Xíní ñúhú cavatá yo ta xíní ñúhú cajii ndivaha iní caja cáhnú ndivaha í mé á.

Jáchi sa ñaxinu coo quívi ndiquehe Jesucristo, mé a cúu tátuhun

ndicachi loho, na cúu cuéntá mé á.

Cacuu a tátuhun tándaḥa Jesucristo xihín na cúu cuéntá mé á, na sa ndúu tiaḥva na tándaḥa na xihín mé á.

<sup>8</sup> Ta ñeḥe táhvi ná candixi na jahmá vaḥa ndivaḥa, ña naní lino ta cúu á ña vií ndivaḥa ta ndató ndíyihvi a, cáchí na.

Jáchí mé jahmá vií ña naní lino cán náḥa ña naḥica vaḥa na cán íchi cuéntá Ndióxi.

<sup>9</sup> Tá nandihí já naçachi mé tátó Ndióxi já xihín í:

—Caḥyún ña yóho. Cajji ini ñayivi, na naçana Ndióxi cuḥun indiví tá ná xinu coo quiví ndiquehe Jesucristo, mé a cúu tátuhun ndicachi loho cán, na cúu cuéntá mé á —naçachi tátó Ndióxi cán xihín í.

Ta naçachi tucu a já:

—Mé a ndaa ndinuhu tuhun Ndióxi cúu ña yóho —naçachi a xihín í.

<sup>10</sup> Andá já naçaxítí í nu tátó Ndióxi cán ña ná caja cáhnu í ña. Joo já naçachi a já xihín í:

—A cáxítí tohún nu yeḥe jáchi ndítahan caja cáhnún Ndióxi. Jáchi yeḥe cúu u da cája chúun nu Ndióxi tá quiaḥva cája chúun yóhó xihín java ga na cúu cuéntá Jesús, na cúu ñanún, na co jándacoo cáḥan ña ndaa, ña najánaḥa Jesús nuú ñayivi. Caja cáhnún Ndióxi —cáchí a.

Jáchí na cúu profeta cándeé ini na ña jánaḥa Jesús ña ndaa saḥá ña cán quéa cáḥan na ña nuú ñayivi.

*Tá naḥini Juan in a cánúu cuáyí yaa*

<sup>11</sup> Tá nandihí já naḥini í nanuna indiví ta naçeta in cuáyí yaa. Ta mé a cánúu rí cán naní a: mé a co cáva ivi joho ini. Ta naní tucu a: ña ndaa. Jáchi ndaa cája vií a saḥá ñayivi ta ndaa cája mé á tá quihvi táhan cáni táhan xihín ná. <sup>12</sup> Ta tá quiaḥva yeḥe nu cándaa ñúhu cáyi quiaḥva já yeḥe nduchú nuú a. Ta cándojó cuahá ndivaḥa tiyivi jini á. Ta ndaa in quivi taan mé á joo in túhún mé á xini nda quivi quéa ndaa taan. <sup>13</sup> Ta nandaxi jáhma mé á xihín ni. Ta naní a: tuhun Ndióxi. <sup>14</sup> Ta naḥini í ndico in táhnda cáhnu soldado cuéntá indiví jatá cuahan na xihín á. Ta ndíxi na jahmá vaḥa ña naní lino. Ta cúu á jahmá yaa çachi, ña ndató vií ña. Ta in in na cán cánúu cuáyí yaa caḥan na xihín á. <sup>15</sup> Ta yúhu mé á ña cúu tuhun Ndióxi cán quéa in yúchu cáni ña jeen ndivaḥa. Ta xihín mé yúchu jeen cán jándicueḥe quini ndivaḥa mé á ndijáá ñayivi ndúu ñuyivi. Ta caḥnda ndeé mé á chuun saḥa ná. Ta cája vií a saḥa ná tá quiaḥva cája da sání nihni jatá uva ini pila ña ná cuhni ri. Ta mé Ndióxi cúu á jándoho ndivaḥa ini ñayivi jáchi xójo ndivaḥa ini mé á xihín ná ta mé á cúu á Ndióxi ña ín ndée caja tóco ndihí ñaḥa. <sup>16</sup> Ta jatá jáhma ndíxi mé a cán xihín nu jíhin a ndaa java tuhun já cáchí ña já: “Yeḥe cúu rey nuú ndaja táhan rey ta cúu

u xitoho nuú na náhnu ndúu ñuyívi”, cáchi a.

17 Tá nandihí já naxini i in tátō Ndióxi cándichi a jatá candii. Ta já naçayuhú cóhó a nuú ndijáa laa, rí ndáchi nu táchi. Ta já naçachi a já xihín rí:

—Naha ndihí ndó taca ndó cajini ndó ña quiahva Ndióxi nu ndo. 18 Ta ña caxí ndo cacuu a yiquí cuñu na náhnu, na sáhdá chuun nuú ñayivi. Ta caxí ndo yiquí cuñu na cúu sacuaḥa nu soldado xihín yiquí cuñu na ndacú. Ta caxí ndó yiquí cuñu cuáyí xihín yiquí cuñu da cándójó jatá rí. Ta caxí ndó yiquí cuñu na xica núná mé xihín na cómí xitoho cuéntá saḥa. Ta quiahva já caxí ndó yiquí cuñu na valí xihín na náhnu viti —cáchi a.

19 Tá nandihí já naxini i rí cúu quití quini cán naṭaca rí xihín na náhnu, na sáhdá chuun nuú ñayivi ndúu ñuyívi ta xihín soldado na. Naṭaca na caní táhan na xihín mé a cánúu jatá cuáyí yaa cán xihín soldado mé á. 20 Ta naṭiin mé á quití quini cán xihín da cúu profeta túhún, mé da naçaja ña xitúhún nu mé rí cúu quití quini cán. Jáchi xihín ña xitúhún naçaja mé profeta túhún cán najándahvi da ñayivi ta najácahan da na ña ná nani marca mé rí quini cán yiquí cuñu na. Ta já naçaja cáhnu na tiniñu yúu rí. Ta naxini i najácana tácu Ndióxi mé quití quini cán xihín profeta túhún cán ini in-dayá, ña cúu tátuhun in mini nu cándaha ñúhu cáyí xihín

azufre. 21 Ta na java ga cán naxihí na xihín yúchu cání ña naqueta yúhu mé a cánúu jatá cuáyí yaa cán. Ta ndijáa laa naṭaca ndihí rí caxí rí yiquí cuñu na janda quiahva nandivaha ini rí.

## 20

*Cáhan Juan saḥa in mil cuia tá ná candico ndaa tiñáhá sacuaḥa*

1 Tá nandihí já naxini i nanuu in tátō Ndióxi chí in-diví ta ñéhe a yávi ña súná yuhú yávi cúná, ña co xínu nu ndíhi nuu cán. Ta cáñee in cadena ndeé ndáha á. 2 Ta naṭiin mé á coo quini, rí cúu tiñáhá sacuaḥa naní Satanás, rí naṭahin janda saḥa. Ta naçató a rí xihín cadena cán tixi in mil cuia. 3 Ta najácana a rí ini yávi cúná nuú naçhicaji a rí. Ta naçacu a in sello yuhú yéhe nu ndácaan rí já ná a quéta rí jándahvi rí ñayivi ñuyívi janda quiahva ná yaha mé in mil cuia. Ta tá sa nayaha in mil cuia já janí tucu rí caca nuu rí tixi chá tiempo cuití va.

4 Tá nandihí já naxini i ndíta cuaḥa táyí vaḥa nu ndúu coo na candojo chuun ña caja vií na saḥa ñayivi. Ta quiahva já naxini rí cán ndúu ínima na naçhitúhún na yiquí jíní na jáchi naçahan na tuhun Ndióxi, ña ndaa najánaḥa Jesús nuú ñayivi. Ta cúu ná na coo naçaja cáhnu quití quini cán xihín tiniñu yúu rí. Ta ni coo naçahan na ñamaní nani marca rí taan na ni ndáha ná. Ta naxini i

ñanditacu tucu mé ña cán ta andá jáví mé ná xihín Jesús ñasacomí ña cuéntá sahá ñayivi tixi in mil cują. <sup>5</sup> Ta ña yóho cacuu na nu cuítí nditacu tucu. Joo java ga ña ñaxihí cán camaní nditacu na jáchi ndítahan nu ná candati na janda quiahva ná yaha in mil cują. <sup>6</sup> Caji ini ñayivi, ña nditacu tañu ña jánditacu Ndióxi nu cuítí cán jáchi cúu ná ña ñandicaxi mé á. Jáchi a cúhun toho na indayá nu ndoho ini ñayivi quini. Ña cán cacuu a tátuhun quivi na chí ivi. Ña yaha xihín ná quéa nduu na jutú caja ndívi ña nu Ndióxi xihín nuú Jesucristo. Ta xihín mé á cacomí ña cuéntá sahá ñayivi tixi in mil cują.

<sup>7</sup> Ta tá sa ná yaha in mil cują cán já janí Satanás, mé tiñáhá sacuaḥa nu ndácaan rí ndájí rí cán. <sup>8</sup> Ta já queta rí jándahvi rí ndijáá ñayivi ndúu ñuyíví. Ta jándahvi rí ñayivi ndúu ñuu naní Gog xihín ñuu naní Magog ña ná taca na caní táhan na. Ta ña soldado taca cán cacuu na tátuhun ñutí ndúu yuhú tañuhú xihín ña cuaḥa cúu ná. <sup>9</sup> Ta ndicujta nuu ñayivi ndijáá ñuu ñuyíví ta cava yivi ña jatá tóco ndihi ña cúu cuéntá Ndióxi. Ta quiahva já cava yivi ña jatá ñuu Jerusalén, mé ñuu ña quíhvi ini Ndióxi. Joo jácuyu Ndióxi ñúhu cáyi indiví ta jándihi a saḥa ná. <sup>10</sup> Ta mé tiñáhá sacuaḥa, mé rí najándahvi ñahá cán jácana Ndióxi rí ini in m̄ini nu cándaha ñúhu cáyi

xihín azufre. Ta sa mé cán cúu nu jácana mé á quití quini xihín da cúu profeta túhún. Ta cán cañuhu na ndoho ini na ñuú ta ndiví andá ama cáa quivi.

*Tá cája víi Ndióxi sahá ñayivi*

<sup>11</sup> Tá ñandihí já ñaxini i in táyi cáhnu, dó yaa cachí nu sácoo Ndióxi. Ta nuu mé á ñandiñuhú tóco ndihí ñuyíví xihín indiví ta chí a vája ga cuu cuní ña. <sup>12</sup> Ta ñaxini i ndijáá ña sa ñaxihí, ña válí xihín ña náhnu ndíta na nu ín coo Ndióxi. Tá ñandihí já ñaxini i ñanuna nuú java libro. Ta ñanuna inga libro nu ndáa quivi tóco ndihi ña catacu andá ama cáa quivi. Ta já ñacaví sahá ña ñacaja in in ña sa ñaxihí cán jáchi ini mé libro cán ndáa tóco ndihi ña ñacaja in in ñayivi. <sup>13</sup> Ta ñandindita tóco ndihi ña ñaxihí ini tañuhú xihín ña ñanduxu já ná caja víi Ndióxi sahá ndihi na tá quiahva cáa ñacaja in in ña cán. <sup>14</sup> Janda jáví a quíví ga ñayivi ta a cúhun ga ínimá ña nuú ñataca ínimá ña ñaxihí. Joo najácana Ndióxi ñayivi quini ini mé m̄ini nu cándaha ñúhu cáyi. Mé m̄ini cán cúu á indayá nuú ndoho ini ñayivi ta cúu á tátuhun quivi na chí ivi. <sup>15</sup> Ta mé cán cúu nuú najácana Ndióxi tóco ndihi ña co ndáa quivi nu mé libro nu ndáa quivi ñayivi catacu andá ama cáa quivi.

## 21

*Tá naxini Juan indivi saá xihín ñuyívi saá*

1 Tá nandihí já naxini i indivi saá xihín ñuyívi saá. Jáchí sa nandihí va sahá indivi xihín ñuyívi ña nu cuítí cán. Ta jári tañuhú sa coó ga dó ñúhu viti. 2 Ta yehe, da cúu Juan naxini i nanuu ñuu Jerusalén saá, ña yíi ta naquixi a chí indivi nu íin Ndióxi. Ta tá quiahva ndató cácutú in ñáñáha tándaha ndiquehe ña yíi ña quiahva já ndató nacacutú ñuu Jerusalén cán. 3 Tá nandihí já naxini johó i nacayuhú cóhó a chí indivi ta já cáchí a já:

—Ndióxi íin a tañu ñayivi viti jáchí cúu ná cuéntá mé á. Ta coo a xihín ná jáchí cúu á Ndióxi, mé á cája cáhnu na. 4 Ta mé á yacó ndihí a ticuíi nuu ná ña nasacu na. Ta a quívi ga na. Ta ni a cuácu ga na. Ta ni a táhnda ga ini na. Ta ni a ndíhíhví ga na. Jáchí sa najándihí Ndióxi saha tóco ndihí ña cán, ña nasahíin jihna —cáchí a.

5 Ta mé a íin coo nu sácoo rey nacahan ta já nacachí a já:

—Candehé. Yehe ndája saá i tóco ndihí ñaha.

Ta já nacachí tucu a já:

—Cahyún tóco ndihí ña cahan i xuhun yóho jáchí cúu á ña ndaa ta cuu candee ini ndó ña —cáchí a.

6 Tá nandihí já nacachí tucu a já xihín i:

—Sa najáxi nu coo i tóco ndihí ñaha. Yehe cúu u nu cuítí ta yehe cúu u nu ndihí jáchí janda tá cámaní cava sahá saha tóco ndihí ñaha sa íin va yehe ta coo tá coo i vatí ná ndihí sahá. Ta ndá na cúni candaa chága ini sahá yehe já caja i ña ná cuu candaa ini na sahá i. Ta cúu á tátuhun íchí ini na ticuíi, dó cája ña ná catacu na anda ama cáa quívi. Ta coó toho yahvi quehe e nu ná saha do. 7 Ta ndá na ná cana vaha nu tóco ndihí ña núu ñehe táhví na ndiquehe na tóco ndihí ña yóho nuu i. Ta yehe cacuu u Ndióxi, mé á caja cáhnu na ta mé ná cacuu na jahyi i. 8 Joo na láhá xihín na coo cúni candusa tuhun Ndióxi xihín na cándají na cúu cuéntá Ndióxi, mé ná cán cuhun na indayá nu cándaha ñúhu cáyi xihín azufre. Ta cán cuhun ri na sáhní ndji xihín ndijáa na ndúu xihín na coo cúu yíi á ñájíhí na. Ta cán cuhun ndijáa na cája tá nuu ña tají xihín na cája cáhnu yoco xihín na cahan ña tuhún. Ña yóho cacuu a tátuhun quívi na chí ívi jáchí ndoho ndivaha ini na ini indayá nu cándaha ñúhu cáyi xihín azufre —cáchí a.

*Cahan Juan sahá ñuu Jerusalén saá*

9 Ta ndaja coo in táhan ndíhúsa tátó Ndióxi ña ñehe usa coho nu ñúhu usa ña núu quixi jatá ñuyívi naxinu a nuu i ta já nacachí a já xihín i:

—Naha quíi yóho candehún. Jáchí jána ha i nuun na cúu



cuéntá mé a cúu tátuhun ndicachi loho. Na yóho cúu ná tátuhun in ñá tándaha ta Jesucristo cúu á tátuhun yí ña —cáchi a.

10 Anda já nacaja ínima yii Ndióxi xihín i ña ndáca táto Ndióxi yehé já nasahan i in yucu jícó ña cáhnu. Ta cán naxini i ñuu Jerusalén ña yii, ña nanuu chí indivi nu ín Ndióxi cán. 11 Ta mé ñuu cán ndató ndivaha yehé ña jáchi cája mé á ña ná ndiyehé ña. Ta jíñu ña tá quiahva jíñu yuu yahvi ndivaha tátuhun yuu jaspe. Ta cúu á tátuhun yutátá jáchi cuu candehé yó chíhini a janda inga xoo a. 12 Ta jatá mé ñuu cán nacava nuu in náma yuu cáhnu ta jícó ndivaha. Ta nasahin uxu ivi yehé a nu ndíta in in táto Ndióxi in in yehé a. Ta ndica yehé cán ndáa quiví ndihuxu ivi táhnda na naquixi chichi Israel. 13 Ta uní yehé sándehe nu xoo cána candii. Ta uní yehé sándehe nu xoo chí norte. Ta uní yehé sándehe nu chí sur. Ta uní yehé sándehe nu xoo quéta nuu candii. 14 Náma yuu ñuu Jerusalén cán nasahin uxu ivi yuu ndúhu saha. Ta jatá yuu cán ndáa quiví ndihuxu ivi na apóstol, na naxica tuun xihin Jesús, mé a cúu tátuhun ndicachi loho cán.

15 Mé táto Ndióxi ña cáhan xihín i cán cáñee in tóyoó jiuñun cuáán ndáha ña ná chiquiahvá mé á ñuu cáhnu xihin yehé a xihin náma yuu ña ndájí jatá. 16 Ta nachiquiahvá a ña xihin

tóyoó cán ta in quiahva ndáa ndicomí xoo mé ñuu cán ta chí in quiahva cáni a ta in quiahva ndíca ña. Ta quiahva ñéhe a cúu á ivi mil ivi ciento kilómetro. Quiahva já cáni ña ta quiahva já jícó ña ta quiahva já ndíca ña. 17 Tá nandihí já nachiquiahvá táto Ndióxi cán náma yuu ndájí jatá ñuu cáhnu cán. Ta quiahva ñéhe a cúu uní jico comí metro. Ta metro cája chúun táto Ndióxi cán cúu dó tátuhun dó chíquiahvá ñayivi ndúu ñuyiví ñaha.

18 Ta mé náma yuu ndájí jatá ñuu cáhnu cán nacavaha ña xihín yuu jaspe. Ta mé ñuu cáhnu cán nacavaha ña xihín jiuñun cuáán, ña cúu tátuhun yutátá ña víi ndivaha nuu. 19 Ta mé yuu ndúhu ña nacana saha mé náma yuu cán nacacutú a xihin tá nuu yuu yahvi ndivaha. Yuu ndúhu nu cuítí cán nacacutú a xihin yuu naní jaspe. Ta ña cáhivi cán nacacutú a xihin yuu naní zafiro. Ta ña cáhuni cán nacacutú a xihin yuu naní ágata. Ta ña cácomí cán nacacutú a xihin yuu naní esmeralda. 20 Ta ña cáhuñun cán nacacutú a xihin yuu naní ónice. Ta ña cáhñu cán nacacutú a xihin yuu naní cornalina. Ta ña cáhusa cán nacacutú a xihin yuu naní crisólito. Ta ña cáhuna cán nacacutú a xihin yuu naní berilo. Ta ña cáhñun cán nacacutú a xihin yuu naní topacio. Ta ña cáhuxu cán nacacutú a xihin yuu naní crisoprasa. Ta ña cáhuxu

in cán naçacutú a xihín yuu naní jacinto. Ta ña cáhuxu ivi cán naçacutú a xihín yuu naní amatista. <sup>21</sup> Ta ndíhuxu ivi yéhe ini ñuu cáhnu cán cúú á uxu ivi perla. Ta tá in tá in yéhe cán naçavaha xihín in talaá perla níí. Ta mé cáyé cáhnu ñuu cán cúú á ña naçavaha xihín ndínuhu jiuhun cuáán, ña cúú tátuhun yutátá jáchi janda inga xoo a tívi.

<sup>22</sup> Ta ni in túhún veñuhu coó naxini i ini mé ñuu cáhnu cán. Jáchi mé Ndióxi, xitoho í, mé a íin ndée cája tóco ndihi ñaha cúú á tátuhun veñuhu na. Ta jári Jesús, mé á cúú tátuhun ndicachi loho cán cúú á tátuhun veñuhu na. <sup>23</sup> Ta mé ñuu cáhnu cán co xini ñuhú toho a candii ni yoo ña ná jándiyehé ñahá jáchi xihín quiahva yéhe Ndióxi cán jándiyehé a mé ñuu cán. Ta Jesús, mé a cúú tátuhun ndicachi loho cán cúú á tátuhun lámpara jándiyehé a ñuu cán. <sup>24</sup> Ndijáá ñayivi, na naquixi ndijáá nación ñuyívi caca nuu na ini ñuu cáhnu cán xihín quiahva yéhe a. Ta ndijáá na sáhdá chuun nuú ñayivi ñuyívi xinu na ñuu cán ta ndiquiahva na tóco ndihi ña cuicá cómi na nu mé ñuu cán. <sup>25</sup> Ta a cándaji toho yéhe a tá ndiví ta coó toho ña ñuu coo cán. <sup>26</sup> Ndijáá ña cuicá xihín ña náhnu cuéntá ñayivi ñuyívi yóho cañehe na ña nu mé ñuu cán. <sup>27</sup> Joo ni in túhún ña quini a quíhvi toho ini ñuu cán. Ta ni in na cája ñaha cándají Ndióxi a quíhvi cán. Ta ni na cátoó

jándahvi ñayivi a quíhvi cán. Na ndihvi cán cuití va cúú ná na ndáa quívi nu libro nu ndáa quívi tóco ndihi na catacu anda ama cáa quívi. Mé libro yóho íin a nuú Jesús, mé á cúú tátuhun ndicachi loho.

## 22

<sup>1</sup> Tá nandihí já najánaha táto Ndióxi cán in yuta vii nuú i nu ñuhu ticuí, dó cája ña ná catacu ñayivi anda ama cáa quívi. Ta tá quiahva yéhe yutátá quiahva já yéhe nuu do. Ta cána dó chí xoo nu íin coo Ndióxi xihín Jesús, mé a cúú tátuhun ndicachi loho cán. <sup>2</sup> Ta yáha dó mé maññú ndaa íchi cáhnu mé ñuu cán. Ta in in xoo yuta cán sáhnu yíto, dó cája ña ná catacu ñayivi anda ama cáa quívi. Ta tá yoo tá yoo cúun cuihi nu dó cán. Ta uxu ivi tañu cúun cuihi nu do nu cuía. Ta ndáha do cája ña ná ndivaha ñayivi ñuyívi. <sup>3</sup> Ta cán ni in ga ñaha a chúh chahan jata. Ta Ndióxi xihín Jesucristo, mé a cúú tátuhun ndicachi loho cán coo a nu sácco rey mé ñuu cáhnu cán. Ta na cúú cuéntá Ndióxi caja cáhnu na mé a cán. <sup>4</sup> Ta cuni táhyí na nuu mé á ta candaa quívi mé á taan na. <sup>5</sup> Ta cán coó toho ñuu coo. Ña cán quea na canduu cán a cuní ñuhú ga na ñuhú lámpara ta ni a cuní ñuhú ga na ña ná yehé candii jáchi mé Ndióxi, xitoho na jándiyehé a nu ná. Ta cahnda na chuun tátuhun rey anda ama cáa quívi.

*Sa cáyati quívi quixi Jesucristo*

<sup>6</sup> Tá nandihí já nācachi tátō Ndióxi cán já xihín i:

—Tuhun yóho cúú á ña ndaa ta cuu candeé inún ña. Jáchí mé Ndióxi, xitoho í, mé a cája ña ná cahan profeta, mé a cán quea nāchindahá a tátō mé á já ná caxi tuhun a nuú na cúú cuéntá mé á ña yachi quixi tóco ndihí ña yóho — nācachi a.

<sup>7</sup> Ta já cáchí Jesús já:

—Sa saa yachi va yehe. Cajii ini na cándusa tuhun cahan sahá ña yaha chí nuu, ña ndaa nu libro yóho —cáchí a.

<sup>8</sup> Yehe, da cúú Juan naxini johó i ta naxini ndihí i ña yóho. Ta tá nandihí naxini johó i ña ta tá nandihí naxini i ña já nācaxítí i nu tátō Ndióxi ña caja cáhnu i ña jáchí mé a najánaña ña yóho nuú i. <sup>9</sup> Joo nācahan tátō Ndióxi cán xihín i já nācachi a já:

—A caxítí tohún nuú yehe jáchí ndítahan caja cáhnún Ndióxi. Jáchí yehe cúú u da cája chúun nu Ndióxi tá quiahva cája chúun mún xihín ñanún, na cúú profeta cuéntá Ndióxi xihín na cándusa ña cahan libro Ndióxi yóho — nācachi tátō Ndióxi cán xihín i.

<sup>10</sup> Tá nandihí já nācachi tucu a já xihín i:

—A chíjehé tuhún sahá tuhun Ndióxi, ña ndaa nu libro yóho jáchí sa nācayati tiempo xinū nuu á coo a. <sup>11</sup> Joo ndá da cája quini ná caja quini chága da tá cúní da. Ta ndá da coó vií ná caca tiquíní mé dá tá cúní da.

Joo ndá da vaha ná ndihí ini da caja da ña vaha. Ta ndá da nāndiquiahva vaha mé ndáha Ndióxi ná ndihí ini da caca ndacú da íchi cuéntá mé á —cáchí tátō Ndióxi xihín i.

<sup>12</sup> Ta já nācachi Jesús já xihín i:

—Candehé. Sa saa yachi vi. Ta vaxi i ñehe e yahvi quehe in in ñayivi. Ta ndiquiahva i nuú in in na ña ndítahan quehe na sahá ña nācaja na. <sup>13</sup> Yehe cúú u nu cuítí ta yehe cúú u nu ndíhi jáchí jandá tá camaní cava sahá saha tóco ndihí ñaha sa íin va yehe ta coo tá coo i vatí ná ndihí sahá —cáchí a.

<sup>14</sup> Cajii ini ñayivi, na nandaja vií ínima jáchí cúú á tátuhun ndícata na jáhma ná já ná cuu ñehe táhvi na caxi na cuíhi nuú yitó cuíhi, dó cája ña ná catacu ñayivi anda ama cáa quivi. Jáchí xihín ña yóho cuu quihvi na chí yéhe ñuu cáhnu cán. <sup>15</sup> Joo chí jata mé ñuu cán candoo tóco ndihí na nācaan cája ña núu xihín tóco ndihí na cája ña tají xihín ndijáá na ndúu xihín na coo cúú yíí ná á ñájihí na. Ta jata ñuu cán candoo ri na sáhní ndii xihín na cája cáhnu yoco xihín na cahan ña tuhún xihín na jándahvi ñani táhan.

<sup>16</sup> —Yehe cúú Jesús ta nāchindahá i tátō mí i já ná caxi tuhun a ña yóho xihín ndijáá na cúú cuéntá mí i, na ndítaca ndijáá veñuhu. Yehe nācaja i ña nācacu rey David ta nāquixi i chichi mé David. Cúú u tátuhun quimi cáhnu, rí quéta tá nativi —cáchí Jesús.

<sup>17</sup> Mé ínimá yíi Ndióxi xihín na cúu cuéntá Jesús cana na Jesús ña ná quixi a ta já cachi na já:

—Naha quíi ndo.

Ta ndá na xíni johó ña yóho xíní ñúhú cachi ri na cán va:

—Naha quíi ndo.

Ta ndá na íchi ini ticuíi, na cúni coho dó ná quixi na nu mé á já quiahva ticuíi nu ná, dó caja ña ná catacu na anda ama cáa quívi. Ta coó toho yahvi quehe mé á nu ná saha do.

<sup>18</sup> Ta ña yóho quéa cúni cachi i xihín tóco ndihi ndó, na xíni johó ña ndáa nu libro yóho: Ta ndá na ná chinúu chága tuhun jatá ña sa cáhan libro yóho já quéa chinúu ri Ndióxi tondóhó, ña ndáa nu libro yóho jatá ná. <sup>19</sup> Ta ndá na

na tavá tuhun cáhan Ndióxi, ña ndáa nu libro yóho já quéa tavá Ndióxi quívi ná ña ndáa nu libro mé nu ndáa quívi tóco ndihi ñayivi catacu anda ama cáa quívi. Ta mé na cán a cuú quíhvi na ñuu yíi ndivaha cán ta ni a quiahva Ndióxi nu ná ñaha cáhan mé libro yóho saha.

<sup>20</sup> Ta sahan Jesús tuhun saha tóco ndihi ña yóho já cáhí a já:

—Mé a ndaa sa saa yachi vi —cáhí a.

Já ná coo. Naha quíi ndó Jesús, xitoho nde.

<sup>21</sup> Ña cúni quéa ná caja cuahá Jesucristo, xitoho í ñamaní xihín ndihi ndó. Já ná coo.